

Alkitab
Bahasa Meyah
Edisi 1997-2013

Perjanjian Baru

Matius

1 ¹ Yesus Kristus bera onjuj jeska efen meimowa raja Daud jera meimowa Abraham tein. Noba Ofa efen meimowa enjineg onnga rua ribiedi bera erek kef oida,

² Abraham bera Ishak efen meka, Ishak efen efesa Yakub, Yakub efen efesa Yehuda jera efen mokoser enjineg tein,

³ Yehuda efen efesa Peres jera Zerah (Goga gegangosu ofoka Tamar). Peres efen efesa Hezron, Hezron efen efesa Ram,

⁴ Ram efen efesa Aminadab, Aminadab efen efesa Nahason,

⁵ Nahason efen efesa Salmon, Salmon efen efesa Boas. (Boas mosu efen ofoka Rahab). Boas efen efesa Obed. (Obed mosu efen ofoka Rut). Obed efen efesa Isai,

⁶ Isai efen efesa raja Daud. Oisouska raja Daud onjoros mona onnga rusnok ragei rusnok Israel noba rurka rua jah monuh Babel bera Yesus efen meimower erek kef oida, Raja Daud efen efesa Salomo (Salomo mosu bera Uria efen mohona sismeni. Beda Uria efen mohona eja erek Daud efen mohona.)

⁷ Salomo efen efesa Rehabeam, Rehabeam efen efesa Abia, Abia efen efesa Asa,

⁸ Asa efen efesa Yosafat, Yosafat efen efesa Yoram, Yoram efen efesa Uzia,

⁹ Uzia efen efesa Yotam Yotam efen efesa Ahas, Ahas efen efesa Hizkia,

¹⁰ Hizkia efen efesa Manasye, Manasye efen efesa Amon, Amon efen efesa Yosia

¹¹ Yosia efen efesa Yekhonya jera efen mokoser tein. (Koma gij mona onnga rusnok enjgineg ragei rua onnga Israel jah monuh Babel).

¹² Gij mona onnga rusnok Israel ruksons jeska Babel jah rerin monuh onjoros mona onnga Yesus onjuj jeska efen mosu bera Ofa efen meimowa erek kef oida, Yekhonya efen efesa Sealtiel, Sealtiel efen efesa Zerubabel,

¹³ Zerubabel efen efesa Abihud, Abihud efen efesa Elyakim, Elyakim efen efesa Azur,

¹⁴ Azur efen efesa Zadok, Zadok efen efesa Akhim, Akhim efen efesa Eliud,

¹⁵ Eliud efen efesa Eleazar, Eleazar efen efesa Matan, Matan efen efesa Yakub,

¹⁶ Yakub efen efesa Yusuf, noba Maria erek Yusuf efen mohona. Noba Maria bera onnga engker rot efen efesa Yesus. Yesus bera onnga rusnok rijeka erek Kristus onnga emen jeskaseda oskotu efen rusnok Israel jeska rerin mar onnga okum.

¹⁷ Jefeda rusnok ebic setka kungkob tohkuru bera onnga runjuj jeska Abraham onjoros Daud. Noba rusnok ebic setka kungkob tohkuru bera onnga runjuj jeska raja Daud onjoros mona onnga rusnok ragei rua onnga Israel jah monuh Babel. Noba rusnok ebic setka kungkob tohkuru bera onnga runjuj jeska rua onnga Israel gij mona onnga rua ruksons jah rerin monuh onjoros mona onnga Yesus onjuj jeska efen mosu.

¹⁸ Kef bera osok gij rot teinefa Yesus eja erek Maria efen efesa. Gij mona onnga Yesus onjuj jeska efen mosu enesi, beda efen mosu onnga ofoka Maria bera

erek Yusuf efen osroj onnga gomoskotuma gij mona kahma. Tina gij mona onnga goga gonomoskotuma enesi, beda Allah ocunc gu Maria rot oida, oisouska owesa efek jeska Efena Ebsi, bera ofa emesma odou okum rot efen efesa.

¹⁹Erek koma beda nou onnga Yusuf eg rot oida Maria efaga okum rot efesa fob, jefeda ofa osujohu rot oida goga gemekebema ojpgomu fogora gonomoskotuma guru. Tina Yusuf bera erek osnok egens onnga oufamofa, jefeda ofa osujohu rot oida gemekebema erek wuswus ojpgomu jeskaseda rusnok rufoukou rineg rot guru. Beda rusnok rinefesij Maria ofonoknoka rot guru.

²⁰Tina gij motu egens, askesi Yusuf ahca ros, beda ofa esih mar. Noba mar onnga ofa esih rot bera erek kef: Ofa ek malaikat egens onnga en jeska Allah. Noba malaikat egens koma agot gu ofa oida, "Yusuf, onnga onjuj jeska raja Daud, bua buskotu bebin busroj Maria ojpgomu. Binemeesa rot guru. Jeska Efena Ebsi Allah bera ojuj gij Maria odou efesi fogora efaga okum rot efen efesa kef.

²¹Ofa emeker rot efen efesa orna. Noba bua bijeka Ofa efen ofoka Yesus, jeska ofoka insa koma efen ofou oida, 'Ofa omoskotu efen rusnok jeska rerin mar onnga oska.' "

²²Mar insa koma nomnaga orogna jeni erek koma jeskaseda mar onnga Tuhan anggot gu efen nabi-nabi sis eteb fob bera emah gij efera fob. Mar onnga Allah anggot rot insa koma bera erek kef oida,

²³"Ojowu egens onnga efaga eneja erek egens jera orna egema tein enesi, ofa efen efaga bera omokum rot efen efesa. Beda ofa emeker rot efen efesa orna egens si. Noba rusnok rimejeka efen efesa ofoka

Immanuel. Ofoka egens koma efen ofou oida, 'Allah eneker jera mimif.' "

²⁴ Erek koma jefeda Yusuf oskotu Maria erek efen mohona jeni erek malaikat egens anggot rot gu ofa neeka fob. Beda Maria eja eker jera Yusuf gij efen mod.

²⁵ Tina gegan gefaga eneja erek egens enesi ojpgomuja onjoros Maria eker rot efen efesa orna egens koma fog. Beda Yusuf ejeka ofa efen ofoka Yesus.

2¹ Yesus onjuj jeska efen mosu Maria gij kota ofokai egens onnga ofoka Betlehem. Betlehem angh gij rusnok Yahudi rerin monuh Yudea. Noba gij mona insa koma, raja egens onnga efen ofoka Herodes bera ofoka ereij keingg rusnok Yahudi. Noba gij mona insa koma tein bera rua onnga Majus rija jah kota Yerusalem. Rua bera erek rusnok onnga rufokor eteb fogora rudou ebriyi gij mar onnga angh gu mebaga erek motur jera mesta. Rua rin yes jeska monuh onnga mowa orogna jeska.

² Nou onnga rua rinsaga gu kota Yerusalem beda rua ragot gu rusnok jah suma oida, "Memef mohca Yahudi efen raja efeinah egens onnga onjuj jeska efen mosu gij monuhif. Jeska memef mek Ofa efen motur egens gij monuh onnga mowa orogna jeska fob. Jefeda memef men jeskaseda mougif gu Ofa."

³ Nou onnga raja Herodes eg rot oida rua ruhca raja Yahudi efeinah, beda Ofa jera rusnok enjineg rufoukou gij kota Yerusalem rita rudou ejisei noba okum rot ojpgomu.

⁴ Jefeda raja Herodes ohoturu rusnok Yahudi rerin ebirfager imam-imam jera Guru-Guru agama tein.

Beda ofa ejeka gu rua oida, "Kristus onggga emen bera onjuj jeska mosu gij monuh sinefo?"

⁵ Beda rua ruroun oida, "Ofa ojuj jeska efen mosu gij kota Betlehem onggga angh gij monuh Yudea. Jeska nabi egens ongggu gij Mar Efeyi Ebsi sis fob oida,

⁶ 'Kota Betlehem onggga angh gij monuh Yudea, bua bera kota egens onggga ofokai ojomu, tina bebin bufoka bera aksa eteb morototuma jera kota eteb enjineg gij monuh Yudea. Jeska osnok egens onggga ofoka aksa omorogna jeska bua. Noba Ofa emeja okag rot Allah efen rusnok Israel erek gembala egens eja okag rot efen domba-domba.' "

⁷ Erek koma jefeda raja Herodes ohoturu rua onggga Majus insa koma erek wuswus. Beda ofa ejeka gu rua rot mona kenefo jera aras egaho onggga rua rik motur egens insa koma gij monuh onggga mowa orogna jeska.

⁸ Nou onggga koma oisa fob beda ofa obk rua jah kota Betlehem. Tina ofa agot gu rua sismeni fog oida, "Iwa ija noba yuhca oforokai egens koma. Noba gij mona onggga iwa ik Ofa fob, beda yuksons jah sif noba yagot gu didif rot jeskaseda didif tein dija jah suma noba dugif gu Ofa."

⁹ Erek koma jefeda rua rija jeska Yerusalem. Noba askesi rua ricira gu moroju ros beda rua rik motur egens insa koma jeska monuh onggga mowa orogna jeska deika. Beda rua rudou efaga ouka eteb rot. Erek koma beda motur egens koma eja okag rot rua. Jefeda rua ruroru motur koma onjoros motur koma ah skida monuh oforokai onggga Yesus engker gij.

¹⁰ (2:9)

¹¹ Beda rua ruiru gij mod egens noba rik oforokai orna egens insa koma jera efen mosu Maria. Beda rua ris rukeibi gu mebi noba rugif gu oforokai orna egens insa koma. Beda rua rurka rerin mareibra onnga efen efera osok eteb doska fogora rita mar insa koma gu oforokai egens koma erek mar onnga rurougif gu Ofa rot. Mar insa koma bera erek emas jera miniyi jeska mega kemenyan jera marfok efeyi onnga ofoka mur. Efeyi koma efen ensesa onnga eyejkita eteb.

¹² Nou onnga mar koma oisa fob beda rua risejah nou rija jeska. Tina gij mar onnga rua risih bera Allah ocunc gu rua oida runoksons skoita raja Herodes deika guru. Jefeda rua rija teisis jah risinsa rerin monuh ojgomu.

¹³ Nou onnga Majus insa koma rinja fob, beda gij mar onnga Yusuf esih deika bera malaikat egens jeska Allah agot gu ofa oida, "Bua bita oforokai Yesus koma jera efen mosu noba iwa yuku jah monuh Mesir. Noba iwa iker jah suma ojgomuja onjoros didif dagot mar gu bua deika. Jeska ai juens bera raja Herodes omohca oforokai egens koma jah sif jeskaseda agob Ofa."

¹⁴ Jefeda Yusuf osowu gij motu insa koma, beda ofa jera efen oforokai egens koma jera oforokai efen mosu rija jah monuh Mesir.

¹⁵ Beda rua riker gij monuh insa koma onjoros raja Herodes agos fob. Jefeda mar insa koma bera angh gij efera jeni erek Tuhan anggot rot oisouska nabi egens sis eteb fob. Jeska Ofa agot oida, "Didif dui gu dedin edesa jeskaseda ofa orogna jeska monuh Mesir."

¹⁶ Erek koma tina gij mona onnga Yusuf eja jah monuh Mesir erek efeinah ros, beda raja Herodes

ejginaga rot oida rua ongg Majus insa koma ruokrusa ofa fogora rua runoksons skoita ofa guru. Beda ofa otkonu eteb doska rot. Jefeda ofa obk efen rusnok jah kota Betlehem jera monuh ongg angh rejrej Betlehem jeskaseda ragob eferatefa jera ruforoker rurna nomnaga ongg enekirsa rerin ari mega ofoj egeka enesi. Rerin ari mega ofoj koma jeni erek ofa eg jeska rua ongg Majus ongg rin skoita ofa sis fob.

¹⁷ Jefeda mar ongg nabi Yeremia anggot rot sis fob bera angh gij efera fob. Ofa agot oida,

¹⁸ "Gij kota Rama ongg angh doida Yerusalem, bera rusnok rig osnok egens ongg ebisa. Rua rig osnok egens ebisa rot odou ongg ousaha eteb, noba ofa agerir mar ojgomuja tein. Ofa bera osnok Israel egens ongg ofoka Rahel ongg ebisa rot efen efeser. Rusnok rineya riker fogora rireibeyi rot ofa, tina guru. Ofa ebisa ojgomuja jeska efen efeser nomnaga ragos fob."

¹⁹ Erek koma noba gij mona ongg raja Herodes anggos fob beda Yusuf esih rot mar deika.

²⁰ Noba gij mar koma bera malaikat egens jeska Tuhan agot gu ofa oida, "Bua bidebecki noba buroun oforokai egens koma jera efen mosu noba bija jeska monuh Mesir. Bua bija sons gu monuh Israel. Jeska rua ongg rudou os ragob oforokai egens koma sis fob bera nomnaga ranggos fob."

²¹ Jefeda ofa edebecki noba oroun efen oforokai egens koma jera oforokai efen mosu, beda rua rija sons jah monuh Israel.

²² Tina Yusuf eg rot oida Arkelaus eferwei efen meka raja Herodes sons, noba ebeibeyaif ofa ofoka ereij keingg rusnok gij monuh Yudea. Beda ofa

emeesa eteb rot, jefeda ofa onodou os eja jah monuh koma guru. Tina gij mar onnga ofa esih deika beda malaikat agens jeska Tuhan eisisi joug ofa rot mar koma tein. Malaikat koma ocunc gu ofa jeskaseda eja gu monuh Galilea ojgomu.

²³ Beda ofa eja eker gij kota egens jah suma onnga ofoka Nazaret. Jefeda mar insa koma angh gij efera jeni erek nabi egens anggot rot sis fob. Nabi koma agot oida, "Rusnok rimejeka Ofa erek osnok egens onnga ojga jeska kota Nazaret."

3¹ Gij mona insa koma bera Yohanes onnga eita baptis gu rusnok en fogora oftufu mar gu rusnok gij monuh onnga mebi oska.

² Ofa oftufu mar erek kef oida, "Iwa imeesa joug rot yeyin mar onnga oska, jeska mona onnga Allah omofoka ereij keingg rusnok erek raja bera ensaga doida fob."

³ Yohanes bera osnok egens onnga nabi Yesaya anggot mar rot sis fob. Nabi egens koma anggot oida, "Osnok egens agerir mar gij monuh onnga mebi oska. Ofa agerir oida, 'Iwa isejah moroju egens nou Tuhan! Iwa itunggom moroju onnga edeider nou Ofa!' "

⁴ Yohanes efen meisoufa onnga ofa ontunggom jeska unta ofos ojgomu. Noba ofa era sapi ofos orotunggom erek marfeb nou erakid okum ofoj. Noba ofa et maat erek mof jera ej mosusu efei tein.

⁵ Rusnok rufoukou jeska kota Yerusalem ni, rejrej monuh Yudea ni, rejrej mei Yordan ni, bera rija skoita ofa jah suma.

⁶ Rua rimeesa joug rot rerin mar onnga oska, beda Yohanes eita baptis gu rua gij mei Yordan.

⁷ Tina gij mona onnga ofa ek rusnok Yahudi jeska ebic Farisi jera ebic Saduki rin skoita ofa jah suma, beda ofa agot gu rua oida, "Iwa bera ifogog eteb erek womfieda ofoukou ojgomu. Idu bera onnga eisisi keingg iwa jeskaseda isuwa isinsa jeska mar okum onnga ai juens emen jeska Allah erek komo!

⁸ Iwa itunggom mar onnga oufamofa ojgomu, beda koma omorocunc rot oida iwa imeesa joug rot yeyin mar onnga oska erek tenten fob ojgomu.

⁹ Iwa yanggot oida iwa injuj jeska yeyin imowa Abraham, jefeda Allah onofra mar okum keingg iwa guru. Tina erek Allah odou os rot beda adaij nou Ofa era mamu kef tein fogora orotunggom rusnok onnga runjuj jeska Abraham. Jefeda mar koma onnga iwa isujohu rot oida omosuwa iwa jeska mar okum onnga emen jeska Allah bera onofij iwa jinaga guru.

¹⁰ Erek osnok egens onnga ensejah nou of mega onnga efen efek jinaga guru, beda erek koma tein ai juens Allah omofra mar okum eteb keingg rusnok nomnaga onnga rineita mar onnga oufamofa gij rerin riteij ah kef guru. Beda erek osnok egens eij mega insa koma gij mah onnga et fogora eribseb, beda erek koma tein Allah emeij rusnok insa koma gij mahmei meren fogora riseiseifa ojgomuja.

¹¹ Didif dira mei direita baptis gu rusnok erek orocunc rot oida rua rimeesa joug rot rerin mar onnga oska fob. Tina Ofa onnga emen bera emeita baptis gu iwa oisouska Efena Ebsi Allah noba oisouska mah onnga otunggom mar erek eirirbi eteb. Ofa efen ofoka onnga aksa eteb ekirsa jeska didif. Noba disinsa dufoka aksa enadaij nou dugif gu mebi fogora dusuwa Ofa efen marfeb tumu sandal jeska okoda tein jinaga guru.

¹² Noba erek osnok egens agei menska jeskaseda eij gandum jeska mesera, beda erek koma tein Allah ensejah nou oga ojga rot rusnok rerin rita mar nomnaga fob. Noba erek osnok egens insa koma esah efen gandum onnga oufamofa gij efen mod efesi, beda erek koma tein Allah ensejah nou oroun efen rusnok onnga runtunggom mar onnga oufamofa jah mebaga. Noba erek osnok egens insa koma eij gandum efen oforu ejeres gij mah, beda erek koma tein Allah emei rusnok onnga runtunggom mar onnga oska gij mahmei meren onnga et rua rot mona onnga ah aibin ojgomuja."

¹³ Gij mona insa koma bera Yesus en jeska monuh Galilea beda ensaga gu mei Yordan efembra. Beda Ofa eja skoita Yohanes jeskaseda Yohanes eita baptis gu Ofa tein.

¹⁴ Tina Yohanes odou os erek koma guru, jefeda ofa agot gu Yesus oida, "Akeina, enadaij nou didif dita baptis gu Bua guru. Jeska bebin bufoka ekirsa jeska didif. Jefeda Bua bera onnga bita baptis gu didif ojgomu."

¹⁵ Beda Yesus oroun gu ofa oida, "Maraim, bua bita baptis gu Didif ojgomu jeskaseda nagef naita mar nomnaga jeni erek Allah odou os rot." Jefeda Yohanes oitij rot.

¹⁶ Nou onnga Yohanes eita baptis gu Yesus fob, beda Yesus orogna jeska mei. Ainsa koma tein Yesus ek mebaga ohoda. Beda Ofa ek Efena Ebsi Allah onjuj en jeska mebaga noba ah esij Ofa erek mem monggeta mos onnga onjuj noba eker esij Ofa.

¹⁷ Beda Ofa eg oga egens jeska mebaga onnga agot oida, "Ofa kef bera dedin edesa onnga dudou okora eteb rot. Noba Didif dudou eskeira eteb rot Ofa tein."

4¹ Nou onnga koma oisa fob, beda Efena Ebsi oroun Yesus jah monuh onnga mebi oska fogora Bilis ereni Yesus odou jah suma.

² Yesus enet maat gij mona rara setka tohkuru jinaga guru, jefeda mosona ongak Ofa eteb.

³ Beda Bilis en skoita Ofa noba ereneni Ofa erek kef oida, "Erek Bua bera Allah efen efesa rot tenten, beda butunggom mamu kef jeskasada eja erek roti ojomu."

⁴ Beda Yesus agot oida, "Runggu gij Mar Efeyi Ebsi oida, 'Maat ojomu bera eneita eiteij ah gu rusnok guru. Tina Allah efen oga nomnaga bera onnga eita eiteij ah gu rusnok.' "

⁵ Beda Bilis oroun Yesus jah kota Yerusalem, noba Ofa ot esij Allah efen mod onnga aksa eteb jah suma.

⁶ Beda Bilis agot oida, "Erek Bua bera Allah efen efesa rot tenten, beda busoka jeska mod aksa kef ojomu, jeska rungu gij Mar Efeyi Ebsi tein rot oida, 'Allah ombk efen malaikat-malaikat jeskasada ot joug Bua. Noba rua rimagei Bua jefeda bebin baki tein enecirej mamu jinaga guru.' "

⁷ Beda Yesus oroun oida, "Tina rungu gij Mar Efeyi Ebsi tein oida, 'Bua binereni bebin Tuhan Allah jinaga guru.' "

⁸ Beda Bilis oroun Yesus jah memaga ofos onnga aksa eteb noba ocunc rusnok rufoukou gij monuh nomnaga jera rerin ebirfager onnga ofoka aksa eteb tein gu Ofa.

⁹ Beda ofa agot gu Yesus oida, "Erek Bua bugif gu didif beda didif dimeita monuh insa kef nomnaga gu Bua si."

¹⁰ Beda Yesus agot oida, "Bilis, bua bija jeska Didif ojomu! Jeska rungu gij Mar Efeyi Ebsi rot oida,

'Rusnok rugif gu Allah ojgomu, noba rua tein rufij Ofa ojgomu.' "

¹¹ Erek koma beda Bilis eja jeska Yesus, noba Allah efen malaikat-malaikat en noba ofij Yesus.

¹² Nou onnga Yesus engg rot oida rusnok rikris Yohanes jah mod oskusk fob, beda Ofa eja jah monuh Galilea.

¹³ Ofa eneker gij kota Nazaret guru, tina Ofa ojogog rusnok gij kota Kapernaum onnga angh doida meren Galilea. Kota koma angh doida monuh Zebulon jera Naftali.

¹⁴ Ofa eja jah monuh insa koma, jefeda mar onnga nabi Yesaya onngu rot sis fob bera ah gij efera fob. Ofa onngu oida,

¹⁵ "Monuh Zebulon jera monuh Naftali onnga angh doida meren, noba onnga angh gu mei Yordan enama tein, monuh Galilea insa kef tein bera mebi onnga rusnok onnga Yahudi guru ringker gij.

¹⁶ Rua insa koma onnga ringker gij motkobah ros, rua bera rik eisa eteb fob. Rua ringker gij monuh motkobah erek monuh mar agos efen. Tina eisa eteb ejinten rua fob."

¹⁷ Osokeij mona insa koma bera Yesus oftufu gu rusnok rot oida, "Iwa imeesa joug rot yeyin mar onnga oska jeska mona onnga Allah omofoka ereij keingg rusnok bera ensaga doida fob."

¹⁸ Askesi Yesus encira gu meren Galilea efembra, beda Ofa ek gosnok egeka onnga gohca mos. Goga insa koma bera Simon (ongga ofoka Petrus tein) jera efen mokosa Andreas. Goga gera jala gorohca mos gij meren.

¹⁹ Beda Yesus agot gu goga oida, "Goga gororu Didif ojgomu, beda Didif dumoftuftu gu goga jeskaseda goga gohoturu rusnok si."

²⁰ Ainsa koma tein goga gaha gegang jala jah noba gororu Yesus.

²¹ Yesus ecira deika beda ofa ek gosnok egeka deika. Goga bera Zebedeus efen efeserga onnga gofoka Yakobus jera Yohanes. Goga gengker gij meg jera gegang geke Zebedeus. Rua rinsejah rerin jala jeskaseda ruhca mos. Beda Yesus ois mar gu goga jeskaseda gororu Ofa tein.

²² Jefeda ainsa koma tein goga gaha gegang jala jah noba goga geja jeska gegang geke beda gororu Yesus.

²³ Yesus ecira rejrej monuh Galilea. Beda jah suma bera Ofa oftuftu mar gu rusnok gij mod onnga rua rum riteij gu Allah gij. Ofa efesij rot Allah efen oga onnga oufamofa osok gij rot teinefa Ofa ofoka ereij keingg rusnok tein. Noba Ofa eita eskeira gu rusnok rot mar nomnaga onnga orotunggom rua erek marenir tein.

²⁴ Rusnok riflesij mar moguma osok gij Yesus rejrej monuh eteb onnga ofoka Siria ojgomuja. Jefeda rusnok rurka rusnok enjgineg onnga marenir skoita Yesus. Rusnok onnga marenir insa koma bera erek rua onnga maira et rufos ni, rifaga okora ni, raki oskukwok ni, raki emageima jera rusnok onnga efena ofogog oira gij rudou efesi fob tein. Beda Yesus eita eskeira gu rua nomnaga.

²⁵ Rusnok riskemba doska ruroru Ofa gij mona insa koma. Rua bera erek rusnok jeska monuh Galilea ni, jeska kota Setka ni, jeska kota Yerusalem ni, jeska monuh Yudea ni, jeska monuh onnga angh gu mei Yordan enama tein ni nomnaga.

5¹ Erek koma beda nou onnga Yesus ek rusnok riskemba insa koma fob, beda Ofa osok memaga ofog oduma beda eker jera rua jah suma. Ofa efen ruforoker rumohoturuma jera Ofa jah suma.

² Beda Ofa oftufu mar gu rua.

³ Yesus agot gu efen ruforoker oida, "Oufamofa eteb nou rusnok onnga ruin keingg rudou efesi noba ruisum gij Allah ojgomu, jeska rua rumoira jera rusnok onnga Allah ofoka ereij keingg si.

⁴ Oufamofa eteb nou rusnok onnga ribisa rot mar, jeska Allah omofij rua rot mar koma si.

⁵ Oufamofa eteb nou rusnok onnga runofra risinsa rufoka erek aksa guru. Jeska Allah onofra mar okum keingg rua guru.

⁶ Oufamofa eteb nou rusnok onnga rug rudou nou jeskaseda rita mar onnga ongnoskamoka ahah Allah eiteij ojgomu, jeska Ofa emeita mar onnga oufamofa gu rua si.

⁷ Oufamofa eteb nou rusnok onnga rucunc rudou onnga eskeira eteb skoita rusnok enjgineg, jeska Allah omocunc odou onnga eskeira eteb skoita rua tein si.

⁸ Oufamofa eteb nou rusnok onnga rita mar rot rudou onnga ebsi komowa. Jeska rua rimeita rudou erek egens jera Allah si.

⁹ Oufamofa eteb nou rusnok onnga rita mar onnga orotunggom rusnok enjgineg erek eskeira moguma. Jeska Allah emejeka rua erek efen efeser si.

¹⁰ Oufamofa eteb nou rusnok onnga risma rifeira okora jeska rusnok enjgineg. Jeska erek rua rururu jeni Allah oga ojgomuja, beda rua rumoira jera rusnok onnga Allah ofoka ereij keingg si.

¹¹ Oufamofa eteb nou iwa gij mona onggara rusnok enjgineg ruhurmei mar skoita iwa ni, rita mar okum skoita iwa ni, rucuwei mar rot iwa ni, jeska iwa iroru Didif fob.

¹² Iwa ita idou onggara eskeira noba onggara erirei eteb rot ojomu, jeska Allah ensejah nou eita yeyin ifons onggara onggoska eteb gu iwa gu mebaga si. Iwa imek mar onggara oska insa koma, jeska sis fob rusnok runtunggom mar onggara oska erek insa koma skoita Allah efen nabi-nabi tein."

¹³ Erek koma beda Yesus agot oida, "Iwa bera erek maroforu mos. Maroforu mos bera oufa nou mar ofoukou onggara mimif mireska. Tina erek maroforu mos insa koma onotka deika guru, beda mimif maha mar koma jah ojomu, noba minereska mar deika guru fob. Beda erek koma tein rot yeyin ita mar onggara oufa era mar onggara oska.

¹⁴ Iwa bera erek lampu onggara eisa nou rusnok mebif. Noba enadaij nou rusnok ridemdem lampu ofoukou jeska kota egens onggara angh gij memaga ofog oduma onggara eisa eteb jinaga guru.

¹⁵ Noba rusnok rines mah gij lampu fogora ridemi lampu eisa insa koma gu debeji meiskoh guru. Tina rua raha lampu eisa insa koma jah skida ojomu jeskaseda ejinten rusnok nomnaga gij mod efesi.

¹⁶ Jefeda erek koma tein, iwa ita mar onggara oufamofa onggara erek eisa nou rusnok enjgineg. Beda rua rimek yeyin ita mar onggara oufamofa insa koma fogora ruis oufamofa eteb gu Allah onggara angh gu mebaga rot si."

¹⁷ Beda Yesus agot deika oida, "Enadaij nou iwa isujohu rot oida Didif din jeskaseda dusuna rot hukum Musa jera mar onggara nabi-nabi ranggot rot

sis fob guru. Jeska Didif dinen jeskaseda dusuna rot mar insa koma guru. Tina Didif din jeskaseda mar onnga rua rimfesij rot bera ah gij efera fob gu mona insa kef tein ojgomu.

¹⁸ Onnga tenten bera mar erek ai ofokai tein jeska hukum Musa eneseiseifa jinaga guru. Tina hukum insa koma nomnaga emah ojgomuja onjoros hukum koma angh gij efera rot onngas fob. Hukum insa koma bera enah ojgomuja onjoros mebif jera mebaga tein enjeseiseifa fob.

¹⁹ Jefeda, osnok egens onnga ekirsa rot hukum Musa efen mar ai ofokai tein, noba ofa oftufu gu rusnok enjgineg jeskaseda ruroru rerin mar onnga oska insa koma tein, beda Allah omoin keingg efen ofoka si. Jefeda gu mebaga bera efen ofoka onofoufem jinaga guru. Tina osnok egens onnga ororu hukum insa koma rot tenten, noba ofa oftufu rot hukum insa koma gu rusnok enjgineg tein, beda ofa emesma ofoka onnga aksa eteb gu mebaga si. Allah omotunggom mar koma gu rua gij mona onnga Ofa ofoka ereij keingg rusnok si.

²⁰ Iwa idou ah keingg rot kef oida, iwa itunggom mar onnga Allah ondou os rot oisouska idou onnga ororu Ofa rot tenten fob ojgomu. Jeska erek iwa ita mar morototuma erek Guru-Guru agama jera rua onnga ebic Farisi rita mar onnga erek oska, beda iwa inoira jera rusnok onnga Allah ofoka ereij keingg tein guru."

²¹ Beda Yesus agot deika oida, "Sis fob yeyin imower ruftufu oida, 'Iwa inagob rusnok enjgineg guru. Erek osnok egens agob rusnok enjgineg, beda ofa emesma mar okum rot mar insa koma si.'

²² Erek koma tina ebeibeyaif Didif dagot oida, rusnok onnga rutkonu oska rot rerin ruhujir, rua bera rimesma okum rot koma tein si. Noba erek rusnok rijeka rerin ruhujir erek mar onnga oska efekeifa ojgomu, beda Allah emei j rua gij mahmei meren rot ojgomu.

²³ Jefeda gij mona onnga iwa ita mar onnga irougif gu Allah rot, tina iwa idou ah keingg rot oida yeyin ihuj egens onnga odou okum rot mar onnga iwa intunggom sis fob ros,

²⁴ beda yaha mar insa koma onnga irougif gu Allah rot ai juens fog ojgomu. Beda iwa ifesij mar jera yeyin ihuj egens insa koma jeskaseda ofa eita odou onnga eskeira sons rot iwa fob. Nou onnga koma oisa fob, beda yuksons noba ita mar onnga irougif gu Allah insa koma deika ojgomu.

²⁵ Noba erek osnok egens agot rot oida ofa emekris iwa skoita hakim, beda iwa ifesij mar jera ofa jeskaseda efen mar okowu insa koma oisa fob. Tina guru, beda ofa emekris iwa skoita Hakim. Beda Hakim koma omocunc iwa erek oska rot fogora tentarer rimaha iwa gij mod oskusk si.

²⁶ Beda onnga tenten bera iwa imah gij mod oskusk ojgomuja onjoros mar okowu insa koma nomnaga onnga angh gu iwa omoisa fob."

²⁷ Beda Yesus agot oida, "Sis fob iwa ig rusnok ruftuflu rot mar erek kef oida, 'Iwa inesiri jera egema efen mohona guru.'

²⁸ Erek koma tina ebeibeyaif Didif dagot gu iwa oida, erek osnok egens ek egema efen mohona, noba ofa osujohu gij efen odou efesi oida ofa odou os esiri morototuma jera ojaga insa koma, beda koma tein bera oska. Jeska ahah Allah eiteij bera koma

morototuma erek ofa ensiri jera ojaga egens insa koma fob.

²⁹Jefeda erek iwa ik mar gu iteij onggga oroku idou efesi jeska ita mar onggga oska, beda isuna rot mar insa koma jeska idou efesi ojgomu jeskaseda inotunggom mar onggga oska koma guru. Koma erek osnok egens onggga oku efen eiteij jeska jeskaseda enek mar insa koma guru. Beda Allah eneij ofa gij mahmei meren guru.

³⁰Erek koma tein, erek mar oroku odou efesi jeskaseda ira yeyin itma irotunggom mar onggga oska, beda isuna rot mar insa koma jeska idou efesi ojgomu. Koma erek osnok egens onggga eris efen etma jeskaseda ofa ineita mar onggga oska insa koma guru. Beda Allah eneij iwa gij mahmei meren guru."

³¹Beda Yesus agot deika oida, "Sis fob rusnok ruftuftu rot oida erek orna egens odou os ebes efen mohona, beda orna egens koma ogu gij surat egens oida ofa ebes efen mohona fob. Beda ofa eita surat koma gu efen mohona insa koma, beda gemekebema ojgomuja.

³²Erek koma tina ebeibeyaif Didif dagot gu iwa oida, erek orna egens efen mohona onggga esiri jera orna egens enjgineg fob, beda adaij nou ofa ebes efen mohona insa koma ojgomu. Tina erek efen mohona enesiri jera orna enjgineg guru, beda enadaij nou ofa ebes efen mohona jinaga guru. Jeska erek ofa ebes efen mohona erek rourou ojgomu, noba mohona ah igers enjgineg deika, beda efen mohona efaga emeja erek egens jera efen mahina onggga efeinah. Tina ahah Allah eiteij bera koma erek goga gesiri morototuma ojgomu. Noba Allah omocunc ojaga insa koma efen mahina onggga sismeni erek oska ekirsa

rot tein. Jeska ofa bera onnga ebes efen mohona insa koma erek rourou ojgomu."

³³ Beda Yesus agot oida, "Sis fob iwa ig rusnok ruftuftu rot oida rusnok rita mar onnga rua ranggen rot jah Tuhan odou ojgomu, noba rineferwei rot mar insa koma guru.

³⁴ Erek koma tina ebeibeyaif Didif dagot gu iwa oida, gij mona onnga iwa yagen rot mar, beda inagot rot mar koma oisouska Allah ofoka era oisouska mar enjgineg tein efen ofoka jinaga guru. Iwa inagen rot mar oisouska mebaga guru, jeska Allah bera engker gij efen kursi jah suma fogora ofoka ereij keingg rusnok.

³⁵ Noba inagen rot mar oisouska mebif ofoka tein guru, jeska Allah aha aki esij mebif. Noba inagen rot mar oisouska Yerusalem ofoka tein guru, jeska Allah bera onnga ofoka ereij keingg kota koma onnga efen ofoka aksa tein ojgomu.

³⁶ Noba inagen rot mar oisouska isinsa yeyin ibirfaga tein guru. Jeska Allah esinsiyai bera efen owesa efek rot yeyin ibirfaga jera ifaga nomnaga tein. Yeyin owesa efek jeskaseda iferwei ibirfeji tein jeskaseda efen efeb titnetna eja erek toga bera enah jinaga guru.

³⁷ Gij mona onnga iwa yagen rot mar, beda iwa yagot oida, 'Tenten, dimeita si', era yagot oida, 'Guru, dineita guru,' erek koma ojgomu. Jeska erek iwa yagen rot mar oisouska mar enjgineg efen owesa efek beda koma bera onnga Bilis odou os rot ojgomu. Ofa bera onnga ofogog eteb."

³⁸ Erek koma beda Yesus agot oida, "Sis fob rusnok ruftuftu oida erek iwa itunggom mar skoita osnok egens fogora efen eiteij egens eseseifa, beda adaij

nou ofa esesa mar sons skoita iwa jeskaseda yeyin iteij egens eseseifa tein. Noba erek iwa itunggom mar skoita osnok egens onnga orotunggom ofa fogora efen ofon egens onnga eseseifa, beda adaij nou ofa esesa mar sons skoita iwa fogora iwa tein yeyin ifon egens eseseifa ojgomu.

³⁹Erek koma, tina ebeibeyaif Didif dagot gu iwa oida, enadaij nou iwa isesa mar sons skoita rusnok onnga rutunggom mar onnga oska skoita iwa jinaga guru. Erek osnok egens eseda yumnu, beda inocunc idou onnga ofogog sons skoita rua rot tein guru.

⁴⁰Noba erek rusnok rikris iwa jah hakim jeskaseda rua rita yeyin meisoufa jeska iwa, beda inocunc idou onnga ofogog sons skoita rua guru. Tina icunc idou onnga oufamofa fogora ita yeyin meisoufa egema tein onnga efen efera osok ekirsa gu rua ojgomu.

⁴¹Noba erek osnok ebirfaga egens eradgodu iwa jeskaseda yurka efen mareibra erek kilometer egens, beda iwa icunc idou onnga oufamofa rot fogora yurka efen mareibra insa koma erek kilometer egeka ojgomu.

⁴²Gij mona onnga rusnok rirejgei gu iwa rot mar, beda iwa ita mar insa koma gu rua ojgomu. Noba gij mona onnga rusnok rudou os rira yeyin mar nou mona juens, noba edaga sons, beda yuitij rot ojgomu."

⁴³Erek koma beda Yesus agot deika oida, "Sis fob rusnok ruftuftu rot oida iwa ita idou onnga okora rot yeyin ihujir noba ita idou onnga oska skoita rusnok onnga rudou oska rot iwa.

⁴⁴Tina ebeibeyaif Didif dagot gu iwa rot oida, iwa ita idou onnga okora rot rusnok onnga rudou oska rot iwa ojgomu. Noba yum iteij gu Allah nou rusnok

ongga rita mar onggga oska skoita iwa tein ojgomu. Jeska Allah ofij rusnok onggga rufogog jera rusnok onggga oufamofa tein rot mowa onggga ejinten rua, jera mos onggga es nou rua tein ojgomuja.

⁴⁵ Jeska erek iwa yum iteij nou rua, beda koma bera onggga orocunc rot oida iwa ita mar erek yeyin Ika onggga eker gu mebaga.

⁴⁶ Noba erek iwa ita idou onggga okora rot rusnok onggga rudou okora rot iwa tein, beda koma erek mar onggga giskini ojgomu. Rusnok onggga ruhoturu pajak jeska iwa nou raja Kaisar bera rita mar erek koma tein ojgomu. Jefeda Allah eneita ifons onggga erek ekirsa rot mar insa koma ojgomu guru.

⁴⁷ Noba erek iwa icunc idou onggga oufamofa skoita yeyin ihujir ojgomu, beda koma tein bera erek mar onggga giskini ojgomu. Rusnok onggga rinejginaga rot Allah guru bera rita mar erek koma tein ojgomu.

⁴⁸ Iwa ita mar onggga oufamofa skoita rusnok nomnaga rot idou onggkas morototuma erek yeyin Ika onggga eker gu mebaga otunggom tein ojgomu."

6¹ Erek koma beda Beda Yesus deika oida, "Gij mona onggga iwa itunggom mar onggga oufamofa nou rusnok enjgineg ororu Allah efen oga, beda enadaij nou iwa itunggom mar insa koma rot tomnomna jeskaseda rusnok rufoukou rik iwa rot guru. Jeska erek iwa itunggom mar insa koma rot tomnomna fogora rusnok risitit gu iwa rot, beda mar onggga rua risitit gu iwa bera erek yeyin ifons rot. Jeska Allah eneita ifons rot mar insa koma guru.

² Jefeda gij mona onggga iwa ikeba yeyin mareibra egema gu rusnok onggga rufojingki, beda ineita mar insa koma jeskaseda rusnok rufoukou rik iwa rot guru. Rusnok enjgineg rutunggom mar erek koma

jah rusnok rudou gij mod onggua rua rugif gu Allah gij. Noba rua rutunggom mar erek koma rot tomnomna gu moroju tein jeskasada rusnok rufoukou rimek rua rot. Tina rua rudou os jeskasada rusnok rucunc rua erek rusnok onggua rudou ebsi komowa ojgomu. Erek koma tina gij rudou efesi bera rua ruhca rufoka aksa ojgomu. Jefeda gij mona onggua rusnok rufra rerin rufoka erek aksa rot, beda koma bera erek rerin rufons. Jeska Allah eneita rufons skoita rua rot jinaga guru.

³Erek koma tina, gij mona onggua iwa ikeba yeyin mareibra egema nou rusnok onggua rufojingki, beda ineita mar koma rot tomnomna jah rusnok enjgineg rudou guru.

⁴Tina ita mar insa koma erek wuswus jeskasada yeyin ihujir tein rinejginaga rot guru. Beda yeyin Ika onggua eker gu mebaga ojgomu bera emek iwa yufij rusnok onggua rufojingki insa koma si. Beda Ofa emeita yeyin ifons onggua ongnoska eteb gu iwa rot si."

⁵Erek koma beda Yesus agot agot, "Gij mona onggua iwa yum iteij gu Allah, beda ineita mar koma erek rusnok enjgineg rita guru. Jeska rua rudou os rut gu rusnok rifelesa gij mod Allah efesi jeskasada rusnok rufoukou rimek rua rum riteij gu Allah ojgomu. Noba rua rum riteij jah rusnok rufoukou rudou gu moroju jeskasada rusnok rimek rua tein. Rua rita mar erek koma jeska, gij rudou efesi bera rua rusujohu rot oida rusnok enjgineg rimesitit rerin rufoka rot ojgomu. Tina rua rudou os rita rufoka onggua aksa ojgomu. Jefeda mar onggua rusnok risitit gu rua rot bera erek rerin rufons ojgomu. Jeska Allah eneita rufons gu rua rot jinaga guru.

⁶Tina gij mona onnga iwa yum iteij gu Allah, beda ijeker gu isinsa gij mer efesi noba yum iteij gu Allah jah suma ojgomu. Jeska mimif minek Allah gu miteij guru. Tina Ofa emek mar onnga iwa intunggom gu isinsa erek insa koma fob. Jefeda Ofa emeita yeyin ifons onnga ongnoska rot si.

⁷Noba gij mona onnga iwa yum iteij gu Allah, beda inagot mar rot dektek noba onnga erek efen ofou rourou ojgomuja tein guru. Jeska rusnok onnga rinejginaga rot Allah guru bera rutunggom mar erek koma gij mona onnga rua rugif gu rerin mar onnga oska ojgomu. Rua rusujohu rot oida mar insa koma onnga rua rugif gu bera emeg ruga, jeska rua rum riteij erek dektek ojgomuja, tina guru.

⁸Jefeda iwa inom iteij erek rua insa koma guru. Jeska gij mona onnga iwa om iteij gu Allah enesi, beda Ofa ejginaga rot mar onnga iwa icosu rot fob.

⁹Jefeda iwa yum iteij gu Allah erek kef oida, 'Mefmen meka onnga eker gu mebaga, Memef modou os jeskaseda rusnok nomnaga rufra bebin bufoka onnga ebsi komowa erek aksa.

¹⁰Memef mois gu Bua jeskaseda bufoka ereij keingg bebin rusnok gu mebif. Noba rusnok rugif gu bebin bufoka gu mebif morototuma erek rua rugif gu bebin bufoka gu mebaga tein.

¹¹Memef mois gu Bua jeskaseda Bua bita mar onnga memef mocosu rot erek orofosut mona tein.

¹²Busuna mefmen mar onnga oska jeska modou efesi morototuma erek memef mosuna rot mar onnga oska onnga rusnok enjgineg runtunggom skoita memef fob.

¹³ But joug memef jeska mar okum ongga ereneni memef. Noba buskotu memef jeska Bilis ongga ofogog doska tein.'

¹⁴ Erek iwa isuna rot mar ongga oska ongga rusnok enjgineg runtunggom gu iwa fob, beda yeyin Ika ongga eker gu mebaga bera omosuna rot iwa yeyin mar ongga oska tein si.

¹⁵ Tina erek iwa inosuna rot mar ongga oska ongga rusnok enjgineg runtunggom skoita iwa guru, beda Allah onosuna rot iwa yeyin mar ongga oska tein guru."

¹⁶ Beda Yesus agot deika oida, "Gij mona juens ongga iwa inet maat guru jeskaseda yum iteij gu Allah ojgomu, beda iwa ineita mar insa koma erek rusnok enjgineg ongga rita mar koma guru. Jeska kij mona juens ongga rua rinet maat guru, beda rusum erek oskusk ni, rua runot rusum ni, noba rua rutunggom mar enjgineg tein ongga orocunc gu rusnok rot oida rua rifeira okora rot ojgomu. Jeska kij rudou efesi bera rua rusujohu rot oida rusnok enjgineg rimesitit rerin rufoka rot ojgomu. Tina ongga tenten bera mar ongga rusnok risitit gu rua insa koma bera erek rerin rufons rot ojgomu. Jeska Allah eneita rufons skoita rua rot jinaga guru.

¹⁷ Jefeda kij mona ongga iwa inet maat guru jeskaseda yum iteij gu Allah, beda yut isum noba yah ibirfaga efeji tein erek giskini ojgomu.

¹⁸ Ita mar erek koma jeskaseda rusnok enjgineg rinejginaga rot oida iwa inet maat kij mona insa koma guru. Beda yeyin Ika ojgomu bera ejginaga rot oida iwa inet maat kij mona insa koma guru. Ofa emek rot mar ongga iwa intunggom gu isinsa ojgomu, fogora Ofa emeita yeyin ifons ongga ongoska eteb si."

¹⁹ Ere koma beda Yesus agot deika oida, "Iwa inereni rot ahais ojgomuja jeskaseda ihoturu mareibra ofoukou gu mebif guru. Jeska gu mebif bera magjir et mareibra insa koma noba motetesi et mareibra koma fogora oska ojgomu. Noba rusnok onnga rukoreka mar bera ruiru gij yeyin mod noba rurka mareibra insa koma jeska tein.

²⁰ Onnga oufamofa bera iwa ihoturu yeyin mareibra ofoukou gu mebaga ojgomu. Jeska jah suma bera magjir enet guru, noba motetesi enet guru jefeda onoska guru, noba rusnok runoukoreka mar jah suma guru.

²¹ Jeska rusnok onnga ruhoturu mareibra ofoukou gu mebif bera rusujohu rot mar onnga mebif efen ojgomuja. Tina rusnok onnga ruhoturu mareibra gu mebaga bera rusujohu rot mar onnga mebaga efen ojgomuja."

²² Beda Yesus agot deika oida, "Rusnok riteij bera erek lampu onnga eisa nou rerin rudou efesi. Ere yeyin iteij ik mar rot koisoisa beda idou ebriyi gij mar rot koisoisa tein.

²³ Tina erek yeyin iteij inek mar rot koisoisa guru, beda idou enebriyi gij mar tein guru. Beda iwa iker gij motkobah ros. Jefeda rusnok onnga rudou enebriyi gij mar rot koisoisa guru, noba ringker gij motkobah ros, rua bera rimesma mar okum eteb si."

²⁴ Ere koma beda Yesus agot deika oida, "Enadaj nou rusnok rugif gu ebirfaga egeka guru. Jeska giskini rua rudou okora rot rerin ebirfaga onnga egens, tina rudou oska rot ebirfaga onnga egeka insa koma ojgomu. Noba rua rumofij rerin ebirfaga onnga egens rot iskusk, tina rua rudou eskes rot ebirfaga onnga egeka koma ojgomu. Ere koma tein, enadaj

nou rusnok rireni rot ahais jeskaseda rufij Allah noba rireni rot ahais jeskaseda ruhoturu fifi era mareibra ofoukou tein jinaga guru.

²⁵ Erek koma jefeda, Didif dudou os dagot gu iwa rot oida enadaij nou iwa ijekjeka idou efesi rot maat onnga imet era mei onnga imej jeskaseda ifena ebah ojgomuja guru. Noba iwa inejekjeka idou efesi rot meisoufa onnga imergi tein guru. Jeska mar enjgineg gij yeyin iteij ah kef bera ofoufem ekirsa jeska maat onnga imet. Noba mar enjgineg nou yeyin ifaga bera ofoufem ekirsa jeska meisoufa onnga imergi tein.

²⁶ Iwa isujohu rot mem onnga ofu gu mebaga. Mem koma rinerefa maat gij mekeni guru. Noba mem koma runohoturu maat gij rerin mod tein guru. Tina yeyin Ika onnga eker gu mebaga bera ot joug rua ojgomuja. Jefeda mem koma rit maat orofosut mona. Noba ahah Allah eiteij bera iwa yufoufem ekirsa jeska mem insa koma ojgomu.

²⁷ Noba erek iwa ijekjeka idou efesi rot mar insa koma ojgomuja, beda koma onofij iwa jeskaseda ifena ebah rot mona onnga ekirsa deika jinaga guru.

²⁸ Jefeda teinefa fogora iwa ijekjeka idou efesi rot meisoufa onnga imergi. Iwa isujohu rot marfok onnga ah gu mekta ojgomu. Marfok insa koma enefarur gij mar guru. Noba marfok koma eneb meisoufa nou esinsa guru.

²⁹ Sis fob, raja Salomo bera efen mareibra ofoukou doska. Noba ofa efen meisoufa onnga erek ongoska eteb tein. Tina marfok insa koma bera ongoska eteb ekirsa jeska raja Salomo efen meisoufa insa koma ojgomu.

³⁰ Allah bera onnga ot joug mosodum onnga ah gu mekta tein. Noba mosodum insa koma bera ah gij

mona onggga estir ojgomu. Beda rusnok ris mah gij mosodum koma fogora eseiseifa. Jefeda Ofa omot joug iwa erek ahais ekirsa ojgomu. Tina iwa idou onororu mar insa koma rot tenten enesi.

³¹ Erek koma jefeda iwa inejekjeka idou efesi rot maat onggga imet era mei onggga imej era meisoufa onggga imergi guru.

³² Rusnok onggga rinejginaga rot Allah guru bera rijekjeka rudou efesi rot mar insa koma ojgomuja. Noba yeyin Ika gu mebaga bera ejginaga rot mar onggga iwa icosu rot fob.

³³ Tina onggga ofoufem ekirsa nou iwa bera, iwa yuh idou efesi skoita Allah onggga ofoka ereij keingg rusnok. Noba ireni rot ahais jeskasada iwa ita mar jeni erek Allah odou os rot ojgomu. Beda Ofa omofij iwa rot maat jera mei jera meisoufa insa koma nomnaga onggga iwa icosu rot si.

³⁴ Jefeda iwa inejekjeka idou efesi rot mar onggga iwa imocosu rot gij mona kahma tein guru. Jeska mar enjgineg onggga ah gij mona kahma bera emereni iwa rot gij mona insa koma tein si. Adaij nou iwa isujohu rot mar onggga mona efeinah orka fob ojgomu."

7 ¹ Beda Yesus agot deika oida, "Iwa inocunc rusnok enjgineg erek oska guru, jeska Allah omocunc iwa tein erek oska rot.

² Allah omocunc iwa erek oska jeni erek iwa icunc rusnok enjgineg erek oska tein si. Noba Ofa omofra mar okum keingg iwa morototuma erek iwa yufra mar okum keingg rusnok enjgineg si.

³ Iwa ineita mar erek rusnok onggga rucunc rot ruhujir rerin mar onggga oska ojgomuja guru. Jeska koma erek osnok egens onggga ocunc mar ofosis onggga ah gij efen mohujir riteij, tina ofa esinsa

enejginaga rot oida mega eteb bera ah joug gij esinsa eiteij erek koma guri.

⁴Enadajj nou ofa agot gu efen mohujir oida, 'Didif dita mar ofosis jeska biteij,' erek koma guru. Jeska ofa esinsa efen mega eteb onnga ocohun efen eiteij ros.

⁵Osnok egens onnga ocunc rot mohujir rerin mar onnga oska erek insa koma bera odou osumsumu ojgomu! Onnga tenten bera, ofa eita mega eteb jeska esinsa eiteij sismeni fog. Beda ofa emek rot koisoisa fogora emejginaga rot teinefa ofa emeita mar ofosis jeska efen mohujir riteij tein si. Jefeda iwa ineita mar erek osnok egens koma onnga ocunc rot efen mohujir rerin mar onnga oska ojgomuja guru.

⁶Noba iwa inefesij rot mar onnga ebsi komowa eteb jeska Allah skoita rusnok onnga ruga oruh rot mar insa koma guru. Jeska koma erek osnok egens onnga eij efen mar onnga eirirbi noba ongnoska eteb skoita mes era skoita mek ojgomu. Beda mes insa koma ekikif noba eska ofa ojgomu. Noba mek insa koma bera omot keingg efen mar onnga eirirbi insa koma gij mohtefa ojgomu."

⁷Erek koma beda Yesus agot deika oida, "Erek iwa irejgei gu Allah rot mar, beda iwa imesma mar insa koma si. Noba erek iwa yuhca mar, beda iwa imek mar insa koma si. Noba erek iwa ingkingk montoj, beda Allah omohoda montoj koma jeska iwa si.

⁸Jeska rusnok nomnaga onnga rirejgei gu Ofa rot mar bera rimesma mar insa koma si. Noba rusnok nomnaga onnga ruhca mar, beda rua rimek mar insa koma si. Noba rusnok nomnaga onnga ringkingk montoj, beda Allah omohoda montoj insa koma jeska rua si.

⁹ Iwa onnga yeyin iser bera onnga idou okora rot rua erek tenten fob. Jeska gij mona onnga rua rirejgei iwa nou maat jeskaseda rit, beda erek giskini bera iwa ita maat gu rua ojgomu fob. Iwa ineita mar onnga oska gu rua erek mamu era magosu gij mona insa koma guru, jeska idou okora rot rua.

¹⁰ (7:9)

¹¹ Erek koma jefeda erek rika onnga mebif efen rita mar onnga oufamofa gu rerin riser fob, beda teinefa ekirsa rot yeyin Ika onnga eker gu mebaga. Jeska Ofa emeita mar onnga ongnoska eteb ekirsa jeska mar onnga iwa irejgei gu Ofa rot fob si.

¹² Noba erek iwa idou os jeskaseda rusnok enjgineg rita mar onnga oufamofa skoita iwa, beda iwa tein ita mar onnga oufamofa skoita rua rot sismeni fog ojgomu. Jeska koma bera jeni erek hukum Musa jera mar onnga nabi-nabi rumftuftu rot sis fob."

¹³ Beda Yesus agot deika oida, "Erek iwa idou os isma eiteij ah onnga efeinah beda yuira montoj onnga erek emeima ojgomu. Jeska montoj onnga erek efefi bera nou rusnok onnga rimeja gij mahmei meren ojgomu. Noba moroju onnga rua rimecira gij jah montoj insa koma bera erek efefi tein. Jefeda rusnok rufoukou rimecira gij moroju insa koma fogora rimeja jah mahmei meren si.

¹⁴ Tina montoj onnga rusnok rumoira gij jeskaseda risma eiteij ah onnga efeinah bera erek emeima ojgomu. Noba moroju onnga rimecira gij jah montoj insa koma bera erek emeima tein. Noba rusnok erek oskiyai ojgomu bera ricira gij moroju insa koma fogora risma eiteij ah onnga efeinah."

¹⁵ Beda Yesus agot deika oida, "Iwa tein yut joug idou efesi rot Guru agama onnga ebireira. Jeska rua

rin skoita rusnok rot rudou onggga eriaga erek domba egens onggga eriaga. Tina gij rudou efesi bera rua rusujohu rot mar onggga erek ofogog eteb ojomu erek serigala onggga ofogog tein.

¹⁶ Mar onggga oska onggga rua rutunggom bera omorocunc gu iwa rot rerin rudou onggga ofogog insa koma si. Koma erek moworug tein. Jeska rusnok rinek moworug onggga efen efek onggga oufamofa erek anggur tein guru.

¹⁷ Mega onggga oufa bera efen efek onggga oufa, noba mega onggga oska bera efen efek onggga oska tein.

¹⁸ Erek koma tein, mega egens onggga onggoska bera efen efek onggga oska guru. Noba mega egens onggga ener rot onggoska guru bera efen efek onggga erek oufamofa jinaga guru.

¹⁹ Noba erek mega egens onggga enefek jinaga guru bera rusnok ruf mega insa koma beda rij gij mah ojomu.

²⁰ Jefeda erek koma tein, iwa imejginaga rot Guru-Guru onggga ebireira oisouska rerin rita mar onggga oska ojomu."

²¹ Beda Yesus agot deika oida, "Erek rusnok rijeka Didif erek rerin Tuhan, tina rua rineita mar onggga dedin Akeina onggga eker gu mebaga odou os rot guru, beda rua runoira jera rusnok onggga Allah ofoka ereij keingg jinaga guru. Tina rusnok onggga rita mar onggga Akeina odou os rot bera rumoira jera rusnok onggga Allah ofoka ereij keingg si.

²² Noba gij mona onggga Allah omoga ojga rot rusnok rerin rita mar, beda rusnok rufoukou rumois gu Didif. Rua rumois rot oida, 'Tuhan, sis fob oisouska bebin bufoka bera memef moftuftu rot Allah oga ni, memef

mekemeji efena ofogog jeska rusnok rudou efesi ni, memef meita eskeira gu rusnok onggga marenir ni fob!'

²³ Tina Didif dimagot gu rua oida, 'Iwa bera erek rusnok onggga runororu Didif rot tenten guru. Iwa bera erek rusnok onggga rudou ofogog ojgomu, jefeda iwa ija jeska Didif ojgomu!' "

²⁴ Beda Yesus agot deika oida, "Erek koma jefeda, osnok egens onggga eg mar onggga Didif difesij rot, noba ofa eita mar koma erek jeni tein, beda ofa bera erek osnok egens onggga odou ebriyi eteb gij mar. Ofa bera erek osnok egens onggga ei efen mod esij mamu onggga ahais.

²⁵ Gij mona onggga mos es eteb, noba mei ofod erek eteb, beda mof edi efen mod rot ahais. Beda efen mod insa koma onohoda jinaga guru. Mod koma ot rot ahais ojgomuja jeska ofa ei efen mod insa koma esij mamu onggga ahais ojgomu.

²⁶ Erek koma tina osnok egens onggga eg mar onggga Didif dimfesij rot, tina ofa eneita jeni mar insa koma guru, beda ofa bera erek osnok egens onggga odou osumsumu eteb ojgomu. Ofa erek osnok egens onggga ei efen mod esij mebsta.

²⁷ Gij mona onggga mos es eteb, noba mei ofot eteb, noba mof eteb edi efen mod, beda mod insa koma onghoda rot nomnaga ojgomu."

²⁸ Nou onggga Yesus omftuftu rot mar insa koma nomnaga oisa fob, beda rusnok onggga ringg mar insa koma bera rudou ousaha eteb rot.

²⁹ Jeska Ofa onoftuftu mar rot giskini erek Guru-Guru agama ruftuftu mar guru. Tina Ofa oftuftu mar gu rua rot efen owesa efek eteb ojgomu.

8¹ Ere koma beda, nou onnga Yesus onjuj jeska memaga ofog oduma insa koma, beda rusnok rufoukou ruroru Ofa tein.

² Beda orna egens onnga maira et ofos erek eteb fob en skoita Yesus. Beda ofa es okeibi gu mebif noba agot gu Yesus oida, "Tuhan, didif dijinaga rot tenten oida erek Bua buitij rot, beda bebin owesa efek adaij nou bita eskeira gu didif."

³ Ere koma beda Yesus osk etma beda ahtec ofa. Noba Ofa agot oida, "Didif duitij rot, jefeda bita eskeira ojgomu." Ainsa koma tein orna egens koma efen ofos eskeira nomnaga fob.

⁴ Beda Yesus agot gu ofa oida, "Bua big duga fog. Bua binagot rot mar kef skoita rusnok enjgineg jinaga guru. Tina bua bija teisis skoita imam egens ojgomu. Beda buis gu ofa jeskaseda ofa eyajga joug bebin bufos fog. Beda bua tein bita mar onnga erek burougif gu Allah rot jeni erek Musa oftufu gu rusnok sis fob. Bita mar insa koma nomnaga jeskaseda burocunc gu rusnok oida bebin bufos eskeira rot tenten fob."

⁵ Nou onnga Yesus oira gij kota Kapernaum, beda tentarer jah suma rerin ebirfaga egens onnga en skoita Yesus.

⁶ Beda ofa erejgejgei gu Yesus oida, "Tuan, didif dedin oforoka egens onnga emfarur nou didif. Tina ofa ahca gij mod efesi ojgomuja jeska ofa maren eteb. Noba ofa ofogu okora eteb rot tein."

⁷ Beda Yesus agot oida, "Didif dimeja jah suma beda dita eskeira gu ofa."

⁸ Tina ebirfaga egens koma agot oida, "Tuan, enadaij nou Bua bin jah dedin mod guru. Jeska Bua bebin bufoka onnga erek aksa eteb ekirsa jeska

didif. Tina erek Bua bagot jah sif oida ofa emeita eskeira ojgomu, beda didif dudou ororu rot oida ofa emeskeira si.

⁹ Jeska didif bera erek osnok egens onnga ougif gu dedin ebirfaga oga. Noba didif dufoka ereij keingg tentarer enjgineg tein. Erek didif dagot gu tentara egens oida, 'Bua bija' beda ofa eja ojgomu. Noba erek didif dagot gu egema oida, 'Bua bin,' beda ofa en ojgomu. Noba erek didif dagot gu dedin oforoka egens onnga emfarur nou didif oida, 'Bua butunggom mar kef,' beda ofa otunggom mar koma ojgomu. Jefeda erek koma tein, didif dudou ororu mar onnga Bua bagot rot ojgomu, fogora ofa emeita eskeira si."

¹⁰ Nou onnga Yesus eg rot mar onnga ebirfaga tentarer egens insa koma anggot fob, beda Ofa odou ousaha eteb rot. Beda Ofa agot gu rusnok onnga ruroru Ofa jah suma oida, "Kef erek tenten oida, gij monuh Israel kef nomnaga bera Didif dinek rusnok egema tein onnga rudou ororu Didif rot tenten morototuma erek osnok egens kef odou ororu Didif rot tentenmen enesi.

¹¹ Gij mona onnga Allah ofoka ereij keingg efen rusnok, beda rusnok rufoukou onnga ruroru Didif rot tenten erek osnok egens kef bera emen jeska monuh ofoukou tein. Beda rua nomnaga rumohoturuma jera mifmin mimowa Abraham, Ishak, Yakub gu mebaga. Beda rua nomnaga rimoinea maat keingg rot rudou efaga ouka eteb morototuma.

¹² Tina rusnok rineya onnga sis fob rusujohu rot oida rumoira gu mebaga si, bera Allah omokoja rua jeska mebaga ojgomu. Allah emeij rua gij monuh onnga motkobah eteb. Beda rua rimeita rifeira okora eteb jah suma si."

¹³ Erek koma beda Yesus agot gu tentarer rerin ebirfaga egens insa koma oida, "Bua buksons jah bebin mod. Jeska bebin oforoka egens koma emeita eskeira jeni erek budou ororu rot erek insa koma si." Nou onnga Yesus anggot mar koma fob, beda ainsa koma tein oforoka egens koma eita eskeira fob.

¹⁴ Erek koma beda, nou onnga Yesus en jah Petrus efen mod, beda Ofa ek Petrus efen mefina onnga ahca ojgomuja jeska ofos ofoufem eteb.

¹⁵ Beda Yesus ahtec ofa fogora eita eskeira gu ofa. Beda ofa edebecki noba oina maat nou Yesus.

¹⁶ Nou onnga motu fob, beda rusnok ruroun rerin rusnok enjgineg rufoukou onnga efena ofogog oira gij rudou efesi skoita Yesus. Beda Ofa ekemeji efena ofogog insa koma nomnaga oisouska efen oga fogora eita eskeira gu rua insa koma onnga marenir.

¹⁷ Noba mar onnga Ofa ontunggom insa koma bera angh gij efera jeni erek mar onnga nabi Yesaya anggot rot sis fob. Ofa agot oida, "Ofa onsuwa mimif jeska mar onnga orotunggom mimif erek marenmi jera mar onnga ereita mifera okora rot tein fob."

¹⁸ Nou onnga Yesus ek rot oida rusnok rufoukou rin noba riker rejrej Ofa, beda Ofa obk efen ruforoker jeskaseda rija jah meren enama.

¹⁹ Beda Guru agama egens en skoita Yesus noba agot gu Ofa oida, "Akeina Guru, Didif dumororu Bua gij monuh nomnaga onnga Bua bimeja gij si."

²⁰ Beda Yesus oroun gu ofa oida, "Mes merenrah rerin mansu onnga ringker gij. Noba mem rerin efefa onnga ringker gij. Tina Didif, onnga Rusnok Efesa, bera dedin monuh egema tein nou diker keingg dufons gij guru."

²¹ Beda orna egens onnga ororu Yesus fob agot gu Ofa oida, "Tuhan, didif dudou os duksons jah dedin monuh beda disah dedin Akeina gij moksu fog. Beda didif dumororu Bua si."

²² Tina Yesus oroun gu ofa oida, "Rusnok onnga rukoja mar onnga Didif dumftuftu rot bera rimeseiseifa si. Jefeda adaj nou rua risah mar agos gij moksu ojgomu. Tina bua buroru Didif ojgomu."

²³ Erek koma beda Yesus oira gij meg egens morototuma jera efen ruforoker.

²⁴ Askesi rua rincira gu meren deismos ros, beda mof edebecki noba okuj rot owesa efek eteb. Rerin meg doida onjuj gu mei. Tina ainsa koma tein Yesus ah ahaingkongka gij meg efesi.

²⁵ Beda Yesus efen ruforoker rin skoita Ofa noba ribs Ofa jeskasada edebecki. Beda rua ruis gu Ofa rot rudou onnga emeesa eteb oida, "Tuhan, bufij memef jeska ai juens bera mimif magebin gij mei kefi!"

²⁶ Beda Yesus agot gu rua oida, "Teinefa fogora iwa imeesa eteb erek komo. Erek idou onororu Didif rot tenten enesei." Beda Yesus edebecki noba ois mar fogora mof esiri noba meren erek edeider sons ojgomu fob.

²⁷ Beda ruforoker koma nomnaga rudou oubsaha eteb rot. Rua ragot moguma oida, "Ofa kef bera erek idu! Jeska mof jera mei ofog tein ororu jeni efen oga!"

²⁸ Gij mona onnga Yesus ensaga gu monuh Gadara, beda Ofa orodosu gosnok gegeka onnga gengker gij monuh onnga mansu ofoukou. Rusnok risah mar agos gij monuh insa koma. Efena ofogog onnga erek rufoukou bera ruiru gij goga godou efesi fob fogora rutunggom goga erek ofogog doska tein. Rusnok

enjgineg rimeesa eteb rot goga, jefeda rua rinecira gu moroju gij monuh insa koma guru.

²⁹ Nou onnga goga gek Yesus, beda goga gagot gu Ofa oida, "Bua onnga Allah efen efesa, enadaij nou Bua bin jah sif guru. Jeska mona onnga Bua bumofra mar okum eteb keingg magef bera enesaga enesi. Bua bija jeska magef!"

³⁰ Doida monuh koma bera mek ofoukou enet mebi jah suma.

³¹ Jefeda efena ofogog insa koma ruis gu Yesus oida, "Erek Bua bikemeji memef jeska gosnok gegeka kef, beda bubk memef jeskaseda moira gij mek ofoukou jah suma ojgomu."

³² Beda Yesus agot oida, "Iwa ija." Jefeda efena ofogog insa koma nomnaga ruroгна jeska gosnok gegeka insa koma godou efesi noba rujoira gij mek ofoukou jah suma. Beda ainsa koma tein mek ofoukou koma ruku jah momfaga onnga aksa beda risiri gij mei fogora mek nomnaga ragos fob.

³³ Rusnok onnga rut joug mek ofoukou koma rik mar insa koma nomnaga, jefeda rua ruku jah kota. Beda rua riflesij gu rusnok jah suma osok gij gosnok gegeka insa koma jera osok gij mek ofoukou onnga ranggos fob.

³⁴ Jefeda rusnok rufoukou ruroгна jeska kota koma beda rija skoita Yesus. Nou onnga rua rik Ofa, beda rua rirejgejgei gu Ofa jeskaseda Ofa eja jeska rerin monuh ojgomu.

9¹ Erek koma beda Yesus eifef meg egens noba oksons jah meren enama. Beda Ofa ecira jah Ofa efen kota.

² Jah suma bera rusnok rurka osnok egens esij mofka skoita Yesus. Osnok egens koma aki

emageima. Nou onnga Yesus ek rot oida rudou ororu Ofa rot tenten fob, beda Ofa agot gu osnok egens koma onnga aki emageima oida, "Edesa, bua binemeesa guru. Jeska Didif dusuna rot bebin mar onnga oska jeska budou efesi."

³ Beda rusnok rineya onnga rirek Guru agama jah suma ragot moguma oida, "Mar onnga Ofa kef anggot fob bera erek Ofa ohurmei mar skoita Allah!"

⁴ Yesus ejginaga rot mar onnga rua ragot moguma, jefeda Ofa agot gu rua oida, "Teinefa fogora iwa insujohu rot mar onnga ofogog erek komo.

⁵ Erek Didif dagot gu ofa oida, 'Bebin mar onnga oska bera dunsuna rot,' beda koma onorocunc rot mar egema tein guru. Tina erek Didif dagot gu ofa oida, 'Bua bidebecki noba bija jah bebin mod,' beda koma orocunc rot dedin owesa efek eteb. Jefeda Didif dumocunc gu iwa rot oida, Didif onnga Rusnok Efesa, bera dedin owesa efek gu mebif jeskaseda dusuna rot rusnok rerin mar onnga oska." Erek koma beda Yesus agot gu osnok egens koma onnga aki emageima oida, "Bua bidebecki, bita bebin meidibi beda bicira baki jah bebin mod."

⁶ (9:5)

⁷ Ainsa koma tein, osnok egens koma edebecki beda ecira aki jah efen mod rot eskeira.

⁸ Nou onnga rusnok jah suma rik mar insa koma, beda rudou emeesa rot Yesus efen owesa efek eteb. Beda rua risitit Allah ofoka jeska Ofa eita owesa efek insa koma gu Yesus.

⁹ Erek koma beda Yesus eja jeska monuh insa koma. Noba askesi Ofa ecira ros, beda Ofa ek didif, dusnok Yahudi egens onnga dufoka Matius. Didif bera erek osnok egens onnga ohoturu pajak jeska

rusnok Yahudi enjgineg nou raja Kaisar onggga ofoka ereij keingg monuh Israel. Gij mona insa koma didif dingker gij dedin kantor. Beda Yesus agot gu didif oida, "Bua buroru Didif." Beda didif durogna jeska kantor koma noba duroru Ofa ojgomuja.

¹⁰ Yesus eja jah dedin mod jeskaseda et maat morototuma jera didif. Noba rusnok onggga ruhoturu pajak jera rusnok enjgineg onggga rusnok Yahudi rusujohu bera erek oska tein rin noba rit maat morototuma jera Yesus gij dedin mod.

¹¹ Beda rusnok Yahudi onggga ebic Farisi rineya rik rot mar insa koma. Jefeda rua ragot gu Yesus efen ruforoker oida, "Teinefa fogora yeyin Guru et maat morototuma jera rusnok onggga oska erek komo!"

¹² Yesus eg rua ragot mar insa koma, jefeda Ofa agot gu rua oida, "Rusnok onggga rifaga eskeira bera runohca dokter guru. Tina rusnok onggga marenir bera ruhca dokter ojgomu.

¹³ Iwa isujohu osok gij mar kef onggga runggu gij Mar Efeyi Ebsi rot efen ofou ojgomu. Runggu rot oida, 'Didif dunodou os rot marska onggga iwa irougif gu Didif rot guru. Tina Didif dudou os jeskaseda rusnok rucunc rudou onggga oufamofa moguma ojgomu.' Didif dinen jeskaseda ducunc rusnok onggga rufra risinsa rufoka aksa erek dedin ruforoker guru. Tina Didif din jeskaseda ducunc rusnok onggga iwa incunc erek oska erek dedin ruforoker ojgomu."

¹⁴ Erek koma beda Yohanes onggga eita baptis gu rusnok, efen ruforoker onggga rin skoita Yesus. Beda rua ragot gu Ofa oida, "Akeina, memef onggga mororu Yohanes jera rua onggga ebic Farisi tein bera menet maat gij mona juens guru jeskaseda mom meiteij gu

Allah ojgomu. Tina Bua bebin ruforoker rineita mar erek koma guru. Koma rot meidu?"

¹⁵ Beda Yesus era mar onggga orocunc jeskaseda oroun gu rua rot mar insa koma. Ofa agot oida, "Gij mona onggga rusnok ruina maat keingg rot igers egens onggga oskotu arja fob, beda rua rudou onokum rot guru, noba rua rinebisa rot gij mona insa koma tein guru. Tina gij mona egens onggga emen, beda orna egens onggga oskotu arja insa koma emeja jeska rua si. Beda gij mona insa koma bera rua rimeita rudou onggga okum fogora rinet maat gij mona juens guru tein.

¹⁶ Erek rusnok rib meifeti onggga efeinah jera meifeti onggga efeyei beda koma enadaij guru. Jeska meifeti onggga efeinah koma emegrina meisoufa onggga efeyei insa koma fogora emebga eteb deika.

¹⁷ Erek koma tein, anggur efei onggga efeinah bera runotkinaja gij mesina kambing ofos onggga efeyei guru. Jeska anggur efei onggga efeinah koma bera emefifij gij mesina kambing ofos onggga efeyei insa koma. Beda mesina koma emecka rot, noba anggur efei insa koma omotkinaja jeska. Noba mesina onggga efeyei insa koma bera eja erek oska ojgomu. Tina anggur efei onggga efeinah bera rutkinaja gij mesina kambing ofos tein onggga efeinah ojgomu jeskaseda egeka tein ah rot ahais ojgomu."

¹⁸ Askesi Yesus efesij rot mar insa koma gu rua onggga ebic Farisi ros, beda ebirfaga Yahudi egens en skoita Yesus. Beda ofa es okeibi gu mebi noba ebisa rot gu Ofa oida, "Dedin edesa ojaga agos fob. Tina erek Bua bin noba baha bitma esij ofa, beda dudou ororu rot tenten oida ofa efena ebah sons deika si."

¹⁹ Jefeda Yesus eja jera ofa jah efen mod. Noba Ofa efen ruforoker rururu Ofa jah suma tein.

²⁰ Askesi Yesus encira gu moroju ros, beda ojaga egens tein bera ecira otoij Ofa. Ofa erek maren tein, jeska efen mesta eba ojgomuja gij tahun rara setka kungkob erfeka fob. Ofa osujohu gij odou efesi oida, erek ofa ahtec Yesus efen meisoufa, beda efen efaga emeita eskeira rot si. Jefeda ofa en doida Yesus ejmeg beda ahtec Ofa efen meisoufa.

²¹ (9:20)

²² Beda Yesus ekikif noba eyajga ofa. Beda Ofa agot oida, "Edesa, bua binemeesa deika guru. Budou ororu Didif rot tenten fob, jefeda bua bita eskeira fob." Beda ainsa koma tein ojaga egens koma efen efaga eita eskeira fob.

²³ Nou onnga Yesus ensaga gu ebirfaga Yahudi insa koma efen mod, beda Ofa ek rusnok onnga en suling ofou nou rusnok gij mona onnga rerin osnok egens anggos fob. Noba Ofa ek rot oida rusnok jah suma rudou ousaha eteb noba ebisa rot ofa onnga anggos fob.

²⁴ Beda Ofa agot gu rusnok jah suma nomnaga oida, "Iwa nomnaga irogna jeska mer efesi kef ojgomu. Oforokai ojaga kef bera enagos guru. Ofa ahca ojgomu." Nou onnga rusnok jah suma rig Yesus agot mar insa koma beda rua rutut rot Ofa, jeska rua rijginaga rot oida oforoka egens koma bera anggos rot tenten fob.

²⁵ Tina nou onnga rua insa koma rurogna jeska mer efesi fob, beda Yesus oira gij mer efesi koma. Beda Ofa agei oforoka egens koma efen etma. Beda ainsa koma tein oforoka egens koma efena ebah sons.

²⁶ Jefeda rusnok rufoukou riflesij rot mar onswos koma gij kota-kota onnga angh rejrej monuh insa koma.

²⁷ Nou onnga koma oisa fob beda Yesus eja jeska monuh insa koma. Noba askesi Ofa ecira gu moroju ros, beda gosnok gegeka onnga geiteij ofou gororu gotoij Ofa. Beda goga gagerir gu Ofa oida, "Bua onnga bunjuj jeska raja Daud, bucunc budou onnga oufamofa skoita magefo!"

²⁸ Nou onnga Yesus oira gij mod efesi, beda gosnok gegeka insa koma gen skoita Ofa. Beda Ofa ejeka gu goga oida, "Goga godou ororu rot tenten oida Didif dedin owesa efek onnga adaij jeskaseda dita eskeira gu goga ei?" Beda goga gagot oida, "Tuan, madou ororu mar koma rot tenten!"

²⁹ Beda Yesus ahtec goga geiteij noba agot oida, "Iwa isma eskeira jeni erek idou onnga ororu Didif rot ojgomu."

³⁰ Beda ainsa koma tein goga geiteij eskeira noba goga gek mar fob. Beda Yesus eyahehir joug rua rot ahais oida, "Goga genagot rot mar insa koma gu rusnok egema tein jinaga guru."

³¹ Tina gij mona egema deika, beda goga geja rejrej monuh insa koma noba gefesij gu rusnok rufoukou osok gij mar onnga Yesus ontunggom insa koma nou goga fob.

³² Nou onnga goga insa koma geja jeska Yesus fob, beda rusnok ruroun orna egens onnga erek osumu skoita Yesus, jeska efena ofogog oira gij efen odou efesi fob.

³³ Nou onnga Yesus ekemeji efena ofogog insa koma jeska ofa, beda osnok egens koma eita eskeira fogora agot mar deika sons. Beda rusnok rufoukou

rudou ousaha eteb rot. Rua ragot oida, "Wah! Mimif minek mar onswos egema tein onnga erek koma gij monuh Israel jinaga enesi!"

³⁴ Tina rusnok Yahudi onnga ebic Farisi ragot oida, "Ebirfaga efena ofogog bera onnga eita owesa efek gu Yesus fogora Ofa ekemeji efena ofogog jeska rusnok ojgomu."

³⁵ Yesus ojogog rusnok onnga ringker gij kota-kota onnga angh gij monuh Galilea. Ofa oftufu mar gij rerin mod onnga rua rum riteij gu Allah gij ni. Ofa efesij mar gu rusnok osok gij Allah efen oga onnga oufamofa jera osok gij mona onnga Allah omofoka ereij keingg rusnok tein ni. Ofa eita eskeira gu rusnok rot mar nomnaga onnga orotunggom rua erek marenir tein.

³⁶ Ofa eyajga rusnok rufoukou insa koma, noba Ofa odou okora eteb rot rua. Jeska rua bera erek rimeesa noba rerin owesa efek jeskaseda rufij risinsa rot jinaga guru. Rua bera erek domba-domba onnga rusnok egema tein runot joug guru.

³⁷ Ofa ek rusnok erek insa koma jefeda Ofa agot mar onnga erek orocunc gu efen ruforoker erek kef oida, "Maat efek onnga angh gu mekeni bera erek ofoukou doska. Tina rusnok onnga rumohoturu maat efek insa koma bera erek oskiyai ojgomu.

³⁸ Jefeda iwa yum iteij gu Ofa onnga efen mekeni insa koma jeskaseda Ofa omobk rusnok dokun deika fogora rua tein rumohoturu efen efek si."

10¹ Yesus ohoturu efen ruforoker rufok setka kungkob erfeka. Beda Ofa eita owesa efek gu rua jeskaseda rikemeji efena ofogog jeska rusnok rudou efesi, jera rita eskeira gu rusnok rot mar nomnaga onnga orotunggom rua erek marenir tein.

² Ruforoker rufok setka kungkob erfeka insa koma bera: Simon (ongga rijeka erek Petrus tein) ni, efen mokosa Andreas ni, Yakobus jera efen mokosa Yohanes ni, (Goga bera Zebedeus efen efeserga)

³ Filipus ni, Bartolomeus ni, Tomas ni, Matius ni (Koma didif onggga duhoturu pajak jeska rusnok sis fob), Yakobus onggga Alfeus efen efesa ni, Tadeus ni,

⁴ Simon ni (ongga rusnok rijeka Patriot tein), jera Yudas Iskariot, onggga gij mona kahma emekikif jeska Yesus.

⁵ Nou onggga Yesus omobk efen ruforoker rufok setka kungkob erfeka onggga Ofa oncunc fob, beda Ofa agot gu rua oida, "Iwa ineja jah monuh onggga rusnok onggga Yahudi guru ringker gij guru. Noba iwa inoira gij kota-kota onggga angh gij monuh Samaria tein guru.

⁶ Tina iwa ija skoita rusnok Israel ojomu. Jeska rua bera erek domba-domba onggga riseiseifa.

⁷ Iwa ija skoita rua noba ifesij gu rua oida, mona onggga Allah omofoka ereij keingg rusnok bera enesaga doida fob.

⁸ Iwa ita eskeira gu rusnok onggga marenir ni, ita efena ebah sons gu rusnok onggga ranggos fob ni, ita eskeira gu rusnok onggga maira et rufos ni, ikemeji efena ofogog jeska rusnok rudou efesi ni. Didif dita owesa efek insa koma rot oubji gu iwa ojomu. Jefeda iwa tein itunggom mar insa koma nou rusnok rot oubji tein ojomu.

⁹ Iwa inorka fifi era mar egema tein guru.

¹⁰ Inorka yeyin mesina tein guru. Noba iwa icira rot meisoufa onggga irgi fob ojomu. Inorka yeyin meisoufa era sandal era moskur onggga egema dokun deika guru. Iwa imofij rusnok jah suma, jefeda adaij

nou rua rufij iwa rot maat jera meisoufa onggga iwa icosu rot ojgomu.

¹¹ Gij mona onggga iwa yuira gij kota egens, beda iwa yuhca osnok egens onggga omoroun iwa gij efen mod. Beda iwa iker jah suma onjoros imorogna jeska kota insa koma.

¹² Nou onggga iwa imoira gij mod egens, beda bagot gu rusnok gij mod insa koma oida, 'Memef mois gu Allah jeskaseda Ofa eita eskeira eteb gu iwa.'

¹³ Noba erek rua ruroun iwa rot rudou onggga oufamofa, beda buis gu Allah rot mar insa koma ojgomu. Tina erek rusnok runororu iwa rot rudou onggga oufamofa skoita iwa guru, beda inois gu Allah jeskaseda Ofa eita eskeira erek insa koma gu rua guru.

¹⁴ Noba erek rusnok gij mod egens era gij kota egens runoroun iwa guru, beda iwa ija jeska ojgomu. Noba yubsa ikoda rot mebi ofou onggga kota koma efen sismeni fog.

¹⁵ Rusnok onggga ringker gij kota insa koma bera rimesma mar okum eteb jeska Allah onggga erek ekirsa jeska mar okum onggga Ofa omofra keingg rusnok jeska kota Sodom jera Gomora sis fob. Rusnok kota Sodom jera Gomora runtunggom mar onggga oska efekeifa sis eteb fob."

¹⁶ Erek koma beda Yesus oftufu mar deika gu efen ruforoker. Ofa agot oida, "Didif dumobk iwa onggga idou eriagamaga jah gu rusnok rifelesa onggga rudou ofogog. Koma erek domba-domba onggga rijeker gu serigala ofoukou rifelesa. Jefeda ibes ifaga jeska mar onggga ofogog erek magosu onggga ebes efaga jeska mar onggga ofogog. Noba ita mar skoita rusnok

enjgineg rot idou onnga eriagamaga ojgomu erek mem monggeta mos onnga eriagamaga.

¹⁷ Yut joug idou efesi rot iskusk ojgomu. Jeska rusnok rineya rimekris iwa jah rusnok Yahudi rerin ebirfager. Beda ebirfager insa koma rumoga ojga rot oida rangha iwa gij mod onnga rua rum riteij gu Allah gij.

¹⁸ Iwa iroru Didif fob, jefeda rusnok rimekris iwa skoita ebirfager rineya jera raja-raja tein. Beda gij mona insa koma bera iwa ifesij osok gij Allah oga onnga oufamofa skoita rua jera rusnok onnga erek Yahudi guru tein ojgomu.

¹⁹ Tina gij mona insa koma iwa inejekjeka idou efesi rot mar onnga imefesij gu rua guru. Jeska iwa imejginaga rot mar koma si.

²⁰ Erek koma jeska yeyin Ika Allah bera omorocunc rot mar onnga imagot insa koma oisouska Efena Ebsi gij idou efesi si. Beda iwa imefesij rot mar onnga en jeska Allah ojgomu.

²¹ Gij mona insa koma rusnok rimekikif jeska risinsa rerin mokoser, jeska mokoser koma ruroru Didif fob. Beda rua rimekris rerin mokoser insa koma skoita ebirfager Yahudi. Beda rua rumoga ojga rot oida rerin mokoser ragos ojgomu. Erek koma noba riker rimekikif jeska rerin riser erek insa koma tein fogora riser ragos. Noba riser rimekikif jeska rerin riker jera rusir erek insa koma tein fogora rigeka tein rimagos.

²² Rusnok rufoukou rimeita rudou onnga ofogog skoita iwa jeska iwa iroru Didif fob. Tina erek dedin rusnok rita rudou ahais gij mona onnga mar okum insa koma rireneni rua, beda rua rineseiseifa guru. Allah omoskotu rua si.

²³ Gij mona onnga rusnok rutunggom mar onnga oska skoita iwa, beda iwa ija jeska kota koma noba ija jah kota enjgineg ojomu. Noba onnga tenten bera askesi iwa ita mar insa koma rejrej kota-kota onnga rusnok rerin Israel ros, beda Didif dumoksons gij mona insa koma si.

²⁴ Guru egens efen ofoka onnga aksa ekirsa jeska efen ruforoker. Noba osnok egens onnga efen rusnok onnga rumfij ofa bera efen ofoka onnga ekirsa jeska rua tein.

²⁵ Jefeda adaij nou ruforoker rita mar morototuma erek rerin Guru eita mar tein ojomu. Noba adaij nou rua onnga rumfij rerin ebirfaga rita mar morototuma erek rerin ebirfaga egens eita mar ojomu. Erek koma tina, erek rusnok rerin ebirfaga egens onnga ofoka Setan, beda rusnok enjgineg rumoga oska ekirsa skoita rua onnga ruroru ofa tein si."

²⁶ Beda Yesus agot gu efen ruforoker deika oida, "Erek koma jefeda iwa inemeesa rot rusnok enjgineg guru. Jeska mar onnga ah endemдеми jeska rua ebeibeyaif bera emah rot tomnomna si. Noba mar onnga angh jejema jeska rua bera rimejginaga rot si.

²⁷ Mar onnga Didif dimfesij gu iwa ojomu bera ah jejema jeska rua ros. Tina ebeibeyaif iwa ifesij osok gij mar insa koma rot tomnomna ojomu. Mar onnga iwa ig jeska Didif fob bera ifesij rot koisoisa gu rusnok nomnaga ojomu.

²⁸ Noba iwa inemeesa rot rusnok onnga ragob iwa ojomu guru. Jeska rerin owesa efek jeskaseda rij iwa gij mahmei meren enah jinaga guru. Tina iwa yugif gu Allah rot idou onnga imeesa rot Ofa ojomu. Jeska Ofa efen owesa efek jeskaseda otunggom

rusnok fogora ragos beda rij rua gij mahmei meren tein.

²⁹ Iwa isujohu rot mem cucurwahi. Mem insa koma efena efera ojuj ojgomu. Rusnok ringk mem koma rot fifi erek ai oskiyai ojgomu. Tina Allah odou okora rot mem koma tein. Noba erek Ofa onoitij rot guru, beda mem erek egens tein enagos guru.

³⁰ Tina Allah odou okora rot iwa erek eteb ekirsa tein. Ofa ejginaga osok gij mar onnga ai ofokai rot iwa tein. Ofa ejginaga rot yeyin ibirfaga efeji egens egens tein.

³¹ Jefeda iwa inemeesa rot rusnok enjgineg guru, jeska ahah Allah eiteij bera iwa erek ofoufem ekirsa jeska mem cucurwahi insa koma. Ofa omot joug iwa rot ahais si.

³² Noba osnok egens onnga agot jah rusnok rudou rot oida ofa bera ororu Didif rot tenten fob, beda Didif dumocunc ofa erek dedin oforoka egens jah Akeina odou gu mebaga tein.

³³ Tina osnok egens onnga okoja Didif jah rusnok rudou, beda Didif tein dumokoja ofa jah Akeina odou gu mebaga si."

³⁴ Erek koma beda Yesus agot deika oida, "Enadaij nou iwa isujohu rot oida Didif din jah mebif jeskaseda rusnok nomnaga riker rot rudou onnga eskeiramera moguma ojgomu guru. Didif dinen jeskaseda dita mar erek koma nou rusnok guru. Tina Didif din jeskaseda rusnok rimekebema ojgomu.

³⁵ Jeska mar onnga Didif duftuftu rot bera omorotunggom meka fogora ekeba jeska efen efesa orna ni, efesa ojaga emekeba jeska ofa efen mosu ni, mogona emekeba jeska efen mefina ni.

³⁶ Yeyin ibskir rimeja erek mesa onnga rufogog skoita iwa.

³⁷ Noba erek rusnok rudou okora rot rerin rika jera rusu ekirsa jeska rudou onnga okora rot Didif, beda enadaij nou rua ruroru Didif erek dedin ruforoker guru. Noba rua onnga rudou okora rot rerin riser ekirsa jeska rudou onnga okora rot Didif, beda enadaij nou rua ruroru Didif erek dedin ruforoker guru.

³⁸ Rua onnga runoitij rot rita efera okora eteb erek Didif dimeita difera okora eteb guru, beda enadaij nou rua ruroru Didif erek dedin ruforoker guru.

³⁹ Noba rusnok onnga rusujohu ekirsa rot mar onnga riteij ah kef efen, beda rua rineita eiteij ah onnga efeinah guru. Noba erek rusnok runororu mar onnga risinsa rudou os gij riteij ah kef guru, tina rua ruroru mar onnga Allah odou os rot ojgomu, beda rua rimeita eiteij ah onnga efeinah si."

⁴⁰ Beda Yesus agot deika oida, "Erek osnok egens oroun iwa rot odou onnga oufamofa, beda koma erek ofa oroun Didif rot odou onnga oufamofa tein. Noba ofa onnga oroun Didif rot odou onnga oufamofa, beda koma erek ofa oroun dedin Akeina rot odou onnga oufamofa tein. Akeina bera onnga obk Didif jah mebif fob.

⁴¹ Noba osnok egens onnga oroun rua onnga Allah ombk fob, jeska ofa ejginaga rot oida rua insa koma bera rifesij mar osok gij Allah oga, ofa tein emesma ofons onnga ongnoska eteb jeska Allah morototuma jera rusnok insa koma onnga Allah ombk fob si. Noba osnok egens onnga oroun rusnok onnga rudou oufamofa, ofa tein emesma ofons onnga ongnoska

eteb jeska Allah morototuma jera rusnok insa koma onggã rudou oufamofa si.

⁴²Noba osnok egens onggã ofij dedin ruforoker rot mar onggã oskiyai tein erek eita mei onggã emej era eita maat onggã emet, beda ofa tein emesma ofons onggã onggoska eteb jeska Allah si."

11 ¹Nou onggã Yesus emfesij rot mar insa koma nomnaga gu efen ruforoker fob, beda Ofa eja jah kota-kota onggã angh gij monuh insa koma jeskaseda oftufu mar gu rusnok noba efesij mar osok gij Allah oga.

²Gij mona insa koma bera rusnok raha Yohanes Pembaptis gij mod oskusk fob. Nou onggã ofa eg rot mar onggã Yesus ontunggom fob, beda ofa obk efen ruforoker rineya skoita Yesus.

³Rua rijeka rua Yesus oida, "Akeina, Bua bera osnok egens koma onggã Yohanes agot oida Allah omobk skoita memef onggã Yahudi ei? Era memef mogog moroju rot osnok egens onggã enjgineg ei?"

⁴Beda Yesus oroun gu rua oida, "Iwa yuksons skoita Yohanes noba ifesij gu ofa rot mar onggã iwa ik noba ig jah sif.

⁵Jeska rusnok onggã riteij ofou sis fob bera rik mar koisoisa fob. Rusnok onggã raki emageima sis fob bera ricira erek giskini fob. Rusnok onggã maira et rufos erek eteb sis fob bera rufos eskeira nomnaga fob. Rusnok onggã osu otuw sis fob bera rig mar fob. Rusnok onggã ranggos sis fob bera rifena ebah deika sons fob. Noba rusnok onggã rufojingki bera rig rot Allah oga onggã oufamofa fob.

⁶Rusnok onggã rinejekjeka rudou efesi rot Didif guru, tina rua rururu Didif rot tenten ojgomu bera rudou efaga ouka eteb rot si."

⁷ Nou onnga Yohanes efen ruforoker insa koma rinja fob, beda Yesus efesij mar osok gij Yohanes jera efen ruforoker gu rusnok rufoukou jah suma. Ofa agot gu rua oida, "Sis fob, gij mona onnga Yohanes engker gij monuh onnga mebi oska ros, beda iwa ineja jah suma jeskaseda ik osnok egens onnga erek mosodum onnga mof okuj ojgomu guru.

⁸ Noba iwa inek osnok egens onnga ergi meisoufa onnga ongnoska eteb jah suma tein guru. Rusnok onnga rirgi meisoufa erek koma bera riker gij raja efen mod ojgomu.

⁹ Tina iwa ik osok egens erek meidu jah suma? Iwa ik osnok egens onnga erek nabi ojgomu. Erek koma tina ofa efen ofoka bera ekirsa jeska nabi enjgineg.

¹⁰ Jeska sis eteb fob bera runggu gij Mar Efeyi osok gij mar onnga Allah anggot gu Kristus osok gij Yohanes. Ofa agot oida, 'Didif dumobk dedin osnok egens eja okag Bua jeskaseda esejah rusnok rudou efesi nou mona onnga Bua bimen.'

¹¹ Onnga tenten bera Yohanes efen ofoka onnga aksa ekirsa jeska rusnok nomnaga onnga ringker gu mebif fob. Erek koma tina rusnok onnga riker gu mebaga onnga runok ofoka gij jinaga guru, rua bera rerin rufoka onnga aksa ekirsa jeska Yohanes efen.

¹² Noba gij mona onnga Yohanes oftufu mar gu rusnok onjoros deisef tein bera rusnok onnga rufogog rudou os riradgodu nou mona onnga Allah omofoka ereij keingg rusnok jeskaseda en ebeirens. Jeska rua rudou os rita owesa efek gij mona insa koma ojgomu.

¹³ Noba gij mona onnga sismeni onjoros mona onnga Yohanes en fob, bera nabi-nabi rimfesij mar osok gij mona onnga Allah omofoka ereij keingg

rusnok. Noba Musa anggot gij efen hukum-hukum osok gij mona insa koma tein.

¹⁴ Didif dagot gu iwa rot oida Yohanes bera ofa koma onnga nabi-nabi ranggot rot oida emen rot owesa efek morototuma erek nabi Elia efen sis fob. Jefeda idou ororu mar koma ojgomu.

¹⁵ Iwa ig mar onnga orocunc kef rot iskusk jeskaseda idou emebriyi gij ojgomu. Rusnok onnga riker gij mona ebeibeyaif bera erek kef: Rua bera erek ruforoker onnga rahaisomu gu moroju. Rineya ruis gu rerin ruhujir oida,

¹⁶ (11:15)

¹⁷ 'Memef mof medemer nou iwa jeskaseda iwa yuka, tina iwa idou efaga onouka rot guri. Beda memef mof medemer jeskaseda idou ousaha noba ebisa rot, tina iwa inebisa rot guri!' Mar egema tein onnga rua rutunggom bera ereita ruforoker koma rudou eskeira rot guru.

¹⁸ Koma erek rusnok onnga riker gij mona ebeibeyaif tein. Jeska gij mona onnga Yohanes en, beda ofa enej anggur efei guru, noba ofa enet maat gij mona juens tein guru. Tina rusnok rudou eneskeira rot ofa guru. Rua ragot oida efena ofogog egens bera oira gij ofa odou efesi fob ojgomu.

¹⁹ Beda ebeibeyaif Didif, Rusnok Efesa, din fob. Noba Didif dij anggur efei noba dita maat gij orofosut mona tein, tina rusnok rudou eneskeira rot Didif tein guri. Rua ragot oida Didif dit maat ofoukou noba dibirfaga erebibeit rot anggur efei ojgomu. Noba rua ragot oida Didif dita mar onnga oska jeska dedin edohujir bera erek rusnok onnga ruhoturu pajak jera rusnok enjgineg tein onnga rua rusujohu bera erek oska. Tina gij mona onnga rusnok rik rusnok rineya

rerin rita mar onggua oufamofa ojgomu, beda koma omorocunc rot tenten oida Allah efen odou onggua ebriyi gij mar erek eteb ekirsa fob."

²⁰ Yesus oftufu mar noba otunggom mar onggua onswos eteb nou rusnok gij kota-kota insa koma fob. Tina rua rinemeesa rot rerin mar onggua oska guri. Jefeda Ofa agot rot mar okum onggua emen skoita rua gij kota-kota insa koma si.

²¹ Ofa agot gu rua oida, "Mar okum eteb emah keingg iwa iwa onggua ingker gij kota Korazim jera kota Betsaida si. Iwa idou ah keingg rot rusnok onggua ringker gij kota Tirus jera Sidon sis eteb fob. Rua bera erek rusnok onggua rufogog doska. Tina erek rusnok gij kota egeka koma rik mar onswos sis fob erek iwa ik Didif duntunggom gij mona ebeibeyaif tein, beda rua rimeesa joug rot rerin mar onggua oska si. Noba rua rimergi meisoufa onggua oska noba raha mongkoru esij ribirfaga efeji jeskasada rurocunc rot rudou onggua okumkum rot rerin mar onggua oska si.

²² Tina iwa onggua kota Korazim jera Betsaida bera ineita mar erek koma jinaga guri. Jefeda gij mona onggua Allah ofra mar okum eteb keingg rusnok onggua rita mar onggua oska fob, beda Ofa omofra mar onggua okum eteb keingg iwa erek ekirsa jeska mar okum onggua emah keingg rua onggua kota Tirus jera Sidon si.

²³ Noba iwa onggua kota Kapernaum, iwa yufra isinsa ifoka erek akseij gu mebaga. Tina Allah omain keingg iwa degini jah mahmei meren ojgomu. Idou ah keingg rot kota Sodom onggua onghoda fob. Kota koma enah deika guru. Tina erek rusnok gij kota Sodom koma ringk rot mar onswos sis fob onggua erek iwa ik Didif duntunggom gij mona ebeibeyaif

fob, beda rua rimeesa joug rot rerin mar onggga oska si. Noba rerin kota onohoda tein guru.

²⁴ Kef bera onggga tenten oida, gij mona onggga Allah ofra mar okum eteb keingg rusnok onggga rita mar onggga oska fob, beda Ofa omofra mar onggga okum eteb keingg iwa erek ekirsa jeska mar okum onggga emah keingg rua onggga kota Sidon insa koma si."

²⁵ Nou onggga Yesus anggot mar insa koma fob, beda Ofa agot oida, "Akeina onggga ofoka ereij keingg mebaga jera mebif tein, Didif disitit bebin bufoka onggga aksa, jeska Bua buncunc mar onggga oufamofa eteb skoita rusnok onggga runofokor aksa guru fob. Noba Bua bindemdemi mar onggga oufamofa insa koma jeska rusnok onggga rufokor aksa noba onggga rudou ebriyi eteb gij mar ofoukou tein fob.

²⁶ Noba koma bera ororu jeni budou ejginaga rot ojgomu. Jefeda ebeibeyaif bera budou eskeira rot tein fob."

²⁷ Beda Yesus agot gu rusnok rufoukou insa koma deika oida, "Dedin Akeina eita owesa efek nomnaga gu Didif fob. Noba Akeina Allah ojgomu bera onggga ejginaga erek jeni rot Didif onggga efen efesa. Noba Didif jera rusnok onggga Didif duroun skoita Allah bera rijginaga erek jeni rot Ofa tein.

²⁸ Iwa nomnaga onggga ifonskos rot mar okum onggga ah gu iwa, iwa in skoita Didif ojgomu. Beda Didif dimeita owesa efek gu iwa fogora iwa imeker keingg ifonskos rot si.

²⁹ Iwa yuh idou rot onggkas gu Didif ojgomu, beda Didif dumoftuflu mar gu iwa si. Jeska Didif dudou erek eriaga noba eskeira rot iwa. Beda iwa imeker keingg ifonskos rot yeyin mar okum ojgomuja.

³⁰ Jeska mar onnga Didif duftufts gu iwa bera ongkoska ojgomu. Beda iwa imeita owesa efek fogora inofonskos rot mar onnga okum deika guru."

12 ¹ Gij mona onnga Sabat egens bera Yesus ecira aki morototuma jera efen ruforoker gij mekta egens onnga gandum ener gij. Ofa efen ruforoker mosona onkir jefeda rua rigib gandum efej fogora rimet.

² Nou onnga rusnok Yahudi onnga ebic Farisi rineya rik mar insa koma fob, beda rua ragot gu Yesus rot rusum oskusk oida, "Teinefa fogora bebin ruforoker rigib maat erek komo. Jeska mifmin erebent agama eyahehir joug rot koma gij mona onnga Sabat ojgomu!"

³ Beda Yesus oroun gu rua oida, "Erek iwa inek gij Mar Efeyi Ebsi osok gij mar onnga Daud otunggom sis fob gij mona onnga ofa efen ruforoker mosona onk rua tein gurei?"

⁴ Jeska ofa oira gij Mod Allah efesi. Beda ofa jera efen ruforoker rit roti onnga imam-imam sismeni rira nou rurougif gu Allah fob. Tina mifmin erebent agama agot oida imam-imam risinsiyai bera rit roti insa koma ojgomu.

⁵ Era, erek iwa inek mar egens gij buku hukum Musa osok gij imam-imam rot mona onnga Sabat gurei. Jeska mar koma agot oida, erek imam-imam onnga rita mar nou Allah gij efen mod efesi bera runororu jeni mar onnga hukum erebent agot rot mona onnga Sabat guru, beda mar koma bera enerek oska guru.

⁶ Tina onnga tenten bera, mar egens onnga erek ekirsa jeska Mod Allah bera en fob.

⁷ Noba runngu gij Mar Efeyi Ebsi rot mar onnga Allah anggot oida, 'Didif dudou eneskeira eteb rot

rusnok onggá rita marksa erek mar onggá rurougif gu Didif rot guru. Tina Didif dudou eskeira rot rusnok onggá rucunc rudou onggá oufamofa moguma ojgomu.' Erek koma noba erek iwa idou ebriyi gij mar insa koma efen ofou fob, beda iwa inocunc rusnok onggá rita mar onggá oufamofa erek oska guru.

⁸ Erek koma jeska Didif, Rusnok Efesa, bera onggá dagot rot mar meidu onggá rusnok rutunggom gij mona onggá Sabat ojgomu."

⁹ Beda Yesus eja jeska mekta insa koma noba eja jah mod onggá rusnok Yahudi rum riteij gu Allah gij.

¹⁰ Osnok egens onggá etma enama ofumbohah enofogu gij mod insa koma. Rusnok rineya jeska ebic Farisi jah suma ruhca moroju jeskaseda rucunc Yesus erek osnok egens onggá eita mar onggá oska. Jefeda rua rijeka gu Ofa oida, "Erek osnok egens eita eskeira gu rusnok enjgineg gij mona onggá Sabat, beda ororu mifmin erebent agama koma bera erek oska ei era gurei?"

¹¹ Beda Yesus agot gu rua oida, "Erek osnok egens jeska iwa efen domba egens onggá esiri gij mebi efesi gu mona onggá Sabat, beda ofa omofra efen domba insa koma jeska mebi efesi koma si.

¹² Tina rusnok bera erek rufoufem ekirsa jeska domba-domba ojgomu. Jefeda erek mimif mufij rusnok enjgineg gij mona onggá Sabat beda ororu mifmin erebent agama koma onoska guru."

¹³ Erek koma beda Yesus agot gu osnok egens koma onggá etma enama ofumbohah oida, "Bua busk bitma onggá ofumbohah." Beda osnok egens koma osk efen etma onggá ofumbohah, noba ainsa koma tein efen etma erek eskeira fob.

¹⁴ Beda rua onggaga ebic Farisi jah suma rurogna rot rudou onggaga oska. Jefeda rua rudou oromom jeskasada ragob Yesus.

¹⁵ Nou onggaga Yesus ejginaga rot oida rusnok ebic Farisi rudou oromom jeskasada ragob Ofa, beda Ofa eja jeska monuh insa koma. Rusnok rufoukou doska ruroru Ofa tein, noba Ofa eita eskeira gu rua onggaga marenir.

¹⁶ Tina Ofa eyahehir joug rua jeskasada rinefesij rot mar onggaga Ofa ontunggom nou rua skoita rusnok enjgineg guru.

¹⁷ Ofa eita mar erek insa koma jeskasada mar onggaga Allah anggot oisouska nabi Yesaya osok gij Yesus sis fob bera emah gij efera fob. Ofa anggot oida,

¹⁸ "Ofa kef bera osnok egens onggaga Didif duncunc fob. Didif dudou okora rot Ofa, noba dudou eskeira rot mar onggaga Ofa otunggom tein. Didif dumobk dedin Efena Ebsi skoita Ofa, beda Ofa emagot gu rusnok ebic nomnaga rot oida mona onggaga Didif dumofra mar okum keingg rusnok rot rerin mar onggaga oska bera en fob.

¹⁹ Noba Ofa enagerir rot mar insa koma guru. Noba efen oga onomosokuma rot jera rusnok enjgineg tein guru. Ofa enefesij osok gij mar koma rot oga eteb skoita rusnok gu moroju tein guru.

²⁰ Ofa omocunc odou onggaga eriaga skoita rusnok onggaga runowesa efek guru. Beda Ofa omofij rua onggaga rufojingki tein si. Ofa omog ejmeg rot efen mar onggaga Ofa oftufu osok gij dedin duga ojgomuja onjoros rusnok rijginaga rot oida Didif bera onggaga duskotu rusnok jeska rerin mar onggaga oska.

²¹ Noba rusnok ebic nomnaga rumoisum gij Ofa si."

²² Nou onnga koma oisa fob, beda rusnok ruroun osnok egens onnga efena ofogog oira gij odou efesi fob fogora ofa enagot mar deika guru, noba eiteij ofou tein. Jefeda Yesus eita eskeira gu osnok egens koma, beda ofa agot mar deika sons noba ek mar deika sons tein.

²³ Rusnok rufoukou onnga rik mar insa koma bera rudou ousaha eteb rot. Jefeda rua ragot moguma oida, "Ofa bera osnok egens koma onnga onjuj jeska raja Daud onnga emen ei?"

²⁴ Nou onnga rusnok ebic Farisi rig rot mar insa koma beda rua ragot oida, "Erek koma guru! Ofa ekemeji efena ofogog jeska rusnok rudou efesi oisouska owesa efek onnga Ofa esma jeska Beelzebul ojgomu."

²⁵ Yesus ejginaga rot mar onnga rua ragot moguma fob, jefeda Ofa agot gu rua oida, "Erek rusnok ebic egens onnga ringker gij monuh egens rimagobuma, beda gij mona kahma bera ebic egens insa koma omorowora rot rua tein. Erek koma tein, erek rusnok onnga ringker gij kota egens era gij mod etma egens rimagobuma, beda kota koma era mod etma egens koma emesiri ojgomu fogora rusnok insa koma rimekebema ojgomu.

²⁶ Beda erek koma tein rot efena ofogog. Erek efena ofogog nomnaga onnga ruroru Bilis risinsa rimagobuma, beda koma erek rua rimekebema tein. Jefeda runofora efek deika guru.

²⁷ Iwa yagot oida Didif dikemeji efena ofogog jeska rusnok rudou efesi oisouska owesa efek onnga Didif disma jeska Beelzebul. Tina gij mona onnga iwa yeyin ruforoker rikemeji efena ofogog jeska rusnok rudou efesi, beda iwa yagot oida rua rinesma owesa

efek jeska Beelzebul rot guru. Jefeda koma orocunc rot oida mar onnga iwa yanggot rot Didif bera enerek tenten guru.

²⁸ Beelzebul eneita owesa efek gu Didif jinaga guru. Tina Efena Ebsi Allah bera onnga eita owesa efek gu Didif jeskaseda dikemeji efena ofogog jeska rusnok rudou efesi. Jefeda koma bera orocunc rot tenten gu iwa oida mona onnga Allah omofoka ereij keingg efen rusnok bera ensaga fog.

²⁹ Erek koma tein, erek osnok egens odou os eita mareibra jeska mod onnga osnok egens enjgineg onnga ofora efek efen, beda sismeni fog bera ofa agei osnok egens onnga ofora efek insa koma, noba erakid efen etma tein ojpgomu. Beda ofa emeita efen mareibra nomnaga jeska efen mod insa koma.

³⁰ Osnok egens onnga onot jera Didif guru, ofa bera onnga eretei rot Didif ojpgomu. Noba osnok egens onnga onofij Didif jeskaseda duroun rusnok skoita Allah guru, beda ofa bera erek osnok egens onnga ekemeji rusnok jeska Allah ojpgomu.

³¹ Didif dagot mar erek insa koma jeska Allah omosuna rot rusnok rerin mar onnga oska nomnaga tein si. Tina erek rusnok ragot mar onnga ofogog osok gij Efena Ebsi, beda Allah onosuna rot rerin mar onnga oska egens koma jinaga guru.

³² Noba erek rusnok ragot mar onnga oska rot Didif, Rusnok Efesa, beda Allah omosuna rot mar insa koma. Tina erek rusnok ragot mar onnga oska rot Efena Ebsi, beda Allah onosuna rot rerin mar onnga oska egens koma jinaga guru."

³³ Beda Yesus agot deika oida, "Mega egens onnga ot gij mebi onnga ofogu rara bera efen efek onnga ongnoska. Noba mega onnga ot gij mebi oska bera

efen efek onnga erek oska tein. Noba erek iwa ik mega efen efek, beda iwa ijginaga rot mega koma efen ofoka erek teinefa.

³⁴ Iwa yeyin idou onnga efesis noba ofogog erek magosu ojgomu. Jeska giskini rusnok ragot rot mar onnga angh gij rudou efesi. Iwa yagot mar onnga erek eriagamaga, tina iwa indemdemi yeyin mar onnga ofogog gij idou efesi ojgomu fob.

³⁵ Osnok egens onnga eita mar onnga oufamofa bera agot rot mar onnga oufamofa eteb onnga angh gij efen odou efesi. Tina osnok egens onnga eita mar onnga ofogog bera agot rot mar onnga ofogog eteb onnga ah gij efen odou efesi tein.

³⁶ Kef bera tenten oida, gij mona onnga Allah ofra mar okum keingg rusnok rot rerin mar onnga oska, beda Ofa omocunc iwa erek oska rot mar nomnaga onnga iwa yanggot fob onnga erek oska tein si.

³⁷ Jeska Allah omocunc rusnok nomnaga erek oska era erek oufamofa si. Noba Ofa omotunggom mar koma oisouska mar onnga rua risinsa ranggot onnga erek oska era onnga erek oufamofa si."

³⁸ Erek koma beda gij mona insa koma bera rua onnga Guru-Guru agama jera rua onnga ebic Farisi rineya ragot gu Yesus oida, "Bua butunggom mar onnga onswos egens nou memefo!"

³⁹ Beda Yesus agot oida, "Iwa onnga ifena ebah gij mona ebeibeyaif bera erek rusnok onnga ofogog eteb. Iwa yuis gu Didif jeskaseda dutunggom mar onswos onnga orocunc rot oida dedin owesa efek onnga en jeska Allah. Tina Didif dineita mar koma nou iwa guru. Allah bera omocunc mar onswos egens gu iwa onnga morototuma erek mar onswos onnga nabi Yunus ek rot sis eteb fob.

⁴⁰ Sis fob bera Yunus eker gij mos eteb efen otkonu efesi gij mona orgomu jera motu orgomu. Beda erek koma tein Didif, Rusnok Efesa, bera dimeker gij mebif efesi nou mona orgomu jera motu orgomu tein.

⁴¹ Gij mona onnga Yunus oftufu gu rusnok Niniwe rot Allah oga, beda rua rimeesa joug rot rerin mar onnga oska. Jefeda gij mona onnga Allah ofra mar okum eteb keingg rusnok rot rerin mar onnga oska, beda rusnok Niniwe insa koma rumocunc iwa irek oska. Noba onnga tenten bera ebeibeyaif iwa ig rot Allah oga jeska osnok egens onnga ofoka ekirsa jeska Yunus fob.

⁴² Noba sis eteb fob bera ojaga egens onnga ofoka ereij keingg monuh eteb bera eja skoita raja Salomo jeskaseda eg rot mar onnga ofa oftufu rot odou onnga ebriyi eteb gij mar. Jefeda gij mona onnga Allah omofra mar okum eteb keingg rusnok rot rerin mar onnga oska, beda ojaga egens insa koma bera omorocunc rot iwa erek oska si. Onnga tenten bera ebeibeyaif iwa ig mar jeska Didif onnga dedin dufoka onnga ekirsa jeska raja Salomo fob."

⁴³ Beda Yesus oftufu mar deika oida, "Gij mona onnga efena ofogog orogna jeska osnok egens odou efesi fob, beda efena ofogog koma ecira gu monuh onnga owowa noba ohca osnok egens jeskaseda eker keingg ofonskos gij efen odou efesi. Tina efena ofogog koma enek osnok egens egema tein onnga adajij guru.

⁴⁴ Beda efena ofogog koma osujohu rot oida omoksons skoita osnok egens onnga ofa engker gij sis fob deika. Beda efena ofogog koma ek rot oida osnok koma efen odou efesi bera erek eskeira eteb deika fob.

⁴⁵ Jefeda efena ofogog koma eja noba oroun efena ofogog cinja erfeka deika onggga erek ofogog ekirsa jeska esinsa. Beda efena ofogog koma nomnaga rijeker morototuma gij osnok egens insa koma odou efesi. Jefeda ebeibeyaif osnok egens insa koma emefera okora eteb ekirsa jeska mona onggga efena ofogog egens engker gij odou efesi. Mar erek koma bera emecirej rusnok onggga riker gij mona ebeibeyaif tein si."

⁴⁶ Askesi Yesus efesij mar gu rusnok rufoukou insa koma ros, beda Ofa efen mosu jera mokoser rinsaga jah suma. Rua rut jah mebah noba rua rudou os riflesij mar jera Yesus.

⁴⁷ Jefeda osnok egens onggga eker gij mod efesi agot gu Yesus oida, "Akeina, bebin mosib jera obkoser rut jah mebah, noba rua rudou os ragot mar jera Bua."

⁴⁸ Beda Yesus oroun oida, "Rusnok onggga erek dedin ameina, era erek dedin edkoser bera erek idu."

⁴⁹ Beda Ofa ek gu efen ruforoker jah suma noba agot oida, "Rusnok kef bera erek dedin ameina jera edkoser.

⁵⁰ Jeska rusnok onggga rita mar onggga Akeina onggga eker gu mebaga odou os rot ojgomu, rua bera erek dedin ameiner jera edkoser jera edieser tein."

13¹ Erek koma beda Yesus orogna jeska mod egens insa koma noba Ofa eja eker gu meren efembra. Ofa eker jah suma noba oftufu mar gu rusnok.

² Rusnok jah suma erek riskemba doska jefeda Ofa oira gij meg egens noba oftufu gu rua jeska meg insa koma. Noba rusnok rut gu meren efembra beda rig mar onggga Yesus oftufu.

³ Ofa era mar onggaa orocunc erek ofoukou jeskasada oftuftu mar gu rua. Ofa agot oida, "Osnok egens eja jeskasada era maat efej erebirma gij efen mekeni.

⁴ Askesi ofa era maat efej insa koma enerebirma ros, beda eneya onggaa ensiri gu moroju. Beda mem rin noba rit maat efej insa koma.

⁵ Beda eneya onggaa ensiri gu mebi onggaa mamu tuturu. Beda maat efej insa koma er ebeirens jeska mebi erek oskiyai orohoh mamu.

⁶ Tina mowa orogna beda edi maat efej insa koma jefeda efej nomnaga, jeska maat efej insa koma ener gij mebi onggaa erek eteb guru.

⁷ Beda maat efej eneya tein onggaa ensiri gij moworug ofogog. Noba moworug ofogog koma er morototuma jera maat efej insa koma, tina eij keingg maat efej jefeda enefek guru.

⁸ Beda maat efej eneya tein onggaa ensiri gu mebi onggaa ofogu rara. Beda maat efej insa koma er erek ongnoska ojgomu noba enjefek erek ofoukou doska. Noba maat efej eneya onggaa ensiri gu mebi ofogu rara bera efen erek ofoukou tein."

⁹ Nou onggaa Yesus emfesij rot mar onggaa orocunc insa koma gu rua oisa fob, beda Ofa agot gu rua oida, "Osnok egens onggaa engg mar onggaa Didif danggot insa kef, ofa osujohu rot mar insa koma efen ofou rot iskusk ojgomuja."

¹⁰ Beda Yesus efen ruforoker rin skoita Ofa noba rua rijeka gu Ofa oida, "Akeina, Bua bira mar onggaa orocunc jeskasada buftuftu mar gu rusnok erek insa koma rot meidu?"

¹¹ Beda Yesus oroun oida, "Didif difesij gu iwa rot teinefa Allah ofoka ereij keingg efen rusnok jeskasada

idou ebriyi gij. Tina mar insa koma efen ofou bera ah jejema jeska rusnok enjgineg ojgomu.

¹² Jeska erek rusnok onnga rudou ebriyi gij mar insa koma fob, bera Allah omofij rua jeskaseda rudou ebriyi gij mar erek eteb ekirsa. Tina erek rusnok rudou enebriyi gij mar koma rot koisoisa enesi, beda mar oskiyai onnga rudou ebriyi gij bera eseseifa jeska rua tein si.

¹³ Gij mona onnga Didif duftuftu mar gu rusnok, beda Didif dira mar onnga orocunc rot ojgomu. Jeska erek rua rik mar onnga Didif dutunggom fob, tina rudou enejginaga rot efen ofou guru. Noba rua rig rot mar onnga Didif duftuftu fob, tina rudou enebriyi gij rot efen ofou tein guru.

¹⁴ Jefeda mar onnga nabi Yesaya anggot sis eteb fob rot rua bera erek tenten ojgomu. Ofa agot oida, 'Rusnok rimeg mar, tina rudou enejginaga rot mar koma efen ofou jinaga guru. Rua rimek mar, tina rudou enebriyi gij mar koma efen ofou guru.

¹⁵ Rerin rudou onnga osumsumu ojgomu, jefeda rua rudou ofoj joug rot mar onnga rimeg jera rimek ojgomu. Erek rineita mar erek koma guru, beda rua rimeg noba rimek mar rot koisoisa si. Beda rudou emebriyi gij mar onnga rua rik jera rig tein. Beda rua rimen skoita Didif Allah, beda Didif dimeita eskeira eteb gu rua si. Tina rua rudobu joug mar koma ojgomu.'

¹⁶ Erek koma tina oufamofa eteb nou iwa onnga irek dedin ruforoker. Jeska iwa idou ejginaga rot mar onnga iwa ik fob. Noba iwa idou ebriyi gij mar onnga iwa ig rot tein fob.

¹⁷ Sis fob, Allah efen nabi-nabi jera efen rusnok enjgineg tein rudou os eteb jeskaseda rik mar onnga

iwa ik gij mona ebeibeyaif fob. Noba rua rudou os eteb jeskaseda rig mar onnga iwa ig gij mona ebeibeyaif fob. Tina rua rinek noba rineg rot mar insa koma guru."

¹⁸ Beda Yesus agot gu efen ruforoker deika oida, "Iwa ig Didif fog, beda dimefesij gu iwa rot mar onnga orocunc insa koma efen ofou.

¹⁹ Maat efej onnga esiri gu moroju bera erek rusnok onnga rig rot teinefa Allah ofoka ereij keingg rusnok. Tina rudou enebriyi gij mar insa koma efen ofou guru. Jefeda Bilis en noba ereni rua fogora runororu mar insa koma deika guru.

²⁰ Maat efej onnga esiri gu mebi onnga mamu tuturu bera erek rusnok onnga rita rudou onnga eskeira gij mona onnga rua rig rot Allah oga onnga oufamofa.

²¹ Tina oga onnga oufamofa insa koma bera enah gij rudou efesi erek ahais guru, noba rua runororu oga insa koma rot ahais tein guru. Jefeda gij mona onnga rusnok enjgineg rita mar onnga oska skoita rua, jeska rua ruroru oga insa koma, beda rua risiri ebeirens rot ojgomu noba runororu oga insa koma deika guru.

²² Maat efej onnga esiri gij moworug ofogog bera erek rusnok onnga rig rot oga onnga oufamofa insa koma. Tina rua rusujohu ekirsa rot mar onnga riteij ah kef efen, noba rudou os ruhoturu mareibra ofoukou ojgomu. Jefeda rua rudou ofoj joug rot oga onnga oufamofa insa koma ojgomu, noba rua rineita mar onnga oufamofa gij riteij ah kef deika guru.

²³ Maat efej onnga esiri gu mebi ofogu rara bera erek rusnok onnga rig rot oga onnga oufamofa insa koma, noba rudou ebriyi gij efen ofou tein. Beda rua

rita mar onggga oufamofa gij rerin riteij ah kef erek mega onggga efen efek ofoukou doska."

²⁴Erek koma beda Yesus era mar orocunc egens deika jeskaseda oftufu gu rusnok. Ofa agot oida, "Gij mona onggga Allah omofoka ereij keingg efen rusnok bera rimek mar erek kef: Gij mona juens osnok egens erefa gandum efej gij efen mekeni.

²⁵Nou motu deis egens beda osnok egens onggga odou ofogog rot ofa en noba erefa mofombra efej fogora oromohoh jera gandum efej tein gij efen mekeni insa koma, beda ofa eja.

²⁶Beda gij mona onggga gandum efej insa koma er fob, noba efen efek fob, beda mofombra efej insa koma er fogora oromohohuma jera gandum efej insa koma tein.

²⁷Erek koma beda rusnok onggga rufij ofa onggga efen mekeni rin skoita ofa beda ragot oida, 'Tuan, sis fob bua birefa gandum efej onggga erek oufamofa ojomu, jefeda mofombra insa koma en jeska guaidu?'

²⁸Beda ofa agot oida, 'Osnok egens onggga odou ofogog rot didif bera enrefa marsi mofombra insa koma fob.' Beda rua rijeka gu ofa oida, 'Budou os oida memef meja jah mekeni noba moku mofombra koma sismeni fog ei.'

²⁹Tina ofa agot gu rua oida, 'Iwa ineita mar erek koma guru. Jeska erek iwa yuku mofombra jeska mebi, beda imoku gandum efej morototuma jera mofombra insa koma ojomu.

³⁰Ongga oufa bera gandum efej jera mofombra er morototuma ojomu. Noba gij mona onggga gandum efen efek fob, beda iwa yuku mofombra nomnaga beda ij mofombra koma gij mah. Beda iwa imohoturu

gandum efek nomnaga noba isah efen efek koma gij dedin gudang ojgomu.' "

³¹ Beda Yesus agot mar onnga orocunc gu rua deika oida, "Mona onnga Allah ofoka ereij keingg rusnok bera erek kef: Osnok egens erefa mega mos efej egens gij efen mekeni.

³² Sismeni bera mega mos insa koma erek efej ai ojgomai. Tina mega mos efej insa koma er erek mega onnga akseij eteb fob. Beda mem ofoukou ojoka efefa gij mega esta insa koma."

³³ Beda Yesus agot mar orocunc juens deika gu rua. Ofa agot oida, "Mona onnga Allah ofoka ereij keingg rusnok bera erek kef: Ojaga egens eita roti efed onnga erek ai oskiyai. Beda ofa orohoh roti efed insa koma jera tepung terigu fogora tepung terigu insa koma efifij erek eteb doska deika fob."

³⁴ Yesus era mar orocunc jeskasada oftufu mar gu rusnok rufoukou ojgomu. Ofa onoftufu mar gu rua rot oga onnga erek giskini jinaga guru.

³⁵ Ofa eita mar erek koma jeskasada mar onnga nabi egens anggot rot sis fob bera emah gij efera fob. Nabi koma agot rot Kristus onnga emen oida, "Didif dimefesij mar onnga erek orocunc gu rusnok ojgomu. Noba oisouska mar orocunc koma bera dimefesij rot mar onnga ah jejema jeska rua sis mona onnga Allah ontunggom mebif fob si."

³⁶ Nou onnga Yesus eja jeska rusnok rufoukou insa koma noba oira gij mod efesi fob, beda Ofa efen ruforoker rin skoita Ofa. Beda rua ragot gu Ofa oida, "Akeina, bagot gu memef rot mar onnga orocunc osok gij gandum efej jera mofombra insa koma efen ofou jeni fog."

³⁷ Beda Yesus agot oida, "Ofa onggga erefa gandum efef insa koma bera Didif, onggga Rusnok Efesa.

³⁸ Noba efen mekeni insa koma bera erek mebif. Noba gandum efef insa koma bera erek Allah efen rusnok. Mofombra efef insa koma bera erek Bilis efen rusnok.

³⁹ Noba ofa onggga erefa mofombra efef bera Bilis. Noba mona onggga rusnok ruhoturu gandum efek insa koma bera erek mona onggga enja ejgwaga. Noba rua onggga ruhoturu gandum efek jera mofombra insa koma bera Allah efen malaikat.

⁴⁰ Erek rusnok insa koma ruku mofombra noba rij gij mah, beda rusnok rimek mar erek koma tein gij mona onggga enja ejgwaga.

⁴¹ Didif, onggga Rusnok Efesa, bera dumobk dedin malaikat-malaikat jeskasada ruhoturu rusnok nomnaga onggga ruftuftu mar onggga oska gu rusnok enjgineg, jera rusnok nomnaga onggga rutunggom mar onggga ofogog tein gu mebif.

⁴² Beda rua rimeij rusnok insa koma nomnaga gij mahmei meren. Beda rua rimeita rifeira okora eteb jah suma si.

⁴³ Beda Allah efen rusnok nomnaga onggga runtunggom mar onggga Ofa odou os rot fob bera rimeker morototuma jera Ofa erek rerin rika Allah si. Noba eisa eteb emejinten rejrej rua tein. Iwa idou ah keingg rot mar insa koma jeskasada idou ebriyi gij ojgomu."

⁴⁴ Yesus agot mar onggga orocunc deika oida, "Mona onggga Allah ofoka ereij keingg rusnok bera erek kef: Gij mona juens osnok egens ek mar onggga efen efera osok eteb gij mekta egens. Mar koma ah jejema jeska rusnok enjgineg. Jefeda ofa era mebi orocohon

mar koma jeskaseda edemdemi fog. Ofa odou efaga ouka eteb rot, jefeda ofa eja noba ohu efen mareibra rot fifi. Beda ofa era fifi insa koma fogora erengk mekta egens koma fob. Jefeda ebeibeyaif mar onnga ofa endemdemi insa koma bera erek ofa efen fob."

⁴⁵ Beda Yesus agot deika oida, "Mona onnga Allah ofoka ereij keingg rusnok bera erek kef: Osnok egens odou os mutiara onnga efen efera osok eteb.

⁴⁶ Noba gij mona onnga ofa ek mutiara egens onnga efen efera osok eteb, beda ofa ohu efen mareibra nomnaga rot fifi sismeni fog. Beda ofa era efen fifi insa koma fogora erengk mutiara egens koma fob."

⁴⁷ Beda Yesus agot deika oida, "Mona onnga Allah ofoka ereij keingg rusnok bera erek kef: Rusnok rineya rij rerin jala gij mei beda rua ruhoturu mos ofoukou.

⁴⁸ Nou onnga runghoturu mos ofoukou fob, beda rua ruksons jah meren efembra jeskaseda rikeba rerin mos insa koma. Mos onnga erek oufamofa bera rua risah gij ember egens. Tina mos onnga erek oska bera rua rij jeska ojgomu.

⁴⁹ Erek koma tein rot mona onnga enja ejgwaga. Allah efen malaikat emekeba rusnok nomnaga onnga rudou ofogog jeska rusnok onnga rudou eriagamaga tein.

⁵⁰ Beda rua rimeij rusnok onnga rudou ofogog insa koma gij mahmei meren. Beda rua rimeita rifea okora eteb jah suma ojgomuja."

⁵¹ Erek koma beda Yesus ejeka gu efen ruforoker oida, "Iwa idou ebriyi gij mar orocunc insa koma efen ofou ei?" Beda rua ragot oida, "Modou ebriyi gij rot fob."

⁵² Beda Ofa agot oida, "Erek koma jefeda orofosut Yahudi efen Guru agama onnga ororu Allah oga fogora rija erek Allah efen ruforoker bera rita mar erek kef: Rua rurka mar onnga ensis jera mar eirirbi onnga efeinah orogna jeska rerin mod efesi ojgomu."

⁵³ Nou onnga Yesus emfesij rot mar orocunc insa koma nomnaga fob, beda Ofa eja jeska monuh insa koma, noba oksons jah efen kota Nazaret.

⁵⁴ Ofa oftufu mar rot Allah oga gij mod onnga rusnok rum riteij gu Allah gij. Noba rusnok onnga ringg mar insa koma bera rudou ousaha eteb rot. Beda rua ragot moguma oida, "Teinefa fogora Ofa odou ebriyi eteb gij Allah oga erek komo. Noba teinefa fogora Ofa otunggom mar onswos ofoukou fob erek komo.

⁵⁵ Jeska Ofa bera Yusuf efen efesa ojgomu. Noba Yusuf bera erek osnok egens onnga otunggom mar jera mega ojgomu. Mimif mijginaga rot efen mosu Maria jera efen mokoser Yakobus, Yusuf, Simon, Yudas tein.

⁵⁶ Noba Ofa efen meyeser onnga ringker gij kota kef tein. Jefeda Ofa eita mar insa koma nomnaga oisouska mar erek meidu."

⁵⁷ Rua rudou eja oska rot Ofa erek koma, jefeda rudou okoja Ofa ojgomu, noba runoruru Ofa guru. Beda Yesus agot gu rua oida, "Giskini bera gij mona onnga Allah efen nabi egens onnga eja jah monuh enjineg, beda rusnok jah suma ruroun ofa ojgomu. Tina gij mona onnga ofa eja jah esinsa efen monuh, beda efen rusnok jera efen ebskir tein rukoja ofa ojgomu."

⁵⁸ Rusnok gij kota Nazaret insa koma runororu Ofa guru, jefeda Ofa onotunggom mar onswos erek ofoukou jah suma guru.

14 ¹ Gij mona insa koma bera raja Herodes onnga ofoka ereij keingg rusnok Yahudi gij monuh Galilea eg mar osok gij Yesus fob.

² Ofa agot gu rusnok ebirfager onnga rufij ofa oida, "Yohanes Pembaptis anggos fob, tina Yesus koma bera erek Yohanes onnga efena ebah sons fob ojgomu. Jeska Ofa efen owesa efek eteb fogora ontunggom mar onnga onswos ofoukou fob."

³ Raja Herodes agot mar erek koma jeska gij mona onnga sis fob bera ofa ofra mokosa Filipus efen mohona onnga ofoka Herodias. Jefeda Yohanes oftufu rot ahais skoita raja Herodes rot oida, "Bua bufra obkosa efen mohona jeska fob, tina mifmin agama erebent agot rot oida koma bera oska eteb!"

⁴ (14:3)

⁵ Jefeda raja Herodes odou os agob Yohanes rot ojgomu, tina ofa emeesa rot jeska rusnok Yahudi rufoukou rusujohu oida Yohanes bera erek Allah efen nabi egens. Jefeda tentarer raha Yohanes gij mod oskusk ojgomu.

⁶ Beda gij mona onnga rusnok ruina maat keingg Herodes nou efen mona onnga mosu engker rot ofa, beda ofa efen mohona Herodias efen efesa ojaga ouka jah raja Herodes jera ebirfager nomnaga rudou. Ofa ouka erek ongnoska yahi jefeda raja Herodes odou eskeira eteb rot ofa.

⁷ Jefeda ofa agen gu ojaga egens insa koma oida, "Budou os meidu tein, beda bagot gu didif ojgomu fogora dimeita gu bua si."

⁸ Erek koma beda ojaga egens insa koma ejeka gu efen mosu Herodias rot mar meidu onnga ofa erejgei jeska raja Herodes. Beda Herodias oroun gu ofa oida, "Buis gu ofa oida, 'Biris Yohanes ebirfaga jeska noba bita gu didif gij mona deisef.' "

⁹ Nou onnga raja Herodes eg rot mar insa koma onnga ojaga egens koma erejgei rot fob, beda ofa odou okum eteb rot. Tina ofa onokoja rot mar onnga ojaga insa koma ois rot guru, jeska ofa anggen rot jah rusnok rufoukou rudou fob.

¹⁰ Jefeda raja Herodes obk efen tentara egens jeskaseda eja noba eris Yohanes ebirfaga jeska, noba orka skoita ojaga egens koma.

¹¹ Beda tentara egens koma oksons noba eita Yohanes ebirfaga onnga ah esij bokor gu ojaga egens insa koma. Beda ojaga egens insa koma orka bokor rot Yohanes ebirfaga gu efen mosu Herodias.

¹² Nou onnga Yohanes efen ruforoker ringg rot oida rusnok riris ofa ogoj fob, beda rua rinjeita Yohanes efaga noba rijesah gij moksu. Beda rua rija noba ragot gu Yesus rot oida rusnok ragob Yohanes fob.

¹³ Nou onnga Yesus engg rot oida rusnok ranggob Yohanes fob, beda Ofa eifef meg egens noba ejeker gu monuh onnga owowa. Rusnok rig rot oida Yesus eja fob jefeda rua rurogna jeska rerin kota noba rija rutoij Ofa. Tina rua ricira gu moroju jah monuh owowa insa koma.

¹⁴ Nou onnga Yesus ojuj jeska meg koma, beda Ofa ek rusnok rufoukou insa koma onnga rururu Ofa jah suma. Jefeda Ofa odou okora rot rua fogora Ofa eita eskeira gu rua onnga marenir.

¹⁵ Gij motu insa koma bera Yesus efen ruforoker rin skoita Ofa noba ragot oida, "Erek moworu fob, noba

mimif miker gij monuh owowa. Jefeda bubk rusnok jah kota-kota jeskaseda rimengk maat nou rimet."

¹⁶ Beda Yesus agot oida, "Enadaij nou rua rija jeskaseda ringk maat guru. Iwa ita maat gu rua jeskaseda rit ojgomu."

¹⁷ Tina rua ragot oida, "Akeina, mefmen roti ofog cinja jera mos orijka ojgomu."

¹⁸ Beda Yesus agot oida, "Beda bita maat koma gu Didif."

¹⁹ Beda Ofa obk rusnok jeskaseda riker gu meskeingg efen. Beda Ofa eita roti ofog cinja jera mos orijka, noba Ofa eyajga gu mebaga. Beda Ofa ois oufamofa gu Allah rot maat insa koma. Beda Ofa ekeba maat insa koma dogdog gu efen ruforoker. Beda ruforoker rikeba maat insa koma gu rusnok rufoukou jah suma.

²⁰ Rusnok koma rint maat onjoros ereya rua fob. Beda Yesus efen ruforoker ruhoturu maat ofod sons deika onggga ok morungga eteb setka kungkob erfeka.

²¹ Noba runer onggga rint maat gij mona insa koma bera erek rufok ribu cinja. Koma erek runofosut rujaga jera riser onggga rit mar gij mona insa koma tein guru.

²² Nou onggga koma oisa fob beda Yesus obk efen ruforoker jeskaseda rifef meg beda rukag rot Ofa jah meren enama. Beda Ofa obk rusnok rufoukou insa koma jah rerin monuh.

²³ Nou onggga Ofa obk rusnok insa koma fob, beda Ofa eja jah memaga ofog oduma jeskaseda om eiteij gu Allah jah suma. Nou motu fob beda Yesus eker gu esinsa jah suma.

²⁴ Beda gij aras insa koma bera Yesus efen ruforoker ricira yes gij meg fob. Mof eteb edi rua doska, noba meren ofog omotoijma erek aksa tein.

²⁵ Erek mona efen en beda Yesus ecira aki esij mei odog skoita efen ruforoker.

²⁶ Nou ongga rua rik Ofa ecira esij mei odog erek koma beda rua ragerir mar rot rudou ongga rimeesa eteb, jeska rua rusujohu rot oida Yesus bera efena ofogog ongga enen skoita rua.

²⁷ Beda Yesus ois gu rua oida, "Iwa inemeesa guru, jeska Didif Yesus bera kef."

²⁸ Beda Petrus agot oida, "Tuhan, erek Bua bera Yesus rot tenten, beda buis gu didif jeskaseda din skoita Bua esij mei odog kef tein."

²⁹ Beda Yesus ois gu ofa oida, "Bua bin." Jefeda Petrus ojuj jeska meg noba ecira esij mei odog skoita Yesus.

³⁰ Tina nou ongga ofa ek rot oida mof eteb ros, beda ofa odou emeesa deika fogora ojuj gij mei. Beda ofa agerir skoita Yesus, "Tuhan, buskotu didif jeska mei ebeirens!"

³¹ Beda ainsa koma tein, Yesus agei Petrus jeskaseda ofa onojuj gij mei guru. Beda Ofa agot, "Teinefa fogora bua bimeesa erek komo. Erek budou onororu Didif rot ahais enesei."

³² Beda goga goira gij meg insa koma, noba ainsa koma tein mof aha toumou.

³³ Beda Yesus efen ruforoker rugif gu Ofa gij meg koma. Rua ragot oida, "Bua bera Allah efen efesa rot tenten."

³⁴ Erek koma beda Yesus jera efen ruforoker rifef meg egens insa koma onjoros rinsaga gu monuh Genesaret.

³⁵ Rusnok jah suma rijginaga rot oida Ofa bera Yesus onnga en fob. Jefeda rua ruis gu rusnok rejrej monuh insa koma jeskaseda rumorka rerin rusnok onnga marenir skoita Yesus.

³⁶ Noba rua onnga marenir rineya ruis gu Yesus jeskaseda rua rahtec Ofa efen meisoufa ojgomu. Beda rua onnga rita mar erek koma bera risma eskeira tein fob.

15 ¹ Nou onnga koma oisa fob beda rusnok Yahudi onnga ebic Farisi jera rineya onnga erek Guru-Guru agama rin jeska kota Yerusalem.

² Beda rua rijeka gu Yesus oida, "Teinefo fogora Bua bebin ruforoker runororu mar onnga mifmin mimower erebent rot sis fob guri. Jeska bebin ruforoker runot rerin ritma jeni mifmin mimower ranggot rot fogora rit maat guru!"

³ Beda Yesus agot gu rua oida, "Tina iwa tein bera ineita mar jeni onnga Allah anggot rot guru jeskaseda iwa iroru mar onnga iwa isinsa yuftuftu rot ojgomu.

⁴ Jeska Allah agot rot oida, 'Yugif gu yeyin ika jera isu ojgomu.' Noba Ofa agot tein oida, 'Rusnok onnga ragot mar ofogog skoita rerin rika jera rusu bera rimagos rot ojgomu.'

⁵ Erek koma noba Allah agot oida, erek rusnok rerin mar onnga adaij nou beda rua rufij rerin riker jera rusir rot ojgomu. Tina rusnok rineita mar koma jeni guru. Jeska iwa yuftuftu rot oida, erek rua rita rerin mar gu Allah ojgomu,

⁶ beda rua runofij rerin riker jera rusir tein deika guru. Jefeda koma erek rua ringkirsa rot mar onnga Allah anggot insa koma rot rerin riker jera rusir jeskaseda ruroru mar onnga iwa yuftuftu rot ojgomu.

⁷ Mar onnga iwa yuftuftu rot bera erek oska eteb ojgomu. Jeska koma onororu jeni Allah oga jinaga guru. Mar onnga nabi Yesaya anggot jeska Allah osok gij iwa sis fob bera erek tenten ojgomu. Jeska ofa agot rot oida,

⁸ 'Allah agot oida, "Rusnok Israel kef rugif gu Didif rot ruga onnga eyejkita, tina rudou efesi onororu Didif rot tenten guru.

⁹ Jefeda enadaij nou rua rugif gu Didif guru. Jeska rua ruftuftu mar onnga en jeska risinsa rudou efesi ojgomu. Noba mar insa koma onofij rua jinaga guru." , "

¹⁰ Erek koma beda Yesus ohoturu rusnok rufoukou jah suma, beda Ofa agot gu rua oida, "Iwa ig duga rot iskusk jeskaseda idou ebriyi gij efen ofou ojgomu.

¹¹ Mar onnga oira gij rusnok rawesi bera onotunggom rua erek oska jeni erek mifmin agama erebent agot rot guru. Tina mar onnga orogna jeska rusnok rawesi bera onnga orotunggom rua erek oska jeni mifmin agama erebent ojgomu."

¹² Erek koma beda Yesus efen ruforoker rin skoita Ofa noba ragot gu Ofa oida, "Mar onnga Bua banggot insa koma otunggom rua onnga ebic Farisi rudou okum rot."

¹³ Beda Yesus agot oida, "Rua onnga Farisi insa koma bera erek marfok onnga Akeina onnga engker gu mebaga enerefa guru. Jefeda Ofa omoku marfok insa koma jeska mebi beda eij jeska si.

¹⁴ Iwa inosujohu rot rua deika guru. Jeska rua bera erek rusnok onnga riteij ofou onnga rinja okag rot rusnok enjgineg onnga riteij ofou tein ojgomu. Jefeda rua nomnaga rimesiri gij mebi efesi si."

¹⁵ Beda Petrus agot oida, "Akeina, mar onnga Bua binefesij insa koma bera efen ofou erek meidu?"

¹⁶ Beda Yesus agot oida, "Iwa idou osumsumu ros ei.

¹⁷ Teinefa fogora idou enebriyi gij mar insa koma efen ofou enesi. Mar koma efen ofou bera erek kef: Mar onnga oira gij rusnok rawesi bera eja jah rerin rutkonu ojgomu. Beda mar koma orogna jeska rua gij mona onnga rua ribeyi rot ojgomu.

¹⁸ Tina mar onnga orogna jeska rusnok rawesi bera en jeska rudou efesi ojgomu. Noba koma bera orotunggom rua erek oska jeni agama erebent agot rot tein.

¹⁹ Jeska mar onnga rusnok rutunggom onnga erek ofogog bera en jeska rudou efesi ojgomu. Mar koma bera erek rusnok onnga ragob rusnok enjgineg ni, risiri jera egema efen mohona ni, risiri morototuma ni, rukoreka mar jeska rusnok enjgineg ni, rucuwei mar gu rusnok enjgineg ni, ruhurmei mar rot rusnok enjgineg ni.

²⁰ Mar insa koma bera onnga otunggom rusnok erek oska ojgomu. Tina erek rusnok rit maat rot rerin ritma onnga runot enesi, beda koma onotunggom rusnok erek oska jinaga guru."

²¹ Nou onnga Yesus emfesij rot mar insa koma oisa fob, beda Ofa eja jah monuh egens onnga angh doida kota Tirus jera kota Sidon.

²² Ojaga egens onnga erek Yahudi guru noba onnga ojga jeska monuh Kana bera eker jah suma. Ofa en skoita Yesus noba ebisa gu Ofa oida, "Bua onnga bera erek raja Daud efen efesa, bucunc budou onnga okora rot didif. Jeska efena ofogog oira gij edesa ojaga egens efen odou efesi fob. Noba efena ofogog

insa koma otunggom ofa fogora eita efera okora eteb rot."

²³Tina Yesus enagot mar egema tein sons skoita ofa guru. Beda Yesus efen ruforoker rin skoita Yesus noba agot gu Ofa oida, "Bua bubk ojaga egens jeskaseda eja jeska mimifo. Jeska ofa ororu mimif noba agerir mar insa koma ojgomuja fogora modou eskes rot fob."

²⁴Beda Yesus agot oida, "Allah obk Didif jeskaseda dufij Ofa efen rusnok Yahudi onnga rirek domba-domba onnga riseiseifa ojgomu."

²⁵Beda ojaga egens koma es okeibi gu mebi jah Yesus odou noba agot oida, "Tuan, bufij didif rot dedin edesa ojaga egens koma ojgomu."

²⁶Beda Yesus agot oida, "Ruforokai rint maat sismeni onjoros maat insa koma ereya rua fog. Jeska enadaj nou rusnok rita maat insa koma jeska ruforokai fogora rij gu mes guru."

²⁷Beda ojaga egens koma agot oida, "Tuan, koma bera tenten ojgomu. Tina mes tein onnga engker gu meja owohoh onnga efen ebirfaga ent maat esij bera et maat oskiyai onnga ensiri jeska meja insa koma tein."

²⁸Beda Yesus agot gu ofa oida, "Ojaga, budou ororu Didif rot tenten fob. Jefeda mar onnga bua buis rot gu Didif bera bimesma si." Beda ainsa koma tein ojaga egens koma efen efesa bera eita eskeira fob.

²⁹Erek koma beda Yesus eja jeska monuh insa koma, beda Ofa ecira gu meren Galilea efembra. Beda Ofa osok gij memaga ofog oduma noba eker jah suma.

³⁰Beda rusnok rufoukou rin skoita Ofa jah suma. Rua ruroun rerin rusnok onnga marenir erek riteij

ofou ni, raki emageima ni, rusnok onnga rinagot mar guru ni, jera rusnok onnga marenir rot mar enjgineg tein ni skoita Yesus. Beda Ofa eita eskeira gu rua nomnaga.

³¹ Rusnok jah suma rudou ousaha eteb jeska rua rik oida rusnok onnga osumu sis fob bera ragot mar ni, rua onnga rifaga oskukwok bera rita eskeira fob ni, rua onnga raki emageima bera ricira raki ni, rua onnga riteij ofou bera rik mar koisoisa ni. Jefeda rua nomnaga risitit mar gu Allah onnga efen rusnok Israel.

³² Erek koma beda Yesus ohoturu efen ruforoker beda agot gu rua oida, "Didif dudou okora rot rusnok jah sif, jeska rua ringker jera Didif jah sif gij mona orgomu fob, tina rinet maat egema tein enesi. Didif dunodou os dubk rua sons jah rerin monuh enesi, jeska rifaga erek eriaga fob, jefeda erek rumosra gu moroju."

³³ Beda Ofa efen ruforoker ragot oida, "Mifmin maat gij monuh onnga owowa kef jeskaseda mita gu rua nomnaga bera enadaij jinaga guru."

³⁴ Beda Yesus ejeka gu rua oida, "Yeyin roti ofog egaho?" Beda rua ragot oida, "Mefmen roti ofog cinja erfeka jera mos erek oskiyai ojgomu."

³⁵ Jefeda Yesus obk rusnok rufoukou jah suma jeskaseda riker gij meskeingg efen.

³⁶ Beda Ofa eita roti ofog cinja erfeka jera mos insa koma noba ois oufamofa eteb skoita Allah rot maat insa koma. Beda Ofa ekeba maat insa koma dogdog skoita efen ruforoker. Beda efen ruforoker rikeba maat insa koma skoita rusnok rufoukou jah suma.

³⁷ Beda rusnok koma nomnaga rit maat onjoros maat ereya rua fob. Beda Yesus efen ruforoker

ruhoturu maat ofod onggga ok morungga eteb erek cinja erfeka.

³⁸ Noba runer onggga rint maat gij mona insa koma bera erek ribu tohkuru. Noba rugun rujager jera riser onggga rint maat insa koma bera erek ekirsa deika.

³⁹ Beda Yesus obk rusnok insa koma sons jah rerin monuh noba Ofa eifef meg egens beda eja jah monuh egens onggga ofoka Magadan.

16 ¹ Rusnok jeska ebic Farisi jera rineya onggga Guru-Guru agama rin skoita Yesus jeskaseda rijeka gu Ofa rot mar. Tina rua rudou os rucunc Ofa erek oska rot mar onggga Ofa otunggom ojgomu. Jefeda rua ruis gu Ofa jeskaseda Ofa otunggom mar onswos egens onggga orocunc rot oida Ofa bera en jeska Allah rot tenten.

² Beda Yesus oroun gu rua oida, "Giskini, nou mona onggga mowa ensiri gij, beda iwa ijginaga rot oida monog bera mos enes guru, jeska mocgoj ofog eja fob.

³ Noba gij rahah beda iwa ijginaga rot oida ai juens mos emes jeska mocgoj ofoukou fob. Iwa ik mebaga beda iwa ijginaga rot oida mos emes era enes guru. Tina teinefa fogora idou enebriyi gij mar onggga Didif dutunggom guri. Jeska mar koma bera orocunc rot oida mona onggga Allah ofoka ereij keingg efen rusnok ensaga doida fob.

⁴ Rusnok onggga riker gij mona ebeibeyaif bera rerin rudou onggga ofogog, noba rua runororu Allah rot tenten jinaga guru. Iwa yuis gu Didif jeskaseda ducunc mar onswos egens nou iwa. Didif dunocunc mar onswos egema tein nou iwa guru. Tina mar onswos egens onggga iwa imek rot bera morototuma erek mar onswos onggga Allah oncunc rot Yunus gij

mona onnga ofa engker gij mos eteb efesi nou mona orgomu sis fob ojgomu." Beda Yesus eja jeska rua.

⁵Gij mona onnga Yesus jera efen rufroker rija jah meren enama, beda rua runorka roti ofog egema deika guru jeska rudou ofoj joug rot.

⁶Beda gij mona insa koma Yesus agot gu rua oida, "Iwa yut joug idou efesi ahais jeska rua onnga ebic Farisi jera ebic Saduki rot rerin roti efed onnga orok mokcin roti ofog nomnaga."

⁷Beda rua ragot moguma oida, "Ofa agot mar erek insa koma jeska memef monorka roti ofog egema guru ei."

⁸Yesus ejginaga rot mar onnga rua ranggot moguma insa koma fob, jefeda Ofa agot gu rua oida, "Teinefa fogora iwa inagot mar moguma osok gij roti erek komo. Erek idou onororu Didif rot tenten enesei.

⁹Iwa idou enebriyi gij rot dedin owesa efek enesei. Gij mona onnga Didif dikeba roti ofog cinja nou rusnok runer rufok ribu cinja sis fob, beda iwa ihoturu maat insa koma efen ofod erek ofoukou doska.

¹⁰Noba gij mona onnga Didif dikeba roti ofog cinja erfeka nou rusnok runer rufok ribu tohkuru fob, beda gij mona insa koma iwa ihoturu maat koma efen ofod ofoukou doska tein.

¹¹Iwa ik mar onswos ofoukou onnga Didif duntunggom fob. Jefeda teinefa fogora iwa idou enebriyi gij rot oida mar onnga Didif danggot insa koma rot bera osok gij rusnok onnga ebic Farisi jera Saduki tein guri. Mar koma bera onosok gij roti guru. Jeska Didif danggot rot oida, iwa yut joug idou efesi ahais rot rua onnga ebic Farisi jera ebic Saduki rot rerin roti efed onnga orok mokcin roti ofog nomnaga."

¹² Erek koma beda Ofa efen ruforoker rijginaga rot oida Ofa eneisisi joug rua rot rusnok ebic Farisi jera ebic Saduki rerin roti efed guru. Tina koma erek orocunc rot oida Ofa eisisi joug rua rot mar onnga ofogog onnga rusnok ebic Farisi jera ebic Saduki ruftuflu rot onnga orok mokcin rusnok rufoukou.

¹³ Yesus eja jah monuh egens onnga angh doida kota Kaisarea Filipi. Beda Ofa ejeka gu efen ruforoker oida, "Rusnok ragot oida Didif, onnga Rusnok Efesa, bera idu?"

¹⁴ Beda rua ruroun oida, "Rineya ragot oida Bua bera Yohanes Pembaptis. Noba rineya ragot oida Bua bera erek nabi Elia onnga efena ebah sons deika fob. Noba rineya ragot oida Bua bera erek nabi Yeremia jeska mona onnga sis eteb fob."

¹⁵ Beda Ofa ejeka gu rua oida, "Iwa isujohu rot oida Didif bera erek idu?"

¹⁶ Beda Simon Petrus oroun oida, "Bua bera Kristus egens koma onnga emen. Jeska Bua bera Allah efen ebesa. Noba Ofa bera onnga efena ebah rot ah aibin."

¹⁷ Beda Yesus agot oida, "Simon, oufamofa eteb rot bua onnga Yona efen efesa! Jeska mar onnga bua banggot insa koma rot tenten bera rusnok enjgineg runoftuflu rot gu bua guru. Tina Akeina Allah onnga engker gu mebaga bera oncunc rot mar insa koma gu bua fob ojomu.

¹⁸ Jefeda Didif dagot gu bua Petrus rot oida bua bimerek mamu egens onnga ahais. Noba Didif dimei dedin Mod Ari egens esij mamu onnga ahais koma si. Noba erek dedin rusnok rineya rimagos tina dedin rusnok Mod Ari rineya onnga rimeker rot ahais ojomuja.

¹⁹ Didif dimeita owesa efek eteb gu bua erek osnok egens onnga agei gusin nou montoj onnga ohoda jeska mebaga. Noba mar onnga bua biyahehir joug gu mebif bera emah erek koma gu mebaga tein. Noba mar onnga bua buitij rot gu mebif bera emah erek koma gu mebaga tein."

²⁰ Erek koma beda Yesus eyahehir joug efen ruforoker jeskaseda rinagot gu rusnok enjgineg rot oida Ofa bera Kristus egens koma onnga emen guru.

²¹ Osokeij mona insa koma bera Yesus agot rot tomnomna gu efen ruforoker oida, "Didif dimeja jah kota Yerusalem. Beda ebirfager Yahudi jera ebirfager imam-imam jera Guru-Guru agama rimeita mar okum gu Didif fogora difera okora eteb rot. Beda rusnok rimagob Didif, tina gij mona orgomu deika, beda Didif dimedebecki sons jeska dagos si."

²² Erek koma beda Petrus agot gu Yesus oida, "Tuhan, didif duis gu Allah jeskaseda rua rineita mar onnga oska insa koma gu Bua jinaga guru!"

²³ Beda Yesus agot teisis gu Petrus oida, "Setan, bua bija jeska Didif ojgomu! Bua budou os biragou joug moroju onnga Didif dimecira gij ojgomu. Mar onnga bua busujohu bera enen jeska Allah guru. Mar koma bera en jeska rusnok rudou efesi ojgomu."

²⁴ Beda Yesus agot gu efen ruforoker oida, "Osnok egens onnga odou os ororu Didif erek dedin oforoka egens, beda ofa onosujohu rot mar onnga ofa esinsa ondou os rot ojgomu guru. Tina ofa esejah odou efesi rot mar onnga eita efera okora gu ofa erek osnok egens onnga ok mega salib fogora eita efera okora noba anggos tumu tein. Ofa eita mar erek koma beda ororu Didif ojgomu.

²⁵ Jeska osnok egens onnga osujohu rot esinsa efen eiteij ah ojgomu noba onoruru Didif guru, beda efen eiteij ah koma emeseiseifa si. Tina erek osnok egens efen eiteij ah eseiseifa, jeska ofa oruru Didif, beda ofa koma emesma eiteij ah onnga ah aibin si.

²⁶ Noba erek osnok egens ohoturu mar ofoukou nou efen eiteij ah kef, tina ofa enesma eiteij ah onnga efeinah guru, jeska ofa onoruru Didif guru, beda mar onnga ofa onghoturu insa koma onofij ofa tein jinaga guru. Ofa eneita mar egema tein jeskaseda eita eiteij ah onnga efeinah insa koma guru.

²⁷ Jeska Didif, Rusnok Efesa, bera emen rot owesa efek jera Akeina efen malaikat-malaikat tein. Beda Didif dimeita ofons gu rusnok oruru jeni rerin rita mar fob.

²⁸ Onnga tenten bera, rusnok rineya rufoukou jah sif rinagos guru onjoros rua rik Didif, Rusnok Efesa, din rot owesa efek erek raja egens."

17 ¹ Gij mona onnga cinja erfens deika beda Yesus oroun Petrus jera Yakobus jera efen mokosa Yohanes jah memaga ofos. Beda rua riker gu risinsa jah suma.

² Yesus efen ruforoker insa koma rik Ofa tina efen efaga eja erek toga. Ofa efen osum eisa eteb erek mowa. Noba efen meisoufa eja erek ebsi komowa onnga eisa eteb tein.

³ Beda rua rik nabi Musa jera nabi Elia jeska mona onnga ensis gefesij mar jera Yesus.

⁴ Jefeda Petrus agot gu Yesus oida, "Tuhan, ongkoska eteb nou mimif miker jah sif. Erek Bua budou os rot beda didif dumotunggom modwok orgomu. Egens nou Bua, egens nou Musa, noba egens nou Elia tein."

⁵ Askesi Petrus agot mar insa koma ros, beda mocgoj ofog egens onggga eisa eteb en noba ocohun rua. Beda rua rig oga egens jeska mocgoj koma onggga agot oida, "Ofa kef bera dedin edesa onggga dudou okora eteb rot. Noba Didif dudou eskeira eteb rot Ofa tein. Iwa ig mar onggga Ofa agot rot ojgomu."

⁶ Nou onggga Yesus efen ruforoker rig oga egens insa koma, beda rua rimeesa eteb rot. Jefeda rua rugif fogora rudou ruohu mebi morototuma ojgomu.

⁷ Beda Yesus en skoita rua noba ahtec rua. Beda Ofa agot oida, "Iwa idebecki ojgomu. Iwa inemeesa rot guru."

⁸ Jefeda rua rik, tina Yesus esinsiyai bera ot jah suma. Rua rinek rusnok egema jah suma deika guru.

⁹ Nou onggga rua runjuj jeska memaga fob, beda Yesus eyahehir joug rua oida, "Iwa inagot rot mar onggga iwa ingk insa koma gu rusnok enjgineg enesi. Tina gij mona onggga iwa ik Didif, Rusnok Efesa, dindebecki jeska dagos fob, beda iwa ifesij rot mar insa koma gu rusnok ojgomu."

¹⁰ Erek koma beda Yesus efen ruforoker rijeka gu Ofa oida, "Akeina, rua onggga Guru-Guru agama ruftuftu rot oida nabi Elia jeska mona onggga ensis bera emen sismeni, beda Kristus egens koma onggga Allah omobk bera emen tein. Rua ruftuftu mar insa koma rot meidu?"

¹¹ Beda Yesus oroun oida, "Ofa onggga erek nabi Elia bera enen rot sismeni ojgomu. Beda ofa omoftuftu rusnok jeskaseda ruroun Kristus egens koma.

¹² Tina onggga tenten bera, osnok egens koma onggga erek Elia bera en fob, noba rusnok runororu ofa guru. Rua rita mar onggga oska skoita ofa ojgomu.

Jefeda erek koma tein, rua rimeita mar onnga oska skoita Didif onnga Rusnok Efesa tein si."

¹³ Erek koma beda Yesus efen ruforoker rudou ebriyi gij rot oida mar onnga Ofa emfesij insa koma bera osok gij Yohanes Pembaptis onnga en rot owesa efek erek nabi Elia efen sis fob.

¹⁴ Nou onnga Yesus jera efen ruforoker insa koma ruksons skoita rusnok gij monuh insa koma, beda osnok orna egens en skoita Yesus noba es okeibi gu mebi.

¹⁵ Beda ofa agot gu Yesus oida, "Tuan, bucunc budou onnga okora rot dedin edesa. Jeska ofa efen efaga oskukwok, beda ofa esiri gij mah era gij mei tein ojgomuja.

¹⁶ Didif duroun ofa skoita bebin ruforoker jeskaseda rua rita eskeira gu ofa. Noba rua rireni, tina guru. Ofa erek oskukwok ojgomu ros."

¹⁷ Beda Yesus agot oida, "Didif dingker jera iwa erek dektek fob, tina iwa idou onororu Didif rot tenten enesei. Iwa ineita mar rot tenten enesei. Iwa iroun oforoka orna egens koma skoita Didif ojgomu."

¹⁸ Beda Yesus agot joug efena ofogog onnga engker gij oforokai egens koma odou efesi, beda ainsa koma tein efen ofogog orogna jeska ofa beda ofa, beda oforoka egens koma eita eskeira fob.

¹⁹ Nou onnga rusnok enjgineg rinja fob, beda Yesus efen ruforoker rin skoita Ofa. Beda rua rijeka gu Ofa oida, "Akeina, memef magot joug efena ofogog insa koma tein fob, tina ofa onougif gu mefmen moga guru. Koma rot meidu?"

²⁰ Beda Yesus agot oida, "Efena ofogog insa koma onougif gu yeyin yuga guru jeska idou onororu mar onnga Didif dumftuftu gu iwa rot tenten enesi. Jeska

erek osnok egens ororu mar insa koma rot tenten erek ai ojgomai tein, beda koma omofij ofa fogora adaij nou ofa otunggom mar meidu onggga ofa odou os rot owesa efek eteb doska si."

²¹ (17:20)

²² Gij mona onggga Yesus jera efen ruforoker rumohoturuma gu monuh Galilea fob, beda Yesus agot gu rua oida, "Gij mona onggga ai juens emen beda rusnok rimaha Didif, Rusnok Efesa skoita rusnok enjgineg.

²³ Beda rua rimagob Didif. Tina gij mona orgomu deika, beda Didif dimedebecki fogora difena ebah sons si." Nou onggga Yesus efen ruforoker ringg mar insa koma beda rudou okum noba okora rot ojgomu.

²⁴ Gij mona onggga Yesus jera efen ruforoker rinsaga gu kota Kapernaum, beda rusnok onggga ruhoturu pajak jeska rusnok Yahudi nou nou Mod Allah bera rin skoita Petrus. Beda rua rijeka gu ofa oida, "Bebin Guru Yesus koma bera oh pajak nou Mod Allah tein ei era gurei?"

²⁵ Beda Petrus oroun gu rua oida, "Yo, Ofa tein oh pajak ojgomu." Nou onggga Petrus oira gij mod efesi jah suma, beda Yesus ejeka gu ofa oida, "Simon Petrus, idu bera onggga oh pajak skoita raja-raja onggga mebif efen? Rua onggga ringker gij raja efen monuh bera ruh pajak gu rua ei, era rusnok rusodosa onggga ringker gij raja-raja rineya rerin monuh bera ruh pajak gu raja-raja ojgomu ei?"

²⁶ Beda Petrus oroun oida, "Rua onggga rusodosa bera ruh pajak ojgomu." Beda Yesus agot oida, "Erek koma jefeda rusnok onggga ringker gij monuh insa koma bera runoh pajak guru.

²⁷ Tina erek mimif munoh pajak skoita rusnok insa koma guru, beda rudou okum skoita mimif ojgomu. Jefeda bua bija jah meren noba buhca mos jah suma. Beda mos onggga bua bagei rot sismeni bera buhoda efen awesi. Beda bua bimek fifi gij mos koma awesi si. Beda bua burka fifi koma gu Mod Allah, beda buh pajak skoita rua ojgomu."

18 ¹ Gij mona insa koma bera Yesus efen ruforoker rijeka gu Ofa oida, "Idu jeska memef bera onggga emesma ofoka onggga aksa ekirsa jeska rineya gij mona onggga Allah ofoka ereij keingg rusnok fob?"

² Nou onggga Yesus eg mar insa koma beda Ofa oroun oforokai egens jeskaseda ot desi Ofa jah rua rudou.

³ Beda Ofa agot gu rua oida, "Onggga tenten bera erek iwa ineita mar rot idou efesi onggga erek ruforokai rerin rudou efesi guru, beda iwa inoira jera rusnok onggga Allah ofoka ereij keingg jinaga guru.

⁴ Jeska rusnok onggga ruin keingg rudou efesi erek eriaga morototuma erek ruforokai rerin rudou onggga eriagamaga, rua bera onggga rimesma rufoka onggga aksa eteb gu mebaga.

⁵ Noba osnok egens onggga oroun rusnok onggga rita mar rot rudou onggga eriaga erek ruforokai rerin rudou onggga eriaga, beda koma erek rua ruroun Didif tein."

⁶ Beda Yesus agot deika oida, "Erek koma tein, erek osnok egens otunggom mar skoita rusnok onggga ruroru Didif erek oforokai egens kef, fogora rua runororu Didif deika guru, beda Allah omofra okum mar eteb doska keingg osnok egens koma rot si. Mar

egema tein onggara rusnok rita gu ofa rot bera enerek mar okum onggara Allah emeita gu ofa rot guru.

⁷ Okum rot rusnok mebif, jeska mar onggara oroku rusnok rudou efesi fogora runoruru Allah oga deika guru bera enahuma ojjomuja. Tina osnok egens onggara otunggom mar insa koma fogora rusnok enjineg runoruru Allah efen oga deika guru, beda Allah omofra okum mar eteb doska keingg ofa insa koma si.

⁸ Noba erek mar onggara angh gij idou efesi oroku iwa jeskasada ira yeyin itma irotunggom mar onggara oska, beda isuna rot mar insa koma jeska idou efesi sismeni fog ojjomu. Koma erek osnok egens onggara eris efen etma jeskasada eneita mar onggara oska insa koma guru. Erek koma tein, erek mar onggara angh gij idou efesi oroku iwa jeskasada icira yaki jah monuh enjineg fogora itunggom mar onggara oska, beda iwa isuna rot mar insa koma jeska idou efesi sismeni fog ojjomu. Koma erek osnok egens onggara eris efen aki jeskasada onotunggom mar onggara oska insa koma guru. Oufamofa ekirsa rot rua insa koma onggara riris ritma era raki egens jeskasada rineita mar onggara oska guru. Jeska rua bera onggara rimesma eiteij ah onggara efeinah ojjomu. Jeska rusnok onggara runosuna rot mar onggara oska insa koma jeska rudou efesi rot sismeni fog guru, tina rua rururu mar koma ojjomu, beda Allah emeij rua gij mahmei meren rot si.

⁹ Noba erek mar onggara angh gij idou efesi oroku iwa jeskasada ita mar onggara oska onggara iwa ik gu iteij, beda iwa isuna rot mar insa koma jeska idou efesi sismeni fog ojjomu. Koma erek osnok egens onggara oku efen eiteij egens jeskasada eneita mar onggara oska onggara ofa ek guru. Iwa itunggom mar

erek koma tein jeskaseda imesma eiteij ah efeinah ojgomu. Beda Allah eneij iwa gij jah mahmei meren guru."

¹⁰ Beda Yesus agot deika oida, "Jefeda iwa inocunc idou onnga oska skoita rusnok onnga rita mar rot rudou onnga eriagamaga erek oforokai egens kef guru. Jeska malaikat-malaikat onnga runt joug rusnok insa koma bera rerin owesa efek jeskaseda riflesij rot mar teisis skoita Allah gu mebaga osok gij mar insa koma."

¹¹ (18:10)

¹² Beda Yesus agot rot mar orocunc erek kef oida, "Osnok egens ont joug efen domba-domba onnga erek wuntin egens. Tina ofa efen domba egens onnga eja eseiseifa jeska ofa. Beda ofa odou okora eteb rot domba egens koma jefeda ofa eja jeska domba-domba setka cinja tohkuru noba cinja tohkuru insa koma, beda ofa ohca domba egens onnga eseiseifa.

¹³ Gij mona onnga ofa ek efen domba egens koma, beda ofa odou efaga ouka eteb rot domba egens onnga ofa ensma sons fob.

¹⁴ Erek koma tein, dedin Akeina onnga eker gu mebaga bera odou os rot oida efen rusnok erek ai egens tein, onnga rudou eriaga erek ruforokai rerin, jeskaseda rineja eseiseifa guru."

¹⁵ Beda Yesus agot deika oida, "Erek yeyin ihuj egens onnga eita mar onnga oska skoita iwa, beda iwa ija skoita ofa noba yagot gu ofa rot mar insa koma ojgomu. Noba erek ofa oitij rot mar onnga iwa yanggot rot, beda koma erek imohujma sons deika fob.

¹⁶ Tina erek ofa okoja rot mar onggga iwa yanggot gu ofa rot ojgomu, beda iwa ija sons skoita ofa morototuma jera osnok egens era egeka deika jeskaseda ifesij mar jera ofa rot ojgomu. Ita mar erek koma jeskaseda goga onggga insa koma tein goftuftu gu osnok egens koma rot efen mar onggga oska tein. Jeska koma ororu jeni erek runggu gij Mar Efeyi Ebsi rot fob.

¹⁷ Noba erek ofa onoitij rot mar onggga goga goftuftu rot gu ofa guru, beda iwa ifesij rot ofa efen mar onggga oska insa koma skoita rusnok nomnaga gij Mod Ari. Noba erek ofa onoitij rot mar onggga rusnok Mod Ari ruftuftu gu ofa rot efen mar onggga oska guru, beda iwa ibes ifaga jeska ofa morototuma erek iwa ibes ifaga jeska rusnok onggga rinejginaga rot Allah guru, era erek iwa ebes ifaga jeska rusnok onggga ruhoturu pajak nou raja Kaisar tein ojgomu."

¹⁸ Beda Yesus agot gu efen ruforoka deika oida, "Didif dita owesa efek gu iwa jeskaseda mar onggga iwa iyahehir joug rot gu mebif bera angh erek koma gu mebaga tein. Noba mar onggga iwa yuitij rot gu mebif bera angh erek koma gu mebaga tein.

¹⁹ Noba onggga tenten bera, gij mona onggga gosnok gegeka jeska iwa gom geiteij morototuma rot mar egens gu Allah, beda dedin Akeina onggga engker gu mebaga bera emeita mar insa koma nou goga si.

²⁰ Jeska gij mona onggga gosnok gegeka era rusnok rugomu rum riteij morototuma rot mar egens gu Allah, beda Didif diker gu rua rifekesa gij mona insa koma tein."

²¹ Nou onggga koma oisa fob beda Petrus en skoita Yesus noba ejeka gu Ofa oida, "Tuhan, erek dedin edohuj egens onggga otunggom mar onggga oska

skoita didif fob, noba ofa eita mar koma ofosma ofoukou deika, beda didif dusuna rot ofa efen mar onnga oska insa koma erek ofosma egaho fogora dunosuna rot deika guru. Didif dusuna rot mar insa koma erek ofosma cinja erfeka ei?"

²² Beda Yesus oroun gu ofa oida, "Erek bua busuna rot ofa efen mar onnga oska erek ofosma cinja erfeka ojgomu, beda koma tein enadaij enesi. Bua bunofosut rot ofosma egaho erek koma guru. Tina busuna rot efen mar onnga oska koma ojgomuja ojgomu.

²³ Jeska Allah ofoka ereij keingg rusnok erek kef: Gij mona juens bera raja egens ejeka joug efen ruforoker onnga rira ofa efen fifi sis fob jeskaseda rita sons gu ofa.

²⁴ Rusnok ruroun oforoka egens jeska rua insa koma skoita raja egens koma. Oforoka egens koma era raja efen fifi erek juta ofoukou.

²⁵ Tina oforoka egens koma efen fifi enadaij nou oh sons skoita raja egens koma jinaga guru. Jefeda raja egens koma oga ojga rot oida omohu ofa jera efen mohona jera efeser jera efen mareibra nomnaga tein skoita rusnok enjgineg jeskaseda esma efen fifi insa koma sons.

²⁶ Erek koma beda oforoka egens koma es okeibi gu mebi beda erejgei gu raja egens koma oida, 'Tuan, bucunc budou efesi onnga okora rot didif fogora biker joug gu mona egema deika, beda didif dimedaga bebin fifi nomnaga sons gu bua si.'

²⁷ Beda raja egens koma odou okora rot ofa jefeda ofa osuna rot mar okowu insa koma onnga ah gu oforoka egens koma. Jefeda ofa enedaga fifi insa

koma sons deika guru. Beda ofa obk oforoka egens koma sons jah efen mod ojgomu.

²⁸ Erek koma beda oforoka egens koma eja noba orodosu efen mohuj egens onnga era ofa efen fifi erek oskiyai sis fob. Beda ofa agei efen mohuj egens insa koma rot ahais beda ois gu ofa oida, 'Bua bidaga dedin fifi sons ebeibeyaif ojgomu!'

²⁹ Beda mohuj egens koma esiri gu mebi beda erejgei gu oforoka egens koma oida, 'Edohuj, bucunc budou onnga okora rot didif ai juens deika, beda didif dimedaga bebin fifi sons gu bua si.'

³⁰ Beda oforoka egens koma okoja rot mar onnga efen mohuj erejgei insa koma ojgomu. Tina ofa ois gu tentara egens jeskaseda ekris efen mohuj egens koma jah mod oskusk ojgomu. Beda ofa ah gij mod oskusk onjoros ofa oh oforoka egens efen fifi sons fob.

³¹ Nou onnga ruforoker enjgineg rig rot mar onnga ofa otunggom skoita efen mohuj egens insa koma fob, beda rua rudou okum eteb rot ofa. Jefeda rua rija skoita raja egens insa koma noba rifesij rot mar onnga oforoka egens koma ontunggom fob.

³² Jefeda raja egens koma ois gu oforoka egens koma jeskaseda oksons skoita ofa. Beda raja koma etaha joug ofa oida, 'Bua bera erek dedin oforoka egens onnga oska ojgomu! Neeka bera didif dusuna rot mar okowu onnga angh gu bua, jeska bua birejgei gu didif rot ojgomu.

³³ Didif duncunc dudou onnga okora rot bua fob, tina bua bunocunc budou onnga okora rot bebin obohuj egens koma guri!'

³⁴ Raja egens koma otkonu oska eteb skoita efen oforoka egens insa koma. Jefeda ofa obk ofa jah mod

oskusk jeskaseda ofa eker jah suma onjoros ofa oh raja efen fifi insa koma nomnaga sons fob ojomu."

³⁵ Beda Yesus agot deika oida, "Erek koma jefeda, erek iwa inosuna rot mar onnga oska onnga yeyin ihujir runtunggom skoita iwa fob guru, beda dedin Akeina onnga engker gu mebaga bera onosuna rot iwa yeyin mar onnga oska jinaga tein guru."

19 ¹ Nou onnga Yesus oftufu rot mar insa koma oisa fob, beda Ofa eja jeska monuh Galilea beda ecira jah monuh Yudea onnga ah gu mei Yordan enama.

² Rusnok rufoukou rururu Ofa gij mona insa koma, jefeda Ofa eita eskeira gu rua onnga marenir jah suma.

³ Rusnok Yahudi rineya onnga ebic Farisi rudou os rijeka joug Yesus jeskaseda rucunc Ofa erek oska rot mar onnga Ofa oroun gu rua ojomu. Jefeda rua rijeka gu Ofa oida, "Akeina, oisouska mifmin agama erebent bera runer ribes rerin ruhoner jeni risinsa rudou os rot ei era gurei?"

⁴ Beda Yesus oroun gu rua oida, "Iwa ik mar egens onnga runngu gij Mar Efeyi Ebsi sis fob juens deika ojomu. Jeska mar egens koma agot rot oida gij mona onnga sismeni fob bera Allah otunggom runer jera rujager.

⁵ Beda Allah agot oida, 'Erek koma jefeda orna egens emeja jeska efen meka jera mosu noba Ofa eja erek egens jera efen mohona.'

⁶ Jefeda goga geneker rot godou onnga egeka deika guru. Tina godou efesi eja erek egens fob. Noba Allah bera onnga ebiedi goga godou erek egens fob. Jefeda enadaij nou rusnok enjgineg rita mar onnga

orotunggom goga fogora gemekebema deika jinaga guru."

⁷ Beda rua onnga ebic Farisi insa koma rijeka gu Yesus deika oida, "Tina sis fob bera Musa agot gu mifmin mimower rot oida runer rugu gij surat egens onnga oncunc rot oida ofa ebes efen mohona, beda gemekebema ojomu. Musa anggot mar insa koma rot meidu?"

⁸ Beda Yesus oroun oida, "Musa oitij rot oida yeyin imower ribes rerin ruhoner jeska rua ribirfaga ombrera ojomu. Tina Allah onodou os mar erek koma gij mona onnga Ofa otunggom rusnok guru.

⁹ Jefeda erek orna egens efen mohona onnga ensiri jera orna egens enjineg, noba ofa ebes efen mohona insa koma rot, beda koma onoska guru. Erek koma tina erek orna egens ebes efen mohona erek rourou ojomu, noba ofa oskotu mohona onnga efeinah deika, beda ahah Allah eiteij koma bera erek ofa jera efen mohona onnga efeinah gesiri morototuma ojomu fob."

¹⁰ Beda Yesus efen ruforoker ragot oida, "Erek koma jefeda onnga oufa ekirsa bera runer runoskotu rujager guru."

¹¹ Beda Yesus oroun oida, "Enadaij nou runer nomnaga riker fogora runoskotu mohona guru. Tina rua onnga risma owesa efek jeska Allah bera rerin owesa efek rot fogora runoskotu rujager guru.

¹² Jeska runer rineya bera runoskotu arja oisouska mar onnga erek toga toga. Runer rineya bera rifaga rineja erek egens jera ojaga egens guru, jeska rerin rifaga onnga enadaij nou guru. Noba rineya bera riris rerin rici ofongga jeska fob ojomu, jefeda runoskotu arja guru. Noba runer rineya runoskotu arja guru

jeskaseda rua rufij Allah ojgomu. Jefeda erek runer rerin owesa efek jeskaseda ruroru mar erek insa koma, beda rua rita mar erek koma fogora runoskotu rujager guru."

¹³ Rusnok rineya rurka rerin ruforoka rifes gu Yesus jeskaseda Ofa aha efen etma esij rua fogora ois gu Allah jeskaseda Ofa eita oufamofa gu ruforoka rifes insa koma. Tina Yesus efen ruforoker ritaha joug rusnok insa koma jeskaseda ruroun ruforoker koma jeska Ofa ojgomu.

¹⁴ Beda Yesus agot oida, "Iwa ineragou joug ruforoka rifes koma guru, tina yuitij rot rua rin skoita Didif ojgomu. Jeska rusnok onnga rita rudou efesi erek ruforoka rifes insa kef rerin rudou efesi bera rumoira jera rusnok onnga Allah ofoka ereij keingg."

¹⁵ Beda Ofa aha efen etma esij ruforoka rifes insa koma jeskaseda Allah eita oufamofa gu rua. Beda Ofa obk rua sons jah rerin mod.

¹⁶ Gij mona egema deika bera oforoka orna egens en skoita Yesus. Beda ofa agot oida, "Akeina Guru, didif dita mar onnga oufamofa erek meidu jeskaseda disma eiteij ah onnga efeinah?"

¹⁷ Beda Yesus oroun oida, "Bua bijeka gu Didif osok gij mar onnga erek oufamofa rot meidu? Allah ojgomu bera onnga oufamofa. Bua buroru mar nomnaga onnga Ofa anggot rot, beda bua bimesma eiteij ah onnga efeinah si."

¹⁸ Beda ofa ejeka gu Yesus oida, "Mar onnga Allah anggot rot bera erek meidu?" Beda Yesus oroun oida, "Allah agot oida inagob rusnok enjgineg guru ni, inesiri morototuma guru ni, inoukoreka mar guru ni, inohurmei mar rot rusnok enjgineg guru ni,

¹⁹ yugif gu yeyin iker jera isir ni, ita idou onnga okora rot yeyin ihujir morototuma erek idou okora rot isinsa ni."

²⁰ Beda orna egens koma agot oida, "Didif duroru mar insa koma nomnaga erek jeni fob. Jefeda didif dita mar egema tein erek meidu?"

²¹ Beda Yesus agot gu ofa oida, "Erek bua budou os bita mar onnga oufamofa rot tenten, beda buhu bebin mareibra nomnaga ojgomu. Beda bikeba bebin fifi insa koma gu rusnok onnga rufojingki ojgomu. Bita mar erek koma beda bua bimesma bufons onnga ongnoska eteb gu mebaga si. Beda buroru Didif ojgomu."

²² Nou onnga orna egens engg rot mar insa koma onnga Yesus anggot gu ofa fob, beda ofa oksons jah efen mod rot osum oskusk ojgomu. Jeska ofa bera erek orna mei ahta eteb.

²³ Beda Yesus agot gu efen ruforoker oida, "Ongga tenten bera okum eteb nou rusnok onnga ruisum gij rerin mareibra ofoukou jeskaseda ruiru jera rusnok onnga Allah ofoka ereij keingg.

²⁴ Didif dagot juens deika oida, okum eteb nou unta efaga egens oira mohunu mos esta. Tina okum ekirsa nou rusnok onnga ruisum gij rerin mareibra ofoukou jeskaseda ruiru jera rusnok onnga Allah ofoka ereij keingg ojgomu."

²⁵ Nou onnga Yesus efen ruforoker rig rot mar insa koma, beda rua rudou ousaha eteb. Jefeda rua ragot oida, "Jefeda Tuhan, idu bera omoira jera rusnok onnga Allah ofoka ereij keingg erek komo?"

²⁶ Beda Yesus orumba gij rua beda agot oida, "Tenten, oisouska rusnok risinsa rerin owesa efek

bera enadaij guru. Tina oisouska Allah efen owesa efek bera rusnok rimeita eiteij ah onnga efeinah si."

²⁷ Beda Petrus agot oida, "Tuhan, memef maha mefmen mar nomnaga jah fob jeskaseda mororu Bua ojomu. Jefeda memef memesma mar erek meidu?"

²⁸ Beda Yesus agot gu rua oida, "Kef bera tenten oida, gij mona onnga Didif, Rusnok Efesa, dingker gu mebaga jeskaseda dufoka ereij keingg rusnok rot dufoka onnga aksa eteb, beda iwa onnga irek dedin ruforoker rufok setka kungkob erfeka bera imeker jera Didif jah suma tein. Beda iwa imofoka ereij keingg rusnok jeska Yahudi efen ebic setka kungkob erfeka si.

²⁹ Rusnok nomnaga onnga raha rerin mod ni, mokoser jera meyeser ni, meka jera mosu ni, riser ni, rerin mekeni ni, jeskaseda ruroru Didif ojomu, beda rua rimesma mar insa koma nomnaga rot ofosma wuntin egens ekirsa deika gij rerin riteij ah ainsa kef. Noba rua rimesma eiteij ah onnga ah aibin ojomuja tein.

³⁰ Tina rusnok onnga ruhca rufoka onnga aksa gij mona ebeibeyaif bera runofoka aksa gij mona onnga emen deika guru. Noba rusnok onnga runohca rufoka onnga aksa gij mona ebeibeyaif guru, rua bera rimesma rufoka onnga aksa gij mona onnga emen gij mona kahma si."

20¹ Yesus efesij rot mar onnga orocunc egens oida, "Mona onnga Allah ofoka ereij keingg rusnok bera erek kef: Gij mona juens erek rahah tentena osnok egens bera eja jeskaseda ruhca rusnok nou rufij ofa gij efen mekeni.

²Ofa oitij nou oh rusnok koma rerin rufons erek fifi perak egens gij mona egens erek giskini. Beda ofa obk rua jeskaseda rifarur gij efen mekeni anggur.

³Erek aras orgomu deika beda ofa eja jah pasar. Beda ofa ek rusnok egema deika jah suma onggga rerin rifarur enah guru.

⁴Jefeda ofa agot gu rua oida, 'Iwa tein ija noba ifarur gij dedin mekeni, beda didif dumoh yeyin ifons onggga erek adaij nou si.'

⁵Beda rua tein rija noba rifarur gij osnok egens koma efen mekeni. Erek mowa ot deis, beda ofa obk rusnok egema deika jeskaseda rifarur gij efen mekeni. Noba erek moworu fob, beda ofa obk rusnok egema deika jeskaseda rifarur gij efen mekeni.

⁶Beda gij moworu insa koma erek aras cinja fob beda ofa ek rusnok egema deika gu pasar onggga rerin rifarur enah guru. Beda ofa agot gu rua oida, 'Iwa iker jah sif erek dektek fob rot meidu?'

⁷Beda rua ragot gu ofa oida, 'Rusnok runofra memef jeskaseda mefarur nou rua enesi.' Beda ofa agot oida, 'Jefeda iwa ija gu dedin mekeni beda ifarur jah suma nou didif ojgomu.'

⁸Ai juens deika beda erek motu fob. Jefeda osnok egens koma ois gu efen oforoka egens onggga ot joug rusnok onggga rifarur gij efen mekeni. Ofa agot gu efen oforoka egens koma oida, 'Buhoturu rusnok onggga rimfarur gij dedin mekeni fob, beda buh rerin rufons gu rua. Buh rufons skoita rua onggga rusokeij rifarur deisef erek moworu rot sismeni fog. Beda buh rufons skoita rua onggga rusokeij rifarur deisef erek mowa ot deis fob. Nou onggga koma oisa fob, beda buh rufons skoita rua onggga rusokeij rifarur deisef erek rahah tentena fob.'

⁹ Beda rusnok onggga rusokeij rifarur erek aras cinja gij moworu fob bera risma fifi perak egens erek rerin rufons.

¹⁰ Jefeda rua onggga rusokeij rifarur gij rahah tentena bera rusujohu rot oida rua rimesma fifi ekirsa jeska rua insa koma onggga rifarur erek mona estir si. Tina oforoka egens koma oh rua rerin rufons erek fifi perak egens tein ojgomu.

¹¹ Rua rita rerin rufons insa koma rot rusum oskusk. Beda ruga erahah moguma rot jera osnok egens koma onggga efen mekeni.

¹² Rua ragot oida, 'Rusnok koma bera rifarur gij bebin mekeni deisef erek aras egens ojgomu. Tina memef mefarur rot ahais gij bebin mekeni erek mona aksa eteb deisef fobo. Teinefa fogora rua risma rufons onggga erek edamokuma jera mefmen mofons tein erek komo!'

¹³ Beda osnok egens koma oroun gu rua oida, 'Edohuji, didif dunorokrusa iwa rot yeyin ifons insa koma jinaga guru. Jeska rahah insa koma bera didif dagot gu iwa rot oida dumoh yeyin ifons erek fifi perak egens nou mona egens, noba iwa yuitij rot ojgomu fob.

¹⁴ Jefeda iwa ita yeyin ifons insa koma noba ija jah yeyin mod rot idou onggga eskeira ojgomu. Erek didif dudou os dita rusnok onggga rifarur gij mona estir fifi perak egens tein, beda enadaij nou iwa ita idou onggga oska skoita didif rot guru. Jeska didif duga eris rot mar insa koma ojgomu. Jefeda iwa ineita idou onggga ejisei rot rua jeska didif ducunc dudou onggga oufamofa skoita rua erek koma guru.' "

¹⁵ (20:14)

¹⁶ Beda Yesus agot rot omoisa oida, "Jefeda rusnok onnga ruhca rufoka onnga aksa gij mona ebeibeyaif bera gij mona onnga emen runofoka aksa deika guru. Noba rusnok onnga runohca rufoka onnga aksa gij mona ebeibeyaif guru bera rimesma rufoka onnga aksa gij mona kahma onnga emen si."

¹⁷ Askesi Yesus ecira jah kota Yerusalem, beda Ofa ohoturu efen ruforoker rufok setka kungkob erfeka ojgomu jeskaseda efesij mar gu rua.

¹⁸ Ofa agot oida, "Iwa ig Didif duga rot iskusk fog. Ebeibeyaif mimif minja jah kota Yerusalem. Beda rusnok jah suma rimaha Didif, Rusnok Efesa, gu ebirfager imam-imam jera ebirfager Guru-Guru agama si. Beda rua rumoga ojga rot oida Didif dagos ojgomu.

¹⁹ Beda rua rimaha Didif skoita rusnok onnga Yahudi guru. Rua koma bera rifena omoskoreta rot Didif ni, rimer marfeb rimangha Didif ni, beda rua rumotob Didif tumu mega salib ni, beda dimagos si. Tina gij mona orgomu deika fob, beda Didif dimedebecki sons jeska dagos si."

²⁰ Zebedeus efen mohona en skoita Yesus morototuma jera ofa efen efeserga Yakobus jera Yohanes. Beda ofa ougif gu Yesus noba agot oida ofa odou os erejgei Yesus rot mar egens.

²¹ Beda Yesus agot gu ofa oida, "Bua budou os meidu?" Beda ofa agot oida, "Akeina, bagen gu didif rot oida dedin edeserga egens bera geker gu bugnosk noba gegema geker gu bigris gij mona onnga Bua bufoka ereij keingg rusnok erek raja fob."

²² Beda Yesus agot gu goga oida, "Goga godou enebriyi gij mar insa koma onnga gegang gosou erejgei gu Didif rot enesi. Goga goitij rot geita gefera okora

eteb erek Didif dimeita difera okora eteb tein ei?"

Beda goga gagot oida, "Magef maitij rot maita mar erek koma tein."

²³ Beda Yesus agot gu goga oida, "Tenten, gij mona kahma beda goga gemeita gefera okora erek Didif si. Tina Didif dinagot rot idu onnga engker gu dugnosk jera digris guru. Jeska Allah esinsiyai bera onnga omocunc rot idu onnga emeker gu dugnosk jera onnga emeker gu digris."

²⁴ Nou onnga Yesus efen ruforoker rufok setka onnga enjineg rig rot mar insa koma fob, beda rua rudou okum skoita goga koma.

²⁵ Jefeda Yesus ohoturu efen ruforoker nomnaga beda agot gu rua oida, "Iwa ijginaga rot oida rusnok onnga Yahudi guru rerin ebirfager onnga rut keingg rusnok koma rot rerin owesa efek eteb. Noba rua rufoka ereij keingg rusnok koma rot rufoka onnga aksa eteb tein.

²⁶ Tina iwa ineita mar jah gu ifekesa erek ribirfager insa koma rita mar guru. Onnga tenten bera, osnok egens jeska iwa ifekesa onnga odou os esma ofoka onnga aksa jeska Allah, beda ofa oin keingg odou efesi sismeni fog, fogora ofij rusnok enjineg tein.

²⁷ Noba osnok egens onnga odou os jeskaseda Allah ofra efen ofoka erek aksa ekirsa jeska rineya, beda ofa ofij rusnok nomnaga ojgomu.

²⁸ Jeska Didif, Rusnok Efesa, dinen jeskaseda rusnok enjineg rufij Didif ojgomu guru. Tina Didif din jeskaseda dufij rusnok enjineg. Noba Didif tein din jeskaseda daha disinsa gu rusnok onnga rufogog fogora rimagob Didif. Beda oisouska mar koma bera rusnok rufoukou rimesma eiteij ah onnga ah aibin."

²⁹ Nou onnga Yesus jera efen ruforoker rinja jeska kota Yerikho, beda rusnok rufoukou ruroru Ofa tein.

³⁰ Gij mona insa koma bera gosnok gegeka onnga geiteij ofou gengker gu moroju efembra. Rua rig jeska rusnok enjgineg oida ai juens beda Yesus emerabj goga. Jefeda goga gois rot goga eteb oida, "Tuano! Bua onnga bunjuj jeska raja Daud, bucunc budou onnga okora rot magefo!"

³¹ Rusnok enjgineg jah suma ritaha joug goga jeskaseda goga geker toumou ojomu. Tina goga gois rot goga onnga eteb ekirsa deika oida, "Bua onnga bunjuj jeska raja Daud, bucunc budou onnga okora rot magefo!"

³² Beda Yesus ot jah suma noba ois gu goga jeskaseda gen skoita Ofa. Beda Ofa agot gu goga oida, "Goga godou os jeskaseda Didif dita mar meidu nou goga?"

³³ Beda goga goroun oida, "Tuan, magef madou os jeskaseda Bua bita eskeira gu maiteij fogora mak mar ojomu."

³⁴ Yesus odou okora rot rua, jefeda Ofa ahtec goga geiteij. Beda ainsa koma tein goga geiteij erek eskeira noba gek mar fob. Beda goga tein gororu Ofa.

21 ¹ Yesus jera efen ruforoker rinsaga gu kota Betfage jera kota Betania onnga angh gu memaga ofos Zaitun. Kota egeka koma ah doida kota Yerusalem. Beda Yesus obk efen goforoka gegeka jeskaseda geja gokag rua.

² Ofa agot gu goga oida, "Goga geja gokag memef modou jah kota Betfage onnga angh jah kendeja. Nou onnga goira gij kota koma, beda goga gemek keledai egens onnga rusnok runcoka morototuma

jera efen efer egens tein. Beda gosuwa keledai egeka koma, noba goroun skoita Didif.

³ Noba erek rusnok rijeka gu goga rot mar onga gotunggom koma, beda gagot gu rua oida, 'Akeina ocosu rot ojgomu.' Beda rua rumoitij rot si."

⁴ Mar insa koma ecira jeni erek koma jeskasada mar onga nabi egens anggot gij Mar Efeyi Ebsi sis fob bera emah gij efera fob. Ofa agot rot oida,

⁵ "Bagot gu rua onga kota Sion oida, 'Iwa ik, jeska yeyin raja egens emen! Ofa oin keingg efen ofoka noba ecira esij keledai egens jera keledai efen efer egens tein.' "

⁶ Jefeda Yesus efen goforoka gegeka insa koma geja noba gotunggom mar koma jeni erek Yesus anggot rot fob.

⁷ Beda goga goroun keledai egens koma jera efen efer egens tein skoita Yesus. Noba rua raha meifeti esij keledai egens koma ejmeg, beda Yesus eifef esij keledai egens koma. Beda Yesus eifef keledai efer egens insa koma.

⁸ Askesi keledai koma enecira rot Yesus ros, beda rusnok rufoukou ruhoda rerin mei efeti noba ruosu moroju onga Yesus encira gij. Noba rua tein riris ayug efeyi eteb jeskasada ruosu moroju nou keledai encira rot Yesus gij. Rua rita mar erek koma jeskasada ruocunc rot oida rurougif gu Yesus erek raja egens.

⁹ Noba rusnok rufoukou onga rincira rukag rot Yesus jera rusnok rufoukou onga rutoij Yesus tein ruis rot ruga eteb oida, "Misitit Ofa onga onjuj jeska raja Daud! Muis gu Allah jeskasada Ofa eita oufamofa eteb skoita Ofa onga en oisouska Tuhan efen ofoka.

Muis oufamofa eteb skoita Allah onnga efen ofoka aksa eteb!"

¹⁰ Nou onnga Yesus oira gij kota Yerusalem beda rusnok rufoukou gij kota insa koma rifesij mar ofoukou moguma osok gij Ofa. Rua rijeka moguma oida, "Ofa kef onnga enen bera idu?"

¹¹ Beda rineya ruroun oida, "Ofa bera nabi egens koma jeska kota Nazaret onnga angh gij monuh Galilea!"

¹² Yesus oira gij momas onnga angh rejrej Mod Allah beda Ofa ekemeji rusnok onnga ruhu mareibra jera ringk mareibra jeska momas insa koma. Beda Ofa otkinaja meja-meja onnga rusnok ringker gu jeskaseda riferwei fifi nou rusnok enjgineg. Beda Ofa otkinaja kursi-kursi onnga rusnok ringker esij jeskaseda ruhu mem monggeta mos skoita rusnok enjgineg tein.

¹³ Ofa agot gu rusnok insa koma oida, "Runggu gij Mar Efeyi Ebsi sis fob rot mar onnga Allah anggot erek kef oida, 'Dedin Mod egens bera nou rusnok onnga rum riteij gu Didif gij ojgomu. Tina iwa intunggom dedin Mod kef erek mod egens nou rusnok onnga rungkoreka mar jeskaseda ridemdami gij!' "

¹⁴ Erek koma beda rusnok onnga riteij ofou jera rua onnga raki emageima bera rin skoita Ofa gij momas insa koma, beda Ofa eita eskeira gu rua.

¹⁵ Ebirfager Yahudi jera Guru-Guru agama rik mar onnga Yesus ontunggom onnga erek ongoska eteb fob. Noba rua tein rik ruforoka rifes risitit gu Yesus oida, "Mois oufamofa eteb gu Bua onnga bunjuj jeska raja Daud!" Jefeda ebirfager insa koma rudou otkonu oska skoita Yesus ojgomu.

¹⁶ Rua ragot gu Ofa oida, "Bua big rot mar onnga ruforoka rifes koma ruis gu Bua. Enadaij nou rua risitit Bua erek koma guru!" Beda Yesus agot gu ebirfager Yahudi koma oida, "Didif dig mar insa koma fob. Noba koma jeni erek runggu gij Mar Efeyi Ebsi sis fob. Rua runggu oida, 'Bua buftu gu ruforoka rifes jeskaseda risitit mar rot tenten fob.' "

¹⁷ Yesus eja jeska rusnok insa koma, beda Ofa oksons jah kota Betania noba eker jah suma gij motu.

¹⁸ Askesi Yesus ecira sons gu kota Yerusalem deika beda mosona ongk Ofa.

¹⁹ Beda Ofa ek mega ara egens onnga ot jah moroju efembra. Jefeda Ofa eja skoita mega egens koma jeskaseda ohca efen efek, tina guru. Ofa ek mega efeyi ojgomu. Erek koma jefeda Ofa agot rot mega egens koma oida, "Mega kef enefek deika jinaga guru." Beda ainsa koma tein mega koma efen efeyi osrosra fob.

²⁰ Yesus efen ruforoker rik mar insa koma, jefeda rudou ousaha eteb rot. Rua ragot oida, "Wah, ainsa koma mega kef erek ebah, tina ebeibeyaif osrosra rot ebeirens fob!"

²¹ Beda Yesus agot gu rua oida, "Ongga tenten bera iwa inekjekka idou rot mar erek koma guru, tina idou ororu Didif rot tenten ojgomu. Beda iwa tein imotunggom mar erek Didif duntunggom gu mega ara egens kef fob si. Noba iwa imotunggom mar onnga orotunggom rusnok rudou ousaha eteb ekirsa jeska mar insa koma tein si. Koma erek osnok egens onnga agot gu memaga ofog oduma oida, 'Bij bisinsa gij mei mojemu efei ojgomu.' Beda erek koma tein mar onnga iwa imagot rot bera emecira jeni yuga insa koma si.

²² Erek iwa idou ororu Didif rot tenten ojomu, beda iwa imesma mar meidu onnga iwa yum itej gu Allah rot si."

²³ Yesus oksons gu momas onnga angh rejrej Mod Allah gij kota Yerusalem. Beda Ofa oftutu mar gu rusnok jah suma. Erek koma beda ebirfager imam-imam jera ebirfager Yahudi rineya rin skoita Ofa jah suma. Beda rua rijeka gu Ofa oida, "Bebin owesa efek erek meidu fogora bunotunggom mar erek komo. Noba idu bera onnga eita owesa efek koma gu Bua fobo?"

²⁴ Beda Yesus agot gu rua oida, "Didif tein dudou os dijeka gu iwa osok gij mar egens ojomu. Noba erek iwa iroun gu Didif rot mar insa koma, beda Didif dumoroun gu iwa rot dedin owesa efek insa kef si."

²⁵ Beda Yesus ejeka gu rua oida, "Idu bera onnga eita owesa efek gu Yohanes jeskaseda ofa eita baptis gu rusnok, Allah bera eita ei, era rusnok ei?" Erek koma beda ebirfager Yahudi insa koma riflesij moguma osok gij mar onnga Yesus ejeka gu rua rot. Rua ragot moguma oida, "Erek mimif magot gu Yesus oida Yohanes esma owesa jeska Allah, beda Ofa emejeka gu mimif rot oida teinefa fogora munoruru Yohanes oga guru.

²⁶ Tina erek mimif magot oida Yohanes esma owesa efek jeska rusnok ojomu noba Allah guru, beda rusnok enjineg rumotkonu oska skoita mimif. Jeska rua rusujohu rot oida Yohanes bera erek nabi egens onnga Allah ombk."

²⁷ Jefeda rua ragot gu Yesus oida, "Memef menejginaga rot idu onnga eita owesa efek gu Yohanes guru." Beda Yesus agot gu rua oida, "Erek

koma jefeda, Didif tein dinagot gu iwa rot idu bera onggwa eita owesa efek gu Didif guru."

²⁸ Beda Yesus agot gu ebirfager Yahudi insa koma deika oida, "Iwa isujohu rot mar orocunc egens kef fog: Orna egens efen efesa egeka. Ofa eja skoita efen efesa onggwa osumbohka beda agot oida, 'Edesa, bua bija noba bifarur gij dedin mekeni anggur deisef.'

²⁹ Beda efesa egens koma oroun gu efen meka oida, 'Didif dudobu rot.' Tina dektek deika guru, beda ofa emeesa joug rot mar onggwa ofa anggus insa koma fogora ofa eja noba efarur gij mekeni koma ojgomu.

³⁰ Beda meka egens koma eja skoita efen efesa onggwa egeka noba agot gu ofa tein jeskasada ofa eja noba efarur gij efen mekeni. Beda efen efesa onggwa egeka koma agot gu efen meka oida, 'Akeina, didif dimeja si.' Tina ofa onororu meka efen oga insa koma jinaga guru. Ofa eker ojgomu."

³¹ Beda Yesus ejeka gu ebirfager Yahudi insa koma oida, "Kenefo jeska goga insa koma bera otunggom mar jeni erek efen meka odou os rot?" Beda rua ruroun oida, "Efesa onggwa osumbohka koma ojgomu." Beda Yesus agot gu rua oida, "Iwa bera irek efesa onggwa egeka insa koma ojgomu. Jefeda onggwa tenten bera, rusnok onggwa ruhoturu pajak nou raja Kaisar jera rujona onggwa rija motu tein bera rumoira jera rusnok onggwa Allah ofoka ereij keingg si. Tina iwa bera guru!

³² Sis fob Yohanes en jeskasada ocunc rot moroju egens onggwa tenten nou iwa, tina iwa inororu ofa efen oga jinaga guri. Tina rua onggwa ruhoturu pajak jera rujona rija motu insa koma bera ruroru ofa efen oga fob. Noba gij mona onggwa iwa ik rua insa koma ruroru Yohanes, beda iwa inemeesa joug rot yeyin

mar onggga osok onggga iwa insujohu rot osok gij Yohanes tein guru."

³³ Beda Yesus agot gu rusnok insa koma deika oida, "Iwa ig rot mar onggga orocunc erek kef fog: Osnok egens erefa anggur efej gij efen mekeni egens. Beda ofa otunggom mejga mamu rejrej efen mekeni koma. Noba ofa eji mebi efesi jeskaseda esin keingg anggur efek insa koma gij mebi efesi fogora eita efei jeska. Beda ofa tein ei mod egens onggga aksa jeskaseda eyajga joug efen mekeni insa koma. Koma oisa fob, beda ofa aha mekeni koma gu rusnok enjgineg jeskaseda riker joug ofa efen mekeni. Beda ofa ecira gu monuh onggga angh yes jeska.

³⁴ Gij mona onggga anggur efek ofom fob, beda ofa obk efen rusnok onggga rumfij ofa skoita rusnok onggga riker joug mekeni insa koma jeskaseda rita efen anggur efek eneya gu Ofa.

³⁵ Tina rua onggga runt joug efen mekeni ragei rua insa koma onggga rin jeskaseda rita efen efek nou osnok egens koma. Beda rua rubu eneya, noba rua ragob eneya, noba rua rira mamu riredi eneya.

³⁶ Beda osnok egens koma obk efen rusnok onggga rumfij ofa erek ofoukou deika skoita rusnok koma onggga runt joug efen mekeni. Tina rua onggga runt joug mekeni rita mar onggga ofogog skoita rua tein ojgomu.

³⁷ Beda osnok egens koma obk esinsa efen efesa skoita rua onggga runt joug mekeni. Jeska ofa osujohu rot oida rusnok insa koma rumougif gu efen efesa si.

³⁸ Tina nou onggga rusnok insa koma rik ofa efen efesa emen skoita rua, beda rua ragot moguma oida, 'Ofa kef onggga emen bera ebirfaga mekeni

efen efesa. Mimif magob ofa ojgomu fogora mumok mekeni kef erek nou misinsa ojgomu.'

³⁹ Jefeda rua ruskotu ofa, ragob ofa beda rij ofa jeska mekeni koma."

⁴⁰ Beda Yesus agot deika oida, "Jefeda Didif dimagot gu iwa rot mar onggga osnok egens onggga efen mekeni koma emeita gu rua insa koma.

⁴¹ Ofa emeja jah mekeni koma, beda ofa emagob rusnok insa koma nomnaga onggga ringker joug efen mekeni. Beda ofa emaha mekeni insa koma gu rusnok enjgineg deika onggga emekeba rot mekeni koma efen efek gu ofa si."

⁴² Beda Yesus agot gu ebirfager Yahudi insa koma oida, "Iwa ik rot mar egens onggga runggu gij Mar Efeyi Ebsi juens deika ojgomu. Jeska mar egens koma agot oida, 'Rusnok onggga rii mod bera rukoja Mamu ahais egens koma fogora rij jeska fob. Tina Mamu koma ejerek Mamu onggga ofoufem ekirsa nou mod koma nomnaga. Tuhan bera onggga otunggom mar insa koma, noba koma bera onggkoska ahah miteij tein.'

⁴³ Erek koma jefeda iwa onggga ebirfager Yahudi bera inoira jera rusnok onggga Allah ofoka ereij keingg jinaga guru. Tina rusnok enjgineg onggga ruroru jeni Allah oga rot tenten bera rumoira jera rusnok onggga Ofa ofoka ereij keingg si. [Noba rusnok onggga rukockoreta rot mamu egens insa koma bera rimesiri fogora riseiseifa. Tina mamu egens koma onggga encirej rua bera rumohoda rot rua si.]"

⁴⁴ (21:43)

⁴⁵ Rua onggga ebirfager imam-imam jera rua onggga ebic Farisi rijginaga rot oida mar onggga Yesus emfesij

osok gij rusnok onggaa runt joug mekeni insa koma fob bera erek orocunc rot rua risinsa ojomu.

⁴⁶Jefeda rua rudou os ragei Ofa ojomu. Tina rua rimeesa rot rusnok rufoukou jah suma. Jeska rusnok insa koma rusujohu rot oida Yesus bera erek nabi egens onggaa Allah ombk.

22 ¹Yesus era mar onggaa orocunc jeskaseda oroftuutu gu rusnok deika.

²Ofa agot oida, "Mona onggaa Allah ofoka ereij keingg rusnok bera erek kef: Raja egens ensejah nou oina maat keingg efen efesa orna egens onggaa omoskotu arja.

³Jefeda ofa obk rusnok onggaa rumfij ofa jeskaseda rujoroun ofa efen mohujir jah efen mod fogora rit maat morototuma. Tina efen mohujir koma rinen guru.

⁴Jefeda ofa obk efen rusnok rineya onggaa rumfij ofa skoita efen mohujir insa koma jeskaseda ragot gu rua oida, 'Raja ensejah efen maat nomnaga fob. Ofa eris sapi jera sapi efer ofoukou fob. Noba ofa oina maat erek ofoukou fob. Jefeda iwa in jeskaseda it maat jera idou onggaa efaga ouka morototuma jera ofa rot efen efesa onggaa oskotu arja fob ojomu.'

⁵Tina raja efen mohujir insa koma rudou eskes rot mar onggaa rusnok insa koma rinfesij gu rua fob ojomu. Rineya rijef mekeni, noba rineya rija fogora ruhu mar gij rerin moutoko.

⁶Beda rineya ragei raja efen rusnok onggaa rumfij ofa insa koma beda rubu rusnok koma fogora ragos ojomu.

⁷Nou onggaa raja egens koma rig rot mar insa koma fob, beda ofa otkonu oska eteb rot efen mohujir insa koma. Jefeda ofa obk efen tentarer rufoukou skoita

mohujir insa koma. Beda tentarer koma ragob rua nomnaga beda ris mah gij rerin kota fogora mah et rerin mod nomnaga.

⁸ Beda raja koma ohoturu efen rusnok onggga rumfij ofa noba ofa agot gu rua oida, 'Didif duina maat ofoukou fob, noba rusnok onggga didif duis gu rot sismeni jeskaseda rin noba rit maat bera dukoja rua ojgomu fob.

⁹ Jefeda ebeibeyaif iwa ija jah semfag noba ihoturu rusnok rufoukou jah suma. Beda iroun rua jah dedin mod jeskaseda met maat morototuma.'

¹⁰ Jefeda rua onggga rumfij raja insa koma rija jah semfag noba ruhoturu rusnok onggga rerin rudou oufamofa jera rusnok onggga rerin rudou oska tein morototuma. Beda rua nomnaga rija jah raja efen mod noba ruina maat keingg morototuma jera ofa ojgomu. Jefeda raja efen mod erek ebera rot rusnok insa koma fob.

¹¹ Beda raja egens koma eyajga rusnok insa koma onggga rin skoita efen mod. Tina ofa ek osnok egens jah suma onggga energi meisoufa onggga ongnoska jeni erek rusnok rirgi gij mona onggga rua ruina maat keingg guru.

¹² Jefeda raja koma agot gu ofa oida, 'Enadaij nou bua buira jera memef jah sif tein guru. Jeska bua binergi meisoufa jeni erek rusnok rirgi gij mona onggga ruina maat keingg guru.' Tina osnok egens koma enagot mar sons gu raja koma jinaga guru.

¹³ Beda raja koma agot gu efen rusnok onggga rumfij ofa oida, 'Iwa yagei ofa beda irakid efen etma jera aki tein. Beda ij ofa jah mebah ojgomu. Ofa eker jah suma gij motkobah ojgomu. Beda ofa emeita efera okora eteb jah suma ojgomuja.' "

¹⁴ Beda Yesus agot oida, "Allah ejeka rusnok rufoukou jeskaseda rija erek efen rusnok onnga Ofa ofoka ereij keingg. Tina rusnok erek oskiyai bera ruiru jera Ofa efen rusnok insa koma onnga Ofa ofoka ereij keingg ojgomu."

¹⁵ Erek koma jefeda rua onnga Ebic Farisi rija noba rudou oromom rot teinefa rua rimejeka mar reirei joug Yesus jeskaseda rucunc Ofa erek oska rot.

¹⁶ Jefeda rua rubk rerin ruforoker rineya jera rusnok rineya onnga erek raja Herodes efen ruforoker jeskaseda rijeka gu Ofa erek reirei. Rua ragot oida, "Akeina Guru, memef mejginaga rot oida Bua bifesij rot mar onnga tenten ojgomu. Noba Bua buftuftu gu rusnok osok gij mar onnga Allah odou ejginaga rot tein. Bua budou enemeesa rot mar onnga rusnok enjgineg rusujohu osok gij Bua jinaga guru. Jeska Bua bunougif gu rusnok ororu rerin rufoka onnga aksa era onnga erek enaksa tein guru.

¹⁷ Jefeda bagot rot koisoisa gu memef osok gij mar egens kef fog: Erek mimif onnga Yahudi muh pajak skoita raja Kaisar gij kota Roma, beda koma bera ekirsa rot mifmin agama erebent ei, era gurei?"

¹⁸ Tina Yesus ejginaga rot oida rua rijeka gu Ofa rot mar insa koma jeskaseda rucunc Ofa erek oska rot ojgomu. Jefeda Ofa agot gu rua oida, "Iwa yeyin idou onnga ofogog ojgomu. Teinefa fogora iwa idou os icunc Didif erek oska rot mar onnga Didif dagot erek komo!

¹⁹ Iwa icunc fifi egens gu Didif onnga rusnok ruh gu raja Kaisar erek pajak fog." Beda rua rita fifi erek insa koma egens gu Ofa.

²⁰ Beda Ofa ejeka gu rua oida, "Idu bera efen efena jera ofoka enah tumu fifi kefo?"

²¹ Beda rua ruroun oida, "Koma bera Kaisar efen efena jera ofoka." Jefeda Yesus agot gu rua oida, "Erek koma beda, iwa ita mar onnga raja Kaisar efen gu ofa ojgomu, noba ita mar onnga Allah efen gu Ofa ojgomu."

²² Erek koma beda rua rudou ousaha eteb rot mar onnga Yesus oroun gu rua rot odou onnga efesis eteb. Jefeda rua rija jeska Ofa.

²³ Gij mona insa koma bera Yahudi rineya jeska ebic Saduki rin skoita Yesus. Rua onnga ebic Saduki insa koma rusujohu rot oida rusnok rinedebecki jeska ranggos guru. Jefeda rua rijeka gu Yesus rot mar insa koma erek reirei ojgomu.

²⁴ Rua ragot oida, "Akeina Guru, sis fob Musa agot rot oida erek orna egens agos tina onok efesa guru, beda efen mokosa era mokora egema ois moisa koma jeskaseda goga gok egesa egema nou orna onnga anggos fog.

²⁵ Sis fob runer rufok cinja erfeka onnga rumokosema bera riker jah sif. Orna egens onnga osumbohka oskotu arja. Tina gij mona onnga ofa anggos bera ofa onok efesa guru. Beda mokosa onnga egeka ois moisa koma deika.

²⁶ Tina ofa tein agos noba onok efesa guru. Erek koma tein rot mokosa onnga orgomu. Mokosa nomnaga ois moisa insa koma deika, tina rua nomnaga ragos jeska, noba runok efesa egema tein guru.

²⁷ Beda moisa egens koma tein agos otoij rua.

²⁸ Jefeda erek rusnok ridebecki jeska ranggos rot tenten ei, beda gij mona insa koma kenefo jeska mokoser insa koma bera ois ojaga koma erek mohona rot tenten? Jeska rua nomnaga ruskotu ofa sis fob."

²⁹ Beda Yesus oroun gu rua oida, "Mar onnga iwa insujohu rot bera erek tenten guru. Jeska idou enebriyi gij mar meidu onnga Mar Efeyi Ebsi anggot rot mar koma enesi. Noba idou tein enebriyi gij rot Allah efen owesa efek jeskaseda ofra rusnok jeska ranggos tein guru.

³⁰ Jeska gij mona onnga rusnok ridebecki jeska ranggos, beda rua runoskotu arja era rinahi igers deika guru. Rua rita mar erek malaikat-malaikat onnga runoskotu arja era rinahi igers guru.

³¹ Noba erek iwa inek rot mar onnga Allah anggot gij Mar Efeyi Ebsi osok gij rusnok onnga ridebecki jeska ranggos tein gurei?

³² Jeska Ofa agot oida, 'Didif bera Allah onnga Abraham efen, Ishak efen, jera Yakub efen.' Jefeda Ofa bera enerek Allah nou rusnok onnga ranggos fob ojgomuja guru. Tina Ofa erek Allah nou rusnok onnga rifena ebah sons fob erek Abraham, Ishak jera Yakub onnga ranggos rot rifaga sis fob tein."

³³ Rusnok rufoukou onnga ringg mar onnga Yesus omftuftu rot gu rua onnga ebic Saduki fob bera rudou ousaha eteb rot.

³⁴ Rua onnga ebic Farisi rig rot oida mar onnga Yesus emfesij gu rua onnga ebic Saduki bera orotunggom rudou ousaha fogora rineseda mar sons rot efen oga guru.

³⁵ Jefeda osnok egens jeska rua tein onnga odou ebriyi eteb gij rot hukum Musa eja skoita Yesus jeskaseda ejeka gu Ofa erek reirei fogora ocunc Ofa erek oska rot ojgomu.

³⁶ Ofa agot oida, "Akeina Guru, rot mifmin hukum Yahudi nomnaga, hukum kenefo bera erek ofoufem ekirsa jeska nomnaga?"

³⁷ Beda Yesus agot oida, "Hukum egens onnga ofoufem ekirsa jeska nomnaga bera erek kef oida, 'Iwa idou okora rot yeyin Tuhan Allah rot idou efesi ongkasmos ni, gij mar nomnaga onnga isujohu rot ni, noba gij mar nomnaga onnga itunggom ni.'

³⁸ (22:37)

³⁹ Noba hukum egeka onnga ofoufem ekirsa jeska nomnaga bera erek kef oida, 'Idou okora rot rusnok enjgineg erek idou okora rot isinsa.'

⁴⁰ Noba hukum-hukum enjgineg onnga Musa omftuftu rot jera mar nomnaga onnga nabi-nabi rumftuftu rot sis fob bera ah oisouska hukum egeka insa koma."

⁴¹ Nou onnga rusnok rineya jeska ebic Farisi rumohoturuma fob, beda Yesus ejeka gu rua oida,

⁴² "Kristus egens koma onnga emen erek raja jeskaseda omofoka ereij rusnok Israel bera onjuj jeska ofou ebiedi idu?" Beda rua ruroun oida, "Ofa omojuj jeska efen ofou ebiedi raja Daud."

⁴³ Beda Yesus agot gu rua oida, "Tina gij Mar Efeyi Ebsi bera Daud agot oisouska Efena Ebsi rot oida Ofa onnga emen erek Kristus egens bera erek Daud efen Tuhan. Daud ejeka Ofa erek efen Tuhan rot meidu? Jeska mar egens koma gij Mar Efeyi Ebsi agot oida,

⁴⁴ 'Tuhan Allah agot gu dedin Tuhan oida, "Biker gu dugnosk rot bufoka aksa noba Didif dumoin keingg mesa nomnaga fogora rumougif gu Bua." '

⁴⁵ Jefeda erek raja Daud esinsa ejeka Kristus koma onnga emen erek efen Tuhan, beda koma orocunc rot oida Kristus koma onnga ojuj jeska ofou ebiedi raja Daud bera en jeska Tuhan Allah tein."

⁴⁶ Erek koma beda enadajj nou rusnok insa koma ruga eseda rot mar onnga Yesus emfesij gu rua fob

guru. Jefeda oisouska mona insa koma bera rusnok rimeesa rot rijeka gu Ofa erek reirei deika guru.

23¹ Erek koma beda Yesus oftufu mar gu rusnok onnga rufoukou jera efen ruforoker.

² Ofa agot oida, "Rua onnga Guru-Guru agama jera rua onnga ebic Farisi bera rerin owesa efek jeskaseda ruftufu gu iwa osok gij hukum Musa efen ofou.

³ Jefeda iwa yugif gu rua rot mar onnga rua ruftufu rot noba iwa iroru mar insa koma rot iskusk tein ojgomu. Erek koma tina iwa ineita mar morototuma erek rua risinsa rita mar guru. Jeska rua risinsa rineita mar jeni erek rua ruftufu rot gu rusnok enjgineg jinaga guru.

⁴ Rua ruftufu mar onnga erek okum gu rusnok tina rua runofij rusnok koma jeskaseda rincira rot mar insa koma jinaga guru. Koma erek osnok egens onnga aha mar okum eteb esij rusnok rijmeg, tina rua runofij rusnok koma jeskaseda rurka mar okum insa koma jinaga guru.

⁵ Rua bera erek rusnok onnga rufij Allah. Tina rua rita mar koma nomnaga rot tomnomna jeskaseda rusnok enjgineg rimek rua fogora rimesitit rerin rufoka rot ojgomu. Rerin meifeti onnga runngu Mar Efeyi Ebsi tumu bera erek eteb ekirsa jeska rusnok enjgineg rerin. Beda rua rirgi meifeti koma tumu ritofu jera ritma tein jeskaseda rusnok enjgineg rik rua fogora rugif gu rerin rufoka ojgomu. Beda rua rira mar ruoma rerin meisoufa onnga aksa erek ongnoska eteb jeskaseda rusnok rumofra rufoka erek aksa ojgomu.

⁶ Noba gij mona onnga rusnok ruina maat keingg eteb, beda rua insa koma rudou os riker jah rusnok nomnaga rudou jeskaseda rusnok rimek rua fogora

rugif gu rua ojgomu. Noba rerin kursi gij mod onnga rusnok rum riteij gu Allah gij bera onnga angh jah rusnok nomnaga rudou. Noba rua risinsiyai bera ringker gij kursi koma ojgomu. Noba rusnok ebireira bera guru.

⁷ Noba gij mona onnga rua rija jah pasar, beda rudou os eteb jeskaseda rusnok rugif gu rua jah suma. Noba rua risitit risinsa rifaga jeska rusnok rijeka rua erek Guru-Guru onnga rufoka aksa.

⁸ Tina enadaij nou rusnok rijeka rineya jeska iwa erek, 'Guru-Guru' guru. Jeska iwa nomnaga yeyin ifoka onnga erek edamokuma ojgomu tein. Iwa yeyin Guru onnga erek egens ojgomu.

⁹ Noba enadaij nou iwa ijeka rusnok mebif egema tein erek 'Akeina' guru. Jeska iwa yeyin Ika onnga erek egens ojgomu. Noba Ofa eker gu mebaga.

¹⁰ Noba enadaij nou rusnok rijeka rineya jeska iwa erek 'Ebirfaga' guru. Jeska yeyin ebirfaga onnga egens ojgomu. Ofa koma bera yeyin Kristus onnga ofoka ereij keingg iwa erek raja egens.

¹¹ Onnga oufamofa ekirsa bera, rusnok onnga rufoka aksa eteb gu ifekesa bera rufij iwa erek osnok egens onnga ofij efen ebirfaga ojgomuja.

¹² Noba erek rusnok rufra risinsa rufoka erek aksa eteb, beda Allah omoin keingg rerin rufoka degini. Noba erek rusnok ruin keingg risinsa rufoka ojgomu, beda Allah omofra rerin rufoka erek aksa eteb si."

¹³ Erek koma beda Yesus agot gu rua onnga Guru-Guru agama jera rua onnga ebic Farisi oida, "Mar okum eteb emah keingg iwa si! Jeska iwa ineita mar jeni erek iwa yuftuftu rot gu rusnok enjgineg rot jinaga guri. Iwa idou ebriyi gij Allah efen oga, tina iwa inoftuftu mar insa koma rot koisoisa gu

rusnok enjgineg jeskaseda rua tein rumoira jera rusnok onggga Allah ofoka ereij keingg tein guri. Noba iwa isinsa inoira jera rusnok onggga Allah ofoka ereij keingg guri. Tina iwa tein iragou joug moroju rot rua onggga rudou os rumoira jera Allah efen rusnok ovgomu.

¹⁴ [Mar okum eteb emah keingg iwa onggga Guru-Guru agama jera iwa onggga ebic Farisi. Jeska iwa ineita mar jeni erek iwa yuftuftu rusnok enjgineg rot jinaga guri. Noba iwa irokrusa rujona rija mesina fogora ita rerin mareibra nomnaga ovgomu. Noba iwa yum iteij mar gu Allah erek aksa eteb jeskaseda rusnok rimesitit iwa rot ovgomu. Jefeda gij mona kahma bera iwa imesma mar okum onggga eteb ekirsa jeska Allah rot si.]

¹⁵ Mar okum eteb emah keingg iwa onggga Guru-Guru agama jera iwa onggga ebic Farisi. Jeska iwa ineita mar jeni erek iwa yuftuftu rot gu rusnok enjgineg jinaga guri. Iwa icira gu monuh ofoukou jeskaseda yuftuftu rusnok fogora rua ruroru yeyin agama Yahudi tein. Erek koma tina rua tein ruroru yeyin ita mar onggga oska erek ekirsa jeska iwa ovgomu. Jefeda rua rimeja jah mahmei meren rot ebeirens ekirsa jeska iwa.

¹⁶ Mar okum eteb emah keingg iwa si. Jeska iwa icira rot rusnok onggga erek riteij ofou. Tina iwa irek iteij ofou tein morototuma ovgomu. Iwa yagot oida erek osnok egens agen rot mar oisouska Allah efen Mod, tina ofa eneita mar onggga ofa anggen rot insa koma guru, beda Allah odou onokum rot guru. Tina erek ofa agen rot mar gu Allah oisouska emas onggga angh gij Mod Allah efesi, noba ofa eneita mar onggga

ofa anggen rot insa koma guru, beda Allah odou erek okum eteb rot ofa ojgomu.

¹⁷ Mar onggga iwa yuftuftu rot erek insa koma bera orocunc rot oida iwa irek rusnok onggga riteij ofou noba onggga rudou osumsumu eteb. Jeska erek osnok egens agen rot mar egens oisouska mar egeka insa koma tein, beda ofa eita mar onggga anggen rot ojgomu. Gegeka tein bera erek edamokuma ojgomu.

¹⁸ Erek koma tein, iwa yuftuftu rot oida erek osnok egens agen rot mar oisouska meja onggga angh gij Mod Allah efesi, tina ofa eneita mar onggga ofa anggen rot gu Allah guru, beda Allah odou onokum rot ofa guru. Tina erek ofa agen rot mar oisouska mar onggga ofa aha esij meja koma nou Allah, noba ofa eneita mar onggga ofa anggen rot insa koma guru, beda Allah odou omokum rot ofa si.

¹⁹ Iwa idou osumsumu erek rusnok onggga riteij ofou ojgomu. Jeska erek ofa eneita mar onggga ofa anggen rot oisouska mar onggga egeka insa koma tein guru, beda Allah odou omokum rot ofa ojgomu. Jeska egeka tein bera erek ofoufem ahah Allah eiteij tein.

²⁰ Jefeda gij mona onggga rusnok ragen rot mar oisouska meja egens koma onggga angh gij Mod Allah efesi, beda koma erek rua ragen rot mar oisouska mar onggga rua raha esij meja insa koma tein ojgomu.

²¹ Noba gij mona onggga rusnok ragen rot mar oisouska Allah efen Mod, beda koma erek rua ragen rot mar oisouska Allah efen ofoka tein ojgomu. Jeska Allah bera onggga engker gij efen Mod insa koma.

²² Noba gij mona onggga rusnok ragen rot mar oisouska mebaga, beda koma erek rua ragen rot mar oisouska Allah efen kursi eteb onggga ah gu mebaga tein. Beda koma tein erek rua ragen rot mar oisouska

Allah ofoka tein. Jeska Ofa bera onggga engker gij efen kursi eteb insa koma gu mebaga ojgomu.

²³Mar okum eteb emah keingg iwa onggga Guru-Guru agama jera iwa onggga ebic Farisi. Jeska iwa ineita mar jeni erek iwa yuftuftu rot gu rusnok enjgineg jinaga guri. Iwa iroru jeni mar onggga agama erebent anggot rot fogora iwa ikeba yeyin maat efed oknama gu Allah fob ojgomu. Erek koma tina iwa inoga ojga rot mar erek tenten nou rusnok enjgineg rerin mar oga guru. Noba iwa inocunc idou onggga okora rot mar okum onggga ah gu rusnok enjgineg tein guru. Iwa ineita mar rot idou onggga icosu efei ahta skoita rusnok enjgineg guri. Tina yeyin agama erebent bera anggot rot mar insa koma tein ojgomu. Ongga tenten bera iwa ita mar insa koma nomnaga onggga agama erebent anggot rot ojgomu, tina guri.

²⁴Iwa bera irek rusnok onggga riteij ofou onggga rincira rot rusnok enjgineg onggga riteij ofou tein ojgomu. Iwa ireni rot ahais jeskaseda iroru jeni mar ofokai egens egens onggga agama erebent agot rot. Tina iwa ineita mar onggga agama erebent anggot rot onggga erek ofoufem eteb guri. Noba idou osumsumu rot mar onggga iwa intunggom insa koma ojgomuja.

²⁵Mar okum eteb emah keingg iwa onggga Guru-Guru agama jera iwa onggga ebic Farisi. Jeska iwa ineita mar jeni erek iwa yuftuftu rot gu rusnok enjgineg jinaga guri. Iwa yut yeyin ifaga noba irgi meisoufa onggga ebsi komowa. Tina yeyin idou efesi bera erek oska ros, jeska iwa idou efeneinei rot iwa isinsiyai ojgomu. Jefeda iwa itunggom mar ofogog skoita rusnok enjgineg jeskaseda ita mar onggga iwa idou os rot ojgomu.

²⁶ Iwa onnga ebic Farisi bera irek rusnok onnga riteij ofou. Iwa ita idou efesi onnga erek ebsi komowa fog ojgomu, beda yeyin ifaga nomnaga emerek ebsi komowa tein si.

²⁷ Mar okum eteb emah keingg iwa onnga Guru-Guru agama jera iwa onnga ebic Farisi. Jeska iwa ineita mar jeni erek iwa yuftuftu rot gu rusnok enjgineg jinaga guri. Iwa bera irek rusnok onnga ranggos fob rerin rudog. Rusnok enjgineg rutunggom rudog insa koma erek ongoska eteb. Tina mar onnga angh gij odog efesi koma bera erek rusnok rufora onnga etefa ojgomu.

²⁸ Erek koma tein, rusnok rik iwa beda rua rusujohu rot oida iwa bera irek rusnok onnga oufamofa ojgomu. Tina yeyin idou efesi bera ebera rot mar onnga oska eteb ojgomu. Jeska iwa ineita mar jeni erek iwa yuftuftu rot gu rusnok enjgineg jinaga guru."

²⁹ Beda Yesus agot deika oida, "Mar okum eteb emah keingg iwa onnga Guru-Guru agama jera iwa onnga ebic Farisi. Jeska iwa ineita mar jeni erek iwa yuftuftu rot gu rusnok enjgineg jinaga guri. Iwa itunggom Allah efen nabi-nabi onnga anggos rerin rudog erek ongoska eteb nou rua. Noba iwa itunggom mar erek koma rot rusnok enjgineg tein onnga rita mar onnga oufamofa gij mona onnga sis fob tein.

³⁰ Noba iwa yagot rot oida, 'Erek memef mengker gij mona onnga mefmen meimower ringker gij sis fob, beda memef menagob Allah efen nabi-nabi erek rua runtunggom gij mona insa koma guru.'

³¹ Tina mar onnga iwa yanggot insa koma bera orocunc rot oida iwa injuj in jeska rusnok insa koma onnga ranggob Allah efen nabi-nabi sis fob.

³² Jefeda iwa imotoiru gij mar onggga oska insa koma onggga yeyin imower runtunggom sis fob onjoros omoisa rot nomnaga si.

³³ Iwa bera ifogog eteb erek womfieda jera womfieda efen efer tein. Iwa inosuwa jeska mar okum eteb onggga emah keingg iwa gij mona onggga Allah eij iwa gij mahmei meren jinaga guru.

³⁴ Jefeda Didif dumobk rusnok onggga ragot rot mar onggga Allah ocunc gu rua gij rudou efesi ni, jera rusnok onggga rudou ebriyi eteb gij Allah oga ni, jera rusnok onggga ruftuftu rot Allah oga ni. Beda iwa imagob rineya jeska rua si. Noba iwa imotob rineya tumu mega salib tein. Noba iwa bera imangha rineya gij mod onggga rusnok rum riteij gu Allah gij. Beda iwa imokuk rineya gij monuh sinefa onggga ruku gij.

³⁵ Sis fob Habel eita mar onggga erek oufamofa ojomu. Tina efen mokora agob ofa ojomu. Noba Zakharia onggga Berekia efen efesa bera rusnok ranggob ofa tein gij mona onggga ofa ot gu meja onggga ah gij Mod Allah efesi. Sis fob rusnok bera ranggob rusnok enjineg rufoukou onggga rineita mar onggga oska jinaga guru. Jefeda mar okum onggga Allah emah keingg rua onggga ranggob rusnok insa koma sis fob bera emah keingg iwa nomnaga onggga ingker gij mona ebeibeyaif tein si."

³⁶ (23:35)

³⁷ Beda Yesus agot oida, "Didif dudou okora rot iwa onggga kota Yerusalemo! Iwa bera onggga yagob nabi-nabi sis fob. Iwa bera onggga ira mamu iredi rua onggga Allah ombk skoita iwa jeskaseda ruftuftu gu iwa rot efen oga fogora ranggos fob. Sis fob Didif dudou os ducohun iwa nomnaga erek mongkukar

mosu onggga ocohun efer gij efembra efesi. Tina iwa ikoja rot koma ojgomu.

³⁸Jefeda Allah eneker gij yeyin Mod egens jah gu ifekesa deika guru. Mod koma emah erek rourou ojgomu.

³⁹Noba iwa inek Didif deika guru onjoros mona onggga iwa yuis rot oida, 'Oufamofa eteb gu Bua onggga bin oisouska Tuhan Ofoka!' "

24 ¹Askesi Yesus eja jeska Mod Allah beda Ofa efen ruforoker ragot gu Ofa rot teinefa Mod Allah koma bera erek ongkoska eteb.

²Beda Yesus oroun oida, "Tenten, mamu eteb koma onggga rusnok rira jeskaseda rii Mod aksa kef bera erek ongkoska. Tina onggga tenten bera, gij mona kahma beda rusnok rumohoda Mod eteb kef nomnaga si. Beda mamu egens tein enah esij mamu egema deika jinaga guru."

³Erek koma beda Yesus ejeker gu memaga ofos Zaitun. Beda Ofa efen ruforoker rin skoita Ofa noba rua rijeka gu Ofa oida, "Tuhan, gij mona juaho fogora mar onggga Bua banggot rot Mod Allah insa koma emesaga? Noba mar erek meidu bera omorocunc rot mona onggga Bua bumoksons jera mona onggga enja ejgwaga ensaga tein fob."

⁴Beda Yesus agot oida, "Iwa yut joug idou efesi rot ahais ojgomu jeskaseda rusnok runorokrusa iwa osok gij mar insa koma guru.

⁵Jeska rusnok rufoukou rumorogna noba rurokrusa rusnok enjgineg. Rua rimagot oida, 'Didif bera Kristus egens koma onggga Allah omobk jeskaseda osuwa rusnok jeska rerin mar onggga okum.' Rua rimagot mar erek koma fogora rumorokrusa rusnok rufoukou.

⁶ Noba iwa imeg mar osok gij rusnok gij monuh egens onnga angh doida bera rimagobuma, era rusnok rimefesij oida rusnok gij monuh enjgineg tein bera rimagobuma. Tina idou inemeesa rot mar koma guru. Mar insa koma emen ojgomu, tina koma onorocunc rot oida mona onnga enja ejgwaga bera ensaga fob guru.

⁷ Rusnok monuh egens rimagobuma jera rusnok monuh onnga enjgineg. Noba ebirfager monuh egens rimagobuma jera ebirfager monuh enjgineg. Icusur agoska mebi doska gij monuh suma suma. Noba gij mona egema beda mosona eteb omok rusnok rufoukou doska.

⁸ Tina mar insa koma bera erek orocunc rot mar sismeni onnga emen gij mona kahma ojgomu. Koma bera erek ojaga egens onnga otkonu okora fob. Erek dektek guru beda ofa emeker rot efen efesa si.

⁹ Beda rusnok rimagei iwa noba rikris iwa skoita rerin ebirfager. Beda ebirfager koma rumoga ojga rot oida iwa isma mar okum noba yagos ojgomu. Rusnok rufoukou rudou omofogog rot iwa, jeska iwa iroru Didif.

¹⁰ Beda gij mona insa koma rusnok rufoukou rimekikif fogora runoruru Didif deika guru. Rua tein rimekikif jeska rerin ruhujir onnga rururu Didif. Noba rudou omofogog morototuma tein.

¹¹ Beda nabi-nabi onnga ebireira rimen noba rumorokrusa rusnok rufoukou.

¹² Rusnok rufoukou rimeita mar onnga ofogog ojgomuja fogora rusnok rudou onomokorema deika guru.

¹³ Tina erek rusnok rut joug rudou efesi rot ahais joug mar onnga oska insa koma onjoros mona insa koma omoisa fob, beda Allah omoskotu rua si.

¹⁴ Rusnok rimefesij rot Allah oga onnga oufamofa gu rusnok rejrej mebif nomnaga sismeni fog. Rua rimefesij rot oida mona onnga Allah omofoka ereij keingg efen rusnok bera enesaga doida fob. Nou onnga mar insa koma oisa fob, beda mona onnga enja ejgwaga omorogna keingg rusnok si."

¹⁵ Beda Yesus agot deika oida, "Gij mona kahma beda iwa imek osnok egens onnga ofogog doska otunggom mar onnga oska eteb gj Mod Allah efesi. Nabi Daniel bera onngu mar osok gj mar insa koma sis fob. (Iwa isujohu osok gj mar insa koma rot iskusk jeskaseda idou ebriyi gj efen ofou).

¹⁶ Erek koma beda gj mona insa koma rusnok onnga ringker gu monuh Yudea rumoku jah memaga ofos.

¹⁷ Noba rusnok onnga riker skida rerin mod onnga erek edeider bera runojuj sons jeskaseda rita mar jeska mod efesi insa koma sismeni fog deika jinaga guru. Tina rua ruku ebeirens ojgomu.

¹⁸ Noba rusnok onnga rif mar gu mekeni bera runoksons jah rerin mod jeskaseda rita meisoufa egema sismeni fog deika jinaga guru. Tina ruku ebeirens ojgomu.

¹⁹ Okum eteb rot rujager onnga rifaga okum rot riser era rot rujager onnga rungh mengk gu rerin riser gj mona insa koma. Jeska rua runoku ebeirens jinaga guru.

²⁰ Noba iwa yum iteij gu Allah jeskaseda mar okum insa kef enesaga gj mona onnga meifina eteb era gj

mona onggga Sabat tein guru. Jeska okum nou rusnok onggga ruku gij mona insa koma.

²¹ Erek koma jeska gij mona insa koma onggga emen bera rusnok rimeita rifeira okora eteb. Rua rimeita rifeira okora ekirsa jeska rusnok nomnaga onggga rita rifeira okora sis mona onggga Allah ontunggom mebif nomnaga onjoros deisef tein. Noba inek rusnok onggga rita rifeira okora ekirsa jeska rua onggga rimeita rifeira okora gij mona insa koma deika guru tein.

²² Tina Allah anggen rot oida mona koma onggga emen bera Ofa omotunggom erek mona onggga estir ojgomu. Jeska erek Ofa onotunggom erek koma guru, beda rusnok nomnaga rimagos rot ojgomu. Tina Ofa omotunggom mona insa koma erek estir jeskaseda rusnok nomnaga rinagos rot mar okum onggga emah keingg rua guru. Ofa omotunggom mar erek koma jeska Ofa odou efeneinei rot rua onggga Ofa oncunc erek efen rusnok fob ojgomu.

²³ Noba erek rusnok ragot gij mona insa koma oida, 'Iwa ik osnok egens kef fog, jeska ofa bera Kristus onggga Allah omobk!' Era rusnok ragot oida, 'Kristus onggga Allah omobk bera en jah suma!' Beda idou onororu mar onggga rua ranggot insa koma guru.

²⁴ Jeska rusnok rufoukou onggga ruh risinsa rourou erek Kristus onggga Allah omobk, era onggga rijeka risinsa rourou erek nabi-nabi onggga Allah omobk bera rimen si. Beda rua rumotunggom mar onswos eteb jeskaseda ruokrusa rusnok onggga Allah oncunc fob. Rua rimereni rot mar erek koma jeskaseda orokrusa rusnok onggga Allah oncunc fob, tina rineita guru.

²⁵ Jefeda iwa yut joug idou efesi rot ahais ojgomu. Jeska mar onggga Didif dimfesij gu iwa ebeibeyaif bera ah gu mona kahma ros.

²⁶ Noba erek rusnok ragot oida rua rik Didif gij monuh onnga owowa fob, era rua ragot oida Didif didemi gij monuh enjgineg tein, beda iwa ineja jah monuh insa koma guru. Jeska rua rucuwei mar rot ojgomu.

²⁷ Erek koma jeska Didif, Rusnok Efesa, bera dimen rot ebeirens erek moc efesa onnga efnefna ebeirens gij mebaga nomnaga.

²⁸ Giskini erek rusnok rik mem ofoukou rit marska gu mebi, beda rua rijginaga rot oida mar agos enahuma. Erek koma tein, rusnok rimek mar onnga orocunc rot mona onnga Didif dimen si."

²⁹ Beda Yesus agot deika oida, "Gij mona onnga rusnok rik mar okum ofoukou insa koma oisa fob, beda mowa emeja erek motkobah, noba mesta tein eneisa deika guru. Motur tein emesiri jeska mebaga, beda Allah emekemeji mar onnga efen owesa efek eteb jeska mebaga.

³⁰ Beda rusnok rimek mar onnga orocunc rot Didif, Rusnok Efesa, gij mebaga. Gij mona insa koma rusnok mebif nomnaga bera rimagerir rot ruga onnga emeesa eteb. Jeska rua rimek Didif, Rusnok Efesa, din gij mocgoj ofog jeska mebaga rot dufoka onnga aksa eteb jera owesa efek onnga erek eteb tein.

³¹ Gij mona insa koma rusnok rimeg manghi mei oga eteb, beda Allah omobk efen malaikat-malaikat rejrej mebif nomnaga. Rua rumohoturu Allah efen rusnok nomnaga onnga Ofa oncunc sis fob."

³² Beda Yesus agot deika oida, "Iwa isujohu rot mega ara egens. Gij mona onnga mega koma efen efeyi ofokoku ros beda koma erek orocunc rot oida eimofoj adaij nou efen efek ensaga doida fob.

³³ Erek koma tein, gij mona onggaga iwa ik mar insa koma onggaga Didif dimfesij rot gu iwa fob, beda iwa imejginaga rot oida mona onggaga enja ejpgwaga bera enesaga doida fob.

³⁴ Onggaga tenten bera, mar insa koma nomnaga omorogna askesi rusnok onggaga ebeibeyaif rifena ebah ros.

³⁵ Noba mebaga jera mebi kef onggaga iwa isujohu bera emah gij mona onggaga ah aibin, mar koma bera emeja eseseifa si. Tina dedin duga bera emah gij mona onggaga ah aibin ojgomuja."

³⁶ Beda Yesus agot deika oida, "Erek koma jefeda rusnok egema tein rinejginaga rot mona juaho era aras egaho fogora mar insa koma nomnaga omorogna guru. Noba Malaikat-malaikat gu mebaga era Didif tein, onggaga Allah efen efesa, bera menejginaga rot mona juaho fogora mar insa koma omorogna en guru. Tina dedin Akeina Allah ojgomu bera ejginaga rot mona insa koma nomnaga fob.

³⁷ Didif, Rusnok Efesa, omorogna keingg rusnok rot ebeirens morototuma erek mar onggaga orogna keingg rusnok rot ebeirens gij mona onggaga Nuh eneker ros.

³⁸ Gij mona onggaga mei ofot enedi mebif nomnaga enesi, rusnok rita mar erek giskini ojgomu. Rua rit maat jera rij anggur efei noba rusnok rumoskotuma erek giskini. Rua rita mar erek koma erek giskini ojgomuja onjoros mona onggaga Nuh oira gij meg eteb egens onggaga ofa ontunggom fob.

³⁹ Tina gij mona ainsa koma tein bera rusnok rudou enebriyi gij oida ai juens mar okum emen skoita rua guru. Iwa imek mar erek koma tein gij mona onggaga Didif, Rusnok Efesa, duksons din gu mebif rot ebeirens.

⁴⁰ Gij mona insa koma gosnok gekeka gemef mar gu mekeni. Beda Didif dumofra gegema, noba gegema bera eker ojgomu.

⁴¹ Gojaga gekeka gomos metrem ofou gij mokaga. Beda Didif dumofra gegema, noba gegema bera eker ojgomu.

⁴² Jefeda iwa yut joug idou efesi rot ahais ojgomu. Jeska iwa inejginaga rot mona onggaga Didif, onggaga direk yeyin Tuhan, bera duksons en guru.

⁴³ Koma erek osnok egens onggaga ejginaga rot aras egaho fogora osnok egens onggaga oukoreka mar emen jah efen mod. Osnok egens koma omot joug rot ahais, beda ofa ensejah nou ekemeji osnok egens koma onggaga oukoreka mar jeska efen mod ojgomu.

⁴⁴ Erek koma jefeda, iwa yut joug idou efesi rot ahais ojgomuja. Jeska Didif, Rusnok Efesa, bera dimen gij mona egens jera aras egens onggaga iwa inejginaga rot jinaga guru."

⁴⁵ Beda Yesus agot deika oida, "Erek osnok egens omfij efen ebirfaga rot iskusk, beda efen ebirfaga koma emeita owesa efek gu ofa jeskaseda ekeba maat gu ruforoker enjgineg onggaga rimfarur nou ebirfaga egens koma.

⁴⁶ Noba erek osnok egens koma eita mar insa koma rot iskusk gij mona onggaga ebirfaga egens koma ongksons en fob, beda ofa odou efaga ouka eteb rot si. Jeska efen ebirfaga koma emeita owesa efek ekirsa gu ofa rot fogora ofa emagei ebirfaga egens koma efen mareibra nomnaga nou ofa.

⁴⁷ (24:46)

⁴⁸ Tina erek osnok egens eneya omfij efen ebirfaga rot odou onggaga oska rot ojgomu, beda ofa osujohu

rot oida mona onnga efen ebirfaga omoksons en bera erek dektek ros ojomu.

⁴⁹ Beda ofa emeita mar onnga oska skoita ebirfaga efen ruforoker ojomu. Noba ofa emej mofut efei morototuma jera efen mohuj onnga rij mofut efei ojomuja.

⁵⁰ Noba gij mona juens beda osnok egens koma efen ebirfaga bera omorogna keingg ofa si. Jeska ofa enejginaga rot mona kenefo fogora efen ebirfager omoksons en guru.

⁵¹ Beda efen ebirfaga egens koma omofra mar okum eteb keingg osnok egens koma onnga omfij si. Ofa emesma mar okum morototuma erek rusnok onnga rita mar onnga oska erek ofa insa koma si. Beda ofa emeita efera okora eteb rot tein si."

25 ¹ Yesus agot oida, "Mona onnga Allah ofoka ereij keingg rusnok bera erek kef: Gij mona juens beda rujowu rufok setka rurka rerin lampu eisa fogora rija jeskasada ruodosu igers egens onnga emen.

² Rujowu rufok cinja jeska rua insa koma bera rudou efesis, noba rufok cinja onnga rineya bera rudou osumsumu ojomu.

³ Rua onnga rudou osumsumu bera rurka rerin lampu eisa tein, tina rua runorka mini mah egema dokun nou rerin lampu insa koma guru.

⁴ Erek koma tina rua onnga rudou efesis bera rurka mini mah egema dokun erek ofoukou nou rerin lampu.

⁵ Rua nomnaga bera riker nou igers egens insa koma erek dektek, tina ofa enen enesi. Jefeda rua ruhnohnoha fogora rah ahaingkongka jeska fob.

⁶ Erek koma beda erek motu deis ros, beda rua rig osnok egens agot rot oga eteb oida, 'Igers ai juens beda emesaga jah sif! Iwa in noba irodosu ofa!'

⁷ Beda rujowu rufok setka insa koma rusoyu fogora rita rerin lampu eisa jeskasada rija skoita igers egens insa koma.

⁸ Beda rujowu onggga rudou osumsumu ragot gu rua onggga rudou etesis oida, 'Ihujir, iwa ita yeyin mini mah egema gu memefi, jeskasada mefmen mini mah oisa noba lampu eneisa deika guri.'

⁹ Tina rua onggga rudou etesis bera ragot oida, 'Memef meneita mefmen mini mah egema gu iwa guru. Jeska mefmen mini mah nou mimif nomnaga bera enadaij guru. Iwa ija jah moutoko beda ingk mini mah egema deika ojgomu.'

¹⁰ Jefeda rua onggga rudou osumsumu insa koma rija jah moutoko jeskasada ringk mini mah nou rerin lampu deika. Tina askesi rua rincira jah moutoko ros, beda igers egens koma ensaga fob. Beda rujowu onggga rinsejah nou ofa jah suma jera rerin lampu onggga eisa ros bera rururu ofa jah efen mod. Beda rusnok ruf montoj joug rot ahais, noba rua nomnaga ruina maat keingg eteb jah suma.

¹¹ Gij mona juens deika, beda rujowu onggga rijengk mini mah deika bera rinsaga gu igers efen mod tein. Rua rut gu montoj mod egens koma beda ruis oida, 'Tuano, memef tein modou os moira gij bebin modo!'

¹² Tina igers egens koma agot gu rua oida, 'Iwa inoira jinaga guru, jeska didif dinejginaga rot iwa guru.' "

¹³ Beda Yesus agot deika oida, "Iwa yut joug rot idou onggga etesis tein, jeska iwa inejginaga rot mona

kenefo era aras egaho fogora Didif dumoksons en gu mebif guru."

¹⁴Yesus agot oida, "Mona onnga Allah ofoka ereij keingg rusnok bera erek kef: Sis fob osnok orna egens ensejah mar jeskaseda ecira jah monuh enjgineg. Jefeda ofa omohoturuma jera efen rusnok onnga rumfij ofa jeskaseda rucunc rot idu onnga rimagei efen fifi gij mona onnga ofa eja fob.

¹⁵Ofa eita efen fifi koma gu rua ororu jeni osnok egens egens efen owesa efek. Ofa ekeba efen fifi emas erek ribu cinja skoita osnok egens. Beda ofa ekeba efen fifi emas erek ribu egeka skoita egema. Beda ofa ekeba efen fifi emas erek ribu egens gu egema. Beda ofa eja jah monuh enjgineg.

¹⁶Erek koma beda osnok egens onnga esma fifi emas erek ribu cinja era fifi insa koma orohca efen ofou dokun deika. Jefeda ofa esma fifi koma efen ofou ogun dokun erek ribu cinja deika.

¹⁷Erek koma tein, osnok onnga egeka otunggom mar erek koma rot efen fifi emas ribu egeka tein. Jefeda ofa esma fifi koma efen ofou ogun dokun erek ribu egeka deika.

¹⁸Tina osnok egens onnga esma fifi emas ribu egens bera eji mebi beda edemi fifi insa koma gij mebi efesi ojgomu.

¹⁹Erek mona egema deika fob, beda rusnok insa koma rerin ebirfaga egens oksons jah efen monuh insa koma. Beda ofa ejeka joug efen rusnok insa koma onnga rumfij ofa rot efen fifi.

²⁰Osnok egens onnga esma fifi emas ribu cinja sis fob en skoita ebirfaga egens koma noba eita ebirfaga efen fifi insa koma sons gu ofa. Beda agot oida, 'Tuan, sis fob bua bita fifi emas ribu cinja gu didif.

Beda didif dira fifi koma durohca fogora disma efen ofou erek ribu cinja dugun dokun deika.' Beda ofa eita fifi onggga ogun dokun deika insa koma gu efen ebirfaga tein.

²¹ Beda ebirfaga egens koma agot gu ofa oida, 'Bua bunroru dedin duga rot tentenmen fob. Bua buntunggom mar onggga oufamofa eteb nou didif fob. Bua buroru dedin duga gij mar insa koma onggga erek oskiyai rot tenten fob, jefeda didif dumocunc bua jeskaseda bagei dedin mar onggga erek ofoukou ekirsa deika. Bua buira jera didif noba budou efaga ouka eteb morototuma jera didif rot ojomu.'

²² Erek koma beda osnok egens onggga esma fifi emas ribu egeka en noba eita fifi ribu egeka insa koma sons gu efen ebirfaga egens koma. Beda ofa agot gu efen ebirfaga egens koma oida, 'Tuan, sis fob bua bita fifi emas ribu egeka gu didif. Beda didif dira fifi koma durohca fogora disma efen ofou erek ribu egeka dugun dokun deika.' Beda ofa eita fifi onggga ogun dokun deika insa koma gu efen ebirfaga tein.

²³ Beda ebirfaga egens koma agot gu ofa oida, 'Bua bunroru dedin duga rot tentenmen fob. Bua buntunggom mar onggga oufamofa eteb nou didif fob. Noba jeska bua buroru dedin duga gij mar insa koma onggga erek oskiyai rot tenten fob, jefeda didif dumocunc bua jeskaseda bagei dedin mar onggga erek ofoukou ekirsa deika. Bua buira jera didif noba budou efaga ouka eteb morototuma jera didif rot ojomu.'

²⁴ Erek koma beda osnok egema onggga esma fifi emas ribu egens en skoita efen ebirfaga egens koma noba agot oida, 'Tuan, didif dijginaga rot oida bua bera bita mar rot budou onggga efesis eteb. Jeska

bua bera erek osnok egens onggga enerefa maat efej guru, tina bua bisma efen efek rot ojgomu ros. Noba bua bera erek osnok egens onggga enerebirma maat efej guru, tina bua bisma efen efek rot ojgomu ros. Noba bua bera erek osnok egens onggga enera maat efej enerebirma guru, tina bua bisma efen efek rot ojgomu ros.

²⁵ Didif dimeesa rot bua ojgomu, jefeda didif dij mebi noba didemi bebin fifi koma gij mebi efesi jeskaseda eneseiseifa guru. Noba ebeibeyaif didif dita bebin fifi insa koma sons gu bua.'

²⁶ Beda ebirfaga egens koma agot gu ofa oida, 'Bua bunororu dedin duga rot tenten guru. Bua bera erek osnok egens onggga oska noba odou eskes tein ojgomu. Bua bijginaga rot oida didif bera erek osnok egens onggga enerefa maat efej guru, tina didif disma efen efek rot ojgomu ros, era erek osnok egens onggga enera maat efej enerebirma guru, tina didif disma efen efek rot ojgomu ros.

²⁷ Jefeda teinefa fogora bua binisah dedin fifi insa koma gij mod ebsi jeskaseda disma fifi koma efen ofou ogun dokun deika guri!

²⁸ Jefeda didif dita fifi ribu egens koma jeska bua, noba dimeita gu ofa insa koma onggga efen fifi ribu setka fob ojgomu.

²⁹ Erek koma jeska rusnok onggga rerin mar egema fob, bera rimesma mar erek ekirsa deika si. Rua rerin mar onggga adaj nou. Tina rusnok onggga rerin mar erek ai oskiyai ojgomu, beda rerin mar onggga ai oskiyai koma tein bera eseiseifa jeska rua si.'

³⁰ Beda ebirfaga egens koma agot deika oida, 'Iwa yagei osnok egens kef onggga onororu dedin duga rot tenten guru. Beda ij ofa gij monuh motkobah

ojgomu. Beda ofa emeita efera okora eteb jah suma ojgomuja.' "

³¹ Beda Yesus agot deika oida, "Gij mona onnga Didif, Rusnok Efesa, duksons jah mebif jera Allah efen malaikat-malaikat ofoukou, beda Didif dimeker gu rusnok rifekesa erek raja egens noba dumoga ojga rot rusnok nomnaga rerin rita mar.

³² Rusnok jeska monuh nomnaga bera rumohoturuma jah suma. Beda Didif dimekeba rusnok insa koma kij ebic egeka erek osnok egens onnga ekeba efen domba-domba kij ebic egens noba efen kambing-kambing kij ebic egema.

³³ Beda Didif dumocunc rusnok onnga rerin rita mar onnga oufamofa jeskasada riker gu dugnosk. Noba Didif dumocunc rusnok onnga rerin rita mar onnga oska jeskasada riker gu digris.

³⁴ Beda Didif, onnga erek Raja egens, bera dimagot gu rusnok onnga riker gu dugnosk oida, 'Iwa bera isma oufamofa eteb jeska dedin Akeina Allah. Jefeda iwa in noba iker kij Akeina efen monuh mebaga ojgomu. Ofa ensejah monuh insa koma nou iwa kij mona onnga Ofa otunggom mebif nomnaga fob.

³⁵ Jeska kij mona onnga mosona ongk Didif sis fob, beda iwa ita maat gu Didif fob. Noba kij mona onnga magon en Didif sis fob, beda iwa ita mei gu Didif jeskasada dij fob. Noba kij mona onnga Didif din skoita iwa erek dusodosa kij yeyin monuh sis fob, beda iwa iron Didif rot idou onnga eskeira fob.

³⁶ Noba kij mona onnga dedin meisoufa onnga enadaij sis fob guru, beda iwa ita meisoufa egema gu Didif fob. Noba kij mona onnga marenid sis fob, beda iwa yufij Didif jeskasada diskeira fob. Noba kij mona

ongga rusnok rikris Didif jah mod oskusk, beda iwa injogog Didif jah suma jeskaseda yufij Didif rot.'

³⁷ Beda rusnok onggga oufamofa insa koma rimagot gu Didif oida, 'Tuhan, sis fob memef menek mosona ongak Bua guru, noba meneita maat gu Bua guru. Memef menek magon en Bua guru, noba meneita mei gu Bua guru.

³⁸ Memef menek Bua erek busodosa gij memef mefmen monuh guru, noba monoroun Bua erek koma guru. Memef menek Bua bicira rot meisoufa onggga enadaj guru, noba meneita meisoufa egema gu Bua guru.

³⁹ Memef menek Bua erek marenib guru, noba menek Bua gij mod oskusk guru. Noba memef monojogog Bua jah suma tein guru.'

⁴⁰ Beda Didif dumoroun gu iwa oida, 'Ongga tenten bera, gij mona onggga iwa itunggom mar insa koma skoita rusnok onggga erek onok ofoka tein gij guru onggga ororu Didif fob, beda koma morototuma erek iwa intunggom mar insa koma nou Didif tein ojgomu.'

⁴¹ Beda Didif dimagot gu rusnok onggga oska onggga riker jah digris oida, 'Iwa ija jeska Didif ojgomu! Iwa bera imesma mar okum eteb jeska Allah si! Iwa ija jah mahmei meren efen eisa egigir rot ah aibin ojgomuja. Sis fob Allah ensejah mahmei meren koma nou Bilis jera efen malaikat-malaikat onggga oska tein.

⁴² Jeska gij mona onggga mosona ongak Didif fob, beda iwa ineita maat egema tein gu Didif guri. Noba gij mona onggga magon en Didif fob, beda iwa ineita mei egema tein gu Didif guri.

⁴³ Jeska gij mona onggga Didif din skoita iwa erek dusodosa gij yeyin monuh sis fob, beda iwa inoroun Didif rot idou onggga oufamofa jinaga guri. Noba gij

mona onggā dedin meisoufa onggā erek enadaij sis fob guru, beda iwa inofij Didif rot meisoufa egema tein guri. Noba gij mona onggā marenid noba rusnok rikris Didif jah mod oskusk fob, beda iwa inojogog Didif era inofij Didif jinaga guri.'

⁴⁴Erek koma beda rua rimagot gu Didif oida, 'Tuhan, memef menek mosona onggā Bua sis fob guru. Noba memef menek magon en Bua sis fob guru. Memef menek Bua erek busodosa gij mefmen monuh sis fob guru. Noba memef menek Bua rot bebin meisoufa onggā enadaij guru. Memef menek Bua gij mod oskusk sis fog guru fogora monofij Bua rot mar insa koma nomnaga guru.'

⁴⁵Beda Didif dimagot oida, 'Onggā tenten bera gij mona onggā iwa inofij rusnok enjgineg onggā runok rufoka tein gij guru rot mar insa koma nomnaga sis fob guru, beda koma morototuma erek iwa inofij Didif rot mar insa koma tein guru.'

⁴⁶Beda Didif dumobk rua insa koma jah mahmei meren fogora rimesma mar okum eteb jah suma rot mona onggā ah aibin ojgomu. Tina rua onggā runtunggom mar onggā oufamofa sis fob bera rimesma eiteij ah onggā ah aibin ojgomuja."

26 ¹Nou onggā Yesus oftufu rot mar insa koma nomnaga oisa fob, beda Ofa agot gu efen ruforoker oida,

²"Gij mona egeka deika, beda mona eteb onggā ofoka Paskah jera mona onggā rusnok rit roti onggā enefifij guru bera emesaga. Noba gij mona insa koma rusnok rimagei Didif, Rusnok Efesa, beda raha Didif gu rusnok enjgineg. Beda rua rumotob Didif tumu mega salib."

³ Erek koma beda ebirfager imam-imam jera rusnok Yahudi rerin ebirfager enjgineg tein rumorodosuma gij mod eteb onnga Kayafas efen. Ofa bera erek imam onnga ofoka aksa gij mona insa koma.

⁴ Beda rua ruhca moroju jeskaseda ragei Yesus erek wuswus beda ragob Ofa.

⁵ Rua ragot moguma oida, "Mimif mineita mar insa koma gij mona onnga Paskah guru, jeska rusnok rufoukou rumotkonu oska eteb rot mimif fogora rimagot mar ofoukou rot."

⁶ Erek koma beda, askesi Yesus engker gu kota Betania ros, beda Ofa eja jah mod egens onnga osnok egens onnga ofoka Simon efen. Sis fob Simon maira et ofos.

⁷ Askesi Yesus et maat gij mod insa koma ros, beda ojaga egens en skoita Ofa. Ofa orka fanin egens onnga ebera rot miniyi onnga efen ensesa. Miniyi koma bera efen efera osok eteb. Ofa ohoda fanin insa koma beda otkinaja miniyi koma nomnaga tumu Yesus ebirfaga.

⁸ Tina Yesus efen ruforoker rik mar koma onnga ofa ontunggom, jefeda rua ragot rot rusum oskusk moguma oida, "Teinefa fogora ofa otkinaja miniyi rourou erek komo.

⁹ Jeska miniyi insa koma bera efen efera osok eteb. Onnga oufa bera ofa ohu miniyi insa koma beda ekeba fifi onnga esma rot skoita rusnok onnga rufojingki ojgomu!"

¹⁰ Yesus ejginaga rot mar onnga rua ranggot moguma insa koma fob. Jefeda Ofa agot gu rua oida, "Teinefa fogora iwa inagot mar gu ofa erek komo. Mar onnga ofa ontunggom insa koma gu Didif bera erek ongnoska eteb.

¹¹ Rusnok onggga rufojingki bera riker ojgomuja. Tina Didif dineker morototuma jera iwa ojgomuja guru.

¹² Mar onggga ofa ontunggom insa koma bera jeskaseda esejah difaga nou mona onggga danggos fogora rusnok rimesah difaga gij moksu.

¹³ Ongga tenten bera, gij mona onggga rusnok riflesij osok gij Allah oga onggga oufamofa rejrej mebif, beda rua rimefesij rot mar onggga ojaga egens kef ontunggom nou Didif tein. Jefeda rusnok rufoukou rimejginaga rot ofa tein si."

¹⁴ Erek koma beda Yesus efen oforoka egens onggga ofoka Yudas Iskariot eja skoita ebirfager imam-imam.

¹⁵ Beda ofa agot gu rua oida, "Iwa ita fifi gu didif, beda didif dimekikif jeska Yesus noba dumofij iwa yagei Ofa si." Jefeda rua rita fifi perak setka orgomu gu ofa rot.

¹⁶ Beda oisouska mona insa koma bera Yudas ohca moroju egens jeskaseda aha Yesus gu rua.

¹⁷ Mona eteb onggga rusnok Yahudi rit roti onggga enefifij guru bera ensaga fob. Jefeda Yesus efen ruforoker ragot gu Ofa oida, "Memef meja sinefa jeskaseda mesejah maat koma onggga mimif mint morototuma nou mona onggga Paskah?"

¹⁸ Beda Yesus agot gu rua oida, "Iwa ija skoita osnok egens gij kota, beda yagot gu ofa oida, 'Mefmen Guru agot oida, dedin mona onggga eimofoj bera ensaga fob, jefeda Didif jera dedin ruforoker bera met maat nou mona onggga Paskah gij bua bebin mod efesi.' "

¹⁹ Jefeda Yesus efen ruforoker runtunggom mar jeni erek Ofa anggot rot fob, beda mar insa koma nomnaga ensejah nou rua fob.

²⁰ Erek motu fob, beda Yesus eker jera efen ruforoker rufok setka kungkob erfeka jeskaseda rit maat morototuma.

²¹ Askesi rua rint maat ros, beda Yesus agot gu rua oida, "Ongga tenten bera, osnok egens jeska iwa emekikif jeska Didif si."

²² Mar onggga Yesus anggot insa koma ereita efen ruforoker rudou efesi okumkum rot. Jefeda rua egens egens ragot oida, "Tuhan, didif dineita mar erek koma jinaga guru."

²³ Beda Yesus oroun oida, "Osnok egens onggga ec roti gij mokosku kef jera Didif bera onggga emekikif jeska Didif si."

²⁴ Didif, Rusnok Efesa, bera dimagos jeni erek runggu rot gij Mar Efeyi Ebsi sis fob. Tina okum eteb rot osnok egens koma onggga ekikif jeska Didif, Rusnok Efesa. Ongga tenten bera, oufa ekirsa erek ofa efen mosu onojuj rot ofa sis fob guru. Jeska ebeibeyaif ofa emesma mar okum eteb rot mar onggga ofa ontunggom koma si."

²⁵ Beda Yudas, onggga ai juens emekikif jeska Yesus, agot oida, "Guru, Bua busujohu rot oida didif bera onggga emekikif jeska Bua ei?" Beda Yesus oroun oida, "Mar onggga bua banggot rot bera erek tenten ojgomu."

²⁶ Askesi rua rint maat ros, beda Yesus eita roti ofog egens noba oisa oufamofa eteb gu Allah rot. Beda Ofa etka roti insa koma noba ekeba dogdog gu efen ruforoker. Beda Ofa agot gu rua oida, "Iwa ita roti kef beda it. Jeska roti kef bera erek dedin difaga onggga dimaha gu rusnok onggga rufogog jeskaseda iwa imesma eiteij ah onggga efeinah."

²⁷ Beda Ofa eita mokosku rot anggur efei noba ois oufamofa eteb gu Allah rot. Beda Ofa eita mokosku egens koma gu rua jeskaseda orofosutut rusnok egens egens rij anggur efei morototuma jera Ofa. Beda Ofa agot oida, "Iwa nomnaga ij anggur efei kef ojpgomu.

²⁸ Jeska anggur efei kef bera erek dedin dugufu onnga emeya nou rusnok rufoukou. Noba koma orocunc rot mona efeinah onnga Allah anggen eimofoj rot sis fob jeskaseda Ofa omosuna rot rusnok rufoukou rerin mar onnga oska.

²⁹ Ongga tenten bera, Didif dinej anggur efei morototuma jera iwa deika guru onjoros mona onnga Allah ofoka ereij keingg rusnok ensaga fob. Beda gij mona insa koma bera dimej anggur efei onnga erek efeinah morototuma jera iwa deika si."

³⁰ Nou onnga rua ruf medemer morototuma oisa fob, beda rua rija jah memaga ofos Zaitun.

³¹ Erek koma beda Yesus agot gu efen ruforoker oida, "Gij motu kef bera iwa nomnaga imoku jeska Didif si. Noba koma ororu jeni erek runggu gij Mar Efeyi Ebsi sis fob. Mar egens koma agot oida, 'Allah emagob Ofa onnga ont joug domba-domba, beda domba-domba riberbera suma suma.'

³² Tina gij mona onnga Didif dindebecki jeska danggos fob, beda Didif dimeja okag iwa jah monuh Galilea."

³³ Beda Petrus agot gu Yesus oida, "Erek rua insa kef nomnaga ruku jeska Bua, tina didif dineita mar erek koma jinaga guru."

³⁴ Beda Yesus agot gu Petrus oida, "Ongga tenten bera, nou onnga mongkukar orna onoga nou motu insa kef rot ofosma egeka enesi, beda bua bisinsa

bumorot keingging gu rusnok rot ofosma orgomu rot oida bua binejginaga rot Didif guru."

³⁵ Beda Petrus agot oida, "Erek rusnok ragob didif morototuma jera Bua, beda didif dunorot keingging oida dinejginaga rot Bua erek koma guru." Noba ruforoker onnga enjgineg nomnaga ragot mar erek koma tein.

³⁶ Erek koma beda, Yesus jera efen ruforoker rija jah mekeni egens onnga ofoka Getsemani. Beda Ofa agot gu rua oida, "Askesi Didif dum diteij gu Allah ros beda iwa iker jah sif."

³⁷ Beda Ofa oroun Petrus, Yakobus jera Yohanes onnga Zebedeus efen efeserga morototuma jera Ofa. Gij mona insa koma bera Ofa odou efeneinei noba odou okum eteb tein rot mar onnga emeita efera okora eteb gu Ofa.

³⁸ Beda Ofa agot gu ruforoka rugomu insa koma oida, "Dudou okum eteb doska onjoros erek dimagos rot ojomu. Jefeda iwa iker jera Didif jah sif noba inohohnoha jeska Didif guru."

³⁹ Ofa ecira oskiyai deika beda odou orohu mebi. Beda Ofa om eiteij gu Allah oida, "Akeina, bita mar okum onnga dimeita difera okora rot jeska Didif ojomu. Tina bunotunggom mar onnga Didif disinsa dudou os rot guru. Butunggom mar jeni erek budou ejginaga rot ojomu."

⁴⁰ Beda Yesus oksons skoita efen ruforoker rugomu insa koma, tina rua rahca ahaingkongka fob. Beda Ofa agot gu Petrus oida, "Simon, bua binahca erek koma guru. Erek bineker jera Didif rot ai juens ojomu tein gurei.

⁴¹ Bua binahca guru, tina bum biteij gu Allah ojomu jeskaseda bua binesiri gu mar onnga ereneni

bua guru. Erek bua budou os bita mar onggga Didif danggot ainsa kef, tina bebin owesa efek bera enadaij rot guru."

⁴² Beda Yesus ejeker gu esinsa noba om eiteij gu Allah juens deika oida, "Akeina, erek enadaij nou Bua bita mar onggga dimeita difera okora eteb jeska Didif guru, beda Didif dimeita mar koma jeni erek budou ejginaga rot si."

⁴³ Nou onggga Ofa ongksons deika skoita efen ruforoker insa koma, beda Ofa ek, tina rua rahca ahaingkongka deika jeska rufonskos eteb.

⁴⁴ Beda Yesus eja noba om eiteij gu Allah rot mar insa koma juens deika.

⁴⁵ Tina nou onggga Ofa ongksons skoita rua deika, beda Ofa ek, tina rua rahca ahaingkongka deika. Beda Ofa agot gu rua oida, "Teinefa fogora iwa inahca erek koma ros. Iwa idebecki ojomu. Iwa ik, jeska ai juens beda osnok egens onggga odou ekikif jeska Didif bera emaha Didif gu rusnok onggga rufogog.

⁴⁶ Jefeda iwa idebecki ebeirens! Jeska osnok egens insa koma enesaga fob."

⁴⁷ Askesi Yesus enagot mar insa koma skoita efen ruforoker ros, beda Yudas ensaga jah suma. Rusnok rufoukou onggga rurka meiteb kalawan jera moskur tein ruroru Yudas jah suma. Ebirfager imam-imam jera Yahudi rerin ebirfager rineya bera rubk rua jah suma.

⁴⁸ Gij mona onggga Yudas engkikif jeska Yesus sis fob beda ofa agot gu rusnok insa koma oida, "Osnok egens onggga didif dunsu omnu bera onggga iwa yuhca rot insa koma. Jefeda iwa yagei Ofa ojomu."

⁴⁹ Erek koma beda gij motu insa koma Yudas eja teisis skoita Yesus beda agot gu Ofa oida, "Akeina Guru, didif duis oufamofa eteb gu Bua." Beda ofa onsa Yesus omnu.

⁵⁰ Beda Yesus agot oida, "Edohuj, bita mar onnga budou os rot ebeirens ojgomu." Beda rusnok insa koma ragei Yesus rot ahais.

⁵¹ Beda Yesus efen oforoka egens jah suma agei efen meiteb kalawan noba agob osnok egens onnga ofij ebirfaga imam fogora eris efen osu enama jeska.

⁵² Beda Yesus agot gu ofa oida, "Bisah bebin meiteb kalawan gij efei ojgomu. Rusnok onnga rira meiteb riragob rusnok enjineg bera rimagos rot meiteb onnga rusnok ragob rua rot tein si.

⁵³ Erek Didif dudou os rot beda dumois gu dedin Akeina, beda Ofa omobk efen malaikat ebic setka kungkob erfeka jeskasada ragob rusnok kef.

⁵⁴ Tina Didif dineita mar erek koma guru jeskasada mar onnga rua rumotunggom gu Didif bera ah gij efera jeni erek runggu gij Mar Efeyi Ebsi sis fob ojgomu."

⁵⁵ Beda Yesus agot gu rusnok insa koma oida, "Teinefa fogora iwa yurka yeyin meiteb jera moskur jeskasada iragei Didif erek komo! Jeska Didif bera dinerek osnok egens onnga ofogog guri. Gij mona ofoukou bera Didif duftu mar gu rusnok gij momas onnga angh rejrej Mod Allah, tina iwa inagei Didif jah suma guri.

⁵⁶ Tina mar onnga iwa intunggom kef bera jeskasada mar onnga nabi-nabi runggu gij Mar Efeyi Ebsi osok gij Didif sis fob bera emah gij efera ojgomu." Beda Yesus efen ruforoker nomnaga rimaha Ofa jah fogora ruku jeska.

⁵⁷ Erek koma beda rusnok insa koma ruroun Yesus gu mod onnga Kayafas efen. Ofa bera ebirfaga imam-imam Yahudi egens onnga ofoka aksa. Noba ebirfager imam-imam Yahudi rineya jera ebirfager rusnok Yahudi jera Guru-Guru agama rumohoturuma gij mod egens insa koma.

⁵⁸ Petrus okahma otoij Yesus ai yes. Beda ofa oira gij momas onnga angh rejrej mod insa koma fob. Beda ofa eker doida tentarer onnga runt joug mod insa koma jeskaseda eg rot mar onnga ebirfager Yahudi rumotunggom skoita Yesus.

⁵⁹ Ebirfager imam-imam Yahudi jera ebirfager Yahudi rineya tein ruhca rusnok onnga rimagot rot oida rua rik Yesus otunggom mar onnga oska sis fob fogora ebirfager koma rimagob Yesus rot.

⁶⁰ Tina rua rinek osnok egens tein onnga anggot mar insa koma rot koisoisa jinaga guru.

⁶¹ Beda gosnok gegeka gagot oida, "Sis fob magef mag Yesus koma agot oida 'Didif dumohoda Mod Allah kef. Noba gij mona orgomu deika, beda Didif dimei Mod Allah egens kef deika sons si.' "

⁶² Beda ebirfaga imam-imam egens insa koma ot noba agot gu Yesus oida, "Bagot rot koisoisa gu memef osok gij mar onnga goga ganggot insa koma fob ojomu."

⁶³ Tina Yesus enagot mar sons gu ofa rot guru. Beda ebirfaga imam-imam egens koma agot deika oida, "Didif dui gu Bua oisouska Allah, onnga efena ebah, efen ofoka jeskaseda buroun mar onnga mejeka gu Bua rot tenten ojomu! Bua bera Kristus onnga Allah omobk erek raja egens ei?"

⁶⁴ Beda Yesus oroun gu ofa oida, "Mar onnga bua banggot insa koma bera tenten ojomu. Tina Didif

dagot gu bua rot tenten tein oida gij mona kahma bera bua bera bimek Didif, Rusnok Efesa, riker gu Allah ognosk rot owesa efek eteb. Noba bua bimek Didif dumoksons jeska mebaga gij mocgoj ofog si."

⁶⁵ Nou onnga ebirfaga imam-imam egens koma eg mar insa koma onnga Yesus anggot rot fob, beda ofa ekris efen meisoufa fogora ebga erek orocunc rot oida ofos graga eteb rot. Beda ofa ois gu rusnok jah suma oida, "Ofa ohurmei mar skoita Allah! Jefeda enadaij nou memef mejeka gu rusnok osok gij Ofa deika guru. Jeska iwa tein ig Ofa ohurmei mar skoita Allah fob.

⁶⁶ Iwa isujohu rot oida memef meita mar okum gu Ofa erek meidu?" Beda rua ragot oida, "Ofa ontunggom mar onnga oska eteb fob, jefeda Ofa agos rot ojgomu."

⁶⁷ Beda rua ruskurfi gij Yesus osum noba rubu Ofa jera riseda Ofa osum tein.

⁶⁸ Beda rua rirahaisomu rot Ofa fogora ragot oida, "Bua bera Kristus, jefeda bagot gu memef oida idu bera onnga obu Bua ainsa koma."

⁶⁹ Erek koma beda askesi Petrus engker gu momas onnga angh rejrej mod egens insa koma ros, beda ojaga egens onnga omfij ebirfaga imam-imam Yahudi ojot doida Petrus. Beda ofa agot oida, "Bua tein bera osnok egens onnga ororu Yesus insa koma onnga ojga jeska monuh Galilea!"

⁷⁰ Beda Petrus oroun gu ofa jah rusnok nomnaga rudou oida, "Didif dinejginaga rot mar onnga bua banggot rot insa kef guru."

⁷¹ Beda ofa ojot doida montoj momas insa koma. Beda ojaga egens egema deika ek ofa jah suma. Beda ofa agot gu rusnok jah suma oida, "Ofa kef bera

ororu Yesus koma onggga ojga jeska kota Nazaret tein."

⁷² Beda Petrus agot rot oga ahais gu ofa tein oida, "Didif dinejginaga rot osnok egens koma guru!"

⁷³ Erek ai juens deika beda rusnok onggga rut jah suma rik Petrus, beda rua rin skoita ofa. Beda rua ragot gu ofa oida, "Tenten, bua tein bera Yesus efen ruforoka egens ojgomu. Jeska bua bagot mar morototuma erek rua onggga rujga monuh Galilea tein."

⁷⁴ Beda Petrus agot rot ahais gu rua oida, "Didif dinejginaga rot osnok egens koma jinaga guru! Noba erek didif ducuwei mar gu iwa rot, beda didif duis gu Allah jeskaseda ofra mar okum keingg didif rot ojgomu!" Beda ainsa koma tein mongkukar orna oga.

⁷⁵ Petrus odou ah keingg rot mona onggga Yesus agot gu ofa rot oida, "Erek mongkukar orna onoga enesi, beda bua bumorot keingg rot ofosma orgomu oida bua binejginaga rot Didif guru." Beda Petrus eja orogna jeska momas insa koma noba ebisa eteb rot mar onggga ofa ontunggom insa koma.

27 ¹ Gij raha tentena beda ebirfager imam-imam jera ebirfager Yahudi onggga rineya bera riflesij mar osok gij rot teinefa rua rimagob Yesus.

² Rua rira rantai rirakid Yesus etma, beda ruroun Ofa skoita Pilatus. Ofa bera erek raja Kaisar efen Gubernur gij monuh insa koma.

³ Nou onggga Yudas, onggga engkikif jeska Yesus fob, eg rot oida ebirfager imam-imam ruga ojga rot oida Yesus agos ojgomu, beda ofa odou okum eteb rot mar onggga ofa ontunggom skoita Yesus fob. Jefeda ofa orka fifi perak setka orgomu onggga ofa esma jeska ebirfager imam-imam sis fob.

⁴ Beda ofa agot gu rua oida, "Didif dingkikif jeska Yesus noba dumfij iwa fob. Jefeda mar onnga didif duntungom koma bera erek oska eteb. Jeska Ofa eneita mar egema tein onnga erek oska fogora yagob Ofa rot guru." Beda rua ragot gu ofa oida, "Skoidu, koma onofoufem skoita memef guru. Bua bera onnga buntungom mar insa koma ojgomu."

⁵ Jefeda Yudas eij fifi insa koma gu Mod Allah efesi, beda ofa eja noba era marfeb erakid ogoj beda ef esinsa tumu mega efetma fogora agos.

⁶ Beda ebirfager imam-imam ruhoturu fifi onnga Yudas eij jeska insa koma. Noba rua ragot oida, "Fifi kef bera memef moh fogora osnok egens agos rot. Noba mimif agama erebent agot oida fifi onnga erek koma bera minesah gij Mod Allah guru."

⁷ Jefeda rua ruitij rot oida rimera fifi insa koma rimerengk mebi jeska osnok egens onnga otunggom debeji. Beda rua rucunc mebi koma erek rusnok onnga rusodosa rerin rudog ojgomu.

⁸ Erek koma jefeda onjoros deisef tein bera rusnok rijeka mebi koma oida, Mebi ogufu.

⁹ Erek koma beda mar onnga nabi Yeremia anggot sis eteb fob rot mar insa koma bera ah gij efera fob. Ofa agot oida, "Rua onnga Israel ruitij rot ruh fifi perak setka orgomu jeskaseda ragob Ofa.

¹⁰ Beda rua rira fifi insa koma rirengk mebi jeska osnok egens onnga otunggom debeji. Koma bera onnga Tuhan danggot rot gu Didif fob."

¹¹ Beda rua ruroun Yesus skoita Gubernur Pilatus, noba Ofa ot jah Pilatus odou. Beda Pilatus ejeka gu Ofa oida, "Bua bera rusnok Yahudi rerin raja ei?" Beda Yesus oroun oida, "Mar onnga bua banggot bera tenten."

¹² Tina Yesus onoroun mar osok gij mar onggga ebirfager imam-imam jera ebirfager Yahudi rineya ranggot rot osok gij Ofa guru.

¹³ Jefeda Pilatus agot gu Ofa oida, "Iwa ingg rot mar onggga oska onggga rusnok insa koma ranggot osok gij Bua fob. Teinefa fogora Bua bunoroun mar sons rot guri."

¹⁴ Tina Yesus onoroun mar sons rot mar onggga rua ranggot insa koma jinaga guru. Jefeda Gubernur insa koma odou ousaha eteb rot.

¹⁵ Gij orofosut mona onggga rusnok Yahudi ruina maat nou mona eteb onggga ofoka Paskah bera Gubernur osuwa osnok egens onggga rusnok Yahudi rirejgei gu ofa rot jeska mod oskusk.

¹⁶ Gij mona insa koma bera tentarer rangha osnok egens onggga ofoka Barsabas gij mod oskusk fob.

¹⁷ Jefeda nou onggga rusnok Yahudi rufoukou rumohoturuma gu Pilatus efen mod, beda ofa ejeka gu rua oida, "Iwa idou os jeskaseda didif dusuwa idu nou iwa? Didif dusuwa Barsabas ei, era didif dusuwa Yesus onggga rinjeka Kristus ei?"

¹⁸ Ofa agot mar erek insa koma jeska ofa ejginaga rot oida ebirfager Yahudi raha Yesus gu ofa jeska rudou ejisei rot Yesus ojgomu.

¹⁹ Askesi Pilatus engker gij efen kursi gij mona insa koma jeskaseda oga ojga rot mar onggga rusnok runcunc rot Yesus ros, beda osnok egens orka surat egens jeska efen mohona. Mohona koma ongggu gij efen surat gu Pilatus oida, "Bua bineita mar onggga oska egema tein skoita osnok egens koma guru. Jeska Ofa eneita mar onggga oska egema tein guru. Gij motu neeka fob bera didif disih mar okum ofoukou osok gij Ofa ojgomu."

²⁰ Beda ebirfager imam-imam jera ebirfager Yahudi rineya rusos rusnok rufoukou jah suma jeskaseda ruis gu Pilatus oida rudou os Barsabas ojgomu, noba ragob Yesus ojgomu.

²¹ Tina Pilatus agot gu rusnok rufoukou jah suma oida, "Iwa idou os jeskaseda didif dusuwa kenefo jeska goga kefo?" Rua ruroun oida, "Busuwa Barsabas ojgomu!"

²² Beda Pilatus agot oida, "Tina didif dita mar meidu rot Yesus kef onnga iwa ijeka erek Kristus?" Beda rua ruroun oida, "Butob Ofa tumu mega salib ojgomu!"

²³ Tina Pilatus ejeka gu rua oida, "Tina Ofa otunggom mar onnga oska erek meidu?" Beda rusnok jah suma ruis rot ruga eteb doska oida, "Butob Ofa tumu mega salib ojgomu!"

²⁴ Pilatus ek rot oida rusnok insa koma rukoja Yesus ojgomu, noba erek ai juens beda rusnok rumotkonu oska eteb skoita ofa rot. Jefeda ofa eita mei beda ot efen etma gij mei koma jah rusnok koma rudou jeskaseda rik. Beda ofa agot gu rusnok insa koma oida, "Erek osnok egens kef agos ojgomu, beda koma enah gu didif guru. Mar koma bera onnga iwa idou os rot ojgomu."

²⁵ Beda rusnok rufoukou jah suma ruis rot ruga eteb oida, "Maraim, erek Ofa agos ojgomu, beda koma ah gu memef ojgomu, noba koma ah gu memef meser tein ojgomu!"

²⁶ Erek koma beda Pilatus osuwa Barsabas nou rua. Noba ofa obk efen tentarer jeskaseda rangha Yesus. Beda ofa aha Yesus skoita tentarer enjgineg jeskaseda rutob Ofa tumu mega salib.

²⁷ Erek koma beda Pilatus efen tentarer ruroun Yesus gij Gubernur efen mod efesi. Beda tentarer rufoukou jah suma rut rejrej Ofa.

²⁸ Rua rusuwa Ofa efen meisoufa giskini, beda rua raha meifeti onnga erek raja ergi tumu Ofa.

²⁹ Noba rua rira marfeb egens onnga efen ofogog doska fogora rirajgej ebirfaga erek rirahaisomu rot Ofa. Beda rua rita moskur egens gu Ofa jeskaseda agei erek raja agei moskur egens. Beda rua ris rukeibi gu mebif beda ougif gu Ofa erek rusnok rugif gu raja egens fogora rirahaisomu rot Ofa erek koma. Rua ragot mar erek kef oida, "Bua onnga Yahudi rerin raja, memef modou os jeskaseda Bua bifena ebah nou mona onnga dektek ojgomu!"

³⁰ Beda rua ruj oskurfi gij Ofa noba ragei moskur sons jeska Ofa beda rubu Ofa ebirfaga tein.

³¹ Nou onnga rua rirahaisomu rot Ofa erek insa koma oisa fob, beda rua rita raja efen meisoufa insa koma jeska Ofa noba rita Ofa efen meisoufa sons gu Ofa. Beda rua ruroun Ofa jah mebah jeskaseda rutob Ofa tumu mega salib.

³² Askesi rua ruroun Yesus jeskaseda rutob Ofa tumu mega salib, beda rua rurodosu osnok egens onnga ofoka Simon gu moroju osobu deismos. Ofa bera ojga jeska kota Kirene. Tentarer insa koma riradgodu ofa jeskaseda orka mega salib onnga ai juens runtob Yesus tumu.

³³ Tentarer insa koma ruroun Yesus jah monuh egens onnga ofoka Golgota. Koma efen ofou oida, Monuh Ebirfaga Oboha.

³⁴ Beda rua rurka anggur efei onnga rugun ariawun onnga ofoka mur gij fogora rita gu Ofa, tina nou

ongga Yesus ereni oskiyai beda Ofa okoja anggur koma ojgomu.

³⁵ Beda rua rutob Ofa tumu mega salib. Nou onga koma oisa fob beda rua ruku mofka jeskaseda orocunc rot idu jeska rua bera emesma Yesus efen meisoufa.

³⁶ Beda rua riker jah suma noba riajga Ofa.

³⁷ Rua runggu mar tumu papan egens onga agot rot efen mar onga oska. Rua runggu rot oida, "OFA KEF BERA RUSNOK ONGGA YAHUDI RERIN RAJA."

³⁸ Beda rua rutob gosnok gegeka deika onga goukoreka mar sis fob desi Ofa. Rua runtob egens gu Yesus ognosk, noba gegema gu Yesus egris.

³⁹ Rusnok onga rirabj monuh insa koma rik Yesus noba ruga oruh Ofa ojgomu.

⁴⁰ Rua ragot oida, "Hah! Bua bagot oida bumohoda Mod Allah nomnaga beda bimei Mod koma sons gij mona orgomu ojgomu. Ereka Bua bera Allah efen efesa rot tenten beda busuwa bisinsa jeska mega salib koma ojgomu! Bujuj jeska mega koma ojgomu!"

⁴¹ Beda ebirfager imam-imam jera Guru-Guru agama jera ebirfager Yahudi rineya nomnaga ruga oruh Yesus erek koma tein.

⁴² Rua ragot oida, "Ofa ofij rusnok enjgineg jeskaseda rerin mar okum enah gu rua deika guru, tina enadaij nou Ofa onsuwa esinsa jeska mar kef guri! Ofa bera onga rusnok Israel rerin raja ei. Ereka Ofa ojuj jeska mega salib kef beda memef modou omororu Ofa si!

⁴³ Ofa oisum gij Allah, noba Ofa agot oida Ofa bera Allah efen efesa tein. Jefeda teinefa fogora Allah onoskotu Ofa jeska mar okum kefi guri."

⁴⁴ Noba gosnok gegeka insa koma onggaruntob tumu mega salib desi Yesus bera goga oruh Ofa tein.

⁴⁵ Erek mowa ot deis beda monuh insa koma nomnaga eja erek motkobah. Noba ah erek koma onjoros aras orgomu fob.

⁴⁶ Beda gij aras insa koma Yesus ois rot oga eteb oida, "Eloi, Eloi, lama sabakhtani." Koma efen ofou oida, "Akeina Allah, teinefo fogora Bua baha Didif igef jah erek kefo?"

⁴⁷ Erek koma beda rusnok onggarunt doida Yesus rig Ofa agot mar erek insa koma. Jefeda rua ragot oida, "Ofa ois mar gu nabi Elia!"

⁴⁸ Beda orna egens eja ebeirens jeskasada ejeita anggur efei onggarunkemba. Ofa ec moskur gij anggur efei insa koma noba osk moskur insa koma rot gu Yesus awesi jeskasada Ofa omna oskiyai.

⁴⁹ Beda osnok egens onggarunkineg agot oida, "Mimif miker ai juens jeskasada mik oida nabi Elia emen noba omosuwa Ofa jeska mega salib ei era gurei."

⁵⁰ Erek koma beda Yesus ois mar rot oga eteb fob, beda agos.

⁵¹ Ainsa koma tein meifeti aksa onggaruskok rimf joug montoj rot rusnok jeskasada runoira gij Mod Allah efesi guru bera ebga jeska skida onjoros degini fob. Beda mebi icusur doska noba mamu eteb ofoukou ebriyi.

⁵² Beda rusnok rudog ohoda noba Allah efen rusnok rineya rufoukou onggaranggos sis fob bera rifena ebah sons.

⁵³ Beda gij mona onggaruskok endebecki jeska agos fob, rusnok onggarifena ebah sons insa koma tein

ricira gij kota Yerusalem. Noba rusnok rufoukou ringk rua jah suma tein.

⁵⁴ Ebirfaga tentarer egens jera efen ruforoker onnga runt joug Yesus tumu mega salib jera ofa bera rik mebi icusur jera mar enjineg tein onnga omorogna keingg rusnok gij mona insa koma. Jefeda rua rimeesa eteb rot beda ragot oida, "Tenten Ofa bera Allah efen efesa ojgomu!"

⁵⁵ Noba rujager rufoukou rut ai yes noba riajga mar insa koma tein. Rua bera onnga ruroru Yesus jeska monuh Galilea. Noba rua rumfij Yesus gij mona insa koma tein.

⁵⁶ Rineya jeska rua bera erek Maria jeska Magdalena ni, Maria onnga Yakobus jera Yusuf gegang mosu ni, jera Zebedeus efen mohona ni.

⁵⁷ Nou onnga motu fob, beda orna mei ahta egens jeska kota Arimatea ensaga jah suma. Ofa ofoka Yusuf, noba ofa tein ororu Yesus sis fob.

⁵⁸ Ofa eja skoita Pilatus jeskaseda erejgei ofa rot Yesus efaga. Beda Pilatus obk efen tentarer jeskaseda rita efen efaga koma gu Yusuf.

⁵⁹ Jefeda Yusuf orka efaga koma jeska fob. Beda ofa era meifeti onnga efeinah orond Yesus efaga insa koma.

⁶⁰ Beda ofa esah Yesus efaga koma gij moksus egens onnga ofa otunggom gij mamu efesi fob. Beda ofa eskiski mamu eteb joug mamu efesi insa koma rot ahais. Beda ofa eja jeska.

⁶¹ Noba Maria jeska Magdalena jera Maria onnga enjineg insa koma tein geyajga mar insa koma.

⁶² Gij mona juens deika, onnga erek mona onnga Sabat, beda ebirfager imam-imam jera rusnok ebic Farisi rija skoita Pilatus.

⁶³ Beda rua ragot gu ofa oida, "Tuan, bua budou ah keingg rot mar onnga Ofa onnga ocuwei mar anggot sis fob, gij mona onnga Ofa enagos enesei? Jeska Ofa anggot oida, 'Gij mona orgomu deika beda Didif dimebebecki jeska danggos si.'

⁶⁴ Jefeda bua bubk bebin tentarer jeskaseda ot joug Ofa efen moksus gij mona orgomu ojgomu. Bitu mar erek koma jeskaseda Ofa efen ruforoker rinen noba runorka efen efaga jeska guru. Erek bua bunotunggom mar koma guru, beda rua rimagot gu rusnok rufoukou oida Ofa endebecki jeska agos fob. Beda rucuwei mar koma bera erek oska ekirsa jeska mar onnga Ofa ocuwei mar rot sis fob ojgomu."

⁶⁵ Jefeda Pilatus agot gu rua oida, "Iwa ita mar koma ojgomu. Jefeda iwa iron dedin tentarer jah suma beda yuf joug moksus koma rot ahais ojgomu."

⁶⁶ Jefeda rua rija jah mansu mamu onnga Yesus efaga angh gij. Beda rua raha mar tumu mamu eteb onnga of joug moksus awesi insa koma. Beda mar koma orocunc oida rusnok enjineg riskiski mamu insa koma jeska fob era gurei. Beda tentarer rut joug mansu insa koma rot ahais ojgomuja tein.

28 ¹ Nou mona onnga Sabat oisa fob, beda Maria jeska kota Magdalena jera Maria onnga enjineg geja jah mansu mamu onnga Yesus efaga angh gij.

² Ainsa koma tein mebi icusur doska, beda malaikat egens ojuj jeska mebaga. Beda Ofa eskiski mamu eteb jeska moksus efesi. Beda ofa eker esij mamu egens insa koma.

³ Ofa efen efaga efesa eteb erek mocgoj efesa, noba efen meisoufa erek ebsi komowa eteb doska.

⁴Tentarer onnga runt joug moksu insa koma rimeesa eteb jefeda rua risiri gu mebif erek rusnok onnga ranggos risiri gu mebif.

⁵Beda malaikat egens koma agot gu gojaga jah suma oida, "Goga genemeesa guru. Didif dijginaga rot oida iwa yuhca Yesus, onnga rusnok runtob tumu mega salib fob.

⁶Tina Ofa eneker jah sif deika guru. Ofa endebecki jeska anggos fob jeni erek Ofa anggot rot sis fob. Goga gek mebera onnga risah efen efaga esij sis fob.

⁷Jefeda goga geja ebeirens beda bagot rot mar insa kef skoita Ofa efen ruforoker. Goga gagot gu rua oida Yesus endebecki jeska anggos fob. Noba Ofa eja okag rua jah monuh Galilea fob. Rua rimek Ofa jah suma si. Rudou ah keingg rot mar onnga Yesus anggot gu rua rot sis fob ojomu."

⁸Jefeda goga geja ebeirens jeska moksu insa koma. Goga godou efesi erek emeesa noba erirei eteb tein. Beda goga gofob skoita Yesus efen ruforoker.

⁹Ainsa koma tein Yesus orogna keingg goga. Beda Ofa agot gu goga oida, "Eskeiramera eteb rot goga." Beda goga gen skoita Ofa, noba gougif gu Ofa aki. Beda goga gesitit gu Ofa tein.

¹⁰Beda Yesus agot gu goga oida, "Goga genemeesa guru. Goga geja noba gagot gu dedin edohujir jeskaseda rua rija jah monuh Galilea ojomu. Beda rua rimek Didif jah suma si."

¹¹Askesi gojaga insa koma gecira skoita Yesus efen ruforoker ros, beda tentarer insa koma onnga runt joug moksu rot Yesus efaga eja skoita ebirfager imam-imam gij kota Yerusalem. Beda rua rifesij rot mar insa koma onnga rua rik gu Yesus odog fob.

¹² Beda ebirfager imam-imam koma rumorodosuma jera ebirfager Yahudi rineya jeskaseda riflesij rot mar onnga rua rumotunggom rot ojgomu. Jefeda rua rita fifi ofoukou doska gu tentarer insa koma.

¹³ Beda rua ragot gu tentarer insa koma oida, "Iwa yagot oida Yesus efen ruforoker rin gij motu deis beda rurka efen efaga askesi iwa yahca jeska ros ojgomu fob.

¹⁴ Noba erek Gubernur eg rot oida efen efaga enah gij moksus insa koma deika guru, beda memef momot deismos rot iwa gu Gubernur. Beda memef memagot oida iwa ineita mar onnga oska guru. Jefeda iwa inemeesa rot guru."

¹⁵ Jefeda tentarer insa koma rita fifi koma, beda rua ruroru jeni mar onnga ebirfager imam-imam ranggot rot ojgomu. Jefeda mar onnga ebirfager imam-imam insa koma rucuwei mar rot bera eberbera rejrej monuh Yahudi ojgomu. Noba onjoros mona deisef tein rusnok ruroru mar insa koma ojgomuja ros.

¹⁶ Yesus efen ruforoker rufok setka kungkob erfens rija jah memaga ofog oduma gij monuh Galilea onnga Yesus anggot rot gu rua sis fob.

¹⁷ Nou onnga rua rik Ofa jah suma beda rua rugif gu Ofa. Tina erek rineya jeska rua rijekjeka rudou rot oida koma bera Yesus rot tenten ei era gurei?

¹⁸ Beda Yesus en doida rua beda agot gu rua oida, "Allah eita owesa efek eteb gu Didif jeskaseda dufoka ereij keingg mar nomnaga gu mebif jera mebaga tein fob.

¹⁹ Jefeda iwa ija skoita rusnok gu monuh nomnaga. Beda iwa yuftu ruu rot dedin duga jeskaseda ruu tein rumororu Didif dedin duga. Beda iwa ita baptis

gu rua oisouska Akeina ofoka ni, Allah efen efesa ofoka ni, jera Efena Ebsi ofoka ni.

²⁰ Beda yuftuftu gu rua jeskaseda rua ruroru jeni mar nomnaga onnga Didif danggot rot gu iwa fob. Beda Didif dimeker jera iwa ojgomuja onjoros mona onnga enja ejgwaga ensaga tein si." Ainsoma.

Markus

1 ¹Oga onnga oufamofa osok gij Yesus Kristus onnga Allah efen efesa bera onsokeij rot sismeni erek kef:

²Gij mona onnga sis eteb fob bera nabi egens onnga ofoka Yesaya anggot mar onnga Allah anggot rot gu efen efesa oida, "Didif dumobk osnok egens onnga emeja okag rot Bua. Ofa omoftuftu mar gu rusnok jeskaseda rua risejah nou rumoroun Bua.

³Osnok egens koma emeker gij monuh onnga owowa ojgomu. Noba ofa emagot gu rusnok oida, 'Ai juens bera Tuhan enesaga. Jefeda iwa isejah idou efesi jeskaseda iroun Ofa fogora imororu Ofa tein.' "

⁴Mar insa kef onnga nabi Yesaya anggot rot sis fob bera ah gij efera fob. Jeska osnok egens onnga ofoka Yohanes bera enjeker gij monuh egens onnga owowa fob. Noba ofa oftuftu rusnok rot oida, "Iwa imeesa joug rot yeyin mar onnga oska ojgomu fogora ita baptis tein onnga orocunc rot oida iwa imeesa joug yeyin mar onnga oska rot tenten fob. Iwa ita mar erek koma ojgomu beda Allah omosuna rot yeyin mar onnga oska jeska idou efesi si."

⁵Rusnok rufoukou doska jeska kota Yerusalem jera monuh Yudea rijeg rot mar onnga Yohanes oftuftu rot jah suma. Noba rua onnga ringg rot mar insa koma bera ragot moguma oida, "Tenten, mimif mita mar onnga oska fob." Erek koma beda Yohanes eita baptis gu rua.

⁶Yohanes ergi meisoufa onnga erek nabi Yesaya ergi sis fob. Koma bera, ofa ergi unta ofos erek efen

meisoufa. Noba ofa era sapi ofos erakid okom ofoj. Noba efen maat bera erek mof jera mosusu efei.

⁷Ofa oftufu mar erek kef oida, "Gij mona kahma beda osnok egens onnga omotoij didif bera efen ofoka onnga aksa ekirsa jeska didif. Noba didif disinsa dufoka aksa enadaij nou dugif gu mebi fogora dusuwa Ofa efen marfeb tumu sandal jeska okoda tein jinaga guru. Jeska Ofa bera efen ofoka onnga aksa ekirsa jeska Didif.

⁸Ebeibeyaif didif dita baptis gu iwa gij mei ojomu. Tina Ofa emeita Efena Ebsi gu iwa si."

⁹Gij mona onnga Yohanes eita baptis gu rusnok ros, beda Yesus en jeska kota Nazaret onnga angh gij monuh Galilea. Beda Yohanes eita baptis gu Ofa tein gij mei Yordan.

¹⁰Nou onnga Yesus orogna jeska mei insa koma, beda ainsa koma tein Ofa ek mebaga ohoda, noba Efena Ebsi Allah ojuj en erek mem monggeta mos, beda eker esij Ofa.

¹¹Beda Allah agot gu Ofa jeska mebaga oida, "Bua bera dedin edesa onnga dudou okora rot, noba onnga dudou eskeiramera eteb rot tein."

¹²Beda ainsa koma tein Efena Ebsi Allah obk Yesus jah monuh egens onnga owowa.

¹³Askesi Yesus engker jah suma ros, beda Bilis ereneni Ofa gij mona rara setka tohkuru. Noba mar onnga osuwotu ofoukou tein ringker gij monuh insa koma. Noba malaikat-malaikat jeska Allah ofij Ofa jah suma tein.

¹⁴Gij mona onnga raja Herodes angha Yohanes gij mod oskusk fob, beda Yesus eja jah monuh Galilea noba efesij mar rot Allah oga onnga oufamofa jah suma.

¹⁵ Ofa agot oida, "Mona onggā Allah omofoka ereij keingg rusnok bera ensaga doida fob. Jefeda iwa imeesa joug rot yeyin mar onggā oska ojgomu, beda iroru Allah oga onggā oufamofa kef."

¹⁶ Erek koma beda, askesi Yesus ecira gu meren Galilea efembra ros, beda Ofa ek gosnok gegeka jah suma. Goga koma bera Simon jera efen mokosa Andreas. Ainsa koma tein goga gera jala gorohca mos fogora gohoturu mos insa koma, jeska gegān gefarur bera mar erek koma ojgomu.

¹⁷ Nou onggā Yesus ek goga geita mar erek koma ros, beda Ofa agot gu goga oida, "Oisouska mona deisef bera goga gororu Didif ojgomuja. Noba Didif dumoftufts goga rot teinefa goga gohoturu rusnok jeskaseda rumororu Didif."

¹⁸ Beda ainsa koma tein goga gaha gegān jala jah fogora gororu Yesus ojgomuja.

¹⁹ Beda Yesus ecira gu meren efembra koma deika onjoros Ofa ek gosnok gegeka deika. Goga koma bera Yakobus jera efen mokosa Yohanes onggā Zebedeus efen efeserga. Goga insa koma gengker gij meg efesi noba geb jala onggā ebgebga.

²⁰ Ainsa koma tein Yesus ejeka gu goga tein jeskaseda gororu Ofa. Erek koma jefeda goga geja jeska gegān meka Zebedeus jera rusnok enjineg tein onggā rumfij ofa gij meg jah suma, noba goga gororu Yesus ojgomu.

²¹ Gij mona egema deika beda Yesus jera efen ruforoker rijesaga jah gu kota Kapernaum. Noba gij mona onggā Sabat beda rua onggā rusnok Yahudi rugif gu Allah. Erek koma beda Yesus oira gij mod egens onggā rua rum riteij gij tein. Beda Ofa oftufufts rusnok jah suma.

²² Rusnok nomnaga jah suma rudou ousaha eteb rot mar onnga Yesus omftuftu insa koma, jeska Ofa onoftuftu mar erek Guru-Guru agama enjineg rumftuftu gu rusnok guru, tina Ofa oftuftu mar rot owesa efek eteb ojomu.

²³ Gij mona insa koma tein, osnok egens onnga efena ofogog engker gij efen odou efesi bera eker gij mod egens koma tein. Beda ofa agerir rot oida,

²⁴ "Ei, Yesus onnga ojga jeska kota Nazaret! Bineita mar okum skoita memef onnga erek rifena ofogog guru. Bua bin jeskaseda bagob memef ei? Didif dijginaga rot Bua fob. Bua bera osnok egens koma onnga ebsi komowa onnga Allah omobk!"

²⁵ Beda Yesus etaha joug efena ofogog insa koma oida, "Ei, biker toumou ojomu! Bua burogna jeska osnok egens kef ojomu!"

²⁶ Beda efena ofogog insa koma era osnok egens koma ededima doska, noba orogna rot oga onnga agerir mar jeska osnok egens insa koma.

²⁷ Rusnok jah suma nomnaga rik noba rudou ousaha eteb rot, jefeda rua ragot moguma oida, "Wah, meidu bera kefo! Kef erek mar onswos eteb! Yesus koma bera oftuftu mar onnga efeinah rot owesa efek eteb. Noba Ofa tein ekemeji efena ofogog jeska osnok egens kef, beda efena ofogog insa koma ororu efen oga ojomu tein!"

²⁸ Erek koma jefeda rusnok jah suma riflesij rot mar insa koma rejrej monuh Galilea nomnaga.

²⁹ Nou onnga Yesus eita mar insa koma oisa fob, beda Ofa jera Simon ni, Andreas ni, Yakobus ni, Yohanes ni, rua nomnaga rurogna jeska mod egens insa koma noba rija jah mod egens onnga Simon jera Andreas gegang.

³⁰ Gij mona insa koma bera Simon efen morois ah gij mer efesi ojgomuja jeska ofa maren erek ofos ofoufem eteb. Nou onnga rusnok rik Yesus en jah suma, beda rua riflesij gu Ofa rot Simon efen mefina insa koma.

³¹ Erek koma jefeda Ofa eja skoita Simon efen mefina noba agei efen etma, beda ofij ofa jeskaseda ot. Ainsa koma tein efen ofos onnga ofoufem esiri noba ofa eita eskeira fob. Jefeda ofa oina maat nou Yesus jera efen ruforoker ojgomu.

³² Nou onnga moworu fob beda rusnok rurka rua onnga marenir rufoukou jera rua onnga efena ofogog engker gij rudou efesi tein skoita Yesus.

³³ Jefeda rusnok rufoukou jeska kota insa koma ruisa keingg mod onnga Yesus engker gij noba rimeradgoduma gu montoj.

³⁴ Beda Yesus eita eskeira gu rusnok rufoukou onnga marenir, noba Ofa tein ekemeji efena ofogog ofoukou onnga ringker gij rusnok rudou efesi tein. Ofa eyahehir joug rifena ofogog insa koma jeskaseda rinagot mar guru, jeska rua rijginaga rot oida Ofa bera Kristus onnga Allah omobk.

³⁵ Gij monog erek rahah tentena, beda Yesus osoyu noba eja jeska kota insa koma jah monuh egens onnga owowa jeskaseda om eiteij gu Allah jah suma.

³⁶ Nou onnga Simon jera efen mohujir runsowu fob beda rua rik, tina Yesus eneker guru, jefeda rua rujohca Ofa.

³⁷ Nou onnga rua ringk Yesus fob, beda rua ragot gu Ofa oida, "Akeina, rusnok rufoukou bera ruhca Bua!"

³⁸ Tina Ofa agot gu rua oida, "Mimif mija jah kota-kota enjgineg tein jeskaseda duftuftu mar

rot Allah oga jah suma. Jeska Didif din gu mebif jeskaseda duftu mar rot Allah oga gu rusnok rufoukou."

³⁹ Jefeda Ofa eja rejrej monuh Galilea insa koma noba oftufu mar rot Allah oga gij mod onnga rusnok Yahudi rum riteij gij. Noba Ofa tein ekemeji efena ofogog jeska rusnok rudou efesi.

⁴⁰ Gij mona egens bera osnok egens onnga maira et ofos en skoita Yesus. Ofa ougif gu Yesus noba erejgei gu Ofa oida, "Akeina, erek Bua bundou os rot, beda bita eskeira gu didif. Jeska bebin owesa efek bera adaij nou jeskaseda bufij didif. Beda rusnok enjgineg rumocunc rudou onnga oufamofa rot didif deika ojgomu."

⁴¹ Yesus odou okora rot osnok egens insa koma, jefeda Ofa aha efen etma esij ofa noba agot oida, "Didif dudou os dita eskeira gu bua."

⁴² Beda ainsa koma tein ofa efen ofos nomnaga eskeira ojgomu fob.

⁴³ Nou onnga Yesus omobk ofa sons, beda Ofa eyahehir joug ofa rot oida, "Bua binefesij rot mar insa kef gu rusnok enjgineg guru. Tina bua bija skoita imam egens noba bucunc bisinsa gu ofa jeskaseda ofa ek bufos beda agot rot oida bua bera biskeira rot tenten fob. Noba bua tein burka mar onnga Musa anggot rot sis fob skoita imam insa koma. Beda ofa emes mah gij mar insa koma gu Allah erek bebin mar onnga burougif gu Allah. Bua eita mar erek koma jeskaseda imam egens koma ejginaga rot oida bua bera bita eskeira rot tenten fob."

⁴⁴ (1:43)

⁴⁵ Tina osnok egens insa koma ejefesij gu rusnok rufoukou rot teinefa Yesus eita eskeira gu ofa

ojgomu. Erek koma jefeda Yesus onoira gij kota-kota koma rot tomnomna deika guru, jeska rusnok rufoukou runoisa keingg Ofa ojgomuja. Ofa ejeker jah monuh onnga owowa ojgomu. Erek koma tina rusnok rufoukou rin skoita Ofa jah suma tein ojgomuja.

2¹ Gij mona egema deika beda Yesus jera efen ruforoker ruksons jah kota Kapernaum. Nou onnga rusnok gij kota insa koma ringg oida Yesus en fob, beda rusnok rufoukou rin skoita Yesus gu mod onnga Ofa engker gij.

² Rua rin odudu deika jah suma onjoros mod egens koma ebera rot rua fob. Rusnok ragatit joug montoj awesi tein. Beda Yesus oftufu rot Allah oga gu rua.

³ Askesi Ofa oftufu mar ros, beda runa rufok tohkuru rurka osnok egens onnga ofumbohah skoita Ofa.

⁴ Tina rusnok rufoukou joug, jefeda enadaij nou rua ruiru gij mod egens insa koma jinaga guru. Jefeda rua rusok mod insa koma onnga ejmeg erek edeider. Beda rua ruhoda meja efeyi onnga runroka mod insa koma jah skida ahah Yesus ebirfaga. Beda rua ritki mofka rot osnok egens onnga ofumbohah insa koma gu Yesus.

⁵ Nou onnga Yesus ek oida osnok egens insa koma odou ororu Ofa rot tenten fob, beda Ofa agot oida, "Edohuj, bebin mar onnga oska bera dusuna jeska budou efesi fob."

⁶ Guru-Guru agama onnga ringker gij mod insa koma ringg mar onnga Yesus anggot fob. Jefeda rua ragot moguma oida,

⁷ "Osnok egens kef bera idu fogora enagot mar erek kefo! Ofa oga oruh Allah! Jeska Allah esinsiyai

ojgomu bera osuna rot mar onnga oska jeska rusnok rudou efesi ojgomu. Rusnok ebireira bera guru!"

⁸Tina Yesus ejginaga gij odou efesi rot mar onnga rua runsujohu rot gij rudou efesi insa koma fob. Jefeda Ofa agot gu rua oida, "Mar onnga iwa insujohu rot koma bera erek tenten guru.

⁹Erek Didif danggot gu osnok egens onnga ofumbohah koma oida, 'Didif dusuna bebin mar onnga oska,' beda koma erek mar onnga osufou ojgomu. Jeska iwa inejginaga rot guru oida ofa efen mar onnga oska bera onsuna rot tenten fob era gurei. Tina erek Didif dagot oida, 'Bua bidebecki, noba bufra bebin mofka fogora bija sons jah bebin mod,' beda iwa imejginaga rot tenten oida Didif dedin owesa efek nou dita eskeira gu rusnok tein.

¹⁰Tina ebeibeyaif Didif dumocunc gu iwa rot oida Allah bera eita owesa efek gu Didif, Rusnok Efesa, jeskaseda dusuna rot mar onnga oska jeska rusnok rudou efesi gu mebif jera dita eskeira gu rusnok onnga marenir tein."

¹¹Beda Yesus agot gu osnok egens onnga ofumbohah insa koma oida, "Bua bidebecki, noba bufra bebin mofka fogora bija jah bebin mod."

¹²Beda ainsa koma tein, osnok egens koma edebecki ebeirens, beda ofra efen mofka noba orogna jeska mod egens koma. Rusnok nomnaga onnga ringk mar onnga onswos insa koma bera rudou ousaha eteb rot. Jefeda rua risitit gu Allah noba ragot oida, "Mimif minek mar onswos egema erek kef sis fob guru!"

¹³Gij mona egema deika beda Yesus oksons jah meren Galilea efembra. Gij mona insa koma tein

rusnok rufoukou onnga rin skoita Ofa jah suma. Noba Ofa oftufu rua tein osok gij Allah oga.

¹⁴ Nou onnga koma oisa fob, beda Yesus ecira jah meren Galilea efembra deika. Beda Ofa orodosu jera osnok egens onnga engker gij kantor pajak onnga ofoka Lewi. Ofa koma bera Alfeus efen efesa. Ofa erek ebirfaga rot rusnok onnga runghoturu pajak nou raja Kaisar. Nou onnga Yesus engk Lewi beda Ofa agot gu ofa oida, "Bua bin noba buroru Didif ojgomu." Beda ainsa koma tein ofa orogna jeska kantor koma noba ororu Yesus ojgomuja.

¹⁵ Gij mona onnga Yesus jera efen ruforoker rint maat morototuma jera Lewi gij mod onnga ofa efen, beda ainsa koma tein rusnok rufoukou onnga runghoturu pajak jera rusnok enjgineg tein onnga Yahudi runsujohu rot oida rirek oska bera rit maat morototuma jera Yesus gonu Lewi jah suma. Jeska rusnok rufoukou insa koma onnga rururu Yesus rejrej monuh egens koma.

¹⁶ Nou onnga Guru-Guru agama rineya jeska ebic Yahudi onnga ofoka Farisi ringk Yesus ent maat morototuma jera rusnok insa koma, beda rua rijeka gu Yesus efen ruforoker oida, "Teinefa fogora yeyin Guru koma enet maat morototuma jera rua onnga runghoturu pajak jera rua enjgineg tein onnga erek oska erek komo?"

¹⁷ Yesus eg, tina rua rinjeka erek koma, jefeda Ofa agot gu Guru-Guru agama insa koma oida, "Rusnok onnga riskeiramera bera runois gu dokter guru. Tina rusnok onnga marenir ojgomu bera rumois gu Dokter. Erek koma tein Didif dinen skoita rusnok onnga rusujohu rot oida risinsa rudou bera erek ebsi komowa fob guru. Tina Didif din jeskaseda dita eiteij

ah onnga efeinah gu rusnok onnga rusujohu rot oida rerin mar onnga oska enah gij rudou efesi ojgomu."

¹⁸Gij mona insa koma bera rua onnga ruroru Yohanes Pembaptis jera rua onnga ruroru ebic Farisi tein rinet maat nou mona juens guru, tina gij mona insa koma rua rum riteij gu Allah ojgomu. Jefeda rusnok rineya rin skoita Yesus noba rijeka gu Ofa oida, "Rusnok onnga ruroru Yohanes Pembaptis jera rua onnga ebic Farisi gij mona juens bera rinet maat guru, tina rua rum riteij gu Allah ojgomu. Teinefa fogora ruforoker onnga ruroru Akeina bera rineita mar erek koma tein guri?"

¹⁹Beda Yesus agot mar onnga orocunc gu rua oida, "Gij mona onnga rusnok rumohoturuma rot osnok egens onnga oskotu arja, beda rua rit maat morototuma noba rifaga ouka rot ojgomu.

²⁰Tina gij mona onnga rusnok enjgineg ragei igers insa koma jeska rua fob, beda rusnok koma rudou okum noba rinet maat jera rinej mei erek insa koma deika guru, jeska rudou okumkum rot ojgomu. Erek koma tein, gij mona ebeibeyaif bera Didif dingker jera dedin ruforoker ros, jefeda rua rit maat jera rij mei tein jeska rudou efaga ouka ros."

²¹Beda Yesus agot mar egens deika onnga erek orocunc gu rua oida, "Rusnok rineb meifeti onnga efeinah jera meifeti onnga efeyei guru. Jeska meifeti onnga efeinah koma emegrina meisoufa onnga efeyei insa koma fogora emebga eteb deika.

²²Erek koma tein anggur efei onnga efeinah bera runotkinaja gij mesina kambing ofos onnga efeyei guru. Jeska anggur efei onnga efeinah koma emefifij gij mesina kambing ofos onnga ekirsa insa koma. Beda mesina koma emecka rot, noba anggur insa

koma omotkinaja jeska. Noba mesina onnga efeyei koma emeja erek oska efekeifa rot tein ojomu. Jefeda anggur efei onnga efeinah bera rutkinaja gij mesina kambing ofos tein onnga efeinah ojomu. Erek koma tein rot mar onnga efeinah onnga Didif duftuoftu rot."

²³ Gij mona onnga Sabat egens bera Yesus jera efen ruforoker rirabj mekeni gandum egens. Askesi rua rirabj mekeni egens insa koma beda Ofa efen ruforoker rigib gandum efej noba rit oskiyai.

²⁴ Jefeda rusnok onnga ebic Farisi rineya ragot gu Yesus oida, "Teinefa fogora bebin ruforoker koma rikirsa rot mar onnga mifmin agama erebent eyahehir joug erek komo? Jeska erebent koma agot oida gij mona onnga Sabat bera minefarur gij mar egema tein guru. Noba mar onnga rua runtunggom koma bera erek rifarur ojomu."

²⁵ Beda Yesus agot gu rua oida, "Mar onnga iwa isujohu rot bera erek tenten guru. Iwa ik rot mar egens gij Mar Efeyi Ebsi onnga emfesij rot osok gij meidu onnga Daud ontunggom gij mona onnga ofa jera efen ruforoker mosona ongkir. Jeska gij mona onnga Abyatar erek imam onnga ofoka aksa, beda Daud oira gij mod onnga imam-imam rum riteij gu Allah gij. Beda ofa et roti onnga imam-imam sismeni rira nou rurougif gu Allah fob. Beda ofa eita roti insa koma gu efen ruforoker tein. Tina mifmin agama erebent agot oida imam-imam risinsiyai bera rit roti insa koma ojomu.

²⁶ (2:25)

²⁷ Erek koma tina Daud jera efen ruforoker bera rineita mar onnga oska guru. Jeska Allah ontunggom mona onnga Sabat jeskaseda ofij rusnok rot ojomu.

Mona onggá Sabat koma bera onofoufem ekirsa jeska rusnok guru.

²⁸Jefeda Didif, Rusnok Efesa, disinsiyai dedin owesa efek jeskaseda dagot rot mar meidu onggá dedin rusnok runtunggom gij mona onggá Sabat ojgomu."

3¹Gij mona onggá Sabat egema deika beda Yesus oira sons gij mod onggá rusnok Yahudi rum riteij gu Allah gij. Osnok egens efen etma jah enama onggá ofumbohah bera eker jah suma.

²Noba rineya jeska ebic Farisi onggá ringker jah suma ruhobut joug Yesus jeskaseda rik oida Ofa eita eskeira gu osnok egens insa koma ei era gurei. Jeska koma bera erek Ofa ekirsa rot rerin agama erebent. Beda rua rumocunc Ofa erek oska rot tein.

³Erek koma, beda Yesus agot gu osnok egens onggá efen etma jah enama ofumbohah insa koma oida, "Bua bin noba but jah sif, jah rusnok nomnaga rudou."

⁴Beda Yesus ejeka gu rusnok onggá ringker jah suma oida, "Ororu mifmin hukum agama bera mimif mutunggom mar erek meidu gij mona onggá Sabat insa kefo? Mimif mita mar onggá oska ei, era mutunggom mar onggá oufa ei? Koma bera, mimif muskotu rusnok jeska rerin mar onggá okum erek insa koma ei, era mimif murouns rua riker gij rerin mar onggá okum ojgomuja onjoros ragos rot ei?" Tina rua onggá Farisi insa koma nomnaga riker toumou ojgomu.

⁵Beda Yesus odou okum eteb rot rua jeska ribirfaga ombrera noba rudou onokora rot osnok egens koma onggá efen etma jah enama ofumbohah guru. Jefeda Ofa agot gu osnok egens koma oida, "Bua busk bebin

bitma koma." Osnok egens insa koma osk efen etma noba ainsa koma tein efen etma eskeira fob.

⁶ Nou onnga rusnok ebic Farisi rurogna jeska mod insa koma fob, beda rua rumohoturuma rot ebeirens jera rusnok rineya onnga erek raja Herodes efen ruforoker jeskaseda riflesij moguma rot teinefa rua rimagob Yesus.

⁷ Yesus jera efen ruforoker rija jeska monuh insa koma, beda rua rija jah meren Galilea efembra. Noba gij mona insa koma bera rusnok rufoukou doska jeska monuh Galilea ruroru Yesus jah suma tein.

⁸ Rusnok rufoukou jeska kota Yerusalem jera kota-kota enjgineg jeska monuh Yudea ni, monuh Idumea ni, jera rineya onnga jeska monuh onnga angh jah mei Yordan enama ni, rineya onnga jeska kota Tirus jera kota Sidon ni bera rin skoita Yesus jeskaseda rik rot mar onswos onnga Ofa ontunggom fob.

⁹ Beda Yesus obk efen ruforoker jeskaseda risejah meg egens nou Ofa, jeska rusnok riskembemba rin odudu deika skoita Ofa noba riker rejrej Ofa. Jefeda Ofa odou os eker gij meg efesi gu esinsa noba oftufu rua jeska meg insa koma ojgomu.

¹⁰ Erek koma, jeska Ofa eita eskeira gu rusnok rufoukou fob, jefeda rusnok enjgineg onnga marenir rin noba rut rejrej Ofa tein. Noba erek rua rahtec Ofa efen meisoufa tumu efen efaga, beda rua tein rita eskeira fob.

¹¹ Noba nou onnga rusnok enjgineg onnga efena ofogog engker gij rudou efesi ringk Yesus, beda efena ofogog insa koma okoja rua jeskaseda risiri jah Yesus odou noba ragerir oida, "Bua bera Allah efen efesa!"

¹² Tina Yesus agot joug efena ofogog insa koma rot ahais jeskaseda rinagot mar guru.

¹³ Yesus eja jah memaga ofos. Beda Ofa ois gu runer rineya onnga Ofa odou os rijerek efen ruforoker onnga rumofij Ofa.

¹⁴ Nou onnga rua rin skoita Ofa fob, beda Ofa ocunc runer rufok setka kungkob erfeka jeskaseda rijerek efen rasul-rasul. Ofa ocunc rua insa koma jeskaseda ruroru Ofa fogora rua tein rujoftuftu rusnok noba rikemeji efena ofogog onnga engker gij rusnok rudou efesi rot owesa efek jeska Allah tein.

¹⁵ (3:14)

¹⁶ Runer setka kungkob erfeka insa koma onnga Yesus oncunc erek efen rasul-rasul fob bera rufoka erek kef: Simon (ongga Ofa ejeka ofoka Petrus tein) ni,

¹⁷ Yakobus jera efen mokosa Yohanes, onnga Zebedeus efen efeserga ni, (Ofa ejeka goga koma erek Boanerges, onnga efen ofou oida, "Moc ogugur efen oforoka"),

¹⁸ Andreas ni, Filipus ni, Bartolomeus ni, Matius ni, Tomas ni, Yakobus onnga Alfeus efen efesa ni, Tadeus ni, Simon onnga jeska Yahudi ebic egens onnga ofoka Zelot ni,

¹⁹ jera Yudas onnga ojga jeska kota Iskariot ni. Gij mona kahma ofa bera onnga odou emekikif jeska Yesus tein.

²⁰ Yesus oksons jah mod egens onnga Ofa engker gij. Beda rusnok rufoukou rin skoita Ofa jah suma tein, jefeda Ofa jera efen ruforoker rineker keingg rufons era rinet maat oskiyai tein jinaga guru.

²¹ Erek koma jefeda, rusnok enjgineg onnga riker jah suma bera ragot osok gij Yesus oida, "Merei ok

osnok egens kef ojgomu!" Nou onnga Yesus efen ebskir ringg rot mar insa koma, beda rua rin skoita Yesus jeskaseda ruroun Ofa sons jah efen kota Nazaret.

²² Erek koma beda Guru-Guru agama onnga rin jeska Yerusalem ragot oida, "Beelzebul, onnga erek ebirfaga nou efena ofogog nomnaga bera oira gij Ofa odou efesi fob. Jefeda Ofa esma owesa efek jeska Beelzebul fogora ekemeji efena ofogog jeska rusnok rudou efesi ojgomu."

²³ Jefeda Yesus ohoturu Guru-Guru agama insa koma nomnaga. Beda Ofa efesij mar onnga orocunc gu rua erek kef oida, "Teinefa fogora iwa inagot mar erek komo? Bilis (onnga ofoka Beelzebul tein) bera enekemeji efena ofogog enjgineg jeska rusnok rudou efesi jinaga guru, jeska Bilis jera efena ofogog insa koma bera erek egens ojgomu.

²⁴ Erek rusnok onnga ringker gij monuh egens risinsa rimagobuma, beda gij mona kahma rusnok insa koma rimekebema rot si.

²⁵ Erek koma tein, erek rusnok onnga ringker gij mod etma egens rimagobuma, beda mod etma egens insa koma emesiri ojgomu noba rusnok insa koma rineker erek egens deika guru.

²⁶ Beda erek koma tein rot efena ofogog. Erek efena ofogog nomnaga onnga ruroru Bilis koma rimagobuma, beda rua rineker erek egens deika guru, noba runofora efek tein deika guru.

²⁷ Erek koma tein, erek osnok egens odou os eita mareibra jeska mod onnga osnok egens onnga ofora efek efen, beda sismeni bera ofa emagei osnok egens onnga ofora efek insa koma, noba erakid efen etma

tein rot ahais fog, fogora ofa emeita efen mareibra nomnaga jeska efen mod insa koma."

²⁸ Beda Yesus agot gu Guru-Guru agama insa koma deika oida, "Erek rusnok rita mar onnga oska noba ruga oruh Allah tein, beda Allah omosuna rot mar onnga oska insa koma jeska rudou efesi tein.

²⁹ Tina erek rusnok ruga oruh Efena Ebsi Allah, beda Allah onosuna rot mar onnga oska koma jeska rudou efesi jinaga guru."

³⁰ (Yesus agot mar erek insa koma, jeska Guru-Guru agama koma ragot oida Ofa esma owesa efek jeska Bilis ojgomu, noba enesma owesa efek jeska Efena Ebsi Allah guru.)

³¹ Erek koma beda Yesus efen mosu jera mokoser rin skoita Ofa. Nou onnga rua rinsaga fob, beda rua riker jah mebah. Beda rua rubk osnok egens jeskaseda agot gu Yesus oida rua rinsaga jah suma fob.

³² Gij mona insa koma bera rusnok rufoukou ringker rejrej Yesus jeskaseda rig rot mar onnga Ofa oftuftu. Erek koma beda rineya ragot gu Ofa oida, "Akeina, mosib jera obkoser rineker jah mebah kef. Rua ruhca Bua."

³³ Beda Yesus agot oida, "Didif dimagot gu iwa rot rusnok idu bera onnga erek dedin ameiner jera edkoser."

³⁴ Beda Ofa eyajga joug efen ruforoker onnga ringker rejrej Ofa noba agot oida, "Rusnok kef onnga ringker rejrej Didif bera erek dedin ameiner jera dedin edkoser.

³⁵ Jeska rusnok onnga rutunggom mar onnga Allah ondou os rot bera erek dedin edkoser jera dedin edieser jera dedin ameiner tein."

4¹ Yesus ot doida meren Galilea efembra jeskaseda oftufu mar gu rusnok deika. Rusnok rufoukou onnga rin odudu deika skoita Ofa jah suma. Rua nomnaga bera erek rufoukou doska, jefeda Ofa eifef meg egens jeskaseda oftufu rusnok insa koma onnga rut jah meren efembra.

² Beda Ofa efesij mar ofoukou onnga erek orocunc rot gu rua.

³ Ofa agot oida, "Iwa ig mar onnga Didif dimefesij kef rot iskusk noba isujohu rot mar insa koma efen ofou ojgomu. Osnok egens onnga ef efen mekeni eja noba era maat efef erebirma.

⁴ Askesi ofa era maat efef insa koma enerebirma ros, beda eneya onnga ensiri gu moroju. Beda mem rin noba rit maat efef insa koma.

⁵ Beda eneya onnga ensiri gu mebi onnga mamu tuturu. Beda maat efef insa koma er ebeirens jeska mebi erek oskiyai noba orohu mamu tein. Tina nou onnga mowa orogna noba edi maat efef insa koma, beda maat koma efef nomnaga ojgomu, jeska maat efef insa koma ener gij mebi onnga erek eteb guru.

⁶(4:5)

⁷ Beda maat efef eneya tein onnga ensiri gij moworug ofogog. Noba moworug ofogog insa koma er morototuma jera maat efef koma. Tina moworug koma eij keingg maat efef jefeda enefek guru.

⁸ Beda maat efef eneya tein onnga ensiri gij mebi onnga ofogu rara. Beda maat efef insa koma er erek ongnoska ojgomu noba enjefek erek ofoukou doska. Noba egema onnga enjefek erek ofoukou tein. Noba egema onnga enjefek erek adaij nou tein."

⁹ Nou onnga Yesus emfesij mar onnga orocunc insa koma gu rua fob, beda Ofa agot deika gu rua oida,

"Iwa onnga ingg mar onnga Didif danggot insa kef rot iskusk fob, beda isujohu rot mar insa koma efen ofou ojgomu."

¹⁰ Nou onnga Yesus ejeker gu esinsa, beda efen rufroker rufok setka kungkob erfeka jera rusnok enjgineg tein onnga ringg mar onnga Ofa oftufu insa koma bera rija skoita Ofa. Beda rua rijeka gu Ofa rot mar onnga orocunc insa koma efen ofou.

¹¹ Beda Ofa agot gu rua oida, "Didif dimfesij gu iwa rot teinefa Allah ofoka ereij keingg efen rusnok fob. Tina rusnok enjgineg onnga runoira gij rusnok onnga Allah ofoka ereij keingg enesi bera rudou enebriyi gij mar insa koma efen ofou rot tenten enesi, jeska mar koma bera ah jejema jeska rua ros.

¹² Erek koma jeska sis fob nabi egens anggot mar osok gij rua oida, 'Rua riteij ah keingg mar onnga didif dutunggom, tina rudou enebriyi gij efen ofou guru. Noba rua rig mar onnga didif danggot, tina rudou enejginaga rot mar koma efen ofou tein guru. Jefeda rua rinemeesa joug rot rerin mar onnga oska guru. Erek koma jefeda Allah onosuna rot rerin mar onnga oska koma jeska rudou efesi guru.' "

¹³ Erek koma beda Yesus agot gu rua deika oida, "Didif dudou okum rot iwa jeska idou enebriyi gij mar onnga durocunc rot insa koma efen ofou enesi. Jefeda idou enebriyi gij mar onnga orocunc enjgineg onnga dimefesij gu iwa tein guri.

¹⁴ Jefeda Didif dimagot gu iwa rot orocunc insa koma osok gij maat efej efen ofou. Osnok egens onnga era maat efej erebirma insa koma bera erek osnok egens onnga efesij rot Allah oga onnga oufamofa.

¹⁵ Maat efej onnga ensiri gu moroju insa koma bera erek rusnok onnga rig rot Allah oga insa koma. Nou onnga rua ringg rot oga insa koma fob, beda ainsa koma tein Bilis en noba ereni rudou rot ahais jeskaseda rudou ofoj joug rot Allah efen oga insa koma nomnaga ojgomu.

¹⁶ Noba maat efej onnga ensiri gij mebi onnga mamu tuturu insa koma bera erek rusnok onnga rig rot Allah oga noba ruroun efen oga insa koma rot rudou onnga efaga ouka eteb.

¹⁷ Tina rua rinesah Allah efen oga insa koma gij rudou efesi rot ahais guru. Jefeda gij mona onnga mar okum ereneni rua, era rusnok rita mar onnga oska skoita rua, beda rua raha Allah oga insa koma jah noba runororu deika guru.

¹⁸ Maat efej onnga ensiri gij moworug ofogog insa koma bera erek rusnok onnga ringg rot Allah oga fob. Tina rua rusujohu ekirsa rot maat onnga rimet, jera meisoufa onnga rimergi ojgomuja. Noba rua tein rudou erebibi rot mareibra ofoukou ojgomuja jera rot rerin riteij ah insa kef tein ojgomu. Jefeda mar insa koma nomnaga of joug rudou efesi ojgomu fogora rua runosujohu rot Allah oga insa koma deika guru.

¹⁹ (4:18)

²⁰ Noba maat efej onnga ensiri gu mebi onnga ofogu rara insa koma bera erek rua onnga ringg Allah oga noba rinsah efen oga insa koma rot koisoisa gij rudou efesi. Jefeda rua rutunggom mar ofoukou onnga oufamofa eteb erek maat efej insa koma onnga efen efek ofoukou onnga oufamofa."

²¹ Beda Yesus agot rot mar onnga orocunc gu rua deika oida, "Rusnok onnga ris mah gij lampu

bera runocohun lampu onnga eisa insa koma guru. Noba rua tein rinaha lampu onnga eisa insa koma jah mebera obohoh guru. Onnga tenten bera rua raha lampu insa koma rot tomnomna jah skidameda ojgomu.

²² Erek koma tein, mar nomnaga osok gij Allah oga onnga angh jejema jeska rusnok gij mona ebeibeyaif bera rua rimejginaga rot gij mona kahma si. Mar koma osok gij Allah oga onnga iwa ijginaga rot fob bera gij mona kahma rusnok enjgineg tein rimejginaga rot si.

²³ Jefeda iwa isujohu rot iskusk osok gij mar onnga Didif dimfesij rot gu iwa fob ojgomu.

²⁴ Erek koma jefeda iwa ig noba isujohu rot iskusk osok gij mar kef onnga Didif dimfesij rot gu iwa. Jeska erek iwa isujohu rot iskusk, beda Allah omofij iwa jeskaseda idou ebriyi gij mar insa koma efen ofou. Noba Ofa tein emeita idou onnga ebriyi gij ekirsa gij mar insa koma si.

²⁵ Jeska erek iwa isujohu rot iskusk osok gij mar insa koma efen ofou fogora idou ebriyi gij, beda Allah omofij iwa jeskaseda idou ebriyi gij rot ekirsa deika. Tina erek iwa inosujohu rot iskusk osok gij mar insa koma efen ofou guru, beda mar onnga oskiyai insa koma tein onnga idou embriyi gij fob bera emeseiseifa jeska iwa si."

²⁶ Beda Yesus agot gu rua deika oida, "Didif dimefesij mar onnga orocunc gu iwa rot teinefa rusnok onnga Allah omofoka ereij keingg bera rumogun odudu dokun deika. Koma bera erek osnok egens insa koma onnga era maat efej erebirma gij efen mekeni.

²⁷ Nou onnga ofa otunggom mar insa koma oisa fob, beda ofa onosujohu deika rot oida maat efej insa koma emer erek teinefa guru. Tina gij orofosut mona bera ofa ahca noba edebecki erek giskini ojgomu, noba maat efej insa koma er ojgomuja.

²⁸ Mebi ofogu koma bera otunggom maat efej insa koma fogora ener rot oufamofa. Beda maat efej insa koma ener ojgomuja onjoros efen efeyi ofokoku orogna fogora emfebi.

²⁹ Nou onnga maat efej insa koma emfek fob, beda ofa obk rusnok jeskaseda ruhoturu maat efek insa koma jeska mekeni. Erek koma tein, rusnok onnga Allah omofoka ereij keingg bera rumogun odudu dokun deika si."

³⁰ Yesus agot rot mar onnga orocunc gu rua juens deika oida, "Didif dimefesij mar osok gij mega moj efej egens jeskaseda durocunc gu iwa rot teinefa rusnok onnga Allah omofoka ereij keingg bera rumogun odudu dokun deika.

³¹ Osnok egens erefa mega mos efej egens gij efen mekeni. Sismeni bera mega mos insa koma erek efej ai ojgomai.

³² Tina mega mos efej insa koma er erek mega onnga akseij eteb fob. Beda mem ofoukou ojoka efem gij mega esta insa koma."

³³ Yesus efesij mar ofoukou onnga erek orocunc nou rusnok jeni erek rudou ebriyi gij rot mar koma ojgomu.

³⁴ Mar nomnaga onnga Ofa emfesij gu rua bera erek mar onnga orocunc rot ojgomu. Tina gij mona onnga Ofa eker jera efen ruforoker ojgomu, beda Ofa oftufu gu rua rot koisoisa osok gij mar onnga orocunc insa koma nomnaga efen ofou.

³⁵ Gij mona insa koma tein erek moworu fob, beda Yesus agot gu efen ruforoker oida, "Mimif mija jah meren enama konj."

³⁶ Jefeda Ofa efen ruforoker rifef meg egens insa koma onnga Yesus engker gij jeska rusnok rufoukou onnga runt gu meren efembra. Beda rusnok enjineg tein rifef meg egema noba ruroru Yesus jah meren enama insa koma.

³⁷ Nou onnga rua rinsaga gu mei obug, beda mof edebecki rot okuj onnga owesa eteb. Noba ainsa koma tein mei mojemu ofog onnga eteb edebecki noba edi meg rot rua onjoros mei mojemu efei embera gij meg rot rua fob.

³⁸ Askesi mof endi rua erek koma ros, beda Yesus ebirfaga erebgi moroirebi noba Ofa ahca ahaingkongka ojgomu gij meg osku. Tina Ofa efen ruforoker rimeesa eteb, jefeda rua rijeb Ofa. Beda rua ragot oida, "Akeina, ai juens beda meg omojuj rot mimif gu mei kefi! Bua binemeesa rot gurei!"

³⁹ Jefeda Yesus edebecki noba Ofa etaha joug mof onnga eteb insa koma, beda Ofa agot joug meren ofog eteb onnga edebecki insa koma tein. Beda ainsa koma tein mof esiri toumou noba meren ofog insa koma tein edeider sons.

⁴⁰ Beda Yesus agot gu rua oida, "Teinefa fogora iwa imeesa rot erek komo? Erek iwa idou inoruru Didif rot tenten enesei!"

⁴¹ Erek koma jefeda rua rudou ousaha eteb rot Ofa fogora rua ragot moguma oida, "Ofa kef bera efen owesa efek eteb, jeska mof jera mei mojemu ofog tein ororu efen oga!"

5 ¹ Yesus jera efen ruforoker rifef meg egens insa koma onjoros runjowa gu monuh onnga rusnok

Gerasa ringker gij. Monuh insa koma bera angh gu meren Galilea enama.

² Nou onnga Yesus onjuj jeska meg insa koma fob, beda osnok orna egens orogna jeska mamu efesi onnga erek mar agos odog.

³ Koma bera, efena ofogog engker gij efen odou efesi tein, jefeda ofa eker gu mamu efesi insa koma ojomuja. Sis fob rusnok rira rantai rirakid efen etma jera aki jeska ofa ofogog doska, tina guru. Ofa ekris rantai insa koma fogora ebga jeska noba ofa eyah kermom onnga rangha gu aki tein fogora ebs. Ofa erek ofora efek eteb doska jefeda enadajj nou rusnok ranggei ofa jinaga guru.

⁴ (5:3)

⁵ Gij orofosut mona jera motu bera ofa ecira gij monuh onnga mar agos odog insa koma noba ofa tein eja jah memaga ofos. Beda ofa agerir mar ojomuja noba era mamu efeya ereris esinsa efaga tein.

⁶ Nou onnga ofa engk Yesus enesaga yes ros, beda ofa ofof skoita Yesus noba ougif jah Yesus odou.

⁷ Beda Yesus agot gu efena ofogog insa koma onnga engker gij ofa odou efesi oida, "Bua buroгна jeska osnok egens kef ojomu!" Beda osnok egens insa koma ois rot oga eteb oida, "Yesus, Bua bera Allah, onnga ofoka aksa, efen efesa! Bua bunotunggom mar onnga okum skoita didif guru! Didif duis gu Bua jeskaseda bagen gu Allah esinsa rot oida binaha mar okum keingg memef guru!"

⁸ (5:7)

⁹ Beda Yesus ejeka ofa oida, "Bua bufoka idu." Beda ofa oroun oida, "Didif dufoka Mesa, jeska efena

ofogog eskemba doska bera ringker gij osnok egens kef odou efesi."

¹⁰ Efena ofogog insa koma emeesa eteb rot oida Yesus emekemeji rua nomnaga jeska monuh insa koma. Jefeda efena ofogog insa koma ois gu Yesus jeskaseda Ofa eneita mar erek koma gu rua guru.

¹¹ Ainsa koma tein mek ofoukou et mebi jah memaga ofog oduma onnga angh doida jah suma.

¹² Jefeda efena ofogog insa koma ois gu Yesus jeskaseda erek Ofa oitij rot beda rifena ofogog insa koma nomnaga rujoira gij mek ofoukou insa koma ojgomu.

¹³ Beda Yesus oitij rot, jefeda rifena ofogog insa nomnaga ruroгна jeska osnok egens insa koma noba rujoira gij mekir ofoukou koma rudou efesi. Jefeda mekir koma ruku noba rusoka jeska momfaga onnga erek mobcka aksa jah meren efembra fogora ragos ojgomu. Mek insa koma onnga runsoka jeska momfaga bera erek ribu egeka.

¹⁴ Nou onnga rusnok onnga ringker joug mek ofoukou koma rik mar rot insa koma nomnaga fob, beda rua rufof jah kota noba rejrej monuh insa koma jeskaseda riflesij rot mar onnga rua ringk fob. Erek koma jefeda rusnok rufoukou ruroгна jeska kota koma jeskaseda rik rot mar onnga rusnok insa koma ringk fob.

¹⁵ Nou onnga rua runjowa keingg Yesus fob, beda rua rik, tina osnok egens onnga merei ongk insa koma engker doida Yesus aki. Ofa ergi meisoufa noba efen odou efesi eskeira fob. Rua ringk erek koma, jefeda rua nomnaga rimeesa rot Yesus jeska rua rik oida Ofa efen owesa efek eteb.

¹⁶ Beda rua onnga ringk mar onnga Yesus ontunggom insa koma rifesij gu rusnok rineya koma rot teinefa Ofa ekemeji efena ofogog jeska osnok egens insa koma odou efesi noba rot mar onnga encirej mek ofoukou insa koma fob.

¹⁷ Jefeda rusnok Gerasa koma rirejgei gu Yesus jeskaseda Ofa eja jeska rerin monuh ojgomu.

¹⁸ Nou onnga Yesus eifef meg, beda osnok egens insa koma onnga eita eskeira fob bera ois gu Yesus jeskaseda ororu Ofa tein.

¹⁹ Tina Yesus onoitij rot guru. Ofa agot gu osnok egens insa koma oida, "Bua bija noba bifesij gu bebin rusnok nomnaga rot mar onnga oufamofa onnga Allah ontunggom nou bua fob, noba rot teinefa Allah ocunc rot efen odou onnga oufamofa skoita bua fob."

²⁰ Erek koma jefeda ofa ejefesij gu rusnok gij kota setka onnga angh gij monuh egens insa koma osok gij mar onnga Yesus ontunggom nou ofa fob. Noba rusnok nomnaga onnga ringg rot mar insa koma bera rudou ousaha eteb rot tein.

²¹ Yesus eja jeska rusnok Gerasa insa koma, beda Ofa oksons jah meren Galilea enama. Noba nou onnga Ofa enjesaga jah meren efembra, beda rusnok rufoukou doska rumohoturuma rejrej Ofa.

²² Gij mona insa koma bera osnok egens onnga ofoka Yairus en skoita Yesus. Ofa erek ebirfaga nou mod egens onnga rusnok Yahudi rum riteij gu Allah gij. Nou onnga ofa ek Yesus, beda ofa es okeibi gu mebi jah Yesus odou noba ois rot odou onnga okora eteb gu Ofa oida,

²³ "Akeina, dedin edesa ojaga egens bera maren eteb doska noba ofa doida nou anggos. Jefeda Bua bin jah dedin mod noba baha bitma esij ofa jeskaseda

bita eskeira gu ofa. Erek Bua bita mar erek koma beda ofa enagos guru."

²⁴Jefeda Yesus jera efen ruforoker rija morototuma jera Yairus jah efen mod. Noba rusnok rufoukou insa koma tein onnga ruroru Yesus bera rimeradgoduma rejrej Ofa.

²⁵Noba ojaga egens onnga mesta ebah ojgomuja gij tahun rara setka kungkob erfeka fob ecira otoij rusnok rufoukou insa koma rifelesa.

²⁶Mar insa koma bera eita efera okora eteb gu ofa ojgomuja. Jefeda ofa ohu efen mareibra nomnaga jeskaseda orka esinsa skoita dokter ojgomuja. Ofa eita mar erek koma onjoros efen mareibra nomnaga oisa fob. Tina ofa eneita eskeira guru. Ofa efen ogufu onnga mesta ebah insa koma eya erek ekirsa ojgomuja.

²⁷Ojaga egens koma engg rot mar onswos ofoukou onnga Yesus ontunggom fob. Jefeda ofa tein eretka gij rusnok rufoukou insa koma rifelesa onjoros onjot doida jah Yesus ejmeg fob.

²⁸Ofa eita mar erek koma jeska ofa osujohu rot oida erek ofa otub ofou onduis meifeti tumu Yesus efaga, beda ofa emeita eskeira si.

²⁹Nou onnga ofa otub ofou oduis meifeti tumu Yesus fob, beda ainsa koma tein efen ogufu aha toumou jah. Beda ainsa koma tein ofa ejginaga rot oida ofa eita eskeira rot tenten fob.

³⁰Beda ainsa koma tein Yesus ejginaga gij odou efesi rot oida efen owesa efek orogna jeska Ofa fob. Jefeda Ofa eyajga jah ejmeg skoita rusnok rufoukou insa koma noba ejeka oida, "Idu bera otub ofou onduis meifeti tumu dijmeg kef?"

³¹ Beda efen ruforoker ragot gu Ofa oida, "Akeina, rusnok riskemba onnga runt rejrej Bua noba rimeradgoduma skoita Bua jah sif. Jefeda erek rusnok rufoukou otub ofou oduis Bua."

³² Tina Yesus eiteij orohcohca ojgomuja rot osnok egens insa koma onnga otub ofou oduis meifeti tumu efen efaga.

³³ Ojaga egens insa koma odou ejginaga rot oida ofa eita eskeira fob. Jefeda ofa en skoita Yesus rot odou onnga osousoyu noba emeesa eteb beda ofa ougif gu Ofa. Beda ofa efesij rot mar insa koma nomnaga gu Ofa.

³⁴ Erek koma beda Yesus agot gu ojaga egens insa koma oida, "Edesa, jeska budou ororu Didif rot tenten fob, jefeda bua binsma eskeira fob. Noba bija rot budou onnga efaga ouka rot ojgomu, jeska mar egens koma onnga eita efera okora gu bua sis fob bera onoksons skoita bua deika guru."

³⁵ Askesi Yesus anggot mar ros, beda rusnok rineya rin jeska Yairus efen mod noba ragot gu Ofa oida, "Tuan, bebin ebesa ojaga insa koma agos fob. Jefeda bua bunorohrus Yesus en deika guru."

³⁶ Yesus eg rot mar onnga rua ranggot insa koma, tina Ofa agot gu Yairus oida, "Bua binemeesa rot guru. Budou ororu oida dedin owesa efek onnga adajj nou dufij bua ojgomu."

³⁷ Rusnok enjineg rudou os ruroru Yesus jah Yairus efen mod tein, tina Ofa oroun Petrus, Yakobus jera Yakobus efen mokosa Yohanes ojgomu.

³⁸ Nou onnga rua rinsaga gu mod onnga Yairus efen fob beda Yesus ek, tina rusnok rufoukou jah suma erek ribisa ohohora gij eteb doska, noba rudou tein ousaha rot ojgomuja.

³⁹ Erek koma beda Yesus oira gij mod egens insa koma noba agot gu rusnok oida, "Iwa ibisa fogora yuga onohohora gij erek koma rot meidu? Jeska oforoaka egens koma enagos guru. Ofa ahca koma."

⁴⁰ Nou onnga rua ringg Yesus anggot mar erek koma beda rua nomnaga rutut rot Ofa jeska rua rijginaga rot oida oforoaka egens insa koma bera agos rot tenten fob. Tina Ofa obk rua nomnaga rurogna jeska mod insa koma. Beda Ofa oroun oforoaka egens insa koma efen meka gonu mosu jera Ofa efen ruforoker rugomu insa koma morototuma jera Ofa gij morongsu onnga mar agos angh gij.

⁴¹ Beda Yesus agei oforoaka egens insa koma etma beda agot oida, "Talita kum!" Koma efen ofou oida, "Buforoaka, bidebecki."

⁴² Beda oforoaka ojaga egens insa koma edebecki ebeirens, noba ecira jah. (Ofa efen tahun erek setka kungkob erfeka fob.) Rua onnga ringk mar insa koma rufos graga eteb rot.

⁴³ Tina Yesus eyahehir joug rua nomnaga jeskaseda rinagot rot mar insa koma gu rusnok enjgineg guru. Beda Ofa obk rua jeskaseda rita maat gu oforoaka ojaga egens insa koma ojgomu.

6¹ Nou onnga Yesus otunggom mar insa koma oisa fob, beda Ofa jera efen ruforoker rija jeska monuh insa koma beda ricira jah kota Nazaret onnga Yesus efen ojga.

² Gij mona onnga Sabat beda Yesus oira gij mod onnga rusnok rum riteij gu Allah gij noba oftufu rusnok jah suma. Beda rusnok rufoukou rudou ousaha rot mar onnga Ofa omftufu gu rua. Jefeda rua ragot moguma oida, "Teinefa fogora Ofa odou

efesis rot mar erek komo? Idu bera oftufu Ofa fogora otunggom mar ongos onswos teino?

³Jeska Ofa kef bera osnok egens giskini erek mimif ojgomu. Ofa efen efarur erek rua ongos rutunggom kursi jera meja, erek koma ojgomu. Ofa bera Maria efen efesa. Noba Ofa tein, Yakobus ni, Yoses ni, Yudas jera Simon ni rerin rukora. Ofa efen meyeser tein riker morototuma jera mimif jah sif!" Erek koma jefeda rua rudou oska rot Ofa.

⁴Beda Yesus agot gu rua oida, "Rusnok gij kota-kota ofoukou bera rugif gu nabi-nabi ongos runjogog rua. Tina gij kota ongos nabi-nabi risinsa rerin bera rusnok runougif gu rua guri. Erek koma rot Didif tein. Jeska Didif, ongos erek nabi egens tein, bera din jah dedin kota kef, tina iwa inougif gu Didif guri."

⁵Ofa aha etma esij rusnok rigekeka ojgomu ongos marenir fogora eita eskeira gu rua. Tina Ofa onotunggom mar onswos ofoukou gij kota insa koma guru, jeska rusnok rudou onororu Ofa guru.

⁶Noba Ofa odou ousaha rot rusnok ongos ringker gij kota egens insa koma, jeska rudou onororu Ofa jinaga guru. Yesus eja jah kota-kota ongos angh gij monuh insa koma noba oftufu mar gu rusnok.

⁷Beda Ofa ois gu efen ruforoker rufok setka kungkob erfeka jeskaseda rumohoturuma jera Ofa. Beda Ofa eita owesa efek gu rua nomnaga jeskaseda rikemeji efena ofogog jeska rusnok rudou efesi. Beda Ofa obk rua erek gosnok gegeka gegeka jah kota-kota ongos angh gij monuh insa koma.

⁸Nou ongos rua rinja beda Ofa agot gu rua tein oida, "Iwa inesah mar egema tein guru. Iwa yurka moskur joug itma ojgomu. Tina inorka mar erek maat

ni, era mesina nou isah mar gij ni, era fifi egema tein guru.

⁹Iwa irgi sandal joug yukoda jera meisoufa egensmes tumu ifaga ojgomu, tina inorka meisoufa egema tein guru.

¹⁰Beda gij mona onnga iwa yuira gij kota egens fob, noba rusnok ruroun iwa gij rerin mod, beda iwa yahca gij mod egens insa koma ojgomu onjoros iwa inja jeska kota insa koma jeskaseda rudou onoska rot iwa guru.

¹¹Tina erek iwa insaga gu kota egens, noba rusnok onnga ringker jah suma runoroun iwa guru, noba rua tein rineg rot mar onnga iwa yuftuftu rot gu rua guru, beda ija jeska kota insa koma ojgomu. Noba nou onnga iwa inja jeska kota insa koma, beda yubsa ikoda rot mebi ofou sismeni fog. Iwa itunggom mar koma jeskaseda irocunc rot oida mebi ofou onnga angh gu rua bera erek rerin mar onnga oska onnga angh gu rua ojgomuja."

¹²Jefeda Yesus efen ruforoker rufok setka kungkob erfeka rija jah kota-kota fob. Rua ruftuftu gu rusnok jeskaseda rimeesa joug rot rerin mar onnga oska.

¹³Noba rua tein rikemeji efena ofogog ofoukou jeska rusnok rudou efesi. Noba rua rira miniyi rurohur gij rusnok onnga marenir ritofu fogora rita eskeira gu rua.

¹⁴Rusnok rufoukou rifesij moguma rot mar nomnaga onnga Yesus ontunggom fob onjoros raja Herodes tein engg rot fob. Rusnok rineya ragot oida, "Yesus koma bera Yohanes Pembaptis onnga efena ebah sons. Jeska Ofa efen owesa efek eteb fogora ontunggom mar onswos ofoukou fob."

¹⁵ Tina rusnok enjgineg ragot osok gij Yesus oida, "Ofa koma bera nabi Elia onnga emfena ebah sons fob." Noba rusnok egema tein ragot oida, "Ofa bera nabi enjgineg jeska nabi-nabi onnga ringker sis eteb fob onnga rifena ebah sons jeska ranggos fob."

¹⁶ Tina nou onnga raja Herodes engg rot mar onswos onnga Yesus otunggom fob, beda ofa agot oida, "Yesus koma bera Yohanes Pembaptis onnga didif dumbk rusnok sis fob jeskaseda riris efen ebirfaga. Noba ebeibeyaif bera ofa emfena ebah sons fob."

¹⁷ Raja Herodes agot mar erek koma jeska sis fob, gij mona onnga ofa eneg rot Yesus enesi, beda ofa ofra mokosa Filipus efen mohona onnga ofoka Herodias. Jefeda Yohanes Pembaptis oftutu rot ahais skoita raja Herodes oida, "Bua bumfra obkosa efen mohona jeska fob, tina ororu mifmin agama erebent bera koma erek mar onnga oska eteb!" Jefeda raja Herodes obk efen tentarer jeskaseda rikris Yohanes jah mod oskusk rot.

¹⁸ (6:17)

¹⁹ Yohanes anggot mar insa koma jefeda Herodias endemdem odou onnga ofogog rot ofa noba ofa odou os agob Yohanes rot ojgomu. Tina gij mona insa koma bera ofa enagob Yohanes enesi, jeska ofa efen mahina raja Herodes onoitij rot erek koma enesi.

²⁰ Jefeda raja Herodes obk efen rusnok jeskaseda riker joug Yohanes rot iskusk askesi ofa angh gij mod oskusk efesi ros. Ofa otunggom mar erek koma jeska ofa emeesa rot Yohanes. Ofa osujohu rot oida Yohanes bera erek osnok egens onnga eneita mar onnga oska guru, noba efen odou onnga ebsi

komowa ojgomu. Noba gij mona onggga Yohanes emfesij rot Allah oga gu ofa, beda ofa efen odou eineina gij rot, tina ofa odou os eg rot mar insa koma ojgomuja.

²¹ Tina gij mona onggga rusnok ruina maat keingg Herodes rot efen mona onggga mosu onjuj rot ofa, beda efen mohona Herodias osujohu gij odou efesi rot oida gij mona insa koma bera ofa ereni jeskaseda agob Yohanes ojgomu. Gij mona insa koma tein raja Herodes oroun ebirfager monuh Galilea jera efen ebirfager tentara jera rua onggga rufoka aksa eteb gij monuh insa koma jeskaseda rit maat morototuma jera ofa.

²² Askesi rua nomnaga rint maat morototuma ros, beda Herodias efen efesa ojaga ouka jah raja Herodes jera ebirfager insa koma nomnaga rudou. Ofa ouka erek onggkoska yahi jefeda raja Herodes jera ebirfager insa koma rudou eskeira eteb rot ofa. Beda raja Herodes agot gu ojaga egens insa koma oida, "Budou os meidu tein, beda bagot gu didif ojgomu fogora didif dimeita mar koma gu bua si."

²³ Beda raja Herodes agen rot gu ojaga egens insa koma oida, "Meidu onggga budou os nomnaga tein bera dimeita gu bua si. Erek dedin mareibra nomnaga jera mar nomnaga onggga dufoka ereij keingg bera dimeita oknama gu bua tein si!"

²⁴ Erek koma beda ojaga egens insa koma eja skoita efen mosu Herodias noba ejeka gu ofa oida, "Ameina, didif dijeka gu raja Herodes nou meidu onggga erek oufa etebo?" Beda Herodias oroun gu ofa oida, "Buis gu raja Herodes oida, 'Biris Yohanes ebirfaga jeska noba bita gu didif.' "

²⁵ Beda ofa oksons ebeirens skoita raja Herodes noba agot gu ofa oida, "Raja Herodes, bua biris Yohanes Pembaptis ebirfaga jeska noba baha esij bokor beda bita gu didif."

²⁶ Nou onnga raja Herodes engg mar erek koma fob, beda ofa odou okum eteb rot. Tina ofa onokoja rot mar onnga ojaga egens insa koma ois rot guru, jeska ofa anggen rot gu ofa fob. Noba ebirfager insa koma nomnaga rijginaga rot mar koma fob.

²⁷ Erek koma jefeda raja Herodes obk efen tentara egens ebeirens jah mod oskusk jeskaseda eris Yohanes ebirfaga noba orka ebirfaga koma skoita ofa. Jefeda tentara egens insa koma eja jah mod oskusk noba eris Yohanes ebirfaga.

²⁸ Beda ofa oksons noba eita Yohanes ebirfaga onnga ah esij bokor gu ojaga egens insa koma. Beda ojaga egens insa koma orka bokor rot Yohanes ebirfaga gu efen mosu Herodias.

²⁹ Nou onnga Yohanes efen ruforoker ringg oida rusnok ranggob ofa fob, beda rua rinjeita Yohanes efaga noba risah gij moksu.

³⁰ Yesus efen ruforoker rufok setka kungkob erfeka onnga Ofa ombk gij mona onnga sis fob bera ruksons noba rumohoturuma jera Ofa. Beda rua riflesij gu Ofa rot mar nomnaga onnga rua runtunggom noba rumftuftu gu rusnok fob.

³¹ Beda Yesus agot gu rua oida, "Mimif mija jah monuh egens onnga owowa jeskaseda miker keingg mufons ai juens fog." Yesus agot mar erek koma jeska gij mona insa koma bera rusnok rufoukou rin odudu deika skoita Ofa jera efen ruforoker ojgomuja onjoros erek rinet maat oskiyai tein jinaga guru.

³² Jefeda rua rifef meg egens noba rija jah monuh egens onggwa owowa.

³³ Tina rusnok rufoukou bera rik rua rinja jeska monuh insa koma. Noba rusnok rijjinaga rot oida Ofa bera Yesus jera efen ruforoker. Jefeda rusnok rufoukou rurogna jeska kota-kota onggwa angh gij monuh koma noba rua rija rukag rot Yesus jera efen ruforoker jah monuh onggwa Ofa enja gij.

³⁴ Nou onggwa Yesus jera efen ruforoker runsoka jeska meg jah mog, beda Ofa ek, tina rusnok rufoukou doska runowa jah suma fob. Beda Yesus ek erek koma, jefeda Ofa odou okora eteb rot rua, jeska rua erek domba-domba onggwa efen gembala egema onot joug rua guru. Jefeda Ofa oftufu mar ofoukou gu rua tein.

³⁵ Nou onggwa mowa enjesiri gij, beda Yesus efen ruforoker ragot gu Ofa oida, "Akeina, monjomjom fob, noba monuh kef ah yesmes jeska kota,

³⁶ jefeda onggwa oufa bera Akeina bubk rusnok kef jeskaseda rijengk maat nou risinsa gij kota-kota ofokai onggwa angh rejrej monuhif foga."

³⁷ Tina Yesus oroun gu rua oida, "Iwa ita maat egema gu rua ojgomu." Beda rua ragot gu Ofa oida, "Akeina, memef mejengk maat nou rusnok riskembemba doska kef erek teinefa! Jeska erek osnok egens efarur rot mesta cinja orfomu, tina efen ofons insa koma tein bera enadaij nou emengk maat nou rusnok rufoukou insa kef jinaga guru!"

³⁸ Jefeda Yesus ejeka gu rua oida, "Iwa isah maat erek egaho bera enah gij yeyin mesina? Iwa ijek yeyin mesina sismeni foga." Nou onggwa rua rik fob, beda rua ruksons noba ragot gu Ofa oida, "Roti ofog cinja jera mos orijka ojgomu bera enahif."

³⁹ Erek koma beda Yesus obk efen ruforoker jeskaseda ragot gu rusnok insa koma nomnaga oida riker erek ebic egens egens gu meskeingg efen jah suma.

⁴⁰ Jefeda rusnok insa koma riker gij ebic egens egens erek rufok wuntin egens, noba ebic egema erek rufok setka cinja.

⁴¹ Beda Yesus eita roti ofog cinja jera mos orijka insa koma noba Ofa eyajga jah mebaga. Beda Ofa ois oufamofa gu Allah rot fog. Beda Ofa etka roti insa koma dogdog, noba eita gu efen ruforoker jeskaseda rikeba gu rusnok rufoukou insa koma nomnaga. Noba Yesus eyah mos orijka insa koma tein dogdog gu ruforoker jeskaseda rikeba rot rusnok insa koma tein.

⁴² Rusnok nomnaga rint maat insa koma onjoros maat ereya rua nomnaga fob.

⁴³ Beda Yesus efen ruforoker ruhoturu maat ofod sons deika onnga ok morungga eteb setka kungkob erfeka.

⁴⁴ Runa onnga rint maat gij mona insa koma bera erek rufok ribu cinja.

⁴⁵ Nou onnga mar insa koma oisa fob, beda ainsa koma tein Yesus obk efen ruforoker jeskaseda rifef meg noba rija rukag rot Ofa jah kota Betania onnga angh jah meren enama. Beda Ofa obk rusnok rufoukou insa koma jeskaseda ruksons jah rerin monuh tein.

⁴⁶ Nou onnga Ofa ombk rusnok rufoukou insa koma jeska fob, beda Ofa eja jah memaga ofos egens jeskaseda om eiteij gu Allah jah suma.

⁴⁷ Nou onnga motu fob, beda Yesus efen ruforoker runjowa gu meren deismos fob. Tina Yesus eker gu mog ros.

⁴⁸ Beda Yesus ek, tina efen ruforoker ruku meg doska jeska mof en jeska meg osum noba ereteitei rot rua. Noba erek aras orgomu motu deis ros, beda Ofa oira esij mei odog beda ecira aki skoita rua. Nou onggga Ofa ensaga doida meg egens insa koma, beda Ofa erek erabj meg rot rua.

⁴⁹ Nou onggga ruforoker insa koma rik Ofa ecira aki esij mei odog erek koma, beda rua rusujohu rot oida koma bera meranghi mei.

⁵⁰ Jefeda rua nomnaga ragerir jeska erek rimeesa eteb. Tina Yesus ois gu rua oida, "Ei, iwa inemeesa noba inejekjeka idou efesi rot guru, jeska Didif bera Yesus!"

⁵¹ Beda Ofa eifef meg jera rua, noba ainsa koma tein mof onggga eteb insa koma aha toumou. Erek koma jefeda rudou ousaha eteb rot mar onggga rua rik insa koma fob.

⁵² Rua ringk mar onswos onggga Yesus ontunggom rot roti jera mos gij mona insa koma tein fob. Tina rudou enebriyi gij rot mar insa koma guru, jeska rudou osumsumu rot teinefa Yesus efen owesa efek.

⁵³ Yesus jera efen ruforoker rinsaga jah meren enama, beda meg eibibi rot rua jah kota Genesaret.

⁵⁴ Nou onggga rua runjuj jeska meg fob, beda rusnok jah suma rik rua noba rijginaga rot oida Ofa bera Yesus jera efen ruforoker.

⁵⁵ Jefeda rua rufof rejrej monuh insa koma jeskaseda rijagot gu rusnok enjgineg tein oida Yesus esinsa bera ensaga jah suma fob. Jefeda rusnok rufoukou rumorka rua onggga marenir esij mofka jah gu monuh onggga Yesus engker gij jeskaseda Ofa eita eskeira gu rua.

⁵⁶ Gij monuh era gij kota onnga Yesus omoira, beda rusnok rurka rua onnga marenir jeskaseda raha rua gu moroju esta onnga rusnok rumorodosuma gij. Beda rua onnga marenir ruis gu Yesus jeskaseda erek Ofa oitij rot, beda rua rahtec efen meisoufa tumu Ofa efaga ojgomu. Noba rua onnga rahtec efen meisoufa insa koma fob bera rita eskeira tein.

7¹ Gij mona egema deika beda ebirfager Yahudi onnga ebic Farisi jera Guru-Guru agama onnga rin jah kota Yerusalem rumohoturuma rejrej Yesus.

² Beda rua rik, tina Yesus efen ruforoker rutunggom mar rot ritma onnga rua insa koma rusujohu oida erek oska eteb. Koma bera, rua rik ruforoker rit maat, tina runot rerin ritma sismeni fog guru. Noba ororu agama Yahudi erebent bera rusnok rut ritma jeni erebent insa koma anggot rot sismeni fog fogora rimet maat ojgomu.

³ Jeska rua onnga Farisi jera rineya tein onnga ruroru agama Yahudi erebent rot ahais bera rut ritma jeni erebent egens insa koma onnga onjuj en jeska rerin rimowa, fogora rimet maat ojgomu.

⁴ Erek koma tein, gij mona onnga rua rijengk maat gu pasar noba ruksons jah rerin mod, beda rua rut maat insa koma jeni agama erebent anggot rot, fogora rit. Rua rerin agama erebent egema tein onnga rua rireni rot ahais jeskaseda ruroru jeni ojgomu. Koma erek, rua rut rerin mok osku ni, bokor efeyi ni, jera rerin meidibi ni tein jeni rerin agama erebent anggot rot jeskaseda mar koma onotunggom rua erek oska ahah Allah eiteij guru.

⁵ Jefeda rua onnga ebic Farisi jera Guru-Guru agama insa koma ragot gu Yesus oida, "Bebin ruforoker koma rikirsa rot erebent onnga onjuj en jeska mifmin

mimowa, jeska rua rit maat tina runot ritma jeni mifmin agama erebent anggot rot sismeni fog guri. Teinefa fogora Bua burons rua mar erek komo!"

⁶ Beda Yesus agot gu rua oida, "Mar onnga nabi Yesaya anggot rot sis fob osok gij iwa bera erek tenten. Jeska iwa bera onnga ineita mar onnga oufamofa jeni erek yanggot rot gu rusnok ejjinaga guru. Yesaya onngu mar onnga Allah anggot rot erek kef oida, 'Rusnok kef rusujohu rot oida rua rufra dufoka erek aksa oisouska mar onnga rua ranggot ojgomu. Tina gij rudou efesi bera runofra dufoka aksa erek oskiyai tein jinaga guru.

⁷ Rua rugif gu Didif erek rourou ojgomu. Jeska mar onnga en jeska risinsa rudou efesi bera rua ruftuftu gu rusnok rot oida mar koma bera en jeska Didif ojgomu, tina guru.' "

⁸ Beda Yesus agot deika oida, "Koma erek tenten, jeska iwa yukoja mar onnga Allah anggot rot noba iwa iroru erebent onnga rusnok ruftuftu rot ojgomu.

⁹ Iwa idou efesis rot jeskaseda inororu mar onnga Allah anggot rot guru. Tina iwa iroru mar onnga isinsa yeyin erebent rot ojgomu.

¹⁰ Mifmin mimowa Musa anggot rot oida, 'Yugif gu yeyin ika gonu yusu.' Ofa tein agot rot oida, 'Idu onnga agot mar ofogog skoita efen meka era mosu beda ofa emagos rot ojgomu.'

¹¹ Erek koma tina erek osnok egens agot gu efen meka jera mosu oida, 'Didif dunofij goga rot dedin mar egema tein guru, jeska didif danggen rot oida dimeita mar insa koma gu Allah erek mar onnga durougif gu Ofa rot ojgomu.' Beda iwa yuftuftu gu rusnok oida mar insa koma bera erek oufa ojgomu. Jefeda koma bera erek iwa yuitij rot jeskaseda rusnok

runofij rerin riker jera rusir jinaga guru. Koma bera erek oska, jeska koma orocunc rot oida iwa inororu hukum Musa insa koma rot tenten deika guru.

¹²(7:11)

¹³Jefeda oisouska yeyin erebent onnga onjuj jeska yeyin imowa insa koma bera iwa inororu mar onnga Allah anggot rot osok gij yeyin ika jera yusu guru. Noba iwa ita mar erek koma rot mar egema tein onnga ofoukou ojgomuja."

¹⁴Erek koma beda Yesus ois gu rusnok rufoukou jah suma jeskaseda rumohoturuma jera Ofa deika. Beda Ofa efesij rot mar insa koma gu rua deika sons oida, "Iwa nomnaga ig duga rot iskusk fog jeskaseda idou ebriyi gij rot tenten ojgomu.

¹⁵Mar meidu meidu onnga oira gij rusnok rutkonu bera onotunggom rerin rudou erek oska ahah Allah eiteij guru. Tina mar onnga orogna jeska rusnok rudou efesi ojgomu bera onnga orotunggom rudou erek oska ahah Allah eiteij fob.

¹⁶Ainsa kef bera yuj yusu nou mar onnga Didif danggot gu iwa rot iskusk ojgomu fog."

¹⁷Nou onnga Yesus eja jeska rusnok insa koma nomnaga noba ojoira gij mod egens fob, beda efen ruforoker rijeka gu Ofa osok gij mar onnga Ofa emfesij insa koma rot efen ofou.

¹⁸Beda Ofa oroun gu rua oida, "Dudou ai erek okum rot iwa jeska idou enebriyi gij rot mar onnga Didif dimfesij insa koma efen ofou enesi. Mar meidu meidu onnga rusnok rint bera oira gij rutkonu ojgomu. Noba mar insa koma bera onotunggom rerin rudou efesi erek oska ahah Allah eiteij jinaga guru.

¹⁹Jeska mar insa koma onaira gij rudou efesi guru, tina mar koma bera oira gij rutkonu ojgomu. Noba gij

mona ongga rua rij ebeyi rot, beda mar insa koma tein orogna ojgomu." (Mar ongga Yesus anggot insa koma bera orocunc rot oida maat nomnaga bera erek oufamofa nou rusnok ojgomu noba onotunggom rusnok rudou efesi erek oska tein guru).

²⁰ Beda Yesus agot gu rua deika oida, "Mar ongga oska ongga orogna jeska rusnok rudou efesi bera ongga orotunggom rudou efesi erek oska ahah Allah eiteij.

²¹ Jeska mar ongga angh gij rusnok rudou efesi bera ongga oroku rudou efesi jeskaseda rusujohu rot mar ongga ofogog ni, risiri morototuma ni, rukoreka mar ni, ragob rusnok enjgineg ni, risiri jera egema efen mohona ni,

²² rudou ot rot mareibra ofoukou ojgomu ni, rita mar ofogog ojgomuja ni, ruokrusa rusnok enjgineg ni, rusoka ebeirens gij mar meidu meidu ongga oska ni, rudou ejisei rot rusnok enjgineg ni, ruga oruh rusnok enjgineg ni, rufra risinsa rufoka erek eteb ni, ruhurmei mar rot meidu meidu ojgomuja ni.

²³ Mar insa koma nomnaga ongga en jeska rusnok rudou efesi bera ongga orotunggom rudou efesi erek oska ahah Allah eiteij ojgomu."

²⁴ Nou ongga Yesus enja jeska monuh Galilea beda Ofa eja jah monuh egens ongga angh rejrej kota Tirus. Ofa oira gij mod egens jah suma jeskasada eker gu esinsa. Jefeda Ofa enagot gu rusnok enjgineg rot guru. Tina dektek guru, beda rusnok jah suma rijginaga rot oida Ofa en fob noba engker gij mod egens insa koma.

²⁵ Beda ojaga egens ongga eker jah suma efen oforokai ojaga egens ongga efena ofogog engker gij odou efesi. Ojaga egens insa koma bera jeska

rua onnga Yahudi guru. Ofa bera rua onnga Yunani onnga ojga jeska kota Fenisia gij monuh Siria. Nou onnga ojaga egens insa koma engg rot oida Yesus bera en fob, beda ofa eja ebeirens skoita Ofa. Beda ofa es okeibi gu mebi noba ougif gu Ofa. Ofa erejgei Yesus jeskaseda Ofa ekemeji efena ofogog jeska efena efesa egens insa koma odou efesi ojgomu.

²⁶ (7:25)

²⁷ Tina Yesus agot rot mar onnga orocunc egens gu ofa oida, "Ruforoker rint maat onjoros maat insa koma ereya rua sismeni fog. Jeska enadaj nou rusnok rita maat insa koma jeska rua fogora rij gu mes guru."

²⁸ Tina ojaga egens koma odou ebriyi gij mar onnga orocunc insa koma, jefeda ofa agot sons gu Yesus oida, "Mes onnga engker jah meja owohoh onnga ruforoker rint maat esij bera et maat oskiyai tein onnga ensiri jeska meja insa koma."

²⁹ Beda Yesus agot gu ofa oida, "Mar onnga bua banggot insa koma bera orocunc rot oida budou ororu Didif rot tenten fob. Jefeda binerejgei Didif deika guru, tina buksons jah bebin mod ojgomu. Jeska mar onnga bua budou os rot bera ah gij efera fob. Koma bera, efena ofogog onnga engker gij bebin ebese odou efesi insa koma bera orogna jeska fob."

³⁰ Jefeda ojaga egens insa koma oksions jah efena mod. Nou onnga ofa ensaga jah suma fob beda ofa ek, tina efena efesa ojaga egens insa koma onnga ah gu meidibi bera eskeira sons fob. Jeska efena ofogog insa koma orogna jeska odou efesi fob.

³¹ Gij mona egema deika beda Yesus eja jeska monuh insa koma onnga angh rejrej kota Tirus. Beda

Ofa eris kota Sidon deis jera monuh onggga ofoka kota Setka onjoros Ofa ensaga gu meren Galilea.

³² Jah suma bera rusnok ruroun osnok egens onggga osu otuw noba enagot mar tein guru skoita Ofa. Beda rua rirejgejgei Yesus jeskaseda Ofa aha etma esij osnok egens koma fogora eita eskeira gu ofa.

³³ Nou onggga Yesus oroun osnok egens koma ai yes jeska rusnok rufoukou insa koma, beda Ofa ahtec osnok egens insa koma efen osu. Beda Ofa oskurfi gij etma fogora oroduis osnok egens insa koma arni ofou tein.

³⁴ Beda Ofa eyajga jah mebaga noba agot rot odou onggga okora oida, "Efata!" Koma efen ofou oida, "Big mar!"

³⁵ Beda ainsa koma tein osnok egens insa koma eg mar koisoisa, noba mar onggga otunggom ofa fogora enagot mar guru bera eseiseifa jeska ofa ojgomu. Jefeda ofa agot mar erek giskini ojgomu.

³⁶ Beda Yesus eyahehir joug rusnok nomnaga jah suma jeskaseda rinagot rot mar onggga Ofa ontunggom nou osnok egens insa koma guru. Ofa eyahehir joug rua erek koma ojgomu, tina rua rijefesij rot mar insa koma gu rusnok enjgineg ojgomuja.

³⁷ Rusnok onggga ringg rot mar insa koma rudou ousaha eteb rot. Noba rua ragot rot rudou onggga efaga ouka eteb oida, "Mar nomnaga onggga Ofa ontunggom bera erek oufamofa eteb! Ofa tein eita eskeira gu rusnok onggga rusuw otu fogora rua rig mar. Noba Ofa eita eskeira gu rusnok onggga rinagot mar jinaga guru fogora rua ragot mar tein!"

8¹ Gij mona insa koma bera rusnok riskemba rumohoturuma rejrej Yesus deika. Beda rusnok

koma rerin maat nomnaga oisa jeska rua fob. Jefeda Ofa ois gu efen ruforoker noba agot gu rua oida,

²"Dudou okora rot rusnok kef, jeska rua ringker jera Didif jah sif gij mona orgomu fob, noba rerin maat tein nomnaga oisa jeska rua fob.

³Noba erek Didif dubk rua sons gu rerin monuh, beda rineya rujosra rot mosona gu moroju osubu deis, jeska rerin maat egema nou rua guru. Noba rua rin jeska rerin monuh onnga ah yes."

⁴Beda Yesus efen oforoka egens agot oida, "Monuh onnga mineker gij kef bera owowa. Erek mimif muhca nou maat beda enadaij nou rusnok riskemba kef tein jinaga guru."

⁵Beda Yesus ejeka gu efen ruforoker oida, "Yeyin roti ofog egaho?" Beda rua ragot oida, "Mefmen roti ofog cinja erfeka."

⁶Beda Yesus ois gu rusnok riskemba insa koma oida, "Iwa nomnaga iker jah." Nou onnga rua ringker gu mebi fob, beda Ofa eita roti ofog cinja erfeka insa koma noba ois oufamofa gu Allah rot roti koma. Beda Ofa ekeba roti koma noba eita gu efen ruforoker jeskaseda rikeba dogdog gu rusnok jah suma. Beda efen ruforoker rikeba roti koma nomnaga gu rusnok riskemba insa koma.

⁷Yesus efen ruforoker rerin mos oskiyai tein. Jefeda nou onnga Yesus ois oufamofa gu Allah rot mos koma fob, beda Ofa agot gu efen ruforoker jeskaseda rikeba mos oskiyai insa koma tein gu rusnok jah suma. Jefeda rua rikeba mos oskiyai koma gu rusnok insa koma.

⁸Beda rusnok riskemba koma rint maat insa koma onjoros ereya rua fob. Beda Yesus efen ruforoker ruhoturu maat ofod onnga ok morungga eteb erek

cinja erfeka. Gij mona insa koma bera rusnok rufok ribu tohkuru rint maat jah suma.

⁹ Nou onnga koma oisa fob, beda Yesus obk rusnok riskemba insa koma jeskaseda ruksons jah rerin monuh.

¹⁰ Ainsa koma tein, Yesus jera efen ruforoker rifef meg beda rija jah monuh Dalmanuta onnga angh gu meren Galilea enama.

¹¹ Jah suma bera rusnok Yahudi onnga ebic Farisi rineya rin skoita Yesus beda ruga omosokuma jera Ofa. Rua riradgodu Ofa jeskaseda Ofa otunggom mar onswos egens deika onnga orocunc rot oida Ofa efen owesa efek onnga en jeska Allah. Tina gij rudou efesi bera rua rusujohu rot oida erek Ofa otunggom mar onnga ekirsa rot Hukum Musa, beda rua rumocunc Ofa erek oska rot.

¹² Tina Yesus odou okum rot mar onnga rua rinjeka gu Ofa rot, jefeda Ofa agot oida, "Iwa onnga ebic Farisi bera ingk mar ofoukou onnga Didif duntunggom nou rusnok fob. Jefeda teinefa fogora iwa ineradgodu Didif jeskaseda dutunggom mar onswos deika erek komo. Onnga tenten bera, Didif dunotunggom mar onnga onswos egema tein nou iwa deika guru."

¹³ Beda Yesus eja jeska Farisi insa koma, noba Ofa jera efen ruforoker rifef meg. Beda rua ruksons jah meren Galilea enama deika.

¹⁴ Yesus jera efen ruforoker rifef meg insa koma tina ruforoker rudou ofoj joug nou rumorka maat egema deika. Rerin roti ofog egens ojgomu ah gij meg efesi insa koma.

¹⁵ Jefeda Yesus agot rot mar onnga orocunc gu efen ruforoker erek kef oida, "Iwa yut joug idou rot efesi ahais ojgomu jeska rua onnga Farisi jera raja

Herodes rerin roti efed onggga orok mokcin roti ofog nomnaga."

¹⁶ Tina rudou eineina gij rot mar onggga Ofa anggot insa koma ros, jefeda rua ragot moguma oida, "Ofa agot erek koma jeska mifmin roti enadaij guru ei?"

¹⁷ Yesus ejginaga rot mar onggga rua rimfesij moguma rot, jefeda Ofa agot gu rua oida, "Dudou okum rot iwa jeska iwa isujohu rot oida mar onggga Didif danggot insa koma bera osok gij roti ojgomu. Iwa ingk mar onswos onggga Didif duntunggom sis fob, noba erek iwa inosujohu rot osok gij mar koma deika gurei. Jeska iwa inosujohu rot oida dedin owesa efek onggga adaij jeskaseda dita maat egema gu iwa tein gurei.

¹⁸ Didif dudou okum rot iwa jeska iwa ik mar onggga Didif duntunggom sis fob, tina idou enebriyi gij mar insa koma rot koisoisa enesei. Noba iwa ingg mar onggga Didif dumftuftu fob tina idou enebriyi gij mar onggga Didif danggot rot koisoisa tein enesei.

¹⁹ Noba idou ofoj joug rot roti ofog cinja onggga dikeba gu rusnok rufok ribu cinja sis fob tein ei? Nou onggga rusnok insa koma rint maat ereyer fob, beda iwa ihoturu maat ofod egaho?" Beda rua ragot oida, "Maat ofod insa koma onggga Memef mohoturu bera ok morungga eteb setka kungkob erfeka."

²⁰ Beda Yesus agot oida, "Noba teinefa rot roti ofog cinja erfeka onggga iwa ikeba gu rusnok rufok ribu tohkuru neeka. Nou onggga rusnok insa koma rint maat ereyer fob, beda iwa ihoturu roti ofod egaho?" Beda rua ragot oida, "Maat ofod insa koma onggga memef mohoturu bera ok morungga eteb cinja erfeka."

²¹ Beda Yesus agot oida, "Dudou okum rot iwa jeska idou enebriyi gij rot mar onnga Didif duntunggom insa koma rot koisoisa enesi."

²² Yesus jera efen ruforoker rifef meg egens insa koma onjoros rinsaga gu kota Betsaida. Jah suma bera rusnok ruroun osnok egens onnga efen eiteij ofou skoita Yesus. Beda rua ruis gu Yesus jeskaseda Ofa aha etma esij osnok egens insa koma fogora eita eskeira gu ofa.

²³ Jefeda Yesus agei osnok egens insa koma etma beda oroun ofa jeska kota koma. Beda Ofa oskurfi gij etma noba aha mar koma gij osnok egens insa koma efen eiteij. Beda Ofa aha efen etma esij osnok egens koma. Beda Yesus ejeka gu ofa oida, "Bua bik mar fob ei".

²⁴ Beda osnok egens insa koma oroun oida, "Didif dik rusnok ricira, tina rot koisoisa enesi. Rerin rifaga erek mega ofoj ojgomu ros."

²⁵ Beda Yesus ahtec osnok egens insa koma efen eiteij juens deika. Beda osnok egens insa koma ek juens deika, tina efen eiteij bera eskeira ojgomu fob. Noba ebeibeyaif ofa ek mar deika rot koisoisa fob.

²⁶ Nou onnga Yesus obk osnok egens insa koma gu efen mod beda Ofa agot oida, "Bua binagot gu rusnok gij kota rot mar onnga Didif duntunggom nou bua fob kef guru."

²⁷ Erek koma beda Yesus jera efen ruforoker rija jeska kota Betsaida. Beda rua rija monuh egens onnga angh doida kota Kaisarea Filipi. Askesi rua ricira raki jah monuh egens koma ros, beda Yesus ejeka gu efen ruforoker oida, "Rusnok rimfesij moguma rot oida Didif bera idu?"

²⁸ Rua ruroun oida, "Rineya ragot oida Bua bera Yohanes Pembaptis onnga emfena ebah sons. Noba rineya ragot oida Bua bera nabi Elia jeska sis eteb fob onnga Allah anggen oida omobk sons skoita rusnok."

²⁹ Beda Ofa ejeka gu rua oida, "Tina iwa isujohu rot oida Didif bera idu?" Beda Petrus oroun oida, "Bua bera Kristus onnga Allah omobk jeskaseda osuwa rusnok jeska rerin mar okum."

³⁰ Beda Yesus eyahehir joug efen ruforoker insa koma jeskaseda rinefesij rot mar onnga Petrus anggot insa koma gu rusnok enjgineg guru.

³¹ Beda Yesus oftufu mar gu efen ruforoker deika. Ofa agot oida, "Didif, Rusnok Efesa, bera dimeita difera okora eteb. Beda ebirfager Yahudi, jera ebirfager imam-imam jera ebirfager Guru-Guru agama rumokoja Didif tein. Beda rusnok rimagob Didif. Noba gij mona orgomu deika, beda Didif dimedebecki jeska danggos sons."

³² Yesus anggot mar insa koma gu rua, beda Petrus oroun Yesus gu gesinsa noba ofa etaha joug Yesus rot mar onnga Ofa anggot insa koma.

³³ Tina Yesus ekikif noba eyajga efen ruforoker, beda Ofa agot rot ahais gu Petrus oida, "Petrus, bua bija jeska Didif ojgomu! Jeska mar onnga bua busujohu rot insa koma bera erek Bilis ondou os rot tein. Mar onnga bua busujohu rot koma bera onnga rusnok rudou os rot tein, tina koma bera enerek mar onnga Allah odou os rot guru."

³⁴ Beda Yesus ohoturu rusnok rufoukou jera efen ruforoker noba agot gu rua oida, "Erek osnok egens odou os ororu Didif erek dedin oforoka egens, beda ofa onosujohu rot mar onnga ofa esinsa ondou os rot ojgomu guru. Tina ofa esejah odou efesi rot mar

ongga emeita efera okora gu ofa erek osnok egens onggga ok mega salib fogora eita efera okora noba anggos tumu tein. Ofa eita mar erek koma beda ororu Didif.

³⁵ Jeska osnok egens onggga osujohu rot ofa esinsa efen eiteij ah ojgomu noba onororu Didif rot tenten guru, beda ofa efen eiteij ah koma emeseiseifa si. Tina erek osnok egens efen eiteij ah bera eseiseifa jeska ofa ororu Didif noba ejagot rot Allah oga onggga oufamofa tein, beda ofa koma emesma eiteij ah onggga ah aibin si.

³⁶ Noba erek osnok egens ohoturu mar ofoukou nou esinsa efen eiteij ah kef, tina eiteij ah kef bera eseiseifa ojgomu jeska ofa onororu Didif guru, beda mar onggga ofa onghoturu insa koma onofij ofa tein jinaga guru.

³⁷ Jeska erek efen eiteij ah insa koma eseiseifa fob, beda enadaj nou ofa otunggom mar egema tein jeskaseda eita eiteij ah insa koma sons deika jinaga guru.

³⁸ Gij mona insa kef bera rusnok rufoukou rineita mar onggga oska noba runororu Didif guru. Jefeda erek mojen rua rot Didif jera mar onggga Didif dimfesij tein, beda mojen Didif, Rusnok Efesi, tein rot rua fogora dumokoja rua jeska Didif ojgomuja. Didif dumotunggom mar erek koma gij mona onggga Didif dungksions rot dufoka onggga aksa eteb erek dedin Akeina efen ofoka onggga aksa eteb tein jera malaikat-malaikat onggga ebsi komowa tein."

9¹ Beda Yesus agot gu rua oida, "Gij mona kahma, beda rineya jeska iwa onggga rinagos enesi bera rimek Allah ofoka ereij keingg efen rusnok rot owesa efek eteb si."

² Gij mona egema deika, beda Yesus oroun Petrus jera Yakobus jera Yohanes jah memaga ofos. Noba rua riker morototuma gu risinsa jah suma. Askesi Yesus eker jah suma, beda efen ruforoker rik, tina efen efaga eja erek toga.

³ Ofa efen meisoufa eja erek efesa eisa eteb doska. Mar egema tein onnga angh gu mebif bera onotunggom rusnok rerin meisoufa efesa eisa eteb erek Yesus efen gij mona insa koma guru.

⁴ Beda nabi Musa jera nabi Elia gorogna keingg rua jah suma. Beda goga gefesij mar jera Yesus.

⁵ Askesi rua rimfesij mar ros, beda Petrus ois gu Yesus oida, "Akeina Guru, ongnoska eteb nou mimif miker jah sif. Jefeda memef mei modwok orgomu jah sif tein. Egens nou Bua, egens nou Musa noba egens nou Elia."

⁶ (Petrus enejginaga rot mar onnga ofa enagot gu rua insa koma guru, jeska ofa, Yakobus jera Yohanes rimeesa eteb. Jefeda ofa agot mar insa koma ojgomu.)

⁷ Beda mocgoj ofog eteb orogna keingg rua jah suma noba ocohun rua. Beda Allah agot jeska mocgoj ofog insa koma oida, "Ofa kef bera dedin edesa onnga dudou okora rot. Jefeda iwa ig mar nomnaga onnga Ofa agot ojgomu."

⁸ Beda ainsa koma tein Yesus efen ruforoker rik, tina Yesus esinsiyai bera onot jah suma jera rua ojgomu.

⁹ Nou onnga rua runjuj jeska memaga ofos insa koma, beda Yesus eyahehir joug rua jeskaseda rinefesij rot mar onnga rua rik insa koma gu rusnok enjgineg tein guru onjoros mona onnga Ofa, Rusnok Efesa, agos noba edebecki sons fob.

¹⁰ Jefeda rua ruroru jeni mar onnga Yesus anggot insa koma ojgomu. Tina rua rimfesij moguma rot mar onnga Ofa anggot osok gij edebecki jeska agos, jeska rudou enebriyi gij rot mar koma enesi.

¹¹ Beda rua rijeka gu Ofa oida, "Akeina, Guru-Guru agama ragot oida nabi Elia jeska mona onnga ensis bera omoksans sismeni fog fogora Kristus onnga Allah omobk bera emen. Rua ruftuftu mar erek koma rot meidu?"

¹² Beda Yesus agot oida, "Koma tenten. Nabi Elia emen rot sismeni jeskaseda esejah rusnok rudou efesi nou mona onnga Kristus emen tein. Noba iwa isujohu rot mar onnga nabi-nabi runggu osok gij Kristus onnga emen. Jeska rua runggu rot oida, Ofa onnga Rusnok Efesa, bera emeita efera okora eteb, beda rusnok rumokoja Ofa tein.

¹³ Tina Yohanes, onnga erek Elia bera en fob. Noba rusnok rita mar onnga oska skoita ofa jeni erek rudou os rot ojgomu. Noba koma tein ororu jeni mar onnga nabi-nabi runggu rot Yohanes sis eteb fob."

¹⁴ Nou onnga Yesus oksans jera efen ruforoker rugomu insa koma, beda rua rik rusnok rufoukou rut rejrej Yesus efen ruforoker enjineg. Noba ainsa koma tein rineya onnga Guru-Guru agama ruga omosokuma jera ruforoker insa koma.

¹⁵ Nou onnga rusnok rufoukou koma rik Yesus, beda rua rufof skoita Ofa rot rudou onnga eskeira eteb noba ruisu Ofa.

¹⁶ Beda Yesus ejeka gu efen ruforoker jah suma oida, "Iwa jera Guru-Guru kef bera yuga omosokuma osok gij mar meidu?"

¹⁷ Beda osnok egens onnga onot gu rusnok rufoukou insa koma rifelesa oroun oida, "Akeina Guru, didid

duroun dedin edesa orna egens jeskaseda Bua bita eskeira gu ofa. Jeska efena ofogog engker gij odou efesi, jefeda dedin edesa enagot mar deika guru.

¹⁸ Noba gij mona onnga efena ofogog insa koma agob ofa, beda ofa eij esinsa gu mebi, beda awesi efeireira, noba ofon emeskema ahais ojgomu, beda efen efaga oskukwok tein. Tina jeska Bua bineker jah sif enesi, jefeda didif direjgei bebin ruforoker jeskaseda rua rikemeji efena ofogog insa koma jeska edesa kef efen odou efesi. Beda rua rireni, tina guri. Efena ofogog koma eneker gij efen odou efesi ojgomu ros."

¹⁹ Beda Yesus agot gu efen ruforoker rot odou okumkum oida, "Iwa ingk Didif duntunggom mar ofoukou nou rusnok fob, tina idou onororu Didif rot tenten enesei. Didif dui keingg dudou efesi rot iwa onjoros mona egaho fogora idou ebriyi gij mar onnga Didif dutunggom! Iwa iroun osnok egens koma efen efesa skoita Didif."

²⁰ Jefeda rua ruroun efesa orna egens insa koma skoita Yesus. Nou onnga efena ofogog insa koma ek Yesus, beda ofa obu oforoka efes egens koma. Beda oforoka efes koma esma noba eredma gu mebi. Beda ofa eskiskiski noba awesi efeireira.

²¹ Erek koma beda Yesus ejeka gu efen meka oida, "Mar kef bera encirej ofa gij mona egaho fob?" Beda efen meka oroun gu Yesus oida, "Mar insa koma encirej Ofa sis mona onnga ofa erek oforokai onjoros mona deisef tein.

²² Noba efena ofogog koma okoja ofa gij mah era mei tein jeskaseda ofa agos ojgomu. Tina erek Bua bebin owesa efek onnga adaij nou, beda bucunc

budou onggga okora rot magef fogora bufij ofa ojjgomu."

²³ Beda Yesus agot oida, "Bua binagot oida, 'Erek Bua bebin owesa efek onggga adaij nou,' erek koma guru. Jeska rusnok onggga rudou ororu Allah rot tenten bera rimesma mar onggga rua rirejgei Ofa rot si."

²⁴ Beda meka egens koma ois gu Ofa oida, "Didif dudou ororu Allah rot tenten fob. Erek koma tina bufij didif jeskaseda dudou ororu Ofa rot ahais ekirsa ojjgomu!"

²⁵ Beda Yesus ek oida rusnok rufoukou deika rufof skoita rua jah suma, jefeda Ofa etaha joug efena ofogog egens insa koma erek kef oida, "Bua onggga butunggom rusnok fogora rusu otuw jera rinagot mar tein guru, bua burogna jeska oforoka efes egens kef odou efesi ojjgomu noba bunoirra deika guru!"

²⁶ Ainsa koma tein efena ofogog koma ois mar rot oga eteb noba eredma, beda orogna jeska oforoka efes insa koma odou efesi. Beda oforoka efes egens koma ahca gu mebi erek anggos. Jefeda rusnok rineya rusujohu rot oida ofa agos fob.

²⁷ Tina Yesus agei efen etma noba ofra ofa jeskaseda ot. Jefeda ofa edebecki noba eskeira fob.

²⁸ Erek koma beda nou onggga Yesus jera efen ruforoker ruirra gij mod egens, beda rua rijeka gu Ofa oida, "Akeina, memef mereni tina menekemeji efena ofogog insa koma guru. Koma rot meidu?"

²⁹ Beda Yesus oroun gu rua oida, "Rot efena ofogog onggga erek egens insa koma bera iwa yum iteij sismeni fog, fogora ikemeji efena ofogog insa koma ojjgomu. Jeska mar egema tein onggga iwa itunggom bera onofij iwa rot jinaga guru."

³⁰ Ere koma, beda Yesus jera efen ruforoker rija jeska monuh koma noba riris monuh Galilea deis. Beda Ofa enagot gu rusnok enjgineg oida rua rimeja jah suma guru. Jeska Ofa odou os eker gu esinsa jera efen ruforoker ojgomu jeskaseda oftufu mar gu rua. Ere koma, beda Ofa agot gu rua oida, "Gij mona kahma, beda osnok egens bera emekikif jeska Didif, Rusnok Efesa, fogora emaha Didif gu rusnok enjgineg onnga rufogog. Beda rua rimagob Didif. Tina kij mona orgomu deika, beda Didif dimedebecki jeska danggos si."

³¹ (9:30)

³² Tina Yesus efen ruforoker rudou enebriyi kij mar onnga Ofa anggot insa koma efen ofou guru. Noba rua tein rimeesa rot jefeda rinejeka gu Ofa osok kij mar insa koma guru.

³³ Ere koma beda Yesus jera efen ruforoker ruksons jah kota Kapernaum. Nou onnga rua rumuira kij mod egens, beda Yesus ejeka gu rua rot mar onnga rua rimfesij moguma gu moroju deis insa koma.

³⁴ Tina rua runoroun mar gu Ofa guru, jeska rua ruga omosokuma rot oida idu jeska rua bera emesma ofoka onnga aksa ekirsa jeska rineya. Noba mojen rua rot mar insa koma.

³⁵ Jefeda Yesus eker jah suma beda ohoturu efen ruforoker setka kungkob erfeka insa koma noba agot gu rua oida, "Ere osnok egens odou os jeskaseda Allah ofra efen ofoka onnga ere aksa, beda ofa oin keingg esinsa ofoka ere osnok egens onnga onok ofoka guru, fogora ofij rusnok nomnaga ojgomu."

³⁶ Beda Yesus oroun oforokai egens skoita Ofa noba agei ofa jera odou. Beda Ofa agot gu efen ruforoker

oida, "Erek osnok egens oroun oforokai erek kef oisouska Didif dufoka, beda koma erek ofa oroun Didif disinsa tein fob. Noba erek ofa oroun Didif disinsa fob, beda koma erek ofa oroun Allah esinsa onnga ombk Didif tein."

³⁷ (9:36)

³⁸ Yohanes agot gu Yesus oida, "Akeina Guru, memef mek osnok egens ekemeji efena ofogog jeska rusnok rudou efesi oisouska Bua bebin bufoka. Tina memef magot joug ofa jeska ofa bera onoira erek egens jera mimif enesi."

³⁹ Tina Yesus oroun oida, "Iwa inagot joug ofa erek koma guru. Jeska erek osnok egens ontunggom mar onswos oisouska dedin dufoka, beda koma erek ofa ororu Didif rot tenten fob. Noba ofa enekikif jeska Didif fogora oga oruh Didif tein jinaga guru. Jeska ofa era dedin owesa efek fogora orotunggom mar onnga onswos erek koma.

⁴⁰ Jeska erek osnok egens onok eretei rot mimif guru, beda ofa erek egens jera mimif.

⁴¹ Noba onnga tenten bera, erek osnok egens ofij iwa erek eita mei jeskaseda iwa ij, jeska iwa iroru Didif onnga Kristus, beda Allah emeita ofons onnga ongnoska eteb gu ofa rot si."

⁴² Erek koma beda Yesus agot deika oida, "Erek osnok egens ocunc mar onnga oska gu rusnok enjineg onnga ruroru Didif rot rudou onnga erek oforokai insa koma efen odou, fogora rua risiri gij mar onnga oska tein, beda Allah omofra mar okum eteb doska keingg rusnok onnga runcunc mar onnga oska insa koma rot si.

⁴³ Erek osnok egens odou eftirir keingg mar onnga oska fogora ofa odou os era efen etma ereita mar

ongga oska koma, beda ofa osuna rot mar insa koma jeska odou efesi sismeni fog. Koma bera erek osnok egens onggga eris etma insa koma jeska jeskaseda ofa enera efen etma koma rot mar onggga oska insa koma guru. Ofa osuna rot mar insa koma jeskaseda esma eiteij ah onggga ah aibin ojgomuja. Beda Allah tein eneij ofa gu mahmei meren guru.

⁴⁴((Jeska mah koma bera et rusnok rot ah aibin ojgomuja.))

⁴⁵Noba, erek osnok egens odou eftirir keingg mar onggga oska fogora odou os ecira aki rot skoita mar insa koma, beda ofa osuna mar insa koma jeska odou efesi sismeni fog. Koma bera erek osnok egens onggga eris aki insa koma jeskaseda ofa enecira aki skoita mar onggga oska insa koma guru. Ofa osuna rot mar insa koma jeska jeskaseda esma eiteij ah onggga ah aibin. Beda Allah tein eneij ofa gij mahmei meren guru.

⁴⁶((Jeska mah koma bera et rusnok rot ah aibin ojgomuja.))

⁴⁷Noba erek osnok egens odou eftirir keingg mar onggga oska onggga ofa ek gu eiteij, beda ofa osuna rot mar insa koma jeska odou efesi sismeni fog. Jeska koma bera erek osnok egens onggga oku efen eiteij jeska jeskaseda ereita mar koma onggga ofa ek gu eiteij guru. Ofa osuna rot mar onggga oska insa koma jeska odou efesi jeskaseda oira jera rusnok onggga Allah ofoka ereij keingg erek efen rusnok. Beda Allah eneij ofa gij mahmei meren guru.

⁴⁸Jeska mah koma bera et rusnok rot ah aibin ojgomuja.

⁴⁹Erek koma beda iwa isujohu rot maroforu mos. Jeska maroforu mos bera ofij maat jeskaseda ah

dektek ojgomuja. Koma morototuma erek mahmei meren onnga Allah ej rusnok gij. Jeska mah koma emet rusnok jah suma rot mona onnga ah aibin ojgomuja.

⁵⁰ Maroforu mos bera oufamofa nou mar ofoukou onnga mimif mireska gij. Tina erek maroforu mos insa koma onotka deika guru, beda mimif maha mar koma jah ojgomu noba minereska mar deika guru. Iwa tein bera irek maroforu mos onnga otka ros fogora isejah idou efesi jeskaseda yufij Allah rot mar ofoukou ojgomuja. Noba iwa ita idou onnga eskeiramera moguma tein ojgomu."

10 ¹ Erek koma beda Yesus jera efen ruforoker rija jeska kota Kapernaum noba ricira jah monuh Yudea. Beda rua ricira jah mei Yordan enama. Jah suma tein bera rusnok rufoukou rin skoita Ofa, jefeda Ofa oftufu mar gu rua erek giskini ojgomu.

² Askesi Yesus oftufu mar ros, beda rusnok Yahudi rineya jeska ebic Farisi rin skoita Ofa. Beda rua rijeka gu Ofa oida, "Akeina, ororu mifmin hukum Yahudi bera runer rukoja rerin ruhoner erek risinsa rudou os ei era gurei?" Rua rijeka mar koma erek reirei ojgomu jeskaseda erek Yesus agot oida, "Iwa itunggom erek koma ojgomu," era Ofa agot oida, "Enadaij rot guru," beda rua rucunc Ofa erek oska rot ojgomu.

³ Tina Yesus ejeka gu rua oida, "Sis fob, Musa agot mar meidu gu yeyin imower osok gij mar insa koma?"

⁴ Beda rua ragot oida, "Hukum Musa bera agot rot oida, 'Erek orna egens odou os okoja efen mohona, beda ofa ogu surat onnga agot rot mar erek koma fogora eita gu efen mohona, beda obk ofa jeska efen mod ojgomu.' "

⁵ Beda Yesus agot oida, "Ongga tenten bera, Musa oitij rot mar insa koma gij efen hukum jeska iwa idou ombrera ojgomu noba inororu mar onggga ofa anggot rot egema tein sis fob guru. Jeska mar onggga ofa ongggu rot sismeni bera erek kef oida: 'Gij mona onggga Allah ontunggom rusnok, beda ofa ontunggom orna jera ojaga jeskaseda gegeka tein geja gerak egens.'

⁶ (10:5)

⁷ Erek koma jefeda gij mona onggga orna egens oskotu efen mohona fob, beda ofa eja jeska efen meka gonu mosu noba ejeker erek egens jera efen mohona.

⁸ Noba sis fob bera gegang godou erek egeka, tina ebeibeyaif gegang godou bera enjerek egens ojgomuja.

⁹ Jefeda orna egens onokoja efen mohona insa koma guru, jeska Allah bera onggga oroun goga mejerema erek egens."

¹⁰ Nou onggga Yesus jera efen ruforoker rungksong jah mod fob, beda rua rijeka gu Ofa rot mar onggga Ofa omftuftu gu rusnok ebic Farisi insa koma efen ofou.

¹¹ Beda Ofa agot gu rua oida, "Erek orna egens okoja efen mohona, noba ofa ojskotu mohona onggga efeinah, beda koma erek ofa jera efen mohona onggga efeinah insa koma gesiri morototuma ojgomu fob.

¹² Erek koma tein, erek ojaga egens enja jeska efen mahina noba ahi igers mahina onggga efeinah deika, beda koma erek ofa jera efen mahina onggga efeinah insa koma tein gesiri morototuma ojgomu fob."

¹³ Gij mona egema deika beda rusnok rouroun ruforokai skoita Yesus jeskasada Ofa aha efen etma esij rua fogora eita oufamofa gu rua. Tina Yesus efen ruforoker ritaha joug rusnok insa koma rot.

¹⁴ Nou onnga Yesus engk rua rita mar erek koma, beda Ofa odou okum rot efen ruforoker insa koma. Jefeda Ofa agot gu rua oida, "Iwa ineragou joug ruforokroka erek koma guru, tina yuitij rot oida rua rin skoita Didif ojgomu. Jeska rusnok onnga rita rudou efesi onnga erek ruforokroka kef rerin rudou efesi bera rumoira jera rusnok onnga Allah ofoka ereij keingg si.

¹⁵ Noba, Didif dagot rot tenten oida, erek osnok egens onororu Allah, onnga ofoka ereij keingg rusnok, morototuma erek ruforokroka kef rumororu Ofa guru, beda rua runoira jera Ofa efen rusnok jinaga guru."

¹⁶ Erek koma beda Ofa oroun ruforokroka insa koma desi Ofa. Beda Ofa aha efen etma esij rua fogora ois gu Allah jeskasada eita oufamofa gu rua.

¹⁷ Nou onnga Yesus jera efen ruforoker rinja jeska monuh insa koma, beda osnok egens ofof skoita Yesus noba es okeibi gu mebi jah Yesus odou. Beda ofa agot gu Yesus oida, "Guru onnga oufamofa, didif dutunggom mar erek meidu jeskasada disma eiteij ah onnga ah aibino?"

¹⁸ Beda Yesus oroun gu ofa oida, "Bua bijeka gu Didif erek oufamofa rot meidu? Jeska rusnok egema tein bera runoufa guru. Allah esinsiyai bera onnga oufamofa ojgomu.

¹⁹ Bua bijginaga rot hukum Musa fob. Musa agot gij hukum koma oida, 'Binagob rusnok guru ni, genesiri morototuma guru ni, bunokoreka mar guru

ni, bunocuwei mar gij rusnok enjgineg guru ni, bunorokrusa rusnok guru ni, bugif gu bebin mekeb jera mosib ojgomu ni.' "

²⁰ Beda osnok egens koma agot oida, "Guru, sis mona onnga didif dumforokai ros onojoros mona deisef tein bera didif duroru jeni mar koma nomnaga fob. Noba mar egema tein enahif ei?"

²¹ Beda Yesus ohobut osnok egens insa koma noba odou okora rot ofa. Beda Ofa agot oida, "Mar egens deika bera enahif ros. Bua buhu bebin mareibra nomnaga fogora bikeba fifi onnga bua binsma jeska mar insa koma gu rusnok onnga rufojingki ojgomu. Beda bua bimesma mar onnga oufamofa eteb gu mebaga si. Beda bua buroru Didif."

²² Nou onnga osnok egens insa koma engg mar onnga Yesus anggot fob, beda ofa osum oskusk rot. Jefeda ofa eja rot odou okum, jeska ofa erek orna mei ahta onnga efen mareibra ofoukou doska tein.

²³ Beda Yesus eyajga rusnok jah suma, noba agot gu efen ruforoker oida, "Okum eteb rot rusnok onnga ruisum gij rerin mareibra ofoukou ojgomu jeskaseda rumoira jera rusnok onnga Allah ofoka ereij keingg jinaga guru."

²⁴ Yesus efen ruforoker rudou ousaha eteb rot mar onnga Ofa anggot insa koma. Beda Yesus agot gu rua deika oida, "Iforoker onnga dudou okora rot, okum eteb nou unta efaga egens oira gij mohunu mos esta. Tina okum eteb ekirsa nou rusnok onnga ruisum gij rerin mareibra ofoukou jeskaseda ruiira jera rusnok onnga Allah ofoka ereij keingg ojgomu."

²⁵ (10:24)

²⁶ Erek koma jefeda Yesus efen ruforoker rudou ousaha eteb ekirsa deika noba ragot moguma oida,

"Erek koma jefeda enadaij nou rusnok egema risma eiteij ah onnga efeinah jinaga guru."

²⁷ Beda Yesus orumba gij rua noba agot oida, "Tenten, oisouska rusnok risinsa rerin owesa efek bera enadaij guru. Tina oisouska Allah efen owesa efek bera rua rimeita eiteij ah onnga efeinah si."

²⁸ Beda Petrus agot gu Yesus oida, "Tuhan, teinefa rot memefo? Memef maha mefmen mar nomnaga jah jeskaseda mororu Bua ojgomu fob?"

²⁹ Beda Yesus agot oida, "Ongga tenten bera, idu onnga aha efen mod ni, era aha efen mokora jera meyera ni, era efen meka gonu mosu ni, era efen efeser ni, era efen mebi ni jeskaseda ororu Didif, noba jeskaseda ejefesij rot Allah oga onnga oufamofa,

³⁰ beda ofa emesma mar insa koma nomnaga rot ofosma wuntin egens ekirsa deika gij efen eiteij ah ainsa kef tein. Noba erek rusnok rita efera okora gu ofa rot, beda gij mona onnga emen bera ofa emesma eiteij ah onnga efeinah noba ah aibin jera mar insa koma tein si.

³¹ Tina rusnok onnga ruhca rufoka onnga aksa gij mona ebeibeyaif bera runofoka aksa gij mona onnga emen deika guru. Noba rusnok onnga runohca rufoka onnga aksa gij mona ebeibeyaif guru, rua bera rimesma rufoka onnga aksa eteb gij mona onnga emen si."

³² Yesus jera efen ruforoker ricira jah kota Yerusalem. Noba Yesus eja okag rot rua jera rusnok enjineg tein onnga ruroru Ofa. Jefeda rua rudou ousaha eteb rot Ofa jeska Ofa enemeesa rot rusnok onnga rudou ofogog skoita Ofa jah suma guru. Noba rusnok enjineg koma onnga ruroru Ofa tein bera

rimeesa rot mar ofogog onnga emecirej Yesus jera rua nomnaga gij kota koma. Beda Yesus oroun efen ruforoker rufok setka kungkob erfeka gu risinsa noba agot gu rua juens deika rot mar onnga okum onnga emah keingg Ofa gij kota Yerusalem.

³³ Ofa agot oida, "Iwa ig duga kef rot iskusk fog, jeska mimif mimeja jah kota Yerusalem kendeja. Noba jah suma bera rusnok rimagei Didif, Rusnok Efesa, beda rumoroun Didif skoita ebirfager imam-imam Yahudi jera Guru-Guru agama. Beda ebirfager koma rumoga ojga rot oida Didif dijagos ojgomu. Beda rua rimaha Didif gu rusnok onnga Yahudi guru.

³⁴ Beda rusnok insa koma rumoga oruh Didif ni, rumoskurfi rot Didif ni, rangha Didif rot ahais ni, beda ragob Didif. Noba gij mona onnga orgomu deika, beda Didif dimedebecki sons jeska danggos."

³⁵ Yakobus jera Yohanes, onnga Zebedeus efen efeserga, gen skoita Yesus noba gagot gu Ofa oida, "Akeina Guru, magef madou os jeskaseda Bua butunggom mar onnga marejgei rot gu Bua."

³⁶ Beda Yesus ejeka gu goga oida, "Goga godou os dutunggom mar erek meidu?"

³⁷ Beda goga goroun oida, "Gij mona onnga bua bufoka ereij keingg rusnok rot bufoka onnga aksa eteb, beda bucunc magef jeskaseda magema maker jah bugnosk noba magema maker jah bigris, fogora magef mamesma mafoka onnga aksa tein."

³⁸ Beda Yesus agot gu goga oida, "Goga godou enebriyi gij rot mar insa koma onnga genjeka gu Didif rot enesi. Goga goitij rot geita gefera okora eteb noba gagos tein erek Didif dimeita difera okora eteb noba dimagos tein ei?"

³⁹ Beda goga gagot gu Yesus oida, "Magef maitij rot maita mar erek koma tein." Beda Yesus agot gu goga oida, "Tenten, gij mona kahma beda, goga gemeita gefera okora noba gemagos erek Didif si.

⁴⁰ Tina Didif dinagot rot idu onnga engker gu dugnosk jera digris guru. Jeska Allah esinsiyai bera onnga omocunc rot idu onnga emeker jah dugnosk jera onnga emeker jah digris."

⁴¹ Nou onnga Yesus efen ruforoker rufok setka onnga enjgineg rig rot mar insa koma onnga Yakobus jera Yohanes genjeka gu Yesus rot, beda rudou okumkum rot goga.

⁴² Beda Yesus ohoturu efen ruforoker rufok setka kungkob erfeka noba agot gu rua oida, "Iwa ijginaga rot fob oida rusnok onnga Yahudi guru bera rerin ebirfager onnga rut keingg rua ojgomuja. Noba rusnok insa koma rerin rusnok enjgineg onnga rufoka aksa tein onnga riyahahir joug rua rot mar ofoukou ojgomuja.

⁴³ Tina iwa ineita mar erek ebirfager insa koma guru. Onnga tenten bera, erek osnok egens jeska iwa ifekesa onnga odou os esma ofoka onnga aksa jeska Allah, beda ofa oin keingg odou efesi sismeni fog, fogora ofij rusnok enjgineg tein.

⁴⁴ Noba erek osnok egens odou os jeskaseda Allah ofra efen ofoka erek aksa ekirsa jeska rineya, beda ofa ofij rusnok nomnaga.

⁴⁵ Jeska Didif, Rusnok Efesa tein, bera dinen jeska mebaga jeskaseda rusnok enjgineg rufij Didif ojgomu guru. Tina Didif din jeskaseda dufij rusnok enjgineg. Noba Didif din jeskaseda daha disinsa gu rusnok onnga rufogog fogora rimagob Didif. Beda oisouska

koma bera rusnok rufoukou rimesma eiteij ah onnga ah aibin."

⁴⁶ Yesus jera efen ruforoker rinsaga gu kota Yerikho fob. Nou onnga rua rija jeska kota koma, beda rusnok rufoukou doska ruroru rua jeska kota koma. Erek koma noba osnok egens onnga ofoka Bartimeus onnga Timeus efen efesa bera eker gu moroju efembra. Ofa bera eiteij ofou noba erejgejgei rusnok rot fifi ojgomuja.

⁴⁷ Nou onnga Bartimeus engg jeska rusnok enjgineg oida Yesus, onnga ojga jeska kota Nazaret, bera ai juens emerabj ofa jah suma, beda ofa ois rot oga eteb oida, "Yesus, Bua bera Kristus onnga Allah anggen eimofoj rot oida omojuj jeska raja Daud. Bita oufamofa gu Didifo!"

⁴⁸ Beda rusnok rufoukou ritaha joug ofa jeskaseda ofa eker toumou ojgomu. Tina ofa ois rot oga eteb deika oida, "Yesus onnga onjuj jeska raja Daud, bita oufamofa gu didifo!"

⁴⁹ Beda Yesus ojot jah suma noba agot gu rusnok oida, "Yagot gu ofa jeskaseda en skoita Didif jah sif." Jefeda rua rijagot gu osnok egens insa koma oida, "Budou onokumkum guru. Bidebecki jeska Yesus enejeka gu bua fob."

⁵⁰ Jefeda ofa eij efen mahkowu jah, beda ot ebeirens noba eja skoita Yesus.

⁵¹ Erek koma beda Yesus ejeka gu ofa oida, "Bua budou os Didif dutunggom mar erek meidu nou bua?" Beda ofa oroun gu Yesus oida, "Akeina, didif dudou os dik mar."

⁵² Beda Yesus agot oida, "Bija ebeibeyaif. Allah eita eskeira gu biteij fob, jeska budou ororu Didif rot tenten." Ainsa koma tein efen eiteij eskeira noba ofa

ek mar tein. Beda ofa ororu Yesus jah gu moroju osubu deis insa koma tein.

11 ¹Yesus jera efen ruforoker rinesaga jah kota Betfage jera kota Betania onnga angh gu memaga ofos onnga ofoka Saitun. Kota-kota koma ah doida kota Yerusalem. Nou onnga rua rinsaga gu kota Betfage, beda Yesus obk efen goforoka gegeka jeskaseda geja gokag rua.

²Ofa agot gu goga oida, "Goga geja gokag memef jah kota Betfage onnga angh jah kendeja. Nou onnga goira gij kota koma, beda goga gemek keledai efer egens onnga rusnok runcoka. Keledai egens koma bera rusnok egema tein rineifef enesi. Beda gosuwa keledai koma, noba goroun skoita Didif.

³Noba erek rusnok rijeka gu goga rot oida, 'Goga gosuwa keledai koma rot meidu?' Beda goga goroun gu rua oida, 'Tuhan ocosu rot, noba dansusk rusnok rumoroun keledai koma sons skoita iwa si.' "

⁴Erek koma beda nou onnga goga genjesaga gu kota insa koma, beda goga gek keledai efer egens onnga rusnok runcoka gu montoj mod egens onnga angh gu moroju efembra.

⁵Noba askesi goga gosuwa keledai efer insa koma beda rusnok rijeka gu goga oida, "Goga gosuwa keledai efer koma rot meidu?"

⁶Beda goga gagot mar insa koma jeni onnga Yesus oftufu gu goga, jefeda rusnok koma ruitij rot goga goroun keledai egens insa koma.

⁷Nou onnga goga goroun keledai efer egens insa koma gu Yesus, beda goga gaha meifeti esij keledai ejmeg. Beda Yesus eifef esij keledai egens insa koma.

⁸Noba askesi keledai efer koma enecira rot Yesus ros, beda rusnok rufoukou ruhoda rerin meifeti noba

rurosu moroju onnga Yesus encira gij. Rua tein riris ayug efeyi eteb jeskaseda rurossu moroju nou keledai onnga encira rot Yesus. Rua rita mar erek koma jeskaseda ruocunc rot oida rurougif gu Ofa rot tenten fob.

⁹ Noba rusnok rufoukou onnga Yesus encira gu rifelesa insa koma bera risitit rot ruga eteb oida, "Oufamofa eteb jeska Bua bin fob! Allah eita oufamofa eteb gu Bua onnga en oisouska Ofa efen ofoka! Allah eita oufamofa eteb gu bua onnga bin jeskaseda bufoka ereij keingg memef erek mifmin mimowa raja Daud onnga ofoka ereij keingg mifmin mimowa. Memef mesitit Allah onnga engker gu mebaga!"

¹⁰ (11:9)

¹¹ Yesus oira gij kota Yerusalem beda Ofa eja gu momas onnga angh rejrej Mod Allah jah suma. Ofa eyajga joug mar nomnaga jah suma. Beda Ofa jera efen ruforoker rija jeska kota Yerusalem noba rua ruksons jah kota Betania jeska erek moworuru fob.

¹² Erek monog deika beda Yesus jera efen ruforoker rija jeska kota Betania. Ainsa koma tein mosona ok Yesus.

¹³ Beda Ofa ek mega efek egens onnga efeyi ofoukouku ros. Jefeda Ofa eja skoita mega efek egens insa koma jeskaseda ohca rot efen efek. Beda Ofa ek, tina efen efeyi ereinahta ojgomu. Ofa enek efen efek egema tein guru, jeska mona onnga enefek enesi ros.

¹⁴ Jefeda Ofa agot skoita mega egens insa koma oida, "Didif duhca efek jeska bua, tina dinek egema tein guri. Jefeda rusnok eneya tein rinet efek jeska bua deika guru. Jeska gij mona kahma bera binefek

deika jinaga guru." Noba efen ruforoker rig mar onnga Ofa anggot erek insa koma skoita mega egens koma onnga enefek guru.

¹⁵ Yesus jera efen ruforoker ruksons jah Yerusalem. Beda Ofa oira gu momas onnga rusnok rum riteij gu Allah gij. Momas insa koma bera angh rejrej Mod Allah. Jah suma bera Ofa ek rusnok rufoukou onnga rudou erebibeit rot rerin mar onnga ruhu rot erek efera osok eteb noba rimengk tein. Erek koma jefeda Yesus ekemeji rusnok insa koma jeska momas koma. Beda Ofa otkinaja meja onnga rusnok riferwei fifi nou rusnok enjineg tein. Noba Ofa otkinaja kursi-kursi onnga rusnok ringker gij jeskasada ruhu mem monggeta mos gij tein.

¹⁶ Noba Ofa eyahehir joug rusnok nomnaga onnga rurka rerin mareibra jeskasada runorka mar koma gij momas insa koma deika guru.

¹⁷ Beda Ofa oftufu mar gu rusnok jah suma. Ofa agot oida, "Runggu gij Mar Efeyi ebsi rot mar onnga Allah anggot erek kef oida, 'Dedin mod bera rusnok rinjeka erek mod egens nou rusnok nomnaga jeskasada rum riteij gij ojgomu.' Tina iwa intunggom mod kef erek mod egens nou rusnok onnga rungkoreka mar jeskasada ridemdem gij erek komo."

¹⁸ Nou onnga rua onnga ebic Farisi jera Guru-Guru agama rik mar onnga Yesus ontunggom insa koma fob, beda rudou ejisei rot Ofa, jeska rusnok rufoukou rudou ousaha rot Yesus jera mar onnga Ofa omftufu rot owesa efek. Jefeda rua insa koma ruhca moroju jeskasada ragob Ofa.

¹⁹ Nou onnga mowororu fob, beda Yesus jera efen ruforoker rija jeska kota Yerusalem erek giskini.

²⁰ Erek rahah tentena, beda Yesus jera efen ruforoker rija jah kota Yerusalem deika. Rua rik mega egens onnga Yesus anggot joug mar skoita neeka fob. Tina mega efeyi insa koma nomnaga osrosra fob.

²¹ Petrus odou ah keingg rot mar onnga Yesus anggot gu mega insa koma, jefeda ofa agot gu Yesus rot odou ousaha oida, "Akeina Guru, Bua bik fog, jeska mega kef onnga Bua biyahehir joug neeka bera efeyi nomnaga osrosra fob!"

²² Erek koma beda Yesus oroun oida, "Iwa idou ororu rot tenten ojgomu oida Allah omotunggom mar nomnaga onnga iwa irejgei Ofa rot si.

²³ Onnga tenten bera, erek osnok egens ereni jeskaseda otunggom mar onnga onswos eteb erek ofa obk memaga ofos egens jeskaseda memaga koma eij esinsa gij mei mojomu efei, noba efen odou onosousoyu rot guru, beda Allah emeita koma nou ofa si.

²⁴ Erek koma jefeda, gij mona onnga iwa yum iteij gu Allah rot mar, beda idou ororu rot tenten oida iwa imesma mar koma onnga iwa yum iteij gu Ofa rot si. Iwa idou ororu erek koma ojgomu beda Allah emeita mar koma gu iwa si.

²⁵ Erek koma tein, gij mona onnga iwa yum iteij gu Allah rot mar, tina idou oska rot rusnok enjgineg ros, beda iwa isuna rot mar koma jeska idou efesi sismeni fog fogora yum iteij gu Allah rot mar. Ita erek koma jeskaseda yeyin ika Allah onnga engker gu mebaga omosuna rot yeyin mar onnga oska jeska idou efesi tein."

²⁶ ((Noba erek iwa inosuna rot rusnok enjgineg rerin mar onnga oska guru, beda yeyin Ika onnga eker gu

mebaga bera onosuna rot iwa tein yeyin mar onnga oska guru.))

²⁷ Erek koma beda Yesus jera efen ruforoker ruiira gij kota Yerusalem deika. Noba askesi Yesus enecira gij momas onnga angh rejrej Mod Allah, beda rusnok rineya onnga ebirfager imam-imam Yahudi jera Guru-Guru agama jera ebirfager agama Yahudi rin skoita Ofa.

²⁸ Beda rua ragot gu Ofa oida, "Mar ofoukou kef onnga Bua buntunggom bera oisouska ofoka idu? Noba idu bera onnga eneita owesa efek gu Bua jeskaseda butunggom mar erek insa komo?"

²⁹ Beda Yesus agot gu rua oida, "Didif dudou os dijeka mar egens gu iwa sismeni fog. Noba erek iwa iron gu Didif rot, beda Didif tein dimagot gu iwa rot idu onnga eita owesa efek gu Didif."

³⁰ Beda Yesus ejeka gu rua oida, "Idu onnga eita owesa efek gu Yohanes jeskaseda ofa eita baptis gu rusnok? Allah bera onnga eita ei era rusnok enjgineg bera onnga eneita? Iwa iron rot mar koma gu Didif fog."

³¹ Erek koma beda rua rifesij moguma osok gij mar insa koma onnga Yesus ejeka gu rua rot. Rua ragot moguma oida, "Erek mimif magot gu Yesus oida Yohanes esma owesa efek jeska Allah, beda Ofa emagot gu mimif oida, 'Teinefa fogora iwa inororu Yohanes oga guri.'

³² Tina erek mimif magot oida Yohanes esma owesa efek jeska rusnok ojgomu noba jeska Allah guru, beda rusnok enjgineg rumotkonu oska eteb rot mimif. Jeska rua rusujohu rot oida Yohanes bera erek nabi egens onnga Allah ombk."

³³Jefeda rua ragot gu Yesus oida, "Memef menejginaga rot oida idu onnga eita owesa efek gu Yohanes guru." Beda Yesus agot gu rua oida, "Erek koma jefeda, Didif tein dinagot gu iwa rot idu onnga eita owesa efek gu Didif guru."

12¹Erek koma beda Yesus efesij mar gu ebirfager insa koma nomnaga onnga erek orocunc rot teinefa rusnok Yahudi rita mar onnga oska skoita nabi-nabi onnga ensis. Ofa agot oida, "Osnok egens erefa anggur efef gij efen mekeni egens. Beda ofa otunggom mejga mamu rejrej efen mekeni koma. Beda ofa eji mebi efesi jeskasada esin keingg anggur efek insa koma gij mebi efesi fogora eita efei jeska. Beda ofa tein ei mod egens onnga aksa jeskasada ot joug efen mekeni insa koma. Nou onnga mar koma oisa fob, beda ofa aha mekeni koma gu rusnok enjgineg jeskasada riker joug ofa efen mekeni koma. Beda ofa ecira jah monuh egens onnga angh yes jeska.

²Gij mona onnga anggur efek insa koma ofom fob, beda ofa obk efen osnok egens onnga omfij ofa skoita rusnok onnga ringker joug mekeni insa koma jeskasada eita anggur efek eneya jeska rua.

³Tina rua onnga ringker joug mekeni koma bera ragei ofa oigomu. Beda rua rubu ofa noba obk ofa sons rot etma efesijg skoita ebirfaga egens insa koma.

⁴Erek koma noba gij mona onnga egema deika beda osnok egens onnga efen mekeni koma obk osnok egens egema deika skoita rua. Tina rua rubu ofa tein noba ruga oruh ofa.

⁵Erek koma beda ebirfaga egens insa koma obk osnok egens egema deika, tina rua ragob ofa oigomu.

Beda ebirfaga egens koma obk rusnok onggga rumfij ofa erek rufoukou deika, tina rusnok insa koma ranggob rineya noba rua rubu rineya.

⁶ Beda ebirfaga egens insa koma efen efesa orna egens onggga ofa odou okora rot eteb. Ofa osujohu rot oida, 'Rusnok onggga ringker joug dedin mekeni bera rumougif gu dedin edesa orna egens kef si.' Jefeda ofa obk efen efesa egens koma tein skoita rua.

⁷ Tina gij mona onggga efesa orna egens insa koma enjesaga gu mekeni koma, beda rusnok jah suma ragot moguma oida, 'Ofa bera onggga emesma mekeni kef gij mona onggga efen meka anggos jeska si. Jefeda mimif magob ofa jeskaseda mumok mekeni kef gu misinsa ojgomu.'

⁸ Erek koma jefeda rua ragei ofa beda ragob ofa fogora rij efen efaga jeska mekeni anggur.

⁹ Jefeda Didif dimagot gu iwa rot mar onggga osnok egens onggga efen mekeni koma emeita gu rua insa koma. Ofa omoksons jah efen mekeni koma, beda ofa emagob rusnok insa koma nomnaga onggga ringker joug efen mekeni. Beda ofa emaha mekeni insa koma gu rusnok enjgineg deika."

¹⁰ Beda Yesus agot deika gu ebirfager Yahudi insa koma oida, "Iwa idou ah keingg rot mar onggga runggu gij Mar Efeyi Ebsi rot Didif sis fob. Mar koma agot oida, 'Rusnok onggga rii mod bera rukoja Mamu ahais egens koma fogora rij jeska fob. Tina mamu koma bera enjerek mamu onggga ofoufem ekirsa nou mod koma nomnaga.

¹¹ Tuhan bera ontunggom mar insa koma, noba koma bera onggoska ahah miteij tein.' "

¹² Erek koma beda ebirfager Yahudi onggaringg mar insa koma onggaringg Yesus emfesij gu rua fob bera ruhca moroju jeskasada ragei Ofa. Jeska rua rijginaga rot oida mar onggaringg Yesus emfesij osok gij rusnok insa koma onggaringg riker joug mekeni bera erek orocunc rot mar onggaringg rua risinsa rerin rita mar onggaringg oska. Tina rua rinagei Ofa enesi jeska rua rimeesa rot meidu onggaringg rusnok rufoukou jah suma rumotunggom skoita rua rot. Jefeda rua rija jeska Ofa ojgomu.

¹³ Gij mona egema deika beda ebirfager Yahudi rubk rineya onggaringg Yahudi ebic egens onggaringg ofoka Farisi jera rineya onggaringg rururu raja Herodes skoita Yesus. Rua rudou os rijeka joug Ofa reirei jeskasada erek Ofa agot mar onggaringg rua rusujohu rot bera erek oska, beda rua rimagei Ofa rot.

¹⁴ Rua rin skoita Ofa noba ragot oida, "Akeina Guru, memef mejginaga rot oida Bua bera bagot rot mar onggaringg tenten ojgomu, noba bua bunoruru rusnok onggaringg rufoka aksa onggaringg rusos budou efesi rot mar egema tein guru. Tina Bua buftuftu mar onggaringg Allah ondou os rot tenten ojgomuja. Jefeda Akeina bagot gu memef oida, erek memef moh pajak gu raja Kaisar, beda koma bera erek tenten ei? Memef moh pajak insa koma gu Ofa ei era gurei?" Tina Yesus ejginaga rot oida mar onggaringg rua rinjeka gu Ofa rot insa koma bera onoruru meidu onggaringg rindemdemi gij rudou efesi fob guru. Jefeda Ofa agot gu rua oida, "Teinefa fogora iwa ireneni Didif jeskasada dagot mar onggaringg oska fogora yagei Didif rot erek komo." Beda Ofa agot deika oida, "Iwa ita fifi gu Didif jeskasada dik ai juens fog."

¹⁵ (12:14)

¹⁶ Jefeda rua rita fifi gu Ofa. Beda Ofa ejeka gu rua oida, "Idu efena jera ofoka bera enah gij fifi kef?" Beda rua ruroun oida, "Koma bera raja Kaisar efen efena jera ofoka."

¹⁷ Beda Yesus agot gu rua oida, "Jefeda iwa ita mar onnga raja Kaisar efen gu ofa ojgomu, noba ita mar onnga Allah efen gu Ofa tein ojgomu." Erek koma beda rua rudou ousaha eteb rot mar onnga Yesus oroun gu rua, jeska enadaj nou rua ragei Ofa rot mar onnga Ofa anggot insa koma jinaga guru.

¹⁸ Rusnok Yahudi jeska ebic egens onnga ofoka Saduki rin skoita Yesus. Rua onnga ebic Saduki koma bera rusujohu rot oida rusnok rinedebecki jeska ranggos guru.

¹⁹ Rua rireni Yesus fogora rijeka gu Ofa reirei oida, "Akeina Guru, sis fob Musa onngu mar egens onnga agot rot oida erek orna egens agos tina onok efesa guru, beda efen mokosa era mokora egema ois moisa koma jeskaseda goga gok egesa egema nou orna onnga anggos fob."

²⁰ Beda rua riflesij deika oida, "Sis fob runer rufok cinja erfeka onnga rumokosama bera runofoguma.

²¹ Orna egens onnga osumbohka oskotu arja. Tina gij mona onnga ofa anggos fob bera ofa onok efesa guru. Beda mokosa onnga egeka ois moisa koma, tina ofa tein agos noba onok efesa guru. Erek koma tein rot mokosa onnga orgomu.

²² Mokosa nomnaga ois moisa insa koma, tina rua nomnaga ragos jeska, noba runok riser tein guru. Beda moisa egens insa koma tein agos otoij rua.

²³ Jefeda erek rusnok ridebecki jeska ranggos rot tenten, beda gij mona insa koma bera kenefo jeska mokoser insa koma bera omois ojaga koma

erek mohona rot tenten? Jeska gij mona onnga rua nomnaga rifena ebah ros bera rua nomnaga ruis ojaga egens koma erek rerin ruhona fob."

²⁴ Beda Yesus oroun gu rua oida, "Mar insa koma onnga iwa insujohu rot bera erek tenten guru. Jeska iwa idou enebriyi gij rot meidu onnga Mar Efeyi Ebsi anggot rot osok gij mar insa koma enesi. Noba iwa idou enebriyi gij rot Allah efen owesa efek jeskaseda ofra rusnok jeska ranggos tein guru.

²⁵ Jeska gij mona onnga rusnok ridebecki jeska ranggos, beda rua runoskotu arja era rinahi igers deika guru. Rua rita mar erek malaikat-malaikat onnga runoskotuma guru.

²⁶ Erek koma tein, iwa idou ah keingg rot buku hukum onnga Musa onngu jeni erek mar onnga Allah oncunc gu ofa sis fob ojgomu. Gij buku insa koma bera ofa onngu mar osok gij mona onnga ofa engk tumu maksaksa onnga mah ent. Gij mona insa koma bera ofa eg Allah oga onnga agot oida, 'Didif bera Abraham, Isak, jera Yakob efen Allah.'

²⁷ Jefeda Allah bera enerek Allah nou rusnok onnga ranggos fob ojgomu guru. Tina Ofa bera erek Allah nou rusnok onnga rifena ebah sons erek Abraham, Isak jera Yakob onnga rifaga ranggos sis fob. Jefeda mar onnga iwa onnga ebic Saduki rusujohu rot bera erek tenten guru."

²⁸ Guru agama egens onnga en jah suma bera engg rot mar onnga Saduki insa koma ruga emesedema rot jera Yesus. Noba ofa engg rot oida mar onnga Yesus oroun gu Saduki insa koma bera erek oufamofa eteb. Jefeda ofa ejeka gu Yesus oida, "Akeina, rot mifmin hukum Yahudi nomnaga, hukum kenefo bera erek ofoufem ekirsa jeska nomnaga?"

²⁹ Beda Yesus oroun gu ofa oida, "Hukum egens onnga ofoufem ekirsa jeska hukum nomnaga bera erek kef: 'Iwa onnga Israel ig rot iskusk fog. Mifmin Tuhan onnga minjeka erek Allah, Ofa esinsiyai bera erek Tuhan. Tuhan egema bera enofogu guru.

³⁰ Iwa idou okora rot yeyin Tuhan jera idou efesi ongkasmos ni, gij mar nomnaga onnga isujohu rot ni, noba gij mar nomnaga onnga itunggom tein.'

³¹ Noba hukum onnga egeka onnga erek ofoufem ekirsa jeska hukum nomnaga bera erek kef: 'Iwa idou okora rot rusnok enjgineg erek idou okora rot isinsa tein.' Hukum eneya bera onofoufem ekirsa jeska hukum egeka insa kef guru."

³² Beda Guru agama egens insa koma agot gu Yesus oida, "Akeina Guru, mar onnga Bua banggot rot insa koma bera erek ongkoska eteb. Jeska Bua banggot rot tenten oida Allah bera onnga erek Tuhan ojgomu, noba Tuhan egema tein enofogu guru.

³³ Noba Bua tein banggot rot tenten oida mimif mudou okora rot Ofa jera mudou ongkasmos ni, gij mar nomnaga onnga musujohu rot ni, gij mar nomnaga onnga mutunggom ni, noba mudou okora rot rusnok enjgineg erek mudou okora rot misinsa tein ojgomu. Mar koma nomnaga bera ofoufem ekirsa jeska mar nomnaga onnga mimeita nou murougif gu Allah."

³⁴ Nou onnga Yesus engg mar koma, beda Ofa agot gu Guru agama egens koma oida, "Mar onnga bua buroun rot insa koma bera orocunc rot oida bua tein bumoiria jera rusnok onnga Allah ofoka ereij keingg." Beda gij mona insa koma ebirfager Yahudi rinejeka gu Yesus reirei rot mar egema deika guru, jeska Ofa oroun mar gu rua rot odou onnga ebriyi gij eteb.

³⁵ Nou onnga Yesus emfesij mar jera Guru-Guru insa koma oisa fob, beda Ofa agot gu rusnok jah suma oida, "Guru-Guru agama ruftuoftu oida Kristus koma onnga Allah omobk bera ojuj jeska ebic raja Daud ojgomu noba enen jeska Allah guru. Tina koma tenten guru

³⁶ Jeska raja Daud esinsa agot oisouska Efena Ebsi Allah oida, 'Tuhan Allah agot gu dedin Tuhan oida: "Biker jah dugnosk rot bufoka aksa, noba Didif dumoin keingg bebin mesa nomnaga fogora rumougif gu Bua." '

³⁷ Jefeda erek raja Daud esinsa ejeka Kristus onnga emen erek ofa efen Tuhan, beda koma orocunc rot oida Kristus onnga ojuj jeska raja Daud bera en jeska Tuhan Allah tein. Jeska Daud tein ougif gu Ofa." Erek koma beda, rusnok rufoukou jah suma onnga rig mar onnga Yesus omftuoftu rot bera rudou erirei eteb rot.

³⁸ Askesi Yesus oftuoftu mar gu rusnok insa koma ros, beda Ofa agot oida, "Iwa isisi joug isinsa idou efesi rot ahais osok gij rua onnga Guru-Guru agama. Jeska rua rudou os rincira rot meisoufa onnga ongkoskamoka jeskaseda ruocunc rot rerin rufoka onnga aksa eteb. Noba rua rudou os rusnok riskemba rugif gu rua gu pasar tein ojgomu.

³⁹ Noba, nou onnga rua ruiira gij mod onnga rusnok Yahudi rum riteij gij, era rua ruiira gij mod onnga rusnok ruina maat keingg rusnok gij, beda rua rudou os riker esij kursi eteb jah rusnok nomnaga rudou ojgomu.

⁴⁰ Noba rua rucuwei mar gu rujona rija mesina fogora rita rerin mareibra nomnaga jeska rua koma ojgomuja. Noba rua rum riteij erek aksa eteb jeskaseda rusnok enjgineg rusujohu rot oida rua bera

erek rusnok onggga rineita mar onggga oska guru. Jefeda gij mona kahma bera Allah omofra mar okum eteb keingg rua rot si!"

⁴¹ Gij mona juens bera Yesus eker gu momas onggga angh rejrej Mod Allah. Noba askesi Ofa eker doida meifeti onggga rusnok rikeba rerin fifi gij erek rurougif gu Allah jah suma, beda Ofa eyajga rot teinefa rusnok rufoukou rikeba rerin fifi gij meifeti koma. Ofa ek runa mei ahta ofoukou rij fifi eteb gij meifeti insa koma.

⁴² Tina Ofa tein ek ojaga eja mesina egens onggga ofojingki eij fifi egeka onggga erek ai oskiyai gij meifeti insa koma.

⁴³ Beda Ofa ois gu efen ruforoker noba agot gu rua oida, "Ahah Allah eiteij bera eja mesina egens koma onggga ofojingki eij fifi eteb ekirsa jeska runa mei ahta insa koma nomnaga ojgomu.

⁴⁴ Jeska rua rij fifi jeska rerin mareibra onggga ofod eskemba. Tina ojaga eja mesina egens insa koma onggga ofojingki bera eita fifi nomnaga onggga ofa efen tein. Egema enah deika guru."

13 ¹ Nou onggga Yesus eja jeska momas onggga angh rejrej Mod Allah insa koma, beda efen oforoka egens agot gu Ofa oida, "Akeina Guru, bua bik mamu eteb kef onggga rusnok rira jeskaseda rii mod Allah onggga aksa kef. Jeska mamu kef jera mod onggga aksa kef tein bera erek ongnoska eteb."

² Beda Yesus agot gu ofa oida, "Gij mona kahma beda mamu eteb kef jera mod eteb kef tein bera rumohoda nomnaga fogora mamu egens enah esij egema tein deika jinaga guru."

³ Erek koma beda Yesus ejeker gu memaga ofos Zaitun Efeda onggga angh gu meindoks enama jeska

Mod Allah. Jah suma bera Petrus ni, Yakobus ni, Yohanes ni jera Andreas tein rin skoita Yesus noba riker morototuma jera Ofa jah suma.

⁴ Beda rua rijeka gu Ofa oida, "Tuhan, gij mona juaho fogora mar onggua Bua banggot rot osok gij mamu eteb insa koma bera emesaga fob? Noba mar meidu omorocunc rot oida mona onggua Allah omotunggom mar koma bera en doida fob?"

⁵ Beda Yesus agot gu rua oida, "Iwa yut joug idou efesi rot ahais ojgomu jeskaseda rusnok runocuwei mar gu iwa osok gij mar insa koma guru.

⁶ Jeska rusnok rufoukou rumorogna noba ruokrusa rusnok enjgineg. Rua rimagot oida, 'Didif bera Kristus egens koma onggua Allah omobk jeskaseda osuwa rusnok jeska rerin mar onggua okum.' Rua rimagot erek koma fogora rumorokrusa rusnok rufoukou.

⁷ Noba gij mona onggua iwa ig rot oida rusnok gij monuh egens onggua angh doida bera rimagobuma, era rusnok rimfesij oida rusnok gij monuh enjgineg tein bera rimagobuma, beda idou enefeneinei rot koma guru. Mar insa koma bera emen ojgomu, tina koma onorocunc rot oida mar onggua Allah ensejah nou otunggom bera ah gij efera fob guru.

⁸ Rusnok monuh egens rimagobuma jera rusnok monuh onggua enjgineg. Noba ebirfager monuh egens rimagobuma jera ebirfager monuh enjgineg. Icusur agoska mebi doska gij monuh suma suma. Noba gij mona egema deika beda mosona eteb omok rusnok rufoukou doska. Tina mar insa koma bera erek orocunc rot mar onggua sismeni onggua emen kahma ojgomu. Mar koma bera erek ojaga egens onggua otkonu okora rot efen efesa fob. Koma erek orocunc rot oida dektek guru, beda ofa emeker rot efen efesa.

⁹ Erek koma tein, iwa yut joug idou efesi rot mar onnga rusnok rumotunggom skoita iwa gij mona insa koma. Jeska rua rimekris iwa skoita ebirfager agama jeskaseda ruga ojga rot iwa. Noba rusnok egema rumobu iwa gu mod onnga iwa imohoturuma gij jeskaseda yum iteij gu Allah tein. Noba rusnok rimekris iwa skoita ebirfager monuh noba skoita raja eneya tein jeskaseda ruga ojga rot iwa, jeska iwa iroru Didif fob. Tina Allah omoitij rot mar koma jeskaseda iwa ifesij rot Ofa efen oga onnga oufamofa gu rua.

¹⁰ Noba rusnok rimefesij rot Allah oga onnga oufamofa gu rusnok mebif nomnaga fog, fogora mar okum insa koma onnga Allah ensejah rot bera emesaga si.

¹¹ Noba rua rimagei iwa fogora ruga ojga rot iwa jeska iwa iroru Didif fob. Jefeda gij mona insa koma bera iwa inejekjeka idou efesi rot mar onnga iwa imagot gu rua guru. Tina iwa yagot rot mar onnga angh gij idou efesi ojgomu. Jeska mar onnga iwa inagot insa koma bera erek mar onnga Efena Ebsi Allah oncunc gij idou efesi rot sisteni fob.

¹² Noba gij mona insa koma tein bera runa rimekikif jeska rerin rukoser era rukorer noba rimaha rua gu rerin mesa fogora rukoser insa koma rimagos ojgomu. Beda riker tein rimekikif jeska rerin riser fogora rimaha rua gu rerin mesa. Noba riser tein rudou emekirsa rot rerin riker. Jefeda rusnok rimagob rerin riker insa koma ojgomu.

¹³ Rusnok rufoukou doska bera rimeita rudou onnga ofogog rot iwa jeska iwa iroru Didif fob. Jefeda iwa ita idou ahais onjoros mona onnga Allah ontunggom mar insa koma onnga Ofa ensejah rot fob. Ita idou

ahais erek koma ojgomuja jeskaseda iwa isma eiteij ah onnga efeinah noba onnga ah aibin."

¹⁴ Erek koma beda Yesus agot deika oida, "Gij mona kahma beda iwa imek osnok egens onnga ofogog doska otunggom mar onnga oska eteb gij Mod Allah efesi. Fogora Mod efesi insa koma bera emeja erek oska efekeifa eteb ojgomu. Jefeda idu onnga ek gij Mar Efeyi Ebsi, beda ofa eisisi keingg odou efesi osok gij mar onnga Didif dimfesij rot insa koma ojgomu. Jeska gij mona insa koma bera rusnok onnga ringker gij monuh Yudea rumoku gu memaga ofos.

¹⁵ Noba rusnok onnga riker skida rerin mod onnga erek edeider bera runojuj sons jeskaseda rita mar jeska mod efesi insa koma sismeni fog guru. Tina rua rumoku ebeirens ojgomu.

¹⁶ Noba rusnok onnga rif mar gu mekeni bera runoksons gu rerin mod jeskaseda rita meisoufa egema sismeni fog guru. Tina rumoku ebeirens ojgomu.

¹⁷ Okum eteb rot rujager onnga rifaga okum rot riser era rot rujager onnga rungh mengk gu rerin riser gij mona insa koma tein. Jeska rua runoku ebeirens jinaga guru.

¹⁸ Noba iwa yum iteij gu Allah jeskaseda mar okum insa kef enesaga gij mona onnga meifina eteb guru. Jeska gij mona onnga meifina eteb ensaga bera okumkum eteb nou rusnok onnga rungku jeska mar okum insa koma.

¹⁹ Erek koma jeska gij mona insa koma onnga emen bera rusnok rimeita rifeira okora eteb. Rua rimeita rifeira okora ekirsa jeska rusnok nomnaga onnga rita rifeira okora sis mona onnga Allah ontunggom mebif nomnaga onjoros deisef tein. Noba mimif minek

rusnok onnga rita rifeira okora ekirsa jeska rua onnga rimeita rifeira okora gij mona insa koma deika guru.

²⁰ Noba Allah anggen rot oida Ofa omotunggom mona insa koma erek estir ojgomu. Jeska erek Ofa onotunggom mona insa koma erek estir guru, beda rusnok nomnaga rimagos rot ojgomu. Ofa omotunggom mar erek koma jeskaseda rusnok nomnaga rinagos rot mar okum onnga emah keingg rua gij mona insa koma guru. Tina Ofa omotunggom mar erek koma jeska Ofa odou efeneinei rot efen rusnok onnga Ofa oncunc fob.

²¹ Erek rusnok ragot gij mona insa koma oida, 'Iwa ik osnok egens kef fog, jeska ofa bera Kristus egens koma onnga Allah omobk.' Era rusnok rimagot oida, 'Kristus egens koma onnga Allah omobk bera en jah suma fob.' Beda idou onororu mar onnga rua ranggot insa koma jinaga guru.

²² Jeska rusnok rufoukou onnga ruh risinsa rourou erek Mesias onnga Allah omobk, era onnga rijeka risinsa rourou erek nabi-nabi onnga Allah omobk bera rimen si. Beda rua rumotunggom mar onswos eteb jeskaseda ruokrusa rusnok onnga Allah oncunc fob. Rua rimereneni rot mar erek koma, tina rineita guru.

²³ Jefeda iwa yut joug isinsa idou efesi rot ahais ojgomu. Jeska mar onnga Didif dimfesij gu iwa ebeibeyaif bera ah gu mona kahma ros."

²⁴ Beda Yesus agot deika oida, "Gij mona insa koma onnga rusnok rita rifeira okora eteb oisa fob, beda mowa emeja erek motkobah, noba mesta tein eneisa deika guru. Motur tein emesiri jeska mebaga, beda mebaga emeja erek toga.

²⁵ (13:24)

²⁶ Beda gij mona insa koma bera rusnok rimek Didif, Rusnok Efesa, din gij mocgoj ofog rot owesa efek eteb jera eisa onnga efesa eteb tein.

²⁷ Beda Didif dumobk malaikat-malaikat rejrej mebif nomnaga jeskaseda ruhoturu rusnok nomnaga onnga Allah oncunc fob jeska monuh onnga angh doida jera monuh onnga angh yes tein.

²⁸ Iwa isujohu rot mega ara egens. Gij mona onnga mega koma efen efeyi ofoukouku ros beda koma erek orocunc rot oida mona dektek guru, beda emefek si.

²⁹ Erek koma tein, gij mona onnga iwa ik mar insa koma onnga Didif dimfesij rot gu iwa fob, beda iwa imejginaga rot oida mona onnga enja ejgwaga bera enesaga doida fob.

³⁰ Onnga tenten bera, mar insa koma nomnaga omorogna gij mona onnga rusnok rifena ebah ros erek ebeibeyaif tein.

³¹ Noba mebaga jera mebi kef onnga iwa isujohu emah rot mona onnga ah aibin bera emejeseiseifa si. Tina dedin duga bera eneseiseifa guru. Dedin duga bera emah gij mona onnga ah aibin ojgomuja."

³² Beda Yesus agot deika oida, "Erek koma jefeda rusnok egema tein rinejginaga rot mona juaho fogora mar insa koma nomnaga omorogna guru. Noba malaikat-malaikat gu mebaga era Didif tein, onnga Allah efen efesa, memef tein bera menejginaga rot mona juaho fogora mar insa koma omorogna guru. Dedin Akeina Allah esinsiyai bera ejginaga rot mona insa koma ojgomu fob.

³³ Jefeda iwa yut joug idou efesi rot iskusk, jeska iwa inejginaga rot mona juaho fogora mona insa koma omorogna guru."

³⁴ Beda Yesus agot mar onggaga orocunc rot mona insa koma oida, "Koma erek ebirfaga egens onggaga emecira jah monuh enjineg. Sismeni bera ofa aha efen mod gu rusnok onggaga rumfij ofa. Beda ofa agot rot mar onggaga orofosutut osnok egens egens onggaga rumfij bera rumotunggom nou ofa ojgomu. Noba ofa agot gu osnok egens onggaga ont joug montoj mod koma oida ofa ot joug rot iskusk ojgomu. Beda ebirfaga egens insa koma eja jeska fob.

³⁵ Erek koma jefeda, iwa tein yut joug idou efesi rot iskusk. Jeska Didif, onggaga erek ebirfaga mod egens insa koma, bera dumoksons gij mona onggaga rusnok rinejginaga rot guru. Erek Didif dimen gij moworu, era motu deis, era gij mona efenen, era gij rahah tentena tein, iwa inejginaga rot guru.

³⁶ Noba gij mona onggaga Didif durogna keingg iwa, tina gij mona insa koma bera inot joug idou efesi rot ahais ros guru, beda mona insa koma bera onoufa nou iwa guru.

³⁷ Mar onggaga Didif danggot gu iwa bera nou rusnok nomnaga tein onggaga ruroru Didif. Koma bera: Yut joug idou efesi rot iskusk ojgomu."

14 ¹ Gij mona egeka deika beda mona onggaga Paskah jera mona onggaga rusnok rit roti onggaga enefifij guru bera emesaga. Gij mona insa koma bera ebirfager imam-imam Yahudi jera Guru-Guru agama ruhca moroju erek wuswus jeskasada ragei Yesus fogora ragob Ofa.

² Tina rua ragot moguma oida, "Minagei Ofa askesi mona onggaga Paskah enesi. Jeska erek magei Ofa gij mona insa koma, beda rusnok rumotkonu oska eteb skoita mimif rot."

³ Erek koma beda, askesi Yesus engker gu kota Betania ros, beda Ofa eja gu mod egens onnga osnok egens onnga ofoka Simon efen. Simon koma bera onnga maira et ofos sis fob. Askesi Yesus et maat gij mod insa koma ros, beda ojaga egens en skoita Ofa. Ofa orka fanin egens onnga ebera rot miniyi onnga efen ensesa. Miniyi koma bera efen efera osok eteb. Ofa ohoda fanin insa koma beda otkinaja miniyi koma nomnaga esij Yesus ebirfaga.

⁴ Rusnok egema onnga ringker jah suma rik mar koma onnga ofa ontunggom, jefeda rua ragot rot rusum oskusk oida, "Teinefa fogora ofa otkinaja miniyi onnga efen efera osok eteb rourou erek komo.

⁵ Jeska miniyi insa koma bera efen efera osok ojgomu morototuma erek osnok egens efen ofons nou tahun egens. Onnga oufamofa bera ofa ohu miniyi koma noba fifi onnga ofa emesma rot bera ekeba gu rusnok onnga rufojingki ojgomu. Tina ofa eneita erek koma guri." Jefeda rua ritaha joug ofa rot mar onnga ofa ontunggom insa koma.

⁶ Beda Yesus agot gu rua oida, "Teinefa fogora iwa inagot mar gu ofa erek komo. Iwa ineita erek koma guru. Mar onnga ofa ontunggom insa koma gu Didif bera erek ongnoska eteb.

⁷ Rusnok onnga rufojingki bera riker jera iwa ojgomuja. Noba erek idou os, beda yufij rua rot mar onnga rua rucosu rot ojgomu. Tina Didif dineker morototuma jera iwa ojgomuja guru.

⁸ Jefeda ofa otunggom mar onnga ofa efen owesa efek adaij rot ojgomu. Noba mar koma bera erek oufamofa tein ojgomu. Jeska ororu mifmin erebent bera ofa otkinaja miniyi insa koma jeskaseda esejah

difaga nou mona onnga danggos fogora rusnok rimesah difaga gij moksu.

⁹ Onnga tenten bera, gij mona onnga rusnok rifiesij osok gij Allah oga onnga oufamofa rejrej mebif, beda rua rimefesij rot mar onnga ojaga egens kef ontunggom gu Didif tein. Jefeda rusnok rufoukou rimejginaga rot ofa tein."

¹⁰ Koma oisa fob beda osnok egens jeska Yesus efen ruforoker rufok setka kungkob erfeka onnga ofoka Yudas Iskariot orogna wuswus noba eja skoita ebirfager imam-imam Yahudi. Ofa eja skoita rua jeskaseda efesij gu rua rot teinefa ofa emekikif jeska Yesus fogora emaha Ofa gu rua.

¹¹ Nou onnga rua ringg mar insa koma fob beda rudou eskeiramera eteb rot. Jefeda rua ragen gu Yudas oida erek ofa eita mar insa koma, beda rua rumoh fifi eteb gu ofa rot si. Jefeda Yudas osujohu gij odou efesi rot teinefa ofa emaha Yesus gu ebirfager insa koma.

¹² Mona eteb onnga rusnok Yahudi rit roti onnga enefifij guru jera riris domba efer egens jeskaseda eisisi keingg risinsa rot mona onnga Allah oskotu rerin rimower jeska mar onnga ofogog bera ensaga fob. Jefeda Yesus efen ruforoker ragot gu Ofa oida, "Memef meja jah guaidu jeskaseda mesejah maat koma onnga mimif mint morototuma gij mona onnga Paskah?"

¹³ Jefeda nou onnga Yesus omobk efen goforoka gegeka beda Ofa agot gu goga oida, "Goga goira gij kota Yerusalem. Jah suma bera goga gomorodosu osnok egens onnga orka meic rot mei. Beda goga gororu Ofa ojgomu.

¹⁴ Nou onggga ofa oira gij mod egens beda gagot gu osnok egens onggga efen mod insa koma oida, 'Guru ejeka oida morongsu onggga Ofa jera efen ruforoker rimet maat gij nou mona onggga Paskah bera sinefo.'

¹⁵ Beda osnok egens insa koma omocunc morongsu eteb egens onggga angh skida gu goga. Morongsu insa koma bera ofa ensejah nou mingker gij. Jefeda goga goina maat jah suma jeskaseda mimif mint ojgomu."

¹⁶ Erek koma jefeda goforoka gegeka insa koma geja jah kota Yerusalem. Nou onggga goga gensaga jah suma fob, beda goga gek mar nomnaga jeni erek Yesus anggot gu goga. Beda goga gesejah maat rot mona onggga Paskah jah suma.

¹⁷ Gij motu insa koma beda Yesus jera efen ruforoker rufok setka kungkob erfeka rinsaga gu mod egens insa koma fob. Beda rua rusok gu morongsu onggga angh skida.

¹⁸ Askesi rua rint maat jah suma ros, beda Yesus agot oida, "Didif dagot rot tenten gu iwa oida osnok egens jeska iwa bera odou emekikif jeska Didif. Ofa bera osnok egens jeska iwa onggga et maat morototuma jera Didif jah sif."

¹⁹ Rua rudou okora rot mar onggga Yesus anggot insa koma, noba rua orofosutut egens egens ragot gu Ofa oida, "Akeina, didif dineita mar erek koma rot Bua guru!"

²⁰ Beda Yesus agot oida, "Osnok egens koma onggga emekikif jeska Didif bera osnok egens jeska iwa ifok setka kungkob erfeka ifekesa onggga ec roti gij mok osku kef jera Didif.

²¹ Ongga tenten bera Didif, Rusnok Efesa, dimagos jeni erek mar onggga nabi-nabi runggu rot gij Mar

Efeyi Ebsi sis fob. Tina mar okum eteb emah keingg osnok egens koma onggga odou ekikif jeska Didif onggga Rusnok Efesa. Onggga tenten bera, oufamofa ekirsa erek ofa efen mosu onojuj rot ofa sis fob guru. Jeska ebeibeyaif ofa emesma mar okum eteb rot mar onggga ofa omotunggom si."

²² Askesi rua rint maat ros, beda Yesus eita roti ofog egens noba oisa oufamofa gu Allah rot. Beda Ofa etka roti insa koma noba ekeba dogdog gu efen ruforoker. Beda Ofa agot gu rua oida, "Iwa ita roti kef. Jeska roti kef bera erek dedin difaga onggga dimaha gu rusnok onggga rufogog nou iwa."

²³ Beda Ofa eita mok osku rot anggur efei noba ois oufamofa gu Allah rot. Beda Ofa eita mok osku egens koma gu rua jeskaseda orofosutut osnok egens egens ej anggur efei morototuma jera Ofa.

²⁴ Beda Ofa agot gu rua oida, "Anggur efei onggga angh gij mok osku kef bera erek dedin dugufu onggga emeya nou rusnok rufoukou. Noba koma orocunc rot mona efeinah onggga Allah anggen eimofoj rot sis fob jeskaseda omoskotu rusnok jeska rerin mar onggga oska.

²⁵ Onggga tenten bera, Didif dinej anggur efei deika guru onjoros mona onggga efeinah insa koma. Gij mona insa koma bera Allah omofoka ereij keingg rusnok rot owesa efek. Noba gij mona insa koma bera dimej anggur efei onggga erek efeinah deika."

²⁶ Nou onggga rua ruf medemer morototuma oisa fob, beda rua rija jah memaga ofos egens onggga ofoka Zaitun Efeda.

²⁷ Beda Yesus agot gu efen ruforoker oida, "Didif dijginaga rot oida gij mona onggga rusnok onggga rufogog rutunggom mar onggga oska skoita Didif,

beda iwa nomnaga imaha Didif jah fogora imoku jeska. Jeska nabi-nabi runggu gij Mar Efeyi Ebsi rot mar onnga Allah anggot rot sis fob osok gij mona insa koma. Rua runggu oida, 'Didif duitij rot oida rusnok ragob gembala egens onnga ont joug efen domba-domba. Beda efen domba-domba insa koma riberbera suma suma.'

²⁸Tina gij mona onnga Didif didebecki jeska danggos fob, beda Didif dumokag rot iwa noba dumorodosu iwa gij monuh Galilea."

²⁹Beda Petrus agot gu Yesus oida, "Erek bebin ruforoker kef nomnaga ruku, tina didif bera dunoku jeska Bua erek koma jinaga guru."

³⁰Beda Yesus agot gu ofa oida, "Petrus, gij motu insa kef bera nou onnga mongkukar orna onoga rot ofosma jueka enesi, beda bua bisinsa bumorot keingging gu rusnok rot ofosma juomu oida bua binejginaga rot Didif guru."

³¹Tina Petrus oroun gu Yesus rot ahais oida, "Akeina, erek rusnok ragob didif morototuma jera Bua, beda didif dunorot keingging oida dinejginaga rot Bua erek koma jinaga guru." Noba ruforoker onnga enjgineg nomnaga bera ragot mar erek koma tein.

³²Erek koma beda, Yesus jera efen ruforoker rija jah mekeni egens onnga ofoka Getsemani. Mekeni insa koma bera angh degini memaga Ofos Zaitun Efeda. Beda Ofa agot gu efen ruforoker oida, "Askesi Didif dum diteij gu Allah ros beda iwa iker jah sif."

³³Beda Ofa oroun Petrus ni, Yakobus ni, jera Yohanes morototuma jera Ofa. Gij mona insa koma bera Ofa odou efeneinei noba odou okum eteb tein rot mar onnga emeita efera okora eteb gu Ofa.

³⁴ Beda Ofa agot gu ruforoka rugomu insa koma oida, "Dudou okum eteb doska onjoros erek dimagos rot ojgomu. Jefeda iwa iker jera Didif jah sif noba inohnoha jeska Didif guru."

³⁵ Ofa ecira oskiyai deika beda odou orohu mebi. Beda Ofa om eiteij gu Allah jeskaseda erek Allah oitij rot beda mar okum koma bera enah keingg Ofa guru.

³⁶ Ofa om eiteij oida, "Akeina, Bua bebin owesa efek jeskaseda butunggom mar meidu onggga Bua budou os rot ojgomu. Jefeda bita mar okum kef onggga dimeita difera okora rot jeska Didif ojgomu. Noba Bua bunotunggom mar onggga Didif disinsa dudou os rot guru. Tina Bua butunggom mar jeni Akeina bisinsa budou ejjinaga rot ojgomu."

³⁷ Beda Yesus oksons skoita efen ruforoker rugomu insa koma, tina rua rah ahaingkongka ojgomu fob. Beda Ofa agot gu Petrus onggga ofoka Simon tein oida, "Simon, bua binahca erek koma guru. Erek bineker jera Didif rot ai juens ojgomu tein gurei."

³⁸ Beda Ofa agot gu ruforoker rugomu insa koma oida, "Iwa inahca guru, tina yum iteij gu Allah ojgomu jeskaseda inesiri gu mar onggga ereneni iwa guru. Erek iwa idou os ita mar onggga Didif danggot ainsa kef, tina yeyin owesa efek bera enadaij rot guru."

³⁹ Beda Yesus ejeker gu esinsa noba om eiteij gu Allah juens deika osok gij mar onggga Ofa om eiteij rot insa koma.

⁴⁰ Nou onggga Ofa ongksns skoita efen ruforoker insa koma deika beda Ofa ek, tina rua rahca ahaingkongka deika jeska rufonskos eteb. Rua rusowu deika tina rua riker toumou ojgomu jeska mojen rua rot.

⁴¹ Beda Yesus eja noba om eiteij gu Allah juens deika. Tina nou onggga Ofa ongksons skoita rua deika, beda Ofa ek, tina rua rahca ahaingkongka deika. Beda Ofa agot gu rua oida, "Teinefa fogora iwa inahca erek koma ros. Iwa idebecki ojgomu. Jeska mona onggga Allah oncunc nou Didif bera enesaga fob jeskaseda Didif dita difera okora. Iwa ik, jeska ai juens beda osnok egens onggga odou ekikif jeska Didif, Rusnok Efesa, bera emaha Didif gu rusnok onggga rufogog.

⁴² Jefeda iwa idebecki ebeirens! Jeska osnok egens insa koma bera enesaga fob."

⁴³ Sis fob Yudas Iskariot bera erek oforoka egens jeska Yesus efen ruforoker rufok setka kungkob erfeka insa koma. Ofa agot gu rusnok onggga rimagei Yesus rot oida, "Osnok egens onggga didif dunsu, ofa bera onggga iwa yagei. Noba iwa yurka yeyin meiteb tein fogora irohru Ofa skoita ebirfager imam-imam." Jefeda askesi Yesus agot mar insa koma gu efen ruforoker ros, beda Yudas enesaga jah suma fob. Noba rusnok rufoukou onggga rurka rerin meiteb jera moskur bera rin jah suma morototuma jera ofa. Ebirfager imam-imam Yahudi jera Guru-Guru agama jera ebirfager rusnok Yahudi bera onggga rubk rusnok insa koma morototuma jera Yudas.

⁴⁴ (14:43)

⁴⁵ Nou onggga Yudas ensaga jah suma fob, beda ofa ecira aharuka skoita Yesus noba agot gu Ofa oida, "Akeina Guru." Beda ofa onsa Yesus omnu.

⁴⁶ Jefeda rusnok rufoukou insa koma ragei Yesus rot ahais ojgomu.

⁴⁷ Beda Yesus efen oforoka egens onggga ont desi Ofa bera eita efen meiteb noba agob osnok egens

ongga omfij ebirfager imam-imam Yahudi fogora eris efen osu enama jeska.

⁴⁸ Beda Yesus agot gu rusnok insa koma oida, "Teinefa fogora iwa yurka yeyin meiteb jera moskur jeskaseda iragei Didif erek komo! Jeska Didif bera dinerek osnok egens onggga ofogog guru.

⁴⁹ Gij mona ofoukou bera Didif duftu mar gu rusnok gij momas onggga angh rejrej Mod Allah, tina iwa inagei Didif jah suma guri. Tina mar onggga iwa intunggom ainsa kef bera jeskaseda mar onggga nabi-nabi runggu gij Mar Efeyi Ebsi osok gij Didif sis fob bera emah gij efera ojgomu."

⁵⁰ Beda Yesus efen ruforoker nomnaga rimaha Ofa jah fogora ruku jeska.

⁵¹ Gij mona insa koma tein bera oforoka efes egens ororu Yesus gu ejmeg. Ofa ergi meifeti onggga erek efen meisoufa ojgomu. Beda rusnok insa koma ragei ofa rot meifeti tein, tina meifeti insa koma esiri jah fogora ofa esa etma rotir noba oku jeska rua rot ojgubaga ojgomu.

⁵² (14:51)

⁵³ Erek koma beda rusnok insa koma ruroun Yesus gu mod onggga ebirfaga imam-imam Yahudi egens onggga ofoka aksa eteb engker gij. Noba ebirfager imam-imam Yahudi ni, ebirfager rusnok Yahudi ni, jera Guru-Guru agama ni, rumohoturuma gij mod egens insa koma.

⁵⁴ Petrus tein otoij Yesus erek ai yes. Beda ofa oira gij momas onggga angh rejrej mod insa koma. Beda ofa ot doida mah morototuma jera tentarer onggga runt joug mod insa koma jeskaseda efa etma nou mah.

⁵⁵ Ebirfager imam-imam Yahudi jera ebirfager Yahudi rineya tein ruhca rusnok onnga rimagot rot oida rua rik Yesus otunggom mar onnga oska sis fob fogora ebirfager koma rimagob Yesus rot. Tina rua rinek osnok egens egema tein onnga agot mar insa koma rot koisoisa jinaga guru.

⁵⁶ Jeska rusnok rufoukou ragot rourou oida rua rik Yesus otunggom mar onnga oska sis fob. Tina mar onnga rua ranggot rot insa koma bera erek toga jeska mar onnga rusnok enjineg ranggot rot Yesus. Jefeda koma bera orocunc rot oida rua nomnaga rucuwei mar ojgomu.

⁵⁷ Rusnok rineya onnga rucuwei mar ragot oida, "Sis fob memef meg Yesus agot oida, 'Gij mona orgomu beda Didif dumohoda Mod Allah kef onnga rusnok ri fob. Beda gj mona orgomu deika bera Didif dimei Mod Allah egens koma deika onnga rusnok rinei jinaga guru.' "

⁵⁸ (14:57)

⁵⁹ Tina mar onnga rusnok insa koma ranggot bera erek toga jeska mar onnga rusnok enjineg ranggot rot osok gj mar insa koma.

⁶⁰ Beda ebirfaga imam-imam Yahudi egens onnga ofoka aksa eteb ojet jah rusnok rudou noba agot gu Yesus rot odou ousaha oida, "Teinefa fogora Bua bunoroun mar rot bisinsa gurei? Jeska rusnok insa kef bera ranggot rot mar onnga okum osok gj Bua ojgomuja."

⁶¹ Yesus onotunggom mar onnga oska egema tein guru, tina Ofa onoroun mar sons gu rua insa koma guru. Ofa eker toumou ojgomu. Beda ebirfaga egens koma ejeka gu Yesus juens deika oida, "Bua bera

Kristus onnga Allah, onnga ofoka aksa eteb, ejeka erek efen efesa ei era gurei?"

⁶² Beda Yesus agot gu Ofa oida, "Didif bera Kristus. Noba bua bimek Didif, Rusnok Efesa, diker rot owesa efek desi Allah onnga efen owesa efek nomnaga. Noba bua bimek Didif dumojuj en jeska mebaga gij mocgoj ofog tein si."

⁶³ Nou onnga ebirfaga egens koma eg Yesus agot mar erek koma fob, beda ofa ekris efen meifeti onnga ergi jeni rerin erebent agama Yahudi. Beda ebirfaga imam imam egens insa koma agot gu ebirfager rineya jah suma oida, "Minejeka gu rusnok enjgineg rot Ofa deika guru, jeska iwa ig Ofa agot oida Ofa bera erek egens jera Allah. Noba ororu mifmin hukum agama koma bera oska eteb! Jefeda iwa isujohu erek teinefa rot mar insa koma?" Jefeda ebirfager koma ruga ojga rot oida Ofa agos rot mar onnga Ofa anggot insa koma ojgomu.

⁶⁴ (14:63)

⁶⁵ Beda rineya jah suma ruskurfi keingg Yesus. Noba rua rira meifeti rirajgej joug Yesus eiteij jeskaseda Ofa enek mar guru. Beda rua rubu Ofa fogora rirahaisomu rot Ofa oida, "Bua bera erek nabi egens ei, jefeda bagot gu memef rot oida idu bera onnga onobu Bua ainsa kef!" Beda rua onnga runt joug Mod Allah rikris Ofa jeska noba rubu Ofa rot ahais.

⁶⁶ Erek koma beda askesi Petrus engker gu momas onnga angh rejrej mod egens insa koma, beda ojaga egens onnga omfij ebirfaga imam-imam Yahudi ojot doida Petrus.

⁶⁷ Nou onnga ofa ek Petrus ot doida mah beda ofa orumba gij ofa osum noba agot oida, "Bua tein

bera erek osnok egens onnga ororu Yesus insa koma onnga ojga jeska kota Nazaret!"

⁶⁸ Beda Petrus oroun oida, "Didif dinejginaga rot Ofa guru, noba dudou enebriyi gij rot mar onnga bua banggot insa kef tein guru." Beda ofa eja gu montoj momas koma. (Ainsa koma tein mongkukar orna egens oga fob.)

⁶⁹ Nou onnga ojaga egens insa koma ek Petrus ot doida montoj momas, beda ofa agot gu rusnok jah suma oida, "Isok egens kef bera erek osnok egens jeska rua onnga rururu Yesus onnga ojga jeska kota Nazaret!"

⁷⁰ Beda Petrus agot juens deika oida, "Koma bera tenten guru!" Dektek deika guru, beda rusnok onnga rut doida Petrus jah suma ragot gu ofa oida, "Tenten, bua bera erek osnok egens onnga ororu Yesus insa koma, jeska bebin buga bera erek rusnok onnga ringker gij Yesus efen monuh Galilea."

⁷¹ Beda Petrus agot rot ahais gu rua oida, "Didif dinejginaga rot Yesus koma guru! Noba erek didif ducuwei mar gu iwa rot mar insa koma, beda didif dui gu Allah jeskaseda Ofa ofra mar okum eteb keingg didif rot ojgomu!"

⁷² Ainsa koma tein mongkukar orna oga ofosma juens deika. Beda Petrus odou ah keingg rot mar onnga Yesus anggot gu ofa rot sis fob oida, "Erek mongkukar onoga rot ofosma egeka enesi, beda bua bumorot keingging rot ofosma orgomu oida bua binejginaga rot Didif guru." Nou onnga Petrus ofos eciyi oida ofa eita mar koma jeni erek Yesus anggot rot sis fob, beda ofa ebisa eteb rot ojgomu.

15 ¹ Gij rahah tentena beda ebirfager imam-imam Yahudi ni, ebirfager rusnok Yahudi ni,

Guru-Guru agama ni, jera imam-imam enjgineg tein onnga rufoka aksa ni rumohoturuma jeskaseda ruga ojga rot mar meidu onnga rua rumotunggom skoita Yesus. Jefeda rua rirakid Yesus etma, beda ruroun Ofa skoita Pilatus onnga erek Gubernur nou monuh Yudea koma.

² Beda Pilatus ejeka gu Yesus oida, "Bua bera erek raja onnga ofoka ereij keingg rusnok Yahudi ei era gurei?" Beda Yesus agot gu ofa oida, "Didif bera raja erek bua banggot rot."

³ Beda ebirfager imam-imam Yahudi ragot oida Yesus bera otunggom mar onnga oska ofoukou.

⁴ Jefeda Pilatus ejeka gu Ofa deika oida, "Bua binagot mar rot bisinsa gurei? Bua big rot mar onnga oska ofoukou onnga imam-imam kef ranggot osok gij bua fob."

⁵ Tina Yesus onoroun mar sons rot guru. Jefeda Gubernur Pilatus odou ousaha rot koma ojgomu.

⁶ Gij orofosut mona onnga rusnok Yahudi ruina maat nou mona onnga Paskah bera Pilatus osuwa osnok egens onnga rusnok Yahudi rirejgei ofa rot jeska mod oskusk.

⁷ Sis fob tentarer raha osnok egens onnga ofoka Barsabas jera rusnok enjgineg gij mod oskusk. Rua rutunggom mar erek koma jeska Barsabas jera efen rusnok ruis mosuruk ofoka skoita raja Kaisar onnga rufoka ereij keingg monuh Yudea. Noba rua tein ragob rusnok enjgineg.

⁸ Erek koma jefeda rusnok Yahudi rufoukou rin skoita Pilatus noba rirejgei ofa jeskaseda ofa osuwa osnok egens jeska mod oskusk erek giskini.

⁹ Jefeda Pilatus agot gu rua oida, "Didif dumosuwa osnok egens insa koma onnga agot oida Ofa bera raja Yahudi skoita iwa."

¹⁰ Pilatus agot erek koma jeska ofa ejginaga rot oida ebirfager imam-imam Yahudi onnga ranggei Yesus bera rudou ejisei rot Ofa.

¹¹ Tina ebirfager imam-imam insa koma rusos rusnok rufoukou jah suma jeskaseda rua ruis gu Pilatus rot oida ofa osuwa Barsabas ojgomu.

¹² Beda Pilatus agot oida, "Erek didif dusuwa Barsabas beda didif dutunggom mar meidu rot osnok egens kef onnga iwa injeka erek raja onnga ofoka ereij keingg rusnok Yahudi?"

¹³ Tina rua ruis gu ofa oida, "Butob Ofa tumu mega salib ojgomu!"

¹⁴ Beda Pilatus agot gu rua oida, "Memef motob Ofa tumu mega salib rot meidu? Ofa eita mar onnga oska erek meidu?" Tina rua ruis rot ruga eteb ekirsa oida, "Butob Ofa tumu mega salib ojgomu!"

¹⁵ Pilatus odou os otunggom mar onnga eita rusnok rufoukou insa koma rudou eskeira rot, jefeda ofa osuwa Barsabas jeska mod oskusk gu rua. Beda ofa aha Yesus gu efen tentarer jeskaseda rangha Ofa fogora rutob Ofa tumu mega salib.

¹⁶ Erek koma beda tentarer insa koma ruroun Yesus gu momas onnga angh gu mod onnga Gubernur Pilatus engker gij. Beda rua ruhoturu tentarer rineya jah suma tein.

¹⁷ Beda rua raha meifeti onnga erek raja efen tumu Yesus. Beda rua rira marfeb egens onnga efen ofogog doska fogora rirajgej Yesus ebirfaga erek rirahaisomu rot Ofa.

¹⁸ Rua rirahaisomu rot Ofa erek koma fogora ruis oida, "Oufamofa eteb gu Bua onnga bufoka ereij keingg rusnok Yahudi erek raja."

¹⁹ Noba rua rira moskur ru robu Ofa gu ebirfaga noba ruskurfi keingg Ofa tein. Beda rua ris rukeibi gu mebi noba rugif gu Ofa erek rirahaisomu rot oida Ofa erek raja.

²⁰ Nou onnga rua rutunggom mar erek insa koma oisa fob, beda rua rikris meifeti onnga ongnoska insa koma jeska Ofa. Beda rua rita Ofa efen meifeti sons noba ruohrus Ofa jeska kota koma jeskaseda rutob Ofa tumu mega salib.

²¹ Askesi rua ruroun Yesus jeskaseda rutob Ofa tumu mega salib, beda rua ruodosu osnok egens onnga ofoka Simon gu moroju. Ofa bera Alexandar jera Rufus gegam meka onnga ojga jeska kota Kirene. Gij mona insa koma bera ofa oksans en jah kota Yerusalem jeska monuh enjgineg. Nou onnga tentarer rik ofa beda rua riradgodu ofa jeskaseda ofa orka mega salib onnga ai juens runtob Yesus tumu.

²² Tentarer insa koma ruroun Yesus gu monuh egens onnga ofoka, "Golgota."

²³ Beda rua rita anggur efei onnga rugun ariawun onnga ofoka mur gij gu Ofa, tina Ofa enej guru.

²⁴ Beda rua rutob Ofa tumu mega salib. Nou onnga koma oisa fob beda rua ruku mofka jeskaseda orocunc rot idu onnga emesma Yesus efen meisoufa. Beda rua rikeba Yesus efen meisoufa erek insa koma dogdog moguma.

²⁵ Rua runtob Ofa tumu mega salib gij rahah erek aras cinja tohkuru.

²⁶ Beda rua rugu mar tumu mega salib insa koma jah skida Yesus ebirfaga. Mar onnga rua runngu bera osok gij mar onnga runtob Ofa rot erek kef: ""

²⁷ Noba rua tein runtob gosnok gegeka onnga goukoreka mar morototuma jera Yesus jah suma. Rua runtob gegema jah Ofa ognosk noba gegema jah Ofa egris.

²⁸ ((Jefeda oisouska mar koma bera mar onnga runngu gij Mar Efeyi Ebsi sis fob angh gij efera fob. Jeska sis eteb fob nabi-nabi runngu mar rot Yesus oida rusnok rusujohu rot oida Ofa tein bera erek rua onnga rufogog.))

²⁹ Rusnok onnga rirabj jah suma rik Yesus noba ruga oruh Ofa oida, "Sis fob bera Bua bagot rot oida Bua bumohoda Mod Allah onnga eteb doska, noba gij mona orgomu deika beda bimei mod insa koma deika sons si!

³⁰ Erek Bua busujohu rot oida bebin owesa efek eteb erek koma, jefeda bucunc rot erek koma ojgomu fogora busuwa bisinsa jeska mega salib kef ojgomu!"

³¹ Erek koma tein ebirfager imam-imam Yahudi ragot mar onnga oska rot Ofa moguma oida, "Sis fob bera rusnok ragot oida Ofa onskotu rusnok rufoukou jeska rerin mar okum, tina Ofa onskotu esinsa jeska efen mar okum kef guri."

³² Beda rua ragot gu Ofa oida, "Bua bagot oida bua bera Kristus onnga Allah omobk erek raja jeskaseda ofoka ereij keingg mimif onnga Yahudi. Jefeda busuwa bisinsa jeska mega salib kef jeskaseda orocunc rot mar insa koma ojgomu. Beda memef modou omororu Bua si." Noba gosnok gegeka insa koma onnga runtob tumu mega salib desi Ofa tein goga oruh Ofa.

³³ Gij mona insa koma erek mowa ot deis onjoros moworu beda mebaga eja erek motkobah.

³⁴ Beda gij aras insa koma tein Yesus ois rot oga eteb oida, "Eloi, Eloi, lama sabakhtani?" Koma efen ofou oida, "Akeina Allah, teinefo fogora Bua baha Didif igef jah erek kefo?"

³⁵ Erek koma beda rusnok onnga runt doida Yesus rig Ofa agot mar erek insa koma. Jefeda rua ragot oida, "Ofa ois mar gu nabi Elia!"

³⁶ Beda orna egens eja ebeirens jeskasada ejeita anggur efei onnga ekemba. Ofa ec moskur gij anggur efei insa koma noba osk moskur koma rot gu Yesus awesi jeskasada Ofa omna oskiyai. Beda osnok egens enjgineg deika agot oida, "Mimif miker ai juens jeskasada mik oida nabi Elia emen fogora omosuwa Ofa jeska mega salib ei era gurei."

³⁷ Erek koma beda Yesus ois mar rot oga eteb beda agos.

³⁸ Ainsa koma tein meifeti aksa onnga rusnok rimf joug montoj gij Mod Allah efesi bera ebga jeska skida onjoros degini fob.

³⁹ Tentarer efen ebirfaga egens onot jah Yesus odou. Nou onnga ofa eg Yesus ois mar rot oga eteb erek insa koma noba agos beda ofa agot oida, "Osnok egens kef bera Allah efen efesa rot tenten ojgomu."

⁴⁰ Rujager rut ai yes jah suma noba rik mar insa koma. Rineya jeska rua bera Maria jeska kota Magdalena ni, Maria enjgineg onnga Yakobus jera Yoses gegang mosu ni, jera Salome ni.

⁴¹ Sis fob rujager rugomu insa koma rururu Yesus rejrej monuh Galilea jeskasada rufij Ofa rot mar. Noba rujager rufoukou enjgineg tein onnga rururu

Yesus jah kota Yerusalem rut ai yes jah suma noba rik mar insa koma tein.

⁴² Rusnok runtob Yesus tumu mega salib gij mona onnga cinja insa koma. Noba gij mona insa koma tein rusnok Yahudi risejah mar ororu rerin agama erebent jeskaseda rugif gu Allah nou mona onnga cinja erfens.

⁴³ Jefeda nou moworu beda osnok egens onnga ofoka Yusuf onnga ojga jeska kota Aramatea en jah suma. Ofa jeska ebic rusnok Yahudi egens onnga rerin rufoka aksa, noba rusnok rufoukou rugif gu ofa tein. Ofa tein omom odou efesi rot mona onnga Allah omobk raja egens koma onnga omofoka ereij keingg rusnok Yahudi. Ofa oku ofos fogora eja skoita Gubernur Pilatus. Beda ofa erejgei Pilatus jeskaseda erek ofa oitij rot beda Yusuf edaga Yesus efaga jeska mega salib fogora esah gij moku.

⁴⁴ Erek koma beda Pilatus odou ousaha rot oida Yesus agos fob. Jefeda ofa ois gu efen ebirfaga tentarer onnga runtob Yesus tumu mega salib jeskaseda en skoita ofa. Beda Pilatus ejeka gu ofa oida, "Yesus agos tenten fob ei era enesei."

⁴⁵ Nou onnga ebirfaga tentarer egens insa koma agot gu Pilatus oida Yesus bera agos rot tenten fob, beda Pilatus oitij rot mar onnga Yusuf erejgei ofa rot.

⁴⁶ Erek koma jefeda Yusuf orka meifeti jah monuh onnga rusnok runtob Yesus tumu mega salib gij. Beda ofa edaga Yesus efaga jeska mega salib noba era meifeti insa koma orond efen efaga. Beda ofa esah Yesus efaga gij moku onnga erek mamu efesi onnga rusnok runtunggom sis fob. Beda ofa okoja mamu onnga eteb doska keingg jeskaseda orof joug mamu efesi insa koma.

⁴⁷ Maria onggga ojga jeska kota Magdalena jera Maria onggga Yoses efen mosu gek Yusuf esah Yesus efaga gij mamu efesi insa koma tein.

16 ¹ Gij mona cinja erfens erek moworu beda mona onggga Yahudi rugif gu Allah oisa fob. Jefeda Maria jeska kota Magdalena ni, Maria onggga Yakobus efen mosu ni, jera Salome rijengk ariawun onggga efen ensesa jeskaseda ruos Yesus efaga jeni Yahudi erebent.

² Noba gij mona rahah tentena deika, beda rujager insa koma rurka ariawun onggga efen ensesa insa koma jah mamu efesi onggga Yusuf ensah Yesus efaga gij.

³ Askesi rua rincira jah suma, beda rua riflesij moguma oida, "Idu bera omofij mimif jeskaseda mukora mamu onggga eteb koma onggga orof joug moksus rot Yesus?"

⁴ Nou onggga rua rinjesaga jah suma fob, beda rua rik, tina mamu eteb koma bera onof joug mamu efesi deika guru fob. Noba rua rudou ousaha rot jeska mamu koma bera okum eteb doska.

⁵ Beda rua ruira gij moksus insa koma noba rua rik orna egens onggga eker jah ognosk. Ofa ergi meisoufa onggga ebsi komowa. Jefeda rua rudou ousaha rot ofa.

⁶ Beda orna egens insa koma agot gu rua oida, "Iwa idou onousaha rot guru. Iwa yuhca Yesus onggga ojga jeska kota Nazaret, tina Ofa onofogu jah sif deika guru. Jeska rusnok runtob Ofa tumu mega salib fogora agos fob, tina ebeibeyaif bera Ofa efena ebah sons deika fob. Iwa ik, jeska neeka rua raha efen efaga jah sif.

⁷ Tina iwa ija skoita Petrus jera Yesus efen ruforoker enjineg tein, noba yagot gu rua oida Yesus eja okag rot rua gu monuh Galilea fob. Beda rua rimek Ofa jah suma jeni erek Ofa anggot gu rua sis fob tein.

⁸ Jefeda rujager insa koma rufof jeska Yesus odog rot rudou onggga eineina gij noba rimeesa eteb rot tein. Askesi rua rufof jeska, beda rua rinagot mar gu rusnok enjineg enesi, jeska rua rimeesa rot mar onggga rua ringk insa koma."

⁹ Nou mona onggga Sabat oisa fob, beda Yesus efena ebah sons jeska agos. Beda gij mona insa koma Ofa ojocunc esinsa gu Maria onggga ojga jeska kota Magdalena. Sis fob Yesus ekemeji efena ofogog erek rufok cinja erfeka jeska ofa odou efesi.

¹⁰ Nou onggga Maria engk Yesus, beda ofa eja skoita Yesus efen mohujir onggga rudou ousaha noba ribisa ros. Noba ofa efesij gu rua rot teinefa ofa engk Yesus gij mona insa koma.

¹¹ Tina rua rudou onororu rot oida Yesus bera efena ebah sons deika guru. Noba rua ragot sons gu Maria oida, "Ah! Bua binek Ofa rot tenten guru."

¹² Beda Yesus, onggga ebeibeyaif osum eja erek toga fob, bera orogna keingg efen mohuj gegeka askesi goga gecira jah monuh enjineg ros. Beda Ofa ecira morototuma jera goga.

¹³ Noba gij mona onggga goga goksons jah kota Yerusalem, beda goga gefesij gu Yesus efen mohujir rot oida goga gek Ofa jah gu semfag fob. Tina rudou onororu mar onggga goga ganggot rot insa koma tein guru.

¹⁴ Dektek deika guru, beda Yesus orogna keingg efen ruforoker rufok setka kungkob erfens askesi rua rit maat morototuma ros. Beda Ofa etaha joug rua

jeska rudou ombrera ojgomu noba runororu oida Ofa efena ebah sons guru. Yesus etaha joug rua erek koma jeska rua runororu mar onggga rusnok insa koma onggga rik Ofa ranggot rot gu rua guru.

¹⁵ Beda Ofa agot gu rua oida, "Iwa ija gu monuh nomnaga, noba ifesij rot Allah oga onggga oufamofa gu rusnok ebic nomnaga.

¹⁶ Noba erek rusnok ruroru oga onggga oufamofa insa koma noba rita baptis tein, beda Allah omoskotu rua jeska rerin mar onggga oska. Tina erek rusnok runororu oga onggga oufamofa insa koma guru, beda Allah omofra mar okum eteb keingg rua ojgomu.

¹⁷ Beda rusnok onggga rudou ororu oga onggga oufamofa insa koma bera rumotunggom mar onggga onswos eteb. Koma erek, oisouska dufoka bera rua rimekemeji efena ofogog jeska rusnok rudou efesi ni, rua rimefesij mar gij oga onggga risinsa rinejginaga rot efen ofou tein guru ni,

¹⁸ erek magosu womfieda eska rua, era erek rua rij memnei efei, beda maren rua guru noba rua rinagos rot jinaga guru ni, rua rimaha rerin ritma esij rusnok onggga marenir jeskaseda Allah eita eskeira gu rua, beda rusnok insa koma rimeskeira ni."

¹⁹ Nou onggga Yesus anggot mar insa koma gu efen ruforoker oisa fob, beda Allah ofra Ofa jah mebaga. Beda Ofa eker desi Allah fogora esma ofoka onggga aksa eteb tein.

²⁰ Beda Yesus efen ruforoker rija jeska Yerusalem noba riflesij rot oga onggga oufamofa insa koma gu monuh suma suma. Noba askesi rua riflesij rot oga onggga oufamofa insa koma, beda Tuhan ofij rua fogora rua rutunggom mar onggga onswos jah gu rusnok rifelesa jeskaseda orocunc rot gu rusnok

insa koma oida mar onnga rua rimfesij rot bera erek
tenten ojgomu. Ainsoma.

Lukas

1¹ Teofilus onnga budou oufamofa, rusnok rufoukou bera rireni ojgomu jeskaseda rugu keingg osok gij mar nomnaga onnga encira gu mifekesa fob.

² Rua rugu keingg mar kef jeni erek mar onnga rusnok enjineg ringk gu risinsa riteij noba ruftuftu gu rusnok enjineg tein fob. Noba rua ranggot rot mar insa koma gu memef, noba gu rusnok gij monuh ofoukou tein fob.

³ Erek koma noba didif disinsa tein duhca otoij mar insa koma nomnaga erek jeni fob. Jefeda didif dusujohu rot oida onnga oufamofa bera didif dugu keingg koisoisa rot mar insa koma nomnaga jeskaseda bua tein bik fogora budou ebriyi gij tein si.

⁴(1:3)

⁵ Gij mona onnga Herodes erek raja eteb gij monuh Yudea, beda osnok egens onnga erek imam egens onnga ofoka Zakharia bera enofoguma. Ofa efen ofou ebiedi ebic imam-imam Abia. Ofa efen mohona ofoka Elisabet tein onnga efen ofou ebiedi imam-imam.

⁶ Goga gegang geiteij ah onnga oufamofa jeni Allah odou ejginaga rot. Goga gororu mar onnga Tuhan obk jera mar onnga Ofa anggot joug tein rot godou ongakasmos.

⁷ Goga gonok gesa guru, jeska Elisabet ebsei noba ofa ojonokona, noba mahina tein onokona fob.

⁸ Gij mona juens beda ebic imam Abia bera onnga rita mar erek imam egens jah Allah odou gij efen mod nou rusnok Yahudi nomnaga. Beda erek giskini,

rua rucunc imam egens jeska rifekesa jeskaseda oira gij Allah efen mod fogora es mah gij mar onnga efen ensesa skoita Allah. Noba gij mona insa koma rua rucunc oida Zakharia bera onnga omoira gij Allah efen mod efesi ojgomu.

⁹(1:8)

¹⁰Noba askesi ofa es mah gij mar efen ensesa gij mod Allah efesi, beda rusnok Yahudi riker jah mebah noba rum riteij gu Allah.

¹¹Askesi Zakharia onotunggom mar insa koma ros, beda malaikat egens jeska Allah orogna gu ofa noba ot desi mebera jah ognosk.

¹²Nou onnga ofa ek malaikat egens koma beda ofa ofos graga noba emeesa rot.

¹³Tina malaikat egens koma agot gu ofa oida, "Zakharia, bua binemeesa guru! Jeska Allah engg rot mar onnga bua bum biteij rot gu Ofa fob. Jefeda bebin obhona Elisabet omok ebesa orna egens si. Noba gij mona onnga ofa onjuj rot ebesa egens koma, beda bua bijeka efen ofoka Yohanes ojgomu.

¹⁴Mar onnga Yohanes omotunggom bera emereita budou efaga ouka eteb rot si. Noba rusnok enjgineg rufoukou tein rudou emefaga ouka eteb rot ofa si.

¹⁵Ofa omotunggom mar rot ofoka onnga aksa eteb ahah Allah eiteij. Noba ofa enej mofut efei era mar enjgineg tein onnga orotunggom rusnok ribirfaga erebibeij rot guru. Noba gij mona onnga ofa onjuj jeska efen mosu onjoros omorna eteb fob bera Efena Ebsi emah gu ofa rot owesa efek eteb ojgomuja.

¹⁶Ofa omoftufts rusnok onnga Israel, fogora rusnok rufoukou rimekikif jeskaseda rerin mar onnga oska noba ruksons skoita Allah onnga erek rerin Tuhan si.

¹⁷ Ofa emesma owesa efek jeska Allah fogora omoftuftu mar rot ahais erek nabi Elia oftuftu mar sis fob. Ofa omokag rot Tuhan noba Ofa emesejah rusnok ebic egens jeskaseda ruroun Ofa. Jeska oisouska mar onnga Ofa omoftuftu rot bera runa jera rerin risir rudou emeskeira mejerema sons. Noba rusnok onnga rungkoja Allah oga sis fob bera rumororu mar onnga rusnok ruftuftu rot Allah oga onnga erek tenten ojomu."

¹⁸ Beda Zakharia agot gu malaikat egens koma oida, "Didif dunokona fob, noba edohona tein ojonokona ojomu fob, jefeda mar meidu bera omorocunc gu didif rot oida mar nomnaga onnga bua bimfesij rot koma bera emecira rot si ei."

¹⁹ Beda malaikat egens koma oroun gu ofa oida, "Didif dufoka Gabriel. Didif bera onnga dut desi Allah noba dufij Ofa. Allah bera onnga ombk didif skoita bua jeskaseda dagot rot efen oga onnga oufamofa insa kef gu bua.

²⁰ Tina jeska bua bunororu duga rot tenten guru, jefeda enadaj nou bua bifesij mar deika jinaga guru. Bua bah erek koma ojomuja onjoros mona onnga mar insa koma nomnaga encira rot jeni fob. Jeska mar insa koma nomnaga bera emecira rot jeni Allah anggot rot fob si."

²¹ Askesi malaikat egens insa koma enefesij mar gu Zakharia ros, beda rusnok onnga rut joug jah mebah bera rijeka moguma rot Zakharia jeska ofa eker gij Mod Allah efesi erek dektek fob ojomu.

²² Nou onnga ofa orogna jeska Mod Allah fob, beda ofa odou os agot mar gu rua, tina guri. Enadaj nou ofa agot mar jinaga guru. Beda rua rijginaga rot oida ofa ek mar onnga onswos eteb gij mod Allah efesi

fob. Jeska ofa era etma ereni mar jeskaseda efesij mar gu rua tina guru.

²³ Gij mona onnga Zakharia ontunggom mar gij Mod Allah erek oisa fob, beda ofa oksons jah efen mod ojgomu.

²⁴ Noba gij mona egema deika beda efen mohona Elisabet efaga okum rot efen efesa. Beda Elisabet eker gij efen mod efesi nou mesta cinja ojgomuja.

²⁵ Beda ofa agot oida, "Sis fob dunok edesa egens tein guru, jefeda mojenen didif rot ojgomu. Tina ebeibeyaif Allah bera omfij didif fob, jefeda difaga okum rot edesa fob, noba mojenen didif deika guru."

²⁶ Gij mona onnga Elisabet efaga okum rot efesa erek mesta cinja erfens fob, beda Allah obk malaikat Gabriel insa koma deika jah kota Nazaret onnga angh gij monuh Galilea.

²⁷ Ofa obk Gabriel skoita ojowu egens onnga ofoka Maria. Ojowu egens koma oitij rot ah igers jera orna egens onnga ofoka Yusuf fob. Tina Yusuf onoroun ofa enesi. Yusuf koma bera onjuj jeska efen ofou ebiedi raja Daud.

²⁸ Malaikat egens insa koma en skoita Maria noba agot oida, "Maria biteijo! Ongkoska eteb nou bua, jeska Allah onsujohu rot oida Ofa emeita oufamofa eteb gu bua si!"

²⁹ Nou onnga Maria engg rot mar insa koma, beda ofa odou ousaha rot, noba ejeka odou rot mar onnga malaikat egens koma anggot gu ofa fob.

³⁰ Tina malaikat egens koma agot gu ofa oida, "Maria, bua binemeesa guru. Jeska Allah odou eskeira rot bua ojgomu.

³¹ Bua bifaga omokum rot ebesa orna egens noba bimeker rot Ofa si. Noba bua bijeka efen ofoka Yesus ojomu.

³² Ofa emesma owesa efek eteb, noba rusnok rimejeka Ofa erek Allah efen efesa onggga ofoka aksa eteb si. Tuhan Allah omofra Ofa erek raja onggga ofoka eteb morototuma erek efen meimowa raja Daud sis fob.

³³ Ofa omofoka ereij keingg rusnok onggga rufou ebiedi jeska ebic Yakub rot mona onggga ah aibin ojomuja."

³⁴ Tina Maria agot gu malaikat egens koma oida, "Dedin osroj onoroun didif enesi. Jefeda mar insa koma bera emecira erek teinefa, jeska dinahi igers enesi?"

³⁵ Beda malaikat egens koma agot gu ofa oida, "Efena Ebsi emen skoita bua noba emah jera bua fogora Allah efen owesa efek omocohun bua rot si. Jefeda rusnok rimejeka bebin ebesa egens koma oida, 'Allah efen efesa onggga ebsi komowa.'

³⁶ Noba bebin obkora Elisabet onggga ojonokona fob, noba rusnok rijeka ofa ebsei ros. Tina ebeibeyaif ofa efaga okum rot efesa egens gij mesta cinja erfens fob fob.

³⁷ Jeska adaij nou Allah otunggom mar meidu onggga Ofa odou os rot ojomu."

³⁸ Beda Maria oroun oida, "Didif bera dusnok egens onggga dufij Allah ojomuja, jefeda didif duitij rot mar nomnaga onggga bua bimfesij rot ojomu." Beda malaikat egens koma eja jeska ofa.

³⁹ Erek koma beda Maria eja ebeirens jah kota egens gij monuh Yudea onggga ah gu memaga.

⁴⁰ Beda ofa eja jah Zakharia efen mod. Nou onnga Ofa omoira gij mod beda Ofa orodosu Elisabet.

⁴¹ Nou onnga Elisabet eg Maria oga, beda efen efesa onnga ah gij otkonu koma oka rot odou onnga eskseira. Beda ainsa koma tein Elisabet esma owesa efek jeska Efena Ebsi Allah.

⁴² Jefeda ofa ois gu Maria oida, "Bua binsma oufamofa eteb jeska Allah fob! Noba bebin ebesa onnga enah gij butkonu koma bera emesma oufamofa eteb tein si!

⁴³ Tina didif disma oufamofa eteb tein, jeska bua onnga erek dedin Tuhan efen mosu bera en skoita didif fob!

⁴⁴ Nou onnga didif dig buga, beda dedin edesa onnga angh gij dutkonu efesi kef bera oukouka rot odou onnga erirei eteb tein.

⁴⁵ Oufamofa eteb nou bua jeska budou ororu rot tenten oida mar onnga Allah anggot gu bua fob bera emecira gij si!"

⁴⁶ Beda Maria agot oida, "Didif dufra Allah ofoka erek aksa eteb ojgomuja!

⁴⁷ Didif dudou efaga ouka eteb rot Allah onnga omoskotu didif.

⁴⁸ Jeska Ofa odou ah keingg rot didif onnga erek osnok egens onnga ofij Ofa ojgomuja. Ebeibeyaif rusnok nomnaga rimejeka didif erek osnok egens onnga ensma oufamofa eteb jeska Allah fob.

⁴⁹ Jeska Allah, onnga ofoka aksa, bera oncunc efen owesa efek eteb gu didif fob. Ofa efen ofoka onnga ebsi komowa.

⁵⁰ Ofa ocunc odou onnga eriagamaga skoita rusnok nomnaga onnga rimeesa rot Ofa ojgomuja. Koma

rot rusnok nomnaga gij mona deisef jera gij mona kahma tein.

⁵¹ Noba oisouska efen owesa efek bera Ofa ontunggom mar onnga onswos eteb fob. Jeska Ofa ekemeji rusnok nomnaga onnga rufra risinsa rufoka erek aksa noba ridemdemi mar onnga oska erek koma gij rudou efesi.

⁵² Ofa edaga owesa efek jeska rusnok onnga rufoka aksa, noba Ofa ofra rusnok onnga runofoka guru fogora rua risma rufoka onnga aksa tein.

⁵³ Ofa obk rusnok onnga rerin mareibra ofoukou jeska fob, noba eneita mar egema tein gu rua guru. Tina Ofa eita mar onnga ongnoska eteb gu rusnok onnga mosonenir ojgomu.

⁵⁴ Ofa omfij mimif, onnga mirek efen rusnok Israel onnga mufij Ofa ojgomuja. Ofa oncunc efen odou onnga eriagamaga skoita

⁵⁵ Abraham jera rusnok nomnaga onnga runjuj jeska ofa fob. Ofa anggen rot mar insa koma gu mifmin mimower sis eteb fob."

⁵⁶ Maria eker jera Elisabet gij efen mod erek mesta orgomu fob, beda ofa oksons jah efen mod.

⁵⁷ Gij mona onnga adaij fob beda Elisabet ojuj rot efesa orna egens.

⁵⁸ Ofa efen mohujir jera efen ebskir rig rot oida Tuhan eita oufamofa eteb gu Elisabet fogora ofa ok efen efesa egens fob. Jefeda rua nomnaga rudou efaga ouka rot ofa.

⁵⁹ Gij mona onnga eferatefa egens koma efen mona cinja orfomu fob, beda rusnok rin jeskaseda riris efen ofom mareij ofos jeska jeni rerin agama erebent. Rua rudou os rijeka ofa efen ofoka Zakharia morototuma erek meka efen ofoka.

⁶⁰ Tina Elisabet agot oida, "Erek koma Guru. Memef mejeka efen ofoka Yohanes ojgomu."

⁶¹ Tina, rua ragot oida, "Bebin ebskir egema tein rerin rufoka erek koma guru."

⁶² Beda rua rira ritma rireni gu Zakharia oida, "Bua budou os bijeka ebesa kef efen ofoka erek teinefa?"

⁶³ Beda Zakharia ocunc gu rua jeskaseda rita mar nou omogu keingg rot efen ofoka. Beda ofa ogu keingg rot efesa efen ofoka gu rua. Tina rua nomnaga rudou ousaha rot jeska ofa ogu keingg oida, "Ofa efen ofoka Yohanes."

⁶⁴ Beda ainsa koma tein Zakharia agot mar deika sons. Jefeda ofa ois oufamofa eteb gu Allah.

⁶⁵ Efen mohujir nomnaga rudou ousaha eteb rot mar insa koma, noba rusnok rufoukou riflesij rot mar insa koma rejrej monuh Yudea.

⁶⁶ Rusnok nomnaga onnga ringg rot mar insa koma rijeka moguma oida, "Gij mona kahma, beda Zakharia efesa koma emeja erek osnok egens idu? Jeska Allah oncunc oufamofa eteb gu ofa fob."

⁶⁷ Beda Yohanes efen meka Zakharia esma owesa efek jeska Efena Ebsi fogora agot mar jeska Allah. Ofa agot oida,

⁶⁸ "Oufamofa eteb gu Ofa onnga erek rusnok Israel rerin Allah, jeska Ofa en jeskaseda oskotu efen rusnok.

⁶⁹ Ofa omobk osnok egens onnga omoskotu mimif jeska mifmin mar onnga okum. Ofa koma onnga ojuj jeska raja Daud.

⁷⁰ Jeska sis eteb fob Ofa agot oisouska efen nabi-nabi oida,

⁷¹ Ofa omoskotu mimif jeska rusnok onggga rufogog rot mimif jera rusnok nomnaga onggga rudou oska rot mimif.

⁷² Ofa omotunggom mar erek koma jeskaseda ocunc efen odou onggga eriagamaga rot mifmin mimower, noba jeskaseda orocunc rot oida Ofa odou ah keingg rot mar onggga Ofa anggen rot sis ob.

⁷³ Jeska sis fob Ofa anggen rot mar gu mifmin mimowa Abraham.

⁷⁴ Ofa anggen rot oida Ofa omosuwa mimif jeska mifmin mesa onggga ofogog rot mimif fogora mumofij Ofa oisouska mudou onggga enemeesa rot rusnok enjineg jinaga guru.

⁷⁵ Jefeda mimif mufij Ofa oisouska mudou onggga ebsi komowa noba onggga efen mar onggga oska oskiyai tein guru."

⁷⁶ Beda Zakharia agot rot efen efesa Yohanes oida, "Rusnok rimejeka bua erek Allah efen nabi egens onggga efen owesa efek eteb. Jeska bua bumokag rot Tuhan fogora bisejah moroju egens nou Ofa si.

⁷⁷ Beda bua bimefesij mar gu rusnok oida Tuhan omosuna rot rerin mar onggga oska fogora rimesma eiteij ah onggga efeinah si.

⁷⁸ Erek mowa orogna fogora eij aki gu mebif, beda erek koma Ofa onggga en jeska mebaga bera omocunc rot Allah efen odou onggga eriagamaga skoita rusnok nomnaga.

⁷⁹ Beda Ofa efen eisa emesenin noba ejinten rusnok nomnaga onggga ringker gij motkobah. Beda Ofa omocunc moroju egens gu mimif fogora oroun mimif skoita eiteij ah onggga eskeiramera."

⁸⁰ Beda Zakharia efen efesa omorna eteb fob, noba ofa esma owesa efek jeska Efena Ebsi ojgomuja. Ofa

ejeker gu monuh onggwa owowa ojgomuja onjoros ofa onsokeij efen efarur jah gu rusnok Israel rifelesa tein.

2¹ Gij mona onggwa Elisabet onjuj rot efen efesa fob, beda raja Kaisar Agustus oga ojga rot oida rusnok nomnaga ruksons jah rerin rujga jeskasada rugu keingg rufoka erek rufosuit rot rusnok egaho onggwa ringker gij monuh insa koma nomnaga.

² (Rua rafosuit rusnok nomnaga rot sismeni gij mona onggwa Kirenius erek Gubernur nou monuh Siria.)

³ Jefeda rusnok nomnaga ruksons jah rujga onggwa rerin rufou ebiedi jeskasada rugu keingg rufoka jah suma.

⁴ Jefeda Yusuf tein eja jeska kota Nazaret onggwa angh gij monuh Galilea. Beda ofa eja jah kota Betlehem onggwa angh gij monuh Yudea. Ofa eja jah kota Betlehem jeska efen meimowa raja Daud onggwa mosu onjuj rot ofa jah suma sis eteb fob.

⁵ Yusuf eja jah suma noba ugu keingg efen ofoka morototuma jera efen osroj Maria onggwa gomoskotuma gij mona kahma. Tina Maria efaga okum rot efesa fob.

⁶ Gij mona onggwa goga genjesaga jah monuh Betlehem fob, beda Maria otkonu okora rot efesa.

⁷ Beda ofa ojjuj rot efen efesa osumbohka egens onggwa orna. Beda goga gera mahkowu gorond eferatefa egens koma, noba aha ofa gij burwa egens onggwa sapi rint mofombra jeska gij. Rua riker jah suma jeska mod enjgineg nomnaga bera ebera joug fob.

⁸Gij motu insa koma bera gembala-gembala rut joug rerin domba-domba gu mektah egens onnga angh rejrej kota Betlehem insa koma.

⁹Beda ainsa koma tein malaikat egens jeska Tuhan Allah orogna keingg rua jah suma. Noba Tuhan efen efesa eisa eteb gij riteij, jefeda rua rimeesa eteb rot.

¹⁰Tina malaikat egens koma agot gu rua oida, "Iwa inemeesa guru. Didif din jeskaseda dagot rot oga onnga oufamofa nou iwa. Beda iwa jera rusnok enjineg rufoukou tein idou emefaga ouka eteb rot si.

¹¹Gij mona deisef gu monuh onnga imowa raja Daud efen sis fob bera, ojaga egens onjuj rot efesa orna egens. Ofa bera omoskotu iwa jeska yeyin mar onnga okum si. Ofa bera yeyin Tuhan Kristus onnga en skoita iwa fob.

¹²Mar egens onnga imorocunc rot Ofa gu iwa bera erek kef: Iwa ija noba imek eferatefa egens onnga rusnok rira mahkowu rurond ofa. Noba ofa ahca gij burwa egens onnga sapi rint mofombra jeska gij."

¹³Beda ainsa koma tein malaikat-malaikat riskembemba ruroгна jah suma tein. Beda rua nomnaga risitit gu Allah oida,

¹⁴"Mimif nomnaga muis oufamofa eteb gu Allah onnga engker gu mebaga rot efen ofoka onnga aksa eteb! Noba mimif muis eskeiramera eteb nou rusnok nomnaga onnga ringker gu mebif, jeska Ofa oncunc efen odou onnga oufamofa rot rua fob!"

¹⁵Nou onnga malaikat-malaikat insa koma ruksons jah mebaga fob, beda gembala-gembala insa koma ragot moguma oida, "Mimif mija jah kota Betlehem jeskaseda miajga mar onnga encira jah suma erek malaikat egens koma anggot gu mimif fob ojgomu."

¹⁶ Jefeda rua rija ebeirens jah suma noba rijesaga keingg Maria gonu Yusuf jera gegan eferatefa egens koma onggahca gij burwa efesi egens.

¹⁷ Nou onggahca ringk eferatefa egens koma fob, beda rua riflesij gu rusnok enjgineg rot mar insa koma onggahca malaikat egens anggot gu rua osok gij eferatefa egens koma fob.

¹⁸ Rusnok onggahca rig rot mar insa koma bera rudou ousaha eteb rot.

¹⁹ Tina nou onggahca Maria engg rot mar insa koma fob, beda ofa edemi mar koma gij efen odou efesi fogora osujohu rot ojgomu.

²⁰ Beda gembala-gembala insa koma ruksons noba riflesij rot oida Allah ontunggom mar onggahca oufamofa eteb fob. Rua riflesij rot mar onggahca ringg gu rusu jera mar onggahca ringk gu riteij tein. Mar onggahca riflesij insa koma bera ah jeni erek malaikat egens anggot gu rua rot sismeni fob.

²¹ Gij mona onggahca Maria efesa efen mona cinja orfomu fob, beda osnok egens eris eferatefa egens koma efen ofom mareij ofos jeska jeni rerin agama erebent anggot rot. Beda rua rijeka Ofa efen ofoka Yesus jeni erek malaikat anggot rot gu Maria sis mona onggahca Ofa efaga onokum rot efesa koma enesi.

²² Gij mona onggahca Maria efesa efen mona setka tohkuru fob, beda goga gontunggom mar nomnaga onggahca hukum Musa anggot rot nou gegan egesa egens koma. Jefeda goga gorka Ofa jah kota Yerusalem jeskasada gocunc Ofa gu Allah jeni agama erebent anggot rot tein.

²³ (Jeska runggu koisoisa gij Hukum Allah rot oida, "Orofosut eferatefa orna onggahca osumbohka bera

icunc ofa nou Allah erek osnok egens onnga omofij Allah si.")

²⁴ Beda rua ringk mem monggeta mos efaga eriska jeskaseda rita mar insa koma erek mar onnga rurougif gu Allah tein. Mar insa koma nomnaga jeni hukum Allah anggot rot sis fob.

²⁵ Gij mona insa koma bera osnok egens onnga ofoka Simeon eker gij kota Yerusalem. Ofa bera osnok egens onnga ororu Allah oga rot tenten ojomuja. Noba ofa onotunggom mar onnga oska egema tein guru. Ofa tein omom odou nou mona onnga Kristus emen jeskaseda ofij efen rusnok Israel. Noba Efena Ebsi Allah bera eker desi ofa.

²⁶ Sis fob Efena Ebsi oncunc gu Ofa gij odou efesi fob oida ofa emek Kristus egens koma onnga Tuhan Allah omobk si, fogora ofa emagos ojomu.

²⁷ Erek koma beda Efena Ebsi ocunc gu ofa gij odou efesi jeskaseda ofa oira gij momas onnga angh rejrej Mod Allah. Beda ainsa koma tein Yusuf jera Maria gorka gegan gesa egens koma skoita ofa jeskaseda ofa otunggom mar jeni agama erebent anggot rot.

²⁸ Beda Simeon ofra oforoka egens koma noba agei jera odou. Beda ofa esitit gu Tuhan Allah oida,

²⁹ "Tuhan onnga butunggom mar jeni budou ejginaga rot. Ebeibeyaif didif dik Ofa onnga Bua banggen rot oida didif dimek si fob. Jefeda didif dimagos jera dudou onnga eskeiramera eteb si tein.

³⁰ Jeska Didif dik Ofa koma onnga omosuwa mimif jeska mifmin mar okum gu disinsa diteij fob.

³¹ Ofa bera onnga Bua binsejah jeskaseda osuwa rusnok nomnaga jeska rerin mar okum si.

³² Ofa bera erek eisa onnga orocunc moroju onnga tenten nou rusnok onnga Yahudi guru. Noba bebin

rusnok Israel nomnaga rumofra efen ofoka erek aksa eteb tein."

³³ Yesus meka jera mosu godou ousaha eteb rot mar onnga Simeon anggot insa koma rot gegan gesa.

³⁴ Beda Simeon ois gu Allah jeskaseda Ofa eita oufamofa eteb gu goga tein. Beda ofa agot gu Maria oida, "Oisouska mar onnga oforoka egens kef omotunggom gij mona kahma bera rusnok rineya rimesiri rot rerin mar onnga oska, noba rineya bera rimesma oufamofa eteb jeska Allah tein si. Ofa omocunc rot mar onnga oufamofa eteb, tina rusnok rineya tein rimeretei rot Ofa si.

³⁵ Jefeda mar onnga rusnok nomnaga ridemдеми gij rudou efesi bera emah rot tomnomna si. Noba oisouska mar insa koma tein bera budou omokora eteb fogora bua bimebisa eteb rot si."

³⁶ Gij mona insa koma tein bera nabi ojaga egens onnga ojonokona fob enofoguma. Ofa efen ofoka Hana onnga Fanuel efen efesa. Ofa onjuj jeska efen ofou ebiedi ebic Ayser. Sis fob ofa ah igers gij ari mega ofoj cinja erfeka fob,

³⁷ beda ofa erek ojona eja mesina gij ari mega ofoj setka cinja orfomu noba tohkuru. Ofa eker gu momas onnga angh rejrej Mod Allah ojgomuja. Erek rahah onjoros motu fob bera ofa om eiteij gu Allah jah suma ojgomuja.

³⁸ Gij mona insa koma tein ofa en skoita Yusuf jera Maria jeskaseda ek gegan gesa egens koma. Beda ofa ois oufamofa eteb gu Allah rot oforoka egens koma noba efesij gu rusnok jah suma osok gij rot teinefa Ofa omoskotu rusnok Yahudi onnga ringker gij kota Yerusalem insa koma jeska rerin mar okum.

³⁹ Gij mona onnga Yusuf jera Maria gontunggom mar nomnaga jeni Hukum Tuhan Allah anggot rot fob, beda goga goksons jah gegan kota Nazaret onnga angh gij monuh Galilea.

⁴⁰ Beda gegan oforoka egens koma ojorna eteb fob. Ofa efen owesa efek noba efen odou onnga ebriyi eteb gij mar tein. Noba Allah efen oufamofa eteb ah gu Ofa ojgomuja.

⁴¹ Gij orofosut tahun egens bera Yesus efen meka jera mosu gecira jah kota Yerusalem nou mona eteb egens onnga ofoka Paskah.

⁴² Gij mona onnga Yesus efen ari mega ofoj setka kungkob erfeka fob, beda rua nomnaga ricira jah kota Yerusalem nou mona eteb egens insa koma erek giskini.

⁴³ Nou onnga mona eteb egens insa koma oisa fob, beda rua nomnaga ruksons jah rerin monuh, tina Yesus eker gij kota Yerusalem ros. Ofa efen meka jera mosu genejginaga rot koma guru.

⁴⁴ Goga gosujohu rot oida Ofa ororu rerin rusnok rufoukou onnga rincira fob, jefeda goga gecira nou mona juens gu gesinsa ojgomu. Gij mona onnga efeinah deika beda goga gohca Ofa gij gohujir rifelesa,

⁴⁵ Tina genek Ofa guru. Jefeda goga goksons jah Yerusalem jeskasada gohca Ofa jah suma.

⁴⁶ Goga gohca Ofa gij mona orgomu ojgomuja, beda goga gek Ofa gij mod onnga rusnok rum riteij gu Allah gij. Ofa eker gu Guru-Guru agama rifelesa. Ofa agosuit mar jeska rua noba ejeka joug gu rua rot mar ofoukou tein.

⁴⁷ Rua nomnaga onggaga ragosuit mar onggaga Yesus emfesij fob bera rudou ousaha eteb rot, jeska Ofa oroun mar gu rua rot odou onggaga efesis eteb.

⁴⁸ Gij mona onggaga Ofa efen meka jera mosu gek Ofa beda godou ousaha rot eteb tein. Ofa efen mosu agot gu Ofa oida, "Didif jera mekeb madou efeneinei eteb rot bua ojgomu. Magef mahca bua rot mona juomu fobo! Teinefo fogora bua buntunggom mar erek koma gu magefo?"

⁴⁹ Beda Yesus oroun gu goga oida, "Goga gohca Didif rot meidu? Erek goga genejginaga rot oida Didif ducosu rot diker gij Akeina efen mod efesi gurei?"

⁵⁰ Tina goga godou enebriyi gij mar onggaga Yesus oroun gu goga insa koma guru.

⁵¹ Beda Ofa eja morototuma jera goga sons jah kota Nazaret, noba Ofa ougif gu goga gegang goga ojgomuja. Tina Ofa efen mosu edemi mar insa koma gij odou efesi jeskasada osujohu rot deika.

⁵² Beda Yesus ojorna eteb deika fob noba ogun odou onggaga efesis ekirsa deika. Noba Tuhan Allah odou eskeira eteb rot Ofa, beda rusnok tein rudou oufamofa rot Ofa.

3¹ Gij mona onggaga raja Kaisar Tiberius ofoka ereij keingg rusnok monuh ofoukou erek tahun setka noba cinja fob, beda Pontius Pilatus ejerek gubernur gij monuh Yudea, noba Herodes ejerek raja egens gij monuh Galilea. Ofa efen mokosa Filipus onggaga erek raja egens gij monuh Iturea jera monuh Trakhonitis. Noba gij mona insa koma tein, Lisaniyas erek raja gij monuh Abilene, noba Hanas jera Kayafas gerak gebirfaga imam-imam Yahudi onggaga gofoka aksa eteb.

²Gij tahun insa koma tein bera Allah obk Yohanes, onnga Zakharia efen efesa, gij mona onnga ofa eker gu monuh onnga owowa.

³Jefeda ofa ecira rejrej monuh onnga angh gu mei Yordan efembra. Ofa oftufu rusnok oida rua rita baptis jeskaseda ruocunc oida rimeesa joug rerin mar onnga oska fob, beda Allah osuna rot rerin mar onnga oska jeska rudou efesi.

⁴Koma jeni erek nabi Yesaya onngu rot sis eteb fob oida, "Osnok egens onnga eker gu mebi monuh onnga owowa bera ois gu rusnok oida, 'Ai juens beda Tuhan emesaga, jefeda iwa itunggom moroju egens onnga edeider nou Ofa.

⁵Iwa iji mebi gij meindoks nomnaga jeskaseda edeider. Iji memaga ofos jera memaga ofog oduma tein jeskaseda enaksa deika guru. Itunggom moroju onnga okeibibi jeskaseda aharuka. Itunggom moroju onnga esiri noba eifef jeskaseda edeider tein.

⁶Rusnok nomnaga rimek Ofa onnga Allah omobk jeskaseda eita eiteij ah onnga efeinah gu rusnok.' "

⁷Rusnok rufoukou doska rin skoita Yohanes jeskaseda ofa eita baptis gu rua. Yohanes agot gu rua oida, "Iwa bera irek rusnok onnga rufogog. Iwa isujohu rot oida iwa imosuwa jeska mar okum onnga emen jeska Allah ei?

⁸Ita mar onnga oufamofa jeskaseda irocunc oida iwa imeesa joug yeyin mar onnga oska fog. Iwa inagot oida, 'Mefmen meimowa Abraham, jefeda Allah eneita okum gu memef guru.' Erek koma guru, jeska adaij nou Allah otunggom Abraham efen meidebeser jeska mamu kef tein.

⁹Erek osnok egens ensejah nou of mega onnga efen efek guru, beda erek koma tein Allah ensejah

nou ofra mar okum keingg rusnok ongg riteij ah oska. Beda Allah emeij rua gij mahmei meren."

¹⁰ Beda rusnok insa koma rijeka gu Yohanes oida, "Erek koma jefeda memef motunggom mar erek meidu?"

¹¹ Beda Yohanes agot gu rua oida, "Idu ongg efen meisoufa erek ofoukou, beda ofa ekeba oknama skoita rua ongg rerin meisoufa guru. Noba idu ongg efen maat ofoukou, beda ekeba maat oknama gu rusnok ongg rerin maat egema guru."

¹² Beda rusnok ongg ruhoturu pajak nou raja Kaisar rin skoita Yohanes jeskaseda ofa eita baptis gu rua tein. Rua rijeka gu ofa oida, "Akeina, teinefa rot memefo? Memef motunggom mar erek meidu?"

¹³ Beda Yohanes agot gu rua oida, "Iwa inohoturu pajak ongg ekirsa jeska meidu ongg raja ois gu iwa rot guru."

¹⁴ Beda tentarer rineya rijeka gu Yohanes oida, "Akeina, teinefa rot memefo. Memef mutunggom mar erek meidu?" Beda Yohanes agot oida, "Iwa ineradgodu rusnok jeskaseda rimeita fifi gu iwa rot mar guru. Noba iwa inocunc rusnok enjgineg rourou erek oska guru. Idou eskeira rot yeyin ifons ojgomu."

¹⁵ Gij mona insa koma rusnok rumom rudou efesi nou mona ongg Kristus emen tein. Noba rua rejekjeka rudou efesi rot oida Yohanes bera Kristus egens koma ongg emen ei era gurei?

¹⁶ Erek koma beda Yohanes agot gu rua nomnaga oida, "Didif dira mei jeskaseda dita baptis gu iwa, tina gij mona ongg kahma bera osnok egens ongg ofoka aksa ekirsa jeska didif emen si. Noba disinsa dufoka aksa enadaij nou dugif gu mebi fogora dusuwa Ofa efen marfeb tumu sepatu jeska okoda

tein jinaga guru. Jeska Ofa bera efen ofoka aksa ekirsa jeska Didif. Ofa bera emeita baptis gu iwa oisouska Efena Ebsi jera mah tein.

¹⁷ Noba erek osnok egens agei menska jeskaseda eij gandum jeska mersa, beda erek koma tein Allah ensejah nou oga ojga rot rusnok rerin rita mar nomnaga fob. Noba erek osnok egens insa koma esah efen gandum onnga oufamofa gij mod, beda erek koma tein Allah ensejah nou oroun efen rusnok onnga runtunggom mar onnga oufamofa jah mebaga. Noba erek osnok egens insa koma eij gandum efen oforu ejeres gij mah, beda erek koma tein Allah emeij rusnok onnga runtunggom mar onnga oska ojgomu gij mah mei meren onnga et rua rot ah aibin ojgomuja."

¹⁸ Erek koma beda Yohanes era mar orocunc enjgineg tein jeskaseda eisisi joug rusnok noba jeskaseda oftufu rua rot Allah oga onnga oufamofa.

¹⁹ Tina raja Herodes ofra mokosa efen mohona noba otunggom mar enjgineg tein onnga ofogog doska. Jefeda Yohanes etaha joug raja Herodes rot efen mar onnga oska insa koma ojgomu.

²⁰ Beda Herodes otunggom mar onnga ofogog ekirsa deika fogora ofa aha Yohanes gij mod oskusk.

²¹ Tina gij mona onnga Yohanes eita baptis gu rusnok ros, beda ofa eita baptis gu Yesus. Noba askesi Yesus om eiteij gu Allah, beda mebaga ohoda

²² noba Efena Ebsi Allah ojuj erek mem monggeta mos beda ah esij Yesus efembra. Beda Allah agot oga jeska mebaga oida, "Bua bera dedin edesa onnga dudou okora eteb rot, noba dudou eskeira eteb rot Bua tein."

²³ Gij mona onnga Yesus efen ari mega ofoj erek tahun setka orgomu fob, beda Ofa osokeij efen efarur. Noba gij mona insa koma rusnok rusujohu oida Yusuf bera Yesus efen efesa. Noba Yusuf efen meka Eli.

²⁴ Eli efen meka Matat, Matat efen meka Lewi, Lewi efen meka Malkhi, Malkhi efen meka Yanai, Yanai efen meka Yusuf.

²⁵ Yusuf efen meka Matica, Matica efen meka Amos, Amos efen meka Nahum, Nahum efen meka Hesli, Hesli efen meka Nagei.

²⁶ Nagei efen meka Maat, Maat efen meka Matica, Matica efen meka Simeij, Simeij efen meka Yosekh, Yosekh efen meka Yoda.

²⁷ Yoda efen meka Yohanan, Yohanan efen meka Resa, Resa efen meka Zerubabel, Zerubabel efen meka Sealtiel, Sealtiel efen meka Neri.

²⁸ Neri efen meka Malkhi, Malkhi efen meka Adi, Adi efen meka Kosam, Kosam efen meka Elmadam, Elmadam efen meka Er.

²⁹ Er efen meka Yesua, Yesua efen meka Eliezer, Eliezer efen meka Yorim, Yorim efen meka Matat, Matat efen meka Lewi.

³⁰ Lewi efen meka Simeon, Simeon efen meka Yehuda, Yehuda efen meka Yusuf, Yusuf efen meka Yonam, Yonam efen meka Elyakim.

³¹ Elyakim efen meka Melea, Melea efen meka Mina, Mina efen meka Matata, Matata efen meka Natan, Natan efen meka Daud.

³² Daud efen meka Isai, Isai efen meka Obed, Obed efen meka Boas, Boas efen meka Salmon, Salmon efen meka Nahason.

³³ Nahason efen meka Aminadab, Aminadab efen meka Amin, Amin efen meka Arni, Arni efen meka Hezron, Hezron efen meka Peres.

³⁴ Peres efen meka Yehuda, Yehuda efen meka Yakub, Yakub efen meka Ishak, Ishak efen meka Abraham, Abraham efen meka Terah, Terah efen meka Nahor.

³⁵ Nahor efen meka Serug, Serug efen meka Rehu, Rehu efen meka Peleg.

³⁶ Peleg efen meka Eber, Eber efen meka Salmon, Salmon efen meka Kenan, Kenan efen meka Arpaksad, Arpaksad efen meka Sem, Sem efen meka Nuh, Nuh efen meka Lamekh.

³⁷ Lamekh efen meka Metusalah, Metusalah efen meka Henokh, Henokh efen meka Yared, Yared efen meka Mahaleleel, Mahaleleel efen meka Kenan, Kenan efen meka Enos.

³⁸ Enos efen meka Set, Set efen meka Adam Adam efen meka Allah.

4 ¹ Gij mona onnga Yesus eja jeska mei Yordan, beda Efena Ebsi eker desi Ofa rot owesa efek eteb. Beda Efena Ebsi Allah oroun Ofa jah monuh onnga owowa onnga rusnok rineker gij guru.

² Nou onnga Yesus ensaga jah suma, beda Bilis ereni Ofa gij mona setka tohkuru ojgomuja. Gij mona insa koma bera Yesus enet maat egema tein guru. Jefeda mosona onk Ofa erek eteb ojgomu fob.

³ Beda Bilis agot gu Ofa oida, "Bua bera Allah efen efesa, jefeda butunggom mamu egens kef erek maat nou bua."

⁴ Beda Yesus agot gu ofa oida, "Runggu gij Mar Efeyi Ebsi rot oida, 'Rusnok rineita riteij ah oisouska maat ojgomu guru.' "

⁵ Beda Bilis oroun Yesus jah monuh egens onnga aksa eteb. Beda ofa ocunc rusnok gij monuh ofoukou jera rerin ebirfager nomnaga gu Yesus.

⁶ Beda ofa agot oida, "Rusnok gij monuh nomnaga jera rerin ebirfager kef nomnaga bera onnga didif dedin. Noba didif dedin owesa efek jeskaseda daha mar insa koma nomnaga skoita osnok egens onnga didif ducunc rot ojgomu.

⁷ Jefeda erek Bua bugif gu didif ojgomu, beda dimeita mar insa kef nomnaga gu Bua si."

⁸ Beda Yesus agot deika oida, "Runggu gij Mar Efeyi Ebsi oida, 'Bugif gu Allah noba bufij Ofa ojgomu.' "

⁹ Beda Bilis oroun Yesus jah kota Yerusalem noba aha Ofa skida mod onnga rusnok rum riteij gu Allah gij ofos onnga aksa eteb. Beda ofa agot gu Yesus oida, "Bua bera Allah efen efesa, jefeda Bua bij bisinsa jeska mod aksa kef ojgomu.

¹⁰ Jeska rungu gij Mar Efeyi Ebsi oida, 'Allah omobk efen malaikat-malaikat jeskaseda rut joug Bua rot iskusk si.

¹¹ Erek koma beda malaikat-malaikat koma rumoskotu Bua fogora baki onojot gij mamu egens tein guru.' "

¹² Beda Yesus agot gu Bilis oida, "Runggu gij Mar Efeyi Ebsi oida, 'Binereni bebin Allah jinaga guru.' "

¹³ Nou onnga Bilis ereni Yesus jera mar egema tein oisa fob, beda ofa eja jeska Yesus noba eker nou mona onnga ongoska deika jeskaseda ereneni Ofa deika ojgomu.

¹⁴ Erek koma beda Yesus oksons jah monuh Galilea. Noba owesa efek eteb jeska Efena Ebsi Allah ah gu Ofa ojgomuja. Erek koma beda rusnok rufoukou

rifesij mar moguma rot Ofa rejrej monuh Galilea insa koma.

¹⁵ Ofa oftufu rusnok gij mod onnga rua rum riteij gu Allah gij, noba rusnok nomnaga koma risitit Ofa.

¹⁶ Erek koma beda Yesus eja jah kota Nazaret tein. Ofa omorna eteb gij kota egens koma. Noba gij mona onnga Sabat beda Ofa eja gu mod onnga rusnok rum riteij gu Allah gij erek giskini. Beda Ofa ot jeskaseda efesij mar jeska Mar Efeyi Ebsi.

¹⁷ Beda rua rita buku nabi Yesaya gu Ofa. Ofa ohoda buku egens koma beda ohca rot mar egens onnga nabi Yesaya onngu rot sis fob erek kef oida,

¹⁸ " 'Efena Ebsi Allah eker desi Didif jeskaseda dagot rot efen oga onnga oufamofa gu rusnok onnga rufojingki. Ofa obk Didif jeskaseda difesij mar gu rusnok onnga ringker gij mod oskusk oida ebeibeyaif rua runsuwa fob. Noba rua onnga riteij ofou bera rik mar fob. Noba rusnok onnga mar okum ah keingg rua bera runsuwa jeska mar insa koma fob.

¹⁹ Noba Ofa obk Didif jeskaseda dagot gu rua oida mona onnga Allah emeita eiteij ah onnga efeinah gu rusnok bera ensaga fob.' "

²⁰ Beda Yesus of joug buku egens insa koma, noba eita buku koma gu osnok egens jah suma. Beda Ofa eker sons gij efen kursi. Rusnok nomnaga gij mod insa koma bera ruhobut Ofa.

²¹ Beda Ofa agot gu rua oida, "Mar insa kef onnga iwa ingg Didif dimfesij gu iwa fob, deisef bera mar koma ah gij efen efera fob."

²² Rua nomnaga rudou oufamofa rot Ofa noba rua rudou ousaha eteb rot teinefa Ofa efesij mar onnga erek ongkoskamoka tein. Beda rua ragot moguma oida, "Tina Ofa kef bera Yusuf efen efesa ojgomu."

²³ Beda Yesus agot gu rua oida, "Didif dijginaga rot fob oida iwa idou os yagot rot mar orocunc egens gu Didif erek kef oida, 'Bua bera erek Dokter, jefeda bita eskeira gu bisinsa ojgomu.' Jeska iwa idou os rot oida Didif ducunc mar onswos jah sif tein morototuma erek mar onswos onnga Didif duncunc rot gij kota Kapernaum fob ojgomu. Jeska iwa idou onororu Didif rot tenten enesi.

²⁴ Tina Didif dimagot rot mar insa kef ojgomu oida, 'Giskini gij mona onnga nabi egens oksons jah efen monuh beda rusnok runoroun ofa deika guru.'

²⁵ Tina, iwa ig rot kef fog, jeska gij mona onnga nabi Elia engker gij Israel ros, beda mos enes gij tahun rara orgomu, noba mosona eteb ongk rusnok. Gij mona insa koma tein rujaga onnga rija mesina rufoukou bera ringker gij monuh Israel tein.

²⁶ Tina Allah onobk nabi Elia skoita rua jeskaseda ofij rua guru. Ofa obk Elia skoita ojaga eja mesina egens onnga eker gij kota Sarfat onnga angh doida Sidon jeskaseda ofij ofa ojgomu.

²⁷ Noba gij mona onnga nabi Elia engker gij Israel bera rusnok rufoukou onnga rufos efera okora eteb runofoguma tein. Tina rua nomnaga rineita eskeira guru. Osnok egens ojgomu onnga ofoka Naaman bera eita eskeira. Noba ofa bera osnok egens jeska rua onnga Siria."

²⁸ Erek koma jefeda rusnok nomnaga onnga ringker gu mod onnga rusnok rum riteij gij insa koma rutkonu oska eteb rot mar onnga Yesus anggot gu rua.

²⁹ Beda rua ridebecki noba rukoja Ofa jah mebah onjoros rinsaga jah gu memaga efebari. Rua rudou os rij Ofa jeska mamu efaga koma.

³⁰ Tina Yesus eretka rusnok riskemba insa koma beda eja jeska fob.

³¹ Erek koma beda Yesus eja jah kota Kapernaum onnga angh gij monuh Galilea. Beda Ofa oftufu rusnok jah suma gij mona onnga Sabat.

³² Rua nomnaga rudou ousaha rot Ofa, jeska Ofa oftufu rua rot owesa efek eteb.

³³ Osnok egens onnga efena ofogog engker gij odou efesi bera eker gij mod egens insa koma. Ofa ois rot oga eteb oida,

³⁴ "Ei, Yesus onnga jeska kota Nazaret! Bua budou os meidu rot memef? Bua bin jeskaseda bufra mar okum keingg memef ei? Didif dijginaga rot Bua fob. Bua bera Ofa onnga ebsi komowa noba onnga Allah ombk jeskaseda agot rot efen oga gu rusnok!"

³⁵ Beda Yesus etaha joug efena ofogog egens koma oida, "Biker toumou ojgomu! Bua burogna jeska osnok egens kef ojgomu!" Beda efena ofogog koma edi osnok egens koma fogora esiri beda orogna jeska osnok egens koma jah rusnok nomnaga rudou. Tina osnok egens koma eneita efera okora guru.

³⁶ Beda rusnok onnga ringg rot mar insa koma rudou ousaha eteb rot. Jefeda rua ragot moguma oida, "Ofa era oga onnga owesa efek fogora eretaha joug efena ofogog insa koma, noba efena ofogog koma ororu efen oga ojgomu!"

³⁷ Erek koma jefeda rusnok riflesij mar moguma osok gij Yesus rejrej monuh insa koma.

³⁸ Erek koma beda Yesus eja jeska mod egens insa koma noba eja jah Simon efen mod. Beda rusnok ragot gu Yesus oida Simon efen meifina ojaga bera maren ofoufem eteb.

³⁹ Jefeda Yesus ejek Simon meifina ojaga onggamaren insa koma. Beda oisouska efen oga bera maren ofoufem insa koma eja jeska ojgomu, beda ainsa koma tein ojaga egens koma eskeira fob. Beda ofa edebecki noba ofij Yesus jera rusnok enjgineg jah suma tein.

⁴⁰ Nou onggamowa ensiri gij fob, beda rusnok onggarerin rua onggamarenir rufoukou bera ruroun rua skoita Yesus. Beda Yesus aha efen etma esij rua fogora eita eskeira gu rua nomnaga.

⁴¹ Rifena ofogog tein ruroгна jeska rusnok rufoukou rudou efesi noba ruis oida, "Bua bera Allah efen efesa!" Tina Yesus etaha joug rua noba obk rua jeskaseda riker toumou ojgomu. Jeska rifena ofogog insa koma rijginaga oida Yesus bera Kristus egens koma onggamen jeskaseda eita eiteij ah onggafeinah gu rusnok.

⁴² Nou rahah tentena beda Yesus eja jeska kota koma noba ejeker gij monuh egens onggawowa gu esinsa. Rusnok rufoukou ruhca Yesus ojgomuja. Nou onggaru ringk Ofa, beda rua rirejgei Ofa jeskaseda Ofa eneja jeska rua guru.

⁴³ Tina Ofa agot gu rua oida, "Didif ducosu rot dijefesij rot Allah oga onggoufamofa noba osok gij rot teinefa Ofa ofoka ereij keingg rusnok gij monuh enjgineg tein. Jeska Allah bera ombk Didif jah mebi jeskaseda difesij rot mar insa koma ojgomu."

⁴⁴ Erek koma jefeda Yesus ejefesij rot Allah oga gij mod rejrej monuh Yudea ojgomu.

5¹ Gij mona juens bera Yesus onot doida meren Genesaret. Rusnok riskemba rimeradgoduma jeskaseda rut doida Ofa fogora rig rot Allah oga.

² Yesus ek meg egeka ot gu meren efembra. Rusnok onnga ruhca mos runsoka jeska meg insa koma fob noba runot rerin jala gu mei.

³ Jefeda Yesus eifef meg egens onnga Simon efen jeskaseda oftufu rusnok riskemba jeska meg egens koma. Beda Ofa obk Simon jeskaseda edei meg koma ai yes jeska meren efembra.

⁴ Nou onnga Yesus oftufu rusnok insa koma oisa fob, beda Ofa agot gu Simon oida, "Buku meg jah mei efen ojgomu, noba iwa isuwa yeyin jala jeskaseda iragei mos."

⁵ Beda Simon oroun oida, "Akeina, gij motu aksa insa koma bera memef mereni rot ahais noba menagei mos egema tein guru. Tina jeska Bua bubk didif erek koma jefeda didif direni juens deika."

⁶ Nou onnga rua rusuwa rerin jala deika fob beda rua ragei mos ofoukou doska, noba rerin jala doida nou ebga rot ojgomu.

⁷ Jefeda rua ruis gu rerin mohujir onnga ringker gij meg egema jeskaseda rin noba rufij rua ruku jala rot mos ofoukou insa koma gij meg efesi. Jefeda meg koma doida nou ojuj gij mei rot.

⁸ Nou onnga Simon ek mar insa koma, beda ofa ougif gu Yesus jah odou noba agot oida, "Tuhan, oufa nou bua bija jeska didif ojgomu, jeska didif bera direk osnok egens onnga efen mar onnga oska ofoukou fob."

⁹ Simon jera efen mohujir insa koma rudou ousaha eteb rot mos ofoukou onnga ranggei fob.

¹⁰ Gij mona insa koma tein Yakobus jera Yohanes onnga Sebedeus efen efeserga onnga gefarur jera Simon tein godou ousaha eteb rot. Beda Yesus agot gu Simon oida, "Binemeesa rot guru, jeska oisouska

mona deisef bera bua bumohoturu rusnok nou Didif ojpgomu."

¹¹ Beda Simon jera efen mohujir ruku meg jah meren efembra, beda rua raha mar insa koma nomnaga jah fogora ruroru Yesus.

¹² Gij mona juens bera Yesus encira jah kota egens. Orna egens onnga ofos efera okora eteb bera eker jah suma. Nou onnga ofa ek Yesus beda ofa esiri gu mebi jah Yesus odou noba erejgei Ofa oida, "Tuan, erek Bua budou os rot beda bita eskeira gu didif ojpgomu."

¹³ Erek koma beda Yesus osk efen etma beda ahtec ofa, noba agot oida, "Didif dudou os dita eskeira gu bua. Jefeda bita eskeira ojpgomu!" Ainsa koma tein osnok egens koma eita eskeira fob.

¹⁴ Beda Yesus agot gu ofa oida, "Bua binagot rot mar insa koma gu rusnok ebireira guru. Tina bua bija teisis skoita imam egens jeskaseda ofa eyajga joug bua fogora agot rot oida bua bita eskeira rot tenten fob. Beda bjeita mar onnga burougif gu Allah jeni Musa anggot rot sis fob jeskaseda rusnok enjgineg rimek fogora rimejginaga rot oida bua bita eskeira rot tenten fob."

¹⁵ Tina rusnok rufoukou rifesij mar moguma rejrej monuh ofoukou rot mar onnga Yesus ontunggom fob. Jefeda rusnok riskemba rin skoita Yesus jeskaseda Ofa eita eskeira gu rua tein.

¹⁶ Nou onnga mar insa koma oisa fob, beda Yesus ejeker gij monuh egens onnga owowa jeskaseda om eiteij gu Allah jah suma.

¹⁷ Gij mona juens bera Yesus oftufu mar gu rusnok. Beda rusnok Yahudi rineya onnga ebic Farisi jera rineya onnga Guru-Guru agama rineker jah suma.

Rua rin jeska kota Yerusalem jera kota-kota onnga angh gij monuh Galilea jera monuh Yudea. Gij mona insa koma bera owesa efek jeska Tuhan ah gu Yesus, jefeda Ofa eita eskeira gu rusnok onnga marenir.

¹⁸ Beda rusnok rineya rin skoita Yesus. Rua rurka osnok egens onnga ofumbohah esij mofka. Rua rudou os raha osnok egens koma jah Yesus odou.

¹⁹ Tina rusnok riskemba ringker rejrej Yesus, noba enadaij nou rua ruiru gij mod efesi jinaga guru. Jefeda rua rusok jah mod osum, noba ritki osnok egens koma jah skida mod mongosum. Beda rua ruhoda mebi efebr onnga runroka mod fogora ritki osnok egens koma degini gij mer efesi jah Yesus odou.

²⁰ Nou onnga Yesus ek oida rusnok insa koma rudou ororu Ofa rot tenten fob, beda Ofa agot gu osnok egens koma onnga ofumbohah oida, "Edohuj, Didif dusuna rot bebin mar onnga oska nomnaga jeska budou efesi fob."

²¹ Beda rua onnga ebic Farisi jera Guru-Guru agama rutkonu oska rot mar onnga Yesus anggot. Jefeda rua ragot moguma oida, "Osnok egens kef bera erek idu fogora ohurmei mar skoita Allah erek komo? Jeska Allah esinsiyai bera onnga osuna rot rusnok rerin mar onnga oska ojgomu. Noba rusnok ebireira bera guru!"

²² Tina Yesus ejginaga rot mar onnga rua runsujohu rot gij rudou efesi fob. Beda Ofa agot oida, "Iwa ijekjeka idou efesi osok gij mar insa koma rot meidu?"

²³ Erek Didif dagot gu osnok egens koma oida, 'Dusuna rot bebin mar onnga oska fob.' Beda koma onocunc rot mar egema tein guru. Tina erek Didif dagot gu ofa oida, 'Bua bidebecki noba bicira

ojgomu,' beda koma omorocunc rot dedin owesa efek si.

²⁴Tina Didif dumocunc gu iwa rot oida Didif, onnga Rusnok Efesa, bera en gu mebif jeskaseda dusuna rot rusnok rerin mar onnga oska." Beda Yesus agot gu osnok egens koma onnga ofumbohah oida, "Bua bidebecki, bufra bebin mofka beda bija jah bebin mod."

²⁵Beda ainsa koma tein, osnok egens koma edebecki ebeirens jah rusnok jah suma rudou, beda eita efen mofka noba eja gu efen mod rot odou onnga esitit gu Allah ojgomuja.

²⁶Rusnok onnga ringk mar insa koma rudou ousaha eteb rot. Beda rua tein risitit gu Allah rot mar insa koma. Rua ragot oida, "Deisef bera mimif mik mar onswos eteb doska!"

²⁷Nou onnga koma oisa fob, beda Yesus orogna jeska mod insa koma beda Ofa ek osnok egens onnga ohoturu pajak eneker gij efen kantor efesi. Osnok egens koma bera efen ofoka Lewi. Beda Yesus agot gu ofa oida, "Bua buroru Didif ojgomu."

²⁸Beda Lewi edebecki noba eja jeska mar insa koma nomnaga noba ororu Yesus.

²⁹Erek koma beda Lewi ohoturu efen mohujir rufoukou gij efen mod jeskaseda rit maat morototuma jera Yesus. Rusnok rufoukou onnga ruhoturu pajak jera rusnok enjgineg tein rit maat morototuma jera goga jah suma.

³⁰Tina rusnok rineya onnga ebic Farisi jera rineya onnga Guru-Guru agama rudou otkonu oska rot. Jefeda rua ruga erahah gu Yesus efen ruforoker oida, "Teinefa fogora Yesus jera iwa onnga Ofa efen ruforoker it maat morototuma jera rusnok onnga

ruhoturu pajak jera rusnok enjgineg tein onggga erek oska erek komo!"

³¹ Beda Yesus oroun gu rua oida, "Rusnok onggga rifaga eskeira bera runois rot dokter guru. Tina dokter en jeskaseda ofij rua onggga marenir ojgomu.

³² Erek koma tein, Didif dinen skoita rusnok onggga rusujohu rot oida rerin rudou onggga ebsi komowa fob guru. Tina Didif din skoita rusnok onggga rijginaga rot oida rerin mar onggga oska fob jeskaseda rua rimeesa joug rerin mar onggga oska insa koma ojgomu."

³³ Beda rusnok ragot gu Yesus oida, "Yohanes efen ruforoker rinet maat gij mona juens guru tina rum riteij gu Allah ojgomu. Noba rua onggga Farisi rerin ruforoker rita mar erek koma tein. Tina gij orofosut mona bera bebin ruforoker rit maat jera rij mei tein ojgomuja. Erek koma rot meidu?"

³⁴ Beda Yesus oroun oida, "Gij mona onggga rusnok rumohoturuma jera osnok orna egens onggga onskotu arja fob, beda rua rit maat morototuma noba rifaga ouka rot tein. Tina gij mona onggga orna egens koma eja jeska rua fob, beda rua rinet maat gij mona juens guru, tina rum riteij ojgomu."

³⁵ (5:34)

³⁶ Beda Yesus agot rot mar orocunc egeka erek kef oida, "Erek rusnok rineb meifeti onggga efeinah jera meifeti onggga efeyei beda koma enadaij guru. Jeska meifeti onggga efeyei koma emegrina meisoufa onggga efeinah insa koma fogora emebga eteb deika. Noba meifeti onggga efeinah koma bera erek toga jeska meifeti onggga ensis tein.

³⁷ Erek koma tein anggur efei onggga efeinah bera runotkinaja gij mesina kambing ofos onggga efeyei guru. Jeska anggur efei onggga efeinah koma emefifij

gij mesina kambing ofos onggga efeyei insa koma. Beda mesina koma emecka rot, noba anggur efei insa koma omotkinaja jeska. Noba mesina onggga efeyei insa koma eja erek oska efekeifa ojgomu.

³⁸ Jefeda anggur efei onggga efeinah bera rutkinaja gij mesina kambing ofos tein onggga efeinah ojgomu.

³⁹ Erek koma tein, rusnok onggga rij anggur efei onggga ensis fob bera rusujohu rot oida koma erek otka. Jefeda rua rukoja rot anggur efei onggga efeinah ojgomu. Rua ragot oida, 'Anggur efei onggga ensis bera oufa ekirsa.' "

6¹ Gij mona onggga Sabat egens bera Yesus jera efen ruforoker ruiru gij mekeni gandum egens. Yesus efen ruforoker rigib gandum efej noba rahsus gu ritma beda rit.

² Erek koma beda rineya onggga ebic Farisi ragot oida, "Teinefa fogora iwa ikirsa rot mifmin hukum agama fogora iwa itunggom mar onggga hukum koma eyahehir joug gij mona onggga Sabat erek komo?"

³ Beda Yesus oroun oida, "Erek iwa inek gij Mar Efeyi Ebsi rot mar onggga Daud ontunggom gij mona onggga mosona onggga ofa jera efen mohujir enesei?"

⁴ Jeska gij mona insa koma ofa oira gij Mod Allah efesi fogora eita roti onggga rusnok rinta erek mar onggga rurougif gu Allah rot. Beda ofa jera efen mohujir rint roti insa koma ojgomu. Tina ororu jeni mifmin agama erebent bera imam-imam rimet roti koma ojgomu."

⁵ Beda Yesus agot deika oida, "Didif, Rusnok Efesa, bera dedin owesa efek jeskaseda dagot rot mar onggga rusnok rutunggom gij mona onggga Sabat."

⁶ Gij mona onggga Sabat egema deika, beda Yesus oira gij mod egens onggga rusnok rum riteij gu Allah

gij jeskaseda oftufu rusnok jah suma. Osnok egens onnga etma jah enama onnga ofumbohah bera onofoguma.

⁷ Rineya onnga ebic Farisi jera Guru-Guru agama rineya ruhobut Yesus jeskaseda rik oida Ofa emeita eskeira gu osnok egens koma gij mona onnga Sabat, era gurei.

⁸ Tina Yesus ejginaga rot mar onnga rua runsujohu gij rudou efesi fob. Jefeda Ofa agot gu osnok egens onnga etma jah enama ofumbohah insa koma oida, "Bua bin noba but jah sif." Beda osnok egens koma edebecki noba ojot desi Yesus.

⁹ Beda Yesus ejeka gu rusnok onnga ringker jah suma oida, "Ororu mifmin hukum agama bera adaj nou mimif mutunggom mar erek meidu gij mona onnga Sabat? Mimif mutunggom mar onnga oska ei, era mimif mutunggom mar onnga oufamofa ei? Adaj nou mimif mita eskeira gu rusnok ei, era mimif mita mar onnga oska gu rusnok ei?"

¹⁰ Beda Yesus eyajga rusnok insa koma nomnaga, noba Ofa agot gu osnok egens insa koma oida, "Bua busk bitma koma." Beda osnok egens koma osk efen etma, noba ainsa koma tein efen etma eskeira fob.

¹¹ Tina rua onnga ebic Farisi jera Guru-Guru agama insa koma rutkonu oska eteb rot Yesus. Jefeda rua rumohoturuma jeskaseda riflesij rot mar okum onnga rimeita gu Ofa ojgomu.

¹² Gij mona juens, beda Yesus osok jah memaga ofos jeskaseda om eiteij gu Allah jah suma. Ofa om eiteij gu Allah rara gij motu insa koma.

¹³ Nou onnga mona ebriyi fob, beda Yesus ohoturu efen rusnok onnga ruroru Ofa fob. Beda Ofa ocunc rusnok rufok setka kungkob erfeka jeska rua

jeskaseda rufij Ofa jeni erek efen ruforoker setka kungkob erfeka. Rua insa koma bera erek

¹⁴ Simon (ongga Yesus ejeka Petrus tein) ni, Andreas onggga Simon mokosa ni, Yakobus ni, Yohanes ni, Filipus ni, Bartolomeus ni,

¹⁵ Matius ni, Tomas ni, Yakobus onggga Alfeus efesa ni, Simon (ongga ruis Patriot) ni,

¹⁶ Yudas onggga Yakobus efesa ni, Yudas Iskariot onggga odou emekikif jeska Yesus gij mona kahma ni, rua insa koma nomnaga.

¹⁷ Erek koma beda Yesus ojuj jeska memaga ofos insa koma morototuma jera efen ruforoker. Beda Ofa ojut gu mebi onggga edeider. Rusnok rufoukou onggga rururu Yesus fob bera runofoguma jah suma morototuma jera rusnok enjgineg tein jeska kota-kota onggga angh rejrej monuh Yudea ni, jeska kota Yerusalem ni, jeska kota Tirus jera kota Sidon onggga angh gu mei mojemu efei efembra ni.

¹⁸ Rua nomnaga rin jeskaseda rig mar onggga Yesus oftufu noba jeskaseda risma eskeira rot rerin marenir. Noba rusnok onggga efena ofogog oira gij rudou efesi tein rin skoita Yesus jeskaseda Ofa eita eskeira gu rua tein.

¹⁹ Rusnok riskemba rimeradgoduma jeskaseda rahtec Yesus fogora rita eskeira. Jeska gij mona insa koma bera owesa efek eteb ah gu Yesus, jefeda Ofa eita eskeira gu rusnok insa koma nomnaga.

²⁰ Yesus eyajga rusnok insa koma onggga rururu Ofa fob, beda Ofa agot oida, "Oufamofa eteb nou iwa onggga ifojingki, jeska iwa imoira jera rusnok onggga Allah ofoka ereij keingg si.

²¹ Oufamofa eteb nou iwa onggga mosona onggk iwa ebeibeyaif, jeska gij mona kahma beda mosona onok

iwa deika jinaga guru. Oufamofa eteb nou iwa ongg a idou okum noba ibisa gij mona ebeibeyaif, jeska gij mona kahma beda idou emefaga ouka si.

²² Oufamofa eteb nou iwa ongg a iroru Didif, Rusnok Efesa. Jeska gij mona ongg a rusnok enjgineg rucunc rudou ongg a oska rot iwa ni, rimekeba jeska iwa ni, ruga oruh iwa ni, rucunc ifoka erek ofogog ni.

²³ Tina idou onoubsaha rot koma guru. Jeska rusnok insa koma rerin rimower ongg a rita mar erek koma skoita Allah efen nabi-nabi sis fob tein. Tina iwa ita idou ongg a erirei eteb rot mar okum insa koma ongg a ah keingg iwa ojgomu. Jeska Allah ensejah yeyin ifons ongg a onggoska eteb gu mebaga fob.

²⁴ Tina mar okum eteb emah keingg iwa ongg a yurna mei ahtah, jeska idou agei yeyin mareibra ofoukou eteb eteb fob, jefeda inesma ifons gu mebaga deika guru.

²⁵ Mar okum eteb emah keingg iwa ongg a int maat ofoukou ojgomuja fob, jeska mosona omongk iwa si. Mar okum eteb emah keingg iwa ongg a idou efaga ouka rot isinsa ojgomu, jeska gij mona kahma bera imebisa noba idou okum rot isinsa si.

²⁶ Mar okum emah keingg iwa jeska iwa idou os jeskaseda rusnok nomnaga risitit iwa ojgomu. Jeska iwa yeyin imower rinsitit nabi-nabi ongg a ebireira erek koma sis fob tein."

²⁷ Erek koma tina Didif dagot gu iwa ongg a yuj yusu rot mar ongg a dimfesij insa kef oida icunc idou ongg a okora rot rusnok ongg a rudou oska rot iwa ojgomu. Noba itunggom mar ongg a onggoska skoita rusnok ongg a rita mar ongg a oska skoita iwa ojgomu.

²⁸ Yum iteij gu Allah rot rusnok ongg a ruga oruh iwa noba ongg a rufra mar okum keingg iwa tein.

²⁹ Erek osnok egens eseda yumnu jah enama, beda iwa inotkonu oska rot ofa guru. Noba erek osnok egens agei yeyin meisoufa jeska iwa, beda iwa inotkonu oska rot ofa guru.

³⁰ Erek osnok egens erejgei mar jeska iwa, beda iwa ita mar koma gu ofa ojgomu. Noba erek osnok egens agei yeyin mareibra jeska iwa, beda inois rot mar insa koma sons guru.

³¹ Iwa itunggom mar onggga oufamofa skoita rusnok morototuma erek iwa idou os rua rutunggom mar onggga oufamofa skoita iwa tein ojgomu.

³² Erek iwa idou okora rot rusnok onggga rudou okora rot iwa tein, beda koma onocunc rot oida iwa ita mar onggga oufamofa rot tenten enesi. Jeska rusnok onggga rita mar onggga oska bera rudou omokorema tein ojgomu.

³³ Noba erek iwa itunggom mar onggga onggkoska skoita rusnok onggga rutunggom mar onggga onggkoska skoita iwa tein, beda koma onorocunc rot oida iwa ita mar onggga oufamofa rot tenten enesi. Jeska rusnok onggga rita mar onggga oska bera rumofijma tein.

³⁴ Noba erek iwa ikeba yeyin mareibra gu rusnok enjgineg, tina iwa idou os isma mar jeska rua sons gij mona kahma deika ojgomu, beda koma onocunc rot oida iwa ita mar onggga oufamofa rot tenten guru. Jeska rusnok onggga rita mar onggga oska bera rita mar erek insa koma rot rerin ruhujir tein ojgomu.

³⁵ Tina onggga tenten bera icunc idou onggga okora rot yeyin mesa onggga ofogog rot iwa ojgomu. Ita mar onggga oufamofa skoita rua insa koma ojgomu. Ikeba yeyin mareibra gu rua, noba inohca mona efekesa jeskaseda isma mareibra sons jeska rua deika guru. Erek koma beda iwa isma eskeira noba iwa imeita

idou erek Allah efen odou. Erek iwa ita mar insa koma nomnaga rot tenten, beda iwa imesma ifons onnga oufamofa eteb jeska Allah si. Beda iwa imejerek Allah, onnga ofoka aksa eteb, efen efeser. Jeska Ofa tein bera oncunc odou onnga oufamofa skoita rusnok onnga rudou ofogog noba Ofa ofij rusnok onnga runofij rusnok enjgineg guru.

³⁶ Iwa icunc idou onnga eriagamaga skoita rusnok enjgineg morototuma erek yeyin ika Allah oncunc odou onnga eriagamaga skoita iwa fob."

³⁷ Beda Yesus agot deika oida, "Erek iwa inocunc rusnok enjgineg erek oska guru, beda Allah onocunc iwa erek oska tein guru. Erek iwa inofra mar okum keingg rusnok enjgineg guru, beda Allah onofra mar okum keingg iwa tein guru. Erek iwa isuna rot rusnok enjgineg rerin mar onnga oska, beda Allah omosuna rot iwa yeyin mar onnga oska tein si.

³⁸ Iwa ita mar onnga oufamofa gu rusnok rot idou onnga eskeira, beda Allah emeita mar onnga oufamofa gu iwa tein si. Ofa emeita oufamofa eteb ekirsa gu iwa fogora mar onnga iwa icosu rot bera emah gu iwa rot eteb tein si. Jeska Allah emeita mar gu iwa morototuma erek iwa ita mar gu rusnok enjgineg tein."

³⁹ Beda Yesus efesij rot mar onnga orocunc rot erek kef tein oida, "Enadaj nou osnok egens onnga eiteij ofou okag rot osnok egens egema onnga eiteij ofou tein guru. Jeska gegeka tein gemesiri gij momfaga si.

⁴⁰ Oforoka egens ofoka enaksa ekirsa jeska Guru efen ofoka guru. Tina oforoka egens onnga omfokor rot tenten fob bera emejerek efen Guru si.

⁴¹ Enadaij nou iwa icunc rot mar ofosis onggah ah gij ihujir riteij, tina inek mega osu eteb onggah angh gij isinsa iteij guru.

⁴² Jefeda iwa inagot gu yeyin ihujir oida, 'Bua bin jah sif noba didif dimeita mar ofosis jeska biteij si,' erek koma guru. Jeska iwa isinsa inek rot mega osu onggah angh gij iteij ros enesi. Onggah tenten bera, iwa ita mega osu jeska isinsa iteij sismeni fog fogora iwa imek rot iskusk. Beda iwa ita mar ofosis jeska ihujir riteij tein ojomu."

⁴³ Beda Yesus agot rot mar orocunc erek kef oida, "Mega egens onggah ot gij mebi ofogu rara bera efen efek erek onggoska. Noba mega egens onggah ot gij mebi oska bera efen efek onggah oska ojomu.

⁴⁴ Rusnok rijginaga rot mega egens oisouska mega egens koma efen efek. Moworug enefek ara guru. Noba mega onggah er ebireira enefek anggur guru.

⁴⁵ Erek koma tein, rusnok onggah rita mar onggah oufamofa bera rita mar insa koma oisouska rudou efesi onggah oufamofa. Noba rusnok onggah rita mar onggah ofogog bera rita mar insa koma oisouska rudou efesi onggah ofogog. Jeska mar onggah rusnok ragot rot bera en jeska meidu onggah angh gij rudou efesi ojomu."

⁴⁶ Beda Yesus agot deika oida, "Iwa ijeka Didif erek yeyin ika, tina teinefa fogora iwa ineita mar onggah Didif danggot rot gu iwa guri?"

⁴⁷ Didif dimefesij rot mar orocunc egens osok gij rusnok onggah rin skoita Didif noba rig duga fogora rincira rot mar onggah danggot insa koma.

⁴⁸ Rua insa koma bera rirek osnok egens onggah emei mod. Sismeni ofa eji mebi onjoros orodosu mamu. Beda ofa ei efen mod egens esij mamu onggah

ahais insa koma. Noba gij mona onggga mei ofot noba edi efen mod, beda efen mod koma eneineina jinaga guru. Tina mod koma ot rot ahais ojgomuja. Jeska mod egens koma onot esij mamu onggga ahais ojgomu fob.

⁴⁹Tina rusnok onggga ringg duga fob, tina rineita jeni duga insa koma guru, beda rua rirek osnok egens onggga emei mod tein. Tina ofa enei efen mod esij mamu guru. Noba gij mona onggga mei ofot noba edi efen mod koma, beda efen mod insa koma esiri ebeirens noba eseiseifa ojgomu."

7¹Nou onggga Yesus efesij mar insa koma nomnaga gu rusnok fob, beda Ofa eja jah kota Kapernaum.

²Ebirfaga tentara egens gij kota koma efen oforoka egens onggga omfij onggga maren eteb. Ofa odou okora eteb rot efen oforoka egens koma, tina ofa maren eteb noba doida nou anggos tein.

³Gij mona onggga ebirfaga egens koma eg rot oida Yesus en jah kota koma fob, beda ofa obk efen mohujir onggga ebirfager Yahudi rineya skoita Ofa. Rua rimerejgei Ofa jeskasada Ofa en noba eita eskeira gu oforoka egens insa koma onggga maren eteb.

⁴Nou onggga rua rin skoita Yesus fob, beda rua rirejgei Ofa rot rudou onggkas oida, "Akeina, memef mois gu Bua jeskasada Bua bin noba bufij osnok egens onggga obk memef skoita Bua ojgomu.

⁵Ofa jeska rua onggga kota Roma, tina ofa odou okora eteb rot mimif onggga Yahudi, noba ofa ofij memef jeskasada mei Mod egens nou mom meiteij gij tein fob."

⁶Jefeda Yesus eja morototuma jera rua. Askesi Yesus esaga doida ebirfaga egens insa koma efen

mod, beda ebirfaga egens koma obk efen mohujir rineya skoita Yesus jeskaseda ragot gu Ofa oida, "Akeina, enadaij nou Bua bin skoita dedin mod fogora bufonskos rot guru. Jeska bebin bufoka erek aksa ekirsa jeska didif ojgomu.

⁷ Noba erek koma tein, mojenid rot onggga din skoita Bua, jeska bufoka aksa ekirsa jeska didif. Tina erek Bua bagot rot ojgomu, beda didif dudou ororu rot tenten oida dedin oforoka egens koma emeita eskeira si.

⁸ Jeska didif tein dugif gu dedin ebirfaga oga. Noba dedin tentarer rugif gu dedin duga tein. Jeska erek didif dubk tentara egens oida, 'Bua bija,' beda ofa eja ojgomu. Noba erek didif dubk egema oida, 'Bua bin jah sif,' beda ofa en ojgomu. Noba erek didif dubk osnok egens onggga ofij didif rot oida, 'Bua butunggom mar kef,' beda ofa otunggom mar koma ojgomu."

⁹ Nou onggga Yesus engg rot mar onggga ebirfaga egens koma anggot fob, beda Ofa odou ousaha eteb rot ofa. Beda Ofa ekikif noba agot gu rusnok ofoukou onggga ruroru Ofa oida, "Ebirfaga tentara egens koma efen odou onggga ororu Didif rot tentenmen ojgomu. Jefeda Didif dinek rusnok egema tein gij monuh Israel nomnaga onggga ruroru Didif morototuma erek ofa koma enesi."

¹⁰ Beda rusnok insa koma onggga rinja skoita Yesus bera ruksons jah ebirfaga egens koma efen mod. Nou onggga rua rinsaga jah suma beda rua rik, tina oforoka egens insa koma eskeira fob.

¹¹ Erek dektek deika guru, beda Yesus eja jah kota Nain. Noba Ofa efen ruforoker jera rusnok riskemba tein ruroru Ofa jah suma.

¹² Nou onnga Ofa ensaga doida montoj onnga omf joug kota egens koma, beda rusnok rurka osnok egens efaga jeska kota koma. Mar agos koma bera eja mesina efen efesa orna aki egens. Rusnok rufoukou jeska kota koma ruhrus ofa jah moku.

¹³ Nou onnga Yesus ek eja mesina egens koma beda Ofa odou okora eteb rot ofa, fogora Ofa agot gu ofa, "Ojaga, binebisa guru."

¹⁴ Beda Ofa ojot desi mar agos koma noba agei mebera onnga mar agos enah esij. Beda rua onnga rurka mebera rot mar agos insa koma riker toumou. Beda Yesus agot oida, "Buforoka, bidebecki ojgomu!"

¹⁵ Beda oforoka egens koma efena ebah sons fogora ofa edebecki noba agot mar. Beda Yesus oroun ofa skoita efen mosu.

¹⁶ Rusnok onnga ringk mar insa koma rudou ousaha eteb noba rua risitit mar gu Allah. Rua ragot oida, "Nabi onnga ofoka aksa eteb egens bera en skoita memef fob! Allah bera ombk Ofa jeskasada ofij efen rusnok!"

¹⁷ Beda rusnok rifesij moguma rot mar onnga Yesus ontunggom rejrej monuh Yudea jera monuh enjineg tein.

¹⁸ Erek koma beda Yohanes efen ruforoker rijagot gu ofa rot mar onnga Yesus ontunggom fob. Jefeda Yohanes ois gu efen goforoka gegeka.

¹⁹ Beda ofa obk goga skoita Tuhan Yesus jeskasada gejecha gu Ofa erek kef oida, "Akeina, Bua bera Kristus koma onnga Allah omobk skoita efen rusnok Israel ei, era memef mogog moroju rot osnok egens enjineg ei?"

²⁰ Jefeda goforoka gegeka insa koma geja skoita Yesus noba gejecha gu Ofa oida, "Akeina, Yohanes

ongga eita baptis gu rusnok, bera obk magef skoita Akeina jeskaseda majeka oida Bua bera Kristus ongg Allah omobk skoita efen rusnok Israel ei, era memef mogog moroju rot osnok egens enjineg ei?"

²¹ Gij mona insa koma bera Yesus eita eskeira gu rusnok ofoukou fob ni, Ofa ekemeji efena ofogog jeska rusnok rudou efesi ni, Ofa eita eskeira gu rusnok riskemba ongg riteij ofou ni.

²² Jefeda Ofa oroun gu goga oida, "Goga goksons skoita Yohanes noba gagot gu ofa rot mar ongg goga gengg noba gengk fob. Jeska rusnok ongg riteij ofou bera rik mar fob ni, rusnok ongg rufumbohah bera rincira deika ni, rusnok ongg rufos efera okora eteb bera rita eskeira fob ni, rusnok ongg rusuw otuw bera rig mar fob ni, rusnok ongg ranggos bera rifena ebah sons ni, rusnok ongg rufojingki bera ringg rot Allah oga ongg oufamofa fob ni.

²³ Allah emeita oufamofa eteb gu rusnok ongg rudou onokoja Didif rot mar ongg Didif duntunggom fob guru."

²⁴ Nou ongg Yohanes efen goforoka insa koma geja fob, beda Yesus agot gu rusnok rufoukou jah suma osok gj Yohanes oida, "Sis fob, gj mona ongg Yohanes engker gj monuh ongg owowa ros, beda iwa ineja jah suma jeskaseda ik osnok egens ongg erek mosodum ofok ongg mof okirc ojgomu guru.

²⁵ Noba iwa inek osnok egens ongg ergi meisoufa ongg onggkoska eteb jah suma guru. Rusnok ongg rirgi meisoufa erek koma bera riker gj raja efen mod ojgomu.

²⁶ Tina iwa ik osnok egens erek meidu jah suma? Iwa ik osnok egens ongg erek nabi ojgomu. Erek

koma tina ofa efen ofoka onnga ekirsa jeska nabi enjgineg.

²⁷ Jeska sis eteb fob runggu gij Mar Efeyi Ebsi osok gij mar onnga Allah anggot gu Kristus osok gij Yohanes. Ofa agot oida, 'Didif dumobk dedin osnok egens eja okag rot Bua jeskaseda esejah rusnok rudou efesi nou mona onnga Bua bimen.'

²⁸ Noba onnga tenten bera Yohanes efen ofoka onnga aksa ekirsa jeska rusnok nomnaga onnga ringker gu mebif fob. Erek koma tina rusnok onnga riker gu mebaga onnga runok ofoka gij jinaga guru, rua bera rerin rufoka onnga aksa ekirsa jeska Yohanes."

²⁹ (Rusnok nomnaga jera rua onnga ruhoturu pajak tein ringg rot mar onnga Yesus anggot insa koma. Beda rua ragot moguma oida, "Mar onnga Ofa omftuftu rot Allah oga bera erek tenten ojpgomu." Rua ranggot mar erek koma jeska sis fob Yohanes eita baptis gu rua tein.

³⁰ Tina rua onnga ebic Farisi jera rua onnga Guru-Guru agama rukoja mar onnga Allah oga eris rot nou rua ojpgomu. Rua rita rudou erek koma jeska rua rudubu joug rita baptis jeska Yohanes ojpgomu.

³¹ Beda Yesus efesij mar deika oida, "Rusnok onnga ringker gij mona deisef bera erek ruforoker onnga rahaisomu gu moroju.

³² Rineya ruis gu rerin ruhujir oida, 'Memef mof medemer nou iwa jeskaseda iwa yuka, tina iwa inouka rot guri. Beda memef mof medemer jeskaseda idou ousaha noba ebisa rot, tina iwa inebisa rot guri!' Mar egema tein onnga rua rutunggom bera eneita ruforoker koma rudou eskeira rot guru.

³³ Koma erek rusnok onnga riker gij mona ebeibeyaif tein. Jeska gij mona onnga Yohanes en, beda ofa enej anggur efei guru, noba ofa enet maat gij mona juens tein guru. Tina rusnok rudou eneskeira rot ofa guru. Rua ragot oida efena ofogog egens oira gij odou efesi fob ojgomu.

³⁴ Beda ebeibeyaif Didif, Rusnok Efesa, din fob. Noba Didif dij anggur efei noba dit maat orofosut mona tein, tina rusnok rudou eneskeira rot Didif guri. Rua ragot oida didif dit maat ofoukou noba dibirfaga erebibeit rot anggur efei ojgomu. Noba rua ragot oida Didif dita mar onnga oska, jeska dedin edohujir rirek rusnok onnga ruhoturu pajak jera rusnok enjgineg tein onnga rua rusujohu rot bera erek oska.

³⁵ Tina gij mona onnga rusnok rik rusnok rineya rerin rita mar onnga oufamofa ojgomu, beda koma omorocunc rot tenten oida Allah efen odou onnga ebriyi gij mar erek eteb ekirsa fob."

³⁶ Osnok egens jeska ebic Farisi onnga ofoka Simon bera erejgei Yesus jeskaseda en noba get maat morototuma jera ofa.

³⁷ Ojaga egens onnga efen mar onnga oska ofoukou eker gij kota koma. Nou onnga ofa engg rot oida Yesus en fob noba Ofa et maat gij mod onnga Simon efen, beda ofa eja jah suma. Noba ofa orka fanin egens onnga ebera rot miniyi onnga efen ensesa jah suma tein.

³⁸ Beda ofa es okeibi gu mebi gu Yesus ejmeg noba ebisa. Beda ofa ot Yesus aki rot efen eitoh onnga embisa. Noba ofa era efen ebirfaga efeji onnga akseij fogora orosuna Yesus aki. Beda ofa onsa Yesus aki noba otkinaja efen miniyi insa koma esij Yesus aki.

³⁹ Nou onnga Simon engk rot mar insa koma beda ofa osujohu gij odou efesi oida, "Yesus kef bera erek nabi guri, jeska Ofa enejginaga rot oida ojaga egens kef onnga ahtec efen aki bera erek rua onnga oska eteb ojgomu guru! Ojaga egens kef bera efen mar onnga oska ofoukou roso!"

⁴⁰ Erek koma beda Yesus agot gu Simon oida, "Simon, Didif dudou os dagot rot mar egens gu bua." Beda Simon agot oida, "Akeina, meidu bera koma?"

⁴¹ Beda Yesus agot gu oida, "Osnok egens eita fifi gu gosnok gegeka. Noba gij mona kahma deika beda goga gomoh fifi koma sons gu ofa ojgomu. Osnok egens esma fifi ribu wuntin cinja, noba osnok egema eita fifi ribu setka cinja.

⁴² Gij mona egema deika beda goga gonoh fifi insa koma gu ofa sons guru, jeska gegang fifi eneya deika guru. Jefeda osnok egens onnga efen mar okowu insa koma osuna rot mar okowu koma jeska goga ojgomu. Jefeda idu jeska goga insa koma bera onnga emeita odou onnga eskeira eteb ekirsa noba onnga odou okora rot ofa erek ekirsa?"

⁴³ Beda Simon oroun oida, "Didif dusujohu rot oida osnok egens onnga esma fifi ribu wuntin cinja bera odou eskeira noba odou okora rot ofa erek ekirsa." Beda Yesus agot oida, "Bua banggot rot tenten fob."

⁴⁴ Beda Yesus eyajga ojaga egens koma noba agot gu Simon oida, "Bua bik ojaga egens kef. Didif din jah bebin mod, tina bua bineita mei eneya jeskaseda dut dedin daki guri. Tina ojaga egens kef bera era efen eitoh orot daki fob. Noba ofa era efen ebirfaga efeji onnga akseij fogora orot dedin daki tein.

⁴⁵ Tina gij mona onnga Didif daira gij bebin mod, beda bua bunonsa dumnu erek buisu Didif tein

guri. Tina nou onnga daira gij bebin mod onjoros ebeibeyaif tein bera ojaga egens kef onsa daki ojgomuja.

⁴⁶ Bua bunotkinaja miniyi onnga efen ensesa eneya esij dibirfaga guri. Tina ojaga egens kef bera otkinaja miniyi onnga efen ensesa esij daki fob.

⁴⁷ Jefeda onnga tenten bera, Didif dunsuna rot ofa efen mar onnga oska ofoukou jeska odou efesi fob. Jeska ofa oncunc rot oida ofa odou okora eteb rot Didif ojgomu. Tina rusnok onnga rusujohu oida rerin mar onnga oska erek ai oskiyai ojgomu, beda rerin rudou onnga okora rot Didif erek ai oskiyai ojgomu."

⁴⁸ Beda Yesus agot gu ojaga egens koma oida, "Asoka, bebin mar onnga oska bera Didif dunsuna jeska budou efesi fob."

⁴⁹ Beda rusnok enjgineg onnga rint maat morototuma jera Yesus rimejekema oida, "Ofa kef bera idu fogora Ofa osuna rot rusnok rerin mar onnga oska erek komo?"

⁵⁰ Tina Yesus agot gu ojaga egens koma oida, "Jeska budou ororu Didif rot tenten fob, jefeda koma bera onnga oskotu bua jeska bebin mar onnga oska fob. Bua bija rot budou onnga eskeiramera ojgomuja."

8¹ Ere koma beda Yesus eja jah kota-kota onnga angh gij monuh insa koma jeskaseda efesij oga onnga oufamofa osok gij rot teinefa Allah ofoka ereij keingg rusnok. Noba Ofa efen ruforoker rufok setka kungkob erfeka

² jera rujager rineya onnga Yesus ekemeji efena oska jeska, noba rineya onnga Ofa eita eskeira gu sis fob bera ricira morototuma jera Ofa. Ojaga egens bera Maria onnga rijeka Magdalena tein. Sis fob

Yesus ekemeji efena ofogog cinja erfeka jeska efen odou efesi fob,

³ jera Yohana onnga Khuza efen mohona (Khuza bera osnok egens onnga ofij raja Herodes), jera Susana jera rujager enjgineg tein. Rujager insa koma rira rerin mareibra rufofij Yesus jera efen ruforoker.

⁴ Ere koma beda rusnok rufoukou rin skoita Yesus jeska monuh ofoukou. Gij mona onnga rusnok rufoukou insa koma rumohoturuma rejrej Yesus fob, beda Ofa efesij mar gu rua rot orocunc egens erek kef oida,

⁵ "Osnok egens eja jeskaseda era maat efefj erebirma gij efen mekeni. Askesi ofa era maat efefj insa koma enerebirma ros, beda eneya onnga ensiri gu moroju. Beda mem rin noba rit maat efefj insa koma.

⁶ Beda eneya onnga ensiri jah mebi onnga mamu tuturu. Beda maat efefj insa koma er ebeirens jeska mebi erek oskiyai orohoh mamu. Tina nou onnga mowa orogna beda edi maat efefj insa koma jefeda efefj nomnaga, jeska maat efefj insa koma ener gij mebi onnga erek eteb guru.

⁷ Beda maat efefj eneya tein onnga ensiri gij moworug ofogog. Noba moworug ofogog insa koma er morototuma jera maat efefj insa koma, tina moworug eij keingg maat efefj koma jefeda enefek guru.

⁸ Beda maat efefj eneya tein onnga ensiri gij mebi onnga ofogu rara. Beda maat efefj insa koma er erek ongkoska ojgomu noba enjefek erek ofoukou doska tein." Nou onnga Yesus emfesij mar onnga orocunc insa koma gu rua oisa fob, beda Ofa agot oida, "Idu onnga odou onnga ebriyi gij mar kef efen ofou

rot iskusk, beda ofa oj osu nou noba eg rot iskusk ojgomu tein."

⁹Erek koma beda Yesus efen ruforoker rijeka gu Ofa rot mar onggaga orocunc insa koma efen ofou.

¹⁰Beda Ofa agot gu rua oida, "Didif dimfesij gu iwa rot teinefa Allah ofoka ereij keingg rusnok. Ebeibeyaif iwa ijginaga rot mar insa koma fob. Tina Didif dira mar onggaga orocunc fogora direfesij rot mar insa koma gu rusnok enjgineg ojgomu. Didif dutunggom erek koma jeska runggu gij Mar Efeyi Ebsi sis fob oida, 'Rusnok rimek mar, tina rudou enejginaga rot mar koma efen ofou jinaga guru. Rua rimeg mar, tina rudou enebriyi gij mar koma erek teinefa guru.' "

¹¹Beda Yesus efesij mar orocunc osok gij maat efej onggaga osnok egens erebirma efen ofou.

¹²Ofa agot oida, "Maat efej esiri bera erek Allah efen oga. Noba maat efej onggaga ensiri gu moroju bera erek rusnok onggaga ringg rot Allah oga. Tina Bilis en noba esma oga onggaga oufamofa insa koma jeska rudou efesi jeskaseda rudou onororu Allah oga insa koma deika guru. Jefeda rua rinesma riteij ah onggaga efeinah guru.

¹³Maat efej onggaga ensiri gij mebi onggaga mamu tuturu bera erek rusnok onggaga ringg rot Allah oga, noba rudou efaga ouka rot. Tina rua runororu oga insa koma rot ahais guru. Jefeda gij mona onggaga mar okum ereneni rua, beda rudou esiri fogora runororu Allah oga deika guru.

¹⁴Maat efej onggaga ensiri gij moworug ofogog bera erek rusnok onggaga ringg rot Allah oga fob. Tina rua rudou efeneinei rot mar onggaga ongkoskamoka onggaga rimeita gij rerin riteij ah insa kef ojgomuja, noba rua runororu Allah oga rot ahais guru.

¹⁵ Noba maat efej onnga ensiri gij mebi onnga ofogu rara bera erek rusnok onnga ringg rot Allah oga fob. Noba rua risah efen oga insa koma gij rudou efesi rot ahais ojgomuja. Rua bera erek rusnok onnga rita mar onnga oufamofa oisouska rudou onnga aharukamoka ojgomu. Noba jeska rua rug rijmeg gij Allah oga ojgomu, jefeda rua rerin efek onnga erek ofoukou doska tein."

¹⁶ Beda Yesus agot rot mar orocunc erek kef oida, "Giskini rusnok onnga ris mah gij lampu nou rerin mod efesi bera runocohun lampu onnga eisa insa koma guru. Noba rua tein rinaha lampu onnga eisa insa koma jah mebera obohoh tein guru. Onnga tenten bera rua raha lampu insa koma tomnomna jah skidamedada gij mod efesi insa koma jeskaseda rusnok nomnaga onnga ruiira gij mod egens koma bera rimek eisa insa koma.

¹⁷ Erek koma tein, mar nomnaga onnga angh jejema jeska rusnok ebeibeyaif bera rua rimejginaga rot gij mona kahma si.

¹⁸ Jefeda iwa isujohu rot koisoisa osok gij mar onnga iwa ingg insa kef ojgomu. Jeska rua onnga rudou ebriyi gij mar insa kef bera rimesma mar onnga erek ekirsa deika si. Noba rua onnga rudou enebriyi gij mar kef guru, beda mar oskiyai onnga rua rita fob bera emeseiseifa jeska rua tein si."

¹⁹ Yesus efen mosu jera mokoser rin skoita Ofa. Tina nou onnga rua rinsaga jah suma fob beda enadaj nou rua rik Ofa guru, jeska rusnok rufoukou riker rejrej Ofa.

²⁰ Beda osnok egens agot gu Yesus oida, "Akeina, mosib jera obkoser runot jah mebah. Noba rua rudou os rik Bua."

²¹ Beda Yesus agot gu rusnok jah suma oida, "Rusnok onggga ringg rot Allah oga noba rincira rot efen oga insa koma, rua rirek dedin ameina jera edkoser bera insa koma."

²² Gij mona egens beda Yesus agot gu efen ruforoker oida, "Mimif mija jah meren enama." Jefeda rua rifef meg meifeni egens beda rija.

²³ Nou onggga rua runjowa jah gu meren deis ros, beda Yesus ahca. Erek dektek deika guru, beda mof eteb edi meren rot rua. Mei oira gij rerin meg efesi noba rua rimeesa eteb oida meg omojuj gu mei rotir.

²⁴ Beda Yesus efen ruforoker rijeb Ofa noba ragot oida, "Akeina, jeska meg omojuj gu mei rotimi!" Erek koma jefeda Yesus osowu noba agot joug mof jera mei mojomu ofog insa koma, beda mof eteb jera mei mojomu ofog koma aha toumou noba meren edeider sons.

²⁵ Beda Yesus agot gu efen ruforoker oida, "Teinefa fogora iwa idou onororu Didif rot tenten guri?" Beda rua rudou ousaha noba rimeesa, beda rua rijeka moguma oida, "Ofa kef bera erek idu? Jeska Ofa agot joug mof jera mei mojomu ofog noba mar koma ororu efen oga ojgomu!"

²⁶ Yesus jera efen ruforoker rifef meg meifeni egens insa koma onjoros rinsaga gu monuh Gerasa onggga angh gu meren Galilea enama.

²⁷ Nou onggga Yesus onsoka jah mog fob, beda osnok egens onggga efena ofogog oira gij odou efesi ek Yesus. Osnok egens koma en jeska kota jah suma. Ofa energi meisoufa guru, noba ofa eneker gij mod egema tein guru. Ofa eker gu mamu mansu efekesa onggga erek rusnok rerin moksou ojgomu.

²⁸ Nou onnga ofa ek Yesus, beda ofa agerir mar noba eij esinsa gu mebi jah Yesus odou. Beda ofa ois rot oga eteb doska oida, "Yesus, bua bera Allah efesa onnga ofoka aksa eteb! Bua bineita mar onnga okum gu didif guru!" Beda Yesus obk efena ofogog jeskasada eja jeska osnok egens koma.

²⁹ Beda ofa ois gu Yesus rot odou onnga emeesa eteb oida, "Bua bineita efera okora gu didif guru!" Sis fob efena ofogog insa koma osokeij osnok egens koma fogora merai ok ofa. Jefeda rusnok rira rantai rirakid efen etma jera aki noba rut joug ofa rot ahais tein. Tina ofa oku rantai beda ebga ojgomu. Noba efena ofogog koma oroun ofa jah monuh onnga owowa ojgomu.

³⁰ Beda Yesus ejeka ofa oida, "Bufoka idu?" Beda ofa oroun sons oida, "Didif dufoka Legiun." Ofa agot mar erek koma jeska efena ofogog riskemba bera oira gij osnok egens koma odou efesi fob.

³¹ Beda efena ofogog insa koma ois gu Yesus jeskasada Ofa onobk ofa jah monuh onnga emeita ofogu okora eteb gij guru.

³² Gij mona insa koma tein mek ofoukou bera rit mebi gu memaga ofog oduma jah suma. Beda efena ofogog insa koma ois gu Yesus jeskasada Yesus oitij rot oida efena ofogog insa koma nomnaga rujoira gij mek ofoukou insa koma rudou efesi. Beda Yesus oitij rot.

³³ Jefeda efena ofogog insa koma nomnaga rurogna jeska osnok egens koma noba rujoira gij mek ofoukou rudou efesi. Jefeda mek ofoukou insa koma ruku noba rujosoka gij momfaga jah meren efei fogora nomnaga ragos.

³⁴ Nou onnga rusnok onnga rut joug mek insa koma rik mar koma nomnaga fob, beda rua rufof jah kota jera rejrej monuh insa koma tein jeskaseda riflesij rot mar onnga rua ringk insa koma.

³⁵ Beda rusnok rufoukou rija jah suma jeskaseda riajga rot mar onnga rusnok insa koma rimfesij rot. Rua rija skoita Yesus, beda rua rik osnok egens onnga Yesus ekemeji efena ofogog jeska odou efesi fob. Ofa eker desi Yesus aki. Ofa ergi meisoufa noba odou efesi eskeira fob. Jefeda rusnok insa koma rimeesa rot mar onswos koma.

³⁶ Noba rua onnga ringk mar insa koma nomnaga riflesij deika rot teinefa Yesus ekemeji efena ofogog fogora osnok egens koma eskeira fob.

³⁷ Jefeda rusnok onnga ringker gij monuh Gerasa insa koma ruis gu Yesus jeskaseda Ofa eja jeska rerin monuh, jeska rua rimeesa eteb rot Ofa. Jefeda Yesus eifef meg egens noba oksons jah meren enama.

³⁸ Osnok egens insa koma onnga Yesus eita eskeira gu, ois gu Yesus jeskaseda ororu Ofa. Tina Yesus obk ofa jeskaseda eja ojgomu. Beda Yesus agot gu ofa oida,

³⁹ "Bua buksons noba bifesij gu rusnok rot teinefa Allah omfij bua fob." Jefeda osnok egens koma eja rejrej kota nomnaga onnga angh gij monuh insa koma noba efesij gu rusnok rufoukou rot teinefa Yesus ofij ofa fob.

⁴⁰ Gij mona onnga Yesus oksons jah meren enama fob, beda rusnok rufoukou ruroun Ofa rot rudou onnga erirei eteb, jeska rua rumom rudou nou mona onnga Ofa omoksons en jah suma.

⁴¹ Gij mona insa koma tein, osnok egens onnga ebirfaga mod onnga rusnok rum riteij gu Allah gij

ongga ofoka Yairus bera enofoguma. Ofa ojougif gu Yesus noba erejgejgei gu Yesus jeskaseda Yesus eja jah ofa efen mod.

⁴² Jeska ofa efen efesa ojowu egens ojgomu onggga efen tahun setka kungkob erfeka onggga maren eteb noba konosa anggos. Askesi Yesus ecira jah Yairus efen mod beda rusnok riskemba rimeradgoduma rejrej Yesus.

⁴³ Erek koma beda ojaga egens onggga mesta ebah ojgomuja gij tahun ofoukou fob tein bera ont gu rusnok riskemba rifekesa. Ofa ejek dokter rufoukou tina ofa eneita eskeira rot mar insa koma jinaga guru.

⁴⁴ Ofa ojot doida Yesus ejmeg noba ahtec Yesus efen meisoufa tumu Yesus. Beda ainsa koma tein ofa esma eskeira fogora efen ogufu eneya deika guru.

⁴⁵ Erek koma beda Yesus agot oida, "Idu bera ahtec Didif ainsa koma?" Beda rusnok rufoukou ragot oida, "Akeina, memef bera guru." Beda Petrus agot gu Yesus oida, "Akeina, jeska rusnok riskemba rut rejrej Bua noba rimeradgoduma skoita Bua ojgomu."

⁴⁶ Tina Yesus agot oida, "Osnok egens bera ahtec Didif fob. Didif dijginaga rot koma jeska ainsa koma tein owesa efek bera orogna jeska Didif fob."

⁴⁷ Ojaga egens koma ofos eciyi rot oida Yesus ejginaga rot ofa fob. Jefeda ofa en skoita Yesus noba es okeibi gu mebi jah Ofa odou rot odou onggga emeesa. Beda ofa efesij gu rusnok jah suma rot teinefa ofa ahtec Yesus tumu efen meisoufa fogora eita eskeira rot mar insa koma.

⁴⁸ Beda Yesus agot gu ofa oida, "Edesa, jeska budou ororu Didif rot tenten fob, jefeda bua bita eskeira fob. Bua bija rot budou onggga eskeiramera ojgomu."

⁴⁹ Askesi Yesus efesij mar insa koma ros, beda osnok egens en jeska Yairus efen mod noba agot gu Yairus oida, "Tuan, bebin ebesa ojaga agos fob, jefeda bua binerejgei mar gu Akeina Guru deika guru."

⁵⁰ Nou onggga Yesus engg rot mar koma, beda Ofa agot gu Yairus oida, "Bua binemeesa guru. Bua budou ororu Didif rot tenten ojpgomu beda bebin ebesa emeita eskeira si."

⁵¹ Nou onggga Yesus ensaga gu Yairus efen mod, beda Ofa eyahehir joug rusnok jah suma oida runoira gij mod efesi jera Ofa guru. Tina Ofa oroun Petrus, Yohanes, Yakobus, Yairus jera Yairus efen mohona ojpgomu.

⁵² Rusnok nomnaga jah suma ribisa noba rudou ousaha eteb rot ojowu egens koma onggga anggos fob. Tina Yesus agot oida, "Iwa inebisa guru. Jeska ojowu egens koma bera enagos guru. Ofa ahca ojpgomu."

⁵³ Nou onggga rusnok insa koma rig Yesus agot mar erek koma beda rua rutut rot ojpgomu, jeska rua rijginaga rot oida ojowu egens koma anggos rot tenten fob.

⁵⁴ Beda Yesus agei ojowu egens koma etma noba agot gu ofa oida, "Edesa, bua busowu ojpgomu!"

⁵⁵ Beda ainsa koma tein ojowu egens koma efena ebah sons. Beda ofa osowu noba edebecki. Beda Yesus obk rusnok jeskaseda rita maat gu ofa.

⁵⁶ Noba Ofa efen meka jera mosu gofos graga eteb rot! Tina Yesus agot joug goga oida genefesij rot mar onggga goga gek insa koma gu rusnok enjgineg jinaga guru.

9¹ Yesus ohoturu efen rasul setka kungkob erfeka. Beda Ofa eita owesa efek gu rua jeskaseda rikemeji efena ofogog jeska rusnok rudou efesi jera rita eskeira gu rusnok onnga marenir tein.

² Beda Ofa obk rua jeskaseda rijefesij rot teinefa Allah ofoka ereij keingg rusnok, noba jeskaseda rua rita eskeira gu rua onnga marenir tein.

³ Ofa agot gu rua deika oida, "Gij mona onnga iwainja fob, beda inorka mar egema tein guru. Inorka mar erek moskur ni, mesina ni, maat ni, fifi ni, era meisoufa egema dokun tein guru.

⁴ Gij mona onnga iwa injesaga gu monuh egens, beda iwa iker gjij mod egens onnga rusnok ruroun iwa gjij rot sismeni ojgomu. Noba gjij mona onnga iwa imfarur mar nou Allah gjij monuh egens, beda iwa iker jah suma ojgomuja onjoros ifarur mar insa koma oisa fob fogora imeja.

⁵ Tina erek rusnok gjij monuh egens runoroun iwa rot rudou onnga eskeira guru, beda nou onnga imeja jeska monuh koma, iwa yubsa ikoda rot mebi ofou onnga kota koma efen jeskaseda irocunc rot oida mar onnga okum emen skoita rua si."

⁶ Beda Yesus efen ruforoker rija jah kota-kota onnga angh gjij monuh insa koma. Rua riflesij rot Allah oga onnga oufamofa, noba rua rita eskeira gu rusnok rufoukou onnga marenir tein.

⁷ Gij mona insa koma bera raja Herodes eg mar ofoukou jeska rusnok osok gjij mar onswos onnga Yesus ontunggom fob. Jefeda ofa odou eineina gjij, jeska rineya ranggot oida Yohanes Pembaptis bera endebecki jeska anggos fob.

⁸ Noba rineya ranggot oida nabi Elia jeska mona onnga ensis fob bera orogna keingg rusnok. Noba

rineya ranggot oida nabi egens jeska mona onnga sis eteb fob bera efena ebah sons deika fob.

⁹Tina raja Herodes agot oida, "Didif dubk rusnok jeskaseda ragob Yohanes, jefeda ofa agos fob. Tina osnok egens kef onnga rusnok ranggot oida ontunggom mar onswos ofoukou deika bera idu?" Beda ofa ereni jeskaseda ek Yesus.

¹⁰Nou onnga Yesus efen ruforoker rufok setka kungkob erfeka ruksons fob, beda rua rifesij gu Yesus rot mar nomnaga onnga rua runtunggom fob. Beda Yesus oroun rua jah kota Betsaida.

¹¹Tina gij mona onnga rusnok ofoukou rig oida Yesus encira fob, beda rua tein rururu ofa jah suma. Jefeda Ofa oroun rua tein rot odou onnga oufamofa. Beda Ofa efesij mar gu rua osok gij rot teinefa Allah ofoka ereij keingg rusnok. Noba Ofa eita eskeira gu rua onnga marenir tein.

¹²Nou onnga mowa enjesiri gij, beda Yesus efen ruforoker rin skoita ofa. Beda rua ragot gu Ofa oida, "Akeina, monuh kef bera ah yes mes. Onnga oufa bera Akeina bubk rusnok kef jeskaseda ruhca maat noba rahca gij kota-kota onnga angh rejrej monuh insa kef ojgomu."

¹³Tina Yesus oroun gu rua oida, "Iwa ita maat gu rua ojgomu." Beda rua ragot gu Ofa oida, "Memef mefmen roti ofog cinja orijka ojgomu. Jefeda memef mejengk maat eteb nou rusnok rufoukou kef erek teinefa?"

¹⁴(Runa erek rufok ribu cinja runofogu jah suma.) Beda Yesus agot gu rua oida, "Yubk rusnok rufoukou insa koma jeskaseda riker gij ebic egens egens erek rufok setka cinja."

¹⁵ Beda ruforoker koma rita jeni erek Yesus anggot rot.

¹⁶ Erek koma beda Yesus eita roti ofog cinja jera mos orijka insa koma, beda Ofa eyajga gu mebaga, noba ois oufamofa gu Allah rot. Beda Ofa ekeba roti jera mos insa koma dougdoug, noba eita gu Ofa efen ruforoker jeskaseda rikeba maat insa koma gu rusnok ribu cinja koma.

¹⁷ Beda rusnok rufoukou insa koma rit maat onjoros ereya rua nomnaga fob. Beda Yesus efen ruforoker ruhoturu maat ofod koma onnga ok morungga eteb erek setka kungkob erfeka.

¹⁸ Gij mona juens bera Yesus jera efen ruforoker rijeker gu risinsa, noba Yesus om eiteij gu Allah gij odou efesi. Beda Ofa ejeka efen ruforoker oida, "Rusnok enjgineg ragot oida Didif bera erek idu?"

¹⁹ Beda efen ruforoker ruroun sons oida, "Rineya ragot oida Bua bera Yohanes onnga eita baptis gu rusnok. Noba rineya ragot oida Bua bera nabi Elia. Noba rineya ragot oida Bua bera nabi egens jeska mona onnga sis eteb fob onnga efena ebah sons."

²⁰ Beda Yesus ejeka rua oida, "Tina iwa isinsa isujohu rot oida Didif bera erek idu?" Beda Petrus oroun oida, "Akeina, Bua bera Kristus egens koma onnga Allah omobk skoita efen rusnok Israel!"

²¹ Erek koma beda Yesus agot gu efen ruforoker oida, "Iwa inagot gu rusnok enjgineg egema tein rot oida Didif bera Kristus egens koma onnga emen erek koma jinaga guru."

²² Beda Yesus agot deika oida, "Didif, Rusnok Efesa, dimeita difera okora eteb beda ebirfager Yahudi jera imam-imam ebirfaga jera Guru-Guru agama tein bera rumokoja Didif. Beda rusnok rimagob Didif. Noba gij

mona juomu deika beda Didif dimedebecki sons jeska dagos si."

²³ Beda Yesus agot gu efen ruforoker oida, "Erek osnok egens odou os ororu Didif erek dedin oforoka egens, beda ofa onosujohu rot mar onnga ofa esinsa odou os rot ojgomu guru. Tina ofa esejah odou efesi rot mar onnga eita efera okora gu ofa erek osnok egens onnga ok mega salib fogora eita efera okora noba anggos tumu tein. Ofa eita mar erek koma beda omororu Didif.

²⁴ Jeska idu onnga osujohu rot esinsa efen eiteij ah ojgomu noba onororu Didif guru, beda efen eiteij ah koma emeseiseifa si. Tina erek osnok egens efen eiteij ah bera eseiseifa jeska ofa ororu Didif, beda ofa koma emesma eiteij ah onnga ah aibin si.

²⁵ Noba erek osnok egens ohoturu mar ofoukou nou efen eiteij ah kef, tina ofa enesma eiteij ah onnga efeinah guru, jeska ofa onororu Didif guru, beda mar onnga ofa onghoturu insa koma fob bera onofij ofa tein jinaga guru. Ofa eneita mar egema tein jeskaseda eita eiteij ah onnga efeinah insa koma guru.

²⁶ Noba idu onnga mojen ofa rot mar onnga Didif, Rusnok Efesa duftuftu fob, beda Didif tein mojenid rot ofa tein gij mona onnga Didif duksons rot owesa efek jeska dedin Akeina morototuma jera malaikat-malaikat onnga ebsi komowa tein si.

²⁷ Onnga tenten bera, rusnok rineya onnga riker jah sif rinagos guru onjoros rua rik Allah ofoka ereij keingg efen rusnok si."

²⁸ Erek mona cinja orfomu deika beda Yesus oroun Petrus jera Yohanes jera Yakobus beda rija jah memaga ofos jeskaseda rum riteij jah suma.

²⁹ Askesi Yesus om eiteij jah suma, beda Ofa efen osum eisa eteb erek mowa. Noba efen meisoufa eja erek ebsi komowa onnga eisa eteb tein.

³⁰ Beda Musa jera Elia onnga ganggos sis fob,

³¹ gorogna rot gefesa eteb tein. Beda goga gefesij mar morototuma jera Yesus osok gij mona onnga Yesus emagos gij Yerusalem fogora emeja jah mebaga.

³² Ainsa koma tein Petrus jera efen mohujirga rah ahaingkongka fob. Nou onnga rua rusowu beda rua rik Yesus erek efesa eteb. Noba rua rik Musa jera Elia gonot jera Ofa tein.

³³ Nou onnga goga genja jeska Yesus, beda Petrus agot gu Yesus oida, "Akeina, ongnoska eteb nou memef meker jah sif! Jefeda memef mei modwok orgomu. Egens nou Bua, egens nou Musa noba egens deika nou Elia." (Petrus agot mar erek koma jeska ofa odou enebriyi gij mar onnga ofa engk insa koma fob guru.)

³⁴ Askesi Petrus anggot mar insa koma ros, beda mocgoj ofog eteb en noba ocohun rua, jefeda Petrus jera mohujirga rimeesa eteb rot.

³⁵ Beda rua rig oga egens jeska mocgoj insa koma agot oida, "Kef bera dedin edesa onnga duncunc fob. Iwa ig rot mar onnga Ofa anggot ojgomu!"

³⁶ Nou onnga koma oisa fob, beda rua rik Yesus esinsiyai onot jah suma. Beda rua riker toumou rot mar insa koma, noba rinefesij rot mar koma gu rusnok enjgineg tein guru.

³⁷ Gij mona juens deika beda Yesus jera efen ruforoka rugomu rujuj jeska memaga ofos insa koma, beda rusnok rufoukou rin skoita.

³⁸ Osnok egens onnga onot gu rusnok rufoukou insa koma rifekesa ois rot oga eteb oida, "Akeina Guru, Bucunc budou onnga okora rot didif fogora bijek dedin edesa egens, jeska ofa erek dedin edesa onnga egensmes ojgomu.

³⁹ Noba gij mona onnga efena ofogog oira gij efen odou efesi, beda ofa agerir mar noba efaga oskukwok onjoros awesi efeireira. Efena ofogog koma oskotu ofa noba onorogna jeska ofa jinaga guru.

⁴⁰ Didif duis gu bebin ruforoker jeskaseda rikemeji efena ofogog egens koma jeska ofa, beda rua rireni rot, tina efena ofogog koma onorogna jeska ofa odou efesi guri!"

⁴¹ Erek koma beda Yesus agot oida, "Iwa idou onororu Didif rot tenten enesei! Iwa idou erek oska ros ojgomu ei! Didif diker jera iwa noba duh dudou gu iwa nou mona egaho fogora imororu Didifi? Buroun oforokai egens koma gu Didif ojgomu."

⁴² Nou onnga rua ruroun oforokai egens koma skoita Yesus fob, beda efena ofogog edi ofa fogora ofora oskukwok. Tina Yesus ekemeji efena ofogog koma jeskaseda orogna jeska ofa, jefeda oforokai egens koma eskeira fob. Beda Yesus oroun ofa sons gu efen meka.

⁴³ Rusnok onnga ringk rot mar insa koma nomnaga rudou ousaha rot Allah efen owesa efek eteb. Askesi rusnok onnga ringg mar insa koma riker rot rudou onnga ousaha ros, beda Yesus agot gu efen ruforoker oida,

⁴⁴ "Iwa yuj yusu noba ig kef rot iskusk ojgomu fog: Rusnok rimaha Didif, Rusnok Efesa, gu rusnok enjineg."

⁴⁵ Tina rua rudou enebriyi gij rot mar onggga Yesus enagot insa koma efen ofou guru. Jeska mar koma efen ofou bera ah jejema jeska rua ros. Jefeda rudou enebriyi gij guru, noba rua rimeesa jefeda rinejeka gu Yesus rot mar insa koma efen ofou tein guru.

⁴⁶ Yesus efen ruforoker ruga emekirsema osok gij idu jeska rua bera emesma ofoka onggga aksa ekirsa jeska rineya.

⁴⁷ Yesus ejginaga rot mar onggga ruga emekirsema rot insa koma fob. Jefeda Ofa oroun oforokai egens jeskaseda ot desi Ofa.

⁴⁸ Beda Ofa agot gu efen ruforoker oida, "Idu onggga oroun oforokai egens erek kef oisouska dedin dufoka, beda koma erek ofa oroun Didif tein fob. Noba idu onggga oroun Didif, beda koma erek ofa oroun Allah onggga ombk Didif tein fob. Jeska osnok egens gu iwa ifekesa onggga onohca efen ofoka aksa guru, ofa bera onggga emesma ofoka onggga aksa eteb ekirsa jeska rineya."

⁴⁹ Erek koma beda Yohanes agot gu Yesus oida, "Akeina, memef mek osnok egens ekemeji efena ofogog jeska rusnok oisouska bebin bufoka, tina memef meyahehir joug ofa rot, jeska ofa onoir a jera mimif guru."

⁵⁰ Beda Yesus agot gu Yohanes oida, "Iwa ineyahehir joug ofa erek koma guru. Jeska idu onggga onok eretei rot iwa guru, beda ofa tein erek egens jera iwa ojgomu."

⁵¹ Doida mona onggga Yesus omosok jah mebaga, beda Ofa oga ojga rot oida Ofa emeja jah kota Yerusalem si.

⁵² Beda Ofa obk efen ruforoker rineya rukag Ofa odou. Rua rija jah kota egens gij monuh Samaria jeskaseda risejah mar nou Yesus jah suma.

⁵³ Tina rusnok gij monuh insa koma rijginaga rot oida Yesus eris rerin monuh askesi Ofa ecira jah kota Yerusalem, jefeda runoroun Ofa guru.

⁵⁴ Nou onnga Yesus efen goforoka Yakobus jera Yohanes geg rot mar insa koma fob, beda goga gagot gu Yesus oida, "Tuhan, bua budou os jeskaseda magef mois gu Allah fogora mah eisa ojuj jeska mebaga fogora et rua insa koma nomnaga ei?"

⁵⁵ Tina Yesus ekikif skoita goga noba etaha joug goga rot mar onnga ganggot insa koma ojgomu.

⁵⁶ Nou onnga koma oisa fob, beda rua ricira jah kota enjgineg deika.

⁵⁷ Nou onnga Yesus jera efen ruforoker rincira deika, beda osnok egens agot gu Yesus oida, "Akeina, didif dumororu Bua gij monuh nomnaga onnga Bua bimeja gij ojgomuja."

⁵⁸ Beda Yesus oroun gu ofa oida, "Mes merenrah rerin mansu onnga ringker gij enahuma. Noba mem rerin efefa onnga ringker gij enahuma. Tina Didif, onnga Rusnok Efesa, bera dedin monuh egema tein enah nou diker keingg dufons gij guru."

⁵⁹ Beda Yesus agot gu osnok egens egema deika oida, "Bua buroru Didif ojgomu." Tina osnok egens koma agot oida, "Tuan, didif dudou os duksons jah dedin monuh beda disah dedin akeina gij moksus fog. Beda didif dumororu Bua si."

⁶⁰ Beda Yesus agot gu ofa oida, "Rusnok onnga rukoja mar onnga Didif dumftuftu rot bera rimeseiseifa si. Jefeda adaj nou rua risah mar

agos gij moksu ojgomu. Tina bua bera buroru Didif ojgomu."

⁶¹ Beda Osnok egens egema deika agot gu Yesus oida, "Tuhan, didif dudou os duroru Bua. Tina didif duksons jeskasada duisu dedin rusnok sismeni fog."

⁶² Beda Yesus agot gu osnok egens koma oida, "Idu onnga odou os ororu Didif, tina ofa odou os oksons skoita mar onnga ofa ontunggom sis fob tein, beda enadaij nou ofa oira jera rusnok onnga Allah ofoka ereij keingg guru."

10 ¹ Gij mona egema deika beda Yesus ohoturu efen ruforoker rufok setka cinja erfeka deika. Beda Ofa obk rua rija gegeka gegeka rukag Ofa jah monuh onnga Ofa emeja gij.

² Ofa agot gu rua oida, "Rusnok onnga rudou os rig rot Allah oga bera erek rufoukou, tina rusnok onnga ruftuftu rusnok enjgineg osok gij Allah efen oga insa koma bera erek ruskiyai. Jefeda iwa yum iteij gu Tuhan Allah jeskasada Ofa esa rusnok eneya deika jeskasada riflesij rot efen oga.

³ Iwa ija ojgomu. Erek domba-domba onnga eja skoita serigala, beda erek koma tein Didif dumobk iwa onnga idou eriaga skoita rusnok onnga rudou ofogog rifelesa.

⁴ Iwa inorka fifi ni, mesina ni, sepatu ni, egema tein guru. Iwa inot gu moroju fogora ifesij mar ebireira jera rusnok jah suma guru.

⁵ Gij mona onnga iwa yuira gij mod egens, beda iwa yuis gu rusnok onnga riker jah suma oida, 'Oufamofa ah gu iwa ojgomu.'

⁶ Noba erek rua ruroun iwa rot rudou onnga oufamofa, beda Allah omocunc rot efen oufamofa gu

rua si. Tina erek rusnok rudou oska rot iwa ojgomu, beda Allah onocunc rot efen oufamofa gu rua guru.

⁷ Iwa ineja jeska mod egema jah mod egema tein guru, tina yah gu mod egens ojgomu. Noba maat onnga rua ricka, beda it ojgomu. Mojenen iwa rot mar koma guru, jeska adaij nou rusnok onnga rifarur nou Tuhan Allah oga jeskaseda risma maat insa koma erek rerin rufons ojgomu.

⁸ Gij mona onnga iwa ijesaga gu monuh egens, noba rusnok jah suma ruroun iwa rot rudou onnga oufamofa, beda iwa it maat onnga rincka gu iwa ojgomu.

⁹ Beda iwa ita eskeira gu rusnok onnga marenir tein. Noba yagot gu rua rot oida, 'Mona onnga Allah omofoka ereij keingg rusnok bera ensaga doida fob.'

¹⁰ Tina gij mona onnga iwa injesaga monuh egens, noba rusnok runoroun iwa guru, beda iwa ija jah moroju noba yagot oida,

¹¹ 'Memef moubasa mebi ofou jeska mokoda erek orocunc rot oida Allah omofra mar okum keingg iwa si. Jeska mona onnga Allah omofoka ereij keingg rusnok bera emen, tina iwa inoira jera Ofa efen rusnok insa koma jinaga guru.' "

¹² Beda Yesus agot oida, "Gij mona onnga enja ejgwaga, beda Allah omofra mar okum keingg rusnok gij kota Sodom. Tina rusnok onnga rukoja mar onnga iwa yuftuflu rot Allah oga bera rimesma mar okum eteb ekirsa jeska Allah si."

¹³ Beda Yesus agot deika oida, "Mar okum eteb emah keingg iwa onnga ingker gij kota Korazim jera kota Betsaida si. Iwa idou ah keingg rot rusnok onnga ringker gij kota Tirus jera Sidon sis eteb fob. Rua bera erek rusnok onnga rufogog doska. Tina rusnok gij

kota egeka koma rik mar onswos sis fob morototuma erek iwa ik Didif duntunggom gij mona ebeibeyaif tein, beda rua rimeesa joug rerin mar onggga oska si. Noba rua rimergi meisoufa onggga oska noba raha mongkoru esij ribirfaga efeji jeskaseda rurocunc rot rudou onggga okumkum rot rerin mar onggga oska si.

¹⁴ Tina iwa onggga kota Korazim jera Betsaida bera ineita mar erek koma jinaga guri. Jefeda gij mona onggga Allah ofra mar okum eteb keingg rusnok onggga rita mar onggga oska fob, beda Ofa omofra mar onggga okum eteb keingg iwa erek ekirsa jeska mar okum onggga emah keingg rua onggga kota Tirus jera Sidon si.

¹⁵ Noba iwa onggga kota Kapernaum, iwa yufra isinsa ifoka erek akseij gu mebaga. Tina Allah omain keingg iwa degini jah mahmei meren ojgomu si."

¹⁶ Gij mona onggga rusnok rig mar jeska iwa, beda koma erek rua rig mar jeska Didif. Noba erek rusnok rukoja iwa, beda koma erek rua rukoja Didif tein. Noba erek rusnok rukoja Didif, beda koma erek rua rukoja Tuhan Allah onggga ombk Didif tein fob.

¹⁷ Yesus efen ruforoker rufok setka cinja erfeka ruksons rot rudou efaga ouka eteb. Beda rua ragot gu Yesus oida, "Tuhan, gij mona onggga memef mekemeji efena ofogog onggga oira gij rusnok rudou efesi fob, beda efena ofogog koma ougif gu mefmen moga ojgomu."

¹⁸ Beda Yesus oroun oida, "Didif dik Bilis esiri jeska mebaga erek moc efna.

¹⁹ Onggga tenten bera Didif dita owesa efek gu iwa jeskaseda irot keingg magosu jera mouma, noba jeskaseda yut rot ahais gij mona onggga Bilis ereneni

iwa fogora ofa emesiri gu iwa ojgomu. Jefeda enadaij nou mar egema tein ecirej iwa jinaga guru.

²⁰ Tina enadaij nou iwa idou efaga ouka jeska efena ofogog ougif gu iwa guru. Ongga tenten bera, ita idou onggga efaga ouka rot Tuhan Allah ojgomu, jeska Ofa eita eiteij ah onggga ah aibin gu iwa gu monuh mebaga."

²¹ Ere koma beda Yesus odou efaga ouka oisouska Efena Ebsi noba Ofa agot oida, "Akeina, Bua bera Tuhan onggga ofoka ereij keingg mebaga jera mebif. Didif duis oufamofa eteb gu Bua jeska Bua bindemi mar insa koma jeska rusnok onggga risitit risinsa rufoka oida rudou efesis eteb gij mar nomnaga. Noba Bua buncunc rot mar insa koma gu rusnok onggga rerin rudou efesi onggga erek ruforokai rerin rudou efesi ojgomu. Bua buntunggom erek koma ororu jeni Bua bisinsa budou os rot ojgomu.

²² Bua bita mar nomnaga gu Didif fob. Rusnok rineya rinejginaga rot Didif guru, tina Akeina bera ejginaga Didif rot tenten ojgomu fob. Ere koma tein rusnok rineya rinejginaga rot Bua guru. Tina Didif dijginaga Bua rot tenten fob. Noba rusnok onggga Didif duncunc fob bera rijginaga rot Bua tein fob."

²³ Beda Yesus oksef noba agot gu efen ruforoker oida, "Oufamofa eteb nou iwa jera rusnok enjgineg tein onggga ingk mar insa kef fob.

²⁴ Jeska sis eteb fob bera nabi-nabi jera raja-raja rudou os rik mar onggga iwa ingk gij mona ebeibeyaif fob, tina rinek guru. Noba rua rudou os rig mar onggga iwa ig gij mona ebeibeyaif tein, tina rua rineg guru."

²⁵ Ere koma beda osnok egens onggga erek Guru agama en jeskaseda ereni Yesus rourou. Ofa agot oida, "Akeina Guru, didif dutunggom mar meidu

jeskaseda dita eiteij ah onnga efeinah noba onnga ah aibino?"

²⁶ Beda Yesus oroun gu ofa oida, "Runggu gij Mar Efeyi Ebsi rot mar insa koma erek meidu?"

²⁷ Beda Guru egens koma oroun gu Yesus oida, "Rua runggu rot oida, 'Iwa idou okora rot yeyin Tuhan Allah rot idou efesi ongkasmos ni, gij mar nomnaga onnga isujohu rot ni, noba gij mar nomnaga onnga itunggom ni. Noba idou okora rot rusnok enjineg erek idou okora rot isinsa tein.' "

²⁸ Beda Yesus agot gu ofa oida, "Bua buroun mar rot tenten fob. Jefeda bua bita mar erek koma, beda bua bimeita eiteij ah onnga efeinah si."

²⁹ Tina Guru agama egens koma odou os ofra esinsa ofoka erek Guru onnga odou ebriyi eteb gij mar ojgomu, jefeda ofa ejeka gu Yesus deika oida, "Rusnok enjineg onnga didif dudou okora rot bera erek idu?"

³⁰ Beda Yesus agot mar orocunc egens erek kef oida, "Osnok egens onnga Yahudi ecira jeska kota Yerusalem jah kota Yerikho. Beda ofa orodosu rusnok onnga rufogog gu moroju. Rua ruskotu ofa beda ragei efen mareibra jeska ofa, beda rubu ofa doska fogora rija jeska ofa. Osnok egens koma ahca rot ofogu okora eteb.

³¹ Erek koma beda imam Yahudi egens onnga ecira gu moroju insa koma ensaga jah suma noba ek osnok egens koma. Beda ofa oira jah moroju efembra jeska osnok egens koma beda eja ojgomu.

³² Erek koma tein osnok Yahudi egens onnga ebic Lewi oira jah suma noba ek osnok egens koma. Beda ofa tein erabj osnok egens koma noba eja ojgomu.

³³ Tina osnok egens jeska monuh Samaria, erek onnga erek Yahudi guru, ensaga jah suma. Nou onnga ofa engk osnok egens insa koma, beda ofa odou okora eteb rot ofa.

³⁴ Jefeda ofa ojot doida osnok egens koma beda ofa eita anggur efei oskiyai noba era miniyi oros efen ofogu okora. Beda ofa era meifeti orond osnok egens koma efen efera okora. Nou onnga koma oisa fob, beda ofa aha osnok egens koma esij efen keledai, noba orka ofa jah mod ebsi. Beda ofa ofij osnok egens koma jeskaseda eker keingg ofonskos fog gij mod insa koma.

³⁵ Erek koma beda ofa oh fifi gu osnok egens onnga efen mod ebsi koma. Beda ofa agot oida, 'Bita mar gu ofa jeskaseda efen efera okora emeskeira. Noba gij mona onnga Didif duksons beda dumoh bua deika rot si.' "

³⁶ Beda Yesus ejeka gu Guru egens insa koma oida, "Idu jeska rusnok rugomu insa koma onnga rik osnok egens koma onnga efen efera okora bera ocunc odou onnga okora rot ofa koma?"

³⁷ Beda Guru agama koma oroun oida, "Osnok egens koma onnga ofij ofa bera onnga ocunc odou onnga okora rot ofa." Beda Yesus agot oida, "Tenten! Jefeda bua butunggom mar erek koma rot rusnok enjineg tein ojgomu."

³⁸ Yesus jera efen ruforoker ricira deika noba rijesaga gu monuh egens. Ojaga egens onnga eker jah suma onnga ofoka Marta bera oroun Yesus gij efen mod.

³⁹ Marta efen mokora egens onnga ofoka Maria. Ofa eker desi Yesus jeskaseda eg mar onnga Yesus oftufu rot.

⁴⁰ Tina Marta oina mar ojgomuja. Beda ofa eja skoita Yesus noba agot gu Ofa oida, "Tuhan, dedin edkosa Maria onofij didif erek oskiyai tein guri. Jefeda Bua bubk ofa jeskaseda en noba ofij didif ojgomu."

⁴¹ Tina Yesus agot gu ofa oida, "Marta, bua budou okumkum rot mar ofoukou ojgomuja.

⁴² Tina mar egens bera onnga ofoufem ojgomu, noba Maria odou os rot mar insa koma. Jefeda rusnok egema tein rimeita mar egens koma jeska ofa jinaga guru."

11 ¹ Gij mona juens bera Yesus om eiteij gu Allah. Nou onnga Ofa om eiteij oisa fob, beda efen oforoka egens agot gu Ofa oida, "Tuhan, sis fob Yohanes omftuftu efen ruforoker rot teinefa rua rum riteij gu Allah. Jefeda Bua tein buftuftu memef rot mar insa koma."

² Jefeda Yesus agot gu rua oida, "Gij mona onnga iwa yum iteij gu Allah, beda yagot mar erek kef oida, 'Mefmen meka onnga eker gu mebaga, memef modou os jeskaseda rusnok nomnaga rufra bebin bufoka onnga ebsi komowa erek aksa. Noba memef mois gu Bua jeskaseda bufoka ereij keingg bebin rusnok gu mebif.

³ Memef mois gu Bua jeskaseda Bua bita mar onnga memef mocosu rot gij orofosut mona tein.

⁴ Busuna rot mefmen mar onnga oska jeska modou efesi morototuma erek memef tein mosuna rot mar onnga oska onnga rusnok enjineg runtungom skoita memef fob. But joug memef jeska mar okum onnga ereneni memef.' "

⁵ Beda Yesus agot gu rua deika oida, "Erek osnok egens jeska iwa eja skoita efen mohuj egens gu

motu deis. Beda Ofa agot gu efen mohuj koma oida, 'Edohuji, bita roti ofog orgomu gu didif ojgomu.

⁶Jeska ainsa kef bera dedin edohuj egens onnga encira jeska monuh onnga ah yes, noba ofa eker jera didif. Tina dedin maat egema tein enah nou ofa guru.'

⁷Beda mohuj onnga eker gij mod egens koma agot oida, 'Bua binejeka gu didif rot maat ebeibeyaif guru! Jeska duf joug montoj fob, noba didif jera dedin edeser mahca fob. Jefeda didif dunofij bua ainsa kef enesi.' "

⁸Beda Yesus agot deika oida, "Osnok egens onnga ahca koma onokoja efen mohuj egens koma ojgomuja guru. Jeska osnok egens onnga ohca roti insa koma mojenen ofa guru. Tina ofa omois gu efen mohuj egens insa koma nou roti ojgomuja onjoros ofa edebecki fogora eita roti gu ofa ojgomu.

⁹Jefeda erek iwa irejgei mar jeska Allah, beda ofa emeita mar insa koma gu iwa si. Noba erek iwa yuhca rot mar, beda iwa imek mar insa koma si. Noba erek iwa ingkik montoj, beda montoj omohoda jeska iwa si.

¹⁰Jeska osnok egens onnga erejgei nou mar bera emesma mar koma si. Noba osnok egens onnga ohca nou mar, beda ofa emek mar koma si. Noba osnok egens onnga engkik montoj, beda montoj omohoda jeska ofa si."

¹¹Beda Yesus agot deika oida, "Erek osnok egens erejgei efen meka nou mos, beda meka koma eneita magosu gu ofa ojgomu guru.

¹²Noba erek ofa erejgei meka rot mem ofou, beda meka eneita majangkada gu ofa ojgomu guru.

¹³ Jefeda erek iwa onnga irek rusnok mebif ojgomu ita mar onnga ongnoska gu yeyin iser, beda Allah emeita mar onnga oufamofa rot ekirsa si! Jeska Ofa emeita Efena Ebsi gu rusnok nomnaga onnga rirejgei gu Ofa rot si."

¹⁴ Gij mona juens Yesus ekemeji efena ofogog jeska osnok egens onnga enagot mar guru. Nou onnga efena ofogog koma orogna jeska osnok egens koma odou efesi, beda osnok egens koma agot mar deika sons. Rusnok rufoukou onnga ringk mar insa koma rudou ousaha eteb rot.

¹⁵ Tina rusnok rineya ragot oida, "Ofa eita owesa efek jeska Beelzebul, onnga efena ofogog nomnaga rerin ebirfaga, fogora ekemeji efena ofogog jeska rusnok rudou efesi ojgomu."

¹⁶ Rusnok rineya rudou os rireni Yesus rourou tein, jefeda rua ruis gu Ofa jeskasada Ofa otunggom mar onswos egema deika onnga orocunc rot oida Ofa en jeska Allah rot tenten ojgomu.

¹⁷ Tina Yesus ejginaga rot mar onnga rua rusujohu rot gij rudou efesi ojgomu. Jefeda Ofa agot gu rua oida, "Erek rusnok onnga ringker gij monuh egens risinsa rimagobuma, beda gij mona kahma ebic egens insa koma rimekebema fogora orowora rot rua tein.

¹⁸ Erek koma tein rot rua onnga Bilis ofoka ereij keingg fob. Erek rua rimagobuma, beda rua tein rimekebema fogora runot rot ahais deika guru.

¹⁹ Iwa yagot oida Didif dikemeji efena ofogog jeska rusnok rudou efesi oisouska owesa efek onnga Didif disma jeska Beelzebul. Tina gij mona onnga iwa yeyin ruforoker rikemeji efena ofogog jeska rusnok rudou efesi, beda rua rinesma owesa efek jeska Beelzebul

rot guru. Jefeda koma orocunc rot oida mar onnga iwa yanggot rot Didif bera enerek tenten guru.

²⁰ Tina Didif dikemeji efena ofogog jeska rusnok rudou efesi oisouska owesa efek jeska Allah ojgomu. Noba koma erek orocunc gu iwa oida ebeibeyaif bera Allah ofoka ereij keingg efen rusnok.

²¹ Gij mona onnga osnok egens onnga ofora efek era efen mocongg orot joug gij ofa efen mod, beda efen mareibra eneseiseifa guru.

²² Tina gij mona onnga osnok egens onnga ofora efek ekirsa enjagob osnok egens koma, beda ofa eita osnok koma efen mocongg beda orka efen mareibra nomnaga jeska ofa. Beda ofa ekeba mareibra insa koma gu rusnok rineya.

²³ Osnok egens onnga onot jera Didif guru, beda ofa bera onnga eretei rot Didif ojgomu. Noba osnok egens onnga onofij Didif jeskaseda ohoturu rusnok guru, beda ofa bera otunggom rusnok fogora rimekebema rot ojgomu."

²⁴ Gij mona onnga efena ofogog orogna jeska osnok egens odou efesi fob, beda efena ofogog koma ecira gij monuh onnga owowa jeskaseda ohca osnok egens fogora eker keingg ofonskos gij efen odou efesi. Tina erek efena ofogog enek osnok egens egema tein onnga adaij guru, beda efena ofogog koma osujohu rot oida omoksons skoita osnok egens onnga engker gij sis fob deika.

²⁵ Beda efena ofogog koma ek rot oida osnok egens koma efen odou efesi bera erek eskeira eteb deika fob.

²⁶ Jefeda efena ofogog koma eja noba oroun efena ofogog cinja erfeka deika onnga erek ofogog ekirsa jeska ofa esinsa. Beda efena ofogog koma

nomnaga rijeker morototuma gij osnok egens insa koma odou efesi. Jefeda ebeibeyaif osnok egens insa koma emefera okora ekirsa jeska mona onggaga efena ofogog egens eker gij odou efesi sis fob."

²⁷ Askesi Yesus enagot mar insa koma ros, beda ojaga egens onggaga ont gu rusnok ofoukou rifelesa ois gu Yesus oida, "Oufamofa eteb rot bebin mosib onggaga engker rot bua noba onggaga ongh mengk gu Bua!"

²⁸ Beda Yesus oroun gu ofa oida, "Oufamofa eteb rot rusnok onggaga ringg Allah oga noba ricira rot mar koma tein!"

²⁹ Askesi rusnok rufoukou rinen skoita Yesus deika, beda Ofa agot oida, "Rusnok onggaga rifena ebah gij mona ebeibeyaif bera rufogog ekirsa doska. Rua ruis gu Didif jeskasada dutunggom mar onswos egema deika onggaga orocunc rot oida Didif disma owesa efek jeska Allah fob. Tina rua rimek mar onswos egens deika ojgomu. Mar onswos egens koma bera morototuma erek mar onswos onggaga rusnok ringk jeska nabi Yunus sis fob.

³⁰ Mar onswos jeska Yunus koma bera erek orocunc nou rusnok gij kota Niniwe sis fob. Beda erek koma tein rusnok rimek mar onswos egens jeska Didif, Rusnok Efesa, onggaga emerek mar onggaga orocunc rot rusnok onggaga rifena ebah gij mona ebeibeyaif ojgomu.

³¹ Sis eteb fob ojaga egens onggaga ofoka ereij keingg monuh eteb eja skoita Salomo jeskasada eg mar onggaga ofa oftutu rot odou onggaga efesis eteb. Tina ebeibeyaif osnok egens onggaga ofoka eteb ekirsa jeska Salomo bera enofoguma. Tina rusnok onggaga rifena ebah ebeibeyaif bera runororu efen oga guri. Jefeda

gij mona onnga enja ejgwaga, beda ojaga egens koma emedebecki jera rusnok onnga rifena ebah gij mona ebeibeyaif. Beda ofa omocunc rua erek oska.

³² Noba gij mona onnga enja ejgwaga fob, beda rusnok Niniwe onnga ranggos sis fob bera rimedebecki jera rusnok onnga rifena ebah gij mona ebeibeyaif tein. Beda rua rumocunc rusnok onnga rifena ebah ebeibeyaif erek oska. Jeska sis fob Yunus ejefesij mar jeska Allah gu rusnok gij kota Niniwe, beda rua rimeesa joug rerin mar onnga oska. Tina ebeibeyaif osnok egens onnga ofoka aksa ekirsa jeska Yunus bera enofoguma, tina rusnok onnga rifena ebah ebeibeyaif bera runororu efen oga guri."

³³ Beda Yesus agot deika oida, "Giskini bera rusnok rines mah gij lampu egens fogora ridemi lampu onnga eisa koma guru. Noba rua runocohun lampu onnga eisa koma tein guru. Tina rua rimaha lampu egens koma jah mebera jeskaseda rusnok onnga rumoira gij mod insa koma rimek eisa koma.

³⁴ Rusnok riteij bera erek lampu onnga eisa nou rerin rudou efesi. Erek yeyin iteij ik mar rot koisoisa beda idou ebriyi gij mar rot koisoisa tein. Tina erek yeyin iteij inek mar rot koisoisa guru, beda idou enebriyi gij mar tein guru. Beda iwa iker gij motkobah ros.

³⁵ Iwa isujohu rot koisoisa oida mar onnga enah gu idou efesi bera erek eisa ojgomu, noba enerek motkobah guru.

³⁶ Jefeda erek yeyin idou efesi onnga efen eisa ojgomu, noba motkobah eneya enah gij guru, beda yeyin iteij ah bera erek eisa nou rusnok nomnaga morototuma erek lampu egens onnga eisa nou rusnok nomnaga si."

³⁷ Nou onnga Yesus emfesij rot mar insa koma oisa fob, beda osnok egens jeska ebic Farisi erejgei Ofa jeskaseda en noba get maat morototuma. Jefeda Yesus eja gu efen mod fogora eker gu meja jeskaseda get mar morototuma.

³⁸ Tina Farisi egens koma odou ofos graga rot Yesus jeska ofa et maat, tina Ofa onot efen etma jeni rerin agama erebent rot sismeni fog guri.

³⁹ Ere koma beda Yesus agot gu ofa oida, "Iwa onnga ebic Farisi bera yut mok osku jera bokor efei jah ejmeg ojgomu, tina inosujohu rot mar onnga angh gij mok osku efesi guri! Koma erek iwa isinsa onnga idou efesi ebera rot mar onnga oska ofoukou, noba idou esma keingg mareibra ofoukou, noba isujohu rot mar onnga ofogog ojgomuja.

⁴⁰ Iwa idou bera osumsumu eteb! Ere koma iwa inejginaga rot oida Allah bera onnga ontunggom mar koma efen ejmeg jera mar koma efen efesi tein guri?

⁴¹ Tina erek iwa ikeba mar onnga angh esij bokor efesi gu rusnok onnga rufojingki, beda koma omorocunc rot oida yeyin idou efesi bera erek eskeira tein si.

⁴² Mar okum eteb emah keingg iwa onnga ebic Farisi! Iwa iroru jeni mar onnga agama erebent anggot rot fogora iwa ikeba yeyin maat efed oknama gu Allah fob ojgomu. Ere koma tina iwa inoga ojga rot mar erek tenten nou rusnok enjgineg rerin mar oga guru. Onnga oufamofa bera, iwa yuftuftu rusnok rot teinefa Allah odou okora rot rua, noba inesitit isinsa ifoka rot maat efed insa koma onnga iwa ikeba gu Allah guru.

⁴³ Mar okum eteb emah keingg iwa onnga Farisi! Jeska iwa idou os iker gij kursi eteb onnga angh jah

rusnok nomnaga rudou gij mod onggga rusnok rum riteij gu Allah gij. Noba iwa idou os jeskaseda rusnok rugif gu iwa gij mona onggga rua rik iwa gu pasar ojpgomu.

⁴⁴Mar okum eteb emah keingg iwa onggga Farisi! Jeska erek rusnok rudog onggga rufoka enah tumu guru, jefeda rusnok rinejginaga rot oida moksus egens enah jah suma guru. Erek koma tein rot iwa, jeska rusnok rinek rot yeyin mar onggga oska guru, jefeda rua rusujohu rot oida yeyin mar onggga oska enah gu iwa guru."

⁴⁵Beda osnok egens onggga odou ebriyi eteb gij hukum Musa agot gu Yesus oida, "Akeina Guru, mar onggga Bua banggot insa koma bera erek buga oruh rot memefo!"

⁴⁶Beda Yesus oroun oida, "Mar okum eteb emah keingg iwa onggga Guru-Guru agama tein si! Jeska iwa yuftufts rusnok rot mar okum ofoukou jeskaseda rua rincira gij ojpgomu. Tina iwa inofij rua jeskaseda rincira rot mar okum insa koma erek oskiyai tein jinaga guri!

⁴⁷Okum eteb emah keingg iwa si! Iwa itunggom Allah efen nabi-nabi rudog erek ongkoskamoka ojpgomu. Tina yeyin iker bera onggga ranggob nabi-nabi insa koma sis fobo!

⁴⁸Jefeda koma erek iwa yuitij rot mar onggga oska onggga yeyin iker runtunggom skoita nabi-nabi insa koma sis fob ojpgomu. Jeska rua bera ragob nabi-nabi koma, noba iwa bera onggga itunggom nabi-nabi rudog nou rua ojpgomu.

⁴⁹Sis eteb fob Allah agot oida, 'Didif dumobk dedin nabi-nabi jera rasul-rasul skoita rua. Beda rua

rimagob rineya noba rimeita mar okum gu rineya tein. '

⁵⁰ Jefeda rusnok onggga rifena ebah gij mona ebeibeyaif bera rimesma mar okum eteb jeska Allah rot nabi-nabi nomnaga onggga rusnok ranggob onjoros deisef tein si.

⁵¹ Gij mona onggga dojunmeni bera rusnok ranggob Habel. Noba gij mona kahma deika beda rua ranggob Zakharia tein gij mona onggga ofa ot deismos gu mebera jera Mod Allah tein. Jefeda iwa ijginaga rot tenten ojgomu rot oida, rusnok onggga rifena ebah gij mona ebeibeyaif bera rimesma mar okum eteb jeska Allah rot nabi-nabi insa koma nomnaga onggga rusnok ranggob fob si!

⁵² Mar okum eteb emah keingg iwa onggga Guru-Guru agama! Jeska iwa ijginaga rot Allah oga efen ofou fob. Tina iwa isinsa inororu efen oga insa koma rot tenten guri! Noba iwa iragou joug moroju jeskaseda rusnok enjgineg rudou enebriyi gij efen oga tein guru."

⁵³ Nou onggga Yesus enja jeska rua onggga Farisi jera Guru-Guru agama insa koma, beda rua rutkonu oska eteb rot Ofa. Jefeda rua ruga erahah rot mar ofoukou skoita Ofa noba rijeka joug Ofa rot mar ofoukou deika ojgomu.

⁵⁴ Jeska erek Ofa agot mar onggga ekirsa rot rerin hukum agama beda rimagei Ofa rot ojgomu.

12¹ Rusnok rufoukou doska rimeradgoduma jeskaseda riajga Yesus. Beda Yesus agot gu efen ruforoker oida, "Iwa yut joug idou rot rua onggga Farisi, jeska rua rineita mar jeni onggga rua risinsa ruftuftu rot gu rua enjgineg tein jinaga guru. Koma bera erek roti efed onggga orok mokcin roti nomnaga.

²Jeska mar onnga oska onnga rusnok ridemdemi ebeibeyaif bera emah rot tomnomna gu rusnok nomnaga gij mona kahma si.

³Noba mar onnga iwa yanggot erek wuswus nou motu bera rusnok nomnaga rimeg rot gij mona onnga efeinah deika si. Noba mar onnga iwa yanggot ohuhunu gu rusnok gij rusu efesi bera rimagot rot tomnomna gu rusnok nomnaga gij mona kahma si."

⁴Beda Yesus agot deika oida, "Iwa inemeesa rot rusnok onnga rerin owesa efek jeskaseda ragob iwa guru. Jeska enadaij nou rua rutunggom mar onnga ekirsa jeska koma gu iwa deika guru.

⁵Tina onnga tenten bera, iwa imeesa rot Allah ojgomu. Jeska gij mona onnga rusnok ranggos fob, beda Ofa efen owesa efek adaij jeskaseda eij rerin rifena gij mahmei meren ojgomuja. Jefeda iwa imeesa rot Allah ojgomu.

⁶Rusnok ruhu mem cucurwahi efaga cinja fogora rirengk rot fifi onnga oskiyai. Erek koma, tina Allah ejginaga rot mem ofokai insa koma nomnaga erek jeni fob.

⁷Noba Ofa tein ejginaga rot yeyin ibir efeji nomnaga onnga angh tumu iwa. Jefeda iwa inemeesa guru, jeska ahah Allah eiteij bera iwa erek ofoufem ekirsa jeska mem cucurwahi insa koma ojgomu!"

⁸Beda Yesus agot deika oida, "Erek osnok egens agot jah rusnok rudou oida ofa bera erek dedin osnok egens, beda Didif, Rusnok Efesa tein, dimagot jah Allah efen malaikat-malaikat rufoukou rudou rot oida ofa bera erek dedin osnok egens si.

⁹Tina, erek osnok egens orot keingging gu rusnok rudou rot oida ofa enerek dedin osnok egens guru, beda Didif tein dumorot keingging gu Allah efen

malaikat-malaikat rudou rot oida ofa enerek dedin osnok egens jinaga guru.

¹⁰ Noba erek rusnok ragot mar onnga oska rot Didif, Rusnok Efesa, beda adaij nou Allah osuna rot rerin mar onnga oska koma jeska rudou efesi ojgomu. Tina erek rusnok ragot mar onnga oska rot Efena Ebsi Allah, beda Allah onosuna rot rerin mar onnga egens insa koma jeska rudou efesi jinaga guru.

¹¹ Noba gij mona onnga rusnok rikris iwa skoita ebirfaga monuh, era skoita ebirfaga mod onnga rusnok rum riteij gu Allah gij, era skoita ebirfager enjgineg tein jeska iwa iroru Didif fob, beda iwa inejeka idou efesi rot mar onnga iwa imagot rot isinsa gu rua guru.

¹² Jeska gij mona insa koma bera Efena Ebsi omoftu iwa gij idou efesi rot mar onnga imagot gu rua si."

¹³ Osnok egens onnga ot gu rusnok insa koma rifelesa ois gu Yesus oida, "Akeina Guru, bubk dedin edkora jeskaseda ofa ekeba mareibra onnga maka anggos jeska egema gu didif ojgomu foga."

¹⁴ Beda Yesus oroun gu ofa oida, "Edohuj, rusnok egema tein bera runocunc Didif jeskaseda dut deismos gu gefekesa rot gegam mareibra koma guru."

¹⁵ Beda Yesus agot gu rusnok rufoukou jah suma oida, "Iwa yut joug idou efesi jeskaseda idou enesma keingg mareibra ofoukou guru. Jeska osnok egens enesma eiteij ah onnga oufamofa oisouska efen mareibra ofoukou onnga ofa ohoturu fob guru."

¹⁶ Beda Yesus efesij rot mar onnga orocunc erek kef oida, "Orna mei ahtah egens efen mekeni egens onnga eteb doska noba ofa esma maat efek ofoukou jeska mekeni egens koma.

¹⁷ Beda ofa osujohu gij odou efesi rot oida, 'Maat ofoukou dedin kef bera dimesah sinefo?'

¹⁸ Ofa osujohu rot mar insa koma fogora oga eris rot mar erek kef oida, 'Didif dumohoda dedin mod egens onnga dinsah dedin maat gij fob ojgomu. Beda didif dimei mod egens onnga eteb ekirsa fogora disah dedin maat jera mareibra ofoukou gij ojgomu.'

¹⁹ Beda ofa osujohu gij efen odou efesi deika oida, 'Ebeibeyaif dedin maat jera mareibra onnga erek adaij nou fogora diker rot ongnoskamoka gij tahun ofoukou deika si.'

²⁰ Tina Allah agot gu ofa oida, 'Bua budou osumsumu eteb rot ros! Jeska gij motu insa kef bera bua bimagos ojgomu. Jefeda mar ofoukou onnga bua buhoturu nou bisinsa fob bera emah gu rusnok enjgineg ojgomu.'

²¹ Jefeda rusnok nomnaga onnga ruhoturu mar ofoukou nou risinsiyai ojgomu bera rimek mar erek osnok egens koma ojgomu si. Jeska ahah Allah eiteij bera rerin mar ofoukou insa koma onofij rua jinaga guru."

²² Beda Yesus agot deika oida, "Erek koma jefeda, Didif dudou os dagot gu iwa oida enadaij nou iwa ijekjeka idou efesi rot maat onnga imet era mei onnga imej jeskaseda ifena ebah ojgomuja guru. Noba iwa inejekjeka idou efesi rot meisoufa onnga imergi tein guru.

²³ Jeska mar enjgineg gij yeyin iteij ah kef bera ofoufem ekirsa jeska maat onnga imet. Noba mar enjgineg nou yeyin ifaga bera ofoufem ekirsa jeska meisoufa onnga imergi tein.

²⁴ Iwa isujohu rot mem onnga ofu gu mebaga esda. Mem insa koma rinerefa maat gij mekeni guru. Noba

mem runohoturu maat gij rerin mod tein guru. Tina yeyin Ika onnga eker gu mebaga bera ot joug rua ojgomuja. Jefeda mem koma rit maat orofosut mona. Noba ahah Allah eiteij bera iwa erek ofoufem ekirsa jeska mem insa koma ojgomu.

²⁵ Noba erek iwa ijekjeka idou efesi rot mar insa koma ojgomuja, beda koma onofij iwa jeskaseda ifena ebah rot mona onnga ekirsa jinaga guru.

²⁶ Enadaij nou iwa itunggom mar erek insa koma jinaga guru. Jefeda iwa inekjeka idou efesi rot mar egema tein guru.

²⁷ Iwa isujohu rot marfok onnga ah gu mektah. Marfok insa koma enefarur gij mar guru. Noba marfok koma eneb meisoufa nou esinsa guru. Raja Salomo bera efen mareibra ofoukou doska. Noba ofa efen meisoufa onnga erek ongoska eteb tein. Tina marfok insa koma bera erek ongoska eteb ekirsa jeska raja Salomo efen meisoufa insa koma ojgomu.

²⁸ Allah bera onnga ot joug mosodum onnga ah gu mektah tein. Noba mosodum insa koma bera ah gij mona onnga estir ojgomu. Beda ris mah gij mosodum koma fogora eribseb noba eseseifa ojgomu. Jefeda Ofa omot joug iwa erek ahais ekirsa ojgomu. Tina iwa idou onoruru mar insa koma rot tenten enesi.

²⁹ Jefeda iwa inekjeka idou efesi rot mar onnga imet era mar onnga iwa imej guru. Iwa idou enefeneinei rot mar egema tein guru.

³⁰ Jeska rusnok onnga runoruru Allah guru bera ruhca mar erek koma ojgomuja. Tina yeyin ika Allah bera ejjinaga rot oida iwa icosu rot mar insa koma fob ojgomu.

³¹ Jefeda onnga oufamofa eteb bera, iwa iroru mar onnga Allah odou os rot ojgomu, beda Ofa emeita mar insa koma nomnaga gu iwa si."

³² Erek koma beda Yesus agot deika oida, "Iwa bera irek domba-domba onnga Allah ot joug. Jefeda iwa inemeesa rot mar egema tein guru. Jeska oisouska efen odou onnga eskeiramera rot iwa bera Ofa odou os eita eiteij ah onnga efeinah gu iwa gu mebaga.

³³ Jefeda iwa yuhu yeyin mareibra ojgomu. Noba fifi onnga imesma jeska mar insa koma bera ikeba gu rusnok onnga rufojingki tein. Beda iwa imesah mareibra ofoukou gu mebaga. Jah suma bera mareibra ah aibin rot ojgomuja. Jeska mareibra onnga angh gu mebif bera rusnok rukoreka ojgomu noba magjir tein et fogora eseiseifa.

³⁴ Jeska rusnok onnga ruhoturu mareibra ofoukou gu mebif bera rusujohu rot mar onnga mebif efen ojgomuja. Tina rusnok onnga ruhoturu mareibra gu mebaga, beda rua rusujohu rot mar onnga mebaga efen ojgomuja."

³⁵ Beda Yesus agot deika oida, "Iwa yut joug rot iskusk jeskaseda iwa insejah nou yufij yeyin ebirfaga gij mona onnga ofa ensaga keingg iwa fob. Iwa isejah yeyin meisoufa onnga imergi, noba ris mah gij yeyin lampu jeskaseda eisa ojgomuja.

³⁶ Koma erek rusnok onnga rufij rerin ebirfaga egens. Rua rut joug rot mona onnga ofa oksons en jeska monuh egema onnga rusnok ruina maat keingg gosnok onnga gomoskotuma. Nou onnga ofa ensaga gu efen mod noba engkik montoj, beda rua onnga rufij ebirfaga egens koma ruhoda montoj jeska ofa rot ebeirens.

³⁷ Erek ofa ek, tina rua rut joug noba rinsejah nou rufij ofa ojgomu. Jefeda onnga tenten bera, ebirfaga egens koma emergi meisoufa erek rua onnga rufij fogora omobk efen ruforoker insa koma jeskaseda riker gu meja. Beda ofa emecka maat gu rua tein si.

³⁸ Jefeda oufamofa eteb rot rusnok onnga rumfij rerin ebirfaga egens insa koma. Jeska erek ofa en gu motu fob, era gu motu deis fob, tina rua riker joug rot ofa ros, beda rua rimesma oufamofa eteb jeska ofa si.

³⁹ Tina onnga tenten bera, erek osnok egens ejginaga rot mona onnga rusnok onnga rukoreka mar rimen skoita efen mod, beda ofa omot joug rot iskusk jeskaseda rua runoira gij efen mod guru.

⁴⁰ Erek koma jefeda iwa tein yut joug idou efesi rot iskusk, jeska iwa inejginaga rot mona onnga Didif, Rusnok Efesa, bera dumoksons en guru."

⁴¹ Beda Petrus ejeka gu Yesus oida, "Tuhan, bebin buga koma bera buncunc rot memef onnga bebin ruforoker ei, era gu rusnok nomnaga ei?"

⁴² Beda Yesus oroun oida, "Erek osnok egens omfij efen ebirfaga rot iskusk, beda efen ebirfaga koma emeita owesa efek gu ofa jeskaseda ekeba maat gu ruforoker enjgineg onnga rimfarur nou ebirfaga egens koma.

⁴³ Noba erek osnok egens koma eita mar insa koma rot iskusk gij mona onnga ebirfaga egens koma onksons en fob, beda ofa odou efaga ouka eteb rot si.

⁴⁴ Jeska efen ebirfaga koma emeita owesa efek ekirsa gu ofa rot fogora ofa emagei ebirfaga egens koma efen mareibra nomnaga nou ofa.

⁴⁵ Tina erek ofa agot oida, 'Dedin ebirfaga bera enen ebeirens guru. Ofa eker dektek ros ojgomu.' Jefeda ofa obu ebirfaga egens koma efen rusnok enjineg onnga rufij ofa, noba osnok egens koma et maat ofoukou noba ej mofut efeyi fogora ebirfaga erebibeit rot mofut efeyi ojgomuja.

⁴⁶ Beda ebirfaga egens insa koma emen gij mona egens onnga ofa enejginaga rot guru. Beda ebirfaga egens koma emaha mar okum eteb keingg ofa noba obk ofa jeskaseda riker jera rusnok enjineg onnga runororu Allah oga guru.

⁴⁷ Noba erek osnok egens onnga ejginaga rot efen ebirfaga odou os rot fob, tina ofa enesejah nou ofij efen ebirfaga guru, era ofa onotunggom mar onnga ebirfaga egens koma odou os rot guru, beda ofa emesma okum eteb jeska efen ebirfaga egens tein si.

⁴⁸ Tina erek osnok egens enejginaga rot mar onnga efen ebirfaga odou os rot enesi, beda mar okum onnga ofa esma jeska efen ebirfaga koma bera erek oskiyai ojgomu. Jeska erek rusnok risma mar ofoukou fob, beda rerin ebirfaga omois gu rua jeskaseda rufij erek ofoukou ojgomu. Noba erek rusok onnga risma owesa efek eteb jeska rerin ebirfaga, beda ebirfaga koma omobk rua jeskaseda rutunggom mar onnga erek ofoufem ekirsa nou ofa ojgomu."

⁴⁹ Beda Yesus agot deika oida, "Didif din jeskaseda dis mah eisa egigir eteb gu mebif. Noba Didif dudou os oida mah eisa egigir eteb insa koma et mebif nomnaga fob!

⁵⁰ Tina Didif dijinaga rot oida mar okum eteb emeita efera okora eteb gu Didif si. Noba dudou okum eteb rot mar koma ojgomuja onjoros mona onnga Didif dincira gij mar koma fob ojgomu.

⁵¹ Enadaij nou iwa isujohu rot oida Didif din gu mebif jeskaseda dufij rusnok fogora riker rot rudou onnga eskeiramera moguma guru. Jeska Didif din jeskaseda oisouska mar onnga Didif duftu bera rusnok rudou emekebema rot ojgomu.

⁵² Ebeibeyaif rusnok rufok cinja riker erek egens. Tina gij mona kahma beda rudou emekebema rot dedin duga. Noba rusnok rugomu rumok eretei skoita gosnok gegeka, era gosnok gegeka gomok eretei skoita rusnok rugomu.

⁵³ Meka emekeba jeska efen efesa orna ni, efesa orna emekeba jeska efen meka ni, mosu emekeba jeska efen efesa ojaga ni, efesa ojaga emekeba jeska efen mosu ni, mogona emekeba jeska efen mogona ni, mefina emekeba jeska efen mefina ni."

⁵⁴ Beda Yesus agot gu rusnok rufoukou insa koma deika oida, "Gij mona onnga iwa ik mocgoj ofog onnga ontumbah orogna, beda iwa yagot oida ai juens mos es. Beda tenten, mos ens ojgomu.

⁵⁵ Beda gij mona onnga mof enen jeska monuh yes, beda iwa yagot oida mosua omowa. Beda tenten, mosua fob.

⁵⁶ Tina iwa irek rusnok onnga ruhurmei mar ojgomu. Jeska iwa ik mar insa koma beda idou ejginaga rot mona onnga nou mos ens jera mona onnga mosua. Erek koma tina, teinefa fogora iwa idou inebriyi gij mar onnga orocunc jeni rot mar onnga emecira gij mona deisef guri?"

⁵⁷ Beda Yesus agot deika oida, "Teinefa fogora iwa isinsa inoga ojga rot mar moguma rot tenten gurei?"

⁵⁸ Erek osnok egens odou os ekris iwa skoita hakim egens jeskaseda ofa oga ojga rot efen mar oga, beda iwa ireni rot ahais jeskaseda idou emeskeira moguma

sons ojgomu. Erek iwa ineita mar insa koma guru, beda ofa omoroun iwa skoita hakim. Beda hakim omobk iwa skoita polisi. Beda polisi rimaha iwa gij mod oskusk.

⁵⁹ Beda iwa imah gij mod oskusk ojgomuja onjoros imoh osnok egens insa koma efen mar okowu nomnaga sons fog."

13¹ Gij mona insa koma bera rusnok rineya riflesij gu Yesus osok gij rot teinefa Gubernur Pilatus anggob rusnok jeska monuh Galilea askesi rua rugif gu Allah sis fob.

² Beda Yesus agot gu rua oida, "Jefeda iwa isujohu rot oida rusnok insa koma bera rerin mar onnga oska ekirsa jeska rusnok Galilea rineya jeska rua ranggos erek koma fob ei?

³ Erek koma guru. Tina erek iwa tein inemeesa joug yeyin mar onnga oska guru, beda mar okum emedi iwa tein fogora iwa tein imagos si.

⁴ Teinefa rot rusnok rufok setka noba cinja orfomu onnga ranggos gij kota Yerusalem gij mona onnga mod aksa eteb esiri keingg rua. Iwa isujohu koma bera orocunc rot oida rua rerin mar onnga oska ekirsa jeska rusnok rineya onnga ringker gij kota Yerusalem ei?

⁵ Erek koma guru. Tina erek iwa tein inemeesa joug yeyin mar onnga oska guru, beda mar okum emedi iwa fogora iwa imagos tein si."

⁶ Beda Yesus agot deika oida, "Osnok egens efen mega ara egens onnga ot gu efen mekeni anggur. Gij mona juens beda ofa ejek mega egens koma rot efen efek, tina enek efek egema tein guri.

⁷ Jefeda ofa agot gu osnok egens onnga omfij gij efen mekeni oida, 'Didif dijek dedin mega egens kef

rot efen efek gij tahun rara orgomu fob, tina dinek mega koma efen efek jinaga guru. Jefeda buf mega egens ojgomu, jeska mega koma ot rourou gij dedin mekeni ojgomu.'

⁸Tina osnok egens onnga omfij koma agot oida, 'Tuan, erek buitij rot beda mega koma ot gij tahun egens deika fog ojgomu. Beda didif dimeji mebi rejrej mega efaga egens koma noba dumogun maat gij mebi jeskaseda ofogu rara.

⁹Beda naker gij tahun egens deika ojgomu. Noba erek efen efek beda oufamofa eteb nou bua. Tina erek efen efek guru, beda dumof mega egens koma si.' "

¹⁰Gij mona onnga Sabat egens beda Yesus oftufu rusnok gij mod egens onnga rua rum riteij gu Allah gij.

¹¹Ojaga egens onnga efena ofogog engker gij odou efesi enofogu jah suma. Efena ofogog insa koma edi ofa fogora ofa maren gij tahun rara setka noba cinja orfomu fob. Ofa ejmeg ofora agab jefeda ofa onot rot iskusk guru.

¹²Nou onnga Yesus ek ojaga egens koma, beda Ofa ois gu ojaga egens koma oida, "Asoka, Didif dusuwa bua jeska mar onnga otunggom bua erek marenib fob!"

¹³Beda ofa aha efen etma esij ofa. Beda ainsa koma ojaga egens koma ot aharuka noba ofa esitit gu Allah.

¹⁴Jefeda ebirfaga mod onnga rusnok rum riteij gu Allah gij bera otkonu oska rot Yesus jeska Ofa eita eskeira gu osnok egens gij mona onnga Sabat. Jefeda ofa agot gu rusnok jah suma oida, "Gij mona cinja erfens bera rusnok rifarur gij mar. Jefeda erek

iwa idou os isma eskeira beda iwa in gij mona onnga rimfarur insa koma ojgomu, tina inen rot mar insa koma gij mona onnga mimif mum miteij gu Allah guru!"

¹⁵ Beda Yesus agot gu ofa oida, "Bua buhurmei mar ojgomu! Gij mona onnga Sabat beda iwa nomnaga isuwa yeyin lembu era keledai jeska yeyin mod fogora iroun mar koma jah mebah jeskaseda ita mei gu.

¹⁶ Tina teinefa rot ojaga egens kefo! Ofa tein bera onnga onjuj jeska efen meimowa Abraham. Noba Bilis ontunggom ofa gij tahun rara setka noba cinja orfomu fob fogora ofa maren ojgomuja! Tina iwa isujohu rot oida enadaij nou ofa osuwa jeska mar okum insa kef gij mona onnga Sabat gurei!"

¹⁷ Nou onnga Yesus anggot mar insa koma fob, beda ebirfaga mod insa koma mojen ofa eteb rot. Tina rusnok jah suma rudou efaga ouka eteb rot mar onswos onnga Yesus ontunggom jah gu rifekesa fob.

¹⁸ Yesus agot gu rua oida, "Mona onnga Allah ofoka ereij keingg rusnok bera erek kef:

¹⁹ Osnok egens erefa mega mos efej egens gij efen mekeni. Sismeni mega mos efej insa koma bera erek efej ai ojgomai. Tina mega mos efej insa koma er erek mega onnga akseij eteb fob. Beda mem ofoukou ojoka efefa gij mega esta insa koma."

²⁰ Beda Yesus agot mar orocunc juens deika gu rua. Ofa agot oida, "Mona onnga Allah ofoka ereij keingg rusnok bera erek kef:

²¹ Ojaga egens eita roti efed onnga erek ai oskiyai. Beda ofa orohoh roti efed insa koma jera gandum fogora gandum koma ejefifij erek eteb doska deika fob."

²² Erek koma noba askesi Yesus otoiru jah kota Yerusalem beda Ofa oira gij kota-kota onggga angh gij monuh insa koma tein. Beda Ofa oftufu mar gu rusnok gij kota-kota insa koma.

²³ Beda osnok egens ejeka gu Yesus oida, "Tuhan, erek rusnok oskiyai bera rimesma eiteij ah onggga efeinah ei?"

²⁴ Beda Yesus oroun oida, "Iwa ireni rot iskusk jeskaseda imoira gij montoj onggga emeinma ojgomu. Jeska rusnok rufoukou bera rimereni rot tina rua nomnaga runoira gij montoj onggga emeinma insa koma guru.

²⁵ Gij mona onggga ebirfaga mod of joug montoj jeska iwa fob, beda iwa imot jah mebah noba ingkik montoj koma ojgomuja. Noba iwa imois gu ebirfaga mod egens koma oida, 'Tuan, buhoda montoj jeska memefo.' Tina tuan insa koma omoroun gu iwa oida, 'Didif dinejginaga rot iwa guru! Iwa in jeska guaidu?'

²⁶ Beda iwa imoroun gu ofa oida, 'Tuan, mimif mint maat morototuma jera bua sis fob! Noba bua buftufu memef gij mefmen monuh sis fob.'

²⁷ Tina ofa omoroun gu iwa oida, 'Didif dinejginaga rot iwa guru. Noba didif dinejginaga rot monuh onggga iwa in jeska tein guru. Iwa ija jeska didif ojgomu. Iwa bera erek rusnok onggga rufogog ojgomu!' "

²⁸ Beda Yesus agot gu rusnok insa koma deika oida, "Gij mona onggga Allah ofoka ereij keingg rusnok, beda iwa imek yeyin imower Abraham ni, Ishak ni, Yakub ni, jera nabi-nabi nomnaga risitit Allah. Tina iwa imebisa noba imeita ifera okora eteb gij mona insa koma si. Jeska Allah omokoja iwa jeska ojgomu.

²⁹ Rusnok rimen jeska monuh onggga mowa orogna ni, monuh onggga mowa esiri gij ni, monuh onggga

agosu ni, monuh onnga emaga ni. Beda rua nomnaga rimet maat morototuma noba rimefaga ouka eteb morototuma jera Allah si.

³⁰ Tina rusnok onnga ruhca rufoka onnga aksa gij mona onnga ebeibeyaif bera runofoka aksa gij mona onnga emen deika guru. Noba rusnok onnga runohca rufoka onnga aksa gij mona ebeibeyaif guru bera rimesma rufoka onnga aksa gij mona onnga emen si."

³¹ Gij mona insa koma beda rusnok rineya onnga ebic Farisi rin skoita Yesus noba ragot gu Ofa oida, "Akeina, Bua bineker jah sif guru. Bua bija jah monuh enjgineg ojgomu, jeska raja Herodes odou os agob Bua."

³² Beda Yesus oroun gu rua oida, "Raja Herodes bera odou efesis noba ofogog tein. Jefeda bua bagot gu ofa oida, 'Gij mona deisef jera monog tein bera dikemeji efena ofogog jeska rusnok rudou efesi noba dita eskeira gu rineya onnga marenir tein. Beda gij mona juomu bera dimeita mar nomnaga oisa fob.'

³³ Erek koma, tina deisef, monog, ckog tein bera Didif dumotoiru ojgomuja onjoros dinsaga gu kota Yerusalem fob. Jeska Didif ducosu rot danggos gij kota Yerusalem morototuma erek nabi-nabi onnga ranggos jah suma sis fob tein ojgomu!

³⁴ Didif dudou okora eteb rot iwa onnga kota Yerusalem! Yeyin imower bera onnga ranggob rusnok onnga Allah ombk skoita iwa sis fobo. Noba rua bera onnga rira mamu riredi rusnok rineya onnga Allah ombk skoita rua fogora ranggos tein. Sis fob Didif dudou os ducohun iwa nomnaga erek mongkukar mosu onnga ocohun efer gij efembra efesi. Tina iwa idowu joug rot ojgomu.

³⁵ Jefeda Allah eneker gij yeyin Mod egens jah ifekesa deika guru. Mod koma emah erek rourou ojgomu. Noba iwa inek Didif deika guru onjoros mona onnga iwa yuis rot oida, 'Oufamofa eteb gu Bua onnga bin oisouska Tuhan ofoka!' "

14 ¹ Gij mona onnga Sabat egens, beda Yesus eja jah Farisi egens onnga ofoka aksa efen mod jeskaseda get maat morototuma. Rusnok nomnaga jah suma ruhobut Ofa ojgomuja.

² Osnok egens onnga efen aki jera etma efifij noba emageima bera eker doida Yesus.

³ Beda Yesus ejeka gu rua onnga ebic Farisi insa koma jera Guru-Guru agama rineya jah suma oida, "Ororu mifmin agama erebent bera mimif mita eskeira gu rusnok gij mona onnga Sabat ei era gurei?"

⁴ Tina rusnok insa koma riker moubsaha ojgomu. Jefeda Yesus aha efen etma esij osnok egens koma beda eita eskeira gu ofa. Beda Ofa obk osnok egens koma jah efen mod.

⁵ Erek koma beda Ofa agot gu rua deika oida, "Erek iwa yeyin iser era yeyin sapi egens onnga ensiri gij mebi efesi gu mona onnga Sabat, beda iwa imofij rua fogora yuku rua jeska mebi efesi insa koma ei era gurei?"

⁶ Tina rusnok insa koma runoroun mar gu Yesus guru. Rua rudou ousaha jefeda riker toumou ojgomu.

⁷ Yesus eyajga rusnok rineya onnga ruiru gij mod onnga ebirfaga Farisi egens insa koma efen. Rineya jeska rua rijeker esij kursi eteb jah rusnok nomnaga rudou jeskaseda rusnok rugif gu rua ojgomu. Nou

ongga Yesus ek mar insa koma beda Ofa efesij rot mar orocunc egens erek kef oida,

⁸"Gij mona onnga rusnok ruis gu iwa jeskaseda in noba it maat morototuma jera gosnok onnga gomoskotuma, beda iwa inejeker esij kursi eteb egens jah rusnok nomnaga rudou guru.

⁹Jeska erek rua ruis gu osnok egens onnga ofoka aksa ekirsa jeskaseda engker gij kursi eteb egens, beda rua rimekemeji iwa jeska kursi koma fogora mojen iwa eteb rot.

¹⁰Ongga oufamofa bera, gij mona onnga rusnok ruis gu iwa jeskaseda in, beda iwa ijeker jah gu rusnok rijmeg ojgomu. Beda rua rimen skoita iwa noba ragot gu iwa oida, 'Edohuji, iwa in noba iker gij kursi eteb egens kef jah rusnok rudou ojgomu.' Erek koma beda rusnok insa koma rumougif gu iwa.

¹¹Jeska Allah omoin keingg rusnok nomnaga onnga rufra risinsa rufoka erek Aksa si. Noba erek rusnok ruin keingg risinsa rufoka erek enaksa guru, Beda Allah omofra rerin rufoka erek aksa si."

¹²Erek koma beda Yesus agot gu ebirfaga Farisi egens koma oida, "Gij mona onnga bua buina maat nou mona era motu, beda bunois gu bebin obhujir ni, obkoser ni, bebin ebskir rineya ni, era runa mei ahtah ni jeskaseda rin noba rit maat morototuma jera bua guru. Jeska gij mona kahma beda rua rumois gu bua tein jeskaseda bin noba bit maat morototuma jera rua. Beda koma erek rua risesa maat insa koma sons gu bua rot ojgomu.

¹³Tina onnga oufamofa bera, gij mona onnga bua buina maat eteb, beda bua buis gu rusnok onnga rufojingki ni, rusnok onnga raki emageima ni, rusnok onnga rufumbohah ni, rusok onnga riteij ofou ni.

¹⁴ Bua bufij rusnok erek koma beda Allah emeita oufamofa eteb gu bua rot si. Jeska enadaj nou rusnok insa koma risesa maat ofoukou sons gu bua guru. Tina gij mona onga rusnok onga rudou ebsi komowa rindebecki jeska ranggos fob, beda bua bimesma bebin bufons rot onga erek ongoska ekirsa si."

¹⁵ Nou onga osnok egens koma engg rot mar insa koma onga Yesus anggot fob beda ofa agot oida, "Oufamofa eteb rot rusnok onga ruina maat eteb morototuma jera Allah gu mebaga!"

¹⁶ Beda Yesus efesij mar orocunc egens erek kef oida, "Gij mona juens beda osnok egens onga oina maat eteb bera ois gu efen mohujir rufoukou jeskaseda rin noba rit maat morototuma jera ofa.

¹⁷ Nou onga mar nomnaga ensejah fob, beda ofa obk osnok egens skoita rua jeskaseda agot gu rua oida, 'Iwa in jeska maat nomnaga ensejah fob.'

¹⁸ Tina rusnok insa koma nomnaga rinen guri. Osnok egens jeska rua ragot oida, 'Didif dineja enesi, jeska didif dingk mekeni egens fob, noba didif dudou os dijek dedin mekeni koma fog.'

¹⁹ Beda osnok egens eneya deika agot oida, 'Didif dineja deisef guru, jeska didif dingk sapi efaga setka fob, noba didif dudou os durohrus dedin sapi-sapi koma jah mektah sismeni fog.'

²⁰ Beda osnok egens eneya deika agot oida, 'Didif ainsa kef bera duskotu arja deisef fob, jefeda didif dineja jah suma enesi.'

²¹ Erek koma jefeda osnok egens insa koma oksons noba agot rot mar insa koma nomnaga gu efen ebirfaga. Beda ebirfaga egens koma otkonu oska eteb rot. Jefeda ofa agot gu osnok oforoka egens

insa koma onnga ofij ofa oida, 'Bua bija ebeirens jah moroju osubu deis, beda buroun rusnok onnga rufojingki ni, rusnok onnga raki emageima ni, rusnok onnga riteij ofou ni, rusnok onnga rufumbohah ni, rua koma rin jah sif ojgomu.'

²² Nou onnga osnok egens koma oroun rusnok insa koma fob, beda ofa agot gu efen ebirfaga oida, 'Tuan, didif duntunggom mar onnga bua bumbk didif rot fob, tina bebin mod efesi enebera rot rusnok enesi.'

²³ Beda ebirfaga egens koma agot gu ofa oida, 'Jefeda bua bija jah moroju onnga angh rejrej monuh insa kef noba biradgodu rusnok jah suma jeskaseda rua tein rin noba rit maat fogora dedin mod emebera rot rusnok si.

²⁴ Tina rusnok insa koma onnga didif dui gu rot sismeni bera rinen guri! Jefeda gij mona kahma bera rua rinet maat morototuma jera didif deika jinaga guru!' "

²⁵ Gij mona insa koma bera rusnok rufoukou rincira morototuma jera Yesus. Beda Yesus ekikif noba agot gu rua oida,

²⁶ "Erek osnok egens odou os ororu Didif, tina ofa odou okora rot efen rusnok erek mosu ni, meka ni, mohona ni, efesa ni, mokosa ni, meyera ni, era ofa esinsa tein erek ekirsa jeska Didif, beda enadaij nou ofa ororu Didif jinaga guru.

²⁷ Noba erek osnok egens onoitij rot eita efera okora morototuma erek Didif dimeita difera okora guru, beda enadaij nou ofa ororu Didif guru.

²⁸ Gij mona onnga osnok egens odou os ei mod onnga aksa, beda ofa ofosuit efen fifi egaho

jeskaseda ek rot oida efen fifi onggga adaj nou ei mod egens rot oisa ebeirens fob ei, era gurei.

²⁹ Jeska erek ofa aha mod egens koma efen efeb ojgomu ros, tina efen fifi oisa jeska, beda mod egens koma onoisa guru. Erek koma beda rusnok onggga rik mod egens koma bera rumotut rot ofa si.

³⁰ Rua rimagot oida 'Wah! Osnok egens kefi ei mod eteb, tina onoisa ebeirens guri.'

³¹ Era raja egens emagobuma jera raja enjgineg. Tina sismeni bera ofa omosujohu rot oida efen tentarer rufok ribu setka bera adaj nou rimagobuma jera raja enjgineg koma efen tentarer rufok ribu setka egeka ei era gurei?

³² Ofa osujohu rot, tina efen tentarer enadaj guru. Jefeda gij mona onggga raja enjgineg koma efen tentarer onggga askesi gu moroju ros, beda ofa omobk efen ruforoker skoita raja enjgineg koma jeskaseda ragot gu ofa oida ofa onodou os rimagobuma jera ofa guru!"

³³ Beda Yesus agot deika oida, "Erek koma rot iwa tein. Erek iwa inaha mar nomnaga jah jeskaseda iroru Didif guru, beda enadaj nou iwa iroru Didif jinaga guru."

³⁴ Beda Yesus agot deika oida, "Maroforu mos bera oufa nou mar ofoukou onggga mimif mireska. Tina erek maroforu mos insa koma onotka deika guru, beda mimif maha maroforu mos koma jah ojgomuja noba minereska mar deika guru. Jefeda erek iwa isujohu rot mar insa koma onggga iwa ig rot iskusk ojgomu beda idou emebriyi gij efen ofou si."

³⁵ (14:34)

15 ¹ Gij mona juens rusnok onggga ruhoturu pajak jera rusnok rineya onggga rusnok Yahudi

rusujohu bera onnga rierek oska tein rumohoturuma jera Yesus jeskaseda rig rot efen oga.

²Tina rusnok onnga ebiec Farisi jera rineya onnga Guru-Guru agama ruga erahah rot rusnok insa koma. Jefeda rua ragot rot Yesus oida, "Wah! Ofa kef oroun rusnok insa koma onnga rerin mar onnga oska ofoukou fogora et maat morototuma jera rua tein ojgomu!"

³Erek koma beda Yesus efesij mar orocunc egens gu rua erek kef oida,

⁴"Osnok egens jeska iwa efen domba efaga wuntin egens, tina domba orins ejeseiseifa ojgomu. Beda osnok egens koma emeja jeska efen domba-domba efaga setka cinja tohkuru noba cinja tohkuru, noba ofa ojohca domba orins koma onnga enseiseifa. Ofa omohca domba orins koma ojgomuja onjoros ofa ek domba egens koma sons.

⁵Noba gij mona onnga ofa enja ek efen domba orins koma sons fob, beda ofa emaha domba koma esij efembra,

⁶noba orka sons rot odou efaga ouka eteb. Beda ofa omohoturu efen mohujir jera rusnok enjineg tein, noba agot gu rua oida, 'Mimif nomnaga mifaga ouka eteb morototuma ojgomu, jeska dedin domba orins onnga enseiseifa sis fob bera dita sons fob.'

⁷Erek koma tein, rua onnga ringker gu mebaga bera rudou efaga ouka ekirsa rot osnok egens onnga emeesa joug efen mar onnga oska fob jeska rusnok setka cinja tohkuru noba cinja tohkuru onnga rusujohu oida rinemeesa joug rerin mar onnga oska guru."

⁸Beda Yesus agot deika oida, "Didif difesij rot mar orocunc erek kef tein oida, ojaga egens efen fifi perak

setka, beda egens eseiseifa. Jefeda ofa es mah gij efen lampu fogora ohca fifi insa koma. Beda ofa tein omog mar ofora ejeres jeska mersa tein jeskaseda ohca fifi insa koma.

⁹ Nou onnga ofa ek fifi insa koma sons fob, beda ofa omois gu efen mohujir nomnaga fogora agot gu rua oida, 'Iwa idou efaga ouka morototuma jera didif, jeska dik dedin fifi onnga enseiseifa insa koma fob!'

¹⁰ Erek koma tein, Allah efen malaikat-malaikat rudou efaga ouka eteb rot osnok egens onnga emeesa joug efen mar onnga oska fob."

¹¹ Beda Yesus agot orocunc egens erek kef oida, "Osnok egens efen efeserga gorna gegeka.

¹² Efesa onnga osuira agot gu efen meka oida, 'Akeina, bua bikeba bebin mareibra oknama gu didif gij mona ebeibeyaif ojgomu.' Jefeda meka koma ekeba efen mareibra oknama gu efen efeserga gegeka tein.

¹³ Gij mona egema deika, beda efesa onnga osuira insa koma ohu efen mareibra insa koma nomnaga jeska fob. Beda ofa ecira jah monuh onnga angh Yes. Beda ofa era efen fifi erengk mar onnga oska ofoukou ojgomu.

¹⁴ Gij mona onnga ofa efen fifi nomnaga oisa fob, beda mosona eteb ongk rusnok rufoukou onnga ringker gij monuh insa koma. Beda mosona ongk ofa tein.

¹⁵ Jefeda ofa eja noba efarur nou osnok egens onnga engker gij monuh insa koma. Osnok egens koma obk ofa jeskaseda ot joug efen mek gu mektah ojgomu.

¹⁶ Erek koma beda ofa ocosu rot et maat ofora ejeres onnga mek et, jeska rusnok rineya rineita maat egema gu ofa guru.

¹⁷ Erek koma beda ofa osujohu gij odou efesi oida, 'Rusnok onnga rumfij akeina bera rita maat ofoukou, noba mosona ongak didif jah sif ojgomuja.

¹⁸ Jefeda didif dumoksans skoita akeina noba dagot gu ofa oida didif bera duntungom mar onnga oska gu Allah jera ofa tein.

¹⁹ Jefeda enadaj nou ofa ejeka didif erek efen efesa deika guru, tina ofa ejeka didif erek efen osnok egens onnga ofij ojgomu.'

²⁰ Ofa osujohu rot mar insa koma, beda ofa ecira sons skoita efen meka. Nou onnga ofa enesaga doida meka efen mod ai erek yes ros, beda efen meka koma ek ofa enen. Jefeda ofa ofof skoita efen efesa egens insa koma rot odou onnga erirei eteb. Beda ofa oijugeij efen efesa noba onsa ofa efen omnu tein.

²¹ Beda efesa egens koma agot gu efen meka oida, 'Akeina, didif bera dita mar onnga oska gu Allah jera bua tein. Jefeda enadaj nou bua bijeka didif erek bebin ebesa deika guru. Tina bua bijeka didif erek bebin osnok egens onnga ofij bua ojgomu.'

²² Tina meka koma ois gu efen rusnok onnga rumfij ofa noba agot gu rua oida, 'Iwa ifof ebeirens noba ijeita meisoufa onnga ongnoskamoka eteb nou dedin edesa egens kef. Beda bita mas nou ofa rot efen etma otufou jera sepatu nou efen aki tein.

²³ Beda iris sapi efer egens onnga efes ebriyi fogora yuina maat. Jeska didif dudou efaga ouka rot dedin edesa kef onnga duroun fob!

²⁴ Jeska sis fob bera dedin edesa egens kef erek anggos fob, tina ebeibeyaif erek ofa efena ebah sons.

Sis fob ofa ejeseiseifa, tina ebeibeyaif dik ofa sons fob.' Jefeda rua insa koma nomnaga rit maat noba rudou efaga ouka rot.

²⁵ Ainsa koma tein bera efesa onggga osumbohka emfarur gu mektah ros. Nou onggga ofa oksons noba esaga doida mod, beda ofa eg rusnok ridi moubseja noba ruka tein.

²⁶ Beda ofa ejeka gu osnok egens onggga ofij efen meka oida, 'Ruga ofoukou jah akeina efen mod bera rot meidu?'

²⁷ Beda osnok egens koma oroun oida, 'Tuan, bebin obkosa ongksons en fob! Noba mekeb obk rusnok jeskaseda riris sapi efer onggga efes ebriyi, jeska ofa oroun efen efesa sons rot odou onggga eskeiramera eteb fob!'

²⁸ Erek koma beda efesa onggga osumbohka insa koma otkonu oska eteb rot. Jefeda ofa odobu joug omoira gij mod efesi koma. Beda meka orogna jeska mod koma noba agot gu ofa oida, 'Edesa, bua buira gu mod ojgomu.'

²⁹ Tina efesa koma oroun gu efen meka oida, 'Akeina, gij tahun ofoukou fob bera didif dif mar rot ahais nou bua fob! Noba didif dunokoja mar egema tein onggga bua banggot rot gu didif jinaga guru. Tina bua bineita mar onggga efera ojuj erek kambing efaga egens tein gu didif jeskaseda duina maat keingg dedin edohujir guri.

³⁰ Tina bebin ebesa egens kef era bebin mareibra erahaisomu tumu rujager onggga ebireira ojgomu. Erek koma tina ofa ongksons, beda bua biris sapi efer onggga efes ebriyi eteb nou ofa ojgomo!'

³¹ Beda meka koma oroun gu ofa oida, 'Edesa. Bua bingker desi didif ojgomu. Noba dedin mareibra nomnaga bera ah gu bua tein ojgomu.

³² Tina mimif muina maat noba mifaga oka rot ojgomu. Jeska obkosa koma erek anggos fob, tina ebeibeyaif efena ebah sons. Ofa erek enseiseifa, tina ebeibeyaif bera dik ofa sons fob.' "

16 ¹ Erek koma beda Yesus agot gu efen ruforoker oida, "Osnok orna mei ahtah egens efen osnok egens onnga omfij fogora agei efen fifi. Beda gij mona egema deika ofa eg jeska rusnok enjgineg rot oida osnok egens koma onnga agei efen fifi bera era fifi koma erahaisomu gij mar rourou ojgomu.

² Jefeda ofa ois gu osnok egens koma jeskaseda en, beda ejeka gu ofa oida, 'Bagot gu didif rot mar onnga oska onnga didif dingg rot bua fobo? Jeska bua bira dedin fifi rourou erek koma jefeda ebeibeyaif enadaj nou bua bagei dedin fifi deika guru!'

³ Beda osnok egens koma osujohu oida, 'Jeska tuan onsuna rot dedin dufoka fob, jefeda didif dutunggom meidu? Didif dunofora efek guru, jefeda dinef mar gij mekeni tein guru. Noba erek direjgei mar jeska rusnok enjgineg beda mojen didif eteb rot.

⁴ Didif dutunggom mar meidu jeskaseda rusnok rumoroun didif sons erek rerin mohuj egens gij rerin mod?' Jefeda osnok egens koma otunggom mar erek kef:

⁵ Ofa ois gu rusnok onnga orna mei ahtah efen mar okowu onnga angh gu rua. Beda ofa ejeka gu osnok egens jeska rua oida, 'Mar okowu onnga angh gu bua bera meidu?'

⁶ Beda osnok egens koma agot oida, 'Mar okowu onnga angh gu didif bera erek miniyi zaitun debeji wuntin egens.' Beda osnok onnga ofij orna mei ahtah koma agot gu ofa oida, 'Erek koma beda bua buh miniyi zaitun debeji setka cinja gu didif ojgomu.'

⁷ Beda ofa ejeka gu osnok egens egema deika oida, 'Mar okowu onnga angh gu bua bera erek meidu?' Beda osnok egens koma oroun oida, 'Mar okowu onnga angh gu didif bera erek gandum karon ribu egens.' Beda osnok egens onnga ofij orna mei ahtah koma agot oida, 'Erek koma beda bua buh gandum karon wuntin cinja orfomu gu didif ojgomu!'

⁸ Erek koma jefeda nou onnga orna mei ahtah insa koma engg rot mar onnga osnok egens koma ontunggom nou ofa fob, beda ofa esitit efen osnok egens koma, jeska ofa eita mar rot odou onnga etesis eteb. Onnga tenten bera, rusnok mebif rerin rudou etesis ekirsa gij rerin rita mar moguma erek ekirsa jeska rusnok onnga riker gij Allah efen eisa ojgomu.

⁹ Jefeda erek rusnok onnga rira mareibra onnga mebif efen jeskaseda rimeita rusnok rudou eskeira rot iwa ojgomu, beda Allah omoroun rusnok onnga rita mar erek koma nou Ofa tein. Fogora rua rimeker gu mebaga nou mona onnga ah aibin ojgomuja.

¹⁰ Erek koma jeska osnok egens onnga odou ocosu efei ahtah gij mar onnga oskiyai bera odou ocosu efei ahtah gij mar onnga eteb tein. Tina osnok egens onnga odou onocosu efei ahtah gij mar onnga oskiyai guru, beda ofa odou onocosu efei ahtah gij mar onnga eteb tein guru.

¹¹ Jefeda erek iwa idou onocosu efei ahtah rot mar onnga mebif efen guru, beda teinefa rot mar onnga

tenten onnga Allah efen. Jeska ofa onocunc iwa jeskaseda ragei mar insa koma jinaga guru.

¹² Noba erek iwa idou onocosu efei ahtah rot mareibra onnga rusnok rineya rerin guru, beda iwa inesma mareibra nou isinsa tein jinaga guru."

¹³ Beda Yesus agot deika oida, "Enadaij nou osnok egens ofij efen ebirfaga gegeka tein guru. Jeska ofa odou okora eteb ekirsa rot efen ebirfaga egens, noba odou oska rot ebirfaga onnga egema ojgomu. Noba ofa esejah odou efesi jeskaseda ofij efen ebirfaga egens rot iskusk, tina ofa odou eskes rot egema. Erek koma tein, enadaij nou iwa yufij Allah noba yuhca mareibra ofoukou onnga mebif efen erek egeka tein morototuma jinaga guru."

¹⁴ Nou onnga rusnok rineya jeska ebic Farisi ringg rot mar onnga Yesus anggot insa koma fob, beda rua rutkonu oska eteb rot Ofa. Jeska rua bera rirek rusnok onnga ruhca mareibra ofoukou nou risinsa ojgomuja. Jefeda rua rufc rusum gij mar onnga Ofa anggot insa koma ojgomu.

¹⁵ Beda Yesus agot gu rua oida, "Iwa ita mar jah rusnok rudou jeskaseda rua rusujohu rot oida iwa bera rirek rusnok onnga rudou ebsi komowa ojgomu. Tina Allah ejjinaga rot mar onnga oska onnga angh gij idou efesi fob. Jeska mar onnga rusnok mebif rufra erek ofoufem bera erek mar onnga oska efekeifa ahah Allah eiteij ojgomu.

¹⁶ Sis fob nabi-nabi ruftuoftu rot hukum Musa ojgomuja onjoros mona onnga Yohanes en noba eita baptis gu rusnok. Noba ebeibeyaif rusnok rig rot Allah oga onnga oufamofa osok gij rot teinefa Ofa ofoka ereij keingg rusnok. Jefeda rusnok rufoukou rireni rot

ahais jeskaseda ruiru jera rusnok onggga Allah ofoka ereij keingg insa koma.

¹⁷ Noba mebi jera mebaga emejeseiseifa si, tina mar ofoka egens tein eneseiseifa jeska Allah efen hukum jinaga guru.

¹⁸ Erek koma noba idou ah keingg rot kef oida, idu onggga ens efen mohona noba onjoskotu mohona onggga efeinah deika, beda ahah Allah eiteij bera goga gesiri morototuma ojjomu fob. Noba erek osnok egens oskotu ojaga egens onggga eja jeska efen mahina tein, beda koma erek goga gesiri morototuma ojjomu tein."

¹⁹ Beda Yesus efesij rot mar orocunc erek kef oida, "Osnok egens onggga orna mei ahtah eteb enofoguma. Ofa ergi meisoufa onggga onggkoskamoka, noba orofosut mona bera ofa ek efen eiteij ah onggga ebera rot mareibra ofoukou ojjomuja.

²⁰ Erek koma noba orofosut mona bera osnok egens onggga ofojingki onggga ofoka Lazarus eker gu montoj onggga orna mei ahtah insa koma efen jeskaseda erejgei mar jeska ofa. Lazarus maren ofos jefeda ofa efera okora eteb ojjomuja.

²¹ Noba mosona onggk ofa eteb tein jefeda ofa odou os et maat ofora ejeres onggga esiri jeska meja onggga orna mei ahtah egens koma et maat esij. Erek koma beda mes en noba omna efen efera okora insa koma tein.

²² Beda Lazarus koma agos noba malaikat-malaikat ofra ofa jah mebaga fogora eker desi Abraham. Beda orna mei ahtah koma tein agos noba rusnok rijesah ofa efen efaga gij moksus.

²³ Beda orna mei ahtah koma eita efera okora eteb gij mahmei meren ojjomuja. Nou onggga ofa eyajga

jah skida, beda ofa ek Abraham eker gij monuh onnga ah yes, noba ofa ek Lazarus tein eker desi ofa.

²⁴ Beda ofa ois gu Abraham oida, 'Akeina Abrahamo, bucunc budou onnga okora rot didif fogora bubk Lazarus jeskaseda ofa ec etma otufou gij mei, beda en noba ered darni ofou. Jeska didif dut gij mah onnga eisa egigir eteb noba difera okora eteb!'

²⁵ Tina Abraham agot gu ofa oida, 'Edesa, bua budou ah keingg rot gij mona onnga goga gefena ebah gu mebi imbeja ros. Jeska gij mona insa koma bua bera bebin biteij ah onnga ongnoska noba ebera rot mareibra ofoukou ojgomuja. Tina Lazarus bera enek mar erek koma guru. Ofa maren jefeda efera okora ojgomu. Tina ebeibeyaif bera ofa eker gu mebaga rot ongnoska fob. Noba bua bah jah suma fogora bifera okora ojgomuja.

²⁶ Erek koma noba mogenamena ah joug mimif. Jefeda enadaij nou rusnok jeska memef men jah suma guru, noba enadaij nou rusnok jah suma tein rin jah sif tein jinaga guru.'

²⁷ Beda orna mei ahtah egens koma agot oida, 'Erek koma beda, Akeina Abraham, bua bubk Lazarus skoita dedin akeina efen mod ojgomu.

²⁸ Jeska dedin edkoser rufok cinja onnga riker gu jah suma ros. Bubk ofa oftufu rua jeskaseda rua tein rinen jah mahmei meren fogora rita rifeira okora eteb erek didif guru.'

²⁹ Beda Abraham oroun oida, 'Mar Efeyi Ebsi onnga Musa jera nabi-nabi runggu rot bera enah jah suma fob. Adaij nou rua rik mar koma gu risinsa noba ruroru jeni rot ojgomu.'

³⁰ Tina orna mei ahtah egens koma oroun oida, 'Akeina Abraham, koma bera enadaij rot enesi. Tina

erek osnok egens onnga anggos fob eja skoita rua, beda rua rimeesa joug rerin mar onnga oska si!

³¹ Beda Abraham agot gu ofa sons oida, 'Sis fob rua runororu mar onnga Musa jera nabi-nabi ranggot rot guru, jefeda rua runororu osnok egens onnga edebecki jeska anggos efen oga tein guru.' "

17 ¹ Yesus agot gu efen ruforoker oida, "Mar onnga ereita rusnok rudou efesi fogora risiri gij mar onnga oska bera enahuma ojgomuja. Tina okum eteb emah keingg rusnok onnga rucunc mar koma gu rusnok enjgineg fogora rua tein rita mar onnga oska koma insa koma.

² Jeska erek osnok egens otunggom mar skoita rusnok onnga ruroru Didif erek ruforokai ruroru Didif, fogora rua runororu Didif deika guru, beda Allah omofra okum eteb doska keingg osnok egens koma rot si. Mar egema tein onnga rusnok rita gu ofa rot bera enerek mar okum onnga Allah emeita gu ofa rot guru.

³ Jefeda iwa yut joug isinsa idou efesi rot mar insa koma ojgomu. Erek yeyin yuhuj egens onnga otunggom mar onnga oska fob, beda iwa yuftuftu ofa rot ahais ojgomu. Noba erek ofa emeesa joug efen mar onnga oska insa koma, beda ita idou onnga eskeira rot ofa deika.

⁴ Erek ofa otunggom mar onnga oska eneya rot ofosma cinja erfeka gij mona juens skoita iwa, beda ofa oksons skoita iwa rot ofosma cinja erfeka jeskaseda ois gu iwa oida, 'Didif dimeesa joug dedin mar onnga oska insa koma fob,' beda iwa ita idou onnga eskeira rot ofa deika ojgomu."

⁵ Erek koma beda Yesus efen ruforoker ragot gu Ofa oida, "Tuhan, bufij memef jeskaseda modou

ororu Bua rot ahais ojgomu." Beda Yesus oroun gu rua oida,

⁶"Erek iwa idou ororu Didif erek ai oskiyai ojgomu, beda koma adaij jeskaseda itunggom mar okum erek yagot gu mega egens kef oida, 'Bukub bisinsa jeska mebi kef noba bujot gij mei mojuma efei!' Beda mega egens koma omoruru jeni yuga ojgomu."

⁷Beda Yesus agot gu efen ruforoker oida, "Erek osnok egens ofij iwa gij yeyin mekeni era ot joug yeyin domba-domba, beda giskini iwa inagot gu ofa oida, 'Bua bin noba bit maat sismeni fog,' guru.

⁸Tina giskini iwa imagot gu ofa oida, 'Bua buina maat nou didif fog. Beda birgi meisoufa onggga ebsi noba burka maat efej koma gu didif ojgomu. Noba bua biker joug didif askesi dit maat oisa fog, beda bua bit maat tein.'

⁹Giskini bera iwa inesitit osnok egens koma onggga ofij iwa guru, jeska ofa otunggom mar onggga iwa yubk ofa rot ojgomu.

¹⁰Erek koma tein, gij mona onggga iwa itunggom mar onggga rusnok enjgineg rubk iwa rot, beda iwa yuin keingg isinsa ifoka fogora yagot gu rua oida, 'Memef bera merek rusnok onggga mofij ojgomu. Jefeda memef mororu mar onggga rusnok ranggot rot gu memef ojgomu.' "

¹¹Askesi Yesus ecira jah kota Yerusalem, beda Ofa oira anjob monuh Samaria jera Galilea.

¹²Nou onggga Ofa omoira gij kota egens beda rusnok rufok setka onggga rufos maren jefeda rifea okora eteb rot rin skoita Ofa. Rua rut ai yes jeska Ofa,

¹³beda ruis gu Ofa oida, "Tuhan Yesus, bucunc budou onggga okora rot memefo!"

¹⁴ Nou onnga Yesus engk rua, beda Ofa agot oida, "Iwa ija noba icunc isinsa ifaga skoita imam-imam." Nou onnga rusnok insa koma rincira gu moroju ros, beda rufos ejerek eskeira fob.

¹⁵ Nou onnga osnok egens jeska rua ek rot oida efen ofos nomnaga eskeira fob, beda ofa oksons rot odou onnga efaga ouka noba esitit Allah.

¹⁶ Beda ofa es okeibi gu mebi jah Yesus odou noba ois oufamofa eteb gu Yesus rot. Osnok egens koma bera ojga jeska monuh Samaria.

¹⁷ Beda Yesus agot oida, "Didif dik oida rusnok rufok setka bera rita eskeira fob. Jefeda rufok cinja tohkuru riker sinefo?"

¹⁸ Teinefo fogora rineya onnga Yahudi koma runoksons jeskaseda ruis oufamofa eteb gu Allah guro. Erek osnok egens kef jeska monuh Samaria bera oksons rot ojgomo."

¹⁹ Beda Yesus agot gu ofa oida, "Bua bidebecki noba bija ojgomu. Bua budou ororu Didif rot tenten fob, jefeda bua bisma eskeira fob."

²⁰ Gij mona juens rusnok rineya onnga jeska ebic Farisi rijeka gu Yesus oida, "Gij mona juaho fogora Allah emen noba ofoka ereij keingg rusnok?" Beda Yesus oroun oida, "Enadaij nou iwa ifokor gij mar onnga orocunc rot fogora idou ejginaga rot mona onnga Ofa emen jinaga guru.

²¹ Noba iwa ineg rusnok ragot oida, 'Allah ofoka ereij keingg rusnok gij monuh egens jah suma,' guru! Jeska ebeibeyaif Allah ofoka ereij keingg rusnok jah gu ifekesa fob."

²² Erek koma beda Yesus agot gu efen ruforoker oida, "Gij mona onnga emen beda iwa idou omosos

rot jeskaseda ik Didif, Rusnok Efesa, deika. Tina iwa inek Didif deika guru.

²³ Beda rusnok enjgineg rimagot oida. 'Ofa eker jah suma!' Era rua rimagot oida, 'Ofa eker jah sif!' Tina iwa inororu rerin ruga koma jinaga guru.

²⁴ Jeska gij mona onggga Didif, Rusnok Efesa, duksons en fob, beda rusnok gij monuh nomnaga rimek mar erek moc efna eteb gu mebaga.

²⁵ Tina rot sismeni bera Didif dimeita difera okora eteb fogora rusnok onggga riker gij mona ebeibeyaif rumokoja Didif fog, beda dumoksons en si.

²⁶ Gij mona onggga Didif, Rusnok Efesa, duksons en fob, beda rusnok rimek mar morototuma erek rua rik gij mona onggga Nuh eker gu mebif sis eteb fob.

²⁷ Gij mona insa koma bera rusnok rita mar erek giskini ojgomu. Rua ruina maat ni, rij mei ni, rumoskotuma ni, ojgomuja onjoros mona onggga Nuh oira gij kabar mei onggga ofa ontunggom fob. Beda ainsa koma tein mos es ojgomuja onjoros mei ofot noba endi rusnok nomnaga fogora ragos gij mei insa koma.

²⁸ Rusnok ringk rot mar erek insa koma tein gij mona Lot eker gu mebif sis eteb fob. Gij mona insa koma bera rusnok rit maat ni, rij mei ni, ruhu mar ni, rirefa marsi gij mekeni ni, rii mod ni ojgomuja.

²⁹ Tina gij mona onggga Lot orogna jeska kota Sodom, beda mah efesi kreni onggga eisa eteb ojuj jeska mebaga noba et rusnok insa koma nomnaga fogora ragos ojgomu.

³⁰ Rusnok rimek mar erek insa koma tein gij mona onggga Didif duksons en jeska mebaga bera erek koma tein.

³¹ Jefeda gij mona insa koma bera rusnok onnga ringker jah mod majmeg bera runoira gij mer efesi jeskaseda rita mareibra fog guru. Tina rua rufof ebeirens ojgomu. Noba erek koma tein rot rusnok onnga rif mar gij rerin mekeni. Rua runoksons jah rerin mod sismeni fog guru. Tina rua rufof rot ebeirens ojgomu.

³² Iwa idou ah keingg rot mar onnga encirej Lot efen mohona sis fob.

³³ Noba erek rusnok rusujohu ekirsa rot mar onnga riteij ah kef efen, beda rua rineita eiteij ah onnga efeinah guru. Noba erek rusnok runororu mar onnga risinsa rudou os gij riteij ah kef guru, tina rua ruroru mar onnga Allah odou os rot ojgomu, beda rua rimeita eiteij ah onnga efeinah tein si.

³⁴ Gij mona insa koma bera gosnok gegeka gahca nou motu. Beda gegema gomosok jah mebaga noba gegema geker ojgomu ros.

³⁵ Gij mona insa koma bera gojaga gegeka gos gandum efef gij mokaga. Beda gegema omosok jah mebaga noba gegema geker.

³⁶ ((Beda gosnok gorna gegeka gefarur gu mektah. Noba gegema gomosok jah mebaga, noba gegema geker ojgomu.))"

³⁷ Erek koma beda Yesus efen ruforoka rijeka gu Ofa oida, "Tuhan, memef memek mar koma gij monuh sinefo?" Beda Yesus oroun oida, "Gij mona onnga iwa iajga mem meg ofu jah skida, beda iwa ijginaga rot oida mar onnga anggoss enahuma. Beda iwa erek koma tein, iwa imek mar onnga orocunc rot mona onnga Didif duksons en tein si."

18 ¹ Erek koma beda Yesus agot mar orocunc egens gu efen ruforoka jeskaseda rua rum

riteij rot ahais noba rineita rudou onggga eskes rot guru.

²Ofa agot oida, "Osnok hakim egens eker gij kota egens. Ofa enemeesa rot Allah era rusnok egema tein guru.

³Gij mona insa koma bera ojaga onggga eja mesina eker gij kota koma tein. Gij orofosut mona bera ofa eja skoita hakim egens koma noba agot gu ofa oida, 'Rusnok onggga rufogog rot didif runtunggom mar onggga oska gu didif fob. Jefeda bua buga ojga rot dedin mar okowu insa koma ojgomu.'

⁴Tina gij mona ofoukou fob bera hakim egens koma onoga ojga rot ofa enesi. Beda hakim egens koma osujohu gij odou efesi oida, 'Didif dinemeesa rot Allah era rusnok egema tein guru.

⁵Tina ojaga eja mesina egens koma en skoita didif gij orofosutut mona jeskasada ois gu didif rot efen mar okowu fogora dufonskos rot ofa! Jefeda didif dumoga ojga rot ofa efen mar okowu insa koma jeskasada ofa onoksons skoita didif deika guru!" "

⁶Beda Yesus agot oida, "Iwa isujohu rot mar onggga hakim egens koma oga eris rot ojgomu!

⁷Jeska hakim koma bera efen odou onggga oska, tina ofa ofij ojaga egens koma ojgomu. Jefeda Allah, onggga odou oufamofa eteb, bera omofij rusnok onggga ofa oncunc fob si. Jeska rua tein rum riteij gu Ofa gij orofosut mona jera motu rot rerin mar okum. Noba Allah eneker dektek rot mar onggga rum riteij gu Ofa rot guru.

⁸Gij mona onggga estir bera Ofa omofij rua rot tenten si. Tina gij mona onggga Didif, Rusnok Efesa, duksons en jah mebif, beda dimek rusnok rineya onggga rudou ororu Didif rot tenten fob ei, era gurei?"

⁹ Beda Yesus agot mar orocunc gu rusnok onnga rusujohu rot oida risinsa rudou erek ebsi komowa tina rusnok rineya bera rudou oska ojgomu.

¹⁰ Ofa agot oida, "Gosnok gegeka geja jah mod onnga rusnok rum riteij gu Allah gij jeskaseda gom geiteij gu Allah. Gegema jeska goga bera jeska ebic Farisi noba gegema bera erek rua onnga ruhoturu pajak nou raja Kaisar.

¹¹ Beda osnok egens onnga ebic Farisi insa koma ot noba esitit esinsa ofoka gu Allah. Ofa om eiteij oida, 'Allah, didif duis oufamofa gu Bua jeska didif bera dinerek rusnok rineya onnga rukoreka mar guru, era erek rusnok onnga rufogog guru, era erek rusnok onnga risiri morototuma guru. Noba didif duis oufamofa gu Bua jeska didif dinerek osnok egens kef onnga ohoturu pajak nou raja Kaisar tein guru.

¹² Tina gij orofosutut ari egens bera didif dinet maat gij mona jueka guru. Noba didif dikeba dedin mareibra oknama skoita rusnok enjgineg ojgomu.'

¹³ Erek koma beda osnok egens koma onnga ohoturu pajak ot ai yes jeska. Beda ofa ougif ebirfaga rot odou onnga okora, noba mojen ofa tein rot efen eita mar. Beda ofa om eiteij oida, 'Allah, bucunc budou onnga okora rot didif ojgomu, jeska didif dita mar onnga oska fob.' "

¹⁴ Beda Yesus agot deika oida, "Onnga tenten bera, osnok egens koma onnga ohoturu pajak oksons rot efen odou onnga ebsi komowa ahah Allah eiteij fob. Tina osnok egens koma onnga ebic Farisi bera guru. Erek koma jeska Allah omain keingg rusnok nomnaga onnga risitit risinsa rufoka si. Noba Ofa omofra rusnok rufoka onnga ruin keingg risinsa rufoka si."

¹⁵ Rusnok rufoukou rurka rerin ruforoka rifes skoita Yesus jeskaseda Ofa aha efen etma esij rua fogora rita oufamofa gu rua. Nou onggga Yesus efen ruforoka rifes ringk mar insa koma, beda rua ritaha joug rusnok insa koma.

¹⁶ Tina Ofa agot gu efen ruforoker oida, "Iwa ineragou joug ruforoka rifes koma guru, tina yuitij rot oida rua rin skoita Didif ojgomu. Jeska rusnok onggga rita rudou efesi erek ruforoka rifes insa kef rerin rudou efesi bera rumoira jera rusnok onggga Allah ofoka ereij keingg si.

¹⁷ Tina erek rusnok rineita rudou efesi erek ruforoka rifes kef rerin rudou efesi jeskaseda ruiru jera Allah efen rusnok guru, beda enadaij nou rua rijerek Allah efen rusnok jinaga guru."

¹⁸ Osnok egens onggga efen mareibra ofoukou en skoita Yesus noba ejeka gu Ofa oida, "Guru onggga oufamofa, didif dutunggom mar meidu jeskaseda disma eiteij ah onggga efeinah noba ah aibin?"

¹⁹ Beda Yesus oroun gu ofa oida, "Bua bijeka Didif erek onggga oufamofa rot meidu? Jeska rusnok egema tein bera runoufa guru. Allah esinsiyai bera onggga oufamofa ojgomu!

²⁰ Bua bijginaga osok gij mar onggga hukum Musa anggot rot erek kef oida, 'Iwa inesiri morototuma guru ni, inagob rusnok guru ni, inokoreka mar guru ni, inocuwei mar gij rusnok enjgineg guru ni, yugif gu yeyin ika jera isu ojgomu ni.' "

²¹ Beda osnok egens koma agot gu Yesus oida, "Didif duroru mar insa koma nomnaga sis mona onggga duforokai onjoros mona deisef fob."

²² Nou onggga Yesus eg rot mar insa koma beda Ofa agot oida, "Tina mar ofoka egens bera enahuma ros.

Bua buhu bebin mareibra nomnaga fogora bikeba fifi onnga bua binsma jeska mar insa koma gu rusnok onnga rufojingki ojgomu. Beda bua bimesma mar onnga oufamofa eteb gu mebaga si. Beda bua buroru Didif."

²³ Nou onnga osnok egens koma engg rot mar onnga Yesus anggot fob, beda efen odou okumkum rot ojgomu, jeska ofa efen mareibra ofoukou.

²⁴ Yesus ek ofa, beda agot oida, "Ongga tenten bera okum eteb nou rusnok onnga ruisum gij rerin mareibra ofoukou jeskaseda ruiru jera rusnok onnga Allah ofoka ereij keingg.

²⁵ Okum eteb nou unta efaga egens oira gij mohunu mos esta. Tina okum eteb ekirsa nou rusnok onnga ruisum gij rerin mareibra ofoukou jeskaseda ruiru jera rusnok onnga Allah ofoka ereij keingg ojgomu."

²⁶ Rusnok onnga rig mar insa koma ragot oida, "Wah! Erek koma jefeda enadaij nou rusnok egema tein risma eiteij ah onnga efeinah jeska Allah guru!"

²⁷ Beda Yesus oroun oida, "Tenten, oisouska rusnok risinsa rerin owesa efek bera enadaij guru. Tina oisouska Allah efen owesa efek bera rua rimeita eiteij ah onnga efeinah si."

²⁸ Beda Petrus agot gu Yesus oida, "Tuhan, teinefa rot memefo? Memef maha mefmen mar nomnaga jah jeskaseda mororu Bua fob!"

²⁹ Beda Yesus agot oida, "Ongga tenten bera, idu onnga eja jeska efen mod ni, mohona ni, meiba ni, mosu ni, meka ni, era efeser ni jeskaseda oira jera rusnok onnga Allah ofoka ereij keingg fob,

³⁰ beda ofa emesma mar insa koma erek ofoukou deika gij eiteij ah kef. Noba gij mona onnga emen bera ofa emesma eiteij ah onnga ah aibin si."

³¹ Yesus oroun efen ruforoker rufok setka kungkob erfeka jeskaseda riker gu risinsa. Beda Ofa agot gu rua oida, "Mimif minja jah kota Yerusalem. Noba mar nomnaga onggga nabi-nabi runggu gij Mar Efeyi Ebsi osok gij Didif, Rusnok Efesa, bera emah gij efera si.

³² Rua rimaha Didif gu rusnok onggga Yahudi guru. Beda rua rimagot mar onggga oska rot Didif ni, ruga omoruh Didif ni, rumoskurfi rot Didif ni, rimangha Didif ni, beda ragob Didif.

³³ Noba gij mona juomu, beda Didif dimedebecki jeska danggos si."

³⁴ Tina Yesus efen ruforoker rudou enebriyi gij mar insa koma jinaga guru. Mar koma ah jejema jeska rua ojgomuja.

³⁵ Gij mona onggga Yesus enesaga doida kota Yerikho, beda osnok egens onggga eiteij ofou eker gu moroju efembra noba erejgei mar jeska rusnok onggga rirabj ofa.

³⁶ Nou onggga ofa engg rusnok ruga ofoukou onggga rincira gu moroju koma, beda ofa ejeka oida, "Meidu bera komo?"

³⁷ Beda rua ragot gu ofa oida, "Ai juens beda Yesus, onggga jeska kota Nazaret, bera emerabj jah sif!"

³⁸ Erek koma jefeda osnok egens koma ois rot oga eteb oida, "Yesus, onggga raja Daud efen efesa, bucunc budou onggga okora rot didifo!"

³⁹ Tina rusnok onggga ricira rukag Yesus odou ritaha joug ofa oida, "Ei, biker toumou ojgomu!" Tina ofa ois deika oida, "Yesus onggga Daud efen efesa, bucunc budou onggga okora rot didifo!"

⁴⁰ Beda Yesus ot jah suma noba obk rusnok jeskaseda rujorohrus osnok egens koma onggga eiteij

ofou skoita Ofa. Nou onnga ofa en skoita Yesus fob, beda Yesus ejeka gu ofa oida,

⁴¹ "Bua budou os jeskasada Didif dutunggom mar meidu nou bua?" Beda ofa oroun gu Yesus oida, "Tuhan, didif dudou os dik mar!"

⁴² Beda Yesus agot gu ofa oida, "Bik mar ojgomu! Jeska bua budou ororu Didif rot tenten fob, jefeda bua bisma eskeira fob."

⁴³ Beda ainsa koma tein ofa ek mar. Jefeda ofa ororu Yesus noba esitit Allah rot odou onnga erirei eteb. Nou onnga rusnok rufoukou insa koma rik mar koma beda rua tein rifaga ouka eteb rot fogora risitit Allah.

19 ¹ Gij mona onnga Yesus enjesaga gu kota Yerikho,

² beda osnok egens onnga ofoka Zakheus eker gij kota koma. Ofa erek rusnok onnga ruhoturu pajak rerin ebirfaga, noba ofa efen mareibra ofoukou tein.

³ Ofa odou os ek Yesus askesi Yesus erabj jah suma, tina ofa okumfoj erek estir ojgomu, noba rusnok rufoukou rut jah ofa odou joug tein.

⁴ Jefeda ofa eja okag rusnok insa koma beda osok mega efaga egens jeskasada ek Yesus rot koisoisa.

⁵ Nou onnga Yesus ensaga gu mega okowu insa koma, beda Ofa eyajga jah skida noba agot oida, "Zakheus, bua bujuj en ojgomu, jeska deisef bera Didif dimeja jah bebin mod."

⁶ Erek koma beda Zakheus ojuj ebeirens noba oroun Yesus rot odou onnga erirei eteb.

⁷ Nou onnga rusnok onnga rik mar insa koma beda rua ragot moguma rot rusum oskusk oida, "Wah! Ofa koma ejeker jera osnok egens koma onnga efen mar oska ofoukou!"

⁸Erek koma tina nou onggaga goga gensaga jah efen mod, beda Zakheus ot noba agot oida, "Tuhan, ebeibeyaif didif dikeba dedin mareibra enama tein gu rusnok onggaga rufojingki. Noba didif dumoh dedin fifi erek ofosma tohkuru sons gu rusnok onggaga didif durokrusa sis fob tein."

⁹Erek koma beda Yesus agot gu ofa oida, "Gij mona deisef bera Allah oskotu bua jera bebin rusnok onggaga ringker jera bua jeska yeyin mar onggaga oska fob. Jeska bua tein bera bunjuj jeska bebin ebimowa Abraham.

¹⁰Erek koma jeska, Didif, Rusnok Efesa, bera din jeskaseda duhca rusnok onggaga riseiseifa fogora duskotu rua jeska rerin mar onggaga oska."

¹¹Askesi rusnok insa koma rig mar onggaga Yesus enefesij gu rua, beda Ofa efesij rot mar orocunc egens gu rua. Ofa efesij mar orocunc egens koma gu rua jeska Ofa enjesaga doida kota Yerusalem fob. Noba gij mona insa koma bera rusnok rusujohu rot oida mona onggaga Allah omofoka ereij keingg rusnok erek raja gu mebif bera ensaga doida fob.

¹²Yesus agot gu rua oida, "Osnok egens onggaga ofoka aksa eja jah monuh yes jeskaseda rusnok rufra efen ofoka erek raja egens fogora ofa omoksans jah efen monuh.

¹³Nou onggaga ofa esejah nou eja jeska, beda ofa ohoturu efen rusnok rufok setka onggaga rumfij ofa. Beda ofa eita fifi emas egens rua orofosut egens egens. Beda Ofa agot gu rua oida, 'Nou onggaga didif dinja fob beda iwa ira fifi emas kef fogora irohca efen ofou eja erek ekirsa deika.'

¹⁴Tina rusnok onggaga riker gij efen monuh insa koma rudou oska rot ofa. Jefeda nou onggaga ofa enja

fob, beda rua rubk rusnok rineya jah monuh ongg
yes insa koma tein jeskaseda ragot oida, 'Memef
mudobu joug osnok egens koma erek mefmen raja
ojgomo!'

¹⁵ Tina rusnok ongg ringker gij monuh egens koma
rufra osnok egens koma ofoka erek raja ojgomu.
Beda ofa oksons jah efen monuh. Nou ongg ofa
ensaga gu efen monuh fob, beda ofa ohoturu efen
rusnok ongg rumfij ofa jeskaseda ejeka gu rua rot
efen fifi emas insa koma ongg ofa ekeba gu rua sis
fob.

¹⁶ Beda osnok egens ongg osumbohka en skoita
ofa noba agot oida, 'Tuan, fifi emas egens ongg bita
gu didif sis fob bera disma efen ofou dokun deika
erek setka fob.'

¹⁷ Beda raja egens koma oroun oida, 'Bua
buntunggom mar ongg oufamofa fob. Noba jeska
budou ocosu efei ahtah gij mar ojgomai insa kef fob,
jefeda dufra bufoka erek aksa fogora bufoka ereij
keingg rusnok gij kota rara setka.'

¹⁸ Beda osnok ongg egeka en skoita ofa noba agot
oida, 'Tuan, fifi emas egens ongg bita gu didif sis
fob bera disma efen ofou erek cinja dokun deika fob.'

¹⁹ Beda raja koma agot oida, 'Didif dufra bebin
bufoka aksa, jefeda bua bufoka ereij keingg rusnok
gij kota rara cinja.'

²⁰ Beda osnok ongg ofij egens deika en skoita
ofa noba agot oida, 'Tuan, kef bera bebin fifi emas
ongg bua bita gu didif sis fob. Didif disah fifi koma
gij meifeti efesi, jeska didif dimeesa rot bua.

²¹ Jeska didif dijginaga rot oida bua bagot mar
rot owesa efek eteb. Bua buhoturu mar ongg
rusnok enjgineg rerin ojgomu. Noba bua bita maat

jeska mekeni onggga rusnok enjgineg rirefa maat gij ojgomu.'

²² Beda osnok onggga erek raja egens koma agot gu ofa oida, 'Bua bera osnok egens onggga oska eteb! Bua bijginaga fob oida didif bera dagot mar rot owesa efek eteb! Noba bijginaga rot oida didif duhoturu mar onggga rusnok enjgineg rerin ojgomu. Noba didif dita maat jeska mekeni onggga rusnok enjgineg rirefa maat gij ojgomu.

²³ Jefeda teinefa fogora bua binisah fifi emas insa koma gij fifi ebic jeskaseda didif dimesma fifi koma efen ofou dokun deika gurei!'

²⁴ Erek koma beda raja egens koma agot gu rua onggga runt jah suma oida, 'Iwa ita fifi emas egens koma jeska ofa noba ita fifi koma gu osnok egens koma onggga esma fifi setka sis fob!'

²⁵ Tina rua ragot oida, 'Tuan, osnok egens koma efen fifi setka fob!'

²⁶ Beda raja koma agot oida, 'Ongga tenten bera, idu onggga efen mar ofoukou fob, beda ofa emeita mar egema dokun deika si. Tina idu onggga efen mar oskiyai, beda efen mar oskiyai koma tein emeseiseifa jeska ofa si.'

²⁷ Beda ofa agot deika oida, 'Ebeibeyaif iwa ijorohrus rua onggga rundobu joug didif erek rerin raja, beda yagob rua jah sif ojgomu.' "

²⁸ Nou onggga Yesus emfesij rot mar insa koma fob, beda Ofa otoiru jah kota Yerusalem.

²⁹ Gij mona onggga rua rinjesaga doida kota Betfage jera kota Betania onggga angh gu memaga ofos Saitun fob, beda Ofa obk gosnok gegeka jeskaseda geja gokag Ofa.

³⁰ Ofa agot gu goga oida, "Goga geja gokag jah kota onnga enah jah mudou koma. Nou onnga goga gonjoira kota jah suma, beda goga gemek keledai efer egens onnga runcoka fob. Rusnok rineya bera rineifef esij keledai egens koma enesi. Goga gosuwa keledai egens koma noba gorka gu Didif.

³¹ Gij mona onnga rusnok rijeka joug goga rot oida, 'Goga gosuwa keledai koma rot meidu', beda goga goroun oida, 'Tuhan ocosu rot.' "

³² Beda goforoka gegeka insa koma geja fob noba gek mar jeni erek Yesus anggot gu goga fob.

³³ Askesi gosuwa keledai egens koma ros, beda rusnok onnga rerin keledai koma rijeka gu goga joug oida, "Goga gosuwa mefmen keledai koma rot meidu?"

³⁴ Beda goga goroun gu rua oida, "Tuhan ocosu rot."

³⁵ Beda goga goroun keledai efer egens koma gu Yesus. Noba rua raha meifeti esij keledai egens koma, beda Yesus eifef esij keledai koma ejmeg.

³⁶ Askesi Yesus encira esij keledai egens koma, beda rusnok rufoukou ruhoda rerin meisoufa eneya noba ruosu moroju nou Yesus. Rua rutunggom mar insa koma erek rurougif gu Yesus.

³⁷ Yesus oira moroju onnga onjuj jeska memaga ofos Zaitun, noba esaga doida kota Yerusalem. Beda rusnok rufoukou onnga ricira morototuma jera Ofa rudou efaga ouka eteb noba risitit Allah. Rua ragot ruis mar onnga oufamofa eteb gu Yesus jeska rua ringk mar onswos ofoukou onnga Ofa ocunc rot sis fob.

³⁸ Rua ruis oida, "Oufamofa eteb rot raja egens kef onnga en oisouska Tuhan Allah. Eskeiramera eteb

ah gu mebif noba rusnok nomnaga rufra Allah ofoka erek aksa eteb gu mebaga!"

³⁹ Erek koma beda, rusnok rineya onggaa runt gu rusnok insa koma rifekesa onggaa ebic Farisi ragot gu Yesus oida, "Akeina Guru, Bua bitaha joug bebin rusnok kef jeskaseda runois rot mar insa koma deika guru!"

⁴⁰ Beda Yesus oroun oida, "Onggaa tenten bera, erek Didif dagot gu rua oida, 'Iker toumou,' beda mamu onggaa ah jah sif tein rimesitit mar erek rua rinsitit insa koma ojomu si."

⁴¹ Nou onggaa Yesus enesaga doida Yerusalem, beda Ofa eyajga kota koma jah kembin. Noba Ofa ebisa rot rusnok onggaa ringker gij kota koma.

⁴² Ofa agot oida, "Erek iwa onggaa kota Yerusalem ijginaga rot mar onggaa oufamofa onggaa omorka eskeiramera eteb gu iwa deisef, beda idou omoroun Didif, tina guru. Jeska ebeibeyaif mar onggaa oufamofa insa kef bera ah jejema jeska iwa ojomu.

⁴³ Jefeda gij mona kahma beda mesa eteb onggaa ofogog rot iwa bera rimen noba riker rejrej yeyin kota kef si. Jefeda enadaij nou iwa yuku jeska jinaga guru.

⁴⁴ Noba jeska iwa idou enebriyi gij rot oida Allah bera en skoita iwa fob guru, jefeda rua onggaa rufogog insa koma bera rimedi iwa rot ahais doska noba rut keingg iwa jera yeyin iser gij kota efesi kef. Beda rua rumohoda yeyin kota kef onjoros mamu egens tein enah mesijma deika guru."

⁴⁵ Nou onggaa Yesus oira gij momas onggaa angh rejrej Mod Allah, beda Ofa ekemeji rusnok onggaa ruhu mar jah suma.

⁴⁶ Ofa agot rot oga eteb oida, "Runggu gij Mar Efeyi Ebsi rot mar onggaa Allah anggot erek kef oida, 'Dedin

Mod egens bera nou rusnok onnga rum riteij gu Didif gij ojgomu. Tina iwa intunggom dedin Mod erek mod egens nou rusnok onnga rungkoreka mar jeskasada ridemдеми gij! "

⁴⁷ Gij orofosut mona bera Yesus oftufu rusnok gij momas onnga angh rejrej Mod Allah. Tina ebirfaga imam-imam jera Guru-Guru agama jera ebirfaga Yahudi rineya ruhca moroju jeskasada ragob Ofa.

⁴⁸ Tina rua rinek mona egens onnga adaij nou guru, jeska rusnok rufoukou riker rejrej Ofa jeskasada rig mar onnga Ofa oftufu gu rua ojgomuja.

20 ¹ Gij mona juens bera Yesus oftufu mar jera efesij mar rot Allah oga onnga oufamofa gu rusnok rufoukou gij momas onnga angh rejrej Mod Allah. Beda ebirfager imam-imam jera Guru-Guru agama jera ebirfager Yahudi rineya rin skoita Ofa.

² Beda rua ragot gu Ofa oida, "Bebin owesa efek erek meidu fogora bunotunggom mar erek komo. Noba idu bera onnga eita owesa efek koma gu Bua fobo?"

³ Beda Yesus agot oida, "Didif dudou os dijeka gu iwa rot mar sismeni fog. Iwa yagot gu Didif rot mar kef oida,

⁴ idu onnga eita owesa efek gu Yohanes jeskasada ofa eita baptis gu rusnok, Allah bera eita ei, era rusnok ei?"

⁵ Beda rusnok insa koma ragot moguma oida, "Erek mimif magot oida Yohanes eita owesa efek jeska Allah, beda Ofa emagot oida, 'Erek koma jefeda teinefo fogora iwa inororu ofa efen oga guri?"

⁶ Tina erek mimif magot oida ofa eita owesa efek jeska rusnok ojgomu, beda rusnok rufoukou koma rimeramamu rimeredi mimif rot, jeska rua rudou

rusujohu rot oida Yohanes bera erek nabi egens onnga Allah ombk fob."

⁷Jefeda rua ruroun gu Yesus oida, "Memef menejginaga rot idu onnga eita owesa efek gu Yohanes guru."

⁸Beda Yesus agot gu rua oida, "Erek koma jefeda, Didif tein dinagot gu iwa rot idu bera eita owesa efek gu Didif erek koma guru."

⁹Erek koma beda Yesus efesij gu rusnok rot mar orocunc egens kef oida, "Osnok egens erefa anggur gij efen mekeni. Nou onnga ofa eja jah monuh yes, beda ofa aha mekeni anggur koma gu rusnok rineya jeskaseda riker joug mekeni anggur koma.

¹⁰Gij mona kahma deika beda anggur efek insa koma ofom fob. Jefeda osnok egens onnga efen mekeni koma obk osnok egens onnga omfij ofa skoita rusnok onnga ringker joug mekeni insa koma jeskaseda rua rita anggur efek egema nou ofa. Tina rusnok onnga ringker joug mekeni koma rubu osnok egens onnga ofij ebirfaga koma. Beda rua rubk ofa oksons skoita osnok egens onnga efen mekeni koma rot etma efesijg.

¹¹Beda ofa onnga efen mekeni koma obk osnok egens onnga omfij eneya deika, tina rusnok insa koma rubu ofa tein, noba ruga oruh ofa, beda rua rubk ofa tein oksons rot etma efesijg.

¹²Beda ofa onnga efen mekeni koma obk efen osnok egens onnga omfij egema dokun deika. Tina rusnok koma rubu ofa rot ahais tein noba rij ofa jeska mekeni koma.

¹³Erek koma jefeda osnok egens onnga efen mekeni koma agot oida, 'Didif dutunggom mar egema deika erek meidu? Didif dumobk dedin edesa egens

ongga dudou okora eteb rot, fogora rua rumougif gu ofa si.'

¹⁴Tina gij mona onggga rusnok onggga ringker joug mekeni koma rik ofa efen efesa, beda rua ragot moguma oida, 'Ofa kef bera emesma mekeni kef gij mona onggga meka anggos jeska, jefeda mimif magob ofa jeskaseda mumok mekeni kef gu misinsa ojpgomu.'

¹⁵Jefeda rua rikris ofa jeska mekeni fogora ragob ofa beda agos." Beda Yesus ejeka gu rua oida, "Osnok egens onggga efen mekeni insa koma omotunggom mar meidu skoita rua onggga ringker joug mekeni?"

¹⁶Ongga tenten bera ofa ekemeji rua jeska mekeni koma fogora emagobir beda rua nomnaga ranggos! Beda ofa emaha mekeni koma gu rusnok rineya deika." Tina nou onggga ebirfager rusnok Yahudi insa koma ringg Yesus efesij mar erek koma, beda rua rua ragot oida, "Erek koma guru!"

¹⁷Jefeda Yesus ohobut rua noba agot oida, "Jefeda mar kef efen ofou erek teinefa: 'Rusnok onggga rii mod bera rukoja Mamu ahais egens koma fogora rij jeska fob. Tina mamu egens koma ejerek mamu onggga ofoufem ekirsa nou mod koma nomnaga.'

¹⁸Noba rusnok onggga rukockoreta rot mamu egens insa koma bera rimesiri fogora riseiseifa. Tina rusnok onggga mamu egens insa koma encirej rua, beda rua rumohoda nomnaga si."

¹⁹Guru-Guru agama jera ebirfager imam-imam rutkonu oska rot Ofa jeska rua rijginaga rot oida mar onggga Ofa omftuftu rot insa koma bera osok gij rua. Jefeda rua rudou os ragei Ofa ainsa koma tein

ojgomu. Tina rua rimeesa rot rusnok rufoukou onnga riker rejrej Ofa.

²⁰ Ebirfager imam-imam jera Guru-Guru agama insa koma ruhca mona egens jeskaseda ragob Yesus. Jefeda rua rubk rerin rusnok rineya skoita Yesus jeskaseda rejeka gu Ofa erek reirei ojgomu. Noba erek Ofa oroun mar gu rua onnga ekirsa rot rerin agama erebent, beda rua rimagei Ofa fogora raha Ofa gu Gubernur onnga ofoka ereij keingg rusnok nomnaga.

²¹ Jefeda rusnok insa koma rijeka gu Yesus reirei oida, "Akeina Guru, memef mejginaga rot oida mar nomnaga onnga Bua banggot noba buftufts rot bera erek tenten ojgomu. Noba Akeina bunofra osnok egens erek ekirsa jeska egema tein guru, tina Bua buftufts rot Allah oga onnga tenten ojgomu.

²² Jefeda Akeina, bagot gu memef oida mimif onnga Yahudi bera muh pajak skoita raja Kaisar tein ei, era gurei?"

²³ Tina Yesus ejginaga rot oida rua rijeka gu Ofa erek reirei ojgomu. Jefeda Ofa agot oida,

²⁴ "Bucunc fifi perak egens gu Didif." Beda Ofa agot oida, "Efena jera ofoka idu bera enah tumu fifi kef?" Beda rua ruroun gu Yesus oida, "Koma raja Kaisar efena jera ofoka."

²⁵ Beda Yesus agot gu rua oida, "Jefeda iwa ita mar onnga Kaisar efen gu ofa ojgomu, noba ita mar onnga Allah efen gu Ofa ojgomu."

²⁶ Jefeda enadaj nou rua rig Ofa agot mar onnga ekirsa rot rerin agama erebent jah rusnok rufoukou rudou jinaga guru. Rua rudou ousaha eteb rot mar onnga Ofa oroun rot insa koma, jefeda rua riker toumou noba rinejeka gu Ofa rot mar deika guru.

²⁷ Rusnok Yahudi rineya jeska ebic Saduki rin skoita Yesus. Rusnok onnga ebic Saduki rusujohu rot oida rusnok onnga ranggos bera rinedebecki sons guru. Rua rijeka gu Yesus oida,

²⁸ "Akeina Guru, sis fob Musa onngu keingg rot hukum egens onnga agot oida erek orna egens anggos fob noba ofa onok efesa guru, beda ofa efen mokosa era mokora egema omois moisa koma jeskaseda goga gok egesa egema nou orna egens onnga anggos fog.

²⁹ Sis fob runer rufok cinja erfeka onnga rumokosema bera riker jah sif. Orna egens onnga osumbohka oskotu arja. Tina gij mona onnga ofa anggos bera ofa onok efesa guru.

³⁰ Beda mokosa onnga egeka ois moisa koma deika tina ofa tein agos noba gonok efesa guru.

³¹ Beda mokosa onnga orgomu ois moisa koma tina ofa tein agos. Beda mokoser nomnaga onnga runtoij bera ruis moisa insa koma, tina rua nomnaga tein ragos jeska noba ojaga egens koma onok efesa guru.

³² Beda ojaga egens insa koma tein agos jeska noba onok efesa guru.

³³ Jefeda gij mona onnga rusnok ridebecki jeska ranggos, beda idu bera eita ojaga egens koma erek mohona gu mebaga? Jeska rua insa koma nomnaga ruis ojaga insa koma erek ruhona fob."

³⁴ Beda Yesus oroun gu rua oida, "Rusnok onnga rifena ebah gij mona ebeibeyaif bera rumoskotuma.

³⁵ Tina gij mona onnga rusnok, onnga Allah odou eskeira rot, ridebecki jeska ranggos fob beda runomoskotuma deika guru.

³⁶ Rusnok insa koma rija erek malaikat-malaikat ojgomu. Jefeda rua rinagos tein guru. Noba rua

rijerek Allah efen efeser jeska rua rindebecki jeska ranggos fob.

³⁷ Tina rot mar onggga Musa ongggu keingg sis fob bera, ofa esinsa agot rot tenten oida rusnok onggga ranggos rimedebecki sons si. Jeska sis fob, gij mona onggga ofa ek mah onggga ent, beda ofa agot oida Tuhan Allah bera erek Abraham, Isak jera Yakub onggga ranggos sis fob rerin Allah ojomu.

³⁸ Jefeda Tuhan Allah enerek Allah onggga rusnok onggga ranggos rerin guru. Tina Ofa bera erek Allah nou rusnok onggga rifena ebah ojomu. Jeska Allah eita eiteij ah onggga efeinah gu efen rusnok gu mebaga."

³⁹ Beda Guru-Guru agama rineya ragot oida, "Akeina Guru, Bua buroun mar rot koisoisa fob!"

⁴⁰ Erek koma beda rusnok insa koma runofos efek deika guru. Jefeda rua rinejeka gu Yesus rot mar deika guru.

⁴¹ Beda Yesus ejeka gu ebirfager Yahudi agama insa koma oida, "Rusnok Yahudi ruftuoftu oida Kristus egens koma onggga emen bera omojuj jeska ofou ebiedi raja Daud.

⁴² Tina Daud esinsa ongggu keingg gij Mar Efeyi Ebsi sis fob oida, 'Tuhan Allah agot gu dedin Tuhan oida, "Biker jah dugnosk rot bufoka aksa

⁴³ noba Didif dumoin keingg mesa nomnaga fogora rumougif gu Bua si." '

⁴⁴ Jefeda erek Daud ois Kristus koma onggga emen erek 'Tuhan,' beda teinefa fogora iwa isujohu oida Ofa omojuj en jeska ebic raja Daud ojomu, noba jeska Allah guri."

⁴⁵ Askesi rusnok rig mar onggga Yesus enefesij ros, beda Ofa agot gu efen ruforoker oida,

⁴⁶ "Yut joug idou efesi rot rua onggá Guru-Guru agama. Rua rudou os rincira rot meisoufa onggoska onggá orocunc rot rerin rufoka aksa. Noba rua rudou os jeskaseda rusnok rugif gu rua gij mona onggá rincira gij pasar. Noba gij mona onggá rua ruira gij mod onggá rusnok rum riteij gu Allah gij, era gij mod onggá rusnok ruina maat keingg eteb, beda rua rudou os riker gij kursi eteb jah rusnok nomnaga rudou ojgomu.

⁴⁷ Tina rua ruokrusa rujona rija mesina jeskaseda rita rerin mareibra jeska rua. Noba rua rum riteij erek dektek jeskaseda rusnok rusujohu oida rerin rudou onggá ebsi komowa eteb ojgomu. Tina gij mona kahma bera Allah omofra mar okum eteb keingg rua rot si."

21 ¹ Gij mona juens Yesus ek rusnok onggá runa mei ahtah rikeba rerin fifi gij meifeti erek mar onggá rurougif gu Allah rot.

² Beda Ofa ek ojaga eja mesina egens onggá ofojingki eij fifi egeka onggá erek ai oskiyai ojgomu gij meifeti koma.

³ Beda Yesus agot oida, "Onggá tenten bera, ojaga eja mesina egens koma ekeba fifi onggá ekirsa jeska rua onggá runa mei ahtah ojgomu.

⁴ Jeska rua insa koma rikeba fifi jeska rerin mareibra onggá ofod ojgomu. Tina ojaga eja mesina egens kef onggá ofojingki bera eita fifi nomnaga onggá ofa efen ojgomu."

⁵ Rusnok rineya onggá rururu Yesus rinagot rot teinefa Mod Allah efen mamu onggá onggoskamoka noba efen mar onggá rusnok rita gu Allah erek rurougif gu Ofa onggá onggoska eteb tein.

⁶ Beda Yesus agot gu rua oida, "Gij mona egens onnga emen bera rusnok rumohoda Mod egens kef nomnaga fogora mamu egens tein enah mesijma deika guru."

⁷ Beda rua rijeka gu Yesus oida, "Akeina Guru, gij mona juaho fogora mar insa koma emecira? Noba mar meidu bera onnga omorocunc rot mona egens koma onnga emen?"

⁸ Beda Yesus agot oida, "Iwa yut joug idou efesi rot ahais jeskaseda rusnok enjgineg runorokrusa iwa rot guru. Jeska rusnok rufoukou rimagot oida Didif bera onnga dubk rua fob. Noba rua rimagot rourou oida, 'Didif bera Ofa onnga emen!' Noba rua rimagot tein oida, 'Mona onnga Allah anggot eimofoj rot bera en fob!' Tina iwa inororu rerin ruga koma jinaga guru.

⁹ Gij mona onnga iwa ingg rot oida rusnok rimagobuma, era rusnok ruh mosoruk ofoka beda iwa inemeesa rot guru. Jeska mar insa koma nomnaga emen rot sismeni fob. Tina mar koma onorocunc rot oida mona onnga monuhif emeseiseifa bera en doida guru."

¹⁰ Beda Yesus agot deika oida, "Rusnok gij monuh egens rimagobuma jera rusnok gij monuh egema.

¹¹ Beda mebif icusur erek doska gij monuh ofoukou tein. Noba mosona eteb omok rusnok rufoukou. Noba mar onnga eita rusnok rifera okora ofoukou bera emen tein. Noba rusnok rimek mar onnga okum ofoukou jera mar onswos gu mebaga fogora rimeesa eteb rot.

¹² Tina gij mona onnga mar insa koma enesaga enesi, beda rusnok rimagei iwa fogora rufra mar okum keingg iwa. Rua rumorka iwa skoita ebirfager mod onnga rusnok rum riteij gu Allah gij fogora

rimaha iwa gij mod oskusk. Noba rua rimekris iwa skoita raja-raja jera Gubernur tein jeska iwa iroru Didif.

¹³ Jefeda gij mona insa koma bera iwa imagot rot Allah oga gu rusnok insa koma.

¹⁴ Tina iwa isisi joug isinsa idou efesi jeskaseda iwa inejekjeka idou rot mar onnga iwa imagot rot gu rua guru.

¹⁵ Jeska Didif dumocunc gu iwa rot mar onnga iwa imagot rot si. Jefeda enadaij nou rusnok insa koma ruga eseda rot yeyin yuga guru fogora rua rimesiri gu iwa ojomu.

¹⁶ Noba yeyin ika jera isu ni, ikoser gonu ikorer ni, ibskir ni, ihujir ni, rua rudou emekikif jeska iwa noba rumocunc iwa gu yeyin mesa onnga rudou oska rot iwa. Beda rua rimagob rineya jeska iwa.

¹⁷ Rusnok rufoukou rimeita rudou onnga ofogog rot iwa jeska iwa iroru Didif fob.

¹⁸ Tina Didif dumot joug iwa jefeda mar egema tein eneita iwa fogora yagos jinaga guru.

¹⁹ Noba erek iwa yut rot ahais gij mar insa koma nomnaga, beda iwa imesma eiteij ah onnga efeinah si."

²⁰ Beda Yesus agot deika oida, "Gij mona onnga tentarer rufoukou runt joug rejrej kota Yerusalem, beda iwa imejginaga rot oida dektek deika guru, beda kota koma emesiri fogora omohoda nomnaga.

²¹ Beda gij mona insa koma bera rusnok onnga ringker gij monuh Yudea ruku jah memaga ojomu. Noba rusnok onnga ringker gij kota koma ruku jeska ojomu. Noba rusnok onnga ringker jah mebah kota koma bera runoira jinaga guru!

²² Jeska gij mona insa koma bera mar nomnaga onnga nabi-nabi runggu rot osok gij kota Yerusalem sis fob bera emah gij efera fob, beda rusnok gij kota koma rimesma okum eteb si.

²³ Okum eteb rot rujager onnga rifaga okum rot efesa jera rujager onnga rungh mengk gu riser tein. Jeska enadaij nou rua ruku ebeirens jeska kota koma jinaga guru. Gij mona insa koma bera rusnok gij monuh ofoukou rimeita rifeira okora eteb.

²⁴ Rusnok rimera meiteb aksa fogora ragob rineya. Noba rua rumorka rineya jeska kota koma jah risinsa rerin monuh ojgomu. Beda rusnok onnga Yahudi guru rumot keingg kota Yerusalem rot ahais ojgomuja onjoros mona onnga Allah anggot oida adaij fob."

²⁵ Beda Yesus agot deika oida, "Rusnok rimeyajga mar onswos rot mowa ni, mesta ni, motur ni, mei mojumu efei ahrahra rot ofog eteb ni, jefeda rusnok rimeesa eteb rot mar insa koma tein.

²⁶ Mebaga nomnaga omosousouyu rot ahais, jefeda rusnok rufoukou rimeesa eteb rot mar okum onnga emen skoita rusnok mebif.

²⁷ Beda gij mona insa koma rusnok rimek Didif, Rusnok Efesa, dimen gij mocgoj ofog rot dufoka onnga aksa noba rot dedin owesa efek eteb.

²⁸ Gij mona onnga iwa ig mar insa koma, beda iwa yut noba iajga jah mebaga, jeska ai juens beda iwa imesma eiteij ah onnga efeinah si."

²⁹ Beda Yesus efesij mar orocunc gu rua erek kef oida, "Iwa isujohu rot mega ara jera mega enjgineg tein.

³⁰ Gij mona onnga iwa ik mega ofojuwu askesi omorogna, beda iwa ijginaga rot oida mona onnga mega enefek bera enesaga doida fob.

³¹ Beda erek koma tein, gij mona onnga iwa ingk mar okum insa koma nomnaga orogna fob, Beda iwa imejginaga rot oida mona onnga Allah omofoka ereij keingg rusnok bera ensaga doida fob.

³² Onnga tenten bera, erek rusnok onnga rifena ebah gij mona ebeibeyaif rinagos enesi, beda mar insa koma nomnaga emecira gij si.

³³ Mebaga jera mebi emeseiseifa si, tina dedin duga bera eneseiseifa jinaga guru."

³⁴ Beda Yesus agot deika oida, "Iwa yut joug idou efesi rot ahais jeskaseda iwa inesiri gij mar onnga oska erek ibirfaga erebibe rot mofut efei ni, irahaisomu gij mar ofoukou onnga erek oska ni, ijekjeka idou efesi rot yeyin iteij ah insa kef ni guru. Jeska erek iwa iroru mar onnga oska insa koma ojgomu, beda mona onnga enja ejgwaga bera omorogna keingg iwa ebeirens erek moubohu onnga oskotu mekhuis rot ebeirens tein.

³⁵ Jeska mar koma nomnaga emen skoita rusnok nomnaga onnga ringker gu mebif.

³⁶ Jefeda iwa yut joug idou efesi rot ahais noba yum iteij rot ahais tein jeskaseda iwa imosuwa jeska mar okum insa koma onnga emen, noba jeskaseda iwa imot jah Didif, Rusnok Efesa, dudou rot idou onnga mojen iwa rot guru."

³⁷ Gij orofosut mona bera Yesus oftufu mar gu rusnok gij momas onnga angh rejrej Mod Allah. Nou motu insa koma beda Ofa eja jah memaga ofos Zaitun noba ahca jah suma.

³⁸ Beda gij raha tentena rusnok rufoukou rin jah momas onnga angh rejrej Allah jeskaseda rig mar onnga Yesus oftufu rot.

22¹ Mona eteb egens onnga Yahudi rit roti onnga enefifij guru onnga ofoka Paskah bera enesaga doida fob.

² Beda gij mona insa koma tein ebirfager imam-imam jera Guru-Guru agama ruhca moroju egens jeskaseda ragob Yesus, jeska rua rimeesa rot oida rusnok riskemba rumoruru Ofa ojgomu.

³ Erek koma beda gij mona insa koma Bilis oira gij Yudas, onnga rijeka Iskariot tein, odou efesi. Ofa bera osnok egens jeska rusnok rufok setka kungkob erfeka onnga rururu Yesus erek efen ruforoker.

⁴ Beda ofa eja skoita ebirfager imam-imam jera ebirfager rusnok onnga runt joug Mod Allah jeskaseda riflesij moguma jera rua rot teinefa ofa emaha Yesus gu rua.

⁵ Beda rua rudou eskeira eteb rot, noba rua ruitij rot oida rumoh fifi gu ofa rot si.

⁶ Beda ofa oitij rot, noba ohca mona onnga rusnok rufoukou rineker rejrej Yesus guru fogora ofa emaha Yesus gu rua.

⁷ Mona onnga rusnok rit roti onnga enefifij guru jera riris domba efer egens erek mar onnga rurougif gu Allah rot bera ensaga fob.

⁸ Beda Yesus obk Petrus gonu Yohanes oida, "Goga geja noba gesejah maat nou mona onnga Paskah jeskaseda mit maat morototuma."

⁹ Beda goga gejeke gu Yesus oida, "Akeina, budou os magef masejah maat koma sinefo?"

¹⁰ Yesus oroun oida, "Nou onnga goga gomoira gij kota koma, beda goga gomorodosu orna egens onnga omorka debeji rot mei. Beda goga goruru ofa jah mod onnga ofa eja gij.

¹¹ Beda goga gagot gu osnok egens onggga efen mod koma oida, 'Guru agot oida Morongsu kenefa bera Didif dimet maat onggga Paskah morototuma jera dedin ruforoker?'

¹² Beda ofa omoroun goga jah morongsu eteb egens onggga angh skida mod koma. Beda goga gesejah maat onggga Paskah efen jah suma."

¹³ Jefeda Petrus jera Yohanes geja noba gek mar insa koma nomnaga jeni erek Yesus anggot gu goga fob. Beda goga gesejah maat onggga Paskah efen jah suma.

¹⁴ Nou mona onggga rusnok rit maat onggga Paskah efen ensaga fob, beda Yesus eker morototuma jera efen ruforoker gu meja egens.

¹⁵ Beda Ofa agot gu rua oida, "Didif dudou os dit maat Paskah kef jera iwa fog, beda dimeita difera okora.

¹⁶ Jeska onggga tenten bera, Didif dinet maat jera iwa deika guru onjoros mona onggga Allah ofoka ereij keingg rusnok fog."

¹⁷ Erek koma beda Yesus eita mok osku, noba ois oufamofa gu Allah rot beda agot oida, "Iwa nomnaga ij jeska mok osku kef ojgomu.

¹⁸ Jeska Didif dinej anggur efei morototuma jera iwa deika guru onjoros mona onggga Allah ofoka ereij keingg rusnok fog."

¹⁹ Beda Yesus eita roti, noba ois oufamofa gu Allah rot, beda Ofa ekeba roti koma dougdoug gu efen ruforoker. Beda Ofa agot oida, "Roti kef erek difaga onggga dimaha gu rusnok onggga rufogog jeskaseda iwa imeita eiteij ah onggga efeinah. Gij mona kahma deika beda iwa itunggom mar erek kef jeskaseda ireisisi joug isinsa osok gij Didif."

²⁰ Nou onggua rua rint maat oisa fob, beda Ofa eita mok osku rot anggur koma noba agot gu rua oida, "Anggur onggua angh gij mok osku kef bera erek eimofoj efeinah onggua Allah anggot rot oida Ofa emeita gu rusnok.

²¹ Tina osnok egens koma onggua odou emekikif jeska didif bera eker morototuma jera mimif gu meja kef.

²² Didif, Rusnok Efesa, bera dimagos jeni Allah odou ejginaga rot si. Tina mar okum eteb emah keingg osnok egens koma onggua odou engkikif jeska Didif."

²³ Jefeda ruforoker insa koma rimejekema oida, "Idu jeska mimif bera omotunggom mar erek komo?"

²⁴ Yesus efen ruforoker ruga omosokema rot oida idu jeska rua bera efen ofoka aksa ekirsa jeska rineya.

²⁵ Beda Yesus agot gu rua oida, "Rusnok onggua Yahudi guru rerin raja-raja onggua rut keingg rua ojgomuja. Noba raja-raja koma rijeka risinsa erek raja onggua rut joug rerin rusnok rot rudou onggua eskeiramera ojgomu.

²⁶ Tina iwa ineita mar erek koma guru! Onggua tenten bera, ofa onggua odou os esma ofoka onggua aksa, beda ofa eita mar rot odou onggua eriagamaga erek ruforoka rifes rerin rudou onggua eriagamaga. Noba ofa onggua odou os ofoka ereij keingg rusnok enjgineg, beda ofa ofij rusnok enjgineg ojgomuja.

²⁷ Jeska idu bera onggua efen ofoka onggua aksa ekirsa: Osnok egens onggua engker gu meja jeskaseda et maat ei, era osnok egens onggua ecka maat gu ofa onggua engker gu meja? Onggua tenten bera osnok egens onggua engker gu meja koma bera efen ofoka onggua aksa ekirsa. Tina Didif, onggua direk yeyin

ebirfaga, bera diker gu iwa ifekesa erek osnok egens onnga omfij iwa.

²⁸ Onjoros mona deisef tein bera iwa iroru Didif gij mar okum nomnaga onnga angh keingg Didif fob.

²⁹ Noba Allah eita owesa efek gu Didif jeskaseda dufoka ereij keingg rusnok. Beda erek koma tein Didif dita owesa efek gu iwa rot.

³⁰ Didif duntunggom mar koma jeskaseda iwa imeker gu dedin meja egens gu mebaga. Beda iwa imet maat noba imej mar erek rusnok onnga rufoka aksa tein. Beda iwa imeker gij kursi eteb jeskaseda yuga ojga rot rusnok Israel ebic setka kungkob erfeka rerin rita mar tein."

³¹ Beda Yesus agot deika oida, "Simon Petrus, bua big fog, jeska Bilis efen owesa efek jeskaseda ereni bua rot ahais.

³² Tina Didif dum diteij nou bua fob jeskaseda budou ororu Didif rot ahais ojgomuja. Noba gij mona onnga bua bimeesa joug rot mar onnga bua bita fob, beda bua bufij dedin ruforoker rineya koma jeskaseda rua tein ruroru Didif rot rudou ahais ojgomuja."

³³ Beda Petrus oroun gu Yesus oida, "Tuhan, Didif dinsejah dudou efesi jeskaseda daira gij mod oskusk noba danggos morototuma jera Bua ojgomu!"

³⁴ Beda Yesus agot gu ofa oida, "Petrus, bua bisinsa bumorot keingging gu rusnok rot ofosma juomu oida bua binejginaga rot Didif guru."

³⁵ Erek koma beda Yesus agot gu efen ruforoker oida, "Sis fob Didif dumbk iwa jah monuh yes. Noba gij mona insa koma bera Didif danggot gu iwa oida inorka fifi ni, mesina ni, sepatu eneya tein guru. Noba gij mona onnga iwa inja fob bera iwa ita mar nomnaga onnga iwa incosu rot gij mona insa koma

tein fob ei?" Beda rua ruroun oida, "Tuhan, memef meita mar onnga adaij fob."

³⁶ Beda Yesus agot gu rua oida, "Erek koma, tina ebeibeyaif bera iwa yurka yeyin fifi jera mesina ojgomu. Noba erek iwa yeyin meiteb aksa egema guru, beda yuhu yeyin meisoufa eneya fogora irengk meiteb aksa tein.

³⁷ Jeska runggu gij Mar Efeyi Ebsi sis fob oida, 'Rusnok rucunc Ofa erek osnok egens onnga ofogog tein.' Mar insa koma bera osok gij Didif. Noba mar koma bera emah gij efera tein fob si."

³⁸ Beda Yesus efen ruforoker ragot oida, "Tuhan, meiteb aksa egeka bera enahif fob!" Beda Yesus agot oida, "Koma adaij nou."

³⁹ Erek koma beda Yesus eja jeska kota koma noba eja jah memaga ofos Zaitun erek giskini. Noba Ofa efen ruforoker tein rija morototuma jera Ofa.

⁴⁰ Nou onnga rua rinsaga jah suma fob, beda Yesus agot gu rua oida, "Iwa yum iteij jeskaseda iwa inesiri gij mar onnga oska onnga emerani iwa guru."

⁴¹ Erek koma beda Ofa eja ai yes jeska rua.

⁴² Beda Ofa es okeibi gu mebi noba om eiteij oida, "Akeina, erek Bua budou os rot beda bita mar onnga emeita efera okora gu Didif jeska fog. Tina Bua bineita mar onnga Didif dudou os rot ojgomu guru. Tina Bua bita mar onnga Akeina budou ejginaga rot ojgomu."

⁴³ Beda malaikat egens jeska mebaga orogna skoita Yesus noba eita owesa efek gu Ofa.

⁴⁴ Yesus odou efesi okumkum eteb rot mar okum onnga emah keingg Ofa, jefeda Ofa om eiteij rot tentenmen ojgomuja. Beda ebirfeka erek ogufu onnga eya jah mebi.

⁴⁵ Nou onnga Yesus om eiteij oisa fob, beda Ofa oksons skoita efen ruforoker. Tina rua nomnaga rah ahaingkongka ros, jeska rudou okum noba rufonskos tein.

⁴⁶ Beda Ofa agot gu rua oida, "Teinefo fogora iwa inahca erek komo? Iwa isowu noba yum iteij jeskaseda mar egema enereni iwa tein guru!"

⁴⁷ Askesi Yesus enagot mar gu efen ruforoker ros, beda rusnok ebic egens rin skoita Ofa. Yudas, osnok egens jeska Yesus efen ruforoker, ofa bera oroun rua skoita Yesus. Beda Yudas eja skoita Yesus noba onsa Ofa omnu erek oisu Ofa.

⁴⁸ Tina Yesus agot oida, "Yudas, bua bunsa Didif fogora bikikif jeska Didif, Rusnok Efesei?"

⁴⁹ Nou onnga Yesus efen ruforoker rik oida ai juens beda rusnok insa koma rimagei Yesus, beda rua ragot oida, "Tuhan, memef mera meiteb aksa merakob rua ej!"

⁵⁰ Beda Yesus efen oforoka egens agei efen meiteb aksa eragob osnok egens jeska rusnok ebic insa koma beda eris efen osuw jah ognosk fogora esiri gu mebi. Osnok egens koma bera onnga omfij ebirfaga imam onnga ofoka aksa.

⁵¹ Tina Yesus ois oida, "Iwa ineita erek koma guru!" Beda Ofa ahtec osnok egens koma efen osuw fogora osuw koma eskeira sons.

⁵² Beda Yesus agot gu ebirfager imam-imam jera ebirfager tentarer onnga rut joug Mod Allah jera ebirfager Yahudi rineya oida, "Didif dunoh mosoruk ofoka erek rusnok onnga rufogog guri, jefeda teinefa fogora iwa yurka meiteb aksa jera moskur jeskaseda yagei Didif erek komo?"

⁵³ Gij orofosut mona bera Didif diker jera iwa gij momas ongganga angh rejrej Mod Allah, tina iwa inagei Didif jah suma guri! Tina mona eimofoj ongganga Allah anggot rot sis fob bera ensaga fob. Ebeibeyaif iwa ita mar ongganga ofogog gij motkobah kef ojomu." "

⁵⁴ Erek koma beda rusnok insa koma ragei Yesus noba ruroun Ofa skoita mod ongganga ebirfaga imam ongganga ofoka aksa eteb efen. Noba Petrus otoij rua erek ai yes.

⁵⁵ Rusnok rukub mah gij momas ongganga angh rejrej mod egens koma. Noba Petrus ejeker morototuma jera rusnok ongganga riker rejrej mah insa koma.

⁵⁶ Beda ojaga egens ongganga omfij imam-imam jah suma ek Petrus eneker gu mah efembra. Ofa ohobut Petrus beda agot oida, "Osnok egens kef tein ongganga ororu Yesus koma."

⁵⁷ Tina Petrus orot keingging rot mar insa koma ojomu. Ofa agot gu ojaga egens koma oida, "Asoka, didif dinejginaga rot Ofa koma guru!"

⁵⁸ Ai juens deika beda osnok egens egema ek Petrus noba agot oida, "Bua tein jeska rua ongganga rururu Yesus koma!" Tina Petrus oroun gu ofa oida, "Didif jeska rua insa koma guru!"

⁵⁹ Erek aras egens deika beda osnok egens ois oida, "Tenten, osnok egens kef tein bera erek Yesus efen oforoka ojomu, jeska ofa tein efen oga jeska rua ongganga monuh Galilea!"

⁶⁰ Beda Petrus oroun oida, "Didif dinejginaga rot mar ongganga bua banggot koma guru!" Askesi Petrus enagot mar insa koma ros, beda mongkukar orna oga fob.

⁶¹ Erek koma beda Tuhan Yesus ekikif noba ohobut Petrus. Beda Petrus odou ah keingging rot mar ongganga

Yesus anggot gu ofa sis fob oida, "Deisef erek mongkukar orna onoga enesi, beda bua bumorot keingging rot ofosma orgomu gu rusnok oida bua bera binejginaga rot Didif guru."

⁶² Beda Petrus eja orogna jeska momas egens koma noba ebisa eteb rot mar insa koma.

⁶³ Rusnok onga rut joug Yesus rahaisomu rot Ofa noba rubu Ofa tein.

⁶⁴ Rua rira meifeti rurond efen eiteij beda rijeka gu Ofa oida, "Bua birek nabi egens ei, jefeda bagot gu memef rot idu bera onga obu Bua koma ojgomu!"

⁶⁵ Beda rua ruga oruh Ofa rot mar ofoukou tein.

⁶⁶ Gij rahah tentena beda ebirfager Yahudi jera ebirfager imam-imam jera Guru-Guru agama rumohoturuma. Beda rusnok ruroun Yesus skoita rua.

⁶⁷ Beda rua ragot gu Ofa oida, "Bua bera Kristus egens koma onga emen ei era gurei. Bagot rot koisoisa ojgomu?" Beda Yesus oroun gu rua oida, "Erek Didif dagot gu iwa oida Didif bera Kristus koma onga emen, beda iwa idou inororu Didif rot guru.

⁶⁸ Noba erek dijeka gu iwa rot mar insa koma tein, beda iwa inoroun gu Didif rot guru.

⁶⁹ Tina ebeibeyaif Didif, onga Rusnok Efesa, bera dimeker jah Allah ognosk. Ofa bera efen ofoka onga aksa eteb."

⁷⁰ Beda rua rijeka gu Ofa oida, "Bua bera Allah efesa ei?" Beda Yesus oroun oida, "Mar onga iwa yagot koma bera tenten ojgomu."

⁷¹ Beda rua ragot moguma oida, "Erek koma jefeda munohca rot efen mar onga oska deika guru, jeska mar onga Ofa anggot koma bera erek oska!"

23 ¹Erek koma beda ebirfager agama insa koma nomnaga ridebecki noba ruroun Yesus skoita Gubernur Pilatus.

²Nou onggua rua rinsaga jah Pilatus efen mod beda rua rucuwei mar gij Yesus oida, "Osnok egens kef agot mar onggua ekirsa rot mefmen hukum agama! Noba Ofa oftufu rusnok oida rua runoh pajak skoita raja Kaisar tein guru. Noba Ofa ofra esinsa ofoka erek raja egens onggua ofoka Kristus onggua emen tein!"

³Jefeda Pilatus ejeka gu Yesus oida, "Tenten ei? Bua bera raja jeska rusnok onggua Yahudi ei?" Beda Yesus oroun oida, "Mar onggua bua banggot koma bera tenten ojgomu."

⁴Beda Pilatus agot gu ebirfager imam-imam insa koma jera rusnok rufoukou jah suma koma oida, "Didif dinek rot mar onggua oska onggua Ofa ontunggom fob egema tein guru. Jefeda enadaij nou didif duga ojga rot Ofa guru."

⁵Tina rua ruis rot ruga eteb ekirsa oida, "Ofa oftufu mar gu rusnok fogora rudou oska rot memefo. Ofa oftufu rot mar erek koma rejrej monuh Yudea nomnaga. Sismeni Ofa oftufu mar erek koma gij monuh Galilea ojgomuja onjoros jah kota Yerusalem kef tein."

⁶Nou onggua Pilatus engg mar onggua ebirfager Yahudi ranggot insa koma rot Yesus, beda ofa ejeka gu rua oida, "Yesus bera ojga monuh Galilea ei?"

⁷Nou onggua rua ruroun gu Pilatus oida Yesus efen ojga monuh Galilea, beda Pilatus ejginaga rot oida Herodes bera raja onggua ofoka ereij keingg rusnok Yahudi gij monuh insa koma. Jefeda ofa obk Yesus skoita raja Herodes onggua engker gij kota Yerusalem gij mona insa koma tein.

⁸ Gij mona onnga Herodes ek Yesus, beda ofa odou eskeira eteb rot, jeska sis fob bera ofa odou os orodosu Yesus tein. Jeska ofa engg mar ofoukou osok gij Yesus fob, noba ofa odou os ek Yesus otunggom mar onnga onswos tein.

⁹ Erek koma jefeda Herodes ejeka mar ofoukou gu Ofa. Tina Yesus onoroun mar sons gu ofa jinaga guru.

¹⁰ Ebirfager imam-imam jera Guru-Guru agama rut jah suma tein, noba rucuwei mar ofoukou gij Ofa jah Herodes odou.

¹¹ Beda Herodes jera efen tentarer rita meifeti onnga erek raja efen noba raha koma tumu Ofa. Beda rua rahaisomu rot Ofa noba ruga oruh Ofa tein. Noba rua rubk Ofa sons skoita Pilatus.

¹² Sis fob bera Herodes jera Pilatus gomotkonu oska moguma, tina gij mona insa koma beda goga godou eskeira moguma sons.

¹³ Pilatus jera ebirfager imam-imam jera ebirfager Yahudi rineya tein rumohoturuma.

¹⁴ Beda ofa agot gu rua oida, "Iwa iroun osnok egens kef skoita didif, noba iwa yagot oida mar onnga Ofa oftutu bera orotunggom rusnok rudou oska rot iwa. Didif dijeka joug Ofa jah idou fob, tina didif dik rot oida Ofa onotunggom mar onnga oska egema tein guru.

¹⁵ Noba raja Herodes tein enek rot efen mar onnga oska egema tein guru. Jefeda ofa obk Ofa sons skoita mimif. Ofa koma bera onotunggom mar oska egema tein guru, jefeda enadaij nou didif duga ojga rot oida Ofa agos guru.

¹⁶ Erek koma jefeda didif dumobk tentarer jeskaseda rangha Ofa doska, beda didif dumosuwa Ofa jeska ojgomu."

¹⁷ ((Gij orofosut mona onga Paskah bera Pilatus osuwa osnok Yahudi egens jeska mod oskusk jeskaseda rusnok Yahudi rudou oufa rot ofa)).

¹⁸ Rusnok nomnaga onga runt jah suma ruis rot ruga eteb gu Pilatus oida, "Burka Ofa jeska ojgomu, noba busuwa Barabas jeska mod oskusk ojgomu."

¹⁹ (Tentarer raha Barabas gij mod oskusk jeska sis fob ofa oh mosoruk gij kota Yerusalem, noba ofa agob rusnok tein.)

²⁰ Tina Pilatus odou os osuwa Yesus ojgomu, jefeda ofa agot rot mar insa koma juens deika.

²¹ Tina rua ruis rot ruga eteb deika oida, "Butob Ofa tumu mega salib ojgomu! Butob Ofa tumu mega salib ojgomu!"

²² Beda Pilatus ois rot mar insa koma erek ofosma juomu deika oida, "Iwa idou os jeskaseda didif dutob Ofa tumu mega salib rot meidu? Ofa ontunggom mar onga oska erek meidu? Jeska didif dinek efen mar onga oska onga Ofa ontunggom fogora ejagos rot jinaga guru. Jefeda didif dumobk tentarer jeskaseda rangha Ofa, beda didif dumosuwa Ofa ojgomu."

²³ Tina rusnok riskemba insa koma ruis rot ruga eteb ojgomuja oida rutob Ofa tumu mega salib ojgomu. Jefeda Pilatus esiri gu rua fogora oitij rot ojgomu.

²⁴ Beda ofa oga ojga rot oida Yesus ejagos jeni rusnok insa koma rudou os rot.

²⁵ Noba ofa osuwa Barabas insa koma onga ois mosoruk ofoka noba anggob rusnok sis fob gu rua. Beda ofa aha Yesus gu rua jeskaseda rua rutunggom mar onga rudou os rot ojgomu.

²⁶ Nou onnga rua ruroun Yesus jeskaseda rutob Ofa tumu mega salib, beda rua rurodosu osnok egens onnga ofoka Simon. Ofa ojga Kirene. Gij mona insa koma ofa oksons jeska monuh enjineg noba ofa omoira gij kota koma. Beda rua ruskotu ofa noba riradgodu ofa jeskaseda orka mega salib onnga rumotub Yesus tumu.

²⁷ Rusnok rufoukou rutoij Yesus. Rineya jeska rua bera rujager onnga ribisa noba rudou ousaha rot Ofa.

²⁸ Beda Yesus ekikif noba agot gu rujager koma, "Yujager onnga kota Yerusalem, iwa inebisa rot Didif guru. Tina iwa ibisa rot isinsa jera yeyin iser tein.

²⁹ Jeska gij mona onnga okum onnga emen beda iwa imagot oida, 'Oufa ekirsa rot rujager onnga rifaga onokum rot riser guru, jera rujager onnga runok riser guru, jera rujager onnga erek runoh mengk gu riser tein guru.'

³⁰ Jeska gij mona insa koma onnga emen beda rusnok rumois gu memaga oida, 'Ijba keingg memef ojgomo!' Noba rua rumois gu memaga ofog oduma oida, 'Icohun memef ojgomo!'

³¹ Jeska erek rusnok rita mar onnga oska erek kef gu Didif, onnga erek mega efeyi onnga ebah ros, beda rua rimeita mar onnga okum ekirsa gu iwa si."

³² Gij mona insa koma rua ruroun gosnok gegeka onnga gofogog jeskaseda rutob goga tein tumu mega salib morototuma jera Yesus.

³³ Nou onnga rusnok insa koma ruroun Yesus jah monuh onnga ofoka 'Ebirfaga Oboha,' beda rua runtob Ofa jera gosnok gegeka onnga gofogog insa koma tumu mega salib. Rua runtob gegema tumu

mega salib jah Yesus ognosk noba gegema tumu mega salib jah Yesus egris.

³⁴ Beda Yesus agot oida, "Akeina, busuna mar onnga oska insa kef jeska rusnok koma rudou efesi. Jeska rua rudou enebriyi gij mar kef onnga rua runtunggom gu Didif enesi."

³⁵ Rusnok rut jah suma noba ruhobut rot Yesus ojgomuja. Noba ebirfager Yahudi ruga oruh rot Ofa tein. Rua ragot oida, "Ofa osuwa rusnok enjgineg jeska rerin mar okum fob. Jefeda erek Ofa bera Kristus koma onnga Allah ocunc jeskaseda emen skoita mimif onnga Yahudi rot tenten ei, beda adaij nou Ofa osuwa esinsa jeska mar okum insa kef ojgomu!"

³⁶ Beda tentarer tein rin noba ruga oruh Ofa. Rua rita anggur efei onnga ekemba gu Ofa jeskaseda ej.

³⁷ Beda rua ragot oida, "Erek Bua bera raja onnga rusnok Yahudi rerin, beda busuwa bisinsa jeska mega salib kef ojgomu!"

³⁸ Beda runggu tumu mega salib jah skida Yesus ebirfaga rot mar erek kef: "."

³⁹ Gegema jeska goga onnga gofogog onnga runtob tumu mega salib jah suma oga oruh Yesus tein. Ofa agot oida, "Erek Bua bera Kristus egens koma onnga emen, beda busuwa bisinsa jera magef tein ojgomu!"

⁴⁰ Tina gegema jeska goga etaha joug ofa oida, "Erek bua binemeesa rot Allah tein gurei? Rusnok insa koma ruga ojga rot oida bua bagos morototuma erek ruga ojga rot Ofa tein.

⁴¹ Nagef natunggom mar onnga oska fob, jefeda nagef nasma mar okum kef rot ojgomu. Tina Yesus kef bera eneita mar onnga oska egema tein guru."

⁴² Beda osnok egens koma agot gu Yesus oida, "Yesus, gij mona onnga Bua bufoka ereij keingg rusnok fob, beda bucunc budou onnga eriagamaga rot didif ojgomu."

⁴³ Beda Yesus agot gu ofa oida, "Ongga tenten bera, gij mona deisef tein bua bumoirra gu mebaga morototuma jera Didif si."

⁴⁴ Erek mowa ot deis fob, beda mebaga gij monuh insa koma eja erek motkobah noba ah erek koma gij aras orgomu deika.

⁴⁵ Beda meifeti aksa onnga rusnok rif joug montoj gij Mod Allah ebga erek egeka.

⁴⁶ Beda Yesus ois rot oga eteb oida, "Akeina, Didif daha difeni gij bebin bitma!" Nou onnga Ofa anggot mar koma, beda Ofa agos fob.

⁴⁷ Nou onnga ebirfaga tentarer egens engk rot mar insa koma, beda ofa esitit Allah noba agot rot Yesus oida, "Osnok egens kef bera efen odou onnga ebsi komowa rot tenten ojgomu!"

⁴⁸ Nou onnga rusnok rufoukou onnga rut jah suma ringk rot mar insa koma tein, beda rua ruksons jah rerin mod rot rudou onnga okum eteb.

⁴⁹ Tina rusnok egema tein onnga erek Yesus efen mohujir rut ai yes noba riajga rot mar insa koma nomnaga. Rineya jeska rua bera rujager onnga runroru Yesus jeska monuh Galilea.

⁵⁰ Osnok egens onnga ofoka Yusuf onnga ojga jeska kota Arimatea gij monuh Yudea enofogu jah suma. Ofa osnok egens onnga odou oufamofa, noba ofa ororu Allah oga rot Tenten. Ofa tein odou ot nou mona onnga Allah omofoka ereij keingg rusnok. Ofa tein bera erek rusnok Yahudi rerin ebirfaga egens.

Tina ofa onoitij rot mar onnga ebirfager agama insa koma ruga ojga rot osok gij Yesus guru.

⁵¹ (23:50)

⁵² Ofa eja skoita Pilatus noba erejgei ofa jeskaseda erek Pilatus oitij rot, beda ofa emedaga Yesus efaga jeska mega salib.

⁵³ Pilatus oitij rot, jefeda ofa ejedaga Yesus efaga jeska mega salib, noba ofa era meifeti orond efen efaga. Beda ofa aha Yesus efaga gij mamu efesi onnga rusnok rutunggom fob. Rusnok rinaha mar agos egema tein gij mamu efesi insa koma enesi.

⁵⁴ Gij mona insa koma rusnok Yahudi risejah mar nou mona onnga Sabat, jeska ai juens beda mona onnga Sabat emesaga.

⁵⁵ Rujager insa koma onnga rururu Yesus jeska monuh Galilea bera rururu Yusuf jah mamu efesi jeskaseda rik ofa esah Yesus efaga gij mamu efesi insa koma.

⁵⁶ Beda rua ruksons noba risejah mar onnga efen ensesa jera miniyi onnga efen ensesa jeskaseda oroh Yesus efaga. Tina jeska mona onnga Sabat ensaga fob, jefeda rua riker mona juens jeni rerin agama erebent anggot rot.

24 ¹ Gij mona juens erek rahah tentena, beda rujager insa koma rurka miniyi onnga efen ensesa jah Yesus moksu jeskaseda ruros efen efaga.

² Nou onnga rua rinsaga gu Yesus odog, beda rua rik, tina mamu eteb onnga rurof joug mamu efesi neeka bera eskiski jeska fob.

³ Beda rua ruira gij mamu efesi, tina rua rinek Yesus efaga jah suma guru.

⁴ Rua runot jah suma noba rusujohu osok gij mar insa koma, tina rudou eineina gij ojgomu. Beda ainsa

koma tein, gosnok gegeka onnga gergi meisoufa onnga efesa eisa eteb got desi rua.

⁵ Rujager insa koma rimeesa eteb noba ruug ribirfaga jeska. Beda gosnok gegeka insa koma gagot gu rua oida, "Iwa yuhca osnok egens onnga efena ebah gu rusnok onnga ranggos rifelesa rot meidu?

⁶ Jeska Ofa enah jah sif guru. Ofa endebecki jeska agos fob! Iwa idou ah keingg rot mar onnga Ofa anggot gu iwa gij monuh Galilea sis fob ei?

⁷ Gij mona insa koma Ofa agot oida, 'Rusnok rufogog rimagei Didif, Rusnok efesa, fogora runtob Didif tumu mega salib. Beda gij mona onnga juomu deika bera dimedebecki jeska dagos si.' "

⁸ Beda rujager insa koma rudou ah keingg rot mar onnga Yesus anggot erek insa koma gu rua sis fob.

⁹ Nou onnga rua ruksons jeska Yesus odog fob, beda rua riflesij rot mar insa koma nomnaga gu Yesus efen ruforoker rufok setka kungkob erfens jera rusnok enjgineg tein.

¹⁰ Rujager onnga rinfesij rot mar insa koma nomnaga bera erek Maria onnga rijeka Magdalena ni, Yohana ni, Maria onnga Yakobus efen mosu ni, jera rujager enjgineg tein.

¹¹ Tina Yesus efen ruforoker ragot oida, "Iwa yucuwei mar rot ojomu!" Noba rua rudou onororu rujager insa koma ruga guru.

¹² Tina Petrus edebecki noba ofof jah Yesus odog. Nou onnga ofa ensaga jah suma, beda ofa ougif noba ogog gij mamu efesi, tina ofa ek meifeti ojomu. Beda ofa odou ousaha rot, noba ofa oksons rot odou onnga eineina gij tein.

¹³ Gij mona insa koma tein bera Yesus efen goforoka gegeka onnga gecira jah kota egens onnga ofoka

Emaus. Kota egens koma ah kilometer setka kungkob erfeka yes jeska kota Yerusalem.

¹⁴ Goga gecira noba gefesij mar moguma osok gij mar onggaga encirej Yesus fob.

¹⁵ Askesi Goga genefesij mar ros, beda ainsa koma tein Yesus orogna keingg goga noba ecira morototuma jera goga.

¹⁶ Goga gek Ofa, tina godou enebriyi gij oida Ofa koma bera Yesus enesi. Mar egens ocohun keingg rudou efesi rot.

¹⁷ Beda Ofa ejeka gu goga oida, "Goga gefesij rot mar meidu gu moroju kef?" Beda goga got rot gebirfaga onggaga esiri jeska godou okum rot.

¹⁸ Beda gegema jeska goga onggaga ofoka Kleopas ejeka gu Yesus oida, "Bua bisinsiyai onggaga binjah kota Yerusalem bera binejginaga rot mar okum onggaga encirej osnok egens jah suma fob gurei?"

¹⁹ Beda Yesus ejeka goga oida, "Mar meidu bera koma?" Beda goga goroun oida, "Mar onggaga encirej Yesus, onggaga ojga jeska kota Nazaret. Ofa erek nabi egens onggaga Allah ombk fob. Noba Ofa agot mar rot owesa efek noba otunggom mar rot owesa efek ahah Allah eiteij jera rusnok riteij tein.

²⁰ Mefmen Guru-Guru agama jera ebirfager tein raha Ofa gu rusnok onggaga rufogog tein. Noba rua runtob Ofa tumu mega salib fogora Ofa agos fob.

²¹ Tina sis fob memef modou oisum gij Ofa rot oida Ofa bera Kristus egens koma onggaga emen jeskaseda osuwa mimif onggaga Israel jeska mifmin mar okum. Rua ranggob Ofa erek mona orgomu fob.

²² Erek koma noba rujager rineya jeska memef bera ranggot rot mar onggaga orotunggom modou ousaha

eteb rot. Gij raha tentena, beda rua rija jah Yesus odog.

²³ Tina rua rinek efen efaga jah suma guru. Beda rua ruksons noba ragot oida rua ringk malaikat gegeka fob. Noba malaikat gegeka koma ganggot oida Yesus efena ebah sons fob.

²⁴ Beda rineya jeska memef rija jah Yesus odog. Noba rua rik oida mar onnga rujager ranggot insa koma bera tenten ojgomu. Tina rua rinek Yesus guru."

²⁵ Beda Yesus agot gu goga oida, "Goga godou osumu ojgomu. Goga godou onororu mar nomnaga onnga nabi-nabi ranggot rot mar insa koma sis fob enesi.

²⁶ Jeska nabi-nabi koma ranggot oida, 'Kristus koma onnga emen jeska Allah bera emeita efera okora rot sismeni fog fogora Ofa emesma ofoka onnga aksa eteb.' "

²⁷ Beda Yesus efesij gu goga rot mar nomnaga onnga Musa jera nabi-nabi nomnaga runggu gij Mar Efeyi Ebsi sis fob osok gij Ofa esinsa.

²⁸ Erek koma noba nou onnga rua rinsaga doida kota Emaus fob, beda Yesus ocunc gu goga rot oida Ofa emeja jah monuh enjgineg.

²⁹ Tina goga gois gu Ofa oida, "Bua bin noba biker jera magef ojgomu, jeska ai juens beda motu fob." Jefeda Ofa ororu goga jah gegangan mod.

³⁰ Nou onnga Ofa eker gu meja morototuma jera goga, beda Ofa agei roti ofog egens. Beda ofa ois oufamofa gu Allah rot, beda Ofa etka roti dougdoug fogora eita gu goga.

³¹ Beda ainsa koma tein goga gejginaga rot oida Ofa bera Yesus. Beda Yesus eseseifa jeska geiteij fob.

³² Erek koma beda goga gagot moguma oida, "Tenten, askesi nagef nacira morototuma gu moroju jera Ofa ros, noba Ofa efesij mar insa koma jah Mar Efeyi Ebsi gu nagef, beda Ofa oga agob nadou efesi rot tenten."

³³ Jefeda goga gedebeki noba goksons rot ebeirens jah kota Yerusalem. Nou onnga goga gensaga jah suma fob, beda goga gejek Yesus efen rufroker rufok setka kungkob erfens jera rua enjgineg onnga rumohoturuma jera rua fogora gagot oida goga gek Yesus fob.

³⁴ Beda rua insa koma ragot gu goga oida, "Tenten, Yesus endebecki sons jeska agos fob! Noba Ofa oncunc esinsa gu Simon fob!"

³⁵ Beda goga gefesij rot teinefa Yesus ecira jera goga noba gefesij mar jera goga gu moroju. Noba goga gagot rot teinefa goga gejginaga rot oida Ofa koma bera Yesus gij mona onnga Ofa etka roti nou goga fob.

³⁶ Askesi rua rimfesij rot mar insa koma ros, beda Yesus orogna gu rua rifekesa noba agot gu rua oida, "Iwa isma eskeiramera eteb fob!"

³⁷ Rua nomnaga rufos graga rot noba rimeesa eteb, jeska rua rusujohu rot oida rifena bera koma.

³⁸ Beda Yesus agot gu rua oida, "Iwa ijekjeka mar gij idou efesi erek koma rot meidu?"

³⁹ Iwa ik ofamosma onnga angh tumu dedin ditma jera daki. Didif bera Yesus ojomu! Iwa yahtec Didif dufos ojomu beda imek oida dedin dufos jera dufora tein. Efena bera efen mar erek koma guru."

⁴⁰ Nou onnga Ofa anggot mar insa koma gu rua fob, beda Ofa ocunc efen etma jera aki gu rua.

⁴¹ Rua rijekjeka rudou efesi rot jeska rudou efaga ouka, tina rua rudou ousaha eteb rot tein. Beda Yesus ejeka gu rua oida, "Maat egema enahuma ei?"

⁴² Beda rua rita mos ofogu onnga efej fob gu Ofa.

⁴³ Beda Ofa eita mos koma noba et.

⁴⁴ Erek koma beda Ofa agot gu rua oida, "Sis fob Didif dimfesij rot mar insa kef nomnaga gu iwa fob. Didif danggot rot oida mar nomnaga onnga Musa onngu gij Mar Efeyi Ebsi ni, mar nomnaga onnga nabi-nabi runggu rot ni, mar nomnaga onnga runggu gij Mazmur ni, osok gij Didif bera emah gij efera sismeni fog."

⁴⁵ Beda Ofa oftufu rua rot koisoisa deika jeskaseda rudou ebriyi gij mar onnga runggu gij Mar Efeyi Ebsi rot Ofa efen ofou.

⁴⁶ Ofa agot gu rua oida, "Sis fob runggu gij Mar Efeyi Ebsi rot oida, 'Kristus egens koma onnga emen bera emeita efera okora rot sismeni fogora gij mona juomu deika beda Ofa emedebecki sons jeska agos si.

⁴⁷ Beda rusnok rumoftufu oisouska efen ofoka rot oida, erek rusnok rimeesa joug rerin mar onnga oska, beda Allah omosuna rot rerin mar onnga oska koma jeska rudou efesi. Rua rumoftufu rot oga onnga oufamofa insa koma sismeni gij kota Yerusalem, beda oga insa koma emeja jah monuh nomnaga tein. Beda Allah onotkonu oska rot rua deika guru.' "

⁴⁸ Beda Yesus agot deika oida, "Iwa isinsa bera ingk rot mar insa koma nomnaga gu iteij fob.

⁴⁹ Didif dimesa mar onnga Akeina Allah anggen rot sis fob gu iwa si. Erek koma tina iwa iker gij kota Yerusalem onjoros iwa isma owesa efek eteb jeska mebaga."

⁵⁰ Erek koma beda Yesus oroun rua jeska kota Yerusalem noba okag rot rua jah kota Betania. Beda Ofa ofra etma noba eita oufamofa gu rua.

⁵¹ Askesi Ofa eneita oufamofa gu rua ros, beda Ofa eja jeska rua noba osok jah mebaga.

⁵² Beda rua risitit mar gu Ofa noba ruksons jah kota Yerusalem rot rudou onnga efaga ouka eteb.

⁵³ Beda rua rumohoturuma gij momas onnga ah rejrej Mod Allah noba risitit Allah ojgomuja. Ainsoma.

Yohanes

1 ¹ Gij mona onnga Allah onotunggom mebif enesi, bera Ofa onnga efen ofoka Oga enofoguma sis fob. Oga insa koma enofoguma morototuma jera Allah fob. Noba Oga insa koma bera morototuma erek Allah.

² Noba gij mona onnga sis dojunmeni bera Oga insa koma eneker jera Allah fob.

³ Ofa bera onnga ontunggom mar nomnaga. Noba mar nomnaga onnga enahuma bera en jeska Ofa ojomu.

⁴ Ofa bera onnga eita eiteij ah onnga efeinah gu rusnok. Noba eiteij ah onnga efeinah insa koma bera erek eisa onnga orocunc rot mar onnga tenten gu rusnok nomnaga.

⁵ Noba mebi insa kef bera erek motkobah rot efen mar onnga oska ofoukou ojomu. Noba Oga insa koma efen eisa onnga ejinten gij motkobah nomnaga fob, tina motkobah onocohun keingg eisa koma jinaga guru.

⁶ Allah obk osnok egens onnga efen ofoka Yohanes.

⁷ Ofa en jeskaseda efesij mar onnga tenten osok gij eisa insa koma. Ofa efesij rot mar insa koma jeskaseda rusnok rufoukou rimeg rot fogora rua tein rumororu.

⁸ Yohanes bera enerek eisa insa koma guru, tina ofa en jeskaseda efesij mar onnga tenten osok gij eisa insa koma gu rusnok ojomu.

⁹ Jeska Ofa onnga erek eisa onnga tenten nou rusnok nomnaga bera emen gu mebif.

¹⁰ Ofa onggga efen ofoka Oga bera onggga ontunggom mebif nomnaga, noba ebeibeyaif Ofa en gu mebif fob. Tina rusnok rinejginaga rot Ofa enesi.

¹¹ Ofa en skoita efen rusnok Yahudi, tina efen rusnok insa koma rungkoja Ofa ojgomu.

¹² Tina rusnok enjgineg rufoukou ruroun Ofa noba rudou ororu Ofa rot tenten. Jefeda Ofa eita owesa efek gu rua jeskaseda rija erek Allah efen efeser.

¹³ Rua rineja erek Allah efen efeser oisouska risinsa rudou os rot guru. Noba rusnok enjgineg runocunc rua erek koma guru. Tina Allah esinsa bera onggga ocunc rua erek efen efeser ojgomu.

¹⁴ Ofa onggga efen ofoka Oga insa koma en gu mebif erek osnok egens noba eker morototuma jera rusnok. Ofa bera erek Allah efen efesa onggga egensmes. Noba memef mek Ofa efen owesa efek. Owesa efek koma bera Ofa esinsa esma jeska efen meka Allah. Noba Ofa otunggom mar nomnaga oisouska efen odou onggga oufamofa noba onggga ororu mar onggga tenten ojgomu.

¹⁵ Yohanes insa koma onggga Allah ombk sis fob bera anggot mar onggga tenten osok gij Ofa. Jeska ofa ois gu rusnok oida, "Ofa kef bera onggga didif dimfesij gu iwa rot sis fob. Ofa bera onggga didif danggot rot oida, Ofa onggga ongakahma otoij didif bera efen ofoka onggga ekirsa jeska didif. Jeska gij mona onggga didif dunjuj jeska ameina, beda Ofa enofoguma sis fob."

¹⁶ Noba oisouska odou onggga eskeiramera eteb rot mimif bera Ofa eita oufamofa eteb gu mimif odudu dokun deika ojgomuja.

¹⁷ Jeska Allah eita efen hukum gu rusnok oisouska Musa. Tina oisouska Yesus Kristus bera mimif misma

efen oga onggga tenten jera oufamofa eteb erek insa koma ojgomu.

¹⁸ Rusnok egema tein rinek Allah enesi. Tina efen efesa egensmes onggga erek Allah, Ofa bera engker desi Allah. Noba oisouska efen oga bera Ofa oncunc gu mimif rot Allah erek jeni.

¹⁹ Sis fob ebirfager Yahudi gij kota Yerusalem rubk rerin imam-imam jera rineya jeska rusnok ebic Lewi skoita Yohanes jeskaseda rijeka gu ofa oida, "Bua bera idu?" Kef bera osok gij mar onggga ofa oroun gu rua insa koma.

²⁰ Ofa enedemdemi mar gij odou efesi jeska rua guru, tina ofa agot mar rot tomnomna gu rua ojgomu. Ofa agot gu rua oida, "Didif bera Kristus egens koma onggga emen guru."

²¹ Jefeda rua rijeka gu ofa deika oida, "Jefeda bua bera idu? Bua bera nabi Elia onggga ongksons en fob ei?" Tina ofa oroun gu rua oida, "Didif bera nabi Elia tein guru."

²² Beda rua rijeka gu ofa deika oida, "Jefeda bua bera idu? Bagot gu memef rot tenten jeskaseda memef moksons noba magot rot gu rua onggga rumbk memef skoita bua tein. Bagot gu memef osok gij mar onggga bua butunggom jah sif."

²³ Beda Yohanes era mar onggga nabi Yesaya anggot gij Mar Efeyi Ebsi osok gij ofa sis fob fogora ofa oroun gu rua oida, "Didif bera osnok egens koma onggga agerir mar gij monuh onggga mebi oska rot oida iwa itunggom moroju onggga edeider nou Tuhan onggga emen!"

²⁴ Erek koma beda ebirfager Yahudi rubk rineya jeska ebic Farisi skoita Yohanes.

²⁵ Rua rijeka gu ofa oida, "Bua banggot rot oida bua bera Kristus onnga emen guru, era nabi Elia guru, era nabi enjgineg tein guru. Jefeda bua bita baptis gu rusnok rot meidu?"

²⁶ Beda Yohanes oroun gu rua oida, "Didif dira mei direita baptis gu rusnok. Tina osnok egens onnga iwa inejginaga rot enesi bera eneker gu ifekesa fob.

²⁷ Ofa bera omokahma otoij didif. Tina didif dedin dufoka onnga enadaj nou dugif gu mebi noba dusuwa Ofa efen marfeb tumu sandal jeska okoda tein jinaga guru."

²⁸ Rusnok insa koma rinjeka joug Yohanes gij monuh Betania onnga angh jah mei Yordan enama. Ofa eita baptis gu rusnok jah suma.

²⁹ Gij mona egema deika, beda Yohanes ek Yesus enen skoita Ofa. Beda Yohanes agot gu rusnok jah suma oida, "Iwa ik, jeska osnok egens kef bera erek Allah efen domba efer. Ofa en jeskaseda osuwa rusnok jeska rerin mar onnga oska!

³⁰ Ofa bera onnga didif dimfesij mar rot sis fob. Gij mona insa koma bera didif danggot rot oida, osnok egens emen okahma otoij didif. Tina Ofa bera efen ofoka onnga aksa ekirsa jeska didif. Jeska gij mona onnga ameina eneker rot didif enesi, beda Ofa enofoguma fob.

³¹ Erek didif dita baptis gu rusnok Yahudi jeskaseda rua rinsejah nou mona onnga Kristus emen fogora osuwa rusnok jeska rerin mar onnga oska. Tina gij mona insa koma bera didif disinsa dinejginaga rot oida Ofa koma bera Kristus egens onnga emen guru."

³² Erek koma beda Yohanes agot oida, "Didif dik Efena Ebsi ojuj jeska mebaga noba ah esij Ofa erek mem monggeta mos onnga ojuj jeska mebaga.

³³ Onjoros mona insa koma bera didif dinejginaga rot idu onnga emen erek Kristus egens onnga omoskotu mimif enesi. Tina Allah, onnga obk didif jeskaseda dira mei direita baptis gu rusnok, bera agot gu didif oida, 'Gij mona onnga bua bik Efena Ebsi onjuj jeska mebaga noba eker esij osnok egens, beda bua bimejginaga rot oida osnok egens koma bera onnga emeita baptis gu rusnok oisouska Efena Ebsi.'

³⁴ Didif dingk rot mar insa koma fob. Noba didif dagot gu iwa rot tenten oida, osnok egens insa koma bera Allah efen efesa."

³⁵ Gij mona egema deika beda Yohanes eja jah mei Yordan morototuma jera efen goforoka onnga gororu ofa.

³⁶ Nou onnga ofa ek Yesus ecira jah suma beda ofa agot oida, "Goga gek, jeska Ofa koma bera erek Allah efen Domba Efer!"

³⁷ Yohanes efen goforoka koma geg mar onnga ofa anggot insa koma, jefeda goga gororu Yesus ojomu.

³⁸ Nou onnga Yesus ekikif noba ek goga, beda Ofa agot gu goga oida, "Goga godou os meidu?" Beda goga goroun oida, "Akeina Guru, Bua biker sinefo?"

³⁹ Beda Ofa oroun gu goga oida, "Goga gororu Didif fogora gemek rot ojomu si." Jefeda goga insa koma gororu Yesus noba goga gek monuh onnga Ofa eker gij. Noba goga geker jera Ofa gij monuh insa koma jeska nou monjomjom fob.

⁴⁰ Gegema jeska goga insa koma onnga eg rot mar onnga Yohanes agot osok gij Ofa fogora ororu Ofa bera Andreas, onnga Simon Petrus efen mokora.

⁴¹ Beda Andreas eja rot ebeirens skoita efen mokosa Simon Petrus jeskaseda agot gu ofa oida, "Simon,

memef mek Kristus onnga omosuwa rusnok jeska rerin mar onnga oska fob!"

⁴² Beda Andreas oroun Simon skoita Yesus. Beda Yesus agot gu ofa oida, "Bua bera Simon onnga Yohanes efen efesa. Tina Didif dimejeka bua bufoka Kefas." (Ofoka Kefas morototuma erek Petrus).

⁴³ Gij mona egema deika beda Yesus ecira jah monuh Galilea. Ofa ek Filipus jah suma, beda Ofa agot gu ofa oida, "Bua buroru Didif ojgomu."

⁴⁴ Filipus ojga jeska kota Betsaida. Noba Andreas jera Petrus geker jah suma tein.

⁴⁵ Filipus ejek Natanael jah suma, beda agot gu ofa oida, "Memef mek osnok egens koma onnga Musa onngu mar rot gij buku hukum sis eteb fob. Ofa bera onnga nabi-nabi runggu mar rot sis fob tein. Ofa efen ofoka Yesus onnga Yusuf efen efesa. Noba Ofa ojga jeska kota Nazaret."

⁴⁶ Tina Natanael agot gu Filipus oida, "Didif dinek mar egema tein orogna jeska kota Nazaret onnga erek oufa enesi!" Erek koma tina Filipus agot oida, "Bua bija noba bik Ofa ojgomu."

⁴⁷ Nou onnga Yesus ek Natanael encira skoita Ofa, beda Ofa agot rot Natanael oida, "Osnok egens kef bera erek rusnok onnga Israel rot tenten. Ofa odou ororu mar onnga tenten ojgomu."

⁴⁸ Beda Natanael ejeka gu Ofa oida, "Bua bijginaga rot didif jeska guaidu?" Beda Yesus oroun oida, "Erek Filipus enagot mar gu Didif rot bua enesi, tina Didif dik bua bingker gu mega ara efeyi owohoh."

⁴⁹ Beda Natanael agot gu Yesus oida, "Akeina Guru, Bua bera Allah efen efesa rot tenten! Bua bera Raja egens koma onnga emen jeskasada ofoka ereij keingg rusnok Israel."

⁵⁰ Beda Yesus agot gu ofa oida, "Bua budou ororu didif ebeibeyaif jeska bua big Didif dagot oida Didif dingk bua biker gu mega ara efeyi owohoh. Tina gij mona kama bera bua bimek mar onnga onswos eteb ekirsa jeska mar insa koma si."

⁵¹ Beda Yesus agot gu rua nomnaga oida," Didif dagot rot tenten oida iwa nomnaga imek mebaga ohoda jera Allah efen malaikat-malaikat onnga rusok noba rujuj jeska mebaga skoita Didif, Rusnok Efesa si."

2¹ Erek koma beda gij mona jueka deika rusnok gij kota Kana onnga angh gij monuh Galilea ruina maat ofoukou keingg rua onnga rumoskotuma. Noba Yesus efen mosu eneker jah rifelesa tein.

² Noba rua ruis gu Yesus jeskaseda Ofa jera efen ruforoker tein rin noba rit maat insa koma morototuma.

³ Askesi rusnok rufoukou jah suma rit maat ros, beda rerin anggur efei oisa fob. Jefeda Yesus efen mosu agot gu Ofa oida, "Rerin anggur efei onnga rimej nomnaga oisa fob."

⁴ Tina Yesus oroun oida, "Ameina, enadaj nou Didif dita mar ebeibeyaif guru. Jeska mona onnga Didif dumocunc rot dedin owesa efek bera enen enesi."

⁵ Beda Yesus efen mosu agot gu rusnok onnga rumfij oida, "Iwa itunggom mar nomnaga onnga Ofa anggot rot gu iwa ojgomu."

⁶ Yesus ek debeji cinja erfens jah suma. Rusnok Yahudi rira mei jeska debeji insa koma jeskaseda rurot risinsa jeni erebent agama agot rot. Noba debeji egens egens insa koma ok mei liter erek wuntin egens.

⁷ Beda Yesus agot gu rua onggga rumfij oida, "Iwa yageya mei gij debeji koma nomnaga." Jefeda rua rageya mei gij debeji insa koma nomnaga onjoros ebera rot fob.

⁸ Beda Ofa agot gu rua oida, "Iwa yutkinaja mei insa koma oskiyai gij mok osku beda ita gu rua onggga rumfij rerin ebirfaga jah sif." Jefeda rua rurka mei insa koma skoita ebirfaga mod koma.

⁹ Nou onggga ofa ej mei insa koma beda mei koma eja erek anggur efei fob. Ofa enejginaga rot anggur efei insa koma bera en jeska sinefa guru. Tina rusnok onggga rumfij insa koma bera rijginaga rot fob. Beda ebirfaga egens insa koma ois gu orna egens onggga oskotu arja jah suma.

¹⁰ Beda ofa agot gu orna egens koma oida, "Erek giskini bera rusnok rita anggur efei onggga ongnoska gu rerin ruhujir rot sismeni fog. Nou onggga rua rinj anggur efei onggga oufamofa ofoukou fob, beda rua rita anggur efei onggga onotka eteb guru gu rua ojgomu. Tina anggur efei onggga dij ainsa kef bera onggga erek ongnoska eteb ekirsa jeska anggur efei onggga mimif minj gij rahah insa koma tein."

¹¹ Jefeda mar onggga Yesus ontunggom insa koma bera erek mar onswos onggga Ofa orocunc rot sismeni gij kota Kana onggga angh gij monuh Galilea. Ofa ocunc rot efen ofoka onggga aksa eteb, noba efen ruforoker rudou ororu rot tenten oida Ofa bera Allah efen efesa.

¹² Nou onggga koma oisa fob, beda Yesus eja jah kota Kapernaum morototuma jera efen mosu ni, efen mokoser ni, jera rusnok enjgineg tein onggga rudou os rururu Ofa tein. Rua ringker gij kota insa koma nou mona onggga estir ojgomu.

¹³ Gij mona eteb egens onnga ofoka Paskah en doida fob, beda Yesus eja jah kota Yerusalem.

¹⁴ Ofa oira gij momas onnga angh rejrej Mod Allah jah suma. Tina Ofa ek rusnok ebireira onnga ruhu mar erek sapi ni, domba ni, jera mem monggeta tein jah suma. Noba Ofa ek rusnok eneya onnga riferwei rusnok rerin fifi onnga erek toga toga tein.

¹⁵ Jefeda Ofa era marfeb erek mar onnga erangha rua rot fogora Ofa ekemeji rusnok insa koma jeska momas koma fob. Noba Ofa tein ekemeji rerin sapi-sapi jera domba-domba tein jeska momas koma onnga angh rejrej Mod Allah. Beda Ofa otkinaja meja onnga rusnok insa koma ringker gij jeskaseda riferwei rusnok rerin fifi fogora rerin fifi esiri suma suma.

¹⁶ Beda Ofa agot gu rua onnga ruhu mem monggeta oida, "Iwa yurka yeyin mem kef jeska ojgomu! Enadaj nou iwa ira Mod onnga Akeina efen kef erek mod onnga rusnok ruhu mareibra noba ringk mar gij erek koma guru!"

¹⁷ Nou onnga Yesus efen ruforoker ringk mar insa koma nomnaga, beda rudou ah keingg sons rot mar onnga nabi runggu gij Mar Efeyi Ebsi sis fob. Rua runggu rot oida, "Didif Dudou okora eteb rot bebin mod. Koma bera omotunggom didif fogora dagos rot si."

¹⁸ Erek koma beda rusnok Yahudi jah suma ragot gu Yesus oida, "Idu onnga eita owesa efek gu Bua fogora bunotunggom mar insa koma gij momas kefi! Jefeda Bua butunggom mar onswos nou mimif tein jeskaseda bucunc rot bebin owesa efek erek koma ojgomu."

¹⁹ Beda Yesus agot gu rua oida, "Iwa yuhoda Mod Allah onnga aksa eteb kef, beda Didif dimei mod kef sons gij mona rara orgomu si."

²⁰ Tina rua onnga Yahudi ragot oida, "Wah! Rusnok rimfarur gij ari mega ofoj setka tohkuru noba cinja erfens jeskasada rii Mod aksa kefi. Teinefa fogora Bua bimei Mod kef sons gij mona orgomu erek komo. Koma enadaij jinaga guru!"

²¹ (Tina ainsa koma tein Yesus efesij rot esinsa efen efaga onnga Ofa enjeka erek mod koma.

²² Noba gij mona onnga Yesus endebecki jeska agos fob, beda efen ruforoker rudou ah keingg rot mar insa koma onnga Ofa anggot gu rusnok Yahudi sis fob. Beda rudou ororu ojgomu rot mar onnga rusnok rungu gij Mar Efeyi Ebsi osok gij mar insa koma tein. Noba rua rijginaga rot oida mar onnga Yesus anggot gij mona insa koma osok gij esinsa efen efaga onnga erek Mod Allah bera erek tenten fob.)

²³ Yesus oira gij kota Yerusalem jeskasada ruina maat keingg morototuma jera rusnok Yahudi enjineg rot rerin mona eteb egens onnga ofoka Paskah. Noba gij mona insa koma bera rusnok rufoukou rudou eredi rot Ofa, jeska rua ringk mar onswos ofoukou onnga Ofa orocunc rot fob.

²⁴ Tina Yesus odou eneredi rot rua guru, jeska Ofa ejginaga rot mar onnga angh gij rusnok rudou efesi fob.

²⁵ Enadaij nou rusnok egema tein ruftuftu Ofa rot rusnok rerin rita mar guru, jeska Ofa ejginaga rot mar meidu onnga angh gij rusnok rudou efesi fob.

3¹ Osnok egens onnga ofoka Nikodemus eneker jah suma. Ofa bera jeska ebic Yahudi onnga ofoka Farisi. Ofa efen ofoka onnga aksa eteb tein.

²Gij motu egens beda ofa en skoita Yesus noba agot gu Ofa oida, "Akeina Guru, memef mejjinaga rot oida Bua bera erek Guru egens onggga Allah ombk fob. Jeska rusnok egema tein runocunc rot mar onggga onswos erek Bua buncunc rot fob guru. Jefeda koma orocunc rot oida Allah bera onggga onofij Bua."

³Beda Yesus agot gu ofa oida, "Kef bera onggga tenten oida, erek rusnok rinesma riteij ah juens deika guru, beda enadaij nou rua ruiru jera rusnok onggga Allah ofoka ereij keingg jinaga guru."

⁴Beda Nikodemus agot oida, "Tina erek osnok egens onokona fob, teinefa fogora ofa esma eiteij ah juens deika erek koma? Jeska enadaij nou ofa oira sons gij mosu efen otkonu guru. Jefeda ofa esma eiteij ah juens deika erek teinefa?"

⁵Beda Yesus oroun gu ofa oida, "Ongga tenten bera, erek osnok egens enesma eiteij ah oisouska mei jera oisouska Efena Ebsi guru, beda enadaij nou ofa oira jera rusnok onggga Allah ofoka ereij keingg jinaga guru.

⁶Erek giskini bera rusnok risma riteij ah gij mona onggga rua runjuj jeska rerin rusu fob. Tina rusnok bera risma eiteij ah onggga efeinah oisouska Efena Ebsi ojgomu.

⁷Erek Didif dagot gu bua oida bua bucosu rot bisma biteij ah juens deika, beda bineita budou onggga ousaha rot koma guru.

⁸Rusnok rufos eciyi rot mof onggga okurc rua, noba rua rig mof insa koma tein. Tina rua rinejginaga rot mof koma okurc jeska sinefa guru. Noba rua rinejginaga rot mof koma okurc jah gaidu guru, jeska rinek mof koma gu riteij tein guru. Erek koma tein rot rusnok onggga risma eiteij ah onggga efeinah

deika jeska Efena Ebsi. Rua rinek mar koma gu riteij guru. Tina rua rijginaga rot oida rerin eiteij ah onnga efeinah fob."

⁹ Beda Nikodemus ejeka gu Yesus oida, "Koma bera erek teinefa?"

¹⁰ Yesus oroun gu ofa oida, "Bua bera erek rusnok Yahudi efen Guru egens onnga ofoka aksa. Teinefa fogora bua budou enebriyi gij mar insa koma guri.

¹¹ Memef magot rot tenten osok gij mar onnga memef mejginaga rot fob. Noba memef mefesij rot mar onnga memef mek fob, tina iwa yukoja rot mar insa koma ojgomu.

¹² Noba Didif dimfesij gu bua osok gij mar onnga angh gu mebif fob, tina budou onororu mar insa koma guru. Jefeda erek Didif difesij gu bua osok gij mar onnga angh gu mebaga, beda budou onororu mar koma tein jinaga guru.

¹³ Jeska Didif, Rusnok Efesa, bera onnga onjuj jeska mebaga ojgomu. Noba didif bera dumosok jah mebaga sons tein si.

¹⁴ Sis fob nabi Musa agei mar egens onnga ofa ontunggom jeska tembaga erek magosu esij moskur. Beda ofa aha mar koma erek aksa skoita rusnok onnga Israel. Erek koma tein, rusnok rumofra Rusnok Efesa erek aksa tein.

¹⁵ Rua rimeita mar erek koma jeskaseda rusnok nomnaga onnga rururu Ofa rot tenten bera rimesma eiteij ah onnga ah aibin ojgomuja.

¹⁶ Allah odou okora rot rusnok mebif erek eteb doska. Jefeda Ofa obk efen efesa orna onnga egensmes jeskaseda rusnok onnga rururu Ofa rot tenten bera rineseiseifa guru, tina rua rimesma eiteij ah onnga ah aibin si.

¹⁷ Allah onobk efen efesa insa koma jeskaseda oga ojga rot oida rusnok nomnaga rerin mar onnga oska guru. Tina Allah obk efen efesa jeskaseda oskotu rusnok oisouska Ofa esinsa ojgomu.

¹⁸ Allah onocunc rusnok onnga ruroru efen efesa fob erek oska guru. Tina Ofa oncunc rusnok onnga runororu efen efesa insa koma guru erek oska sis fob. Jeska rudou okoja rot Allah efen efesa onnga egensmes insa koma fob.

¹⁹ Allah bera oga ojga rot rusnok rerin rita mar erek kef oida, Ofa efen eisa bera oira gu mebif fob. Tina rusnok insa koma rukoja rot efen eisa. Rua rudou os riker gij motkobah ojgomu, jeska mar onnga rua rutunggom ojgomuja bera erek ofogog.

²⁰ Rusnok onnga rutunggom mar onnga ofogog bera rudou okoja rot eisa koma. Rua runoira gij eisa guru, jeska eisa koma bera onnga orocunc rot tomnomna oida rerin rita mar erek ofogog ojgomu.

²¹ Tina rusnok onnga rudou os ruroru mar onnga oufa bera ruiru gij eisa insa koma fob. Noba eisa insa koma orocunc rot tomnomna oida rerin rita mar onnga oufa bera runtunggom oisouska Allah ojgomu."

²² Nou onnga koma oisa fob, beda Yesus jera efen ruforoker ricira jah monuh Yudea. Beda Ofa eker jah suma jera rusnok onnga ruroru Ofa, fogora eita baptis gu rusnok jah suma.

²³ Gij mona onnga rusnok rinaha Yohanes gij mod oskusk enesi, beda ofa eita baptis gu rusnok gij monuh Aion onnga angh doida Salim. Jeska mei ofoukou enah jah suma, noba rusnok rufoukou rinja skoita ofa jeskaseda ofa eita baptis gu rua.

²⁴ (3:23)

²⁵ Yohanes efen ruforoker rineya onggaga ruga omosokuma jera rusnok Yahudi enjgineg osok gij rerin erebent agama egens. Erebent egens insa koma agot rot teinefa rusnok Yahudi rira mei rurot risinsa rifaga jeni hukum agama ojomu.

²⁶ Jefeda rua rija skoita Yohanes noba ragot gu ofa oida, "Akeina Guru, budou ah keingg rot osnok egens koma onggaga bua bifesij mar rot gu memef gij mona onggaga mimif mingker gu mei Yordan enama sis fob ei? Ebeibeyaif Ofa bera eita baptis gu rusnok tein. Noba rusnok rufoukou rija skoita Ofa ojomu."

²⁷ Beda Yohanes oroun gu rua oida, "Allah ojomu bera onggaga ocunc gu rusnok rot mar onggaga rua rutunggom nou Ofa.

²⁸ Iwa isinsa yagot rot tenten oida iwa ingg didif dagot sis fob oida, didif bera dinerek Kristus onggaga emen guru. Tina Allah ombk didif jeskasada disejah rusnok rudou efesi jeskasada ruroun Ofa.

²⁹ Iwa isujohu rot mar erek kef oida, gij mona onggaga rusnok ruina maat keingg rua onggaga rumoskotuma, beda igers bera onggaga en jeskasada oskotu efen arja ojomu. Tina ofa efen mohuj insa koma bera onggaga ont desi ofa ojomu. Noba mohujir insa koma rig mar onggaga igers enagot gu rua fogora rudou efaga ouka rot ojomu. Erek koma tein, didif dudou efaga ouka rot mar onggaga didif dingg osok gij Yesus koma onggaga eita baptis gu rusnok fob.

³⁰ Ebeibeyaif Ofa bera efen ofoka onggaga eja erek aksa eteb. Noba didif dedin dufoka bera oin degini jeska Ofa ojomu."

³¹ Beda Yohanes agot deika oida, "Ofa onggaga en jeska mebaga fob bera efen ofoka onggaga aksa ekirsa jeska rusnok nomnaga. Rusnok bera ringker gu

mebif, noba rua ragot mar osok gij meidu onggga mebif efen ojomu. Tina Ofa onggga en jeska mebaga bera efen ofoka onggga aksa ekirsa.

³² Jeska Ofa efesij osok gij mar onggga Ofa esinsa engg noba engk fob. Tina rusnok rukoja rot mar insa koma onggga Ofa emfesij rot ojomu.

³³ Noba rusnok onggga ruroun mar onggga Ofa emfesij rot ruocunc rot oida Allah oga bera erek tenten ojomu.

³⁴ Ofa onggga Allah ombk fob bera efesij mar rot Allah oga ojomu. Jeska Allah eita Efena Ebsi gu Ofa rot onggkas fob.

³⁵ Mifmin Mika Allah odou okora eteb rot Ofa onggga erek efen efesa insa koma. Noba Allah eita efen owesa efek eteb gu Ofa onggga erek efen efesa jeskaseda Ofa ofoka ereij keingg mar nomnaga tein.

³⁶ Noba rusnok onggga ruroru Ofa efen oga rot tenten ojomu bera rimesma eiteij ah onggga ah aibin ojomuja. Tina rusnok onggga rukoja Ofa efen oga bera rimesma eiteij ah onggga efeinah jinaga guru. Noba Allah omofra mar okum keingg gu rua rot si."

4¹ Rusnok onggga ebic Farisi ringg rot oida rusnok rufoukou bera rin skoita Yesus fogora Ofa eita baptis gu rua. Jefeda rusnok onggga ruroru Yesus rija erek ekirsa jeska rua onggga ruroru Yohanes.

² Tina Yesus esinsa eneita baptis gu rusnok insa koma guru. Ofa obk efen ruforoker jeskaseda rita baptis insa koma gu rua.

³ Nou onggga Tuhan Yesus ejginaga rot oida rua onggga Farisi ringg mar insa koma osok gij Ofa fob, beda Ofa eja jeska monuh Yudea noba oksons jah monuh Galilea.

⁴Tina moroju onnga Ofa encira gij jah monuh Galilea bera eris monuh Samaria deis tein.

⁵Askesi Ofa encira gij monuh Samaria ros beda Ofa ensaga gu kota egens onnga ofoka Sikhar. Sikhar koma angh doida mekta egens onnga Yakub ongh gu efen efesa Yusuf sis eteb fob.

⁶Noba mei ofok onnga Yakub eji mebi nou sis eteb fob bera enah jah suma tein. Yesus ofonskos jeska Ofa encira yes fob, noba mowa ot deis tein. Jefeda Ofa eker keingg ofons doida mei ofok insa koma.

⁷Nou onnga ojaga egens onnga efen ojga jeska monuh Samaria insa koma en jah mei ofok jeskaseda ageya mei, beda Yesus agot gu ofa oida, "Bita mei egema gu Didif jeskaseda dij."

⁸(Ainsa koma tein Yesus efen ruforoker nomnaga rija jah kota jeskaseda ringk maat jah suma.)

⁹Beda ojaga egens koma agot gu Yesus oida, "Didif dudou oubusaha jeska Bua bijeka didif rot mei erek koma. Jeska Bua bera erek rua onnga Yahudi. Noba didif bera jeska rusnok onnga Samaria." (Ofa agot erek koma jeska erek giskini bera rusnok Yahudi rudou oska skoita rusnok Samaria.)

¹⁰Beda Yesus agot gu ofa oida, "Bua binejginaga rot teinefa Allah eita mar onnga oufamofa eteb gu rusnok rot oubji fob enesi. Noba bua binejginaga rot Didif, onnga dinjeka bua rot mei tein enesi. Jeska erek bua bijginaga rot Didif fob, beda bua bera onnga bimerejgei Didif nou mei ojgomu. Beda Didif dimeita mei onnga eita eiteij ah onnga efeinah gu bua si."

¹¹Tina ojaga egens koma agot oida, "Tuan, erek koma beda Bua bageya mei onnga eiteij ah koma jeska sinefa? Jeska Bua bebin marfeb jera ember

egema guru. Noba mei ofok kef erek eja degini doska.

¹² Erek koma tein, memef mesma mei ofok insa kef jeska mefmen meimowa Yakub. Noba ofa jera efen efeser jera efen sapi ofoukou bera rinj mei jeska mei ofok kef ojgomu. Bua busujohu rot oida bebin bufoka bera erek aksa ekirsa jeska Yakub ei. Mei kef bera eskeira eteb!"

¹³ Beda Yesus oroun gu ofa oida, "Erek rusnok rij mei jeska mei ofok insa kef, beda magon en rua nou mona onnga estir deika ojgomu.

¹⁴ Tina mei onnga Didif dita gu rusnok bera angh gij rua erek mei eiteij onnga eya ojgomuja. Magon enen rua rot mei deika jinaga guru. Jeska mei insa koma bera ereita eiteij ah onnga efeinah onnga ah aibin ojgomuja."

¹⁵ Beda ojaga egens insa koma agot gu Yesus oida, "Tuan, bita mei insa koma egema gu didif tein jeskaseda magon enen didif deika guru. Beda didif dunoksons jah mei ofok insa kef jeskaseda dageya mei deika guru."

¹⁶ Beda Yesus agot gu ofa oida, "Bua bija burohrus bebin obhina jah sif fog."

¹⁷ Tina ojaga egens koma agot oida, "Didif dedin edahina egema guru." Beda Yesus agot gu ofa oida, "Koma erek tenten ojgomu.

¹⁸ Jeska onjoros deisef bera bua bahi igers erek ofosma cinja fob. Noba orna egens onnga bua bingker jera ebeibeyaif bera enerek bebin obhina guru."

¹⁹ Beda ojaga egens koma agot oida, "Tuan, ebeibeyaif didif dijginaga rot oida Bua bera erek nabi egens rot tenten ojgomu.

²⁰ Memef jera mefmen meimower bera rugif gu Allah gu memaga onnga angh jah sif. Tina iwa onnga Yahudi ragot oida rusnok rugif gu Allah gij kota Yerusalem ojgomu, noba gij monuh enjgineg bera guru. Bua busujohu rot mar insa koma erek meidu?"

²¹ Beda Yesus oroun gu ofa oida, "Kef bera tenten oida, gij mona egens onnga emen beda enadaij nou rusnok ruga omosokuma rot monuh kenefo onnga tenten nou rua jeskaseda rugif gu meka Allah gij deika guru.

²² Iwa onnga rusnok Samaria jah sif bera idou enebriyi gij rot teinefa fogora iwa yugif gu Allah guru. Tina memef onnga Yahudi modou ebriyi gij rot teinefa fogora memef mougif gu Ofa. Jeska Ofa onnga omoskotu rusnok nomnaga jeska rerin mar onnga oska bera omorogna jeska rusnok onnga Yahudi.

²³ Gij mona onnga emen, beda rusnok onnga rugif gu Allah rot tenten bera rumougif gu Ofa oisouska Efena Ebsi jera efen oga onnga tenten ojgomu. Noba onnga tenten bera, mona insa koma ensaga fob. Jeska Allah esinsa tein bera ohca rusnok onnga rudou os rugif gu Ofa erek insa koma ojgomu.

²⁴ Allah bera erek Efena ojgomu, noba erek rusnok rudou os rugif gu Ofa, beda rua rugif gu Ofa oisouska Efena Ebsi noba oisouska efen oga onnga tenten tein ojgomu."

²⁵ Beda ojaga egens insa koma agot oida, "Didif dijginaga rot oida Kristus, onnga omosuwa rusnok jeska rerin mar onnga oska, bera emen si. Jefeda gij mona onnga Kristus insa koma en fob, beda Ofa omoftufts mimif osok gij mar insa koma nomnaga."

²⁶ Beda Yesus agot gu ofa oida, "Didif, onnga dinefesij mar jera bua ebeibeyaif, bera Kristus insa koma."

²⁷ Ainsa koma tein Yesus efen ruforoker ruksons en jeska kota fob. Rua rudou oubsaha jeska rua rik Ofa efesij mar jera ojaga egens insa koma. Tina rua rinejeka gu Ofa osok gij mar meidu onnga Ofa enefesij rot jera ojaga egens koma guru. Noba rua tein rinejeka gu Ofa rot mar meidu onnga ojaga egens koma odou os rot tein guru.

²⁸ Jefeda ojaga egens insa koma eja jeska efen debeji nou mei onnga ofa orka jah suma, beda ofa oksons gu efen rusnok gij kota jah suma.

²⁹ Beda ofa agot gu rua oida, "Iwa in ebeirens fog jeskaseda ik osnok osodosa egens onnga anggot mar gu didif rot mar onnga disinsa dutunggom sis fob. Ofa ejginaga rot mar insa koma fob erek teinefa? Ofa bera Kristus egens koma onnga emen ei era gurei?"

³⁰ Jefeda rusnok rufoukou rin skoita Yesus.

³¹ Askesi rusnok insa koma rineja skoita Yesus, beda Ofa efen ruforoker rirejgei Ofa jeskaseda Ofa et maat egema fob.

³² Tina Yesus agot gu rua oida, "Didif dit dedin maat eneya onnga iwa inejginaga rot guru."

³³ Jefeda efen ruforoker rijeka joug moguma oida, "Idu bera onnga eita maat gu Ofa fob?"

³⁴ Beda Yesus agot oida, "Allah ombk Didif jeskaseda dutunggom mar onnga Ofa odou ejginaga rot ojgomu. Koma bera onnga ereita owesa efek gu Didif erek maat onnga eita owesa efek gu mifaga. Noba Didif duh dudou efesi rot onngkas gij mar koma jeskaseda dutunggom mar insa koma onjoros omoisa fog.

³⁵ Gij mesta insa kef erek giskini bera iwa yagot oida, 'Mesta tohkuru deika beda maat onnga angh gij mekeni efen efek fogora mohoturu fog.' Tina iwa ik rot koisoisa ojgomu fog, jeska rusnok rufoukou bera rinsejah jeskaseda ruroru Allah oga. Rua bera erek maat ofoukou onnga angh gij mekeni rot efen efek fogora ihoturu fog.

³⁶ Noba erek rusnok onnga ruhoturu maat efej risma rufons rot, beda erek koma tein rusnok onnga ruroun rusnok enjgineg skoita Allah jeskaseda risma eiteij ah onnga ah aibin bera rimesma rufons onnga ongnoska eteb rot si. Jefeda rua onnga rirefa marsi jera rua onnga ruhoturu maat efej bera rita rudou onnga efaga ouka morototuma rot. Beda erek koma tein, rusnok nomnaga onnga ruroun rusnok enjgineg skoita Allah bera rudou emefaga ouka morototuma rot si.

³⁷ Giskini rusnok ragot oida, 'Rineya rirefa marsi beda rineya tein ruhoturu efen maat efej tein.' Noba mar onnga rua ragot insa koma bera tenten ojgomu.

³⁸ Noba erek rusnok ruhoturu maat onnga rua risinsa rinerefa marsi nou guru, beda erek koma tein Didif dubk iwa jeskaseda iroun rusnok skoita Allah. Rusnok enjgineg rinsejah rua jeskaseda risma Allah oga sis fob. Tina iwa bera onnga imoroun rua skoita Allah si."

³⁹ Nou onnga ojaga egens insa koma emfesij gu efen rusnok Samaria oida Yesus efesij gu ofa rot mar onnga ofa esinsa ontunggom sis fob, beda rusnok rufoukou rudou ororu rot oida Yesus bera Kristus koma onnga emen.

⁴⁰ Jefeda nou onnga rusnok Samaria rin skoita Ofa, beda rua ruis gu Ofa jeskaseda Ofa eker morototuma

jera rua ojgomu. Beda Ofa eker jera rua nou mona egeka deika.

⁴¹ Nou onggga rua ringg mar onggga Ofa omftuftu rot, beda rineya rufoukou tein onggga ruroru Ofa gij mona insa koma.

⁴² Rua insa koma ragot gu ojaga egens koma oida, "Sismeni bera bua bimfesij gu memef rot mar onggga Yesus anggot gu bua, jefeda memef tein mororu Ofa gij mona insa koma. Tina ebeibeyaif memef tein mengg rot mar onggga Ofa emfesij fob. Jefeda memef mejjinaga rot tenten fob oida Ofa bera raja egens koma onggga omoskotu rusnok jeska rerin mar okum."

⁴³ Nou onggga mona egeka insa koma oisa fob, beda Yesus otoiru jah monuh Galilea.

⁴⁴ Sis fob Yesus agot oida, "Rusnok runoroun nabi-nabi onggga rugja jeska risinsa rerin monuh guru."

⁴⁵ Erek koma tina gij mona onggga Ofa ensaga gij monuh Galilea fob, beda rusnok jah suma ruroun Ofa rot rudou onggga eskeiramera. Sis fob rineya jeska monuh insa koma ringk mar onggga Ofa otunggom gij kota Yerusalem nou mona onggga Paskah, jeska rua tein rinja jah Yerusalem nou mona eteb insa koma tein.

⁴⁶ Beda Yesus eja jah kota Kana onggga angh gij monuh Galilea insa koma juens deika. Sis fob Ofa otunggom mei jeskaseda eja erek anggur efei jah suma. Ebirfaga egens onggga ofoka aksa eker gij kota Kapernaum. Noba ebirfaga egens insa koma efen efesa onggga maren eteb.

⁴⁷ Ofa engg rot oida Yesus bera en jeska monuh Yudea, noba Ofa engker gij monuh Galilea insa koma. Jefeda ofa eja ebeirens skoita Yesus noba erejgejei

Ofa jeskaseda en gu kota Kapernaum beda eita eskeira gu efen efesa insa koma. Jeska efen efesa insa koma bera doida nou onnga anggos fob.

⁴⁸ Beda Yesus agot gu ofa jera rusnok enjineg jah suma oida, "Teinefa fogora iwa idou os ik Didif ducunc mar onswos onnga orotunggom rusnok rudou ousaha rot sismeni fog fogora iwa imororu Didif erek komo."

⁴⁹ Tina ebirfaga egens insa koma agot gu Yesus oida, "Tuan, bin ebeirens jeska dedin edesa doida nou onnga anggos."

⁵⁰ Beda Yesus agot gu ofa oida, "Bua bija, jeska bebin ebesa emeita eskeira si. Ofa enagos guru." Ebirfaga egens koma odou ororu mar onnga Yesus anggot insa koma rot tenten fob. Jefeda ofa oksons gu efen mod.

⁵¹ Askesi ofa encira gu moroju ros, beda efen osnok egens onnga omfij ofa en skoita ebirfaga egens koma. Beda ofa agot gu ebirfaga egens koma oida, "Bebin ebesa eskeira sons fob."

⁵² Beda ebirfaga egens koma ejeka gu ofa oida, "Dedin edesa eita eskeira erek aras egaho fob?" Beda osnok egens onnga omfij koma agot gu ofa oida, "Neeka erek aras egens, beda efen ofos ofoufem ojuj fob."

⁵³ Meka egens insa koma ejginaga oida neeka, erek aras egens, bera Yesus agot gu ofa rot oida, "Bebin ebesa emeita eskeira si. Ofa enagos guru." Jefeda ofa jera rusnok nomnaga onnga ringker gij efen mod tein ruroru Yesus gij mona insa koma.

⁵⁴ Mar onswos onnga Yesus oncunc rot insa koma bera erek ofosma jueka onnga Ofa ontunggom gij mona onnga Ofa en jeska Yudea jah Galilea deika.

5¹ Gij mona egema deika beda Yesus eja jah kota Yerusalem jeskasada ororu Yahudi efen mona eteb egens onнга ruina maat eteb keingг gij.

² Mei ofokai egens, onнга rijeka oida Mei Betesda gij Yahudi rerin ruga, bera angh jah suma. Noba modwok cinja angh rejrej mei insa koma tein. Noba mei insa koma angh doida kota koma efen montoj egens onнга rusnok rijeka ofoka oida, Montoj Domba-domba.

³ Rusnok onнга marenir erek riteij ofou jera rua onнга raki emageima bera ringker gij modwok insa koma doida mei.

⁴ (Jeska erek malaikat egens jeska Tuhan en noba ahaisomu gij mei insa koma fogora ecira, beda osnok egens onнга oira gij mei insa koma rot sismeni bera eita eskeira.)

⁵ Erek koma, noba orna egens onнга efen aki emageima gij ari mega ofoj setka orgomu noba cinja orfomu enahca doida mei insa koma fob.

⁶ Nou onнга Yesus ek gu ofa, beda Yesus ejginaga gij odou efesi oida orna egens insa koma bera efen aki emageima gij ari mega ofoj ofoukou fob. Beda Yesus agot gu ofa oida, "Bua budou os bita eskeira tein ei."

⁷ Beda ofa oroun gu Yesus oida, "Tuan, gij mona onнга Malaikat ahaisomu gij mei fogora mei ecira, beda rusnok egema tein runoufij didif jeskasada daira gij mei insa koma guru. Noba askesi didif dija deci deci skoita mei insa koma, beda rusnok enjgineг riker gij mei rot sismeni fog. Jefeda dineita eskeira jeska mei insa koma guri."

⁸ Beda Yesus agot gu ofa oida, "Bua but ojgomu. Noba bita bebin meidibi beda bija."

⁹ Ainsa koma tein osnok egens insa koma eita eskeira fob. Jefeda ofa eita efen meidibi beda ecira erek giskini. Mona onggga Yesus eita eskeira gu osnok egens insa koma bera gij mona onggga Sabat.

¹⁰ Nou onggga rusnok Yahudi rik osnok egens insa koma onggga eita eskeira fob noba orka efen meidibi, beda rua ruga etaha joug ofa oida, "Deisef bera mona onggga Sabat. Noba mifmin agama erebent agot oida rusnok runorka mar gij mona onggga Sabat insa kef guru!"

¹¹ Tina ofa agot gu rua oida, "Osnok egens onggga eita eskeira gu didif bera anggot gu didif oida, 'Bua bita meidibi beda bija.' "

¹² Beda rua rijeka gu ofa oida, "Idu bera anggot gu bua oida bita bebin meidibi beda bija erek koma?"

¹³ Tina osnok egens koma enejginaga rot oida idu onggga anggot mar erek insa koma gu ofa guru. Jeska rusnok rufoukou jah suma noba Yesus enja jeska fob.

¹⁴ Erek dansusk beda Yesus ek osnok egens insa koma gij Mod Allah ejmeg. Beda Ofa agot gu osnok egens insa koma oida, "Bua bita eskeira fob. Jefeda bunororu mar onggga oska deika guru jeskasada mar onggga okum ekirsa enesiri keingg bua rot deika guru."

¹⁵ Erek koma beda osnok egens koma eja skoita ebirfager Yahudi insa koma noba agot gu rua oida, "Yesus bera onggga eita eskeira gu didif."

¹⁶ Beda rusnok onggga Yahudi insa koma rudou ofogog skoita Yesus, jeska Ofa eita eskeira gu osnok egens insa koma gu mona onggga Sabat.

¹⁷ Tina Yesus agot gu rua oida, "Dedin Akeina bera ofij rusnok ojgomuja. Jefeda Didif tein dumofij rusnok ojgomuja tein."

¹⁸ Mar onnga Yesus anggot insa koma bera orotunggom rudou efesi erek ofogog ekirsa deika skoita Ofa, noba rudou os ragob Ofa ojgomu. Jefeda rua ragot oida, "Sismeni bera Yesus otunggom mar insa koma onnga mifmin agama erebent agot oida mineita gij mona onnga Sabat jinaga guru. Noba ebeibeyaif Ofa agot oida Allah bera erek efen meka! Jefeda Ofa osujohu rot oida Ofa bera morototuma erek Allah teino!"

¹⁹ Rua insa koma rudou ofogog skoita Yesus, tina Ofa agot gu rua oida, "Enadaij nou Didif, Rusnok efesa, dita mar rot disinsa ojgomu guru. Jeska Didif, onnga Ofa efen efesa, dudou os dita mar onnga Didif dik Akeina ontunggom fob ojgomu.

²⁰ Akeina odou okora rot Didif onnga efen efesa. Noba Ofa oncunc gu Didif rot mar nomnaga onnga Ofa esinsa odou os fob. Tina Akeina omocunc mar oisouska Didif onnga erek ekirsa jeska mar onnga dutunggom insa koma fogora idou omoubsaha eteb ekirsa rot si.

²¹ Akeina bera efen owesa efek jeskasada ofra rusnok jeska ranggos fogora eita eiteij ah onnga efeinah gu rua. Erek koma tein Didif, onnga Allah efen efesa, bera efen owesa efek jeskasada eita eiteij ah onnga efeinah gu rusnok onnga dudou os rot ojgomu.

²² Onnga tenten bera, Akeina enagot rot rusnok rerin rita mar onnga erek oufa era erek oska guru. Tina Ofa eita owesa efek gu Didif, onnga Ofa efen efesa, jeskasada duga ojga rot mar insa koma ojgomu.

²³ Ofa eita mar insa koma gu Didif jeskasada rusnok nomnaga rumofra dedin dufoka erek aksa eteb

morototuma erek rua rufra Allah efen ofoka erek aksa eteb tein. Noba osnok egens onnga onofra dedin dufoka erek aksa eteb guru, beda koma erek ofa onofra Allah efen ofoka erek aksa eteb tein guru. Jeska Allah bera onnga ombk Didif skoita rusnok fob.

²⁴ Kef bera onnga tenten oida, osnok egens onnga eg mar onnga Didif duftuftu rot, noba ofa ororu Allah onnga ombk Didif fob, beda ofa emesma eiteij ah onnga ah aibin si. Didif dunocunc ofa erek oska guru. Noba ofa eneja eseseifa rot efen mar onnga oska guru, tina ofa emesma eiteij ah onnga efeinah si.

²⁵ Kef bera erek tenten oida, Mona eimofoj egens onnga emen bera ensaga fob. Noba gij mona insa kef rusnok onnga rinseiseifa bera rimeg Didif, onnga Allah efen efesa, dedin duga. Noba rua onnga ringg rot duga insa koma bera rineseiseifa deika guru, tina rua rimesma eiteij ah onnga ah aibin si.

²⁶ Allah bera efen owesa efek jeskaseda eita eiteij ah onnga efeinah gu rusnok. Noba erek koma tein Ofa eita owesa efek gu Didif, onnga efen efesa, jeskaseda dita eiteij ah onnga efeinah gu rusnok.

²⁷ Noba Ofa tein bera eita owesa efek gu Didif, onnga efen efesa, jeskaseda duga ojga rot rusnok nomnaga rerin rita mar. Jeska Didif bera erek Rusnok Efesa tein.

²⁸ Iwa idou onoubsaha rot mar onnga ai juens dimagot erek kef guru oida, gij mona egens onnga emen beda rusnok onnga ranggos fob bera rimeg rot dedin duga si.

²⁹ Beda rua nomnaga rimedebecki jeska ranggos si. Noba rua onnga rita mar onnga oufamofa sis fob bera rimesma eiteij ah onnga ah aibin. Noba rua onnga

rita mar onnga oska sis fob bera rimesma okum eteb jeska Allah ojgomu."

³⁰ Beda Yesus agot deika oida, "Didif dineita mar oisouska disinsa dudou ejginaga rot guru. Tina Didif duga ojga rot rusnok rerin rita mar oisouska meidu onnga Allah oncunc gu Didif fob. Jefeda mar onnga Didif danggot rot insa koma bera erek tenten ojgomu. Jeska Didif dineita mar jeskaseda disinsa dudou eskeira rot guru. Tina Didif dita mar jeskaseda direita Allah odou eskeira rot. Jeska Ofa bera onnga ombk Didif.

³¹ Erek Didif dagot mar rot disinsa, beda iwa inejginaga rot oida mar onnga danggot bera erek tenten ei era gurei.

³² Tina osnok egens onnga enjgineg bera emfesij mar rot Didif fob. Noba Didif dijginaga rot oida mar onnga ofa emfesij osok gij Didif bera erek tenten ojgomu.

³³ Iwa bera yumbk yeyin rusnok skoita Yohanes onnga eita baptis gu rusnok jeskaseda ijeka ofa rot mar onnga ofa onotunggom. Noba ofa oroun mar onnga tenten gu iwa fob.

³⁴ Onnga tenten bera Didif dunocosu rot rusnok enjgineg ragot mar osok gij Didif guru. Tina Didif dagot mar erek insa koma jeskaseda iwa imesma eiteij ah onnga efeinah ojgomu.

³⁵ Yohanes oga insa koma bera erek lampu onnga eisa rot eteb nou rusnok. Noba gij mona onnga estir bera iwa idou eskeira rot mar onnga ofa omftuftu rot gu iwa.

³⁶ Tina mar enjgineg onnga agot mar osok gij Didif bera enahuma ros. Noba mar koma bera agot mar osok gij Didif erek ekirsa jeska mar onnga Yohanes

anggot osok gij Didif fob. Didif dutunggom mar onnga Akeina obk Didif rot ojgomuja onjoros omoisa fob. Noba mar insa koma bera onnga orocunc rot tenten oida Akeina bera ombk Didif skoita rusnok fob. Mar insa koma bera erek mar onnga anggot rot Didif jah rusnok rudou ojgomu.

³⁷ Noba Akeina onnga ombk Didif, Ofa tein bera agot rot mar onnga Didif dutunggom. Iwa ineg Ofa efen oga noba inek Ofa tein guru.

³⁸ Noba iwa inesah efen oga gij idou efesi tein guru. Jeska iwa idou onororu Didif onnga Ofa ombk skoita iwa fob guru.

³⁹ Iwa ifokor rot iskusk gij Mar Efeyi Ebsi jeska iwa isujohu rot oida oga insa koma bera emereita eiteij ah onnga ah aibin gu iwa. Noba Mar Efeyi Ebsi insa koma bera onnga agot mar onnga tenten osok gij Didif.

⁴⁰ Tina iwa idoubu joug in skoita Didif jeskaseda isma eiteij ah insa komo.

⁴¹ Didif dunohca rusnok jeskaseda rua risitit mar rot Didif guru.

⁴² Tina Didif dijginaga rot mar onnga angh gij idou efesi fob. Noba Didif dijginaga rot oida idou onokora rot Allah erek tenten guru.

⁴³ Didif din jeska dedin Akeina, noba Didif difesij mar oisouska Ofa efen ofoka ojgomu. Erek koma tina iwa idou os yukoja Didif. Tina gij mona onnga osnok egens enjgineg en skoita iwa, noba ofa efesij mar rot esinsa ojgomu, beda iwa iroun ofa rot idou onnga eskeira ojgomu.

⁴⁴ Iwa idou os isitit isinsa ifoka moguma, tina iwa inereni jeskaseda ita mar onnga Allah emesitit yeyin ifoka rot guri. Ofa bera Allah onnga egensmes

ojgomu. Noba mar insa koma bera eragou joug iwa rot fogora idou onororu Didif guru.

⁴⁵ Tina enadaij nou iwa isujohu rot oida Didif dumot jah Allah odou noba ducunc iwa erek oska guru. Jeska nabi Musa esinsa bera omocunc iwa erek oska jah Allah odou si. Noba ofa bera onggga iwa yuisum gij rot oida omoskotu iwa jeska yeyin mar onggga oska si, tina guri.

⁴⁶ Erek iwa iroru mar onggga Musa omftuftu rot sis fob, beda iwa imororu Didif tein. Jeska sis eteb fob bera Musa ongggu mar osok gij Didif.

⁴⁷ Tina erek iwa inororu mar onggga Musa ongggu rot sis fob guri, beda erek koma tein iwa inororu mar onggga Didif duftuftu rot gij mona deisef tein guru."

6¹ Nou onggga mar insa koma oisa fob, beda Yesus eja jah meren Galilea enama. (Meren koma efen ofoka Tiberias tein.)

² Noba rusnok rufoukou ruroru Ofa jah suma, jeska rua ringk rot mar onswos ofoukou onggga Ofa orocunc rot gij mona onggga Ofa eita eskeira gu rerin rusnok onggga marenir fob.

³ Nou onggga Ofa ensaga jah gu meren insa koma fob, beda Ofa osok memaga ofog oduma noba eker jah suma jera efen ruforoker.

⁴ Mona insa koma bera erek doida mona eteb egens onggga Yahudi ruina maat keingg jeni rerin erebent agama.

⁵ Nou onggga Yesus ek rusnok rufoukou rinen skoita Ofa, beda Ofa agot gu Filipus oida, "Mimif mingk roti nou rusnok kef nomnaga erek sinefo?"

⁶ (Yesus ejginaga rot mar onggga ai juens Ofa omotunggom, tina Ofa ereni Filipus erek koma

jeskaseda ek rot oida Filipus odou ororu Ofa rot tenten fob ei era gurei.)

⁷ Beda Filipus oroun gu Yesus oida, "Akeina, koma erek roti ofoukou doska. Erek mimif mifarur gij mesta cinja orfomu nou fifi, beda koma adaij nou mingk roti oskiyai tein nou rua orofosut egens egens insa kef ojgomu, tina guru."

⁸ Beda Yesus efen oforoka eneya onnga ofoka Andreas, onnga Petrus efen mokora, agot oida,

⁹ "Akeina, oforoka orna egens enofogif. Noba ofa efen roti ofog cinja jera mos ofokai orijka. Tina koma enadaij nou rusnok rufoukou doska jah sif."

¹⁰ Beda Yesus agot oida, "Iwa yubk rusnok nomnaga jeskaseda riker fog." Monuh insa koma bera meskeingg efen ofoukou. Noba runer onnga ringker jah suma erek rufok ribu cinja.

¹¹ Beda Yesus eita roti ofog cinja insa koma. Beda Ofa ois oufamofa eteb skoita Allah rot roti insa koma. Beda Ofa ekeba roti insa koma gu rusnok rufoukou onnga ringker gu meskeingg efen jah suma. Ofa otunggom mar erek koma tein rot mos orijka insa koma. Ofa ekeba maat insa koma gu rua nomnaga onjoros ereya rua nomnaga fob.

¹² Nou onnga rusnok insa koma rit maat oisa fob, beda Yesus agot gu efen ruforoker oida, "Iwa ihoturu roti jera mos ofod jeskaseda maat insa koma enseiseifa guru.

¹³ Jefeda rua ruhoturu maat ofod jah suma. Noba oisouska roti ofog cinja onnga Yesus ekeba rot sismeni bera rua ruhoturu maat ofod onnga ok morungga eteb setka kungkob erfeka."

¹⁴ Nou onnga rusnok jah suma rik mar onswos insa koma onnga Yesus oncunc fob, beda rua ragot

moguma oida, "Ofa bera nabi egens onggga ranggot gij Mar Efeyi Ebsi oida emen gij mona kahma si."

¹⁵ Yesus ejginaga gij odou efesi fob oida rua rudou os rucunc Ofa erek rerin raja egens. Jefeda Ofa eja jeska monuh insa koma noba eja jah memaga ofog oduma jeskasada eker gu esinsa.

¹⁶ Nou motu insa koma beda memef onggga Yesus efen ruforoker mecira jah meren Galilea efembra.

¹⁷ Erek motu fob noba Yesus onoksons skoita memef enesi. Jefeda memef meifef meg egens noba meja jah kota Kapernaum onggga angh gu meren enama.

¹⁸ Tina ebeibeyaif mof eteb edi memef doska, noba meren ofog omotoijma erek aksa tein.

¹⁹ Nou onggga memef mongku meg insa koma erek kilometer cinja erfens jeska meren efembra fob beda memef mek Yesus ecira esij mei odog skoita memef, jefeda memef memeesa eteb rot.

²⁰ Tina Yesus agot gu memef oida, "Iwa inemeesa guru, jeska Didif bera Yesus."

²¹ Beda modou eskeira sons noba memef moroun Ofa gij meg. Noba ainsa koma tein meg onggga memef mengker gij ensaga gu kota Kapernaum fob.

²² Gij mona egema deika beda rusnok onggga ringker gij monuh onggga angh gu meren enama ruhca Yesus. Rua rijginaga rot oida memef onggga efen ruforoker bera menja fob, noba Ofa onororu memef guru. Noba rua tein rijginaga rot oida neeka fob bera meg egens onggga eja jeska rerin monuh insa koma ojomu. Tina rua rinek Yesus guru.

²³ Beda meg egema onggga en jeska kota Tiberias ensaga gu monuh insa koma onggga rusnok rit roti onggga Yesus ois oufamofa gu Allah rot neeka fob.

²⁴ Nou onnga rua rig rot oida Yesus jera efen ruforoker rineker jah suma deika guru, beda rua rifef meg jeskaseda rija jah kota Kapernaum noba ruhca Yesus jah suma ojgomu.

²⁵ Nou onnga rusnok insa koma rik Yesus gij kota Kapernaum onnga angh jah meren enama, beda rua ragot gu Ofa oida, "Akeina Guru, Bua bin jah sif gij mona juaho?"

²⁶ Beda Yesus agot gu rua oida, "Kef bera tenten oida, iwa inohca Didif jeska iwa ik Didif duncunc mar onnga onswos fob guru. Iwa yuhca Didif jeska iwa int maat noba ereya iwa fob.

²⁷ Iwa inereni jeskaseda ita maat onnga dansusk eja erek esemba ojgomu guru. Tina ireni rot ahais jeskaseda iroru dedin duga ojgomu. Jeska koma bera erek maat onnga angh rot ongkoska ojgomuja, noba onnga eita eiteij ah rot ah aibin ojgomu tein. Didif, Rusnok Efesa, bera dimeita maat erek insa koma gu iwa, jeska Akeina Allah bera oncunc rot oida Ofa odou eskeiramera eteb rot Didif fob."

²⁸ Beda rusnok insa koma rijeka gu Yesus oida, "Memef meita mar erek meidu jeskaseda Allah odou eskeira rot memef tein?"

²⁹ Beda Yesus oroun oida, "Allah odou os rot oida iwa ita mar erek kef: Iwa idou ororu efen efesa onnga Ofa ombk skoita iwa fob rot tenten ojgomu."

³⁰ Jefeda rua ragot oida, "Bua butunggom mar onswos egema onnga orocunc nou memef fog, beda memef mudou omororu Bua si. Jefeda Bua bumocunc mar onswos erek meidu?"

³¹ Musa tein orocunc rot mar onswos gij mona onnga ofa eita maat onnga ojuj jeska mebaga gu mefmen meimowa gij mona onnga rua rincira gu

monuh ongga mebsta tuturu. Jeska runggu gij Mar Efeyi Ebsi oida, 'Musa eita maat gu rua jeska mebaga.' Jefeda Bua tein bucunc rot mar onswos erek meidu skoita memefo."

³² Beda Yesus agot gu rua oida, "Ongga tenten bera, Musa eneita maat jeska mebaga ongga erek tenten guru. Tina ebeibeyaif dedin Akeina bera ongga eita maat ongga tenten gu iwa jeska mebaga.

³³ Jeska Allah efen maat insa koma bera erek Ofa ongga onjuj jeska mebaga noba ongga eita eiteij ah ongga efeinah gu rusnok."

³⁴ Beda rusnok insa koma ragot oida, "Tuan, bita maat insa koma egema gu memef tein ojgomuja."

³⁵ Beda Yesus agot oida, "Didif bera erek maat ongga eita eiteij ah ongga efeinah gu rusnok. Noba osnok egens ongga en skoita Didif bera mosona enen ofa deika guru. Noba osnok egens ongga odou ororu Didif rot tenten bera magon enen ofa tein deika guru.

³⁶ Koma erek mar ongga Didif danggot gu iwa fob. Iwa ik Didif fob, tina idou onororu Didif rot tenten enesi. Koma erek Didif danggot ainsa koma gu iwa sis fob.

³⁷ Rusnok nomnaga ongga Allah eita gu Didif fob bera rimen skoita Didif si. Didif dumoroun rua erek dedin rusnok si. Noba Didif dunokoja rua jinaga guru.

³⁸ Didif dunojuj jeska mebaga jeskaseda dutunggom mar ongga disinsa dudou os rot guru. Tina Didif dunjuj jeska mebaga jeskaseda dutunggom mar ongga Allah odou os rot ojgomu.

³⁹ Noba mar ongga Ofa odou os rot bera erek kef oida, osnok egens tein jeska rusnok nomnaga ongga Allah eita gu Didif bera eneseiseifa guru. Didif

dumofra rua nomnaga jeska ranggos gij mona onnga enja ejgwaga ensaga fob si.

⁴⁰ Noba kef tein bera onnga Akeina Allah odou os rot. Ofa odou os rot oida rusnok rudou ebriyi gij rot oida Didif bera erek Ofa efen efesa, noba ruroru Didif rot tenten ojgomu. Beda rua rimesma eiteij ah onnga ah aibin si. Noba gij mona onnga enja ejgwaga esaga fob, beda Didif dumofra rua jeska ranggos si."

⁴¹ Erek koma beda rusnok Yahudi ruga erahah osok gij Yesus, jeska Ofa agot oida, "Didif bera erek maat onnga onjuj jeska mebaga."

⁴² Rineya ragot oida, "Yesus kef bera Yusuf efen efesa. Memef mejginaga rot Ofa efen meka insa koma jera mosu tein. Teinefa fogora Ofa agot oida Ofa onjuj jeska mebaga fob erek komo!"

⁴³ Tina Yesus agot gu rua oida, "Yuga enerahah rot mar erek koma guru.

⁴⁴ Akeina bera onnga obk Didif fob. Noba Akeina bera onnga oroun rusnok skoita Didif ojgomu. Erek Allah onoroun rua guru, beda enadaij nou rua rin skoita Didif guru. Beda Didif dumofra rusnok onnga Allah oroun skoita Didif jeska ranggos gij mona onnga enja ejgwaga fob.

⁴⁵ Sis fob rua onnga nabi-nabi runggu gij Mar Efeyi Ebsi oida, 'Allah omoftu efen rusnok.' Noba rusnok nomnaga onnga ringg rot mar onnga Akeina omftu gu rua fob, fogora ruroru mar insa koma tein, rua bera onnga rimen skoita Didif.

⁴⁶ Rusnok egema tein rinek Allah guru. Tina Didif, onnga din jeska Allah, bera dik Ofa fob.

⁴⁷ Kef bera erek tenten oida, osnok egens onnga ororu dedin duga bera emeita eiteij ah onnga ah aibin si.

⁴⁸ Didif bera erek maat onnga eita eiteij ah onnga efeinah gu rusnok.

⁴⁹ Sis fob, gij mona onnga yeyin imower rincira gij monuh onnga mebsta tuturu, beda rua rit maat onnga onjuj jeska mebaga onnga rijeka ofoka Manna. Erek koma tina gij mona kahma deika beda rua tein ranggos erek giskini ojgomu.

⁵⁰ Tina maat onnga en jeska mebaga ebeibeyaif bera enahuma. Noba osnok egens onnga et maat insa koma bera enagos jinaga guru.

⁵¹ Didif bera erek maat onnga onjuj jeska mebaga. Noba maat insa koma bera efena ebah. Osnok egens onnga et maat insa koma bera emeita eiteij ah onnga ah aibin ojgomuja. Noba maat insa koma bera erek difaga onnga dimaha jah jeskaseda rusnok rimesma eiteij ah onnga efeinah."

⁵² Erek koma beda rusnok Yahudi insa koma ruga omosokuma rot oida, "Teinefa fogora osnok egens kef eita esinsa efen efaga jeskaseda memef met erek maat erek komo!"

⁵³ Beda Yesus agot oida, "Kef bera onnga tenten oida, erek iwa inet Didif, Rusnok Efesa, dedin difaga guru, noba iwa inej dedin dugufu tein guru, beda enadaij nou iwa isma eiteij ah onnga efeinah tein jinaga guru.

⁵⁴ Jeska rua onnga rit dedin difaga noba rij dedin dugufu bera rimeita eiteij ah onnga ah aibin si. Noba Didif dumofra rua jeska ranggos gij mona onnga enja ejgwaga fob.

⁵⁵ Jeska dedin difaga bera erek maat onnga tenten. Noba dedin dugufu bera erek mar onnga tenten nou rusnok jeskaseda rij ojgomu.

⁵⁶ Rua onnga rit dedin difaga noba rij dedin dugufu bera rimeita rudou onnga egens jera Didif fob. Noba Didif dudou erek egens jera rua tein.

⁵⁷ Allah, onnga eita eiteij ah onnga efeinah gu rusnok, bera onnga ombk Didif fob. Noba Didif bera dinsma diteij ah jeska Ofa tein. Jefeda osnok egens onnga et dedin difaga bera emesma eiteij ah onnga efeinah jeska Didif tein si.

⁵⁸ Didif dinerek maat insa koma onnga yeyin imower rint sis fob guru. Rua rit maat insa koma, tina gij mona kahma deika beda rua ranggos erek giskini ojgomu. Didif bera erek maat onnga onjuj jeska mebaga gij mona ebeibeyaif. Noba osnok egens onnga ent maat insa kef bera emesma eiteij ah onnga ah aibin ojgomuja si."

⁵⁹ Yesus agot mar insa koma nomnaga gij mona onnga Ofa oftufu rusnok Yahudi gij rerin mod onnga rua rum riteij gu Allah gij. Mod koma angh gij kota Kapernaum.

⁶⁰ Nou onnga Yesus efen ruforoker rig rot mar insa koma nomnaga onnga Ofa omftufu gu rusnok Yahudi fob, beda rua ragot moguma oida, "Mar onnga Ofa oftufu insa koma bera okum eteb. Enadajj nou rusnok rudou ebriyi gij rot koisoisa jinaga guru!"

⁶¹ Yesus ejginaga gij odou efesi rot mar onnga ruga erahah rot erek insa koma, jefeda Ofa agot gu rua oida, "Erek mar onnga Didif dumftufu insa koma orotunggom idou efesi erek oska rot, beda idou omokum gij mona onnga iwa ik Didif, Rusnok Efesa, duksons jah monuh mebaga tein.

⁶² (6:61)

⁶³ Rusnok rerin owesa efek jeskaseda rita eiteij ah onnga efeinah gu rusnok enjgineg jinaga guru. Efena

Ebsi Allah bera onnga eita eiteij ah onnga efeinah gu rusnok ojgomu. Mar onnga Didif dimfesij rot insa koma bera en oisouska Efena Ebsi Allah. Noba koma bera onnga eita eiteij ah onnga efeinah gu rusnok.

⁶⁴Tina rineya jeska iwa inororu dedin duga rot tenten enesi." (Gij mona onnga sismeni bera Yesus ejginaga gij odou efesi rot rusnok idu onnga runororu Ofa rot tenten guru, jera idu onnga emeja jeska Ofa tein.)

⁶⁵Ofa agot oida, "Didif dagot mar erek insa kef, jeska sis fob Didif danggot gu iwa rot oida, erek Allah onoroun rusnok skoita Didif guru, beda enadaj nou rua risinsa rin skoita Didif tein guru."

⁶⁶Nou onnga Yesus anggot mar insa koma oisa fob, beda Ofa efen ruforoker rineya onnga rufoukou rija jeska Ofa noba runororu Ofa deika guru.

⁶⁷Beda Yesus ejeka gu efen ruforoker rufok setka kungkob erfeka oida, "Iwa idou os ija jeska Didif tein ei?"

⁶⁸Beda Simon Petrus oroun gu Ofa oida, "Tuhan, erek memef meja jeska Bua, beda memef meja skoita idu deiko. Jeska mar onnga Bua buftuftu rot bera onnga ereita eiteij onnga ah aibin gu rusnok.

⁶⁹Noba ebeibeyaif memef mudou ejginaga rot oida Bua bera osnok egens onnga ebsi komowa onnga Allah omobk. Noba memef mudou ororu Bua fob."

⁷⁰Beda Yesus agot oida, "Tenten, Didif duncunc iwa onnga ifok setka kungkob erfeka jeskaseda iroru Didif. Tina Didif dijginaga rot fob oida osnok egens jeska iwa bera erek Bilis."

⁷¹Yesus emfesij mar insa koma osok gij Yudas, onnga Simon Iskariot efen efesa. Yudas bera egens jeska Yesus efen ruforoker rufok setka kungkob

erfeka, tina gij mona kahma deika bera ofa emekikif jeska Yesus.

7¹ Nou onggga mar insa koma oisa fob, beda Yesus ecira rejrej monuh Galilea. Ofa odobu joug ecira gu monuh Yudea, jeska rusnok Yahudi rerin ebirfager rineya jah suma onggga rudou os ragob Ofa.

²Gij mona insa koma bera rusnok Yahudi rerin mona eteb egens onggga rijeka ofoka oida, "Mona onggga rusnok rii modwok fogora ruina maat keingg," bera ensaga fob.

³Jefeda Yesus efen mokosa agot gu Ofa oida, "Ongga oufa bera Bua bija jeska monuhif noba bija jah kota Yerusalem nou mona eteb jeskaseda rusnok onggga ruroru Bua bimek Bua butunggom mar onswos deika.

⁴Jeska osnok egens onggga odou os oida efen ofoka eiskiskma bera enedemdemi mar onswos onggga ofa ontunggom guru. Erek Bua buntunggom mar onswos rot tenten fob, beda bucunc bisinsa rot bebin owesa efek skoita rusnok rufoukou deika ojgomu."

⁵(Yesus efen mokoser insa koma oh mojen gu Ofa erek koma jeska rua rudou onororu rot oida Ofa bera Kristus onggga emen enesi.)

⁶Tina Yesus agot gu efen mokoser insa koma oida, "Mona eimofoj onggga adaij nou Didif jeskaseda dija jah Yerusalem bera enesaga enesi. Tina iwa ija jah suma gij mona onggga idou os rot ojgomu.

⁷Rusnok mebif rudou onofogog rot iwa guru. Tina rusnok mebif rudou ofogog rot Didif, jeska Didif dagot mar rot tenten osok gij rerin mar onggga oska.

⁸Jefeda iwa ija jah suma nou mona eteb insa koma. Didif dineja jah suma enesi. Jeska mona eimofoj

ongga adaij nou Didif jeskaseda dija jah suma bera enesaga enesi."

⁹ Yesus agot mar insa koma gu efen mokoser, beda Ofa eker gij monuh Galilea ojomu.

¹⁰ Nou onggga Yesus efen mokoser rija jah Yerusalem nou mona eteb egens insa koma fob, beda Yesus tein eja jah suma. Tina Ofa onocunc rot esinsa gu rusnok rufoukou jah suma guru.

¹¹ Noba gij mona onggga ruina maat keingg insa koma, beda ebirfager Yahudi rineya jah suma ruhca Yesus. Rua rijeka joug rusnok oida, "Iwa bera ik Yesus fob ei?"

¹² Rusnok rufoukou onggga rin nou mona eteb insa koma bera riflesij mar moguma osok gij Yesus. Rineya ragot oida, "Ofa bera erek osnok egens onggga oufamofa eteb ojomu." Noba rineya ragot oida, "Guru, Ofa orokrusa rusnok ojomu."

¹³ Tina rua rinefesij mar insa koma rot tomnomna guru, jeska rua rimeesa rot oida ebirfager Yahudi rumotkonu oska skoita rua rot.

¹⁴ Askesi mona onggga eteb insa koma enecira ros, beda Yesus oira gij momas onggga angh rejrej Mod Allah, noba Ofa oftufu mar gu rusnok jah suma.

¹⁵ Nou onggga rusnok insa koma ringg mar onggga Ofa oftufu rot beda rua rudou ousaha eteb. Rua ragot moguma oida, "Ofa onofokor aksa guru, jefeda teinefa fogora Ofa odou ebriyi eteb gij Mar Efeyi Ebsi erek komo."

¹⁶ Beda Yesus agot gu rua oida, "Mar onggga Didif duftufu gu rusnok bera enen jeska Didif guru. Tina mar insa koma bera en jeska Ofa onggga ombk Didif ojomu fob.

¹⁷ Noba rusnok onnga rudou os rot mar onnga Allah odou ejginaga rot bera rijginaga oida mar onnga Didif duftuftu bera en jeska Allah ojgomu, noba enen jeska Didif guru.

¹⁸ Jeska rusnok onnga ruftuftu rot mar onnga en jeska risinsa rudou efesi bera ruhca rufoka onnga eiskiskma ojgomu. Tina rusnok onnga rudou os rufra rerin ebirfaga onnga obk rua efen ofoka erek aksa, rua koma bera onnga ruftuftu mar onnga tenten ojgomu. Rua rerin rudou efesi onnga erek aharukamoka ojgomu.

¹⁹ Musa eita Tuhan efen hukum gu iwa sis fob. Tina iwa inororu hukum insa koma rot tenten guru. Jefeda iwa idou os yagob Didif rot meidu?"

²⁰ Tina rusnok jah suma ragot gu Ofa oida, "Ah, merei ok Bua fob. Idu bera odou os agob Bua?"

²¹ Beda Yesus agot gu rua oida, "Didif dita eskeira gu osnok egens fob noba iwa idou ousaha eteb jeska Didif duntunggom mar koma gij mona onnga Sabat.

²² Tina iwa tein itunggom mar gij mona onnga Sabat ojgomu. Jeska Musa obk rusnok Yahudi jeskaseda riris rufom mareij ofos jeska rerin riser orna. (Tina Yahudi rerin rimower onnga rutunggom mar koma gij mona onnga Musa enagot rot enesi.) Noba iwa bera iris ifom mareij ofos jeska yeyin iser insa koma gij mona onnga Sabat tein.

²³ Hukum egens jeska Musa agot rot oida rusnok rineita mar gij mona onnga Sabat guru. Tina iwa iris ruforoker rufom mareij ofos jeska gij mona onnga Sabat tein, jeska iwa isujohu rot oida mar onnga iwa intunggom insa koma bera erek ofoufem tein. Jefeda teinefa fogora iwa yutkonu oska jeska Didif dita

eskeira gu osnok egens rot ongkas gij mona onnga Sabat tein erek komo.

²⁴Iwa inoga ojga rot rusnok oisouska mar onnga iwa isujohu rot rua guru. Tina yuga ojga rot rua oisouska mar onnga erek tenten rot rua ojgomu."

²⁵Nou onnga rusnok enjgineg ringg rot mar insa koma nomnaga, beda rudou eineina gij rot. Ruaragot oida, "Ofa koma bera onnga mifmin ebirfager rineya rudou os ragob ojgomu.

²⁶Tina Ofa oftufu mar gu rusnok rot tomnomna ojgomu, noba rusnok enjgineg rineyahehir joug Ofa rot guru. Erek ebeibeyaif mifmin ebirfager rusujohu rot oida Ofa bera Kristus egens koma onnga emen ei?

²⁷Tina mimif mijginaga rot oida Ofa koma bera ojga jeska Nazaret. Noba Kristus egens onnga emen bera minejginaga rot efen ojga guru."

²⁸Ainsa koma tein Yesus oftufu mar gij momas onnga angh rejrej Mod Allah ros. Ofa ois gu rusnok onnga ranggot mar insa koma oida, "Iwa isujohu rot oida iwa ijginaga rot Didif fob. Noba iwa isujohu rot oida iwa ijginaga rot dedin monuh onnga dujga jeska tein fob. Tina Didif dinen oisouska disinsa dedin owesa efek guru. Noba Ofa onnga ombk Didif fob bera eita mar onnga erek tenten ojgomu. Noba iwa inejginaga Ofa rot tenten guru.

²⁹Tina Didif dijinaga Ofa rot tenten fob. Jeska Didif din jeska Ofa. Noba Ofa bera onnga ombk Didif jah sif fob."

³⁰Nou onnga Yesus anggot mar insa koma oisa fob, beda rusnok jah suma rudou os ragei Ofa jeskaseda ragob Ofa. Tina rusnok egema tein rinagei Ofa guru, jeska efen mona onnga eimofoj bera enesaga enesi.

³¹ Tina rusnok rufoukou jah suma rudou ororu Ofa ojgomu. Rua ragot oida, "Ofa bera Kristus egens koma onggga emen. Jeska Ofa ontunggom mar onswos ofoukou fob."

³² Ebirfager Yahudi jeska ebic Farisi rig rot mar onggga rusnok insa koma rimfesij rot osok gij Yesus fob. Jefeda rua jera rineya onggga ebirfager imam-imam rubk rerin tentarer jeskaseda ragei Yesus.

³³ Ainsa koma tein Yesus enefesij mar gu rusnok ros. Ofa agot oida, "Didif dineker jera iwa erek mona estir deika ojgomu, beda Didif dumoksons skoita Ofa onggga ombk Didif jah sif.

³⁴ Gij mona insa koma bera iwa imohca Didif, tina inek Didif guru. Noba iwa ineja jah monuh onggga Didif dingker gij tein guru."

³⁵ Beda rusnok Yahudi jah suma ragot moguma oida, "Ofa eja jah monuh sinefo fogora munohca Ofa erek koma guru? Erek Ofa emeja eker jera mifmin rusnok Yahudi onggga ringker gij kota kota rusnok Yunani rerin fogora oftufu rua jah suma ei?

³⁶ Ofa agot gu mimif oida, 'Iwa imohca Didif, tina inek Didif guru.' Noba Ofa agot tein oida, 'Iwa ineja jah monuh onggga Didif dingker gij guru.' Koma efen ofou bera erek meidu. Mimif minejginaga rot guru."

³⁷ Gij mona onggga Yahudi rerin mona eteb egens insa koma doida omoisa fob, beda Yesus ot gij momas onggga angh rejrej Mod Allah noba agot gu rusnok rufoukou jah suma oida, "Osnok egens onggga magon enen ofa, beda ofa en skoita Didif noba ej mei ojgomu.

³⁸ Noba gij Mar Efeyi Ebsi bera rungggu oida, 'Osnok egens onggga odou ororu Didif fob, beda mei onggga

erek eiteij ah bera emeya jeska efen odou efesi ojpgomuja.' "

³⁹ Mar orocunc insa koma ongga Yesus emfesij rot bera osok gij Efena Ebsi Allah. Gij mona insa koma Allah onobk Efena Ebsi skoita rusnok enesi, jeska Yesus enedebecki jeska anggos rot efen ofoka ongga aksa eteb enesi. Tina gij mona kahma deika beda rua ongga ruroru Yesus fob bera rinsma Efena Ebsi Allah fob.

⁴⁰ Nou ongga rusnok jah suma ringg mar ongga Yesus emfesij insa koma fob, beda rua ruga emesedema rot. Rineya ragot oida, "Tenten, Ofa bera nabi egens koma ongga runggu gij Mar Efeyi Ebsi oida emen si."

⁴¹ Beda rineya ragot oida, "Ofa bera Kristus egens koma ongga emen." Tina rineya ragot oida, "Erek koma guru. Kristus ongga emen insa koma bera onojga jeska monuh Galilea guru.

⁴² Jeska Mar Efeyi Ebsi agot oida Kristus ongga emen bera omojuj jeska raja Daud efen rusnok ongga rujga jeska Betlehem ongga erek raja Daud efen kota tein ojpgomu."

⁴³ Jefeda rusnok insa koma rudou onoitij rot oida Yesus bera erek idu guru.

⁴⁴ Rineya rudou os ragei Ofa, tina rusnok egema tein rinagei Ofa guru.

⁴⁵ Nou ongga mar koma oisa fob, beda tentarer insa koma ongga ebirfager Yahudi rumbk jeskasada ragei Yesus bera ruksons skoita rua. Beda ebirfager insa koma rijeka tentarer koma oida, "Teinefa fogora iwa inagei Yesus noba iroun Ofa skoita memef jah sif guro."

⁴⁶ Beda tentarer insa koma ruroun oida, "Ofa oftufu mar erek ofoufem ekirsa jeska rusnok enjgineg rumftufu mar gu mimif sis fob."

⁴⁷ Beda rua onnga ebic Farisi insa koma ragot oida, "Ah! Yesus orokrusa iwa tein ojgomu!"

⁴⁸ Jeska mifmin ebirfager Yahudi jera rua onnga ebic Farisi egema tein runororu Ofa guru.

⁴⁹ Tina rusnok onnga runok rufoka gij guru erek iwa tein bera rudou osumsumu rot hukum Musa ojgomu. Allah omofra okum keingg iwa nomnaga si!"

⁵⁰ Tina osnok egens eneya jeska ebic Farisi insa koma onnga ofoka Nikodemus. Gij mona insa koma ofa enefesij mar jera Yesus enesi. Ofa agot oida,

⁵¹ "Mifmin hukum erebent agot oida munofra mar okum keingg rusnok ebeirens guru. Tina mimif mig mar onnga rua rimfesij nou risinsa sismeni fog."

⁵² Tina rua ruroun gu ofa oida, "Erek bua bujga jeska monuh Galilea tein jefeda budou egens jera Ofa ei? Bua bik Mar Efeyi Ebsi ojgomu, jeska mar koma bera enagot mar egema tein rot nabi egens onnga ojga jeska monuh Galilea jinaga guru!"

⁵³ (Beda rua nomnaga rimekebema fogora rija jah rerin mod.)

8¹ Nou onnga koma oisa fob, beda Yesus eja jah memaga ofos onnga ofoka Zaitun.

² Tina gij rahah beda Ofa oksons jah Mod Allah gij kota Yerusalem. Noba rusnok rufoukou rin skoita Ofa, beda Ofa oftufu mar deika gu rua.

³ Beda rusnok Yahudi rerin Guru-Guru hukum agama jera rineya onnga ebic Farisi ruhrus ojaga egens onnga ensiri jera ojaga egema efen mahina. Beda rua riradgodu ojaga egens insa koma jeskaseda ot jah rusnok insa koma rudou.

⁴ Beda rua ragot gu Yesus oida, "Akeina Guru, memef magei ojaga egens kef askesi ofa esiri jera ojaga egema efen mahina.

⁵ Noba hukum Musa agot rot oida mimif mira mamu miredi ofa onjoros anggots rot efen mar onnga oska insa koma ojgomu. Bua busujohu rot mar insa kef erek teinefa?"

⁶ Rua rijeka gu Yesus osok gij mar insa koma jeska rua runsujohu gij rudou efesi fob oida, erek Ofa onoitij rot mar insa koma guru, beda rua rumocunc Ofa erek oska. Jeska koma tein bera ekirsa rot hukum Musa. Beda rua rumocunc Ofa tein erek oska rot. Beda Yesus enagot mar rot ebeirens guru. Tina Ofa eker jah suma noba era etma otufou orogu mar gij mebi ojgomu.

⁷ Beda rua rijeka gu Yesus rot mar insa koma juens deika. Jefeda Yesus ek rua noba agot oida, "Rua jeska ifekesa onnga runotunggom mar onnga oska egema tein enesi bera rij mamu sismeni fogora riredi ofa ojgomu."

⁸ Beda Yesus era etma otufou orogu mar deika gij mebi.

⁹ Rua nomnaga rijginaga rot oida mar onnga oska enah gij rudou efesi tein. Jefeda nou onnga rusnok insa koma rig mar onnga Yesus anggot gu rua fob, beda rua koma egens egens rija jeska Yesus noba ruksons jah rerin mod. Sismeni runa ofos rija jeska, beda rua onnga erek ruforoker rija tein onjoros ojaga egens insa koma ot gu esinsa jah suma ojgomu.

¹⁰ Beda Yesus ek gu ofa noba agot oida, "Asoka, rusnok onnga ragei bua bera rija guaidu? Idu bera onnga ocunc bua erek oska ebeibeyaifo?"

¹¹ Beda ofa oroun gu Yesus oida, "Tuan, rua insa koma nomnaga rinja fob, jefeda rua runocunc didif erek oska deika gurei." Beda Yesus agot oida, "Koma tenten, noba Didif tein dunocunc bua erek oska guru. Bua bija ojgomu, tina bineita mar onnga oska egema deika guru."

¹² Gij mona egema deika beda Yesus efesij mar gu rusnok. Ofa agot oida, "Didif bera erek eisa nou rusnok. Noba osnok egens onnga ororu Didif, beda ofa eneker gij motkobah deika guru. Tina ofa emeker gij eisa onnga eita eiteij ah onnga efeinah si."

¹³ Beda rineya jeska ebic Farisi ruga erahah rot oida, "Mar onnga Bua bimfesij bera osok gij Bua bisinsa ojgomu. Koma onocunc oida mar insa koma bera erek tenten guru. Jefeda memef mokoja rot mar onnga Bua bimfesij rot ojgomu."

¹⁴ Beda Yesus oroun oida, "Tenten, mar insa koma onnga Didif dimfesij rot bera osok gij Didif disinsa ojgomu. Tina mar insa koma bera erek tenten ojgomu. Didif dijinaga rot monuh onnga Didif din jeska. Noba Didif dijinaga rot monuh onnga Didif dimeja gij tein. Tina iwa bera inejjinaga rot monuh onnga Didif din jeska guru. Noba iwa inejjinaga rot monuh onnga Didif dimeja gij tein guru.

¹⁵ Iwa yuga ojga rot rusnok oisouska mar onnga rusnok mebif rusujohu rot ojgomu. Didif dunoga ojga rot rusnok guru.

¹⁶ Tina erek Didif duga ojga rot mar gu rusnok, beda Didif duga ojga rot mar erek tenten ojgomu. Jeska Didif dineita mar insa koma rot disinsa ojgomu guru. Dedin Akeina onnga obk Didif jah sif bera eneker jera Didif.

¹⁷ Noba yeyin hukum agot rot oida, 'Erek rusnok egeka gagot rot mar onnga oska onnga osnok egens egema ontunggom fob, beda mar onnga goga ganggot insa koma bera erek adaj nou ojgomu.'

¹⁸ Didif dagot mar onnga tenten osok gij mar onnga disinsa dutunggom. Noba Akeina onnga ombk Didif bera agot rot oida mar onnga Didif dutunggom bera erek tenten tein."

¹⁹ Beda rua rijeka gu Yesus oida, "Bebin mekeb eker sinefa?" Beda Yesus oroun oida, "Iwa inejinaga rot Didif guru. Noba iwa inejinaga rot dedin Akeina tein guru. Jeska erek iwa ijginaga rot Didif fob, beda iwa ijginaga rot dedin Akeina tein ojgomu."

²⁰ Yesus anggot mar insa koma nomnaga gij mona onnga Ofa oftufu mar gu rusnok gij momas onnga angh rejrej Mod Allah. Jah suma bera rusnok raha burwa egens gij. Noba rusnok rikeba rerin fifi eneya gij burwa insa koma. Tina rusnok egema tein rinagei Ofa gij mona insa koma guru, jeska efen mona onnga eimofoj rot bera enesaga enesi.

²¹ Erek koma beda Yesus agot gu rusnok insa koma deika oida, "Didif dimeja jeska iwa si. Beda iwa imohca Didif, tina iwa imeja eseiseifa jeska iwa iroru mar onnga oska ojgomuja ros. Jefeda enadaj nou iwa ija jah monuh onnga Didif dimeja gij jinaga guru."

²² Jefeda rua ragot moguma oida, "Ofa agot oida, mimif mineja jah monuh onnga Ofa emeja gij guru. Koma efen ofou oida Ofa emagob esinsa ojgomu ei?"

²³ Beda Yesus agot oida, "Monuh mebif kef bera onnga iwa yeyin, tina Didif din jeska mebaga ojgomu.

²⁴ Didif danggot rot oida iwa imeja eseiseifa jeska iwa iroru mar onnga oska ojgomuja. Noba erek iwa

inoruru Didif oisouska mar onnga Didif duncunc rot disinsa guru, beda iwa imeja eseseifa si."

²⁵ Beda rua ragot oida, "Erek koma jefeda Bua bera idu?" Beda Yesus agot oida, "Gij mona onnga sismeni onjoros mona deisef tein bera Didif dimfesij gu iwa osok gij Didif fob.

²⁶ Noba yeyin mar ofoukou enjineg tein onnga Didif dumocunc onnga erek oska. Tina Didif difesij mar gu rusnok osok gij mar onnga Didif dig jeska Ofa onnga ombk Didif fob ojgomu. Noba Ofa bera agot mar onnga tenten ojgomu."

²⁷ Rusnok insa koma rudou enebriyi gij oida Ofa emfesij mar osok gij efen meka Allah guru.

²⁸ Jefeda Yesus agot gu rua oida, "Gij mona onnga iwa yufra Didif, Rusnok Efesa, beda idou emebriyi gij rot oida Didif bera Ofa onnga emen. Noba iwa imejginaga rot oida mar onnga Didif dimfesij rot bera onoisouska mar onnga disinsa dudou os rot guru. Tina Didif duftuftu mar onnga Akeina omftuftu gu Didif sismeni fob ojgomu.

²⁹ Ofa onnga ombk Didif bera eker jera Didif ojgomuja. Jeska mar nomnaga onnga Didif duntunggom bera jeskaseda direita Ofa efen odou onnga eskeiramera rot ojgomu. Jefeda Ofa eneja jeska Didif jinaga guru."

³⁰ Rusnok rufoukou onnga ringg mar insa koma onnga Yesus omftuftu rot bera rururu Ofa.

³¹ Erek koma jefeda Yesus agot gu rusnok Yahudi insa koma onnga rururu Ofa oida, "Erek iwa ita mar onnga Didif duftuftu ojgomuja, beda iwa imerek rusnok onnga rururu Didif rot tenten fob.

³² Beda idou emebriyi gij mar onnga tenten ojgomu tein. Noba mar onnga tenten insa koma bera

omосуwa iwa jeska yeyin mar okum onggа angh keingg iwa si."

³³ Beda rua ragot gu Yesus oida, "Memef bera monjuj jeska Abraham. Memef monofij rusnok enjineg erek rerin rusnok onggа rumfij rua jinaga guru. Jefeda Bua bagot rot oida memef momосуwa jeska mar meidu?"

³⁴ Beda Yesus agot oida, "Rusnok onggа rutunggom mar onggа oska bera rugif gu rerin mar onggа oska insa koma ojgomuja. Enadaij nou rua rusuwa risinsa jeska mar insa koma jinaga guru.

³⁵ Rua onggа rufij rusnok enjineg bera runoira jera rusnok insa koma rerin ribskir ojgomuja guru. Tina orna egens onggа oira jera efen ebskir bera emeker erek koma ojgomuja.

³⁶ Jefeda erek Allah efen efesa osuwa iwa, beda iwa isuwa rot tenten fob si.

³⁷ Didif dijinaga rot oida iwa nomnaga bera yunjuj jeska Abraham. Tina rineya jeska iwa rudou os ragob Didif ojgomu, jeska iwa yukoja mar onggа Didif duftuftu rot.

³⁸ Didif dimfesij rot mar onggа Akeina oncunc gu Didif fob. Tina iwa ita mar onggа yeyin imower runcunc gu iwa ojgomu fob."

³⁹ Beda rua ragot oida, "Abraham bera erek mefmen meimowa." Beda Yesus agot oida, "Erek iwa bera Abraham efen rusnok onggа runjuj jeska ofa rot tenten, beda iwa imeita mar onggа oufamofa erek Abraham eita sis fob.

⁴⁰ Didif bera osnok egens onggа difesij rot mar onggа tenten. Noba mar insa koma bera Didif dingg jeska Allah fob. Tina rineya jeska iwa rudou os ragob

Didif rot ojgomu. Abraham eneita mar onggga oska erek koma sis fob guru.

⁴¹Jefeda iwa bera iroru mar onggga oska erek yeyin iker runtunggom sis fob ojgomu tein." Tina rua ragot gu Ofa oida, "Memef minerek rusnok onggga rinejginaga rot rerin rika guru! Allah bera erek mefmen meka. Mefmen meka egema bera enofogu guru."

⁴²Beda Yesus agot gu rua deika oida, "Erek Allah bera yeyin Ika rot tenten fob ei, beda iwa idou okora rot Didif tein ojgomu. Jeska Didif din jeska Allah, noba dingker jera iwa fob. Didif dinen oisouska disinsa dedin owesa efek guru, tina Allah bera onggga ombk Didif fob.

⁴³Iwa idou enebriyi gij mar onggga Didif dimfesij rot guru, jeska iwa yukoja mar onggga Didif duftuftu rot ojgomu.

⁴⁴Ongga tenten bera iwa irek Bilis efen efeser noba ofa erek yeyin ika ojgomu. Jeska iwa idou os itunggom mar onggga Bilis odou os rot ojgomu. Sis mona onggga dojunmeni onjoros mona deisef tein, Bilis bera erek rusnok onggga ragob rusnok enjgineg. Ofa okoja mar onggga tenten ojgomuja. Jeska mar onggga tenten enah gij ofa odou efesi jinaga guru. Gij mona onggga Bilis ocuwei mar gu rusnok, beda koma orocunc rot efen eita mar ojgomu. Ofa bera erek rusnok onggga rucuwei mar ojgomuja. Noba ofa tein oftuftu rusnok enjgineg jeskaseda rucuwei mar morototuma erek ofa ojgomu tein.

⁴⁵Didif difesij rot mar onggga tenten ojgomu, tina iwa inororu dedin duga guri.

⁴⁶Iwa inek Didif dutunggom mar onggga oska egema tein guru. Jefeda erek Didif difesij rot mar onggga

tenten ojomu, beda teinefa fogora iwa inoruru dedin duga insa koma guri.

⁴⁷ Rusnok onnga erek Allah efeser bera ruroun mar onnga Allah anggot rot gu rua ojomu. Tina iwa inoroun mar onnga Ofa anggot rot gu iwa guru, jeska iwa inerek Ofa efen rusnok guru."

⁴⁸ Erek koma beda rusnok Yahudi insa koma ragot gu Yesus oida, "Memef mosujohu rot oida Bua bera oska erek rua onnga Samaria, noba efena ofogog bera oira gij budou efesi fob. Koma erek tenten ei?"

⁴⁹ Beda Yesus oroun gu rua oida, "Efena ofogog onok Didif guru. Didif dugif gu dedin Akeina. Tina iwa inougif gu Didif guru.

⁵⁰ Didif dunohca dufoka onnga aksa guru. Tina Akeina odou os rot oida Didif disma dufoka onnga aksa. Noba Ofa bera onnga oga ojga rot rusnok nomnaga rerin rita mar.

⁵¹ Kef erek tenten oida, osnok egens onnga oruru mar onnga Didif duftuftu rot bera enagos guru."

⁵² Beda rusnok Yahudi insa koma ragot gu Yesus oida, "Ebeibeyaif memef mejjinaga rot tenten oida efena ofogog ok Bua fob! Jeska rusnok onnga rufoka aksa erek Abraham jera nabi-nabi onnga ensis tein ranggos fob. Tina Bua bagot oida rusnok onnga rururu mar onnga Bua buftuftu rot bera rinagos guru.

⁵³ Erek Bua busujohu rot oida bufoka aksa ekirsa jeska mefmen meimowa Abraham efen ofoka ei. Ofa tein anggos fob. Noba nabi-nabi onnga ensis ranggos fob tein. Jefeda Bua busujohu rot oida Bua birek idu?"

⁵⁴ Beda Yesus oroun oida, "Erek Didif dufra disinsa dufoka erek aksa, beda koma onorocunc rot oida dufoka erek aksa rot tenten guru. Dedin Akeina bera

ongga ofra dufoka erek aksa. Noba iwa yagot oida Ofa bera erek yeyin Allah.

⁵⁵ Iwa inejginaga Ofa rot tenten guru. Tina Didif dijginaga Ofa rot tenten fob. Erek Didif dagot oida dinejginaga Ofa rot tenten guru, beda koma erek Didif ducuwei mar morototuma erek iwa. Tina Didif dijginaga Ofa rot tenten fob, noba Didif duroru mar onnga Ofa anggot rot tenten tein fob.

⁵⁶ Sis eteb fob yeyin imowa Abraham odou erirei eteb jeska ofa ejginaga rot oida Didif dimen si. Ofa ejginaga rot mar insa koma fob, noba ofa odou eskeira eteb rot tein."

⁵⁷ Beda rusnok Yahudi insa koma ragot gu Yesus oida, "Bua bera erek buforoka ros, tina Bua bagot oida Bua bik Abraham onnga anggos sis eteb fob ei?"

⁵⁸ Beda Yesus agot gu rua oida, "Kef erek tenten oida, gij mona onnga Abraham onojuj jeska efen mosu enesi bera Didif dunofoguma."

⁵⁹ Beda rusnok insa koma ragei mamu jeskaseda riredi Ofa, tina Ofa edemi esinsa jeska rua, beda Ofa eja jeska Mod Allah.

9¹ Gij mona egema deika, askesi Yesus enecira gu moroju, beda Ofa ek osnok orna egens onnga eiteij ofou. Sis fob osnok egens koma onjuj jeska efen mosu rot eiteij ofou erek koma.

² Beda Yesus efen ruforoker rijeka gu Ofa oida, "Akeina Guru, osnok egens kef onjuj jeska efen mosu rot eiteij ofou jeska ofa efen mar onnga oska ei, era efen meka jera mosu bera onnga gegana mar onnga oska ei?"

³ Beda Yesus oroun gu rua oida, "Ofa efen mar onnga oska era meka jera mosu gegana mar onnga oska bera onotunggom ofa fogora onjuj rot eiteij ofou

guru. Osnok egens kef onjuj jeska mosu rot eiteij ofou jeskaseda oisouska ofa bera Allah omocunc rot efen owesa efek onnga eteb gu rusnok.

⁴ Askesi mona onnga eimofoj enahuma ros, beda mimif mita mar onnga Allah ombk Didif rot ojgomu. Noba askesi Didif dingker gu mebif ros, beda Didif direk eisa nou mebif. Tina motkobah emen si. Noba askesi motkobah insa koma enah, beda rusnok rineita mar gij deika guru."

⁵ (9:4)

⁶ Nou onnga Yesus anggot mar insa koma fob, Ofa oj oskurfi gij mebi. Beda Ofa orohoh oskurfi insa koma jera mebi oskiyai fogora orotunggom mohtefa rot. Beda Ofa aha mohtefa insa koma gij osnok egens insa koma eiteij.

⁷ Beda Ofa agot gu osnok egens insa koma oida, "Bua bija beda but busum gij mei onnga ofoka Siloam." (Siloam efen ofou, Ombk). Jefeda osnok egens koma eja noba ot efen osum gij mei insa koma. Beda ofa eja gu efen mod rot eiteij onnga eskeira fob.

⁸ Rusnok onnga ringker doida ofa efen mod noba rua onnga rik ofa erejgei rusnok nou fifi bera ragot rot rudou onnga oubsaha oida, "Wah! Osnok egens kef bera onnga eker doida moroju noba erejgei rusnok nou fifi ojgomuja!"

⁹ Rineya ragot oida, "Tenten koma bera ofa!" Tina rusnok rineya ragot oida, "Guru, ofa efen osum erek morototuma jera ofa onnga erejgei nou fifi ojgomu." Beda ofa onnga eita eiteij eskeira fob koma agot oida, "Tenten, didif bera ofa koma!"

¹⁰ Beda rua rijeka gu ofa oida, "Biteij eskeira fogora bik mar erek teinefa?"

¹¹ Beda ofa oroun oida, "Osnok egens onggga ofoka Yesus otunggom mohtefa beda Ofa aha mohtefa koma gij diteij. Beda Ofa obk didif gu mei Siloam jeskaseda dut dusum jah suma. Jefeda didif dija jah suma noba dut dusum. Beda ainsa koma tein diteij eskeira fogora dik mar koisoisa tein."

¹² Beda rua rijeka gu ofa oida, "Osnok egens koma eker guaidu?" Beda ofa agot oida, "Didif dinejginaga rot guru."

¹³ Yesus eita eskeira gu osnok egens insa koma efen eiteij gij mona onggga Sabat. Beda rusnok insa koma ruroun osnok egens koma onggga eita eiteij eskeira skoita ebirfager onggga ebic Farisi.

¹⁴ (9:13)

¹⁵ Beda rua onggga ebic Farisi insa koma rijeka joug ofa oida, "Bebin biteij eskeira erek teinefa?" Beda ofa oroun gu rua oida, "Tuan, Ofa aha mohtefa gij diteij, beda didif dut dusum, noba ebeibeyaif diteij eskeira fogora dik mar fob."

¹⁶ Beda rineya jeska ebic Farisi insa koma ragot oida, "Yesus koma bera enen jeska Allah guru. Jeska Ofa otunggom mar insa koma gij mona onggga Sabat, noba koma bera erek mar onggga oska!" Tina rineya ragot oida, "Guru, Ofa jeska Allah ojgomu. Jeska osnok egens onggga otunggom mar onggga oska bera eneita owesa efek jeskaseda orocunc rot mar onswos erek insa koma jinaga guru." Jefeda rua ruga omosokuma erek koma osok gij Yesus.

¹⁷ Beda rua rijeka gu osnok egens insa koma onggga eiteij eskeira deika oida, "Bua bera onggga bita biteij onggga eskeira jeska Ofa, jefeda bua busujohu rot oida Ofa bera erek idu?" Beda osnok egens koma oroun oida, "Ofa bera erek nabi egens."

¹⁸ Rua onnga ebic Farisi insa koma rudou onororu oida osnok egens koma efen eiteij onnga ofou sis fob guru. Jefeda rua rubk rusnok enjineg jeskaseda rujoroun ofa efen meka jera mosu skoita rua.

¹⁹ Beda rua rijeka gu ofa efen meka jera mosu insa koma oida, "Goga gagot oida gegan gesa orna egens onnga eiteij ofou. Noba goga gagot oida osnok egens kef bera ofa. Tina ofa koma bera efen eiteij onnga ek mar erek giskini. Jefeda teinefa fogora ofa ek mar erek koma fobo?"

²⁰ Beda osnok egens koma efen meka jera mosu gagot oida, "Tuan tenten, ofa koma bera erek magef mafman masa. Noba ofa onjuj jeska efen mosu rot eiteij ofou.

²¹ Tina magef manajginaga rot teinefa ofa ek mar ebeibeyaif erek koma guru. Noba magef manajginaga rot idu onnga eita eskeira gu ofa guru. Iwa ijeka ofa ojgomu. Jeska ofa orna fob, jefeda adaij nou ofa agot mar rot esinsa ojgomu."

²² Goga gagot mar erek insa koma jeska goga gemeesa rot ebirfager Yahudi. Jeska ebirfager Yahudi ruga eris rot oida rusnok onnga ragot oida Yesus bera Kristus egens onnga emen, beda enadaij nou rua ruiira gij Mod onnga Yahudi rum riteij gu Allah gij deika guru.

²³ Rua ruga eris rot mar insa koma, jefeda goga gagot gu rua oida ofa orna fob, jefeda rijeka gu ofa rot ojgomu.

²⁴ Jefeda rua rubk rusnok jeskaseda ruroun osnok egens insa koma onnga eita eiteij eskeira gij mer efesi jeskaseda rijeka joug ofa juens deika. Beda rua ragot gu ofa oida, "Bagot mar rot tenten jah Allah odou rot osnok egens insa koma. Jeska memef

mejginaga rot oida Ofa onnga eita eskeira gu bua bera erek rua onnga rita mar onnga oska ojgomu!"

²⁵ Beda ofa oroun gu rua oida, "Didif dinejginaga rot oida Ofa bera erek rua onnga rita mar onnga oska era onnga oufa tein guru. Tina mar egens onnga didif dijginaga fob bera oida sis fob diteij ofou, tina ebeibeyaif diteij eskeira fogora dik mar fob."

²⁶ Beda rua rijeka gu ofa deika oida, "Ofa otunggom mar meidu gu bua? Teinefa fogora Ofa otunggom biteij eskeira erek komo?"

²⁷ Beda ofa oroun oida, "Didif dimfesij rot mar insa koma gu iwa fob. Tina iwa idou okoja rot ojgomu. Iwa idou os ig osok gij mar insa koma deika rot meidu? Iwa idou os iroru Ofa erek efen ruforoker tein ei?"

²⁸ Beda rua rifena oskereta ofa beda ragot oida, "Bua bera erek Ofa efen oforoka egens! Tina memef bera erek Musa efen ruforoker.

²⁹ Memef mejginaga rot oida Allah emfesij mar gu Musa sis fob. Tina Ofa insa koma bera erek idu? Memef menejginaga rot efen ojga tein guru."

³⁰ Beda osnok egens insa koma oroun gu rua oida, "Wah, didif dudou ousaha rot iwa. Jeska Ofa otunggom mar onnga ongnoska eteb erek eita eskeira gu diteij, tina iwa onnga irek mefmen ebirfager inejginaga rot Ofa efen monuh tein guri.

³¹ Memef mejginaga rot oida Allah eneg rot mar onnga rusnok onnga rita mar onnga oska rum riteij gu Ofa rot guru. Tina Ofa eg mar jeska rusnok onnga rugif gu Ofa rot tenten noba onnga rutunggom mar onnga Ofa odou os rot ojgomu.

³² Sis mona onnga Allah ontunggom mebif onjoros deisef tein, bera memef meneg mar rot osnok egens

egema tein onnga otunggom rusnok onnga runjuj jeska mosu rot riteij ofou erek riteij eskeira jinaga guru. Tina Ofa ontunggom mar insa koma fob.

³³ Erek Ofa enen jeska Allah guru, beda enadaij nou Ofa otunggom mar onswos erek koma jinaga guru."

³⁴ Beda rua ruroun gu ofa oida, "Bua bunjuj jeska bebin mosib rot budou onnga efen mar onnga oska. Jefeda bua bera erek idu fogora buftuftu mar gu memef erek komo!" Rua ragot mar insa koma beda rukoja ofa jeska Mod onnga Yahudi rum riteij gij.

³⁵ Nou onnga Yesus engg rot oida ebirfager Farisi okoja osnok egens insa koma jeska Mod onnga rusnok rum riteij gij, beda Ofa ohca osnok egens koma. Beda Yesus agot gu ofa oida, "Bua budou ororu Rusnok Efesa rot tenten ei?"

³⁶ Beda ofa ejeka gu Yesus oida, "Tuan, idu bera Rusnok Efesa? Bagot gu didif rot jeskaseda didif duroru Ofa ojgomu."

³⁷ Beda Yesus agot gu ofa oida, "Bua bingk Ofa fob. Jeska Didif, onnga difesij mar gu bua ebeibeyaif, bera Rusnok Efesa."

³⁸ Beda ofa agot oida, "Tuhan, dudou ororu Bua ojgomu!" Beda osnok egens insa koma es okeibi gu mebi noba ougif gu Yesus.

³⁹ Beda Yesus agot gu ofa oida, "Didif din gu mebif jeskaseda duga ojga rot rusnok rerin rita mar. Noba Didif din jeskaseda rua onnga riteij ofou rik mar, noba rusnok onnga rik mar rija erek riteij ofou."

⁴⁰ Rineya jeska ebic Farisi rig mar onnga Yesus anggot insa koma gu osnok egens koma. Jefeda rua ragot gu Yesus oida, "Bua bagot oida memef meiteij erek ofou tein ei!"

⁴¹ Beda Yesus agot oida, "Iwa ita mar erek rusnok onnga riteij ofou, beda idou enebriyi gij mar onnga iwa intunggom guru. Jefeda mar onnga oska enah gu iwa guru. Tina jeska iwa yagot oida iwa ita mar rot koisoisa erek rusnok onnga rik mar rot koisoisa fob, beda idou ebriyi gij mar onnga iwa itunggom. Jefeda mar onnga oska ah gu iwa ros."

10 ¹ Yesus agot oida, "Kef bera erek tenten oida, osnok egens onnga onaira gij momas egens onnga rungk mera joug domba-domba oisouska montoj guru, tina ofa osoka tera mera insa koma ojgomu, beda ofa bera erek rusnok onnga rukoreka mar ojgomu.

² Noba osnok egens onnga oira momas insa koma oisouska montoj ojgomu, ofa bera onnga ont joug domba-domba insa koma.

³ Noba osnok egens onnga ot gu montoj bera ohoda montoj koma nou ofa onnga ont joug domba-domba insa koma. Noba domba-domba insa koma ruroru ofa efen oga. Ofa era rufoka ois gu rua, beda ofa eja okag rot rua.

⁴ Ofa oroun efen domba-domba nomnaga insa koma orogna jeska momas. Beda ofa eja okag rot rua, noba rua rutoij ofa jeska rua rijginaga rot ofa efen oga.

⁵ Tina domba-domba insa koma runororu rusnok onnga rua rinejginaga rot enesi jinaga guru. Rua rumoku jeska rua, jeska rinejginaga rot rerin ruga guru."

⁶ Yesus efesij mar onnga orocunc insa koma gu rusnok Yahudi, tina rudou enebriyi gij mar insa koma efen ofou guru.

⁷ Rusnok insa koma rudou enebriyi gij mar orocunc insa koma efen ofou guru. Jefeda Yesus agot gu rua rot efen ofou oida, "Kef erek tenten oida, Didif bera erek montoj nou domba-domba insa koma jeskaseda ruiru gij montoj.

⁸ Noba rusnok onggga rungkag rot Didif erek nabi-nabi onggga ebireira jera Guru-Guru onggga oska bera rierek rusnok onggga rusok tera mera jeskaseda ruiru momas insa koma fogora rukoreka mar ojgomu. Tina domba-domba rineg rua insa koma ruga jinaga guru.

⁹ Didif bera erek montoj insa koma. Noba rusnok onggga ruiru oisouska Didif bera dumoskotu rua jeska rerin mar onggga oska. Rua bera erek domba-domba insa koma onggga rumoira gij momas efesi noba onggga rurogna tein jeskaseda rit meskeingg ofok onggga ereinahtah ojgomuja.

¹⁰ Rua onggga rukoreka mar bera rin jeskaseda ragei mar onggga rusnok egema rerin. Noba rua rin jeskaseda ragob rusnok noba ruhoda rot rerin mar fogora orowora. Tina Didif din jeskaseda dita eiteij ah onggga efeinah gu rusnok. Noba eiteij ah insa koma bera erek onggkoska eteb.

¹¹ Didif bera erek gembala egens onggga ont joug efen domba-domba rot odou onggga oufamofa eteb. Noba Didif duitij rot oida dimagos jeskaseda dedin domba-domba risma eiteij ah onggga efeinah.

¹² Rusnok enjgineg rut joug gembala efen domba-domba jeskaseda risma rufons rot. Tina rua runot joug domba-domba insa koma rot iskusk morototuma erek gembala esinsa ot joug domba-domba koma rot iskusk guru. Jeska gij mona onggga rua rik serigala egens onggga enen, beda rua

rimeesa fogora rua raha domba-domba jah noba ruku jeska. Beda serigala insa koma osoka keingg domba-domba. Beda domba-domba insa koma nomnaga rimekebema dogdog.

¹³ Rusnok insa koma onnga runt joug domba-domba ruku ojgomu, jeska rua rudou onokora rot domba-domba insa koma erek tenten guru. Rua runt joug domba-domba insa koma jeskaseda risma fifi rot ojgomu.

¹⁴ Didif bera erek gembala egens onnga ont joug efen domba-domba rot odou onnga oufamofa. Didif dijginaga rot dedin domba-domba insa koma morototuma erek dedin Akeina ejginaga rot Didif tein. Noba dedin domba-domba insa koma rijginaga rot Didif erek Didif dijginaga rot dedin Akeina. Noba Didif duitij rot oida dagos jeskaseda dedin domba-domba risma eiteij ah onnga efeinah.

¹⁵ (10:14)

¹⁶ Didif dedin domba-domba enjgineg tein onnga runoira jera dedin domba-domba insa kef enesi. Jefeda Didif ducosu rot duhoturu rua jeskaseda rua riker morototuma jera dedin domba-domba insa kef tein. Rua tein rimeg rot dedin duga si. Beda gij mona insa koma bera Didif dedin domba-domba ebic egens ojgomuja. Noba rua rerin Didif erek osnok egens onnga dunt joug rua ojgomuja.

¹⁷ Dedin Akeina odou okora rot Didif, jeska Didif duitij rot oida dagos jeskaseda disma diteij ah deika sons ojgomu.

¹⁸ Erek Didif dunoitij rot guru, beda enadaij nou rusnok ragob Didif guru. Tina Didif duitij rot oida dagos ojgomu. Jeska Didif disinsa bera onnga dagot rot oida Didif dimagos ojgomu. Noba Didif disinsa

bera onggaga dagot rot oida Didif dimesma diteij ah sons deika ojomu. Jeska dedin Akeina ombk Didif jeskasada dita mar insa koma ojomu si."

¹⁹ Nou onggaga rusnok Yahudi rig mar insa koma beda rua ruga omosokuma rot mar onggaga Yesus emfesij gu rua insa koma fob.

²⁰ Rineya onggaga erek rufoukou ragot oida, "Efena ofogog egens bera oira gij efen odou efesi fob, jefeda Ofa erek merei fob! Memef meneg rot mar onggaga Ofa agot deika guru!"

²¹ Tina rineya ragot oida, "Osnok egens onggaga merei ok Ofa bera enagot mar onggaga onswos erek Ofa anggot insa koma fob guru. Noba enadaij nou osnok egens onggaga merei ok eita eskeira gu rusnok onggaga riteij ofou erek Ofa ontunggom insa koma guru."

²² Mona eteb egens onggaga Yahudi ruina maat erek rireisasi keingg risinsa rot mona onggaga rimower rii Mod Allah gij Yerusalem bera ensaga fob. Noba mesta onggaga ongak meifirna ensaga gij mona insa koma tein.

²³ Ainsa koma tein Yesus ecira gu Mod Allah insa koma efen majmeg onggaga rusnok Yahudi rijeka oida, Majmeg Salomo.

²⁴ Beda ebirfager rusnok Yahudi rumohoturuma rejrej Ofa. Beda rua ragot gu Ofa oida, "Teinefa fogora Bua bifesij mar onggaga orotunggom modou erek eineina gij rot Bua ojomuja. Erek Bua bera Kristus egens koma onggaga emen, beda bagot erek koma rot koisoisa gu memef ojomu foga."

²⁵ Beda Yesus oroun gu rua oida, "Didif danggot erek koma gu iwa fob, tina idou onororu Didif rot guru. Noba mar onggaga Didif dutunggom oisouska

Akeina efen owesa efek bera orocunc erek koisoisa rot Didif fob.

²⁶ Tina iwa inororu duga guru, jeska iwa inerek dedin domba-domba guru.

²⁷ Rusnok onnga rirek dedin domba-domba bera ruroru dedin duga. Didif dijginaga rot rua, noba rua ruroru Didif.

²⁸ Beda Didif dita eiteij ah onnga ah aibin gu rua, jefeda rua rinagos jinaga guru. Noba rusnok enjgineg rinagei rua jeska Didif jinaga guru.

²⁹ Dedin Akeina bera onnga eita rusnok onnga rirek domba-domba insa koma gu Didif. Ofa bera efen ofoka onnga aksa ekirsa jeska mar nomnaga. Noba enadaij nou rusnok ragei domba-domba insa koma jeska Didif jinaga guru.

³⁰ Jeska Didif jera dedin Akeina bera erek egens morototuma."

³¹ Beda ebirfager Yahudi insa koma ragei mamu jeskaseda riredi Yesus rot deika.

³² Tina Yesus agot gu rua oida, "Didif duntunggom mar ofoukou onnga erek oufamofa eteb nou dedin Akeina fob. Jefeda iwa itkonu oska eteb skoita Didif rot kenefo fogora idou os yagob Didif rot erek komo?"

³³ Beda rua ruroun oida, "Mar oufamofa eteb onnga Bua buntunggom enereita modou otkonu oska rot Bua guru. Tina memef modou os magob Bua jeska Bua bagot oida Bua bera morototuma erek Allah. Jefeda koma erek Bua buga oruh rot Allah, jeska Bua bera erek rusnok giskini ojgomu!"

³⁴ Beda Yesus agot gu rua oida, "Runggu gij yeyin Buku hukum Musa sis fob rot mar onnga Allah anggot erek kef oida, 'Didif dagot oida iwa bera erek Allah.'

³⁵ Runggu gij Mar Efeyi Ebsi insa koma nou rusnok oida rua onnga ruroru Allah oga bera erek Allah tein. Noba mar insa koma onnga angh gij Mar Efeyi Ebsi bera erek tenten ojgomu.

³⁶ Jefeda erek Didif dagot oida Didif bera erek Allah efen efesa tein, beda teinefa fogora iwa yagot oida koma erek duga oruh Allah rot erek komo. Jeska Didif bera onnga Allah oncunc noba Ofa ombk Didif skoita rusnok mebif fob.

³⁷ Erek Didif dineita mar onnga Akeina onobk Didif rot guru, beda iwa inororu Didif guru.

³⁸ Iwa idou os yukoja Didif. Beda ita mar erek koma ojgomu. Tina iroru mar onnga Didif duntunggom onnga Akeina ombk Didif rot. Beda iwa imejginaga rot koisoisa oida Didif bera erek egens morototuma jera dedin Akeina."

³⁹ Nou onnga ebirfager Yahudi ringg mar insa koma beda rua rudou os ragei Yesus rot mar onnga Ofa anggot insa koma, tina Ofa edemi jeska rua.

⁴⁰ Erek koma beda Yesus oksons jah mei Yordan enama gu monuh onnga Yohanes eita baptis gu rusnok gij sis fob. Beda Ofa eker jah suma.

⁴¹ Beda rusnok rufoukou rija skoita Yesus jah suma. Rua ragot oida, "Sis fob Yohanes onocunc rot mar onswos guru. Tina mar nomnaga onnga Yohanes emfesij rot Yesus insa kef bera erek tenten ojgomu."

⁴² Noba rusnok rufoukou gij monuh insa koma ruroru Yesus tein.

11 ¹ Osnok egens onnga ofoka Lazarus maren eteb fob. Ofa eker gij kota Betania. Noba efen meyeserga Maria jera Marta bera geker gij kota insa koma tein.

² Maria insa koma bera onggga otkinaja mar onggga efen ensesa esij Tuhan Yesus ebirfaga. Noba ofa era efen ebirfaga efeji akseij orot Yesus efen aki sis fob. Ofa efen meyera Lazarus insa koma onggga maren eteb.

³ Jefeda Maria jera Marta gobk osnok egens jeskaseda eja agot gu Yesus oida, "Tuhan, bebin obhuj onggga bua budou okora rot bera maren eteb."

⁴ Nou onggga Yesus engg rot mar insa koma fob, beda Ofa agot oida, "Erek ofa maren, tina ofa enagos rot guru. Mar insa koma edi ofa jeskaseda rusnok rumofra Allah ofoka erek aksa eteb. Noba oisouska mar insa koma bera Allah efen efesa emesma ofoka onggga aksa eteb tein si."

⁵ Yesus odou okora rot Marta jera Maria jera Lazarus tein.

⁶ Erek koma tina gij mona onggga Ofa engg rot oida Lazarus maren eteb, tina Ofa eneja skoita ofa rot ebeirens guru. Ofa eker gij efen monuh insa koma erek mona egeka deika.

⁷ Nou onggga mona egeka insa koma oisa fob, beda Ofa agot gu efen ruforoker oida, "Mimif mija sons jah monuh Yudea."

⁸ Tina efen ruforoker ragot gu Ofa oida, "Akeina Guru, sis fob bera rusnok jah suma rudou os ragob Bua. Teinefa fogora Bua budou os buksons jah suma erek koma?"

⁹ Beda Yesus agot oida, "Mowa eisa ojgomuja erek aras setka kungkob erfeka. Jefeda rusnok onggga ricira askesi mowa eisa ros bera runokockereta mamu guru. Jeska rua rik mowa efen eisa gij mebi kef ojgomu.

¹⁰ Tina erek rua ricira askesi motkobah ros, beda rua rukockereta mamu ojomu. Jeska rua rinek eisa guru."

¹¹ Erek koma beda Yesus agot oida, "Mifmin muhuj Lazarus ahca fob. Tina Didif dimeja jah suma noba dibs ofa fogora edebecki ojomu."

¹² Beda Yesus efen ruforoker ragot oida, "Tuhan, erek ofa ahca, beda ofa efaga emeita eskeira si."

¹³ Yesus agot oida Lazarus ahca, tina koma erek orocunc rot oida Lazarus bera anggos fob. Tina Yesus efen ruforoker rusujohu rot oida Lazarus ahca erek giskini ojomu.

¹⁴ Jefeda Yesus agot gu rua rot koisoisa oida, "Lazarus bera anggos fob.

¹⁵ Ecka bera Didif dineja ebeirens skoita ofa guru. Noba koma bera omofij iwa rot jeskasada iwa idou omororu Didif ojomu. Mimif minja skoita ofa."

¹⁶ Beda Tomas (ongga rinjeka ofoka Kembar tein) agot oida, "Mimif muroru Yesus jeskasada magos morototuma jera Ofa ojomu."

¹⁷ Nou onggga Yesus ensaga gu kota Betania, beda Ofa eg rot oida Lazarus anggos fob, noba rusnok rinsah efen efaga gij mansu mamu onggga erek efen moksus nou mona tohkuru fob.

¹⁸ Kota Betania bera erek kilometer orgomu jeska kota Yerusalem.

¹⁹ Noba rusnok Yahudi rufoukou bera rinja jah kota Betania jeskasada ribisa morototuma jera Marta jera Maria rot Lazarus.

²⁰ Nou onggga Marta eg rot oida Yesus enen, beda ofa eja jeskasada orodosu Ofa gu moroju. Tina Maria eker gij efen mod efesi.

²¹ Beda Marta agot gu Yesus oida, "Tuhan, erek Bua bin jah sif sis fob, beda dedin ediyera enagos guru.

²² Tina didif dudou ororu rot tenten oida ainsa kef tein bera Allah emeita mar onnga Bua birejgei Ofa rot si."

²³ Beda Yesus agot oida, "Bebin ebiyera emedebecki noba efena ebah deika si."

²⁴ Beda Marta oroun oida, "Didif dijginaga rot oida gij mona onnga enja ejgwaga fob, beda ofa emedebecki noba efena ebah deika si."

²⁵ Beda Yesus agot oida, "Didif bera onnga dufra rusnok jeska ranggos, noba onnga dita rifena ebah sons gu rua tein. Rua onnga ruroru Didif bera rimesma eiteij ah si. Koma nou rusnok onnga ranggos fob tein.

²⁶ Noba rusnok nomnaga onnga rifena ebah ros noba ruroru Didif, beda rua rinagos deika guru." Beda Yesus agot gu Marta oida, "Bua budou ororu mar onnga Didif danggot ainsa kef fob ei?"

²⁷ Beda Marta oroun oida, "Tuhan, tenten. Didif dudou ororu oida Bua bera Kristus onnga Allah efen efesa onnga emen gu mebif rot tenten ojgomu."

²⁸ Nou onnga Marta anggot mar insa koma gu Yesus fob, beda ofa oksons skoita efen mokosa Maria. Beda ofa agot gu Maria esinsiyai ojgomu, "Guru en fob, noba Ofa odou os efesij mar jera bua."

²⁹ Nou onnga Maria eg mar insa koma, beda ofa ot noba eja ebeirens skoita Yesus.

³⁰ Yesus onoiri gij kota Betania enesi, tina Ofa eker jah mebah gu monuh onnga Marta orodosu Ofa gij.

³¹ Maria efen mohujir Yahudi onnga ribisa morototuma jera ofa rik ofa orogna rot ebeirens jeska mod. Jefeda rua ruroru ofa jeska rua rusujohu rot

oida ofa eja jah mansu mamu onggga Lazarus odog jeskaseda ribisa rot ofa jah suma.

³² Tina Maria eja teisis jah monuh onggga Yesus engker gij. Nou onggga ofa ek Yesus jah suma, beda ofa es okeibi gu mebif beda agot oida, "Tuhan, erek Bua bin jah sif sis fob, beda dedin ediyera enagos guru."

³³ Nou onggga Yesus ek Maria ebisa noba efen mohujir tein onggga ribisa, beda Ofa odou okum noba odou okora tein.

³⁴ Beda Ofa ejeka gu Maria oida, "Iwa insah efen efaga guaidu?" Beda rua ragot oida, "Tuhan, buroru memef jah suma."

³⁵ Beda Yesus ebisa. Jefeda rua onggga Yahudi jah suma ragot oida, "Tenten, Ofa tein odou okora eteb rot Lazarus."

³⁶ (11:35)

³⁷ Tina rineya jah suma ragot oida, "Erek Yesus eita eskeira gu osnok egens onggga eiteij ofou, teinefa fogora Ofa eneita eskeira gu Lazarus jeskaseda ofa tein enagos guri."

³⁸ Yesus odou okora noba ousaha eteb rot Lazarus. Beda Ofa eja jah Lazarus efen moku. Moku insa koma bera erek mansu gij mamu eteb. Noba rusnok rira mamu eteb rurof joug mansu insa koma awesi.

³⁹ Yesus agot gu rusnok jah suma oida, "Iwa yuhoda mamu efeyi jeska mansu kef." Beda Marta, onggga Lazarus efen meyesa, agot oida, "Tuhan, ofa anggos gij mona tohkuru fob. Ofa efaga efen embah tein fob."

⁴⁰ Beda Yesus agot gu ofa oida, "Budou ofoj joug rot mar onggga Didif danggot gu bua fob ei. Jeska Didif

danggot rot oida erek bua buroru Didif rot tenten, beda bua bimek Allah efen owesa efek eteb si."

⁴¹ Jefeda rusnok ruhoda mamu eteb insa koma jeska mansu efesi fob. Beda Yesus eyajga gu mebaga noba agot oida, "Akeina, Didif duis oufamofa gu Bua, jeska Bua bingg rot mar onnga Didif direjgei Bua rot fob.

⁴² Didif dijginaga rot oida Bua big mar nomnaga onnga Didif difesij gu Bua. Tina Didif dagot mar erek kef jeskaseda rusnok onnga rut jah sif rimeg rot tein. Didif dudou os jeskaseda rua rudou ororu rot tenten oida Bua bera onnga bumbk Didif fob."

⁴³ Nou onnga Yesus anggot mar insa koma fob, beda Ofa agerir rot oga eteb oida, "Lazarus, bua buroгна jeska mansu koma!"

⁴⁴ Ainsa koma tein Lazarus, onnga anggos sis fob, bera eja orogna jeska mansu insa koma. Meifeti onnga rusnok rirajgej efen etma, jera aki jera osum tein bera enah tumu ofa ros. Beda Yesus agot gu rua oida, "Iwa yuhoda meifeti jeska ofa jeskaseda ofa ecira ojgomu."

⁴⁵ Rusnok Yahudi rufoukou onnga runjogog Maria gij mona insa koma rik rot mar onnga Yesus ontunggom fob. Beda rufoukou jeska rua insa koma onnga rudou ororu Yesus tein.

⁴⁶ Tina rineya rija teisis skoita ebirfager ebic Farisi noba riflesij gu rua rot mar nomnaga onnga Yesus ontunggom insa koma fob.

⁴⁷ Beda ebirfager imam-imam jera rua onnga ebic Farisi ruhoturu morototuma jera ebirfager Yahudi rineya jeskaseda riflesij mar moguma osok gij Yesus. Rua ragot moguma oida, "Ofa orocunc mar onswos ofoukou fob. Jefeda mimif mita mar erek meidu rot?"

⁴⁸ Erek mimif mudou orons rot ojgomu, beda rusnok rufoukou rumororu Ofa si. Beda raja Kaisar efen tentarer rimen fogora rumohoda mifmin Mod Allah noba rut keingg mimif nomnaga."

⁴⁹ Osnok egens jeska rua insa koma onnga ofoka Kayafas. Rua runcunc ofa erek ebirfaga imam egens onnga ofoka aksa nou tahun insa koma fob. Ofa agot oida, "Iwa idou osumsumu ojgomu.

⁵⁰ Onnga oufa ekirsa nou mimif bera Ofa agos nou mifmin rusnok Israel nomnaga ojgomu. Beda mifmin monuh insa kef eneseiseifa jeska mimif guru."

⁵¹ Kayafas esinsa onosujohu rot mar insa koma guru. Tina jeska ofa erek ebirfaga imam onnga ofoka aksa, jefeda ofa agot rot mar onnga Allah oncunc gu ofa gij odou efesi oida Yesus emagos nou rusnok Yahudi nomnaga.

⁵² Noba Ofa emagos tein nou Allah efen efeser onnga eberbera fogora ohoturu rua nomnaga erek Allah efen efeser onnga ebic egens.

⁵³ Jefeda gij mona insa koma rua onnga ebirfager Yahudi ruga eris rot oida rumohca moroju jeskaseda ragob Yesus.

⁵⁴ Erek koma jefeda Yesus enecira rot tomnomna gu rusnok Yahudi rifekesa deika guru. Ofa eja jeska monuh insa koma, beda eja jah kota Efraim onnga angh doida monuh egens onnga owowa. Noba Ofa eker jah suma morototuma jera efen ruforoker.

⁵⁵ Mona eteb egens nou rusnok Yahudi onnga ofoka Paskah bera ensaga doida fob. Noba rusnok Yahudi rufoukou rinja jah kota Yerusalem jeskaseda rita mar jeni erek rerin erebent anggot rot, fogora risejah nou mona onnga Paskah.

⁵⁶ Rusnok jah suma ruhca Yesus. Rua rut jah Mod Allah ejmeg noba rijeka joug moguma oida, "Ofa en jah sif nou mona onnga Paskah ei era gurei?"

⁵⁷ Tina ebirfager imam-imam jera rua onnga ebic Farisi ranggot gu rusnok fob oida, "Erek iwa ik Yesus jah sif, beda yagot gu memef rot ebeirens ojgomu." Rua ragot mar erek koma, jeska rua rudou os ragei Yesus gij mona insa koma.

12¹ Nou mona eteb onnga ofoka Paskah ensaga doida fob, erek mona cinja erfens deika, beda Yesus onjogog efen mohujir gij kota Betania. Lazarus engker gu Kota Betania gij mona mona onnga ofa anggos fob. (Lazarus bera onnga Yesus omfra jeska anggos sis fob.)

² Yesus efen mohujir risejah maat jeskasada rit morototuma jera Ofa. Marta bera onnga ecka maat gu rua insa koma. Noba Lazarus tein bera et maat morototuma jera rua.

³ Beda Maria orka fanin eteb egens onnga ebera rot miniyi onnga efen ensesa. Miniyi insa koma efen efera osok eteb doska. Beda ofa otkinaja miniyi insa koma esij Yesus aki jeskasada orocunc rot efen odou onnga okora eteb rot Ofa. Beda ofa era efen ebirfaga efeji akseij orot Yesus aki. Beda mar efen ensesa insa koma efen eyejkita eberbera gij mer efesi insa koma.

⁴ Erek koma noba Yesus efen oforoka egens onnga ofoka Yudas Iskariot, onnga emekikif jeska Yesus gij mona kahma, ofa bera eneker jah suma tein.

⁵ Ofa agot oida, "Miniyi onnga efen ensesa insa koma bera efen efera osok eteb doska. Koma efen efera osok morototuma erek osnok egens esma ofons gij tahun egens onnga emfarur rot fob. Teinefa

fogora ofa onohu mar insa koma beda ekeba efen fifi eteb gu rusnok onnga rufojingki ojgomu guri."

⁶ Tina Yudas odou onokora rot rusnok onnga rufojingki erek tenten guru. Ofa agot mar erek koma jeska ofa bera onnga ont joug Yesus jera efen ruforoker rerin fifi. Noba giskini ofa era fifi eneya insa koma nou esinsiyai ojgomu.

⁷ Beda Yesus oroun gu Yudas oida, "Binagot mar erek koma rot Maria guru. Mar onnga ofa otunggom jera mar efen ensesa insa koma bera erek tenten ojgomu. Jeska ofa ensejah dedin difaga rot fogora rusnok rimesah difaga gij moksus efesi.

⁸ Rusnok onnga rufojingki bera riker gij ifekesa ojgomuja fogora yufij rua ojgomuja. Tina Didif dineker gu ifekesa ojgomuja deika guru."

⁹ Gij mona insa koma tein rusnok Yahudi rufoukou rig rot oida Yesus bera eker gij Maria efen mod. Jefeda rua rija jah suma jeskaseda rik Yesus. Noba rua tein rudou os rik Lazarus tein onnga Yesus omfra jeska anggos sis fob.

¹⁰ Rusnok ringk mar onswos onnga Yesus otunggom rot Lazarus, jefeda rusnok rufoukou ringkikif jeska rerin ribirfager Yahudi noba rua ruroru Yesus ojgomu. Jefeda ebirfager Yahudi ruga eris rot oida rimagob Lazarus tein.

¹¹ (12:10)

¹² Gij mona egema deika beda rusnok Yahudi rufoukou onnga rinja jah Yerusalem nou mona onnga Paskah bera rig rot oida Yesus emen jah suma.

¹³ Jefeda rua riris ayug ofoka rot efeyi fogora ruosu moroju nou Yesus jeskaseda rugif gu Ofa. Beda rua ruis rot ruga eteb oida, "Oufamofa eteb gu Allah. Oufamofa eteb gu Ofa onnga en oisouska Allah

ofoka. Oufamofa eteb gu Ofa onggga erek Israel efen raja!"

¹⁴ Beda Yesus eita keledai efer egens noba eker esij keledai insa koma. Koma morototuma erek rungggu gij Mar Efeyi Ebsi sis fob oida,

¹⁵ "Iwa onggga ingker gij kota Zion inemeesa guru. Jeska yeyin raja egens emen skoita iwa eifef keledai efer egens."

¹⁶ Gij mona insa koma Yesus efen ruforoker rudou enejginaga rot oida nabi rungggu mar insa koma osok gij Yesus sis eteb fob enesi. Tina gij mona onggga Yesus omfra jah mebaga fob, beda rua rudou ah keingg rot oida mar ofoukou onggga rusnok runtunggom skoita Yesus bera ah jeni erek nabi-nabi rungggu rot gij Mar Efeyi Ebsi sis eteb fob.

¹⁷ Rusnok riskemba onggga ringk Yesus ois mar gu Lazarus gij mamu efesi fogora Lazarus efena ebah sons sis fob bera riflesij rot mar insa koma gu rusnok enjgineg ojgomuja.

¹⁸ Jefeda rusnok rufoukou onggga rig rot mar onswos insa koma rija jeskasada rurodosu Yesus tein.

¹⁹ Nou onggga rusnok ebic Farisi rik mar insa koma, beda rusum oskusk rot. Jefeda rua ragot moguma oida, "Mifmin owesa efek ensiri fob, jeska ebeibeyaif rusnok riskemba doska rudou os ruroru Ofa ojgomu!"

²⁰ Rusnok rineya onggga enerek Yahudi guru bera rin jah kota Yerusalem jeskasada rugif gu Allah gij mona onggga Paskah insa koma tein.

²¹ Rua rija skoita Yesus efen oforoka egens onggga ofoka Filipus jeskasada rijeka joug ofa rot Yesus. (Filipus bera onggga ojga jeska kota Betsaida onggga angh gij monuh Galilea.) Rua ragot oida, "Tuan, memef modou os mefesij mar jera Yesus."

²² Beda Filipus agot rot mar insa koma gu Andreas. Noba Andreas jera Filipus gagot rot gu Yesus.

²³ Yesus agot gu rusnok koma oida, "Mona onggga Didif, Rusnok Efesa, disma dedin dufoka onggga aksa eteb bera ensaga fob.

²⁴ Kef erek tenten oida, Didif bera erek marsi gandum efej egens. Erek rusnok rinesah marsi gandum efej koma gij mebi guru, beda marsi angh erek egens ojgomuja. Tina erek risah marsi koma gij mebi, beda marsi koma eja erek ofoukou doska.

²⁵ Jeska osnok egens onggga eita mar onggga ofa esinsa odou os rot gij efen eiteij ah insa kef, beda efen eiteij ah koma emeseiseifa si. Tina osnok egens onggga aha mar rot efen eiteij ah nomnaga jeskaseda ororu Didif, beda ofa emeita eiteij ah onggga efeinah noba onggga ah aibin si.

²⁶ Noba osnok egens onggga odou os ofij Didif, beda ofa ororu Didif ojgomu. Jefeda ofa tein emeker gij monuh nomnaga onggga Didif dimeja gij si. Noba orofosut osnok egens egens onggga ofij Didif, bera Akeina omofra rua rerin rufoka erek aksa tein si.

²⁷ Ebeibeyaif Didif dudou okum eteb. Tina Didif dinagot oida, Akeina buskotu Didif jeska mar okum insa kef guru. Jeska Didif din jeskaseda dita difera okora gij mona insa kef.

²⁸ Noba Didif duis oida, Akeina bita mar onggga omorofra bufoka erek aksa eteb ojgomu." Nou onggga Yesus anggot mar insa koma fob beda oga egens jeska mebaga agot oida, "Didif dinta mar onggga orofra dufoka erek eteb fob. Noba Didif dimeita mar erek insa juens deika si."

²⁹ Rusnok onggga runt jah suma rig oga egens insa koma. Beda rua ragot oida mar insa koma bera erek

moc ogugur. Tina rineya ragot oida mar insa koma bera erek malaikat onnga agot mar skoita Yesus.

³⁰ Beda Yesus agot oida, "Oga insa koma onnga iwa ingg fob bera en jeskaseda ofij iwa fogora imororu mar onnga danggot rot ojgomu. Koma enen jeskaseda ofij Didif guru.

³¹ Mona onnga Allah omofra mar okum eteb keingg rusnok mebif onnga ofogog bera ensaga fob. Ebeibeyaif ofa onnga erek ebirfaga efena ofogog gu mebif bera emesiri gu Allah si.

³² Noba erek rusnok rufra Didif jah skida, beda Didif dumoroun rusnok rufoukou skoita Didif."

³³ Yesus agot mar insa koma jeskaseda orocunc rot oida ai juens beda Ofa emagos tumu mega salib.

³⁴ Beda rusnok rufoukou jah suma ragot oida, "Gij Musa efen buku hukum, Tuhan agot oida Ofa onnga enen erek Kristus bera efena ebah rot ah aibin ojgomuja. Tina Bua banggot oida rusnok rumofra Ofa, Rusnok Efesa, jah skida. Ofa onnga Bua bijeka oida Rusnok Efesa bera erek idu?"

³⁵ Beda Yesus agot gu rua oida, "Didif onnga erek eisa bera dineker jera iwa dektek deika guru. Jefeda iwa icira gij eisa insa koma ojgomuja, beda motkobah onocohun keingg iwa deika guru. Erek iwa icira gij motkobah, beda iwa inejginaga rot monuh onnga iwa inja gij guru.

³⁶ Iwa iroru Didif onnga erek eisa askesi Didif diker gu ifekesa ros jeskaseda iwa ija erek rusnok onnga ringker gij eisa." Nou onnga Yesus emfesij rot mar insa koma fob, beda Ofa eja jeska rusnok koma noba Ofa edemdami esinsa jeska rua.

³⁷ Yesus oncunc rot mar onswos ofoukou jah gu rusnok Yahudi rifelesa, tina rua runoruru Ofa guru.

³⁸ Tina mar insa koma ah jeni erek nabi Yesaya onngu rot gij Mar Efeyi Ebsi sis eteb fob. Ofa onngu rot oida, "Tuhan, memef memfesij rot Bua gu rusnok fob. Noba rua rik rot bebin owesa efek eteb fob, tina runororu moga rot guri."

³⁹ Noba mar onnga Yesaya runngu tein sis fob bera orocunc rot meidu rusnok runororu guru. Ofa onngu rot mar erek kef oida,

⁴⁰ "Allah ontunggom riteij erek ofou jeskaseda rinejginaga rot mar onnga rua rik guru. Noba Ofa of joug rudou efesi jeskaseda rudou enebriyi gij mar guru. Jefeda rua rinen skoita Ofa jeskaseda risma eiteij ah onnga efeinah guru. Noba Ofa onosuna rot rerin mar onnga oska jeska rudou efesi tein guru."

⁴¹ Yesaya onngu rot mar insa koma osok gij Yesus onnga emen gij mona kahma, jeska Allah oncunc rot Yesus efen owesa efek eteb gu Yesaya gij odou efesi sis fob.

⁴² Ebirfager Yahudi rineya rufoukou rudou ororu Yesus tein. Tina rua rimeesa rot rusnok Yahudi onnga ebic Farisi, jefeda rua rinagot rot tomnomna oida rudou ororu Yesus fob guru. Rua rimeesa oida rua onnga ebic Farisi riyahahir joug rua fogora runoira gij Mod Allah deika guru.

⁴³ Rua rudou os oida rerin ruhujir risitit rufoka ojgomu. Noba rua runosujohu rot teinefa Allah esitit rusnok onnga ruroru Ofa rot tenten guru.

⁴⁴ Beda Yesus agot oida, "Osnok egens onnga odou ororu Didif bera ororu Allah onnga ombk Didif tein.

⁴⁵ Noba osnok egens onnga ek Didif bera ek Ofa onnga ombk Didif fob.

⁴⁶ Didif din gu mebif erek eisa jeskaseda rusnok onnga ruroru Didif bera rineker gij motkobah deika guru.

⁴⁷ Osnok egens onnga eg rot dedin duga, tina ofa onororu duga insa koma guru, beda Didif dunocunc ofa erek oska enesi. Jeska Didif dinen gu mebif jeskaseda duga ojga rot idu onnga erek oska guru. Tina Didif din gu mebif jeskaseda duskotu rusnok jeska rerin mar onnga oska.

⁴⁸ Mar egens onnga enjgineg omocunc rot oida rusnok onnga rukoja dedin duga noba runororu Didif guru bera erek oska. Mar egens insa koma bera mar onnga Didif difesij rot gu rusnok. Noba mar onnga Didif difesij rot insa koma bera omorocunc rot rusnok nomnaga rerin rita mar gij mona onnga enja ejgwaga si.

⁴⁹ Mar onnga Didif dumftuftu fob bera enen jeska Didif guru. Jeska dedin Akeina Allah onnga ombk Didif bera ducunc gu Didif rot mar onnga dimefesij jera mar onnga dumoftuftu gu rusnok.

⁵⁰ Noba Didif dijginaga rot oida rusnok risma eiteij ah onnga ah aibin oisouska rudou onnga ororu Allah oga rot tenten ojgomu. Jefeda Didif difesij rot mar onnga Allah oncunc gu Didif fob ojgomu."

13 ¹ Mona eteb egens onnga ofoka Paskah ensaga doida fob. Yesus ejginaga rot oida mona onnga Ofa eja jeska mebif noba oksons skoita efen Meka gu mebaga bera ensaga fob. Ofa odou okora rot efen rusnok onnga runroru Ofa fob. Noba Ofa odou okora rot rua ojgomuja onjoros Ofa anggos tein.

² Yesus jera efen ruforoker riker morototuma jeskaseda rit maat nou motu. Gij mona insa koma

bera Bilis oncunc gu Yudas Iskariot gij odou efesi jeskaseda ekikif jeska Yesus.

³ Yesus ejginaga rot oida Allah eita owesa efek gu Ofa jeskaseda otunggom mar onnga Ofa esinsa odou os rot ojgomu. Noba Ofa ejginaga rot oida Ofa en jeska Allah gij mona onnga sismeni, noba ai juens beda Ofa omoksons skoita Allah deika si.

⁴ Jefeda askesi rua rint maat morototuma, beda Yesus ot noba osuwa meifeti onnga Ofa ergi esij efen meisoufa. Beda Ofa eita handuk noba erajgej joug okum ofoj.

⁵ Beda Ofa otkinaja mei gij mongkei mos egens. Beda Ofa era mei insa koma orot efen ruforoker raki. Beda Ofa era handuk insa koma orosuna mei jeska raki.

⁶ Nou onnga Ofa omot Petrus aki tein, beda Petrus agot oida, "Tuhan, enadaij nou Bua but dedin daki erek koma guru."

⁷ Beda Yesus oroun gu ofa oida, "Ebeibeyaif budou enebriyi gij rot mar meidu fogora Didif dut bebin baki erek kef enesi. Tina gij mona kahma beda budou emebriyi gij si."

⁸ Beda Petrus agot oida, "Tuhan guru. Bua bunot dedin daki jinaga guru." Beda Yesus oroun oida, "Erek Didif dunot bebin baki guru, beda bua binerek dedin oforoka egens guru."

⁹ Beda Petrus agot oida, "Tuhan, erek koma jefeda bunot bebin baki ojgomu guru. Tina Bua but dedin ditma jera dibirfaga nomnaga tein."

¹⁰ Beda Yesus agot oida, "Nou onnga osnok egens osiomu gij mei fob, beda efen efaga bera erek eskeira fob. Dansusk beda ofa ocosu rot ot efen aki ojgomu.

Iwa bera erek eskeira fob, tina osnok egens eneya jeska iwa bera eneskeira guru."

¹¹ Yesus ejginaga rot idu onnga engker gu rifelesa onnga emekikif jeska Ofa. Jefeda Ofa agot erek insa koma oida osnok egens eneya jeska rua bera eneskeira guru.

¹² Nou onnga Ofa ot rua insa koma rerin raki oisa fob, beda Ofa ergi efen meifeti esij meisoufa deika. Beda Ofa eker sons gu meja. Beda Ofa ejeka gu rua oida, "Iwa idou ebriyi gij mar onnga Didif duntunggom insa koma nou iwa fob ei?"

¹³ Iwa ijeka Didif erek Akeina noba erek Guru noba erek Tuhan tein. Noba mar koma onnga iwa ijeka Didif bera erek tenten ojgomu. Didif bera erek Guru jera Tuhan.

¹⁴ Jefeda erek Didif, onnga yeyin Guru jera Tuhan, dui keingg dudou efesi fogora dufij iwa erek insa koma, beda iwa tein yuin keingg idou efesi fogora imofijma tein ojgomu.

¹⁵ Didif duntunggom mar insa koma erek orocunc nou iwa jeskaseda iwa tein ita mar erek insa koma moguma.

¹⁶ Kef erek tenten oida osnok egens onnga ofij efen ebirfaga bera efen ofoka enaksa ekirsa jeska ebirfaga efen ofoka guru. Noba osnok egens onnga efesij mar nou efen ebirfaga bera efen ofoka enaksa ekirsa jeska ebirfaga onnga obk ofa efen ofoka guru.

¹⁷ Erek iwa idou ebriyi gij mar insa koma efen ofou beda iwa itunggom mar morototuma erek Didif duntunggom fob ojgomu. Beda iwa imesma oufamofa eteb rot si.

¹⁸ Mar onnga Didif dimfesij insa kef bera nou iwa nomnaga guru. Didif dijginaga rot idu onnga Didif

duncunc fob. Tina mar onnga runngu gij Mar Efeyi Ebsi sis fob bera ai juens emah gij efera fob si. Mar koma agot oida, 'Osnok egens onnga et maat morototuma jera Didif bera odou engkikif jeska Didif fob.'

¹⁹ Mar insa koma enah gij efera enesi. Tina Didif difesij rot mar insa koma gu iwa ebeibeyaif jeskaseda gij mona onnga iwa ingk rot mar insa koma fob, beda iwa idou omororu rot tenten oida Didif bera Kristus onnga emen si.

²⁰ Kef erek tenten oida, rua onnga ruroun osnok egens onnga Didif dumbk fob, beda koma erek rua ruroun Didif tein. Noba rus onnga ruroun Didif, beda koma erek rua ruroun Allah onnga ombk Didif tein."

²¹ Nou onnga Yesus anggot mar insa koma fob, beda Ofa odou okum eteb. Beda Ofa agot rot tomnomna gu efen ruforoker jah suma oida, "Didif dudou os dagot gu iwa rot oida osnok egens jeska iwa ifekesa bera emekikif jeska Didif."

²² Beda Yesus efen ruforoker insa koma rimeyajgema rot rudou onnga eineina gij, jeska rua rinejginaga rot koisoisa osok gij idu onnga Yesus emfesij rot guru.

²³ Didif, onnga Yesus efen oforoka egens onnga Ofa odou okora rot bera dingker desi Ofa.

²⁴ Noba Simon Petrus agot mar ohunhunu gu didif jeskaseda didif dijeka Yesus rot idu insa koma onnga emekikif jeska Ofa.

²⁵ Jefeda didif dagot gu Yesus oida, "Tuhan, idu bera onnga emekikif jeska Bua?"

²⁶ Beda Yesus agot oida, "Didif dimec roti kef gij mok osku. Noba Didif dimeita roti kef gu ofa onnga odou emekikif jeska Didif." Beda Yesus eita roti noba

ec roti insa koma gij mok osku. Beda Ofa eita roti koma gu Yudas Iskariot, onga Simon efen efesa.

²⁷ Nou onga Yudas eita roti insa koma jeska Yesus, beda ainsa koma tein Bilis oira gij efen odou efesi. Beda Yesus agot gu ofa oida, "Mar onga ai juens bua bumotunggom bera butunggom koma rot ebeirens ojgomu."

²⁸ Memef nomnaga onga mengker jah suma jera Yesus modou enebriyi gij mar onga Ofa anggot insa koma gu Yudas enesi.

²⁹ Yudas bera onga ont joug mefmen fifi. Jefeda rineya jeska memef rusujohu rot oida Yesus obk Yudas jeskasada engk maat nou mona onga Paskah, era obk ofa jeskasada ekeba fifi gu rusnok onga rufojingki.

³⁰ Yudas eita roti insa koma onga Yesus ec gij mok osku noba eita gu ofa. Beda ofa eja ebeirens jeska rua. Noba erek motu fob.

³¹ Nou onga Yudas eja jeska rua fob, beda Yesus agot oida, "Ebeibeyaif rusnok rumofra Didif, Rusnok Efesa, dedin dufoka erek aksa eteb. Noba rusnok rumofra Allah efen ofoka erek aksa eteb oisouska mar onga ai juens Didif dumotunggom.

³² Noba erek rusnok rumofra Allah ofoka erek aksa eteb oisouska mar onga Didif dumotunggom, beda erek koma tein Allah omofra Didif, efen efesa, dufoka erek aksa eteb oisouska esinsa efen owesa efek ojgomu. Noba gij mona onga estir deika beda Ofa omotunggom mar insa koma tein si."

³³ Beda Yesus agot gu efen ruforoker oida, "Edeser, ai juens bera Didif dimeja jeska iwa. Iwa imohca Didif, tina iwa inek Didif guru. Didif dimfesij rot mar

insa koma gu ebirfager Yahudi fob. Noba ebeibeyaif Didif difesij rot mar insa koma gu iwa tein.

³⁴ Didif dagot rot mar onnga efeinah gu iwa erek kef oida, iwa idou omokorema moguma ojgomuja. Iwa idou omokorema morototuma erek Didif duncunc dudou onnga okora rot iwa tein fob.

³⁵ Jeska erek iwa ita idou onnga omokorema, beda rusnok enjgineg rimejginaga rot tenten oida iwa bera erek dedin ruforoker si."

³⁶ Erek koma beda Simon Petrus ejeka gu Yesus oida, "Tuhan, Bua bija jah guaidu?" Beda Yesus oroun oida, "Monuh onnga Didif dimeja gij ebeibeyaif bera bua bunoruru Didif jah suma guru. Tina gij mona kahma beda bua bumoruru Didif jah suma si."

³⁷ Beda Petrus ejeka gu Yesus oida, "Tuhan, teinefa fogora enadaij nou didif dururu Bua jah suma ebeibeyaif guru? Jeska didif dinsejah gij dudou efesi jeskaseda dagos morototuma jera Bua."

³⁸ Beda Yesus oroun gu ofa oida, "Bua bagot oida binsejah gij budou efesi jeskaseda bagos morototuma jera Didif fob. Tina onnga tenten bera, erek mongkukar orna onoga nou motu insa kef rot ofosma egeka enesi, beda bua bisinsa bumorot keingging rot ofosma egeka gu rusnok oida bua binejginaga rot Didif guru."

14 ¹ Erek koma beda Yesus agot gu efen ruforoker oida, "Iwa idou onokumkum rot mar onnga Didif dimfesij insa koma gu iwa guru. Tina ita idou onnga oruru Allah jera Didif rot tenten ojgomu.

² Akeina efen mod onnga eteb doska. Noba mod koma efen morongsu ofoukou doska tein. Noba Didif dimeja okag rot iwa jah suma jeskaseda disejah morongsu egens nou iwa. Nou onnga Didif dinsejah

mar nomnaga nou iwa fob, beda Didif dumoksons skoita iwa. Beda Didif dumoroun iwa sons jah suma jeskaseda iwa tein ifaga ouka morototuma jera Didif. Didif difesij rot mar insa koma ebeibeyaif, jeska mar insa koma bera erek tenten ojgomu.

³(14:2)

⁴Noba iwa ijginaga rot moroju onnga eja suma fob."

⁵Beda Tomas agot gu Yesus oida, "Tuhan, memef menejginaga rot monuh onnga Bua binja gij enesi. Jefeda memef mejginaga rot moroju onnga eja jah suma erek teinefa?"

⁶Beda Yesus oroun oida, "Didif bera onnga erek moroju. Didif bera onnga tenten. Noba Didif bera onnga dita eiteij ah onnga efeinah gu rusnok tein. Noba rusnok rururu moroju egens koma skoita Allah oisouska Didif ojgomu.

⁷Iwa ijginaga rot Didif erek tenten fob. Jefeda iwa ijginaga rot dedin Akeina tein erek tenten fob. Koma tenten, jeska ebeibeyaif iwa ik Didif fob, jefeda koma erek iwa ijginaga rot Ofa tein fob."

⁸Beda Filipus agot gu Yesus oida, "Tuhan, bucunc Mekeb Allah gu memef, beda modou eskeira rot koma ojgomu."

⁹Tina Yesus agot oida, "Filipus, Didif dingker jera iwa rot mona onnga dektek fob, tina bua binejginaga rot Didif enesei. Osnok egens onnga ek Didif fob bera ek Akeina Allah fob tein. Jefeda teinefa fogora bua bagot gu Didif oida, bucunc Akeina Allah gu iwa erek komo.

¹⁰Erek budou onoruru rot oida Didif jera dedin Akeina bera erek egens gurei. Mar onnga Didif dimfesij gu iwa enen jeska Didif disinsa ojgomu guru.

Tina mar insa koma bera en jeska Akeina onnga engker morototuma jera Didif, noba onnga agot mar oisouska Didif.

¹¹ Erek Didif dagot rot oida Didif jera dedin Akeina bera erek egens ojgomu, beda iwa ita idou onnga ororu mar insa koma rot tenten ojgomu. Era ita idou onnga ororu mar insa koma jeska iwa ingk mar onswos ofoukou onnga Didif duncunc rot gu rusnok fob.

¹² Kef erek tenten oida, osnok egens onnga ororu Didif rot tenten fob bera omotunggom mar morototuma erek Didif duntunggom fob si. Noba rua onnga rudou ororu mar insa koma bera rumotunggom mar onnga eteb ekirsa jeska mar onnga Didif duntunggom fob si. Jeska Didif dimeja skoita dedin Akeina.

¹³ Noba erek iwa irejgei Didif rot mar oisouska dedin dufoka, beda Didif dimeita mar insa koma nou iwa si. Didif dimeita mar insa koma nou iwa jeskaseda rusnok rumofra Allah ofoka erek aksa eteb.

¹⁴ Erek iwa irejgei Didif rot mar meidu ojgomu, beda Didif dimeita mar insa koma nou iwa si."

¹⁵ Erek koma beda Yesus agot deika oida, "Erek iwa idou okora rot Didif erek tenten, beda iwa imotunggom mar onnga Didif danggot rot si.

¹⁶ Didif dumois gu Allah beda Ofa omobk mar egens enjineg jeskaseda ofij iwa. Mar insa koma bera Efena Ebsi Allah onnga omocunc rot mar onnga tenten gu iwa gij idou efesi. Ofa bera eker jera iwa rot mona onnga ah aibin ojgomuja. Rusnok mebif runororu Ofa guru, jeska rua rinek Ofa noba rua rinejginaga rot Ofa guru. Tina iwa ijginaga rot Ofa,

jeska Ofa eker jera iwa ebeibeyaif. Noba Ofa emeker gij idou efesi tein ojgomuja.

¹⁷ (14:16)

¹⁸ Didif dinaha iwa jah guru erek ruforokai onnga rerin meka jera mosu guru. Tina Didif dumoksons skoita iwa si.

¹⁹ Gij mona onnga dektek deika guru, beda rusnok mebif rinek Didif deika guru. Tina iwa imek Didif si. Jeska erek Didif disma eiteij ah onnga efeinah beda iwa imesma eiteij ah onnga efeinah tein si.

²⁰ Gij mona insa koma iwa imejginaga rot tenten oida Didif jera Akeina bera erek egens, noba iwa jera Didif bera erek egens tein.

²¹ Rusnok onnga rijginaga rot mar onnga Didif danggot rot, noba rua rugif gu mar insa koma tein, rua bera onnga rudou okora rot Didif erek tenten. Beda dedin Akeina odou omokora rot rua onnga rudou okora rot Didif. Didif dudou okora rot rua tein, beda Didif dumocunc disinsa gu rua si."

²² Erek koma beda Yudas (Yudas onnga toga jeska Yudas Iskariot) agot oida, "Tuhan, Bua bumocunc bisinsa skoita memef, tina Bua bunocunc bisinsa skoita rusnok enjgineg guru. Koma rot meidu?"

²³ Beda Yesus oroun oida, "Erek rusnok rudou okora rot Didif, beda rua rumororu mar onnga Didif dumftuftu fob si. Beda dedin Akeina odou omokora rot rua. Beda Ofa jera Didif mamen skoita rua, noba maker jera rua.

²⁴ Rusnok onnga rudou onokora rot Didif guru, rua bera runororu mar onnga Didif dumftuftu rot guru. Noba mar insa koma onnga Didif dumftuftu rot bera enen jeska Didif guru, tina mar insa koma bera en jeska Akeina onnga ombk Didif fob.

²⁵ Didif difesij mar insa koma nomnaga askesi diker morototuma jera iwa ros.

²⁶ Tina gij mona kahma beda Ofa onggga emen jeskaseda ofij iwa bera omoftuftu rot mar nomnaga gu iwa. Noba Ofa omofij iwa jeskaseda idou ah keingg rot mar nomnaga onggga Didif dumftuftu rot gu iwa sis fob si. Ofa insa koma onggga omofij iwa bera Efena Ebsi onggga Akeina omobk oisouska dedin dufoka.

²⁷ Didif dimeita idou efesi erek eskeiramera eteb. Noba eskeiramera onggga angh gij dudou efesi bera emen jeska Didif tein si. Didif dineita idou onggga eskeiramera insa koma gu iwa morototuma erek rusnok mebif rita rudou onggga eskeiramera gu rusnok enjgineg guru. Jefeda iwa ineita idou efesi onggga okum era emeesa rot mar guru.

²⁸ Iwa ingg Didif dagot fob oida Didif dimeja jeska iwa, tina Didif dumoksons skoita iwa deika si. Ere iwa idou okora rot Didif erek tenten, beda idou eskeira rot oida Didif dumoksons skoita dedin Akeina ojgomu. Jeska Ofa bera efen ofoka onggga aksa ekirsa jeska Didif.

²⁹ Mar insa koma enen enesi, tina Didif dagot rot mar insa koma gu iwa ebeibeyaif jeskaseda gij mona onggga Didif dinja jeska iwa fob, beda idou emah keingg rot mar insa koma fogora imororu Didif rot tenten si.

³⁰ Didif dinefesij mar gu iwa rot dektek deika guru, jeska ofa onggga efen owesa efek erek ebirfaga efena ofogog gu mebif bera doida ensaga fob. Noba ofa efen owesa efek egema tein jeskaseda ofoka ereij keingg Didif jinaga guru.

³¹ Tina ofa en jeskaseda rusnok mebif rijginaga rot fob oida Didif dudou okora rot dedin Akeina. Jefeda Didif dumotunggom mar jeni erek Akeina anggot gu Didif rot sis fob si. Mimif minja ebeibeyaif."

15 ¹ Erek koma beda Yesus agot deika oida, "Didif bera erek mofun efaga mosu onggga tenten, noba Akeina Allah, onggga ot joug mofun insa koma, bera erek osnok egens onggga ef mar gij mekeni.

² Noba orofosutut mofun efen efetma onggga enefek jinaga guru bera Ofa eyah jeska beda eij jeska ojgomu. Noba orofosutut mofun efetma onggga efen efek fob bera Ofa eseda efetma koma deci deci jeskaseda mofun efetma insa koma eskeira nomnaga. Noba gij mona kahma beda mofun efen efetma insa koma efen efek erek ekirsa deika.

³ Noba erek koma tein yeyin idou efesi erek eskeira fob tein. Noba koma bera en oisouska mar onggga Didif dumftuftu gu iwa fob.

⁴ Noba mofun efen efetma onggga angh gu esinsa bera efen efek jinaga guru. Tina erek mofun efen efetma ebiedi jera mofun ebic enjgineg ojgomu, beda efen efek ofoukou. Erek koma tein nou iwa. Erek idou eja erek egens jera Didif, beda Didif dimeja erek egens jera iwa. Beda iwa imek mar onggga oufamofa gij yeyin iteij ah. Tina guru, beda inek mar onggga oufamofa gij yeyin iteij ah guru.

⁵ Didif bera erek mofun efaga mosu, noba iwa bera erek mofun efen efetma tein. Noba erek rusnok rita rudou onggga egens jera Didif noba Didif dita dudou onggga erek egens jera rua, beda rua rimek oufamofa eteb gij rerin riteij ah si. Jeska erek rudou eneja egens jera Didif guru, beda enadajj nou rua rik mar onggga oufamofa gij rerin riteij ah guru.

⁶ Noba rua onnga rudou eneja erek egens jera Didif guru, beda Allah emejij rua jeska erek rusnok rij mofun efen efetma onnga ebriyi fob jeska. Mofun efen efetma insa koma eja erek ofora, noba rusnok ruhoturu mofun efen efetma insa koma beda rij gij mah fogora et noba eribseb nomnaga ojgomu.

⁷ Iwa ita idou onnga egens jera Didif ojgomuja, noba dedin duga bera angh gij idou efesi tein ojgomuja. Beda iwa irejgei Didif rot mar meidu onnga idou os rot ojgomu. Beda Didif dimeita mar insa koma gu iwa si.

⁸ Erek rusnok rik rot yeyin ita mar onnga oufamofa gij iteij ah kef, beda rua rumofra Allah ofoka erek aksa eteb rot. Noba koma bera onnga orocunc rot oida iwa iroru Didif rot tenten fob.

⁹ Didif dudou okora rot iwa morototuma erek Akeina odou okora rot Didif. Iwa iroru mar onnga Didif dumftuftu gu iwa fob jeskaseda Didif ducunc dudou onnga okora rot iwa ojgomuja.

¹⁰ Didif duroru mar onnga Allah anggot rot gu Didif fob, noba Ofa ocunc odou onnga okora rot Didif ojgomuja. Erek koma tein, erek iwa iroru mar nomnaga onnga Didif danggot rot gu iwa fob, beda Didif dumocunc dudou onnga okora rot iwa ojgomuja.

¹¹ Didif dimfesij rot mar insa koma nomnaga gu iwa fob jeskaseda iwa ita idou onnga erirei eteb rot morototuma erek Didif dudou erirei eteb tein. Beda yeyin idou emefaga ouka erek eteb ekirsa rot ojgomuja.

¹² Mar egens onnga Didif dagot rot gu iwa bera erek kef oida, iwa ita idou onnga omokorema morototuma erek Didif dudou okora rot iwa.

¹³ Erek osnok egens agos nou efen mohujir, beda mar egens koma bera orocunc erek ekirsa jeska mar nomnaga rot oida ofa odou okora eteb rot efen mohujir insa koma.

¹⁴ Noba erek iwa ita mar onnga Didif danggot rot gu iwa fob, beda koma omorocunc rot oida iwa bera erek dedin edohujir onnga tenten.

¹⁵ Didif dinejeka iwa erek rusnok onnga rufij rerin ebirfaga deika guru. Jeska rusnok onnga rufij rerin ebirfaga bera rinejginaga rot mar onnga ofa otunggom guru. Tina Didif dijeka iwa erek dedin edohujir ojgomu. Jeska Didif dimfesij rot mar nomnaga onnga Didif dingg jeska Akeina gu iwa fob.

¹⁶ Iwa inocunc Didif erek yeyin ihuj egens guru. Tina Didif bera onnga duncunc iwa erek dedin edohujir fob. Noba Didif dubk iwa jeskaseda ija noba itunggom mar onnga oufamofa gij yeyin iteij ah kef. Mar onnga oufamofa insa koma bera emah rot mona onnga ah aibin ojgomuja. Beda gij mona onnga iwa irejgei mar gu Allah oisouska dedin dufoka, beda Ofa emeita mar insa koma gu iwa si.

¹⁷ Mar egens onnga Didif dagot rot gu iwa bera oida, iwa ita idou onnga omokorema ojgomuja."

¹⁸ Erek koma beda Yesus efesij deika gu efen ruforoker oida, "Erek rusnok mebif rudou oska rot iwa, beda idou ah keingg rot oida sismeni bera rudou oska rot Didif fob.

¹⁹ Erek iwa ita idou onnga egens jera rusnok mebif, beda rua rudou okora rot iwa tein morototuma erek rudou okora rot rusnok enjgineg onnga mebif efen. Didif duncunc iwa fob jeskaseda ineja erek egens jera rusnok mebif deika guru. Jefeda ebeibeyaif rusnok mebif rudou oska rot iwa tein.

²⁰ Iwa idou ah keingg rot mar onnga Didif danggot sis fob oida, osnok egens onnga ofij efen ebirfaga bera onofoka aksa ekirsa jeska efen ebirfaga insa koma guru. Jefeda erek koma tein, erek rusnok rutunggom mar onnga oska gu Didif onnga direk yeyin ebirfaga, beda rua rumotunggom mar onnga oska skoita iwa tein si. Noba erek rusnok ruroru mar onnga Didif duftuftu fob, beda rua rumororu mar onnga iwa yuftuftu tein si.

²¹ Rua rimeita mar insa koma nomnaga gu iwa jeska iwa bera erek dedin rusnok onnga ruroru Didif fob. Jeska rua rinejginaga rot Ofa onnga ombk Didif fob guru.

²² Erek Didif dinen jeskaseda difesij mar gu rua guru, beda rerin mar onnga oska enah gu rua tein guru. Tina Didif dimfesij mar gu fob, noba rua rukoja rot mar insa koma ojomu. Jefeda rerin mar onnga oska enah gu rua ojomuja.

²³ Noba osnok egens onnga odou oska rot Didif, beda ofa tein odou oska rot dedin Akeina.

²⁴ Didif duntunggom mar onswos ofoukou gu rifelesa fob. Rusnok enjgineg runotunggom mar erek insa koma jinaga guru. Noba erek Didif duntunggom mar insa koma guru, beda rerin mar onnga oska enah gu rua ojomuja guru. Tina rua ringk mar insa koma onnga Didif duntunggom fob. Erek koma tina rua rudou oska rot Didif jera dedin Akeina tein ojomu.

²⁵ Erek koma tina rua rita mar erek insa koma ojomu jeskaseda mar onnga nabi runggu gij Mar Efeyi Ebsi sis eteb fob bera emah gij efera si. Mar onnga runggu rot bera oida, 'Didif dineita mar egema tein onnga oska fogora rudou oska rot Didif guru, tina rudou oska rot Didif ojomu.'

²⁶ Didif dumobk Ofa onnga omofij iwa si. Ofa emen jeska dedin Akeina. Ofa bera Efena Ebsi onnga ocunc rot mar onnga tenten gij rusnok rudou efesi. Ofa bera Akeina Allah Efena Ebsi. Gij mona onnga Ofa ensaga fob, beda Ofa omocunc rot mar onnga tenten osok gij Didif.

²⁷ Beda iwa ifesij mar onnga tenten osok gij Didif gu rusnok enjineg tein. Jeska gij mona onnga Didif duncunc iwa erek dedin ruforoker onjoros deisef tein bera iwa iroru Didif ojomuja fob.

16 ¹ Didif dimfesij rot mar insa koma nomnaga gu iwa fob jeskaseda idou enesiri rot guru.

² Jeska gij mona kahma bera rusnok rumokoja iwa fogora inoira gij mod onnga rusnok rum riteij gu Allah gij deika guru. Koma tenten, jeska gij mona kahma bera rusnok rimagob rineya jeska iwa. Noba rua rumosujohu rot oida mar insa koma erek rumofij Allah.

³ Rua rimeita mar erek insa koma jeska rua rinejginaga Allah rot tenten guru. Noba rua rinejginaga Didif rot tenten tein guru.

⁴ Didif difesij rot mar insa koma gu iwa ebeibeyaif jeskaseda gij mona onnga iwa ik mar insa koma, beda iwa idou emah keingg rot oida Didif dinsisi joug iwa rot mar insa koma." Beda Yesus agot gu efen ruforoker deika oida, "Gij mona onnga sismeni bera Didif dinefesij gu iwa osok gij mar okum onnga rusnok rimeita gu Didif enesi. Jeska gij mona insa koma onjoros mona deisef tein bera Didif diker jera iwa ojomuja.

⁵ Tina ebeibeyaif Didif duksons skoita Ofa onnga ombk Didif jah sif sis fob. Tina iwa inejeka gu Didif rot monuh onnga Didif dimeja gij guru.

⁶ Noba ebeibeyaif idou okum noba okora tein jeska Didif dimfesij rot mar insa koma gu iwa fob.

⁷ Tina erek Didif dija jeska iwa beda koma bera omofij iwa ojgomu. Jeska gij mona onggga Didif dinja fob, beda Didif dumobk Ofa onggga omofij iwa si. Noba erek Didif dineja jeska iwa guru, beda Ofa onggga omofij iwa bera enen guru.

⁸ Noba gij mona onggga Ofa onggga omofij iwa ensaga fob, beda Ofa omocunc gu rusnok mebif rot tenten oida rerin mar onggga oska ros. Ofa omoftuftu rua rot oida rerin mar onggga oska ros, noba rot teinefa Allah omofra mar okum eteb keingg rusnok rot rerin mar onggga oska si.

⁹ Ofa omocunc gu rusnok mebif rot oida rerin mar onggga oska ros, jeska rua runororu Didif enesi.

¹⁰ Ofa omocunc gu rua oida rusnok risma rudou onggga efen mar onggga oska oskiyai tein guru, jeska Didif dija skoita Allah. Beda rusnok rinek Didif deika guru.

¹¹ Noba Ofa omocunc gu rusnok oida Allah omofra okum keingg rusnok onggga rerin mar onggga oska ros si. Jeska Ofa omofra mar okum keingg Bilis, onggga ebirfaga efena ofogog onggga angh gu mebif fob.

¹² Didif dudou os dagot mar deika gu iwa, tina mar koma omorotunggom idou efesi erek okum ekirsa rot, jefeda dinagot rot mar insa koma enesi.

¹³ Tina gij mona onggga Ofa onggga omofij iwa en fob, beda Ofa omocunc gu iwa rot mar onggga iwa imotunggom si. Jeska Ofa bera Efena Ebsi onggga orocunc rot mar onggga tenten. Ofa onocunc rot mar onggga en jeska Ofa esinsa guru. Tina Ofa emagot rot mar onggga Ofa engg jeska Didif fob. Beda Ofa

omocunc gu iwa gij idou efesi rot mar onggga emen gij mona kahma si.

¹⁴ Ofa omorocunc rot dedin dufoka onggga aksa, jeska Ofa emeg rot mar onggga Didif danggot fob, beda Ofa omocunc rot mar insa koma gu iwa gij idou efesi tein si.

¹⁵ Didif dagot rot mar insa koma onggga Efena Ebsi omocunc gu iwa jeska, mar nomnaga onggga Akeina efen bera Didif tein dedin."

¹⁶ Erek koma beda Yesus agot oida, "Erek dektek guru, beda iwa inek Didif deika guru. Noba gij mona onggga estir, beda iwa imek Didif deika si."

¹⁷ Beda rineya jeska Yesus efen ruforoker ragot moguma oida, "Mar onggga Ofa anggot insa koma bera efen ofou erek meidu? Mimif mudou enebriyi gij guru. Jeska Ofa agot oida, 'Erek dektek guru, beda iwa inek Didif deika guru. Noba gij mona onggga estir, beda iwa imek Didif deika si.' Noba Ofa tein agot oida, 'Erek koma jeska Didif dija skoita dedin Akeina.' Mar insa koma tein efen ofou erek meidu?"

¹⁸ Noba rua rijeka moguma oida, "Ofa tein agot oida, 'Gij mona onggga estir ojgomu.' Mimif mudou enebriyi gij mar insa koma efen ofou tein guri."

¹⁹ Yesus ek rot oida efen ruforoker rudou os rijeka joug Ofa rot mar insa koma efen ofou. Jefeda Ofa agot gu rua oida, "Iwa ijeka joug moguma rot mar onggga Didif danggot insa koma oida, gij mona onggga dektek guru, beda iwa inek Didif deika guru. Noba gij mona onggga estir beda iwa imek Didif deika si.

²⁰ Ongga tenten bera, gij mona insa koma beda iwa imebisa rot noba idou omokumkum eteb rot, tina rusnok mebif rudou emefaga ouka eteb rot tein. Iwa

idou omokumkum rot, tina gij mona kahma deika beda idou emerirei eteb rot.

²¹ Nou onnga ojaga egens engker rot efen efesa, beda ofa otkonu okora eteb rot. Jeska mona onnga efen efesa omojuj jeska ofa bera ensaga fob. Tina gij mona onnga eferetefa insa koma onjuj jeska ofa fob, beda ofa onosujohu eteb rot otkonu onnga okora insa koma deika guru. Jeska ebeibeyaif ofa odou eskeira eteb rot efen eferetefa insa koma fob.

²² Erek koma rot iwa tein. Ebeibeyaif idou okum rot jeska Didif dimeja jeska iwa. Tina Didif dimek iwa deika si. Beda gij mona insa koma idou emerirei eteb rot si. Noba enadaj nou rusnok enjgineg rutunggom mar skoita iwa fogora idou okum deika jinaga guru.

²³ Gij mona insa koma bera enadaj nou iwa irejgei Didif rot mar deika guru. Jeska onnga tenten bera iwa imerejgei rot mar teisis skoita Allah oisouska dedin dufoka ojgomu. Beda Ofa emeita mar meidu onnga iwa irejgei Ofa rot si.

²⁴ Onjoros mona deisef tein bera iwa inerejgei Allah rot mar oisouska dedin dufoka enesi. Tina ebeibeyaif iwa imerejgei rot mar ojgomu, beda Ofa emeita mar insa koma gu iwa jeskaseda idou emerirei erek eteb ekirsa rot ojgomuja."

²⁵ Beda Yesus agot deika gu efen ruforoker oida, "Didif dira mar orocunc jeskaseda difesij rot mar insa koma nomnaga gu iwa fob. Tina gij mona kahma beda Didif dinera mar orocunc jeskaseda difesij mar gu iwa deika guru. Didif dimera oga erek giskini jeskaseda difesij mar gu iwa osok gij Akeina.

²⁶ Gij mona insa koma beda iwa isinsa imerejgei Akeina rot mar ofoukou oisouska dedin dufoka. Didif disinsa dinerejgei mar gu Allah nou iwa deika guru.

²⁷ Akeina Allah esinsa odou okora eteb rot iwa. Ofa odou okora eteb rot iwa jeska iwa idou okora rot Didif, noba iwa idou ororu rot oida Didif din jeska Ofa fob.

²⁸ Didif din gu mebif jeska Akeina. Noba ebeibeyaif Didif dimeja jeska mebif noba duksons skoita Akeina."

²⁹ Beda Yesus efen ruforoker ragot oida, "Ebeibeyaif Bua bagot mar gu memef rot buga onnga giskini ojgomu. Jeska Bua binera mar onnga erek orocunc rot deika guru.

³⁰ Bua bijginaga rot mar onnga memef modou os mejeka rot gu Bua fob. Jefeda enadaj nou memef mejeka mar gu Bua deika guru. Jeska ebeibeyaif memef modou ejginaga rot koisoisa oida Bua budou ebriyi gij mar nomnaga fob. Koma bera orofij memef jeskaseda modou ororu rot tenten oida Bua bin jeska Allah fob."

³¹ Beda Yesus oroun gu rua oida, "Jefeda ebeibeyaif iwa iroru Didif rot tenten fob ei?

³² Iwa ig mar kef rot koisoisa fog oida, gij mona kahma beda iwa imemekebema. Iwa egens egens imoksons jah yeyin mod. Iwa imaha Didif jah ojgomu. Tina gij mona insa koma beda Didif dineker gu disinsiyai guru, jeska Allah bera eker morototuma jera Didif ojgomuja.

³³ Didif dimfesij mar insa koma gu iwa jeskaseda iwa ita eiteij ah onnga eskeiramera. Iwa imesma ifera okora jeska rusnok mebif si. Tina yuku ifos rot ojgomu, jeska rusnok mebif rerin owesa efek bera ensiri gu Didif fob."

17¹ Nou onnga Yesus emfesij mar insa koma nomnaga gu efen ruforoker fob, beda Ofa eyajga gu mebaga noba om eiteij gu Allah. Ofa

agot oida, "Akeina, dedin mona eimofoj adaij nou jeskaseda dagos bera ensaga fob. Bufra dedin dufoka erek aksa eteb jeskaseda dumofra bufoka erek aksa eteb tein.

² Bua bita owesa efek onnga ekirsa jeska rusnok nomnaga rerin gu Didif fob. Bua bita dufoka erek insa koma fob jeskaseda Didif, onnga bebin ebesa, dimeita eiteij ah onnga ah aibin gu rusnok onnga Bua buroun skoita Didif erek dedin ruforoker fob.

³ Noba erek rusnok rijginaga rot Bua onnga erek Allah egens onnga tenten fob, noba rua rijginaga rot Didif Yesus Kristus, onnga Bua bumbk sis fob tein. Koma bera onnga ereita eiteij ah onnga ah aibin gu rua.

⁴ Didif dumfra bebin bufoka erek aksa oisouska mar nomnaga onnga Didif duntungom gu mebif fob. Jeska Bua bera onnga bumbk Didif gu mebif sis fob.

⁵ Akeina, ebeibeyaif Didif dimen skoita Bua. Jefeda Didif duis gu Bua jeskaseda Bua bucunc rot dedin dufoka onnga aksa skoita rusnok mebif. Bufra dedin dufoka aksa morototuma erek nafnan nafoka onnga aksa gij mona onnga Bua bunotungom mebif enesi.

⁶ Didif dumftuftu mar osok gij Bua gu dedin ruforoker insa koma onnga Bua buncunc nou Didif sis fob. Noba Bua bita rua insa koma gu Didif fob. Rua bera rugif gu dedin duga fob.

⁷ Noba ebeibeyaif rua rijginaga fob rot oida mar nomnaga onnga Bua bita gu Didif bera en jeska Bua.

⁸ Didif dimfesij rot mar nomnaga onnga Bua bucunc gu Didif fob. Noba rua ruroru mar insa koma rot tenten fob. Rua rijginaga rot tenten oida Didif din jeska Bua. Noba rua rudou ororu rot tenten oida Bua bera onnga bumbk Didif skoita mebif fob.

⁹ Didif dudou os dum diteij gu Bua nou rua. Tina Didif dunom diteij nou rusnok mebif onnga enjgineg guru. Didif dum diteij gu Bua nou dedin ruforoker insa koma onnga Bua bita gu Didif sis fob ojpgomu. Jeska rua bera onnga Bua buncunc erek bebin rusnok fob.

¹⁰ Mar nomnaga onnga Didif dedin bera erek Bua tein bebin. Noba mar nomnaga onnga Bua bebin bera erek Didif tein dedin. Noba oisouska mar onnga rua rutunggom bera rusnok rimek rot dedin dufoka onnga aksa eteb.

¹¹ Didif dineker gu mebif erek dektek deika guru, tina Didif dimen skoita Bua. Tina dedin ruforoker insa koma rimeker gu mebif ojpgomu. Akeina onnga erek ebsi komowa eteb, Bua but joug rua rot ahais oisouska bebin bufoka onnga efen owesa efek eteb. Bebin bufoka insa koma morototuma erek dedin dufoka onnga Bua bita gu Didif fob. But joug rua jeskaseda rua riker morototuma erek egens ojpgomuja. Koma erek nagef nafnan nadou onnga erek egens tein.

¹² Gij mona onnga Didif dingker jera rua bera Didif dunt joug rua oisouska bebin bufoka onnga efen owesa efek eteb. Bebin bufoka insa koma bera morototuma erek dedin dufoka onnga Bua bita gu Didif sis fob. Didif dunt joug rua insa koma fob, noba osnok egens jeska rua bera eseseifa. Ofa bera onnga emesma okum eteb ojpgomu jeskaseda mar onnga runggu rot ofa gij Mar Efeyi Ebsi sis fob bera ah gij efera fob.

¹³ Ai juens beda Didif dimen skoita Bua. Tina Didif dum diteij rot mar insa koma ebeibeyaif jeskaseda

dedin ruforoker rimesma rudou onnga erirei eteb morototuma erek Didif dudou onnga erirei eteb tein.

¹⁴ Didif dumftuftu mar onnga Bua banggot rot gu rua fob. Noba ebeibeyaif rusnok mebif rudou oska rot rua tein. Koma jeska rudou enerek egens jera rusnok mebif deika guru. Koma morototuma erek Didif onnga dudou enerek egens jera rusnok mebif guru.

¹⁵ Didif dunois gu Bua jeskaseda Bua bufra rua jeska mebif ebeibeyaif guru. Tina Didif duis gu Bua jeskaseda Bua but joug rua jeska Bilis onnga ofogog doska.

¹⁶ Rua rudou enerek egens jera rusnok mebif guru morototuma erek Didif onnga dudou enerek egens jera rusnok mebif tein guru.

¹⁷ Bua bisejah rua rudou efesi erek ebsi komowa oisouska bebin buga onnga tenten. Jeska mar onnga Bua buftuftu rot bera erek tenten ojgomu.

¹⁸ Bua bumbk Didif skoita rusnok mebif sis fob. Noba erek koma tein, ebeibeyaif Didif dumobk rua skoita rusnok mebif.

¹⁹ Didif disejah dudou efesi jeskaseda dufij Bua. Noba koma bera omofij rua tein jeskaseda rua risejah gij rudou efesi fogora rumofij Bua oisouska bebin buga onnga tenten.

²⁰ Didif dum diteij gu Bua nou dedin ruforoker insa koma. Tina Didif dum diteij tein nou rusnok nomnaga onnga rimeg rot mar onnga dedin ruforoker rumftuftu gu rua fogora ruroru Didif tein.

²¹ Akeina, Didif dum diteij gu Bua jeskaseda rua riker erek egens. Koma morototuma erek nagef onnga nadou egens. Noba Didif dum diteij jeskaseda rudou eja erek egens jera nagef tein. Beda rusnok

mebif rudou omororu rot tenten oida Bua bera onggabumbk Didif fob.

²² Didif dita owesa efek gu rua morototuma erek owesa efek onggabua bita gu Didif fob jeskaseda rua riker erek egens ojgomuja. Koma morototuma erek nagef ongganaker erek egens ojgomuja.

²³ Didif dita dudou erek egens jera rua, noba Bua bita budou erek egens jera Didif jeskaseda rua rerin rudou eja erek egens morototuma ojgomuja. Bedarusnok mebib rimejginagarot tenten oida Bua bera onggabumbk Didif gu mebib fob. Noba rua rimejginagarot oida Bua budou okorarot dedin ruforoker insakoma morototuma erek budou okorarot Didif tein.

²⁴ Akeina, Didif dudou os rot oida dedin ruforoker onggabua bita gu Didif fob rimeker morototumajera Didif gij monuh onggadidif dingker gij. Didif dudou os rot oida rua rik dedin dufoka onggaksa eteb jah suma. Bua bera onggabita dufoka onggaksa insakoma gij mona onggabua bunotunggom mebib enesi, jeska Bua budou okorarot Didif.

²⁵ Akeina, Bua bera onggabita mar onggaufamofa. Nobarusnok mebib rinejginagarot Bua guru, tina Didif dijinagarot Bua fob. Noba dedin ruforoker insakoma rijginagarot oida Bua bera onggabubk Didif gu mebib fob.

²⁶ Didif duncunc gu rua rot bebin bita mar fob. Noba Didif dumocunc rot mar insakoma gu rua deika jeskaseda rudou omokorarot rusnok enjgineg morototuma erek Bua budou okorarot Didif. Bedarudou emeja erek egens jera Didif."

18¹ Erekkoma beda nou onggayesus om eitejigugAllah rot mar insakoma fob, beda Ofa

eja morototuma jera efen ruforoker jah mei Kidron enama. Meken i egens onga mega zaitun efeda enah jah suma. Rua riker jah suma.

² Yudas, onga engkikif jeska Yesus fob, ejginaga rot meken i egens insa koma tein, jeska Yesus ena jah suma morototuma jera efen ruforoker erek ofosma ofoukou sis fob.

³ Jefeda Yudas oroun tentarer ebic egens jera rusnok enjgineg tein onga ebirfager imam-imam noba ebirfager Farisi rubk jah suma. Rusnok insa koma rurka mah eisa, jera lampu, jera rerin meiteb aksa tein.

⁴ Yesus ejginaga rot mar nomnaga onga ai juens rumotunggom skoita Ofa. Jefeda Ofa ojordosu rua noba agot gu rua oida, "Iwa bera yuhca idu?"

⁵ Beda rua ruroun gu Ofa oida, "Memef mohca Yesus onga ojga jeska kota Nazaret." Beda Yesus agot gu rua oida, "Didif bera Ofa." (Ainsa koma tein Yudas ot jah suma morototuma jera rusnok insa koma.)

⁶ Nou onga Yesus anggot oida, "Didif bera Ofa," skoita rua, beda rua risesif jah rijmeg noba risiri gu mebif.

⁷ Beda Yesus ejeka gu rua deika oida, "Iwa bera yuhca idu?" Beda rua ragot oida, "Memef mohca Yesus onga ojga jeska kota Nazaret."

⁸ Beda Yesus agot oida, "Didif danggot ainsa koma gu iwa fob oida Didif bera Ofa." Iwa yuhca Didif ojgomu, jefeda isuwa dedin ruforoker kef ojgomu.

⁹ Rua rusuwa Yesus efen ruforoker. Beda mar koma ah jeni erek mar onga Yesus anggot rot sis fob oida, "Rua onga Akeina Allah eita gu Didif bera eneseiseifa guru," koma bera angh gij efera fob.

¹⁰ Erek koma beda gij mona insa koma Simon Petrus orka efen meiteb aksa tein. Jefeda ofa eita efen meiteb eragob osnok egens jeska rusnok onnga rin skoita Yesus insa koma fogora efen osu jah ognosk esiri jeska. Ofa bera osnok egens onnga omfij ebirfaga imam-imam onnga ofoka aksa. (Ofa efen ofoka Malkus).

¹¹ Beda Yesus agot gu Petrus oida, "Bua bisah bebin meiteb ojgomu. Didif dunoku jeska mona eimofoj insa kef onnga dimesma difera okora gij guru. Jeska mar insa kef bera ororu Akeina odou ejginaga rot fob."

¹² Erek koma beda tentarer insa koma jera rerin komandan jera rusnok Yahudi onnga runt joug Mod Allah ragei Yesus gij mekeni insa koma.

¹³ Rua rirakid efen etma beda oroun Ofa skoita imam egens onnga ofoka Hanas. Hanas bera onnga imam egens enjgineg onnga ofoka Kayafas efen mefina. Kayafas bera erek ebirfaga imam onnga ofoka aksa gij tahun insa koma.

¹⁴ Kayafas bera onnga anggot gu ebirfager Yahudi sis fob oida, onnga oufa ekirsa nou rua bera osnok egens agos nou rusnok Israel nomnaga ojgomu.

¹⁵ Erek koma beda Simon Petrus jera didif gotoij Yesus jah ejmeg. Didif dijginaga ebirfaga imam-imam egens koma fob, jefeda didif dutoij Yesus gij momas onnga ah rejrej mod egens onnga imam insa koma engker gij.

¹⁶ Tina Petrus eker jah mebah doida montoj. Beda didif duroгна jeska momas insa koma, noba dagot mar gu ojaga egens onnga ot joug montoj insa koma. Beda didif duroun Petrus gij momas insa koma tein.

¹⁷ Erek koma beda ojaga egens insa koma agot gu Petrus oida, "Bua bera Yesus efen oforoka egens tein ei?" Beda Petrus oroun gu ofa oida, "Erek koma guru."

¹⁸ Motu insa koma erek meifina, jefeda rusnok onggga rumfij imam-imam jera rusnok onggga rut joug imam-imam rukub mah. Noba rua rut rejrej mah efembra insa koma. Petrus ot gu mah efembra insa koma tein.

¹⁹ Erek koma beda ebirfaga imam-imam onggga ofoka aksa ejeka joug Yesus osok gij efen ruforoker noba osok gij mar onggga Yesus oftufu gu rusnok.

²⁰ Beda Yesus oroun gu ofa oida, "Didif dimfesij mar rot tomnomna gu rusnok fob. Didif duftufu mar gij mod onggga rusnok rum riteij gu Allah gij fob, noba Didif dumftufu mar gij Mod Allah tein fob. Rusnok Yahudi rufoukou onggga ruhoturu jah suma bera ringg mar jeska Didif fob. Didif dinefesij mar onggga didemi jeska rusnok enjgineg tein jinaga guru.

²¹ Jefeda iwa ijeka joug Didif rot meidu? Iwa ijeka joug rusnok onggga ringg mar onggga Didif dumftufu fob ojgomu. Rua bera onggga rijginaga rot mar onggga Didif dimfesij fob."

²² Nou onggga Yesus anggot mar insa koma fob, beda osnok egens onggga ofij imam-imam obu Yesus gu osum. Beda ofa agot gu Yesus oida, "Enadaij nou Bua bagot mar rot buga erek koma gu ebirfaga imam-imam onggga ofoka aksa guru!"

²³ Beda Yesus agot gu ofa oida, "Erek Didif danggot mar onggga oska rot, beda bucunc rot ojgomu. Tina enadaij nou bua bubu osnok egens onggga efesij mar onggga tenten guru."

²⁴ Beda imam Hanas insa koma obk Yesus rot efen etma onnga rirakid fob skoita imam Kayafas ojgomu.

²⁵ Erek koma beda askesi Petrus ot gu mah efembra insa koma, beda rusnok jah suma ragot oida, "Bua bera osnok egens onnga ororu Yesus tein ei?" Tina Petrus oroun oida, "Erek koma guru."

²⁶ Osnok egens onnga omfij ebirfaga imam-imam onnga ofoka aksa ot jah suma tein. Ofa efen mokosa onnga Petrus era meiteb eris efen osu fob. Ofa agot gu Petrus oida, "Didif dik bua but morototuma jera Yesus gij mekeni fob."

²⁷ Tina Petrus orot keingging juens deika rot oida mar onnga osnok egens insa koma anggot fob bera erek tenten guru. Beda ainsa koma tein mongkukar orna egens oga fob.

²⁸ Gij rahah tentena beda rusnok insa koma ruroun Yesus jeska Kayafas efen mod skoita Gubernur gij monuh insa koma efen mod. Rua risinsa runoira gij Gubernur efen mod guru. Jeska Gubernur insa koma bera erek rusnok onnga Yahudi guru. Noba ororu rusnok Yahudi rerin agama erebent bera erek rua ruiru gij rusnok onnga Yahudi guru rerin mod, beda koma orotunggom rua erek oska. Beda koma tein eragou joug rua fogora rinet maat jera rusnok Yahudi nou mona eteb onnga ofoka Paskah gij mona insa koma tein guru.

²⁹ Jefeda Gubernur Pilatus orogna jeska efen mod jeskaseda efesij mar jera rusnok insa koma. Beda ofa agot gu rua oida, "Iwa icunc Ofa rot efen mar onnga oska erek meidu?"

³⁰ Beda rua ruroun oida, "Erek Ofa eneita mar onnga oska guru, beda memef monoroun Ofa skoita bua guru."

³¹ Beda Pilatus agot oida, "Iwa yagei Ofa ojgomu, noba icunc rot efen mar onnga oska ororu isinsa yeyin agama erebent ojgomu." Beda rua ragot oida, "Tina mefmen owesa efek jeskaseda moga ojga rot oida Ofa agos rot efen mar onnga oska bera enah guru."

³² (Nou onnga rua ranggot mar insa koma, beda mar koma angh gij efera fob jeni erek Yesus anggot rot teinefa Ofa emagos sis fob).

³³ Erek koma beda Pilatus oira sons gij efen mod efesi noba ejeka joug Yesus oida, "Bua bera rusnok Yahudi rerin raja ei?"

³⁴ Beda Yesus ejeka gu ofa oida, "Bua bisinsa budou os bijeka Didif rot mar koma ei, era rusnok enjgineg ranggot rot mar insa koma gu bua fob ei?"

³⁵ Beda Pilatus oroun oida, "Didif dinerek rusnok onnga Yahudi guru. Bua bebin rusnok jera bebin ebirfager imam-imam onnga ruroun Bua skoita Didif ojgomu. Bua buntunggom mar onnga oska fob erek meidu?"

³⁶ Beda Yesus oroun oida, "Dedin owesa efek erek raja bera enen jeska mebif guru. Erek dedin owesa efek onnga en jeska mebif, beda dedin rusnok rimagobuma jera rua onnga Yahudi insa koma jeskaseda rinagei Didif guru. Tina guru, jeska dedin owesa efek erek raja bera en jeska monuh enjgineg ojgomu."

³⁷ Beda Pilatus agot gu Yesus oida, "Jefeda Bua bera erek raja egens ei?" Beda Yesus oroun oida, "Bua bera onnga bagot oida Didif direk raja egens. Didif dunjuj jeska dedin ameina erek osnok mebif egens jeskaseda difesij rot mar onnga tenten gu rusnok.

Noba rusnok nomnaga onnga rudou os ruroru mar onnga tenten bera rig rot dedin duga."

³⁸Erek koma beda Pilatus agot gu Yesus oida, "Meidu bera erek mar onnga tenten?" Nou onnga ofa anggot mar insa koma, beda ofa oksons skoita rusnok Yahudi. Beda ofa agot gu rua oida, "Didif dijeka joug osnok egens insa koma fob, tina didif dinek rot efen mar onnga oska egema tein guru.

³⁹Tina ororu yeyin erebent egens gij mona onnga Paskah bera didif dumosuwa yeyin osnok egens jeska mod oskusk. Jefeda iwa idou os rot oida didif dusuwa Ofa onnga erek raja Yahudi ei?"

⁴⁰Beda rusnok insa koma ruis oida, "Bunosuwa Ofa guru. Bua busuwa Barabas ojgomu." (Barabas bera osnok egens onnga oh mosoruk ofoka skoita raja Kaisar sis fob.)

19¹Erek koma jefeda Pilatus obk efen tentarer jeskaseda ruroun Yesus orogna beda rangha Ofa.

²Beda tentarer insa koma rahaisomu rot Yesus fogora rua rira mega mofun efetma onnga ofogog noba rirajgej Yesus ebirfaga. Beda rua rita meifeti onnga efeb titnetna ekeni ofom ahta erek raja ergi tumu Yesus.

³Beda rua ruis oida, "Memef mougif gu Bua onnga raja Yahudi." Rua rutunggom mar onnga oska erek insa koma ofosma ofoukou. Noba rua rubu Ofa osum tein.

⁴Erek koma beda Pilatus eja skoita rusnok Yahudi juens deika beda agot gu rua oida, "Iwa ik, jeska didif dumoroun Yesus skoita iwa. Didif dudou os jeskaseda iwa ijginaga rot oida didif dinek rot efen mar onnga oska egema tein guru."

⁵ Jefeda tentarer insa koma oroun Yesus skoita Pilatus. Mofun efetma onnga ofogog bera ah esij Yesus ebirfaga ros, noba meifeti onnga erek raja rirgi bera angh tumu Ofa ros. Beda Pilatus agot oida, "Iwa ik Ofa kef."

⁶ Nou onnga ebirfager imam-imam jera rua onnga runt joug Mod Allah rik Yesus, beda rua ruis oida, "Yutob Ofa tumu mega salib ojgomu!" Rua ruis mar insa koma ojgomuja. Tina Pilatus agot gu rua oida, "Iwa yutob Ofa tumu mega salib ojgomu, tina didif disinsa dinek rot Ofa efen mar onnga oska jinaga guru."

⁷ Beda rua onnga Yahudi ruroun oida, "Ofa anggot rot oida Ofa bera Allah efen efesa. Noba ororu mifmin hukum agama bera Ofa agos rot mar insa koma ojgomu."

⁸ Nou onnga Pilatus eg rot mar insa koma, beda ofa odou emeesa rot eteb ekirsa.

⁹ Ofa oira sons gij efen mod beda ejeka gu Yesus oida, "Bua bin jeska guaidu?" Tina Yesus onoroun mar sons gu ofa guru.

¹⁰ Beda Pilatus agot oida, "Teinefa fogora Bua binagot mar gu didif guru. Jeska didif dedin owesa efek jeskaseda dusuwa Bua era bagot rot oida rutob Bua tumu mega salib."

¹¹ Beda Yesus agot oida, "Bebin owesa efek jeskaseda buga ojga rot Didif bera en jeska Allah ojgomu. Noba rua onnga rurka Didif skoita bua bera rerin mar onnga oska erek ekirsa jeska bua bebin mar onnga oska."

¹² Nou onnga Yesus anggot mar insa koma fob, beda Pilatus odou os osuwa Ofa ojgomu. Tina rusnok Yahudi ruis oida, "Erek bua busuwa Ofa, beda koma

orocunc rot oida budou onororu raja Kaisar oga rot tenten guru. Jeska raja Kaisar agot oida osnok egens onnga ofra esinsa ofoka erek raja egens bera engkirsa rot ofa efen hukum tein."

¹³ Nou onnga Pilatus engg rot mar onnga rua ranggot insa koma fob, beda ofa oroun Yesus jah kursi egens onnga Gubernur engker esij gij mona onnga ofa oga ojga rot rusnok rerin mar onnga oska. Kursi insa koma angh gij monuh egens onnga ofoka Semfag Mamu. (Gij Yahudi oga monuh insa koma efen ofoka Gabata.)

¹⁴ Mona insa koma bera mona onnga rusnok Yahudi risejah mar nou Paskah. Rua rinsaga gu kursi insa koma erek mowa ot deis fob. Beda Pilatus agot gu rusnok Yahudi oida, "Kef bera yeyin raja."

¹⁵ Tina rua ruis oida, "Burka Ofa jeska ojgomu, noba intob Ofa tumu mega salib ojgomu!" Rua ruis mar insa koma ojgomuja. Beda Pilatus agot gu rua oida, "Teinefa fogora iwa idou os oida didif dutob yeyin raja kef tumu mega salib erek komo?" Beda rua onnga ebirfager imam-imam ragot oida, "Mefmen raja egens ojgomu, noba ofa bera ofoka Kaisar!"

¹⁶ Erek koma jefeda Pilatus eita Yesus gu rua jeskaseda rutob Ofa tumu mega salib. Jefeda tentarer jah suma ruroun Yesus jeskaseda rutob Ofa tumu mega salib.

¹⁷ Rua raha mega salib eteb esij Yesus ejmeg jeskaseda Ofa esinsa orka mega insa koma jah monuh egens onnga rijeka oida, Monuh Mosta Ebirfaga Oboha. (Gij Yahudi oga bera rijeka monuh insa koma oida Golgota.)

¹⁸ Beda rua rutob Yesus tumu mega Salib jah suma. Noba rua rutob gosnok gegeka tumu mega salib jah

suma morototuma jera Yesus tein. Rua rutob egens jeska goga jah Yesus ognosk, noba gegema jah Yesus egris.

¹⁹ Noba Pilatus onngu mar gij papan beda rua raha papan insa koma tumu mega salib onnga runtob Yesus tumu. Mar onnga ofa onngu tumu papan koma agot oida, ""

²⁰ Noba rusnok Yahudi rufoukou rik mar onnga ofa onngu gij papan insa koma jeska ofa onngu mar insa koma gij Yahudi oga jera Latin oga jera Yunani oga. Noba monuh onnga rua runtob Yesus tumu salib gij bera ah doida kota Yerusalem.

²¹ Beda ebirfager imam-imam Yahudi ragot gu Pilatus oida, "Bua bunogu gu papan rot oida Ofa bera raja Yahudi erek koma guru. Tina bugu rot oida Ofa ejeka esinsa erek Raja Yahudi ojgomu."

²² Beda Pilatus oroun gu rua oida, "Mar onnga dididunggu rot bera ah erek koma ojgomu."

²³ Nou onnga tentarer runtob Yesus tumu mega salib fob, beda rua rita Yesus efen meisoufa noba rikeba erek tohkuru jeskaseda rua egens egens rita egema tein morototuma. Noba rua tein rita efen meifeti egens onnga aksa. Meifeti insa koma bera onnga osnok egens eb meifeti, tina efen ofofu erek efetma enah gij guru.

²⁴ Jefeda tentarer insa koma ragot oida, "Enadaij nou mimif mikris meifeti insa kef onnga oufamofa guru. Jefeda mimif mita mar egens onnga omorocunc rot oida idu jeska mimif bera emesma meifeti kef." Mar onnga rua runtunggom insa koma bera angh gij efera jeni erek runggu gij Mar Efeyi Ebsi sis fob. Jeska runggu gij Mar Efeyi Ebsi sis eteb fob osok gij Yesus oida, "Rua rikeba dedin meisoufa orofosut egens

egens. Noba rua rutunggom mar egens jeskaseda rik rot oida idu jeska rua bera rimesma dedin meisoufa." Jefeda mar onnga tentarer runtunggom insa koma fob bera ah jeni erek runngu gij Mar Efeyi Ebsi sis fob.

²⁵ Yesus efen mosu jera efen mokosa jera Maria onnga Klopas efen mohona jera Maria jeska Magdalena, rua nomnaga runt doida Yesus, onnga angh tumu mega Salib.

²⁶ Nou onnga Yesus ek efen mosu jera didif, onnga Ofa odou okora rot, beda Ofa agot gu magef oida, "Ameina, ofa kef bera erek bebin ebesa."

²⁷ Beda Ofa agot gu didif oida, "Ofa kef bera erek bebin mosib." Jefeda gij mona insa koma didif duroun Yesus efen mosu jeskaseda ofa eker gij dedin mod.

²⁸ Erek koma beda Yesus ejginaga rot oida mar nomnaga bera oisa fob. Beda Ofa agot oida, "Magon en Didif." Ofa agot mar insa koma jeskaseda mar onnga runngu gij Mar Efeyi Ebsi rot mar insa koma bera emah gij efera jeni erek runngu sis fob.

²⁹ Jah suma bera osnok egens efen mok osku onnga rutkinaja anggur efei onnga ekemba gij. Jefeda tentara egens ec meifeti gij anggur efei insa koma. Beda ofa erajgej meifeti insa koma tumu mega hisop efetma egens. Beda ofa osk mega efetma rot meifeti insa koma gu Yesus awesi jeskaseda ej.

³⁰ Nou onnga Yesus omna anggur efei onnga ekemba insa koma oskiyai, beda Ofa agot oida, "Mar nomnaga oisa fob." Beda Ofa efen ebirfaga ojuj noba Ofa agos fogora aha efeni gij fob.

³¹ Mona insa koma bera mona onnga rusnok Yahudi risejah mar nou mona onnga Sabat onnga doida enesaga fob. Tina mona onnga Sabat insa koma

bera erek ofoufem ekirsa jeska giskini. Noba rusnok Yahudi runodou os oida rusnok rifaga enah tumu mega salib gij mona onnga Sabat guru. Jefeda rua rirejgei Pilatus jeskaseda ofa obk efen tentarer fogora riyah rusnok raki onnga angh tumu mega Salib ros. Beda rua rimagos ebeirens fogora tentarer ridaga rifaga jeska mega salib.

³² Jefeda tentarer rin noba riyah osnok egens aki onnga angh tumu mega Salib jah suma. Beda rua riyah osnok onnga egeka aki tein onnga angh tumu mega salib doida Yesus.

³³ Tina nou onnga tentarer insa koma rin skoita Yesus, beda rua rik oida Ofa agos fob. Jefeda rua rineyah Yesus efen aki guru.

³⁴ Tina tentara egens jeska rua era efen meitefa oroduis Yesus gij efembra. Beda ainsa koma tein ogufu jera mei eya jeska Yesus efaga.

³⁵ (Osnok egens onnga engk rot mar insa koma fob bera onnga emfesij rot gu memef. Ofa bera erek osnok egens onnga efesij mar onnga tenten ojgomu. Noba ofa ejginaga rot oida mar onnga ofa emfesij rot insa koma bera erek tenten tein ojgomu. Noba ofa efesij rot mar insa koma jeskaseda iwa tein idou ororu rot.)

³⁶ Mar insa koma nomnaga encira fob jeskaseda mar onnga runngu gij Mar Efeyi Ebsi sis fob bera angh gij efera erek jeni fob. Jeska sis fob runngu rot oida, "Ofa efen ofora egema tein enebs guru."

³⁷ Noba mar enjgineg onnga runngu gij Mar Efeyi Ebsi sis fob bera erek kef oida, "Rua rurumba gij Ofa onnga rusnok ruduis fob."

³⁸ Osnok egens onnga ofoka Yusuf onnga ojga jeska kota Arimatea en skoita Pilatus noba erejgei

ofa jeskaseda Pilatus eita Yesus efaga gu ofa. (Yusuf bera osnok Yahudi egens onnga ororu Yesus fob. Tina ofa edemi mar insa koma gij odou efesi jeska ofa emeesa rot ebirfager Yahudi.) Pilatus oitij rot, jefeda Yusuf eja noba orka Yesus efaga jeska.

³⁹ Noba Nikodemus, onnga orodosu Yesus gij motu egens sis fob, ofij Yusuf gij motu insa koma. Ofa orka miniyi onnga efen ensesa erek kilo setka orgomu jah suma.

⁴⁰ Goga gedaga Yesus efaga beda gos miniyi insa koma esij Yesus efaga. Beda goga gera meifeti gorond Yesus efaga. (Rusnok Yahudi risejah rusnok onnga ranggos rifaga erek koma fogora risah gij moksu.)

⁴¹ Mekenı egens enah doida monuh onnga runtob Yesus tumu mega salib gij. Noba gij mekenı insa koma bera rusnok runtonggom moksu egens onnga erek mansu fob. Noba rua rinesah mar agos gij mansu efesi insa koma enesi.

⁴² Goga gesah Yesus efaga gij mansu egens insa koma jeska mansu koma bera ah doida kota. Noba goga godou os gotunggom mar insa koma rot ebeirens jeska ai juens beda Yahudi efen mona onnga Sabat enesaga. Noba goga gocosu rot gesejah mar ororu rerin agama erebent nou mona onnga Sabat insa koma.

20 ¹ Erek rahah tentena beda Maria onnga jeska Magdalena eja jah Yesus efen moksu. Noba erek motkobah ros. Nou onnga ofa ensaga jah suma beda ofa ek, tina mamu eteb egens onof joug Yesus gij moksu awesi deika guru.

² Jefeda ofa ofof skoita Simon Petrus jera didif, onnga Yesus efen oforoka egens onnga Ofa odou

okora rot, jeskaseda efesij rot mar insa koma gu magef. Ofa agot gu magef oida, "Rusnok rineya rurka Yesus efaga jeska efen moksu fob. Noba memef menejginaga rot monuh onnga rua raha efen efaga gij guru."

³Jefeda Petrus jera didif mafof skoita Yesus moksu.

⁴Tina didif dufof ebeirens jefeda disaga rot sismeni gu Yesus moksu.

⁵Beda didif dugif noba dugog joug gij mamu efesi. Didif dik meifeti jah suma, tina dunoira guru.

⁶Beda Simon Petrus ensaga jah suma. Ofa oira gij moksu beda ek meifeti jah suma tein.

⁷Noba ofa ek meifeti onnga rusnok rira nou rirajgej Yesus ebirfaga tein. Meifeti insa koma erek oug fob noba ah ai yes jeska meifeti onnga enjgineg insa koma.

⁸Beda didif tein daira gij moksu. Didif dik mar insa koma beda dudou ororu rot oida Yesus endebecki jeska anggos rot tenten fob.

⁹(Memef modou enebriyi gij mar onnga nabi runggu gij Mar Efeyi Ebsi onnga agot oida Yesus emedebecki jeska anggos enesi.)

¹⁰Erek koma beda magef maksons jah mefmen mod.

¹¹Tina Maria ot jah moksu insa koma gu mebah noba ebisa ojgomuja. Askesi ofa ebisa ros, beda ofa ougif noba ek gij mansu efesi.

¹²Beda ofa ek malaikat egeka onnga ergi meisoufa onnga erek ebsi komowa. Goga geker esij mofka onnga rangha Yesus efaga gu neeka fob. Egens eker jah mofka agosu, noba egens eker jah mofka emaga.

¹³Beda goga gejeka gu Maria oida, "Asoka, bua bibisa rot meidu?" Beda ofa agot gu goga oida,

"Rusnok rineya rurka dedin Tuhan efaga jeska moksufob, noba didif dinejginaga rot monuh onggaruarangha efen efaga gij guru."

¹⁴ Nou onggamaria anggot mar insakoma, beda ofa ekikif noba ek Yesus onot jah suma. Tina ofa enejginaga rot oida Ofa bera Yesus enesi.

¹⁵ Beda Yesus agot gu ofa oida, "Ojaga, bua bibisarot meidu? Bua buhca idu?" Ofa osujohu rot oida Yesus bera osnok egens onggatot joug mekeni jah suma, jefeda ofa agot oida, "Tuan, Bua bera onggaburka Yesus efaga jeska fob ei. Bua burka efen efagajah sinefo? Bagot gu didif jeskaseda dijeita efen efaga ojomu."

¹⁶ Beda Yesus agot gu ofa oida, "Maria." Beda Maria eyajga Yesus noba agot gij Yahudi oga oida, "Rabuni!" (Koma efen ofou erek Guru.)

¹⁷ Beda Yesus agot gu ofa oida, "Bua binagei Didif guru, jeska Didif dineja skoita dedin Akeina enesi. Tina bua bija noba bagot rot gu dedin edohujir. Bagot gu rua oida Didif dumoksons skoita dedin Akeina onggarek iwa tein yeyin Ika, noba skoita dedin Allah onggarek iwa tein yeyin Allah."

¹⁸ Beda Maria eja agot gu Yesus efen ruforoker oida, "Didif dik Tuhan fob!" Noba ofa agot gu memef rot mar onggayesús anggot insakoma gu ofa fob.

¹⁹ Nou onggarek motkobah fob beda memef, onggayesús efen ruforoker, momohoturuma fob. Memef mof joug montoj mod rot ahais fob, jeska memef memeesa rot ebirfager Yahudi. Beda Yesus orogna keingg memef noba ot gu mefekesa. Beda Ofa agot gu memef oida, "Didif dui gu Allah jeskaseda Ofa eita idou onggasqueira gu iwa."

²⁰ Beda Ofa ocunc efen etma jera efembra gu memef. Nou onnga memef mek Ofa, beda modou efaga ouka eteb rot.

²¹ Beda Yesus agot gu memef juens deika oida, "Didif duis gu Allah jeskaseda Ofa eita idou onnga eskeira ojgomu. Sis fob Akeina obk Didif jah mebif. Noba erek koma tein Didif dubk iwa skoita rusnok enjgineg."

²² Nou onnga Ofa anggot mar insa koma fob, beda Ofa ofc gu rua beda agot oida, "Iwa isma Efena Ebsi ojgomu.

²³ Erek iwa isuna rot rusnok enjgineg rerin mar onnga oska, beda ahah Allah eiteij bera rerin mar insa koma onsuna rot tenten fob. Noba erek iwa inosuna rot rusnok enjgineg rerin mar onnga oska guru, beda ahah Allah eiteij bera rerin mar onnga oska insa koma enah gu rua ros."

²⁴ Nou onnga Yesus ocunc esinsa gu memef onnga erek efen ruforoker fob, beda Tomas (onnga rijeka ofoka Kembar tein) bera enofogu jah suma guru.

²⁵ Dansusk beda memef mefesij gu Tomas rot oida memef mek Tuhan Yesus fob. Tina Tomas agot gu memef oida, "Didif dudou onororu mar onnga iwa inagot gu didif guru. Erek didif disinsa dik Yesus efen efen ofamosma tumu etma, noba dahtec efera ofamosma jeska paku, noba dahtec efera ofamosma jeska meitefa onnga ruroduis Ofa efembra, beda didif tein dumororu rot oida Ofa efena ebah sons si."

²⁶ Erek ari egens deika memef momohoturuma gij mod egens. Noba Tomas tein enofoguma jera memef gij mona insa koma. Memef mof joug montoj rot ahais fob. Tina Yesus orogna jah suma noba ot jah mefekesa deika. Beda Ofa agot gu memef oida, "Didif

duis gu Allah jeskaseda Ofa eita idou onggga eskeira gu iwa ojgomu."

²⁷ Beda Ofa agot gu Tomas oida, "Tomas, bua bik dedin ditma, noba bahtec dedin difera ofamosma. Noba bahtec dedin difera ofamosma gu difembra." Beda Ofa agot deika gu Tomas oida, "Tomas, bua bineita budou onggga egeka erek koma guru. Tina bua buroru rot tenten ojgomu."

²⁸ Beda Tomas agot gu Yesus oida, "Bua bera dedin Tuhan jera Allah."

²⁹ Beda Yesus agot gu ofa oida, "Bua budou ororu oida Didif difena ebah sons fob jeska bua bik Didif gu bisinsa biteij fob. Tina onggkoska eteb nou rusnok onggga rinek Didif guru, tina rudou ororu oida Didif difena ebah sons fob."

³⁰ Yesus orocunc mar onswos ofoukou deika onggga memef mek gu meiteij tein fob. Tina didif dinefesij rot mar insa koma nomnaga gij surat Injil Efeb kef guru.

³¹ Tina mar nomnaga onggga didif dunggu rot gij surat kef bera jeskaseda iwa imororu rot tenten oida Yesus bera Kristus egens koma onggga en fob. Noba Ofa bera erek Allah efen efesa rot tenten tein. Noba erek iwa iroru mar insa koma nomnaga, beda iwa imesma eiteij ah onggga efeinah oisouska Yesus Kristus efen ofoka si.

21 ¹ Gij mona onggga egema deika, beda Yesus ocunc esinsa gu memef onggga erek efen ruforoker deika. Ofa ocunc esinsa gu memef gu meren Galilea. Ofa ocunc esinsa erek kef oida,

² rineya jeska memef meker morototuma jah meren Galilea efembra. Memef insa koma bera didif Yohanes ni, Simon Petrus ni, Tomas (ongga rijeka Kembar) ni, Natanael onggga ojga jeska Kana gij monuh Galilea

ni, Zebedus efen efesa ni, jera Yesus efen goforoker egeka enjgineg tein.

³Erek koma beda Simon Petrus agot oida, "Didif dimeja jah meren ogbug jeskaseda duhca mos." Beda memef onggga enjgineg jah suma magot oida, "Memef tein mororu bua." Jefeda memef nomnaga meifef meg beda meja jah meren ogug. Memef mohca mos nou motu insa koma, tina menagei egema tein guru.

⁴Erek rahah tentena beda Yesus orogna jah suma noba ot gu meren efembra. Tina memef menejginaga rot oida Ofa koma bera Yesus enesi.

⁵Beda Ofa ois gu memef oida, "Edohuji, iwa yagei mos fob ei?" Beda memef moroun oida, "Guru."

⁶Beda Ofa agot oida, "Iwa ij yeyin jala jah meg ognosk ojgomu, beda iwa imagei mos egema." Jefeda memef motunggom jeni erek koma, beda memef magei mos ofoukou doska. Erek enadaij nou memef mofra jala insa koma jeska mei gij meg efesi guru, jeska mos ofoukou insa koma bera erek okum eteb doska.

⁷Beda didif, onggga Yesus efen oforoka egens onggga Ofa odou okora rot, dagot gu Petrus oida, "Ofa koma bera Tuhan Yesus!" Nou onggga Petrus eg didif dagot mar insa koma, beda Ofa ergi efen meisoufa sons. (Ofa ergi meisoufa erek oskiyai gij meg ojgomu). Beda ofa osoka gij mei jeskaseda eja skoita Yesus.

⁸Beda memef onggga Yesus efen ruforoker rineya meifef meg sons gu meren efembra. Noba memef moku mefmen jala onggga ebera rot mos insa koma jah ejmeg. Gij mona insa koma memef meker erek meter wuntin egens jeska meren efembra.

⁹Nou onggga memef nomnaga monjuj jeska meg gu mei efembra, beda memef mek mah efesi. Noba mos

enah gu mah efesi insa koma. Noba roti enah jah suma tein.

¹⁰ Beda Yesus agot gu memef oida, "Iwa yurka mos egema onggga yanggei fob."

¹¹ Beda Simon Petrus oira gij meg insa koma noba oku jala onggga ebera rot mos eteb gu mebsta. Memef mofosuit mos gij jala insa koma. Noba mos onggga efaga eteb bera erek wuntin egens noba setka cinja noba orgomu. Noba mefmen modou ousaha rot tein jeska erek mos eteb ofoukou doska, tina mefmen jala enebga jinaga guru.

¹² Beda Yesus agot gu memef oida, "Iwa it maat kef ojomu." Beda memef nomnaga menejeka gu Yesus oida, "Bua bera idu," erek koma guru. Jeska memef nomnaga mejjinaga fob oida Ofa bera Tuhan Yesus.

¹³ Beda Yesus eita roti ofog egens jera mos noba eita maat insa koma gu memef fogora met.

¹⁴ Sis mona onggga Ofa endebecki jeska agos fob, beda mona insa koma bera erek ofosma orgomu onggga Ofa oncunc esinsa gu memef onggga efen ruforoker fob.

¹⁵ Nou onggga memef met maat insa koma oisa fob, beda Yesus agot gu Petrus oida, "Simon onggga Yona efen efesa, bua budou okora rot Didif ekirsa jeska bebin obohujir insa kef rudou okora rot Didif ei?" Beda Petrus oroun oida, "Tuhan, Bua bijjinaga fob rot oida didif dudou okora eteb rot Bua." Beda Yesus agot oida, "Erek koma beda bua but joug rusnok koma onggga erek dedin domba-domba nomnaga."

¹⁶ Beda Yesus agot juens deika oida, "Simon onggga Yona efen efesa, bua budou okora rot Didif ei?" Beda ofa oroun oida, "Tuhan, Bua bijjinaga fob rot oida didif dudou okora eteb rot Bua." Beda Yesus agot

oida, "Erek koma beda bua but joug rusnok koma onggga erek dedin domba-domba nomnaga."

¹⁷ Beda Yesus agot rot ofosma juomu deika oida, "Simon onggga Yona efen efesa, bua budou okora rot Didif ei?" Beda Petrus odou okumkum jeska Yesus ejeka gu ofa rot mar insa koma erek ofosma juomu fob. Beda ofa agot gu Yesus oida, "Tuhan, Bua bijginaga rot mar nomnaga fob. Jefeda Bua bijginaga fob rot oida didif dudou okora eteb rot Bua." Beda Yesus agot gu ofa oida, "But joug rusnok koma onggga erek dedin domba-domba nomnaga."

¹⁸ Kef bera erek tenten oida, gij mona onggga bua bumforoka bifes ros, beda bua bijginaga rot birakid bebin mokobu rejrej bifembra noba bua bija gij monuh sinefo onggga bua bisinsa budou os rot fob. Tina gij mona onggga bua bunokona fob, beda bua bumoj bitma nou noba rusnok rimerakid bebin bitma insa koma noba ruroun bua gij monuh egens onggga bua bunodou os bija gij guru."

¹⁹ (Yesus efesij rot mar insa koma jeskaseda orocunc rot oida gij mona kahma beda rusnok rimagob Petrus. Noba mar insa koma bera omofra Allah ofoka erek aksa tein si.) Erek koma beda Yesus agot gu Petrus oida, "Petrus, bua buroru Didif ojgomu."

²⁰ Beda Petrus ekikif noba ek didif, onggga Yesus odou okora rot, dutoij goga. (Didif bera onggga diker doida Yesus gij mona onggga memef nomnaga ment maat morototuma gu meja. Beda didif dijeka Ofa oida, "Tuhan, idu bera emekikif jeska Bua?")

²¹ Nou onggga Petrus ek didif dutoij goga, beda ofa agot gu Yesus oida, "Tuhan, teinefa rot ofa koma onggga otoij nagef?"

²² Beda Yesus agot gu Petrus oida, "Erek Didif dudou os oida ofa efena ebah ojgomuja onjoros Didif duksons, beda koma bera onofoufem nou bua guru. Tina bua buroru Didif ojgomu."

²³ Yesus anggot mar insa koma osok gij didif ojgomu. Jefeda ruforoker rineya koma ragot moguma rot oida, "Ofa egens koma bera enagos jinaga guru!" Tina Yesus enagot oida didif dinagos jinaga guru, erek koma guru. Ofa agot oida, "Erek didif dudou os jeskaseda ofa efena ebah ojgomuja onjoros Didif duksons, beda koma bera onofoufem nou bua guru."

²⁴ Didif Yohanes bera onnga dimfesij rot mar insa koma nomnaga, noba onnga dunggu rot mar insa koma nomnaga gij Surat Injil Efeb egens kef fob. Noba memef mejjinaga rot oida mar nomnaga onnga didif dimfesij rot bera erek tenten ojgomu.

²⁵ Yesus ontunggom mar enjineg tein onnga erek ofoukou doska fob. Noba erek rusnok runggu gij buku-buku rot mar insa koma nomnaga, beda didif dusujohu rot oida mebif bera eteb enadaj nou jeskaseda misah buku-buku insa kef rot nomnaga gij jinaga guru. Ainsoma.

Kisah Para Rasul

1 ¹Teofilus onnga dudou okora rot, gij surat sismeni onnga didif disa skoita bua sis fob bera didif dimfesij mar gu bua osok gij Yesus Kristus. Didif dimfesij rot mar nomnaga onnga Ofa ontunggom jera mar nomnaga onnga Ofa omftuutu rot gij mona onnga Ofa osokeij efen efarur

²ojgomuja onjoros mona onnga Ofa osok jah mebaga. Gij mona onnga Ofa endebecki jeska agos fob, tina eneja jah mebaga enesi, beda Ofa orogna keingg gu efen ruforoker rufok setka kungkob erfens rot ofosma ofoukou. Noba Ofa ocunc mar ofoukou gu rua jeskaseda rudou ejginaga rot tenten oida Ofa endebecki jeska agos noba efena ebah sons rot tenten fob. Ofa ocunc esinsa gu rua erek insa koma gij mona rara setka tohkuru, noba Ofa efesij mar gu rua osok gij rot teinefa Allah ofoka ereij keingg rusnok.

³(1:2)

⁴Gij mona juens bera Ofa et maat morototuma jera rua. Beda Ofa eyahehir joug rua oida, "Iwa ineja jeska kota Yerusalem enesi, tina iwa iker gij kota koma onjoros mona onnga iwa insma Efena Ebsi onnga Akeina Allah anggen gu iwa rot sismeni fog. Noba Didif tein dimfesij mar rot Efena Ebsi Allah insa koma gu iwa sis fob.

⁵Jeska sis fob bera Yohanes eita baptis gu rusnok erek giskini ojgomu. Tina gij mona onnga dektek deika guru, beda Efena Ebsi Allah emeita baptis

oisouska efen owesa efek onggga Ofa emeita gu iwa si."

⁶ Nou onggga Yesus efen ruforoker insa koma rumohoturuma jera Ofa fob, beda rua rijeka gu Ofa oida, "Tuhan, erek Bua bumosuwa mimif onggga Yahudi jeska rusnok onggga rufogog gij mona insa kef jeskaseda mimif misinsa mufoka ereij keingg mifmin rusnok Yahudi ei?"

⁷ Beda Yesus oroun gu rua oida, "Akeina esinsiyai bera enagot rot mona insa koma efen eimofoj ojpgomu. Mar koma bera enen jeska iwa guru."

⁸ Tina gij mona onggga Efena Ebsi en skoita iwa fob, beda iwa imesma owesa efek si. Beda iwa imefesij mar osok gij mar onggga iwa ingk noba ingg jeska Didif gu rusnok gij kota Yerusalem ni, rejrej monuh Yudea jera Samaria ni, ojpgomuja onjoros iwa imfesij mar gu rusnok rejrej monuh nomnaga onggga angh gu mebif si.

⁹ Nou onggga Yesus anggot mar insa koma fob, beda Ofa efen ruforoker rik Ofa osok jah mebaga, noba mocgoj ofog ocohun Ofa jeska rua.

¹⁰ Noba askesi rua ruhobut jah mebaga ros, beda ainsa koma tein gosnok gegeka onggga gergi meisoufa onggga ebsi komowa gorogna beda got desi rua.

¹¹ Beda goga gagot gu rua oida, "Ei, iwa onggga monuh Galilea! Iwa yuhobut jah mebaga rot meidu? Jeska Yesus, onggga iwa ik onsok jah mebaga ainsa koma, Ofa bera omojuj jeska mebaga sons en erek iwa ik Ofa osok jah mebaga koma si."

¹² Erek koma beda Yesus efen ruforoker rija jeska memaga Zaiton ofos noba ruksons jah kota Yerusalem. Memaga ofos insa koma bera ah erek meter ribu egens jeska Yerusalem.

¹³ Nou onnga rua rinsaga jah Yerusalem fob, beda rua rijeker gij morongsu egens jah suma. Morongsu egens koma ah skida mod onnga rusnok enjineg rerin. Ruforoker onnga rumohoturuma jah suma bera Petrus ni, Yohanes ni, Yakobus ni, Andreas ni, Filipus ni, Tomas ni, Bartolomeus ni, Matus ni, Yakobus onnga Alfeus efesa ni, Simon (ongga rijeka Patriot) ni, jera Yudas onnga Yakobus efesa.

¹⁴ Rua nomnaga rumohoturuma rot rudou egens fogora rum riteij ojgomuja. Rineya jah suma onnga rum riteij gu Allah morototuma jera rua bera erek rujager onnga rururu Yesus gij mona onnga sismeni fob, jera Maria onnga Yesus efen mosu, jera Yesus efen mokoser tein.

¹⁵ Gij mona juens deika beda rua rumohoturuma sons. Rua onnga rumohoturuma gij mona insa koma bera erek rusnok rufok wuntin egens noba setka egeka. Beda Petrus ot noba agot oida,

¹⁶ "Edohujir, mar onnga angh gij Mar Efeyi Ebsi onnga raja Daud onngu oisouska Efena Ebsi sis fob bera ah gij efera fob. Jeska mar insa koma bera efesij mar osok gij Yudas onnga oroun rusnok onnga rufogog jeskaseda ranggei Yesus.

¹⁷ Gij mona insa koma bera ofa erek osnok egens onnga Yesus ocunc erek efen oforoka egens jera mimif. Noba ofa tein ofij Yesus morototuma jera mimif tein.

¹⁸ (Yudas esma fifi jeska rusnok onnga rufogog jeskaseda oncunc Yesus gu rua fogora rua ragei Yesus. Beda ofa era fifi insa koma erengk mebi. Tina ofa esma jah odou gij mebi fogora eredi mebi insa koma. Beda efen otkonu ebriyi noba orogna nomnaga fogora agos ojgomu fob.

¹⁹ Rusnok nomnaga onnga ringker gij kota Yerusalem rijginaga rot mar insa koma nomnaga fob, jefeda rua rijeka mebi insa koma gij rerin ruga oida Akeldama. Koma efen ofou oida Mebi Ogufu.)

²⁰ Mar insa koma onnga edi Yudas bera encira jeni mar onnga runngu gij Mar Efeyi Ebsi rot ofa erek kef oida, 'Adaij nou ofa efen mebi ah erek owowa ojgomuja. Noba erek osnok egens ai eneker gij tein guru.' Noba mar enjgineg gij Mar Efeyi Ebsi agot erek kef oida, 'Adaij nou osnok egens onnga enjgineg eferwei ofa ojgomu.' "

²¹ Erek koma beda Petrus agot deika oida, "Jefeda onnga oufa bera mimif mucunc osnok egens jeska mimif onnga ororu Yesus gij mona onnga Yohanes eita baptis gu Yesus onjoros mona onnga Ofa onsok jah mebaga fob. Osnok egens koma tein emefesij mar gu rusnok rot mar onnga mimif mingk jera mingg jeska Yesus fob. Ofa tein emagot gu rua oida Yesus edebecki jeska agos fob."

²² (1:21)

²³ Jefeda rua rucunc gosnok gegeka jeska rifekesa. Geneya gofoka Yusuf onnga rinjeka erek Barsabas tein (ofa efen ofoka Yustus tein) jera Matias.

²⁴ Beda rua rum riteij gu Allah oida, "Tuhan, Bua bijginaga rot mar nomnaga onnga angh gij rusnok rudou efesi fob. Bua bijginaga oida Yudas esiri gij mar onnga oska fogora agos fob. Jefeda Bua bucunc gu memef rot oida idu jeska gosnok gegeka kef onnga Tuhan Bua budou os jeskaseda eferwei Yudas onnga eja jah monuh mar agos fob."

²⁵ (1:24)

²⁶ Erek koma beda Allah ocunc Matias jeskaseda eja erek oforoka egens onnga eferwei Yudas. Beda rua

rufra ofa erek oforoka egens dokun jera rua ongg
 rufok setka kungkob erfens.

2¹ Mona eteb egens ongg rusnok Yahudi rijeka
 ofoka Pentakosta ensaga doida fob. Beda rusnok
 ongg ruroru Yesus rumohoturuma gij mod egens.

² Beda gij mona insa koma rua rig mar erek mof
 eteb okurc rot owesa doska gij mod ongg rua
 ringker gij.

³ Beda rua rik mar erek mah eisa ofokai ongg oira
 gij mer efesi insa koma noba ah gu rusnok insa koma
 orofosut egens egens.

⁴ Beda ainsa koma tein rua nomnaga risma owesa
 efek jeska Efena Ebsi Allah. Beda rua ragot mar gij
 oga ongg erek toga toga. Oga ongg toga insa koma
 bera rua risinsa rinejginaga rot sis fob tein guru. Rua
 ragot mar gij oga insa koma oisouska mar ongg
 Efena Ebsi ocunc gu rua gij rudou efesi ojomu.

⁵ Gij mona insa koma bera rusnok Yahudi rufoukou
 ongg rin jeska monuh egema egema tein riker gij
 Yerusalem. Rua bera erek rusnok ongg rugif gu
 Allah rot tenten.

⁶ Nou ongg rua insa koma ringg Yesus efen rusnok
 riflesij mar gij oga ongg toga toga insa koma, beda
 rua rudou ousaha eteb rot. Jeska Yesus efen rusnok
 riflesij mar gij rua ongg enjgineg egens egens
 rerin ruga. Rua rudou ousaha eteb rot, jefeda rua
 ruhoturu rejrej Yesus efen rusnok insa koma.

⁷ Beda rua ragot moguma oida, "Wah! Rua riflesij
 mar gij mifmin muga egens egens, teinefa erek kefo?
 Jeska rua nomnaga bera rusnok ongg rujga monuh
 Galilea ojomu!

⁸ Mimif onggja jeska monuh toga toga bera mig rua rifiesij mar gij mifmin muga egens egens. Rua rita koma erek teinefa!

⁹ Jeska mimif mirek rusnok onggja rujga monuh Partia ni, monuh Media ni, monuh Elam ni, monuh Mesopotamia ni, monuh Yudea ni, monuh Kapadokia ni, monuh Pontus ni, monuh Asia ni,

¹⁰ monuh Frigia ni, monuh Pamfilia ni, monuh Mesir ni, jera monuh onggja angh rejrej Libia doida kota Kirene ni, jera mimif mineya tein onggja min jeska kota Roma gij monuh Italia ni.

¹¹ Mineya jeska monuh Kreta jera monuh Arab tein. Noba mineya erek rusnok Yahudi, noba mineya erek rusnok Yahudi guru, tina moira gij agama Yahudi fob. Noba mimif nomnaga mig rua rifiesij mar gij mifmin muga egens egens osok gij mar onswos onggja Allah ontunggom fob."

¹² Rua rudou ousaha noba eineina gij tein, jefeda rua rijeka moguma rot oida, "Wah! Mar kef efen ofou erek teinefa?"

¹³ Tina rineya jeska rua ruhurmei mar rot Yesus efen rusnok oida, "Ah, rua koma bera ribirfaga erebibei rot mofut efei ojgomu!"

¹⁴ Erek koma beda Petrus ot jera efen mohujir setka kungkob erfens. Beda ofa agot rot oga eteb gu rusnok rufoukou insa koma onggja rumohoturuma rejrej ofa oida, "Akeineri onggja Yahudi jera iwa enjineg onggja iker gij kota Yerusalem. Iwa ig rot iskusk jeska didif dimefesij mar gu iwa osok gij mar onswos onggja iwa ingg insa kef fob.

¹⁵ Erek iwa isujohu rot oida memef mebirfaga erebibei rot mofut efei, tina erek koma guru. Memef

menej mofut efei guru, jeska kef erek aras cinja tohkuru gij rahah tenten ros.

¹⁶ Mar onswos insa kef bera en jeska Efena Ebsi Allah. Efena Ebsi koma bera onnga Allah anggot eimofoj rot gij Mar Efeyi Ebsi sis fob.

¹⁷ Nabi egens onngu rot mar onnga Allah anggot rot erek kef oida, 'Doida mona onnga enja ejgwaga, beda Didif dumobk Efena Ebsi gu rusnok nomnaga onnga rururu Didif fob. Yeyin iser runer jera rujager rimefesij rot mar onnga Didif duncunc gu rua gij rudou efesi fob. Noba Didif dumocunc mar onswos gu yeyin iser gij rudou efesi. Noba yeyin runokoner tein rimesih mar onnga Didif ducunc gu rua gij rudou efesi.

¹⁸ Didif dumobk Efena Ebsi gu runer jera rujager onnga rumfij Didif, beda rua rimefesij rot mar onnga Didif duncunc gu rua gij rudou efesi skoita gu rusnok enjgineg.

¹⁹ Didif dumotunggom mar jah mebaga jera mebi tein onnga otunggom rusnok rudou ousaha rot. Mar koma emerek ogufu jera mah jera mah efeb.

²⁰ Doida mona onnga Didif dufra okum keingg rusnok onnga rufogog, beda rusnok rimek mowa ongakahaha fogora ejerek motkobah noba mesta ejerek ekeni ogufu.

²¹ Beda gij mona insa koma rusnok onnga rumois gu Tuhan bera rimeita eiteij ah onnga efeinah.' "

²² Erek koma beda Petrus agot deika oida, "Akeineri onnga erek rusnok Israel. Iwa ig mar kef rot iskusk ojgomu. Yesus, onnga ojga jeska monuh Nazaret, bera onnga Allah oncunc gu iwa oisouska efen owesa efek fob. Noba oisouska Ofa bera Allah ontunggom

mar onswos ofoukou gu iwa ifekesa fob. Iwa isinsa ijginaga rot mar insa koma nomnaga fob.

²³ Yudas ofij iwa jeskaseda yagei Ofa. Noba koma ecira jeni Allah odou ejginaga rot fob. Noba iwa jera rusnok enjgineg onnga rufogog intob Ofa tumu mega salib.

²⁴ Tina Allah eita eiteij ah sons gu Ofa fogora osuwa Ofa jeska monuh mar agos. Jeska enadaij nou Yesus eker gij monuh mar agos ojgomuja guru.

²⁵ Jeska raja Daud runggu gij Mar Efeyi Ebsi rot Yesus sis fob oida, 'Bua Allah biker joug didif ojgomuja. Jefeda mar egema tein enereneni Didif guru.

²⁶ Jefeda dudou efaga ouka rot Bua noba Didif dimesitit mar gu Bua ojgomuja. Didif dumoisum gij Bua rot eiteij ah onnga efeinah ojgomuja.

²⁷ Didif bera bebin ebesa onnga dudou ebsi komowa, jefeda Bua binaha difaga ah gij monuh mar agos ojgomuja guru. Dedin difaga enetefa ojgomuja guru.

²⁸ Bua buncunc moroju onnga emeita eiteij ah onnga efeinah. Didif dudou efaga ouka eteb rot Bua askesi didif diker morototuma jera Bua.' "

²⁹ Beda Petrus agot oida, "Akeineri, mifmin mimowa raja Daud agos sis fob, noba rua risah efen efaga gij moksus fob. Noba efen efaga enah gij moksus koma ojgomuja onojoros mona deisef tein.

³⁰ Tina Daud bera erek nabi egens, noba ofa ejginaga rot mar onnga Allah anggen gu ofa fob. Allah anggen gu ofa oida Ofa omocunc osnok egens onnga onjuj jeska Ofa erek raja egens onnga omofoka ereij keingg efen rusnok Yahudi.

³¹ Ofa tein ejginaga rot mar onnga Allah omotunggom gu mona kahma. Jefeda Ofa agot mar insa koma osok gij Yesus erek orocunc rot oida Yesus Kristus bera onnga erek raja egens onnga Allah omobk. Ofa agot oida raja egens koma emedebecki jeska agos. Noba Ofa efen efaga enah gij monuh mar agos ojgomu guru. Noba efen efaga enetefa ojgomuja jinaga tein guru.

³² Yesus insa koma bera endebecki jeska agos rot owesa efek jeska Allah fob. Noba memef mek Ofa eker rot efena ebah deika gu mesinsa meiteij fob.

³³ Allah ofra Ofa jah mebaga noba Ofa eker desi Allah rot efen ofoka onnga aksa eteb fob. Noba Ofa tein bera esma Efena Ebsi onnga Allah agen eimofoj rot sis fob. Noba mar onswos onnga iwa ingg noba ingk insa koma bera en oisouska owesa efek jeska Efena Ebsi onnga Yesus ombk skoita memef.

³⁴ Raja Daud onosok jah mebaga guru, tina ofa tein agot rot Yesus Kristus oida, 'Tuhan Allah agot gu dedin Tuhan oida, "Biker jah dugnosk

³⁵ rot bufoka onnga aksa, beda Didif dumoin keingg mesa nomnaga fogora rumougif gu Bua si." '

³⁶ Jefeda memef modou os jeskaseda iwa onnga rusnok Israel nomnaga ijginaga rot tenten oida, Yesus onnga iwa intob tumu mega salib, Ofa koma bera onnga Allah ofra fob erek rusnok nomnaga rerin ebirfaga egens onnga erek Tuhan. Noba Ofa tein erek Kristus onnga eita eiteij ah onnga efeinah gu rusnok."

³⁷ Nou onnga rusnok insa koma nomnaga ringg mar onnga Petrus anggot fob, beda rudou emeesa eteb rot. Beda rua ragot gu Petrus jera efen mohujir

enjgineg tein oida, "Jefeda memef motunggom mar erek meidu?"

³⁸ Beda Petrus oroun gu rua oida, "Iwa imeesa joug yeyin mar onnga oska ojgomuja. Beda iwa nomnaga ita baptis fogora iroru Yesus Kristus erek Ofa efen rusnok. Beda Allah omosuna rot yeyin mar onnga oska jeska idou efesi. Beda Ofa omobk Efena Ebsi gu iwa tein.

³⁹ Jeska Efena Ebsi onnga Allah anggen eimofoj rot sis fob bera nou mimif nomnaga, jera mifmin miser tein, jera rusnok onnga rangh yes jeska Allah tein. Efena Ebsi insa koma bera nou rusnok nomnaga onnga Allah ois gu jeskaseda ruroru Ofa."

⁴⁰ Petrus agot mar ofoukou deika gu rua jeskaseda rua rikeba jeska rusnok onnga mebif efen onnga erek rufogog fogora Allah onofra mar okum gu rua guru.

⁴¹ Gij mona insa koma tein rusnok rufoukou ruroru mar onnga Petrus anggot insa koma, noba rua rita baptis. Rua rugun rusnok onnga ruroru Yesus erek ribu orgomu dokun deika.

⁴² Beda rusnok efeinah koma rumohoturuma jeskaseda Yesus efen ruforoker ruftuftu rua ojgomuja. Noba rua ritka roti noba rit morototuma jera noba risisi keingg moguma rot tein noba rua rum riteij morototuma.

⁴³ Nou onnga rusnok riskemba rik Yesus efen ruforoker runtunggom mar onswos ofoukou, jefeda rudou ousaha rot.

⁴⁴ Rusnok insa koma onnga ruroru Yesus nomnaga rita mar morototuma jera rudou egens. Noba rua tein rikeba rerin mareibra morototuma.

⁴⁵ Beda rua ruhu rerin mareibra jeskasada rimeita fifi, fogora rua rikeba fifi insa koma nou rerin ruhujir onnga rufojingki.

⁴⁶ Gij orofosut mona bera rua rumohoturuma gu Mod Allah. Beda rua ritka roti morototuma erek rireisasi joug risinsa rot Yesus. Noba rua tein rumohoturuma gij rerin mod egens egens jeskasada rit maat morototuma rot rudou eriagamaga jera rudou onnga efaga ouka eteb.

⁴⁷ Rua risitit gu Allah ojgomuja, noba rusnok enjgineg nomnaga rudou os eteb jera rua. Noba Allah ogun rerin ruhujir rufoukou dokun deika onnga rimeesa joug rerin mar onnga oska fogora oskotu rua tein jeska rerin mar onnga oska fob.

3 ¹ Gij mona juens erek moworu fob bera rusnok rum riteij gu Allah. Jefeda Petrus jera Yohanes geja jah Mod Allah jeskasada gom geiteij tein.

² Orofosut mona beda rusnok rineya raha osnok egens onnga aki oskukwok gu montoj onnga rusnok Yahudi rijeka ofoka Montoj Ongkoska. Sis mona onnga ofa onjuj jeska efen mosu onjoros ofa orna fob bera ofa aki ah erek koma ojgomu. Ofa ah gu montoj egens insa koma jeskasada erejgei rusnok onnga rumoira jah suma nou fifi.

³ Nou onnga ofa ek Petrus jera Yohanes gomoira, beda ofa erejgei goga nou fifi egema.

⁴ Beda goga gohobut ofa, noba Petrus agot gu ofa oida, "Biajga magef ojgomu!"

⁵ Jefeda osnok egens onnga aki oskukwok insa koma ohobut goga rot odou eteb jeska ofa osujohu rot oida goga gemeita fifi egema gu ofa si.

⁶ Tina Petrus agot gu ofa oida, "Didif dedin fifi egema guru, tina mar onnga magef mafman bera

mameita gu bua si. Jefeda didif dagot oida, oisouska owesa efek jeska Yesus Kristus onnga jeska kota Nazaret bera bua bidebecki noba bicira!"

⁷ Beda Petrus agei osnok egens insa koma etma ognosk fogora oroun ofa jeskaseda edebecki. Beda ainsa koma tein osnok egens koma esma aki ofora efek,

⁸ beda ofa edebecki ebeirens noba ecira. Beda ofa oira gij Mod Allah morototuma jera Petrus jera Yohanes. Ofa ecira rot odou efaga oka eteb noba ofa esitit mar gu Allah ojgomuja.

⁹ Rusnok nomnaga jah suma rik ofa ecira erek koma jefeda rua tein risitit mar gu Allah.

¹⁰ Rua rijginaga rot oida sis fob osnok egens koma bera aki oskukwok fob. Noba ofa bera onnga engker joug montoj onnga ofoka Montoj Ongkoska ojgomuja jeskaseda erejgei rusnok nou fifi. Rua rufos graga eteb noba rudou ousaha rot mar onnga rua ringk tumu ofa insa koma fob.

¹¹ Osnok egens insa koma onnga esma eskeira fob bera ororu Petrus jera Yohanes ojgomuja. Nou onnga rua rinsaga gij momas onnga angh rejrej Mod Allah onnga rusnok Yahudi rijeka Momas Salomo, beda rusnok riskembemba rin skoita rua jeska rudou ousaha eteb rot mar onswos onnga rinek insa koma.

¹² Nou onnga Petrus ek rusnok riskembemba insa koma, beda ofa agot gu rua oida, "Ei, iwa isnok onnga Israel! Teinefa fogora iwa idou ousaha rot mar kefo? Iwa yuhobut memef rot meidu. Erek iwa isujohu rot oida osnok egens kef ecira jeska ofa esma owesa efek jeska magef ei? Era iwa isujohu rot oida mar insa koma en oisouska magef rot madou onnga ebsi komowa ei? Erek koma guru!"

¹³ Jeska Allah onggga Abraham ni, Ishak ni, jera Yakub ni rugif gu, Allah onggga mifmin mimowa rugif gu sis fob, Ofa bera onggga eita ofoka onggga aksa eteb gu Yesus fob. Tina Yesus insa koma bera onggga iwa yangha gu rusnok onggga rufogog jeskaseda ragob Ofa. Noba gij mona insa koma bera iwa tein yukoja rot Gubernur Pilatus oga gij mona onggga ofa odou os osuwa Yesus ojgomu.

¹⁴ Yesus bera onggga odou eriaga noba odou ebsi komowa, tina iwa yukoja Ofa ojgomu. Noba iwa yuis rot yuga eteb gu Pilatus jeskaseda ofa aha osnok egens onggga odou ofogog gu iwa ojgomu.

¹⁵ Iwa yagob Ofa onggga eita eiteij ah onggga efeinah gu rusnok, tina Allah eita efena ebah sons gu Ofa. Memef mek mar insa koma nomnaga gu meiteij rot tenten fob.

¹⁶ Noba osnok egens kef esma aki onggga eskeira oisouska odou onggga ororu Yesus Kristus fob. Jefeda mar insa kef onggga iwa ik gu isinsa iteij bera en oisouska modou onggga ororu Yesus rot tenten, fogora osnok egens koma eita eskeira fob.

¹⁷ Iwa onggga rusnok Israel bera onggga yanggob Yesus sis fob. Tina ebeibeyaif didif dijginaga rot oida iwa jera yeyin ebirfager idou enebriyi gij mar onggga iwa intunggom gij mona insa koma guru.

¹⁸ Tina mar insa koma nomnaga bera ah gij efera fob jeni mar onggga Allah anggot oisouska efen nabi-nabi sis fob. Jeska nabi-nabi koma ragot oida, 'Kristus onggga Allah omobk erek raja egens jeskaseda eita eiteij ah onggga efeinah gu rusnok bera emeita efera okora sismeni fog.'

¹⁹ Erek koma jefeda iwa imeesa joug yeyin mar onggga oska ojgomuja. Noba yuh idou efesi rot onngkas

skoita Allah jeskaseda Ofa omosuna rot yeyin mar onnga oska jeska idou efesi. Beda Ofa emeita eskeira gu iwa si, noba Ofa omobk Yesus Kristus skoita iwa. Jeska Ofa bera onnga Allah oncunc sis fob jeskaseda eita eiteij ah onnga efeinah gu rusnok.

²⁰ (3:19)

²¹ Yesus koma bera eker gu mebaga ojgomuja onjoros mona onnga Allah ensejah nou otunggom mar nomnaga erek efeinah deika fog. Koma ororu jeni mar onnga Allah anggot oisouska efen nabi-nabi sis fob.

²² Musa bera erek nabi egens onnga efesij mar osok gij Yesus sis fob. Ofa agot oida, 'Iwa onnga Israel yeyin Allah omocunc nabi egens jeska iwa ifekesa morototuma erek Ofa oncunc didif sis fob. Beda iwa ig mar nomnaga onnga nabi egens koma anggot gu iwa.

²³ Idu onnga onoroun mar onnga nabi egens insa koma anggot rot tenten guru, beda ofa omorogna jeska efen rusnok Yahudi. Noba ofa ejagos ojgomu.'

²⁴ Nabi-nabi ranggot mar insa koma jeska Allah gij mona onnga sis fob. Sismeni fob bera nabi Samuel agot rot mar insa koma, noba nabi-nabi enjgineg tein onnga runtoij ofa rimfesij rot mar insa koma osok gij Yesus Kristus fob. Rua nomnaga rimfesij rot mar onnga encira gij mona ebeibeyaif fob.

²⁵ Noba mar nomnaga onnga Allah anggen rot gu efen rusnok Israel oisouska efen nabi-nabi sis fob bera mimif onnga deisef rimesma si. Jeska Allah anggen gu mifmin mimowa Abraham sis fob oida, 'Oisouska bebin efesa egens bera rusnok nomnaga rimesma oufamofa eteb.'

²⁶ Erek koma jefeda Allah onocunc Yesus noba obk Ofa skoita mimif rot sismeni jeskaseda Ofa eita oufamofa eteb gu mimif. Ofa oncunc efen oufamofa eteb gu mimif fogora mimif mimeesa joug mifmin mar onnga oska."

4¹ Nou onnga Petrus jera Yohanes gefesij mar insa koma gu rusnok ros, beda ebirfager imam-imam jera ebirfager rusnok onnga runt joug Mod Allah jera rusnok Yahudi jeska ebic Saduki rin skoita Petrus jera Yohanes.

² Rua rutkonu oska eteb skoita Petrus jera Yohanes jeska goga goftu tu gu rusnok oida Yesus anggos, tina Ofa edebecki sons jeska anggos fob. Noba koma tein erek orocunc oida rusnok onnga ragos bera rimebecki sons si.

³ Jefeda rua ragei goga noba raha goga gij mod oskusk. Jeska mowa nou ensiri gij fob, jefeda goga geker jah suma onjoros monog rahah tentena.

⁴ Tina gij mona insa koma rusnok riskemba bera ringg mar onnga Petrus jera Yohanes gemfesij gu rua osok gij Yesus Kristus fob. Beda rusnok rufoukou rimeesa joug rerin mar onnga oska. Jefeda rusnok onnga rururu Yesus gij mona insa koma rija erek ribu cinja rugun dokun deika.

⁵ Gij mona egema deika beda ebirfager agama Yahudi jera ebirfager Yahudi enjgineg jera Guru-Guru agama rumohoturuma gij kota Yerusalem.

⁶ Rua rujorodosu jera imam Hanas onnga ofoka aksa eteb jera imam enjgineg onnga ofoka Kayafas ni, Yohanes ni, Aleksander ni, jera rua nomnaga onnga ruiira jera imam-imam onnga ofoka aksa insa koma.

⁷ Beda rua rubk rusnok jeskaseda ruroun Petrus jera Yohanes skoita rua. Beda rua rijeka gu goga oida, "Goga geita owesa efek jeska idu fogora geita eskeira gu osnok egens insa komo."

⁸ Beda Petrus agot mar oisouska owesa efek jeska Efena Ebsi gu rua. Ofa agot oida, "Iwa onggga erek mimif Yahudi mifmin ebirfaga jera iwa onggga erek ebirfaga mifmin agama.

⁹ Deisef bera iwa iroun magef jah sif jeskaseda ijeka gu magef rot mar onggga oufamofa onggga magef matunggom gu osnok egens onggga aki oskukwok. Noba iwa idou os ijginaga rot teinefa osnok egens koma eita eskeira fob.

¹⁰ Jefeda magef madou os jeskaseda iwa jera rusnok Israel nomnaga ijginaga rot tenten oida owesa efek jeska Yesus Kristus onggga ojga kota Nazaret bera onggga eita eskeira gu osnok egens koma. Yesus koma bera onggga iwa intob tumu mega salib fob, tina Allah eita efena ebah sons gu Ofa fob.

¹¹ Yesus insa koma bera onggga nabi-nabi runggu mar rot gij Mar Efeyi Ebsi sis fob erek kef oida, 'Rusnok onggga rii mod bera rukoja Mamu ahais egens koma fogora rij jeska fob. Tina Mamu koma ejerek Mamu onggga ofoufem ekirsa nou mod koma nomnaga.'

¹² Yesus egensmes ojgomu bera onggga eita eiteij ah onggga efeinah gu rusnok. Mimif minesma eiteij ah onggga efeinah jeska rusnok rineya egema tein guru. Tina Yesus esinsiyai ojgomu bera onggga esma owesa efek jeska Allah fogora eita eiteij ah onggga efeinah gu mimif."

¹³ Ebirfager insa koma nomnaga rudou ousaha eteb rot Petrus jera Yohanes, jeska goga gefesij

mar insa koma rot godou onnga enemeesa jinaga guru. Noba rua tein rijginaga rot oida goga bera erek rusnok giskini onnga gonofokor aksa tein guru. Beda rua rudou ah keingg rot oida sis fob goga insa kef bera gororu Yesus erek efen goforoker.

¹⁴Jefeda rua rinagot mar deika gu goga guru, jeska rua risinsa rik osnok egens onnga eita eskeira insa koma ot jah suma morototuma jera goga.

¹⁵Beda rua rubk goga geja jeska. Beda ebirfager insa koma nomnaga rumohoturuma jeskaseda rimejekema oida rita mar okum erek meidu skoita goga.

¹⁶Rua ragot moguma oida, "Mimif mita mar okum erek meidu skoita goga kefo? Jeska rusnok onnga ringker gij kota Yerusalem kef nomnaga rijginaga rot mar onswos onnga goga gontunggom fob. Enadaj nou mimif midemдеми mar onswos insa koma jeska rusnok guru.

¹⁷Jefeda onnga oufa bera mimif miyahehir joug goga jeskaseda goga genefesij mar osok gij Yesus gu rusnok deika guru. Erek mineyahehir joug goga guru, beda rusnok nomnaga rimejginaga rot Yesus fogora rumororu Ofa tein."

¹⁸Jefeda rua ruga ebin goga goksons noba rua riyahahir joug goga oida gonoftuftu era genefesij mar osok gij Yesus Kristus gu rusnok enjgineg deika guru.

¹⁹Tina Petrus jera Yohanes goroun oida, "Iwa isujohu gu isinsa rot mar meidu onnga erek tenten ahah Allah eiteij. Erek magef maroru iwa yeyin yuga ei? Era magef maroru Allah efen Oga ojgomu?"

²⁰Jeska mar onnga magef mangk fob jera mar onnga magef mangg gu masinsa fob bera enadaj nou maha mar koma jah ojgomu guru."

²¹ Jefeda ebirfager insa koma rutkonu oska eteb skoita goga fogora riyahahir joug goga deika. Tina rua rineita mar okum gu goga guru, jeska rusnok nomnaga risitit gu Allah rot mar onswos onnga rua ringk insa koma.

²² Osnok egens onnga eita eskeira insa koma bera efen ari mega ofoj erek setka tohkuru noba ofod.

²³ Gij mona onnga ebirfager Yahudi insa koma rubk Petrus jera Yohanes jeska fob, beda goga goksons skoita gegang gohujir. Beda goga gefesij gu rua osok gij mar nomnaga onnga ebirfager imam-imam jera ebirfager Yahudi insa koma ranggot gu goga fob.

²⁴ Nou onnga ruhujir ringg mar insa koma fob, beda rua nomnaga rum riteij morototuma jera rudou egens gu Allah. Rua ragot oida, "Allah, Bua onnga bufoka aksa eteb! Noba Bua bera onnga buntunggom mebaga ni, mebi ni, mei mojemu efei ni jera mar nomnaga onnga angh gu mebif tein.

²⁵ Sis fob Bua bifesij mar osok gij Efena Ebsi gu mefmen meimowa raja Daud. Ofa bera onnga emfesij mar osok gij rusnok onnga rumokoja Yesus gij mona onnga emen. Ofa agot erek Kef oida, 'Rua onnga rusnok Yahudi guru bera rutkonu oska rot meidu. Rua rusujohu rot mar gij rudou efesi onnga eneita oufamofa gu rua guru.

²⁶ Raja-raja mebif nomnaga ruh mosuruk ofoka nou rimagobuma, noba ebirfager nomnaga rudou egens nou ranggot mar onnga ofogog skoita Allah jera Ofa onnga emen jeskaseda omofoka ereij keingg rusnok.' "

²⁷ Beda rua rum riteij gu Allah deika oida, "Ya Allah, mar insa koma tenten. Jeska raja Herodes jera gubernur Pilatus goga gohoturu jera rusnok onnga

erek Yahudi guru, jera rua onggga Israel gij kota keftin. Rua rumorodosuma rot rudou egens jeskaseda risejah rudou onggga ofogog skoita Yesus. Tina Yesus bera erek osnok egens onggga odou ebsi komowa noba onggga omfij memef sis fob. Ofa koma bera onggga Bua bumbk erek raja egens onggga omosuwa memef jeska rusnok onggga rufogog skoita memef.

²⁸ Rua ruitij moguma jeskaseda ragob Yesus. Noba mar insa koma bera erek Bua binsejah rot gij mona onggga sismeni fob. Jefeda mar koma nomnaga en oisouska bisinsa bebin owesa efek fob.

²⁹ Tuhan, Bua bik, jeska ebeibeyaif rusnok insa koma rireneni memef rot mar okum ojgomuja. Memef bera erek bebin rusnok onggga rumfij Bua. Jefeda Bua bita owesa efek gu memef jeskaseda memef menemeesa mefesij rot bebin buga guru.

³⁰ Tuhan, Bua bita owesa efek gu memef jeskaseda rua onggga marenir rita eskeira oisouska Yesus ofoka. Noba Bua bucunc mar onswos jera mar egema tein onggga ereita rusnok rudou ousaha rot."

³¹ Nou onggga rua rum riteij oisa fob, beda ainsa koma tein mod onggga rua ringker gij eineina doska. Beda rua nomnaga risma owesa efek jeska Efena Ebsi Allah. Beda rua rijefesij mar rot Allah oga gu rusnok jera rudou onggga rinemeesa guru.

³² Rua onggga ruroru Yesus nomnaga rita mar morototuma jera rudou egens. Beda rua rikeba rerin mareibra morototuma. Osnok egens ai tein enagei efen mareibra nou esinsa ojgomu guru.

³³ Yesus efen ruforoker ragot rot owesa efek eteb oida Yesus efena ebah sons fob. Noba Allah eita oufamofa eteb gu rua nomnaga onggga ruroru Yesus ojgomuja.

³⁴ Noba rua nomnaga rita mareibra onggga adaij nou rifaga. Jeska rua onggga rerin mebi era mod bera ruhu mar koma nou fifi. Beda rua rurka fifi insa koma noba rita gu Yesus efen ruforoker.

³⁵ Beda rua nomnaga rikeba fifi insa koma moguma fogora rufofij rerin ruhujir onggga rufojingki.

³⁶ Erek koma tein, osnok egens onggga ofoka Yusuf bera ohu efen mebi nou fifi. Beda ofa orka efen fifi insa koma gu ruforoker beda rita fifi koma gu rua. Yusuf bera erek osnok egens onggga efen ofou ebiedi ebic Lewi jeska monuh Siprus. Ruforoker rijeka gu ofa efen ofoka erek Barnabas tein. (Rua rijeka ofa erek koma jeska ofa era mar ofou fogora ereisisi joug rusnok rudou efesi).

³⁷ (4:36)

5¹ Orna egens onggga ofoka Ananias jera efen mohona Safira gohu gegam mebi.

² Noba fifi onggga goga gesma jeska mebi insa koma bera goga gedemi oknama noba Ananias orka oknama skoita Yesus efen ruforoker noba eita gu rua. Beda ofa agot gu rua oida, "Kef bera fifi onggga mebi efen ofou nomnaga."

³ Beda Petrus agot gu Ananias oida, "Teinefo fogora bua buh budou efesi gu Bilis fogora bucuwei mar gu Efena Ebsi Allah erek komo? Bua banggot oida bua bita mebi efen ofou nomnaga fob, tina onggga tenten bera bua bindemi fifi oknama nou bisinsa fob!

⁴ Gij mona onggga bua bunohu bebin mebi enesi, bera mebi koma ah gu bua ros. Noba gij mona onggga bua buhu mebi insa koma fob, beda fifi onggga rirengk mebi koma tein bua bebin ros. Tina teinefo fogora bua busujohu gij budou efesi rot oida bumorokrusa memef erek komo? Bua busujohu oida bucuwei mar

gu rusnok ojgomu! Tina onggga tenten bera bua bucuwei mar gu Allah fob!"

⁵ Nou onggga Ananias eg mar onggga Petrus enagot insa koma fob, beda ainsa koma tein ofa agos noba esma gu mebi. Beda ruforoka rifes rin noba rira meifeti ruround Ananias efaga noba rurka ofa jah moksus. Beda gij mona onggga rusnok enjgineg ringg osok gij mar insa koma fob beda rua rimeesa rot Allah efen owesa efek.

⁶ (5:5)

⁷ Erek aras orgomu deika, beda Ananias efen mohona oira jah suma tein. Ofa enejginaga rot oida efen mahina agos fob enesi.

⁸ Beda Petrus ejeka gu ofa oida, "Fifi kef onggga bua jera bebin ahwina gesma jeska mebi onggga gonghu fob bera nomnaga insa kef ei?" Beda ofa oroun oida, "Tenten, fifi koma bera nomnaga insa koma."

⁹ Beda Petrus agot gu ofa oida, "Teinefo fogora bua jera ahwina godou egens nou gocuwei mar gu Efena Ebsi Tuhan erek komo. Koma erek goga gereneni Tuhan ojgomu. Bua big rusnok ruga koma onggga rimen ei? Koma bera ruforoka rifes onggga rurka bebin ahwina jah mebah noba risah ofa gij moksus fob. Rua ruksons noba ebeibeyaif rua rumorka bua tein jah moksus si!"

¹⁰ Nou onggga Safira eg mar onggga Petrus enagot insa koma ros, beda ainsa koma tein ofa agos noba esma gu mebi jah Petrus odou. Nou onggga ruforoka rifes insa koma rinsaga fob beda rua rik, tina Ananias efen mohona Safira tein agos fob. Jefeda rua rurka ofa efen efaga jah odog noba risah ofa desi mahina efaga tein.

¹¹ Ere koma jefeda rusnok nomnaga onnga ruroru Yesus jera rusnok enjgineg tein ringg osok gij mar insa koma. Beda rua rudou ousaha noba rimeesa eteb rot Allah efen owesa efek tein.

¹² Yesus efen rufroker insa koma runtunggom mar onswos ofoukou jah gu rusnok rifekesa. Jefeda rusnok rudou ousaha eteb rot. Noba rusnok nomnaga onnga ruroru Yesus fob rumohoturuma jera rudou egens gij momas onnga angh rejrej Mod Allah. Rusnok Yahudi rijeka momas koma efen ofoka Salomo.

¹³ Noba rusnok enjgineg onnga runroru Yesus enesi bera rimeesa rumoira jera rua. Tina rusnok rudou oufamofa skoita rua insa koma onnga ruroru Yesus fob.

¹⁴ Noba ofofosut mona bera rusnok rufoukou ruroru Yesus oga fogora ruiru jera rusnok onnga Yesus efen erek rugun odudu dokun deika.

¹⁵ Yesus efen rufroker runtunggom mar onswos ofoukou fob, jefeda rusnok enjgineg rurka mofka rot rua onnga marenir jah moroju efembra. Rua rutunggom erek koma jeska rua rusujohu oida erek Petrus omoira jah suma, noba ofa efena orka rusnok onnga marenir insa koma, beda rua rimeita eskeira si.

¹⁶ Rusnok rin jeska monuh ofoukou onnga angh rejrej Yerusalem odudu dokun deika. Rua rurka rusnok onnga marenir jera rusnok onnga efena ofogog oira gij rudou efesi. Beda rua insa koma nomnaga rita eskeira fob.

¹⁷ Rufroker rita mar onswos erek insa koma ojgomuja onjoros ebirfaga imam-imam onnga ofoka aksa jera j jera efen rusnok jeska ebic Saduki rudou

ejisei rot ruforoker koma fogora rudou ofogog skoita rua tein.

¹⁸ Jefeda rua ragei ruforoker noba raha rua gij mod oskusk.

¹⁹ Tina nou motu, beda malaikat egens jeska Allah ohoda montoj mod oskusk insa koma noba oroun Yesus efen ruforoker jah mebah. Beda malaikat egens koma agot gu rua oida,

²⁰ "Iwa ija jah momas onggga angh rejrej Mod Allah noba ifesij gu rusnok nomnaga osok gij Allah oga onggga eita eiteij ah onggga efeinah gu rusnok."

²¹ Beda ruforoker koma ruroru erek malaikat egens koma agot gu rua. Nou rahah tenten beda rua ruira momas insa koma noba rua ruftuftu rusnok jah suma. Gij mona insa koma ebirfaga imam egens insa koma jera efen rusnok rinsaga jah suma, beda rumohoturuma jera ebirfager Yahudi nomnaga. Beda rua rubk rusnok jah mod oskusk jeskaseda ruroun ruforoker skoita rua.

²² Jefeda rusnok koma rija jah mod oskusk. Nou onggga rua runjowa jah suma, beda rua rik, tina ruforoker rineker jah suma deika guri. Jefeda rua ruksons noba rifesij rot mar insa koma gu ebirfager insa koma nomnaga.

²³ Rua ragot gu ebirfager koma oida, "Memef mensaga gu mod oskusk fob, noba memef mek oida montoj mod oskusk of joug ahais ros. Noba tentarer onggga runt joug mod oskusk bera runot joug montoj insa koma ros. Noba memef mohoda montoj koma, tina rusnok egens ai tein eneker gij mer efesi koma deika guru!"

²⁴ Nou onggga ebirfaga tentarer jera ebirfager imam-imam ringg mar insa koma fob, beda rua rudou

eineina gij. Noba rua rijekjeka rudou rot mar okum onnga emen skoita rua rot.

²⁵ Ainsa koma beda orna egens esaga jah suma noba agot gu ebirfager koma nomnaga oida, "Akeineri, iwa ig, jeska rusnok onnga iwa yangha gij mod oskusk neeka fob bera ebeibeyaif riker gu momas onnga angh rejrej Mod Allah. Noba rua ruftuoftu rusnok riskembemba gij suma tein!"

²⁶ Jefeda ebirfager tentarer eja jera efen rusnok jah suma noba ruroun Yesus efen ruforoker sons. Tina rua rinagot mar rot ruga ahais skoita ruforoker koma guru, jeska rua rimeesa rot oida rusnok riskemba jah suma rumotkonu oska fogora rimera mamu rimeredi rua.

²⁷ Rua rurka Yesus efen ruforoker skoita ebirfager insa koma. Beda ebirfaga imam-imam egens onnga ofoka aksa ejeka joug rua.

²⁸ Ofa agot gu rua oida, "Memef meyahehir joug iwa rot oida iwa inefesij mar osok gij osnok egens onnga ofoka Yesus deika guru. Tina ebeibeyaif iwa inororu mefmen moga guri! Noba iwa imfesij mar osok gij Yesus koma rejrej kota Yerusalem nomnaga fobo! Noba iwa tein yucuwei mar gij memef oida memef bera onnga manggob osnok egens koma onnga injeka ofoka Yesus fogora Ofa agos."

²⁹ Beda Petrus jera efen mohujir enjgineg tein ragot oida, "Memef mororu mar onnga Allah anggot rot gu memef fob ojgomu. Memef monororu mar onnga oska onnga iwa yanggot rot guru.

³⁰ Yesus, onnga iwa intob tumu mega salib erek osnok egens onnga ofogog, Ofa bera endebecki jeska agos fob. Noba mar onnga Ofa ontunggom

koma oisouska owesa efek jeska Allah onнга mifmin mimower runggif gu sis fob.

³¹ Beda Allah eita owesa efek eteb gu Ofa jera ofoka onнга aksa tein. Ofa esma mar insa koma jeskaseda ofoka ereij keingg rusnok noba eita eiteij ah onнга efeinah gu rusnok tein. Ofa ontunggom erek koma jeskaseda erek mimif onнга Israel mimeesa joug mifmin mar onнга oska, beda Ofa omosuna rot mifmin mar onнга oska insa koma jeska mudou efesi tein.

³² Memef mefesij rot mar onнга memef mengk gu mesinsa meiteij fob. Noba Efena Ebsi Allah oncunc rot mar insa koma gij rusnok rudou efesi onнга ruroru Yesus efen oga fob. Noba Allah tein omobk Efena Ebsi gu rusnok onнга ruroru efen Oga rot tenten."

³³ Nou onнга ebirfager insa koma nomnaga ringg mar koma fob, beda rua rutkonu oska eteb skoita Yesus efen ruforoker. Jefeda rua rudou egens nou ranggob ruforoker koma ojgomu.

³⁴ Tina osnok egens onнга ofoka Gamaliel bera eker gu ebirfager koma rifelesa tein. Ofa bera erek Guru agama egens jeska ebic Farisi noba rusnok nomnaga rugif gu ofa erek eteb. Ofa ot noba obk rusnok jeskaseda ruroun ruforoker insa koma jah mebah.

³⁵ Beda ofa agot gu ebirfager insa koma nomnaga oida, "Akeineri onнга Israel! Iwa isujohu rot iskusk osok gij mar meidu onнга iwa idou os itunggom skoita ruforoker koma.

³⁶ Jeska sis fob osnok egens onнга ofoka Teudas ofra esinsa ofoka erek eteb. Noba rusnok rufok wuntin tohkuru ruroru ofa erek rerin ebirfaga. Noba ofa ois mosuruk skoita raja Kaisar, tina Kaisar efen tentarer ragob ofa ojgomu. Noba efen rusnok

ruksons jah rerin monuh egens egens. Noba mar onggarumois mosuruk rot insa koma bera ejeseiseifa ojomu.

³⁷ Gij mona onggarumois mosuruk rusnok rufoka nomnaga onggarumois mosuruk ofa ofoka ereij keingg, beda osnok egens onggarumois mosuruk ofoka Yudas jeska monuh Galilea ofra esinsa ofoka erek aksa. Noba ofa efen rusnok riskemba onggarumois mosuruk ofa gij mona insa koma. Ofa tein ois mosuruk skoita raja Kaisar, tina ofa tein agos noba efen rusnok ruksons gu rerin monuh egens egens.

³⁸ Jefeda didif disisi joug iwa jeskaseda iwa inotunggom mar egema tein skoita ruforoker insa koma guru. Iwa ia jga joug rua ojomu. Jeska erek mar kef onggarumois mosuruk rua rutunggom noba ruftuflu rot bera en jeska rusnok ojomu, beda mar koma emeja eseseifea si.

³⁹ Tina erek mar onggarumois mosuruk rua ruftuflu rot bera en jeska Allah, beda enadaij nou mimif mukoja mar onggarumois mosuruk Allah ocosu rot guru. Jeska koma erek mimif miretei rot Allah!"

⁴⁰ Ebirfager enjgineg insa koma ruitij rot mar onggarumois mosuruk Gamaliel anggot gu rua, jefeda rua ruitij oida rinagob Yesus efen ruforoker guru. Beda rua ruroun ruforoker insa koma sons, noba rangha rua rot ahais. Beda rua ragot joug oida, "Iwa inefesij mar osok gij Yesus ofoka deika guru!" Beda rua rubk ruforoker koma jeska.

⁴¹ Yesus efen Ruforoker insa koma rija rot rudou onggarumois mosuruk efaga ouka eteb, jeska Allah oncunc rua erek rusnok onggarumois mosuruk rita efera okora morototuma erek Yesus eita efera okora sis fob.

⁴² Noba gij orofosut mona bera rua rija jah momas onnga angh rejrej Mod Allah jera mod enjineg onnga rusnok rerin jeskaseda ruftuftu noba rifesij mar osok gij Allah oga onnga oufamofa. Rua ragot oida, "Yesus bera Kristus egens koma onnga Allah anggot eimofoj rot emen nou eita eiteij ah onnga efeinah gu rusnok."

6¹ Rusnok onnga ruroru Yesus rugun odudu dokun deika. Noba gij mona insa koma bera rusnok Yahudi onnga ruroru Yesus fob gij kota Yerusalem riker morototuma jera rusnok Yahudi onnga rujga jeska monuh Yunani. Rua insa koma jeska monuh Yunani ruroru Yesus fob tein. Beda rua onnga monuh Yunani rudou okum skoita Yahudi insa koma onnga kota Yerusalem efen. Jefeda rua ruga erahah gu Yesus efen ruforoker oida, "Yahudi onnga Yerusalem rinekeba maat rot iskusk gu memef onnga Yunani mefmen rija mesina guri!"

² Ere koma jefeda ruforoker rufok setka kungkob erfeka ruhoturu rusnok nomnaga onnga ruroru Yesus fob noba ragot gu rua oida, "Erek memef mekeba maat gu rusnok ojomuja, beda mefmen efekesa enah nou moftuftu Allah oga gu rusnok guru?"

³ Jefeda onnga oufa bera, iwa icunc yeyin ihujir jeska ifekesa erek rufok cinja erfeka onnga rudou etesis, noba onnga Efena Ebsi Allah engker gij rudou efesi fob. Beda memef mocunc rua erek rusnok onnga rumfij memef fogora rimekeba maat koma gu yeyin rija mesina tein.

⁴ Beda memef onnga rufok setka kungkob erfeka mom meiteij gu Allah noba moftuftu rot Allah oga gu rusnok ojomu."

⁵ Rusnok insa koma nomnaga ruitij morototuma rot mar onnga ruforoker ranggot gu rua fob. Jefeda rua rucunc Stefanus erek osnok egens onnga omfij ruforoker. Ofa bera osnok egens onnga ororu Yesus rot tenten, noba Efena Ebsi Allah eita owesa efek gu ofa fob. Noba rua rucunc Filipus ni, Prokhorus ni, Nikanor ni, Timon ni, Parmenas ni, Nikolas onnga jeska Antiokhia ni. Nikolas koma erek rusnok Yahudi guru, tina ofa oira gij agama Yahudi fob.

⁶ Beda rua ruroun rusnok rufok cinja erfeka insa koma skoita Yesus efen ruforoker, beda ruforoker koma raha ritma esij rua noba rum riteij gu Allah jeskaseda Ofa eita owesa efek gu rua.

⁷ Erek koma jefeda rusnok rufoukou ringg rot Allah oga onnga oufamofa rejrej monuh insa koma. Noba rusnok rufoukou gij kota Yerusalem tein ruiira odudu jera rua onnga ruroru Yesus fob. Noba rusnok Yahudi rerin imam-imam ofoukou tein ruroru Yesus gij mona insa koma.

⁸ Stefanus bera erek osnok egens onnga eita mar onnga oufamofa oisouska owesa efek eteb jeska Allah. Jefeda ofa otunggom mar onswos ofoukou onnga ereita rusnok rudou ousaha eteb rot.

⁹ Tina rusnok Yahudi rineya bera rita rudou oska rot ofa. Rusnok insa koma bera erek rua onnga rum riteij gu Allah gij mod onnga rumois ofoka Libertini. Rua bera erek rusnok Yahudi onnga ojga monuh Kirene jera Aleksandria. Rua jera rusnok Yahudi jeska monuh Kilikia jera monuh Asia ruga rimesedema jera Stefanus.

¹⁰ Tina rua nomnaga risiri gu Stefanus ojgomu, jeska Efena Ebsi Allah ofij ofa fogora eita odou efesis rot mar onnga ofa agot gu rua.

¹¹ Jefeda rua rusos rusnok rineya jeskaseda rua rucuwei mar rot Stefanus gu ebirfager oida, "Memef meg Stefanus oga oruh Musa jera Allah ofoka fobo!"

¹² Beda rua riflesij mar rourou erek insa koma gu rusnok enjgineg jera ebirfager Yahudi jera Guru-Guru agama tein. Jefeda rua nomnaga rutkonu oska eteb rot Stefanus noba rua rijagei ofa. Beda rua ruroun ofa skoita ebirfager imam-imam onggga rufoka aksa eteb.

¹³ Noba rua tein ruhoturu rusnok enjgineg jeskaseda rucuwei mar ofoukou rot Stefanus gu ebirfager insa koma. Rua ragot oida, "Osnok egens kef oga oruh rot Mod Allah onggga ebsi komowa eteb, noba ofa oga oruh Allah oga onggga Ofa eita gu Musa rot mimif sis fob tein.

¹⁴ Jeska memef meg ofa agot oida Yesus, onggga ojga kota Nazaret, bera omohoda Mod Allah kef nomnaga, noba omosuna mifmin agama erebent onggga mimif minsma jeska Musa!"

¹⁵ Nou onggga ebirfager insa koma ringg rot mar insa koma nomnaga, beda rua ruhobut Stefanus rot rudou okumkum eteb. Tina rua rik oida Stefanus efen osum efesa egigir eteb erek malaikat efen osum onggga efesa egigir tein ojgomu.

7¹ Beda ebirfaga imam-imam egens onggga ofoka aksa eteb ejeka gu Stefanus oida, "Mar onggga rusnok insa koma rimfesij rot bua bera tenten ei era gurei?"

² Beda Stefanus oroun oida, "Akeineri, iwa ig duga fog. Gij mona onggga mifmin mimowa Abraham eneja jah monuh Haran enesi, beda ofa eker kij monuh Mesopotamia ros. Tina Allah, onggga mimif mugif gu, en skoita ofa

³ noba agot gu ofa oida, 'Bua bija jeska bebin ebskir nomnaga jera monuhif noba bicira jah monuh egens onnga Didif dumocunc gu bua.'

⁴ Ere koma beda Abraham eja jeska efen monuh onnga ofoka Kasdim noba ofa ejeker gij monuh Haran. Noba gij mona onnga ofa efen meka anggos fob, beda Allah oroun ofa jah monuh Israel kef onnga akeineri jera didif mingker gij onojoros mona deisef.

⁵ Gij mona insa koma Allah eneita mebi egema tein gu Abraham enesi. Ofa enesma mebi onnga oskiyai tein nou emei mod gij tein guru. Tina Allah agen gu Abraham oida Ofa emeita mebi monuh insa koma nomnaga gu ofa erek efen mebi. Noba mebi insa koma nou efen rusnok nomnaga onnga runjuj jeska ofa tein. Tina gij mona insa koma bera Abraham onok efesa egema tein enesi.

⁶ Ere koma tina Allah agot gu ofa oida, 'Bebin ebdebeser rimejeker erek rua onnga rusodosa gij monuh Mesir. Beda rusnok onnga rerin monuh insa koma rumot keingg rua noba rumotunggom mar onnga oska skoita rua ojgomuja onjoros tahun wuntin tohkuru omoisa fob.

⁷ Tina Didif dumofra mar okum gu rusnok Mesir insa koma onnga runt keingg rua. Beda dedin rusnok rumorogna jeska monuh insa koma noba rimeja jah monuh insa kef onnga Didif dita gu bua. Beda rua rumougif gu Didif jah sif.'

⁸ Beda Allah agen rot mar insa koma gu Abraham oisouska mar egens onnga Ofa obk Abraham jeskaseda otunggom. Ofa obk Abraham jera efen efeser nomnaga jeskaseda riris rufom mareij ofos jeska. Noba gij mona onnga Abraham efen mohona onjuj rot efen efesa Ishak erek mona cinja orfomu

fob, beda Abraham eris Ishak ofom mareij ofos jeska. Beda gij mona kahma deika, Ishak tein eris efen efesa Yakub ofom mareij ofos jeska. Beda gij mona kahma deika, Yakub eris efen efesa setka kungkob erfeka rerin rufom mareij ofos jeska tein. Beda Yakub efen efeser setka kungkob erfeka insa koma bera onnga rijerek mimif onnga Yahudi mifmin mimower ebic setka kungkob erfeka insa koma.

⁹Tina gij mona insa koma bera Yakub efen efeser setka kungkob erfeka insa koma rudou ejisei rot rerin rukosa Yusuf. Jefeda rua ruhu ofa gu rusnok onnga rija jah monuh Mesir. Rua ringk ofa erek osnok egens onnga omfij rua ojgomuja. Tina Allah ofij ofa ojgomu,

¹⁰fogora osuwa ofa jeska mar onnga oska nomnaga onnga ereneni ofa. Gij mona onnga ofa eja skoita raja Mesir onnga ofoka Firaun, beda Allah eita odou onnga efesis eteb gu ofa. Jefeda Firaun odou oufamofa eteb skoita Yusuf. Beda ofa ofra Yusuf erek efen gubernur gij monuh Mesir insa koma. Noba ofa ofoka ereij keingg Firaun efen rusnok nomnaga.

¹¹Gij mona kahma deika, beda mosona eteb ongk rusnok nomnaga gij monuh Mesir jera monuh Kanaan tein. Jefeda rusnok rifeira okora eteb. Noba mosona ongk mifmin mimower onnga ringker gij monuh Kanaan tein.

¹²Jefeda gij mona onnga Yakub eg oida rusnok ruhu maat gij monuh Mesir, beda ofa obk efen efeser rineya insa koma jah monuh Mesir jeskaseda ringk maat. Koma erek mona onnga sismeni nou rua rimeja jah suma.

¹³Beda gij mona onnga rua ruksons jah monuh Mesir rot ofosma jueka deika jeskaseda ringk maat, beda Yusuf agot gu rua oida ofa bera Yusuf onnga

rerin rukosa. Gij mona insa koma Firaun eg rot Yusuf efen meka jera mokorer.

¹⁴Jefeda Yusuf esa oga skoita efen meka Yakub jeskaseda rua nomnaga rijeker gu monuh Mesir. Rua nomnaga erek rufok setka cinja erfeka noba cinja.

¹⁵Jefeda Yakub ejeker gij monuh Mesir onjoros ofa jera efen efeser onga mifmin mimower koma nomnaga ragos fob.

¹⁶Beda rua rerin ridebeser rurka mimower insa koma rerin rufora nomnaga sons jah kota Sikhem. Beda rua risah rufora insa koma gij odog egens onga Abraham engk jeska rusnok Hemor sis fob.

¹⁷Dektek deika guru beda mar onga Allah anggen rot gu Abraham sis eteb fob bera ensaga doida fob. Gij mona insa koma bera mifmin mimower ruk riser rufoukou fogora mifmin rusnok rufoukou riker gij monuh Mesir.

¹⁸Rua rija erek rusnok rufoukou onjoros mona onga raja Faraun onga efeinah ofoka ereij keingg rusnok monuh Mesir. Ofa enejginaga rot Yusuf guru.

¹⁹Firaun koma ebidei mifmin mimower, noba ocunc odou onga ofogog eteb skoita rua. Ofa ocunc mar onga oska skoita rua fogora eradgodu rua jeskaseda rij rerin riser riferatefa nomnaga beda ragos ojgomu.

²⁰Beda gij mona insa koma Musa efen mosu onjuj rot ofa. Ofa bera erek eferatefa egens onga ongoska eteb. Ofa efen mosu jera meka gok ofa gij mod gegang erek mesta ortomu fob. Tina goga gemeesa rot raja Firaun jefeda goga gaha ofa igef jah mebah.

²¹Tina raja Firaun efen efesa ojaga oroun ofa noba ok ofa erek esinsa efen efesa.

²² Beda rua onggga Mesir ruftufts Musa gij rerin mar nomnaga, jefeda ofa ejerek osnok egens onggga odou efesis eteb noba efen owesa efek eteb gij mar onggga ofa anggot jera mar onggga ofa ontunggom tein.

²³ Noba gij mona onggga Musa efen tahun setka tohkuru fob, beda ofa odou os ek rot efen rusnok Israel riker erek teinefa.

²⁴ Tina gij mona insa koma ofa ek osnok egens onggga Mesir obu efen osnok egens onggga Israel. Jefeda ofa ot jera osnok egens onggga Israel koma noba agob ofa onggga Mesir beda agos.

²⁵ Ofa osujohu rot oida ofa efen rusnok Israel rijginaga rot fob oida Allah omobk ofa jeskaseda osuwa rua onggga Israel jeska rusnok Mesir. Tina rua rinejginaga rot koma enesi.

²⁶ Noba erek monog beda ofa ek gosnok Israel gegeka onggga gemagobuma. Jefeda ofa ocosu rot agei getma mejerema. Ofa agot gu goga oida, 'Goga bera gomokorama! Teinefa fogora gemagobuma erek komo?'

²⁷ Tina osnok egens koma onggga agob efen mohuj insa koma okoja Musa. Ofa agot oida, 'Idu bera onofra bua fogora birek mefmen ebirfaga egens onggga anggot mar rot memef.

²⁸ Era bua bimagob didif ei, erek bua banggob osnok egens koma onggga Mesir efen neeka ei?'

²⁹ Nou onggga Musa eg mar insa koma beda ofa ejginaga oida rusnok nomnaga rijginaga rot osnok egens koma onggga ofa anggot neeka fob. Jefeda ofa emeesa fogora oku jah monuh owowa onggga ofoka Midian. Beda ofa oskotu arja egens jah suma noba ok efesa gegeka.

³⁰ Gij tahun setka tohkuru deika, beda malaikat egens orogna keingg Musa gij monuh owowa onnga angh doida memaga Sinai. Malaikat egens koma orogna erek mah eisa.

³¹ Nou onnga Musa ek mah eisa insa koma, beda ofa odou ousaha noba ejekjeka odou rot. Jefeda ofa ojut doida mah insa koma jeskaseda ek mar koma erek meidu. Nou onnga ofa ont doida mah insa koma fob, beda ofa eg Tuhan agot oida,

³² 'Didif bera Allah onnga bebin ebimower Abraham, Ishak jera Yakub runggif gu sis fob tein.' Beda Musa osousouyu eteb jeska emeesa, noba ofa edemi eiteij jeska mah insa koma onnga eisa eteb.

³³ Beda Tuhan agot gu ofa oida, 'Bua buhoda bebin sepatu jeska bukoda ojgomu, jeska mebi onnga bunot gij jah sif bera erek ebsi komowa.

³⁴ Didif dik fob, tina mar okum ofoukou bera ah keingg dedin rusnok Israel gij monuh Mesir fob. Didif dig rerin ruga ofoukou onnga rumois gu didif rot rudou onnga efera okora eteb ojgomuja. Jefeda Didif dunjuj jeska mebaga jeskaseda dusuwa rua jeska rerin mar okum insa koma. Ebeibeyaif Didif dumobk bua jah monuh Mesir jeskaseda bufij rua.'

³⁵ Sismeni bera Allah ombk Musa skoita rua onnga Israel jeskaseda rufij rua. Tina rua rukoja ofa ojgomu. Rua ragot gu ofa oida, 'Idu bera omfra bua fogora birek mefmen ebirfaga egens onnga anggot mar rot memefo.' Jefeda ofa oku jah monuh Midian. Tina Musa koma bera onnga Allah agot mar gu oisouska malaikat egens onnga erek mah eisa. Noba Ofa obk Musa jeskaseda oksons jah monuh Mesir erek rerin ebirfaga egens fogora osuwa rua onnga Israel jeska mar okum onnga ah keingg rua ojgomuja.

³⁶ Musa kef bera onggaga onggag rot rua onggaga Israel jeska monuh Mesir. Noba gij tahun rara setka tohkuru bera ofa otunggom mar onswos ofoukou sismeni gij monuh Mesir, beda gu Mei Mojumu Efei Ekeni tein, jera gij monuh onggaga owowa tein.

³⁷ Noba Musa kef tein bera onggaga anggot gu rua onggaga Israel oida, 'Ebeibeyaif Allah oncunc didif direk efen nabi egens nou iwa. Tina gij mona kahma deika bera Allah omocunc nabi egens egema deika jeska ifekesa. Noba Ofa omokag rot iwa jeskaseda osuwa iwa jeska yeyin mar onggaga okum.'

³⁸ Musa koma bera onggaga ont rot mifmin mimower Israel gij mona onggaga rua riker gij monuh onggaga owowa ojomuja. Ofa bera onggaga Allah enagot mar gu oisouska Malaikat egens gu memaga Sinai fogora ofa oftufu oga koma gu mifmin mimower. Allah oga insa koma bera onggaga eita eiteij ah aibin gu rusnok. Noba oga Allah insa koma bera ojuj jeska mifmin mimower skoita mimif onggaga deisef tein fob.

³⁹ Erek koma tina, mifmin mimower rinagei Musa efen oga guru. Rua rukoja ofa erek rerin ebirfaga egens. Noba rua rudou os ruksons jah monuh Mesir ojomu.

⁴⁰ Gij mona onggaga Musa eker gu memaga Sinai ofos ros, beda rua onggaga Israel ragot gu ofa efen mokosa Harun oida, 'Bua butunggom mar egens jeskaseda memef mougif gu mar koma ojomu. Noba memef mororu mar koma erek mefmen ebirfaga egens fob. Jeska mefmen ebirfaga Musa oroun memef jah monuh owowa insa kefi. Tina ofa eja fob, noba menejginaga rot meidu onggaga encirej ofa fob guru.'

⁴¹ Beda gij mona insa koma rua risinsa rutunggom mar egens onggaga erek sapi efer. Beda rua nomnaga

rumougif gu mar egens insa koma. Beda rua ruka noba rudou efaga ouka eteb rot mar insa koma onnga rua risinsa runtunggom.

⁴² Jefeda Allah aha rua jah ojgomu, jeska rua rugif gu mar onnga angh gu mebaga erek mesta ni, motur ni, jera mowa ni. Tina runougif gu Allah deika guri. Tina mar insa koma bera ororu jeni mar onnga nabi-nabi runggu keingg gij Mar Efeyi Ebsi sis fob oida, 'Ei, iwa onnga Israel! Gij mona onnga iwa ingker gu monuh owowa erek tahun rara setka tohkuru bera iwa inera yeyin mareibra fogora irougif gu Didif guri. Tina iwa ira yeyin mareibra insa koma fogora irougif gu mar enjgineg ofoukou ojgomu.

⁴³ Mar enjgineg ofoukou insa koma bera erek modwok egens onnga iwa intunggom nou Molokhlah fogora yugif gu ofa. Noba iwa intunggom mega efebr erek motur onnga iwa yuis ofoka Refan. Beda iwa yurka mar insa koma jah monuh nomnaga onnga inja gij jeskaseda yugif gu mar koma. Iwa ita mar onnga oska ofoukou fob, jefeda Didif dimaha iwa jah ojgomu. Noba rusnok onnga rufogog skoita iwa bera rimen nou rimagei iwa. Beda rua rumorka iwa jah monuh yes onnga ofoka Babel.' "

⁴⁴ Beda Stefanus agot deika oida, "Gij mona onnga sis fob bera mifmin mimower ringker jah monuh owowa ros. Beda Allah obk Musa jeskaseda ei mod egens onnga rua rumougif gu Allah gij. Noba gij mona onnga rua rinja jah monuh enjgineg, beda rua ruhoda mod egens insa koma beda rurka morototuma. Mod egens koma bera erek mar onnga orocunc rot oida Allah eneker jah gu rua rifekesa ojgomuja. Noba

rua rii mod egens koma ororu jeni mar onggga Allah oncunc gu Musa rot sismeni fob.

⁴⁵ Beda gij mona onggga mifmin mimower insa koma nomnaga ranggos gij monuh onggga owowa fob, beda rerin riser rurka Mod Allah egens koma jah monuhif onggga ofoka Kanaan. Gij mona insa koma bera Allah ekemeji rusnok enjgineg onggga ringker gij monuh koma rot sismeni. Beda Yosua orka Mod Allah egens insa koma fogora ongakag rot rua onggga Israel askesi rua nomnaga ruiira gij monuh Kanaan kef. Beda Mod Allah egens insa koma ah jah suma ojgomuja onjoros mifmin mimowa raja Daud ofoka ereij keingg rusnok.

⁴⁶ Ofa erek osnok egens onggga Allah odou eskeira eteb rot. Jefeda ofa erejgei gu Allah, onggga mimowa Yakub ougif gu tein, jeskaseda erek Allah oitij rot, beda Daud emei mod eteb egens nou Ofa.

⁴⁷ Tina onggga tenten bera Daud efen efesa Salomo onggga ei mod eteb egens nou Allah gij mona kahma deika fob.

⁴⁸ Tina Allah, onggga efen owesa efek ekirsa jeska mar nomnaga, bera eneker gij mod egens onggga rusnok rii fob ojgomu guru. Jeska Ofa efen nabi egens onggga rungggu gij Mar Efeyi Ebsi rot mar onggga Ofa anggot erek kef oida,

⁴⁹ 'Iwa isujohu oida Didif diker erek sinefo? Erek iwa itunggom mod egens nou Didif beda iwa isujohu rot oida diker jah suma ojgomu ei. Erek koma guru, jeska mebaga nomnaga bera erek dedin mod, noba mebif bera nou dangha dukoda gij ojgomu.

⁵⁰ Didif dineker gij mod egens ojgomu guru, jeska didif disinsiyai bera onggga duntunggom mar nomnaga.' "

⁵¹ Nou onnga Stefanus anggot mar insa koma oisa fob, beda ofa agot deika gu ebirfager imam-imam insa koma oida, "Iwa yanggot oida didif duga oruh Mod Allah onnga ebsi komowa fob ei. Tina onnga tenten bera iwa isinsa onnga idou ombrera ojgomu! Iwa bera onnga inororu Allah oga rot tenten jinaga guru! Iwa ita mar onnga oska morototuma erek yeyin imower rita sis fob ojgomu. Jeska iwa yukoja mar onnga Allah ontunggom oisouska Efena Ebsi ojgomuja!

⁵² Yeyin imower rufra mar okum keingg Allah efen nabi-nabi onnga Ofa obk skoita rua fob. Rua tein ranggob nabi-nabi onnga Allah omobk jeskaseda ranggot gu rua oida, 'Allah omobk osnok egens onnga odou ebsi komowa jeskaseda en noba eita eiteij ah onnga efeinah gu rusnok si.' Noba Ofa koma onnga Allah ombk bera en fob, tina iwa ingkikif jeska Ofa fogora yanggob Ofa fob!

⁵³ Iwa bera onnga insma hukum Allah oisouska malaikat egens onnga anggot rot mar insa koma gu Musa sis fob. Tina iwa tein inororu hukum Allah insa koma rot tenten guri!"

⁵⁴ Nou onnga ebirfager imam-imam Yahudi insa koma ringg mar nomnaga onnga Stefanus emfesij gu rua fob, beda rua rutkonu oska eteb rot ofa onjoros rugufu etiti rurkaga efesi skoita ofa.

⁵⁵ Tina Efena Ebsi Allah onnga engker gij Stefanus odou efesi bera eita owesa efek gu ofa. Jefeda ofa eyajga jah mebaga noba ofa ek Allah onnga efesa eisa eteb. Noba ofa ek Yesus onot desi Allah jah ognosk.

⁵⁶ Beda Stefanus agot gu rusnok insa koma oida, "Wah! Iwa ik! Jeska didif dik mebaga ohoda noba Yesus ot desi Allah jah ognosk fob!"

⁵⁷ Nou onggga ebirfager insa koma nomnaga ringg mar onggga Stefanus anggot insa, jefeda rua nomnaga rujamu rusu noba ruis mar rot ruga eteb jeskaseda rineg mar onggga ofa enagot insa koma guru. Beda ainsa koma tein rua nomnaga ragei ofa,

⁵⁸ beda rikris ofa jeska kota Yerusalem fogora rira mamu ofoukou riredi ofa rot ahais. Beda rua onggga runcuwei mar gij ofa insa koma ruhoda meisoufa jeskaseda rua tein rira mamu riredi ofa. Rua raha rerin meisoufa koma gu oforoka efes egens onggga ofoka Saulus jeskaseda agei nou rua.

⁵⁹ Askesi rua nomnaga rira mamu riredi Stefanus ros, beda ofa ois rot oga eteb oida, "Tuhan Yesus, bita difeni jeska!"

⁶⁰ Beda ofa esiri gu mebi noba ois rot oga eteb oida, "Tuhan, Bua busuna mar onggga oska kef onggga rua runtunggom skoita didif jeska rua rudou efesi." Nou onggga ofa ois rot mar insa koma fob, beda ofa agos.

8¹ Saulus tein onot jah suma noba ofa tein oitij rot mar onggga runtunggom insa koma skoita Stefanus jeskaseda agos ojgomu. Gij mona insa koma tein rusnok Yahudi onggga runoruru Yesus Kristus guru ruhca rusnok Yahudi onggga rururu Yesus Kristus fob onggga ringker gij kota Yerusalem jeskaseda rutunggom mar onggga ofogog skoita rua. Jefeda rusnok onggga rururu Yesus fob bera ruku jeska kota Yerusalem, beda rua riberbera gij monuh Yudea jera monuh Samaria. Noba Yesus efen ruforoker risinsiyai ojgomu bera riker gij kota Yerusalem.

²Gij mona insa koma tein, rusnok rineya onnga rururu Allah oga rot tenten bera risah Stefanus efaga gij moksus efesi. Noba rua ribisa noba rudou okora eteb rot ofa.

³Tina Saulus, ofa ohca rusnok onnga rururu Yesus ojgomuja. Beda ofa ekris runer jera rujager jeska mod egens egens noba orka rua jah mod oskus.

⁴Rusnok insa koma onnga rungku jeska kota Yerusalem rijefesij rot Allah oga onnga oufamofa rejrej monuh onnga rinjeker gij.

⁵Erek koma tein, osnok egens onnga oruru Yesus onnga ofoka Filipus eja jah kota egens onnga angh gij monuh Samaria. Ofa efesij gu rusnok jah suma osok gij Yesus Kristus onnga Allah anggot eimofoj nou emen jeskasada eita eiteij ah onnga efeinah gu rusnok.

⁶Nou onnga rusnok ringg rot mar insa koma noba ringk mar onswos ofoukou onnga ofa ontunggom fob, beda rua ruj rusu nou rot tenten.

⁷Filipus etaha joug efena ofogog ofoukou fogora rua rurogna jeska rusnok rudou efesi rot rimeesa eteb. Noba ofa tein eita eskeira gu rua onnga raki obohah tein.

⁸Jefeda rusnok onnga ringker gij kota insa koma rudou efaga ouka eteb rot mar insa koma nomnaga.

⁹Gij mona insa koma tein osnok egens onnga ofoka Simon bera eker gij kota koma. Ofa erek osnok egens onnga otunggom mar mousu ofoukou onnga ereita rusnok rudou ousaha rot. Ofa ofra esinsa ofoka erek mendersi onnga efen owesa efek eteb.

¹⁰Jefeda rusnok rufoukou gij kota koma erek rua onnga rufoka aksa jera rua onnga rufojingki tein rig

efen oga noba ruroru ofa. Rua ragot oida, "Osnok egens kef efen owesa efek eteb jeska Allah!"

¹¹ Ofa otunggom onswos erek koma, jefeda rusnok rufoukou rig efen oga noba ruroru ofa.

¹² Tina Filipus efesij rot Allah oga onnga oufamofa. Noba ofa emfesij rot teinefa Allah ofoka ereij keingg rusnok. Noba ofa tein oftufu rua rot oida Yesus koma bera Kristus egens onnga emen. Jefeda rusnok rufoukou ruroru mar onnga Filipus emfesij gu fogora runer jera rujager rita baptis.

¹³ Simon esinsa tein ororu mar onnga Filipus emfesij insa koma noba ofa tein eita baptis. Ofa tein odou ousaha eteb rot mar onswos onnga Filipus ontunggom gij kota koma, jefeda ofa ororu Filipus ojgomuja.

¹⁴ Gij mona onnga Yesus efen ruforoker gij kota Yerusalem ringg rot oida rusnok gij monuh Samaria ruroun Allah oga onnga oufamofa fob, beda rua rubk Petrus jera Yohanes jeskaseda geja jah suma.

¹⁵ Gij mona onnga Petrus jera Yohanes genjesaga jah Samaria fob, beda goga gom geiteij nou rua onnga Samaria onnga ruroru Yesus fob jeskaseda rua tein risma Efena Ebsi jeska Allah.

¹⁶ Goga gom geiteij nou rua jeska rua askesi rita baptis oisouska Yesus ofoka fob, tina rua rinesma Efena Ebsi jeska Allah enesi.

¹⁷ Jefeda Petrus jera Yohanes gaha getma esij rua ribirfaga beda gom geiteij gu Allah. Beda ainsa koma tein rua risma Efena Ebsi Allah ojgomu.

¹⁸ Simon ek joug oida Petrus jera Yohanes gaha getma esij rusnok beda rusnok koma risma Efena Ebsi Allah. Jefeda ofa orka fifi gu Petrus jera Yohanes noba agot gu goga oida,

¹⁹ "Goga geita owesa efek insa koma tein gu didif jeskaseda gij mona onnga didif dangha ditma esij rusnok, beda rua tein rimesma Efena Ebsi Allah."

²⁰ Tina Petrus agot gu Simon oida, "Teinefa fogora bua bunosujohu rot oida adaij nou bua bira fifi birengk owesa efek jeskaseda bita Efena Ebsi gu rusnok erek komo? Bua bija jah mahmei meren onnga ent bua jera bebin fifi ojgomu!

²¹ Jeska bua busujohu rot mar erek insa koma, jefeda enadaij nou bua buira jera memef rot mar onnga memfarur gij insa kef jinaga guru! Jeska memef mejjinaga oida bebin budou efesi onororu Allah rot tenten enesi.

²² Erek koma jefeda bua bija jeska mar ofogog onnga bunosujohu rot ojgomu. Noba bua bimeesa joug bebin mar onnga oska, beda bum biteij gu Allah jeskaseda Ofa osuna rot bebin mar onnga oska koma ojgomu.

²³ Jeska didif dijinaga rot oida bebin budou efesi bera ebera rot mar onnga binjisei rot ojgomu. Noba budou efesi ekebin mar ofogog insa koma ojgomuja fob."

²⁴ Erek koma jefeda Simon ois gu Petrus jera Yohanes oida, "Goga gocunc godou onnga okora rot didif ojgomu, noba gom geiteij nou didif gu Allah jeskaseda mar insa koma enecirej didif guru!"

²⁵ Nou onnga goga goftuftu noba gemfesij rot Allah oga gu rusnok oisa fob, beda goga goksons jah kota Yerusalem. Nou onnga goga gencira gu moroju ros, beda goga goftuftu rot Allah oga onnga oufamofa gu rusnok gij monuh ofoukou onnga angh gij Samaria.

²⁶ Malaikat egens jeska Allah agot gu Filipus oida, "Bua bija gu moroju onnga enjejah kota Yerusalem

jera monuh Gaza. Moroju koma ah gij monuh onnga mebsta tuturu."

²⁷ Jefeda Filipus eja jah moroju onnga malaikat egens anggot rot gu ofa. Gij mona insa koma tein osnok egens onnga ofoka aksa bera encira gu moroju insa koma. Ofa ecira sons jah efen monuh onnga ofoka Etiopia. Ofa erek osnok egens onnga agei mareibra nomnaga nou raja ojaga egens onnga ofoka Kandake gij efen monuh Etiopia insa koma. Osnok egens koma enja jah Yerusalem jeskasada om eiteij gu Allah jah suma fob. Noba ebeibeyaif ofa eker esij korobaga egens onnga kuda encira rot. Ofa eker esij korobaga koma noba ek gij Mar Efeyi Ebsi rot mar onnga nabi Yesaya onngu keingg fob.

²⁸ (8:27)

²⁹ Erek koma beda Efena Ebsi Allah agot gu Filipus gij odou efesi oida, "Bua bija doida korobaga egens koma."

³⁰ Jefeda ofa ofof skoita korobaga egens koma, beda ofa eg osnok egens koma efesij gij surat nabi Yesaya. Jefeda Filipus ejeka gu ofa oida, "Tuan, bua budou ebriyi gij mar onnga bua bik koma fob ei?"

³¹ Beda osnok egens koma oroun oida, "Dudou enebriyi gij guri. Jefeda idu bera omofij didifo jeskasada dudou ebriyi gij mar onnga nabi Yesaya enagot rot kefo. Jeska didif dinek osnok egema tein onnga odou embriyi gij mar kef efen ofou jeni enesi." Jefeda ofa oroun Filipus jeskasada eifef esij efen korobaga, noba goga geker morototuma.

³² Osnok egens koma efesij mar gij surat nabi Yesaya onnga agot mar erek kef oida, "Ofa erek domba efer egens onnga rusnok risejah nou ragob. Noba Ofa erek domba efer egens onnga rusnok

rimeris efen efeji jeska, tina ofa eker toumou ojgomu. Ofa enoga erahah rot tein guru.

³³ Rua ruga oruh Ofa noba rita mar onnga oska skoita Ofa. Tina Ofa onotunggom mar onnga oska guru. Idu bera efesij mar nou Ofa, jeska rua ragob Ofa fob."

³⁴ Osnok egens jeska Etiopia koma ejeka gu Filipus oida, "Bua bagot gu didif rot mar insa kef efen ofou ojgomu fog. Mar insa koma onnga nabi Yesaya enagot rot bera osok gij ofa esinsa ei, era osok gij osnok enjgineg ei?"

³⁵ Erek koma jefeda Filipus efesij gu ofa rot mar insa koma efen ofou. Noba oisouska mar insa koma ofa tein emfesij rot Allah oga onnga oufamofa osok gij Yesus Kristus.

³⁶ Askesi goga gecira gu moroju ros, beda goga gensaga gu mei egens onnga ah jah suma. Beda osnok egens insa koma agot gu Filipus oida, "Bua Bik, jeska mei egens enahuma! Jefeda didif tein dudou os dita baptis jah sif ojgomu?"

³⁷ ((Beda Filipus agot gu ofa oida, "Erek bua budou ororu Yesus Kristus rot tenten fob, beda didif dimeita baptis gu bua." Beda osnok egens koma oroun sons oida, "Didif dudou ororu oida Yesus Kristus bera Allah efen efesa."))

³⁸ Beda goga gojuj jeska korobaga insa koma noba gojot gu mei efesi. Beda Filipus eita baptis gu ofa.

³⁹ Nou onnga goga gomorogna jeska mei efesi fob, beda Efena Ebsi Allah orka Filipus jeska monuh insa koma. Noba osnok egens insa koma jeska Etiopia enek ofa deika guru. Tina ofa eja rot odou efaga ouka eteb jah efen monuh.

⁴⁰ Beda Filipus orogna gij kota Asdod. Beda ofa eja jeska Asdod jah kota Kaisarea. Askesi ofa encira jah Kaisarea ros, beda ofa efesij rot oga onnga oufamofa osok gij Yesus Kristus gij kota-kota onnga angh gij monuh insa koma onjoros ofa ensaga gij kota Kaisarea.

9¹ Gij mona insa koma bera Saulus odou os eita mar ofogog skoita rua onnga ruroru Yesus Kristus ojgomu. Jefeda ofa eja skoita ebirfaga imam-imam egens

² jeskaseda erejgei ofa rot surat egens onnga eragot gu ebirfager imam-imam gij kota Damsyik oida Saulus esma owesa efek jeska imam egens koma fob. Noba ofa ek runer era rujager onnga ruroru Yesus oga gij kota Damsyik, beda ofa emagei rua noba omorka rua jah mod oskusk gij kota Yerusalem.

³ Nou onnga ofa eita surat egens insa koma fob beda ofa eja jah kota Damsyik. Tina nou onnga ofa ensaga doida kota Damsyik fob, beda ainsa koma tein mar erek efesa onnga eisa eteb doska jeska mebaga esenin Saulus jah suma.

⁴ Beda ofa esiri gu mebi, noba ofa eg oga egens onnga ois gu ofa oida, "Saulus! Teinefo fogora bua budou os bita difera okora erek komo."

⁵ Beda Saulus ejeka gu Ofa oida, "Tuan, Bua bera idu?" Beda oga egens koma oroun oida, "Didif bera Yesus onnga bua budou os bita difera okora gu ojgomu.

⁶ Tina ebeibeyaif bidebecki noba buira gij kota Damsyik. Jah suma bera osnok egens emagot rot meidu onnga bua bumotunggom."

⁷ Rusnok nomnaga onnga ruroru Saulus jeska Yerusalem rudou osousouyu morototuma noba riker

toumou ojgomu. Jeska rua tein rig oga egens insa koma, tina rua rinek osnok egens ai tein guru.

⁸ Beda Saulus edebecki noba ohoda eiteij, tina ofa enek mar deika guru fob. Jefeda rua ragei Saulus etma noba ruroun ofa jah kota Damsyik.

⁹ Gij mona rara orgomu bera ofa eker rot eiteij ofou ojgomu. Noba ofa enet maat era enej mei tein jinaga guru.

¹⁰ Osnok egens onnga ororu Yesus onnga ofoka Ananias bera eker gij kota koma. Gij mona insa koma Efena Ebsi Allah ocunc mar gu Ananias gij odou efesi. Gij mar koma bera Tuhan Yesus ois gu ofa oida, "Ananias!" Beda Ananias oroun oida, "Tuhan, meidu?"

¹¹ Tuhan Yesus agot gu ofa oida, "Bua bija jah mod onnga Yudas efen onnga angh gij moruju ofoka Aharuka. Nou onnga bua binsaga jah suma fob, beda bijeka rot osnok egens onnga ofoka Saulus jeska kota Tarsus. Ofa om eiteij ros,

¹² noba Efena Ebsi oncunc gu ofa gij odou efesi oida ofa emek bua bimen skoita ofa. Bua bimeja skoita ofa beda baha bitma esij ofa efen eiteij beda eskeira fogora emek mar sons."

¹³ Beda Ananias oroun oida, "Tuhan, Didif dig mar ofoukou jeska rusnok enjineg osok gij Saulus koma fob. Ofa bera erek osnok egens onnga eita mar ofogog eteb skoita bebin rusnok gij kota Yerusalem.

¹⁴ Noba orka surat egens jeska ebirfaga imam-imam onnga eita owesa efek gu ofa jeskaseda agei rusnok nomnaga onnga rururu Bua."

¹⁵ Tina Tuhan Yesus agot gu Ananias oida, "Bua bija ojgomu. Jeska Didif duncunc ofa fob erek osnok egens onnga omofij Didif fogora ofa emagot mar

osok gij Didif gu rusnok enjgineg onggga erek Yahudi guru jera rerin raja-raja tein jera rusnok onggga Yahudi tein si.

¹⁶ Noba Didif disinsa dumocunc gu ofa rot mar okum onggga emeita efera okora gu ofa jeska ofa ororu Didif fob."

¹⁷ Erek koma jefeda Ananias eja jah mod onggga Saulus engker gij, beda ofa aha etma esij ofa. Beda ofa agot oida, "Saulus onggga birek edohuj, Tuhan Yesus, onggga orogna keingg bua gu mona onggga ecka fob. Ofa bera obk didif skoita bua jeskaseda biteij ohoda noba bik mar sons fogora bisma owesa efek jeska Efena Ebsi Allah."

¹⁸ Ainsa koma tein mar onggga erek mos obohobru esiri jeska Saulus eiteij noba ofa ek mar sons. Beda ofa edebecki noba Ananias eita baptis gu ofa.

¹⁹ Nou onggga ofa ent maat fob, beda efen efaga esma ofora efek sons. Saulus eker gij mona ofoukou jera rusnok onggga ruroru Yesus gij kota Damsyik.

²⁰ Ofa eja jah mod onggga rusnok Yahudi rum riteij gu Allah gij, beda ofa efesij gu rusnok oida Yesus bera Allah efen efesa.

²¹ Rusnok insa koma nomnaga rudou ousaha eteb rot Saulus noba rua ragot moguma oida, "Ofa kef bera onggga ofra mar okum keingg rusnok onggga ruroru Yesus gij kota Yerusalem! Noba ofa en jah sif jeskaseda agei rusnok onggga ruroru Yesus fogora orka rua skoita ebirfaga imam-imam jah Yerusalem tein."

²² Tina gij orofosut mona bera Saulus esma owesa efek ekirsa gij mar onggga ofa oftufu fogora ofa ocunc rot tenten oida Yesus bera Kristus onggga en jeskaseda eita eiteij ah onggga efeinah gu rusnok.

Jefeda enadaij nou rusnok Yahudi riseda rot mar onggga ofa oftufu erek jinaga guru.

²³ Gij mona ofoukou egema deika, beda rua onggga Yahudi rudou egens nou ragob Saulus.

²⁴ Tina Saulus eg rot mar insa koma fob. Gij orofosut mona jera motu tein bera rua rusku joug montoj kota koma jeskaseda ragob ofa.

²⁵ Tina gij motu juens beda Saulus efen mohujir raha ofa gij morungga eteb gij morongsu. Morongsu egens koma ah skida tembok aksa onggga angh joug kota koma. Beda rua ritki ofa gij morungga jah mebah jeska kota koma fogora ofa oku jeska.

²⁶ Saulus oksons jah kota Yerusalem, noba ofa odou os eker erek egens jera rusnok onggga ruroru Yesus jah suma tein. Tina rua rusujohu rot oida ofa onororu Yesus rot tenten enesi, jefeda rua rimeesa rot ofa.

²⁷ Tina osnok egens onggga ofoka Barnabas en skoita Saulus. Beda ofa oroun Paulus skoita Yesus efen ruforoker. Barnabas efesij gu rua rot teinefa Saulus ek Tuhan gu moroju gij mona onggga ofa enja jah Damsyik, noba rot teinefa Tuhan anggot mar gu ofa gij mona insa koma. Barnabas tein efesij gu ruforoker koma rot teinefa Saulus omftufu rusnok rufoukou osok gij Yesus gij kota Damsyik rot odou onggga enemeesa oskiyai tein guru.

²⁸ Ofa efesij mar rot Saulus gu ruforoker erek koma, jefeda rua ruroun Saulus erek egens jera rua. Noba gij mona insa koma tein ofa efesij mar osok gij Yesus jah gu Yerusalem rot enemeesa tein guru.

²⁹ Ofa eseda Yahudi ruga rot mar nomnaga onggga rua onggga ruga omosokuma rot. Yahudi insa koma bera rujga jeska monuh Yunani. Rua rutkonu oska rot Saulus, jefeda rua rudou os ragob ofa ojgomu.

³⁰ Rusnok onggga ruroru Yesus ringg rot oida rusnok Yahudi insa koma rudou os ragob Saulus, jefeda rineya jeska rua ruroun Paulus jah kota Kaisarea fogora rua rubk ofa jah kota Tarsus.

³¹ Erek koma jefeda rusnok onggga ruroru Yesus gij monuh Yudea ni, monuh Galilea ni, monuh Samaria ni, rua nomnaga riker rot onggkoska, jeska rusnok Yahudi onggga runororu Yesus guru bera rineita mar onggga oska skoita rua deika guru. Jefeda rusnok onggga rumororu Yesus rugun odudu dokun deika. Beda rua nomnaga risma owesa efek jeska Tuhan ojgomuja. Efena Ebsi ofij rua rot ahais fob, jefeda rua nomnaga ruroru Yesus rot tenten ojgomu.

³² Petrus ecira rejrej monuh ofoukou jeskaseda ogog rusnok onggga ruroru Yesus. Noba gij mona juens ofa ojogog rusnok onggga ruroru Yesus gij kota Lida.

³³ Ofa ek osnok orna egens onggga ofoka Eneas gij kota koma. Osnok egens koma aki ofumbohah fogora emageima, jefeda gij tahun cinja orfomu fob bera ofa enecira jinaga guru.

³⁴ Beda Petrus agot gu Eneas oida, "Eneas! Yesus onggga erek Kristus bera eita eskeira gu bua! Bidebecki noba bug bebin meidibi." Ainsa koma tein Eneas eckicki noba ot.

³⁵ Nou onggga rusnok gij kota Lida jera kota Saron ringg rot oida Eneas ecira fob, jefeda rusnok riskemba rudou ororu Yesus tein.

³⁶ Ojaga egens onggga ofoka Tabita bera eker gij kota Yope. Ofa erek osnok egens onggga ororu Yesus rot tenten fob. (Ofa efen ofoka Dorkas gij Yunani oga). Ofa erek osnok egens onggga eita mar onggga

oufamofa gu rusnok nomnaga noba ofa ofij rusnok onggarufojingki tein.

³⁷ Gij mona insa koma bera ofa maren eteb fogora agos fob. Beda rusnok rut efen efaga ororu agama erebent fogora risah ofa gij morongsu egens onggar angh skida.

³⁸ Kota Yope ah doida kota Lida. Beda gij mona insa koma rusnok onggarururu Yesus gij kota Yope koma ringg rot oida Petrus ensaga jah kota Lida fob noba eker jah suma. Jefeda rua rubk gosnok gegeka skoita Petrus. Nou onggarogaga gensaga jah suma beda gogagerejgei Petrus jeskaseda ofa en ebeirens jah kota Yope.

³⁹ Jefeda Petrus oitij rot. Nou onggarofa ensaga jah suma, beda rusnok ruroun ofa jah morongsu onggamar agos enah gij. Noba rija mesina rufoukou jah suma rut rejrej Petrus noba ribisa rot Tabita. Rua rucunc meisoufa onggarTabita eb nou rua sis fob gu ofa.

⁴⁰ Beda Petrus obk rua nomnaga jeska morongsuegens koma. Beda ofa es okeibi gu mebi noba om eiteij gu Allah. Nou onggarofa om eiteij oisa fob, beda ofa oh odou gu mar agos koma noba agot oida, "Tabita, bidebecki!" Beda Tabita ohoda eiteij noba ek Petrus, beda ofa edebecki.

⁴¹ Beda Petrus agei efen etma noba oroun ofa jeskaseda ot. Beda ofa ois gu rua onggarururu Yesus jah suma jera rija mesina insa koma tein, beda ofa aha Tabita onggar emfena ebah sons gu rua.

⁴² Rusnok riflesij moguma rot mar insa koma rejrej monuh Yope, jefeda rusnok rufoukou rururu Yesus gij monuh insa koma tein.

⁴³ Petrus eker jah suma erek mona ofoukou deika jera osnok egens onggga ofoka Simeon. Simeon koma erek osnok egens onggga ontunggom mar jeska sapi ofos.

10 ¹ Osnok egens onggga ofoka Kornelius bera eker gij kota Kaisarea. Ofa erek Yahudi guru noba efen ofoka aksa erek kapten egens onggga ofoka ereij keingg tentarer rufok wuntin egens. Ofa jera efen tentarer insa koma rujga jeska monuh Italia.

² Ofa jera rusnok nomnaga onggga ringker jera ofa rugif gu Allah tein. Noba ofa otunggom mar onggga ereita Allah odou eskeira rot. Koma bera, ofa ofij rusnok Yahudi onggga rufojingki. Noba orofosut mona bera ofa om eiteij gu Allah.

³ Gij mona juens erek aras orgomu moworu, beda ofa ek mar onggga Efena Ebsi Allah oncunc gu ofa gij odou efesi. Ofa ek malaikat egens jeska Allah en noba ois gu ofa oida, "Kornelius!"

⁴ Kornelius ohobut malaikat egens koma rot emeesa eteb, noba agot oida, "Akeina, meidu?" Beda malaikat koma agot gu ofa oida, "Allah eg buga rot mar onggga bua bum biteij rot gu Ofa fob. Noba Ofa ocunc odou onggga oufamofa skoita bua jeska bua bumfij rusnok onggga rufojingki tein.

⁵ Ebeibeyaif bubk rusnok egema jah kota Yope jeskaseda rujois gu osnok egens onggga ofoka Simon Petrus.

⁶ Ofa eker jera osnok egens onggga ofoka Simon. Simon efen mod onggga ot jah mei mojomu efei efembra. Simon koma efen efarur erek otunggom mar jeska sapi ofos."

⁷ Nou onggga malaikat egens koma agot mar oisa fob, beda Kornelius ois gu gosnok gegeka onggga

gomfij ofa jera tentara egens onggga odou ocosu efei ahtah.

⁸ Kornelius efesij gu rua rot mar nomnaga onggga ofa engk jeska malaikat egens insa koma. Beda ofa obk rua jah kota Yope jeskaseda ruhca Petrus.

⁹ Erek monog deika nou mowa ot deis ros, beda rua onggga Kornelius ombkir koma rujowa gu moroju osuwu ros, noba ai juens beda rua rumoira gij kota Yope. Gij mona insa koma tein bera Petrus ejeker jah skida mod onggga ofa engker gij. Mod koma ofos erek edeider. Ofa eja jah skida jeskaseda om eiteij gu Allah jah suma.

¹⁰ Askesi ofa eker jah suma ros, beda mosona ok ofa fob, jefeda ofa obk osnok egens jeskaseda esejah maat nou ofa. Nou onggga osnok egens koma ensejah maat ros, beda ainsa koma tein Tuhan ocunc mar gu Petrus gij odou efesi.

¹¹ Beda Petrus ek mar erek mebaga ohoda, noba ofa tein ek mar erek mohkowu eteb onggga rimein fogora onsorora jah mebi.

¹² Noba gij mohkowu egens koma bera ofa ek mar ofoukou erek mar onggga efen aki tohkuru, jera mar onggga era otkonu erecira erek magosu. Noba ofa ek mem ofoukou jera mar enjineg tein.

¹³ Beda ofa eg oga egens onggga agot oida, "Petrus, bidebecki noba buina marska kef beda bit ojgomu."

¹⁴ Beda Petrus oroun oida, "Tuhan guru, jeska mar koma erek maat onggga oska. Enadaj nou didif dit maat onggga ebireira erek koma guru! Jeska mefmen runa ensis riyahahir joug memef jeskaseda menet maat erek koma guru."

¹⁵ Tina oga egens koma oroun gu ofa oida, "Enadaj nou bua bijeka marska insa koma erek oska guru,

jeska Allah bera oncunc oida maat insa koma bera erek oufamofa ojgomu."

¹⁶ Tuhan ocunc mar insa koma gu Petrus gij odou efesi erek ofosma juomu fob. Beda Petrus enek mar insa koma deika guru.

¹⁷ Petrus odou eineina gij mar insa koma efen ofou. Noba askesi ofa osujohu noba ejekjeka odou rot mar insa koma ros, beda rusnok onnga Kornelius omobkir runjowa gu mod onnga Simon engker gij.

¹⁸ Beda rua rijeka gu rusnok oida, "Osnok egens onnga ofoka Simon Petrus bera eker jera iwa jah sif ei?"

¹⁹ Ainsa koma tein Petrus odou osujohu rot mar onnga engk insa koma efen ofou ros, beda Efena Ebsi Allah agot gu ofa oida, "Ei, Petrus! Rusnok rugomu ruhca bua.

²⁰ Bua bujuj ebeirens noba binemeesa rot rua guru. Bua buroru rua ojgomu, jeska Didif bera onnga dumbk rua koma skoita bua fob."

²¹ Jefeda Petrus ojuj jah mebi noba agot gu rua oida, "Didif bera onnga iwa inohca. Iwa in rot meidu?"

²² Rua ruroun oida, "Ebirfaga tentarer egens onnga ofoka Kornelius bera onobk memef skoita bua jah sif. Ofa erek osnok egens onnga odou osowejameja eteb, noba ofa ougif gu Allah tein. Noba rusnok Yahudi rufoukou tein rudou os ofa erek eteb. Malaikat egens jeska Allah agot gu ofa oida ofa erejgei bua jeskaseda bin jah efen mod, beda ofa emeg mar meidu onnga bua bimagot rot gu ofa si."

²³ Jefeda Petrus oroun rua noba rua rahca gij Simon efen mod nou motu insa koma. Erek monog rahah tentena, beda Petrus ororu rusnok insa koma jah

kota Kaisarea. Rusnok rineya onggga rururu Yesus gij kota Yope rija morototuma jera rua tein.

²⁴Rua ricira erek motu egens beda risaga gu monuh Kaisarea. Beda Kornelius ohoturu efen rusnok nomnaga jera efen mohujir gij efen mod efesi, jeska ofa ororu eimofoj rot Petrus.

²⁵Nou onggga Kornelius engk Petrus ensaga fob, beda Kornelius ojordosu ofa jah moroju. Beda ofa es okeibi gu mebi noba ougif gu Petrus. Ofa osujohu oida Petrus erek osnok egens onggga ebsi komowa eteb.

²⁶Tina Petrus oku etma noba agot gu ofa oida, "Bidebecki ojgomu, jeska didif tein dusnok giskini erek bua."

²⁷Askesi Petrus jera Kornelius gemfesij mar moguma ros, beda goga goira jah mod efesi. Beda Petrus ek, tina rusnok rufoukou rumohoturuma jah suma fob.

²⁸Beda ofa agot gu rua oida, "Iwa tein ijginaga rot oida, ororu agama Yahudi erebent bera enadaj nou memef onggga Yahudi meker erek egens era mineresesema tein jera rusnok enjgineg guru. Jeska memef mosujohu rot oida rusnok onggga Yahudi guru bera rerin mar onggga oska ojgomu. Tina ebeibeyaif Allah oncunc gu didif gij dudou efesi fob oida enadaj nou didif dusujohu rot mar erek koma deika guru.

²⁹Jeska gij mona onggga Tuan ois gu didif jeskaseda din jah sif, beda didif dudou onokum rot guru. Jefeda ebeibeyaif didif dudou os dijeka gu bua oida bua buis gu didif jeskaseda din rot meidu."

³⁰Beda Kornelius agot gu Petrus oida, "Erek mona tohkuru fob, didif dum diteij gij dedin mod erek moworu fob. Beda ainsa koma tein didif dik mar erek

osnok orna egens ot jah dudou. Ofa ergi meisoufa onnga erek efesa eteb.

³¹ Beda osnok orna egens koma agot gu didif oida, 'Kornelius, Allah eg buga rot mar onnga bum biteij rot gu Ofa fob. Noba Ofa odou eskeira rot bua jeska bua bumfij rusnok onnga rufojingki.

³² Ebeibeyaif bubk rusnok rineya jah kota Yope jeskaseda rujois gu osnok egens onnga ofoka Simon Petrus. Ofa eker jera osnok egens onnga ofoka Simon. Simon efen mod onnga ot jah mei mojomu efei efembra. Osnok egens koma efen efarur erek otunggom mar jeska sapi ofos.'

³³ Jefeda didif dumbk rusnok ebeirens jeskaseda rujoroun bua jah sif. Noba bua budou eriaga eteb jeska bua bin skoita didif fob. Jefeda memef nomnaga memohoturuma erek egens nou Allah fob. Noba memef mesejah nou meg mar nomnaga onnga Tuhan Allah obk bua rot jeskaseda bagot gu memef."

³⁴ Beda Petrus agot oida, "Ebeibeyaif didif dudou ebriyi gij rot tenten oida Allah odou okora rot rusnok nomnaga, koma erek rusnok Yahudi jera rusnok onnga Yahudi guru tein.

³⁵ Ofa odou okora rot rusnok gij monuh nomnaga onnga rugif gu Ofa noba onnga rita mar onnga oufamofa oigomuja.

³⁶ Iwa ijginaga rot oida Allah bera eita efen oga onnga oufamofa gu rusnok Israel sis fob. Allah oga onnga oufamofa koma bera onnga ocunc gu rusnok nomnaga rot teinefa rua rimeita eiteij ah onnga efeinah jeska Yesus Kristus. Beda Allah omoroun rua erek efen rusnok. Yesus koma bera erek Tuhan nou rusnok nomnaga.

³⁷ Iwa tein ijginaga rot mar onnga Ofa ontunggom sismeni gij monuh Galilea, beda rejrej monuh Yudea tein. Mar insa koma ororu mona onnga Yohanes eita baptis gu rusnok.

³⁸ Iwa tein ijginaga oida Allah bera oncunc Yesus onnga ojga monuh Nazaret. Noba Ofa eita owesa efek eteb jera Efena Ebsi gu Yesus jeskaseda Ofa otunggom mar onswos ofoukou. Noba Ofa ecira rejrej monuh ofoukou beda Ofa otunggom mar onnga ongoska eteb erek eita eskeira gu rusnok onnga Bilis ot keingg ojgomuja. Ofa otunggom mar erek koma jeska Allah bera eker desi Ofa.

³⁹ Didif jera dedin edohujir onnga setka kungkob erfens bera mek gu mesinsa meiteij rot mar nomnaga onnga Ofa ontunggom rejrej monuh Yahudi jera gij kota Yerusalem tein. Erek koma tina rusnok runtob Ofa tumu mega salib beda Ofa agos.

⁴⁰ Tina gij mona juomu deika fob, beda Allah eita owesa efek gu Ofa jefeda Ofa edebecki jeska agos. Beda Allah ocunc Ofa gu rusnok rufoukou tein.

⁴¹ Allah onocunc Ofa gu rusnok Yahudi nomnaga guru, tina gu memef onnga Allah oncunc gij mona onnga sismeni jeskaseda memef mefesij gu rusnok enjineg rot mar insa koma onnga memef mek gu mesinsa meiteij. Memef mej mei noba met maat morototuma jera Ofa gij mona onnga Ofa endebecki jeska agos fob tein.

⁴² Noba Ofa obk memef jeskaseda mefesij rot Oga onnga oufamofa insa koma gu rusnok nomnaga. Noba memef mefesij gu rusnok oida Yesus koma esma ofoka onnga aksa eteb jeska Allah jeskaseda Ofa oga ojga rot rusnok nomnaga osok gij idu bera onnga emesma okum jeska Allah noba idu bera

ongga emesma oufamofa jeska Allah tein. Koma rot rusnok nomnaga onggara rifena ebah ros jera rusnok nomnaga onggara ranggos fob tein.

⁴³ Sis fob bera nabi-nabi nomnaga rimfesij mar osok gij Yesus. Rua ragot oida erek rusnok rudou ororu Yesus Kristus rot tenten, beda Allah omosuna rot rerin mar onggara oska jeska rudou efesi oisouska Yesus esinsa efen owesa efek."

⁴⁴ Askesi Petrus emfesij mar insa koma ros, beda ainsa koma tein Efena Ebsi Allah ojuj noba eker jera rua nomnaga onggara ragosuit mar onggara Petrus enagot koma.

⁴⁵ Rusnok Yahudi onggara rururu Yesus fob noba onggara rincira morototuma jera Petrus jeska kota Yope rig rusnok insa koma nomnaga rifesij mar noba risitit gu Allah gij oga enjgineg onggara rusnok koma risinsa rinejginaga rot enesi. Mar onswos insa koma en jeska Efena Ebsi Allah. Jefeda rusnok Yahudi insa koma rudou ousaha eteb jeska koma orocunc rot oida Allah eita Efena Ebsi gu rusnok enjgineg onggara erek Yahudi guru tein fob.

⁴⁶ (10:45)

⁴⁷ Beda Petrus agot oida, "Iwa ik rusnok kef! Rua tein risma Efena Ebsi Allah erek memef tein! Jefeda adaij nou rua rita baptis noba rururu Yesus ojomu."

⁴⁸ Beda Petrus obk rua jeskasada rita baptis gij Yesus Kristus ofoka. Nou onggara rua rita baptis fob, beda rua ruis gu Petrus jeskasada ofa eker jera rua erek mona orgomu deika fog.

11 ¹ Yesus efen ruforoker jera rusnok nomnaga onggara rururu Yesus rejrej monuh Yudea rig oida rusnok onggara Yahudi guru bera rururu Allah oga onggara oufamofa fob.

² Gij mona onga Petrus onksons jah Yerusalem fob, beda rusnok Yahudi onga ruroru Yesus fob, tina onga ruroru Yahudi erebent rot ahais ros, bera rudou okum rot ofa.

³ Rua ragot gu ofa oida, "Petrusa. Teinefa fogora bua binekrsa rot mifmin agama erebent fogora bingker morototuma jera rusnok onga erek oska erek komo! Jeska rua enerek Yahudi guru. Noba onga oska ekrsa bera bua bit maat morototuma jera rua tein!"

⁴ Erek koma jefeda Petrus efesij gu rua rot koisoisa osok gij mar nomnaga onga rua rinjeka gu ofa rot.

⁵ Ofa agot mar erek kef: "Gij mona juens bera didif dingker gij kota Yope. Beda didif dujom diteij jah skida mod monggosum ofos onga edeider. Beda ainsa koma tein Tuhan Allah ocunc mar gu didif gij dudou efesi. Didif dik mar erek mohkowu eteb onga rimein fogora onsorora jah mebi. Mohkowu koma en noba ah doida didif.

⁶ Nou onga didif dik gij mohkowu efesi insa koma, beda didif dik marska ofoukou erek mar onga efen aki tohkuru, jera mar onga era otkonu erecira erek magosu, noba dik mem ofoukou jera mar enjgineg tein onga angh gij mohkowu efesi insa koma.

⁷ Beda didif dig oga egens onga agot oida, 'Petrus, bidebecki noba buina marska koma beda bit ojgomu.'

⁸ Tina didif duroun gu Ofa oida, 'Tuhan guru, jeska maat koma bera erek mar onga oska. Jefeda didif dinet maat onga ebireira erek koma guru! Jeska mefmen runa ensis riyahahir joug memef jeskaseda menet maat erek koma guru.'

⁹ Tina oga insa oroun gu didif oida, 'Enadaij nou bua bijeka maat insa koma erek oska guru. Jeska Allah bera oncunc oida maat koma bera oufamofa ojgomu.'

¹⁰ Didif dik mar insa koma gij dudou efesi rot ofosma juomu, beda dinek mar insa koma deika guru.

¹¹ Gij mona insa koma tein rusnok rugomu onnga erek Yahudi guru rinjesaga keingg mod onnga dingker gij insa koma. Osnok egens jeska monuh Kaisarea bera onobk rua skoita didif.

¹² Beda Efena Ebsi Allah ocunc gu didif gij dudou efesi rot oida dudou enemeesa guru, noba duroru rua ojgomu. Noba dedin edohujir onnga cinja erfens tein ruroru didif jah kota Kaisarea. Noba memef nomnaga moira gij mod onnga osnok egens onnga ofoka Kornelius efen.

¹³ Beda Kornelius koma efesij gu memef rot teinefa ofa ek mar gij odou efesi erek malaikat egens onnga ot jah ofa odou noba agot gu ofa oida, 'Bubk rusnok rineya jah kota Yope jeskaseda rujois osnok egens onnga ofoka Simon Petrus.

¹⁴ Ofa emefesij gu bua rot mar onnga emeita eiteij ah onnga efeinah gu bua jera bebin rusnok nomnaga onnga ringker jera bua.' "

¹⁵ Beda Petrus agot deika oida, "Askesi didif dimfesij mar gu rua ros, beda ainsa koma tein Efena Ebsi Allah ojuj jeska mebaga noba eker desi rua, morototuma erek Efena Ebsi eker desi mimif gij mona onnga sismeni.

¹⁶ Erek koma beda dudou ah keingg rot mar onnga Tuhan anggot gu memef sis fob oida, 'Yohanes eita baptis gu rusnok erek giskini ojgomu, tina iwa imeita baptis oisouska Efena Ebsi Allah.'

¹⁷ Jefeda koma orocunc rot koisoisa gu mimif oida, Allah eita Efena Ebsi gu rusnok onnga Yahudi guru morototuma erek Ofa eita gu mimif onnga Yahudi gij mona onnga mimif muroru Tuhan Yesus Kristus oga. Erek koma jefeda enadaij nou didif dagot joug mar onnga Allah ondou os rot nou rusnok enjgineg guru."

¹⁸ Nou onnga rusnok Yahudi insa koma ringg mar onnga Petrus emfesij gu rua fob, beda rudou onokum rot ofa deika guru. Beda rua risitit gu Allah noba ragot oida, "Erek koma jefeda Allah tein eita efekesa gu rua onnga Yahudi guru, jeskaseda rua tein rimeesa joug rerin mar onnga oska noba risma eiteij ah onnga efeinah tein."

¹⁹ Gij mona onnga rusnok ranggob Stefanus fob, beda rua tein rita mar okum gu rusnok enjgineg onnga ruroru Yesus fob. Jefeda rua insa koma ruku noba riberbera gij monuh enjgineg. Rineya onnga rungku jah monuh Fenisia ni, rineya onnga rungku jah motowohu Siprus ni, rineya tein onnga rungku jah kota Antiokhia ni. Rua nomnaga riflesij rot Allah oga onnga oufamofa gu rusnok onnga erek Yahudi guru gu monuh nomnaga onnga rungku gij.

²⁰ Tina rineya onnga ruroru Yesus fob jeska motowohu Siprus jera monuh Kirene rija jah kota Antiokhia noba rua riflesij rot Allah oga onnga oufamofa osok gij Yesus gu rusnok jah suma onnga erek Yahudi guru.

²¹ Noba owesa efek jeska Allah ah gu rua, jefeda rusnok riskemba ruroru Yesus noba ruh rudou efesi skoita Tuhan gij monuh insa koma.

²² Rusnok rufoukou riflesij moguma rot mar onnga rua insa koma runtunggom ojgomuja onjoros rua onnga ruroru Yesus gij kota Yerusalem tein rig rot

mar insa koma fob. Jefeda rua rubk rerin ruhuj egens onnga ofoka Barnabas skoita rusnok insa koma gij kota Antiokhia.

²³ Gij mona onnga Barnabas ensaga jah suma fob, beda ofa odou efaga ouka eteb rot jeska ofa ek oida Allah eita oufamofa eteb gu rusnok onnga ruroru Yesus gij kota insa koma fob. Beda ofa oftufu rua rot ahais jeskaseda rua ruroru Yesus rot tenten ojgomuja.

²⁴ Barnabas koma bera erek osnok egens onnga odou ocosu efei ahtah eteb. Noba owesa efek jeska Efena Ebsi Allah bera ah gu ofa. Noba ofa tein ororu Yesus rot tenten fob. Jefeda oisouska mar onnga ofa oftufu noba ontunggom fob, bera rusnok rufoukou runroru Yesus ojgomuja.

²⁵ Beda Barnabas ojohca Saulus gij kota Tarsus.

²⁶ Gij mona onnga ofa orodosu Saulus fob, beda ofa oroun Saulus jah kota Antiokhia jeskaseda goga goftufu rusnok rufoukou insa koma onnga ruroru Yesus fob. Goga geker morototuma jera rua gij kota Antiokhia gij tahun egens. Noba gij kota Antiokhia insa koma bera rusnok enjgineg rijeka rua onnga ruroru Yesus fob oida, Rua onnga Kristen.

²⁷ Gij mona insa koma bera nabi-nabi onnga Kristen rineya rin jeska kota Yerusalem jah kota Antiokhia.

²⁸ Nabi egens jeska rua onnga ofoka Agabus. Ofa agot oisouska Efena Ebsi gu rua onnga Kristen oida gij mona kahma beda mosona eteb omok rusnok gij monuh ofoukou si. (Noba gij mona kahma, beda mar koma ecira jeni Agabus agot fob. Koma gij mona onnga Klaudius ejerek raja Kaisar onnga ofoka ereij keingg rusnok gij monuh Israel nomnaga).

²⁹Jefeda rua nomnaga onnga ruroru Yesus gij kota Antiokhia rudou egens nou ruhoturu rerin fifi oknama fogora risa skoita rerin ruhujir onnga ruroru Yesus gij monuh Yudea jeskaseda ringk maat. Rua rikeba fifi koma ororu jeni osnok egens egens efen ofora efek.

³⁰Nou onnga rua runghoturu fifi insa koma fob, beda rua rita fifi koma gu Barnabas jera Saulus jeskaseda goga gorka fifi insa koma gu ebirfager rusnok Mod Ari onnga ruroru Yesus gij monuh Yudea.

12¹Gij mona insa koma tein raja Herodes obk efen rusnok jeskaseda ragei rusnok onnga ruroru Yesus gij kota Yerusalem fogora omofra mar okum keingg rua.

²Ofa tein obk efen tentarer jeskaseda rira meiteb riragob Yakobus onnga Yohanes efen mokora fogora agos.

³Herodes ek, tina rusnok Yahudi onnga runororu Yesus guru bera rudou eskeira eteb rot ofa jeska ofa otunggom mar onnga ofogog insa koma skoita Yakobus. Jefeda ofa obk efen tentarer deika jeskaseda ragei Petrus tein. Ofa otunggom mar insa koma gij mona eteb egens onnga ruis ofoka Paskah.

⁴Nou onnga rua ranggei Petrus fob, beda rua raha ofa gij mod oskusk fog. Beda Herodes obk efen tentarer ebic tohkuru jeskaseda rut joug Petrus rot ahais. Tentara Ebic egens erek tentara rufok tohkuru. Ofa osujohu rot oida Petrus ah gij mod oskusk jah suma onjoros mona onnga eteb insa koma omoisa fog. Beda ofa omoroun Petrus noba omoga ojga rot ofa erek teinefa jah rusnok Yahudi rudou nomnaga.

⁵Jefeda rua raha Petrus gij mod oskusk ojgomu. Tina rua onnga ruroru Yesus gij Yerusalem rum riteij rot ahais gu Tuhan nou Petrus ojgomuja.

⁶ Gij motu juens bera Petrus ahca gij mod oskusk rot efen etma onnga rirakid fob. Noba tentara gegeka gaha ofa gu gefekesa. Noba tentarer rineya onnga runt joug montoj mod oskusk koma. Noba gij monog rahah tentena, beda Herodes omoroun Petrus fogora omoga ojga rot Petrus erek teinefa jah rusnok rudou.

⁷ Gij motu insa koma ros beda Petrus ah ahaingkongka fob. Beda malaikat egens jeska Allah orogna rot efesa erek eisa eteb noba ot desi Petrus. Beda ofa ebs Petrus noba agot oida, "Ei Petrus! Bidebecki ebeirens!" Ainsa koma tein rantai onnga angh tumu Petrus etma ohoda noba esiri jeska.

⁸ Beda malaikat egens koma agot oida, "Birgi meisoufa bebin noba birakid mek meifos tein." Beda Petrus ororu malaikat egens koma oga ojgomu. Beda malaikat egens koma agot deika oida, "Buk mohkowu bebin noba buroru didif ojgomu."

⁹ Jefeda Petrus ororu malaikat egens koma jeska morongsu gij mod oskusk. Tina Petrus enejginaga rot oida malaikat onnga enagot mar gu ofa bera erek mar onnga tenten guru. Jeska ofa osujohu rot oida mar insa koma bera erek mar onnga Tuhan oncunc gu ofa gij odou efesi ojgomu.

¹⁰ Erek koma beda goga gerabj tentarer onnga runt joug montoj onnga egens. Beda goga gerabj tentarer onnga runt joug montoj onnga egeka tein. Beda goga genjesaga gu montoj besi onnga omf joug mod oskusk nomnaga. Tina montoj koma ohoda jeska rua ojgomu, beda goga gorogna noba gecira morototuma erek ai yes fog. Beda malaikat egens koma eseseifa jeska Petrus.

¹¹ Beda ainsa koma tein Petrus odou ebriyi gij mar insa koma nomnaga onnga ofa engk fob. Noba ofa

agot gu esinsa oida, "Ebeibeyaif didif dijginaga rot tenten fob oida Tuhan bera onobk malaikat egens koma jeskaseda osuwa didif jeska Herodes efen owesa efek jera mar ofogog onnga rusnok Yahudi tein rudou os rot Herodes otunggom skoita didif!"

¹² Nou onnga Petrus odou ejginaga rot tenten oida Allah oroun ofa jeska mod oskusk fob, beda ofa eja jah mod onnga Maria efen. Maria koma bera erek Yohanes efen mosu. Noba Yohanes bera onnga rusnok rijeka ofoka Markus tein. Gij motu insa koma tein bera rusnok rufoukou onnga ruroru Yesus rumohoturuma gij mod egens jeskaseda rum riteij gu Allah rot Petrus.

¹³ Noba askesi rua rum riteij ros, beda Petrus ensaga gu mod insa koma noba ofa engkingk montoj jah mebah. Beda ojaga egens onnga ofoka Rode ojohoda montoj. Ofa erek osnok egens onnga omfij gij mod egens koma.

¹⁴ Nou onnga ofa ojohoda montoj koma, beda ofa eg oga egens koma. Beda ofa osujohu oida koma bera erek Petrus oga. Jefeda ofa odou efaga ouka eteb, tina ofa onohoda montoj jeska Petrus enesi. Tina ofa oira ebeirens gij morongsu, beda agot gu rua oida, "Petrus bera onot jah mebah kef!"

¹⁵ Tina rua ragot gu ofa oida, "Merei ok bua fob ei." Tina ofa agot deika oida, "Guru! Koma tenten! Petrus bera onot jah mebah!" Jefeda rua ragot gu ofa oida, "Koma bera malaikat egens onnga ot joug Petrus ojgomu!"

¹⁶ Tina Petrus onot jah mebah noba engkingk montoj ojgomuja. Jefeda rua ruhoda montoj beda rik, tina tenten Petrus bera koma. Beda rua rudou ousaha eteb rot!

¹⁷ Erek koma beda Petrus era etma ereni gu rua oida, "Iwa iker toumou fog jeskasada didif difesij rot teinefa Tuhan oroun didif jeska mod oskusk koma." Nou onnga ofa emfesij rot mar insa koma fob, beda ofa agot gu rua deika oida, "Iwa ijefesij rot mar kef gu Yakobus jera rusnok enjgineg onnga rururu Yesus tein." Beda ofa orogna jeska mod egens insa koma noba eja jah monuh enjgineg.

¹⁸ Erek koma beda gij rahah tentena tentarer onnga runt joug mod oskusk insa koma rik, tina Petrus eneker desi rua deika guru. Jefeda rudou eineina gij noba rimejekema rot ruga ofoukou, jeska rua rinejginaga rot meidu onnga ofra Petrus guru.

¹⁹ Jefeda Herodes obk efen tentarer jeskasada ruhca Petrus. Tina rua rinek ofa deika guru. Beda Herodes obk rusnok enjgineg jeskasada rijeka joug tentarer insa koma onnga runt joug Petrus gij mod oskusk. Beda ofa obk rusnok jeskasada ragob tentarer insa koma ojomu. Nou onnga koma oisa fob, beda Herodes eja jeska monuh Yudea noba ejeker gij kota Kaisarea.

²⁰ Raja Herodes otkonu oska eteb skoita rua onnga kota Tirus jera kota Sidon. Jefeda rusnok rineya jeska kota egeka insa koma rija morototuma skoita Herodes. Tina gij mona onnga rua rinefesij mar jera Herodes enesi, beda rua rija skoita osnok egens onnga omfij Herodes rot iskusk onnga ofoka Blastus. Beda rua rirejgei ofa jeskasada ofij rua rot mar onnga rimagot skoita Herodes. Beda rua nomnaga rija skoita Herodes noba ruis gu ofa jeskasada ofa onotkonu oska rot rua deika guru. Rua rudou os erek koma jeska rusnok onnga ringker gij kota egeka insa

koma bera risma maat nomnaga jeska Herodes efen monuh.

²¹ Gij mona onnga raja Herodes emagot rot, beda ofa ergi meisoufa onnga ongnoska yahi noba ejeker gij efen kursi jeskaseda efesij mar gu rusnok.

²² Nou onnga rusnok rufoukou jah suma ringg mar onnga Herodes anggot gu rua fob, beda rua ruis rot ruga eteb oida, "Oga enerek rusnok ruga ojgomu guru. Tina efen oga kef erek oga jeska Allah esinsa!"

²³ Gij mona insa koma tein, Allah obk malaikat egens jeskaseda en noba ofra mar okum keingg Herodes, jeska ofa ofra esinsa ofoka erek aksa eteb, tina ofa onougif gu Allah guru. Jefeda Herodes maren eteb, noba mofumfou et ofa fogora ofa agos.

²⁴ Gij mona insa koma bera rusnok rufoukou ringg rot Allah oga onnga oufamofa, jefeda rusnok onnga rumororu Yesus rija erek ekirsa odudu dokun deika.

²⁵ Gij mona onnga Barnabas jera Saulus gontunggom mar oisa fob gij kota Yerusalem, beda goga goksons jah kota Antiokhia. Goga goroun osnok egens onnga ofoka Yohanes Markus morototuma jera goga.

13 ¹ Mod Ari onnga angh gij kota Antiokhia bera efen rusnok rufoukou onnga erek nabi-nabi jera Guru-Guru. Noba rineya onnga rirek Guru jah suma bera rufoka Barnabas ni, Simon onnga rijeka ofoka Isok Ahta tein ni, Lukius onnga jeska Kirene ni, Menahem onnga raja Herodes oroun erek efen efesa ni, jera Saulus ni.

² Gij mona juens bera rua rinet maat guru jeskaseda rugif gu Allah noba rum riteij ojgomu. Beda gij mona insa koma Efena Ebsi Allah agot gu rua oida, "Iwa icunc Barnabas jera Saulus nou Didif jeskaseda goga

geita mar jeni meidu onggga Didif dimagot rot gu goga ojgomu."

³Jefeda rua rinet maat guru, tina rum riteij gu Tuhan ojgomu. Beda rua raha ritma esij Barnabas jera Saulus beda rum riteij gu Allah deika jeskaseda Allah eita oufamofa gu goga. Beda rua rubk goga jeskaseda rija gu monuh enjineg noba ruftuftu rot Allah oga gu rusnok jah suma.

⁴Efena Ebsi Allah obk Barnabas jera Saulus jeskaseda goga geja jah kota Seleukia. Beda goga geifef meg meifeni jah motowohu Siprus.

⁵Gij mona onggga goga gensaga jah gu kota Salamis onggga angh gu motowohu Siprus, beda goga gefesij rot Allah oga gu rusnok gij mod onggga rusnok Yahudi rum riteij gu Allah gij. Yohanes Markus tein ororu goga jeskaseda ofij goga.

⁶Rua ricira gij motowohu insa koma onjoros rua rinsaga gu kota Pafos. Jah suma bera rua rurodosu osnok Yahudi egens onggga ofoka Bar Yesus (Ofa efen ofoka gij Yunani oga erek Elimas). Ofa erek mendersi, noba ofa tein ofra esinsa erek nabi egens.

⁷Ofa erek Gubernur Sergius Paulus efen mohuj egens tein. Gubernur insa koma erek osnok egens onggga odou efesis tein. Jefeda ofa ois gu Barnabas jera Saulus jeskaseda goga gen noba gefesij rot Allah oga gu ofa tein.

⁸Tina Elimas odou os eretei rot mar onggga goga goftuftu, jefeda ofa ojosos Gubernur insa koma jeskaseda ofa onororu Yesus guru.

⁹Erek koma tina Saulus, onggga rijeka ofoka Paulus tein, esma owesa efek jeska Efena Ebsi Allah. Beda ofa ohobut mendersi insa koma, beda agot oida,

¹⁰ "Bua birek Bilis ojgomu, jeska bua bucuwei mar gu rusnok ojgomuja. Bua budou bera ofogog skoita mar nomnaga onnga erek ongnoska! Noba bua bukoja rot mar onnga Allah ontunggom onnga erek tenten fogora ocuwei mar rot gu rusnok enjgineg ojgomuja.

¹¹ Erek koma tina ebeibeyaif bua bimek mar okum onnga Allah omofra keingg bua rot si. Jefeda gij mona ofoukou bera bua bebin biteij ofou ojgomuja!" Noba ainsa koma tein Elimas eiteij eja erek ofou fob, jefeda ofa enek mar rot koisoisa deika guru. Ofa ek motkobah ojgomu, jefeda ofa ohcohca rusnok jeskaseda ragei efen etma noba ruroun ofa.

¹² Nou onnga Gubernur ek rot mar insa koma, beda ofa tein ororu Yesus, jeska ofa odou ousaha eteb rot mar onnga Paulus omftuftu gu ofa rot Allah oga.

¹³ Paulus jera efen mohujir rifef meg meifeni egens beda rija jeska Pafos. Rua rifef meg meifeni insa koma jah kota Perga onnga angh gij monuh Pamfilia. Nou onnga rua rinsaga jah suma beda Yohanes Markus ekeba jeska rua beda oksons jah kota Yerusalem.

¹⁴ Beda goga geja jeska kota Perga noba gecira ojgomuja onjoros gensaga gij kota Antiokhia onnga angh jah monuh Pisidia. Gij mona onnga Sabat, beda goga goira gij mod onnga rusnok Yahudi rum riteij gu Allah gij.

¹⁵ Nou onnga rusnok riflesij jeska surat Musa jera surat nabi-nabi oisa fob, beda ebirfager mod insa koma rubk rusnok jeskaseda rijeka gu Paulus jera Barnabas oida, "Edkorerga, erek goga godou os geisisi joug mar gu memef, beda goga gagot rot ojgomu."

¹⁶ Jefeda Paulus edebecki beda ofa era etma ereni gu rua oida, "Edkorer jera edkoser onnga Israel, jera iwa enjineg jah sif onnga yugif gu Allah tein. Iwa nomnaga ig mar onnga didif dimagot kef:

¹⁷ Allah, onnga mimif Yahudi mugif gu, bera oncunc mifmin mimower sis fob noba Ofa ofij rua fogora rua rija erek rusnok onnga rufoukou doska gij mona onnga rua ringker monuh Mesir ros. Tina rua riker jah suma erek rua onnga rusodosa. Beda oisouska Allah efen owesa efek eteb bera Ofa oroun rusnok jeska monuh Mesir.

¹⁸ Noba gij mona onnga rua ringker gij monuh onnga owowa gij tahun rara setka tohkuru, bera rua rutunggom mar onnga oska ojgomuja. Tina Allah oin keingg odou efesi rot rerin mar onnga oska insa koma noba ocunc odou onnga eriaga skoita rua ojgomu.

¹⁹ Beda ofa ekemeji rusnok ebic cinja erfeka onnga enjineg jeska monuh Kanaan. Beda Ofa ekeba monuh insa koma gu rusnok onnga Israel jeskaseda rua riker gij mebi insa koma erek rerin rujga.

²⁰ Sis mona onnga rua riker gij monuh Mesir erek rusodosa onjoros mona onnga rua ruroгна jeska Mesir noba rijeker gu monuh Kanaan, mona insa koma nomnaga ecira erek tahun rara wuntin tohkuru noba setka cinja. Beda Allah ocunc ebirfager rufoukou nou rua. Rua rijeka ebirfager insa koma erek hakim. Hakim-hakim koma rufoka ereij keingg rusnok Israel ojgomuja onjoros Allah oncunc nabi Samuel, onnga erek hakim onnga osuira, nou rua.

²¹ Beda rua ruis gu Allah jeskaseda Ofa ocunc raja egens nou rua. Jefeda Allah ocunc Saul onnga Kis efen efesa jeska ebic Benyamin jeskaseda ejerek raja egens nou rua gij tahun rara setka tohkuru.

²² Tina nou onnga tahun setka tohkuru koma oisa fob, beda Allah aha ofa jeska erek raja. Beda Ofa ofra Daud erek raja deika nou rua. Noba Allah agot rot Daud erek kef oida, 'Didif dik oida Daud, onnga Isai efen efesa, bera erek osnok egens onnga dudou okora rot. Ofa emeita mar nomnaga jeni Didif danggot rot gu ofa si.'

²³ Allah anggen rot oida Ofa omocunc Daud efen medebeser egens jeskaseda en erek raja egens onnga emeita eiteij ah onnga efeinah gu rusnok Israel. Raja egens koma en fob. Noba Ofa koma bera ofoka Yesus.

²⁴ Gij mona onnga Yesus onosokeij efen efarur enesi, beda Yohanes agot gu rusnok onnga Israel rot sismeni oida, 'Iwa imeesa joug yeyin mar onnga oska fogora imeita baptis ojomu.'

²⁵ Beda doida mona onnga Yohanes emfarur rot omoisa, beda ofa agot gu rusnok oida, 'Erek iwa isujohu rot oida didif bera Kristus egens koma onnga emen jeskaseda eita eiteij ah onnga efeinah, tina koma bera tenten guru. Jeska Ofa onnga emeita eiteij ah onnga efeinah gu rusnok bera omokahma toij didif. Noba enadaij nou didif dusuwa mek meifos tumu Ofa efen aki tein jinaga tein guru.' "

²⁶ Beda Paulus agot gu rua deika oida, "Edkorer jera edkoser onnga runjuj jeska Abraham jera iwa enjineg tein onnga yugif gu Allah. Oga onnga oufamofa insa kef onnga en skoita mimif fob bera anggot rot teinefa mimif misma eiteij ah onnga efeinah.

²⁷ Tina rusnok onnga ringker gij kota Yerusalem jera rerin ebirfager nomnaga rudou enebriyi gij guru rot oida Yesus koma bera erek raja egens onnga eita

eiteij ah onggga efeinah gu rusnok. Noba rua tein rudou enebriyi gij surat jeska nabi-nabi onggga rua rimfesij orofosut mona onggga Sabat koma efen ofou erek meidu guru. Jefeda rua rita mar okum skoita Yesus ojomuja. Rua rutunggom mar erek koma, tina rudou enebriyi gij guru rot oida mar onggga rua runtunggom skoita Yesus bera ororu jeni mar onggga nabi-nabi ranggot rot sis fob ojomu.

²⁸ Rua rik, tina Yesus onotunggom mar onggga oska oskiyai tein guru. Tina rua ragot rot oida Ofa agos ojomu. Beda rua ruis skoita Gubernur Pilatus jeskaseda rua ragob Yesus ojomu.

²⁹ Noba gij mona onggga rua runtunggom mar insa koma nomnaga onggga nabi-nabi ranggot rot Ofa sis fob, beda rusnok enjineg rusuwa Ofa jeska mega salib noba risah efen efaga gij mamu efesi.

³⁰ Tina Allah eita efena ebah sons gu Ofa jefeda Ofa edebecki jeska agos.

³¹ Beda Ofa ocunc esinsa gij mona ofoukou gu efen rusnok onggga ruroru Ofa jeska monuh Galilea onjoros kota Yerusalem tein. Noba ebeibeyaif rua insa koma rinjefesij mar rot Ofa gu mimif onggga Israel fob.

³² Jefeda ebeibeyaif memef magot rot oga onggga oufamofa insa koma gu iwa tein. Oga onggga oufamofa koma bera onggga Allah anggen rot gu mifmin mimower sis fob. Noba Ofa eita oga insa koma gu mimif onggga runjuj jeska mifmin mimower. Koma bera, Ofa eita efena ebah sons gu Yesus fob. Noba raja Daud ongggu keingg gij surat Mazmur rot mar onggga Allah anggot gu efen efesa sis fob. Ofa agot oida, 'Bua bera dedin edesa. Noba gij mona deisef tein Didif ducunc gu rusnok oida Didif bera erek bebin mekeb.'

³³ (13:32)

³⁴ Allah eita efena ebah sons gu Ofa fob. Noba Ofa enagos deika guru. Noba mar onnga angh gij Mar Efeyi Ebsi bera ocunc rot mar insa koma onnga Allah anggot gu efen efesa erek kef oida, 'Mar onnga oufamofa noba ebsi komowa onnga Didif danggen rot gu Daud sis fob bera Didif dumotunggom nou Bua si.'

³⁵ Noba raja Daud tein agot rot mar onnga Yesus anggot gu efen meka gij surat Mazmur erek kef oida, 'Bua bumofij Didif, onnga direk bebin ebasa onnga ebsi komowa jeskaseda difaga enetefa gij monuh mar agos ojgomuja guru.'

³⁶ Gij mona onnga Daud anggot mar insa koma, beda ofa enagot mar insa koma rot esinsa efen efaga guru. Jeska gij mona onnga Daud ontunggom mar nomnaga onnga Allah anggot rot gu ofa fob, beda ofa tein agos. Noba efen efaga etefa gij moksufesi.

³⁷ Tina Yesus efen efaga enetefa guru, jeska Allah eita efena ebah sons gu fogora Ofa endebecki jeska anggos fob.

³⁸ Erek koma jefeda edkorer jera edkoser, didif dudou os jeskaseda iwa ijginaga rot tenten oida mar kef nomnaga onnga memef memfesij osok gij Yesus fob bera onnga orosuna mifmin mar onnga oska jeska mudou efesi.

³⁹ Enadaij nou iwa isma idou onnga efen mar onnga oska tein oisouska hukum Musa onnga iwa iroru jeni guru. Tina idu onnga ororu Yesus rot tenten fob, beda Allah omocunc ofa erek osnok egens onnga odou efen mar onnga oska oskiyai tein guru.

⁴⁰ Iwa isujohu rot iskusk osok gij mar onnga nabi-nabi ranggot jeska Allah jeskaseda mar koma enecirej iwa guru. Nabi-nabi koma ranggot oida,

⁴¹ 'Iwa onnga yuga oruh mar onnga Didif danggot, iwa ik rot iskusk fog. Jeska iwa idou omoubsaha rot mar onnga dumotunggom, tina iwa inoruru mar koma guri. Jefeda iwa imagos ojgomu. Jeska ebeibeyaif Didif duntunggom mar onswos, tina iwa isinsa inoruru mar koma guri. Noba erek rusnok enjgineg rumftuftu rot gu iwa tein, tina erek iwa idou okoja rot ojgomu.'
"

⁴² Nou onnga Paulus jera Barnabas genja jeska mod insa koma fob, beda rusnok rufoukou rirejgei goga jeskaseda goga goksons gij mona onnga Sabat deika fogora goftuftu mar koma deika gu rua sons.

⁴³ Nou onnga rusnok nomnaga rurogna jeska mod insa koma fob, beda rusnok rufoukou onnga Yahudi jera rusnok enjgineg tein onnga erek Yahudi guru rururu goga. Beda goga geisisi joug rua jeskaseda rua rururu Allah onnga eita oufamofa gu rusnok ojgomuja.

⁴⁴ Beda gij mona onnga Sabat deika rusnok riskembemba jeska kota insa koma rin jeskaseda rig mar osok gij Allah oga onnga Paulus jera Barnabas goftuftu gu rua deika.

⁴⁵ Nou onnga rusnok Yahudi ringk rusnok rufoukou onnga erek Yahudi guru rin jeskaseda rig rot Allah oga, beda rudou ejisei skoita Paulus jera Barnabas. Jefeda rua ruga oruh Paulus noba rua riseda Paulus oga rot mar onnga ofa oftuftu gu rusnok insa koma.

⁴⁶ Tina Paulus jera Barnabas genemeesa rot rerin ruga insa koma guru. Beda goga gagot gu rua oida, "Allah ombk magef jeskaseda marka efen oga onnga

oufamofa skoita iwa onggga Yahudi sismeni fog. Tina jeska erek iwa isinsa yukoja rot oga insa koma, jefeda koma erek iwa inodou os isma iteij ah onggga ah aibin guru. Jefeda magef maja jeska iwa noba marka Allah oga insa kef skoita rusnok enjgineg onggga erek Yahudi guru.

⁴⁷ Jeska Allah bera onobk magef noba Ofa agot erek kef oida, 'Didif dubk bua jeskaseda bija erek eisa onggga ejin tein gij rusnok onggga Yahudi guru rudou efesi fogora rusnok gij monuh nomnaga tein rimesma eiteij ah onggga efeinah.' "

⁴⁸ Nou onggga rusnok onggga Yahudi guru ringg mar insa koma, beda rudou efaga ouka eteb noba rua risitit rot Allah oga ojomu. Noba rua koma onggga Allah oncunc sis fob nou rimeita eiteij ah onggga efeinah runroru Yesus gij mona insa koma.

⁴⁹ Gij mona insa koma rusnok rufoukou riflesij rot Allah oga rejrej monuh insa koma nomnaga.

⁵⁰ Tina rua onggga Yahudi rusos rusnok enjgineg onggga erek rufoka aksa jera rujaga tein onggga rufoka aksa gij kota koma jeskaseda rua tein rutkonu oska skoita Paulus jera Barnabas fogora rikemeji goga jeska monuh insa koma.

⁵¹ Nou onggga Paulus jera Barnabas genja, beda goga gowusa mebi ofou jeska gokoda sismeni fog. Koma erek gorocunc gu rusnok insa koma oida goga gekik getma jeska mar okum onggga emen jeska Allah skoita rua. Beda goga gejejah monuh Ikonium.

⁵² Rua onggga ruroru Yesus jah kota Antiokhia bera rudou erirei eteb noba Efena Ebsi Allah eita owesa efek gu rua ojomuja.

14 ¹ Gij mona onggga Paulus jera Barnabas genjeker gij kota Ikonium fob, beda goga tein

goira gij mod egens ongg Yahudi rum riteij gij. Beda goga goftuftu rot iskusk jah suma. Jefeda rusnok Yahudi rufoukou jera rusnok ongg erek Yahudi guru tein ruroru Yesus gij mona insa koma.

²Tina rusnok Yahudi rineya ongg rudobu joug rua ongg ruroru Yesus bera rusos rusnok rufoukou ongg erek Yahudi guru jeskaseda rua tein rutkonu oska skoita rua ongg ruroru Yesus fob.

³Jefeda Paulus jera Barnabas geker dektek gij kota koma. Goga goftuftu mar osok gij Tuhan oga rot godou ongg enemeesa tein guru. Jefeda Tuhan ofij goga fogora eita owesa efek gu goga jeskaseda gotunggom mar onswos jera mar enjineg tein ongg eita rusnok rudou ousaha rot. Beda koma tein orocunc gu rusnok oida mar ongg goga gemfesij rot Allah oga koma bera erek tenten ojgomu.

⁴Tina rusnok ongg ringker gij kota koma bera rimekebema rot mar ongg goga goftuftu gu rua fob. Rineya ruroru Yahudi rerin erebent ros, noba rineya ruroru mar ongg Paulus jera Barnabas goftuftu gu rua.

⁵Jefeda rineya ongg rusnok Yahudi jera rerin ebirfager tein jera rineya ongg erek Yahudi guru tein rudou egens nou rufra mar okum keingg Paulus jera Barnabas. Jefeda rua rinsejah nou rira mamu rimeredi goga jeskaseda goga gagos ojgomu.

⁶Tina gij mona ongg Paulus jera Barnabas gengg rot mar insa koma, beda goga goku jah kota Listra jera kota Derbe ongg angh gij monuh Likaonia. Beda goga gecira rejrej monuh koma nomnaga tein.

⁷Noba goga gefesij rot Allah oga ongg oufamofa deika gij monuh insa koma.

⁸Osnok orna egens onggga aki ofumbohah sis mona onggga ofa onjuj jeska efen mosu bera eker gij kota Litra. Ofa enecira oskiyai tein jinaga guru jeska efen aki eriaga ojgomu.

⁹Gij mona onggga Paulus emfesij rot Allah oga, beda osnok egens insa koma eker jah suma noba oj osu nou mar nomnaga onggga Paulus enagot. Beda Paulus ohobut ofa noba ofa ejginaga gij odou efesi oida osnok egens koma osujohu rot oida Allah efen owesa efek onggga adaij nou eita eskeira gu ofa.

¹⁰Jefeda Paulus ois gu ofa oida, "Bua but aharuka ojgomu!" Beda ainsa koma tein osnok egens koma onggga aki ofumbohah edebecki rot ebeirens noba ecira.

¹¹Nou onggga rusnok rufoukou jah suma ringk mar insa koma beda rua ruis gij rerin ruga Likaonia oida, "Mar onggga mimif mugif gu, onggga ringker jah mebaga ejmeg, bera runjuj en jah mebif erek rusnok fob!"

¹²Jefeda rua rijeka Barnabas ofoka erek Zeus noba rua rijeka Paulus ofoka erek Hermes, jeska Paulus bera onggga efesij mar gu rusnok.

¹³Beda ebirfaga egens onggga erek imam rot mar egens koma onggga ofoka Zeus bera enofoguma. Rerin mod Zeus angh jah mebah jeska kota koma. Nou onggga ofa engg rot mar insa koma beda ofa orka sapi onggga rusnok rira marfok ruroumna fob gij kota koma. Beda ofa jera rusnok enjgineg tein rudou os riris sapi koma erek mar onggga rurougif gu Paulus jera Barnabas.

¹⁴Nou onggga Barnabas jera Paulus gengk mar onggga rua rudou os runtunggom nou goga, beda goga gekris gegan meisoufa erek gorocunc gu rusnok

insa koma oida mar onnga rua rudou os rutunggom bera onoufa guru. Beda goga gofof skoita rusnok insa koma rifelesa noba gois rot goga eteb oida,
¹⁵ "Ei, iwa ineris sapi koma erek mar onnga irougif gu magef jinaga guru. Jeska magef tein masnok giskini erek iwa ojomu. Magef manojuj jeska mebaga guru. Magef man jah sif jeskaseda manggot rot Allah oga onnga oufamofa gu iwa jeskaseda iwa ikikif jeska mar onnga iwa yugif gu gij mebaga insa koma ojomu. Jeska mar koma onnga iwa yugif gu bera eneita oufamofa gu iwa jinaga guru. Tina onnga oufamofa ekirsa bera, iwa yugif gu Allah onnga tenten ojomu. Jeska Ofa bera onnga otunggom mebaga ni, mebi ni, mei mojomu efei ni, jera mar enjgineg nomnaga tein.

¹⁶ Gij mona onnga sismeni bera Allah oin keingg odou efesi fogora orons rot rusnok nomnaga ruroru mar meidu onnga risinsa rudou os ojomu.

¹⁷ Tina Allah otunggom mar onnga oufamofa gij rifelesa onnga orocunc rot Ofa ojomuja. Mar insa koma erek, Ofa eita mos onnga ens jeska mebaga ni, Ofa eita maat efej onnga rirefa gu mekeni fogora er rot oufamofa ni, Ofa eita maat efema ofonon jeska mekeni koma gu rusnok ni, Ofa eita mar nomnaga gu rusnok onnga otunggom rudou erirei eteb rot ni."

¹⁸ Barnabas jera Paulus gemfesij rot mar insa koma gu rua, tina rua rudou os riris sapi egens erek mar onnga rurougif gu Paulus jera Barnabas ojomu.

¹⁹ Beda rineya onnga erek rusnok Yahudi rin jeska kota Antiokhia jera kota Ikonium tein. Beda rua rusos rusnok riskemba insa koma jeskaseda rudou oska skoita Paulus jera Barnabas tein. Jefeda rusnok insa koma rira mamu riredi Paulus noba rikris ofa jah

mebah jeska kota koma. Rua rusujohu rot oida ofa agos fob.

²⁰ Tina nou onnga rua onnga ruroru Yesus fob rut rejrej ofa, beda ofa edebecki noba oira gij kota insa koma sons. Erek monog beda ofa jera Barnabas geja jeska kota koma noba gecira jah kota Derbe.

²¹ Paulus jera Barnabas gefesij rot Allah oga onnga oufamofa gij kota Derbe tein. Jefeda rusnok rufoukou ruroru Yesus gij kota koma tein. Beda goga goksons jah kota Listra. Nou onnga goga geja jeska kota Listra beda goga gecira jah kota Ikonium. Beda goga goksons jah kota Antiokhia.

²² Gij mona onnga goga goira gij kota insa koma nomnaga fob, beda goga goftuftu rusnok onnga ruroru Yesus jah suma noba geisisi joug rua tein jeskaseda rua ruroru Yesus rot ahais ojgomu. Goga gagot gu rua oida, "Mimif onnga muroru Yesus bera mimeita mifera okora eteb si. Noba gij mona onnga Yesus ongksons, beda mimif mumoira jera rusnok onnga Allah ofoka ereij keingg si."

²³ Noba Paulus jera Barnabas gocunc rusnok rineya erek ebirfager rot rusnok onnga ruroru Yesus gij kota insa koma nomnaga. Beda gij mona juens bera goga genet maat guru jeskaseda gom geiteij gu Allah rot ebirfager Kristen insa koma onnga goncunc fob. Beda goga gois gu Tuhan jeskaseda Ofa omot joug rua insa koma onnga rufij Ofa ojgomu.

²⁴ Beda Paulus jera Barnabas geja jeska monuh Pisidia noba gecira jah monuh Pamfilia.

²⁵ Jah suma bera goga goftuftu rot Allah oga gij kota Perga. Beda goga geja jeska kota Perga noba gecira jah kota Atalia.

²⁶ Nou onnga genja jeska Atalia, beda goga geifef meg meifeni egens sons jah kota Antiokhia. Sis fob rusnok gij kota Antiokhia insa koma rum riteij gu Allah jeskaseda Ofa omofij Paulus jera Barnabas gij mar onnga gomotunggom rejrej monuh ofoukou. Beda ebeibeyaif goga gemfarur gij monuh insa koma oisa fob noba goksons en jah kota Antiokhia.

²⁷ Nou onnga goga gensaga kota Antiokhia fob, beda goga gohoturu rusnok nomnaga onnga ruroru Yesus gij kota koma. Beda goga gefesij gu rua rot mar nomnaga onnga Allah ontunggom gij kota-kota ofoukou fob. Goga tein gefesij gu rua rot teinefa Allah onghoda moroju jeskaseda rusnok onnga erek Yahudi guru ruroru Yesus tein.

²⁸ Beda Paulus jera Barnabas geker morototuma jera rua onnga ruroru Yesus jah suma gij mona ofoukou.

15 ¹ Rusnok Yahudi rineya onnga ruroru Yesus fob bera rin jeska monuh Yudea jah kota Antiokhia. Beda rua ruftuftu rusnok onnga ruroru Yesus gij kota Antiokhia oida rua tein rucosu rot riris rufom mareij ofos jeska jeni hukum Musa anggot rot ojomu. Erek rua rineita mar erek koma guru, beda rua rinesma eiteij ah onnga efeinah guru.

² Tina Paulus jera Barnabas gonoitij rot mar onnga rua rumftuftu gu rusnok guru, jefeda rua ruga emesedema rot mar insa koma. Beda rua onnga ruroru Yesus gij kota Antiokhia rucunc Paulus jera Barnabas jera rusnok rineya tein jeskaseda rija morototuma jah kota Yerusalem beda rifesij rot mar insa koma gu Yesus efen ruforoker jera ebirfager Mod Ari enjgineg tein jah suma.

³ Gij mona onnga rua rinja fob, beda rua ruiru gij monuh Fenisia jera monuh Samaria. Beda rua riflesij gu Yahudi onnga Kristen jah suma rot teinefa rusnok onnga erek Yahudi guru tein ruroru Yesus fob. Nou onnga rua ringg rot mar insa koma, beda rua rudou efaga ouka eteb rot.

⁴ Gij mona onnga Paulus jera efen mohujir rinsaga gu Yerusalem fob, beda rusnok onnga ruroru Yesus ni, Yesus efen ruforoker ni, jera ebirfager Mod Ari enjineg tein nomnaga ruroun rua rot rudou onnga erirei eteb. Beda Paulus jera Barnabas gefesij gu rua osok gij mar nomnaga onnga Allah ontunggom gij mona onnga goga goftuflu rot efen oga jah gu monuh ofoukou fob.

⁵ Erek koma tina rineya onnga Yahudi jeska ebic Farisi onnga ruroru Yesus fob rut noba ragot oida, "Rua onnga erek Yahudi guru onnga ruroru Yesus fob bera rucosu rot riris rerin rufom mareij ofos jeska tein. Beda rua ruroru hukum Musa nomnaga tein ojgomu!"

⁶ Beda ruforoker jera ebirfager Mod Ari insa koma rumohoturuma jeskaseda riflesij moguma rot mar insa koma onnga rusnok Yahudi ranggot rot.

⁷ Nou onnga rua rimfesij mar moguma rot dektek fob, beda Petrus ot noba agot oida, "Edkorer jera edkoser, iwa nomnaga ijginaga rot teinefa Allah oncunc didif jeska ifekesa sis fob jeskaseda difesij rot Allah oga onnga oufamofa gu rua onnga erek Yahudi guru fogora rua tein rig beda ruroru Yesus.

⁸ Noba Allah, onnga ejginaga rot mar onnga angh gij rusnok rudou efesi, bera orocunc gu mimif oida Ofa oroun rusnok onnga erek Yahudi guru tein fob.

Jeska Ofa eita Efena Ebsi gu rua tein morototuma erek Ofa eita gu mimif gij mona onnga sismeni fob.

⁹Jeska ahah Allah eiteij bera rusnok egens enekirsa jeska rusnok egema guru. Erek koma tein, Ofa onosujohu oida mimif onnga Yahudi bera erek ongnoska ekirsa jeska rusnok enjgineg guru. Jeska rua tein ruroru Yesus fob, jefeda Allah onsuna rot rua tein rerin mar onnga oska fob.

¹⁰Jefeda teinefa fogora iwa idou os itunggom mar onnga Allah onodou os rot guru fogora iradgodu rua onnga Yahudi guru jeskaseda ruroru Yahudi rerin erebent insa koma onnga okum nou rua. Jeska mifmin mimower tein runoruru agama erebent insa koma rot tenten guri. Noba mar insa koma bera okum nou mimif onnga deisef tein ojgomu.

¹¹Mimif onnga Yahudi minesma eiteij ah onnga efeinah oisouska mifmin agama erebent jinaga guru! Onnga tenten bera mimif misma eiteij ah onnga efeinah oisouska Tuhan Yesus onnga ocunc odou onnga okora rot mimif ojgomu. Noba rua onnga Yahudi guru risma eiteij ah onnga efeinah oisouska Yesus Kristus tein ojgomu."

¹²Beda rusnok nomnaga onnga rumohoturuma insa koma riker moubusaha ojgomu. Beda Barnabas jera Paulus gefesij gu rua tein osok gij mar onswos ofoukou onnga goga gontunggom oisouska owesa efek jeska Allah gij mona onnga goga gengker morototuma jera rusnok onnga Yahudi guru.

¹³Nou onnga goga gemfesij mar insa koma oisa fob, beda Yakobus agot oida, "Edkorer jera edkoser, iwa ig duga fog.

¹⁴ Ainsa kef iwa ig Petrus agot rot teinefa Allah odou okora rot rusnok enjgineg tein onnga erek Yahudi guru fogora ocunc rua tein erek efen rusnok.

¹⁵ Noba Koma ororu jeni mar onnga Allah anggot rot oisouska efen nabi-nabi sis fob. Ofa agot oida,

¹⁶ 'Rua onnga Yahudi onnga Daud ofoka ereij keingg bera erek modwok egens onnga oska efekeifa fogora ensiri fob. Noba erek rusnok ruksons jeskaseda rii mod onnga efeinah deika, beda erek koma tein Didif dimeita oufamofa sons gu rua onnga runjuj jeska rusnok insa koma si.

¹⁷ Didif dimeita mar insa koma jeskaseda rusnok onnga erek Yahudi guru tein rimen skoita Didif onnga rerin Tuhan fogora rija erek dedin rusnok.

¹⁸ Tuhan Allah agot rot mar erek koma jeni Ofa anggen rot gij mona onnga sis eteb fob.' "

¹⁹ Beda Yakobus agot deika oida, "Jefeda didif dusujohu rot oida, erek rusnok onnga Yahudi guru ruh rudou efesi gu Allah fob, beda enadaij nou mimif miradgodu rua jeskaseda rururu mifmin agama erebent onnga erek okum nou rua guru.

²⁰ Tina onnga oufa bera, mimif misa surat gu rua jeskaseda misisi joug rua oida rinet marska onnga rusnok enjgineg rijiteyi gu mar onnga oska guru, noba rinet marska onnga ogufu enah gij ros guru, noba rinej ogufu jeska marska insa koma tein guru. Beda rua tein rut joug risinsa jeskaseda rinesiri morototuma guru.

²¹ Mimif magot rot mar insa kef ojgomu jeska koma morototuma erek mar onnga Musa anggot rot sis fob jeskaseda rusnok onnga Yahudi rudou onokum skoita rusnok onnga Yahudi guru. Jeska gij mona onnga sis fob onjoros mona deisef tein bera rusnok ruftuftu

rot mar insa koma onnga Musa anggot rot gij mod onnga rua rum riteij gu Allah gij. Noba rua rik mar insa koma gij orofosut mona onnga Sabat tein."

²² Jefeda Yesus efen ruforoker jera ebirfager Mod Ari jera rusnok nomnaga onnga ruroru Yesus gij kota Yerusalem rudou egens rot mar onnga Yakobus anggot gu rua fob. Beda rua rucunc rusnok rineya jeska rifekesa jeskaseda rija jah kota Antiokhia morototuma jera Paulus gonu Barnabas. Rua rucunc Silas jera Yudas onnga rijeka ofoka Barsabas tein. Goga gerek gebirfaga Mod Ari onnga geita mar onnga oufamofa ojgomu.

²³ Beda rua rita surat egens gu goga jeskaseda goroka skoita rua onnga Kristen gij kota Antiokhia. Surat egens koma agot mar erek kef oida, "Surat kef jeska memef onnga erek Yesus efen ruforoker jera ebirfager Mod Ari tein. Memef onnga merek yeyin ihujir moisu iwa onnga Yahudi guru noba onnga iroru Yesus gij kota Antiokhia ni, monuh Siria ni, jera monuh Kilikia tein.

²⁴ Memef meg oida rineya jeska memef rinja jah suma noba ruftuftu iwa gij mar okum onnga orotunggom idou eineina gij fob. Memef monobk rua jeskaseda ruftuftu rot mar insa koma gu iwa guru. Tina koma en jeska rua risinsa ojgomu.

²⁵ Jefeda memef memfesij mar moguma noba modou egens nou mocunc gosnok gegeka jeska memef jeskaseda gegja skoita iwa jah suma. Goga geja morototuma jera Barnabas jera Paulus onnga memef modou okora eteb rot.

²⁶ Barnabas jera Paulus bera gerek gosnok gegeka onnga goufamofa, noba sis fob rusnok rita mar onnga

oska ofoukou skoita goga, jeska goga gemfesij mar rot Tuhan Yesus Kristus gu rua.

²⁷ Jefeda memef mobk Yudas jera Silas skoita iwa jeskaseda goga tein gagot rot mar onnga memef manggot gij surat egens kef.

²⁸ Efena Ebsi Allah oncunc gu memef fob oida enadaij nou memef onnga Yahudi meradgodu iwa gij mefmen agama erebent onnga erek okum nou iwa guru.

²⁹ Erek koma tina memef modou os meisisi joug iwa gij mar egens oskiyai ojgomu. Koma bera, iwa inet marska onnga rusnok enjgineg rirejiteyi gu mar onnga oska guru. Noba inet marska enjgineg tein onnga efen ogufu enah gij ros guru. Noba inej ogufu jeska marska insa koma tein guru. Beda iwa tein yut joug isinsa jeskaseda inesiri morototuma guru. Erek iwa iroru mar insa kef ojgomu, beda koma omofij iwa rot si. Ainsoma."

³⁰ Gij mona onnga rua nomnaga rimeisisima fob, beda rua rubk Paulus, Barnabas, Silas jera Yudas jah kota Antiokhia. Nou onnga rua rinsaga gij kota koma fob, beda rua rumohoturuma jera rusnok nomnaga onnga ruroru Yesus gij kota koma. Beda rua rita surat insa koma gu rusnok jah suma.

³¹ Nou onnga rua onnga ruroru Yesus jah suma ringk surat egens koma fob, beda rua rudou efaga ouka eteb jeska mar onnga runggu gij surat koma ofij rua ojgomu.

³² Yudas jera Silas bera erek gosnok onnga gefesij mar jeska Allah. Beda goga goftuftu rua onnga ruroru Yesus gij kota Antiokhia gij mar ofoukou jeskaseda rua ruroru Yesus rot ahais ojgomuja.

³³ Nou onnga Yudas jera Silas gengker jah suma gij mona ofoukou fob, beda rua rufij goga fogora goksons jah kota Yerusalem. Rua onnga rururu Yesus gij kota Antiokhia ragot gu goga oida, "Goga geja rot godou onnga eskeira eteb jah Yerusalem!"

³⁴ ((Tina Silas odou os eker gij kota Antiokhia deika.))

³⁵ Gij mona insa koma tein bera Paulus jera Barnabas geker gij kota Antiokhia. Beda goga jera rusnok enjineg rufoukou tein ruftuftu noba riflesij mar osok gij Tuhan oga.

³⁶ Gij mona egema deika beda Paulus agot gu Barnabas oida, "Nagef naksons jah monuh nomnaga onnga nagef nafasij rot Tuhan oga gij sis fob jeskaseda nak rot oida rua riker erek teinefa."

³⁷ Barnabas odou os oroun Yohanes Markus morototuma jera goga.

³⁸ Tina Paulus odou os erek koma guru, jeska sis fob Markus ororu goga, tina gij mona onnga Paulus jera Barnabas gemfesij rot Tuhan oga gij monuh Pamfilia ros, beda Markus aha goga jah noba goksons jah Antiokhia.

³⁹ Beda Paulus jera Barnabas goga omosokuma eteb rot Markus, jefeda goga gemekebema ojgomu. Beda Barnabas oroun Markus noba goga geifef meg meifeni jah motowohu Siprus, tina Paulus oroun Silas.

⁴⁰ Nou onnga rua onnga rururu Yesus gij kota Antiokhia rum riteij keingg goga jeskaseda Allah omofij Paulus jera Silas, beda goga geja

⁴¹ rejrej monuh Siria jera monuh Kilikia. Beda goga geisis joug rusnok onnga rururu Yesus gij monuh insa koma jeskaseda rumoruru Yesus rot ahais deika.

16 ¹Paulus ecira jah kota Derbe. Beda jeska Derbe bera ofa ecira onjoros ensaga gu kota Litra. Osnok egens onnga ororu Yesus onnga ofoka Timotius eker jah suma. Ofa efen mosu jeska rusnok onnga Yahudi noba ofa tein ororu Yesus rot tenten fob. Tina Timotius efen meka bera jeska rusnok onnga Yunani.

²Rusnok nomnaga onnga ruroru Yesus gij kota Litra jera Ikonium rijginaga rot oida Timotius bera erek osnok egens onnga odou oufamofa eteb.

³Paulus odou os oida Timotius ororu ofa gij mar onnga emfarur ojgomu. Jefeda ofa eris Timotius efen ofom mareij ofos jeska jeskaseda rusnok onnga Yahudi onnga ringker gij monuh onnga gemfarur gij bera runotkonu oska skoita Timotius guru. Jeska rua nomnaga rijginaga rot fob oida Timotius efen meka bera jeska rusnok Yunani onnga runororu erebent Yahudi guru.

⁴Nou onnga goga gensaga gij kota-kota, beda goga gefesij gu rusnok onnga ruroru Yesus jah suma osok gij mar onnga Yesus efen ruforoker jera ebirfager Mod Ari ranggot rot gij kota Yerusalem fob. Beda Paulus eisisi joug rua jeskaseda ruroru mar insa koma ojgomu.

⁵Erek koma jefeda rusnok onnga ruroru Yesus gij kota-kota insa koma ruroru Yesus oga rot ahais noba orofosut mona bera rusnok onnga rumororu Yesus rugun odudu dokun deika.

⁶Efena Ebsi Allah eyahehir joug Paulus jera Silas jera Timotius jeskaseda rinefesij rot Allah oga gij monuh Asia guru. Jefeda rua rija jah monuh Frigia jera monuh Galatia.

⁷ Gij mona onggara rua rinsaga anjob monuh Misia fob, beda rua rudou os ruira gij monuh Bitinia, tina Efena Ebsi Allah ocunc gu rua oida runoira gij monuh egens koma guru.

⁸ Jefeda rua rirabj monuh Misia noba rujuj jah kota Troas ojgomu.

⁹ Nou motu beda Efena Ebsi Allah ocunc mar gu Paulus gij odou efesi. Ofa ek mar erek orna egens jeska monuh Makedonia onot jah ofa odou noba erejgejgei gu ofa oida, "Pauluso! Bija jah monuh Makedonia jeskasada bufij memefo!"

¹⁰ Jefeda gij monog rahah tentena, beda didif Lukas ni, Paulus ni, Timotius ni, Silas ni, memef nomnaga meja jah monuh Makedonia. Jeska memef mejjinaga rot tenten oida Allah bera onobk memef jeskasada mejefesij rot Allah oga onggara oufamofa gu rusnok gij monuh Makedonia insa koma.

¹¹ Memef meja jeska kota Troas noba meifef meg meifeni fogora mecira jah motowohu Samotrake. Noba erek monog deika, beda memef meja jeska Samotrake noba mecira jah kota Neapolis.

¹² Nou onggara meja jeska kota koma, beda memef mecira jah kota Filipi. Kota Filipi koma erek kota mosu nou kota nomnaga onggara angh gij monuh Makedonia. Noba raja Kaisar efen rusnok onggara rufoka ereij keingg rusnok nomnaga gij kota koma. Memef meker jah suma erek mona orgomu ojgomu.

¹³ Gij mona onggara Sabat, beda memef morogna jeska kota koma, noba meja jah mei efembra, jeska memef meg oida rusnok onggara Yahudi rumohoturuma jeskasada rum riteij gu Allah jah suma. Memef meker morototuma jera rua noba

mefesij mar jera rujager onggga rumohoturuma jah suma tein.

¹⁴Ojaga egens jeska rua onggga ofoka Lidia. Ofa ojga jeska kota Tiatira. Ojaga egens koma bera erek osnok egens onggga ohu mei onggga efera osok eteb gu rusnok. Ofa erek Yahudi guru, tina ofa ougif gu Allah tein. Jefeda Tuhan ocunc gu ofa gij odou efesi jeskaseda ofa oj osu rot iskusk noba ororu mar onggga Paulus omftuftu gu rua.

¹⁵Jefeda Lidia jera efen rusnok nomnaga onggga ringker gu efen mod rururu Yesus noba rita baptis tein. Beda Lidia erejgei memef jeskaseda meja jah efen mod. Ofa agot gu memef oida, "Erek iwa isujohu rot oida didif dururu Yesus rot tenten fob, beda iwa iker gij dedin mod ojgomu." Ofa erejgei memef rot mar insa koma ojgomuja. Jefeda memef mejeker gij efen mod.

¹⁶Gij mona juens bera memef mom meiteij gu Allah. Beda memef morodosu jera ojaga egens. Ofa erek ojaga egens onggga omfij rusnok. Noba efena ofogog bera engker gij efen odou efesi. Jefeda ofa esma owesa efek jeska efena ofogog insa koma jeskaseda efesij rot mar onggga emecira nou mona kahma si. Noba jeska ofa efesij rot mar onggga emecira gij kahma gu rusnok, jefeda ofa esma fifi ofoukou nou efen ebirfager.

¹⁷Ojaga egens koma ostoij Paulus jera memef noba ois gu rusnok rot tomnomna oida, "Ei iwa ig, jeska rua kef bera erek rusnok onggga rumfij Allah onggga Ofoka aksa. Rua rin jeskaseda ragot gu iwa rot teinefa iwa ita eiteij ah onggga efeinah!"

¹⁸Ofa agerir mar erek koma nou mona ofoukou fob jefeda Paulus otkonu oska rot ofa. Jefeda ofa ekikif

skoita ojaga egens koma beda agot gu efena ofogog onnga enah gij odou efesi oida, "Oisouska Yesus Kristus ofoka, didif dagot rot gu bua oida burogna jeska ojaga egens kef ojgomu!" Beda ainsa koma tein efena ofogog koma orogna jeska ojaga egens koma odou efesi. Jefeda ojaga egens koma efen owesa efek jeska efena ofogog eseseifa ojgomu. Noba enadaij nou ofa efesij rot mar onnga emecira nou mona kahma deika guru.

¹⁹ Nou onnga ojaga egens koma efen ebirfager rig rot oida rua rinesma fifi ofoukou jeska ofa deika guru, beda rua rutkonu oska eteb rot Paulus. Jefeda rua ragei Paulus jera Silas noba rikris goga skoita hakim gij kota egens koma.

²⁰ Beda hakim koma obk Paulus jera Silas skoita raja Kaisar efen ebirfaga tentarer, beda rusnok ragot ofa oida, "Goga kef bera jeska rua onnga Yahudi. Noba goga gontunggom mar onnga oska eteb gij kota kef.

²¹ Goga goftuftu rusnok jeskaseda rua ruroru gegangerebent ojgomu. Noba mar koma bera ekirsa rot mar onnga raja Kaisar anggot rot gu mimif fob."

²² Rusnok enjineg rufoukou tein ragot mar onnga oska rot Paulus jera Silas. Jefeda ebirfaga egens insa koma obk efen tentarer jeskaseda rikris meisoufa jeska goga gofos noba rangha goga rot ahais ojgomuja.

²³ Nou onnga rua rangha goga fob, beda rua raha goga gij mod oskusk. Noba hakim insa koma obk ebirfaga mod oskusk jeskaseda ot joug goga rot ahais ojgomu.

²⁴ Jefeda ebirfaga mod oskusk koma aha goga gij morongsu egens onnga angh gij mer efesi deismos

ojgomu, noba ofa era rantai erakid keingg goga gaki tumu mega onnga okum.

²⁵ Erek motu deis beda Paulus jera Silas gom geiteij noba gof medemer jera gesitit mar gu Allah. Rusnok enjgineg onnga rangh gij mod oskusk insa koma rig goga gomf medemer erek koma.

²⁶ Beda ainsa koma tein mebi icusur onjoros mod osum nomnaga eineina. Beda montoj nomnaga gij mod oskusk koma ohoda noba rantai onnga rinrakid tumu rusnok ritma jera raki nomnaga tein ebga.

²⁷ Ebirfaga egens onnga ont joug mod oskusk insa koma ofos graga eteb rot noba ofa emeesa tein. Ofa ek, tina montoj mod oskusk koma nomnaga onghoda fob, jefeda ofa osujohu rot oida rusnok nomnaga onnga rangh gij mod oskusk koma ruku fob. Jefeda ofa ococ meiteb ofok jeskaseda oduis esinsa.

²⁸ Nou onnga Paulus ek rot mar koma, beda ofa ois rot oga eteb oida, "Bunoduis bisinsa guru! Memef nomnaga meker jah sif ros!"

²⁹ Jefeda ebirfaga mod oskusk insa koma orka mah eisa noba onggobur rot odou onnga emeesa eteb jah morongsu efesi onnga Paulus jera Silas gengker gij. Beda ofa es okeibi gu mebi jah Paulus jera Silas godou erek ougif gu goga.

³⁰ Beda ofa oroun goga jeska mod oskusk noba agot gu goga oida, "Akeinerga, didif dutunggom mar erek meidu jeskaseda Allah omoskotu didif tein?"

³¹ Beda Paulus jera Silas goroun gu ofa oida, "Bua buroru Tuhan Yesus rot tenten ojgomu, beda bua bimesma eiteij ah onnga efeinah si. Noba bebin rusnok nomnaga onnga ringker jera bua gij bebin mod rimesma eiteij ah onnga efeinah tein."

³² Beda Paulus jera Silas gefesij rot Allah oga onnga oufamofa osok gij Yesus gu ebirfaga mod oskusk egens koma jera efen rusnok nomnaga onnga ringker jera ofa.

³³ Gij motu deis insa koma bera ebirfaga mod oskusk oroun goga noba eita ariawun nou gefera okora koma. Beda ofa jera efen rusnok nomnaga rita baptis tein.

³⁴ Beda ofa oroun Paulus jera Silas jah efen mod noba eita maat gu goga. Ofa jera efen rusnok nomnaga rudou efaga ouka eteb, jeska gij mona insa koma bera rua ruroru Allah oga fob.

³⁵ Gij monog rahah beda ebirfager kota egens koma rubk tentarer jah mod oskusk jeskasada ragot gu ebirfaga onnga ont joug mod oskusk oida, "Paulus jera Silas gorogna jeska mod oskusk ojgomu."

³⁶ Ebirfaga mod oskusk insa koma ragot gu Paulus oida, "Akeina, ebirfager koma ranggot oida goga gorogna jeska mod oskusk ojgomu. Jefeda ebeibeyaif goga geja rot godou onnga oufamofa."

³⁷ Tina Paulus agot gu ebirfager insa koma oida, "Rua rucunc magef erek gosnok onnga gontunggom mar onnga oska fob, tina magef manotunggom mar onnga oska egema tein guri. Beda rua rangha magef jah rusnok rufoukou rudou fogora mojen magef eteb rot. Noba rua raha magef gij mod oskusk tein. Tina magef tein maja erek madou egens jera rusnok onnga raja Kaisar efen fob. Noba enadajj nou rua rutunggom mar insa koma skoita rusnok onnga rudou egens jera raja Kaisar efen rusnok jinaga guru. Noba ebeibeyaif rua rudou os rubk magef jeskasada maja rot wuswus ei? Magef madobu joug koma ojgomu! Jefeda iwa yagot gu ebirfager kota insa koma oida

rua risinsa rin skoita magef jah sif jeskaseda ruroun magef jeska mod oskusk ojgomu."

³⁸Jefeda ebirfager mod oskusk insa koma ruksons noba ragot gu ebirfager kota rot mar onnga Paulus anggot fob. Nou onnga ebirfager kota insa koma ringg oida Paulus jera Silas tein godou egens jera rusnok onnga raja Kaisar efen, beda rua rimeesa eteb.

³⁹Jefeda rua rija skoita Paulus jera Silas beda ragot oida, "Memef montunggom mar onnga oska skoita goga fob, tina memef mois gu goga jeskaseda gonotkonu oska skoita memef guru." Beda rua ruroun goga jeska mod oskusk insa koma, noba rua rirejgei jera ruga onnga ongnoska gu goga jeskaseda goga geja jeska kota koma.

⁴⁰Beda Paulus jera Silas geja jeska mod oskusk insa koma noba geja jah mod onnga Lidia efen. Nou onnga goga gorodosu jera rua onnga ruroru Yesus jah suma, beda goga geisisi joug rua deika. Beda Paulus jera Silas geja jeska kota Filipi.

17¹Paulus jera Silas gecira jah monuh Amfipolis jera monuh Apolonia onjoros gensaga kota Tesalonika. Mod egens onnga Yahudi rum riteij gu Allah gij bera onot gij kota koma.

²Jefeda erek giskini, Paulus eja jah mod insa koma jeskaseda riflesij mar jera rusnok jah suma osok gij Mar Efeyi Ebsi efen ofou. Rua riflesij moguma erek koma gij mona onnga Sabat ojgomu.

³Paulus oftufu rua noba ocunc gu rua rot koisoisa gij Mar Efeyi Ebsi oida Kristus onnga Allah anggot eimofoj nou emen jeskaseda eita eiteij ah onnga efeinah gu rusnok bera eita efera okora sismeni fog, beda Ofa emedebecki jeska anggos tein. Paulus agot

oida, "Yesus onngga didif dimfesij rot gu iwa fob, Ofa bera Kristus onngga Allah anggot eimofoj nou emen jeskasada eita eiteij ah onngga efeinah gu rusnok."

⁴Jefeda Yahudi rineya onngga ringg rot mar insa koma ruroru oga onngga oufamofa insa koma. Noba rua rudou eja erek egens jera Paulus jera Silas. Erek koma tein, rusnok onngga Yunani rufoukou onngga rugif gu Allah jera rujaga rufoukou onngga rufoka aksa tein ruroru oga onngga oufamofa insa koma onngga Paulus emfesij gu rua fob.

⁵Tina rusnok onngga Yahudi rineya rudou ejisei noba oska rot Paulus jera Silas. Jefeda rua ruhoturu rusnok ebireira onngga ringker rourou gij pasar. Beda rua rusos rusnok insa koma jeskasada rutkonu oska eteb rot Paulus jera Silas. Beda rua nomnaga rija gu moroju gij kota koma noba ruga ofoukou rot mar onngga Paulus jera Silas gontunggom fob. Beda rua rujohca Paulus jera Silas onngga gengker jah mod onngga Yason efen jeskasada rikris goga skoita rusnok riskemba koma.

⁶Nou onngga rua rinsaga gu Yason efen mod beda rua rik, tina Paulus jera Silas geneker jah suma deika guru. Jefeda rua rikris Yason jera efen rusnok enjineg tein onngga ruroru Yesus skoita ebirfager onngga rufoka ereij keingg rusnok gij kota koma. Rua ruga erahah noba ruis oida, "Paulus jera Silas jera gegan gohujir insa kef, rua nomnaga runtunggom mar onngga oska gij monuh ofoukou fob, noba ebeibeyaif rua rutunggom mar onngga oska gij mifmin kota kef tein fobo!

⁷Noba Yason kef, ofa bera oroun Paulus jera Silas gij efen mod tein! Noba rua kef nomnaga ragot oida raja eteb egema onngga ofoka Yesus enofoguma. Tina

mar onggara rua ranggot insa koma bera ekirsa rot mar onggara raja Kaisar anggot rot sis fobo. Jeska raja Kaisar esinsiyai bera erek raja eteb ojomu."

⁸Rua ranggot mar erek koma, jefeda rusnok rufoukou jera ebirfager gij kota insa koma rutkonu oska eteb skoita Paulus jera Silas tein.

⁹Jefeda ebirfager insa koma rubk Yason jera efen mohujir jeskasada rita fifi gu ebirfager insa koma erek orocunc rot oida Yason omot joug Paulus jera Silas rot mar insa koma. Noba erek goga gemfesij mar deika, beda Yason jera efen mohujir rineita fifi insa koma sons guru. Beda ebirfager insa koma rubk rua jeska.

¹⁰Gij motu insa koma bera rua onggara ruroru Yesus gij Tesalonika rubk Paulus jera Silas jah kota Berea. Noba gij mona onggara goga gensaga jah kota Berea fob, beda goga geja jah mod onggara rusnok Yahudi rum riteij gu Allah gij.

¹¹Rusnok onggara ringker gij kota Berea koma bera rudou eriaga ekirsa jeska rua onggara ringker jah kota Tesalonika. Rua rig rot mar onggara Paulus jera Silas gemfesij gu rua osok gij Yesus oga. Noba rua rudou efaga ouka eteb rot mar insa koma. Noba orofosut mona beda rua ruhca gij Mar Efeyi Ebsi jeskasada rik gu risinsa rot oida mar onggara Paulus emfesij gu rua bera erek tenten ei era gurei.

¹²Rusnok onggara Yahudi rufoukou ruroru Yesus gij kota insa koma, noba runer jera rujager onggara erek Yunani tein noba onggara rufoka aksa ruroru Yesus gij mona insa koma.

¹³Nou onggara rusnok onggara Yahudi gij kota Tesalonika ringg rot oida Paulus oftufu rot Allah oga gij kota Berea, beda rua rija jah kota koma jeskasada

rusos rusnok jah suma fogora rudou oska skoita Paulus jera Silas.

¹⁴ Erek koma jefeda rua onggga ruroru Yesus gij kota koma rubk Paulus ebeirens jah mei mojumu efembra. Tina Silas jera Timotius geker gu kota insa koma ojgomu.

¹⁵ Gij mona onggga rua ruroun Paulus jah kota Atena fob, beda rua ruksons jah kota Berea. Beda rua ragot gu Silas jera Timotius oida Paulus odou os goga tein gostoj ofa ebeirens jah kota Atena.

¹⁶ Askesi Paulus eker nou Silas jera Timotius gij kota Atena ros, beda ofa odou okum eteb jeska ofa ek mar ofoukou onggga angh gij kota koma onggga rusnok rugif gu.

¹⁷ Jefeda gij mona onggga Sabat beda ofa eja jah mod onggga Yahudi rum riteij gij. Beda ofa efesij mar moguma rot Allah oga jera rusnok Yahudi noba jera rusnok enjgineg tein onggga rugif gu Allah jah suma. Noba orofosut mona bera ofa eja jah pasar jeskaseda efesij mar jera rusnok nomnaga onggga ringker jah suma.

¹⁸ Rusnok onggga ruroru mar onggga Epikuros omftuftu rot sis fob jera rusnok onggga ruroru mar onggga Stoa omftuftu rot sis fob bera riker gij kota insa koma. Noba rua nomnaga ruga emesedema rot mar onggga Paulus omftuftu fob. Beda rineya jeska rua ragot osok gij Paulus oida, "Ah! Isok kef bera awesi efei ojgomu. Ofa odou osumsumu ojgomu?" Noba rineya jeska rua ragot oida, "Isok kef bera efesij rot mar onggga rusnok monuh enjgineg rugif gu ojgomu." Rua ragot mar erek koma jeska Paulus efesij rot oga onggga oufamofa osok gij Yesus.

Noba ofa efesij rot teinefa rusnok onnga ranggos rimedebecki sons jeska ranggos tein.

¹⁹ Jefeda rua ruroun Paulus jah memaga ofos onnga ofoka Areopagus jeskaseda rumohoturuma jah suma. Beda rua ragot gu ofa oida, "Memef modou os meg deika osok gij mar onnga efeinah insa koma onnga bua bimesij rot fob.

²⁰ Jeska bua bimesij rot mar onswos onnga memef meneg rot enesi."

²¹ (Rua ragot mar insa koma jeska rua onnga kota Atena jera rusnok enjgineg tein onnga ringker jah suma rudou os eteb rimfesij moguma rot mar onswos onnga rua rig jeska rusnok efeinah onnga rin jah suma.)

²² Erek koma beda Paulus ot nou efesij mar gu rua gu memaga ofos Areopagus insa koma. Ofa agot oida, "Iwa onnga Atena. Didif dik oida iwa idou os eteb yugif noba yum iteij gu mar ofoukou gij kota kef.

²³ Jeska gij mona onnga didif dicira noba diajga joug mar gij kota kef, beda dik mar ofoukou onnga iwa yugif gu. Noba didif dik mar egens onnga iwa yugif gu, tina runngu tumu mar egens koma oida, 'Gu mar egens onnga ah jah mebaga onnga menejginaga rot enesi.' Ebeibeyaif didif dimefesij gu iwa osok gij mar egens insa koma onnga iwa inejginaga rot enesi.

²⁴ Allah, onnga ontunggom mebif jera mar nomnaga onnga angh gu mebif, Ofa bera erek Tuhan onnga ofoka ereij keingg mebaga jera mebif nomnaga. Ofa eneker gij mod egens onnga rusnok rii fogora rugif gu guru.

²⁵ Allah koma bera onnga eita efena ebah jera awesi efeni jera mar nomnaga gu rusnok. Jefeda enadaij nou rusnok rufij Ofa jinaga guru.

²⁶ Noba oisouska osnok orna egens bera Ofa ontunggom rusnok mebif nomnaga fob. Beda Ofa obk rusnok insa koma rijeker rejrej mebif nomnaga. Ofa tein anggot rot mona kenefa jera monuh sinefa bera rua rijeker gij.

²⁷ Ofa otunggom mar erek koma jeskaseda rusnok ruhca Ofa. Noba erek rua ruhca Ofa, beda rua rimek Ofa si. Tina onnga tenten bera, Allah eneker yes jeska mimif guru.

²⁸ Jeska sis fob osnok egens agot oida, 'Ofa bera onnga eita eiteij ah gu mimif. Noba oisouska Ofa bera mimif micira noba miker gu mebif nomnaga.' Erek koma tein, yeyin osnok egens onnga of medemer sis fob agot rot Ofa oida, 'Bua birek mimif nomnaga mifmin mika.'

²⁹ Mimif nomnaga bera onnga erek Allah efen efeser. Noba jeska mimif mirek Allah efen efeser, jefeda enadaij nou mimif musujohu rot oida Allah bera erek mar onnga rusnok runtunggom jeska emas ni, era perak ni, era mamu tein ni guru.

³⁰ Jeska sis fob mifmin mimower rudou osumsumu rot mar insa koma ojpgomu. Tina Allah onofra okum keingg rua rot guru. Erek koma tina ebeibeyaif Ofa odou os jeskaseda rusnok nomnaga rimeesa joug rerin mar onnga oska.

³¹ Jeska Ofa anggot rot oida gij mona juens onnga emen bera Ofa omoga ojga rot rusnok nomnaga rerin rita mar onnga oska jera mar onnga oufa tein. Ofa omotunggom mar insa koma rot tenten oisouska osnok egens onnga Ofa oncunc fob. Noba Ofa oncunc

gu rusnok nomnaga rot oida mar insa koma bera erek tenten ojomu. Jeska Ofa omfra osnok egens insa koma jeska anggos fob."

³² Nou onggga rusnok insa koma rig Paulus agot oida rusnok rimedebecki jeska ranggos, beda rineya rutut rot ofa. Tina rineya ragot gu ofa oida, "Memef modou os meg rot mar insa koma deika ojomu."

³³ Nou onggga rua nomnaga rimfesij mar moguma oisa fob, beda Paulus eja jeska rua.

³⁴ Tina rineya jeska rusnok insa koma ruroun mar onggga Paulus omftuftu fogora rua ruroru Yesus. Osnok egens jeska rua insa koma bera ofoka Dionisius. Ofa bera erek ebirfaga egens jeska rua onggga rumohoturuma gu memaga Areopagus ofos. Noba ojaga egens onggga ofoka Damaris jera rusnok enjgineg tein ruroru Yesus.

18 ¹ Nou onggga mar insa koma oisa fob, beda Paulus eja jeska kota Atena noba ecira deika jah kota Korintus.

² Gij Kota Korintus bera Paulus orodosu osnok Yahudi egens onggga ofoka Akwila. Ofa ojga jeska monuh Pontus. Ainsa koma tein Akwila en jeska monuh Italia morototuma jera efen mohona Priskila. Goga genejeker gij kota Korintus jeska raja Kaisar Kladius ekemeji rusnok onggga Yahudi nomnaga jeska kota Roma. Paulus ojogog goga.

³ Beda ofa eker jera goga noba rua rifarur morototuma, jeska Paulus tein efen efarur erek otunggom modwok jeska sapi ofos.

⁴ Noba gij orofosut mona onggga Sabat beda Paulus eja jah mod onggga Yahudi rum riteij gij. Beda ofa efesij mar gu rua jeskaseda rua onggga Yahudi jera

rua onggga Yahudi guru ringg rot Allah oga fogora ruroru Yesus tein.

⁵ Beda gij mona onggga Silas jera Timotius gensaga jeska monuh Makedonia fob, beda Paulus enei modwok deika guru. Tina orofosut mona bera ofa efesij rot Allah oga onggga oufamofa gu rusnok onggga Yahudi. Ofa agot oida Yesus bera raja egens onggga Allah anggot eimofoj rot emen nou eita eiteij ah onggga efeinah gu rusnok.

⁶ Tina rineya onggga Yahudi riseda rot Paulus oga noba rua ragot mar onggga oska ofoukou skoita ofa onjoros odou eskes rot rua fob. Jefeda ofa agoska meisoufa onggga ergi rot mebi ofou jeskaseda ocunc gu rua oida ofa onoin keingg odou efesi rot rua deika guru. Beda ofa agot oida, "Gij mona onggga Allah eita okum skoita iwa onggga Yahudi, beda koma enah gu didif guru. Koma bera en oisouska mar onggga iwa isinsa intunggom fob ojgomu. Ebeibeyaif didif dikik jeska iwa onggga Yahudi noba didif dumorka Tuhan oga skoita rusnok onggga erek Yahudi guru!"

⁷ Jefeda ofa eja jeska rua noba eja jah mod egens onggga Titius Yustus efen. Ofa osnok egens onggga Yahudi guru, tina ofa tein ougif gu Allah ojgomu. Ofa efen mod egens onggga ah doida mod onggga Yahudi rum riteij gij.

⁸ Tina Krispus, onggga ebirfaga mod onggga Yahudi rum riteij gij insa koma, jera rusnok nomnaga onggga ringker jera ofa ruroru Yesus tein. Noba rusnok rufoukou gij kota insa koma onggga erek Yahudi guru rig mar onggga Paulus omftuftu fob, jefeda rua tein ruroru Yesus noba rita baptis.

⁹ Gij motu juens beda Allah ocunc mar gu Paulus gij odou efesi. Gij mar koma bera Tuhan Yesus agot gu

ofa oida, "Paulus, bua binemeesa guru! Bua bifesij mar rot Didif ojgomuja. Bua bineker moubsaha rot guru!

¹⁰ Jeska Didif dumofij Bua ojgomuja. Noba Didif dumot joug bua jeska rusnok rufogog onnga rudou os rita mar onnga oska skoita bua. Didif dumbk bua jah kota egens kef jeska dedin rusnok rufoukou onnga rumororu Didif si."

¹¹ Erek koma jefeda Paulus eker gij kota Korintus gij tahun egens noba ofod. Noba Ofa oftufu rot Allah oga gu rusnok jah suma.

¹² Gij mona onnga raja Kaisar ofra Galio ofoka erek Gubernur gij monuh Akhaya, beda rusnok onnga Yahudi rudou egens nou ragei Paulus noba rurka ofa skoita Galio jeskaseda ofa oga ojga rot mar onnga Paulus ontunggom fob.

¹³ Nou onnga rua ruroun Paulus skoita Galio fob, beda rua ragot gu ofa oida, "Osnok egens kef agot mar ofoukou gu rusnok riskemba jeskaseda rua rugif gu Allah, tina mar onnga ofa oftufu bera ekirsa rot mar onnga Musa anggot rot ojgomu."

¹⁴ Nou onnga Paulus ai juens emagot mar rot esinsa, beda Galio agot gu rua onnga Yahudi insa koma oida, "Iwa onnga Yahudi. Erek mar onnga iwa inagot kef bera osok gij hukum onnga monuh insa kef efen era osok gij mar onnga oska eteb, beda didif dimeg yuga rot si.

¹⁵ Tina erek mar onnga iwa yuga omosokuma rot insa kef bera osok gij isinsa yeyin hukum agama ojgomu, beda iwa isinsa yuga ojga rot mar koma ojgomu. Didif dunoga ojga rot mar erek koma guru."

¹⁶ Beda Galio ekemeji rua jeska efen mod.

¹⁷ Jefeda rua onggga Yahudi insa koma ragei osnok egens onggga ofoka Sostenes. Ofa erek ebirfaga mod egens onggga rusnok rum riteij gij. Beda rua rubu ofa jah Galio odou. Tina Galio orons rot ojgomu.

¹⁸ Paulus eker gij kota insa koma erek mona ofoukou deika. Beda ofa agot gu rusnok onggga rururu Yesus gij kota koma oida, "Edohuji, iwa iteijo! Didif dija fog." Beda ofa eifef meg meifeni egens morototuma jera efen mohujirga Priskila jera Akwila. Rua ricira jah monuh Siria. Nou onggga rua ruira gij kota Kengkrea fob, beda Paulus eris efen ebirfaga efeji onggga erek akseij fob. Jeska sis fob ofa agen mar gu Tuhan ororu Yahudi erebent. Noba mar insa koma oisa fob.

¹⁹ Beda gij mona onggga Paulus jera efen mohujirga rinsaga kota Efesus, beda Paulus eja jeska Priskila jera Akwila noba ofa eja jah mod egens onggga Yahudi rum riteij gij. Ofa efesij mar osok gij Mar Efeyi Ebsi efen ofou morototuma jera rusnok jah suma

²⁰ Rua rudou os oida Paulus eker dektek jera rua ojgomu. Tina Paulus onodou os rot erek koma guru.

²¹ Erek koma tina nou onggga ofa enja jeska rua, beda ofa agot gu rua oida, "Erek Allah odou os rot, beda didif dumoksons skoita iwa si." Beda ofa eja jeska kota Efesus noba eifef meg meifeni egens jah monuh Siria.

²² Gij mona onggga ofa onjuj jeska meg meifeni insa koma gij kota Kaisarea, beda ofa ecira aki jah kota Yerusalem jeskaseda ogog rusnok onggga rururu Yesus jah suma. Nou onggga koma oisa fob, beda ofa otoiru jah kota Antiokhia.

²³ Nou onggga ofa eker jah suma dektek fob, beda ofa ecira deika jah kota ofoukou onggga angh gij

monuh Galatia jera monuh Frigia. Ofa ojogog rua ongg ruroru Yesus gij monuh insa koma jeskaseda ofij rua fogora ruroru Yesus rot ahais deika.

²⁴Gij mona insa koma tein osnok egens ongg ofoka Apolos en jah kota Efesus. Ofa bera osnok Yahudi egens ongg ojga jeska kota Aleksandria. Ofa efesij mar rot odou ongg efesis eteb noba ofa tein ejginaga rot mar ofoukou ongg angh gij Mar Efeyi Ebsi.

²⁵Sis fob rusnok rineya rumftuftu ofa tein osok gij Yesus oga. Jefeda gij mona ongg ofa ensaga gu kota Efesus fob, beda ofa oftuftu mar gu rusnok osok gij Yesus rot tenten tein. Tina ofa ejginaga rot teinefa Yohanes eita baptis gu rusnok sis fob ojgomu.

²⁶Gij mona insa koma bera Apolos efesij mar gu rusnok ongg Yahudi gij rerin mod ongg rum riteij gij. Noba ofa enemeesa erek oskiyai tein guru. Gij mona insa koma tein Priskila jera Akwila geg mar ongg Apolos emfesij insa koma, jefeda goga goroun ofa jah mod egens ongg gengker gij. Beda goga goftuftu ofa eteb ekirsa deika rot Allah oga osok gij Yesus.

²⁷Gij mona ongg Apolos odou os eja jah monuh Akhaya, beda ofa efen mohujir ongg ruroru Yesus gij kota koma oitij rot tein. Jefeda rua runggu surat egens skoita rerin ruhujir ongg ruroru Yesus gij monuh Akhaya jeskaseda gij mona ongg Apolos ensaga jah suma, beda rua rumoroun ofa rot rudou ongg onggkoskamoka. Jeska oisouska Allah ongg ocunc odou ongg oufamofa skoita rua bera rua tein ruroru Yesus fob. Beda gij mona ongg Apolos ensaga gu monuh Akhaya fob, beda ofa ofij rua eteb jeskaseda ruroru Yesus rot ahais deika.

²⁸ Ofa oga emesedema jera rusnok Yahudi ruga rot tomnomna jah rusnok rudou. Beda ofa tein ocunc gij Mar Efeyi Ebsi oida, tenten Yesus bera raja egens onnga emen jeskaseda eita eiteij ah onnga efeinah gu rusnok.

19 ¹ Gij mona onnga Apolos eker gij kota Korintus ros, beda Paulus ecira rejrej monuh Galatia jera monuh Frigia. Beda ofa eja jah kota Efesus. Beda ofa orodosu jera rusnok rineya onnga ruroru Allah gij kota koma.

² Beda ofa ejeka gu rua oida, "Gij mona onnga iwa iroru Allah oga fob, beda iwa isma Efena Ebsi Allah fob ei?" Beda rua ruroun oida, "Guru. Noba memef menejginaga rot Efena Ebsi Allah koma enesi."

³ Ere koma beda Paulus ejeka gu rua deika oida, "Jefeda gij mona onnga iwa ita baptis fob, beda iwa iroru mar jeska idu?" Beda rua ruroun oida, "Memef mororu mar onnga Yohanes Pembaptis omftuftu rot sis fob."

⁴ Beda Paulus agot gu rua oida, "Yohanes eita baptis gu rusnok erek orocunc oida rua rimeesa joug rerin mar onnga oska fob. Tina gij mona insa koma bera Yohanes oftuftu rua jeskaseda rua ruroru osnok egens onnga omotoij ofa gij mona kahma. Osnok egens insa koma bera Yesus."

⁵ Nou onnga rua ringg mar insa koma fob, beda rua ruis gu Paulus jeskaseda ofa eita baptis gu rua erek rurocunc oida rua tein ruroru Tuhan Yesus.

⁶ Beda Paulus aha etma esij rua, noba ainsa koma tein Efena Ebsi Allah enjeker gij rudou efesi noba eita owesa efek gu rua. Jefeda rua ragot mar gij oga enjineg onnga rua risinsa rinejginaga rot enesi.

Noba rua ragot mar onnga Allah ocunc gu rua gij rudou efesi tein.

⁷ Rua insa koma nomnaga erek runer rufok setka kungkob erfeka.

⁸ Gij mesta rara ortomu fob bera Paulus oftufu mar rot odou onnga enemeesa oskiyai tein guru gu rusnok gij mod onnga rua rum riteij gij. Noba ofa tein eseda rusnok onnga Yahudi ruga ofoukou jera oftufu gu rusnok rot teinefa Allah ofoka ereij keingg rusnok erek raja.

⁹ Tina rineya jeska rua onnga ribirfaga ombrera, jefeda rua runoruru mar onnga Paulus omftufu gu rua guru. Noba rua ruga oruh rot mar onnga Paulus omftufu osok gij Yesus tein. Jefeda Paulus eja jeska rua, noba ofa oroun rusnok onnga rururu Yesus fob jah Tiranus efen mod. Noba gij orofosut mona bera rua riflesij mar noba rijeka moguma osok gij Allah efen oga.

¹⁰ Paulus otunggom mar erek koma gij tahun egeka onjoros rusnok onnga Yahudi jera rusnok onnga Yahudi guru onnga ringker gij monuh Asia insa koma nomnaga ringg rot Tuhan Allah oga fob.

¹¹ Allah eita owesa efek gu Paulus fogora ofa otunggom mar onswos ofoukou.

¹² Erek rusnok rurka meifeti onnga Paulus anggei era enrakid tumu okumfoj skoita rusnok onnga marenir, beda rua rita eskeira fob. Noba efena ofogog onnga engker gij rudou efesi tein orogna jeska rua.

¹³ Rusnok Yahudi rineya onnga rirek mendersi rija rejrej monuh insa koma jeskasada rikemeji efena ofogog jeska rusnok. Rineya jeska rua insa koma bera erek rumokosema rufok cinja erfeka onnga ebirfaga imam egens onnga ofoka Skewa efen efeser. Gij

mona juens beda rua rira Tuhan Yesus ofoka rireneni jeskaseda rikemeji efena ofogog onggga engker gij rusnok rudou efesi. Rua ragot oida, "Oisouska Yesus ofoka onggga Paulus emfesij rot bera dikemeji bua jeska ojgomu!"

¹⁴(19:13)

¹⁵Tina efena ofogog insa koma agot gu rua oida, "Didif dijginaga rot Yesus fob, noba dijginaga rot Paulus tein fob, tina bua bera erek idu fogora bikemeji didifo?"

¹⁶Beda ainsa koma tein osnok egens onggga efena ofogog engker gij odou efesi osoka ebeirens noba oskotu rua. Beda ofa obu rua noba ekris rua rot ofora efek eteb onjoros rerin meisoufa nomnaga ebga fob. Jefeda rua ruku rot rifeira okora eteb.

¹⁷Rusnok onggga Yahudi nomnaga jera rusnok enjgineg tein onggga ringker gij kota Efesus rig rot mar insa koma, jefeda rua rimeesa doska rot Yesus efen owesa efek. Jefeda rua nomnaga ragot mar onggga oufamofa rot Tuhan Yesus.

¹⁸Noba rusnok rufoukou onggga ruroru Yesus fob riflesij gu rusnok rot tomnomna osok gij mar onggga oska onggga rua runtunggom sis fob.

¹⁹Noba rua onggga mendersi rurka rerin buku-buku onggga orocunc rot teinefa rita mar skoita rusnok. Noba rua ris mah gij buku-buku insa koma nomnaga jah rusnok rufoukou rudou. Noba buku-buku insa koma nomnaga efen efera osok eteb erek fifi perak juta setka cinja.

²⁰Beda rusnok onggga ringg rot Allah oga bera rugun odudu dokun deika. Noba rusnok rufoukou tein onggga ruroru Yesus fob bera risma owesa efek ojgomuja

²¹ Gij mona onnga mar insa koma nomnaga oisa fob, beda Paulus odou os eja jah monuh Makedonia jera monuh Akhaya fogora ecira jah kota Yerusalem. Ofa agot oida, "Gij mona onnga didif dincira jah kota Yerusalem fob, beda didif dimeja jah kota Roma tein si."

²² Beda ofa obk gosnok gegeka onnga gomfij ofa jeskaseda geja gokag ofa jah monuh Makedonia. Gosnok gegeka insa koma bera Timotius jera Erastus. Beda Paulus eker nou mona ofoukou deika gij monuh Asia.

²³ Gij mona insa koma bera rusnok rufoukou gij kota Efesus rutkonu oska eteb noba ruga ofoukou rot mar onnga rusnok enjineg rumftuftu osok gij Yesus fob.

²⁴ Osnok egens onnga ofoka Demetrius eker gij kota koma. Ofa odou efesis eteb rot otunggom mar jeska perak onnga erek mod ofokai nou mega efebr egens onnga rijeka Artemis. Noba rusnok rufoukou gij kota insa koma bera rugif gu Artemis koma. Jefeda Demetrius jera efen mohujir tein risma fifi ofoukou jeska mod ofokai insa koma onnga rua rutunggom fogora ruhu gu rusnok.

²⁵ Beda Demetrius ohoturu efen mohujir nomnaga onnga rerin rifarur gij mar insa koma tein, noba ofa agot gu rua oida, "Edohuji, iwa nomnaga ijginaga rot oida ebeibeyaif mimif misma fifi ofoukou jeska mod ofokai onnga mimif mutunggom kef fob.

²⁶ Tina iwa ingk noba ingg gu isinsa fob rot mar onnga Paulus koma oftuftu noba ontunggom fob. Ofa agot oida mar efena onnga rusnok runtunggom jeskaseda rugif gu bera erek mar onnga oska ojgomu. Jefeda rusnok rufoukou gij kota kef jera rejrej monuh Asia nomnaga tein bera rururu efen oga fob.

²⁷ Noba onnga erek oska ekirsa bera mifmin mod ofokai onnga mutunggom kef bera rusnok rinengk mar koma deika guru. Noba erek dektek deika guru, beda rusnok rimeita rudou onnga oska rot Artemis efen mod onnga eteb tein. Noba onjoros deisef tein bera rusnok rejrej monuhif bera rugif gu Artemis ojomu. Tina gij mona kahma deika, beda rusnok runougif gu Artemis morototuma jera mimif deika guri. Noba koma erek rua rumoh mojen gu Artemis tein fob!"

²⁸ Nou onnga rusnok insa koma ringg rot mar onnga Demetrius anggot gu rua fob, beda rua rutkonu oska eteb, noba rua ruis rot ruga eteb oida, "Artemis! Bua bebin bufoka aksa ojomu! Memef mougif gu bua ojomu!"

²⁹ Rua ruis erek koma onjoros rusnok rufoukou gij kota insa koma rutkonu oska eteb tein noba ragot mar ofoukou. Beda rusnok rufoukou insa koma ragei Gayus jera Aristarkhus onnga gororu Paulus jeska monuh Makedonia. Beda rua rikris goga jah mod eteb onnga rusnok rumohoturuma gij fob.

³⁰ Paulus odou os oira gij mod eteb insa koma jeskaseda agot mar gu rusnok insa koma, tina rusnok onnga rururu Yesus jah suma ragei ofa joug ojomu.

³¹ Noba ebirfager monuh Asia onnga ringker gij kota insa koma bera rierek Paulus efen mohujir. Rua rubk rusnok skoita Paulus jeskaseda ragot gu ofa oida, 'Bunoira gij mod eteb koma guru.'

³² Ainsa koma tein, rusnok nomnaga onnga rumohoturuma gij mod eteb insa koma bera rudou erebibeie eteb. Rineya ruis mar egema toga jeska rineya. Rua ruis mar erek koma jeska rusnok rufoukou

rinejginaga rot teinefa fogora rumohoturuma jah suma guru.

³³ Rusnok Yahudi rineya onnga riker jah suma rik, tina Aleksander ot gu rusnok riskembemba insa koma rifelesa. Jefeda rua rukoja ofa jeskasada ot jah rusnok nomnaga rudou. Beda rusnok rineya ruftuftu ofa rot meidu onnga ofa agot gu rusnok rufoukou insa koma. Beda ofa etma ereni gu rua jeskasada riker toumou fogora ofa emagot mar gu rua.

³⁴ Rua rik, tina Aleksander bera osnok egens onnga Yahudi, jefeda rua ruis morototuma rot ruga eteb oida, "Artemis! Bua bebin bufoka aksa! Memef onnga Efesus mougif gu bua ojgomu!" Rua ruis mar erek koma ojgomuja gij aras onngas egeka.

³⁵ Beda ebirfaga egens gij kota koma ois gu rua rot oga eteb, jefeda rua nomnaga riker toumou. Beda ofa agot gu rua oida, "Orofosut rusnok nomnaga rijginaga rot oida mimif onnga mingker gij kota Efesus kef bera onnga mut joug mod onnga Artemis efen jera mamu ofog egens onnga ensiri jeska mebaga noba onnga efen owesa efek eteb.

³⁶ Rusnok egema tein runokoja mar insa koma guru. Erek koma jefeda iwa iker toumou, noba inotunggom mar onnga ofogog ebeirens guru.

³⁷ Gosnok gegeka onnga iwa ingkris jah sif bera gonoukoreka mar jeska mod onnga Artemis efen guru. Noba goga gonoga oruh Artemis tein guru.

³⁸ Noba mod pengadilan onotuma fob. Jefeda erek Demetrius jera efen mohujir rudou os rucunc osnok egens kef erek oska, beda rua rija skoita hakim rot mar insa koma ojgomu.

³⁹ Noba mar egema tein onggga iwa idou os yanggot rot, beda iwa yagot rot mar insa koma gu ebirfager rudou ojgomu.

⁴⁰ Mar onggga mimif muntunggom deisef bera omorka mar okum skoita mimif si. Jeska erek raja Kaisar efen rusnok ebirfager rimek mar okum onggga mimif muntunggom deisef beda rua rumofra okum keingg mimif rot si!"

⁴¹ Nou onggga ebirfaga egens koma anggot rot mar insa koma nomnaga fob, beda ofa obk rua nomnaga rija jah rerin mod ojgomu.

20 ¹ Gij mona onggga rusnok rutkonu oska gij kota Efesus oisa fob, beda Paulus ohoturu efen mohujir nomnaga onggga ruroru Yesus gij kota koma jeskaseda eisisi joug rua rudou efesi. Nou onggga ofa eisisi joug rua oisa fob, beda ofa ois oufamofa gu rua noba ecira jah monuh Makedonia.

² Ofa eja jah kota-kota onggga angh gij monuh Makedonia beda ofa eisisi joug rusnok rot mar ofoukou jah suma tein. Ofa otunggom mar erek koma jeskaseda rua ruroru Yesus rot ahais ojgomuja. Beda ofa eja jeska kota-kota insa koma noba ecira jah monuh Yunani.

³ Ofa eker gij monuh insa koma erek mesta ortomu. Nou onggga ofa ensejah nou eifef meg meifeni egens jah monuh Siria, beda ofa eg rot oida rusnok onggga Yahudi rudou oromom nou ranggob ofa. Jefeda ofa osujohu oida, "Ongga oufa bera didif dicira daki sons jah monuh Makedonia fogora dimeja jah kota Yerusalem ojgomu."

⁴ Nou onggga Paulus enja jah Makedonia fob, beda efen mohujir rudou os ruroru ofa tein. Rua insa koma bera erek Sopater onggga Pirus efen efesa jeska

kota Berea ni, Aristarkus jera Sekundus jeska kota Tesalonika ni, Gayus jeska kota Derbe ni, Timotius ni, jera Tikhikus jera Trofimus jeska monuh Asia tein.

⁵ Rua rukag rot magef jah kota Troas, beda rua riker nou magef jah suma.

⁶ Gij mona eteb onnga Yahudi rint roti onnga enefifij guru oisa fob, beda magef maifef meg meifeni egens jeska kota Filipi. Magef maifef meg meifeni insa koma erek mona cinja fob, beda majesaga kota Troas. Jah suma bera magef marodosu jera mafman mohujir onnga rungkag insa koma. Noba memef nomnaga meker gij ari egens jah suma.

⁷ Gij mona cinja erfens beda memef onnga mororu Yesus momohoturuma jeskaseda met maat morototuma. Beda Paulus efesij mar gu rusnok insa koma ojgomuja onjoros motu deis fob, jeska monog rahah tentena beda ofa odou os eja deika.

⁸ Memef meker gij morongsu onnga ah skida mod egens, noba mah ofoukou eisa gij morongsu insa koma tein.

⁹ Oforoka efes egens onnga ofoka Eutikhus ah jah jendela gij morongsu onnga ah skida insa koma. Tina Paulus efesij mar ofoukou ojgomuja onjoros oforoka efes egens koma ohnohnoha fogora ofa esiri jah mebi. Rua rufra ofa noba rik, tina ofa agos fob.

¹⁰ Beda Paulus ojuj jah mebi noba ahca esij oforoka efes egens insa koma noba agei rout odou. Beda Paulus agot oida, "Iwa inemeesa guru. Ofa efena ebah ros!"

¹¹ Beda Paulus oksons jah morongsu onnga angh skida. Beda ofa ekeba roti jera rua, noba rua nomnaga rit maat morototuma. Beda Paulus efesij

mar ofoukou gu rua deika gij motu insa koma onjoros monog rahah tentena, beda ofa eja.

¹² Rua ruroun oforoka efes egens onggga esiri insa koma jah efen mod. Noba rua rudou efaga ouka eteb rot ojgomu.

¹³ Memef meifef meg meifeni fogora mokag Paulus jah kota Asos jeskaseda morodosu ofa jah suma. Paulus obk memef mokag ofa jeska ofa odou os ecira aki jah kota Asos sismeni fog.

¹⁴ Gij mona onggga memef morodosu Paulus fob, beda memef nomnaga meifef meg meifeni egens jah kota Metilene.

¹⁵ Beda memef meja deika noba meifef meg meifeni egens jah motowohu Khios. Erek mona juens fob, beda memef mensaga gu motowohu Samos. Noba memef meja erek mona juens deika, beda mensaga gu kota Miletus.

¹⁶ Paulus onodou os eker gij monuh Asia dektek guru, jefeda memef meneja jah kota Efesus guru. Paulus odou os eja ebeirens jah kota Yerusalem jeskaseda ensaga jah suma nou mona eteb egens onggga ofoka Pentakosta.

¹⁷ Gij mona onggga Paulus engker gij kota Miletus ros, beda ofa esa surat egens gu ebirfager rusnok onggga ruroru Yesus gij kota Efesus jeskaseda rua rin skoita ofa jah kota Miletus.

¹⁸ Nou onggga rua rinsaga jah suma fob, beda Paulus agot gu rua oida, "Edohuji, iwa ijginaga rot teinefa didif diker jera iwa gij mona onggga didif dinsaga monuh Asia jera kota Efesus fob. Didif diker jera iwa rot ongnoska ojgomu.

¹⁹ Iwa tein ijginaga rot oida gij mona insa koma bera didif difarur nou Tuhan rot dudou onggga eriaga

ojgomu. Noba didif dibisa rot iwa jeska dudou okora eteb rot iwa nomnaga. Tina rusnok onnga Yahudi rita efera okora gu didif, noba rua rudou os ranggob didif.

²⁰ Noba edohuji, iwa ijginaga rot oida didif dinedemdemi mar onnga oufamofa jeska iwa guru. Tina didif duftuftu iwa rot mar nomnaga gij mona onnga mimif mingker morototuma tein fob. Noba didif duftuftu iwa gij yeyin mod egens egens tein.

²¹ Gij orofosut mona bera didif disisi joug iwa onnga Yahudi jera iwa onnga Yahudi guru tein jeskaseda iwa ikikif jeska yeyin mar onnga oska, beda yuh idou efesi rot onngas gu Allah ojgomu, noba iroru Yesus tein.

²² Ebeibeyaif bera didif duntunggom mar nomnaga onnga Efena Ebsi Allah obk didif rot jah sif oisa fob, jefeda didif dimeja jah kota Yerusalem. Noba didif dinejginaga rot mar meidu onnga emecirej didif jah suma guru.

²³ Orofosut kota onnga didif daira gij, beda Efena Ebsi Allah agot gu didif oida rusnok rimekris didif jah mod oskusk, noba rimeita efera okora gu didif.

²⁴ Tina didif dudou onoubsaha rot dedin difaga kef guru. Jeska onnga oufa ekirsa bera didif dicira gij mar onnga Yesus anggot rot gu didif onjoros dimfarur rot oisa fob. Didif difesij rot teinefa Allah oncunc efen odou onnga oufamofa gu rusnok fob.

²⁵ Didif dingker jera iwa nomnaga fob, noba didif dimfesij gu iwa rot teinefa Allah ofoka ereij keingg rusnok erek raja ojgomuja. Tina ebeibeyaif didif dudou ejginaga oida erek dinek iwa deika guru.

²⁶ Jefeda didif dagot gu iwa rot koisoisa oida erek Allah ofra okum keingg ineya jeska iwa, beda koma

jeni mar onnga oska onnga iwa intunggom ojgomu. Mar koma enah gu didif guru.

²⁷ Didif dagot mar erek koma gu iwa jeska didif dimfesij gu iwa rot koisoisa osok gij mar nomnaga onnga Allah ondou os rot fob.

²⁸ Jefeda iwa yut joug isinsa idou efesi rot ahais ojgomu. Noba iwa tein yut joug rusnok enjgineg onnga ruroru Yesus fob, jeska Efena Ebsi Allah omfra iwa erek ebirfager nou rusnok insa koma. Iwa yut joug rua rot iskusk erek gembala egens onnga ot joug efen domba-domba. Jeska Yesus era efen ogufu fogora orosuna rot mar onnga oska jeska mimif, onnga erek efen domba-domba, mudou efesi fob. Jefeda Allah oroun mimif erek efen rusnok fob.

²⁹ Didif dagot mar erek koma jeska gij mona onnga didif dinja jeska iwa fob, beda rusnok onnga rufogog rot iwa bera rimeita mar onnga oska skoita iwa erek serigala egens onnga osoka noba eska domba-domba.

³⁰ Iwa tein yeyin ihujir rineya onnga rumoftuftu iwa gij mar onnga erek tenten guru jeskaseda iwa ikikif jeska Yesus noba iroru rua ojgomu.

³¹ Jefeda iwa yut joug isinsa idou efesi rot ahais. Iwa ijginaga rot oida erek gij tahun orgomu fob bera didif duftuftu iwa orofosut mona jera motu rot dudou onnga okora eteb rot iwa.

³² Ebeibeyaif didif daha iwa gu Allah jeskaseda Ofa eker joug iwa ojgomuja. Noba iwa yagei Ofa efen oga rot ahais ojgomuja. Jeska Allah oga insa koma bera efen owesa efek eteb ekirsa fogora emeita idou ahais noba emeita mar onnga oufamofa gu iwa. Sis fob Ofa ensejah mar insa koma nou efen rusnok nomnaga.

³³ Sis mona onnga dinjeker jera iwa onjoros mona deisef tein bera didif dinerejgei iwa rot fifi era meisoufa egema tein guru.

³⁴ Iwa ijginaga fob oida didif disinsa dimfarur fogora dingk mar nomnaga onnga didif jera edohujir runcosu rot fob.

³⁵ Didif ducunc gu iwa gij mar nomnaga oida mimif mifarur rot ahais erek insa koma jeskaseda mufij rusnok enjgineg onnga runofora efek guru. Iwa idou ah keingg rot mar onnga Yesus anggot rot sis fob oida, 'Mar onnga ongoska eteb ekirsa bera mimif mineker jeskaseda rusnok enjgineg rufij mimif ojomuja guru. Tina mimif tein mufij rusnok enjgineg ojomu. Jeska koma bera onnga ereita oufamofa eteb gu mimif. ' "

³⁶ Paulus anggot mar insa koma oisa fob, beda ofa es okeibi gu mebi jera rua nomnaga fogora ofa om eiteij gu Allah.

³⁷ Gij mona onnga Paulus enja jeska rua, beda rua rudou ousaha eteb, noba rua ragei ofa noba ribisa keingg ofa. Beda rua ragot oida, "Paulus biteijo, bahasmero!"

³⁸ Rua rudou ousaha eteb jeska Paulus anggot gu rua oida rinek ofa deika guru. Beda rua ruroun ofa jah meg meifeni egens koma ojomu.

21¹ Nou onnga memef menja, beda memef mois mar gu ebirfager mod ari gij kota Efesus insa koma, beda memef meifef meg meifeni egens jah motowohu Kos. Erek monog deika beda memef monjowa gij motowohu Rodos. Beda memef meifef meg meifeni egens koma onjoros mensaga ofoksu Patara.

²Gij kota Patara bera memef mek meg meifeni egens onnga ai juens emeja jah monuh Fenisia. Jefeda memef meifef meg meifeni egens koma noba mecira onjoros

³memef mek motowohu Siprus ah jah megris. Tina memef meker gij meg meifeni egens koma onjoros mensaga gu monuh Siria. Beda memef mosoka gij kota Tirus jeska rusnok ruhoda mar jeska meg meifeni egens koma jah suma.

⁴Beda memef mejeresa rua onnga ruroru Yesus gij kota koma, noba memef meker jera rua erek ari egens. Rua ruis gu Paulus oisouska Efena Ebsi Allah jeskaseda ofa eneja jah kota Yerusalem guru.

⁵Erek ari egens oisa fob, beda memef mesejah nou mecira jah kota Yerusalem. Nou onnga mencira beda rusnok insa koma jera rerin riser tein rija morototuma jera memef jah mei mojemu efei efembra. Beda memef mes mokeibi gu mebi noba mom meiteij morototuma.

⁶Nou onnga memef manggei metma fob beda memef meifef meg meifeni egens noba rua ruksons jah rerin mod.

⁷Memef meifef meg meifeni egens koma jeska kota Tirus oigomuja onjoros mensaga gu kota Ptolemais. Beda memef mejeresa mefmen mohujir onnga ruroru Yesus gij kota koma tein. Noba memef meker jera rua erek mona onngas egens.

⁸Erek monog beda memef meja deika onjoros mensaga gu kota Kaisarea. Jah suma beda memef mejeresa Filipus. Ofa tein orka Allah oga gu rusnok enjineg. Noba memef meker jera ofa jah suma. Ofa erek osnok egens jeska rusnok rufok cinja erfeka onnga ruforoker runcunc gij Yerusalem sis fob.

⁹ Ofa efen efeser ruforoka rujowu rufok tohkuru tein onnga Allah eita owesa efek nou ragot rot Allah oga gu rusnok.

¹⁰ Memef meker jera Filipus jah suma erek mona ofoukou fob, beda nabi egens onnga ofoka Agabus en jeska monuh Yudea.

¹¹ Ofa eita marfeb egens onnga Paulus enrakid tumu okumfoj beda erakid esinsa aki jera etma. Beda ofa agot oida, "Efena Ebsi Allah agot erek kef: 'Gij mona kahma beda rusnok onnga Yahudi rimerakid osnok egens onnga efen marfeb kef gij mona onnga ofa ejeker gij kota Yerusalem. Noba rua rimaha ofa gu rusnok onnga erek Yahudi guru.' "

¹² Nou onnga memef mengk rot mar insa koma, beda memef nomnaga modou ousaha rot fogora mois gu Paulus jeskaseda ofa eneja jah kota Yerusalem guru.

¹³ Tina ofa oroun gu memef oida, "Iwa inebisa rot didif erek koma guru. Jeska koma otunggom didif dudou erek okumkum rot tein ojgomu. Erek rusnok Yahudi ragei didif era ragob didif jeska didif duroru Yesus oga ojgomu, beda didif dunokoja rot guru."

¹⁴ Jeska Paulus onororu moga guru, jefeda memef menagot joug ofa deika guru. Noba memef magot gu ofa oida, "Memef mororu mar onnga Allah ondou os rot ojgomu."

¹⁵ Memef meker jah suma gij mona ofoukou fob, beda memef mesejah nou meja jah kota Yerusalem.

¹⁶ Mefmen mohujir rineya jeska kota Kaisarea rija morototuma jera memef. Noba rua ruroun memef jah mod onnga Manason efen jeskaseda meker jera ofa jah suma. (Manason erek osnok egens jeska

motowohu Siprus onggga ororu Yesus gij mona onggga sismeni fob.)

¹⁷ Gij mona onggga memef mensaga gu kota Yerusalem fob, beda mefmen mohujir onggga ruroru Yesus jah suma bera ruroun memef rot rudou efaga ouka eteb.

¹⁸ Erek monog deika beda memef nomnaga meja morototuma jera Paulus skoita Yakobus onggga erek rusnok Kristen efen ebirfaga eteb gij kota Yerusalem. Noba memef momohoturuma jera ofa noba jera ebirfager Kristen rineya jah suma.

¹⁹ Nou onggga memef manggei metma fob, beda Paulus efesij gu rua rot mar onggga Allah ontunggom efekesa rusnok onggga Yahudi guru gij mona onggga ofa orka Allah oga skoita rua.

²⁰ Nou onggga rua ringg mar onggga Paulus emfesij insa koma fob, beda rua nomnaga rudou efaga ouka eteb noba risitit Allah. Beda rua ragot gu Paulus oida, "Bua big fog, jeska rusnok onggga Yahudi rufoukou onggga ruroru Yesus fob. Tina rua nomnaga koma ruroru hukum Musa rot ahais ros.

²¹ Noba rua ringg rot oida bua buftuftu gu rusnok Yahudi onggga ringker gij rusnok enjgineg rifekesa oida rua runororu hukum Musa deika guru, noba rineris rufum mareij ofos jeska rerin ruforoker tein guru, noba runororu Yahudi erebent tein guru.

²² Noba gij mona onggga rusnok Yahudi gij kota kef rig oida bua bimen jah sif fob, beda rua rutkonu oska skoita bua rot mar insa koma onggga rua ringg rot fob. Jefeda onggga oufa bera bua buroru mar onggga memef manggot gu bua ojpgomu. Runa rufok tohkuru onggga ranggen mar gu Tuhan rineker jah sif.

²³ (21:22)

²⁴Jefeda bua buroru rua jah Mod Allah jeskaseda iwa isiomu gij mei jeni mifmin agama erebent. Beda bua bita bebin fifi erek mar onggga burougif gu Allah rot oisouska rua insa koma jeskaseda rua riris ribirfaga efeji jeni mar onggga rua ranggen gu Allah sis fob. Bua butunggom mar insa koma jeskaseda burocunc gu rusnok nomnaga oida bua buroru Yahudi rerin erebent ros. Beda rua rimejginaga rot oida mar onggga oska onggga rua ringg sis fob bera erek tenten guru.

²⁵Beda memef mogu surat egens skoita rusnok Yahudi onggga ruroru Yesus fob. Noba gij surat egens koma bera memef manggot gu rua rot oida rinet marska onggga rusnok enjgineg rira nou rijiteyi gu mar onggga tenten guru, noba rinet marska enjgineg tein onggga ogufu enah gij ros guru, noba rinej ogufu jeska marska insa koma tein guru, noba rut joug risinsa rot ahais jeskaseda rinesiri morototuma tein guru."

²⁶Paulus ororu mar insa koma onggga rua ranggot gu ofa fob. Jefeda erek monog deika beda ofa eja morototuma jera runa rufok tohkuru insa koma jeskaseda rusiomu gij mei ororu Yahudi agama erebent. Beda rua rija jah Mod Allah jeskaseda ragot gu imam jah suma rot mona kenefo fogora mar onggga rua ranggen rot gu Allah bera omoisa. Noba gij mona onggga omoisa fob, beda rua rumorka mar nou rurougif gu Allah tein.

²⁷Gij mona cinja erfeka insa koma onggga rua ranggen rot gu Allah oisa fob, beda rusnok onggga Yahudi rineya jeska monuh Asia rik Paulus gij momas onggga angh rejrej Mod Allah. Jefeda rua rutkonu oska noba rusos rusnok rufoukou. Beda rua ragei Paulus,

²⁸ noba ruis rot ruga eteb oida, "Ei, iwa onnga Israel! Iwa yufij memef ojgomu! Jeska osnok egens kef bera onnga enja jah monuh ofoukou fogora omftuftu mar gu rusnok rufoukou jeskaseda rua rudou oska skoita mimif onnga Yahudi, noba jeskaseda rudou ekirsa rot mar onnga mifmin mimower Israel rirebent rot fob. Noba ofa oftuftu rusnok jeskaseda rua rikirsa rot hukum Musa noba ruga oruh rot Mod Allah tein. Noba ofa tein oroun rusnok ebireira onnga erek Yahudi guru gij momas onnga ah rerjrej Mod Allah insa kef tein! Noba koma erek ofa oh mar oska eteb skoita mod kef onnga ebsi komowa fob."

²⁹ (Rua ragot mar erek koma jeska sis fob rua rik osnok egens onnga ofoka Trofimus ecira morototuma jera Paulus gij kota Yerusalem. Noba rua rusujohu rot oida Paulus oroun ofa gij momas onnga angh rejrej Mod Allah onnga ebsi komowa fob. Trofimus koma bera ojga kota Efesus, noba ofa erek osnok egens onnga Yahudi guru).

³⁰ Rusnok rufoukou gij kota insa koma rutkonu oska eteb rot. Jefeda rua ragei Paulus beda rikris ofa jeska momas insa koma. Ainsa koma tein rusnok enjgineg ruf montoj joug momas insa koma.

³¹ Askesi rusnok insa koma rubu Paulus beda osnok egens ofof ebeirens noba agot gu ebirfaga tentarer oida rusnok rufoukou rutkonu oska eteb.

³² Jefeda ebirfaga egens koma jera ebirfager tentarer egema jera rerin tentarer rufoukou rija ebeirens jah mod onnga rusnok ruga ofoukou gij insa koma. Nou onnga rusnok insa koma rik ebirfaga tentarer en morototuma jera tentarer rufoukou beda rua runobu Paulus deika guru.

³³ Beda ebirfaga egens insa koma oskotu Paulus noba obk tentarer jeskaseda rakid efen etma. Beda ofa ejeka rusnok jah suma oida, Paulus koma bera erek idu, noba ofa otunggom mar onnga oska erek meidu.

³⁴ Beda rusnok rineya ruis mar rot, noba rineya ruis mar onnga erek toga deika onjoros ebirfaga egens insa koma odou eineina gij mar onnga rua ruis insa koma rot Paulus. Jefeda ofa obk efen tentarer jeskaseda rurka Paulus jah rerin mod fogora rijeka joug ofa jah suma.

³⁵ Nou onnga rua rinsaga gij mesiga ofon nou rumoira gij mod, beda rua rubk Paulus jah skida jeska rusnok riskemba onnga rudou os rubu ofa.

³⁶ Rusnok riskemba insa koma runtoij tentarer noba ruis rot ruga eteb oida, "Yagob ofa ojgomu!"

³⁷ Nou onnga rumoira gij mod efesi, beda Paulus agot gu ebirfaga tentarer egens insa koma oida, "Tuan, didif dudou os dagot mar ai juens gu bua fog." Beda ebirfaga egens koma agot gu Paulus oida, "Bua tein bijginaga rot Yunani oga fob ei.

³⁸ Jefeda bua bera jeska monuh Mesir ei era gurei? Jeska didif dusujohu rot oida bua bera osnok egens koma jeska monuh Mesir onnga ok mosuruk skoita raja Kaisar sis fob. Noba osnok egens koma oku rot rusnok rufok ribu tohkuru. Rua ruku rot rerin mocong jah monuh onnga owowa."

³⁹ Beda Paulus oroun gu ofa oida, "Didif bera jeska rua onnga Yahudi. Noba didif dujga jeska kota Tarsus onnga erek ibu kota gij monuh Kilikia. Erek bua buitij rot beda didif dimagot mar gu rusnok riskemba insa koma."

⁴⁰ Ebirfaga egens koma oitij rot, jefeda Paulus agot mar gu rusnok insa koma. Ofa ot gu mesiga ofon onggga skida noba ofa era etma ereni gu rua jeskaseda riker rot moubsaha. Beda ofa agot mar gu rua gij rerin oga Ibrani.

22 ¹ Paulus agot gu rua oida, "Akeineri jera edohujir nomnaga. Didif dudou os dagot mar rot disinsa gu iwa osok gij mar onggga iwa insujohu rot didif fob. Jefeda iwa ig fog."

² Nou onggga rua rig Paulus anggota mar gij rerin oga Ibrani, beda rua riker toumou ojomu. Beda Paulus efesij mar gu rua.

³ Paulus agot gu rua oida, "Didif tein bera osnok Yahudi egens morototuma erek iwa. Didif dujuj jeska dedin ameina gij kota Tarsus onggga angh gij monuh Kilikia. Tina sis mona onggga duforoka onjoros dumorna eteb bera didif diker gij kota Yerusalem kef. Noba didif dufokor aksa gij hukum Musa onggga mifmin mimower ruroru tein. Noba Guru eteb onggga ofoka Gamaliel bera onggga omftuftu didif gij mar insa koma nomnaga. Noba didif duroru Allah oga rot ahais morototuma erek iwa tein onojoros mona deisef.

⁴ Sis fob didif dita mar onggga efera oska eteb gu rusnok onggga ruroru Yesus oga fogora rineya onggga ranggos. Noba didif dagei runer jera rujager rufoukou jah mod oskusk.

⁵ Noba imam egens onggga ofoka aksa jera ebirfager Yahudi rineya rijginaga rot mar insa koma onggga didif duntunggom fob. Jeska rua bera onggga rita surat onggga eita owesa gu didif jeskaseda dutunggom mar insa koma. Noba didif durka surat egens koma gu skoita ebirfager Yahudi onggga ringker gij kota Damsyik jeskaseda dijagei rusnok onggga ruroru

Yesus jah suma fogora dumorka rua jah Yerusalem noba dita mar okum gu rua ojgomu."

⁶ Beda Paulus agot deika oida, "Gij mona onggga didif dija jah kota Damsyik noba dicira gu moroju erek mowa ot deis ros, beda ainsa koma tein efesa onggga eisa eteb jeska mebaga esenin didif jah suma.

⁷ Beda didif disiri gu mebi noba didif dig oga egens onggga ois gu didif oida, 'Sauluso! Teinefa fogora bua budou os bita efera okora gu Didifo?'

⁸ Beda didif dijeka gu Ofa oida, 'Akeina, Bua bera idu?' Beda oga egens koma oroun oida, 'Didif bera Yesus jeska Nazaret onggga bua budou os bita efera okora gu ojgomu.'

⁹ Rusnok onggga ruroru didif jeska Yerusalem nomnaga rik efesa onggga eisa eteb insa koma, tina rua rineg oga egens koma onggga anggota mar gu didif guru.

¹⁰ Beda didif dijeka gu oga egens koma oida, 'Tuhan, didif dutunggom mar meidu?' Beda Tuhan oroun gu didif oida, 'Bidebecki noba buira gij kota Damsyik. Beda osnok egens emagot gu bua rot mar nomnaga onggga Allah ondou os bua butunggom.'

¹¹ Ainsa koma tein mar efesa insa koma eris diteij jefeda dinek mar deika guru. Jefeda dedin edohujir ragei ditma noba ruroun didif jah kota Damsyik.

¹² Osnok egens onggga ofoka Ananias eker jah suma. Ofa erek osnok egens onggga ororu hukum Musa rot tenten. Noba rua onggga Yahudi nomnaga onggga ringker gij kota Damsyik rudou os ofa eteb.

¹³ Ofa en skoita didif, beda ofa ot desi didif noba agot oida, 'Edohuj Saulus, bua bik mar sons ojgomu!' Beda ainsa koma tein didif dufra dibirfaga noba dik ofa.

¹⁴ Beda ofa agot gu didif oida, 'Allah, onnga mifmin mimower rugif gu, bera ocunc gu bua fob jeskaseda bua bijginaga rot mar onnga Ofa ondou os rot. Noba Ofa tein oncunc efen efesa Yesus gu bua, noba bua big efen oga tein fob.

¹⁵ Bua bimerek osnok egens onnga emefesij rot mar onnga bua bingg noba bingk fob skoita rusnok enjgineg si.

¹⁶ Jefeda bua binahca deika guru, tina bidebecki noba bita baptis ojomu. Noba buis gu Yesus jeskaseda Ofa osuna bebin mar onnga oska jeska budou efesi.'

¹⁷ Beda didif duksons jah kota Yerusalem. Gij mona onnga didif dum diteij gj Mod Allah, beda ainsa koma tein Efena Ebsi Allah ocunc mar gu didif gj dudou efesi.

¹⁸ Gij mar koma bera didif dik Tuhan. Noba Ofa agot gu didif oida, 'Saulus, bua bija ebeirens jeska Yerusalem, jeska rusnok onnga ringker jah sif rumokoja mar onnga bua bifesij rot Didif.'

¹⁹ Beda didif dagot gu Tuhan oida, 'Tuhan, rua rumoroun mar onnga didif dimefesij rot Bua si. Jeska rua rijginaga rot oida sis fob didif daira gj mod onnga rusnok rum riteij gj beda dagei rua onnga ruroru Yesus, noba rua rita rifeira okora jeska didif.

²⁰ Erek koma tein gj mona onnga rusnok onnga Yahudi ranggob Stefanus, jeska ofa emfesij mar osok gj Yesus gu rua fob, bera didif tein diker jah suma. Noba didif duitij rot mar insa koma ojomu. Noba didif bera dagei rerin meisoufa askesi rua rira mamu riredi ofa.'

²¹ Tina Tuhan agot gu didif oida, 'Bua bija jeska kota Yerusalem ojomu. Jeska Didif dumobk bua

skoita rusnok onggga Yahudi guru onggga ringker gij monuh yes.' "

²²Rusnok riskemba insa koma ragosuit rot mar onggga Paulus emfesij insa koma, tina nou onggga rua ringg ofa agot oida Allah obk ofa skoita rusnok onggga Yahudi guru, beda rua rutkonu oska eteb noba ruis rot ruga eteb oida, "Ragob osnok egens kef ojgomu! Ofa bera erek mar onggga oska ojgomu!"

²³Rua ruis rot ruga eteb noba rij risinsa rerin meisoufa jeska rifaga, noba rut keingg jera mebi tein jeska rua rutkonu oska eteb rot Paulus.

²⁴Jefeda ebirfaga tentarer egens insa koma obk efen tentarer jeskaseda rurka Paulus gij rerin mod efesi. Beda ofa obk rua jeskaseda rangha ofa beda rijeka joug ofa rot ruga ahais jeskaseda ofa agot rot meidu fogora rua onggga Yahudi insa koma ruis mar erek insa koma skoita ofa.

²⁵Tina nou onggga rua rirakid Paulus etma jeskaseda rangha ofa, beda ofa agot gu ebirfaga egens insa koma onggga ont desi ofa oida, "Didif tein dijerek egens jera raja Kaisar efen rusnok fob. Jefeda enadajj nou bua bangha didif guru. Jeska bua bunocunc didif rot mar onggga oska egema tein onggga duntunggom fob enesi!"

²⁶Nou onggga ebirfaga egens insa koma eg rot mar onggga Paulus anggot fob, beda ofa eja skoita ofa efen ebirfaga egens noba agot oida, "Teinefa fogora bua bubk memef jeskaseda mangha Paulus erek komo. Jeska ofa tein bera ejerek egens jera raja Kaisar efen rusnok fob. Jefeda enadajj nou mimif mangha ofa jinaga guru."

²⁷Jefeda ebirfaga tentarer insa koma eja skoita Paulus noba ejeka gu ofa oida, "Bua bera bijerek

egens jera raja Kaisar efen rusnok fob ei." Beda Paulus oroun oida, "Tenten. Didif bera dija erek egens jera ofa fob."

²⁸ Beda ebirfaga egens koma agot gu Paulus oida, "Didif duh fifi ofoukou gu raja Kaisar jeskaseda eja erek egens jera efen rusnok fob. Teinefa rot bua erek komo." Beda Paulus oroun oida, "Tina didif dijerek egens jera Kaisar efen rusnok gij mona onggamaeina engker rot didif."

²⁹ Ainsa koma tein tentarer koma onggarijeka jough Paulus rija jeska ofa. Noba ebirfaga egens insa koma tein emeesa, jeska ofa erakid Paulus etma, tina Paulus tein erek egens jera raja Kaisar efen rusnok. Noba hukum Kaisar eyahehir jough rot mar insa koma onggaruntunggom skoita Paulus fob.

³⁰ Ebirfaga tentarer insa koma odou os ejginagarot teinefa fogora rua onggayahudi rudou oskarot Paulus. Jefeda erek monog beda ofa ois gu Yahudi ebirfager imam-imam jera ebirfager agama onggarufoka aksa tein jeskaseda rumohoturuma. Beda ofa osuwa Paulus jeska mod insa koma noba oroun ofa skoita rua nomnaga.

23 ¹ Beda Paulus ohobut ebirfager agama Yahudi koma nomnaga noba agot gu rua oida, "Akeineri, Didif duntunggom mar nomnaga onggAllah ombk didif rot. Noba didif dijginaga gij dudou efesi rot oida didif duntunggom mar insa koma rot tenten fob ojgomu."

² Nou onggPaulus anggot mar insa koma, beda Ananias, onggerek imam egens onggofoka aksa eteb, obk osnok egens onggont desi Paulus jeskaseda eseda Paulus osum.

³ Nou onggga ofa eseda Paulus osum fob, beda Paulus ois gu imam egens insa koma oida, "Allah emeseda bua tein si! Bua bisitit bisinsa bifaga oida bua bera buroru hukum Musa rot tenten. Noba buga ojga rot didif oisouska hukum koma tein. Tina bua buhurmei mar ojgomu, jeska bua bubk osnok egens jeskaseda eseda dusum. Noba hukum Musa bera eyahehir joug rot mar koma ojgomu. Jefeda bua bingkirsa rot hukum insa koma!"

⁴ Rua onggga runt jah Paulus oknama ritaha ofa noba ragot oida, "Ei! Enadaij nou bua buga oska skoita ebirfaga imam Allah onggga ofoka aksa kef jinaga gura!"

⁵ Beda Paulus agot oida, "Edohujia, tenten ei? Jeska didif dinejginaga rot oida ofa bera imam onggga ofoka aksa guru! Jefeda koma tenten, jeska runggu gij Mar Efeyi Ebsi oida, 'Inagot mar onggga oska skoita yeyin ebirfager guru.' "

⁶ Beda Paulus ek, tina ebirfager agama Yahudi insa koma rineya onggga jeska ebic Saduki noba rineya onggga jeska ebic Farisi. Jefeda ofa agot gu rua oida, "Didif bera jeska ebic Farisi. Noba didif tein dunjuj jeska rusnok onggga ebic Farisi. Iwa iroun didif jah sif jeskaseda yuga ojga rot didif jeska didif dusujohu oida rusnok onggga ranggos bera rimedebeki jeska ranggos si."

⁷ Nou onggga Paulus anggot mar insa koma, beda rua onggga ebic Farisi rimekeinggma noba rua onggga ebic Saduki rimekeinggma beda rua ruga omosokuma rot mar onggga Paulus anggot insa koma.

⁸ (Jeska rua onggga Saduki rusujohu oida rusnok onggga ranggos fob bera rinedebeki sons guru. Noba rua tein rusujohu oida malaikat ni, rifena ni, eneker

guru. Tina rua onggga ebic Farisi rusujohu oida rusnok onggga ranggos bera rimebebecki jeska ranggos si. Rua tein rusujohu oida malaikat jera rifena tein bera enekerma.

⁹Jefeda rua nomnaga ruga omosokuma eteb rot mar insa koma. Beda rineya onggga erek Guru Agama jeska ebic Farisi rut noba riseda rua onggga Saduki ruga. Rua ragot oida, "Memef mosujohu rot koisoisa tina, osnok egens kef onotunggom mar oska egema tein guru! Jeska erek efeni ebsi egens era malaikat egens bera anggot mar gu ofa ei. Noba koma enerek oska guru!"

¹⁰Rua ruga omosokuma erek insa koma onjoros ruga ofoukou eteb fogora ebirfaga tentarer insa koma emeesa oida ai juens beda rimagob Paulus. Jefeda ofa obk efen tentarer jeskaseda ruroun Paulus jeska rua, noba rurka ofa jah tentarer rerin mod.

¹¹Gij motu egema deika, beda Yesus ocunc mar gu Paulus gij odou efesi. Beda Ofa agot gu Paulus oida, "Bua binemeesa guru. Bua bimfesij mar rot dedin duga gij kota Yerusalem insa kef fob. Noba bua tein bimagot rot mar insa koma gij kota Roma tein si."

¹²Erek monog rahah tentena, beda rineya onggga Yahudi ris mar moguma rot oida rua rinet maat era rinej mei tein guru onjoros mona onggga rua ranggob Paulus fog.

¹³Rua onggga rins mar insa koma nomnaga bera erek rusnok rufok setka tohkuru noba ofod.

¹⁴Rua rija skoita ebirfager imam-imam Yahudi jera ebirfager Yahudi enjineg tein jeskaseda ragot gu rua oida, "Memef nomnaga mes mar moguma oida memef menet maat era menej mei egema tein guru onjoros mona onggga memef manggob Paulus fog.

¹⁵ Jefeda iwa yufij memef erek kef: Iwa jera ebic rusnok onnga rufoka aksa isa surat egens gu ebirfaga tentarer jeskaseda ofa omorka Paulus sons gu iwa. Yagot gu ofa oida iwa idou os ijeka joug Paulus deika. Beda memef mosk joug Paulus fogora memagob ofa ojgomu."

¹⁶ Tina Paulus meyesa efen efesa eg mar insa erek koma fob. Jefeda ofa ofof jah mod onnga tentarer rerin noba agot rot mar insa koma gu Paulus.

¹⁷ Beda Paulus ois gu tentara egens noba agot gu ofa oida, "Buroun oforoka efes egens kef skoita bebin ebirfaga, jeska ofa odou os agot rot mar egens gu bebin ebirfaga egens koma."

¹⁸ Tentara egens koma oroun oforoka efes egens koma skoita efen ebirfaga beda agot gu ofa oida, "Paulus, onnga manggei fob, bera erejgei didif jeskaseda duroun oforoka egens kef skoita bua, jeska ofa odou os agot rot mar egens gu bua."

¹⁹ Beda ebirfaga egens koma oroun oforoka efes insa koma, noba goga gejeker gu gesinsa. Beda ofa ejeka gu oforoka egens koma oida, "Budou os bagot rot mar meidu gu didifo."

²⁰ Beda oforoka efes insa koma oroun oida, "Rusnok onnga Yahudi rudou oromom nou rumois gu bua jeskaseda monog iwa yurka Paulus sons gu ebirfager agama fogora rua rijeka joug ofa deika.

²¹ Tina bua bunororu mar onnga rumois insa koma gu rua guru. Jeska rusnok rufok setka tohkuru rusk joug nou ranggob ofa. Rua ris mar moguma rot oida rua rinet maat era rinej mei egema tein guru onjoros mona onnga rua ranggob Paulus fog. Rua riker nou mar onnga bua banggot rot fogora rua ruw joug moroju rot ojgomu."

²² Beda ebirfaga egens koma eisisi joug oforoka efes insa koma oida, "Binagot rot mar insa koma gu rusnok egema tein guru. Bidemi mar koma gij budou efesi ojgomu."

²³ Nou onggga mar insa koma oisa fob, beda ebirfaga tentarer insa koma ois gu efen tentara gegeka beda agot gu goga oida, "Goga gohoturu tentarer onggga giskini rufok wuntin egeka jera tentarer onggga rifef kuda rufok setka cinja erfeka dokun tentarer onggga rurka meitefaga rufok wuntin egeka. Noba nou motu ainsa kef erek aras cinja tohkuru, beda iwa ija jah kota Kaisarea.

²⁴ Noba gesejah kuda egens nou Paulus, beda iwa nomnaga irohirus ofa rot iskusk skoita Gubernur Feliks gij kota egens koma."

²⁵ Beda ebirfaga koma ogu surat egens skoita Gubernur Feliks onggga agot erek kef oida,

²⁶ "Gu Gubernur Feliks onggga efen ofoka aksa. Surat kef jeska didif, Klaudius Lisias!

²⁷ Rusnok onggga Yahudi bera ranggei osnok egens kef jeskaseda ragob ofa. Tina didif jera dedin tentarer bera monskotu ofa jeska rua. Memef monskotu ofa jeska didif dig oida ofa onggga Yahudi egens kef bera eja erek egens jera raja Kaisar efen rusnok fob.

²⁸ Didif dudou os dijeka joug rusnok Yahudi rot mar meidu fogora rua ranggei ofa erek koma. Jefeda didif dubk ofa skoita Yahudi rerin ebirfager agama onggga rufoka aksa jeskaseda rijeka joug ofa.

²⁹ Tina didif dinek mar onggga oska egema tein onggga ofa ontunggom jeskaseda rikris ofa jah mod oskusk era ragob ofa rot guru. Mar okum onggga rua rudou os rufra keingg ofa bera en jeska risinsa rerin hukum agama ojgomu.

³⁰ Tina didif dingg rot oida rua ongg Yahudi rineya rusk joug nou rimagob ofa ojomu. Jefeda didif dubk ofa ebeirens skoita bua jah ojomu. Noba didif tein dumobk rusnok Yahudi insa koma skoita bua tein, jeskaseda rua rimagot rot rerin mar oga insa koma skoita bua."

³¹ Nou ongg ofa ongg surat egens insa koma fob, beda tentarer koma ruroru jeni ebirfaga oga fogora rua ruhrus Paulus gij motu insa koma tein. Beda rua ruhrus ofa onjoros kota Antipatris.

³² Erek monog deika, beda tentarer insa koma rifef kuda beda ruhrus Paulus onjoros kota Kaisarea. Beda tentarer rineya bera ruksons jah rerin mod gij kota Yerusalem.

³³ Nou ongg tentarer insa koma ongg rifef kuda rinjesaga gu kota Kaisarea, beda rua rusk surat koma gu Gubernur, noba rua ruroun Paulus gu ofa tein.

³⁴ Nou ongg Gubernur engk surat egens insa koma fob, beda ofa ejeka gu Paulus oida, "Bua bujga jeska monuh gaidu?" Nou ongg ofa engg oida Paulus bujga jeska monuh Kilikia fob, beda ofa agot oida,

³⁵ "Erek koma jefeda didif dimejeka joug bua rot mar oga insa kef gij mona ongg rusnok Yahudi insa koma rinsaga jah sif fob." Beda ofa obk efen tentarer jeskaseda raha Paulus gij mod eteb ongg Herodes ei sis fob jeskaseda rut joug ofa jah suma.

24 ¹ Erek mona cinja deika beda Ananias, ongg ebirfaga imam-imam Yahudi, jera ebirfager Yahudi rineya tein rija jah kota Kaisarea jera osnok egens ongg ofoka Tertulus. Ofa bera erek osnok egens ongg agot mar rot rua skoita Gubernur Feliks. Beda rua rija skoita Gubernur Feliks noba rifesij gu Ofa rot mar ongg Paulus ontunggom fob.

² Nou onnga Feliks oroun Paulus gij mer efesi koma, beda Tertulus efesij rot mar onnga Paulus ontunggom erek kef oida, "Gubernur Feliks onnga oufamofa! Bua bera onnga bufoka ereij keingg mefmen monuh, jefeda memef meker rot eskeiramera nou mona onnga dektek fob. Noba oisouska mar onnga bua banggot rot budou onnga efesis eteb bera memef meita ongkoskamoka tein.

³ Noba gij mar nomnaga onnga memef motunggom bera memef mois oufamofa eteb gu bua rot mar onnga oufamofa insa koma nomnaga.

⁴ Noba didif direjgei gu bua jeskaseda buin keingg budou efesi rot memef fogora didif dimefesij rot mar insa kef ojgomu.

⁵ Memef mosujohu rot oida osnok egens kef erek ofogog eteb. Jeska gij onnga mona ofa ensaga gu monuh Yahudi nomnaga, beda ofa otunggom mar onnga ereita rusnok Yahudi rutkonu oska noba ragot mar oga ofoukou. Noba ofa tein erek ebirfaga egens nou rusnok onnga rururu mar onnga Yesus, onnga ojga jeska Nazaret, omftuftu sis fob.

⁶ Noba memef magei ofa gij mona onnga ofa ensejah nou otunggom mar onnga oska efekeifa gij Mod Allah. ((Memef mesinsa modou os moga ojga rot ofa ororu mefmen hukum agama.

⁷ Tina ebirfaga tentarer onnga ofoka Lisias oskotu ofa jeska memef.

⁸ Noba ofa bera onobk memef nomnaga jeskaseda magot rot mar insa koma gu bua ojgomu.)) Jefeda erek bua bisinsa bijeka joug ofa, beda bua tein bimek rot oida mar nomnaga onnga memef manggot rot ofa bera erek tenten ojgomu."

⁹ Rusnok Yahudi insa koma nomnaga ragot rot mar insa koma tein osok gij Paulus.

¹⁰ Beda Gubernur Feliks era etma ereni gu Paulus oida ebeibeyaif ofa agot mar rot esinsa. Jefeda Paulus agot gu Feliks oida, "Gubernur Feliks, Didif dijginaga oida bua bufoka ereij keingg rusnok gij monuh kef erek dektek fob. Jefeda didif dudou efaga ouka eteb jeska bua bera onnga buga omojga rot mar onnga didif danggot ainsa kef tein.

¹¹ Erek mona setka kungkob erfeka fob beda didif dija jah Yerusalem jeskaseda dugif gu Allah jah suma. Erek bua bijeka bebin rusnok jah suma, beda rua rimagot oida koma bera tenten ojomu.

¹² Noba rusnok onnga Yahudi insa kef bera rinek didif duga omosokuma jera osnok egema tein gij Mod Allah guri. Noba rua tein rinek didif dusos rusnok jeskaseda rudou otkonu oska eteb fogora ruga ofoukou gij mod onnga rusnok rum riteij gij tein guru. Noba didif dineita mar erek koma gij mod enjgineg tein guru.

¹³ Noba enadaj nou rua rucunc gu bua oida mar onnga rua rimfesij insa koma osok gij didif bera erek tenten jinaga guru.

¹⁴ Didif dagot gu bua rot tenten oida didif dugif gu Allah onnga mefmen meimowa rugif gu sis fob. Noba didif duroru mar onnga Yesus omftuftu rot sis fob tein. Noba didif duroru hukum Musa jera mar onnga nabi-nabi runggu rot sis fob tein ros.

¹⁵ Didif tein dudou oisum gij Allah rot oida rusnok nomnaga onnga runtunggom mar onnga oska jera mar onnga oufamofa bera rimedebecki jeska ragos si.

¹⁶ Jefeda didif dut joug dudou efesi rot ahais jeskaseda dudou efesi erek ebsi komowa ahah Allah eiteij jera rusnok riteij tein.

¹⁷ Erek tahun ofoukou bera didif dineker gij kota Yerusalem guru. Jefeda didif duksons jah kota Yerusalem jeskaseda durka fifi gu dedin rusnok Yahudi onnga erek rufojingki, noba durka mar egema nou dumorougif gu Allah tein.

¹⁸ Noba gij mona onnga rua rik didif gij Mod Allah bera didif dugif gu Allah jah suma ojomu. Noba ainsa koma tein didif dusiomu gij mei ororu mefmen agama erebent tein. Tina rusnok rufoukou rineya tein rineker jera didif jah suma guru. Noba erek rusnok rinagot mar oga ofoukou jah suma tein guru.

¹⁹ Tina rusnok Yahudi rineya onnga runt jah suma bera rin jeska monuh Asia ojomu. Onnga oufa bera rua rin jah sif fogora rucunc didif erek oska ojomu. Jeska rua bera onnga runtunggom mar oga ofoukou gij mona insa koma fob.

²⁰ Era rua onnga Yahudi insa kef ragot rot mar onnga oska onnga rua ringk didif duntunggom gij mona onnga rua rurka didif skoita ebirfager agama onnga rufoka aksa.

²¹ Rua rutkonu oska rot mar oskiyai onnga didif danggot rot erek kef: 'Iwa onnga Yahudi iron didif jah sif jeskaseda yuga ojga rot didif jeska didif dusujohu rot oida rusnok onnga ranggos bera rimedebeki si.' "

²² Feliks ejginaga osok gij rusnok onnga ruroru moroju onnga Yesus oncunc fob, jefeda ofa agot oida, "Gij mona onnga Lisias en fob, beda didif dumoga ojga rot yeyin mar oga insa kefi si."

²³ Beda ofa obk ebirfaga tentarer egens jeskaseda ot joug Paulus ojgomu, tina onot joug Paulus erek ahais guru. Adaij nou Paulus ecira gij efen mod efesi, noba ofa oitij rot oida Paulus efen mohujir rumorka mar onnga Paulus ocosu rot gu ofa ai tein ojgomu.

²⁴ Gij mona egema deika, beda Feliks oksons jera efen mohona Drusila. Drusila bera erek osnok Yahudi egens. Beda ofa obk tentarer jeskaseda rujoroun Paulus sons skoita ofa fogora ofa emeg Paulus emfesij rot teinefa rusnok rururu Yesus Kristus.

²⁵ Jefeda Paulus efesij mar osok gij rot teinefa rusnok risma rudou onnga ebsi komowa ahah Allah eiteij, jera rot teinefa rua onnga Kristen rut joug rudou efesi jeska mar onnga oska, jera osok gij mona onnga Allah omoga ojga rot rusnok nomnaga rerin rita mar. Nou onnga Feliks engg rot mar insa koma nomnaga fob, beda ofa emeesa rot. Jefeda ofa agot gu Paulus oida, "Ebeibeyaif bua bija ojgomu. Erek dedin efekesa deika beda dumoroun bua sons deika si."

²⁶ Gij mona insa koma Feliks odou os oida Paulus eita fifi eteb gu ofa fogora ofa omosuwa Paulus. Jefeda ofa oroun Paulus skoita ofa erek ofosma ofoukou jeskaseda efesij mar jera ofa deika, tina guru.

²⁷ Gij tahun egeka deika fob beda Perkius Festus eferwei Feliks erek Gubernur nou monuh insa koma deika. Tina Feliks aha Paulus eker gij mod insa koma ojgomuja. Ofa otunggom mar insa koma jeskaseda rusnok onnga Yahudi rudou os rot ofa.

25¹ Gubernur Festus oira gij monuh insa koma fob. Noba gij mona orgomu deika, beda ofa eja jah kota Yerusalem.

²Gij mona onnga ofa ensaga gu kota Yerusalem fob, beda ebirfager imam-imam onnga Yahudi jera ebirfager Yahudi rineya rija skoita ofa noba rua rucunc Paulus erek oska.

³Beda rua rusos Festus jeskasada ocunc odou onnga oufamofa skoita rua fogora obk Paulus sons jah kota Yerusalem. Rua rirejgei ofa erek koma jeska rua rudou oromom nou rusk joug gu moroju beda ragob ofa.

⁴Tina Festus oroun oida, "Ebeibeyaif Paulus angh gij mod egens gu kota Kaisarea. Noba gij mona estir deika beda didif dumoksans jah suma.

⁵Jefeda iwa yubk yeyin ebirfager jeskasada rija morototuma jera didif jah kota Kaisarea. Noba erek Paulus ontunggom mar oska rot tenten fob, beda rua rucunc rot gij kota Kaisarea ojgomu."

⁶Festus eker gij kota Yerusalem erek ari egens jeska, beda ofa oksans jah kota Kaisarea. Erek monog rahah beda ofa ohoturu ebirfager Yahudi insa koma nomnaga, beda ofa obk rusnok jeskasada rujoroun Paulus skoita rua.

⁷Nou onnga Paulus ensaga fob, beda rua onnga Yahudi jeska kota Yerusalem rut rejrej Paulus noba ragot mar ofoukou noba rucunc ofa erek oska rot ojgomuja. Tina mar onnga rua ranggot insa koma nomnaga bera enerek tenten guru.

⁸Beda Paulus agot gu Festus oida, "Didif dinekirsas rot hukum raja Kaisar egema tein guru. Noba didif dinekirsas rot hukum agama Yahudi egema tein guru, noba dunotunggom mar onnga oska gij Mod Allah tein guru. Noba dunoga oruh rot raja Kaisar tein jinaga guru."

⁹Tina Festus odou os otunggom mar onggga ereita Yahudi rudou oufamofa rot ofa jefeda ofa ejeka gu Paulus oida, "Bua budou os bija jah Yerusalem jeskaseda didif duga ojga rot mar okum onggga rua runcunc skoita bua gij kota koma ei?"

¹⁰Beda Paulus oroun oida, "Gubernur Feliks, ebeibeyaif didif dut jah bua budou. Noba bua bera erek raja Kaisar efen ebirfaga egens gij monuhif. Jefeda adaij nou bua buga ojga rot didif jah sif ojgomu. Bua bisinsa tein bijginaga fob oida duntunggom mar onggga oska egema tein skoita rua onggga Yahudi guru.

¹¹Erek didif duntunggom mar onggga oska fogora danggos rot, beda didif duitij rot ojgomu. Tina mar onggga oska onggga rua runcunc osok gij rot didif bera enerek tenten jinaga guru. Jefeda enadaij nou osnok egens egema tein aha didif gij rua ritma jinaga guru! Didif duis gu bua jeskaseda raja Kaisar esinsa oga ojga rot didif ojgomu!"

¹²Jefeda Festus efesij mar jera efen rusnok onggga rumfij ofa rot mar onggga Paulus anggot insa koma fob. Beda ofa agot gu Paulus oida, "Bua bisinsa buis rot jeskaseda raja Kaisar bera omoga ojga rot bua, jefeda bua bimeja skoita Kaisar onggga engker gu kota Roma si!"

¹³Erek dektek deika guru, beda raja Agripa jera Bernike geja jah kota Kaisarea noba gorodosu Festus jah suma.

¹⁴Askesi goga gengker jah suma ros, beda Festus efesij mar gu raja Agripa osok gij Paulus. Ofa agot oida, "Osnok egens onggga rangha gij mod oskusk sis mona onggga Feliks erek Gubernur jah sif bera eneker ros.

¹⁵ Gij mona onnga didif dija jah kota Yerusalem, beda ebirfager imam-imam jera ebirfager Yahudi rineya rucunc ofa erek oska eteb. Noba rua ruis gu didif jeskaseda duga ojga rot ofa ojgomu.

¹⁶ Tina didif dagot gu rua oida memef onnga mofij raja Kaisar bera menaha mar okum keingg rusnok ebeirens erek koma guru. Tina sismeni bera memef mohoturu rua onnga rucunc osnok egens erek oska. Beda memef mejeka osnok egens koma tein jeskaseda ofa esinsa oroun rot mar onnga rua runcunc rot fog ojgomu.

¹⁷ Jefeda gij mona onnga ebirfager Yahudi insa koma rin jah sif fob, beda didif dineker erek dektek guru. Tina erek monog beda didif duhoturu rua nomnaga. Beda didif duroun Paulus insa koma skoita didif.

¹⁸ Nou onnga rua rucunc ofa erek oska, beda didif dusujohu oida rua rimagot rot mar onnga okum eteb. Didif dig, tina ofa onotunggom mar oska eteb egema tein guru.

¹⁹ Rua ruga emaksama rot rerin hukum agama ojgomu. Noba rua tein ruga ofoukou osok gij osnok egens onnga ofoka Yesus. Osnok egens koma bera anggos fob, tina Paulus agot oida Ofa efena ebah sons fob.

²⁰ Didif dudou erebibeit rot mar insa koma. Jefeda didif dijeka gu Paulus oida erek ofa odou os rot beda ofa eja jah Yerusalem jeskaseda duga ojga rot ofa jah suma.

²¹ Tina Paulus esinsa ois gu didif oida ofa odou os raja Kaisar oga ojga rot ofa ojgomu. Jefeda didif dubk dedin tentara jeskaseda ot joug ofa gij mod egens onjoros didif dubk ofa skoita raja Kaisar."

²² Beda raja Agripa agot gu Festus oida, "Didif disinsa tein dudou os dig mar jeska osnok egens koma." Beda Festus agot oida, "Monog bera bua bimeg mar jeska ofa si."

²³ Erek monog beda Agripa jera Bernike gen jah suma noba gergi meisoufa onggga erek ongnoskamoka. Noba ebirfager tentarer onggga rufoka aksa jera rusnok enjgineg tein onggga erek rufoka aksa gij kota insa koma nomnaga ruroun goga jah suma. Rua nomnaga ruira gij mod eteb onggga rusnok ranggot mar gij. Beda Festus obk rusnok jeskaseda rujoroun Paulus skoita rua.

²⁴ Beda Festus agot oida, "Raja Agripa jera iwa nomnaga onggga ifoka aksa! Iwa ig fog, jeska rusnok onggga Yahudi onggga ringker jah kota Yerusalem jera rusnok Yahudi onggga ringker jah sif tein, rua runcunc osnok egens kef erek oska eteb fob. Noba rua ruis rot oida ofa agos ojgomu.

²⁵ Tina didif dinek mar egema tein onggga ofa ontunggom onggga erek oska fogora agos rot jinaga guri. Tina ofa esinsa oisa rot oida didif dubk ofa skoita raja Kaisar ojgomu. Jefeda didif disejah nou dumobk ofa jah suma.

²⁶ Tina didif dinejginaga rot mar meidu onggga dumogu gij surat egens osok gij ofa skoita raja Kaisar guru. Jefeda didif duroun ofa skoita bua raja Agripa onggga ofoka aksa jera iwa nomnaga. Didif dutunggom koma jeskaseda iwa ijeka gu ofa rot mar onggga Yahudi oncunc rot ofa deika. Beda erek didif dimeg rot mar onggga adaij nou dugu gij surat egens gu raja Kaisar.

²⁷ Jeska didif dusujohu oida enadaij nou didif dubk osnok egens gu raja Kaisar, tina erek dinagot rot efen mar oska onggga ontunggom enesi."

26 ¹ Erek koma beda raja Agripa agot gu Paulus oida, "Bua bagot mar rot bisinsa ojomu." Beda Paulus ofra etma erek orocunc oida ofa emagot mar. Beda ofa agot erek kef oida,

² "Raja Agripa onggga ofoka eskeiramera eteb! Deisef bera erek mona onggga ongnoska eteb nou didif. Jeska deisef tein bera didif dagot rot disinsa osok gij mar onggga oska onggga rusnok Yahudi runcunc rot didif jah bua budou.

³ Noba onggga erek oufa eteb ekirsa bera bua tein erek rusnok Yahudi, jefeda bua bijjinaga rot mar onggga mifmin mimower rinrebent fob. Noba bua budou ebriyi gij mar onggga mimif muga omosokuma rot tein. Erek koma jefeda didif direjgei bua onggga bufoka aksa jeskaseda buin keingg budou efesi ai juens fog, noba bagosuit rot mar onggga dagot insa kef.

⁴ Gij mona onggga didif duforoka ros noba dingker gij dedin monuh onojoros mona ebeibeyaif gij kota Yerusalem ros, bera rusnok onggga Yahudi rufoukou rijjinaga rot didif fob.

⁵ Rua rijjinaga rot didif erek tahun ofoukou fob. Noba adaij nou rua riflesij rot oida sis fob bera didif dita mar erek Yahudi onggga ebic Farisi. Rusnok Yahudi onggga ebic Farisi bera ruroru mar onggga mifmin agama anggot rot erek ahais. Noba didif tein duroru mar insa koma rot ahais ojgomuja sis fob.

⁶ Noba ebeibeyaif didif dut jah sif fogora iwa ijeka joug didif jeska didif duroru mar onggga Allah anggen rot gu mifmin mimower sis eteb fob. Mar koma bera

osok gij rusnok onggangos tina rimedebecki jeska ragos si.

⁷Noba mifmin Yahudi ebic setka kungkob erfeka tein rug moroju nou mar koma onggangos Allah anggen rot sis fob. Noba rua rum riteij gu Allah orofosut mona jera motu rot tein. Noba didif tein duroru mar insa koma, jefeda rua onggangos Yahudi rudou os rufra mar okum keingg didif.

⁸Jefeda enadaij nou iwa ita idou onggangos ousaha jeska Allah efen owesa efek onggangos adaij nou ofra rusnok jeska ranggos guru.

⁹Sis fob bera didif tein dusujohu rot oida dutunggom mar oska ojomu skoita rusnok onggangos ruroru Yesus, onggangos oja jeska kota Nazaret.

¹⁰Noba onggangos tenten bera didif dutunggom erek koma skoita rua gij kota Yerusalem fob. Didif disma surat egens jeska ebirfager imam-imam onggangos eita owesa efek gu didif jeskasada dijagei rua onggangos ruroru Yesus jah mod oskusk. Noba didif tein duitij rot oida rua ragos ojomu.

¹¹Didif duhca rua gij mod onggangos memef mom meiteij gij, noba didif diradgodu rua jeskasada rua ruga oruh Yesus ojomu. Noba jeska didif dudou os eteb jeskasada dufra mar okum keingg rua, jefeda didif dijba rua jah monuh enjgineg tein."

¹²Beda Paulus agot deika oida, "Erek koma beda didif durka surat egens onggangos eita owesa efek gu didif jeska ebirfager imam-imam gij kota Yerusalem jah kota Damsyik jeskasada dijagei rua onggangos ruroru Yesus jah suma tein.

¹³Gij mona onggangos didif dinja jah kota Damsyik, noba dicira gu moroju osowu ros, noba erek mowa ot deis ros, beda didif dik efesa onggangos eisa eteb jeska

mebaga. Noba efesa koma esenin didif jera rusnok onnga ruroru didif rot ahais.

¹⁴ Beda ainsa koma tein memef nomnaga mesiri gu mebi. Beda didif dig oga egens onnga agot rot oida, 'Sauluso! Teinefo fogora bua budou os bita efera okora gu Didifo?'

¹⁵ Beda didif dagot oida, 'Akeina, bua bera idu?' Beda oga egens koma oroun oida, 'Didif bera Yesus onnga bua budou os bita efera okora gu ojgomu.

¹⁶ Bua bidebecki ojgomu. Didif ducunc disinsa gu bua jeskaseda dufra bua erek dedin osnok egens onnga omofij didif. Noba bua bimejerek osnok egens onnga emefesij gu rusnok rot mar onnga bua bingk jeska Didif deisef si. Noba bua tein bimagot rot mar onnga Didif dumocunc gu bua gij mona kahma tein si.

¹⁷ Didif dumosuwa bua jeska rusnok onnga Yahudi jera rusnok onnga erek Yahudi guru rerin owesa efek. Noba didif dumobk bua

¹⁸ skoita rusnok onnga erek Yahudi guru. Jeska rua bera erek rusnok onnga riker gij motkobah ros. Noba rua rirek rusnok onnga riteij ofou tein, jeska rua rinejginaga rot dedin duga jinaga enesi. Beda rua tein rumoira gij eisa fogora Bilis onot keingg rua deika guru. Beda rua tein rimen skoita Allah beda Ofa omosuna rot rerin mar onnga oska jeska rudou efesi. Beda rua tein rumoira jera Allah efen rusnok onnga rerin rudou onnga ebsi komowa oisouska rudou onnga ororu didif si.' "

¹⁹ Beda Paulus agot deika oida, "Raja Agripa onnga ofoka aksa. Didif duroru mar insa koma nomnaga onnga Tuhan Yesus anggot gu didif rot tenten ojgomu.

²⁰ Jefeda didif dijefesij rot mar insa koma gu rusnok rufoukou jeskaseda rua tein rimeesa joug rerin mar onnga oska, noba ruh rudou efesi skoita Allah. Beda rua tein rimeita mar onnga oufamofa onnga erek orocunc oida rua rimeesa joug rerin mar onnga oska fob. Didif difesij mar erek koma sismeni gij kota Damsyik beda gij kota Yerusalem onjoros dimfesij rot mar insa koma rejrej monuh Yudea nomnaga tein fob. Noba didif difesij rot mar insa koma nomnaga tein gu rusnok onnga erek Yahudi guru tein.

²¹ Jefeda rusnok onnga Yahudi ragei didif gij Mod Allah noba rua rudou os ragob didif.

²² Tina Allah ont joug didif rot ahais jefeda didif dut jah sif noba difesij mar gu iwa onnga ifoka aksa jera iwa onnga inofoka aksa tein guru. Noba mar onnga didif dinefesij kef bera enerek toga jeska mar onnga nabi-nabi jera mar onnga Musa rimfesij rot sis fob guru.

²³ Rua ragot mar osok gij Kristus egens koma onnga Allah anggot eimofoj rot nou emen jeskaseda eita eiteij ah onnga efeinah gu rusnok. Rua tein ragot rot teinefa Ofa emeita efera okora sismeni fog fogora Ofa erek osumbohka rot rusnok nomnaga onnga rimedebeki jeska ranggos. Noba Ofa omorka Allah oga onnga oufamofa onnga erek eisa skoita rusnok onnga Yahudi jera rusnok onnga erek Yahudi guru onnga riker gij motkobah ros."

²⁴ Askesi Paulus enagot rot mar insa koma ros, beda Festus ois rot oga eteb gu ofa oida, "Paulusa! Merei ok bua fob ei! Jeska bua bufokor aksa eteb fob, jefeda mar koma orotunggom budou erebibei rot ojomu!"

²⁵ Beda Paulus oroun oida, "Gubernur Festus, merei onok didif guru. Mar onga didif dinagot insa kef bera erek tentenmen ojgomu. Noba adaij nou rusnok ruroru mar insa koma ojgomu.

²⁶ Raja Agripa esinsa ejginaga rot mar insa koma nomnaga fob tein. Jeska mar insa koma onga encirej Yesus bera rusnok nomnaga gij monuhif rijginaga rot fob. Jefeda didif dinemeesa nou difesij osok gij mar insa koma nomnaga gu ofa guru.

²⁷ Raja Agripa onga bufoka eteb! Erek bua tein budou ororu mar onga nabi-nabi rimfesij insa koma fob ei? Didif dusujohu oida bua tein buroru mar insa koma fob."

²⁸ Beda raja Agripa agot gu Paulus oida, "Paulusa! Enadaij nou bua busujohu rot oida gij mona onga estir kef bera bua bumoftufts didif fogora dimejerek rua onga Kristen tein guru."

²⁹ Beda Paulus agot oida, "Didif dum diteij gu Allah jeskasada gij mona estir era gij mona eteb beda bua jera iwa nomnaga tein onga ingg mar jeska didif gij mona deisef bera imejerek Kristen morototuma erek didif ojgomu. Tina didif dunodou os rot oida rusnok rakid yeyin itma morototuma erek rakid didif ditma guru."

³⁰ Erek koma beda raja Agripa ot jeskasada eja. Beda Gubernur Feliks ni, Bernike ni jera rusnok enjineg jah suma tein rut morototuma jera raja jeskasada rija.

³¹ Nou onga rua rinja jah mebah, beda rua ragot mar moguma oida, "Paulus kef bera onotunggom mar onga oska egema tein guru. Enadaij nou rua onga Yahudi ruga ojga rot oida ofa eker gij mod oskusk era agos rot ojgomu jinaga guru."

³² Jefeda raja Agripa agot gu Gubernur Festus oida, "Erek ofa onois nou raja Kaisar guru, beda adaij nou bua busuwa ofa ojgomu."

27 ¹ Gij mona onnga rua ranggot rot oida memef meifef meg meifeni egens jah monuh Italia, beda rua raha Paulus jera rusnok rineya onnga runt gij mod oskusk insa gu Yulius. Ofa erek ebirfaga tentarer egens onnga ojga jeska Roma. Ofa tein oira gij ebic tentarer egens onnga rijeka rufoka oida, Resimen Kaisar.

² Memef meifef meg meifeni egens onnga en jeska kota Adramitium. Meg meifeni egens insa koma nou onnga enja jah mei ofoksu egens onnga angh gij monuh Asia. Gij mona insa koma tein osnok egens onnga ofoka Aristarkus, onnga ojga jeska kota Tesalonika gij monuh Makedonia, eifef meg meifeni egens insa koma jera morototuma jera memef.

³ Erek monog beda memef menjesaga gu kota Sidon. Beda Yulius ocunc odou onnga oufamofa skoita Paulus fogora ofa oitij oida Paulus ojogog efen mohujir onnga ringker gij kota insa koma jeskasada rua rufij Paulus rot mar onnga ofa ocosu rot.

⁴ Nou onnga memef meja deika, beda memef meifef meg meifeni egens insa koma ojgomuja. Tina mof efeni erek oska noba ereteitei meg insa koma jah osum rot ahais. Jefeda memef maharira gu mei mojomu efei efembra doida motowohu Siprus, jeska mof eneretei tumu mefmen meg jah suma guru.

⁵ Beda memef meris mei mojomu efei jah mei ogwug. Beda memef mek mei mojomu efei efembra gij monuh Kilikia jera Pamfilia. Memef motoiru erek koma ojgomuja onjoros mensaga gij kota Mira onnga angh gij monuh Likia.

⁶ Beda ebirfaga tentarer egens onggga omorka memef gij meg meifeni insa koma ek meg meifeni egens onggga en jeska kota Aleksandria onggga angh gij monuh Italia. Jefeda ofa obk memef jeskasada meifef meg meifeni egens koma.

⁷ Beda memef mecira gij meg egens koma erek mona ofoukou fob, tina meg egens koma enecira rot iskusk guru. Memef meja decideci erek koma onjoros mifemebi estir ojgomu fob. Beda memef mensaga gij kota Knidus. Tina jeska mof ecira erek oska ojgomuja, noba memef menecira aharuka erek monsujuhu rot sismeni guru. Jefeda memef meifef meg meifeni jah motowohu Kreta jah degini ojgomu. Beda memef maharira osumfon Salmone jeskasada mof oska koma eneretei rot meg meifeni koma deika guru.

⁸ Memef mejaharira decideci jah mei mojomu efei efembra gu motowohu insa koma ojgomuja onjoros monjowa jah ofoksu egens onggga ofoka Ofoksu Ongkoska. Ofoksu egens koma ah doida kota Lasea.

⁹ Memef mecira decideci erek koma nou mona ofoukou fob. Jefeda memef mensaga gij monuh insa koma nou mona onggga mei mojomu ofog eteb eckicki fob. Erek koma jefeda Paulus eisisi gu rua onggga ranggei meg koma oida,

¹⁰ "Edohujia! Didif dusujohu oida, erek mimif micira deika, bera mimif mimagos si. Jeska mona onggga mof eteb ensaga fob. Beda mof koma emedi mimif rot ahais ojgomuja. Beda meg ni, mar onggga murka gij meg meifeni kef ni emeseiseifa si. Noba mimif nomnaga tein mijeseiseifa."

¹¹ Tina ebirfaga tentarer egens koma onggga oroun memef jah kota Roma onororu mar onggga Paulus

eisisi joug rua rot guru. Tina ofa ororu osnok egens onnga agei meg meifeni egens insa koma efen oga ojgomu.

¹²Gij mona onnga mei mojomu enckicki bera ofoksu onnga memef mengker gij insa koma ejerek oska eteb rot meg meifeni nomnaga. Jefeda rusnok rufoukou onnga rifef meg egens insa koma rudou os rija ebeirens jeska ofoksu insa koma noba rifef meg meifeni egens koma onjoros rinsaga gu kota Feniks. Beda memef meker jah suma onjoros mona onnga mei mojomu ofog endeider sons. Kota Feniks koma erek kota egens onnga oufamofa rot meg meifeni nomnaga onnga omoira gij mona onnga mei mojomu ofog eteb tein, jeska efen ofoksu onnga ah jah motowohu Kreta enama. Jah suma mei mojomu onofog eteb guru.

¹³Gij mona insa koma mof eriaga onnga en jeska agosu ojgomu. Jefeda rua onnga ranggei meg meifeni egens insa koma rusujohu oida mona ongnoska nou menja deika. Jefeda rua ruku kamantu noba memef mejaharira gu mei mojomu efei efembra doida motowohu Kreta.

¹⁴Erek dektek guru, beda mof eteb onnga rumois ofoka Mof Mog en noba edi mefmen meg rot ahais.

¹⁵Mof jera mos eteb en jeska meg osum noba ereteitei tumu meifeni, jefeda enadaij nou memef motoiru gij guru. Jefeda memef moug meifina fogora mof orkorka meg meifeni insa koma rot memef ojgomu.

¹⁶Nou onnga memef mekirsa jeska motowohu ofokai egens onnga ofoka Kauda, beda mof esiri oskiyai fob. Jefeda rua onnga ranggei meg egens koma ruku meg ofokai egens onnga rinrakid gu meg

eteb egens koma jeskaseda orka gij meg eteb efesi ojomu. Beda rua rireni rot ahais, tina okum eteb nou rua.

¹⁷ Beda nou onggga rua rumfra meg ofokai egens koma gij meg eteb efesi fob, beda rua rira marfeb rirakid meg eteb egens insa koma ofogu jeskaseda meg koma ecira rot ahais deika. Beda rua rimeesa rot oida mefmen meg egens koma omot gij mebsta rot rua fogora meg koma omohoda rot rua gu motowohu Sirtis. Jefeda rua rug meifeni noba rin kamantu fogora rusorora gij mei oskiyai fogora mof orkorka meg meifeni egens koma rot memef ojgomuja.

¹⁸ Mof eteb jera mei mojomu ofog onggga eteb edi meg insa koma rot ahais ojgomuja. Jefeda gij mona onggga efeinah deika beda rua rij mareibra nomnaga onggga angh gij meg meifeni egens koma gij mei mojomu efei jeskaseda meg ecira erek osufou ojomu.

¹⁹ Mof edi meg egens koma doska ojgomuja nou mona juens deika. Jefeda rua rij mar onggga meg meifeni egens koma efen nomnaga gij mei mojomu efei tein.

²⁰ Mof jera mos eteb edi memef ojgomuja nou mona ofoukou deika, noba memef menek mowa eiteij jera motur tein jinaga guru. Beda memef mosujohu oida memef memagos rot si.

²¹ Rusnok gij meg egens koma rinet maat gij mona ofoukou fob guru. Jefeda Paulus ot gu rifekesa noba agot gu rua oida, "Erek iwa iroru mar onggga disisi joug gu iwa gij mona onggga mimif mingker ofoksu Lasea ros, beda mimif minek mar okum eteb erek kef guru.

²² Tina ebeibeyaif tein didif duis gu iwa jeskaseda iwa yutin idou ahais, jeska osnok egens ai tein jeska iwa enagos guru. Meg meifeni egens kef bera emeseiseifa ojomu.

²³ Jeska gij motu insa malaikat egens jeska Allah, onnga didif dugif gu, bera en skoita didif.

²⁴ Noba malaikat egens koma agot gu didif oida, 'Paulus, bua binemeesa guru. Jeska bua bimeja skoita raja Kaisar jeskaseda ofa oga ojga rot bua si. Noba jeska Allah odou okora rot bua, jefeda rua onnga ringker gij meg meifeni efesi kef nomnaga tein rineseiseifa guru.' "

²⁵ Beda Paulus agot deika oida, "Erek koma jefeda iwa nomnaga yutin idou ahais, jeska didif dudou ororu Allah rot tenten oida mar nomnaga onnga malaikat egens koma anggot rot gu didif bera emecira rot jeni erek koma si.

²⁶ Tina meg meifeni kef omojot gij moruj gu motowohu egens ojomu."

²⁷ Erek motu setka kungkob tohkuru fob, beda mof orkorka meg meifeni rot memef gij mei mojomu efei ogug ojomuja. Beda gij motu deis rua onnga ranggei meg meifeni egens koma rufos ejginaga oida meg meifeni koma ensaga doida mog efembra fob.

²⁸ Jefeda rua rira marfeb rirakid mamu beda rin fogora rusorora jah mei osku jeskaseda rireni mei mojomu osku erek egaho. Beda rua rik, tina mei mojomu osku koma erek meter setka tohkuru. Erek dektek deika guru, beda rua rireni deika. Beda rua rik, tina mei mojomu osku koma erek meter setka orgomu.

²⁹ Jefeda rua rimeesa oida meg meifeni egens koma omot tumu moruj beda emebriyi. Jefeda rua rij

kamantu tohkuru jah meg osku. Noba rua rudou osos rot oida mowa orogna ebeirens ojgomu.

³⁰ Tina rua onnga ranggei meg egens koma rimeesa noba rudou os ruku jeska ojgomu. Jefeda rua ragot oida rua rimeij kamantu egens koma, tina onnga tenten bera rua ritki meg ofoukai koma gij mei mojemu efei jeskaseda rua risinsa ruku gij meg ofokai egens koma ojgomu.

³¹ Beda Paulus agot gu ebirfaga tentarer egens jera efen ruforoker oida, "Erek rua onnga ranggei meg meifeni kef rineker gij meg kef deika guru, bera iwa nomnaga imeseiseifa si."

³² Jefeda tentarer insa koma riris marfeb jeska meg ofokai koma fogora esiri gij mei.

³³ Erek motkobah ros, beda Paulus eisisi joug rua jeskaseda rua nomnaga rit maat oskiyai. Ofa agot gu rua oida, "Erek mona setka kungkob tohkuru fob bera idou emeesa noba erek iwa tein inet maat oskiyai tein guru, jefeda ifora eriaga fob.

³⁴ Onnga oufa bera iwa it maat ojgomai fog jeskaseda yuk ifora efek gij. Jeska iwa nomnaga ineseiseifa guru. Noba mar egema tein enecirej iwa tein guru."

³⁵ Paulus agot mar erek koma, beda ofa eita roti ofog egens noba ois oufamofa gu Tuhan rot gu rifekesa, beda ofa et.

³⁶ Nou onnga rua rik Paulus et maat erek koma, beda rua tein rudou eskeira gij fogora rua tein rit maat.

³⁷ Rusnok onnga ringker gij meg meifeni egens koma nomnaga erek rufok wuntin egeka noba setka cinja erfeka noba cinja erfens.

³⁸ Nou onnga rua rint maat erek adaij fob, beda rua rij gandum nomnaga jeska meg meifeni koma deika jeskaseda meg eja erek osufou.

³⁹ Erek mona fob, beda rua onnga ranggei meg meifeni egens koma rik mebsta gu ofoksu, tina rua rinejginaga oida motowohu kenefa bera koma guru. Beda rua rik ofoksu egens onnga angh jah suma. Jefeda rua rudou os rurka meg meifeni koma jah ofoksu insa koma.

⁴⁰ Beda rua riris marfeb jeska kamantu nomnaga jeskaseda ojuj gij mei. Beda rua tein riris marfeb onnga agei kemudi jeskaseda ruocunc meg egens koma jah ofoksu koma. Beda rua rif meifeti jeskaseda mof okruc meg meifeni egens koma jah mog.

⁴¹ Tina ainsa koma tein meg meifeni koma oira gij mei mojumu efei onnga omoira, jefeda meg meifeni koma ojut gij mebsta. Beda meg osum eretka mebsta koma noba erek eneineina tein guru. Noba mei mojumu ofog eteb obu meg osku rot ahais, jefeda ejobriyi nomnaga.

⁴² Tentarer rudou os ragob rusnok onnga rua ruroun jeska mod oskusk gij meg egens koma, jeska rua rimeesa oida rusnok insa koma rumoku ojgomu.

⁴³ Tina rerin ebirfaga tentarer egens eyahehir joug rua rot ojgomu, jeska ofa odou os ot joug Paulus. Jefeda ofa obk rua onnga rijginaga rot rira mei jeskaseda rua rusoka gij mei noba rira mei jah mog.

⁴⁴ Noba rua onnga rinejginaga rot rira mei guru bera rira meg efebr onnga embriyi noba rumorostoj rua jah mog. Memef motunggom erek koma jefeda memef nomnaga mesaga gu mog noba menagos guru.

28¹ Nou onnga memef nomnaga mera mei jah mog fob, beda memef mek oida motowohu onnga monsoka gij insa koma bera ofoka Malta.

² Rusnok onnga ringker gij motowohu koma ruroun memef rot rudou eriagamaga. Noba rua rukub mah nou memef jeska erek mos es fob noba meifirna tein edi mimif, jefeda meifirna eteb.

³ Beda Paulus ohoturu mega efej noba okub mah eteb. Nou onnga ofa ontunggom mar koma, beda magosu womfieda egens orogna jeska mah koma beda eska Paulus noba erajgej tumu etma.

⁴ Nou onnga rusnok onnga ringker gij motowohu koma ringk mar insa koma, beda rua ragot moguma oida, "Isok egens kef bera erek rua onnga rufogog ojgomu. Jeska erek ofa efena ebah jeska mei fob, tina mar onnga mimif mugif gu noba onnga ofoka ereij keingg mimif jah sif bera rudobu joug oida osnok egens kef efena enebah deika guru."

⁵ Beda Paulus agoska etma rot magosu koma, beda magosu koma esiri jeska etma gij mah. Tina Paulus efaga eskeira ojgomu. Magosu insa koma eneita efera okora gu ofa jinaga guru.

⁶ Rusnok insa koma rusujohu oida ai juens beda Paulus etma onnga magosu enska insa koma ejefifij, era ai juens beda ofa agos ojgomu. Noba erek rua riker dektek joug, tina rinek mar erek runsujohu rot insa koma guri. Jefeda rua rusujohu deika, beda rua ragot oida Paulus erek mar egens onnga rua rumougif gu onnga en skoita rua ojgomu.

⁷ Memef meker doida mekeni eteb egens onnga Publius efen. Ofa erek ebirfaga eteb gij motowohu insa koma. Ofa oroun memef rot odou onnga

ongkoska eteb jah efen mod, noba memef meker jera ofa jah suma erek mona juomu.

⁸ Gij mona insa koma tein Publius efen meka maren eteb erek ofos ofoufem doska noba ofa ot kongkonu tein. Jefeda Paulus ejek Publius efen meka insa koma. Beda Paulus aha efen etma esij ofa noba om eiteij nou ofa. Beda ainsa koma tein osnok egens koma eita eskeira fob.

⁹ Jefeda rusnok enjineg tein onnga marenir gij motowohu insa koma nomnaga rin skoita Paulus, beda ofa eita eskeira gu rua nomnaga tein.

¹⁰ Beda rua rurka mar eskembemba gu memef jeskaseda ruis oufamofa eteb gu memef. Noba gij mona onnga memef meifef meg meifeni egens nou menja deika, beda rua rurka mar ofoukou gu memef jah meg meifeni koma jeskaseda met gij meg.

¹¹ Memef meker gu Malta erek mesta ortomu fob, beda memef meifef meg meifeni egens deika. Meg meifeni koma onnga en jeska kota Aleksandria gij monuh Italia. Rusnok rijeka meg koma efen ofoka "Kastor jera Polaks." Ofoka koma bera morototuma erek mar onnga rua rugif gu efen ofoka tein. Meg egens koma ah gu Malta tein onjoros mona onnga mei mojomu ofog eteb oisa fob.

¹² Beda meg meifeni egens insa koma ecira rot memef onjoros mensaga gu kota Sirakusa. Beda memef meker jah suma erek mona orgomu.

¹³ Beda memef meja jeska kota insa koma noba maharira mei mojomu efembra onjoros mensaga gu kota Rigiium. Erek monog deika beda mof efeni ecira rot ongnoska jah agosu, jefeda gij mona jueka ojgomu beda memef mesaga gu kota Putioli.

¹⁴ Memef morodosu jera rusnok rineya onggarururu Yesus gij kota insa koma tein. Noba rua rirejgei memef jeskasada meker jera rua erek ari egens fog. Beda memef mecira maki jah kota Roma.

¹⁵ Mefmen mohujir onggarururu Yesus gij kota Roma rig oida ai juens beda memef mesaga jah suma. Jefeda rua rija onjoros pasar Apius jera modwok orgomu onggaront jah suma jeskasada rurodosu memef. Nou onggarPaulus orodosu rua jah suma, beda ofa ois oufamofa eteb gu Allah noba ofa eita odou ahais gij.

¹⁶ Gij mona onggamemef mensaga gu kota Roma fob, beda tentarer rinaha Paulus gij mod oskusk deika guru, tina rua ruitij rot oida ofa eker gij mod giskini egens ojgomu. Noba tentarer rut joug ofa jah suma.

¹⁷ Erek mona orgomu deika beda Paulus ois gu ebirfager Yahudi onggaringker gij kota koma jeskasada rua rin jah mod onggatentarer runt joug ofa gij. Nou onggaru rumohoturuma jah suma fob, beda ofa agot gu rua oida, "Edohujia, didif duntunggom mar oska egema skoita mifmin rusnok Israel guri. Noba didif dinekirsajeska mar onggamifmin mimower rirebent rot tein guri. Erek koma tina rusnok Yahudi ragei didif gij kota Yerusalem noba raha didif gu raja Kaisar efen tentarer.

¹⁸ Noba rua rijekajoug didif rot mar onggarYahudi ragot osok gij didif, tina rua rinek mar oska egema tein onggadidif duntunggom jeskasada ruga ojgarot oida didif dijagos ojgomu. Jefeda rua rudou os rusuwa didif.

¹⁹ Tina rua onggarYahudi rucunc didif erek osnok egens onggaroska ojgomuja, jefeda didif duis gu ebirfager tentarer oida didif dudou os jeskasada

raja Kaisar esinsa oga ojga rot didif ojgomu. Didif dagot mar insa koma, tina didif dunofra mar okum gu mifmin rusnok Israel sons jinaga guru.

²⁰ Erek koma jefeda didif dudou os durodosu jera iwa nomnaga jeskaseda difesij mar jera iwa. Didif duisum gij raja egens onnga eita eiteij ah onnga efeinah gu mimif onnga Israel, jefeda ebeibeyaif didif diker gij mod egens kef noba tentarer rira rantai rirakid didif ditma ojgomu."

²¹ Beda rusnok Yahudi insa koma ragot gu Paulus oida, "Memef menesma surat efeyi egens tein jeska monuh Yudea onnga agot mar osok gij bua enesi. Noba mefmen rusnok onnga ruksons jeska Yudea fob bera rinefesij rot mar onnga osok gij bua tein guru.

²² Tina memef modou os meg mar jeska bua osok gij mar insa koma onnga bua buroru deika. Jeska memef nomnaga meg fob oida rusnok rejrej monuh ofoukou ruga oruh rot mar onnga bua buroru insa koma."

²³ Jefeda rua nomnaga ruitij nou rumohoturuma deika. Noba gij mona insa koma rusnok rufoukou rin skoita mod onnga Paulus engker gij. Beda gij rahah tentena onjoros moworu fob bera Paulus efesij gu rua rot teinefa Allah ofoka ereij keingg rusnok. Noba Paulus era mar jeska buku Musa jera buku nabi-nabi tein fogora orocunc gu rusnok rot tenten oida Yesus bera Kristus egens koma onnga emen.

²⁴ Rusnok rineya ruroru mar onnga Paulus emfesij gu rua insa koma, tina rineya runororu guru.

²⁵ Jefeda rua ruga emesedema rot mar insa koma. Beda nou onnga Paulus agot mar kef oida, "Tenten! Mar onnga nabi Yesaya anggot oisouska Efena Ebsi Allah gu mifmin mimower sis fob bera ebeibeyaif ah

gij efera jeni fob. Jeska nabi Yesaya ongggu gij Mar Efeyi Ebsi rot mar onggga Allah anggot gu ofa oida, 'Bua bija skoita dedin rusnok Yahudi noba bagot gu rua erek kef oida, "Iwa ig mar ojgomuja, tina iwa idou enebriyi gij mar koma efen ofou jinaga guru. Iwa ik mar ojgomuja, tina idou enejginaga rot mar koma erek teinefa guru."

²⁶ (28:25)

²⁷ Jeska rerin rudou efesi erek ombrera fob, noba rua runoj rusu nou mar onggga rua ringg deika guru, noba mar onggga rua rik bera runohobut rot koisoisa deika guru. Tina erek rua ruj rusu nou mar onggga rua ringg, beda rudou emebriyi gij si. Noba erek rua ruhobut mar onggga rua rik rot koisoisa ojgomu, beda rua rimejginaga rot mar koma efen ofou si. Beda rudou omororu mar insa koma rot tenten si. Beda rua rimekikif jeska rerin mar onggga oska, noba Didif dusuna rot rerin mar onggga oska insa koma si. Tina rua rineita mar insa koma jeni guri.' " Nou onggga Paulus agot mar insa koma beda rua onggga Yahudi insa koma rija jeska efen mod.

²⁸ Beda Paulus agot gu rua oida, "Edohuji, jeska rua onggga Yahudi rungkoja rot Allah oga onggga eita eiteij ah onggga efeinah gu rusnok fob, jefeda ebeibeyaif Ofa obk rusnok jeskaseda rijefesij rot mar insa koma gu rusnok onggga erek Yahudi guru. Noba rua bera rimagosuit rot noba rumororu tein si!"

²⁹ ((Nou onggga Paulus anggot mar egens koma fob, beda rua onggga Yahudi ruroгна jeska efen mod beda ruga omosokuma rot mar insa koma.))

³⁰ Paulus eita fifi gu osnok egens onggga efen mod egens koma, beda ofa eker gij mod egens koma nou

tahun egeka. Beda ofa oroun rusnok nomnaga onnga runjogog ofa rot odou oufamofa.

³¹ Noba ofa efesij rot teinefa Allah ofoka ereij keingg rusnok, jera osok gij Tuhan Yesus Kristus gu rusnok insa koma. Ofa otunggom mar koma rot odou onnga enemeesa tein guru. Noba rusnok rineyahehir joug ofa rot jinaga guru. Ainsoma.

Roma

1 ¹ Didif Paulus, bera osnok egens onnga ofij Yesus Kristus. Ofa bera onnga enjeka didif erek rasul egens fob. Noba sis fob Ofa bera enjeka didif jeskaseda difesij rot Ofa efen oga onnga oufamofa skoita rusnok. Noba sis mona onnga Yesus enen gu mebif enesi, bera Allah anggen rot efen oga onnga oufamofa insa koma.

² Ofa anggen rot efen oga insa koma oisouska mar onnga nabi-nabi runggu gij Mar Efeyi Ebsi sis fob.

³ Noba oga onnga oufamofa insa koma onnga rua runggu rot bera osok gij Ofa efen efesa Yesus Kristus. Ofa en gu mebif erek osnok egens onnga onjuj jeska efen meimowa raja Daud.

⁴ Noba Ofa en erek osnok egens onnga ebsi komowa morototuma erek Allah tein. Noba oisouska Allah efen owesa efek eteb bera Ofa ocunc Yesus erek efen efesa. Ofa ocunc rot mar insa koma gij mona onnga Ofa ofra Yesus Kristus jeska anggos. Noba Yesus Kristus insa koma bera erek mifmin Tuhan tein.

⁵ Erek koma noba, oisouska mar onnga Yesus ontunggom nou didif, bera Allah oncunc didif rot efen odou onnga oufamofa skoita didif, jeskaseda dufij Ofa erek efen rasul egens. Ofa otunggom mar insa koma jeskaseda didif difesij rot efen oga onnga oufamofa gu rusnok nomnaga onnga erek Yahudi guru. Beda rua tein rumofra Yesus efen ofoka erek aksa, noba rumougif gu Ofa oisouska rudou onnga ororu Ofa fob.

⁶ Noba iwa bera erek rusnok rineya tein ongga Allah enjeka jeskaseda ija erek Yesus Kristus efen rusnok fob.

⁷ Didif dugu surat insa kef skoita iwa ongga ingker gij kota Roma ongga iroru Yesus Kristus fob. Iwa bera ongga Allah odou okora eteb rot. Noba Ofa enjeka iwa jeskaseda ija erek efen rusnok fob. Didif dum diteij gu mifmin Mika Allah jera mifmin Tuhan Yesus Kristus jeskaseda Ofa ocunc efen odou ongga oufamofa skoita iwa ojgomuja, noba jeskaseda iwa isma iteij ah ongga eskeiramera tein ojgomuja.

⁸ Sismeni, didif dudou os duis oufamofa eteb skoita dedin Allah rot mar ongga Ofa ontunggom nou iwa oisouska Yesus Kristus fob. Jeska rusnok ongga ringker rejrej monuh ofoukou bera rimfesij moguma rot teinefa iwa iroru Yesus Kristus erek tenten fob.

⁹ Allah bera ongga didif dufij rot dudou ongkasmos askesi dimfesij rot efen oga ongga oufamofa osok gij efen efesa Yesus Kristus. Noba Ofa ejginaga rot tenten oida didif dum diteij gu Ofa nou iwa erek insa koma ojgomuja.

¹⁰ Erek koma noba didif dum diteij gu Ofa jeskaseda ebeibeyaif Ofa omohoda moroju egens nou didif fogora dumojogog iwa tein si.

¹¹ Jeska didif dudou os dik iwa jeskaseda dufij iwa fogora iwa insma owesa efek jeska Efena Ebsi Allah. Noba didif dudou os dutunggom mar erek koma jeskaseda iwa imororu Yesus Kristus rot ahais ekirsa deika.

¹² Erek koma, jeska erek didif disisi joug iwa erek insa koma, beda iwa tein yeyin owesa efek adaij nou isisi joug didif tein. Koma erek mimif mimeisisima

joug oisouska mudou onnga ororu Yesus Kristus rot tenten fob.

¹³ Didif dudou os difesij gu iwa rot teinefa didif direni gij mona ofoukou jeskaseda dujogog iwa jah suma, tina mar ofoukou eragou joug didif rot ojgomuja. Didif dudou os dija skoita iwa jeskaseda dufij iwa fogora imot rot ahais ekirsa oisouska Yesus Kristus. Koma morototuma erek didif dufij rusnok onnga Yahudi guru gij monuh enjineg tein jeskaseda rua rumororu Yesus Kristus rot ahais tein.

¹⁴ Didif ducosu rot difesij rot Ofa efen oga skoita rusnok onnga Yahudi ni, rusnok onnga Yahudi guru ni, rusnok onnga rufokor aksa tein ni, jera rusnok onnga rudou osumu ni.

¹⁵ Jefeda didif dug dudou nou jeskaseda difesij rot Allah efen oga onnga oufamofa skoita iwa onnga ingker gij kota Roma tein.

¹⁶ Didif dudou os difesij rot Allah oga onnga oufamofa insa koma, noba mar koma bera mojenen didif rot oskiyai tein jinaga guru. Jeska Allah oga insa koma bera efesij rot teinefa Ofa efen owesa efek eteb onnga adaij nou oroskotu rusnok nomnaga onnga ruroru efen oga insa koma. Koma erek sismeni nou rusnok onnga Yahudi, beda nou rusnok onnga erek Yahudi guru tein.

¹⁷ Jeska Allah oga onnga oufamofa insa koma bera efesij gu mimif rot teinefa Ofa ocunc mimif erek rusnok onnga rerin mar onnga oska oskiyai tein guru. Mimif mik mar erek insa koma gij mona onnga sismeni onjoros mona onnga omoisa rot tein. Koma morototuma erek mar onnga runggu gij Mar Efeyi Ebsi sis fob onnga agot rot oida, "Rusnok onnga Allah oncunc oida rerin rudou onnga ebsi komowa jeska

rua ruroru efen oga fob, rua bera ongg a rimesma eiteij ah ongg a ah aibin."

¹⁸ Allah oncunc gu rusnok nomnaga rot tomnomna oida Ofa efen mar okum eteb emen jeska Ofa gij mebaga skoita rusnok nomnaga ongg a runororu Ofa efen oga guru. Mar okum koma emah keingg rusnok ongg a rita mar ongg a oska efekeifa skoita rusnok enjgineg fob tein. Noba oisouska rerin rita mar ongg a ofogog insa koma bera rua riragou joug moroju fogora rusnok enjgineg runororu Allah oga rot tenten tein guru.

¹⁹ Rusnok nomnaga rijginaga rot Allah fob. Erek koma jeska Ofa oncunc mar rot esinsa skoita rusnok nomnaga fob.

²⁰ Enadaij nou mimif mik Allah gu miteij guru. Tina sis mona ongg a Ofa otunggom mebif nomnaga onjoros mona deisef tein bera rusnok nomnaga rijginaga rot oida Ofa enofoguma fob. Noba oisouska mar ongg a Ofa ontunggom fob bera mimif mik rot koisoisa oida Ofa efen owesa efek eteb ongg a ah aibin ojgomuja. Noba Ofa efen ofoka bera aksa ekirsa jeska mar nomnaga ongg a angh gu mebif jera mebaga tein. Jefeda enadaij nou rusnok egema tein ragot oida rua rinejginaga rot Allah enesi jinaga guru.

²¹ Rua rijginaga rot Allah fob, tina rua runougif gu Ofa rot efen ofoka ongg a aksa guru. Noba rua runois oufamofa eteb gu Ofa tein guru. Tina rua ringkikif jeska Ofa, noba rua rusujohu mar rot Ofa ongg a erek rourou ojgomu. Noba rua bera rirek rusnok ongg a rudou osumsumu ojgomu ongg a ringker gij motkobah ojgomuja.

²² Rua rufra risinsa rufoka erek rusnok onnga rudou ebriyi gij mar ofoukou. Tina onnga tenten bera rua rija erek rusnok onnga rudou osumsumu ojgomuja.

²³ Rua runougif gu Allah rot efen ofoka onnga aksa eteb noba onnga ah rot aibin jinaga guru. Tina rua rikikif jeska Ofa noba rugif gu mar onnga rua risinsa runtunggom tumu ritma ojgomu. Mar koma onnga rua rugif gu bera erek orocunc rot rusnok ni, mem ni, marska ni, jera mar erek magosu tein ni.

²⁴ Erek koma jefeda Allah orons rot rua jeskaseda ruroru rerin mar nomnaga onnga angh gij rudou efesi onnga erek oska ojgomuja fog onjoros rua runtunggom mar onnga erek oska efekeifa eteb rot rifaga moguma.

²⁵ Rua rukoja mar onnga tenten rot Allah, beda rugif gu mar onnga erek tenten guru. Rua runougif gu Allah onnga ontunggom mar nomnaga guru, tina rua rugif gu mar onnga Ofa ontunggom ojgomu. Tina oufa nou rusnok risitit mar gu Allah rot mona ah aibin ojgomuja, noba rinesitit rot mar enjgineg tein guru.

²⁶ Jefeda Allah orons rot rua insa koma jeskaseda riker gij rerin mar onnga oska onnga rudou eftirir keingg ojgomuja. Rujager ruroru rerin mar onnga oska insa koma onjoros rudou onosos rot runer deika guru, tina ruckahtah rot rujager enjgineg ojgomu.

²⁷ Noba erek koma tein, runer rudoubu joug risiri morototuma jera rujager deika guru, tina rua ruckahtah rot runer enjgineg fogora rutunggom mar onnga oska efekeifa moguma ojgomu. Jefeda rua rinsma mar okum eteb jeska Allah ororu jeni rerin mar onnga oska efekeifa insa koma fob.

²⁸ Erek koma tein, jeska rua rukoja Allah efen oga onnga tenten noba runosujohu rot Ofa deika guru,

jefeda Allah orons rot rua riker gij rerin mar ongg
oska efekeifa insa koma ojomu. Rua ruroru mar
ongga oska ongg rudou eftirir keingg insa koma
onjoros rutunggom mar ofoukou deika ongg erek
oska eteb fob.

²⁹ Koma bera erek, rudou ebera rot mar nomnaga
ongga erek oska efekeifa ni. Rua rudou os rita mar
ongga ofogog skoita rusnok enjgineg ni. Rua rudou
os ruhoturu mareibra ofoukou nou risinsa ojomu
ni. Mar ongg angh gij rudou efesi bera erek oska
ojgomu ni. Rudou eftirir keingg rot rusnok enjgineg
rerin mar ni. Rua ragob rusnok enjgineg ni. Rua ruga
omosokuma jera rusnok enjgineg ojomu ni. Rua
ruokrusa rusnok enjgineg ojomu ni. Rua ruhurmei
mar osok gij rusnok enjgineg ni. Rua ruh rusnok
enjgineg rufonoknok ni.

³⁰ Rua ruga oruh rusnok enjgineg ni. Rua rufc rusum
rot Allah ni. Rua runougif gu rusnok egema tein guru,
noba rudou okoja rot mar ongg rusnok enjgineg
rusujohu rot rua tein ni. Rua rufra risinsa rufoka
erek aksa ojomu ni. Rua rujohca moroju ofoukou
jeskaseda rutunggom mar ongg ofogog deika ni.

³¹ Rua rudou osumsumu eteb ni. Rua runororu Allah
efen oga guru ni. Rua rukoja rot mar ongg rusnok
enjgineg rusujohu rot ni. Rua rutunggom mar ongg
oska skoita rusnok enjgineg tein ni.

³² Noba rua rijginaga rot mar ongg Allah anggot
osok gij mar insa koma fob tein. Jeska Ofa oga oja
rot oida, rusnok ongg rita mar ongg oska bera
rimagos rot rerin mar ongg oska insa koma si. Ere
koma tina rua ruroru rerin mar ongg oska insa koma
ojgomu. Noba ongg oska ekirsa bera, rua rudou

eskeira rot rusnok enjgineg onnga rutunggom mar onnga oska erek insa koma tein.

2¹ Erek koma jefeda, enadaj nou mimif magot oida minejginaga rot oida Allah omofra mar okum eteb keingg rusnok onnga rutunggom mar onnga oska erek insa koma jinaga guru. Noba erek rineya jeska iwa rucunc rusnok enjgineg erek oska rot mar insa koma onnga rua runtunggom fob, beda koma erek rua rucunc risinsa tein erek ruska. Jeska iwa nomnaga bera ita mar egema tein onnga oska morototuma erek rusnok insa koma fob.

² Mimif mijginaga rot oida gij mona onnga Allah ofra mar okum keingg rusnok rot rerin mar onnga oska, beda mar onnga Allah ontunggom insa koma bera erek tenten ojgomu.

³ Iwa bera erek rusnok giskini onnga rutunggom mar erek insa koma tein. Jefeda gij mona onnga iwa icunc rusnok enjgineg erek oska rot rerin rita mar onnga oska, beda enadaj nou iwa isujohu rot oida iwa imosuwa isinsa jeska Allah efen mar okum insa koma tein guru.

⁴ Askesi iwa iroru mar onnga oska ros, beda Allah oin keingg odou efesi rot iwa noba Ofa ocunc odou onnga oufamofa skoita iwa ros. Tina enadaj nou iwa isujohu rot oida mar onnga Allah ontunggom insa koma bera onofoufem nou iwa guru, erek koma guru. Jeska Ofa ocunc odou onnga oufamofa erek insa koma jeskaseda iwa imeesa joug rot yeyin mar onnga oska.

⁵ Erek koma tina iwa ifos ombrera ojgomu jeska iwa inemeesa joug rot yeyin mar onnga oska guri. Jefeda koma erek iwa imesma mar okum eteb ekirsa gij mona onnga Allah ocunc odou onnga otkonu oska

eteb skoita rusnok onnga ruroru mar onnga oska ros. Gij mona insa koma bera rusnok rimek Ofa ofra mar okum eteb keingg rusnok nomnaga onnga rita mar onnga oska erek insa koma si. Noba mar onnga Ofa omotunggom koma bera erek tenten ojgomu.

⁶Jeska Ofa emeita mar gu rusnok nomnaga jeni rerin rita mar.

⁷Erek rusnok ruh rudou efesi jeskaseda ruroru mar onnga oufamofa ojgomuja jeskaseda Allah omofra rerin rufoka aksa ni, noba ocunc rua erek rusnok onnga rudou oufamofa ni, erek rua rusujohu rot eiteij ah onnga ah aibin ni, beda Allah bera emeita eiteij ah onnga aibin ojgomuja gu rua si.

⁸Tina erek rusnok rudou efeneinei rot risinsa ojgomu noba runofij rusnok enjgineg guru ni, rua rukoja Allah oga onnga tenten ni, rudou os ruroru mar ofogog ni, beda Allah omocunc efen odou onnga otkonu oska eteb skoita rua fogora omofra mar okum keingg rua rot si.

⁹Rusnok nomnaga onnga rita mar onnga ofogog bera rimesma okum eteb noba rumofogu okora eteb rot si. Koma tenten rot rusnok onnga Yahudi jera rusnok onnga Yahudi guru tein.

¹⁰Erek koma tina rusnok nomnaga onnga rita mar onnga oufamofa bera rimesma rufoka aksa jera riteij ah onnga eskeiramera jeska Allah. Noba Allah omocunc rua erek rusnok onnga oufamofa tein. Koma tenten rot rusnok onnga Yahudi jera rusnok onnga erek Yahudi guru tein.

¹¹Mar insa koma nomnaga bera erek tenten ojgomu. Jeska Allah oga ojga rot rusnok ebic nomnaga erek edamokuma rot rerin rita mar fob.

¹² Oisouska hukum Musa bera erek rusnok rinejginaga rot hukum Musa enesi, tina rua ruroru mar onnga oska ojgomu, beda rua tein bera rimesma okum eteb jeska Allah rot si. Noba rusnok nomnaga onnga rijginaga rot hukum Musa fob, tina rua ruroru mar onnga oska ros, beda Allah omofra mar okum eteb keingg rua rot tein si.

¹³ Erek rusnok rudou ebriyi gij hukum Musa fob, tina rua runororu jeni hukum insa koma nomnaga guru, beda Allah onocunc rua erek rusnok onnga rudou ebsi komowa guru. Tina rusnok onnga rudou ebriyi gij hukum Tuhan fob noba ruroru jeni hukum insa koma nomnaga, rua bera onnga Allah omocunc erek rusnok onnga rudou ebsi komowa.

¹⁴ Rusnok onnga Yahudi guru rinejginaga rot hukum Musa enesi. Tina gij mona onnga rua risinsa ruroru mar onnga oufamofa onnga morototuma erek hukum Musa anggot rot, beda koma orocunc rot oida hukum egens bera enah gij rudou efesi fob.

¹⁵ Oisouska mar oufamofa onnga rua runtunggom insa koma bera rua ruocunc rot oida mar onnga morototuma erek hukum Musa bera enah gij rusnok nomnaga rudou efesi fob. Koma tenten ojgomu, jeska rusnok nomnaga rijginaga gij rudou efesi rot fob oida mar onnga rua rutunggom bera erek tenten era erek oska.

¹⁶ Allah omofra mar okum eteb rot mar nomnaga onnga rusnok rindemdemmi gij rudou efesi oisouska mar onnga Yesus Kristus anggot fob si. Mar insa koma nomnaga bera onnga didif dimfesij rot gu rusnok gij mona onnga didif duftufts rot Allah oga onnga oufamofa.

¹⁷ Erek koma noba, teinefa rot iwa onnga erek Yahudi. Iwa idou eredi rot oida Allah omoskotu iwa, jeska iwa iroru hukum Musa ni. Iwa isitit isinsa ifaga jeska iwa bera erek Allah efen rusnok ojgomu ni.

¹⁸ Iwa isujohu rot oida idou ejginaga rot mar onnga Allah ondou os rot ni. Iwa yagot rot oida idou ebriyi osok gij mar meidu onnga erek oufamofa, jeska rusnok rumftuftu iwa gij hukum Musa sis fob ni.

¹⁹ Iwa yagot rot oida iwa iroun rusnok onnga rinejginaga rot Allah enesi skoita Ofa erek osnok egens onnga oroun rua onnga riteij ofou skoita moroju ni. Iwa isujohu rot oida mar onnga iwa yuftuftu gu rua onnga Yahudi guru osok gij Allah oga bera orofij rua erek lampu eisa orofij rusnok gij motkobah ni.

²⁰ Iwa yagot oida iwa yuftuftu rusnok onnga rudou osumsumu rot hukum Musa jera rusnok onnga rudou ebriyi gij mar erek ruforoker rudou ebriyi gij mar ni. Erek koma jeska iwa isujohu rot oida, oisouska hukum Musa bera iwa idou ebriyi gij mar onnga erek tenten fob.

²¹ Erek yeyin ita mar insa koma nomnaga onnga ongnoska, jeska iwa bera rusnok onnga Yahudi. Jefeda teinefa fogora iwa inoftuftu isinsa rot mar insa koma tein guri. Iwa yuftuftu gu rusnok enjgineg oida runokoreka mar guru, tina teinefa fogora iwa isinsa yukoreka mar erek komo.

²² Noba erek iwa iyahehir joug rusnok jeskaseda rinesiri morototuma jera egema efen mohona guru, tina teinefa fogora iwa isinsa isiri morototuma jera egema efen mohona erek komo. Iwa yagot oida enadaj nou rusnok rugif gu mar onnga erek tenten guru. Tina teinefa fogora iwa yukoreka mar onnga

tenten guru onggua rua rugif gu jeskasada iwa yugif gu mar insa koma erek wuswus teino.

²³ Iwa idou os isitit isinsa ifaga rot oida iwa ijginaga rot hukum Allah fob. Tina teinefa fogora iwa inororu jeni hukum insa koma guri. Koma erek iwa ihurmei mar skoita Allah ojgomu.

²⁴ Jeska iwa ihurmei mar skoita Allah erek koma, jefeda mar onggua runggu gij Mar Efeyi Ebsi osok gij iwa sis fob bera erek tenten ojgomu. Mar koma agot rot oida, "Rusnok onggua Yahudi guru rukoja Allah oga jeska rua rik mar onggua Yahudi runtunggom insa koma onggua erek oska ojgomu."

²⁵ Iwa iris ifom mareij ofos jeska jeskasada irocunc rot oida iwa bera erek Allah efen rusnok. Noba erek iwa iroru Ofa rot tenten fob, beda mar koma bera oufa. Tina iwa inororu hukum Musa rot tenten guri. Jefeda mar onggua iwa intunggom gu yeyin ifom mareij ofos insa koma bera onofij iwa oskiyai tein jinaga guru.

²⁶ Rua onggua Yahudi guru rineris rufom mareij ofos jeska guru. Tina erek rua ruroru hukum Allah rot tenten fob, beda Allah omoroun rua tein morototuma erek Ofa oroun rusnok Yahudi onggua riris rufom mareij ofos jeska fob.

²⁷ Iwa onggua Yahudi bera yeyin hukum Musa fob. Noba iwa bera onggua iris ifom mareij ofos jeska fob. Tina iwa inororu hukum insa koma rot tenten guru. Rua onggua Yahudi guru bera rineris rufom mareij ofos jeska guru. Tina rineya jeska rua bera ruroru mar onggua morototuma erek hukum Musa anggot rot fob. Jefeda mar onggua rua runtunggom insa koma orocunc rot oida iwa onggua Yahudi bera erek rusnok onggua oska ojgomu.

²⁸ Ereke rusnok ruroru jeni erebent hukum Musa, beda koma onorocunc rot tenten oida rua bera erek Allah efen rusnok guru. Noba erek rusnok riris rufom mareij ofos jeska, beda koma onorocunc rot tenten oida rua bera erek Allah efen rusnok tein guru.

²⁹ Tina mar onggga oufamofa onggga ah gij rusnok rudou efesi bera onggga orocunc rot oida rua rierek Allah efen rusnok onggga tentenmen ojgomu. Noba mar onggga oufamofa insa koma bera en oisouska Efena Ebsi Allah ojgomu. Mar koma enen jeska mar onggga runggu gij hukum Musa jinaga guru. Osnok egens onggga otunggom mar onggga oufa bera odou os jeskasada Allah esitit mar rot ofa. Ofa onohca rusnok jeskasada rua risitit mar rot ofa guru.

3 ¹ Ereke koma jefeda, erek rusnok riris rerin rufom mareij ofos jeska, beda koma onorocunc rot oida rua bera erek onggkoska ekirsa jeska rusnok enjgineg guru. Jefeda rineya rijeka oida, "Ereke mimif miris mufom mareij ofos jeska, beda koma ofij mimif erek teinefa? Noba mar meidu onggga orocunc rot oida mimif onggga Yahudi bera mifmin mufoka onggga ekirsa jeska rusnok onggga Yahudi guru?"

² Didif dumoroun gu rua insa koma oida, tenten mimif bera erek Yahudi. Noba koma bera ofij mimif ojgomu. Jeska gij mona onggga sismeni bera Allah eita efen oga onggga oufamofa skoita mifmin mimower onggga Yahudi ojgomu.

³ Tina rineya jeska iwa rijeka oida, "Mifmin mimower rineya runororu Allah efen oga insa koma rot tenten guru. Jefeda Allah eneita mar gu mimif jeni erek Ofa anggen rot sis fob gurei?"

⁴ Ereke koma guru, jeska rusnok nomnaga rucuwei mar moguma, tina mar nomnaga onggga Allah

anggen rot bera erek tentenmen ojgomu. Koma erek mar onnga raja Daud onngu gij Mar Efeyi Ebsi sis eteb fob. Ofa onngu oida, "Erek rusnok ruhurmei mar rot bebin buga, tina buga nomnaga bera erek tentenmen. Noba rusnok nomnaga rudou emebriyi gij mar insa koma si."

⁵ Rusnok rineya onnga rudou osumsumu eteb rot bera ragot erek kef oida, "Skoidu, mimif mita mar onnga oska ojgomu. Jeska erek rusnok enjgineg rik mifmin mar onnga oska insa koma, beda koma bera orofij rua. Jeska oisouska mifmin mar onnga oska rua rimejginaga rot oida mar insa koma onnga Allah eyahehir joug bera erek tentenmen ojgomu. Noba koma erek mimif mufij Allah oisouska mifmin mita mar onnga oska insa koma. Jefeda enadaij nou Allah ofra mar okum keingg mimif rot guru." Yo, rusnok rineya ragot mar rourou erek koma fob.

⁶ Tina mimif mijginaga rot oida mar onnga rua rusujohu rot insa koma bera enerek tenten guru. Jeska Allah oga ojga rot rusnok erek edamokuma ojgomu. Jefeda Ofa omoga ojga rot rusnok mebif nomnaga rot rerin rita mar erek edamokuma tein si.

⁷ Noba rusnok onnga rudou osumsumu eteb ragot oida, "Erek rusnok riremenima jeni mimif onnga mucuwei mar jera Allah onnga onocuwei mar guru, beda rua rumofra Allah ofoka erek aksa eteb ojgomu. Noba koma erek mifmin mita mar onnga oska insa koma orofij Allah jeskaseda esma efen ofoka onnga aksa. Jefeda enadaij nou Allah ofra mar okum keingg mimif rot mifmin mar onnga oska insa koma guru."

⁸ Erek mar onnga rua ragot rourou insa koma bera tenten ei, beda onnga oufa bera mimif nomnaga mita mar onnga oska ojgomuja jeskaseda Allah esma

ofoka ongg aaksa eteb deika ojgomu ei. Tina erek koma guru. Noba rusnok rineya ruhurmei mar rot didif tein. Jeska rua ragot oida didif bera duftuoftu mar rourou erek insa koma gu rusnok enjgineg, tina guru. Allah omofra mar okum keingg rua rot si. Noba koma bera erek tenten ojgomu.

⁹Jefeda mimif musujohu rot mar insa koma nomnaga erek teinefa? Enadaij nou mimif musujohu rot oida Allah omocunc odou ongg aoufamofa skoita mimif ongg aYahudi, tina Ofa ocunc odou ongg aoska rot rusnok ongg aYahudi guru, erek koma guru. Jeska didif dimfesij gu iwa fob rot oida Allah omofra mar okum eteb keingg rusnok nomnaga ongg arerin mar ongg aoska si. Koma tenten rot rusnok ongg aYahudi morototuma jera rusnok ongg aYahudi guru.

¹⁰Erek koma jeska, sis fob runggu gij Mar Efeyi Ebsi erek kef oida, "Osnok egens tein ongg aefen odou ongg aebsi komowa bera enofoguma jinaga guru ni.

¹¹Osnok egens tein ongg aodou ebriyi gij Allah oga bera enofoguma jinaga guru ni. Osnok egens tein ongg aereneni rot ahais jeskaseda eita odou egens jera Allah bera enofoguma jinaga guru ni.

¹²Rusnok nomnaga bera ringkikif jeska Allah noba rungkoja Ofa ojgomu ni. Rusnok nomnaga bera onofoufem skoita Allah guru ni. Osnok egens tein eneita mar rot odou ongg aebsi komowa jinaga guru ni.

¹³Mar ongg arusnok nomnaga ranggot rot bera oska eteb erek mar agos efen emba ongg aoska eteb ni. Rua ruokrusa rusnok enjgineg oisouska mar ongg aranggot ni. Noba mar ongg arua ranggot bera orotunggom rusnok enjgineg fogora rifeira okora rot,

erek magosu onnga eska rusnok fogora rita efera okora gu rua ni.

¹⁴ Rua ragot mar ofogog jera mar onnga oska eteb skoita rusnok enjgineg ni.

¹⁵ Rusnok rudou ot ebeirens jeskaseda ragob rusnok enjgineg ni.

¹⁶ Noba orofosut monuh onnga rua ruira gij bera eja erek oska. Beda rusnok jah suma tein rita efera okora jeska rua ni.

¹⁷ Rusnok rinejginaga rot teinefa rua rufij rusnok jeskaseda riker morototuma erek eskeira moguma guru ni.

¹⁸ Rua runougif gu Allah jinaga guru ni."

¹⁹ Erek koma noba mimif mijginaga rot oida hukum nomnaga onnga Allah eita oisouska Musa bera nou rusnok Yahudi. Noba rua rumororu hukum insa koma nomnaga ojgomu. Jefeda enadaij nou rusnok egema tein ruga erahah rot mar skoita Allah osok gij mar okum onnga Ofa omfra keingg rua rot jinaga guru. Noba Allah oncunc rusnok nomnaga erek rerin rita mar onnga oska fob.

²⁰ Jefeda rusnok egema tein rinesma rudou onnga ebsi komowa ahah Allah eiteij oisouska hukum Musa onnga rua ruroru jeni jinaga guru. Onnga tenten bera hukum Allah insa koma orocunc gu mimif rot oida rusnok nomnaga rerin mar onnga oska fob.

²¹ Erek koma tina, ebeibeyaif bera Allah oncunc gu mimif fob rot teinefa mimif misma mudou onnga ebsi komowa ahah Ofa eiteij. Koma enen jeska mudou onnga ororu jeni hukum Musa nomnaga guru. Noba mar insa koma bera runggu rot gij hukum Musa tein fob. Noba nabi-nabi jeska mona onnga ensis bera

runggu gij Mar Efeyi Ebsi osok gij mar insa koma tein fob.

²² Allah ocunc rot oida mimif bera erek rusnok onnga rerin mar onnga oska deika guru. Noba koma bera oisouska mudou onnga ororu Yesus Kristus rot tenten fob. Noba Allah eita mar erek koma nou rusnok Yahudi jera rusnok onnga Yahudi guru, nomnaga onnga ruroru Yesus Kristus fob.

²³ Jeska rusnok nomnaga runtunggom mar onnga oska fob. Noba rusnok nomnaga rineita mar onnga ongnoska jeni erek Allah odou os rot guru.

²⁴ Noba oisouska Allah odou onnga oufamofa eteb bera Ofa oga ojga rot oida Ofa omocunc rusnok rudou erek ebsi komowa. Ofa omotunggom mar koma jeskaseda osuna rot rusnok rerin mar onnga oska jeska rudou efesi. Noba mimif misma mar insa koma oisouska Yesus Kristus ogufu onnga eya nou mimif fob.

²⁵ Allah oncunc Ofa erek osnok egens onnga emagos nou rusnok nomnaga rerin mar onnga oska. Noba mimif misma mudou onnga ebsi komowa oisouska mudou onnga ororu rot tenten oida Yesus ogufu eya jeska efaga tumu mega salib nou mimif fob. Noba Allah ontunggom mar insa koma jeskaseda orocunc rot oida Ofa bera eita mar onnga tenten rot rusnok nomnaga. Jeska gij mona onnga dektek fob bera Ofa oin keingg odou efesi noba onofra mar okum keingg rusnok rot rerin mar onnga oska enesi.

²⁶ Ofa otunggom mar insa koma jeskaseda orocunc gu rusnok gij mona ebeibeyaif rot oida Ofa eita mar nomnaga rot tenten ojgomu. Noba Ofa oncunc oisouska odou onnga tenten oida rusnok nomnaga

ongga ruroru Yesus fob bera erek rusnok onggga rerin rudou ebsi komowa rot tenten fob.

²⁷ Erek koma jefeda enadaij nou mimif misitit misinsa mifaga rot oida mimif misma mudou onggga ebsi komowa oisouska hukum Musa onggga muroru jeni guru. Tina rusnok risma rudou onggga ebsi komowa ahah Allah eiteij oisouska rudou onggga ororu Yesus Kristus rot tenten ojomu.

²⁸ Jeska mimif mijjinaga rot oida Allah bera onggga ocunc rusnok rudou efesi erek ebsi komowa. Noba Ofa eita mar erek koma oisouska mudou onggga ororu Yesus Kristus ojomu. Ofa eneita mar koma oisouska hukum Musa onggga mimif muroru jeni guru.

²⁹ Enadaij nou iwa onggga Yahudi isujohu rot oida Allah omoroun iwa erek efen rusnok ojomu guru. Jeska Allah omoroun rusnok onggga Yahudi guru onggga ruroru Yesus fob erek efen rusnok tein.

³⁰ Ofa esinsiyai ojomu bera onggga ocunc rusnok onggga Yahudi erek ebsi komowa oisouska rudou onggga ororu Ofa rot tenten. Noba Ofa bera onggga ocunc rusnok onggga Yahudi guru tein erek ebsi komowa oisouska rudou onggga ororu Ofa rot tenten.

³¹ Jefeda erek rusnok rusujohu rot oida hukum Musa onofoufem deika guru, beda koma enerek tenten guru. Jeska oisouska mudou onggga ororu Allah rot tenten bera mimif mucunc rot oida hukum Musa bera erek tenten ojomu.

4¹ Ebeibeyaif mimif musujohu rot mifmin mimowa Abraham. Idou ah keingg rot mar onggga Allah ontunggom jeskasada ocunc Abraham erek osnok egens onggga efen mar onggga oska oskiyai tein guru.

² Jeska erek mar onggga Abraham esinsiyai ontunggom bera ereita odou onggga efen mar onggga

oska guru ahah Allah eiteij, beda adaij nou ofa esitit esinsa efaga rot ojgomu. Tina enadaij nou ofa esitit rot esinsa erek koma jah Allah odou guru.

³Jeska iwa idou ah keingg rot mar onnga runggu gij Mar Efeyi Ebsi osok gij Abraham sis fob. Mar egens insa koma agot oida, "Abraham ororu Allah rot tenten, jefeda Allah oncunc ofa erek osnok egens onnga efen mar onnga oska oskiyai tein guru."

⁴Iwa tein isujohu rot mar onnga orocunc rot erek kef oida, erek osnok egens onnga emfarur, beda ofa emesma efen ofons rot. Noba efen ofons insa koma bera enerek oubji guru, tina ofa esma ofons insa koma jeska emfarur rot ojgomu fob.

⁵Erek koma, tina erek osnok egens onotunggom mar jeskaseda esma odou onnga efen mar onnga oska guru, noba ofa ororu rot oida Allah osuna rot rusnok rerin mar onnga oska, beda Allah omocunc ofa erek osnok egens onnga efen mar onnga oska oskiyai tein guru.

⁶Erek koma tein, raja Daud onngu gij Mar Efeyi Ebsi sis fob rot oida rusnok rudou erirei eteb, jeska Allah ocunc rerin rudou erek ebsi komowa fob. Noba rua runotunggom mar onnga oufamofa jeskaseda risma rudou ebsi komowa erek insa koma guru. Tina Allah eita rudou onnga erek insa koma rot oubji ojgomu.

⁷Raja Daud agot oida, "Oufamofa eteb nou rusnok, jeska Allah onsuna rot rerin mar onnga oska fob. Noba Ofa onofra mar okum keingg rua rot deika guru.

⁸Rua rudou efaga ouka ojgomu, jeska Allah odou enah keingg rot rerin mar onnga oska insa koma deika guru."

⁹ Allah onocunc rusnok Yahudi risinsiyai erek rerin rudou onnga ebsi komowa ojgomu guru. Tina Ofa ocunc rusnok onnga Yahudi guru tein erek rusnok onnga rerin mar onnga oska oskiyai tein guru. Allah ocunc Abraham erek osnok egens onnga efen mar onnga oska oskiyai tein guru, jeska ofa ororu Allah oga rot tenten fob.

¹⁰ Tina iwa isujohu rot koisoisa osok gij mona kenefo fogora Allah oncunc ofa erek osnok egens onnga efen odou ebsi komowa erek insa koma. Jeska Allah oncunc Abraham efen odou erek insa koma gij mona onnga ofa eneris efen ofom mareij ofos jeska enesi.

¹¹ Noba gij mona kahma deika, beda ofa ororu mar onnga Allah anggot rot fogora eris ofom mareij ofos jeska. Noba koma erek mar onnga orocunc rot oida, oisouska odou onnga ororu Allah rot tenten fob bera Allah oncunc Abraham erek osnok egens onnga odou ebsi komowa. Jefeda ofa erek osumbohka rot rusnok nomnaga onnga rineris rufom mareij ofos jeska enesi, tina rururu Allah oga rot tenten ojgomuja jeskaseda risma rudou efesi onnga ebsi komowa.

¹² Abraham bera erek osumbohka tein rot rusnok Yahudi onnga riris rufom mareij ofos jeska erek ofa tein. Tina rua tein rururu Allah oga onnga tenten morototuma erek ofa sis fob. Jeska Ofa ororu Allah oga rot tenten gij mona onnga ofa eneris efen ofom mareij ofos jeska enesi.

¹³ Gij mona onnga sismeni fob bera Allah anggen gu Abraham rot oida ofa jera efen rusnok onnga runjuj jeska ofa bera rimesma oufamofa eteb jeska Ofa. Tina Abraham enesma oufamofa insa koma oisouska hukum Musa onnga ofa omoruru guru. Ofa esma

oufamofa insa koma jeska ofa ororu mar onggga Allah anggen insa koma rot tenten. Noba Allah oncunc ofa erek osnok egens onggga efen mar onggga oska oskiyai tein guru.

¹⁴Tina erek rusnok risma rudou onggga ebsi komowa jeska rua ruroru jeni hukum Musa ojomu, beda rudou onggga ororu Allah oga rot tenten bera onofij rua jinaga guru. Noba mar onggga Allah anggen rot gu Abraham bera onofij rua tein jinaga tein guru.

¹⁵Jeska hukum Musa agot oida rusnok rimesma okum eteb jeska Allah rot rerin mar onggga oska. Noba erek hukum egens enahuma guru, beda enadaj nou rusnok rikirsa rot hukum egens guru.

¹⁶Jefeda oisouska rusnok rudou onggga ororu Allah oga rot tenten fob bera rua risma rudou onggga ebsi komowa jeni erek Ofa anggen rot sismeni fob. Allah odou os erek koma jeskaseda rusnok risma rudou onggga ebsi komowa erek insa koma oisouska Ofa odou onggga oufamofa rot rua ojomu. Jefeda rusnok nomnaga onggga ruroru Allah rot tenten erek Abraham ororu Ofa sis fob bera rimesma mar onggga Ofa anggen rot si. Koma nou rusnok Yahudi onggga ruroru hukum Musa ojomu guru. Tina koma tein nou rusnok nomnaga onggga ruroru Allah oga rot tenten ojomu erek Abraham. Ofa bera onggga ororu Allah oga rot tenten fogora esma odou onggga efen mar onggga oska guru rot sismeni.

¹⁷Mar insa kef bera erek tenten ojomu. Jeska rungggu gij Mar Efeyi Ebsi rot oida, "Didif duncunc bua Abraham jeskaseda bija erek dedin rusnok ebic ofoukou rerin rika." Erek koma noba ahah Allah eiteij bera Abraham erek mifmin mika jeska ofa bera onggga ororu Allah oga rot tenten sismeni fogora

esma mar onnga Allah anggen rot fob. Jeska efen odou ororu rot tenten oida Allah efen owesa efek nou ofra rusnok jeska ranggos. Noba ofa ororu rot tenten oida mar onnga Allah anggot rot nou mona kahma bera omorogna si.

¹⁸Gij mona insa koma bera mar egema tein onocunc gu Abraham rot oida ofa emesma efen efesa egens onnga Allah anggen rot gu ofa sis fob guru. Erek koma tina ofa oisum gij Allah rot tenten ojgomu. Jefeda Allah ocunc ofa erek osumbohka rot rusnok ebic ofoukou onnga rimesma rudou onnga ebsi komowa oisouska rudou onnga ororu Ofa rot tenten. Jeska Allah agot gu ofa erek kef oida, "Gij mona kahma beda rusnok onnga rumororu Didif morototuma erek bua buroru Didif bera rumofoukou doska si."

¹⁹Allah agot mar erek insa koma gu ofa fob, tina gij mona insa koma bera ofa erek onokona eteb fob. (Ofa efen ari mega ofoj erek wuntin egens fob). Noba efen mohona tein ojonokona noba ebsei ojgomu. Erek koma tina ofa efena enesiri rot mar onnga Allah anggen rot gu ofa guru, tina ofa ororu efen oga insa koma ojgomuja.

²⁰Erek ofa odou efeneinei rot, tina ofa ororu mar onnga Allah anggen rot insa koma erek ahais ekirsa ojgomuja. Noba ofa ois oufamofa eteb gu Allah rot mar onnga Ofa emeita gu ofa gij mona kahma si.

²¹Erek koma jeska ofa ororu rot tenten oida Allah efen owesa efek adaj nou otunggom mar onnga Ofa anggen rot si.

²²Jefeda runggu gij Mar Efeyi Ebsi sis fob osok gij Abraham oida, "Ofa ororu Allah rot tenten fob, jefeda

Allah ocunc ofa erek osnok egens onnga efen mar onnga oska oskiyai tein guru."

²³ Noba mar onnga runngu gij Mar Efeyi Ebsi insa koma bera onosok gij Abraham ojgomu guru.

²⁴ Tina mar insa koma onnga runngu rot fob bera osok gij mimif tein. Jeska ebeibeyaif bera Allah oncunc mimif tein erek efen rusnok onnga rerin mar onnga oska oskiyai tein guru. Koma jeska mifmin mudou ororu Allah oga rot tenten fob. Noba Ofa bera onnga omfra Yesus Kristus jeska anggos fob.

²⁵ Yesus bera onnga aha esinsa jeskaseda agos nou mifmin mar onnga oska. Beda Allah omfra Ofa jeska anggos jeskaseda mimif tein misma mudou onnga ebsi komowa ahah Ofa eiteij.

5¹ Erek koma jefeda, oisouska mudou onnga ororu Allah oga rot tenten fob, beda Ofa oncunc mimif erek rusnok onnga rerin mar onnga oska oskiyai tein guru. Noba oisouska mar onnga Yesus Kristus ontunggom nou mimif fob bera Allah odou onokum rot mimif deika guru.

² Noba Yesus Kristus bera onnga oroun mimif skoita Allah. Jefeda ebeibeyaif Allah ocunc efen odou onnga eskeiramera skoita mimif ojgomuja. Noba mar koma tein bera en oisouska mudou onnga ororu Yesus Kristus rot tenten fob. Jefeda mimif mudou efaga ouka eteb rot noba muisum gij Allah, jeska Ofa omfra mifmin mufoka erek aksa morototuma erek Ofa efen ofoka onnga aksa tein fob.

³ Erek koma tina, askesi mar okum ereneni mimif ojgomuja ros, beda mimif mudou onokumkum rot guru. Tina mimif mug mijmeg rot noba mudou eskeira rot tein ojgomu. Jeska mar okum insa koma bera oroftufts mimif jeskaseda muin keingg mudou

efesi gij mona onnga mar okum ereneni mimif oigomuja.

⁴Beda oisouska mar insa koma bera Allah odou eskeira rot mimif. Noba oisouska Allah odou onnga eskeira rot mimif bera mimif muisum gij Ofa rot oida Ofa omocunc efen oufamofa eteb gu mimif si.

⁵Mar insa koma bera oroufij mimif jeskaseda mifena enesiri rot guru. Jeska oisouska Efena Ebsi, onnga Allah ombk skoita mimif, bera Ofa oncunc rot oida Ofa odou okora eteb rot mimif.

⁶Erek koma, jeska askesi mimif mingker gij mifmin mar onnga oska ros, beda enadaj nou mimif musuwa misinsa jeska mar onnga okum insa koma guru. Beda Yesus Kristus anggos nou rusnok nomnaga fob. Ofa otunggom mar insa koma gij mona onnga Allah oga eris rot.

⁷Erek giskini bera rusnok rinaha risinsa jeskaseda ragos tumu ruhujir guru. Noba erek rusnok rineya onnga rudou ocosu efei ahtah eteb tein, beda rua ragos tumu ruhujir onnga rerin mar onnga oufamofa ei era gurei.

⁸Erek koma tina Allah oncunc efen odou onnga okora eteb rot mimif fob. Jeska askesi mimif mingker gij mifmin mar onnga oska ros, beda Yesus Kristus anggos nou mimif.

⁹Noba oisouska efen ogufu onnga eya jeska efen efaga tumu mega salib bera Allah oncunc mimif erek rusnok onnga rerin mar onnga oska oskiyai tein guru. Jefeda koma bera orocunc erek ekirsa rot oida Yesus omoskotu mimif jeska mar okum onnga Allah omofra keingg rusnok rot odou onnga otkonu oska gij mona kahma si.

¹⁰ Sis fob bera mimif mita mar erek rusnok onggara rufogog skoita Allah ojomu oisouska mifmin mar onggara oska. Tina ebeibeyaif oisouska efen efesa Yesus Kristus onggara anggos tumu mega salib nou mimif fob bera Allah eita odou onggara eskeiramera rot mimif. Noba onggara oufamofa ekirsa bera, oisouska Yesus Kristus onggara efena ebah sons fob, Ofa omoskotu mimif jeska Allah efen mar okum si.

¹¹ Noba erek koma tein, mimif mudou efaga ouka eteb rot mar onggara Allah ontunggom nou mimif oisouska mifmin Tuhan Yesus Kristus. Ofa bera onggara oroun mimif skoita Allah rot mudou onggara eskeiramera ojomu.

¹² Erek koma jefeda iwa isujohu rot kef oida, gij mona onggara sismeni bera Adam otunggom mar onggara oska fob. Jefeda Allah oga ojga rot oida ofa emagos rot ojomu. Noba rusnok nomnaga bera runjuj jeska Adam. Jefeda rusnok nomnaga rerin mar onggara oska noba rimagos rot tein. Adam anggos rot efen mar onggara oska, jefeda rusnok nomnaga ragos rot rerin mar onggara oska tein. Erek Koma jeska oisouska mar onggara oska onggara Adam otunggom fob, bera rusnok nomnaga runtunggom mar onggara oska fob.

¹³ Noba gij mona onggara Allah eneita hukum gu rusnok enesi, beda rusnok ruroru mar onggara oska fob. Tina erek hukum egema enah enesi, beda Allah onocunc rusnok erek oska rot rerin rita mar onggara oska insa koma tein enesi.

¹⁴ Tina sis mona onggara Adam efena ebah ros onjoros mona onggara Musa efena ebah bera rusnok nomnaga ruroru mar onggara oska fob, jefeda rua ragos rot ojomu. Noba mar onggara rusnok

runtunggom onggga erek oska bera toga jeska mar onggga Adam ontunggom gij mona onggga ofa okoja rot Allah oga. Tina rusnok nomnaga ragos rot rerin mar onggga oska insa koma morototuma erek Adam ojomu. Noba gij mona onggga Adam ontunggom mar onggga oska, beda koma orok mokcin rusnok nomnaga morototuma erek mar onggga Yesus omotunggom omorok mokcin rusnok gij mona onggga Ofa emen tein.

¹⁵ Tina mar onggga gosnok gegeka insa koma gontunggom bera erek toga toga ojomu. Jeska oisouska mar onggga Adam ontunggom fob bera rusnok nomnaga rimagos rot ojomu. Erek koma tina Allah bera oncunc efen odou onggga oufamofa eteb skoita mimif. Jefeda oisouska mar onggga Yesus Kristus ontunggom rot odou onggga oufamofa skoita mimif bera rusnok nomnaga rimesma rudou onggga ebsi komowa rot tein.

¹⁶ Mar onggga Allah ontunggom rot odou onggga eskeiramera bera enerek mar onggga Adam ontunggom onggga erek oska guru. Jeska oisouska mar onggga Adam ontunggom fob bera Allah oga ojga rot oida rusnok nomnaga ragos ojomu. Tina oisouska mar onggga Yesus Kristus ontunggom fob rot odou onggga oufamofa, bera Allah onsuna rot rusnok rerin mar onggga oska fogora rua risma rudou onggga ebsi komowa.

¹⁷ Jeska mar onggga Adam ontunggom sis fob bera rusnok nomnaga ragos rot ojomu. Enadaij nou mimif musuwa misinsa jeska mar koma jinaga guru. Mar Koma bera ofoka ereij keingg mimif ojomuja. Tina rusnok nomnaga onggga Allah oncunc erek rudou ebsi komowa fob bera rimesma mar onggga oufamofa

eteb jeska Ofa gij rerin riteij ah ainsa kef tein si. Rerin mar onggga oska insa koma onofoka ereij keingg rua deika guru. Noba mar onggga oufamofa insa koma nomnaga bera en oisouska mar onggga Yesus Kristus ontunggom nou mimif fob. Allah eita mar koma rot oubji.

¹⁸ Jefeda oisouska mar egens onggga Adam ontunggom fob onggga erek oska bera rusnok risma mar onggga okum rot jeska Allah. Tina erek koma tein, oisouska mar egens onggga Yesus Kristus ontunggom onggga erek oufamofa fob bera rusnok rita rudou onggga ebsi komowa ahah Allah eiteij. Jefeda rua rimesma eiteij ah onggga ah aibin ojgomuja.

¹⁹ Erek koma tein, oisouska Adam onggga onororu jeni Allah oga guru bera rusnok rija erek rua onggga rerin mar onggga oska fob. Tina oisouska Yesus Kristus onggga ororu jeni Allah odou ejginaga rot bera rusnok rija erek rua onggga rerin mar onggga oska oskiyai tein jinaga guru.

²⁰ Erek koma jefeda Allah eita efen hukum gu Musa nou rusnok jeskaseda hukum koma omorocunc rot oida rusnok nomnaga rerin mar onggga oska fob. Tina askesi hukum Musa insa koma orocunc rot mifmin mar onggga oska erek ogun odudu deika, beda erek koma tein Allah ocunc efen odou onggga oufamofa eteb rot mimif erek ogun odudu deika tein.

²¹ Sis fob, mifmin mar onggga oska bera efen owesa efek onggga ah keingg mimif ojgomuja fogora mimagos rot ojgomu. Tina Allah eita efen odou onggga oufamofa skoita mimif. Noba Ofa efen owesa efek onggga ekirsa jeska mar nomnaga. Noba oisouska efen owesa efek insa koma bera Ofa ocunc mimif erek efen rusnok onggga rerin mar onggga oska oskiyai

tein guru. Jefeda mimif misma eiteij ah onnga ah aibin ojgomuja oisouska Yesus Kristus onnga erek mifmin Tuhan.

6¹ Ere koma jefeda, rineya jeska iwa rusujohu rot oida, "Skoidu, mimif nomnaga mutoiru gij mifmin mar onnga oska ojgomu jeskaseda Allah omocunc efen odou onnga oufamofa skoita mimif erek ogun dokun deika si."

² Tina erek koma jinaga guru. Jeska mimif manggos jeska mifmin mar onnga oska morototuma jera Yesus Kristus gij mona onnga Ofa anggos fob. Jefeda enadaj nou mimif mutoiru gij mar insa koma deika jinaga guru.

³ Jeska iwa ijginaga rot oida mimif misma baptis erek orocunc rot oida mimif manggos morototuma jera Yesus Kristus fob. Beda koma tein orocunc rot oida mifmin mudou eja erek egens jera Ofa fob.

⁴ Jefeda gij mona onnga mimif mita baptis insa koma beda koma erek mimif manggos fob, noba rusnok risah mimif gij moksu morototuma erek rusnok rinsah Yesus gij moksu tein sis fob. Mimif mita mar insa koma jeskaseda murocunc gu rusnok enjgineg rot oida mimif mita mar rot mifmin riteij ah onnga efeinah fob. Koma morototuma erek Yesus Kristus onnga esma eiteij onnga efeinah gij mona onnga efen meka Allah ofra Ofa jeska anggos oisouska efen owesa efek onnga eteb doska.

⁵ Jefeda erek mimif mita mudou egens jera Yesus Kristus onnga anggos fob, beda mimif tein mimedebeki jeska manggos morototuma erek Ofa endebecki jeska anggos sis fob.

⁶ Jeska gij mona onnga Yesus Kristus anggos tumu mega salib fob, beda erek koma tein mimif onnga

mifmin mar onnga oska, bera manggos morototuma jera Ofa. Ofa otunggom mar insa koma nou mimif jeskaseda mifmin mar onnga oska insa koma efen owesa efek onoin keingg mimif deika guru. Jefeda ebeibeyaif mimif munougif gu mar onnga oska onnga ah gij mudou efesi deika guru.

⁷ Erek koma jeska gij mona onnga osnok egens agos fob, beda ofa onsuwa jeska mar onnga oska efen owesa efek fob.

⁸ Noba erek mimif manggos morototuma jera Yesus Kristus fob, beda mimif mijginaga rot oida mimesma eiteij ah onnga efeinah morototuma jera Ofa tein.

⁹ Mimif mijginaga rot oida Yesus Kristus endebecki jeska anggos fob. Jefeda Ofa enagos deika jinaga guru. Mar egema tein onotunggom Ofa fogora agos deika jinaga guru.

¹⁰ Ofa anggos rot ofosma egens ojomu jefeda mar egema tein onorotunggom Ofa fogora agos deika guru. Ebeibeyaif Ofa ensma eiteij ah onnga efeinah deika fob, noba Ofa eker morototuma jera Allah ojomuja.

¹¹ Erek koma tein, iwa bera irek rusnok onnga ranggos fob, jeska yeyin mar onnga oska efen owesa efek onoin keingg iwa deika guru. Tina ebeibeyaif bera iwa insma eiteij ah onnga efeinah fob, noba yeyin idou enja erek egens jera Allah oisouska Yesus Kristus tein fob.

¹² Iwa inorons rot yeyin mar onnga oska ah gij idou efesi ojomuja guru. Jeska mar insa koma bera oroku idou efesi fogora imesiri gu mar insa koma deika sons ojomu.

¹³ Allah eneita yeyin ifaga jeskaseda irotunggom mar onnga oska rot guru. Tina onnga oufamofa

bera iwa yaha isinsa skoita Allah erek rusnok onnga ranggos noba onnga rinsma eiteij onnga efeinah fob. Yufra Ofa efen ofoka erek aksa oisouska yeyin ita mar onnga oufamofa ojgomu.

¹⁴Jeska ebeibeyaif bera yeyin mar onnga oska efen owesa efek onoin keingg iwa deika guru. Noba koma enen jeska iwa yuisum gij hukum Musa rot idou onnga ebsi komowa deika guru. Tina koma en jeska Allah onnga oncunc efen odou onnga oufamofa skoita iwa fob.

¹⁵Erek koma jefeda rineya jeska iwa bera rusujohu rot oida rua rururu mar onnga oska ojgomu, jeska hukum Musa enah gu rua deika guru. Noba rua rusujohu rot oida Allah omocunc odou onnga oufamofa skoita rua ojgomuja. Tina erek koma jinaga guru.

¹⁶Jeska erek iwa yaha isinsa skoita rusnok enjgineg jeskaseda rufij rua, beda iwa yugif gu mar onnga rua ranggot rot ogjomu. Erek koma tein, erek iwa iroru mar onnga oska ojgomuja, beda koma erek iwa yugif gu mar insa koma ojgomuja ros fogora iteij ah emeseiseifa rot si. Tina erek iwa iroru Allah oga noba yugif gu Ofa ojgomu, beda iwa isma idou onnga efen mar onnga oska oskiyai tein guru ahah Allah eiteij.

¹⁷Erek koma noba mimif muis oufamofa eteb gu Allah, jeska sis fob iwa yugif gu yeyin mar onnga oska erek osnok egens ougif gu efen ebirfaga ojgomuja. Tina ebeibeyaif bera iwa yugif gu Allah oga onnga tenten rot idou onnga ongakmos ojgomu. Erek koma jeska sis fob rusnok ruftuifu iwa rot oga insa koma.

¹⁸Koma erek iwa insuwa isinsa jeska yeyin mar onnga oska onnga oin keingg iwa sis fob. Noba

ebeibeyaif iwa yugif gu mar onnga ongnoskamoka ojgomu.

¹⁹ Mar onnga didif dimfesij rot insa kef bera erek mar onnga orocunc gu iwa jeskaseda idou ebriyi rot koisoisa osok gij efen ofou. Jeska idou efesi erek enahais joug mar onnga oska enesi. Sis fob iwa yugif gu mar onnga oska jera mar onnga ofogog onnga angh gij idou efesi odudu deika ojgomuja erek osnok egens ougif gu efen ebirfaga ojgomuja. Jefeda ebeibeyaif didif dui gu iwa jeskaseda iwa yugif gu mar onnga erek oufamofa ojgomu erek osnok egens onnga ougif gu efen ebirfaga. Jeska mar koma bera onnga orocunc iwa erek rusnok onnga rudou ebsi komowa.

²⁰ Sis fob iwa bera erek rusnok onnga rugif gu rerin ebirfaga ojgomuja, jeska iwa yugif gu yeyin mar onnga oska ojgomuja. Gij mona insa koma iwa inougif gu mar onnga oufamofa onnga Allah odou os rot guru.

²¹ Tina mar insa koma bera onofij iwa oskiyai tein jinaga guru. Noba ebeibeyaif mar koma bera mojen iwa erek eteb ojgomu. Jeska rusnok onnga rutunggom mar onnga oska erek insa koma bera rija eseiseifa rot.

²² Ere koma tina ebeibeyaif Allah onsuwa iwa jeska yeyin mar onnga oska fob. Noba iwa inja erek rusnok onnga rugif gu Allah rot tenten ojgomuja fob. Noba koma bera orofij iwa, jeska mar insa koma bera onnga eita idou onnga ebsi komowa fogora iwa imesma eiteij ah onnga ah aibin tein.

²³ Rusnok nomnaga onnga runtunggom mar onnga oska bera rimeja eseiseifa rot si. Koma bera erek rerin rufons rot. Tina eiteij ah onnga ah aibin bera

en jeska Allah oisouska mifmin Tuhan Yesus Kristus ojomu. Noba koma bera erek mar onnga oubji jeska Ofa.

7¹ Edohuji, mar onnga ai juens dimefesij gu iwa bera idou ebriyi gij fob, jeska iwa inroru hukum Musa erek dektek fob. Hukum insa koma bera ofoka ereij keingg rusnok ojomuja onjoros ranggos fob.

² Koma erek ojaga egens onnga ahi igers fob. Oisouska mar onnga hukum erebent rot bera ofa eker jera efen mahina insa koma ojomuja. Tina erek efen mahina insa koma agos jeska ofa rot sismeni fog, beda ojaga koma osuwa jeska mar onnga hukum insa koma erebent rot fob.

³ Tina, erek ojaga egens eja jeska efen mahina noba ejeker jera orna egens enjgineg deika, beda koma erek ofa esiri morototuma jera orna egens insa koma. Tina erek efen mahina agos sismeni fog, beda ojaga egens koma onsuwa jeska mar onnga hukum erebent rot insa koma fob. Noba erek ofa ahi igers enjgineg deika, beda koma enerek ofa esiri morototuma jera orna egens insa koma deika guru.

⁴ Edohuji, erek koma tein hukum Musa bera onofoka ereij keingg iwa deika guru, jeska iwa yanggos morototuma jera Yesus Kristus onnga edebecki jeska agos fob. Noba ebeibeyaif iwa ija erek egens jera Ofa jeskaseda itunggom mar onnga oufamofa nou Allah ojomu.

⁵ Sis fob mar onnga oska onnga ah gij mudou efesi bera oroku mimif fogora mutunggom mar onnga hukum Musa eyahehir joug. Jefeda Allah oga ojga rot oida mimif mimagos rot ojomu.

⁶ Tina ebeibeyaif bera mimif munsuwa jeska hukum Musa insa koma ojomu. Koma erek mimif manggos

jefeda hukum insa koma onnga onoskotu mimif erek tentara egens onnga oskotu rusnok deika guru. Ebeibeyaif mimif munougif gu hukum Musa onnga ensis insa koma jeskaseda misma mudou onnga ebsi komowa ahah Allah eiteij deika guru. Tina mimif mugif gu Allah oisouska Efena Ebsi onnga ofij mimif ojgomuja.

⁷Erek koma jefeda rineya jeska iwa rimejeka rot oida, "Hukum Musa bera erek mar onnga oska ei?" Erek koma jinaga guru. Hukum insa koma bera orocunc gu didif rot oida dedin mar onnga oska enahif fob. Jeska hukum insa koma bera agot rot oida, "Iwa idou eneftirir keingg rot rusnok enjgineg rerin mareibra guru." Jefeda didif dijginaga rot oida erek mudou onnga eftirir keingg rot mareibra, beda koma bera erek didif dutunggom mar onnga oska fob.

⁸Jeska gij mona onnga didif dijginaga rot hukum egens insa koma fob, beda ainsa koma tein didif dudou os dikirsa rot hukum egens insa koma ojgomu. Mar onnga oska angh gij dudou efesi rot sismeni fob, jefeda didif dudou eftirir keingg mar ofoukou ojgomuja. Tina erek hukum egens insa koma enah guru, beda mar onnga oska onnga angh gij dudou efesi rot sismeni fob bera onoroku didif jeskaseda dikirsa rot hukum insa koma guru.

⁹Sis fob bera didif dudou enebriyi gij mar onnga hukum Musa anggot rot guru. Tina gij mona onnga didif dingg fogora dudou ebriyi gij hukum Musa fob, beda didif dijginaga rot oida dedin mar onnga oska enah gij dudou efesi fob. Noba didif dimagos rot mar insa koma ojgomu.

¹⁰ Beda ainsa koma tein didif dijginaga rot oida dimeja eseiseifa rot dedin mar onnga oska insa kef si. Jeska hukum Musa insa koma onnga didif duroru jeskaseda disma eiteij ah onnga efeinah bera agot rot oida didif dagos rot dedin mar onnga oska ojomu.

¹¹ Gij mona onnga didif dingg rot hukum Musa fob, beda ainsa koma tein mar onnga oska onnga angh gij dudou efesi bera oroku didif jeskaseda dutunggom mar onnga hukum insa koma eyahehir joug ojomu. Koma erek didif durokrusa disinsa rot ojomu. Jeska ebeibeyaif bera hukum Musa agot oida didif dimagos rot dedin mar onnga oska onnga duntunggom insa koma si.

¹² Jefeda hukum Musa insa koma bera erek ebsi komowa ojomu. Noba mar onnga hukum insa koma agot rot bera erek ebsi komowa tein, jera oufamofa tein, jera tentenmen tein.

¹³ Tina rineya jeska iwa rimagot rot oida, "Hukum Musa onnga erek oufamofa bera orotunggom didif fogora dimagos rot ojomuja." Tina erek koma jinaga guru. Jeska mar onnga oska onnga angh gij mudou efesi bera onnga orotunggom mimif fogora miseiseifa rot ojomuja. Noba oisouska hukum insa koma onnga oufamofa bera mimif mijginaga rot oida mimif mimagos rot mifmin mar onnga oska ojomu. Beda oisouska mar koma bera mimif mijginaga rot oida mar onnga angh gij mudou efesi bera erek oska ojomu. Jefeda oisouska hukum insa koma bera mimif mijginaga rot oida mar onnga angh gij mudou efesi bera erek oska eteb ekirsa fob.

¹⁴ Mimif mijginaga rot oida hukum Musa bera en jeska Efena Ebsi Allah. Tina mar onnga mimif mutunggom bera en jeska dudou efesi ojomu. Noba

dugif gu mar onnga oska onnga angh gij dudou efesi erek osnok egens onnga ougif gu efen ebirfaga.

¹⁵ Noba dedin dita mar insa koma bera orotunggom didif dudou efesi erek eineina gij. Jeska mar onnga oufamofa onnga didif dudou os dita bera didif dineita mar koma guru. Noba mar onnga oska onnga didif dunodou os dita guru bera didif dita mar koma ojpgomu.

¹⁶ Didif dijginaga rot oida didif dita mar onnga oska insa koma onnga dunodou os rot guru. Jefeda koma orocunc rot oida didif dusujohu oida hukum insa koma bera erek tenten ojpgomu.

¹⁷ Jefeda didif disinsa dunodou os dita mar onnga oska guru. Tina mar onnga oska onnga angh gij dudou efesi bera onnga oroku dudou efesi rot ojpgomu.

¹⁸ Noba didif dijginaga rot oida mar onnga oufamofa bera enen jeska didif disinsiyai dudou efesi guru. Jeska erek didif dudou os dita mar onnga oufamofa ojpgomu, tina dedin owesa efek rot bera enadaij nou guru.

¹⁹ Koma bera, didif dineita mar onnga oufamofa onnga dudou os rot guru. Tina didif mar onnga oska onnga didif dunodou os rot guru bera didif dita mar koma ojpgomuja.

²⁰ Noba erek didif dita mar onnga didif dunodou os rot guru, beda koma orocunc rot oida mar onnga oska onnga angh gij dudou efesi bera onnga oroku dudou efesi rot ojpgomu. Noba didif disinsiyai dineita mar onnga oska insa koma guru.

²¹ Jefeda didif dik rot mar egens onnga angh gu didif erek kef oida, gij mona onnga didif dudou os dita mar onnga oufamofa, beda mar onnga angh gij

dudou efesi bera eragou joug didif rot fogora dineita mar onnga oufamofa insa koma guru.

²² Dudou efesi onnga ororu Yesus fob bera dudou os eteb rot hukum Allah.

²³ Tina didif dik rot oida mar onnga oska tein bera enah gij dudou efesi tein. Noba mar onnga oska insa koma bera eremeteima rot mar onnga oufamofa onnga didif dudou os dutunggom. Noba mar onnga oska insa koma bera onskotu didif erek tentara egens oskotu rusnok. Jefeda didif dita mar onnga oska insa koma ojgomu.

²⁴ Didif dudou okum eteb rot mar insa koma onnga angh gu didif. Jeska didif dudou os duroru mar onnga oufamofa ojgomu, tina mar onnga oska onnga angh gij dudou efesi bera oroku didif fogora dutunggom mar onnga oska insa koma ojgomuja. Osnok egens ojgomu bera omoskotu didif jeska mar okum kef onnga orotunggom didif fogora dimeja eseseifa rot. Didif duis oufamofa eteb skoita Allah, jeska oisouska mifmin Tuhan Yesus Kristus bera Ofa omoskotu didif jeska mar insa koma si. Jefeda dedin dudou onnga egens jera Yesus fob bera odou os ororu hukum Allah rot tenten ojgomu. Tina dudou efesi odou os ororu mar onnga oska ojgomu.

²⁵ (7:24)

8¹ Erek koma jefeda erek rusnok rerin rudou onnga eja erek egens jera Yesus Kristus fob, beda Allah onga ojga rot oida rua rimagos guru.

² Erek koma jeska mar onnga oska insa koma onnga angh gij mudou efesi fob bera efen owesa efek jeskada orotunggom mimif fogora mimagos rot. Tina oisouska mudou onnga eja erek egens jera Yesus Kristus fob bera owesa efek jeska Efena Ebsi

osuwā mimif jeska mifmin mar onggā oskā. Beda mimif misma eiteij ah onggā efeinah.

³ Hukum Musa efen owesa efek jeskaseda ofij mimif bera enah guru. Jeska mimif mudou os mutunggom mar onggā hukum insa koma eyahehir joug ojomu. Tina Allah bera onggā omfij mimif fob. Jeska Ofa ombk efen efesa Yesus gu mebif. Ofa en gu mebif rot efen efaga jera efen odou efesi onggā erek rusnok giskini. Ofa en jeskaseda agos nou mifmin mar onggā oskā. Beda Allah odou onokum skoita mimif deika guru. Jeska oisouska mar onggā Yesus ontunggom fob bera mifmin mar onggā oskā enah gu mimif deika guru.

⁴ Allah otunggom mar insa koma jeskaseda mar nomnaga onggā hukum Musa anggot rot bera angh gij efera fob. Jeska ebeibeyaif mimif mineker gij miteij ah kef oisouska mudou efesi onggā efen mar onggā oskā deika guru. Tina mimif miker oisouska Efena Ebsi Allah efen owesa efek ojomu.

⁵ Rusnok onggā riker gij rerin riteij ah kef oisouska mar onggā angh gij rudou efesi ros bera ruroru mar insa koma ojomu. Jefeda rua rimeja eseiseifa rot ojomu si. Tina rusnok onggā riker gij rerin riteij ah kef oisouska mar onggā Efena Ebsi oncunc gu rua fob bera ruroru mar insa koma ojomu. Jefeda rua risma eiteij onggā efeinah noba onggā eskeira tein si.

⁶ (8:5)

⁷ Noba erek rusnok ruroru mar onggā angh gij rudou efesi ojomu ros, beda enadaij nou rua ruroru hukum Allah rot tenten guru. Jeska rudou efesi bera okoja rot hukum insa koma ojomuja.

⁸ Noba erek rusnok ruroru mar onggā angh gij rudou efesi ojomu beda enadaij nou rua rita mar

ongga orotunggom Allah odou eskeiramera rot rua jinaga guru.

⁹ Ere koma tina iwa inerek rusnok onnga ruroru mar onnga oska onnga ah gij rudou efesi ojgomu guru. Jeska Efena Ebsi Allah bera engker gij idou efesi fob, noba iwa iroru mar onnga Ofa oncunc gu iwa ojgomu. Ere koma tina erek Efena Ebsi jeska Yesus Kristus eneker gij rusnok rudou efesi guru, beda rua rinerek Ofa efen rusnok tein guru.

¹⁰ Mimif nomnaga muntunggom mar onnga oska fob, jefeda mifaga emagos rot si. Tina oisouska Yesus Kristus bera Efena Ebsi engker gij mudou efesi fob. Jefeda mimif mimesma eiteij onnga efeinah. Jeska Allah bera oncunc mimif erek rusnok onnga rerin mar onnga oska oskiyai tein guru.

¹¹ Oisouska Efena Ebsi Allah bera Ofa omfra Yesus Kristus jeska agos fogora Ofa esma eiteij onnga efeinah deika fob. Noba jeska Efena Ebsi insa koma engker gij idou efesi tein, beda Allah omofra iwa tein jeska yanggos fogora imesma eiteij ah onnga efeinah sons morototuma jera Yesus Kristus.

¹² Ere koma jefeda, edohuji, onnga oufa bera mimif mineker gij miteij ah kef oisouska mar onnga angh gij mudou efesi deika guru.

¹³ Jeska erek mimif miker oisouska mar onnga angh gij mudou efesi ojgomu, beda mimif mimeja eseiseifa rot si. Tina oisouska owesa efek jeska Efena Ebsi Allah bera mimif maha mar onnga oska insa koma jah ojgomu. Beda mimif mimesma eiteij ah onnga efeinah si.

¹⁴ Ere rusnok ruitij rot oida Efena Ebsi encira rot rua ojgomu, beda rua bera erek Allah efen rusnok rot tenten.

¹⁵ Jeska Efena Ebsi onnga Allah ombk skoita iwa fob bera onotunggom iwa fogora imeesa rot Allah erek rusnok onnga rimeesa rot rerin ebirfaga egens guru. Tina oisouska Efena Ebsi insa koma bera mimif minja erek Allah efen efeser fob. Noba oisouska owesa efek jeska Efena Ebsi bera mimif magot oida, "Allah, Bua bera erek mifmin Mika."

¹⁶ Jeska oisouska mar onnga Efena Ebsi oncunc gu mimif gij mudou efesi fob bera mimif mijginaga rot tenten oida mimif mirek Allah efen efeser fob.

¹⁷ Noba, jeska mimif mirek Allah efen efeser fob, beda mimif mimesma mar onnga oufamofa eteb onnga ah aibin jeska Ofa si. Noba mar nomnaga onnga Allah ensejah nou Yesus Kristus fob bera mimif tein mimesma morototuma jera Ofa si. Jeska erek mimif mita mifera okora morototuma erek Yesus Kristus eita efera okora sis fob, beda mimif mimesma mar onnga ongnoskamoka morototuma jera Ofa tein si.

¹⁸ Gij mona ebeibeyaif bera mar okum ereneni mimif ojgomuja. Tina erek mimif miremenima jeni mar okum insa koma jera mar onnga ongnoska eteb onnga Allah emeita gu mimif, beda mar okum insa koma bera erek ai osufou nou mimif ojgomu.

¹⁹ Mar nomnaga onnga Allah ontunggom fob bera omom odou nou mona kahma ojgomu. Jeska gij mona insa koma bera Ofa omocunc oufamofa eteb skoita mimif onnga erek efen efeser.

²⁰ Mar nomnaga onnga Allah ontunggom bera rudou os rita mar jeni erek Ofa odou os rot ojgomu. Noba rua rireni rot ahais, tina rineita guru. Tina koma bera ororu Allah odou ejginaga rot ojgomu fob.

²¹ Ofa ontunggom mar erek koma jeskaseda rua ruisum gij Ofa rot oida gij mona kahma beda rua rineker gij rifaga onnga etefa ojgomu guru, tina rua rimosuwa jeska rerin mar onnga oska noba rimesma oufamofa eteb jeska Ofa erek efen efeser si.

²² Koma erek ojaga egens onnga efaga okum rot efesa. Ofa odou eriyema nou mona onnga engker rot efesa insa koma fob. Beda erek koma tein ebeibeyaif mar nomnaga onnga Allah ontunggom fob bera erek rudou eriyema rot nou mona onnga rimesma mar onnga oufamofa insa koma onnga Ofa emeita tein si.

²³ Tina mimif tein bera mudou eriyema askesi mimif mumom mudou nou mona onnga Allah osuwa mimif jeska mifaga onnga etefa insa kef. Noba mimif minsma Efena Ebsi jeska Allah erek mar onnga osumbohka fob. Jeska gij mona kahma bera Allah emeita mar nomnaga onnga ongoskamoka noba onnga orocunc rot oida mimif bera erek efen efeser rot fob.

²⁴ Noba, jeska mimif muisum gij Allah rot mar insa koma, beda Ofa onskotu mimif fob. Tina erek rusnok rinsma mar onnga rua ruisum gij fob, beda rua runoisum gij rot mar insa koma deika guru. Jeska rua risma mar insa koma fob.

²⁵ Tina mimif muisum gij mar onnga minek gu miteij enesi ojgomu. Jefeda mimif muin keingg mudou efesi rot ahais noba miker nou mar insa koma ojgomu.

²⁶ Erek koma tein, Efena Ebsi bera ofij mimif gij mona onnga mudou efesi eja erek ofonskos rot fob. Beda mimif minejginaga rot mar meidu onnga mimif mum miteij gu Allah rot koisoisa enesi. Tina askesi mimif mum miteij gu Allah ros, beda ainsa koma tein Efena Ebsi omofij mimif fogora Ofa emera efen oga

ongga ekirsa jeska mar onggga mimif manggot gu Allah tein si.

²⁷ Noba Allah, onggga eyajga joug gij rusnok rudou efesi, bera ejginaga rot mar onggga Efena Ebsi osujohu rot tein. Jeska Efena Ebsi erejgei mar nou mimif gu Allah ororu jeni Allah odou ejginaga rot.

²⁸ Allah enjeka mimif jeskaseda mutunggom mar ororu jeni Ofa odou ejginaga rot. Noba mimif mijginaga rot oida Ofa omofij mimif gij mar nomnaga onggga mimif mutunggom jeskaseda mimif misma oufamofa eteb jeska Ofa ojgomu. Ofa eita mar erek koma nou rusnok nomnaga onggga rudou okora rot Ofa.

²⁹ Jeska gij mona onggga sismeni fob bera Allah ejginaga rot idu onggga emeja erek efen efeser. Noba Ofa ensejah gij odou efesi jeskaseda rua insa koma rimeja morototuma erek efen efesa Yesus Kristus. Ofa otunggom mar erek koma jeskaseda Yesus bera erek osombohka rot efen mokoser jera meyerer rufoukou tein.

³⁰ Noba rua insa koma onggga Ofa ensejah rot sis fob bera Ofa ejeka erek efen efeser fob. Rua onggga Ofa ejeka erek efen efeser fob bera Ofa oncunc rua erek rusnok onggga rudou ebsi komowa tein fob. Noba rua onggga Ofa oncunc erek rudou ebsi komowa insa koma fob bera Ofa eita ofoka onggga aksa eteb gu rua tein fob.

³¹ Allah bera onggga ofij mimif gij mar insa koma nomnaga. Jefeda enadaij nou rusnok egema tein riragou joug rot mar insa koma jinaga guru.

³² Ofa enejgi joug efen efesa gu mebaga guru, tina Ofa obk efen efesa insa koma skoita mimif jeskaseda agos nou mifmin mar onggga oska ojgomu. Noba,

erek Ofa oh efen efesa nou mimif erek koma fob, jefeda Ofa emeita mar enjgineg tein onnga oufamofa eteb gu mimif rot odou onnga eskeiramera tein si.

³³ Mimif bera onnga Allah oncunc erek efen rusnok fob. Noba Ofa oncunc mimif tein erek rusnok onnga rudou ebsi komowa fob. Jefeda enadaj nou rusnok egema tein rucunc mimif erek oska deika guru.

³⁴ Enadaj nou rusnok egema tein ragot oida mifmin mar onnga oska enahuma ros jinaga guru. Jeska Yesus Kristus esinsa bera onnga onot deismos nou mimif skoita Allah ojgomuja. Ofa bera onnga anggos nou mimif fob, tina Ofa tein bera onnga endebecki jeska anggos fogora ensma eiteij onnga efeinah fob. Noba ebeibeyaif bera Ofa eker desi Allah gij mebaga fob.

³⁵ Jefeda enadaj nou mar egema tein ekeba mimif jeska Yesus Kristus onnga odou okora rot mimif jinaga guru. Erek rusnok rufra mar okum keingg mimif ni, erek rusnok rita efera okora gu mimif ni, erek mosona ongak mimif eteb ni, erek micira rot meisoufa onnga ebgebga ni, erek mar onnga ofogog en skoita mimif ni, erek rusnok rudou os ragob mimif ni, beda enadaj nou mar insa koma nomnaga ekeba mimif jeska Yesus Kristus onnga odou okora rot mimif jinaga guru.

³⁶ Koma erek mar onnga runngu gij Mar Efeyi Ebsi sis eteb fob. Rua runngu rot oida, "Allah, rusnok onnga rufogog rudou os ragob mimif jeska mimif bera erek bebin rusnok. Rua rusujohu rot oida mimif bera erek mar onnga ragob ojgomu morototuma erek rua ragob domba-domba tein."

³⁷ Erek koma tina askesi mar okum insa koma ah keingg mimif ros, beda mimif miker rot ahais

ojgomuja oisouska Yesus Kristus onggga odou okora rot mimif.

³⁸ Didif dusujohu rot oida enadaij nou mar egema tein ekeba mimif jeska Allah, onggga odou okora rot mimif jinaga guru. Erek mimif manggos ni, era mifena ebah ros ni, era malaikat ni, era efena ofogog ni, era mar onggga angh gij mona deisef ni, era mar onggga angh gij mona kahma ni, era mar onggga efen owesa efek eteb ni,

³⁹ era mar onggga angh gu mebaga ni, era mar onggga angh gu mebif ni, era mar egema tein onggga Allah ontunggom ni, enadaij nou mar insa koma nomnaga ekeba mimif jeska Allah onggga odou okora rot mimif jinaga guru. Noba Ofa oncunc efen odou onggga okora rot mimif insa koma oisouska mifmin Tuhan Yesus Kristus fob.

9¹ Didif dudou ousaha ojgomuja rot dedin rusnok Israel, jeska rua rukoja Yesus fob. Didif dudou os eteb rot oida dedin rusnok Israel ruroru Yesus Kristus fogora Allah oskotu rua tein jeska rerin mar onggga oska. Noba erek Allah ofra mar okum keingg didif noba ekeba Didif jeska Yesus Kristus jeskaseda dedin rusnok Israel ruroru Yesus ojgomu, beda didif duitij rot mar insa koma tein. Mar onggga danggot ainsa kef bera erek tenten ojgomu. Jeska didif dudou egens jera Yesus Kristus fob. Noba Efena Ebsi Allah onggga engker gij dudou efesi fob bera ocunc rot mar onggga tenten jera mar onggga erek tenten guru.

² (9:1)

³ (9:1)

⁴ Sis fob eteb bera Allah ocunc rua onggga Israel noba ejeka rua erek Ofa efen efeser. Beda Ofa ocunc rot efen eskeiramera eteb gu rua ni. Ofa agot eimofoj

rot mar ofoukou gu rua ni. Ofa eita efen hukum oisouska Musa gu rua ni. Ofa oftufu rua rot teinefa rua rugif gu Ofa gij efen mod ni. Ofa anggen rot mar ofoukou gu rua ni.

⁵ Rua bera onnga runjuj jeska Abraham jera Ishak jera Yakub. Noba Yesus Kristus bera onjuj jeska rua rerin rimower tein. Ofa bera onnga ofoka ereij keingg mar nomnaga erek Allah tein. Mimif muis oufamofa eteb gu Ofa ojgomuja, Ainsoma.

⁶ Koma onorocunc rot oida Allah eneita rusnok rufoukou gu Abraham onnga erek efen rusnok onnga runjuj Jeska ofa guru. Jeska ahah Allah eiteij bera rusnok ebic nomnaga onnga runjuj jeska Israel rineja erek Ofa efen rusnok rot tenten guru.

⁷ Noba erek rusnok rufoukou runjuj jeska Abraham, tina ahah Allah eiteij bera rua nomnaga rineja erek Abraham efen rusnok tein guru. Jeska sis fob Allah anggot gu Abraham oida, "Didif dumocunc dudou onnga oufamofa skoita rusnok onnga runjuj jeska bebin ebesa Ishak ojgomu."

⁸ Jefeda mimif mik rot oida Allah enejeka rusnok nomnaga onnga runjuj jeska Abraham erek efen efeser guru. Tina rusnok onnga runjuj jeska Abraham oisouska Ishak onnga Ofa anggen rot gu Abraham sismeni fob bera erek efen efeser onnga tenten ojgomu.

⁹ Erek koma jeska Allah anggen mar erek kef oida, "Gij ari mega ofoj egens deika beda Didif dumoksons, noba bebin obhona Sara omok efen efesa orna egens si."

¹⁰ Erek koma tein, Ishak efen mahona Ribka bera eker rot efen efeserga.

¹¹ Tina gij mona onggaga ofa onojuj rot efen efeserga insa koma enesi, beda Allah agot gu Sara oida, "Bebin ebesa onggaga osombohka bera omougif gu efen mokosa si." Allah anggot mar insa koma sismeni fob jeskasada orocunc rot oida Ofa eita mar ororu jeni efen odou ejginaga rot ojgomu. Noba mar insa koma bera enen jeska mar onggaga rusnok runtunggom guru.

¹²(9:11)

¹³ Erek koma jeska runggu gij Mar Efeyi Ebsi rot mar onggaga Allah anggot oida, "Didif dudou okora rot Yakub, tina dudou oska rot efen mokora Esau."

¹⁴ Jefeda rineya jeska iwa isujohu rot oida Allah ontunggom mar onggaga oska fob, jeska Ofa odou oska rot Esau insa koma. Tina iwa inosujohu rot mar erek koma guru.

¹⁵ Jeska idou ah keingg rot mar onggaga Allah anggot gu Musa sis fob. Ofa agot oida, "Didif duga bera eris rot idu onggaga dudou okora rot jera idu onggaga ducunc dudou onggaga oufamofa skoita ojgomu."

¹⁶ Jefeda Allah onocunc rot idu bera erek efen rusnok onggaga tenten oisouska mar onggaga rua risinsa rudou os rot era rutunggom guru. Tina Ofa ocunc rot idu onggaga erek efen rusnok oisouska efen odou onggaga oufamofa skoita rua ojgomu.

¹⁷ Koma bera erek mar onggaga Musa onggaga keingg osok gij mar onggaga Allah anggot gu raja Mesir sis eteb fob. Allah agot gu ofa oida, "Didif dufra bufoka erek aksa eteb jeskasada gij mona onggaga bua bukoja dedin duga beda Didif dumorocunc rot dedin owesa efek onggaga eteb ekirsa skoita rusnok nomnaga. Beda rusnok gij monuh ofoukou bera rimeg rot dedin dufoka onggaga aksa ekirsa jeska mar nomnaga."

¹⁸Jefeda oisouska mar insa koma bera mimif mijginaga rot oida Allah esinsa oga eris rot oida Ofa omocunc efen odou onggga oufamofa skoita rusnok si. Noba Ofa esinsa tein bera onggga oga eris rot idu onggga Ofa omotunggom erek ombrera ojgomu erek raja Mesir insa koma.

¹⁹Erek koma beda rineya jeska iwa rijeka rot oida, "Erek Allah otunggom rusnok fogora rita mar oisouska Ofa odou ejginaga rot, beda teinefa fogora Ofa ocunc mimif erek rusnok onggga rerin mar onggga oska erek komo?"

²⁰Tina edohuji, enadaij nou rusnok ragot mar erek insa koma sons skoita Allah guru. Jeska Allah bera onggga ontunggom mimif nomnaga. Koma erek debeji onggga osnok egens ontunggom fob. Debeji koma enagot gu osnok egens onggga ontunggom debeji insa koma oida, "Teinefa fogora bua butunggom didif erek kefo," erek koma guru.

²¹Jeska osnok egens insa koma oga eris rot oida ofa emera mebi ekeni fogora omorotunggom debeji egens onggga efen eirirbi noba efera osok eteb. Noba ofa eita mebi ekeni egema fogora omorotunggom debeji onggga efen efera ojuj tein.

²²Erek koma tein, Allah bera onggga oga eris rot mar onggga Ofa omotunggom rot rusnok nomnaga ojgomu. Noba onggga tenten bera, Ofa ensejah nou ofra mar okum eteb keingg rusnok fogora orocunc rot efen owesa efek eteb. Jeska sis fob Ofa ensejah nou eita mar okum eteb gu rusnok ojgomu. Tina Ofa oin keingg odou efesi rot rua noba eneita mar okum gu rua enesi.

²³Ofa eita mar erek koma jeskaseda orocunc rot teinefa Ofa efen odou onggga okora eteb rot mimif

fogora emeita oufamofa eteb gu mimif si. Jeska sis fob bera Ofa ensejah nou eita mar onggga oufamofa eteb gu mimif tein.

²⁴ Ofa enjeka rusnok rineya jeska rua onggga Yahudi jera rineya jeska rua onggga Yahudi guru jeskaseda rija erek Ofa efen rusnok.

²⁵ Koma tenten jeska rungggu gij Mar Efeyi Ebsi rot mar onggga Allah anggot erek kef oida, "Ebeibeyaif rusnok onggga dudou onokora rot enesi bera gij mona kahma beda Didif dumocunc rua erek dedin rusnok. Noba Didif dudou omokora rot rua tein si."

²⁶ Noba rungggu tein oida, "Sis fob Allah agot gu rusnok gij rerin monuh rot oida rua bera enerek Ofa efen rusnok guru. Tina gij mona kahma beda Ofa emejeka rua gij rerin monuh insa koma erek Allah, onggga efena ebah, efen efeser."

²⁷ Noba gij Mar Efeyi Ebsi bera nabi Yesaya tein agot mar osok gij rua onggga Yahudi. Ofa agot oida, "Rua onggga Israel bera erek riskemba doska. Rua bera erek mebsta onggga angh gu mei mojomu efembra. Tina rusnok oskiyai jeska rua bera rimesma eiteij onggga efeinah ojgomu.

²⁸ Jeska Tuhan omofra mar okum eteb keingg rusnok mebif rot ebeirens jeni erek Ofa anggot rot sis fob si."

²⁹ Noba nabi Yesaya agot rot rusnok onggga angh gij mona kahma ros oida, "Sis fob Allah onghoda rot mifmin mimowa Yahudi. Tina Ofa odou os rot jeskaseda Yahudi ebic egensmes ojgomu rifena ebah ros. Jeska erek Ofa onodou os rot koma guru, beda rusnok Yahudi nomnaga bera rimeseiseifa si. Koma erek rusnok gij kota Sodom jera rusnok gij kota

Gomora tein onnga Allah onghoda rot fogora rusnok insa koma nomnaga riseiseifa ojgomu fob."

³⁰ Erek koma jefeda, mimif mijginaga rot oida rusnok onnga Yahudi guru bera runohca moroju jeskaseda Allah omocunc rua erek efen rusnok onnga rudou efesi komowa guru. Tina rua rik rot oida oisouska rudou onnga ororu Yesus Kristus bera Allah omocunc rua erek efen rusnok onnga rerin mar onnga oska oskiyai tein guru.

³¹ Rusnok onnga Yahudi bera ruroru hukum Musa jeskaseda risma rudou onnga onnga efen mar onnga oska oskiyai tein guru. Tina rua rinesma rudou onnga ebsi komowa erek koma guru.

³² Rua rineita mar insa koma oisouska rudou onnga ororu Allah rot tenten guru. Tina oisouska mar onnga rua risinsa runtungom fob bera rua rusujohu rot oida rimesma rudou onnga ebsi komowa si, tina guru. Jeska rua rukoja Kristus egens koma onnga Allah ombk jeskaseda oskotu rusnok. Koma erek rusnok onnga rukockereta mamu onnga ahais jefeda risiri ojgomu.

³³ Noba sis eteb fob bera nabi Yesaya onngu rot mar insa koma onnga omorogna gij mona kahma. Gij mar insa koma Allah agot oida, "Iwa ig kef rot iskusk fog, jeska gij mona kahma beda Didif dumobk osnok egens jah Yerusalem onnga erek mamu egens onnga ahais. Rusnok rudou omoska rot Ofa fogora rua rimesiri erek rusnok onnga rukockereta mamu onnga ahais fogora risiri. Tina rusnok onnga ruroru Ofa bera mojen rua rot jinaga guru."

10 ¹ Edohuji, didif dudou os eteb jeskaseda Allah oskotu rusnok Yahudi nomnaga jeska rerin

mar onggga oska. Noba didif dum diteij gu Allah rot mar insa koma ojgomuja.

² Didif dijginaga rot tenten oida rua rugif gu Allah rot rudou ongkasmos ojgomu. Tina rudou enebriyi gij rot teinefa rusnok rugif gu Allah erek tenten enesi.

³ Rua runororu moroju onggga Allah ensejah nou rusnok jeskaseda risma rudou onggga ebsi komowa guru. Tina rua rudou os ruroru risinsa rerin moroju ojgomu. Rua runougif gu Allah rot Ofa efen moroju insa koma onggga eita rusnok rudou ebsi komowa jinaga guru.

⁴ Jeska oisouska mar onggga Yesus ontunggom fob bera rusnok runocosu rot ruroru hukum Musa jeskaseda risma rudou onggga efen mar onggga oska oskiyai tein deika guru. Yesus otunggom mar erek insa koma jeskaseda rusnok nomnaga onggga ruroru Ofa bera risma rudou onggga ebsi komowa erek insa koma ojgomuja.

⁵ Sis fob Musa ongggu keingg mar osok gij rusnok onggga ruroru hukum Allah rot tenten jeskaseda risma rudou onggga ebsi komowa. Ofa ongggu oida, "Erek rusnok ruroru jeni hukum Allah nomnaga rot tenten fob, beda rua rimesma eiteij ah onggga efeinah si."

⁶ Erek koma, tina rusnok onggga ruroru Allah oga rot tenten bera rinsma rudou onggga ebsi komowa fob. Jefeda rua ragot oida, "Enadaij nou rusnok rija jah mebaga jeskaseda ruroun Yesus degini kefin skoita mimif jeskaseda mig efen oga guru.

⁷ Noba enadaij nou rusnok rujuj gij monuh mar agos jeskaseda ruroun Yesus skoita mimif fogora mig efen oga guru."

⁸ Jeska rungggu gij Mar Efeyi Ebsi erek kef oida, "Allah oga bera ah doida iwa fob. Jefeda adaij nou

iwa ifesij rot oga insa koma ojgomu, noba adaij nou iwa isah oga insa koma gij idou efesi tein. Oga insa koma bera onnga memef memfesij gu rusnok fob. Oga insa koma agot oida rusnok ruroru Yesus Kristus ojgomu."

⁹Noba erek rusnok ragot rot tomnomna oida, "Yesus Kristus bera Tuhan," noba rua ruroru rot tenten oida Allah omfra Ofa jeska anggos fob, beda Allah omoskotu rua jeska rerin mar onnga oska si.

¹⁰Jeska erek mudou efesi ororu Yesus Kristus rot tenten fob, beda Allah omocunc mimif erek rusnok onnga rudou ebsi komowa. Noba erek mimif magot rot tenten oida mimif muroru Yesus Kristus fob, beda Allah omoskotu mimif jeska mifmin mar onnga oska si.

¹¹Gij Mar Efeyi Ebsi bera Allah agot oida, "Osnok egens onnga odou os ororu Kristus rot tenten, beda mojenen ofa rot koma jinaga guru."

¹²Koma erek tenten nou rusnok ebic nomnaga tein. Jeska ahah Allah eiteij, rusnok onnga Yahudi jera rusnok onnga Yahudi guru tein bera morototuma erek egens. Ofa bera erek Tuhan nou rusnok ebic nomnaga. Noba Ofa ocunc odou onnga oufamofa eteb skoita rusnok nomnaga onnga ruis gu Ofa jeskaseda Ofa oskotu rua.

¹³Erek koma jeska nabi egens onngu gij Mar Efeyi Ebsi sis eteb fob oida, "Allah omoskotu rusnok nomnaga onnga ruis gu Ofa rot si."

¹⁴Erek koma tina, iwa isujohu rot rusnok onnga rudou onororu Tuhan enesi. Jeska erek rudou onororu Allah oga enesi beda enadaij nou rua ruis gu Ofa jeskaseda Ofa oskotu rua guru. Noba erek rua rineg rot Allah oga insa koma enesi, beda enadaij

nou rua ruroru Ofa efen oga insa koma tein guru. Noba erek rusnok rinejefesij rot Allah oga insa koma gu rua guru, beda enadaij nou rua rig rot oga insa koma tein guru.

¹⁵ Noba erek rusnok runobk rineya jeska rifekesa guru, beda enadaij nou rua insa koma rijefesij rot Allah oga gu rusnok enjgineg guru. Koma erek runggu gij Mar Efeyi Ebsi oida, "Gij mona onnga rusnok rinsaga jeskaseda riflesij rot Allah oga onnga oufamofa, beda koma bera erek mar onnga oufamofa eteb!"

¹⁶ Koma tenten, tina rusnok rineya onnga Yahudi bera runoruru Allah oga onnga oufamofa insa koma guru. Jeska nabi Yesaya onngu gij Mar Efeyi Ebsi sis eteb fob oida, "Tuhan, rusnok rufoukou bera runoruru mar onnga memef memfesij osok gij Bua gu rua guri."

¹⁷ Jefeda erek rusnok rijefesij rot Allah oga onnga oufamofa osok gij Yesus Kristus insa koma, beda rusnok enjgineg rimeg rot si. Beda rua tein rumoruru Allah oga rot tenten si.

¹⁸ Tina rineya jeska iwa rimagot oida, "Rusnok Yahudi nomnaga rineg rot Allah oga onnga oufamofa enesi." Beda didif dumoroun gu rua oida koma enerek tenten guru. Jeska runggu gij Mar Efeyi Ebsi oida, "Rusnok rineya bera rimfesij rot Allah oga onnga oufamofa gu rusnok rejrej monuh nomnaga fob."

¹⁹ Tina rineya jeska iwa rimagot oida, "Yahudi onnga ringg rot Allah oga onnga oufamofa insa koma bera rudou enebriyi gij rot guri." Tina didif dagot oida rusnok Yahudi rudou ebriyi gij Allah oga insa koma ojgomu fob. Jeska Musa onngu gij Mar Efeyi Ebsi rot mar onnga Allah anggot gu rua onnga Yahudi

fob. Ofa agot oida, "Didif dumocunc dudou onggga okora rot rusnok onggga Yahudi guru, beda iwa onggga Yahudi idou emejisei eteb rot rua si. Beda iwa imeita idou onggga ofogog skoita rua insa koma onggga iwa isujohu bera erek rudou osumsumu ojgomu."

²⁰ Noba nabi Yesaya anggot rot koisoisa osok gij mar insa koma tein. Jeska gij Mar Efeyi Ebsi ofa anggot rot mar onggga Allah anggot osok gij rusnok onggga Yahudi guru erek kef oida, "Rusnok onggga runohca Didif guru, rua bera onggga rimeja erek egens jera Didif si. Noba Didif dumocunc dudou onggga oufamofa skoita rusnok onggga rinerejgei mar jeska Didif guru."

²¹ Noba Yesaya anggot mar osok gij rua onggga Yahudi erek kef oida, "Didif duga ebin gu rua onggga Yahudi ojgomuja. Tina rua rukoja Didif ojgomu. Rua rufos ombrera rot dedin duga ojgomu."

11 ¹ Erek koma jefeda rusnok rineya rumosujohu rot oida Allah bera okoja efen rusnok Yahudi fob. Tina erek koma guru. Jeska didif disinsa bera direk Yahudi egens jeska rua onggga Israel tein. Noba didif bera dunjuj jeska Abraham jera ebic Yahudi onggga ofoka Benyamin tein.

² Allah onokoja efen rusnok Yahudi guru. Ofa bera enjeka rua gij mona onggga sismeni jeskaseda ocunc efen odou onggga oufamofa skoita rua. Iwa idou ah keingg rot mar onggga runggu gij Mar Efeyi Ebsi sis fob. Jeska gij mar insa koma bera nabi Elia oga erahah skoita Allah rot efen rusnok Israel fob.

³ Ofa agot oida, "Tuhan, bebin rusnok Israel bera ranggob bebin nabi-nabi fob. Noba rua tein runghoda rot bebin mod onggga rusnok rugif gu Bua gij tein fob. Noba ebeibeyaif rua rudou os ragob didif tein."

⁴Tina gij mona insa koma Allah oroun mar gu nabi Elia erek kef oida, "Didif duncunc rusnok rufok ribu cinja erfeka jeska rua onnga Israel onnga rugif gu dedin duga morototuma erek bua fob. Rua tein runougif gu mar onnga oska koma onnga ofoka Baal jinaga guru."

⁵Jefeda gij mona ebeibeyaif tein, oisouska Allah odou onnga oufamofa bera Ofa oncunc rusnok rineya jeska rua onnga Yahudi fob.

⁶Noba Ofa oncunc rua oisouska odou onnga oufamofa eteb oigomu. Ofa onocunc rua oisouska mar onnga rua risinsa runtunggom rot guru. Jeska erek Ofa oncunc rua oisouska mar onnga rua risinsa runtunggom fob, beda koma erek rua runoisum gij Ofa rot efen odou onnga oufamofa skoita rua deika guru.

⁷Jefeda erek rusnok Yahudi risinsa rireni rot ahais jeskaseda rita rudou onnga efen mar onnga oska guru ahah Allah eiteij, beda rua rinesma guru. Tina rusnok Yahudi rineya onnga Allah oncunc fob bera risma rudou onnga ebsi komowa jeska Ofa oigomu. Erek koma tina, rua onnga Yahudi rineya bera rita rudou onnga oska skoita Allah.

⁸Erek koma jeska runggu gij Mar Efeyi Ebsi erek kef oida, "Allah otunggom rua fogora rudou eskes noba osumsumu rot mar oigomu. Jefeda onjoros deisef tein bera rua rudou enebriyi gij mar onnga rua rik gu riteij guru. Noba rudou osumsumu rot mar onnga rua rig tein."

⁹Noba raja Daud tein onngu gij Mar Efeyi Ebsi oida, "Tuhan, didif dui gu bua jeskaseda mar nomnaga onnga rua rerin onnga erek ongkoska omorotunggom rua fogora rija eseseifa rot oigomu.

¹⁰ Beda mar insa koma bera erek bua bisesa mar okum sons skoita rua rot rerin mar onnga oska si."

¹¹ Jefeda rusnok Yahudi rufoukou rija eseiseifa fob. Tina enadajj nou iwa isujohu rot oida rua nomnaga rimeja eseiseifa ojgomuja guru. Jeska oisouska rudou onnga okoja rot Allah oga fob bera rusnok onnga Yahudi guru rinsma Allah oga onnga oufamofa insa koma fob. Noba rusnok onnga Yahudi guru bera ruroru Allah oga insa koma fob, jefeda rusnok onnga Yahudi rudou ejisei rot rua onnga Yahudi guru.

¹² Noba jeska rusnok Yahudi rukoja Allah oga fob, jefeda rusnok enjgineg bera rinsma oufamofa eteb jeska Allah fob. Noba mar onnga oufamofa onnga enseiseifa jeska rua bera orofij rusnok onnga Yahudi guru jeskaseda rua risma oufamofa eteb jeska Allah. Jefeda gij mona onnga rusnok Yahudi ruroru Allah oga rot tenten fob, beda rua rimesma oufamofa jeska Allah onnga erek eteb ekirsa tein.

¹³ Ebeibeyaif didif dudou os difesij mar skoita iwa onnga erek Yahudi guru. Didif bera erek rasul egens onnga duftufts mar rot Allah efen oga gu rusnok onnga Yahudi guru. Noba didif dudou erirei eteb rot mar insa koma ojgomu.

¹⁴ Didif dudou os oida mar onnga didif dutunggom bera ereita rusnok Yahudi rineya rudou ejisei rot fogora rineya jeska rua rumororu Yesus Kristus tein. Beda Ofa omoskotu rua tein jeska rerin mar onnga oska.

¹⁵ Jeska sis fob, gij mona onnga Allah okoja rusnok onnga Yahudi, beda koma erek ohoda moroju egens nou rusnok ebic enjgineg tein jeskaseda risma oufamofa eteb jeska Allah. Jefeda gij mona onnga

Ofa omoroun rusnok ongg Yahudi deika, beda koma erek rusnok ongg ranggos tina risma riteij ah sons.

¹⁶Erek rusnok rikeba rerin roti egema gu Allah erek mar ongg rurougif gu Ofa rot, beda rerin roti efaga egens insa koma nomnaga erek ebsi komowa tein. Noba erek mega ofom bera ebsi komowa, beda mega efaga efen efetma nomnaga bera erek ebsi komowa tein. Erek koma tein, rusnok Yahudi ongg ensis bera erek Allah efen rusnok. Jefeda rusnok Yahudi ongg deisef tein bera erek Ofa efen rusnok ros.

¹⁷Erek koma noba, rua ongg runjuj jeska Abraham bera erek mega zaitun egens ongg Allah erefa fob. Mega insa koma efen efetma eneya ongg eyah jeska efaga mosu fob. Noba iwa, ongg erek Yahudi guru, bera erek mega efetma jeska mega mosu enjgineg ongg Allah erebiedi jera mega efaga mosu egens insa koma ongg Ofa efen fob. Noba mega efetma insa koma esma efeyi jeska mega efaga mosu insa koma tein. Erek koma tein iwa isma oufamofa eteb jeska Allah morototuma erek Ofa eita gu rusnok Yahudi sis fob tein.

¹⁸Tina enadaij nou iwa isujohu rot oida yeyin ifoka bera erek aksa ekirsa jeska rusnok Yahudi rufoka guru. Jeska iwa bera erek mega efetma insa koma ongg esma efeyi jeska mega efaga mosu insa koma ojgomu. Mega efaga mosu insa koma enesma efeyi jeska mega efetma insa koma guru.

¹⁹Erek koma beda rineya jeska iwa rimesitit risinsa rifaga rot oida, "Mimif miferwei Allah efen rusnok Yahudi erek mega zaitun efetma insa koma eferwei mega efetma ongg eyah jeska fob."

²⁰Koma erek tenten, tina Allah okoja rua ongg Yahudi insa koma erek mega efetma ongg eyah

jeska fob, jeska rudou onororu Ofa efen oga rot tenten deika guru. Noba iwa onnga Yahudi guru bera erek mega efetma onnga ebiedi jera mega efaga mosu, jeska iwa iroru Allah efen oga rot tenten ros. Jefeda iwa inesitit isinsa ifaga rot guru, tina yut joug idou efesi rot ahais ojgomuja.

²¹ Jeska erek Allah okoja efen rusnok Yahudi onnga runororu efen oga rot tenten guru, beda Ofa omokoja iwa tein rot si.

²² Iwa isujohu rot teinefa Allah otunggom mar gu rusnok rot odou onnga eskeiramera era rot odou onnga okum tein. Ofa oncunc odou onnga okum skoita rusnok Yahudi onnga runororu efen oga rot tenten guru. Noba Ofa tein oncunc odou onnga eskeiramera skoita iwa onnga erek Yahudi guru deika. Koma jeska iwa iroru Ofa efen oga rot tenten fob. Tina guru, beda Ofa omokoja iwa tein erek mega efetma insa koma onnga eyah jeska mega efaga mosu fob.

²³ Noba erek rua onnga Yahudi rikikif fogora ruroru Allah efen oga rot tenten sons deika, beda Ofa omoroun rua sons si. Koma erek mega efetma onnga eyah insa koma ebiedi mega efaga mosu insa koma sons fob.

²⁴ Iwa onnga Yahudi guru bera erek mega efetma jeska mega efaga mosu onnga er erek ebireira ojgomu. Noba Allah ebiedi iwa jera mega efaga mosu egens onnga Ofa esinsa erefa fob. Tina rusnok Yahudi bera erek mega efetma egens onnga eyah jeska mega efaga mosu onnga Allah enrefa fob, jefeda adaij nou Ofa ebiedi rua sons jera mega efaga mosu insa koma tein ojgomu.

²⁵ Edohuji onnga erek Yahudi guru, didif dudou os difesij rot mar egens onnga ah jejema jeska rusnok riteij sis fob jeskaseda iwa inesitit isinsa ifoka erek aksa ekirsa jeska rusnok onnga Yahudi guru. Jeska ebeibeyaif rusnok rineya jeska rua onnga Yahudi bera rufos ombrera rot Allah oga ojgomuja. Rua rimeker erek koma ojgomuja onjoros rusnok Yahudi nomnaga onnga Allah oncunc rot bera rin skoita Ofa fob.

²⁶ Beda Allah omoskotu rusnok Yahudi rufoukou insa koma jeska rerin mar onnga oska. Jeska runggu gij Mar Efeyi Ebsi sis fob rot oida, "Ofa onnga omoskotu rusnok bera emen jeska rusnok Yahudi. Beda Ofa omosuwa rua onnga Yahudi jeska rerin mar onnga oska si."

²⁷ Noba gij mar enjineg tein bera Allah agot gu rusnok onnga Yahudi rot oida, "Didif dimagen mar morototuma jera rua. Noba Didif dumosuwa rua jeska rerin mar onnga oska si."

²⁸ Erek koma jeska rusnok Yahudi bera rukoja Allah efen oga osok gij Yesus Kristus fob. Jefeda Ofa oncunc rua erek Ofa rusnok onnga rudou ofogog skoita Ofa fob. Jefeda ebeibeyaif iwa onnga Yahudi guru bera onnga isma oufamofa eteb jeska Ofa. Tina jeska Ofa anggen rot mar gu Yahudi rerin rimower sis eteb fob, jefeda Ofa odou okora rot rua onnga Yahudi ros.

²⁹ Jeska Allah onosuna rot mar onnga Ofa anggen rot sis fob gu rusnok onnga Ofa oncunc fob jinaga guru.

³⁰ Sis fob iwa onnga Yahudi guru bera onnga yungkoja rot Allah oga. Tina ebeibeyaif bera Allah oncunc efen odou onnga oufamofa eteb skoita iwa.

Koma jeska rua onnga Yahudi rungkoja Allah efen oga fob.

³¹ Rua insa koma rungkoja Ofa efen oga jeska Ofa oncunc efen odou onnga oufamofa skoita iwa onnga Yahudi guru fob. Tina gij mona kahma deika beda Ofa omocunc efen odou onnga oufamofa skoita rusnok onnga Yahudi tein si. Jeska Ofa oncunc efen odou onnga oufamofa skoita iwa tein fob.

³² Erek koma jeska Allah oncunc rot oida rusnok nomnaga bera runororu efen oga rot tenten guru fob. Beda oisouska mar insa koma bera Ofa tein orocunc rot efen odou onnga oufamofa skoita rusnok nomnaga.

³³ Wah! Allah efen odou onnga ebriyi gij mar erek eteb doska. Ofa efen odou onnga ejginaga rot mar nomnaga erek eteb tein. Rusnok egema tein rudou enebriyi gij mar nomnaga onnga Allah oga eris rot jinaga guru. Noba rusnok egema tein rudou enebriyi gij Ofa efen eita mar skoita rusnok jinaga guru.

³⁴ Runggu gij Mar Efeyi Ebsi oida, "Rusnok egema tein rinejginaga rot mar onnga angh gij Allah odou efesi jinaga guru. Noba rusnok egema tein runoftuftu Ofa rot mar onnga Ofa omotunggom jinaga guru.

³⁵ Enadaj nou rusnok rita mar egema tein skoita Allah fogora rerin mar okowu onnga ah gu Ofa tein jinaga guru."

³⁶ Koma tenten, jeska Allah bera onnga ontunggom mar nomnaga. Noba mar nomnaga bera enah oisouska Ofa ojgomu. Jefeda rusnok nomnaga rufra Ofa efen ofoka erek aksa eteb rot ah aibin ojgomuja. Ainsoma.

12 ¹ Edohuji, Allah oncunc efen odou onnga oufamofa skoita mimif fob, jefeda didif duis

gu iwa nomnaga jeskaseda iwa yuh idou efesi rot ongkasmos skoita Allah ojgomu. Iwa ita itej ah onnga ongoska noba onnga erek mar onnga irougif gu Allah ojgomu. Jeska Ofa bera oncunc efen odou onnga eskeiramera eteb skoita iwa fob. Mar insa koma nomnaga bera erek tenten noba orocunc rot teinefa iwa yugif gu Ofa ojgomu fob.

²Iwa ineita mar morototuma erek rusnok mebif onnga rinejginaga rot Allah enesi guru. Tina yuhoda idou efesi skoita Allah jeskaseda Ofa ocunc gu iwa rot teinefa iwa isujohu rot mar onnga erek efeinah deika. Beda iwa imejginaga jeni rot mar meidu onnga Allah ondou os rot si. Iwa imejginaga rot mar onnga erek ongoska noba rot mar onnga ereita Ofa odou efesi eskeiramera rot tein.

³Allah oncunc efen odou onnga eskeiramera skoita Didif fob. Jefeda oisouska mar insa koma bera didif dagot deika gu iwa rot oida enadaj nou iwa yufra isinsa ifoka erek aksa eteb guru. Noba inoin keingg ifoka degini tein guru. Tina iwa ita idou efesi onnga osujohu rot mar erek edeider ojgomu. Noba iwa ita mar insa koma jeni erek yeyin idou onnga ororu Allah rot tenten fob ojgomu.

⁴Iwa isujohu rot osnok egens efen efaga. Efaga efen efetma koma bera erek mar onnga ofoukou. Noba mimif mira efetma insa koma jeskaseda murtonggom mar onnga erek toga toga.

⁵Erek koma tein mimif nomnaga bera erek rusnok rufoukou. Tina oisouska mudou onnga ororu Yesus Kristus bera mimif minja erek efaga egens ojgomu. Noba mimif onnga erek egens egens bera erek efaga efen efetma onnga egens egens tein. Noba mimif mita mar moguma erek mumofijma.

⁶ Allah eita owesa efek gu mimif jeskaseda mutunggom mar onnga erek toga toga. Noba mimif misma owesa efek insa koma jeni Allah odou onnga oufamofa rot mimif. Jefeda erek osnok egens esma owesa efek jeskaseda eg mar gij odou efesi jeska Allah fogora agot rot mar insa koma gu rusnok enjgineg tein, beda ofa agot rot mar insa koma jeni erek odou ororu Allah rot ojgomu.

⁷ Noba erek osnok egens esma owesa efek jeskaseda ofij efen mohujir, beda ofa eita mar insa koma ojgomu. Noba erek osnok egens esma owesa efek jeskaseda oftufu rot Allah oga gu rusnok enjgineg, beda ofa eita mar insa koma ojgomu.

⁸ Noba erek osnok egens esma owesa efek jeskaseda eisisi joug rusnok enjgineg, beda ofa eita mar insa koma ojgomu. Noba erek osnok egens esma owesa efek jeskaseda ofij rusnok enjgineg rot efen mareibra ofoukou, beda ofa eita mar insa koma oisouska efen odou onnga erirei eteb ojgomu. Noba erek osnok egens esma owesa efek jeskaseda eja okag nou rusnok erek rerin ebirfaga, beda ofa eita mar insa koma oisouska efen odou onnga ocosu efei ahtah ojgomu. Noba erek osnok egens esma owesa efek jeskaseda ocunc odou efesi onnga eskeira skoita rusnok enjgineg, beda ofa eita mar insa koma oisouska efen oga onnga enerahah rot guru.

⁹ Iwa tein ita idou onnga okora rot rusnok enjgineg erek tenten ojgomu. Noba ibes ifaga jeska mar nomnaga onnga erek ofogog ojgomuja. Noba idou osos rot mar onnga erek ongnoskamoka ojgomu.

¹⁰ Yuh idou efesi moguma erek rusnok onnga rudou omokorema ojgomuja. Noba yufra ihujir rerin rufoka erek ekirsa jeska iwa isinsa yeyin ifoka.

¹¹ Inorons rot idou onnga eskes osok gij mar onnga Allah ondou os rot guru. Tina ita idou onnga ahais askesi iwa yufij Tuhan ojgomuja.

¹² Iwa ita idou onnga ererei askesi iwa yuisum gij Allah rot mar onnga Ofa emeita gu iwa. Noba yuin keingg idou efesi rot mar okum onnga askesi ereneni iwa ojgomuja. Noba iwa tein yum iteij gu Allah ojgomuja.

¹³ Noba iwa ikeba yeyin mareibra eneya rot Allah efen rusnok onnga rufojingki tein. Noba iroun rusnok enjgineg gij yeyin mod efesi rot idou onnga oufamofa ojgomu.

¹⁴ Noba gij mona onnga rusnok rutunggom mar onnga ofogog skoita iwa, beda iwa inois gu Allah jeskaseda Ofa ofra mar okum keingg rua rot guru. Tina yum iteij gu Allah jeskaseda Ofa ocunc odou onnga oufamofa skoita rua ojgomu.

¹⁵ Gij mona onnga yeyin ihujir rudou efaga ouka rot mar, beda iwa tein ita idou onnga efaga oka rot morototuma jera rua. Noba gij mona onnga rua rudou okumkum rot mar egema, beda iwa tein ita idou onnga okumkum rot morototuma jera rua ojgomu.

¹⁶ Noba iwa ita idou onnga eskeiramera morototuma tein ojgomuja. Noba inofra ifoka erek aksa eteb ojgomuja guru, tina icunc idou onnga oufamofa skoita rusnok onnga runok rufoka gij guru tein ojgomu. Iwa inesitit isinsa efaga rot mar insa koma tein guru.

¹⁷ Gij mona onnga rusnok rutunggom mar onnga ofogog skoita iwa, beda iwa inesesa mar onnga ofogog sons skoita rua guru. Iwa ireneni rot ahais

jeskaseda mar onnga iwa itunggom bera erek oufamofa ahah rusnok nomnaga riteij ojgomu.

¹⁸ Noba iwa ireneni rot ahais tein jeskaseda iker rot idou onnga eskeiramera morototuma jera rusnok enjgineg.

¹⁹ Edohuji, gij mona onnga rusnok rutunggom mar onnga oska skoita iwa, beda iwa inofra mar okum keingg rua rot ebeirens guru. Tina iwa yuin keingg idou efesi fogora iker rot mona onnga Allah omofra mar okum keingg rua rot efen odou onnga okumkum eteb skoita rua si. Jeska runggu gij Mar Efeyi Ebsi rot mar onnga Allah anggot erek kef oida, "Didif dimesesa mar okum sons skoita rusnok onnga rutunggom mar onnga oska si. Didif dumofra mar okum keingg rua rot si."

²⁰ Erek koma tina onnga oufa bera, iwa ita mar onnga runggu gij Mar Efeyi Ebsi erek kef oida, "Erek mesa onnga ofogog mosona onk rua, beda iwa ita maat gu rua ojgomu. Noba erek magon enir tein, beda iwa ita mei gu rua ojgomu. Jeska erek iwa ita mar insa koma gu mesa onnga oska skoita iwa, beda mojen en rua rot mar onnga oska onnga runtunggom skoita iwa sis fob si."

²¹ Erek iwa itunggom mar onnga ofogog sons skoita rusnok enjgineg, beda koma erek iwa insiri gu rua fob. Tina onnga oufa bera, iwa icunc idou onnga oufamofa sons skoita rusnok onnga rutunggom mar onnga ofogog skoita iwa, beda rua bera onnga rimesiri gu iwa si.

13 ¹ Rusnok onnga Kristen nomnaga rugif gu rerin ebirfager onnga rufoka ereij keingg rusnok nomnaga gij rerin monuh ojgomu. Jeska owesa efek onnga rua rinsma jeskaseda rufoka ereij

keingg rusnok bera en jeska Allah ojomu. Rua rinesma owesa efek insa koma jeska rusnok enjineg ojomu guru. Jeska Allah bera onga ocunc rot idu onga ofoka ereij keingg rusnok.

²Jefeda erek osnok egens eretei rot ebirfager monuh insa koma, beda koma erek ofa eretei rot mar onga Allah anggot rot tein. Beda ofa emesma mar okum rot ojomu.

³Noba rusnok onga rita mar onga oufamofa ojomu bera rinemeesa rot rerin ebirfager monuh guru. Tina rusnok onga rita mar onga erek oska bera rimeesa rot rerin ebirfager monuh ojomu. Erek iwa ita mar onga oufamofa ojomu, beda iwa idou enemeesa rot yeyin ebirfager monuh guru. Beda rua rimesitit iwa rot yeyin ita mar onga oufamofa insa koma si.

⁴Ebirfager monuh insa koma bera erek rusnok onga Allah oncunc fob. Noba Ofa ocunc rua jeskaseda rita mar onga oufamofa skoita iwa ojomu. Tina erek iwa ita mar onga oska, beda iwa imeesa rot rua ojomu. Jeska rua rerin owesa efek jeskaseda rufra mar okum keingg iwa rot. Rua bera onga Allah oncunc jeskaseda rufra mar okum keingg rusnok onga rutunggom mar onga oska.

⁵Jefeda iwa yugif gu yeyin ebirfager monuh ojomu. Noba iwa inougif gu rua jeska iwa imeesa rot rua ojomu guru. Tina iwa yugif gu rua jeska koma bera erek mar onga tenten ojomu.

⁶Mimif muh pajak gu ebirfager monuh tein. Noba askesi rua rutunggom rerin mar erek insa koma beda koma erek rua rifarur nou Allah tein.

⁷Jefeda erek mar okowu eneya onga ah gu iwa, beda iwa yuh mar insa koma sons ojomu. Noba

erek iwa inoh pajak gu yeyin ebirfager monuh enesi, beda iwa yuh mar insa koma gu rua ojgomu. Yugif gu yeyin ebirfager monuh fogora yufra rufoka erek eteb ojgomu.

⁸Erek mar okowu onnga ah gu iwa, beda iwa yuh mar okowu insa koma sons gu rusnok onnga rerin mar koma. Noba erek koma tein, mimif mudou omokorema ojgomuja. Jeska koma tein bera erek mar okowu onnga angh gu mimif nomnaga. Erek iwa idou okora rot rusnok enjgineg beda koma erek iwa iroru Allah efen hukum nomnaga fob.

⁹Hukum Allah agot rot oida, "Iwa inesiri jera egema efen mohona guru ni. Iwa inagob rusnok enjgineg guru ni. Iwa inokoreka mar guru ni. Idou eneftirir keingg rusnok enjgineg rerin mareibra guru ni." Noba oisouska hukum-hukum insa koma bera mimif mik hukum onnga efen ofoka egens ojgomu. Hukum egens koma bera oida, "Idou okora rot yeyin ihujir morototuma erek idou okora rot isinsa."

¹⁰Erek iwa idou okora rot rusnok enjgineg, beda iwa ineita mar onnga oska skoita rua guru. Jefeda rua onnga rudou okora rot rusnok enjgineg bera ruroru Allah efen hukum nomnaga fob.

¹¹Iwa ita mar erek insa koma nomnaga, jeska mona onnga enja ejgwaga bera esaga doida fob. Iwa ita idou efesi onnga ensejah nou mar erek osnok egens onnga anghca bera osowu noba esba eiteij fob. Jeska mona onnga Yesus Kristus omoskotu mimif bera ensaga doida fob. Mona egens koma bera en doida ekirsa jeska meidu onnga mimif munsujohu rot sis fob.

¹²Miteij ah insa kef bera erek motkobah. Noba motkobah insa koma bera doida omoisa fob. Jeska

gij mona onnga estir deika, beda Yesus omoksons en si. Beda gij mona insa koma mimif mumoira gij Yesus efen eisa tein. Jefeda mimif mineita mar onnga oska erek rusnok onnga ringker gij motkobah rutunggom ojomuja guru. Tina erek tentarer onnga rira monska ofos onnga ontumba jeskaseda rut joug risinsa, beda erek koma tein mimif mita mar onnga oufamofa erek rusnok onnga rudou os ringker gij eisa ojomu. Jeska koma bera onnga ot joug mifmin miteij ah tein.

¹³ Mimif mita mar onnga onkoska erek rusnok onnga ringker gij eisa ojomu. Enadaj nou mimif muina maat keingg ojomuja fogora mibirfaga erabibi rot mofut efei guru. Enadaj nou mimif misiri morototuma guru. Noba muga enemaksama guru. Mineita mudou efesi onnga ejisei moguma tein guru.

¹⁴ Mimif mita mar morototuma erek Tuhan Yesus Kristus eita mar ojomu. Noba munosujohu rot teinefa mimif mita mar onnga oska jeni mudou efesi osos rot guru.

14 ¹ Iwa icunc idou onnga eriaga skoita rusnok enjineg onnga rudou eineina gij rot mar onnga erek oska jera mar onnga oufamofa ojomu. Yuga onomosokuma jera rua osok gij mar onnga rua rusujohu rot guru. Noba iwa inagot oida mar onnga rua rutunggom bera erek oska tein guru.

² Erek koma jeska rusnok rineya rusujohu rot oida adaj nou rua rit maat ebireira onnga rudou os rot ojomu. Tina rusnok rineya bera rudou eineina gij rot mar onnga oufamofa jera mar onnga oska ros. Jeska rua rusujohu rot oida rusnok rit marfok ojomu, noba maat enjineg bera guru. Rua rusujohu rot oida maat enjineg bera erek oska ojomu.

³ Noba rusnok enjgineg bera rusujohu rot oida maat nomnaga bera erek oufa ojomu. Tina enadaj nou rua rucunc rusnok onnga rit marfok ojomu erek rusnok onnga rudou osumsumu rot guru. Noba rusnok enjgineg rusujohu rot oida rimet marfok bera oufa ojomu. Tina enadaj nou rua rucunc rusnok onnga rit maat ebireira erek oska tein guru. Jeska Allah oroun rusnok ebic egeka koma tein erek efen rusnok fob.

⁴ Rusnok onnga rit maat onnga erek toga jeska iwa bera rufij Allah erek efen rusnok tein. Jefeda enadaj nou iwa icunc Allah efen rusnok insa koma onnga rumfij Ofa erek oska guru. Jeska rua insa koma bera onnga rusujohu rot oida mar onnga rua rutunggom bera erek oufa era erek oska ahah Allah eiteij ojomu. Noba mar onnga rua rutunggom nou Tuhan bera erek oufa ojomu, jeska Tuhan bera onnga ofij rua rot ojomu.

⁵ Rusnok rineya rufra mona egens jeskaseda rugif gu Allah erek ekirsa jeska mona enjgineg. Noba rineya rusujohu rot oida gij mona nomnaga bera adaj nou rugif gu Allah ojomu. Onnga ofoufem bera mimif muroru jeni mar onnga mimif musujohu bera erek tenten ojomu.

⁶ Jeska rusnok enjgineg rusujohu rot oida rua rufra mona egens erek ekirsa jeskaseda rugif gu Tuhan gij mona egens koma. Noba rua bera rutunggom mar insa koma nou Tuhan ojomu. Noba rusnok enjgineg rusujohu rot oida adaj nou rua rit maat ebireira. Noba rua rutunggom mar koma nou Tuhan ojomu. Noba rua ruis oufamofa eteb gu Allah rot maat insa koma tein. Erek koma tein, rineya onnga rit maat

erek marfok ojgomu bera rutunggom mar koma nou Tuhan. Noba rua ruis oufamofa eteb gu Allah rot tein.

⁷ Erek koma jeska mimif mineker gij miteij ah kef jeskaseda mita mar onnga orotunggom misinsa erek eskeira rot ojgomu guru. Noba mimif minagos jeskaseda mudou eskeira rot misinsa guru.

⁸ Tina mimif miker jeskaseda mutunggom mar onnga ereita Tuhan odou eskeira rot ojgomu. Noba gij mona onnga mimif manggos, beda mimif mudou os jeskaseda Tuhan odou eskeira rot koma tein. Jefeda gij mar egeka insa koma bera mimif musujohu rot mar onnga ereita Tuhan odou eskeira rot ojgomu. Jeska mimif nomnaga bera erek Ofa efen rusnok.

⁹ Yesus Kristus agos noba esma eiteij ah sons gij mona onnga Ofa edebecki jeska agos fob. Noba Ofa otunggom mar koma jeskaseda eja erek Tuhan nou efen rusnok nomnaga onnga rifena ebah ros, jera rusnok nomnaga onnga ranggos fob tein.

¹⁰ Jefeda enadaij nou iwa icunc yeyin ihujir onnga rururu Yesus Kristus fob tein erek oska guru. Noba enadaij nou iwa isujohu rot oida yeyin ifoka onnga aksa ekirsa jeska rua guru. Jeska mimif nomnaga mumojot jah Allah odou noba Ofa emagot rot mar nomnaga onnga mimif muntunggom sis fob si.

¹¹ Koma tenten, jeska runggu gij Mar Efeyi Ebsi rot mar onnga Tuhan agot erek kef oida, "Kef bera erek tenten ojgomu oida, rusnok nomnaga rumougif gu Didif si. Rua nomnaga rimagot rot tenten oida Didif bera Allah."

¹² Jefeda mimif nomnaga mimagot jeni rot mar onnga mimif muntunggom sis fob gu Allah si.

¹³ Erek koma jefeda onnga oufa bera mimif munocunc mifmin muhujir rineya erek oska rot mar

ongga rua runtunggom guru. Tina mimif misisi joug misinsa mudou efesi jeskaseda mineita mar egema tein onggga orotunggom rua fogora risiri gij mar onggga rua rusujohu bera erek oska guru.

¹⁴ Didif bera duroru Yesus Kristus rot tenten fob. Noba didif dijginaga rot tenten oida maat egema tein onggga didif dit bera enerek oska guru. Tina erek osnok egens osujohu rot oida maat eneya bera erek oska, beda mar onggga ofa onsujohu bera erek tenten nou ofa ojgomu. Jefeda ofa enet maat insa koma guru.

¹⁵ Yesus bera anggos tumu mega salib nou osnok egens insa koma tein. Tina erek maat onggga iwa int bera orotunggom yeyin ihujir rudou efesi okumkum rot, beda koma orocunc rot oida idou onokora rot rua erek tenten enesi. Jefeda iwa inet maat onggga orotunggom yeyin ihujir rudou okumkum rot guru. Erek iwa it maat insa koma jah ihujir rudou, beda rua rimek iwa fogora rimet maat insa koma tein. Noba koma erek rua rinsiri gij mar onggga rua risinsa rusujohu bera erek oska.

¹⁶ Jefeda iwa inet maat onggga iwa isujohu bera erek oufa tina yeyin ihujir rusujohu bera erek oska guru. Jeska erek rua rik mar insa koma, beda rua rimesiri gij mar onggga rua rusujohu bera erek oska. Beda rusnok enjgineg rumohurmei mar rot iwa onggga Kristen nomnaga tein si.

¹⁷ Erek mimif mudou os jeskaseda Allah ofoka ereij keingg mimif, beda mar onggga mimif mint jera minj bera onofoufem guru. Tina mar onggga ofoufem nou mimif bera oida mimif mita mar onggga oufamofa ojgomu noba miker rot mudou onggga eskeiramera moguma ojgomuja, noba mita mudou onggga efaga

ouka morototuma rot Efena Ebsi Allah onnga engker gij mudou efesi.

¹⁸ Rusnok onnga rufij Yesus rita mar onnga oufamofa, noba onnga ereita Allah odou eskeiramera rot rua ojgomu. Noba rusnok enjgineg rumougif gu rua rot tein si.

¹⁹ Jefeda onnga oufa bera mimif mita mar onnga ereita mifmin muhujir rudou efesi erek eskeiramera rot ojgomu. Noba mimif tein mumofijma ojgomuja.

²⁰ Maat nomnaga bera erek oufa. Tina erek iwa int maat onnga orotunggom yeyin ihujir fogora rinsiri gij mar onnga rua runsujohu bera erek oska, beda mar onnga Allah oncunc gu rua gij rudou efesi bera emeja eseiseifa rot ojgomu. Noba koma enadaij guru.

²¹ Jefeda erek yeyin ihujir rineya onnga rusujohu rot oida mar erek marska era anggur efei bera erek mar onnga oska, beda iwa inet era inej mar insa koma guru. Iwa inet mar insa koma era mar egema tein onnga orotunggom rua fogora risiri gij mar onnga rua runsujohu bera oska guru.

²² Erek iwa isujohu oida maat onnga iwa int era mar onnga iwa inj bera enerek oska guru, beda idemdemi mar insa koma gij idou efesi ojgomu. Beda iwa jera Allah ojgomu bera ejginaga rot fob, tina rusnok enjgineg guru. Beda yeyin idou emeskeira rot maat insa koma onnga iwa isujohu bera erek oufa ojgomu. Noba iwa isujohu rot oida mar onnga iwa intunggom koma bera enerek oska guru.

²³ Rusnok rineya rijekjeka rudou efesi rot mar onnga rua rint era rinj, jeska rua rusujohu oida mar insa koma bera erek mar onnga oska. Tina erek rua rint mar insa koma ojgomu, beda Allah omocunc rua erek oska rot si. Erek mimif mita mar onnga misinsa

musujohu bera erek oska, beda mimif muntunggom mar onnga oska rot tenten fob.

15¹ Mimif onnga minejekjeka mudou efesi rot mar insa koma guru bera muin keingg mudou efesi rot rusnok onnga rijekjeka rudou gij mar koma ojgomu. Enadaj nou mimif mutunggom mar onnga orotunggom misinsa mudou eskeira rot ojgomu, noba rua insa koma bera guru, erek koma guru.

² Tina onnga oufa bera mimif mutunggom mar onnga ereita mifmin muhujir rudou efesi eskeira rot ojgomu jeskaseda rudou ororu Yesus Kristus erek ahais ekirsa tein.

³ Jeska Yesus Kristus onotunggom mar onnga ereita esinsa odou eskeira rot ojgomu guru. Tina Ofa esejah odou efesi jeskaseda eita efera okora nou rusnok enjineg tein. Jeska runggu gij Mar Efeyi Ebsi rot oida, "Gij mona onnga rusnok ruga oruh iwa, beda koma erek ruga oruh Didif tein fob."

⁴ Erek koma noba mar nomnaga onnga rua runggu gij Mar Efeyi Ebsi sis fob bera jeskaseda oroftuftu mimif rot. Mar onnga rua runggu insa koma bera orofij mimif jeskaseda muin keingg mudou efesi rot mar okum onnga ereneni mimif tein. Noba mar insa koma ereisisi joug mimif jeskaseda muisum gij Allah rot efen oga ojgomuja.

⁵ Allah bera onnga eisisi joug mimif noba ofij mimif jeskaseda muroru Ofa rot ahais ojgomuja. Noba didif dum diteij gu Ofa jeskaseda Ofa omofij iwa fogora iker rot idou onnga eskeiramera morototuma ojgomu. Jeska koma jeni erek Yesus Kristus odou os rot tein.

⁶ Beda yeyin idou emeja erek egens ojgomuja. Noba iwa imofra Allah efen ofoka onnga erek aksa. Ofa bera erek mifmin Tuhan Yesus Kristus efen meka.

⁷ Erek koma jefeda, didif duis gu iwa jeskaseda iwa icunc idou onnga oufamofa moguma ojgomu. Jeska Yesus Kristus oncunc efen odou onnga oufamofa skoita iwa fob. Iwa ita mar erek koma jeskaseda rusnok enjgineg rimek fogora rumofra Allah efen ofoka erek aksa eteb tein.

⁸ Yesus Kristus en gu mebif noba ofij rusnok Yahudi jeskaseda orocunc rot oida mar onnga Allah anggen rot skoita rerin rimower sis fob bera erek tenten ojgomu.

⁹ Noba Ofa ontunggom mar insa koma jeskaseda rusnok onnga Yahudi guru rumofra Allah efen ofoka erek aksa. Jeska gij mona insa koma Ofa ocunc odou onnga oufamofa eteb skoita rua tein. Erek koma jeska rungu gij Mar Efeyi Ebsi oida, "Jefeda Didif dimesitit mar gu Bua morototuma jera rusnok onnga Yahudi guru. Didif dumof medemer rot oufamofa eteb gu Bua si."

¹⁰ Noba mar enjgineg gij Mar Efeyi Ebsi bera agot oida, "Iwa onnga Yahudi guru ita idou onnga efaga ouka morototuma jera Allah efen rusnok onnga Yahudi."

¹¹ Noba mar enjgineg tein agot erek kef oida, "Iwa nomnaga onnga Yahudi guru yuis oufamofa eteb skoita Tuhan. Iwa nomnaga yuf medemer rot idou onnga efaga ouka skoita Ofa."

¹² Noba nabi Yesaya tein onngu gij Mar Efeyi Ebsi oida, "Raja efeinah onnga onjuj jeska rusnok Yahudi ebic Isai bera emen si. Ofa omofoka ereij keingg rusnok nomnaga onnga Yahudi. Noba rusnok onnga Yahudi guru bera rumoisum gij Ofa tein si."

¹³ Didif dum diteij gu Allah jeskaseda Ofa omofij iwa. Beda iwa idou emerirei eteb noba imesma iteij

ah onnga eskeiramera askesi iwa yuisum gij Allah ojomu. Beda oisouska owesa efek jeska Efena Ebsi bera iwa imoisum gij Ofa odudu deika rot mar onnga Ofa anggen rot si.

¹⁴Edohuji, didif dijginaga rot oida yeyin ita mar bera erek oufa ojomu, jeska iwa ijginaga rot mar onnga Allah ondou os rot fob. Noba iwa ijginaga rot teinefa iwa imoftuftuma tein fob.

¹⁵Tina didif duncunc dudou efesi gij surat kef skoita iwa fob. Didif dita mar erek koma jeskaseda ereisisi keingg idou efesi rot mar insa koma nomnaga. Jeska Allah eita owesa efek gu didif rot odou onnga oufamofa jeskaseda duftuftu mar osok gij Yesus Kristus oga skoita rusnok onnga erek Yahudi guru tein.

¹⁶Didif dufij Allah fogora duftuftu rot efen oga onnga oufamofa skoita rua insa koma jeskaseda Allah omoroun rua rot efen odou onnga eskeiramera. Rua insa koma bera erek mar onnga imam egens orka skoita Allah jeskaseda orougif gu Ofa rot. Noba Ofa odou eskeira rot mar insa koma jeska koma bera en oisouska Efena Ebsi ojomu.

¹⁷Jefeda didif dudou erirei eteb rot mar onnga didif dita nou Allah oisouska Yesus Kristus fob.

¹⁸Noba mar ofoka egens onnga didif dudou os difesij rot bera erek kef oida, oisouska mar onnga didif dumftuftu rot bera Yesus oroun rusnok onnga Yahudi guru skoita Allah fob. Rua ruroru Allah oga jeska didif dumfij gu rua noba dumftuftu rua rot Yesus efen oga fob.

¹⁹Noba rua rik mar onswos onnga didif duntunggom oisouska owesa efek jeska Efena Ebsi fob. Didif dumftuftu gu rua osok gij Allah efen oga onnga

oufamofa osok gij Yesus Kristus jeska kota Yerusalem ojgomuja onjoros rejrej monuh Ilirikum tein. Jefeda didif dimfesij rot efen oga gij monuh insa koma oisa fob.

²⁰ Noba ebeibeyaif didif dudou os difesij rot Allah oga onggga oufamofa gij monuh enjgineg onggga rusnok ringeg mar osok gij Yesus Kristus oga enesi. Jeska didif dunodou os difesij mar osok gij Allah oga onggga oufamofa gu rusnok onggga ringg rot mar insa koma fob guru. Jeska koma bera erek osnok egens onggga ofra mod efeb esij mowuj mosu onggga osnok enjgineg efen ojgomu.

²¹ Tina didif dudou os difesij rot Allah oga skoita rusnok onggga ringeg enesi jeskaseda rudou ebriyi gij tein. Koma morototuma erek mar onggga nabi egens ongggu gij Mar Efeyi Ebsi sis fob erek kef oida, "Rusnok onggga ringeg rot efen ofoka sis fob enesi bera rimejginaga rot Ofa si. Noba rua onggga rinejginaga rot efen oga enesi bera rudou emebriyi gij si."

²² Erek gij ari mega ofoj ofoukou fob bera didif dudou os dujogog iwa gij kota Roma. Tina dedin mar onggga dimfarur rot bera eragou joug didif jefeda dinen skoita iwa jah suma enesi. Noba ebeibeyaif mar onggga didif dimfarur jah sif bera erek oisa fob.

²³ (15:22)

²⁴ Jefeda didif dudou os dijek iwa gij mona onggga didif dija jah monuh Spanyol. Nou onggga didif dingker morototuma jera iwa gij mona onggga adaj fob, beda iwa yufij didif rot mar onggga ducosu rot fogora didif dumotoiru jah monuh Spanyol tein.

²⁵ Erek koma tina didif dimeja jah kota Yerusalem sismeni fog. Jeska didif dudou os durka fifi nou Allah efen rusnok gij kota insa koma fog.

²⁶ Koma jeska rusnok onnga ruroru Yesus Kristus gij monuh Makedonia jera monuh Akaya runcunc rudou onnga eskeiramera fob fogora ringkeba rerin fifi egema nou Allah efen rusnok onnga rufojingki gij kota Yerusalem.

²⁷ Rua risinsa rudou os rikeba rerin fifi insa koma, tina rua rucosu rot rutunggom mar insa koma ojgomu. Jeska rua, onnga erek Yahudi guru, bera rinsma oufamofa eteb jeska Allah fob. Noba koma bera en oisouska rusnok Yahudi onnga rumftuftu rua rot Allah efen oga onnga oufamofa sis fob. Jefeda adaij nou rua rufij rusnok onnga Yahudi sons fogora rikeba rerin fifi egema nou rua onnga rufojingki ojgomu.

²⁸ Nou onnga didif dita fifi insa koma gu rua onnga rufojingki gij kota Yerusalem fob, beda didif dimeja skoita iwa gij kota Roma askesi dincira jah monuh Spanyol.

²⁹ Noba didif dijginaga rot oida gij mona insa koma bera Allah emeita oufamofa eteb gu mimif nomnaga oisouska Yesus Kristus si.

³⁰ Edohuji, didif dui gu iwa jeskaseda iwa yufij didif fogora yum iteij gu Allah nou didif rot mar onnga dimfarur gij ainsa kef tein. Iwa itunggom mar insa koma nou didif ojgomu, jeska mimif bera erek ebic egens oisouska Yesus Kristus fob. Noba Efena Ebsi ofij mimif fogora mudou omokorema ojgomuja.

³¹ Iwa yum iteij jeskaseda Allah omoskotu didif jeska rusnok rineya gij monuh Yudea onnga runororu Allah guru. Jeska rua rudou os rutunggom mar onnga ofogog skoita didif. Noba yum iteij jeskaseda fifi onnga didif durka jah kota Yerusalem nou Allah efen

rusnok jah suma bera emereita rudou eskeira eteb rot.

³² Noba erek Allah odou os rot, beda didif dimeja skoita iwa rot dudou onnga eskeiramera ojgomu. Beda didif dimeker keingg dufons askesi diker jera iwa jah suma ros.

³³ Didif duis gu Allah onnga eita eiteij ah onnga eskeira gu rusnok jeskaseda Ofa omofij iwa tein ojgomuja. Ainsoma.

16 ¹ Gij surat kef didif dudou os difesij mar gu iwa osok gij osnok egens onnga ofoka Febe. Ofa tein ororu Yesus Kristus fob. Noba Ofa bera osnok egens onnga ofij ebirfager Mod Ari gij kota Kengkrea.

² Didif duis gu iwa jeskaseda iwa iroun ofa erek yeyin ihuj egens onnga ororu Yesus Kristus morototuma erek iwa fob. Icunc idou onnga okora rot ofa erek Allah efen rusnok nomnaga rucunc rudou onnga omokorema. Noba ofij ofa rot mar onnga ofa ocosu rot, jeska sis fob ofa omfij didif jera rusnok enjgineg tein rot mar onnga memef mocosu rot tein fob.

³ Erek koma noba didif dudou os duisu Priskila jera efen mahina Akwila onnga gomfij Yesus Kristus morototuma jera didif.

⁴ Sis fob goga gofij didif rot mar okum onnga angh keingg didif, jefeda mar ofogog ah keingg goga tein gij mona insa koma. Didif duis oufamofa eteb gu goga jeska goga gomfij didif erek insa koma fob. Noba rusnok Mod Ari onnga erek Yahudi guru, rua tein ruis oufamofa gu goga jeska goga gomfij didif erek insa koma sis fob.

⁵ Noba didif duisu rusnok nomnaga onnga rumohoturuma gij gegang mod jeskaseda rugif

gu Allah jah suma tein. Didif daisu dedin edohuj Epenetus onga dudou okora rot tein. Ofa bera erek osumbohka rot rusnok nomnaga onga ruroru Yesus Kristus gij monuh Asia fob.

⁶ Noba didif daisu Maria tein. Ofa bera emfarur gij efen mar rot ahais jeskaseda ofij iwa.

⁷ Noba didif daisu Andronikus jera Yunius tein. Goga tein gerek gosnok Yahudi onga gengker gij mod oskusk morototuma jera didif sis fob. Goga bera erek Yesus efen rasul onga ofoufem tein. Noba goga gororu Yesus Kristus gokag jeska didif.

⁸ Didif daisu Ampliatus onga dudou okora rot erek osnok egens onga ororu Tuhan fob.

⁹ Noba didif daisu Urbanus tein. Ofa bera osnok egens onga omfij Yesus Kristus morototuma jera didif. Noba didif daisu dedin edohuj Stakhis onga dudou okora rot tein.

¹⁰ Noba didif daisu Apeles tein. Erek mar okum ah keingg ofa ojgomuja, tina ofa odou okora rot Yesus Kristus ojgomuja. Noba didif daisu rusnok nomnaga onga ringker morototuma jera Aristobulus tein.

¹¹ Noba didif daisu Herodion tein. Ofa bera jeska rua onga Yahudi morototuma erek didif tein. Noba didif daisu rusnok nomnaga onga ringker gij Narkisus efen mod onga ruroru Tuhan Yesus fob.

¹² Didif daisu Trifena jera Trifosa tein. Gojaga gegeka insa koma bera gemfarur rot ahais nou Tuhan fob. Noba didif daisu dedin edohuj Persis onga dudou okora rot. Ofa tein emfarur rot ahais nou Tuhan fob.

¹³ Noba didif daisu Rufus onga ororu Tuhan rot ongoska fob. Noba didif daisu ofa efen mosu onga ofij didif erek ofa ofij efen efesa.

¹⁴ Noba didif dudou os daisu Asinkritus ni, Flegon ni, Hermes ni, Petrobas ni, Hermes ni, jera dedin edohujir nomnaga onga rumohoturuma morototuma jera rua tein.

¹⁵ Noba didif daisu Filologus jera Yulia ni, Nereus jera efen meyeser tein ni, Olimpas jera Allah efen rusnok nomnaga onga rumohoturuma morototuma jera rua ni.

¹⁶ Gij mona onga iwa imorodosuma beda yagei itma erek irocunc rot oida idou omokorema. Rusnok gij Yesus efen Mod Ari nomnaga jah sif ruisu iwa nomnaga tein.

¹⁷ Edohuji, didif dui gu iwa jeskaseda iwa yut joug idou efesi ahais rot rusnok enjgineg onga rusos iwa jeskaseda yuga omosokuma fogora imekebema. Noba yut joug idou efesi jeska rusnok onga rusos rineya rudou efesi fogora runororu Allah oga deika guru. Rua bera rukoja mar onga tenten onga rusnok enjgineg rumftuftu gu iwa sis fob. Jefeda iwa ibes ifaga jeska rua ojgomu.

¹⁸ Rusnok onga rita mar erek insa koma bera runofij mifmin Tuhan Yesus Kristus guru. Tina rua rutunggom mar onga ereita risinsa rudou eskeira rot ojgomu. Rua riflesij mar rot ruga onga erek ongkoskamoka jeskaseda ruokrusa rusnok enjgineg onga rudou osumsumu rot rerin mar onga ofogog erek insa koma.

¹⁹ Rusnok onga ruroru Yesus Kristus jah sif bera ringg rot teinefa iwa yugif gu Allah rot efen oga fob. Jefeda koma bera ereita dudou efesi erek eskeiramera eteb rot. Tina didif dui gu iwa jeskaseda ita idou onga ocosu efei ahtah rot mar onga

ongkoska, noba ita idou ahais rot mar onnga ofogog ojgomuja.

²⁰ Allah, onnga eita eiteij ah onnga eskeira gu rusnok, bera emagob Bilis fogora ofa emesiri gu iwa si. Noba onjoros mona insa koma bera didif dumom diteij gu mifmin Tuhan Yesus Kristus jeskaseda Ofa ocunc efen odou onnga oufamofa eteb skoita iwa.

²¹ Timotius onnga ofij Yesus morototuma jera didif jah sif bera oisu iwa tein. Noba Lukius ni, Yason ni, Sosipater ni, onnga jeska rua onnga Yahudi, bera ruisu iwa tein.

²² Didif dufoka Tertius. Didif bera onnga dufij Paulus fogora dugu keingg mar gij surat egens kef nou Ofa. Didif tein duisu iwa oisouska Tuhan ofoka.

²³ Gayus tein oisu iwa. Ofa bera ofij didif fogora dingker gij efen mod. Noba ofa tein ofij rusnok Kristen jah sif jeskaseda rumohoturuma gij efen mod. Noba Erastus onnga ot joug kota insa kef efen fifi, ofa tein oisu iwa. Noba mefmen mohuj Kwartus, ofa tein oisu iwa.

²⁴ (Didif duis gu mifmin Tuhan Yesus Kristus jeskaseda Ofa eita oufamofa eteb gu iwa nomnaga. Ainsoma.)

²⁵ Didif dudou os jeskaseda Allah esma ofoka onnga aksa eteb. Jeska oisouska efen oga onnga oufamofa onnga didif difesij gu rusnok fob, noba oisouska efen oga onnga osok gij Yesus Kristus, bera Ofa omofij rusnok jeskaseda ruroru Ofa rot tenten ojgomuja. Sis fob, oga insa koma osok gij Yesus Kristus bera ah jejema jeska rusnok gij mona onnga dektek fob. Tina ebeibeyaif bera Allah oncunc rot oga insa koma gu rusnok fob.

²⁶ Ofa oncunc oga insa koma rot koisoisa oisouska mar onnga nabi-nabi runggu gij Mar Efeyi Ebsi sis fob. Noba oisouska Allah, onnga anggot rot mar insa kef, bera rusnok rimfesij rot efen oga insa koma gij monuh nomnaga jeskaseda rusnok rumororu efen oga onnga oufamofa insa koma. Beda rua tein rimeita mar jeni efen oga insa koma ojgomuja.

²⁷ Allah bera efen odou onnga ebriyi gij mar erek eteb ekirsa jeska rusnok nomnaga ojgomu. Noba didif dudou os jeskaseda Ofa esma ofoka onnga aksa eteb rot mona onnga ah aibin ojgomuja oisouska Yesus Kristus. Ainsoma.

1 Korintus

1 ¹ Surat kef jeska didif Paulus. Didif bera erek rasul egens onggga Yesus Kristus oncunc fob. Ofa oncunc didif erek koma jeni Allah odou os rot. Noba mifmin muhuj Sostenes tein eneker morototuma jera didif jah sif.

² Iwa bera irek rusnok onggga Allah efen noba onggga imohoturuma gij kota Korintus. Noba didif dagot gu iwa oida Allah eita yeyin idou onggga egens morototuma jera Yesus Kristus fob, fogora iwa irek Ofa efen rusnok onggga idou ebsi komowa fob. Ofa eita mar koma gu rusnok gij monuh enjgineg tein onggga rumohoturuma jeskaseda rugif gu mifmin Tuhan Yesus Kristus onggga rua tein ruis erek rerin Tuhan.

³ Magef mam maiteij jeskaseda mifmin mika Allah jera mifmin Tuhan Yesus Kristus geita oufamofa eteb gu iwa ojgomuja. Noba magef tein mam maiteij jeskaseda Allah eita eiteij ah onggga eskeiramera gu iwa onggga ingker gij kota Korintus.

⁴ Didif duis oufamofa eteb gu Allah rot iwa ojgomuja. Jeska oisouska efen oufamofa onggga Ofa eita gu iwa fob, bera iwa inroru Yesus Kristus fob.

⁵ Noba, Jeska iwa iroru Ofa fob, jefeda Ofa omfij iwa gij mar ofoukou fob. Koma bera, Ofa omfij iwa jeskaseda ita idou efesis fogora ijginaga rot teinefa ifesij mar osok gij Ofa gu rusnok enjgineg. Noba Ofa tein omfij iwa jeskaseda idou ebriyi gij rot efen oga.

⁶ Jeska Allah bera onggga oncunc rot mar nomnaga onggga memef moftuftu gu iwa rot sis bera fob osok

Ofa oida mar koma bera erek tenten ojomu. Jefeda iwa inroru Kristus fob.

⁷ Noba askesi iwa yug moroju rot mona onnga Tuhan Yesus Kristus ongksons en, beda yeyin owesa efek nomnaga onnga Efena Ebsi Allah eita gu rusnok nomnaga fob onnga rururu Yesus ojomu.

⁸ Noba Allah emeita idou ahais ojomuja onjoros mona onnga mifmin Tuhan Yesus Kristus ongksons en fob. Beda gij mona insa koma bera Allah enek yeyin mar onnga oska egema tein jinaga guru.

⁹ Mimif mijginaga rot mar insa koma jeska Allah omotunggom mar nomnaga onnga Ofa anggot rot si. Noba Ofa bera onnga oncunc iwa jeskaseda ijerek egens jera Yesus Kristus onnga erek mimif Tuhan efen efesa.

¹⁰ Edohuji, didif duis gu iwa oisouska mifmin Tuhan Yesus Kristus efen owesa efek jeskaseda iwa inoga omosokuma noba inemekebema rot ebic egens efen ebirfaga onnga ofoka aksa ekirsa jeska ebic egema efen guru. Tina onnga oufa bera iwa ita idou egens rot mar onnga iwa insujohu osok gij Yesus efen oga ojomu. Noba iwa tein yuitij moguma fogora ita mar rot idou egens. Jeska koma bera onnga eita Allah odou eskeiramera rot ojomu.

¹¹ Didif dinagot mar insa kef gu iwa jeska rusnok rineya onnga mod etma Kloe ranggot gu didif oida ineya jeska iwa ifekesa bera yuga omosokuma ojomuja.

¹² Koma bera, ineya jeska iwa ifekesa yagot oida, "Memef mororu Paulus ojomu." Noba ineya yagot oida, "Memef mororu Apolos ojomu." Noba ineya yagot oida, "Memef mororu Kefas." Noba ineya yagot

oida, "Memef bera onnga mororu Kristus rot tenten ojomu noba iwa bera guru."

¹³ Wah! Enadaij nou iwa ikeba Kristus dogdog rot ebic egens egens erek koma jinaga guru! Noba didif Paulus tein dinagos tumu mega salib nou iwa guru. Noba iwa ineita baptis jeskasada ijerek ebic egens onnga iroru didif ojomu guru.

¹⁴ Didif disinsa dita baptis gu Krispus gonu Gayus ojomu, noba dineita baptis gu rusnok rineya jeska iwa guru.

¹⁵ Jefeda enadaij nou rineya ragot oida didif dita baptis gu rusnok jeskasada rua ruroru didif ojomu guru.

¹⁶ (Yo tenten, didif dita baptis gu Stefanus jera efen rusnok onnga ringker jera ofa tein. Tina didif dudou enah keingg rot rineya onnga didif dita baptis gu rua guru.)

¹⁷ Didif dita baptis gu rusnok oskiyai ojomu, jeska Kristus onobk didif jeskasada dita baptis gu rusnok nomnaga guru. Tina onnga tenten bera, Ofa obk didif jeskasada dagot rot Allah efen oga onnga oufamofa ojomu. Noba didif dinera duga onnga rusnok enjgineg rusujohu oida dudou erek efesis eteb rot guru. Tina didif dira duga onnga erek giskini ojomu. Didif dita erek koma jeskasada mar onnga didif dimfesij rot Allah oga osok gij Yesus, onnga anggos tumu mega salib, bera onnga oroku rua rudou skoita Yesus fogora ruroru Ofa tein.

¹⁸ Erek koma jeska gij mona onnga rusnok, onnga rimeja jah mahmei, bera rig rot oida Yesus agos tumu mega salib jeskasada osuwa mimif jeska mifmin mar onnga oska fob, beda rua rusujohu oida mucuwei mar rot ojomu. Tina gij mona onnga mimif mig rot

oga onnga oufamofa insa koma, beda koma orocunc rot owesa efek eteb onnga Allah eita gu mimif fob.

¹⁹ Koma jeni erek mar onnga Allah anggot gij Mar Efeyi Ebsi sis fob oida, "Didif dumohoda rot mar onnga rusnok rusujohu gij rudou efesi onnga erek efesis eteb fogora orowora ojgomu. Noba Didif dumohoda rot mar onnga rusnok rusujohu bera rudou ebriyi eteb gij fogora emeseiseifa rot rua ojgomu si."

²⁰ Jeska mar onnga rusnok mebif runsujohu rot oisouska rerin rudou onnga efesis eteb bera onofoufem skoita Allah guru. Noba rusnok onnga runsujohu oida rerin rudou erek efesis eteb gij hukum agama Yahudi, beda Allah osujohu rot oida rua tein bera erek mar onnga onofoufem skoita Ofa guru. Noba rusnok onnga runsujohu oida ruga emesedema rot rudou onnga ebriyi eteb gij, beda Allah osujohu oida rua tein bera erek mar onnga onofoufem skoita Ofa guru.

²¹ Jeska rusnok mebif rusujohu rot oida rua rita rudou egens jera Allah oisouska risinsa rerin rudou efesi ojgomu. Tina Allah efen odou onnga efesis eteb ekirsa fogora onorons erek koma guru. Noba rusnok mebif rusujohu rot oida oga onnga oufamofa osok gij Yesus Kristus bera erek ocuwei mar ojgomu. Tina oga onnga oufamofa koma bera onnga Allah ocunc oisouska efen odou onnga ongnoska jeskaseda osuwa rusnok jeska rerin mar onnga oska nomnaga.

²² Rua onnga Yahudi rusujohu rot oida oga onnga oufamofa insa koma bera erek ocuwei mar ojgomu. Jeska rua ruis oida rusnok rutunggom mar onswos sismeni fog jeskaseda rik gu riteij fogora rumororu. Noba rua onnga Yahudi guru rusujohu rot oida oga

ongga oufamofa insa koma bera erek ocuwei mar ojgomu. Jeska erek rusnok enjgineg rimera rudou onggga efesis eteb rot fogora rucunc rot mar koma efen ofou jeni ojgomu, beda rua rumororu.

²³ Erek koma, tina memef mefesij rot oida, Yesus Kristus anggos tumu mega salib jeskaseda osuwa mimif jeska mifmin mar onggga oska. Tina oga onggga oufamofa insa kef bera erek mamu onggga rua onggga Yahudi rukockoreta rot. Rua rukockoreta rot jeska rudou onororu oga onggga oufamofa insa koma guru. Noba rua onggga Yahudi guru rusujohu rot oida oga insa koma bera erek ocuwei mar ojgomu.

²⁴ Tina Allah oncunc rusnok rufoukou erek efen rusnok fob. Rineya erek rua onggga erek Yahudi jera rineya onggga erek Yahudi guru tein. Noba gij mona onggga rua insa koma rig rot oga insa koma osok gij Yesus Kristus, beda rudou ebriyi gij rot oida Allah oncunc efen owesa efek eteb gu rua fob. Noba rua tein rudou ebriyi gij rot oida Allah efen odou onggga efesis eteb ekirsa jeska mar nomnaga.

²⁵ Jeska gij mona juens bera rusnok mebif rusujohu rot oida mar onggga Allah ontunggom bera erek ocuwei mar ojgomu. Tina onggga tenten bera, mar onggga Ofa ontunggom insa koma orocunc rot oida Ofa efen odou onggga efesis eteb ekirsa jeska rusnok nomnaga. Noba gij mona juens bera rusnok mebif rusujohu rot oida Allah onowesa efek eteb guru. Tina onggga tenten bera Allah efen owesa efek onggga eteb ekirsa jeska rusnok nomnaga.

²⁶ Edohuji, iwa idou ah keingg rot mar onggga rusnok enjgineg runsujohu rot iwa gij mona onggga Allah enjeka gu iwa erek efen rusnok sismeni fob. Gij mona insa koma bera rua rusujohu rot oida rineya

jeska iwa bera rudou osumsumu ojgomu. Noba rua rusujohu oida rineya jeska iwa bera runowesa efek tein guru. Noba rua rusujohu oida rineya jeska iwa bera runofoka aksa tein guru.

²⁷ Tina Allah bera oncunc iwa insa koma nomnaga erek efen rusnok fob. Ofa otunggom mar erek koma jeskaseda rusnok onnga runororu Ofa guru, jera rusnok onnga rusujohu rot oida rudou ebriyi eteb gij mar fob bera mojen rua rot ojgomu. Noba Allah bera onnga oncunc rua insa koma onnga rusnok enjgineg rusujohu rot oida runowesa efek guru. Ofa oncunc rua insa koma jeskaseda rusnok onnga runororu Ofa guru, noba onnga rufra risinsa rufoka erek aksa bera mojen rua rot ojgomu.

²⁸ Allah oncunc rua insa koma onnga rusnok enjgineg rusujohu rot oida runofoka aksa guru ni, jera rua onnga rusnok enjgineg ruga oruh rua ni, jera rua onnga runowesa efek guru ni. Ofa oncunc rua insa koma nomnaga jeskaseda rija erek Ofa efen rusnok ojgomu. Noba Ofa otunggom mar insa koma jeskaseda mar nomnaga onnga rusnok mebif risinsa runsujohu rot onnga erek ofoufem bera orowora rot ojgomu.

²⁹ Ofa ontunggom mar insa koma nomnaga jeskaseda enadaj nou rusnok egema tein risitit risinsa rufoka rot oida Allah oncunc rua tein erek efen rusnok guru.

³⁰ Tina Allah bera onnga eita idou onnga egens jera Yesus Kristus fob. Noba iwa isma idou erek koma oisouska mar onnga Yesus Kristus ontunggom fob. Beda oisouska mar koma bera mifmin mudou ebriyi gij rot teinefa Allah efen odou onnga efesis eteb. Noba mifmin mudou ebriyi gij mar insa koma jeska

Yesus bera onnga Allah onobk jeskaseda ofij mimif fogora oskotu mimif jeska mifmin mar onnga oska fob. Erek koma jefeda mimif misma mudou onnga efen mar onnga oska oskiyai tein guru fob, tina onnga ebsi komowa ojgomu.

³¹ Runggu gij Mar Efeyi Ebsi rot oida, "Rua onnga rudou os rifaga ouka, beda rinefaga ouka rot risinsa guru, tina rua rifaga ouka rot Allah efen ofoka ojgomu."

2¹ Edohuji, gij mona onnga didif dinsaga keingg iwa jeskaseda dagot rot Allah oga onnga Ofa ocunc gu mimif sismeni fob, beda dinera duga onnga rusnok rusujohu oida dudou bera erek efeis eteb rot guru. Noba didif dinera duga onnga erek onkoska eteb tein guru. Tina didif dagot mar oisouska duga onnga erek giskini ojgomu.

² Jeska gij mona insa koma bera didif dudou os dimagot rot mar ofoka egens gu iwa ojgomu. Mar ofoka egens koma bera osok gij Yesus Kristus, noba rot teinefa Ofa anggos tumu mega salib nou mimif fob.

³ Erek koma noba gij mona insa koma bera didif dunoisum gij disinsa dedin owesa efek jinaga guru. Jeska didif dedin owesa efek enadaj nou guru. Tina didif din skoita iwa rot dudou onnga eriaga ni, dudou onnga emeesa ni, noba dudou onnga osousoyu ojgomu.

⁴ Noba mar onnga didif danggot gu iwa ni, era mar onnga didif dumftuftu gu iwa ni, bera enen jeska dudou onnga efeis eteb jeskaseda duroku idou fogora imoruru Yesus guru. Tina Efena Ebsi Allah bera ocunc rot efen owesa efek gu iwa oisouska mar

ongga didif danggot fogora iwa ijginaga rot oida oga koma bera en jeska Allah fob.

⁵ Didif dutunggom erek koma jeskaseda mar onggga iwa ingg fogora iroru Yesus rot bera en jeska Allah oga ojgomu. Noba oga koma enen jeska rusnok onggga rudou ebriyi eteb gij mar jinaga guru.

⁶ Erek koma tina, gij mona onggga memef moftuftu rusnok onggga ruroru Yesus rot tenten fob, beda memef moftuftu rot modou onggga ebriyi eteb gij ojgomu. Tina mar onggga modou ebriyi gij kef bera enen jeska rusnok mebif guru. Noba koma bera enen jeska rusnok onggga rufoka aksa onggga rudou ebriyi eteb gij tein jinaga guru. Jeska Allah omohoda rot rua insa koma rerin riteij ah nomnaga gij mona onggga Yesus ongksons en fob, fogora omorowora ojgomuja.

⁷ Noba mar onggga memef moftuftu oisouska modou onggga ebriyi gij bera en jeska Allah efen odou onggga ebriyi gij mar ojgomu. Sis dojunmeni bera mar onggga Allah ensejah nou efen rusnok angh jejema jeska rua ros. Noba Ofa ensejah mar insa koma sis mona onggga Ofa onotunggom mebif jera mebaga tein enesi. Beda Ofa esejah mar insa koma jeskaseda gij mona kahma, beda Ofa emeita ofoka eteb gu mimif nomnaga onggga erek efen rusnok si.

⁸ Noba rusnok ebirfager rinejginaga rot teinefa Allah efen odou onggga ebriyi eteb gij erek koma enesi, jeska rudou onoroun Yesus Kristus guru. Mimif mijginaga rot erek koma jeska rua tein erek runtob mifmin Tuhan, onggga ofoka aksa eteb, tumu mega salib sis fob. Jefeda koma orocunc rot oida rua rinejginaga rot Allah efen odou onggga ebriyi eteb gij mar enesi.

⁹ Noba koma jeni erek mar egens onnga Allah anggot rot gij Mar Efeyi Ebsi erek kef oida, "Rusnok egens ai tein rinejginaga rot guru era rinereneni rot tein guru osok gij mar onnga oufamofa onnga Allah ensejah nou efen rusnok onnga rudou okora rot Ofa."

¹⁰ Erek koma, tina Allah bera oncunc rot mar insa koma nomnaga gu mimif oisouska Efena Ebsi fob. Jeska Efena Ebsi bera eyajga joug fogora ejginaga rot mar insa koma nomnaga efen ofou onnga okum. Noba rusnok rudou enebriyi gij mar insa koma guru.

¹¹ Jeska osnok egens esinsiyai tein bera ejginaga rot meidu onnga ah gij esinsa efen odou efesi ojgomu, noba rusnok enjgineg bera guru. Erek koma tein, Efena Ebsi Allah esinsiyai ojgomu bera ejginaga rot mar onnga angh gij Allah odou efesi ojgomu, noba rusnok enjgineg bera guru.

¹² Erek koma tein, mimif munoruru mar koma onnga rusnok mebif rudou ebriyi gij guru. Tina mimif mururu mar koma onnga Efena Ebsi Allah onocunc gu mimif jeskaseda mudou ebriyi gij mar insa koma onnga Allah eita gu mimif rot odou onnga eskeira fob.

¹³ Erek koma jefeda, mar koma onnga memef manggot rot bera onoruru meidu onnga rusnok mebif ruftuftu rot rudou onnga efesis jinaga guru. Tina mar koma onnga manggot rot bera oisouska meidu onnga Efena Ebsi oftuftu gu memef sis fob ojgomu. Jefeda memef mera oga insa koma onnga Efena Ebsi oftuftu gu memef fob, fogora moroftuftu rot mar nomnaga onnga Allah ondou os otunggom nou mimif ojgomu.

¹⁴ Erek osnok egens onoruru Yesus rot tenten guru fogora Efena Ebsi eneker gij odou efesi guru, beda ofa bera onnga okoja mar koma onnga Efena Ebsi

Allah omftuftu gu mimif fob. Ofa eita mar erek koma jeska ofa osujohu rot oida mar koma bera erek oska ojgomu. Noba ofa tein onodou ebriyi gij mar koma jinaga guru. Jeska oisouska Efena Ebsi Allah onnga angh gij mudou efesi fob bera rusnok rudou emebriyi gij mar onnga en jeska Allah si.

¹⁵ Erek koma, tina rua onnga Efena Ebsi engker gij rudou efesi bera rudou ebriyi gij mar insa kef nomnaga fob. Tina rua onnga Efena Ebsi eneker gij rudou efesi guru, rua bera rudou enebriyi gij mar insa koma fogora runoga ojga rot rusnok insa koma guru.

¹⁶ Erek koma jeska runggu gij Mar Efeyi Ebsi oida, "Osnok egens ai tein enejginaga rot mar onnga Tuhan osujohu rot gij efen odou efesi jinaga guru. Jefeda enadaij nou rusnok risisi joug Ofa rot mar guru." Erek koma tina, mimif onnga muroru Yesus fob bera misma mudou onnga musujohu rot mar morototuma erek Yesus Kristus odou osujohu rot mar ojgomu.

3 ¹ Edohuji, gij mona onnga didif dingker jera iwa sis fob bera didif danggot mar gu iwa erek rusnok onnga ruroru mar onnga Efena Ebsi oncunc gu rua rot ahais fob. Jeska gij mona insa koma bera iwa iroru Yesus Kristus erek efeinah ros. Jefeda didif duftuftu mar gu iwa erek rusnok onnga ruroru mar onnga rudou eftirir keingg ros ojgomu. Didif dita mar erek koma jeska iwa iroru Kristus erek efeinah ros, noba idou enebriyi eteb gij Allah oga rot tenten enesi.

² Giskini bera rusnok rineita marska gu rerin riser onnga riferatefa ros guru. Tina rua rita mengk gu riferatefa koma ojgomu. Erek koma tein, didif duftuftu iwa rot mar onnga ai erek osufou ojgomu. Noba erek enadaij nou eferatefa et marska enesi,

beda erek koma tein didif dunoftuftu mar onnga okum gu iwa enesi. Jeska iwa idou enebriyi gij mar erek eteb enesi.

³ Didif dita mar erek koma jeska iwa iroru mar oska onnga idou eftirir keingg ojgomuja ros. Koma erek, idou emejiseima noba yuga omosokuma tein. Noba mar koma bera onnga ocunc rot oida iwa iroru mar onnga oska ros morototuma erek rusnok onnga runororu Kristus guru.

⁴ Jeska gij mona onnga iwa yuga omosokuma erek kef oida, "Memef mororu mar onnga Paulus oftuftu ojgomu," era rineya ragot oida, "Memef mororu mar onnga Apolos oftuftu ojgomu." Beda koma orocunc rot oida iwa ita mar erek rusnok onnga runororu Yesus guru roso.

⁵ Erek koma tein, iwa idou ah keingg rot oida didif jera Apolos bera erek masnok giskini onnga maftuftu mar rot Allah oga ojgomu. Noba jeska magef maftuftu rot Allah oga gu iwa, jefeda iwa iroru Kristus fob. Magef bera matunggom mar onnga Allah oncunc gu magef ojgomu morototuma erek rusnok enjineg onnga runtunggom mar onnga Allah oncunc gu rua tein fob.

⁶ Didif bera onnga duftuftu Allah oga rot sismeni gu iwa onnga Korintus erek osnok egens onnga sismeni erefa marsi gij mekeni. Noba Apolos bera onnga en okahma noba oftuftu iwa rot Allah oga deika, erek osnok egens en okahma noba era mei eres marsi insa koma. Erek koma tina iwa idou ebriyi gij Allah oga insa koma oisouska Allah esinsiyai onnga ofij iwa rot tein. Koma erek Ofa ofij marsi insa koma jeskaseda er ojgomuja.

⁷ Jefeda didif onnga duftuoftu osok gij Allah oga rot sismeni, era Apolos onnga en okahma noba oftuftu rot Allah oga deika bera onofoufem guru. Koma erek osnok egens onnga erefa marsi era osnok egens onnga era mei eres marsi koma onofoufem tein guru. Tina Allah esinsiyai bera onnga ofoufem. Jeska oisouska Ofa onnga onofij iwa bera idou ebriyi gij efen oga insa koma fogora iroru ojgomuja.

⁸ Jefeda osnok egens erefa marsi gij efen mekeni noba osnok egens eneya era mei eres marsi insa koma, tina mar onnga gegeka tein gontunggom koma bera erek gegeka tein ofoufem. Noba goga gemesma gegang gofons ororu jeni mar onnga gontunggom fob. Koma bera, goga gemet maat jeska mekeni insa koma si. Erek koma tein, memef onnga mefarur morototuma rot Allah oga bera memesma mefmen mofons jeska Allah ororu jeni mar onnga montunggom nou Ofa fob.

⁹ Erek koma jeskasada iwa ijginaga rot oida memef nomnaga onnga moftuftu rot Allah oga bera erek morototuma ojgomu. Jeska memef mefarur rot Allah noba nou mesinsa bera guru. Noba erek osnok egens efen mekeni onnga rusnok enjgineg rimfarur gij, beda iwa tein bera erek mekeni onnga osnok egens efen, noba onnga rusnok enjgineg rimfarur gij.

¹⁰ Iwa tein bera erek mod egens onnga Allah ei nou esinsa fob. Noba didif bera erek osnok egens onnga Allah obk rot odou oufamofa jeskasada duftuoftu osok gij efen oga rot iskusk gu iwa tein. Noba gij mona onnga osnok egens esejah mar jeskasada ei mod onnga efeinah, beda sismeni bera ofa erefa mowuj mosu rot iskusk fog. Erek koma tein, didif din jeskasada duftuoftu mar onnga sismeni osok gij Allah

oga rot iskusk gu iwa. Noba erek rusnok egema tein rin noba rufra mod koma efen efeb gij, erek koma tein rusnok egema tein rin noba ruftuftu rot Allah oga deika gu iwa. Erek koma tina, erek osnok egens eisisi keingg esinsa rot teinefa ofa ei mod koma, beda orofosut osnok egens egens tein eisisi keingg esinsa rot teinefa ofa oftuftu rot Allah oga gu rusnok.

¹¹ Rusnok onnga rirefa mowuj mosu bera rinei mod egeka gij guru. Erek koma tein, rua onnga ruftuftu rot Allah oga bera ragot rot mar ofoka egens ojomu. Ofoka egens koma osok gij Yesus Kristus. Ofa bera erek mowuj mosu nou mod onnga Allah efen.

¹² Rusnok rineya rira mar onnga ah aibin erek emas ni, perak ni, mamu onnga eirirber ni jeskasada rirei mod. Noba rusnok rineya rira mar onnga enah aibin guru erek mega mohaha esda jeskasada rirei mod.

¹³ Noba gij mona onnga mah et mod gegeka tein, beda mah koma omorocunc rot mar onnga rira nou rirei mod koma bera erek ah aibin era gurei. Erek koma rot mar onnga rusnok ruftuftu rot Allah oga. Jeska Allah efen eisa omorocunc rot oida tenten ei era gurei. Ofa efen mah bera emerani rot tein fogora omorocunc rot mar onnga orofosut osnok egens egens omftuftu rot efen oga fob si.

¹⁴ Noba gij mona onnga mah et mod onnga ahais tina eneseiseifa jinaga guru, beda erek koma tein rusnok onnga rumftuftu osok gij Allah oga rot tenten fob bera rimesma rerin rufons rot si.

¹⁵ Tina erek mod egens onnga mah ereni tina eseiseifa ojomu, beda erek koma tein rusnok onnga runoftuftu osok gij Allah oga rot tenten rerin rufons emeseiseifa si. Tina rua risinsa rumosuwa jeska Allah efen mah insa koma ojomu.

¹⁶ Didif dudou os disisi keingg iwa rot oida iwa bera erek mod egens onnga Allah ei nou esinsa ojomu. Jeska Efena Ebsi Allah bera engker gij idou efesi.

¹⁷ Jefeda erek rusnok rineya ruftuftu rot mar onnga tenten guru fogora rusnok enjgineg risiri gij mar onnga oska ojomu, beda Allah omofra mar okum eteb keingg rua onnga ruftuftu mar insa koma si. Jeska Allah efen mod egens koma onnga ebsi komowa ojomu. Noba iwa bera onnga erek Ofa efen mod egens koma.

¹⁸ Iwa inesitit isinsa ifaga rot oida idou ebriyi eteb gij mar fob guru. Jeska koma erek iwa ihurmei mar gu isinsa ojomu. Jefeda iwa ineita idou onnga ebriyi gij mar ororu jeni mar onnga rusnok mebif rudou ebriyi gij guru. Erek iwa inororu mar morototuma erek rua ruroru guru, beda rua rumosujohu rot oida iwa idou osumsumu ojomu. Skoidu, iwa irons rot ojomu. Irons rot mar koma jeskaseda iwa isma idou efesi onnga ebriyi gij mar onnga erek Allah odou ebriyi gij mar ojomu.

¹⁹ Jeska rusnok mebif rusujohu rot oida rudou ebriyi eteb gij mar. Tina ahah Allah eiteij bera koma erek rua rucuwei mar ojomu. Mimif mijginaga erek koma jeska runggu gij Mar Efeyi Ebsi sis fob oida, "Oisouska mar onnga rusnok mebif rutunggom rot rudou onnga ebriyi gij mar bera Allah ocunc rot oida rua rudou osumsumu rot mar ojomu."

²⁰ Noba mar egema tein onnga runggu gij Mar Efeyi Ebsi agot erek kef oida, "Allah ejginaga rot oida mar onnga rusnok mebif runsujohu rot rudou onnga ebriyi gij mar bera onoufij rua oskiyai tein jinaga guru."

²¹ Erek koma jefeda iwa inofra yeyin ebirfaga Mod Ari egens onnga iwa isujohu oida efen ofoka aksa

ekirsa jeska egema efen ebirfaga guru. Jeska yeyin ebirfager jera mar nomnaga onggga angh gu iwa bera jeskaseda ofij iwa ojgomu.

²² Koma erek, didif Paulus ni, Apolos ni, Kefas ni, mar nomnaga onggga Allah ontunggom gu mebif jera mebaga ni, yeyin iteij ah ni, era erek yanggos ni, mar nomnaga onggga iwa ik ebeibeyaif jera mar onggga imek jah mona kahma tein ni, mar koma nomnaga bera ah jeskaseda ofij iwa ojgomu.

²³ Noba iwa bera onggga irek Yesus Kristus efen rusnok. Noba Ofa bera onggga en jeska Allah.

4¹ Ere koma jefeda erek rusnok rusujohu rot oida memef bera erek rusnok onggga rumfij Yesus Kristus ojgomu, beda koma bera oufa. Jeska memef tein bera erek rusnok onggga Allah oncunc fob jeskaseda moftuflu rot efen oga onggga ah jejema jeska rusnok sis fob.

² Giskini, erek rusnok rucunc osnok egens jeskaseda otunggom mar onggga ofoufem nou rua, beda ofa omotunggom mar koma rot odou onggga ocosu efei ahta ojgomu.

³ Ere koma tein, didif duntunggom mar nou Allah rot dudou onggga ocosu efei ahta fob. Tina, erek iwa onggga Korintus era hakim agama egens tein ijeka joug didif osok gij mar onggga duntunggom nou Allah fob, beda koma onofoufem skoita didif guru. Noba didif dinemeesa rot koma tein guru. Didif tein dinejeka joug disinsa rot mar insa koma tein guru.

⁴ Noba erek didif dusujohu rot oida didif duntunggom mar onggga oska oskiyai tein guru, beda koma onorocunc rot mar egema tein erek tenten jinaga guru. Jeska Tuhan esinsiyai bera onggga

oga ojga rot oida didif duntunggom mar onnga oska fob ei era gurei.

⁵ Erek koma jefeda enadaij nou iwa isinsa yuga ojga rot mar onnga yeyin ebirfager era mar onnga rusnok egema tein runtunggom fob guru. Jeska gij mona onnga Tuhan ongksons en fob, beda Ofa omoga ojga rot mar onnga rusnok nomnaga runtunggom fob si.

⁶ Edohuji, mar onnga didif dimfesij gu iwa insa koma nomnaga bera erek orocunc egens osok gij didif jera Apolos tein. Didif dimfesij rot mar insa koma jeskaseda durofij iwa rot tein. Noba erek iwa iroru mar onnga iwa ingk magef mantunggom fob, beda iwa tein imofokor gij mar egens kef onnga angh gij Mar Efeyi Ebsi oida, "Inofra osnok egens erek ekirsa jeska osnok egema tein guru." Iwa iroru oga insa koma fogora inofra yeyin ebirfager erek ekirsa jeska rineya rerin ebirfager guru.

⁷ Noba rineya jeska iwa bera risitit risinsa rufoka oida rerin owesa efek adaij nou rucunc rot Guru-Guru onnga ofoufem ekirsa jeska Guru-Guru enjgineg. Erek tenten ei, beda Allah bera onnga emeita rerin owesa efek insa koma jera mar nomnaga gu rua koma ojgomu. Noba jeska Allah bera onnga eita owesa efek insa koma gu rua fob, jefeda enadaij nou rua risitit risinsa rufoka rot mar onnga rua rutunggom jinaga guru.

⁸ Iwa isujohu rot oida yeyin owesa efek adaij fob ei? Noba Allah eita mar nomnaga onnga erek adaij gu iwa fob ei? Noba iwa isujohu rot oida ifoka aksa fob ei fogora ifoka ereij keingg mar nomnaga fob ei? Noba inocosu rot oida memef onnga rasul-rasul moftuftu mar gu iwa deika gurei? Mar koma nomnaga tenten ei! Yo, memef tein modou os rot mar insa koma

jeskaseda memef tein mesma mofoka onnga aksa fogora mofoka ereij keingg morototuma jera iwa ei?

⁹Tina iwa ineita mar erek koma jinaga enesi. Jeska ahah didif diteij bera Allah oncunc memef onnga rasul erek rusnok onnga runok rufoka gij guru. Noba rusnok enjgineg rusujohu oida memef bera erek masusur onnga enadaij nou rifena ebah deika guru. Noba malaikat-malaikat jera rusnok mebif nomnaga riajga joug mar nomnaga onnga encirej memef fob. Jefeda memef bera mejerek rusnok onnga rusnok enjgineg tein runtut rot ojomu.

¹⁰Rusnok enjgineg rusujohu rot oida memef onnga rasul bera erek modou osumsumu ojomu jeska memef mororu Yesus Kristus efen oga ojomuja. Tina iwa isujohu rot oida, jeska iwa iroru Yesus Kristus fob, jefeda iwa bera yeyin idou onnga efesis eteb rot mar nomnaga ei? Noba memefo bera gurei? Erek koma noba rusnok enjgineg rusujohu oida memef bera erek monowesa efek guru. Tina iwa isujohu rot oida iwa bera yeyin owesa efek eteb ei? Rusnok enjgineg rudou oska rot memef, tina rua rugif gu iwa ojomu ei?

¹¹Onjoros mona deisef bera mosona ongak memef ni, magon en memef ni, meisoufa enadaij nou memef guru ni, rusnok rubu memef ni. Noba memef bera erek rusnok onnga ricira rourou jeska rerin monuh era mod egema nou ringker gij egema tein guru.

¹²Memef meij mofora efek rot mar onnga moncosu rot ojomuja. Noba gij mona onnga rusnok ruga oruh memef, beda memef magot mar onnga oufamofa sons gu rua ojomu. Noba gij mona onnga rusnok rita efera okora gu memef tein, beda memef moin

keingg modou efesi rot ahais noba menesesa mar onnga oska sons gu rua rot guru.

¹³ Noba gij mona onnga rusnok ranggot mar onnga oska skoita memef, beda memef magot mar onnga oufamofa sons gu rua ojgomu. Erek koma noba onjoros mona deisef tein bera rusnok rusujohu rot oida memef merek mar onnga oska efekeifa ojgomu.

¹⁴ Didif dunogu mar gij surat egens kef gu iwa jeskaseda mojenen iwa rot eteb erek koma guru. Tina onnga tenten bera didif dunogu mar gij surat egens kef jeskaseda direisisi joug iwa erek didif disisi joug disinsa dedin edeser onnga dudou okora eteb rot ojgomu.

¹⁵ Didif dagot erek koma jeska yeyin Guru-Guru rufoukou onnga ruftuftu iwa rot Yesus Kristus efen oga tein. Tina didif jera Yesus Kristus ojgomu bera merek yeyin ika. Erek koma jeska didif bera onnga duftuftu iwa rot Allah efen oga osok gij Yesus Kristus fogora imoruru Ofa fob.

¹⁶ Jefeda, didif duis rot dudou eteb gu iwa jeskaseda iwa ita mar koisoisa erek didif duncunc gu iwa sis fob ojgomuja.

¹⁷ Erek koma jefeda didif dumobk Timotius skoita iwa jeskaseda ofij iwa gij mar onnga duncunc rot gij surat egens kef fob. Ofa bera erek dedin edesa onnga dudou okora eteb rot noba onnga ororu Yesus Kristus rot tenten fob. Noba ofa tein bera erek osnok egens onnga omfij Tuhan rot tenten ojgomuja. Ofa emeisisi keingg iwa rot teinefa didif dita mar erek osnok egens onnga ororu Yesus Kristus rot tenten fob. Didif tein dita mar koisoisa jeni meidu onnga didif duftuftu gu orofosut osnok egens egens onnga rumohoturuma rot Allah oga ojgomu.

¹⁸ Rineya jeska iwa rusujohu oida didif dinen skoita iwa guru, jeska erek dimeesa rot rua ei. Jefeda rua risitit rot risinsa rufoka rot oida rua bera erek ofoufem ekirsa ojgomu.

¹⁹ Erek koma, tina erek Allah ondou os rot beda didif dimen skoita iwa rot ebeirens si. Noba gij mona onggga didif dinsaga jah suma fob, beda didif dumohca touj rua insa koma onggga risitit risinsa rufoka fogora dimek rot oida rerin owesa efek onggga tenten ei, era rua ruga efeyei rot ojgomu ei?

²⁰ Didif dagot erek koma jeska Allah onocunc gu rusnok enjgineg rot oida Ofa ofoka ereij keingg mimif gij mudou efesi oisouska mar onggga mimif manggot rot ojgomu guru. Tina Ofa oncunc rot oida Ofa ofoka ereij keingg mimif gij mudou efesi oisouska mar onggga mimif mutunggom rot owesa efek jeska Ofa ojgomu.

²¹ Erek koma jefeda iwa isinsa imocunc rot teinefa iwa idou os jeskaseda didif duftufts mar gu iwa gij mona onggga dinsaga jah suma fob. Jeska erek iwa inoruru mar jeni onggga duncunc gu iwa sis fob enesi, beda didif dumoftufts iwa rot ahais deika erek meka egens onggga oftufufts efen efesa rot ahais doska. Tina erek iwa iroru jeni mar koma onggga dumftufts rot gu iwa sis fob, beda didif dumoftufts iwa rot dudou onggga eriaga eteb rot iwa, erek meka onggga oftufufts efen efesa rot odou eriaga eteb.

5¹ Rusnok rufoukou jeska iwa rifesij mar moguma rot osnok egens onggga ontunggom mar onggga oska efekeifa jah gu iwa ifekesa fob. Beda ebeibeyaif didif tein dig rot mar insa koma fob. Koma bera, osnok egens ensiri morototuma jera meka efen mohona fob. Noba koma bera oska ekirsa jeska mar

ongga rusnok ongg runororu Allah guru rutunggom ojjomu.

²Erek koma tina iwa isitit ifaga ojjomu jeska iwa isujohu rot oida mar nomnaga ongg angh gu ifekesa bera erek oufamofa ros ojjomu. Tina ongg tenten bera iwa ita idou ongg okumkum rot mar ongg oska egens koma ongg ofa ontunggom jah gu ifekesa ojjomu. Jefeda gij mona ongg iwa imohoturuma jeskaseda yugif gu Allah, beda yukoja ofa ojjomu, noba ineramecinma jera ofa deika guru.

³Ainsa kef didif diker yes jeska iwa, tina mar ongg didif dunsujohu rot bera osok gij iwa ojjomuja. Noba didif duga ojga rot gij dudou efesi osok gij meidu iwa itunggom rot osnok egens koma efen mar ongg oska.

⁴Iwa itunggom erek mar kef: Iwa imohoturuma oisouska owesa efek jeska Tuhan Yesus jera oisouska meidu ongg iwa ijginaga didif dunsujohu rot ojjomu. Beda iwa ira owesa efek koma jeska Yesus Kristus fogora

⁵yukoja ofa koma jeska ifekesa. Beda yaha ofa gu Bilis ojjomu jeskaseda Bilis eita efera okora eteb gu ofa rot ojjomu. Beda ofa emeesa joug efen mar ongg oska insa koma. Noba gij mona ongg Tuhan ongksons en, beda Ofa enei osnok egens koma jah mahmei guru.

⁶Iwa isitit isinsa ifaga rot oida yeyin idou ongg ororu Yesus Kristus rot tenten fob ei. Erek koma tina iwa tein irons rot osnok egens koma jeskaseda otunggom mar ongg oska eteb jah gu ifekesa tein ojjomuja. Koma bera erek oska eteb. Jeska iwa ijginaga rot oida erek rusnok raha roti efed oskiyai gij roti, beda koma omorok mokcin roti koma nomnaga.

Erek koma tein, erek rusnok Mod Ari egens rurons rot mar onggga oska onggga osnok egens insa koma ontunggom fob, beda mar onggga oska insa koma bera omorok mokcin rusnok Mod Ari nomnaga ojgomuja.

⁷Jefeda erek rusnok onggga Yahudi rij roti efed nomnaga jeska rerin mod gij mona onggga Paskah jeskaseda onorok mokcin rerin roti guru, beda iwa tein inorons rot mar onggga oska insa koma onggga angh gu ifekesa jinaga guru. Jeska mar koma bera erek mifmin erebent onggga ensis. Tina iwa ij mar onggga oska insa koma jeska ifekesa ojgomu jeskaseda yeyin ebic egens onggga erek ebsi komowa tuturu ojgomu. Jeska koma bera erek yeyin erebent onggga efeinah. Iwa ita mar erek koma, jeska Allah oncunc iwa fob erek efen rusnok onggga rerin mar onggga oska egema deika guru. Noba erek rusnok Yahudi riris domba efer egens gij mona onggga Paskah jeskaseda Allah ocunc rua erek rusnok onggga rerin mar onggga oska guru, beda Yesus tein bera onggga erek mifmin domba efer. Jeska Ofa anggos tumu mega salib jeskaseda Allah osuna rot mifmin mar onggga oska jeska mudou efesi.

⁸Jefeda erek rusnok Yahudi rudou efaga ouka gij mona onggga Paskah omoisa, beda mimif tein mudou efaga ouka rot mar koma onggga Kristus ontunggom nou mimif fob. Noba mimif munorons rot mar onggga oska oskiyai tein jera mar onggga ofogog egema tein guru jeskaseda mar koma onorok mokcin mudou efesi guru. Tina mimif mita miteij ah onggga ebsi komowa noba onggga oufa ojgomuja.

⁹ Didif dunggu gij surat egens gu iwa sis fob rot oida iwa ineramecinma jera runer era rujager onnga risiri morototuma erek ebireira guru.

¹⁰ Tina didif dinagot oida iwa ineramecinma jera rusnok egema onnga runougif gu Allah guru noba onnga risiri morototuma erek ebireira ni, era onnga rudou eftirir keingg mar ofoukou ni, era onnga ruokrusa mar jeska rusnok ni, era onnga rugif gu mar onnga enjineg ni, guru. Didif dinagot erek koma guru. Jeska erek didif danggot mar erek koma beda koma erek iwa ija jeska mebif nomnaga rot ojgomu. Jeska rusnok onnga rutunggom mar erek insa koma bera riker gij mifekesa ojgomuja.

¹¹ Tina mar onnga didif danggot gij surat egens insa koma sis fob bera oida iwa ineramecinma jera rusnok onnga ragot oida rua bera Kristen fob, tina rua risiri morototuma erek ebireira ni, era rudou eftirir keingg mar ofoukou ni, era rugif gu mar onnga tenten guru ni, era ruhurmei mar gij rusnok enjineg ni, era ribirfaga erebibe rot mofut efei ni, era ruokrusa rusnok enjineg ni, onnga ragot oida rua bera Kristen, tina rua rita mar erek insa koma. Noba koma bera erek oska ekirsa jeska rusnok mebif onnga rita mar erek insa koma. Jefeda iwa inet maat morototuma jera rua tein jinaga guru.

¹² Didif dunoga ojga rot rusnok insa koma onnga runougif gu Allah guru. Jeska Allah esinsa bera onnga omoga ojga rot rua ojgomu. Tina erek iwa yuga ojga rot rusnok rufogog koma onnga ringker jah ifekesa, beda koma bera oufa ojgomu. Jeska runggu gij Mar Efeyi Ebsi oida, "Iwa ikemeji osnok egens onnga ofogog jeska ifekesa ojgomu."

¹³ (5:12)

6¹ Teinefa fogora iwa inoku ifos rot yeyin mar oga era mar okowu onnga angh gij ifekesa fogora imorka mar koma skoita hakim erek komo. Jeska hakim koma bera erek rusnok onnga runougif gu Allah guru. Onnga tenten bera iwa onnga Kristen imohoturuma noba yuga ojga rot yeyin mar koma gu isinsa ojgomu.

² Iwa inodou ofoj joug rot guru oida mimif onnga Kristen mumoga ojga rot rusnok mebif nomnaga rerin rita mar onnga oska si. Mimif mumotunggom mar koma morototuma jera Yesus gij mona onnga Ofa ongksons en. Jefeda erek iwa yuga ojga rot yeyin mar oga onnga angh gu ifekesa gu isinsa ojgomu, beda koma bera erek mar onnga osufou nou iwa ojgomu.

³ Dugun deika, gij mona onnga Yesus ongksons en fob, beda mimif tein mumoga ojga rot malaikat-malaikat tein rerin rita mar onnga oska si. Noba mar koma bera ofoufem ekirsa jeska yeyin mar oga jera mar okowu insa koma onnga angh gu ifekesa. Jefeda erek iwa yuga ojga rot yeyin mar oga jera mar okowu onnga angh jah isinsa ifekesa, beda koma bera erek osufou ojgomu

⁴ Erek yeyin ebirfager Mod Ari rudou eskes jefeda runoga ojga rot mar insa koma guru, beda yeyin rusnok onnga erek runofoka aksa guru bera ruga ojga rot mar insa koma ojgomu. Jeska rua risinsa tein bera rudou efesis ekirsa jeska hakim koma onnga runougif gu Allah guru rot mar insa koma ojgomu.

⁵ Didif dinagot rot mar insa kef jeskaseda duh mojen gu iwa ojgomu. Jeska erek yeyin rusnok onnga rudou efesis nou bera erek runofoukou guru, tina didif dusujohu rot oida erek osnok egens ai era egeka jah

suma bera adaij nou oga ojga rot yeyin mar jah suma ei?

⁶Tina iwa ineita mar erek koma tein guri! Jeska iwa orohrus yeyin ihuj egens jeska ifekesa skoita hakim rot efen mar okowu ojgomu. Noba onnga oska ekirsa bera, hakim koma bera erek rua onnga runougif gu Allah guru!

⁷Mar oga jera mar okowu insa koma onnga ah gu ifekesa bera orocunc rot oida mar onnga iwa insujohu rot gij idou efesi bera erek oska ros. Jefeda erek idou eskes fogora yunoga ojga rot yeyin mar okowu insa koma guru, beda iwa irons mar oga jera mar okowu insa koma ah ojgomu. Noba inorka mar koma skoita hakim insa koma tein guru. Jeska koma bera erek oska ekirsa.

⁸Tina iwa intunggom mar onnga oska ekirsa deika, jeska iwa bera onnga yucuwei mar fogora irokrusa yeyin yuhujir onnga ruroru Yesus tein.

⁹Iwa inejginaga rot oida rusnok onnga rita mar onnga oska bera runoira morototuma jera Allah efen rusnok gij mona onnga Ofa ofoka ereij keingg rusnok nomnaga fob guru ei! Enadaij nou iwa yucuwei mar gu isinsa erek koma guru. Jeska rusnok onnga risiri morototuma ni, rugif gu mar onnga tenten guru ni, risiri rot egema efen mohona ni, runer onnga ruckahtah rot runer enjgineg fogora risiri morototuma rot fifi ni,

¹⁰rusnok onnga rukoreka mar ni, rudou eftirir keingg mareibra ofoukou ni, ribirfaga erebibe rot mofut efeyi ni, ruhurmei mar gij rusnok enjgineg ni, ruokrusa rusnok rot rerin mareibra ni, rua koma nomnaga bera runoira jera Allah efen rusnok gij

mona onggaga Ofa ofoka ereij keingg rusnok nomnaga jinaga guru.

¹¹ Noba rineya jeska iwa bera rita mar erek koma sis roso. Tina Allah ontunggom iwa erek rusnok onggaga rudou ebsi komowa fob. Noba iwa tein ija erek rusnok onggaga Allah esinsa efen ojgomu. Jefeda ebeibeyaif Allah osujohu rot oida iwa bera erek rusnok onggaga rerin mar onggaga oska oskiyai tein guru. Noba iwa inja erek koma oisouska mar onggaga Tuhan Yesus Kristus ontunggom tumu mega salib nou iwa jera oisouska Efena Ebsi Allah onggaga engker gij idou efesi tein.

¹² Sis fob bera iwa ingg rot mar onggaga didif danggot erek kef oida, "Allah onsuwa didif jeska dedin mar onggaga oska fob. Jefeda adaij nou didif duroru mar meidu onggaga dudou os rot ojgomu." Erek koma tina, mar nomnaga onggaga didif dudou os rot bera erek eneya onoufa eteb nou didif tein guru. Jefeda erek didif dutunggom mar ebireira onggaga dudou osos rot noba onggaga enekirsa jeska Allah oga guru, beda koma bera onoska guru. Tina didif dunorons rot mar egema tein oroku dudou efesi skoita mar erek koma ojgomuja guru.

¹³ Erek koma tina rineya jeska iwa ragot rot mar egens onggaga orocunc erek kef oida, "Allah ontunggom maat nou mutkonu, noba Ofa ontunggom mutkonu nou maat. Noba gij mona kahma bera Allah omohoda mar insa koma nomnaga fogora omorowora rot ojgomu." Iwa ira mar onggaga orocunc erek insa koma fogora isujohu rot oida adaij nou iwa ita mar ebireira onggaga idou osos rot ojgomu. Tina koma erek isiri morototuma jera rujager ebireira tein! Noba koma bera erek oska eteb fob. Allah bera ontunggom mifmin mutkonu nou maat. Tina Ofa

onotunggom mifaga jeskaseda mita mar ebireira rot ojgomuja guru. Ofa ontunggom mifaga jeskaseda murofij Tuhan esinsiyai ojgomu. Noba Ofa, onnga erek mifmin Tuhan, bera ofoka ereij keingg mifmin mifaga tein ojgomu.

¹⁴Erek koma noba oisouska Allah efen owesa efek bera Ofa omfra Tuhan Yesus jeska agos fob. Noba oisouska efen owesa efek insa koma beda Ofa omofra mimif tein jeska manggos si. Jefeda enadaij nou mimif mutunggom mar ebireira onnga mudou os rot mifmin mifaga ojgomuja guru.

¹⁵Idou ah keingg rot oida yeyin idou bera injerek egens jera Kristus fob. Jefeda ebeibeyaif Ofa bera onnga ofoka ereij keingg iwa jera yeyin ifaga tein. Erek koma jefeda erek osnok egens onnga efen efaga onnga Yesus ofoka ereij keingg fob bera esiri morototuma jera rujaga onnga rija motu rot fifi, beda koma bera erek oska eteb fob! Tina iwa inosujohu erek koma guri.

¹⁶Beda iwa idou ah keingg rot oida erek orna egens esiri rot rujaga rija motu egens, beda koma erek godou morototuma erek egens tein. Noba mimif mijginaga rot erek koma jeska runggu gij Mar Efeyi Ebsi rot oida, "Gij mona onnga orna egens jera efen mohona gefaga erek egens beda godou efesi tein eja morototuma erek egens."

¹⁷Tina gij mona onnga osnok egens odou eja erek egens morototuma jera Tuhan, beda ofa efen efena tein eja erek egens jera Efena Ebsi Allah.

¹⁸Erek koma jefeda iwa ibes ifaga jeska mar onnga oska efekeifa erek insiri morototuma ojgomu. Jeska mar onnga oska koma onnga rusnok runtunggom bera enecirej rerin rifaga ojgomu guru. Tina mar

koma bera encirej rerin rudou efesi tein. Noba koma enadaij nou guru. Jeska rudou efesi bera erek egens jera Kristus fob.

¹⁹ Iwa ijginaga rot fob oida ifaga bera erek mod egens onnga Efena Ebsi Allah engker gij. Noba Allah esinsa bera onnga ombk Efena Ebsi koma skoita iwa fob. Jefeda yeyin ifaga koma bera nou isinsa guru, tina ifaga koma bera nou Allah esinsiyai ojgomu.

²⁰ Allah era mar onnga efen efera osok eteb fogora erengk iwa fob. Noba mar onnga efen efera osok koma bera Yesus Kristus onnga anggos tumu mega salib nou iwa erek koma. Jefeda iwa ira ifaga onnga ongnoska rot mar koma ojgomu fogora irougif gu Allah gij mar koma nomnaga.

7¹ Ebeibeyaif didif dimagot gu iwa osok gij mar onnga iwa injeka gu didif rot sis fob. Sis fob bera iwa injeka gu didif rot oida, "Runer onnga ruroru Yesus fob bera ruskotu arja ei, era runoskotu arja gurei." Didif dusujohu rot oida erek orna egens onoskotu arja enesi, beda koma bera oufa. Beda ofa efen efekesa nou ofij Allah ojgomu.

² Tina rusnok rufoukou jah suma risiri morototuma ojgomuja. Jefeda onnga oufa bera runer ruskotu arja ojgomu jeskaseda rudou efesi onockahtah rot rujager onnga ebireira guru. Noba rujager tein rahi igers ojgomu.

³ Erek koma tein, erek orna egens odou os rot oida efaga eja erek egens jera efen mohona, beda efen mohona koma tein ougif gu efen mahina rot ojgomu. Noba erek ojaga egens odou os oida efaga eja erek egens jera efen mahina, beda efen mahina koma ougif gu efen mohona rot tein ojgomu.

⁴Jeska mohona efen efaga koma nou esinsa ojgomu guru, tina efen efaga koma nou mahina tein. Noba mahina tein efen efaga nou esinsa ojgomu guru, tina efen efaga koma nou mohona tein.

⁵Erek koma jefeda mahina onokoja mohona rot onnga odou os gefaga gemerek egens guru. Noba mohona tein onokoja mahina rot onnga odou os gefaga gemerek egens guru. Tina erek gegeka tein goitij rot oida gemekebema nou mona onnga estir ojgomu jeskaseda gom geiteij gu Allah gij mona insa koma, beda koma adaij nou tein. Noba, nou onnga mona insa koma oisa fob, beda goga goksons noba gerek egens deika jeskaseda enadaij nou Bilis enereni goga gij godou efesi fogora gesiri morototuma jera rujager era runer enjineg bera guru.

⁶Mar onnga didif danggot rot insa kef bera enerek mar onnga duga eris rot guru, tina didif duitij rot ojgomu.

⁷Tina onnga tenten bera didif dusujohu rot oida oufa nou iwa nomnaga tein ita mar erek didif fogora dunoskotu arja guru. Tina koma bera oisouska owesa efek onnga en jeska Allah rot ojgomu. Noba rusnok nomnaga rineita owesa efek erek koma jeskaseda runomoskotuma guru. Jeska Allah eita owesa efek gu orofosut osnok egens egens jeni mar onnga rua rutunggom onnga erek toga jeska egema efen.

⁸Didif dudou os disisi joug iwa onnga inoskotu arja enesi ni, jera iwa onnga ija mesina ni, jeskaseda iwa nomnaga ita mar erek didif fogora inomoskotuma deika guru. Beda iwa yeyin efekesa nou yufij Tuhan ojgomu.

⁹Tina erek idou enahais rot mar insa koma guru, beda iwa imoskotuma ojgomu. Jeska koma bera oufa

ekirsa rot runer onnga rudou eftirir keingg rujager era rujager onnga rudou eftirir keingg runer ojgomuja.

¹⁰ Noba didif dudou os dagot mar gu iwa onnga imoskotuma fob. Iwa onnga yujager inokoja yeyin yahiner guru. Didif disinsiyai bera dinagot rot mar insa koma ojgomu guru, jeska Tuhan esinsa tein bera anggot rot mar koma sis fob.

¹¹ Tina erek rineya jeska iwa rukoja rot mar onnga didif danggot insa koma fogora rua rija jeska rerin rahiner ojgomu, beda enadaj nou rua rahi igers onnga efeinah deika guru. Tina guru, beda rua ruksons skoita rerin rahiner onnga sismeni insa koma sons ojgomu. Noba iwa onnga yuskotu arja fob bera iwa inebes yeyin yuhoner tein jeska iwa guru.

¹² Rot iwa onnga yuskotu arja onnga runororu Yesus Kristus enesi bera dimagot rot mar ai egens ojgomu. Noba mar egens kef bera Tuhan esinsa enagot rot guru, tina didif onnga direk rasul egens bera disisi joug iwa rot ojgomu. Mar egens koma bera, erek yeyin yuhoner onnga runororu Kristus enesi, tina rua ruitij rot oida riker morototuma jera iwa ros, beda iwa inebes rua guru.

¹³ Erek koma tein, erek iwa onnga yahi igers jera runer onnga runororu Yesus Kristus enesi, noba rua ruitij rot oida riker morototuma jera iwa ros, beda iwa inaha rua koma jah guru.

¹⁴ Jeska yeyin yahiner insa koma onnga runororu Kristus enesi bera rudou erek egens jera iwa onnga iroru Yesus fob. Jefeda ahah Allah eiteij bera rua rudou erek ebsi komowa oisouska iwa onnga iroru Yesus fob ojgomu. Erek koma tein rot yeyin yuhoner onnga runororu Kristus enesi. Jeska ahah Allah eiteij bera rua tein rerin rudou ebsi komowa oisouska iwa

ongga iroru Yesus fob. Ere koma bera tenten guru, beda rusnok enjgineg ramosujohu rot oida yeyin iser erek rusnok onggga oska efekeifa ojjgomu. Tina ahah Allah eiteij bera yeyin iser tein rerin rudou onggga ebsi komowa morototuma jera iwa onggga iroru Yesus fob ojjgomu.

¹⁵ Tina erek yeyin yuhoner era yahiner onggga runororu Kristus enesi, noba rua rudou os ribes rerin ruhoner era raha rahiner onggga ruroru Kristus fob, beda iwa yuitij rot mar koma ojjgomu. Koma onoska guru, jeska Allah oitij rot jeskaseda mimif onggga Kristen miker rot miteij ah onggga eskeiramera ojjgomu.

¹⁶ Tina didif dagot rot oida iwa inebes yeyin yahiner insa koma onggga runororu Yesus enesi guru. Jeska oisouska mar onggga iwa yumftuftu rot bera rua rimekikif jeska rerin mar onggga oska ei era gurei. Iwa inejginaga rot guru.

¹⁷ Ere koma jefeda rusnok nomnaga onggga ruroru Yesus fob bera rineferwei mar onggga angh gu rua gij mona onggga rua runororu Yesus Kristus enesi fob. Koma erek rua onggga runskotu arja fob ei era runoskotu arja enesi ei, jera mar onggga rua rimfarur gij tein. Jeska mar koma bera onggga Allah oncunc gu rua sis fob. Kef bera onggga didif danggot rot gu rusnok nomnaga onggga rumohoturuma oisouska Kristus ofoka.

¹⁸ Ere rineya jeska iwa onggga riris rufom mareij ofos jeska fob gij mona onggga rua runororu Yesus enesi, beda rerin mar koma ah ojjgomu. Noba rinereni jeskaseda riferwei mar koma guru. Noba rineya onggga rineris rufom mareij ofos jeska guru gij mona onggga rua runororu Yesus enesi, beda rua rerin mar

koma ah gu rua tein erek koma ojomu. Noba rua rinereni jeskaseda riris rufom mareij ofos jeska guru.

¹⁹ Jeska ahah Allah eiteij bera mar onnga rusnok rutunggom gu rerin rufom mareij ofos onofoufem eteb Ofa guru. Tina mar onnga ofoufem skoita Ofa bera erek rusnok ruroru mar onnga Ofa anggot rot ojomu.

²⁰ Jefeda rusnok nomnaga onnga ruroru Yesus fob bera rineferwei mar koma onnga angh gu rua gij mona onnga rua runororu Yesus Kristus enesi erek insa koma guru.

²¹ Sis fob rineya jeska iwa bera rirek rusnok onnga rumfij rerin ebirfager ojomuja. Erek koma tina, rudou onokum rot mar koma guru. Rua riker gij rerin mar onnga rimfarur gij erek insa koma ojomu. Tina erek rerin ebirfaga egens oitij rot onsuwa rua ojomu, beda rua rita efekesa koma fogora rija jeska ofa ojomu.

²² Tina guru, beda riker gij rerin mar onnga rimfarur insa koma ojomu. Jeska Tuhan onsuwa rua onnga rumfij tein jeska rerin mar onnga oska fob. Erek koma noba rusnok onnga runt gu risinsa fob bera rinjerek rusnok onnga rumfij rerin ebirfaga Yesus Kristus tein fob.

²³ Jeska Allah bera erek mar onnga efera osok eteb fogora erengk iwa nomnaga fob. Mar onnga efera osok koma insa koma bera Yesus Kristus onnga anggos tumu mega salib nou iwa fob. Jefeda iwa ineita mar jeskaseda rusnok risitit yeyin ifoka rot ojomu guru. Tina onnga ofoufem bera iwa ireneni rot ahais jeskaseda itunggom mar onnga ereita Allah odou eskeiramera eteb rot iwa ojomu.

²⁴ Erek koma jefeda edohuji, iwa ita idou egens morototuma jera Allah ojomu, noba iroru mar koma onnga ah gu iwa sis mona onnga iwa inororu Yesus Kristus enesi.

²⁵ Ebeibeyaif didif dumoroun mar sons gu ruforoka rifes osok gij mar onnga iwa injeka gu didif rot sis fob. Mar koma bera osok gij ruforoker jera rujower onnga runomoskotuma enesi. Noba mar egens kef bera Tuhan enagot rot gu didif guru. Tina jeska Tuhan ocunc efen odou onnga oufamofa eteb skoita didif fob, jefeda didif dusujohu rot oida iwa tein ita idou onnga eskeiramera rot mar onnga ai juens dimeisisi joug gu iwa rot gij surat egens kef.

²⁶ Gij mona insa kef bera mar okum ah keingg mimif nomnaga onnga muroru Yesus Kristus fob. Erek koma jefeda didif dusujohu rot oida, erek rineya jeska iwa onnga rumoskotuma fob era enesei, beda rua nomnaga riker erek koma ojomuja.

²⁷ Noba rineya jeska iwa onnga ruskotu arja fob, beda rua runohca moroju jeskaseda ribes rerin ruhoner jeska rua guru. Erek koma tein, rineya jeska iwa onnga runoskotu arja enesi, beda rua rinesejah jeskaseda rumoskotu arja ebeirens enesi.

²⁸ Tina erek rua insa koma rujoskotu arja ojomu, beda koma enerek mar onnga oska guru. Noba erek rujower onnga rinahi igers enesi, tina rua rudou os rahi igers ojomu, beda koma tein enerek mar onnga oska guru. Erek koma tina, rusnok onnga rudou os rumoskotuma ojomu bera rimeita rifeira okora ekirsa rot mar koma onnga ah keingg mimif nomnaga gij mona insa kef. Jefeda didif disisi joug iwa rot mar insa koma jeskaseda mar okum koma enecirej iwa erek ekirsa guru.

²⁹ Edohuji, didif dusujohu rot oida mifmin mona onnga ofoukou deika guru. Jefeda gij mona onnga estir kef bera rua onnga runskotu arja fob rudou enerebibe rot mar ofoukou onnga rudou efeneinei rot osok gij rerin riteij ah kef ojgomuja guru. Tina rua rinsejah rudou efesi rot mar onnga ofoufem gij mona insa kef tein morototuma erek runer onnga runskotu arja enesi rinsejah nou mar onnga ofoufem tein ojgomuja.

³⁰ Erek koma tein rusnok rudou enerebibe rot mar okum onnga ereita rudou ebisa rot ojgomuja guru ni, rudou enerebibe rot mar onnga ereita rudou efaga ouka eteb rot ojgomuja guru ni, rusnok onnga ringk mareibra ofoukou bera rudou enerebibe rot rerin mareibra koma ojgomuja guru ni.

³¹ Rusnok rudou enerebibe rot mar onnga rua rij rufora efek rot gij rerin riteij ah kef ojgomu guru ni. Erek koma jeska mar insa koma nomnaga onnga angh gu miteij ah kef bera emeseiseifa ojgomu. Jefeda idou enerebibe rot mar insa koma nomnaga tein ojgomuja guru.

³² Didif dudou os rot oida iwa onnga yuskotu arja fob bera yusuwa isinsa jeska mar okum koma onnga angh keingg rusnok nomnaga onnga ruskotu arja fob. Rusnok onnga runskotu arja enesi bera rudou osujohu rot mar onnga ofoufem skoita Tuhan ojgomu. Jeska rua rudou os rutunggom mar onnga eita Tuhan odou eskeiramera rot ojgomuja.

³³ Erek koma tina rusnok onnga ruskotu arja fob bera rudou erebibe rot mar onnga angh gu mebif ojgomu. Jeska rua rudou os rutunggom mar onnga eita ruhoner rudou eskeiramera rot ojgomu.

³⁴Jefeda mar onnga angh gu mebif bera eita rudou eremesesma jera mar onnga erek ofoufem skoita Allah ojomu. Noba rujager onnga rinahi igers guru, era rujower onnga rinahi igers enesi bera rudou osujohu rot mar onnga ofoufem skoita Allah ojomuja. Jeska rua rudou os rutunggom mar rot rudou ongkamos onnga ereita Tuhan odou eskeiramera rot ojomu. Tina rujager onnga ranghi igers fob bera rusujohu rot mar onnga mebif efen ojomu, jeska rua rudou os rutunggom mar onnga ereita rahiner rudou eskeiramera rot ojomu.

³⁵Didif dinagot mar insa kef jeskaseda diragou joug mar onnga iwa indou os rot guru. Tina didif dagot rot mar insa kef jeskaseda durofij iwa. Beda iwa imotunggom mar onnga oufamofa noba onnga eneremesesma rot mar onnga ofoufem skoita Tuhan Allah guru.

³⁶Erek koma noba erek orna egens osujohu rot oida erek mona ofoukou fob, tina ofa eneita mar jeni onnga ofa anngen rot efen osroj enesi. Noba rusnok egema tein rudou os riradgodu goga jeskaseda gefaga erek egens ebeirens. Beda orna egens koma eita mar onnga ofa esinsa osujohu rot bera erek oufa ojomu fogora gegeka tein gomoskotuma ojomu. Mar onnga ofa ontunggom koma bera enerek oska guru.

³⁷Tina erek orna egens esinsa oga ojga rot oida ofa onoskotu efen osroj enesi, noba rusnok enjgineg runoftu ofa rot erek koma guru, beda adaij nou ofa eita mar jeni erek esinsa odou os rot ojomu. Jefeda erek ofa onoskotu efen osroj insa koma enesi, beda osroj egens koma eker nou ojomu. Mar onnga ofa ontunggom insa koma tein bera erek oufa.

³⁸ Ere koma jefeda, gij mona kef onnga mar okum ah keingg mimif ojomu, beda runer koma onnga ruskotu rerin rusroj fob bera rutunggom mar onnga erek oufamofa. Tina mar onnga erek oufamofa ekirsa jeska koma bera runer runoskotu rerin rusroj enesi.

³⁹ Ere ojaga egens onnga anghi igers fob, beda ofa eker erek orna egens koma efen mohona ojomu. Tina erek efen mahina koma anggos jeska fob, beda adaij nou ojaga egens koma ahi igers efeinah deika. Tina ofa ahi igers jera orna egens onnga ororu Tuhan Yesus fob ojomu.

⁴⁰ Ere koma tina, erek ojaga egens enahi igers jera mahina efeinah egema deika guru, beda didif disinsa dusujohu rot oida ofa bera odou erirei eteb ekirsa rot tein. Noba didif dusujohu rot oida Efena Ebsi Allah oitij rot mar insa koma tein fob.

8¹ Ebeibeyaif didif dudou os disisi joug iwa osok gij mar egens onnga iwa injeka gu didif rot sis fob. Koma bera osok gij maat onnga rusnok enjgineg rira jeskaseda rirejiteyi gu mar onnga tenten guru. Mimif onnga Kristen nomnaga rijginaga rot oida mar koma onnga rusnok rugif gu bera erek oska ojomu. Tina jeska mimif onnga Kristen rijginaga rot fob, jefeda rineya risitit risinsa rifaga rot ojomu. Tina onnga oufamofa eteb bera rua rita rudou onnga okora rot rusnok insa koma ojomu noba rufij rua jeskaseda rua tein ruroru Tuhan rot tenten ojomu.

² Rusnok rineya risitit risinsa rufoka rot oida rudou ebriyi eteb gij mar nomnaga onnga erek adaij fob. Tina koma bera orocunc rot oida rudou enebriyi gij mar rot tenten enesi.

³ Ere koma tina erek rusnok rudou okora rot Allah, beda ahah Allah eiteij bera rusnok koma rerin rudou

ongga ebriyi gij mar rot tenten fob. Fogora rua rijginaga rot koisoisa osok gij mar onggga tenten jera mar onggga tenten guru.

⁴Jefeda ebeibeyaif didif dimagot rot marska onggga rusnok enjgineg rira jeskaseda rirejiteyi gu mar onggga tenten guru. Koma bera mimif tein mit marska insa koma ei, era gurei? Mimif nomnaga mijginaga rot oida mar ofoukou onggga rusnok enjgineg rugif gu jah mebaga jera mebif tein bera erek tenten guru. Jeska Allah esinsiyai bera erek Allah egens ojgomu.

⁵Erek koma tina rusnok enjgineg rusujohu rot oida mar ofoukou onggga rua rugif gu onggga angh gu mebaga jera mebif tein bera tenten ojgomu. (Rua rusujohu rot oida mar ofoukou koma bera erek rerin Allah era rerin Tuhan).

⁶Tina mimif mijginaga rot oida Allah onggga erek mika bera egens ojgomu. Ofa bera onggga ontunggom mar nomnaga. Noba Ofa otunggom mimif tein jeskaseda mija erek efen rusnok. Noba mimif mijginaga rot oida Tuhan bera erek egens ojgomu. Ofa bera Yesus Kristus. Noba oisouska Ofa bera mar nomnaga enahuma. Noba oisouska Ofa bera mimif mita miteij ah tein.

⁷Erek koma tina rusnok onggga Kristen rineya bera rudou enebriyi gij mar insa koma rot koisoisa enesi. Jeska rua rijekjeka rudou rot mar insa koma onggga rusnok rugif gu ros. Jefeda onjoros deisef tein bera gij mona onggga rua rit marska insa koma, beda rua rusujohu rot oida rua tein rita mar onggga oska morototuma jera rusnok onggga rira marska koma jeskaseda rirejiteyi gu mar onggga tenten guru fob. Rua rusujohu rot erek koma jeska rua rudou eineina gij rot mar onggga oufamofa jera mar onggga oska ros.

⁸Erek mimif mit maat eneya erek koma, noba mukoja maat eneya, beda mar koma bera onoroun mimif doida Allah guru. Noba ahah Allah eiteij bera maat onnga mimif mit fob onotunggom mimif erek rusnok onnga oufamofa era rusnok onnga oska jinaga guru.

⁹Jefeda adaj nou iwa it maat meidu onnga iwa idou os rot ojgomu. Tina onnga ofoufem bera iwa yut joug idou efesi rot maat onnga iwa it jeskaseda mar koma bera onotunggom rusnok enjgineg risiri gij mar onnga rua rusujohu bera erek oska guru. Koma bera rot rusnok Kristen onnga rudou eineina gij rot mar onnga oufamofa jera mar onnga oska ros.

¹⁰Jeska gij mona onnga iwa ija jah mod onnga rusnok ruhu marska insa koma onnga rusnok rira jeskaseda rirejiteyi gu mar onnga tenten guru, beda iwa imengk marska insa fogora it. Tina erek rusnok Kristen enjgineg onnga rudou eineina gij rot mar insa koma ros rik tumu iwa, beda rua tein rimengk noba rimet marska insa koma. Tina gij rudou efesi bera rua rusujohu rot oida rua runtunggom mar onnga erek oska rot ojgomu.

¹¹Jefeda mar insa koma onnga iwa intunggom rot idou onnga eskeira ojgomu bera onnga orotunggom yeyin yuhujir koma onnga rudou enahais rot enesi fogora rua risiri gij mar onnga rua rusujohu bera erek oska ojgomuja. Noba Kristus bera enagos tumu mega salib nou rua insa koma tein.

¹²Jefeda mar onnga iwa ita koma bera erek iwa ita mar onnga oska skoita yeyin yuhujir onnga rudou enahais rot mar enesi ojgomu. Noba koma tein bera erek iwa ita mar onnga oska skoita Yesus Kristus ojgomu.

¹³ Erek koma jefeda, erek mar egens ongga didif dit bera orotunggom dedin edohuj egens fogora ofa ensiri gij mar ongga ofa osujohu bera erek oska, beda didif dinet mar koma deika guru. Didif dinet mar koma guru jeskasada dedin edohuj egens koma enesiri gij mar koma ongga ofa osujohu bera erek oska guru.

9¹ Erek koma noba rot mar ongga oska ongga rusnok enjgineg ranggot rot didif fob bera duroun gu rua rot mar erek kef: Rusnok enjgineg ragot oida didif bera enerek rasul egens ongga tenten guru. Tina didif bera dik Yesus Kristus gu diteij fob, fogora dinjerek rasul egens ongga tenten ojgomu. Noba iwa ijginaga rot oida mar koma bera erek tenten ojgomu. Jeska oisouska mar ongga didif dumftuftu jah gu iwa ifekesa bera rusnok rik rot oida didif dimfarur gij mar nou Tuhan erek efen rasul egens fob si.

²(9:1)

³(9:1)

⁴ Jefeda memef ongga rasul bera mosujohu rot oida adaij nou iwa yufij memef tein rot maat gij mona ongga memef memfarur nou Tuhan gu ifekesa.

⁵ Noba adaij nou mefmen mohoner tein ongga ruroru Yesus fob jeskasada ruroru memef jah suma. Jeska rasul enjgineg jera Tuhan efen mokosa jera Petrus tein bera ruroun rerin ruhoner morototuma ojgomu.

⁶ Era, erek iwa osujohu rot oida didif jera Barnabas bera mafarur rot mar ongga macosu rot ojgomu, noba rua ongga rasul rineya bera gurei.

⁷ Tentarer runohca fifi sismeni fog jeskasada rifarur gij rerin mar erek tentarer guru. Tina rusnok enjgineg rita mar insa koma gu rua erek rerin rufons rot

ojgomu. Noba osnok egens onggga emfarur gij mekeni bera ejginaga rot oida ofa tein emeita maat jeska mekeni koma ojgomu si. Noba osnok egens onggga emfa sapi bera emesma marska jeska sapi insa koma si. Jefeda teinefa rot memef onggga memfarur nou Tuhan jah gu ifekeso.

⁸ Mar onggga rusnok mebif rusujohu rot bera erek koma ojgomu. Tina mar onggga didif danggot ainsa koma bera angh gij Mar Efeyi Ebsi tein fob.

⁹ Jeska Musa anggot rot hukum egens erek kef oida, "Askesi sapi emfarur ros, beda rusnok runoku maat jeska sapi koma awesi guru." Noba Allah enagot rot mar insa koma gu Musa jeska odou okora rot sapi koma ojgomu guru.

¹⁰ Ongga tenten bera Ofa anggot rot mar insa koma erek orocunc nou mimif nomnaga. Jeska gij mona onggga rusnok rif mar gij mekeni, beda rudou ot rot oida rua rimesma maat jeska mekeni koma si.

¹¹ Jefeda didif dusujohu rot oida erek memef momftuftu iwa rot Allah oga fob, jefeda adaij nou memef mesma mar erek maat tein jeska iwa rot ojgomu.

¹² Erek rusnok rineya rusujohu rot oida rua rimesma maat jeska iwa si, beda adaij nou memef, onggga moftuftu mar jah gu iwa ifekesa rot sismeni, misma tein ojgomu. Memef mefmen owesa efek jeskaseda mesma maat jeska iwa, tina memef meneradgodu iwa rot guru. Ongga tenten bera memef moin keingg modou efesi rot ahais gij mona onggga memef mocosu rot mar ojgomu. Memef meita mar erek koma jeskaseda meneragou joug iwa erek oskiyai rot moroju onggga omoroun iwa skoita Yesus Kristus efen oga onggga oufamofa tein guru.

¹³ Edohuji, iwa ijginaga rot fob oida rusnok onnga rufij imam-imam Yahudi gij Mod Allah efesi bera risma maat jeska rusnok onnga rurka maat skoita Mod Allah ojgomu. Noba imam-imam onnga riris marska insa koma esij mebera erek mar onnga rurougif gu Allah rot bera rit marska insa koma eneya tein ojgomu si.

¹⁴ Erek koma tein sis fob bera Tuhan anggot rot oida rusnok onnga rurka Allah oga onnga oufamofa skoita rusnok enjgineg bera rimesma rufons jeska rusnok insa koma tein ojgomu.

¹⁵ Didif tein dedin owesa efek erek rasul egens jeskaseda risma mar insa koma tein, tina didif dineradgodu iwa rot jinaga guru. Jeska erek didif dui gu iwa rot fifi era mareibra beda enadaij nou didif difesij gu rusnok enjgineg rot oida didif dimfarur jah gu ifekesa jeskaseda dufij iwa ojgomu erek koma guru. Noba koma bera erek mar egens onnga didif dudou erirei rot ojgomu.

¹⁶ Erek koma tina, gij mona onnga didif duftuftu rot Allah oga onnga oufamofa gu iwa, beda enadaij nou didif disitit disinsa difaga rot guru. Jeska Yesus Kristus bera onnga ombk didif jeskaseda dutunggom mar koma. Noba erek didif dunororu mar koma guru, beda mar okum emen skoita didif rot.

¹⁷ Erek didif duftuftu rot Allah oga jeska disinsiyai dudou os rot ojgomu, beda didif dumois rot dedin dufons skoita rusnok ojgomu. Tina didif dineita mar erek koma guru, jeska Yesus Kristus bera onnga ombk didif jeskaseda difesij rot efen oga gu rusnok. Noba didif dutunggom mar erek koma rot iskusk ojgomuja.

¹⁸ Ere koma jefeda didif duftuoftu rot Allah oga onnga oufamofa ojgomuja. Noba didif dinera dedin owesa efek erek rasul egens fogora durois gu rusnok rot mareibra eneya guru. Didif dumfij iwa jeni Yesus Kristus ondou os rot ojgomu, noba dunois rot mar egema tein jeska iwa rot guru. Koma bera onnga ereita dudou efesi erirei rot morototuma erek rusnok rudou erirei gij mona onnga risma rerin rufons.

¹⁹ Didif dut gu disinsa jefeda enadaij nou rusnok enjineg tein rubk didif rot mar guru. Ere koma tina didif duncunc disinsa erek osnok egens onnga omfij rusnok nomnaga. Didif duntunggom mar erek koma jeskaseda duroku rusnok rufoukou rudou efesi skoita Kristus fogora rumororu Ofa ojgomu.

²⁰ Koma bera, gij mona onnga didif duftuoftu rot Allah oga onnga oufamofa gu rusnok onnga Yahudi, beda didif tein dita mar erek rua onnga Yahudi jeskaseda duroku rerin rudou efesi skoita Yesus fogora rua ruroru Ofa. Noba erek rusnok runororu hukum Musa guru, beda didif dusujohu rot oida koma enerek oska guru. Jeska didif bera dut gu disinsa ojgomu rot fob. Ere koma tina, didif duroru hukum Musa morototuma erek rusnok onnga Yahudi ruroru ojgomu, jeskaseda duroku rudou efesi skoita Kristus fogora rua tein rumororu Ofa.

²¹ Ere koma tein didif tein dita mar morototuma erek rusnok onnga Yahudi guru rit mar jeskaseda duroku rudou efesi skoita Kristus fogora rua tein rumororu Ofa. Ere koma tina didif dinaha hukum Allah koma jah guru, jeska didif duroru Yesus Kristus oga fogora dija erek efen rusnok fob.

²² Gij mona onnga didif duftuoftu rusnok onnga rudou enebriyi gij mar onnga tenten jera mar onnga

oska rot iskusk enesi, beda didif dunofra disinsa dufoka erek osnok egens onnga odou ebriyi eteb gij mar erek eteb fob guru. Tina didif diker erek egens morototuma jera rua insa koma ojgomu jeskaseda duroku rua rudou skoita Kristus. Didif dija erek egens morototuma jera rusnok ebic egens egens jeskaseda gij mar koma nomnaga bera duroku rineya rudou efesi skoita Kristus fogora rua tein ruroru Ofa. Noba Ofa omosuwa rua jeska rerin mar onnga oska.

²³ Didif dutunggom mar erek koma gu rusnok ebic nomnaga jeskaseda rua rimeg rot Allah oga onnga oufamofa. Erek koma beda didif dimesma dufons onnga oufamofa eteb onnga Allah anggen gu efen rusnok nomnaga morototuma jera rusnok insa koma tein si.

²⁴ Iwa onnga Korintus ijginaga rot fob oida gij mona onnga rusnok rufof riremeteima rot rufons beda rua onnga rufof rot iskusk ojgomu bera onnga rimesma rufons rot si. Jefeda erek rusnok insa koma onnga rumfob rot iskusk, beda iwa tein ireneni rot iskusk gij mar onnga iwa itunggom nou Allah jeskaseda iwa tein imesma yeyin yufons jeska Ofa.

²⁵ Rusnok onnga rufof riremeteima rot rufons bera risejah risinsa rifaga rot iskusk sismeni fog. Rua rutunggom mar erek koma jeskaseda gij mona onnga rua rumfob riremeteima, beda rua rimesma rufons si. Tina rufons koma bera erek mar onnga enah aibin guru. Erek koma tina, mimif onnga Kristen bera misejah mudou efesi rot iskusk ojgomuja jeskaseda gij mona kahma, beda mimif mimesma mifmin mufons onnga erek mar onnga ah aibin ojgomuja.

²⁶ Erek koma tein, rua onnga rumfob riremeteima runofob erek ebireira guru. Noba rua onnga rahaisomu

nou rumobuma bera rireni jeskaseda rubu rot iskusk ojgomu. Rua runobu erek ebireira guru. Erek koma jefeda didif tein direneni jeskaseda dutunggom mar nou Allah rot iskusk ojgomu, noba dunotunggom mar erek ebireira guru.

²⁷ Didif dagei dudou efesi rot ahaismes ojgomuja jeskaseda dutunggom mar onnga ofoufem rot Allah ojgomu. Noba didif dunotunggom mar ebireira onnga disinsiyai dudou os rot guru. Jefeda didif tein dita difera okora oskiyai rot mar insa koma. Noba didif dutunggom mar erek koma jeskaseda gij mona onnga didif duftuftu rot Allah oga fogora rusnok rufoukou ruroru Yesus Kristus fob, beda didif dedin dufons eneseiseifa jeska didif jinaga guru.

10 ¹ Erek koma jefeda edohuji, iwa idou ah keingg rot mar koma onnga mifmin mimower runtunggom gij mona onnga rua ruroru Musa jeska monuh Mesir ojgomu. Rua rik erek mocgoj ofog egens onnga Allah engker gij eja okag rot rua. Noba askesi rua ruiru gij mei mojomu efei ekeni oforga, beda Allah ekeba mei mojomu efei koma fogora emah jeska. Jefeda rua ruiru gij mei mojomu efei koma ojgomuja onjoros rinjesaga jah enama rot rifena ebah nomnaga.

² Noba erek rusnok rita baptis erek orocunc rot oida rua ruroru Yesus fob, beda mar insa koma nomnaga bera onnga erek orocunc rot oida mifmin mimower ruroru Musa fob.

³ Beda rua nomnaga rit maat onnga onjuj jeska mebaga morototuma ojgomu.

⁴ Noba rua rij mei onnga orogna jeska mamu egens koma ojgomuja. Mei onnga orogna jeska mamu koma bera erek mar onswos egens onnga Allah ontunggom

nou rua. Mamu koma erek orocunc rot Kristus esinsa onnga eja okag rot rua ojgomuja. Koma erek, gij mona kahma beda Tuhan Yesus emeita eiteij ah gu efen rusnok ojgomuja erek mamu koma eita mei gu rusnok insa koma ojgomuja.

⁵Allah ontunggom mar insa koma nomnaga rot rua fob, tina Ofa odou eneskeira rot rusnok koma rineya guru, jeska rua runougif gu Ofa efen oga guru. Jefeda rusnok koma ragos suma suma gij mebi onnga oska koma ojgomuja.

⁶Mar insa koma nomnaga bera erek orocunc nou mimif tein rot oida mimif mut joug mudou efesi rot ahais ojgomuja jeskaseda mudou eneftirir keingg mar onnga oska erek rua insa koma rutunggom sis fob guru.

⁷Mimif munougif gu mar onnga oska erek mifmin mimower rutunggom sis fob guru. Koma bera erek rungu gij Mar Efeyi Ebsi sis fob oida, "Rusnok koma ruina maat eteb keingg fogora rugif gu mar egens onnga oska ojgomu. Rua rit maat ni, rij anggur efei ofoukou ni, noba ruka gij mebi rejrej mar onnga oska koma ojgomuja."

⁸Mimif tein minesiri morototuma erek rua insa koma rinsiri gij mar onnga oska sis fob guru. Jeska rua rutunggom mar erek koma, jefeda gij mona egens bera rusnok ribu setka egeka noba orgomu jeska rua ragos rot ojgomuja fob.

⁹Erek koma noba mimif tein minereneni Tuhan ojgomuja onjoros Ofa otkonu oska rot mimif guru. Koma erek mar onnga rineya jeska mifmin mimower insa koma runtunggom sis fob. Jefeda Ofa ensa magosu womfieda ofoukou skoita rua jeskaseda eska

rua fogora ragos rot rerin mar onnga oska onnga rua runtunggom insa koma.

¹⁰ Noba mimif tein muga enerahah skoita Allah rot mar onnga Ofa eita gu mimif erek rua insa koma runtunggom sis fob guru. Jeska rua rutunggom mar erek koma jefeda Allah ombk efen malaikat egens onnga efen owesa efek eteb skoita rua fogora ofa agob rua.

¹¹ Mar kef nomnaga onnga encirej rua bera erek orocunc nou mimif gij mona onnga ebeibeyaif ojpgomu. Noba mar onnga nabi-nabi runggu rot gij Mar Efeyi Ebsi bera erek ereisisi joug mimif onnga mimfena ebah gij mona insa kef onnga doida mona onnga enja ejgwaga.

¹² Jefeda erek osnok egens esitit esinsa efaga rot oida ofa bera ororu Allah oga rot ahais fob, beda ofa osujohu rot mar erek iskusk ojpgomu jeskaseda ofa enesiri gij mar onnga oska guru. Jeska erek ofa onosujohu rot iskusk guru, beda ofa emesiri gij mar onnga oska erek mifmin mimower onnga runroru Musa sis fob.

¹³ Didif dagot mar erek koma jeska orofosutut mar onnga ereneni iwa bera ereneni rusnok nomnaga gu mebif ojpgomu. Noba gij mona onnga mar ereneni iwa, beda Allah omofij iwa jeni erek Ofa anggen rot sis fob si. Koma bera, Ofa onorons mar okum onnga ereneni iwa ojpgomuja onjoros mar okum eteb ah nou iwa guru. Tina Ofa emeita owesa efek gu iwa jeskaseda iwa ita idou ahais rot ojpgomuja onjoros mar onnga ereneni iwa koma omoisa fog si.

¹⁴ Edohuji onnga dudou okora rot, iwa ibes ifaga yes jeska mar onnga tenten guru onnga rusnok enjgineg rugif gu.

¹⁵ Didif dagot mar erek koma gu iwa onggá idou ebriyi gij mar onggá tenten fob ojomu. Jefeda iwa isujohu rot oida mar onggá didif dinagot insa kef bera erek tenten ei era gurei.

¹⁶ Iwa isujohu rot mar onggá didif danggot ainsa kef rot rua onggá rugif gu mar onggá oska ojomu. Jeska gij mona onggá mimif mij anggur efei morototuma jeskaseda murois oufamofa gu Yesus Kristus rot efen ogufu onggá eya tumu mega salib nou mimif, beda koma tein erek orocunc rot oida mimif muira gij rusnok ebic egens ojomu fob. Erek koma tein, gij mona onggá mimif mintka roti erek misisi keingg misinsa rot Yesus efaga onggá anggos tumu mega salib nou mimif, beda koma tein erek orocunc rot oida mimif muira gij rusnok ebic egens fob.

¹⁷ Noba mimif onggá mufoukou mintka roti ofog egens ojomu. Beda erek koma tein, Yesus efen efaga egens, noba mimif onggá mufoukou bera ebiedi erek egens oisouska Yesus efaga egens koma ojomu. Koma jeska mimif mintka roti ofog onggá egens ojomu.

¹⁸ Noba gij mona onggá rusnok Yahudi rit maat morototuma onggá rua rira fogora rurougif gu Allah rot, beda koma erek orocunc rot oida rua rija erek egens gij Allah fob.

¹⁹ Erek koma tina, didif dinagot oida mar koma onggá rusnok enjgineg rugif gu bera erek tenten guru. Noba didif dinagot rot oida marska onggá rua insa rira fogora rirejiteyi gu mar koma bera erek ofoufem guru.

²⁰ Mar onggá didif danggot bera erek kef oida, rusnok enjgineg koma rira marska fogora rirejiteyi gu mar onggá rua rusujohu rot bera erek Allah. Tina

ongga tenten bera gij mona insa koma rua rurougif gu efena ofogog jera rudou onggga osumsumu rot ojgomu. Noba didif dunodou os oida iwa it marska onggga rusnok rira fogora rirejiteyi gu efena ofogog morototuma jera rua guru. Jeska koma bera erek iwa ija erek egens jera efena ofogog insa koma ojgomu fob.

²¹ Giskini gij mona juens bera iwa ij anggur efei morototuma jeskaseda ireisisi keingg isinsa rot meidu onggga Tuhan ontunggom nou iwa, beda iwa tein ija erek egens morototuma jera Ofa. Noba gij mona onggga egema deika bera erek iwa ij anggur efei morototuma jera rusnok enjgineg onggga rira anggur efei koma fogora rirejiteyi gu efena ofogog. Jefeda iwa ija erek egens jera efena ofogog koma tein. Tina enadaij nou iwa ija erek egens jera Tuhan noba ija erek egens jera efena ofogog tein jinaga guru. Erek koma tein rot mona onggga iwa intka roti jeskaseda ireisisi keingg isinsa rot Tuhan, beda iwa ija erek egens jera Ofa. Jeska erek iwa tein it maat morototuma jera rusnok enjgineg onggga rira maat koma fogora rirejiteyi gu efena ofogog insa koma, beda iwa tein ija erek egens jera efena ofogog koma onggga rua rugif gu. Tina enadaij nou iwa ija erek egens jera Tuhan noba ija erek egens jera efena ofogog tein jinaga guru.

²² Erek mimif mutunggom mar erek koma, beda Allah odou ejisei rot mimif fogora emeita okum gu mimif. Noba mifmin owesa efek enadaij nou munsuwa misinsa jeska mar onggga okum koma jinaga guru. Jefeda iwa inoromohohuma jera mar onggga oska erek insa koma guru.

²³ Rusnok ragot oida, "Adaij nou mimif mutunggom mar meidu onnga mimif mudou os rot ojgomu onnga erek Allah eneyahehir joug rot guru." Koma bera tenten, tina mar koma eneya bera onoufa nou mimif guru. Noba erek mimif mita mar koma ojgomu, beda koma onofij rusnok enjineg onnga rik rot mar insa koma jeskaseda rururu Yesus rot ahais tein guru.

²⁴ Enadaij nou osnok egens osujohu rot teinefa ofa eita eiteij ah onnga ongnoska rot esinsiyai ojgomuja guru. Tina onnga oufa bera ofa osujohu rot teinefa ofa ofij efen mohujir jeskaseda rua tein rita riteij ah onnga ongnoska ojgomuja.

²⁵ Mar onnga didif dimfesij rot insa kef bera erek kef oida, maat meidu onnga angh gu pasar bera iwa ingk noba it ojgomu. Tina iwa inejeka gu rusnok onnga runghu maat koma rot oida maat koma bera rira fogora rirejiteyi gu mar onnga oska sis fob ei era gurei. Ineita erek koma jeskaseda idou eneineina gij maat koma guru.

²⁶ Jeska mar egens onnga angh gij Mar Efeyi Ebsi agot rot oida, "Allah efen mebif jera mar onnga angh gij nomnaga." Jefeda mar koma nomnaga jera maat insa koma tein bera oufa nou iwa, jeska iwa irek Allah efen rusnok.

²⁷ Noba erek osnok egens erejgei iwa jeskaseda ija noba et maat morototuma jera ofa, noba idou os rot, beda iwa it maat meidu onnga ofa encka gu iwa ojgomu. Noba iwa inejeka gu ofa rot maat koma oida sis fob bera rua rimera maat koma fogora rirejiteyi gu mar onnga oska fob ei, era gurei, iwa ineita erek koma guru.

²⁸ Tina erek osnok egens onnga Kristen ek iwa it maat koma morototuma jera rusnok insa koma, beda

ofa agot gu iwa oida, "Maat koma bera rusnok rira fogora rirejiteyi gu mar onnga oska sis fob. Jefeda maat koma erek mar onnga oska ojgomu." Beda iwa inet maat koma guru, tina yugif gu yeyin yuhuj egens koma ojgomu. Jeska maat koma enjerek mar onnga ofa osujohu bera erek oska fob.

²⁹ Erek iwa ijginaga fob oida maat koma bera rusnok rira fogora rirejiteyi gu mar onnga oska sis fob, tina iwa it maat koma ojgomu, beda enadaij nou rusnok ragot oida iwa intunggom mar onnga oska jinaga guru. Tina jeska yeyin yuhuj insa koma osujohu rot oida maat koma erek mar onnga oska, beda iwa inet guru. Onnga oufa bera yugif gu yeyin yuhuj egens insa koma rot ojgomu.

³⁰ Gij mona onnga didif duis oufamofa gu Allah rot maat onnga didif dusujohu bera onoska guru fogora dimet, beda enadaij nou rusnok enjgineg ragot oida didif dutunggom mar onnga oska fob jinaga guru.

³¹ Jefeda, adaij nou mimif mutunggom mar meidu onnga mimif mudou os rot ojgomu noba onnga Allah eneyahehir joug rot guru. Erek koma, tina onnga ofoufem ekirsa bera gij mar onnga mimif mutunggom erek mit maat ni, era mij anggur efei ni, era mar meidu meidu onnga mimif mutunggom ni, beda mimif mita mar koma rot tenten ojgomu. Mimif mita erek koma jeskaseda rusnok enjgineg rimek tumu mimif fogora rumofra Allah ofoka erek aksa rot mar koma nomnaga.

³² Iwa ineita mar egema tein onnga orotunggom rusnok fogora risiri gij mar onnga oska guru. Koma bera rot rusnok onnga Yahudi, jera rusnok onnga Yahudi guru, jera rusnok onnga rururu Yesus Kristus tein.

³³ Iwa ita mar erek didif, jeska didif bera direneni jeskaseda mar nomnaga onnga didif duntunggom bera ereita rusnok nomnaga rudou eskeiramera rot ojgomuja. Noba didif dineita mar erek koma nou disinsiyai ojgomu guru, tina didif dita mar erek koma rot rusnok rufoukou jeskaseda Allah omosuwa rua jeska rerin mar onnga oska.

11 ¹ Iwa iroru mar onnga didif duntunggom ojgomuja erek didif duroru mar onnga Kristus ontunggom sismeni gij mona onnga Ofa engker gu mebif ros.

² Didif dudou eskeira eteb rot iwa jeska idou ah keingg rot mar nomnaga onnga didif duncunc gu iwa sis fob. Noba iwa tein inroru mar koma nomnaga onnga didif dumftuftu rot gu iwa sis fob.

³ Tina, didif dudou os jeskaseda iwa tein idou ebriyi gij rot teinefa rusnok rugif gu Allah rot tenten. Koma bera, runer rugif gu Yesus Kristus erek rerin ebirfaga. Noba rujager rugif gu rahiner erek rerin ebirfaga. Noba Kristus ougif gu Allah erek efen ebirfaga.

⁴ Erek koma tina, orofosut orna egens onnga om eiteij gu Allah jah gu rusnok rufoukou efekesa, era agot rot mar onnga Allah oncunc gu ofa gij odou efesi gu rusnok enjgineg, beda ofa energi meifeti era topi tumu ebirfaga guru. Jeska koma erek ofa oh mojen gu Kristus onnga erek efen ebirfaga.

⁵ Erek koma tein, orofosut ojaga egens onnga om eiteij gu Allah era agot rot mar onnga Allah oncunc gu ofa gij odou efesi gu rusnok rufoukou, tina ainsa koma tein ofa energi meifeti tumu ebirfaga guru, beda koma tein erek oska. Jeska ororu mifmin erebent gij mona insa kef bera mar onnga ofa ontunggom insa koma bera erek orocunc rot ojaga

egens onggaga ensiri jera egema efen mahina. Jefeda rujager rira meifeti ruround joug ribirfaga ojgomu.

⁶ Didif dagot rot erek koma jeska erek ojaga egens energi meifeti tumu ebirfaga guru, beda koma bera oska morototuma erek ojaga egens onggaga rusnok rahkena ebirfaga efeji nomnaga jeska fob ojgomu. Jefeda onggaga oufa ekirsa bera, rujager rirgi meifeti joug ribirfaga gij mona onggaga rua rugif gu Allah ojgomu.

⁷ Tina, gij mona onggaga runer rum riteij gu Allah, beda rinergi meifeti era topi joug ribirfaga guru. Beda rusnok nomnaga rimek rua fogora rumofra Allah ofoka erek aksa eteb. Jeska Allah ontunggom runer koma erek ereni jeni esinsa ojgomu. Tina gij mona onggaga rujager rum riteij gu Allah, beda rua rirgi meifeti tumu ribirfaga ojgomu. Beda rusnok rimek rua tein fogora rumofra rerin rahiner rufoka erek aksa. Jeska koma orocunc rot oida rua rugif gu rerin rahiner.

⁸ Erek koma jeska runa rinen jeska rujaga sismeni fog guru, tina rujaga rin jeska runa sismeni fob.

⁹ Noba Allah onotunggom orna egens onggaga sismeni koma jeska ojaga ocosu rot ofa guru. Tina Ofa otunggom ojaga onggaga sismeni koma jeska orna bera ocosu rot ofa ojgomu.

¹⁰ Erek koma jefeda rujager rirgi meifeti joug ribirfaga erek orocunc rot oida rua rugif gu rerin rahiner ojgomu. Noba malaikat-malaikat onggaga riajga joug rusnok bera rimek oida rujager insa koma rugif gu rerin rahiner ojgomu.

¹¹ Erek koma tina, osok gij rusnok onggaga ruroru Tuhan bera ojaga onot gu esinsa guru, tina ofa oisum

gij orna ojgomu. Noba orna tein onot gu esinsa guru, tina ofa tein oisum gij ojaga koma ojgomu.

¹² Jeska, erek didif danggot insa koma gu iwa oida, rujaga rin jeska runa rot sismeni. Tina ebeibeyaif bera runer rin jeska rujaga. Noba Allah esinsiyai bera ontunggom gegeka tein.

¹³ Jefeda ahah didif diteij bera adaij nou iwa isinsa yuga ojga rot oida rujager onnga rum riteij gu Allah gij Mod Ari bera rira meifeti ruround joug ribirfaga ojgomu.

¹⁴ Mimif musujohu rot oida runer onnga rerin ribirfaga efeji akseij bera ruroh mojen rot risinsa ojgomu.

¹⁵ Tina erek rujager rerin ribirfaga efeji onnga akseij, beda mimif musujohu rot oida koma erek ongnoska eteb rot rua. Jeska Allah ontunggom rujager rerin ribirfaga efeji akseij jeskaseda ereij keingg ribirfaga nomnaga.

¹⁶ Noba erek rineya ruga omosokuma rot mar insa koma, beda didif dagot rot oida memef era rusnok onnga Mod Ari enjineg nomnaga tein mefmen erebent onnga erek koma ojgomu. Koma bera, rujager rirgi meifeti joug ribirfaga efeji gij mona onnga rua rum riteij gu Allah gij Mod Ari ojgomu. Memef bera mefmen erebent onnga toga jeska mar koma guru.

¹⁷ Ebeibeyaif didif dudou os duftuflu iwa rot teinefa iwa isejah nou ikeba roti jera ij anggur efei morototuma. Tina osok gij mar insa koma bera didif dinesitit iwa rot guru. Jeska gij mona onnga iwa imohoturuma rot mar insa koma, beda iwa ineita mar koma rot iskusk enesi. Tina onnga okum ekirsa

bera iwa ita mar onggga oska gij mona insa koma tein ojjgomuja ros.

¹⁸ Ongga sismeni bera, didif dig rot oida gij mona onggga iwa imohoturuma nou ikeba roti jera ij anggur efei morototuma, beda yuga omosokuma fogora imekebema gij ebic egens egens gu isinsa ojjgomuja. Noba didif dusujohu rot oida mar koma onggga didif dig bera erek tenten ojjgomu. Tina koma erek oska eteb.

¹⁹ Jeska iwa imekebema gij ebic egens egens erek koma jeskaseda irocunc rot oida yeyin ebic egens koma bera tenten ei, noba ebic egema koma bera oska ojjgomu ei!

²⁰ Jefeda, gij mona onggga iwa imohoturuma jeskaseda ikeba roti jera ij anggur efei, beda iwa isujohu rot oida koma bera erek ireisisi keingg isinsa rot mar onggga Tuhan ontunggom nou iwa sis fob. Tina iwa ineita mar koma rot tenten guri. Jeska gij mona insa koma bera iwa ita mar erek oska ojjgomuja ros.

²¹ Didif dagot erek koma jeska gij mona insa koma bera ineya idou eftirir keingg maat ofoukou onggga imorka fogora iwa it maat koma nomnaga gu isinsa ojjgomu. Beda rineya onggga rufojingki rudou os rint maat, tina maat enadaij nou rua tein guri. Noba ineya inekeba yeyin anggur efei guru, tina iwa ij anggur efei koma nomnaga gu isinsa onjoros ibirfaga erebibeit rot ojjgomo.

²² Wah, erek mosona ongk iwa beda iwa it maat jera ij anggur efei gij yeyin mod ojjgomu, tina gij mona onggga iwa imohoturuma bera guru. Jeska iwa itunggom mar erek koma beda koma erek iwa yuga oruh rua onggga Kristen noba yuh mojen gu rua onggga

rufojingki tein ojgomu. Beda iwa isujohu rot oida didif dimesitit iwa rot mona onnga iwa imohoturuma erek koma ei? Wah, menesitit iwa rot mar koma jinaga guru!

²³ Didif dagot mar erek koma, jeska mar onnga ai juens dumocunc gu iwa bera Tuhan oncunc gu didif sis fob. Koma bera, gij motu onnga Yudas odou emekikif jeska Yesus noba ocunc Ofa gu rusnok onnga rufogog, beda Yesus engker morototuma jera efen ruforoker rufok setka kungkob erfeka. Beda Ofa eita roti ofog egens.

²⁴ Noba Ofa ois oufamofa eteb gu Allah fogora Ofa etka roti koma. Beda Ofa agot gu efen ruforoker oida, "Roti kef bera erek difaga onnga didif dimaha gu rusnok onnga rufogog jeskaseda iwa imesma eiteij ah onnga efeinah. Gij mona kahma deika, beda iwa tein itka roti erek koma fogora it jeskaseda ireisisi keingg isinsa osok gij mar onnga Didif duntunggom nou iwa ojgomu."

²⁵ Erek koma beda nou onnga rua rint maat oisa fob, beda Ofa eita mok osku rot anggur efei noba agot gu rua oida, "Anggur efei onnga angh gij mok osku kef bera erek orocunc rot dedin dugufu onnga emeya nou iwa. Noba koma tein bera orocunc rot gu iwa oida mona efeinah onnga Allah anggen rot sis fob bera ecira fob. Gij mona kahma deika, beda iwa ij anggur efei erek koma jeskaseda ireisisi keingg isinsa osok gij mar onnga Didif duntunggom nou iwa."

²⁶ Noba orofosut mona onnga iwa itka roti noba ij anggur efei morototuma erek insa koma, beda koma erek orocunc rot Tuhan Yesus onnga anggos tumu mega salib nou mimif. Iwa itunggom mar erek koma ojgomuja onjoros mona onnga Ofa onksons en.

²⁷ Ere koma jefeda, idu onnga ent roti jera enj anggur efei koma jeskaseda ereisisi keingg esinsa rot mar onnga Tuhan Yesus ontunggom nou ofa, tina ofa otunggom mar koma erek ebireira ojgomu, beda koma erek ofa oga oruh Tuhan Yesus onnga efen ogufu eya tumu mega salib nou mimif fob.

²⁸ Onnga tenten bera, orofosut osnok egens onnga odou os et roti jera ej anggur efei morototuma jera rusnok enjineg jeskaseda ereisisi keingg esinsa rot Tuhan Yesus, beda ofa ohca joug odou efesi sismeni fog rot mar koma efen ofou nou rusnok ojgomu. Noba erek ofa osujohu rot oida kef bera erek mar onnga ofoufem ei, beda ofa et noba ej morototuma jera rua insa koma ojgomu.

²⁹ Tina erek ofa ent roti jera enj anggur efei morototuma jera rusnok enjineg, noba ofa onohca joug odou efesi rot mar koma sismeni fog guru, beda Allah omofra mar okum eteb keingg ofa rot si.

³⁰ Noba, jeska rusnok rufoukou gu ifekesa rita mar erek onnga oska erek insa koma ros, jefeda rineya onnga marenir, noba rineya onnga ranggos fob.

³¹ Tina erek mimif muhca joug misinsa mudou efesi sismeni fog rot mar insa koma, beda Allah onofra okum keingg mimif rot guru.

³² Ere koma tina, Tuhan emera mar okum fogora omoroftu mimif ojgomu. Ofa omotunggom mar erek koma jeskaseda mimif mineja jah mahmei morototuma jera rusnok onnga rudou okoja Allah guru.

³³ Ere koma jefeda, edohuji, gij mona onnga iwa imohoturuma jeskaseda it roti jera ij anggur efei erek ereisisi keingg isinsa rot Tuhan Yesus, beda iker joug

onjoros rusnok nomnaga riramecinma fog, fogora iwa imet maat koma morototuma.

³⁴Noba erek rineya jeska iwa onggga mosona onggk rua gij mona insa koma, beda rua rit maat gij rerin mod efesi sismeni fog ojgomu. Jeska erek rua ruhoturu morototuma jera iwa jeskaseda rit maat ofoukou ojgomu, beda Allah omofra mar okum keingg rua rot mar insa koma si. Noba gij mona onggga didif dinja jah suma, beda didif dumoftuftu mar deika gu iwa.

12 ¹Edohuji, ainsa kef didif dudou os dagot mar osok gij owesa efek onggga rusnok risma jeska Efena Ebsi Allah. Didif dimagot rot mar insa koma gu iwa jeskaseda idou onosumsumu rot mar koma guru.

²Iwa idou ah keingg rot oida gij mona onggga iwa inoruru Allah enesi, bera rusnok rita mar onggga oroku idou skoita mar onggga oska ojgomuja. Koma bera erek iwa yugif gu mar onggga oska noba onggga erek osumsumu ojgomu.

³Erek koma jefeda iwa ijginaga rot tenten oida rusnok onggga ragot mar oisouska Efena Ebsi Allah bera rinagot oida, "Yesus bera oska efekeifa," erek koma jinaga guru. Noba rusnok onggga rinagot mar oisouska Efena Ebsi Allah guru, rua bera rinagot oida, "Yesus bera Tuhan," erek koma jinaga guru.

⁴Mar onggga rusnok rutunggom rot owesa efek onggga rua rinsma jeska Efena Ebsi Allah bera erek toga toga. Tina Efena Ebsi onggga eita owesa efek gu rusnok nomnaga koma bera egens ojgomu.

⁵Noba mar onggga rusnok rutunggom jeskaseda rurofij Tuhan bera erek toga toga. Tina Tuhan onggga rua rumfij bera erek egens ojgomu.

⁶ Noba mar onnga osnok egens otunggom oisouska owesa efek jeska Efena Ebsi Allah jeskaseda ofij rusnok enjgineg bera erek toga toga. Tina Allah esinsiyai bera onnga onoftuflu rua gij rudou efesi rot mar onnga rua rutunggom koma nomnaga.

⁷ Gij mona onnga Efena Ebsi ocunc rot efen owesa efek gu osnok egens gij odou efesi, beda mar onnga osnok egens koma ontunggom rot owesa efek insa koma bera jeskaseda orofij rusnok nomnaga.

⁸ Koma erek rineya risma owesa efek jeska Efena Ebsi jeskaseda rudou ebriyi eteb gij mar onnga rua rusujohu rot jera mar onnga rua ragot rot osok gij Allah oga. Fogora rudou efesis tein gij mar onnga rua ruftuflu rot gu rusnok enjgineg.

⁹ Noba rineya risma owesa efek jeskaseda rudou ororu rot ahais ojomu oida Allah omotunggom mar onnga rua rimerejgei Ofa rot si. Noba rineya risma owesa efek jeskaseda rita eskeira gu rusnok onnga marenir.

¹⁰ Noba rineya risma owesa efek jeskaseda rutunggom mar onnga onswos eteb onnga ereita rusnok enjgineg rudou ousaha rot. Noba rineya risma owesa efek jeskaseda rudou ebriyi gij mar onnga Allah oncunc gu rua gij rudou efesi fogora riflesij rot mar koma gu rusnok enjgineg tein. Noba rineya risma owesa efek jeskaseda rudou ebriyi gij rot oida mar onnga rusnok enjgineg ragot rot bera en jeska Allah era en jeska efena ofogog ojomu. Noba rineya risma owesa efek jeskaseda riflesij mar gij oga egens onnga rua risinsa rinejginaga rot tein enesi. Erek koma tein, gij mona onnga osnok egens emfesij mar gij oga insa koma, beda Efena Ebsi eita owesa gu osnok egens egema deika jeskaseda ofa esinsiyai

odou ebriyi gij oga insa koma efen ofou. Fogora Ofa agot rot mar insa koma gu rusnok enjgineg.

¹¹ Efena Ebsi Allah bera onnga eita owesa efek gu rusnok egens egens jeskaseda rua rutunggom mar koma nomnaga ojgomu. Noba Efena Ebsi Allah bera onnga eita owesa efek insa koma gu rusnok egens egens nomnaga jeni erek mar onnga Ofa esinsiyai ondou os rot ojgomu.

¹² Rusnok onnga rururu Yesus bera erek osnok efaga egens. Efaga egens koma efen efetma ofoukou, tina efetma onnga ofoukou nomnaga ebiedi efaga egens koma ojgomu. Erek koma rot rusnok onnga rururu Yesus Kristus tein. Yesus bera erek osnok egens, tina mimif onnga mirek rusnok onnga rufoukou bera mibiedi erek ebic egens jera Ofa.

¹³ Mimif nomnaga mifmin mufou ebiedi toga toga. Koma bera, rineya onnga Yahudi ni, rineya onnga Yahudi guru ni, rineya onnga erek rusnok onnga rumfij rerin ebirfager ojgomuja ni, rineya onnga runt gu risinsa ni. Tina gij mona onnga mimif nomnaga mita baptis, beda Efena Ebsi Allah onnga Ofa ombk skoita mimif nomnaga bera onnga otunggom mimif jeskaseda mija erek ebic egens gij Yesus Kristus ojgomu.

¹⁴ Didif dagot erek koma jeska efaga egens bera enerek efetma egens ojgomu guru, tina efaga egens bera ebiedi efen efetma ofoukou.

¹⁵ Jefeda erek aki egens agot oida, "Didif bera dinerek etma guru, jefeda didif dinebiedi efaga egens koma guru." Tina aki egens koma tuturu ebiedi efaga egens koma ros.

¹⁶ Noba erek osu egens tein agot oida, "Didif bera dinerek eiteij guru, jefeda dinebiedi efaga egens

koma guru." Tina osu egens koma tuturu ebiedi efaga egens koma ros.

¹⁷ Mar insa koma enadaij guru, jeska erek efaga egens nomnaga eja erek eiteij ojgomu, beda eneg mar deika guru. Noba erek efaga egens koma nomnaga eja erek osu ojgomu, beda eneg mar efen ensesa deika guru.

¹⁸ Tina onnga tenten bera, Allah otunggom efaga egens insa koma erek efen efetma ofoukou ebiedi efaga jeni Ofa efen odou ejginaga rot.

¹⁹ Jeska erek efen efetma egens insa koma enah gu esinsa ojgomu, beda efen efaga enah guru.

²⁰ Tina onnga tenten bera efaga egens efen efetma ofoukou ojgomu.

²¹ Erek koma jefeda, eiteij enagot gu etma oida, "Didif dunocosu rot bua guru." Era ebirfaga enagot gu aki oida, "Didif dunocosu rot bua guru."

²² Tina onnga tenten bera efetma egens onnga mimif musujohu rot bera ofora eriaga ojgomu bera erek ofoufemfem tein nou mimif.

²³ Noba efetma koma erek osu efeb onnga mimif musujohu oida erek onofoufem guru, beda mimif mutunggom mar onnga oufamofa rot osu efeb koma erek maha emas gij. Noba efetma koma onnga mojen mimif rot, beda mimif mira mar jeskaseda miredemi mar koma ojgomu.

²⁴ Noba efetma koma onnga mojen mimif rot guru bera minedemi mar koma guru. Tina Allah ontunggom mifaga erek koma jeskaseda efetma koma onnga erek ongnoska fob omofij efetma koma onnga erek ongnoska eteb guru.

²⁵ Jefeda efaga koma efen efetma enemekabema guru. Tina efetma ebiedi efaga koma erek egens ojomu jeskaseda omofijma.

²⁶ Noba gij mona onnga efetma egens eita efera okora, beda koma erek efaga efetma nomnaga rita rifeira okora tein. Noba gij mona onnga efetma egens odou efaga ouka eteb rot mar, beda efaga efetma nomnaga rudou efaga ouka eteb tein.

²⁷ Noba erek Allah otunggom efaga egens koma jeskaseda efen efetma ofoukou, beda erek koma tein, Ofa otunggom iwa egens egens onnga erek rusnok ofoukou jeskaseda ija erek ebic egens gij Yesus Kristus fob.

²⁸ Beda Ofa eita owesa efek gu iwa egens egens jeskaseda itunggom mar onnga erek imofijma ojgomuja. Erek koma jefeda onnga sismeni bera Ofa eita owesa efek gu rusnok rineya jeskaseda rifarur erek rasul-rasul. Beda Ofa eita owesa efek gu rineya jeskaseda ragot rot mar onnga Ofa oncunc gu rua gij rudou efesi gu rusnok enjgineg. Beda Ofa eita owesa efek gu rineya jeskaseda rudou efesis eteb fogora ruftuftu rot Allah oga gu rusnok enjgineg. Beda Ofa eita owesa efek gu rineya deika jeskaseda rutunggom mar onnga onswos jeska Allah gu rusnok rudou. Beda Ofa eita owesa efek gu rineya jeskaseda rita eskeira gu rusnok onnga marenir. Beda Ofa eita owesa efek gu rineya deika jeskaseda rufij rusnok enjgineg onnga rifeira okora. Beda Ofa eita owesa efek gu rineya jeskaseda risejah Mod Ari efen efarur nou rusnok. Beda Ofa eita owesa efek gu rineya jeskaseda rifeisij mar gij oga egens onnga rua risinsa rinejginaga rot efen ofou enesi tein.

²⁹ Didif dinagot rot oida rusnok nomnaga risma owesa efek jeskaseda rutunggom mar onnga erek egens morototuma guru. Jeska rusnok nomnaga bera rinefarur erek rasul guru. Noba rusnok nomnaga rinerek rua onnga ringg mar jeska Tuhan fogora ragot rot gu rusnok enjgineg guru. Noba rusnok nomnaga rinesma rudou onnga efesis fogora ruftuftu rusnok enjgineg rot Allah oga guru. Noba rusnok nomnaga rinesma owesa efek jeskaseda rutunggom mar onnga onswos jeska Allah jah rusnok rudou guru.

³⁰ Noba rusnok nomnaga rinesma owesa efek jeskaseda rita eskeira gu rusnok onnga marenir guru. Noba rusnok nomnaga rinesma owesa efek jeskaseda riflesij mar gij oga egens onnga rua risinsa rinejginaga rot enesi guru. Noba rusnok nomnaga rinesma owesa efek jeskaseda rudou ebriyi gij oga egens koma onnga rusnok enjgineg rimfesij gij guru.

³¹ Onnga oufamofa bera, iwa idou osos rot owesa efek jeska Allah jeskaseda itunggom mar koma onnga erek ofoufemfem ekirsa jeska mar enjgineg ojgomu. Beda ainsa kef didif dumocunc moroju onnga ongnoska eteb ekirsa nou iwa.

13 ¹ Onnga oufamofa ekirsa bera iwa idou okora rot rusnok enjgineg. Jeska erek didif difesij mar gij rusnok ruga era malaikat-malaikat oga, tina didif dudou onokora rot rusnok enjgineg guru, beda dedin diteij ah bera erek oska ojgomu ros.

² Noba erek didif dedin owesa efek jeskaseda danggot rot mar onnga Allah oncunc gu didif gij dudou efesi gu rusnok enjgineg ni, era dudou ebriyi eteb gij mar onnga en jeska Allah onnga angh endemi jeska rusnok enjgineg ros tein ni, era dudou efesis

rot mar ofoukou doska ni, era dudou ororu Allah rot ahais doska fogora direjgei Ofa rot mar onnga eteb, beda Ofa otunggom mar koma ojgomu ni, erek didif dita mar insa koma nomnaga, tina dudou onokora rot rusnok enjgineg guru, beda didif dunok dufoka gij jinaga guru.

³Erek koma tein, erek didif dikeba dedin mareibra nomnaga gu rusnok onnga rufojingki ni, noba didif daha disinsa jeskaseda dita difera okora rot Allah oga ni, tina dudou onokora rot rusnok enjgineg guru, beda didif dinesma dufons jeska Allah rot mar insa koma nomnaga jinaga guru.

⁴Rusnok onnga rudou okora rot rusnok enjgineg bera ruin keingg risinsa rudou efesi rot rua. Noba rudou eriagamaga rot rua tein. Rua rudou eneftirir keingg rot rusnok enjgineg rerin mareibra guru ni, rua runofra risinsa rufoka erek aksa guru ni, rua rinesitit risinsa rifaga rot mar tein guru ni,

⁵rua runofos efek rot rusnok enjgineg guru ni, rua runohca mareibra rot risinsa ojgomuja guru ni, rerin rifena onosok ebeirens rot mar onnga rusnok enjgineg ranggot guru ni, rua rinedemdemi mar onnga oska ojgomuja gij rudou efesi rot rusnok enjgineg guru ni,

⁶rua runotut rot rusnok onnga rutunggom mar onnga oska guru, tina rudou okora rot rua ojgomu ni, rudou efaga ouka rot rusnok onnga rutunggom mar onnga oufamofa ojgomu ni,

⁷rua ruin keingg risinsa rudou efesi rot mar onnga rua ringk jeska rusnok enjgineg onnga rua rusujohu rot bera oida erek oska ni, rua rudou eredi rot oida rerin ruhujir rumotunggom mar onnga oufamofa ojgomu ni, rua tein ruisum gij rot oida rerin ruhujir

insa koma rumororu mar onggga oufamofa odudu ni, rua rudou eneskes rot rusnok guru, tina rudou okora rot rua ojgomuja ni.

⁸ Mona onggga rusnok rudou omokorema bera onoisa guru, tina ecira rot mona onggga ah aibin ojgomuja. Noba ebeibeyaif rusnok risma owesa efek jeskaseda ragot rot mar onggga Allah oncunc gu rua gij rudou efesi skoita rusnok enjgineg tein. Tina gij mona kahma bera mar insa koma tein omoisa soska ojgomu. Noba ebeibeyaif rusnok risma owesa efek jeskaseda riflesij mar gij oga egens onggga rua risinsa rinejginaga rot enesi. Tina gij mona kahma, beda rusnok runocosu rot mar insa koma deika guru. Ebeibeyaif rusnok risma rudou onggga efesis eteb gij mar jeskaseda ruftuftu Allah efen rusnok osok gij meidu onggga Ofa ontunggom nou rua. Tina gij mona kahma bera rusnok runoftuftu rot mar insa koma deika guru.

⁹ Jeska ebeibeyaif bera mar onggga mudou ebriyi gij rot Allah bera erek oskiyai ojgomu ros. Noba mar onggga Allah oncunc gu rusnok jeskaseda rua ragot rot gu rusnok enjgineg tein bera erek oskiyai ros.

¹⁰ Tina gij mona onggga Allah ontunggom mar nomnaga jeskaseda ah jeni erek Ofa odou os rot, beda owesa efek koma onggga Allah eita gu rusnok egens egens gij mona ebeibeyaif bera munocosu rot deika guru. Jeska gij mona insa koma bera mudou emebriyi gij mar insa koma nomnaga si.

¹¹ Didif dudou os durocunc rot mar onggga dinagot ainsa kef. Sis mona onggga didif duforokai ros bera didif danggot mar erek ruforokai ranggot mar ojgomu ni, didif dusujohu rot mar gij dudou efesi tein erek ruforokai rusujohu rot mar ojgomu ni, dudou ebriyi

gij mar erek ruforokai rudou ebriyi gij ojgomu ni. Tina ebeibeyaif bera didif durna fob, jefeda didif dineita mar insa koma nomnaga erek ruforokai rita deika guru.

¹² Koma tein erek kansinam onnga osnok egens ek efena gij. Tina kansinam koma erek ofumfumf, jefeda ofa enek efena rot koisoisa guru. Erek koma rot mimif onnga ebeibeyaif tein. Mimif minejginaga rot Allah erek koisoisa enesi. Tina gij mona kahma bera mimif mudou emebriyi gij mar nomnaga si. Jeska ebeibeyaif mudou enebriyi gij mar nomnaga enesi. Tina gij mona kahma bera mudou emebriyi eteb gij Allah, erek ofa odou ebriyi eteb gij mimif ebeibeyaif.

¹³ Jefeda onjoros mona insa koma bera mimif mita mar ofoka orgomu onnga erek ofoufem ekirsa jeska mar nomnaga. Koma bera, mimif mudou ororu Allah rot tenten ojgomuja ni, noba mimif muisum gij Ofa rot mar nomnaga onnga Ofa anggen rot nou mimif ojgomuja ni, noba mudou omokorema ojgomuja ni. Noba mar egens onnga ekirsa jeska mar orgomu insa kef bera, mimif mudou omokorema ojgomuja.

14 ¹ Mar onnga ofoufem ekirsa bera rusnok rudou omokorema. Erek koma jefeda iwa ireneni rot ahais jeskaseda idou omokorema ojgomuja. Noba iwa tein irejgei Allah jeskaseda iwa imesma owesa efek jeska Ofa fogora imotunggom mar onnga oufamofa nou Ofa ojgomuja. Noba onnga sismeni bera irejgei Ofa rot owesa efek jeskaseda iwa ig mar onnga en jeska Ofa fogora yagot rot mar insa koma gu rusnok enjgineg tein.

² Jeska rusnok onnga risma owesa efek jeskaseda riflesij mar gij oga egens onnga rua risinsa rinejginaga rot enesi bera rinefesij rot mar koma gu rusnok guru.

Tina rua rifesij rot mar koma gu Allah ojgomu ros. Koma bera, oga egens insa koma efen ofou ah jejema jeska rusnok onnga ringg rot mar koma ojgomu, jeska rudou enebriyi gij oga insa koma guru. Efena Ebsi Allah bera oncunc mar koma gu rusnok insa koma onnga ranggot rot oga egens koma ojgomu.

³Tina rineya onnga rinsma owesa efek jeskaseda rudou ebriyi gij oga egens insa koma efen ofou bera ragot rot mar koma gu rusnok enjgineg. Noba rua ragot mar koma gij oga onnga giskini. Jefeda koma erek rua rita rudou ahais gu rusnok enjgineg ni, risisi joug rua ni, noba rita rudou ererei gu rua tein ni ojgomuja.

⁴Gij mona onnga osnok egens efesij mar gij oga egens insa koma, beda koma erek ofa ereita esinsa odou ahais rot ojgomu. Tina gij mona onnga osnok egens agot rot mar onnga Allah oncunc gu ofa gij odou efesi gu rusnok enjgineg, beda koma erek ofa ereita rudou ahais gu rusnok insa koma ojgomu.

⁵Erek koma jefeda didif dudou os rot oida iwa nomnaga isma owesa efek jeska Efena Ebsi jeskaseda ifesij mar gij oga egens onnga iwa isinsa inejginaga rot efen ofou enesi. Tina onnga ofoufem ekirsa bera, didif dudou os rot oida iwa nomnaga isma owesa efek jeskaseda ig mar onnga en jeska Allah fogora yagot rot mar koma gu rusnok enjgineg tein. Jeska rua onnga ranggot rot mar onnga Allah oncunc gu rua gij rudou efesi skoita rusnok enjgineg bera rerin owesa efek onnga ofoufem eteb. Tina rua onnga rinsma owesa efek jeskaseda rudou ebriyi gij oga egens insa koma efen ofou, rua bera rerin owesa efek onnga ofoufem ekirsa jeska mar enjgineg insa koma. Jeska

mar egens insa koma bera onofij rusnok nomnaga ojgomuja.

⁶ Edohuji, erek didif dumohoturu jera iwa, beda didif difesij mar gij oga egens onnga didif disinsa dinejginaga rot enesi, beda koma onofij iwa rot tenten guru. Tina erek didif dagot rot mar onnga Allah oncunc gu didif gij dudou efesi skoita iwa, era didif duftuftu iwa rot mar egens osok gij Allah oga, beda mar koma bera omofij iwa rot tenten ojgomu si.

⁷ Jeska erek osnok egens onnga ofc moka ofou era edi mobsej, tina rot iskusk guru, beda rusnok onnga ringg medemer koma rudou enebriyi gij efen ofou guru. Erek koma tein rot rusnok onnga riflesij mar gij oga egens onnga rua jera rusnok enjgineg rinejginaga rot enesi. Jeska rusnok onnga ringg oga onnga onswos insa koma bera rudou enebriyi gij efen ofou jinaga guru.

⁸ Noba erek osnok egens enen manghi mei rot iskusk guru, beda rusnok onnga ringg manghi mei insa koma bera rinejginaga rot oida ai juens, beda rusnok rimagobuma guru.

⁹ Jefeda erek iwa ifesij mar gij oga egens onnga rusnok enjgineg rinejginaga rot guru, beda rua rudou enebriyi gij mar onnga iwa imfesij rot insa koma efen ofou jinaga guru.

¹⁰ Gij mebi kef bera rusnok ruga ofoukou, tina rusnok nomnaga onnga rimfesij mar gij rerin risinsa ruga bera rudou ebriyi gij ruga insa koma.

¹¹ Noba erek didif dig oga egens onnga osnok egens emfesij mar gij, tina dudou enebriyi gij guru, beda koma erek didif dusodosa jeska ofa koma. Noba ofa tein erek osodosa jeska didif tein.

¹² Erek koma rot rusnok tein onggwa rinsma owesa efek jeskasada rifiesij mar gij oga egens onggwa rua risinsa rinejginaga rot enesi. Rua nomnaga rudou enebriyi gij mar koma onggwa rua ranggot moguma guru. Jefeda, jeska iwa idou osos nou insma owesa efek jeskasada itunggom mar, beda irejgei Allah jeskasada Ofa eita owesa efek onggwa ofij rusnok Mod Ari nomnaga ojpgomu.

¹³ Jefeda onggwa oufa bera rusnok rimfesij mar gij oga egens onggwa rua risinsa rinejginaga rot efen ofou enesi. Tina onggwa ofoufem ekirsa bera rua tein rirejgei Allah rot owesa efek jeskasada rudou ebriyi gij mar koma onggwa rua rimfesij insa koma, fogora rua rimagot rot efen ofou gu rusnok enjgineg tein.

¹⁴ Jeska erek didif dum diteij oisouska Efena Ebsi Allah gij oga egens onggwa didif disinsa dinejginaga rot enesi, beda didif bera dudou ah toumou ojpgomu noba dunosujohu rot mar koma guru. Jeska difeni bera onggwa om eiteij rot mar koma ojpgomu.

¹⁵ Jefeda didif dimeita mar erek kef: Oisouska Efena Ebsi bera dedin difeni omom eiteij gij oga egens onggwa dinejginaga rot enesi. Tina oisouska dudou efesi bera didif dum diteij gij oga egens onggwa didif disinsa jera rusnok enjgineg tein rijginaga rot tein fob ojpgomu. Noba oisouska Efena Ebsi bera dedin difeni omof medemer gij oga egens onggwa dinejginaga rot efen ofou tein enesi. Tina oisouska dedin dudou efesi bera dumof medemer gij oga egens onggwa didif disinsa jera rusnok enjgineg tein rijginaga rot fob.

¹⁶ Jeska, erek rineya jeska iwa irois oufamofa gu Allah gij oga egens onggwa iwa isinsa inejginaga rot enesi, beda rusnok egema tein rudou enebriyi gij mar koma onggwa rua rumois rot efen ofou jinaga guru.

Jefeda enadaij nou rua tein ruitij rot mar onggga iwa yuis gu Allah insa koma guru.

¹⁷ Mar onggga rua ruis gij oga egens insa koma gu Allah bera erek onggkoska. Tina mar koma onofij rusnok enjgineg tein guru.

¹⁸ Didif duis oufamofa eteb gu Allah jeska Ofa eita owesa efek gu didif jeskaseda difesij mar gij oga oga onggga disinsa dinejginaga rot enesi noba onggga erek ekirsa jeska iwa nomnaga.

¹⁹ Tina gij mona onggga didif duhoturu jera rusnok Mod Ari, beda didif dudou os difesij mar erek oskiyai tein ojgomu gij oga egens onggga rusnok enjgineg rudou ebriyi gij efen ofou fob. Beda rudou emebriyi gij mar onggga didif dumftuftu rot Allah oga efen ofou si. Jeska koma erek oufamofa ekirsa jeska mar onggga didif dimfesij gij oga egens onggga rua rudou enebriyi gij jinaga guru.

²⁰ Edohuji, iwa isujohu rot mar erek rua onggga runa fob. Noba inosujohu rot mar erek rua onggga ruforokai ros guru. Tina erek ruforokai rinejginaga rot mar onggga ofogog enesi, beda iwa tein ita idou onggga erek koma.

²¹ Gij Mar Efeyi Ebsi bera Tuhan anggot mar osok gij rusnok onggga rimfesij mar gu iwa gij oga onggga iwa idou enebriyi gij efen ofou guru. Ofa agot oida, "Didif dumobk rusnok onggga rusodosa skoita rusnok kef jeskaseda riflesij mar oisouska dedin dufoka gu rua koma. Tina rua runororu mar koma onggga rusnok rusodosa ranggot rot gu rua guri. Didif disinsa tein dimagot mar gu rua. Tina rua runororu mar koma onggga Didif danggot gu rua tein guri."

²² Erek koma jefeda gij mona onggga rusnok rimfesij mar gij oga egens onggga rua risinsa rinejginaga rot

enesi, beda koma enerek orocunc rot mar onswos gu rusnok onnga ruroru Allah fob guru. Tina oga egens koma bera erek orocunc rot mar onswos gu rusnok onnga runoruru Allah enesi. Tina gij mona onnga rusnok rifesij rot mar onnga Allah oncunc gu rua gij rudou efesi skoita rusnok enjineg, beda koma erek orocunc rot mar onswos gu rusnok onnga ruroru Allah fob. Tina mar koma enerek orocunc nou rusnok onnga runoruru Allah enesi, guru.

²³ Koma bera, gij mona juens iwa jera rusnok onnga Kristen nomnaga imohoturuma gij Mod Ari efesi. Beda iwa nomnaga ifesij mar gij oga egens onnga iwa isinsa inejginaga rot efen ofou enesi. Beda ainsa koma tein rusnok rineya onnga rudou enebriyi gij oga onswos ofoukou koma efen ofou guru riker morototuma jera iwa. Era rusnok rineya onnga runoruru Yesus enesi ruiru gij Mod Ari morototuma jera iwa. Noba rua tein rudou enebriyi gij oga insa koma ofoukou onnga iwa imfesij insa koma guru. Erek koma jefeda rusnok insa koma rumosujohu rot oida iwa nomnaga bera erek merei.

²⁴ Tina onnga oufa bera, iwa nomnaga ifesij mar gij oga onnga idou ebriyi gij onnga Allah ocunc gu orofosut osnok egens egens gij odou efesi fob ojomu. Noba erek osnok egens onnga onoruru Allah rot tenten enesi era onnga odou enebriyi gij Allah oga rot tenten enesi oira gij Mod Ari, beda mar koma nomnaga onnga ofa engg jeska iwa omorocunc rot tenten gu osnok egens koma. Fogora ofa efen odou emebriyi gij rot oida ofa efen mar onnga oska enah gu ofa ros.

²⁵ Beda, jeska mar onnga oska onnga ofa endemi gij odou efesi ah tomnomna fob, jefeda ofa omain

keingg esinsa ofoka fogora omougif gu Allah. Noba ofa emagot rot tenten gu iwa nomnaga oida, "Allah bera engker morototuma jera iwa rot tenten fob."

²⁶ Jefeda edohuji, ebeibeyaif didif dudou os dagot gu iwa osok gij mar onnga oufamofa nou iwa. Koma bera, gij mona onnga iwa imohoturuma jeskaseda yugif gu Allah, beda osnok egens odou os of medemer ni, noba osnok egema deika odou os oftufu rot Allah oga ni, noba rusnok rineya rudou os riflesij rot mar onnga Allah oncunc gu rua gij rudou efesi ni, noba rineya deika rudou os riflesij mar gij oga egens onnga rua risinsa rinejginaga rot guru ni, noba osnok egema deika odou os agot rot mar onnga rusnok rimfesij gij oga egens koma efen ofou ni. Tina onnga ofoufem bera mar onnga iwa nomnaga itunggom bera omofij rusnok Mod Ari nomnaga tein ojomu si. Noba ineita mar koma nou isinsiyai ojomu guru.

²⁷ Koma bera, erek gosnok egeka era rusnok rugomu rudou os riflesij mar gij oga egens onnga rua risinsa rinejginaga rot enesi, beda osnok egens efesij mar jeska fog. Beda ofa onnga egeka efesij mar deika. Beda ofa onnga orgomu efesij mar deika. Tina inoromohohuma rot mar insa koma guru. Beda ainsa koma tein osnok egens onnga efen owesa efek jeska Allah bera agot rot mar onnga rua rimfesij gij oga egens koma efen ofou.

²⁸ Tina erek rusnok rineya rinesma owesa efek jeskaseda riflesij rot oga egens insa koma efen ofou guru, beda rusnok insa koma rinefesij mar gij oga egens koma onnga ofa enejginaga rot guru. Mar koma onnga rua rudou os riflesij rot bera riflesij gij rudou efesi gu Allah ojomu.

²⁹ Erek koma tein rot rusnok onggarsma owesa efek jeskasada ragot rot mar onggars Allah oncunc gij rudou efesi gu rusnok enjineg. Beda adaij nou rusnok egeka era rugomu ragot mar deika ojomu. Noba rusnok rineya onggars ringker gij Mod Ari efesi insa koma rig rot mar onggars rusnok insa koma rimfesij. Beda rua rusujohu rot koisoisa oida mar koma bera en jeska Allah ei, era enen jeska Ofa guru ei.

³⁰ Noba erek Allah ocunc mar gu osnok egens gij odou efesi deika, beda osnok egens insa koma onggars emfesij mar sismeni bera eker ai juens fog. Beda osnok egens onggars okahma insa koma agot rot mar koma onggars Allah oncunc gu ofa gij odou efesi sismeni fog.

³¹ Iwa ita mar jeni erek koma jeskasada gij mona onggars osnok egens anggot mar jeska fob, beda osnok egema agot mar deika, beda osnok egema deika. Iwa ita erek koma jeskasada rusnok nomnaga tein rimeg rot fogora rudou emebriyi gij mar koma tein. Noba rua tein rimeita rudou ahais rot ojomuja.

³² Iwa ita mar erek insa koma ojomu. Jeska adaij nou osnok egens onggars emfesij mar onggars Allah ocunc gu ofa gij odou efesi jeskasada eker keingg ai juens fog, beda emagot mar deika.

³³ Jeska Allah bera odou os rot oida mimif mita mar nomnaga erek egens ojomu noba muga enekirsema rot guru. Rusnok nomnaga onggars ruroru Yesus fob gij monuh enjineg tein bera rita mar erek insa koma ojomu.

³⁴ Erek koma tein, gij mona onggars rusnok rumohoturuma jeskasada rugif gu Allah, beda rujager rinagot mar guru, tina riker toumou ojomu. Noba

ongga oufa bera rua rugif gu rerin rahiner ojgomu, jeska mar koma bera onga hukum Musa anggot rot fob.

³⁵ Noba erek rujager koma rusujohu rot mar gij mona onga rusnok rumohoturuma fob, beda rua rimejeka gu rerin rahiner rot mar insa koma jah rerin mod sismeni fog ojgomu si. Jeska enadaij nou rujager rimfesij rot mar gij mona onga rusnok rumohoturuma jeskaseda rugif gu Allah guru.

³⁶ Didif dijinaga rot oida mar insa koma bera iwa onga kota Korintus ineita rot tenten enesi. Tina erek iwa isujohu rot oida iwa bera onga yanggot rot Allah oga gu rusnok enjgineg ei, noba meneya bera gurei? Era, erek iwa bera onga ingg rot Allah oga fob ei, noba rusnok enjgineg bera enesei?

³⁷ Erek rineya jah suma risitit risinsa rufoka rot oida rua bera rinsma owesa efek jeska Efena Ebsi Allah jeskaseda ragot rot mar onga Allah fob oncunc gu rua gij rudou efesi ojgomu, era oida rua rinsma owesa efek onga enjgineg jeska Efena Ebsi Allah deika ei. Jefeda adaij nou rua ragot rot oida mar onga didif dunogu insa kef bera en jeska Allah rot tenten ojgomu.

³⁸ Tina erek rua insa koma rudobu joug rot mar koma ei, beda mimif mijginaga rot oida Allah onocunc mar gij rudou efesi rot tenten guru. Jefeda iwa inororu rerin ruga insa koma guru.

³⁹ Erek koma jefeda edohuji, iwa irejgei gu Allah ojgomu jeskaseda iwa isma owesa efek jeskaseda yanggot rot mar onga Ofa oncunc gu iwa gij idou efesi skoita rusnok enjgineg. Noba iwa tein ineyahehir joug rusnok onga rinsma owesa efek jeskaseda

rifesij mar gij oga egens onnga rinejginaga rot enesi guru.

⁴⁰Tina gij mona onnga iwa imohoturuma jeskaseda yugif gu Allah, beda ita mar nomnaga rot iskusk ojgomu noba yuga enekirsema rot mar guru.

15¹Edohuji, ebeibeyaif didif dudou os disisi keingg iwa sons deika osok gij Allah oga onnga oufamofa koma onnga didif dimfesij gu iwa sis fob. Oga onnga oufamofa insa koma bera onnga iwa inroru fob noba onjoros mona deisef tein iwa bera iroru oga koma ojgomuja.

²Noba erek iwa iroru oga onnga oufamofa insa koma, beda iwa imesma eiteij ah onnga efeinah jeska Allah. Tina erek iwa inroru oga insa koma guru, tina iwa iroru mar enjineg tein onnga erek tenten guru, beda koma onofij iwa guru. Jeska koma eneita eiteij ah onnga efeinah gu iwa guru.

³Erek koma jeska mar insa koma nomnaga onnga didif dimfesij gu iwa sis fob bera dinsma jeska Tuhan sis fob. Noba mar koma onnga didif dimfesij insa koma bera erek ofoufem eteb. Mar koma bera, Kristus agos tumu mega salib nou mimif jeskaseda osuwa mimif jeska mifmin mar onnga oska nomnaga.

⁴Beda rusnok rinsah Ofa efen efaga gij mamu efesi. Noba gij mona onnga orgomu fob, beda Allah omfra Ofa jeska anggos. Noba mar koma nomnaga ororu jeni mar onnga runggu gij Mar Efeyi Ebsi sismeni fob.

⁵beda Yesus oncunc esinsa efaga gu Petrus sismeni fogora gu efen ruforoker rufok setka kungkob erfeka.

⁶Beda Ofa ocunc efen efaga gu efen rusnok rufok wuntin cinja onnga ruroru Ofa tein. Noba rusnok koma rineya ragos fob, tina rufoukou bera rifena ebah ros.

⁷ Beda Ofa ocunc efen efaga gu Yakobus fogora gu efen rasul-rasul nomnaga tein.

⁸ Noba gij mona kahma deika beda Ofa ocunc esinsa gu didif tein onggga erek rasul onggga osuira. Jeska erek eferatefa egens onggga ojaga enesejah nou onjuj rot enesi, tina onjuj ojgomu, beda erek koma tein sis fob didif tein dinesejah jeskaseda dija erek rasul enesi. Erek koma tina Allah oncunc didif erek rasul ojgomu.

⁹ Erek koma jefeda didif direk rasul egens onggga Tuhan efen noba onggga dufoka enaksa morototuma erek rasul-rasul enjgineg insa koma guru. Noba enadaij nou rusnok rijeka gu didif erek rasul guru. Jeska sis fob bera didif dumfra mar okum eteb keingg rusnok onggga ruroru Yesus fob ojgomuja.

¹⁰ Tina ebeibeyaif didif bera dita mar erek rasul gij mona deisef jeska Allah eita oufamofa eteb gu didif jeni mar onggga Ofa esinsa ondou os rot ojgomu. Noba koma onggga Ofa ontunggom nou didif bera enah erek rourou ojgomu guru. Jeska didif difarur erek ahais ekirsa jeska rasul-rasul enjgineg nomnaga. Tina didif dinefarur mar kef ororu jeni disinsa dedin owesa efek guru. Jeska Allah bera onggga eita oufamofa eteb gu didif fogora dimfarur gij mar erek insa koma ojgomu.

¹¹ Erek koma jefeda erek iwa ingg rot Allah oga onggga oufamofa koma jeska didif era jeska rasul-rasul enjgineg, beda koma onofoufem guru. Jeska mar onggga memef nomnaga memfesij rot bera efen ofou onggga erek morototuma ojgomu. Noba onggga ofoufem bera iwa iroru Allah oga onggga oufamofa insa koma ojgomuja.

¹² Memef onnga rasul-rasul bera memfesij gu iwa rot oida Allah omfra Yesus Kristus jeska anggos fob. Tina teinefo fogora rineya jeska iwa ragot oida rusnok onnga ranggos fob bera rinedebecki deika guru erek komo.

¹³ Jeska, erek iwa isujohu rot oida rusnok rinedebecki jeska ranggos guru, beda koma orocunc rot oida Allah onofra Yesus Kristus tein jeska anggos guru.

¹⁴ Noba erek Allah onofra Yesus Kristus jeska anggos guru, beda koma orocunc rot oida mar onnga memef memfesij rot insa koma bera onofij iwa jinaga guru. Jefeda Allah oga onnga oufamofa insa koma onnga iwa inroru bera onofij iwa oskiyai tein jinaga guru.

¹⁵ Noba erek rusnok rinedebecki jeska ranggos guru, beda Allah tein onofra Yesus Kristus jeska anggos guru. Noba onnga okum ekirsa bera koma tein orocunc rot mar onnga memef memfesij insa koma rot noba onnga en jeska Allah bera erek ocuwei mar ojgomu. Jeska memef memfesij rot oida Allah omfra Yesus Kristus jeska anggos fob.

¹⁶ Jefeda erek rua onnga ranggos rinedebecki deika guru, beda Allah onofra Yesus Kristus jeska anggos guru.

¹⁷ Noba erek Yesus Kristus enedebecki jeska anggos guru, beda mar onnga iwa iroru bera onofij iwa erek oskiyai tein guru. Jeska yeyin mar onnga oska nomnaga bera ah gu iwa ros ojgomu.

¹⁸ Erek koma tein rot rusnok onnga ruroru Yesus Kristus sis fob tina onnga ranggos fob. Rua tein rinedebecki jeska ranggos guru, tina riseiseifa ojgomu.

¹⁹ Jefeda koma tein erek mimif muisum gij Yesus Kristus rot mifmin miteij ah ebeibeyaif ojgomu. Noba rusnok enjgineg rimagot oida mimif bera mirek rusnok onnga rudou omodgema rot ojgomu ros. Tina erek koma guru.

²⁰ Tina onnga tenten bera Allah omfra Yesus Kristus jeska anggos fob. Noba jeska Ofa bera onnga endebecki jeska anggos rot sismeni, beda koma erek orocunc rot oida rusnok onnga Kristen nomnaga onnga ranggos fob bera rimebecki jeska ranggos si.

²¹ Jeska mar onnga oska onnga osnok egens ontunggom sis fob bera orok mokcin rusnok nomnaga jefeda rijagos rot ojgomu. Beda erek koma tein mar onnga oufa onnga osnok egens ontunggom fob bera orofij rusnok nomnaga fogora rimebecki jeska ranggos rot si.

²² Jeska Adam, onnga osnok egens onnga sismeni, onororu Allah oga nomnaga rot tenten guru, jefeda efen mar onnga oska koma bera orok mokcin mimif nomnaga onnga munjuj jeska ofa tein fob, fogora magos rot ojgomu. Tina Yesus Kristus ororu Allah oga nomnaga rot tenten gij mona onnga Ofa engker gu mebif ros. Jefeda mar onnga oufamofa koma bera onnga ereita eiteij ah onnga efeinah gu mimif onnga erek efen rusnok.

²³ Tina Yesus Kristus jera efen rusnok nomnaga rimebecki jeska ranggos morototuma gij mona egens ojgomu guru. Jeska Yesus Kristus bera onnga endebecki jeska anggos rot sismeni fog. Ofa bera onnga sismeni rot rusnok rufoukou onnga rimebecki jeska ragos. Noba gij mona onnga Ofa

ongksons en, beda efen rusnok tein rimededebecki jeska ranggos si.

²⁴ Gij mona onnga enja ejgwaga ensaga fob, beda Yesus Kristus omoku owesa efek jeska rua onnga rufoka ereij keingg rusnok nomnaga, jera rua onnga rufoka aksa nomnaga onnga ringkirsa rot Allah oga. Beda Ofa omofra mar okum eteb keingg rua fogora rumorowora ojgomu. Erek koma beda Yesus Kristus emaha owesa efek insa koma nomnaga gu efen meka Allah. Beda Allah omofoka ereij keingg rusnok nomnaga ojgomuja.

²⁵ Erek koma jeska Yesus Kristus omofoka ereij keingg rusnok ojgomu onjoros mona onnga Ofa omoin keingg rusnok nomnaga onnga rufogog rot Ofa.

²⁶ Erek koma tein rot mar onnga oska koma onnga orotunggom mimif fogora magos ojgomu. Gij mona onnga Yesus otunggom mar nomnaga erek omoisa fob, beda Ofa emagei owesa efek jeska mar onnga oska insa koma fogora mimif minemeesa rot manggos deika guru.

²⁷ Jeska runggu gj Mar Efeyi Ebsi rot oida, "Oisouska mar onnga Allah ontunggom fob bera Yesus Kristus omofoka ereij keingg mar nomnaga onnga efen owesa efek ojgomuja." Noba mar insa koma gj Mar Efeyi Ebsi agot oida, "Omofoka ereij keingg mar nomnaga," tina koma onorocunc rot oida Ofa omofoka ereij keingg Allah tein guru. Jeska oisouska mar onnga Allah ontunggom fob bera Yesus Kristus omofoka ereij keingg mar nomnaga ojgomuja.

²⁸ Gij mona onnga Yesus Kristus ofoka ereij keingg mar nomnaga fob, beda Ofa omoin keingg esinsa ofoka gu efen meka Allah. Jeska erek didif danggot

insa koma oida, Allah bera ongg a ocunc Yesus Kristus jeskaseda ofoka ereij keingg mar nomnaga. Tina Yesus Kristus bera omain keingg esinsa ofoka erek koma jeskaseda Allah emeita ofoka ongg aksa ekirsa noba ongg ereij keingg mar nomnaga.

²⁹ Ebeibeyaif didif dudou os dagot mar egens deika osok gij rua insa koma ongg ranggot rot oida rusnok ongg ranggos fob bera rinedebecki deika guru. Erek mar ongg rua ranggot insa bera tenten ei, beda teinefo rot rusnok ebic egens koma ongg rita baptis oisouska Yesus ofoka ofosma jueka, sismeni rot risinsa, beda rot ofosma jueka rot rerin rusnok ongg ranggos fob ongg rineita baptis enesi. Tina erek rusnok rinedebecki jeska ranggos deika guru, beda mar ongg rusnok ebic egens insa koma runtunggom bera onofij rua era rerin rusnok ongg ranggos koma oskiyai tein guru.

³⁰ Erek koma tein memef bera memef meita mifera okora jeska rusnok ongg rufogog rot memef jeska memef moftuftu rot Allah oga ongg oufamofa. Tina erek rusnok rinedebecki jeska ranggos guru, beda mar ongg memef mencira gij insa koma bera onofij memef jinaga guru.

³¹ Edohuji, gij orofosut mona bera rusnok ongg rufogog rot didif bera rita mar ongg oska gu didif fogora doida danggos rot. Koma jeska didif difesij rot Allah oga gu rusnok ojgomu. Koma erek tenten, tina dudou erirei rot ojgomu. Noba didif disitit rot iwa ifoka tein gu rusnok enjgineg jeska iwa iroru mifmin Tuhan Yesus Kristus rot tenten ojgomuja.

³² Noba gij kota Efesus kef bera didif dita dudou ahais rot rusnok jah sif ongg erek rufogog eteb doska. Tina erek rusnok rinedebecki jeska ranggos

guru, beda mar koma onggga didif dincira rot gij Kota Efesus bera onofij didif jinaga guru. Jefeda erek rusnok rinedebecki jeska ranggos guru, beda mimif tein mita mar erek rusnok onggga Yunani ranggot rot ojgomu. Rua ragot oida, "Mimif mit maat ni, mij anggur efei ni, mifaga ouka eteb ojgomuja ni, jeska mifmin miteij ah erek estir ojgomu, beda mimif magos noba mifaga tein etefa ojgomu."

³³ Tina erek koma guru. Noba onggga oufamofa bera, iwa ibes ifaga jeska rusnok onggga ruhurmei mar rot oida rusnok rinedebecki jeska ranggos guru ojgomu. Erek iwa inebes ifaga jeska rua guru, beda rua rumorokrusa iwa skoita mar onggga tenten guru.

³⁴ Iwa ibs idou efesi rot mar onggga didif danggot rot gu iwa ojgomu, noba inororu mar onggga oska insa koma deika guru. Jeska rineya jeska iwa rudou osumsumu rot Allah oga ros. Noba koma erek oroh mojen gu iwa nomnaga tein.

³⁵ Didif danggot rot oida rusnok rimebebecki jeska ranggos fob, tina rusnok rineya rijekjeka rudou rot mar insa koma oida, "Rua onggga ranggos bera rimebebecki erek teinefa? Noba rua rimeita rifaga onggga efeinah tein onggga erek teinefa?"

³⁶ Wah, rua onggga rinjekjeka rudou efesi rot erek koma bera erek rudou osumsumu eteb ros! Gij mona onggga iwa irefa metrem efej, beda efej koma etefa fob fogora ofoita emer erek efeinah deika.

³⁷ Noba gij mona onggga iwa irefa maat efej insa koma era maat efej enjgineg tein bera iwa inerefa efaga guru, tina iwa irefa efej ojgomu.

³⁸ Beda Allah esinsiyai bera emeita maat efej koma efen efaga jeni erek onggga Ofa ondou os rot ojgomu.

Noba Ofa eita efaga onggga erek toga toga gu maat efej nomnaga.

³⁹ Marska nomnaga onggga efena ebah gu mebif efen efaga onggga erek toga toga. Koma bera, mek efen efaga onggga toga jeska mem. Noba mem efen efaga onggga toga jeska mos. Beda rusnok rerin rifaga toga jeska marska insa kef tein nomnaga.

⁴⁰ Erek koma tein, mar onggga angh gu mebaga erek malaikat-malaikat bera rerin rifaga onggga onggoska tina onggga erek toga jeska rusnok mebif rerin rifaga onggga onggoska tein.

⁴¹ Noba mowa eisa egigir efen onggoska erek toga jeska mesta. Noba mesta eisa egigir efen onggoska onggga toga jeska motur. Noba orofosutut motur koma egens egens eisa egigir efen onggoska onggga erek toga toga.

⁴² Erek koma tein rot rusnok gij mona onggga Allah omfra rua jeska ranggos fob. Koma bera, gij mona onggga rusnok ranggos beda rusnok enjgineg risah rifaga koma gij moksu, beda rifaga koma etefa ojomu. Tina gij mona onggga Allah omfra rusnok jeska ranggos fob, beda rua rimesma rifaga onggga enetefa deika guru.

⁴³ Noba rifaga insa koma onggga rusnok rinsah gij moksu bera erek mar onggga oroh mojen rot gu mimif nomnaga ojomu. Jeska gij mona onggga mimif mimfena ebah ros, beda mifmin mifaga mufora eriaga ni, marenmi ni, jefeda mifmin mifaga erek oska ojomu. Tina gij mona onggga Allah omfra rifaga insa koma jeska ranggos, beda rimeita rifaga onggga erek onggoska eteb ojomu si. Noba gij mona onggga rusnok rinsah rifaga insa koma gij moksu fob, beda rifaga koma onowesa efek deika guru. Tina gij mona

ongga Allah omfra rifaga koma jeska ranggos, beda rifaga koma emeita owesa efek eteb si.

⁴⁴ Gij mona onnga mimif manggos, beda rua risah mifaga onnga mebif efen ojgomu. Noba gij mona onnga Allah omfra mifaga jeska manggos fob, beda mimif misma mifaga onnga erek mebaga efen deika. Jeska erek mifmin mifaga onnga angh gu mebif gij mona ebeibeyaif, beda erek koma tein, gij mona kahma bera mifmin mifaga erek toga onnga angh gu mebaga.

⁴⁵ Koma erek mar egens onnga runggu gij Mar Efeyi Ebsi oida, "Allah otunggom Adam onnga sismeni jeskaseda efena ebah." Noba Yesus Kristus, onnga erek Adam onnga osuira, bera erek efena onnga eita eiteij ah gu mimif. Jeska oisouska Ofa bera mimif misma mifaga onnga efeinah jeskaseda miker gu mebaga rot ah aibin ojgomuja.

⁴⁶ Allah eneita mifaga gu mimif jeskaseda mingker gu mebaga sismeni fog guru. Tina ofa eita mifaga koma jeskaseda mingker gu mebif sismeni fog.

⁴⁷ Noba Allah era mebi fogora orotunggom Adam erek osnok egens onnga sismeni. Tina Yesus Kristus, onnga erek Adam onnga egeka, bera en teisis jeska mebaga ojgomu.

⁴⁸ Noba orofosut osnok egens egens bera efen efaga erek Adam efen, jeska rusnok nomnaga runjuj en jeska ofa. Erek koma tein, orofosut osnok egens egens onnga ruroru Yesus Kristus onnga en jeska mebaga fob bera rimeita rifaga erek Ofa efen gu mebaga si.

⁴⁹ Beda koma orocunc rot gu mimif oida ebeibeyaif bera mifmin mifaga kef jeskaseda mingker gu mebif ojgomu. Tina gij mona onnga kahma deika beda

mifmin mifaga onnga erek toga jeskaseda mingker gu mebaga ojomu.

⁵⁰ Edohujia, didif dudou os difesij gu iwa juens deika osok gij mar onnga didif dumftufts insa koma rot efen ofou. Rusnok rifaga onnga Allah ontunggom gu mebif bera efen mar erek rugufu ni, rufogu ni, jera mar enjineg tein. Tina enadaj nou rusnok rifaga ringker gu mebaga onnga Allah ofoka ereij keingg jinaga guru. Koma bera, rusnok rifaga onnga ranggos noba ritefa bera rineja riker gu mebaga guru. Jah suma bera mar egema tein enagos era enetefa tein guru.

⁵¹ Erek koma, tina idou ah keingg rot mar onnga ai juens dimagot rot gu iwa, jeska mar koma bera ah jejema jeska rusnok nomnaga sis fob. Tina ebeibeyaif Allah oncunc mar koma gu mimif fob. Mar koma bera, gij mona onnga Tuhan onksons en beda rineya jeska mimif mifena ebah ros. Tina mimif nomnaga mimeita mifaga onnga efeinah gij mona insa koma tein si.

⁵² Mar insa koma omorogna keingg mimif ebeirens doska erek moc efnefna era erek miteij efna ebeirens tein. Beda ainsa koma tein bera mimif mimeg mar erek malaikat-malaikat rin manghi mei oga rot okag. Koma erek orois gu rusnok nomnaga rot oida mona onnga enja ejgwaga bera ensaga fob. Noba askesi malaikat-malaikat rin manghi mei ros, beda rusnok onnga Kristen nomnaga onnga ranggos sis fob bera rimebebecki rot rerin rifaga onnga efeinah noba onnga enetefa deika guru. Rifaga koma bera angh rot ah aibin gu mebaga ojomuja. Fogora mimif onnga mifena ebah ros bera mimeita mifaga onnga efeinah deika tein.

⁵³ Mar insa koma emecira erek koma sismeni fog jeskaseda mimif miferwei mifaga onnga etefa rot mifaga onnga enetefa deika guru. Noba mimif mimeferwei mifaga kef onnga emagos rot mifaga onnga enagos deika guru.

⁵⁴ Gij mona onnga mimif mimferwei mifmin mifaga erek koma fob, beda mar onnga runngu gj Mar Efeyi Ebsi sis fob bera emah gj efera fob si. Mar koma bera agot oida, "Mimif mifaga ouka eteb noba misitit rot muga eteb gu Allah, jeska Ofa omfra mar okum keingg rusnok onnga rufogog rot Ofa fogora rijeseiseifa fob."

⁵⁵ Noba mar egema onnga angh gj Mar Efeyi Ebsi bera agot oida, "Allah onsuwa mimif jeska mar onnga otunggom mimif fogora magos sis fob. Jefeda mimif minemeesa rot manggos deika guru. Jeska mimif tein miker rot mona onnga ah aibin ojgomuja."

⁵⁶ Rusnok rimeesa nou ragos jeska rua rimesma okum rot mar onnga oska onnga rua runtunggom gj mona onnga rifena ebah ros. Noba rua rimesma mar onnga okum koma jeska rua runororu hukum Allah guru.

⁵⁷ Tina mimif muis oufamofa eteb gu Allah jeska mar insa koma nomnaga enecirej mimif deika guru. Jeska mifmin Tuhan Yesus Kristus anggos tumu mega salib nou mimif jeskaseda orosuna rot mifmin mar onnga oska jeska mudou efesi fob.

⁵⁸ Edohuji onnga dudou okora rot, jeska mimif mijginaga rot oida mimedebeki jeska manggos si, jefeda iwa ita idou ahais ojgomu rot mar onnga iwa itunggom nou Tuhan. Iwa ita mar erek koma ojgomuja, jeska iwa ijginaga rot oida mar nomnaga

ongga iwa intunggom nou Tuhan bera omofij iwa si. Jeska mar koma bera erek ofoufem ojgomu nou iwa.

16¹ Ebeibeyaif didif dudou os dagot mar osok gij fifi onggga iwa inghoturu nou Allah efen rusnok gij kota Yerusalem. Didif dudou os rot oida iwa itunggom mar erek didif dumftufts rot gu rua onggga rururu Yesus gij monuh Galatia sis fob tein.

² Koma bera, gij orofosut mona onggga Ari, beda orofosut osnok egens egens ekeba fifi egema nou Allah jeni erek rua egens egens rerin owesa efek rot ojgomu. Iwa itunggom mar erek koma jeskaseda gij mona onggga didif dinsaga jah kota Korintus fob, beda iwa inghoturu fifi koma fob.

³ Beda iwa icunc rusnok rineya onggga iwa idou iredi rot rua ojgomu. Noba gij mona onggga didif dinsaga jah suma fob, beda didif dimeita surat onggga onggag rot rua fogora rumorka skoita rua onggga ringker jah kota Yerusalem. Beda didif dumobk rua rot fifi tein onggga iwa ingkeba fob jah Allah efen rusnok gij kota Yerusalem.

⁴ Noba erek ofoufem rot beda didif tein dimeja jah suma morototuma jera rua.

⁵ Didif dimeja jah monuh Makedonia sismeni fog, fogora dumojogog iwa gij kota Korintus tein.

⁶ Beda didif dudou os diker jera iwa jah suma onjoros mona onggga mof eteb omoisa fob ei era gurei, didif dinejginaga rot enesi. Tina erek didif diker dektek jera iwa, beda oufa nou iwa yufij didif jeskaseda disejah mar nou monuh kenefo onggga didif dimeja gij.

⁷ Erek didif dujogog iwa ebeibeyaif, beda didif diker erek mona onggga estir ojgomu, fogora dija jah monuh Makedonia. Tina didif dunodou os rot erek

koma guru. Jeska erek Tuhan oitij rot, beda gij mona kahma bera didif dimeker jera iwa erek mona dektek tein.

⁸ Ebeibeyaif bera didif diker gij kota Efesus ojgomuja onjoros mona Pentakosta ensaga fob.

⁹ Jeska gij mona ebeibeyaif bera rusnok rufoukou jah sif onnga rineg rot Allah oga enesi. Noba rusnok rufoukou onnga rufogog rot didif tein, tina didif diker ojgomu jeskaseda difarur rot Allah juens deika fog.

¹⁰ Erek Timotius enjah skoita iwa, beda iwa iroun ofa rot idou onnga ongnoska ojgomu jeskaseda ofa odou ererei jera iwa. Jeska ofa bera erek osnok egens onnga emfarur rot Tuhan morototuma erek didif tein fob.

¹¹ Enadaij nou rusnok rineya rifena oskereta rot ofa jinaga guru. Tina iwa yufij ofa ojgomu jeskaseda ofa omoksons skoita didif. Beda iwa ita mar erek koma jeska didif diker nou ofa jera dedin edohujir enjgineg tein.

¹² Osok gij Apolos bera, didif diradgodu ofa ojgomuja jeskaseda ofa eja morototuma jera mifmin mohujir enjgineg tein skoita iwa, tina ofa onodou os eja gij mona ebeibeyaif enesi. Jefeda gij mona kahma beda ofa emeja skoita iwa si.

¹³ Iwa ibes ifaga jeska mar onnga oska noba iroun Allah oga rot ahais ojgomuja. Noba iwa enemeesa rot mar egema tein guru, tina yuku yufos ojgomu erek rua onnga rururu Yesus Kristus rot tenten. Noba ita idou ahais gij mar onnga ereneni iwa.

¹⁴ Iwa itunggom mar nomnaga jera idou onnga okora rot rusnok enjgineg tein.

¹⁵ Iwa ijginaga rot oida Stefanus jera efen rusnok onnga rinkger jera ofa bera onnga rururu Yesus

sismeni jah monuh Akhaya. Noba ebeibeyaif rua raha risinsa jeskaseda rufij Allah efen rusnok ojgomu.

¹⁶ Edohuji, didif duis rot duga eteb gu iwa jeskaseda iwa yugif gu yeyin ebirfager Mod Ari onnga rita mar erek rua insa koma jera rusnok nomnaga onnga rimfarur morototuma jera rua.

¹⁷ Didif dudou efeneinei rot iwa jeska iwa ineker morototuma jera didif jah sif guru, tina ainsa kef bera Stefanus ni, Fortunatus ni, Akhaikus ni, rua nomnaga rin skoita didif fob. Noba koma eita dudou erirei rot tein.

¹⁸ Beda rua rufij didif fogora dudou ahais morototuma erek rua rufij iwa sis fob tein. Rusnok onnga rita mar erek koma bera erek ofoufem nou mimif nomnaga.

¹⁹ Rusnok nomnaga onnga rumohoturuma gij Mod Ari onnga ont jah suma gij monuh Asia ruisu iwa. Noba Akwila jera Priskila jera rusnok nomnaga onnga rumohoturuma gij gegang mod efesi bera rua ruisu iwa.

²⁰ Noba mifmin mohujir onnga rururu Yesus jah kota Efesus kef tein bera ruisu iwa. Gij mona onnga iwa imorodosuma, beda icunc idou onnga oufamofa moguma ojgomu, jeska koma bera orocunc rot oida iwa idou omokorema fob.

²¹ Ebeibeyaif didif disinsa bera dugu gij surat egens kef rot oida, "Didif Paulus tein duis oufamofa eteb gu iwa."

²² Erek rusnok rineya rudou onokora rot Tuhan guru, beda mar okum emah keingg rua ojgomu. Tina mimif magot oida, "Maranatha," onnga efen ofou oida, "Tuhan, bua bin ojgomu."

²³ Didif dui gu Tuhan jeskaseda Ofa eita oufamofa eteb gu iwa ojgomuja.

²⁴ Didif dudou okora rot iwa nomnaga jeska mimif nomnaga bera erek egens oisouska Yesus Kristus fob. Ainsoma.

2 Korintus

1 ¹ Surat kef jeska didif Paulus onnga direk Yesus Kristus efen rasul. Noba didif dinja erek erek rasul egens koma oisouska Allah odou ejginaga rot. Noba mifmin muhuj Timotius bera eneker jera didif jah sif. Didif disa surat kef skoita iwa onnga Allah efen rusnok onnga rururu Yesus Kristus fob gij kota Korintus. Noba surat kef tein bera nou Allah efen rusnok nomnaga onnga ringker suma suma rejrej monuh Akaya tein.

² Didif duis gu mifmin mika Allah jera Tuhan Yesus Kristus jeskaseda Ofa ocunc efen odou onnga oufamofa eteb skoita iwa, noba jeskaseda Ofa eita eiteij ah onnga eskeiramera gu iwa nomnaga tein.

³ Mimif muis oufamofa eteb gu Allah onnga Tuhan Yesus Kristus efen meka noba onnga Ofa tein ougif gu erek efen Allah. Allah bera erek mifmin mika onnga odou okora eteb rot mimif. Noba Ofa bera erek mifmin Allah onnga ofij mimif rot mar okum onnga ah keingg mimif jeskaseda mudou eskeiramera ojpgomuja.

⁴ Noba oisouska mar insa koma onnga Ofa ofij mimif rot bera mimif tein mufij rusnok enjgineg rot rerin mar okum onnga ah keingg rua.

⁵ Noba erek mimif mita mifera okora gij mar onnga ah keingg mimif jeska mudou egens jera Yesus Kristus fob, beda oisouska Ofa bera mimeita mudou onnga eskeiramera eteb tein si.

⁶ Noba erek mar onnga okum ah keingg memef, beda koma tein bera ereita idou eskeiramera noba

ereita eiteij ah onnga efeinah gu iwa tein si. Jeska Allah omftuftu memef gij mar okum insa koma onnga ah keingg memef fob, beda memef mesma modou onnga eskeiramera ojgomuja. Erek koma jefeda memef tein mejginaga rot teinefa mofij iwa gij mar onnga ah keingg iwa tein. Beda iwa tein imesma idou onnga eskeiramera ojgomuja. Noba iwa tein imot rot ahais gij mar onnga okum insa koma erek memef tein mot rot ahais gij ojgomu.

⁷ Jefeda memef moisum gij Allah rot tenten oida, erek iwa ita ifera okora rot mar onnga angh keingg iwa, beda Ofa omofij iwa jeskaseda imesma idou onnga eskeiramera tein ojgomuja si. Jeska Ofa bera onnga eisisi joug memef gij mona onnga mar insa koma askesi ah keingg memef sis fob.

⁸ Memef mudou os oida iwa ijginaga rot teinefa mar okum eteb angh keingg memef gij monuh Asia fob. Jeska mar onnga okum angh keingg memef jah suma ojgomuja onjoros modou esiri rot fogora mosujohu rot oida memagos ojgomu.

⁹ Memef mosujohu oida memagos rot si, erek osnok egens onnga hakim oga ojga rot oida ofa emagos ojgomu. Noba Allah oitij rot mar okum insa koma jeskaseda oroftuftu memef fogora monoisum gij mesinsa mefmen owesa efek guru, tina moisum gij Ofa efen owesa efek ojgomu. Jeska Ofa efen owesa efek onnga adaij nou ofra rusnok onnga ranggos tein.

¹⁰ Ofa onskotu memef jeska mar okum insa koma onnga angh keingg memef rot ahais fogora doida manggos rot fob. Noba memef moisum gij Ofa rot oida Ofa omoskotu memef jeska mar okum enjgineg onnga emah keingg memef gij mona kahma tein si.

¹¹ Noba Ofa omoskotu memef oisouska mar onnga iwa yum iteij rot gu Ofa nou memef ojgomuja tein si. Noba gij mona onnga Allah oroun gu iwa rot mar onnga iwa yum iteij rot, beda rusnok rufoukou rumois oufamofa eteb rot mar onnga Ofa ontunggom nou memef fob.

¹² Memef modou erirei eteb noba mesitit gu Allah tein, jeska memef mejginaga rot oida memef meita mar nou rusnok nomnaga rot modou onnga ocosu efei ahtah ojgomu, noba rot modou onnga oufamofa eteb skoita rua tein. Noba memef meita mar erek koma jeskaseda mofij iwa onnga iroru Yesus Kristus fob. Memef monotunggom mar insa koma oisouska mar onnga rusnok mebif rudou ebriyi gij rot guru. Tina memef motunggom mar insa koma oisouska Allah onnga omfij memef rot ojgomu.

¹³ Noba surat-surat onnga memef monggu skoita iwa bera erek osufou ojgomu jeskaseda iwa ik noba idou embriyi gij efen ofou tein.

¹⁴ Iwa idou ebriyi gij rot memef erek oskiyai ros. Tina didif dudou os rot oida iwa idou ebriyi gij rot memef erek eteb deika. Beda iwa imeita idou onnga erirei eteb rot memef fogora yagot mar onnga oufamofa osok gij memef skoita rusnok enjgineg. Beda memef modou emerirei eteb rot iwa fogora memagot mar onnga oufamofa rot iwa gij mona onnga Tuhan Yesus Kristus ongksons en tein fob si.

¹⁵ Didif dusujohu rot oida idou embriyi gij surat egens koma onnga didif dinsa skoita iwa sis fob rot efen ofou fob. Jefeda didif dumojogog iwa rot ofosma jueka deika si, fogora iwa imesma idou onnga oufamofa rot erek ofosma jueka deika tein.

¹⁶ Jeska didif dumojogog iwa askesi dincira jah monuh Makedonia. Beda didif dumojogog iwa deika gij mona onnga dungksions jeska monuh Makedonia si. Beda gij mona insa koma bera iwa imofij didif jeskaseda duksons jah monuh Yudea deika.

¹⁷ Didif dinsejah dudou efesi rot jeskaseda dimeja skoita iwa si. Tina enadaj nou didif dinja jah suma gij mona ebeibeyaif enesi. Jefeda erek iwa insujohu rot oida didif bera erek osnok egens onnga agot ebeirens rot oida, "Tenten dimen si," tina guru ei.

¹⁸ Erek koma tina mar onnga didif danggot ainsa kef bera erek tenten ojgomu, noba dunoga efei rot gu iwa jinaga guru. Jeska didif dimeita mar onnga didif danggen rot si morototuma erek Allah eita mar onnga Ofa anggen rot si.

¹⁹ Noba didif, Silas, jera Timotius tein bera momftuftu mar ofoukou osok gij Yesus Kristus onnga Allah efen efesa gu iwa ifekesa sis fob. Noba Yesus bera enerek osnok egens onnga agot mar rot ebeirens oida, "Tenten," tina guru, erek koma jinaga guru. Ofa omotunggom mar nomnaga onnga Ofa anggen rot si.

²⁰ Jeska mar onnga Allah tein anggen rot bera erek tenten ojgomu. Noba Ofa omotunggom mar insa koma nomnaga oisouska Yesus Kristus si. Jefeda oisouska Ofa efen owesa efek bera mimif magot oida, "Ainsoma," jeska mimif mijginaga rot oida Ofa omotunggom mar onnga Ofa anggen rot si. Beda mimif misitit efen ofoka rot tein ojgomu.

²¹ Noba Ofa bera onnga otunggom mimif jeskaseda mut rot ahais morototuma jera Yesus Kristus.

²² Ofa oncunc mimif erek efen rusnok onnga ebsi komowa fob. Noba Ofa obk Efena Ebsi onnga engker

gij mudou efesi fob. Noba koma orocunc rot oida mimif bera erek Ofa efen rusnok. Noba Efena Ebsi koma tein bera erek orocunc rot mar onnga oufamofa onnga Ofa anggen rot gij mona kahma tein si.

²³ Erek koma tina, erek didif dija skoita iwa gij mona ebeibeyaif ojgomu, beda dumoftuftu iwa gij mar ofoukou rot ahais fogora idou omokum rot didif ojgomu. Noba didif dudou onos rot erek koma guru. Jefeda didif dineja skoita iwa enesi. Noba Allah esinsa bera odou ejginaga rot oida mar onnga danggot rot insa kef bera erek tenten ojgomu.

²⁴ Noba memef monofoka ereij keingg iwa rot ahais osok gij mar meidu onnga iwa iroru ojgomu guru. Jeska iwa iroru Allah efen oga rot tenten fob. Tina onnga tenten bera, memef modou os mofij iwa jeskaseda iwa isma idou onnga erirei eteb deika ojgomuja.

2¹ Erek koma jefeda didif dusujohu rot oida dineja skoita iwa enesi jeskaseda idou onokum rot mar ofoukou onnga didif duftuftu gu iwa gij mona insa koma guru.

² Jeska erek didif dutunggom mar onnga ereita idou okumkum rot ojgomu, beda enadaj nou iwa ita mar nou didif onnga erek ereita didif dudou erirei eteb rot deika guru. Jeska yeyin idou bera okumkum rot mar ofoukou onnga didif dumftuftu rot gu iwa ojgomu. Jefeda didif dudou os erek koma guru.

³ Noba gij dedin surat onnga sismeni bera didif dunggu mar jera dudou onnga okumkum rot iwa noba onnga dibisa eteb rot iwa tein. Noba didif dunogu surat egens insa koma jeskaseda direita idou onnga okumkum rot ojgomu guru. Tina didif dugu surat egens koma jeskaseda iwa ik fogora imejginaga

rot oida didif dudou okora eteb rot iwa ojgomu. Didif dumftuftu iwa rot ahais gij surat insa koma fob jeskaseda gij mona onnga didif din skoita iwa fob, beda iwa imereita dudou erirei rot mar onnga oufamofa onnga iwa intunggom fob. Noba didif dijginaga rot tenten fob oida erek didif dudou erirei rot iwa, beda iwa idou eskeira rot tein si.

⁴(2:3)

⁵Sis fob bera didif dunggu gij surat egens insa koma onnga sismeni osok gij osnok egens koma onnga otunggom mar onnga oska jah gu iwa ifekesa fob. Noba mar onnga ofa ontunggom koma bera erek ereita dudou okum eteb rot ojgomu. Tina mar koma bera ereita iwa tein idou okum eteb ekirsa rot. Noba koma erek tenten, tina ainsa kef bera didif dudou onokum rot ofa deika guru.

⁶Jeska mar okum onnga iwa yumfra keingg ofa fob bera erek adaj nou ojgomu.

⁷Tina ebeibeyaif ofa engkikif jeska efen mar onnga oska fob. Jefeda iwa tein isuna rot ofa efen mar onnga oska insa koma ojgomu. Beda iwa yufij ofa rot efen odou onnga okumkum insa koma jeskaseda ofa odou enesiri rot mar okum koma onnga iwa yumfra keingg ofa ojgomuja guru.

⁸Jefeda didif duis gu iwa jeskaseda iwa icunc idou onnga okora rot ofa deika ojgomu.

⁹Didif dinsa surat onnga sismeni insa koma skoita iwa jeskaseda direneni idou efesi rot fogora dik rot oida iwa imororu mar nomnaga onnga didif danggot rot ei era gurei. Tina iwa iroru mar koma rot tenten fob.

¹⁰Noba iwa insuna rot ofa efen mar onnga oska fob, jefeda didif tein dunsuna rot mar koma fob.

Jeska mar onggaga ofa otunggom sis fob koma bera erek oska skoita didif tein. Noba gij mona onggaga didif dunsuna rot mar onggaga oska onggaga rusnok enjgineg runtunggom fob, beda didif dita mar erek koma oisouska owesa efek jeska Yesus Kristus ojgomu. Noba koma bera omofij iwa tein si.

¹¹ Jefeda iwa yufij osnok egens insa koma erek didif danggot rot jeskaseda enadaij nou Bilis orokrusa ofa deika rot guru. Jeska mimif mijginaga rot teinefa Bilis efen eita mar tein.

¹² Sis fob bera didif dija jah kota Troas jeskaseda duftu rot Yesus Kristus efen oga jah suma. Noba gij mona onggaga didif dinsaga jah suma fob, beda didif dik rot oida Tuhan eita efekesa nou didif jeskaseda dutunggom mar erek koma ojgomu.

¹³ Tina didif dudou efeneinei rot tein, jeska dunorodosu dedin edohuj Titus jah suma guru. Jefeda didif daisu bahasmero gu rusnok jah suma fogora dija jah monuh Makedonia ojgomu.

¹⁴ Erek koma, tina didif duis oufamofa eteb gu Allah rot mar onggaga Yesus Kristus ontunggom fob. Jeska Bilis, onggaga ofoka ereij keingg mimif sis fob, bera ensiri gu Ofa fob. Jefeda ebeibeyaif Yesus eja okag rot memef beda memef mecira rot Ofa efen oga onggaga oufamofa rejrej monuh nomnaga. Noba Allah efen oga insa koma bera erek mar efen ensesa onggaga erebirma rejrej skoita rusnok nomnaga.

¹⁵ Noba memef tein bera erek mar onggaga efen ensesa onggaga Yesus era nou orougif gu Allah rot. Noba mar efen ensesa insa koma erebirma skoita rusnok onggaga Allah omoskotu jeska rerin mar onggaga oska gij mona kahma deika tein. Noba mar insa koma

erebirma skoita rusnok onggga rineseiseifa rot rerin mar onggga oska tein.

¹⁶Tina gij mona onggga rua onggga rinseiseifa insa koma rig rot oga onggga oufamofa koma, beda rua rukoja rot ojgomu. Jeska skoita rua bera oga onggga oufamofa insa koma erek mar agos efen esemba ojgomu. Koma jeska rua rinesma eiteij ah onggga efeinah guru. Tina skoita rusnok onggga Allah onskotu fob bera oga onggga oufamofa insa koma erek mar onggga efen ensesa ojgomu. Jeska rua rimesma eiteij ah onggga efeinah si. Noba enadaij nou rusnok egema tein ruftuflu rot mar insa koma oisouska risinsa rerin owesa efek jinaga guru.

¹⁷Noba memef bera menerek rusnok enjgineg onggga ruftuflu rot Allah efen oga jeska rudou ot rot mareibra ofoukou onggga rimesma jeska rusnok guru. Tina memef bera moftuflu osok gij Allah efen oga rot modou onggga eskeiramera ojgomu. Memef motunggom mar koma oisouska modou onggga egens jera Yesus Kristus, jeska memef bera merek rusnok onggga Allah ombk fob. Noba memef meita mar erek rusnok onggga rijginaga rot oida Allah eyajga joug mar nomnaga onggga rua rutunggom nou Ofa.

3¹Didif danggot mar erek insa koma, jefeda iwa imosujohu rot oida didif disitit rot disinsa dufoka ojgomu ei. Beda iwa tein isujohu rot oida teinefa fogora memef meneita surat egens jeska ebirfager rineya onggga anggot rot mefmen meita mar jah ifekesa sis fob gurei. Yo, rasul-rasul ebireira onggga riker gu ifekesa rudou os rita surat erek koma jeskaseda risitit risinsa rifaga rot ojgomu.

²Tina memef modou os jeskaseda yeyin ita mar onggga oufamofa bera onggga orocunc rot oida memef

moftuftu iwa rot tenten fob. Jefeda enadaij nou memef tein mita surat egens onggga anggot rot mar erek koma jinaga guru.

³Erek koma tein, iwa bera erek surat egens onggga Yesus Kristus ongggu fob. Noba Ofa ensa surat koma skoita rusnok oisouska memef onggga moftuftu iwa rot efen oga erek rasul-rasul fob. Jeska erek rusnok rik rot yeyin ita mar onggga oufamofa, beda rudou emebriyi gij rot teinefa Yesus Kristus omfij iwa fob. Noba oisouska Efena Ebsi bera Allah omfij iwa fogora iwa inroru Ofa rot tenten fob. Noba efen oga insa koma bera angh gij idou efesi rot ahais ojgomu, erek mar onggga rusnok runggu gij mamu efebr onggga angh rot ahais.

⁴Didif dagot mar erek insa koma jeska modou ejginaga rot tenten oida oisouska modou onggga egens jera Yesus Kristus bera Allah omocunc rot oida mar insa koma bera erek tenten ojgomu.

⁵Noba enadaij nou memef magot rot oida memef montunggom mar insa koma nomnaga oisouska mesinsa mefmen owesa efek jinaga guru. Jeska mar nomnaga onggga montunggom insa koma fob bera oisouska Allah efen owesa efek ojgomu.

⁶Ofa bera onggga eita owesa efek gu memef jeskaseda moftuftu rusnok rot efen oga. Noba memef monoftuftu rot oida rusnok ruroru hukum-hukum Musa onggga ofa ongggu rot sis fob guru. Jeska mar koma bera eneita eiteij ah onggga efeinah guru. Tina memef moftuftu rot mar onggga efeinah onggga Allah anggen rot sis fob. Koma bera rot teinefa rusnok risma eiteij ah onggga efeinah oisouska Efena Ebsi Allah ojgomu.

⁷ Hukum-hukum insa koma onggga Allah eita gu Musa sis fob bera rusnok runggu tumu mamu efebr fob. Noba hukum-hukum koma bera erek mar onggga efen efesa eteb, jeska rusnok rimeesa rot noba rururu jeni ojgomu. Noba gij mona onggga Musa ensma hukum-hukum insa koma jeska Allah fob, beda Musa efen osum eja erek efesa eteb rot mar onswos onggga Allah eita gu ofa gij mona insa koma. Noba ofa efen efesa insa koma esiri deci deci, tina enadaj nou rua onggga Israel rik efen osum erek dektek guru, jeska efen efesa eteb ros. Erek koma tina, hukum-hukum onggga onswos insa koma bera onggga agot rot oida rusnok ragos rot rerin mar onggga oska ojgomu.

⁸ Tina Efena Ebsi onggga Allah eita gu mimif fob bera efen efesa eteb ekirsa deika jeska hukum-hukum insa koma ojgomu. Jeska Efena Ebsi koma bera onggga eita eiteij ah onggga efeinah gu rusnok.

⁹ Erek rusnok rusjohu rot oida hukum-hukum insa koma onggga agot rot oida rusnok ragos ojgomu bera erek mar onggga efen owesa efek eteb, beda mar onggga Efena Ebsi otunggom bera efen owesa efek onggga eteb ekirsa deika. Jeska oisouska Efena Ebsi onggga angh gij mudou efesi bera Allah osujohu rot oida mifmin mar onggga oska oskiyai tein enah gij mudou efesi deika guru.

¹⁰ Noba mar onggga Efena Ebsi ontunggom ebeibeyaif nou mimif bera efen owesa efek eteb onggga ekirsa deika ojgomu. Jefeda hukum-hukum insa koma efen owesa efek onggga ensiri ojgomu fob.

¹¹ Erek koma tein, hukum-hukum insa koma onggga angh reirei bera efen owesa efek onggga eteb. Tina mar onggga Efena Ebsi Allah ontunggom bera efen

owesa efek eteb ekirsa deika ojgomu. Jeska mar koma bera emah rot ah aibin ojgomuja.

¹² Erek koma jefeda memef moisum gij mar onggga Efena Ebsi ontunggom nou mimif fob fogora moku mofos rot ojgomu noba moftuftu rot Allah efen oga ojgomuja.

¹³ Noba memef menedemi mar onggga motunggom insa koma guru. Jeska sis fob, Musa ef meifeti joug osum jeskaseda rua onggga Israel rinek efen efesa insa koma onggga ensiri deci deci fob guru.

¹⁴ Noba rua onggga Israel bera rudou ombrera ojgomu noba rudou enebriyi gij Allah oga efen ofou jinaga guru. Noba erek deisef tein, gij mona onggga rusnok Yahudi rik gij Mar Efeyi Ebsi, beda rudou enebriyi gij mar koma efen ofou rot tenten guru. Koma erek meifeti insa koma onggga of joug riteij ros. Noba erek rusnok rururu Yesus Kristus rot tenten ojgomu fob, beda koma erek ribes meifeti insa koma jeska riteij fob.

¹⁵ Erek koma jeska gij mona ebeibeyaif tein, nou onggga rusnok Yahudi rik gij Mar Efeyi Ebsi rot hukum-hukum Musa, beda rua rusujohu rot oida rimesma eiteij ah onggga efeinah oisouska Hukum insa koma ojgomu. Koma erek meifeti insa koma onggga angh joug riteij ros.

¹⁶ Tina erek rusnok rikikif jeska mar onggga rua rusujohu rot erek insa koma fogora ruksons skoita Tuhan, beda rudou emebriyi gij Allah oga efen ofou si. Koma bera erek rusnok onggga ribes meifeti onggga angh joug riteij fogora rik mar rot koisoisa deika ojgomu.

¹⁷ Noba Tuhan insa koma onggga rua ruksons skoita bera morototuma erek Efena Ebsi onggga eita eiteij ah

gu rusnok. Jefeda rusnok onnga Efena Ebsi engker gij rudou efesi fob bera runsuwa jeska hukum-hukum insa koma ojgomu fob.

¹⁸ Noba mimif onnga Kristen bera erek rusnok onnga rinaha meifeti joug rusum deika guru. Jefeda rusnok enjineg rimek Tuhan efen owesa efek onnga angh gu mimif. Noba Efena Ebsi Tuhan bera onnga otunggom mar gij mudou efesi odudu deika jeskaseda mimif misma owesa efek onnga oufamofa erek Ofa efen owesa efek onnga oufamofa.

4¹ Allah bera onnga oncunc memef rot odou onnga eskeiramera jeskaseda moftuftu rot Ofa efen oga gu rusnok enjineg. Jefeda memef modou eneskes rot guru.

² Noba memef mokoja rot mar onnga rusnok enjineg rutunggom jeskaseda ruokrusa iwa rot ojgomu. Memef monocuwei mar gij rusnok era monokrusa rua jeskaseda rua ruroru Allah oga guru. Noba memef tein meneferwei Allah oga efen ofou tein guru. Noba askesi memef moftuftu rot Allah efen oga, beda Ofa bera onnga eyajga joug memef rot mar onnga memef moftuftu ojgomuja. Jefeda memef moftuftu mar rot koisoisa onnga erek tenten ojgomu. Noba memef modou os jeskaseda mar onnga memef motunggom insa koma ereita rusnok nomnaga rudou eskeira rot memef ojgomu.

³ Noba erek mar onnga memef moftuftu rot bera ah jejema jeska rusnok rineya, beda koma jeska rua bera onnga rimejeseiseifa ojgomu.

⁴ Jeska Bilis bera onnga ofoka ereij keingg rusnok gij mona ebeibeyaif onnga runororu Allah oga guru. Noba ofa bera onnga orokrusa rua fogora rudou enebriyi gij rot Allah efen oga guru. Koma bera erek

ofa ocohun rusnok rudou efesi jeska Allah efen owesa efek. Noba owesa efek insa koma bera erek Allah oga onnga oufamofa, noba onnga oncunc rot Yesus Kristus efen owesa efek onnga eteb. Noba Yesus bera morototuma erek Allah tein.

⁵Erek koma jeska memef monoftuftu mar rot mesinsa guru. Tina memef moftuftu mar rot Yesus Kristus onnga erek Tuhan ojgomu. Noba memef moncunc mesinsa skoita iwa erek yeyin rusnok onnga rumfij iwa fob. Memef meita mar erek koma nou iwa, jeska Yesus bera eita mar erek koma nou mimif nomnaga sis fob.

⁶Erek koma jeska gij mona onnga Allah onotunggom mebif enesi, beda Ofa otunggom eisa sismeni fog. Ofa erebent rot oida, "Oisouska motkobah bera eisa enah ojgomu." Noba erek koma tein, Ofa bera onnga esa efen eisa jeskaseda eij aki gij mudou efesi tein fob. Ofa otunggom mar koma jeskaseda mudou ebriyi gij rot teinefa Ofa efen ofoka onnga aksa eteb. Noba mimif mik efen ofoka onnga aksa erek koma oisouska mar onnga Yesus Kristus ontunggom fob.

⁷Memef bera erek rusnok onnga runowesa efek guru noba onnga runok rufoka gij guru. Erek koma tina Allah bera onnga oncunc memef jeskaseda moftuftu rot efen oga onnga oufamofa eteb skoita rusnok enjineg. Noba mar onnga Ofa ontunggom insa koma bera orocunc rot oida Ofa efen owesa efek onnga eskeira eteb insa koma bera enen jeska memef guru, tina en jeska Ofa esinsa ojgomu.

⁸Noba gij mona onnga memef moftuftu rot Allah oga, beda mar okum ofoukou bera ah keingg memef, tina modou enesiri rot guru. Noba erek modou

okumkum eteb rot tein guru, tina memef mog mejmeg gij ojgomu.

⁹ Noba gij mona onggara rusnok rireneni memef rot mar onggara okum, beda Allah enaha memef jah igef jinaga guru. Noba gij mona onggara rusnok rubu memef fogora mesiri rot, beda memef medebecki noba motoiru gij mefmen mar ojgomu.

¹⁰ Mar onggara okum ofoukou bera encirej memef ojgomu onjoros doida manggos rot fob. Erek koma jeska memef moftuftu rot Yesus Kristus efen oga. Tina Allah oitij rot mar insa koma jeskaseda rusnok rik fogora rudou ejjinaga rot teinefa mimif misma eiteij ah oisouska Yesus Kristus efen eiteij ah.

¹¹ Gij orofosut mona onggara memef meita mar nou Yesus Kristus, beda mar onggara ofogog ereneni memef ojgomuja onjoros doida manggos rot. Tina Allah oitij rot mar koma jeskaseda rusnok enjineg rik rot teinefa Yesus eita owesa efek gu memef onggara monowesa efek guru. Noba mar koma en oisouska Yesus Kristus efen eiteij ah onggara efeinah.

¹² Jefeda memef doida manggos rot, jeska memef moftuftu rot Yesus oga gu rusnok. Tina mar koma bera onggara ereita eiteij ah onggara efeinah gu iwa tein ojgomu.

¹³ Noba memef mesejah nou magos jeska modou ororu Yesus efen oga rot tenten ojgomu fob. Jefeda memef mefesij rot Allah oga insa koma gu rusnok enjineg. Koma erek mar egens onggara runggu gij Mar Efeyi Ebsi erek kef oida, "Didif duroru Allah efen oga fob, jefeda didif dimagot rot Ofa efen oga gu rusnok enjineg tein si."

¹⁴ Memef mefesij rot mar erek insa koma jeska modou ororu rot tenten oida Allah, onggara omfra

Yesus Kristus jeska anggos fob, bera omofra memef tein noba emeita eiteij ah onnga efeinah gu memef morototuma jera Yesus Kristus si. Beda Ofa omoroun memef morototuma jera iwa jah efen monuh mebaga onnga Ofa engker gij.

¹⁵ Memef meita mar insa koma nomnaga jeskaseda mofij iwa ojgomu. Noba erek Allah oncunc efen odou onnga oufamofa skoita rusnok enjgineg odudu dokun deika, beda rua rumois oufamofa eteb skoita Ofa rot. Noba rua rumofra efen ofoka onnga aksa eteb tein.

¹⁶ Allah bera ontunggom mar insa koma nou mimif nomnaga fob, jefeda mudou enesiri jeska mar onnga mimif mutunggom nou Ofa jinaga guru. Noba mimif minejagos erek deci deci ojgomu, tina gij orofosut mona tein bera Allah eita mudou ahais ojgomuja.

¹⁷ Noba mar okum insa koma onnga ah keingg memef sis fob bera erek mar onnga ai osufou rot memef ojgomu. Jeska Allah emeita eiteij ah onnga eskeiramera eteb rot mona onnga ah aibin ojgomuja. Noba koma bera oufamofa ekirsa jeska mar okum insa koma onnga angh keingg memef ojgomu.

¹⁸ Jeska memef modou enemeesa rot mar okum insa koma onnga memef mek ojgomuja guru. Tina memef mosujohu rot osok gij mar onnga oufamofa onnga menek gu meiteij guru. Jeska mar onnga mimif mik gu miteij bera ah reirei ojgomu. Tina mar onnga minek gu miteij guru, mar koma bera ah aibin ojgomuja.

5¹ Koma Mar insa koma bera erek tenten ojgomu, jeska mimif mijginaga rot oida mifmin mifaga onnga erek modwok onnga eneja erek etefa kef. Beda gij mona onnga mimif manggos fob, beda mimif mimesma mifaga onnga efeinah deika gij mebaga si.

Noba mifmin mifaga onnga efeinah koma bera erek mod egens onnga ot ahais rot ah aibin ojgomuja. Noba mar koma bera enen jeska mar onnga rusnok rutunggom guru. Tina Allah esinsa bera onnga emeita mifaga onnga efeinah erek koma ojgomu.

² Erek koma tina, askesi mimif mingker gij mifaga insa kef ros, bera mudou ereyema rot ojgomuja. Jeska mudou osos rot jeskaseda misma mifaga onnga efeinah noba onnga angh gu mebaga ojgomu. Koma erek osnok egens onnga odou osos rot ergi meisoufa onnga erek efeinah ojgomu.

³ Erek koma jeska gij mebaga bera mimif minerek efena ojgomu guru, tina mimif mimesma mifaga onnga efeinah tein si.

⁴ Noba askesi mimif mingker gij mifaga onnga ebeibeyaif efen, bera mimif mibisa noba mireyema osok gij mar okum onnga ah keingg mimif gu mebif ojgomuja. Koma erek rusnok onnga ringker gij modwok onnga eneja etefa ojgomuja. Tina mimif mineradgodu ebeirens jeskaseda manggos ojgomu guru. Koma erek osnok egens onnga ohoda efen meisoufa onnga efeyei ebeirens fogora ofos rourou ojgomu. Mimif mireyema erek koma jeska mimif mudou os miferwei mifaga onnga eriaga insa kef jera mifaga onnga efeinah gu mebaga ojgomu. Jah suma bera mifmin mifaga onnga efena ebah rot ah aibin ojgomuja.

⁵ Allah bera onnga ensejah mimif jeskaseda mimesma mar insa koma. Noba Efena Ebsi onnga Ofa eita gu mimif fob bera erek orocunc rot mar enjineg tein onnga Ofa anggen rot oida emeita gu mimif gij mona kahma tein si.

⁶ Noba mimif mijginaga rot oida askesi mimif mingker gij mifmin mifaga insa kef ros, beda koma erek miker yes jeska mebaga onnga Tuhan Yesus engker gij. Tina mimif mudou eskeira rot ojgomu, jeska ai juens beda mimif mimesma mifaga onnga efeinah deika gij mebaga si.

⁷ Jeska mar onnga mimif mutunggom gij miteij ah insa kef bera oisouska mudou onnga ororu Allah oga ojgomu, noba onoruru mar onnga mimif mik gu miteij guru.

⁸ Noba mimif minemeesa nou magos guru, jeska mimif mijginaga rot oida mimif mijeker morototuma jera Tuhan gu mebaga. Noba koma bera erek oufamofa ekirsa nou mimif.

⁹ Ere koma jefeda memef mog mejmeg gij rot mar ofoka egens ojgomu fogora memef motunggom mar onnga ereita Tuhan efen odou onnga eskeiramera rot ojgomu. Noba memef motunggom mar erek koma askesi mengker gij mifaga insa kef, era askesi mengker gij mebaga ojgomuja.

¹⁰ Jeska mimif nomnaga mumojot jah Yesus Kristus odou si. Beda Ofa omoga ojga rot mar nomnaga onnga mimif muntunggom askesi mingker gij mifmin mifaga insa kef ros. Ofa emeita oufamofa gu rusnok onnga rutunggom mar onnga erek oufa ojgomu. Noba Ofa omofra okum eteb keingg rusnok onnga runtunggom mar onnga erek oska.

¹¹ Yesus Kristus omoga ojga rot rusnok nomnaga rerin rita mar si, jefeda memef memeesa rot Tuhan efen owesa efek ojgomu. Noba memef moftuftu rusnok enjgineg rot ahais jeskaseda rua tein rururu Allah rot tenten ojgomuja. Noba Allah ejginaga rot oida memef motunggom mar koma rot modou egens

ojgomu fob. Noba didif dudou os jeskaseda iwa tein ijginaga rot oida memef meita mar rot modou onnga egens erek koma ojgomu.

¹² Noba didif dinagot rot mar insa kef jeskaseda disitit disinsa dufoka rot skoita iwa guru. Tina didif dagot rot mar insa kef gu iwa jeskaseda iwa idou eskeira rot memef ojgomu. Beda iwa tein imesitit rot mofoka skoita rusnok enjgineg onnga risitit risinsa rufoka rot mar onnga rua rutunggom jah gu iwa ifekesa. Tina rua rineita mar rot rudou onnga ocosu efei ahtah jinaga guru.

¹³ Noba jeska didif dagot mar erek insa koma beda iwa imosujohu rot oida merei ok didif fob ei. Skoidu, iwa isujohu rot erek koma ojgomu. Jeska didif dutunggom mar nomnaga jeskaseda durofra Allah efen ofoka erek aksa ojgomu. Tina didif dedin dudou bera erek giskini ojgomu. Jeska didif dutunggom mar insa koma jeskaseda orofij iwa tein rot.

¹⁴ Erek koma jeska Yesus bera oncunc rot efen odou onnga okora eteb rot mimif nomnaga. Jefeda memef modou os mofij rusnok enjgineg ojgomu. Noba modou efesi ororu rot tenten oida Yesus Kristus anggos nou rusnok nomnaga fob. Jefeda ahah Allah eiteij bera mimif nomnaga tein manggos rot mifmin mar onnga oska morototuma jera Yesus fob.

¹⁵ Noba Ofa anggos nou rusnok nomnaga jeskaseda rua risma eiteij ah onnga efeinah. Tina Ofa enagos nou rusnok jeskaseda rua rutunggom mar onnga risinsa rudou os rot gij rerin riteij ah onnga efeinah insa koma guru. Ofa agos nou rusnok jeskaseda ebeibeyaif bera rua rita mar rot riteij ah onnga efeinah noba onnga ereita Yesus Kristus odou eskeira rot ojgomu. Jeska Ofa bera onnga anggos noba

endebecki rot efen eiteij ah ongg a efeinah jeskaseda orofij rusnok nomnaga gij mar koma fob.

¹⁶ Erek koma jefeda iwa inosujohu mar rot rusnok enjineg morototuma erek rusnok mebif rusujohu rot mar guru. Jeska gij mona ongg a mimif munororu Yesus enesi bera mimif tein musujohu rot Yesus Kristus erek rusnok mebif rusujohu rot Ofa.

¹⁷ Tina gij mona ongg a rusnok rudou eja erek egens jera Yesus Kristus fob, beda rua rija erek rusnok ongg a efeinah tein ojgomu. Jeska Allah onsuna rot rerin riteij ah ongg a ensis jeska fob. Beda rua rinsma eiteij ah ongg a efeinah deika fob.

¹⁸ Noba mar koma nomnaga en jeska Allah ojgomu. Ofa bera ongg a oroun rusnok sons skoita Ofa esinsa oisouska Yesus Kristus fob. Noba Ofa obk memef jeskaseda moftuftu rot mar insa koma gu rusnok fogora moroun rua sons skoita Ofa.

¹⁹ Memef moftuftu rot oida Allah odou os oroun rusnok nomnaga sons skoita Ofa esinsa. Noba Ofa otunggom mar koma oisouska Yesus Kristus ojgomu. Noba askesi Ofa oroun rusnok, beda Ofa onosujohu rot rerin mar ongg a oska deika guru. Noba Ofa bera obk memef jeskaseda moftuftu rot mar insa koma gu rusnok nomnaga ojgomuja.

²⁰ Jefeda memef bera erek rusnok ongg a rumfij Yesus Kristus ojgomu. Noba Allah bera ombk memef fogora Ofa agot mar oisouska memef skoita iwa. Beda memef mois gu iwa oisouska Yesus efen ofoka jeskaseda iwa ikikif jeska yeyin mar ongg a oska fogora yuksons skoita Allah ojgomu.

²¹ Yesus Kristus bera efen mar ongg a oska erek oskiyai tein guru. Noba erek hakim egens agot oida osnok egens agos ojgomu, beda erek koma tein Allah

ombk Yesus sis fob jeskaseda Ofa agos rot mifmin mar onnga oska nomnaga. Ofa ontunggom mar erek koma jeskaseda oisouska mudou onnga egens jera Ofa bera Allah omocunc mimif erek rusnok onnga rerin mar onnga oska oskiyai tein guru.

6¹ Iwa bera erek rusnok onnga rumfij Allah morototuma jera memef. Noba Allah bera oncunc efen oga onnga oufamofa gu iwa rot odou oufamofa. Jefeda memef mois gu iwa jeskaseda inaha oga onnga oufamofa insa koma jah ojgomu guru.

² Jeska runggu gij Mar Efeyi Ebsi rot mar egens onnga Allah anggot gu Yesus erek kef oida, "Gij mona egens onnga Didif dudou eskeira rot bera Didif dingg rot bebin buga. Noba gij mona egens onnga Didif dinsejah nou duskotu bua bera Didif dufij bua." Jefeda Didif duis gu iwa rot oida Allah bera odou eskeira rot mona deisef tein ojgomu. Noba gij mona ebeibeyaif bera Allah ensejah nou oskotu rusnok jeska rerin mar onnga oska.

³ Memef meneita mar onnga eragou joug rusnok fogora runororu Allah oga deika guru, erek koma guru. Memef meita mar onnga oufamofa jeskaseda rusnok enjgineg rudou onoska rot mar onnga memef moftuftu rot guru.

⁴ Tina onnga tenten bera, memef motunggom mar onnga erek oufamofa ojgomu jeskaseda morocunc gu rusnok enjgineg rot oida memef bera erek rusnok onnga rumfij Allah rot tenten ojgomu. Noba memef meita mar erek koma rot modou onnga ahais ojgomuja gij mona onnga mar okum ah keingg memef ni, mar okum ereneni memef ni, mar okum otunggom modou emeesa rot ni ojgomuja.

⁵ Noba gij mona onggara rusnok rubu memef ni, era gij mona onggara rusnok ruga emaksema rot mar onggara memef montunggom fob ni, era rikris memef jah mod oskusk ni, era gij mona onggara memef mefarur gij mar rot ahais ni, era gij mona onggara modou efeneinei rot mar onggara memfarur gij ni, era gij mona onggara mosona eteb ongak memef ni, beda mar insa koma nomnagara orocunc rot oida memef bera erek rusnok onggara rumfij Allah rot tenten ojgomu.

⁶ Noba gij mona onggara memef meita mar rot modou onggara ebsi komowa ni, era rot modou onggara ebriyi gij Allah efen oga ni, era memef meita mar rot modou onggara onkoska skoita rusnok enjineg oisouska Efena Ebsi onggara engker gij modou efesi ni, era motunggom mar oisouska modou onggara okora rot rusnok erek tenten ni,

⁷ era moftuftu mar osok gij Allah oga rot tenten oisouska Ofa efen owesa efek onggara angh gu memef ni, beda ahah Allah eiteij bera memef motunggom mar insa koma nomnagara oisouska modou onggara efen mar onggara oska oskiyai tein guru. Mar insa koma bera onggara ot joug memef jeskaseda menesiri gij mar onggara oska guru.

⁸ Erek koma noba askesi memef motunggom mar nou Allah bera rusnok rineya rugif gu memef noba rineya rudou oska rot memef tein. Noba rineya ruga oruh memef, tina rineya risitit mefmen mofoka tein. Noba memef meita mar onggara tenten ojgomu, tina rusnok rucunc memef erek rua onggara ruokrusa rusnok enjineg ojgomu.

⁹ Allah jera efen rusnok rijginagara rot oida didif bera erek rasul egens onggara tenten ojgomu. Tina

rusnok rineya rusujohu rot oida didif bera enerek rasul onnga tenten guru. Noba erek doida memef manggos rot mar okum onnga encirej memef, tina Allah omfij memef jefeda memef mefena ebah ros. Noba rusnok rumfra mar okum keingg memef, tina menagos rot guru.

¹⁰ Noba rusnok raha mar okum keingg memef, tina memef modou efaga ouka rot ojgomu. Noba memef merek rusnok onnga rufojingki ojgomu, tina mar onnga memef moftuftu gu rusnok bera ereita mar ofoukou onnga erek ongoska eteb gu rua. Noba memef mefmen mareibra ofoukou guru, tina memef mesma mar onnga oufamofa eteb jeska Allah ojgomuja.

¹¹ Edohuji onnga ingker gij kota Korintus, didif dudou okora eteb rot iwa, jefeda didif duncunc dudou efesi rot onngas skoita iwa gij surat egens kef fob. Noba didif dinedemi mar egema tein jeska iwa guru.

¹² Noba memef monof joug modou efesi rot iwa guru. Tina iwa bera onnga yumf joug idou efesi rot memef fob.

¹³ Erek koma tina ebeibeyaif bera didif dagot mar skoita iwa erek didif dagot mar skoita dedin edeser ojgomu. Jefeda iwa icunc idou onnga okora rot memef morototuma erek memef tein moncunc modou onnga okora rot iwa fob.

¹⁴ Enadaij nou iwa ibiedi erek egens jera rusnok onnga runougif gu Allah guru. Jeska rusnok onnga ruroru mar onnga tenten ojgomu bera erek toga jeska rusnok onnga runororu mar onnga tenten guru. Enadaij nou iwa onnga erek eisa ibiedi erek egens jera rusnok onnga erek motkobah jinaga guru.

¹⁵ Erek koma tein, enadaj nou Yesus Kristus oitij morototuma jera mar onnga Bilis efen jinaga guru. Noba rusnok onnga ruroru Allah rot tenten bera rerin mar onnga morototuma erek rusnok onnga runororu Allah rot tenten guru erek jinaga guru.

¹⁶ Noba enadaj nou mimif mibiedi erek egens jera mar onnga oska onnga rusnok enjineg rugif gu jinaga guru. Jeska mimif bera erek Allah efen mod onnga Ofa engker gij ojgomuja. Noba Ofa bera onnga efena ebah rot ah aibin. Noba Ofa esinsa bera agot rot erek kef oida, "Didif dimeker gij rudou efesi, beda dimecira morototuma jera rua. Noba Didif dimeja erek rerin Allah. Beda rua rimeja erek dedin rusnok."

¹⁷ Erek koma jeska Tuhan agot rot mar erek kef tein oida, "Iwa irogna jeska rusnok koma, noba ikeba isinsa jeska rua ojgomu. Noba inoromohohuma jera rerin mar onnga oska egema tein deika guru. Beda Didif dumoroun iwa si."

¹⁸ "Beda Didif dimeja erek yeyin ika. Noba iwa imeja erek dedin edeser runer jera rujager." Tuhan Allah, onnga efen owesa efek eteb, bera agot rot mar erek koma.

7¹ Edohuji onnga dudou okora rot, Allah bera onnga angen rot mar insa koma nomnaga nou mimif fob. Jefeda mimif mibes mifaga jeska mar nomnaga onnga orotunggom mifmin mifaga jera mudou efesi erek oska ojgomu. Beda mimif mija erek rusnok onnga rerin rudou onnga ebsi komowa ojgomu. Noba mimif mita mar erek koma oisouska mudou onnga mugif gu Allah ojgomuja.

² Didif duis gu iwa jeskasada iwa yuhoda idou efesi nou memef ojgomu. Jeska memef meneita mar onnga oska egema tein skoita iwa ineya jah suma

guru. Noba memef meneita mar egema tein onnga orotunggom rusnok fogora risiri gij mar onnga oska guru. Noba memef monorokrusa ineya jeska iwa tein guru.

³Tina didif dinagot mar insa kef jeskaseda durocunc rot oida iwa bera erek oska, erek koma guru. Jeska didif danggot gu iwa sis fob rot oida, erek memef mefena ebah ros era magos tein askesi memef mofij iwa, beda modou omokora rot iwa ojgomuja.

⁴Erek koma tein, didif dudou eredi rot iwa, noba dudou erek eteb rot iwa ojgomuja. Noba mar onnga iwa itunggom bera orofij didif askesi mar okum ah keingg didif. Jefeda koma erek iwa ireita dudou erirei eteb rot ojgomu.

⁵Jeska gij mona onnga memef mensaga jah monuh Makedonia, beda mar ofoukou ah keingg memef ojgomuja. Koma erek rusnok enjgineg rucunc rudou onnga oska skoita memef, noba modou efesi tein erek emeesa ojgomuja.

⁶Tina Allah eisis joug rusnok onnga rudou okum. Noba Ofa bera eisis joug mefmen modou oisouska Titus onnga Ofa obk skoita memef jah sif.

⁷Noba mar onnga ofa emfesij osok gij iwa bera orofij memef erek eteb tein. Jeska ofa emfesij gu memef rot teinefa iwa onnga Korintus idou osos eteb jeskaseda ik didif ebeirens deika. Noba ofa emfesij rot oida iwa imeesa joug rot yeyin mar onnga oska egens koma sis fob, jera rot teinefa iwa idou okora rot didif ojgomu. Jefeda mar insa koma nomnaga erek orofij dudou efesi erek eteb rot ojgomu.

⁸Surat egens onnga didif dinsas skoita iwa sis fob bera ereita idou efesi erek okumkum rot fob. Jeska didif ditaha joug iwa osok gij osnok egens onnga

ontunggom mar onnga oska eteb jah gu iwa ifekesa fob. Noba didif tein dudou emeesa rot. Jeska didif dik rot teinefa idou okum eteb rot. Erek koma tina didif dusujohu rot oida yeyin idou bera okumkum rot gij mona onnga estir ojgomu.

⁹ Didif dudou okora rot iwa jeska dedin surat egens koma ereita idou okumkum rot. Tina ebeibeyaif didif dudou eskeira rot surat egens insa koma ojgomu, jeska oisouska surat egens koma bera iwa imeesa joug yeyin mar onnga oska fob. Jefeda koma bera ereita dudou eskeira eteb fob. Jeska idou onnga okumkum insa koma bera en oisouska Allah odou ejginaga rot ojgomu.

¹⁰ Erek koma jeska rusnok rudou onnga okumkum oisouska Allah odou ejginaga rot bera omofij rua jeskaseda rimeesa joug rerin mar onnga oska. Beda koma bera ereita eiteij ah onnga efeinah gu rua tein. Noba koma orotunggom rusnok rudou erirei eteb rot. Tina gij mona onnga rusnok mebif rita rudou onnga okum rot rerin rita mar, beda koma onofij rua jeskaseda rita eiteij ah onnga efeinah guru. Jeska gij rudou efesi bera rua runosujohu rot mar onnga Allah anggot rot guru.

¹¹ Jefeda idou ah keingg rot teinefa Allah omfij iwa oisouska idou onnga okumkum insa koma ojgomu. Jeska idou onnga okumkum insa koma bera onnga ereita idou onnga ocosu efei ahtah rot fob ni, noba ebeibeyaif iwa idou os icunc rot oida imeesa joug yeyin mar onnga oska rot tenten fob ni, noba iwa yut joug idou efesi rot mar onnga oska ojgomuja fob ni, noba iwa idou os itunggom mar onnga tenten ni, jeska iwa idou efeneinei rot mar onnga oska onnga angh gij ifekesa ros ni, iwa insejah idou efesi

jeskaseda yufra mar okum keingg rusnok onnga rutunggom mar onnga oska ni. Mar insa koma nomnaga bera onnga orocunc rot oida iwa iroru mar onnga tenten deika fob.

¹² Noba onnga tenten bera didif disa surat egens insa koma jeskaseda iwa isinsa ik rot teinefa iwa iroru mar onnga memef manggot rot fob ei era gurei. Beda iwa tein imejginaga rot teinefa iwa inroru mar onnga memef moftuftu rot tenten fob ojomu. Jeska iwa yumfra mar okum keingg osnok egens insa koma fob.

¹³ Noba jeska iwa iroru mefmen moga erek jeni rot osnok egens onnga otunggom mar onnga oska insa koma fob, jefeda memef modou erirei eteb rot iwa. Noba iwa ireita modou onnga erirei eteb ekirsa deika, jeska gij mona onnga Titus onjogog iwa, beda iwa yumfij ofa fogora ireita ofa odou eskeira eteb fob.

¹⁴ Sis fob, gij mona onnga Titus eneja skoita iwa enesi, beda didif disitit rot mar ofoukou osok gij iwa gu ofa fob. Noba mar onnga didif dinsitit gu ofa sis fob koma bera mojenen didif rot guru. Jeska oisouska mar onnga oufamofa onnga iwa intunggom nou ofa bera iwa incunc rot oida didif danggot mar erek tenten osok gij iwa fob. Noba ebeibeyaif tein Titus bera emfesij rot teinefa iwa yumfij ofa erek ongnoska fob. Jefeda mar onnga ofa emfesij rot bera orocunc rot mar insa koma onnga didif danggot rot osok gij iwa sis fob.

¹⁵ Noba ofa esinsa efen odou onnga okora eteb rot iwa odudu deika. Jeska ofa odou ah keingg rot teinefa iwa iroun ofa rot idou onnga ougif gu ofa ojomu. Noba ofa odou ah keingg rot teinefa iwa insejah nou itunggom mar onnga ofa anggot rot si.

¹⁶Jefeda didif dudou efaga ouka eteb rot iwa, jeska didif dijginaga rot oida iwa imotunggom mar onggga tenten si.

8¹Edohuji, ebeibeyaif didif dudou os difesij gu iwa rot mar onggga Allah ontunggom rot odou onggga oufamofa nou rusnok Mod Ari onggga ringker gij monuh Makedonia.

²Jeska mar ofoukou bera ereneni rua ojgomuja onjoros rudou efera okora eteb rot. Tina rudou onokumkum rot mar insa koma guru. Rua riker rot rudou onggga eskeiramera ojgomuja, jefeda rua rerin owesa efek onggga adaij nou rufij rerin ruhuji rot rerin mar okum tein ojgomu. Mar onggga rua runtunggom bera erek kef oida, erek rua risinsa rufojingki eteb, tina rua rikeba rerin mareibra ofoukou jeskasada rufij rusnok Kristen onggga ringker gij kota Yerusalem.

³Noba didif dagot rot tenten ojgomu oida rua rikeba risinsa rerin mareibra insa koma erek doida omoisa nomnaga. Noba rua rineita mar erek koma jeska rusnok enjineg riradgodu rua rot guru.

⁴Tina rua ruis gu memef rot ahais jeskasada morka rerin mareibra onggga rua rikeba insa koma nou Allah efen rusnok onggga ringker gij monuh Yudea skoita rusnok koma.

⁵Noba rua rita mar insa koma jeni erek memef moisum gij rua rot sis fob. Noba onggga oufamofa ekirsa bera rua ruh rudou efesi rot ongkasmos gu Tuhan jera memef tein oisouska Allah odou ejginaga rot. Noba koma tein erek ekirsa jeska meidu onggga memef moisum gij rua rot sis fob.

⁶Jefeda memef magot gu Titus jeskasada ofa ojogog iwa gij kota Korintus ebeirens deika. Jeska sis fob ofa oftufu iwa rot teinefa iwa ikeba yeyin

mareibra nou Allah efen rusnok tein. Noba gij mona onnga ofa onjogog iwa deika, beda ofa omoftuftu iwa deika rot mar insa koma onjoros iwa tein yufij Allah efen rusnok onnga rufojingki gij monuh Yudea rot yeyin mareibra fob.

⁷Ebeibeyaif iwa bera erek rusnok onnga runtunggom mar ofoukou onnga ongnoska fob. Koma bera erek iwa iroru Allah rot tenten fob ni, iwa yagot mar onnga erek ongnoska moguma ojgomu ni, idou ebriyi gij mar onnga tenten fob ni, iwa insejah idou efesi fogora yufij rusnok enjgineg ni, idou okora eteb rot memef ni. Erek koma jefeda memef mois gu iwa jeskaseda iwa icunc idou onnga okora rot Allah efen rusnok fogora ikeba yeyin mareibra tein nou rusnok onnga rufojingki ojgomu.

⁸Didif dunoga efet iwa rot mar koma guru. Tina didif dimfesij gu iwa rot teinefa rua onnga monuh Makedonia insa koma rudou otot jeskaseda rufij rusnok enjgineg rot rerin mareibra tein fob. Jefeda iwa tein icunc idou onnga okora rot rusnok enjgineg fogora yufij rua rot yeyin mareibra ojgomu.

⁹Jeska iwa ijginaga rot fob oida gij mebaga bera mifmin Tuhan Yesus Kristus oncunc efen oufamofa eteb skoita mimif fob. Sis mona onnga Ofa eker gu mebaga ros, beda Ofa efen mar ofoukou onnga ongnoska eteb. Erek koma tina Ofa aha mar koma jah fogora en gu mebif erek osnok egens onnga ofojingki jeskaseda ofij mimif. Jefeda mimif minsma mar ofoukou onnga ongnoska eteb fob.

¹⁰Gij tahun onnga sis fob iwa bera onnga yanggot rot sismeni rot oida imofij rusnok onnga rufojingki rot yeyin mareibra. Noba iwa tein bera onnga ita yeyin

mareibra insa koma rot sismeni jeska rusnok Mod Ari enjgineg nomnaga.

¹¹ Jefeda didif dusujohu rot erek kef oida: didif duis gu iwa jeskaseda iwa ita mar erek koma juens deika fogora ikeba yeyin mareibra oskiyai nou rusnok enjgineg. Noba iwa ita mar erek koma oisouska yeyin owesa efek onnga adaj nou tein.

¹² Noba erek iwa idou ot nou yufij rusnok enjgineg erek koma, beda Allah odou emeskeira rot iwa oisouska mar onnga iwa ita insa koma oigomu. Jeska Ofa onoga efet rusnok rot oida rua rugun mar dokun ekirsa jeska mar onnga angh gu rua guru.

¹³ Didif dineradgodu iwa jeskaseda yufij rusnok enjgineg onjoros yeyin mareibra omoisa rot fogora idou okum rot tein guru. Tina ebeibeyaif bera yeyin mareibra efen ofod adaj nou. Jefeda didif dusujohu rot oida iwa yufij rusnok enjgineg rot oigomu. Noba gij mona onnga iwa yeyin mareibra enadaj nou iwa deika guru, beda rua tein rumofij iwa sons rot rerin mareibra efen ofod tein si. Beda iwa nomnaga yeyin mareibra onnga adaj morototuma tein.

¹⁴ (8:13)

¹⁵ Koma bera erek mar onnga runngu gij Mar Efeyi Ebsi sis fob erek kef oida, "Osnok egens onnga ohoturu efen maat ofoukou bera efen eteb onnga adaj nou. Noba osnok egens onnga ohoturu maat erek oskiyai, ofa tein efen adaj nou." Noba erek iwa imofijma erek koma, beda iwa tein imeita mareibra onnga adaj oigomuja.

¹⁶ Memef mois oufamofa eteb gu Allah jeska Ofa oncunc mar gij Titus odou efesi fogora ofa odou os ofij iwa morototuma erek memef tein modou os mofij iwa.

¹⁷ Noba didif direjgei ofa jeskaseda eja skoita iwa. Tina ofa oitij ebeirens rot, jeska ofa esinsa ensejah odou efesi rot otunggom mar erek koma sis fob. Jefeda ofa odou eskeira eteb rot ojgomu.

¹⁸ Noba memef momobk mefmen mohuj egens onnga rusnok Mod Ari nomnaga rugif gu. Jeska ofa odou efnis eteb jefeda ofa ejginaga rot teinefa oftufu rot Allah efen oga onnga oufamofa gu rusnok enjgineg. Ofa tein bera omororu Titus skoita iwa.

¹⁹ Noba rusnok Mod Ari nomnaga bera runcunc ofa tein jeskaseda ororu memef gij mona onnga memef morka mareibra onnga rusnok ringkeba nou Allah efen rusnok onnga rufojingki jah gu kota Yerusalem. Mar koma bera onnga orofra Allah efen ofoka erek aksa noba orocunc rot oida memef modou os mofij Allah efen rusnok tein.

²⁰ Ofa omororu memef tein, jefeda enadaj nou rusnok enjgineg rudou efeda rot memef osok gij mar onnga memef motunggom rot mareibra ofoukou insa koma guru.

²¹ Jeska memef modou os motunggom mar onnga tenten ojgomu ahah Tuhan eiteij jera rusnok tein riteij.

²² Noba memef momobk osnok egens dokun deika morototuma jera Titus noba jera efen mohuj egens insa koma tein skoita iwa. Ofa bera anggot rot ofosma ofoukou fob oida ofa odou os ofij rusnok enjgineg ojgomuja. Noba ofa ejginaga rot teinefa iwa idou os yufij rusnok enjgineg rot yeyin mareibra tein. Jefeda ofa tein odou os eja skoita iwa.

²³ Noba Titus kef bera erek dedin edohuj egens onnga efarur morototuma jera didif ojgomuja. Noba gosnok gegeka kef gemeja oisouska gegam Mod Ari

ofoka. Noba goga tein gegan geita mar onnga orofra Yesus Kristus efen ofoka erek aksa.

²⁴Jefeda iwa icunc idou onnga okora rot rua insa koma jeskaseda rusnok enjgineg rimek fogora rimejginaga rot oida mar onnga memef mesitit rot osok gij iwa bera erek tenten ojgomu.

9¹Didif dinefesij osok gij mar insa koma skoita iwa deika guru.

²Jeska didif dijginaga rot oida iwa idou os yufij rusnok insa koma tein ojgomu. Noba didif dinsitit rot ifoka osok gij mar insa koma skoita rua onnga ringker gij monuh Makedonia erek ofoukou fob. Didif danggot gu rua oida, "Askesi tahun sis fob onjoros deisef tein bera rua onnga kota Korintus rinsejah nou rufij rusnok onnga rufojingki rot rerin mareibra." Noba onnga tenten bera, rusnok onnga ringker gij monuh enjgineg tein ringk rot teinefa iwa idou os itunggom mar insa koma fob. Jefeda rua tein rudou os rufij rusnok onnga rufojingki erek iwa ita sis fob.

³Noba didif dumobk mifmin muhujir rugomu insa koma skoita iwa jah kota Korintus jeskaseda ruhoturu mareibra onnga iwa imekeba nou rusnok onnga rufojingki. Beda koma omorocunc rot oida mar onnga memef mesitit rot iwa gu rusnok enjgineg gij monuh Makedonia bera erek rourou guru. Jeska didif dijginaga rot oida gij mona onnga rua rinsaga jah suma, beda iwa insejah nou rita mar insa koma gu rua si.

⁴Era, erek rusnok jeska monuh Makedonia meja morototuma jera didif skoita iwa, tina iwa inekeba mareibra insa koma enesi, beda mojen didif eteb rot. Noba mojen iwa eteb tein rot mar onnga didif dinsitit rot osok gij iwa skoita rua sis fob.

⁵Jefeda didif dusujohu rot oida didif dumobk muhujir rugomu insa koma jeskaseda rija okag rot didif skoita iwa. Beda rua rumohoturu mareibra insa koma onnga iwa yanggen rot oida imeita sis fob. Noba gij mona onnga didif dinsaga jah suma, beda mareibra onnga iwa ihoturu fob bera insejah nou ita gu memef ojgomu. Beda koma tein omorocunc rot oida iwa idou os yufij ojgomu, noba erek rusnok enjgineg rineradgodu iwa rot ebeirens gij mona insa koma guru.

⁶Erek koma jefeda iwa isujohu rot mar kef onnga erek orocunc fog: Rusnok onnga rirefa rerin maat efef erek oskiyai ojgomu bera rua rimesma rerin maat efek tein onnga erek oskiyai ojgomu. Noba rusnok onnga rirefa rerin maat efef erek ofoukou bera rua rimesma maat efek onnga erek ofoukou doska tein. Erek koma tein, rusnok onnga rudou agei rerin mareibra ofoukou bera rikeba mareibra erek oskiyai ojgomu. Beda gij mona kahma bera rusnok enjgineg rumofij rua tein erek oskiyai ojgomu.

⁷Jefeda orofosutut osnok egens egens osujohu rot koisoisa osok gij efen mareibra egaho onnga ofa emekeba rot rusnok enjgineg ojgomu. Beda ofa ekeba mar koma rot odou onnga oitij rot ojgomu. Noba ofa odou enagei rot mar koma guru, era rusnok enjgineg rineradgodu ofa rot guru. Jeska Allah odou eskeira rot rusnok onnga rikeba rerin mareibra oisouska rudou onnga eskeira rot ojgomu.

⁸Noba Allah efen owesa efek onnga adaij nou eita mareibra nomnaga onnga iwa idou ocosu rot ojgomu. Ofa omotunggom erek koma jeskaseda yeyin mareibra onnga adaij nou iwa ojgomuja. Beda

yeyin mareibra insa koma efen ofod adaj nou fogora irofij rusnok enjgineg rot tein.

⁹ Koma tenten ojgomu, jeska runggu gij Mar Efeyi Ebsi rot oida, "Rusnok ringkeba rerin mareibra ofoukou gu rua onnga rufojingki, Allah omocunc rua erek rusnok onnga rerin mar onnga oska oskiyai tein guru."

¹⁰ Allah bera onnga ofij rusnok rot maat efej jeskaseda rimerefa gij rerin mekeni. Noba Ofa bera onnga ofij rusnok rot rerin maat jeskaseda rimet maat efema tein. Jefeda erek koma tein, Ofa omofij iwa rot yeyin mareibra tein si. Noba Ofa omogun yeyin mareibra koma dokun deika ojgomuja. Beda oisouska idou onnga efen mar onnga oska jinaga guru bera iwa imekeba yeyin mareibra gu rusnok enjgineg tein.

¹¹ Allah omofij iwa rot yeyin mar nomnaga onnga erek ofoukou ojgomuja jeskaseda adaj nou iwa yumfij rusnok enjgineg rot mar insa koma ojgomuja. Noba gij mona onnga memef morka mareibra onnga iwa ikeba insa koma nou rusnok enjgineg, beda rua rumois oufamofa eteb gu Allah rot.

¹² Noba mar insa koma onnga iwa intunggom bera erek irofij rusnok enjgineg ofoukou. Noba onnga oufa ekirsa deika bera mar koma ereita rusnok rufoukou rudou efesi fogora rimesitit gu Allah rot efen oga tein.

¹³ Noba rua rimesitit gu Ofa rot teinefa iwa yumfij rusnok onnga monuh Yudea jera rusnok enjgineg tein fob. Erek koma, tina onnga oufamofa ekirsa bera rua rumois oufamofa skoita Allah rot iwa tein si, jeska mar onnga iwa intunggom insa koma bera orocunc rot oida iwa iroru jeni Yesus Kristus oga onnga oufamofa rot tenten fob.

¹⁴ Beda rua rumom riteij rot ahais skoita Allah nou iwa ojgomuja. Jeska Allah ocunc efen odou onnga oufamofa eteb skoita rua oisouska mar onnga iwa intunggom nou rua fob.

¹⁵ Mimif nomnaga tein muis oufamofa eteb skoita Allah, jeska Ofa obk efen Efesa skoita mimif sis fob. Noba koma bera mar onnga erek ongnoska eteb ekirsa jeska mar nomnaga.

10 ¹ Edohuji, ebeibeyaif didif dudou os duis mar gu iwa rot dudou onnga erek eriaga noba osufou tein jeni erek Yesus Kristus ontunggom gu rusnok sis fob. Jeska rusnok rineya jah gu iwa ifekesa bera ragot osok gij didif oida, "Gij mona onnga Paulus engker jera mimif bera ofa agot mar rot odou onnga eriaga noba onnga osufou ojgomu. Tina gij mona onnga ofa ejeker yes jeska mimif, bera ofa agot mar gij efen surat onnga erek okumkum skoita mimif ojgomu. Jefeda ofa erek emeesa rot mimif ojgomu ei." Erek koma tein rua rusujohu rot mar erek rusnok mebif rusujohu rot mar ojgomu. Jefeda didif duis gu iwa jeskaseda iwa itaha joug rusnok onnga ragot mar erek koma ojgomu. Iwa ita mar erek koma jeskaseda gij mona onnga didif dunjogog iwa deika, beda didif dunocosu rot ducunc gu rua insa koma rot teinefa didif dagot mar onnga okumkum teisis skoita rua onnga ranggot mar erek insa koma guru.

² (10:1)

³ Jeska memef bera erek rusnok giskini onnga eriaga ojgomu, tina memef menera mar onnga rusnok mebif efen jeskaseda mokoja rot mar okum onnga angh keingg memef guru.

⁴ Memef monokoja mar okum onnga angh keingg memef oisouska owesa efek onnga rusnok mebif efen

guru. Tina memef mera owesa efek onggan en jeska Allah onggan adaij nou, fogora memef morohoda rot owesa efek onggan mebif efen ojgomu.

⁵ Noba oisouska owesa efek insa koma bera memef mohoda rot mar nomnaga onggan rusnok ruga emaksema rot skoita Allah jera rusnok nomnaga onggan rusujohu rot oida risinsa rudou erek efesis eteb. Noba oisouska Allah efen owesa efek insa koma bera memef moftuflu rusnok enjgineg jeskasada rusujohu rot mar jeni erek Yesus Kristus osujohu rot mar ojgomu.

⁶ Noba gij mona onggan iwa onggan kota Korintus icunc rot oida iwa iroru Yesus Kristus rot tenten fob, beda memef mensejah nou mofra mar okum keingg rusnok rineya jah suma onggan ruroru mar onggan oska erek insa koma.

⁷ Iwa isujohu rot iskusk osok gij rusnok rineya onggan ringker jah gu ifekesa. Jeska rua risitit risinsa rufoka oida rua risinsiyai bera onggan rumfij Yesus Kristus rot tenten, noba memef bera guru. Tina didif dagot oida enadaij nou rua rusujohu rot mar erek koma guru. Jeska memef tein bera erek rusnok onggan rumfij Yesus Kristus rot tenten fob.

⁸ Ainsa kef bera didif disitit disinsa difaga erek oskiyai rot owesa efek onggan Allah eita gu memef fob, tina mojen en didif rot koma guru. Jeska Allah eita owesa efek insa koma gu didif jeskasada durofij iwa rot ojgomu. Noba memef menera owesa efek insa koma jeskasada motunggom mar gu ifekesa fogora imekebema rot guru.

⁹ Didif dinagot rot mar insa kef jeska didif dunodou os rot oida surat onggan didif dinsan skoita iwa bera ereita idou emeesa rot didif guru.

¹⁰ Erek koma tina didif dimagot mar teisis rot ahais morototuma erek didif danggot mar gij dedin surat ojgomu skoita rusnok onggga risitit risinsa rufoka rot mar erek insa koma si. Jeska rineya jah gu ifekesa ragot mar erek kef rot ahais oida, "Paulus agot mar onggga okumkum noba ahais gij efen surat onggga ofa ensa skoita mimif. Tina gij mona onggga ofa en skoita mimifo, beda ofa agot mar onggga erek eriaga ojgomo. Noba mar onggga ofa anggot gij mona insa koma efen owesa efek jinaga guri."

¹¹ (10:10)

¹² Yo, erek rua insa koma bera rufra risinsa rufoka erek aksa ei, tina memef bera gurei. Koma tenten, jeska rua rireni jeni rerin rita mar jera rusnok enjineg rerin rita mar onggga morototuma erek rua rerin ojgomu. Jefeda koma erek rua risitit risinsa rufoka rot risinsa rerin rita mar onggga oska ojgomu. Noba koma bera orocunc rot oida rudou osumsumu eteb ojgomu.

¹³ Memef bera mefmen owesa efek tein, tina memef monofra mesinsa mofoka rot mar onggga montunggom onggga erek ekirsa jeska mar onggga Allah oncunc gu memef fob guru. Didif duntunggom mar onggga Allah oncunc gu didif fob. Tina iwa tein bera erek mar egens onggga Allah oncunc gu memef jeskaseda mefarur rot ojgomu.

¹⁴ Beda mar koma tein bera orocunc rot oida memef menekirsa rot mar onggga Allah oncunc gu memef rot guru. Jefeda gij mona onggga memef mecira rot Yesus Kristus efen oga onggga oufamofa skoita iwa sis fob, beda koma erek memef mororu mar onggga Allah oncunc rot gu memef sis fob tein ojgomu.

¹⁵ Noba memef tein menekirsa rot mar onnga Allah oncunc gu memef guru, jefeda menesitit mesinsa mofoka rot mar onnga rusnok enjgineg rimfarur gij fob guru. Tina rasul-rasul ebireira insa koma bera rita mar erek koma ojgomuja. Noba memef modou os eteb rot oida iwa iroru jeni Allah efen oga rot tenten odudu dokun deika ojgomuja. Beda memef tein memeita mar onnga ongnoska ekirsa deika jah gu ifekesa ojgomuja.

¹⁶ Jefeda memef tein memecira rot Yesus Kristus efen oga onnga oufamofa jah monuh onnga ai erek yes jeska iwa deika. Beda enadaij nou rusnok enjgineg ragot oida memef bera morka Yesus Kristus efen oga gij monuh onnga rusnok enjgineg rumftuftu rot Kristus gij sis fob guru.

¹⁷ Erek koma tina iwa isujohu rot mar egens kef onnga runggu gij Mar Efeyi Ebsi onnga agot oida: "Idu onnga odou os esitit rot mar, beda ofa esitit rot mar onnga Tuhan ontunggom ojgomu."

¹⁸ Jeska erek osnok egens esitit esinsa ofoka rot mar onnga ofa ontunggom fob, beda koma onorocunc rot oida mar koma bera erek tenten guru. Tina erek Tuhan odou eskeira rot mar onnga osnok egens ontunggom fob, beda koma orocunc rot oida mar onnga ofa ontunggom bera erek tenten ojgomu.

11 ¹ Didif duis gu iwa jeskaseda iwa yuin keingg idou efesi ai juens deika fog fogora didif dimagot mar onnga erek dahaisomu duga oskiyai rot deika.

² Didif dudou ejisei rot iwa erek Allah tein odou ejisei rot iwa. Jeska iwa bera erek ojowu egens onnga didif ducunc nou orna egens fob jeskaseda eja erek efen osroj. Tina orna egens enjgineg odou os orka ojowu

insa koma jeska. Iwa bera erek ojowu egens insa koma. Noba osnok egens onnga iwa inja erek osroj nou bera Yesus Kristus.

³ Didif danggot mar insa koma erek mar onnga orocunc rot ojgomu, jeska didif dimeesa rot oida rusnok enjgineg rumorokrusa iwa fogora iwa imekikif jeska Yesus beda inororu Ofa rot idou onnga ebsi komowa noba onnga eskeira deika guru. Bilis, onnga erek magosu ofogog, bera orokrusa Hawa sis fob tein.

⁴ Noba didif dudou efeneinei rot iwa jeska gij mona onnga rusnok enjgineg rin skoita iwa noba ruftuftu rot mar onnga ebireira, beda iwa iroru mar koma rot ebeirens ojgomu. Erek rua ruftuftu mar rot Yesus Kristus onnga toga jeska mar onnga memef moftuftu rot ni, erek rua rucunc efena onnga toga jeska Efena Ebsi onnga iwa insma sis fob ni, erek rua rucunc moroju egens onnga toga jeskaseda iwa isuwa jeska yeyin mar onnga oska ni, beda giskini bera iwa iroru mar onnga oska insa koma rot ebeirens ojgomu.

⁵ Tina didif dedin dufoka bera onoin gij rua insa koma onnga rucunc risinsa erek rasul onnga rufoka aksa ekirsa jeska rineya guru.

⁶ Noba didif dinagot mar rot duga onnga erek ongnoska eteb ahah rusnok riteij guru, tina didif dudou ebriyi gij mar onnga danggot efen ofou jeni ojgomu. Noba didif dusujohu rot oida iwa tein ijginaga rot mar koma fob. Jeska memef mocunc mar erek koma gu iwa rot koisoisa gij mar nomnaga onnga memef moftuftu rot Yesus oga gu iwa sis fob.

⁷ Noba gij mona onnga didif duftuftu iwa rot Allah efen oga onnga oufamofa, beda didif duin keingg disinsa dufoka jeskaseda dufra iwa yeyin ifoka erek

aksa ojgomu. Noba didif dunois gu iwa rot fifi era mareibra egema tein guru. Tina, teinefa fogora iwa isujohu rot oida didif dutunggom mar onggga oska skoita iwa rot sis fob erek komo.

⁸ Noba askesi didif dingker morototuma jera iwa ros, beda rusnok Mod Ari enjgineg rufij didif rot fifi jera mareibra. Noba didif dinera mar koma nou disinsa erek rusnok Mod Ari insa koma rudou os rot ojgomu guru. Tina didif dira mar insa koma jeskaseda durofij iwa rot ojgomu.

⁹ Noba askesi didif dingker jera iwa ros, beda didif dineradgodu iwa rot mar egema tein guru. Jeska dedin edohujir onggga rin jeska monuh Makedonia bera rufij didif rot mar nomnaga onggga ducosu rot ojgomu fob. Gij mona onggga sis fob didif dineradgodu iwa rot mar egema tein guru. Noba gij mona onggga emen tein bera didif dineradgodu iwa rot mar egema tein guru.

¹⁰ Didif bera osnok egens onggga duroru Yesus Kristus rot tenten, bera dimesitit gu rusnok gij monuh Akaya rot oida didif dineradgodu iwa era rusnok enjgineg tein rot mar egema tein jinaga guru.

¹¹ Tina, jeska didif dagot mar erek insa koma, jefeda iwa isujohu rot oida dudou onokora rot iwa gurei. Tina erek koma guru. Jeska Allah esinsa ejginaga rot teinefa didif dudou okora eteb rot iwa fob.

¹² Noba didif dimagot rot mar erek insa koma ojgomuja jeskaseda direveda rot mar onggga rasul-rasul onggga ebireira insa koma ranggot rot didif fob. Jeska rua ragot oida rua tein ruftuflu rot Allah oga morototuma erek didif. Tina guru, jeska rua bera onggga ruhca rot fifi ojgomu.

¹³ Rua rita mar erek koma jeska rua bera erek rasul-rasul onnga ebireira ojgomu. Noba rua rucuwei mar gu rusnok rot mar onnga rua rimfarur gij. Noba rua rutunggom mar rot risinsa onnga orocunc rot oida rua bera erek Yesus Kristus efen rasul onnga tenten, tina guru.

¹⁴ Erek koma tina didif dudou onoubsaha rot mar onnga oska insa koma onnga rua rita rot rudou onnga efesis eteb gij guru. Jeska Bilis esinsa tein bera odou efesis fogora ocunc esinsa erek malaikat egens onnga ebsi komowa gu rusnok.

¹⁵ Jefeda mimif mudou onoubsaha rot rasul-rasul onnga ebireira insa koma guru. Jeska rua bera erek Bilis efen ruforoker, jefeda rua tein bera ruokrusa rusnok fogora rucunc risinsa erek rusnok onnga rumfij Allah rot rudou onnga ebsi komowa. Jefeda rua rimesma mar okum jeni rerin rita mar onnga oska insa koma si.

¹⁶ Erek koma jefeda didif duis gu iwa jeskaseda iwa yuin keingg idou efesi rot didif ai juens deika fogora dimagot mar rot dudou onnga okum erek insa koma deika. Jeska didif dudou os dagot mar erek osnok egens onnga odou osumsumu ojgomu fogora disitit disinsa dufoka erek rasul-rasul insa koma rutunggom tein ojgomu. Tina iwa inosujohu rot oida merei ok didif fob guru.

¹⁷ Noba Allah bera onocunc gu didif jeskaseda disitit rot disinsa erek koma guru. Jeska askesi didif disitit rot disinsa, beda koma orocunc rot oida didif dita mar erek osnok egens onnga odou osumsumu eteb ojgomu.

¹⁸ Tina rasul-rasul onnga ebireira insa koma bera rita mar erek koma ojgomuja. Jefeda iwa irons rot

didif ai juens fog jeskaseda didif tein difesij mar erek rua insa koma.

¹⁹ Jeska iwa onnga kota Korintus isujohu rot oida yeyin idou onnga ebriyi gij mar ofoukou fob ei. Erek koma tina teinefa fogora iwa irons rot rusnok enjgineg onnga rudou osumsumu eteb jeskaseda ruftuftu mar jah gu iwa ifekesa erek komo.

²⁰ Iwa irons rusnok ebireira onnga rudou os rufoka ereij keingg iwa ni, era onnga riragou joug yeyin mar nomnaga ni, era rudou os ruokrusa iwa ni, era rufra risinsa rufoka erek ekirsa jeska iwa ni, era rua rubu iwa ni. Teinefa fogora iwa irons rot mar erek komo.

²¹ Noba, jeska memef meneita mar erek insa koma gu iwa guri, jefeda iwa isujohu rot oida memef bera enerek rasul onnga tenten guri. Jefeda mar insa koma mojen memef rot ojgomu ei! Erek koma tina, erek rua insa koma ruku rufos fogora risitit risinsa rifaga ojgomuja, beda didif tein dumoku dufos ai juens fogora dimesitit rot disinsa difaga tein. Yo, tenten, ebeibeyaif didif difesij mar erek osnok egens onnga odou osumsumu eteb ojgomu.

²² Rua risitit rot risinsa oida rua bera rusnok Yahudi. Didif tein bera jeska rusnok onnga Yahudi. Noba rua risitit risinsa rufoka rot oida rua bera jeska ebic Israel onnga Allah oncunc fob. Beda didif tein bera jeska ebic Israel onnga Allah oncunc fob. Rua risitit risinsa rufoka rot oida rua bera onnga runjuj jeska Abraham. Beda didif tein bera dunjuj jeska Abraham.

²³ Noba rua risitit risinsa rufoka rot oida rua bera erek rusnok onnga rumfij Yesus Kristus rot tenten ojgomu. Beda didif tein bera erek osnok egens onnga dumfij Yesus Kristus rot tenten tein. Tina didif dufij Yesus Kristus erek ahais ekirsa jeska rua ojgomu.

Erek koma noba rusnok raha didif gij mod oskusk rot ofosma ofoukou ekirsa jeska rua fob. Noba rusnok rangha didif erek ahais ojgomuja erek ekirsa jeska rusnok onnga rangha rua fob. Noba doida onnga didif danggos gij mar okum onnga ah keingg didif ojgomuja tein. (Tenten, ebeibeyaif didif dagot mar insa koma erek rua insa koma onnga rudou osumsumu eteb ei.

²⁴Skoidu, didif dimagot mar erek koma ai juens deika ojgomu.) Beda rusnok onnga Yahudi rangha didif ahais rot ofosma setka orgomu noba cinja tohkuru. Rua rita mar erek koma gu didif rot ofosma cinja fob.

²⁵Noba rusnok rira moskur rurobu didif ojgomuja. Rua rutunggom mar erek koma rot ofosma juomu. Noba rusnok rira mamu ofoukou riredi didif erek ahais tein. Noba meg meifeni ojuj gu mei rot didif rot ofosma juomu fob. Noba erek ofosma juens bera didif diker gij mei efen nou motu onjoros moworu jeska meg ojuj rot didif gij mei efen.

²⁶Noba gij mona onnga dincira gu monuh onnga angh yes, beda mar onnga ofogog ereneni didif ojgomuja. Mei ofot edi didif ni, rusnok onnga rufogog rudou os ragei dedin mar jeska didif ni, dedin rusnok Yahudi rucunc rudou onnga ofogog skoita didif ni, rusnok onnga Yahudi guru tein rucunc rudou onnga ofogog skoita didif ni. Noba gij mona onnga didif dingker gij kota, beda mar ofogog ereneni didif jah suma tein. Noba gij mona onnga dingker gij monuh onnga owowa beda mar ofogog ereneni didif jah suma tein. Noba gij mona onnga didif difef meg meifeni, beda mar ofogog ereneni didif jah suma tein. Noba rusnok onnga ranggot rourou oida rua bera

erek dedin edohujir onnga Kristen, rua tein rireneni didif rot rerin rita mar onnga ofogog.

²⁷ Didif dimfarur gij mar erek ahais ojgomuja onjoros dufonskos eteb rot, tina enadaij nou didif diker keingg dufons rot tein guru. Noba gij mona ofoukou bera mosona eteb ongg didif, noba magonen didif eteb tein. Noba gij mona ofoukou tein bera dedin maat enadaij guru. Noba gij mona ofoukou bera meifina engk didif eteb jeska dedin meisoufa enadaij guru. Noba gij mona insa koma bera dedin mod egema nou dingker gij tein guru.

²⁸ Noba mar okum egema dokun deika bera, dudou efeneinei eteb rot dedin rusnok Mod Ari.

²⁹ Jeska gij mona onnga rua rudou onowesa efek guru, beda didif dudou okora eteb rot rua ojgomuja. Noba gij mona onnga rua risiri gij mar onnga oska, beda dudou efeneinei eteb rot rua ojgomuja.

³⁰ Giskini, didif dinesitit disinsa difaga rot mar erek insa koma guru. Noba Yesus Kristus efen meka onnga mimif misitit gu bera ejjinaga rot koma tein fob. Tina erek didif disitit disinsa dufoka rot mar egens, beda didif dimesitit osok gij mar onnga orocunc rot oida didif bera dunowesa efek jinaga guru.

³¹ (11:30)

³² Jeska gij mona onnga didif dingker gij kota Damsyik ros, beda raja Aretas efen Gubernur obk tentarer jeskasada ruhca didif fogora ragei didif.

³³ Tina rusnok bera ritki morungga eteb rot didif jeska mer efesi jah mebah fogora didif duka jeska.

12¹ Didif dimesitit rot disinsa dufoka ai juens deika erek rasul-rasul onnga ebireira insa koma rutunggom ojgomuja. Noba erek didif disitit rot disinsa dufoka, beda koma onofij didif rot tenten

guru, tina didif dudou os difesij gu iwa osok gij mar onnga Allah oncunc gu didif sis fob. Jeska Allah omfij didif rot mar egens jeskaseda dudou ebriyi gij erek koisoisa fob.

² Mar insa koma bera erek kef: Gij tahun onnga setka kungkob tohkuru fob bera Ofa ofra didif jah mebaga. Tina didif dinejginaga rot oida Allah omfra dedin difaga era difena ojgomu jah suma guru. Allah esinsiyai bera ejginaga rot fob.

³ Ofa ofra didif jah mebaga erek koma ojgomu. Noba didif dagot juens deika rot oida, erek Ofa ofra difaga era difena ojgomu jah mebaga bera dinejginaga rot guru.

⁴ Noba askesi didif dingker gij mebaga, beda didif dingg mar onswos eteb onnga rusnok mebif rinefesij rot jinaga guru.

⁵ Jefeda adaj nou rusnok risitit risinsa rufoka rot mar erek insa koma onnga onswos eteb ojgomu. Tina didif dimesitit disinsa rot mar egens ojgomu, koma bera osok gij mar onnga orocunc rot teinefa didif disinsa dunowesa efek guru.

⁶ Jeska erek didif dudou os disitit disinsa rot mar insa koma skoita rusnok enjgineg, beda koma onoska guru. Erek koma jeska mar onnga didif dimefesij rot bera erek tenten ojgomu. Tina didif dinesitit disinsa rot jeskaseda rusnok enjgineg rusujohu rot oida didif bera erek osnok egens onnga ongnoska ekirsa jeska rusnok enjgineg erek koma guru.

⁷ Noba didif dingg mar insa koma onnga onswos eteb gu mebaga fob, jefeda Allah osujohu rot oida didif dimesitit disinsa dufoka rot ojgomuja. Jefeda Ofa esa mar egens gu didif onnga erek oin keingg didif rot ojgomuja. Ofa otunggom mar erek koma

jeskaseda didif dinesitit disinsa dufoka rot mar onswos insa koma guru. Noba mar insa koma onnga Ofa ensa skoita didif bera morototuma erek mar onnga Bilis ereneni didif rot tein.

⁸ Noba didif duis gu Allah rot ofosma juomu jeskaseda Ofa eita mar koma jeska didif ojgomu.

⁹ Tina Ofa onoitij rot guru. Jeska Ofa agot gu didif oida, "Erek Didif ducunc dudou onnga oufamofa eteb skoita bua, beda koma bera adaj nou ojgomu. Jeska Didif ducunc dedin owesa efek onnga ekirsa eteb oisouska rusnok onnga risinsa rerin owesa efek guru." Jefeda erek didif dunowesa efek jinaga guru, beda didif dudou os erek koma jeskaseda Yesus Kristus efen owesa efek emah gu didif erek ahais ekirsa ojgomu.

¹⁰ Noba gij mona onnga didif dunofora efek guru ni, era rusnok ruga oruh didif ni, era mar onnga okum ah keingg didif ni, era rusnok rita mar onnga ofogog skoita didif ni, era mar okum ereneni didif ni, beda dudou onokum rot guru. Jeska oisouska mar koma nomnaga bera didif durofij Yesus Kristus ojgomu.

¹¹ Didif dinsitit disinsa dufoka rot mar insa koma jeskaseda duroftuflu iwa rot oida iwa bera ita mar rot idou onnga osumsumu ros. Jeska iwa yugif gu rasul-rasul onnga ebireira insa koma ros. Noba erek iwa isitit rot mar onnga didif duntunggom ojgomu, beda koma bera oufa. Tina iwa ineita erek koma guri. Noba erek iwa isujohu rot oida didif dufoka enaksa guru, tina dedin dufoka onoin gij rasul-rasul onnga ebireira insa koma onnga iwa yufra erek rufoka aksa eteb guru.

¹² Noba gij mona onnga didif dingker jera iwa ros, beda didif duin keingg dudou efesi rot iwa fogora

dutunggom mar onswos ofoukou onggga ereita idou ousaha rot tein. Beda mar koma bera onggga orocunc rot oida didif direk rasul egens onggga tenten ojomu.

¹³ Jefeda teinefa fogora iwa isujohu rot oida didif ducunc dudou efesi erek oufa ekirsa skoita rusnok Mod Ari enjgineg erek komo. Jeska didif direjgei rusnok Mod Ari nomnaga jeskaseda rua rufij didif rot fifi era mareibra ojomu. Tina didif dineradgodu iwa rot mar insa koma jinaga guru. Jefeda onggga tenten bera, koma erek didif duncunc iwa erek ofoufem ekirsa jeska rusnok Mod Ari enjgineg ojomu. Jefeda teinefa fogora idou okum rot didif erek komo.

¹⁴ Noba erek dektek deika guru, beda didif dumojogog iwa rot ofosma juomu deika. Noba erek didif direjgei iwa rot fifi era mareibra gij mona insa koma, beda koma erek didif dita mar okum keingg iwa. Jefeda didif dinerejgei iwa rot mar erek koma guru. Jeska didif dudou onosos rot yeyin mareibra guru. Tina didif dudou osos rot oida iwa iroru Yesus Kristus rot tenten ojomu. Noba onggga tenten bera, riser rineita fifi era mareibra gu rerin riker jera rusir guru. Tina riker jera rusir bera onggga rita fifi era mareibra gu rerin riser ojomu. Beda erek koma tein didif, onggga direk yeyin ika, bera dunois gu iwa rot mar insa koma guru.

¹⁵ Noba didif dimera disinsa dedin fifi jera mareibra noba difarur rot disinsa ditma tein jeskaseda durofij iwa rot ojomuja. Jefeda didif dijginaga rot oida iwa idou omokora rot didif osok gij mar insa koma si.

¹⁶ Noba iwa ijginaga rot oida gij mona onggga didif dunjogog iwa sis fob, beda didif dinerejgei iwa rot mar egema tein guru. Erek koma tina rineya jah

ifekesa bera ragot oida didif dita mar erek insa koma jeskaseda durokrusa iwa rot ojgomu.

¹⁷ Tina didif duis gu iwa jeskaseda isujohu rot mar onnga didif dita erek insa komo. Jeska rusnok onnga didif dumbk skoita iwa bera rinerejgei iwa rot mar egema tein jinaga guru.

¹⁸ Noba sis fob bera didif duis gu Titus jeskaseda ofa jera mefmen mohujir enjgineg rija skoita iwa. Noba iwa ijginaga rot tenten fob oida Titus eneradgodu iwa rot mar egema tein guru. Noba iwa tein ijginaga rot oida Titus jera didif bera maita mar erek morototuma ojgomu.

¹⁹ Erek koma beda erek iwa isujohu rot oida didif dagot mar insa koma nomnaga fogora durohoda rot skoita iwa jeskaseda idou onoska rot memef deika guru. Tina erek koma guru. Jeska onnga tenten bera, memef memfesij mar rot tomnomna jah Allah odou erek rusnok onnga rudou egens jera Yesus Kristus fob. Noba mar nomnaga onnga memef montunggom fob bera jeskaseda morofij iwa rot ojgomu fogora imororu Yesus Kristus ojgomuja. Jeska memef modou okora rot iwa onnga irek mefmen mohujir onnga ruroru Yesus Kristus tein.

²⁰ Didif dagot mar erek koma jeska didif difeneinei rot oida gij mona onnga didif dinsaga jah suma fob, beda didif dimek iwa, tina iwa iroru mar onnga oska ojgomuja ros. Jefeda mojen iwa tein gij mona onnga iwa ik didif. Didif difeneinei rot oida dimek iwa yuga omosokuma ni, idou eftirir keingg mar ni, yutkonu oska eteb rot ebeirens ni, idou eyet yeyin mareibra ni, yuga omoruhma ni, yuh rusnok enjgineg rufonoknoka ni, yufra isinsa ifoka erek aksa ni, imekebema gij ebic egens egens ni.

²¹ Didif difeneinei eteb rot iwa jeska erek didif dik iwa itunggom mar insa koma ros, beda mojen didif eteb rot iwa. Beda koma erek Allah omain keingg didif dufoka rot mar insa koma jah iwa idou tein. Noba didif dibisa rot rusnok rineya jeska iwa onggaa runtunggom mar onggaa oska fob, tina rinemeesa joug rot rerin mar onggaa oska insa koma enesi. Koma bera erek risiri morototuma noba rutunggom mar onggaa oska efekeifa erek rua risinsa rudou os ojgomu.

13 ¹ Didif dumojogog iwa rot ofosma juomu deika. Jefeda iwa isujohu rot mar onggaa rusnok runggu gij Mar Efeyi Ebsi erek kef oida, "Erek osnok egens ocunc osnok egema rot efen mar onggaa oska fob, beda enadaij nou ofa esinsa oga ojga rot mar insa koma guru. Tina onggaa oufamofa bera rusnok egeka era rugomu deika ruga ojga rot ofa. Beda rua nomnaga rufra mar okum keingg osnok egens insa koma ojgomu."

² Erek koma tein, didif dunjogog iwa rot ofosma jueka fob jeskaseda difesij rot yeyin mar onggaa oska. Jefeda ebeibeyaif, askesi didif diker erek yes jeska iwa ros, beda didif dudou os disisi joug iwa osok gij yeyin mar onggaa oska rot ofosma juomu deika fogora oisa fob. Beda gij mona onggaa didif dinsaga jah suma tina guru, beda didif dumofra mar okum keingg rua onggaa rururu mar onggaa oska si.

³ Beda gij mona insa koma tein didif dumorocunc gu iwa rot teinefa Yesus Kristus oftuntu mar oisouska didif rot tenten ojgomu. Noba Ofa bera enerek osnok egens onggaa onowesa efek guru. Tina Ofa efen owesa efek eteb jeskaseda ofij iwa rot tenten ojgomu.

⁴Jeska Ofa anggos tumu mega salib erek osnok egens ongga onowesa efek guru. Tina oisouska Allah efen owesa efek bera ofa esma eiteij ah sons fob. Beda erek koma tein, mefmen mefaga bera onowesa efek morototuma erek Ofa guru. Tina memef tein mesma owesa efek jeska Allah morototuma erek Ofa fob. Jefeda memef mefarur gu iwa ifekesa oisouska owesa efek insa koma ojgomu.

⁵Iwa iajga joug isinsa rot mar ongga iwa itunggom fog jeskaseda mar koma orocunc gu iwa rot oida iwa iroru Yesus Kristus rot tenten fob ei era enesei. Teinefa fogora iwa ita mar erek rusnok ongga rinejginaga rot oida Yesus Kristus rua bera eja erek egens jera iwa fob erek komo guri. Jeska koma orocunc rot oida iwa inororu Yesus Kristus rot tenten enesi.

⁶Memef modou os jeskaseda iwa ik mar ongga memef montunggom fob fogora isujohu rot oida memef bera mororu Yesus Kristus rot tenten fob.

⁷Noba memef mom meiteij gu Allah jeskaseda iwa inotunggom mar ongga oska deika guru. Tina memef meneita mar erek koma jeskaseda rusnok enjgineg rusujohu rot oida didif bera erek rasul egens ongga tenten ojgomu guru. Erek rusnok rineya rusujohu rot oida didif bera dineita mar erek rasul ongga tenten guru, beda koma onotunggom dudou efesi okum rot guru. Jeska memef modou os oida iwa itunggom mar ongga oufamofa ojgomu.

⁸Noba erek iwa iroru mar ongga tenten fob, beda enadaij nou memef mofra mar okum keingg iwa rot jinaga guru. Tina memef mofij iwa jeskaseda iwa iroru mar ongga tenten ojgomuja.

⁹ Noba erek rusnok enjgineg rusujohu rot oida memef bera erek rusnok onnga runowesa efek guru, tina erek iwa iroru Yesus Kristus rot ahais fob, beda memef modou eskeira rot ojgomu. Jeska mar onnga memef mom meiteij rot eteb bera oida iwa iroru Yesus Kristus rot tenten ojgomuja.

¹⁰ Erek koma jefeda didif danggot rot mar insa koma nomnaga gij surat egens kef jeskaseda gij mona onnga didif dinsaga jah suma fob, beda enadaj nou didif duftu mar gu iwa rot duga onnga ahais oisouska owesa efek onnga en jeska Tuhan guru. Jeska Ofa eneita owesa efek koma gu didif jeskaseda durot keingg rusnok rot ojgomuja guru. Tina Ofa eita owesa efek koma gu didif jeskaseda durofij rusnok rot ojgomu.

¹¹ Beda nou onnga omoisa gij surat kef bera didif dui ainsoma eteb gu iwa. Noba didif dudou os dui gu iwa jeskaseda iwa iroru Yesus Kristus rot ahais ojgomuja ni, iwa isma mar onnga didif dinsisi joug iwa rot gu iwa ni, isujohu rot mar erek egens morototuma ni, iker rot idou onnga eskeiramera morototuma ni. Iwa ita mar insa koma nomnaga beda Allah, onnga odou okora rot iwa, noba onnga eita eiteij ah onnga eskeira gu iwa, bera omot joug iwa ojgomuja si.

¹² Noba gij mona onnga iwa imorodosuma beda yagei itma jeskaseda irocunc rot oida idou omokorema oisouska Yesus Kristus rot tenten fob.

¹³ Allah efen rusnok nomnaga jah sif bera ruisu iwa.

¹⁴ Noba didif dum diteij gu Allah jeskaseda Tuhan Yesus Kristus ocunc efen odou onnga oufamofa skoita iwa. Noba didif dum diteij jeskaseda Efena

Ebsi eita oufamofa gu iwa gij mona onnga iwa imohoturuma erek egens. Ainsoma.

Galatia

1 ¹ Didif Paulus, bera onnga dunogu surat egens kef skoita iwa onnga iroru Yesus Kristus gij monuh Galatia. Noba didif dudou os disisi keingg iwa rot oida didif bera erek Yesus Kristus efen rasul egens. Noba rusnok enjgineg runocunc didif erek rasul guru. Noba rusnok rineya runofra didif erek koma tein guru. Tina Yesus Kristus jera mifmin mika Allah, onnga omfra Yesus jeska anggos fob, bera onnga oncunc didif erek Ofa efen rasul egens fob ojgomu. Didif jera mifmin muhuj Kristen onnga ringker jah sif bera mom meiteij gu mifmin mika Allah jera mifmin Tuhan Yesus Kristus tein jeskaseda Ofa omocunc oufamofa eteb skoita iwa. Beda iwa imesma eiteij ah onnga eskeiramera ojgomuja.

² (1:1)

³ (1:1)

⁴ Yesus Kristus bera aha esinsa jeskaseda agos tumu mega salib nou mifmin mar onnga oska. Noba mar onnga Ofa ontunggom insa koma bera erek mar onnga ongnoska eteb noba onnga Ofa orougif gu Allah rot. Ofa otunggom mar koma jeskaseda oskotu mimif jeska mar ofogog onnga rusnok rutunggom gij mona ebeibeyaif ojgomuja. Noba koma bera onnga mifmin mika Allah odou ejginaga rot ojgomu.

⁵ Jefeda mimif mudou os oida Ofa esma ofoka onnga aksa eteb rot mona onnga ah aibin ojgomuja.

⁶ Wah, didif dudou ousaha eteb rot iwa! Jeska iwa inroru Yesus oga onnga oufamofa gij mona onnga erek estir ros, tina ebeibeyaif bera iwa ingkikif jeska

Allah oga onnga oufamofa insa koma rot ebeirens fob. Ofa bera onnga enjeka iwa oisouska Yesus Kristus efen odou onnga oufamofa rot iwa. Noba onnga oska ekirsa bera ebeibeyaif iwa iroru oga onnga toga jeska oga onnga oufamofa insa koma fob.

⁷ Noba oga onnga toga insa koma bera erek mar onnga tenten guru. Didif dagot erek koma jeska oga onnga rusnok enjineg ruftuflu gu iwa jah suma bera orotunggom idou efesi eineina gij rot. Noba rua rireni rot jeskaseda riferwei oga onnga oufamofa osok gij Yesus Kristus ojgomu.

⁸ Tina erek rusnok enjineg, era malaikat-malaikat, era memef onnga Allah ombk tein moftuflu rot mar onnga toga jeska oga onnga oufamofa insa koma, beda didif duis gu Allah jeskaseda Ofa ofra mar okum eteb keingg memef rot ojgomu.

⁹ Oga insa koma bera onnga memef magot gu iwa sis fob, noba iwa tein inroru oga insa koma rot tenten fob. Noba ebeibeyaif didif dudou os dagot gu iwa juens deika oida, erek rusnok enjineg ruftuflu mar gu iwa onnga erek toga jeska oga onnga oufamofa onnga memef moftuflu gu iwa sis fob, beda didif duis gu Allah jeskaseda Ofa ofra mar okum eteb keingg rua noba eij rua gij mahmei meren rot ah aibin ojgomuja.

¹⁰ Jefeda mar onnga didif danggot ainsa kef bera orocunc rot oida didif duntunggom mar jeskaseda rusnok rudou efesi eskeiramera rot didif guru. Tina didif dutunggom mar jeskaseda Allah odou eskeiramera rot didif ojgomu. Jeska iwa isujohu rot oida didif dita mar jeskaseda dutunggom rusnok rudou eskeira rot didif ojgomu. Tina koma bera

tenten guru. Jeska didif dudou os dufij Yesus Kristus ojgomu.

¹¹ Edohujia, iwa ijginaga rot kef fog oida, oga onnga oufamofa onnga didif dumftuftu rot gu iwa sis fob bera enen jeska mar onnga rusnok rudou osujohu rot guru.

¹² Jeska oga insa koma enen jeska rusnok enjgineg jinaga tein guru. Noba rusnok enjgineg runoftuftu didif rot tein guru. Tina Yesus Kristus esinsiyai ojgomu bera oncunc rot oga insa koma gu didif sis fob.

¹³ Erek koma jeska iwa ingg rot teinefa didif duroru Yahudi rerin agama erebent nomnaga rot ahais sis fob. Noba gij mona insa koma bera didif duku dufos ekirsa jeska edohujir onnga morototuma jera didif, fogora dija dukag rot rua deika. Noba iwa ingg rot teinefa didif dita mar onnga okum eteb skoita Allah efen rusnok onnga ruroru Yesus Kristus gij mona insa koma. Noba didif tein direneni rot ahais jeskaseda durohoda rot rusnok insa koma nomnaga fogora runororu Yesus Kristus deika guru. Didif dita mar erek koma jeska duku dufos ahais rot erebent onnga onjuj jeska dedin indimowa onnga Yahudi.

¹⁴ (1:13)

¹⁵ Erek koma tina, gij mona onnga dedin ameina eneker rot didif enesi, beda Allah ocunc didif oisouska efen odou onnga oufamofa jeskaseda dija erek efen osnok egens onnga omfij Ofa gij mona kahma.

¹⁶ Noba gij mona onnga Ofa odou eskeira rot, beda Ofa ocunc efen efesa Yesus Kristus gu didif. Ofa otunggom mar insa koma jeskaseda didif dujoftuftu rot oga onnga oufamofa osok gij Yesus Kristus skoita rusnok onnga Yahudi guru. Jefeda gij mona onnga

Ofa ocunc Yesus Kristus skoita didif, beda didif dinejeka rusnok enjgineg rot mar insa koma efen ofou guru.

¹⁷ Erek koma tein, didif dineja jah kota Yerusalem jeskasada dijeka mar joug rua onggga rungkag rot didif erek rasul fob rot mar insa koma tein guru. Tina didif dija diker gu monuh owowa egens onggga angh gij monuh Arab. Beda didif duksons jah kota Damsyik.

¹⁸ Noba gij tahun orgomu oisa fob, beda didif dija jah kota Yerusalem jeskasada durodosu Petrus. Beda didif diker jera ofa jah suma rot mona setka noba cinja ojgomu.

¹⁹ Beda gij mona insa koma bera didif durodosu jera Yakobus onggga Yesus efen mokosa tein. Tina didif dunorodosu jera rasul enjgineg guru.

²⁰ Noba mar onggga didif dunogu rot insa kef bera erek tenten ojgomu. Didif dunocuwei mar gu iwa rot guru.

²¹ Beda didif dija jah monuh Siria jera monuh Kilikia.

²² Noba gij mona insa koma rusnok onggga rururu Yesus Kristus gij monuh Yudea bera rinejginaga rot didif enesi.

²³ Tina rua ringg mar jeska rusnok enjgineg onggga ragot oida, "Paulus, onggga ofra mar okum eteb keingg mimif onggga Kristen sis fob, ebeibeyaif bera ofa oftufu mar gu rusnok jeskasada rua rururu Yesus Kristus ojgomu. Tina sis fob bera ofa ereneni rot ahais jeskasada orohoda rot mimif nomnaga fogora munoruru Yesus deika guru."

²⁴ Erek koma noba ebeibeyaif rusnok insa koma nomnaga risitit gu Allah jeska didif dururu Yesus Kristus fob.

2¹ Ere koma noba, gij tahun setka kungkob tohkuru deika, beda didif dija jah kota Yerusalem morototuma jera Barnabas. Noba Titus tein ororu magef jah suma.

² Noba didif dineja jah suma jeska rusnok ruga ebin didif rot guru. Tina didif dija jah suma jeska Allah oncunc rot erek koma gij dudou efesi sismeni fob. Beda didif durodosu rusnok Kristen rerin ebirfager jah suma jeskaseda difesij gu rua rot teinefa didif duftufts mar osok gij Allah oga onnga oufamofa gu rusnok onnga erek Yahudi guru gij monuh onnga enjgineg fob. Tina askesi didif diker gij kota Yerusalem bera didif dimfesij rot mar insa koma gu Kristen koma rerin ebirfager risinsiyai ojomu. Didif dagot rot mar insa koma gu rua jeskaseda rua era rusnok egema tein rineseda rot mar onnga didif dimfarur rot sis fob jera mar onnga dimeita gij mona kahma tein guru. Jeska didif duftufts rot oida enadaj nou rusnok risma rudou onnga ebsi komowa oisouska hukum Musa onnga rua ruroru erek jinaga guru.

³ Ere koma jefeda ebirfager insa koma ruitij rot mar onnga didif dumftufts rot gu rusnok onnga Yahudi guru ojomu. Noba rua rineradgodu Titus, onnga erek rua onnga Yunani, jeskaseda ofa tein eris ofom mareij ofos jeska guru.

⁴ Ere koma tina, askesi memef memfesij rot mar insa koma ros, beda rusnok Yahudi rineya onnga Kristen ruira wuswus noba ragosuit rot mar onnga memef memfesij. Tina rua bera enerek mifmin muhujir Kristen onnga tenten guru, jeska rua rudou os riradgodu Titus jera rusnok enjgineg onnga erek Yahudi guru tein jeskaseda rua riris rufom mareij ofos jeska jeni hukum Musa sismeni fog. Rua rusujohu rot

oida koma bera onnga orotunggom rua erek Allah efen rusnok onnga ruroru Yesus rot tenten fob. Erek koma tina, ebeibeyaif Yesus bera onsuwa mimif jeska hukum Musa insa koma fob. Tina rusnok insa koma rudou os riradgodu mimif jeskaseda muroru hukum Musa koma tein ojgomuja.

⁵Jefeda memef tein monoitij rot mar insa koma onnga rua rudou os rot jinaga guru. Memef mosujohu rot erek koma jeskaseda oga onnga oufamofa onnga memef momftuftu rot gu iwa sis fob bera onoromohohuma jera mar onnga oska onnga rua insa koma ruftuftu rot jinaga guru.

⁶Noba osok gij rasul Yakobus, Petrus jera Yohanes onnga iwa yumfra erek yeyin ebirfager, koma bera onofoufem skoita didif guru. Jeska Allah onofra rusnok ororu rerin rufoka guru. Tina mar egens onnga ofoufem bera rua runogun mar egema tein dokun jera mar onnga didif duftuftu rot guru.

⁷Tina rua ruitij rot oida Allah bera oncunc didif jeskaseda durka Ofa efen oga onnga oufamofa skoita rusnok onnga erek Yahudi guru. Koma morototuma erek Ofa oncunc Petrus jeskaseda ofa orka efen oga onnga oufamofa skoita rusnok onnga Yahudi.

⁸Koma bera, Allah eita owesa efek gu Petrus jeskaseda eja erek efen rasul egens nou rusnok onnga Yahudi. Noba Ofa eita owesa efek gu didif tein jeskaseda dija erek efen rasul egens nou rusnok onnga erek Yahudi guru.

⁹Erek koma, beda ebirfager Kristen insa koma tein rudou ebriyi gij rot teinefa Allah oncunc efen odou onnga oufamofa skoita didif tein. Jefeda Yakobus ni, Petrus ni, Yohanes ni, onnga iwa yugif gu erek yeyin ebirfager fob, bera ragei memef metma morototuma

jeska rua ruitij rot oida Didif jera Barnabas bera onnga Allah ombk rot odou onnga eskeira jeskaseda maftuftu rot efen oga skoita rusnok onnga Yahudi guru. Noba Yakobus jera Petrus bera onnga Allah ombk goga skoita rusnok onnga Yahudi.

¹⁰ Noba mar egens onnga rua rirejgei memef rot bera erek kef oida, modou ah keingg rot mefmen mohujir Kristen onnga rufojingki fogora mofij rua ojgomuja. Noba didif dudou os dutunggom mar erek koma ojgomu.

¹¹ Gij mona juens onnga dingker gij kota Antiokhia ros, beda Petrus en jah suma. Noba didif ditaha joug ofa jah suma rot mar egens onnga ofa ontunggom onnga erek tenten guru. Erek koma jeska, sis fob bera ofa ofra mifmin mohujir Kristen onnga Yahudi erek ekirsa jera mifmin mohujir Kristen onnga Yahudi guru. Beda ofa tein et maat morototuma jera rua insa koma nomnaga ojgomu. Koma bera oufa.

¹² Tina gij mona juens bera rasul Yakobus obk efen mohujir onnga Yahudi jeska kota Yerusalem jah kota Antiokhia. Nou onnga rua rinsaga jah suma fob, beda Petrus ebes efaga jeska efen mohujir Kristen insa koma onnga Yahudi guru, jeska ofa emeesa rot rua insa koma onnga rin jeska kota Yerusalem. Erek koma jeska rua ruftuftu rot oida enadaij nou rusnok onnga Yahudi rit maat morototuma jera rusnok onnga Yahudi guru. Noba koma bera onoufa guru.

¹³ Beda rusnok Kristen onnga Yahudi rineya tein rik mar onnga Petrus ontunggom insa koma. Jefeda rua tein ribes rifaga jeska mifmin mohujir Kristen onnga Yahudi guru. Rua rita mar erek koma fogora Barnabas tein eita mar erek rua rita insa koma ojgomu.

¹⁴Erek koma, tina nou onnga didif dik rua rutunggom mar erek insa koma onnga onoruru jeni Allah oga onnga oufamofa guru, beda didif ditaha joug Petrus rot tomnomna oida, "Bua bera birek osnok egens jeska Yahudi onnga onoruru erebent Yahudi deika guru, tina giskini bua bit maat morototuma jera rusnok onnga erek Yahudi guru tein ojgomu. Erek koma jefeda teinefa fogora bua biradgodu rua onnga Yahudi guru jeskaseda rua rururu Yahudi rerin erebent ojgomu, tina bua bera gurei."

¹⁵Didif ditaha joug Petrus rot tomnomna erek insa koma jeskaseda rua nomnaga rig rot mar onnga didif danggot erek kef oida, Petrus jera didif bera marek rusnok onnga Yahudi jeska magef mafman maimowa bera runjuj jeska rusnok onnga Yahudi. Noba magef maneita mar onnga oska erek rusnok onnga runougif gu Allah enesi rita, erek koma guru.

¹⁶Noba magef majginaga rot oida Allah odou eneskeira rot mimif nomnaga oisouska mar onnga mimif mutunggom jeni hukum Musa guru. Tina oisouska mudou onnga ororu Yesus Kristus rot tenten fob, bera Allah odou eskeira rot mimif ojgomu. Noba magef bera madou efesi maruru Yesus Kristus rot tenten fob, jefeda magef maja erek rusnok onnga rudou ebsi komowa ahah Allah eiteij. Noba magef maita mar erek koma oisouska madou onnga maruru Yesus Kristus ojgomu. Noba koma bera enen jeska mar onnga magef maita jeni hukum Musa jinaga guru.

¹⁷Jefeda, mimif onnga Yahudi muisum gj Allah rot oida Ofa odou eskeira rot mimif jeska mimif mururu Yesus Kristus fob. Erek koma tina rusnok

Yahudi enjgineg rusujohu rot oida magef bera erek rusnok onnga rita mar onnga oska oigomu, jeska magef manororu hukum Musa deika guru. Jefeda rua rusujohu rot oida Yesus bera onnga otunggom magef fogora maita mar onnga oska insa koma. Tina mar onnga rua rusujohu rot insa koma bera erek tenten guru.

¹⁸ Noba erek didif dikikif fogora duroru hukum Musa deika, beda koma erek didif dusujohu rot oida rusnok onnga ruisum gij hukum Musa bera risma rudou onnga ebsi komowa oisouska mar insa koma oigomu. Beda koma tein erek orocunc rot oida didif bera dutunggom mar onnga oska, jeska dikikif jeska hukum Musa sis fob. Tina koma erek tenten guru. Jeska koma omorocunc rot oida didif duisum gij hukum Musa oigomu, tina guru.

¹⁹ Ebeibeyaif didif dunororu hukum Musa jeskaseda disma dudou onnga ebsi komowa oisouska hukum Musa insa koma deika guru. Jefeda koma erek didif danggos jeska hukum insa koma oigomu fob.

²⁰ Tina didif duntunggom mar erek koma jeskaseda disma dudou onnga ebsi komowa oisouska mar enjgineg. Koma bera, gij mona onnga Yesus anggos tumu mega salib, beda ahah Allah eiteij bera koma erek didif tein danggos morototuma jera Yesus fob. Erek koma jeska dedin dudou onnga egens jera Yesus fob. Noba, jeska didif duisum gij Yesus Kristus oigomu fob, jefeda koma bera erek didif difena ebah deika morototuma jera Ofa tein.

²¹ Erek koma, noba Allah odou os otunggom mifmin mudou efesi erek ebsi komowa oisouska efen odou onnga oufamofa eteb skoita mimif. Tina erek mimif mukoja Ofa efen odou onnga oufamofa skoita mimif

insa koma, beda enadaj nou Ofa ofij mimif deika guru. Jeska erek rusnok rita rudou onnga ebsi komowa oisouska hukum Musa onnga rua ruroru jeni ojgomu, beda koma erek Yesus efen eita mar tumu mega salib nou mimif bera erek onofij mimif guri.

3¹ Edohuji, teinefa fogora iwa idou osumsumu erek komo! Jeska iwa ita mar erek osnok egens onnga rusnok runtasa efen odou efesi fob. Erek koma, jeska sis fob bera didif duftuflu iwa rot mar onnga Yesus ontunggom nou mimif gij mona onnga Ofa anggos tumu mega salib. Tina ebeibeyaif iwa inororu mar onnga tenten insa koma deika guri.

² Didif dudou os disisi keingg idou efesi juens deika rot oida, iwa inesma Efena Ebsi Allah jeska iwa iroru jeni hukum Musa jinaga guru. Tina iwa insma Efena Ebsi jeska iwa iroru Allah efen oga onnga oufamofa osok gij Yesus Kristus onnga iwa ingg rot fob.

³ Jeska sis fob bera iwa insma idou onnga ebsi komowa oisouska Efena Ebsi Allah ojgomu. Tina ebeibeyaif iwa isujohu rot oida imesma idou onnga ebsi komowa oisouska mar onnga iwa isinsa intunggom jeni hukum Musa ojgomu. Jefeda koma bera orocunc rot oida idou osumsumu ros.

⁴ Rusnok rita efera okora gu iwa jeska iwa iroru Yesus Kristus oga noba iwa inororu hukum Musa deika guru. Tina yeyin ifera okora koma bera enerek rourou guru. Jeska Allah eita idou efesi onnga ebsi komowa oisouska Yesus Kristus fob.

⁵ Noba Allah eneita Efena Ebsi gu iwa jera otunggom mar onswos jah gu iwa ifekesa tein jeska iwa iroru jeni hukum Musa guru. Tina Ofa eita mar insa koma jeska iwa iroru Ofa efen oga onnga oufamofa osok gij Yesus Kristus onnga iwa ingg rot sis fob ojgomu.

⁶ Noba koma bera erek mar onggga Allah ontunggom nou Abraham tein. Jeska mar egens onggga rusnok runggu gij Mar Efeyi Ebsi sis fob bera agot erek kef oida, "Abraham odou ororu Allah efen oga rot tenten ojgomu, noba Allah oncunc Ofa erek osnok egens onggga mar onggga oska oskiyai tein enah gij odou efesi jinaga guru."

⁷ Jefeda iwa ijginaga rot oida erek rusnok ruisum gij Allah oga erek Abraham, beda ahah Allah eiteij bera rua tein rerin mar onggga oska oskiyai enah gij rudou efesi morototuma erek Abraham tein guru.

⁸ Sismeni fob bera Allah oncunc mar gu rusnok rudou efesi jeskaseda runggu rot mar insa koma gij Mar Efeyi Ebsi. Noba mar egens onggga rua runggu keingg rot bera oida gij mona kahma beda Allah emeita efen odou onggga eskeira rot rusnok onggga Yahudi guru oisouska rudou onggga ororu Ofa rot tenten ojgomu. Noba gij mona onggga Yesus enen enesi, bera Allah oncunc rot efen oga onggga oufamofa insa koma gu Abraham oisouska mar onggga Ofa anggot gu Abraham erek kef oida, "Oisouska mar onggga bua butunggom bera didif dumocunc dudou onggga eskeiramera skoita rusnok gij orofosutut monuh nomnaga tein."

⁹ Jefeda Allah bera omocunc efen odou onggga oufamofa eteb skoita rusnok nomnaga onggga ruroru Ofa rot tenten fob morototuma erek Ofa ocunc efen odou onggga oufamofa eteb skoita Abraham sis fob. Jeska ofa bera osnok egens onggga ororu Allah rot tenten fob.

¹⁰ Mar egens onggga runggu gij Mar Efeyi Ebsi sis fob bera agot erek kef oida, "Idu onggga onororu jeni mar nomnaga onggga Musa ongggu gij buku hukum rot

tentenmen ojgomu guru, beda Allah oga ojga rot oida ofa emagos rot ojgomu si." Jefeda mimif mijginaga rot oida rusnok nomnaga rimagos rot ojgomu. Jeska enadaj nou rusnok egema tein ruroru jeni hukum Musa nomnaga tein jinaga guru.

¹¹ Noba mar egema tein onggga runggu gij Mar Efeyi Ebsi sis fob bera anggot erek kef oida, "Allah ocunc efen odou onggga eskeiramera rot rusnok onggga rita mar rot rerin riteij ah onggga ongnoska ojgomu, jeska rua ruroru Ofa rot tenten fob." Erek koma jefeda oisouska mar insa koma onggga angh gij Mar Efeyi Ebsi bera mimif mijginaga rot tenten oida Allah eneita odou onggga eskeiramera rot rusnok jeska rua ruroru jeni hukum Musa guru.

¹² Jeska erek mimif mudou os mita mudou onggga ebsi komowa ahah Allah eiteij oisouska hukum Musa onggga mimif muroru jeni, beda koma bera erek mimif muisum gij mar onggga misinsa muntunggom ojgomu ros. Noba mimif munororu Allah rot tenten enesi. Mimif mijginaga rot erek koma jeska runggu gij Mar Efeyi Ebsi sis fob erek kef oida, "Idu onggga ororu jeni hukum nomnaga rot tentenmen ojgomu, beda ofa emesma eiteij ah onggga efeinah. Jeska ofa esinsa bera onggga ontunggom jeni mar insa koma nomnaga fob."

¹³ Erek koma tina osnok egema tein jeska mimif onggga Yahudi bera runororu jeni hukum insa koma nomnaga jinaga guru. Jefeda Allah oga ojga rot oida mimif nomnaga mimagos rot ojgomu. Tina Yesus bera onsuwa mimif jeska mar insa koma onggga Allah oga ojga rot fob. Jeska mar onggga runggu gij Mar Efeyi Ebsi sis fob bera anggot erek kef oida, "Erek rusnok runtob osnok egens tumu mega salib, beda

koma orocunc rot oida Allah oga ojga rot osnok egens insa koma oida ofa emagos ojgomu." Jefeda gij mona onnga Yesus anggos tumu mega salib, beda koma erek Ofa agos tumu mimif gu mega salib rot mar onnga Allah oga ojga rot nou mimif.

¹⁴Noba Ofa anggos tumu mega salib jeskaseda rusnok onnga erek Yahudi guru tein rimesma oufamofa eteb onnga Ofa anggen rot jah gu Abraham gij mona onnga sismeni fob. Beda ebeibeyaif mimif tein misma oufamofa eteb insa koma oisouska mudou onnga erek egens jera Yesus Kristus fob. Koma bera, erek mimif mudou ororu Yesus Kristus rot tenten, beda mimif mimesma Efena Ebsi onnga Allah anggen rot jah nou rusnok sis fob.

¹⁵Edohuji, didif dudou os dira mar egens onnga orocunc rot mar insa koma nomnaga efen ofou. Koma bera erek kef: erek rusnok ris mar joug morototuma rot mar ofoka egens fob, beda giskini rusnok enjgineg tein rineragou joug rot mar insa koma guru, era runogun mar dokun gij mona kahma deika tein guru. Jefeda erek koma tein rot mar onnga Allah anggen rot sis fob.

¹⁶Jeska Allah anggen rot mar ofoka egens gu Abraham jera efen osnok egens onnga onjuj jeska ofa rot oida Ofa emeita oufamofa eteb gu goga si. Tina iwa ik rot iskusk fog oida runogu gij Mar Efeyi Ebsi rot oida, Allah agen mar rot Abraham efen rusnok onnga runjuj jeska Ofa guru. Tina mar egens gij Mar Efeyi Ebsi agot oida, "Ofa anggen rot osnok egens onnga onjuj jeska Abraham ojgomu."

¹⁷Jefeda mar onnga didif duncunc rot ainsa kef bera osok gij mar ofoka egens ojgomu. Koma bera, mar onnga Allah anggen rot jera Abraham bera ah erek

tenten ojomu. Noba gij tahun rara wuntin tohkuru noba setka orgomu deika, beda Allah ocunc rot efen hukum-hukum gu Musa fogora ofa ogu keingg hukum koma gij buku-buku nou rusnok. Tina hukum Musa insa koma bera eneferwei rot mar onnga Allah anggen rot gu Abraham sismeni fog guru. Jefeda enadaj nou hukum Musa osuna rot mar onnga Ofa anggen rot gu Abraham tein guru.

¹⁸ Noba erek rusnok onnga runjij jeska Abraham bera ruroru jeni hukum Musa jeskaseda risma oufamofa jeska Allah, beda koma erek rua runoisum gij mar onnga Allah anggen rot gu Abraham sismeni fob deika guru. Tina mar onnga oufamofa insa koma onnga Allah anggen rot oida emeita gu Abraham bera Ofa eita rot odou onnga eskeiramera eteb fob. Ofa eneita mar insa koma jeska rusnok ruroru jeni hukum Musa guru.

¹⁹ Erek koma tina, erek Allah eita oufamofa gu Abraham jeska ofa ororu Allah rot tenten ojomu, jefeda Ofa eita hukum Musa insa koma gu rusnok rot meidu? Ofa eita hukum Musa insa koma gu rusnok gij mona kahma deika jeskaseda hukum insa koma bera omocunc gu rua rot rerin mar onnga oska. Noba hukum koma bera efen owesa efek ecira ojomuja onjoros mona onnga osnok egens koma onnga onjij jeska Abraham ensaga fob. Ofa bera onnga Allah anggen rot gu Abraham sis fob. Noba Allah ocunc rot hukum-hukum insa koma gu Musa oisouska malaikat-malaikat onnga Ofa obk skoita Musa. Beda Allah ocunc rot hukum insa koma gu rusnok oisouska Musa tein.

²⁰ Noba erek gosnok gegeka onnga gegang mar okowu ah moguma, beda erek giskini osnok egens

ongga ont deimos bera agot mar rot goga. Ere koma tina gij mona onga Allah anggen rot mar gu Abraham, beda Ofa agot mar teisis gu Abraham ojgomu. Noba Abraham esma mar koma teisis jeska Allah ojgomu.

²¹ Tina jeska Allah anggen rot mar insa koma teisis gu Abraham sismeni fob, jefeda mimif mijjinaga rot oida hukum Musa bera enerek moroju enjineg onga rusnok ruroru jeskaseda rita rudou onga ebsi komowa ahah Allah eiteij guru. Jeska erek Allah eita hukum koma gu rusnok jeskaseda rita mar erek insa koma, beda koma erek rua ruroru hukum Musa ojgomu, noba runoisum gij mar onga Allah anggen rot insa koma gu Abraham guru.

²² Noba runggu mar egens gij Mar Efeyi Ebsi onga anggot erek kef oida, "Ahah Allah eiteij bera rusnok nomnaga rutunggom mar onga oska fob. Noba enadaij nou rua rusuwa risinsa jeska rerin mar onga oska insa koma jinaga guru." Allah otunggom mar erek koma jeskaseda rusnok risma rudou onga ebsi komowa ahah Ofa eiteij oisouska rudou onga ororu Yesus Kristus rot tenten fob. Mar onga oufamofa eteb onga Ofa anggen rot sis fob bera Ofa emeita gu rusnok nomnaga onga ruroru Ofa efen oga si.

²³ Noba gij mona onga Yesus enen enesi, beda mimif bera erek rusnok onga ringker gij mod oskusk, jeska mimif muroru hukum Musa ros. Noba hukum koma ocunc rot oida mifmin mar onga oska enahuma, jefeda mimif mimagos rot ojgomu si. Noba enadaij nou mimif musuwa misinsa jeska hukum insa koma jinaga guru. Noba mimif miker erek koma onjoros mona onga Allah oncunc rot oida mimif

musuwa jeska hukum insa koma oisouska mudou onnga ororu Yesus Kristus ojgomu.

²⁴Jefeda hukum Musa koma bera erek osnok egens onnga omfij oforoka egens fogora ecira rot ofa erek deci deci. Beda erek koma tein, hukum Musa insa koma bera ecira rot mimif deci deci tein ojgomuja onjoros mona onnga Yesus Kristus en fob. Beda gij mona insa koma bera mimif mita mudou onnga ebsi komowa ahah Allah eiteij oisouska mudou onnga ororu Yesus Kristus fob.

²⁵Noba jeska Yesus Kristus, onnga mimif muroru, bera en fob jefeda hukum Musa insa koma efen owesa efek onoin keingg mimif deika guru.

²⁶Jefeda ebeibeyaif iwa nomnaga onnga Yahudi jera iwa onnga erek Yahudi guru tein bera ija erek Allah efen efeser fob. Erek koma jeska iwa iroru Yesus Kristus rot tenten fob.

²⁷Jeska gij mona onnga mimif nomnaga mita baptis, beda koma orocunc rot oida mimif nomnaga mija erek egens jera Yesus Kristus fob. Beda mimif tein mita mar erek Ofa eita ojgomuja.

²⁸Koma bera, rua onnga Yahudi ni, rua onnga Yahudi guru ni, rua onnga rumfij rerin ebirfager ni, rua onnga runt gu risinsa fob ni, runer ni, rujager ni, rua koma nomnaga bera onofoufem skoita Allah guru. Jeska ahah Allah eiteij bera mimif nomnaga mirek egens oisouska Yesus Kristus ojgomu.

²⁹Iwa iroru mar onnga Allah anggen rot gu Abraham, jefeda iwa tein bera erek Allah efen efeser. Beda Ofa emeita oufamofa gu iwa morototuma erek Ofa anggen rot gu Abraham sis fob.

4¹Iwa isujohu rot mar egens onnga orocunc rot hukum Musa erek kef oida, oforoka egens efen

meka onggga orna mei ahta, tina oforoka egens koma bera efen owesa efek enekirsa jeska rusnok onggga rufij efen meka guru.

²Jeska rua onggga rumfij meka bera ruftuoftu meka efen oforoka egens insa koma noba rincira rot ofa ojpgomuja onjoros ofa orna fob. Beda ofa ougif gu rerin ruga tein ojpgomu. Noba gij mona onggga ofa orna eteb fob, beda ofa esma meka efen mareibra nomnaga. Jefeda ofa onororu rusnok onggga rumfij insa koma ruga deika guru.

³Mimif bera erek oforoka egens insa koma tein. Jeska gij mona onggga Allah onobk Yesus enesi, beda mimif mugif gu mifmin erebent jera hukum-hukum onggga mebif efen erek oforoka egens insa koma ororu rusnok enjgineg ruga ojpgomuja.

⁴Tina gij mona onggga Allah anggen eimofoj rot oisa fob, beda Ofa obk efen efesa skoita rusnok mebif. Beda Ofa efen efesa koma bera onjuj jeska efen mosu jah gu mebif. Noba efen efesa insa koma tein efen eiteij ah bera erek rusnok onggga Yahudi tein, jefeda Ofa tein ororu jeni hukum Musa ojpgomuja.

⁵Noba Allah obk Ofa jeskaseda osuwa mimif jeska hukum Musa onggga oin keingg mimif ojpgomuja. Beda Ofa ocunc mimif erek Ofa efen efeser. Jefeda mimif misma mar nomnaga onggga Ofa anggen rot erek oforoka egens insa koma esma mareibra nomnaga onggga efen Meka anggen rot.

⁶Noba jeska mimif mija erek Allah efen efeser, jefeda Ofa obk Efena Ebsi onggga engker gij Yesus, jeskaseda Ofa engker gij mifmin mudou efesi tein. Noba oisouska Efena Ebsi insa koma onggga engker gij mudou efesi bera mimif muis rot mudou onggga erirei eteb gu Allah oida, "Bua bera dedin akeina!"

⁷ Erek koma jefeda iwa bera inerek rusnok onnga rumfij rerin ebirfager fogora ruroru jeni rerin ruga deika guru. Tina ebeibeyaif bera iwa ija erek Allah efen efeser fob. Noba, jeska iwa irek Ofa efen efeser fob, jefeda iwa tein imesma mar onnga oufamofa eteb onnga Ofa ensejah nou efen efeser tein ojgomu si.

⁸ Sis fob, gij mona onnga iwa inejginaga rot Allah enesi, beda iwa yugif gu yeyin mar onnga erek tenten guru ojgomuja morototuma erek rusnok onnga rugif gu rerin ebirfager ojgomuja.

⁹ Tina ebeibeyaif bera iwa ijginaga rot Allah fob. Era, onnga tenten bera, Ofa ejginaga rot iwa fob. Erek koma, jefeda teinefa fogora iwa idou os ikikif sons skoita Yahudi rerin erebent jera rerin hukum-hukum erek komo. Jeska ebeibeyaif bera iwa iroru erebent onnga mebif efen rot rerin mona egens onnga eteb ni, jera mesta egens onnga eteb ni, jera tahun egens onnga eteb ni ojgomuja. Tina mar insa koma bera onofij iwa oskiyai tein jinaga guru. Noba mar koma bera eneita idou efesi erek ebsi komowa ahah Allah eiteij tein jinaga guru.

¹⁰ (4:9)

¹¹ Noba didif dudou efeneinei rot iwa, jeska didif dimeesa rot oida mar onnga dimfarur rot Allah efen oga jah gu ifekesa bera onofij iwa guri.

¹² Jefeda didif dui gu iwa rot ahais jeskasada iwa ibes ifaga jeska Yahudi rerin erebent jera hukum-hukum insa koma ojgomu, erek didif tein dibes disinsa difaga jeska mar insa koma sis fob. Didif dita mar erek koma tein gij mona onnga dingker jera iwa jeskasada dija erek egens jera iwa. Noba iwa

icunc idou efesi onnga oufamofa skoita didif gij mona insa koma.

¹³ Noba iwa idou ah keingg fob rot oida, gij mona onnga didif dinja jah yeyin kota jeskaseda duftuftu iwa rot Allah efen oga bera maren didif gij mona insa koma.

¹⁴ Beda iwa inebes ifaga jeska didif era inokockereta didif rot osok gij mar insa koma guru. Tina iwa iron didif rot idou onnga ongnoskamoka ojgomu erek imoroun malaikat egens onnga Allah ombk skoita iwa era erek iwa imoroun Yesus Kristus esinsa skoita iwa ojgomu.

¹⁵ Noba didif dijginaga rot oida iwa idou ererei ojgomu noba iwa incunc idou onnga okora rot didif erek ahais tein. Jeska gij mona insa koma bera iwa insejah idou efesi jeskaseda yufij didif rot mar meidu onnga ducosu rot ojgomu. Noba erek iwa yeyin owesa efek rot, beda iwa yuku yeyin itej efef jeskaseda ita gu didif. Tina ebeibeyaif bera idou eneskeira deika guru.

¹⁶ Jefeda ebeibeyaif didif dusujohu rot oida yeyin idou erek oska rot didif fob, jeska didif duftuftu iwa rot Allah efen oga onnga tenten sis fob.

¹⁷ Rusnok enjineg koma onnga rururu Yahudi rerin erebent ros bera rudou os eteb jeskaseda iwa iroru rerin mar onnga rua ruftuftu ojgomu. Tina rua runoroun iwa skoita rerin erebent koma jeskaseda mar koma omofij iwa guru. Onnga tenten bera, rua rudou os ruokrusa iwa ojgomu jeskaseda iwa inororu mar onnga didif dumftuftu gu iwa sis fob deika guru. Beda iwa imoruru rua rot idou onnga onngasmos ojgomu.

¹⁸ Tina erek rusnok rudou os eteb jeskaseda rufij iwa rot mar onnga ongnoska ojomu, beda mar onnga rua runtunggom insa koma bera erek oufamofa ojomu. Noba erek rua rita mar onnga ongnoska koma gij mona onnga didif dineker jah suma jera iwa guru, beda koma erek oufamofa ekirsa tein. Tina rua rineita mar erek koma guru.

¹⁹ Iwa bera erek dedin edeser onnga dudou okora eteb rot. Jefeda dudou efeneinei eteb rot iwa ojomuja onjoros mona onnga Yesus Kristus efen oga angh gij idou efesi rot tenten fob. Koma erek ojaga egens onnga otkonu okora eteb onjoros mona onnga ofa engker rot efen efesa jeska fob.

²⁰ Erek koma, noba didif dudou os diker morototuma jera iwa ebeibeyaif jeskaseda dagot rot mar insa kef nomnaga rot duga onnga eriagamaga skoita iwa ojomu. Jeska ainsa kef bera didif dijekjeka dudou efesi rot iwa ojomuja ros.

²¹ Iwa onnga idou os iroru hukum Musa ojomuja ros isujohu rot iskusk osok gij mar enjgineg tein onnga Musa onngu gij efen buku hukum sis fob ojomu.

²² Jeska Ofa onngu gij buku insa koma rot oida, Abraham efen efesa gegeka. Efen efesa egema onnga onjuj jeska ofa efen mohona Hagar onnga erek rusnok onnga rumfij ojomu. Noba efen efesa egema bera onjuj jeska ofa efen mohona Sara onnga erek rusnok onnga runt gu risinsa ojomu.

²³ Noba efen efesa onnga sismeni koma bera onjuj jeska Hagar jeska ofa jera Abraham gesinsa godou os ojomu. Tina efen efesa onnga egema koma bera onjuj jeska Sara jeska koma bera onnga Allah anggen rot skoita Abraham sis fob.

²⁴ Noba gojaga gegeka insa koma bera erek orocunc rot mar egeka onnga Allah anggot eimofoj rot sis fob. Mar egens koma bera hukum Musa onnga rusnok ruroru jeni. Noba mar onnga egeka bera rusnok ruisum gij Allah rot mar onnga Ofa anggen rot skoita Abraham sis fob. Erek koma, beda Hagar bera erek orocunc rot rusnok koma onnga ruroru jeni hukum Musa ojomuja jeska rua rusujohu rot oida rimeita rudou onnga ebsi komowa rot si. Noba rusnok onnga ruroru hukum Musa erek koma bera erek rusnok onnga rumfij rerin ebirfager ojomu. Jeska rua rugif gu hukum Musa ojomuja erek osnok egens onnga ougif gu efen ebirfaga ojomuja.

²⁵ Hagar bera erek osnok egens onnga ougif gu efen ebirfaga egens ojomu. Jefeda ofa bera erek orocunc rot hukum Musa insa koma onnga Allah eita gu efen rusnok Yahudi jah gu memaga ofos Sinai onnga angh gij monuh Arab. Jeska rua rugif gu hukum Musa insa koma ojomuja erek Hagar ougif gu efen ebirfaga egens onnga ofa omfij ojomuja. Noba Hagar tein bera erek orocunc rot kota Yerusalem onnga angh gu mebif ebeibeyaif tein. Jeska rusnok onnga ringker gij Yerusalem bera rugif gu hukum Musa ojomuja erek rusnok onnga rugif gu rerin ebirfaga ojomuja.

²⁶ Tina Sara bera erek osnok egens onnga ot gu esinsa. Jefeda ofa bera erek orocunc rot Yerusalem onnga angh gu mebaga ojomu. Noba ofa bera erek orocunc rot rusnok onnga ruisum gij mar onnga Allah anggen rot sis fob ojomu. Noba ofa tein bera erek mifmin mabowa, jeska sis fob ofa onougif gu ebirfaga egens ojomuja erek rua onnga rumfij guru. Erek koma tein mimif onnga deisef bera munougif gu hukum Musa ojomuja deika guru.

²⁷ Sismeni fob Sara bera ebsei ojomu jefeda onok efesa jinaga guru. Tina gij mona kahma deika, beda ofa eker rot efesa egens onnga Allah anggen rot sis fob. Jefeda nabi Yesaya onngu mar egens gij Mar Efeyi Ebsi erek kef oida, "Bua onnga bibsei bera budou erirei rot ojomu! Noba bua onnga bineker rot bebin ebasa egema tein enesi, bua bifaga ouka rot ojomu. Jeska erek bifaga onokum rot ebasa enesi, tina gij mona kahma beda bua bumok ebaser ekirsa jeska mohona egens onnga engker jera efen mahina ojomuja si."

²⁸ Edohuji, Abraham esma efen efesa Ishak jeska ofa oisum gij Allah onnga anggen rot mar insa koma sis fob. Noba iwa tein bera erek Abraham efen medebeser onnga onjuj jeska Ofa. Jeska iwa tein yuisum gij Allah rot oida imesma oufamofa jeska Ofa oisouska mar onnga Ofa anggen rot sis fob.

²⁹ Noba gij mona onnga Abraham efena ebah ros, beda efen efesa orna Ismail onnga onjuj jeska Hagar ororu gesinsa godou os rot ojomu. Beda Ismail eita odou ofogog skoita efen mokosa Ishak onnga onjuj jeska Sara ororu jeni erek Allah odou ejjinaga rot ojomuja. Noba mar koma ah ojomuja onjoros mona deisef tein. Jeska rua onnga ruroru jeni hukum Musa ros bera rudou ofogog skoita mimif onnga muisum gij Allah oga ojomuja.

³⁰ Tina iwa ik rot mar egens onnga rua runggu gij Mar Efeyi Ebsi onnga anggot rot erek kef oida, "Bua bikemeji ojaga egens koma onnga erek osnok egens onnga ofij jera ofa efen efesa jeska bua ojomu. Jeska enadaj nou efen efesa koma esma mar onnga meka efen jinaga guru. Mar koma bera efesa egens,

ongga onjuj jeska mosu onnga ont gu esinsa, efen ovgomu."

³¹ Erek koma jefeda mimif onnga muisum gij Allah oga ovgomu bera erek Sara efen efeser. Jefeda mimif mimesma oufamofa eteb jeska Allah si. Tina rua onnga ruisum gij hukum Musa ovgomu bera erek Hagar efen efeser. Jefeda rua rinesma mar onnga oufamofa jeska Allah jinaga guru.

5¹ Yesus Kristus bera onsuwa mimif nomnaga jeska hukum Musa fob. Jefeda ebeibeyaif bera mimif mut gu misinsa rot tenten fob. Erek koma jefeda iwa yut joug idou efesi rot ahais ovgomuja noba inesiri gu rua onnga rugif gu hukum Musa insa koma guru.

² Iwa ig rot mar egens onnga didif, Paulus onnga erek rasul egens, dagot erek kef: Erek iwa isiri gu rusnok insa koma fogora iris ifom mareij ofos jeska, beda mar onnga Yesus Kristus ontunggom nou rusnok bera onofij iwa tein jinaga guru fob.

³ Didif dagot rot mar insa koma gu iwa juens deika oida, erek osnok egens odou os eris ofom mareij ofos jeska, beda ofa ororu hukum Musa nomnaga tein erek jeni ovgomu.

⁴ Jeska ebeibeyaif ofa bera osujohu rot oida emesma odou onnga ebsi komowa ahah Allah eiteij oisouska mar insa koma onnga ofa esinsa ontunggom ovgomu, tina guru. Jefeda mar onnga ofa ontunggom koma bera erek efen motka onnga ebga jeska Yesus fob. Enadaj nou ofa esma oufamofa jeska Allah rot efen mar onnga oska deika jinaga guru.

⁵ Tina mimif bera onnga muisum gij Allah oisouska Efena Ebsi onnga engker gij mudou efesi jeskaseda Ofa omocunc mimif erek efen rusnok onnga rerin

mar onggga oska oskiyai tein jinaga guru. Noba koma tein bera oisouska mudou onggga ororu Yesus Kristus rot tenten fob.

⁶Jeska mimif mifmin mudou onggga enja erek egens jera Yesus Kristus fob, jefeda erek rusnok riris rufom mareij ofos jeska era gurei, beda koma bera onofoufem skoita Allah guru. Tina mar onggga ofoufem bera mudou ororu Yesus Kristus ojgomu. Beda rusnok enjgineg rimek rot teinefa mudou omokorema moguma ojgomuja.

⁷Sis fob bera iwa iroru Allah oga onggga oufamofa osok gij Yesus Kristus rot iskusk ojgomuja. Tina teinefa fogora iwa inororu efen oga onggga oufamofa insa koma rot iskusk deika guro! Idu bera onggga eragou joug iwa fogora inororu mar insa koma deika guru!

⁸Rusnok insa koma riradgodu iwa jeskaseda iwa tein iris ifom mareij ofos jeska. Tina koma enen jeska Allah guru. Jeska Ofa bera onggga enejeka iwa jeskaseda ija erek Ofa efen rusnok ojgomuja.

⁹Noba mar insa koma onggga rua rumftuftu gu iwa rot bera erek roti efen efed. Jeska roti efen efed bera orok mokcin roti nomnaga fogora efifij. Beda erek koma tein, mar onggga oska onggga rua rumftuftu insa koma bera omorok mokcin iwa nomnaga si. Beda iwa nomnaga imororu mar insa koma tein.

¹⁰Erek koma tina, didif dudou egens jera iwa oisouska Yesus Kristus fob, jefeda didif dijginaga rot fob oida iwa imororu mar insa koma deika guru. Tina Allah omofra mar okum eteb keingg rusnok nomnaga onggga rusos iwa rot mar insa koma si.

¹¹Edohuji, rusnok enjgineg ragot oida didif bera duftuftu mar gu rusnok jeskaseda riris rufom mareij

ofos jeska ojgomu fogora rua rimesma rudou ongg
ebsi komowa ahah Allah eiteij. Beda rua ruroru
hukum Musa nomnaga ros. Tina koma bera tenten
guru. Jeska rua rita efera okora gu didif ojgomuja ros.
Ongga tenten bera didif duftuftu rot oida, oisouska
Yesus Kristus ongg anggos tumu mega salib bera
mimif mita mudou ongg ebsi komowa ojgomu. Noba
koma bera ongg orotunggom rua jeskaseda rita
efera okora gu didif ojgomu.

¹² Rua insa koma bera ruftuftu rot oida rusnok
riris rufom mareij ofos jeska. Erek koma jefeda didif
dudou os oida rua riris rerin rici ofongga nomnaga
jeska tein ojgomu! Jeska rua bera ongg rutunggom
rusnok Mod Ari nomnaga fogora rudou eineina gij rot
mar ongg tenten ojgomu.

¹³ Edohuji, Allah bera enejeka iwa jeskaseda iroru
hukum-hukum jera erebent ofoukou ongg rusnok
rerin ojgomuja guru. Tina Ofa enjeka iwa jeskaseda
yut gu isinsa ojgomu. Erek koma tina enadaij nou
iwa itunggom mar ongg idou eftirir keingg ojgomuja
guru. Tina ongg oufamofa bera iwa idou omokorema
moguma noba imofijma ojgomuja.

¹⁴ Hukum egens bera agot erek kef oida, "Iwa idou
okora rot yeyin ihujir nomnaga erek iwa idou okora
rot isinsa ojgomu." Noba erek mimif muroru jeni
hukum egens insa koma ojgomu, beda koma bera
erek mimif muroru hukum Allah nomnaga fob.

¹⁵ Tina erek iwa isejah idou efesi ongg ofogog
morototuma noba idou oska morototuma, beda mar
koma omorotunggom iwa fogora imekebema noba
irebserma ojgomuja.

¹⁶ Jefeda didif duis gu iwa jeskaseda iwa yuitij rot
Efena Ebsi Allah ecira rot iwa ojgomuja. Jeska koma

bera omofij iwa jeskaseda inesiri gij mar onggga idou eftirir keingg guru.

¹⁷ Jeska mar onggga iwa idou eftirir keingg onggga erek ofogog bera eretei rot mar onggga Efena Ebsi odou os rot tein. Noba mar onggga Efena Ebsi odou os rot bera eretei rot mar onggga idou eftirir keingg tein. Koma bera, erek iwa iroru mar onggga idou eftirir keingg, beda enadaij nou iwa itunggom mar onggga Efena Ebsi Allah odou os rot tein guru. Noba erek iwa iroru mar onggga Efena Ebsi Allah odou os rot ojgomu, beda enadaij nou iwa itunggom mar onggga idou eftirir keingg tein guru.

¹⁸ Erek koma, tina erek Efena Ebsi Allah encira rot iwa fob, beda hukum Musa efen owesa efek enah gu iwa deika guru.

¹⁹ Mar insa koma onggga mudou eftirir keingg bera ah tomnomna gu rusnok riteij. Koma bera erek rusnok risiri morototuma ni, rutunggom mar onggga oska egema tein rot rifaga morototuma ni,

²⁰ rugif gu mar onggga tenten guru ni, risa mar onggga oska skoita rusnok enjgineg ni, rita rudou ofogog skoita rusnok enjgineg ni, ruga omosokuma ni, rudou emejiseima ni, rita mar rot rutkonu oska ni, rufra risinsa rufoka aksa ekirsa jeska rusnok enjgineg ni, rua rimekebema ni, rukoja rusnok enjgineg onggga rudou enerek egens jera rua guru ni,

²¹ rudou eftirir keingg rusnok enjgineg rerin mar ni, ribirfaga erebibei rot mofut efei ojgomuja ni, risba maat mefma fogora risiri morototuma ni. Noba didif disisi keingg iwa rot mar insa koma nomnaga sis fob. Jefeda didif dudou os disisi keingg iwa juens deika oida rusnok onggga rutunggom mar erek insa koma

bera runoira jera rusnok onggga Allah ofoka ereij keingg jinaga guru.

²² Erek koma, tina rusnok onggga ruitij rot Efena Ebsi Allah encira rot rua bera rita mar erek kef oida, rua rudou omokorema ni, rudou erirei eteb ni, rua riker rot rudou onggga eskeiramera ni, rua ruin keingg rudou efesi ni, rua rucunc rudou onggga oufamofa skoita rusnok enjgineg ni, rua rutunggom mar onggga rua ranggen rot sis fob ni,

²³ rua rita mar rot rudou onggga eriaga ni, rua ruin keingg mar onggga oska onggga ah gij rudou efesi ni. Noba rusnok onggga rita mar erek insa koma bera rinekirsas rot hukum-hukum egema tein jinaga guru.

²⁴ Erek koma tein, rusnok nomnaga onggga ruroru Yesus Kristus bera rikikif jeska mar onggga oska insa koma nomnaga onggga oroku rudou efesi fob, fogora rua rita rudou onggga egens jera Yesus Kristus onggga runtob tumu mega salib. Ofa bera agos nou mifmin mar onggga oska erek insa koma nomnaga fob.

²⁵ Noba jeska mimif misma eiteij ah onggga efeinah oisouska Efena Ebsi Allah fob, jefeda oufa nou mimif mita mar jeni erek Efena Ebsi Allah ocunc gu mimif ojgomu.

²⁶ Noba onggga oufa bera munofra misinsa mufoka erek ekirsas jeska rusnok enjgineg guru. Noba mimif mineita mar onggga orotunggom rusnok enjgineg fogora rudou oska rot mimif era rudou ejisei rot mimif guru.

6¹ Edohuji, gij mona onggga iwa ik yeyin ihuj onggga Kristen egens eita mar onggga oska beda iwa, onggga ita mar rot tenten oisouska Efena Ebsi Allah, bera yuftufts osnok egens koma rot idou onggga eriagamaga osok gij mar onggga ofa ontunggom

koma ojgomu. Tina iwa tein yut joug isinsa idou efesi jeskaseda mar onnga oska koma onoroku idou efesi fogora isiri gij mar onnga oska koma tein guru.

²Noba iwa imofijma rot yeyin mar onnga okum. Beda oisouska mar koma bera iwa imotunggom mar onnga Yesus Kristus anggot rot ojgomu.

³Noba erek osnok egens ocunc esinsa rot oida ofa bera efen ofoka onnga aksa ekirsa jeska rusnok enjgineg nomnaga, beda koma bera erek ofa ocuwei mar gu esinsa ojgomu.

⁴Tina onnga oufamofa bera, orofosutut osnok egens eyajga joug esinsa fog rot mar onnga ofa ontunggom jeskaseda ek rot oida erek oufa ei era gurei. Noba erek ofa otunggom mar onnga oufamofa, beda ofa eita odou onnga erirei eteb rot ojgomu. Tina ofa tein eneramenima jeni mar onnga ofa ontunggom jera mar onnga rusnok enjgineg runtunggom tein guru.

⁵Jeska adaij nou orofosutut osnok egens ot joug esinsa rot mar onnga ofa ontunggom onnga erek oufa era onnga erek oska.

⁶Noba gij mona onnga rusnok enjgineg ruftuftu iwa rot Allah efen oga, beda iwa yufij rua rot yeyin mar erek maat, era mar onnga enjgineg tein ojgomu.

⁷Erek iwa isujohu rot oida iwa inororu mar onnga oska insa koma deika guru, beda koma erek iwa yucuwei mar gu isinsa ojgomu. Jeska enadaij nou rusnok ruokrusa Allah jinaga guru. Mar onnga oska onnga rusnok rutunggom gij riteij ah kef bera omoksons skoita rua si.

⁸Jeska erek osnok egens onnga odou os ororu mar onnga oska gij efen eiteij ah kef jeskaseda ereita esinsa odou erirei rot, beda Allah omofra mar okum

eteb keingg ofa rot si. Koma tein bera erek efen ofons. Noba erek osnok egens odou os otunggom mar onnga oufamofa jeskaseda ereita Efena Ebsi Allah odou eskeira rot, beda ofa emesma efen eiteij ah onnga ah aibin ojgomuja. Koma tein bera erek efen ofons.

⁹ Noba enadaj nou mudou eskes rot mar onnga ereita Allah odou eskeira rot guru. Jeska erek mimif mug mijmeg gij rot ahais ojgomuja, beda mona onnga Allah ensejah nou mimesma mufons rot bera emen si.

¹⁰ Erek koma jefeda, gij mona onnga efekesa ah nou mimif, beda mimif mita mar onnga oufamofa skoita rusnok nomnaga. Noba onnga ofoufem ekirsa bera mimif mita mar onnga oufamofa skoita mifmin muhujir onnga Kristen ojgomuja.

¹¹ Iwa ik rot teinefa didif disinsa dunogu huruf eteb rot disinsa ditma gij surat egens kef.

¹² Erek koma noba rua onnga riradgodu iwa jeskaseda iris ifom mareij ofos jeska bera rutunggom mar erek koma jeskaseda rerin ruhujir rudou eskeira rot rua noba rufra rerin rufoka aksa rot tein. Tina onnga tenten bera, rua rutunggom mar erek koma jeska rua rimeesa rot ebirfager Yahudi. Jeska erek rua rusujohu rot oida rusnok risma rudou onnga ebsi komowa oisouska Yesus Kristus onnga anggos tumu mega salib ojgomu, noba runororu erebent Yahudi deika guru, beda Yahudi koma rumofra mar okum keingg rua rot ojgomu.

¹³ Erek koma tina rusnok onnga ruroru rerin erebent fogora riris rufom mareij ofos jeska bera runororu jeni hukum Musa nomnaga guru. Tina rua rudou os oida iwa iroru rerin erebent insa koma ojgomu.

Rua rudou os erek koma jeskaseda rua rufra risinsa rufoka erek aksa rot jeska iwa bera yugif gu mar onnga rua risinsa ranggot rot insa koma ojgomu.

¹⁴ Tina didif bera dunofra disinsa dufoka erek aksa rot mar egema tein guru. Jeska didif dudou os duftuflu rot mar onnga Yesus Kristus ontunggom tumu mega salib nou rusnok nomnaga ojgomu. Noba oisouska mar onnga Ofa ontunggom insa koma bera dudou onosos rot mar onnga mebif efen deika guru. Noba ahah rusnok mebif riteij bera didif direk mar onnga onofoufem skoita rua deika guru.

¹⁵ Jeska erek rusnok riris rufom mareij ofos jeska era gurei, beda koma bera onofoufem skoita Allah guru. Tina onnga ofoufem skoita Allah bera rusnok riker rot rerin eiteij ah onnga efeinah ojgomu.

¹⁶ Noba rot rusnok onnga ruroru mar insa koma rot tenten bera didif dui gu Allah jeskaseda Ofa eita riteij ah onnga eskeiramera gu rua noba ocunc efen odou onnga oufamofa gu rua ojgomuja. Noba didif dudou os rot oida Ofa eita mar insa koma gu efen rusnok Israel nomnaga tein.

¹⁷ Jefeda ebeibeyaif bera enadaij nou rusnok rita mar okum skoita didif deika guru. Jeska dedin difera ofamosma onnga rusnok rita gu didif sis fob bera onnga orocunc rot oida didif direk osnok egens onnga Yesus Kristus efen fob.

¹⁸ Edohuji, didif dum diteij gu mifmin Tuhan Yesus Kristus jeskaseda Ofa ocunc odou onnga oufamofa eteb skoita iwa nomnaga. Ainsoma.

Efesus

1 ¹ Didif Paulus bera dinja erek Yesus Kristus efen rasul egens jeska koma bera ororu Allah efen odou ejginaga rot. Noba didif dunogu surat egens kef skoita iwa onnga irek Allah efen rusnok onnga ruroru Yesus Kristus gij kota Efesus tein. Iwa bera onnga iroru Yesus Kristus efen oga rot tenten ojgomuja fob.

² Didif duis gu mifmin mika Allah jera Tuhan Yesus Kristus tein jeskaseda Ofa eita oufamofa eteb jera eiteij ah onnga eskeiramera gu iwa ojgomuja.

³ Mimif nomnaga misitit gu Allah onnga mifmin Tuhan Yesus Kristus efen meka ojgomu. Jeska Ofa eita mar nomnaga onnga oufamofa gij mebaga gu mimif oisouska Efena Ebsi fob. Noba Ofa eita mar erek koma oisouska Yesus Kristus fob.

⁴ Erek koma jeska, gij mona onnga Ofa onotunggom mebif enesi, beda Ofa oga ojga rot oida oisouska Yesus Kristus onnga emen, bera Ofa omocunc mimif erek efen rusnok onnga rudou ebsi komowa. Jefeda enadaij nou rusnok enjgineg rucunc mimif erek oska jinaga guru.

⁵ Noba gij mona insa koma tein Allah ensejah rot oida oisouska mudou onnga egens jera Yesus Kristus bera mimif mimeja erek Ofa efen efeser. Mar koma bera ororu Ofa odou ejginaga rot noba odou onnga eskeiramera rot tein.

⁶ Jefeda mimif muis oufamofa eteb gu Ofa jeska Ofa oncunc mimif erek efen rusnok fob. Ofa otunggom mar insa koma oisouska odou onnga eskeiramera

eteb rot mimif noba oisouska efen efesa Yesus Kristus onnga odou okora eteb doska rot mimif.

⁷ Oisouska Yesus Kristus ogufu onnga eya tumu mega salib bera Allah onsuwa mimif jeska mifmin mar onnga oska fob. Ofa onsuna rot mifmin mar onnga oska insa koma jeska mudou efesi fob. Noba koma bera rot teinefa Ofa oncunc efen odou onnga oufamofa eteb skoita mimif.

⁸ Ofa oncunc rot mar ofoukou onnga ongnoska eteb insa koma gu mimif ororu efen odou onnga ejginaga rot mar nomnaga jera odou onnga ebriyi eteb gij mar nomnaga tein.

⁹ Noba oisouska Allah efen odou onnga eskeiramera rot mimif bera Ofa oncunc mar onnga Ofa ensejah nou otunggom gij mona onnga sis dojunmeni fob. Sis fob mar onnga Ofa ensejah rot bera ah jejema jeska rusnok nomnaga. Noba gij mona onnga sis dojunmeni koma bera Ofa osujohu rot oida Ofa omocunc mar insa koma oisouska Yesus Kristus si.

¹⁰ Beda Ofa ensejah rot oida, gij mona onnga enja ejgwaga beda Ofa omotunggom mar nomnaga onnga angh gu mebaga jera mebif tein fogora emeja erek egens oisouska Yesus Kristus ojgomu. Noba Yesus emeja erek mar insa koma nomnaga efen ebirfaga tein.

¹¹ Allah bera ontunggom mar nomnaga jeni Ofa odou ejginaga rot. Noba mar egens onnga Ofa ontunggom gij mona onnga sis dojunmeni insa koma bera erek kef: Ofa oga ojga rot oida gij mona kahma bera Ofa omocunc mimif erek efen rusnok oisouska mudou onnga eja erek egens jera Yesus Kristus fob.

¹² Ofa ensejah rot mar erek koma gij mona onnga sis dojunmeni jeskaseda gij mona kahma beda

memef onnga erek rusnok Yahudi, onnga ruisum gij Yesus Kristus rot sismeni fob, bera memesitit Ofa rot efen ofoka onnga aksa eteb doska ojgomuja.

¹³ Beda Allah ensejah rot mar insa koma nomnaga nou iwa onnga erek Yahudi guru tein. Jeska sis fob bera iwa tein ingg rot Allah oga onnga oufamofa noba onnga tenten ojgomu. Noba oga onnga oufamofa koma bera onnga onskotu iwa jeska yeyin mar onnga oska fob. Jefeda gij mona onnga iwa iroru Ofa rot tenten fob, beda Ofa oncunc iwa tein erek efen rusnok fob. Ofa ontunggom mar koma sis fob oisouska Efena Ebsi onnga Ofa anggen rot oida emen. Noba Efena Ebsi koma onnga angh gij idou efesi fob bera onnga orocunc rot tenten oida iwa bera erek Allah efen rusnok.

¹⁴ Sis fob Ofa anggen rot oida Ofa emeita mar ofoukou onnga ongnoska eteb gu mimif. Noba mar egens onnga Ofa eita gu mimif rot sismeni bera Efena Ebsi onnga engker gij mudou efesi fob. Noba koma bera orocunc rot oida gij mona kahma beda Ofa emeita efen ofod nomnaga rot omoisa gu iwa si. Noba Efena Ebsi onnga angh gij idou efesi fob bera orocunc rot oida Allah omosuwa iwa fogora oroun iwa gu esinsa tein. Jefeda mimif nomnaga misitit Ofa rot efen ofoka onnga aksa eteb doska ojgomuja.

¹⁵ Allah ontunggom mar insa koma nomnaga nou iwa fob, jefeda didif duis oufamofa eteb gu Ofa rot iwa ojgomuja. Jeska didif dingg rot oida iwa iroru Tuhan Yesus Kristus ojgomuja, noba idou okora rot Allah efen rusnok nomnaga tein ojgomuja fob. Jefeda didif dum diteij nou iwa gu Allah ojgomuja tein.

¹⁶ (1:15)

¹⁷ Ofa bera erek mifmin Tuhan Yesus Kristus efen meka noba onnga mimif tein mifmin mika onnga efen ofoka aksa eteb doska. Noba didif dum diteij gu Ofa jeskaseda oisouska Efena Ebsi bera iwa idou emebriyi eteb ekirsa gij mar onnga Allah ontunggom fob. Noba didif dum diteij jeskaseda iwa tein ita idou onnga ebriyi ekirsa gij rot Allah efen owesa efek eteb tein.

¹⁸ Noba didif dum diteij gu Ofa jeskaseda idou emebriyi ekirsa gij mar onnga Ofa ontunggom nou iwa fob. Beda iwa imoisum gij Ofa erek eteb ekirsa deika. Jeska Ofa bera oncunc iwa erek efen rusnok fob. Noba didif dum diteij jeskaseda iwa idou ebriyi gij mar onnga oufamofa eteb doska onnga Ofa anggen rot oida emeita gu efen rusnok si. Noba didif dum diteij jeskaseda idou ebriyi gij rot teinefa Ofa ofij mimif, onnga erek efen rusnok, oisouska efen owesa efek eteb.

¹⁹ (1:18)

²⁰ Noba Ofa era efen owesa efek eteb insa koma jeskaseda orofra Yesus Kristus jeska anggos sis fob. Noba Ofa era efen owesa efek insa koma tein jeskaseda eraha Yesus jah ognosk rot ofoka aksa eteb gu mebaga.

²¹ Jah suma bera Yesus Kristus efen ofoka onnga aksa ekirsa jeska rusnok onnga rufoka ereij keingg rusnok rufoukou ni, ekirsa jeska rusnok onnga rerin owesa efek ni, ekirsa jeska mar meidu meidu onnga rusnok rinjeka erek ofoka aksa gij mona deisef jera gij mona efeinah onnga emen tein ni.

²² Noba Allah bera oin keingg mar nomnaga degini jeskaseda Yesus Kristus ofoka ereij keingg mar koma nomnaga ojgomuja. Beda Ofa oncunc Yesus Kristus erek ebirfaga nou efen rusnok Mod Ari nomnaga tein.

²³ Beda mimif bera erek Ofa efen efaga. Noba Ofa bera erek mifmin ebirfaga onnga ocunc gu mimif rot mar onnga mimif mutunggom nou Ofa. Noba mifmin mudou efesi tein bera ebera rot mar nomnaga onnga Ofa eita gu mimif fob. Jeska mar nomnaga onnga Allah ontunggom bera ebera rot Ofa ojgomu.

2¹ Gij mona onnga sis fob bera iwa inougif gu Allah rot efen oga jinaga guru. Noba yeyin itej ah onnga ebera rot mar onnga oska ojgomuja. Jefeda ahah Allah eiteij bera iwa erek rusnok onnga ranggos fob ojgomu.

² Jeska gij mona insa koma bera iwa iroru mar ofogog onnga rusnok mebif rudou os rutunggom ojgomuja. Noba iwa yugif gu Bilis rot efen oga ojgomu. Ofa bera onnga ofoka ereij keingg efena ofogog nomnaga onnga angh gu mebaga. Noba efena ofogog koma nomnaga bera onnga ruftuftu rusnok mebif onnga runougif gu Allah guru rot Bilis efen oga.

³ Onnga tenten bera, sis fob mimif nomnaga mita mar onnga oska erek rusnok insa koma rita mar onnga oska ojgomu. Mimif muroru mar onnga oska onnga angh gij mudou efesi ojgomuja. Noba mimif mita mar onnga mudou osos rot tein ojgomu. Memef muroru mar onnga oska onnga mudou osujohu rot ojgomuja. Noba gij mona insa koma bera mimif tein mimesma mar okum eteb jeska Allah, erek rusnok insa koma rimesma mar okum jeska Ofa ojgomu.

⁴ Erek koma tina, askesi mimif muroru mar onnga oska erek rusnok onnga ranggos fob ahah Allah eiteij, beda Ofa eita eiteij ah onnga efeinah gu mimif oisouska Yesus Kristus onnga esma eiteij ah onnga efeinah sons fob. Noba Ofa otunggom mar koma nou

mimif jeska Ofa odou okora eteb rot mimif, noba jeska Ofa efen odou onnga eskeira rot mimif tein. Noba Ofa onskotu mimif jeska mifmin mar onnga oska insa koma oisouska efen odou onnga oufamofa skoita mimif ojgomu.

⁵(2:4)

⁶Noba oisouska mudou onnga egens jera Yesus Kristus fob, bera Allah omfra mimif tein morototuma jera Yesus Kristus jeskaseda mimif tein mufoka ereij keingg mar nomnaga morototuma jera Ofa gij mebaga.

⁷Ofa otunggom mar insa koma jeskaseda gij mona kahma beda Ofa omocunc odou onnga okora eteb rot mimif noba onnga oufamofa eteb skoita mimif oisouska Yesus Kristus ojgomuja.

⁸Erek koma jeska Allah onskotu iwa ororu efen odou onnga oufamofa skoita iwa, noba oisouska mifmin mudou onnga ororu Ofa efen oga rot tenten fob tein. Noba mimif minesma eiteij ah onnga efeinah insa koma oisouska mar onnga mimif misinsa muntunggom jinaga guru. Tina gij mona onnga Yesus anggos tumu mega salib nou mimif, beda Ofa osuna rot mifmin mar onnga oska. Noba mar koma onnga Ofa ontunggom bera erek mar onnga Ofa oh rot oubji gu mimif ojgomu.

⁹Jefeda enadaj nou mimif misitit misinsa mifaga rot jinaga guru.

¹⁰Jeska Ofa esinsiyai bera onnga ontunggom mimif erek rusnok onnga efeinah oisouska mudou onnga egens jera Yesus Kristus fob. Noba Ofa ensejah nou otunggom mar insa koma gij mona onnga sis fob jeskaseda gij mona onnga ebeibeyaif bera mimif mutunggom mar onnga oufamofa nou Ofa.

¹¹ Ere koma jefeda iwa idou onofoj joug guru rot oida sis fob bera rusnok onnga Yahudi rinjeka iwa erek rusnok onnga oska efekeifa noba onnga runougif gu Allah guru. Ere koma jeska iwa ineris ifom mareij ofos jeska guru. Tina rua rinjeka risinsa erek rusnok onnga ebsi komowa ojgomu. (Jeska rua bera ruroru Hukum Musa).

¹² Gij mona insa koma bera yeyin idou enerek egens jera Yesus Kristus enesi. Noba iwa irek rusnok onnga rusodosa jeska rua onnga Allah oncunc fob. Noba Ofa enagot eimofoj rot oida Ofa omofij iwa tein si guru. Tina iwa ingker gu mebif erek rusnok onnga riseiseifa ojgomu. Noba iwa bera erek rusnok onnga runoisum gj Allah rot mar egema tein guru.

¹³ Ere koma tina ebeibeyaif bera iwa ita idou onnga erek egens jera Yesus Kristus fob. Sis fob iwa iker erek yes jeska Allah ojgomuja. Tina ebeibeyaif bera iwa in skoita Ofa oisouska Yesus Kristus efen ogufu onnga eya tumu mega salib fob.

¹⁴ Ofa bera onnga eita rusnok Yahudi rudou onnga eskeiramera moguma jera rusnok onnga erek Yahudi guru tein. Ofa oroun mimif nomnaga fogora minja erek Allah efen rusnok ebic egens. Sis fob rusnok rudou onnga oska morototuma insa koma bera erek mejga akseij egens onnga eragou joug rusnok onnga Yahudi jeska rusnok onnga Yahudi guru. Tina ebeibeyaif bera Allah onghoda rot mar insa koma onnga orotunggom mifmin mudou erek oska morototuma fob.

¹⁵ Noba oisouska Yesus Kristus onnga anggos tumu mega salib, bera Ofa orohoda rot hukum Yahudi jera hukum onnga onjuj jeska Musa jera rerin mar nomnaga onnga riyahahir joug fob. Ofa ontunggom

mar insa koma jeskaseda mimif onggga erek ebic egeka insa koma mija erek ebic egens onggga efeinah morototuma jera Ofa. Noba ebeibeyaif mimif mita miteij ah onggga eskeiramera moguma fob.

¹⁶ Jeska oisouska Yesus onggga anggos tumu mega salib fob bera Ofa orohoda rot mar insa koma onggga orotunggom mimif fogora mudou oska morototuma. Beda Ofa oroun mimif nomnaga sons skoita Allah erek ebic egens.

¹⁷ Noba Ofa tein en gu mebif jeskaseda efesij mar gu rusnok nomnaga rot oga onggga oufamofa onggga ereita rusnok rudou eskeiramera. Ofa efesij rot oga onggga oufamofa insa koma gu iwa onggga Yahudi guru onggga iker erek yes jeska Allah. Noba Ofa tein efesij rot oga onggga oufamofa koma gu rusnok Yahudi onggga rijginaga rot Allah fob tein.

¹⁸ Jeska oisouska mar onggga Yesus Kristus ontunggom nou mimif nomnaga fob bera mimif onggga erek ebic egeka minja erek ebic egens jera Allah oisouska Efena Ebsi onggga ofij mimif ojgomuja.

¹⁹ Erek koma jefeda ebeibeyaif bera iwa inerek rusnok onggga rusodosa jeska rusnok onggga Allah oncunc fob deika guru. Tina iwa bera inja erek ebic egens jera Ofa efen rusnok fob. Noba iwa inja erek Ofa efen efeser tein fob.

²⁰ Noba mimif nomnaga bera erek mod egens onggga Allah ei nou esinsa. Noba mar onggga rasul-rasul jera nabi-nabi rumftuftu rot gu rusnok sis fob bera erek orocunc rot teinefa rua tein rufij nou rii mod Allah egens insa koma. Noba Yesus Kristus bera erek mamu ofoj egens onggga mod insa koma angh esij rot ahais ojgomu.

²¹ Beda oisouska Yesus Kristus bera mimif mimebiedima erek mod egens onggga ebsi komowa nou Tuhan Allah.

²² Erek koma beda, oisouska idou onggga egens jera Yesus Kristus fob, bera iwa tein imebiedima erek egens jera Allah efen rusnok nomnaga jeskaseda ija erek mod egens onggga Efena Ebsi Allah engker gij ojgomuja.

3¹ Sis fob bera Allah ensejah gij odou efesi jeskaseda oroun iwa onggga erek Yahudi guru skoita esinsa tein. Jefeda rusnok onggga rufogog raha didif gij mod oskusk jeska didif dimfesij rot mar insa koma onggga Allah ensejah rot sis fob. Tina Allah oitij rot mar koma ojgomu jeskaseda iwa tein isma oufamofa eteb jeska Ofa.

² Noba iwa ingg fob rot oida Allah oncunc didif, rot efen odou onggga eskeiramera, jeskaseda duftuftu iwa onggga erek Yahudi guru tein rot Ofa efen oga fogora durofij iwa tein.

³ Erek koma jeska iwa ingk gij surat egens jeska didif rot teinefa Allah oncunc mar gu didif jeskaseda dufij Ofa rot mar insa koma onggga Ofa ensejah rot sis fob. Noba mar koma bera angh jejema jeska rusnok enjgineg.

⁴ Sis fob Allah enagot rot mar insa koma gu efen rusnok guru. Tina ebeibeyaif bera Ofa oncunc rot mar insa koma gu efen rasul-rasul jera nabi-nabi oisouska Efena Ebsi onggga engker gij rudou efesi fob. Noba didif dimfesij oskiyai rot mar onggga angh jejema insa koma gu iwa gij surat kef tein. Jefeda erek iwa ik rot iskusk beda idou emebriyi gij mar koma osok gij Yesus Kristus si.

⁵(3:4)

⁶ Noba mar onggah jejemah insa koma bera erek kefoida, oisouska Allah oga onggah oufamofa osok gij Yesus Kristus bera rusnok onggah Yahudi guru tein rimesma mar onggah Allah ensejah morototuma jera rusnok onggah Yahudi tein. Rusnok onggah erek Yahudi guru jera rusnok onggah Yahudi tein rinja erek Allah efen rusnok onggah ebig egensmes ojomu. Noba rusnok insa koma nomnaga tein bera rimesma mar onggah oufamofa onggah Allah anggen rot oisouska Yesus Kristus jera efen oga onggah oufamofa osok gij Ofa.

⁷ Oisouska Allah odou onggah eskeiramera rot didif bera Ofa oncunc odou onggah oufamofa skoita didif. Beda Ofa obk didif erek efen osnok egens onggah emfesij rot mar insa koma gu rusnok enjgineng tein. Noba oisouska Ofa efen owesa efek eteb bera didif difarur gij mar koma ojomuja.

⁸ Noba gu Allah efen rusnok nomnaga rifelesa bera didif direk osnok egens onggah onok ofoka gij guru. Erek koma tina Allah oncunc odou onggah oufamofa skoita didif jeskaseda dujoftuftu rot efen oga onggah oufamofa gu rusnok onggah erek Yahudi guru. Oga onggah oufamofa koma bera osok gij rot teinefa mimif misma mar onggah onkoska eteb oisouska Yesus Kristus. Mar koma bera oufamofa eteb ekirsa jeska mudou ebriyi gij rot tein.

⁹ Jeska Allah bera onggah ontunggom mar nomnaga oisouska Yesus Kristus sis fob. Noba Ofa bera oncunc didif jeskaseda difesij rot mar insa koma onggah Allah endemi jeska rusnok nomnaga sis fob. Mar koma onggah Ofa endemi bera erek kefoida, "Ofa omoskotu rusnok onggah Yahudi guru tein jeska rerin mar onggah oska."

¹⁰ Ofa omotunggom mar koma jeskaseda malaikat-malaikat jera mar enjgineg tein onnga efen owesa efek gij mebaga bera rimek rot Ofa efen rusnok Mod Ari onnga erek rusnok Yahudi morototuma jera rusnok onnga Yahudi guru tein. Beda oisouska rusnok insa koma rerin rudou onnga egens jera Allah fob bera malaikat-malaikat insa koma rimek rot teinefa Allah ontunggom mar nomnaga rot odou onnga efesis eteb ekirsa jeska mar enjgineg.

¹¹ Allah otunggom mar insa koma oisouska mifmin Tuhan Yesus Kristus ororu jeni efen odou ejginaga rot sis mona onnga dojunmeni fob.

¹² Erek koma noba oisouska mudou onnga egens jera Yesus Kristus, noba oisouska mudou onnga ororu Ofa, bera mimif minemeesa rot onnga mirejgei mar teisis skoita Allah guru.

¹³ Erek koma jefeda didif dui gu iwa jeskaseda idou enebisa rot didif onnga disma difera okora gij mod oskusk kef guru. Jeska didif disma difera okora insa koma jeskaseda iwa onnga erek Yahudi guru imesma oufamofa eteb jeska Allah tein.

¹⁴ Allah bera oncunc mar insa koma nomnaga onnga ah jejema gu rusnok ebeibeyaif, jefeda didif dugif gu Ofa fogora dum diteij rot ahais gu Ofa nou iwa ojgomuja.

¹⁵ Jeska Ofa bera onnga ontunggom efen rusnok onnga rururu Ofa gu mebif jera efen rusnok onnga rururu Ofa gu mebaga tein. Jefeda Ofa bera erek ebic egeka insa koma tein efen meka.

¹⁶ Noba didif dum diteij gu Ofa jeskaseda Ofa ocunc efen ofoka onnga aksa jera odou onnga ongnoska eteb skoita iwa fogora imeita yeyin idou efesi onnga ahais oisouska Efena Ebsi.

¹⁷ Noba didif dum diteij jeskaseda oisouska idou onnga ororu Yesus Kristus fob, bera Ofa ejerek egens jera iwa odudu dokun deika. Noba erek mod egens onnga ot rot ahais fob, era erek mega egens onnga eij ofom gij mebi efesi fogora ot rot ahais, beda iwa tein ita idou onnga omokorema moguma rot ahais ojgomuja.

¹⁸ Noba erek enadaij nou rusnok rireni jeni mod egens onnga eteb doska efen efefi jera efen aksa jera efen osok eteb jinaga guru, beda erek koma tein enadaij nou mimif mireni jeni rot teinefa Yesus Kristus odou okora eteb doska nou mimif jinaga guru. Tina didif dum diteij jeskaseda iwa, jera Allah efen rusnok nomnaga, imesma owesa efek jeska Ofa fogora idou emebriyi gij rot teinefa Ofa odou okora rot mimif erek insa koma.

¹⁹ Noba didif dum diteij jeskaseda yeyin iteij ah bera ebera rot mar onnga Allah odou os eita gu iwa onnga erek ongnoska eteb. Mar onnga ongnoska eteb insa koma bera oufamofa ekirsa eteb doska jefeda okum nou mudou ebriyi gij ojgomu.

²⁰ Allah bera onnga efen ofoka onnga aksa ekirsa jeska mar nomnaga. Noba oisouska mudou onnga egens jera Ofa bera Ofa efen owesa efek onnga adaij nou otunggom mar onnga eteb ekirsa jeska meidu onnga mimif mirejgei Ofa rot, era ekirsa jeska meidu onnga mimif musujohu rot gij mudou efesi tein.

²¹ Erek koma jefeda didif dum diteij jeskaseda rusnok nomnaga gij mona deisef noba gij mona kahma tein rimesitit Ofa rot efen ofoka onnga aksa eteb ojgomuja. Noba mar onnga oufamofa insa koma nomnaga en oisouska Yesus Kristus Efena Ebsi onnga engker gij mudou efesi tein (Ainsoma).

4¹ Ere koma jefeda didif, onga dingker gij mod oskusk rot Yesus efen ofoka, bera duis gu iwa jeskaseda iwa ita mar nomnaga rot ongoska ojgomuja. Iwa ita mar jeni erek Allah oncunc gu iwa gij mona onga iwa inroru Ofa efen oga sis fob.

² Iwa yuin keingg isinsa ifoka beda ita mar moguma rot idou onga eriaga morototuma. Noba iwa tein yuin keingg idou efesi rot mar onga iwa itunggom moguma tein. Beda iwa imofijma fogora imorocunc rot oida idou omokorema fob.

³ Noba oisouska Efena Ebsi onga engker gij idou efesi fob, bera iwa ireni rot ahais jeskaseda yeyin idou efesi onga erek eskeiramera morototuma ojgomuja. Beda idou efesi tein emerek egens moguma ojgomuja.

⁴ Jeska Yesus Kristus efen rusnok bera erek efaga egens ojgomu. Noba Efena Ebsi Allah bera erek egens ojgomu. Noba mimif muisum gij Allah ojgomu onga enjeka mimif erek efen rusnok.

⁵ Noba mifmin Tuhan onga egens ojgomu. Noba mimif muroru Allah efen oga ojgomu. Beda mimif mita baptis tein gij Yesus Kristus ofoka ojgomu.

⁶ Noba mifmin Allah bera onga egens noba onga erek rusnok nomnaga rerin Rika. Ofa bera onga ofoka ereij keingg rusnok jera mar onga enjgineg nomnaga tein. Noba mar nomnaga onga Ofa ontunggom bera oisouska efen rusnok. Noba Efena Ebsi onga en jeska Ofa bera engker gij mudou efesi fob.

⁷ Ere koma noba Allah eita owesa efek onga oufamofa eteb oisouska efen odou onga eskeira eteb gu mimif. Noba mimif misma mar koma

nomnaga erek jeni oisouska Yesus Kristus efen odou ejginaga rot tein ojomu.

⁸Jeska mar egens gij Mar Efeyi Ebsi bera agot erek kef oida, "Nou onnga Ofa osok jah monuh aksa, beda Ofa eja okag rot mesa onnga rinsiri gu Ofa. Beda Ofa ekeba mareibra gu efen mohujir jeskasada rua rifaga ouka morototuma jera Ofa."

⁹Yesus onsok jah mebaga erek koma fob, beda koma tein orocunc rot oida sismeni fog bera Ofa onjuj gij mebi efesi tein fogora omosok jah mebaga.

¹⁰Ofa onnga onjuj gij mebi efesi degini doska bera onnga onsok jah mebaga skidamedada ojomuja tein. Noba Ofa onsok jah mebaga erek koma jeskasada ofoka ereij keingg mar nomnaga onnga angh gu mebaga jera mebif tein.

¹¹Ofa eita owesa efek gu memef meneya jeskasada motunggom mar erek efen rasul-rasul. Noba Ofa eita owesa efek gu rusnok rineya jeskasada rija erek nabi-nabi onnga rifesij rot mar onnga Allah ocunc gu rua gij rudou efesi skoita rusnok Mod Ari. Noba Ofa eita owesa efek gu rusnok rineya jeskasada ricira rot Allah oga skoita rusnok onnga rineg rot enesi. Noba Ofa eita owesa efek gu rusnok rineya jeskasada rija erek ebirfaga Mod Ari. Noba Ofa eita owesa efek gu rusnok rineya jeskasada rija erek Guru-Guru rot efen oga nou rusnok Mod Ari.

¹²Ofa eita owesa efek insa koma nomnaga gu efen rusnok rineya jeskasada rua nomnaga rita owesa efek onnga adaij nou rumofijma ojomuja. Noba Ofa otunggom mar insa koma jeskasada Yesus Kristus efen rusnok Mod Ari nomnaga rumot rot ahais ojomuja tein.

¹³ Beda mimif mumot rot ahais erek koma ojgomuja onjoros mimif nomnaga tein mita mudou onnga erek egens morototuma. Beda mimif tein misma mudou onnga egens jera Yesus Kristus onnga Allah efen efesa. Noba erek runa ofos jera rujona ofos onnga rudou ebriyi gij mar fob, beda erek koma tein mimif onnga erek rusnok Mod Ari nomnaga muroru mar insa koma onjoros mudou ebriyi gij rot teinefa mimeita mar koisoisa erek Yesus Kristus eita mar.

¹⁴ Beda mimif mita mar erek insa koma jeskaseda mudou enerek ruforoker rerin rudou onnga enahais enesi guru. Jeska giskini bera ruforoker ruroru mar ebireira onnga rusnok enjgineg ruftufts gu rua ojgomuja. Noba rusnok rineya onnga ruftufts mar onnga oska rot rudou onnga efesis eteb bera runofoguma. Beda rua rinsejah gij rudou efesi jeskaseda ruokrusa rusnok onnga rita mar erek ruforoker insa koma rita mar ojgomu.

¹⁵ Tina oisouska mudou onnga omokorema moguma noba mudou onnga ororu mar onnga tenten ojgomu, bera mimif mija erek runa ofos jera rujona ofos onnga rudou ebriyi gij mar erek eteb fob ojgomu. Mar koma orocunc rot oida mimif mita mar koisoisa erek Yesus Kristus eita mar fob. Jeska Ofa bera erek ebirfaga nou rusnok Mod Ari nomnaga.

¹⁶ Mar insa koma bera erek osnok efaga egens. Jeska efaga egens koma efen ofora nomnaga onnga emebiedima erek egens ojgomu. Noba ofora koma nomnaga rumofijma jeskaseda efaga egens koma efen owesa efek nou eita mar fogora eker rot oufamofa. Koma tein orocunc rot rusnok Mod Ari nomnaga. Jeska erek rua rumofijma noba rudou omokorema odudu deika, beda rudou emebriyi gij rot

teinefa rua rimeita mar koisoisa erek Yesus Kristus eita mar.

¹⁷ Erek koma jefeda, didif disisi joug iwa oisouska Tuhan ofoka jeskaseda iwa ineita mar erek rusnok onnga runororu Allah guru, erek koma jinaga guru. Jeska mar onnga rua rusujohu rot bera onofij rua oskiyai tein guru.

¹⁸ Rua riker gij motkobah ojgomu jeska rua rinejginaga rot eiteij ah onnga oufamofa onnga Allah eita gu rusnok onnga rudou okora rot Ofa guru. Rua rinejginaga rot eiteij ah koma guru, jeska rudou osumsumu osok gij mar onnga tenten ojgomu. Noba ribirfaga erek ombrera rot tein ojgomu.

¹⁹ Rua ruku rufos rot mar onnga rudou eftirir keingg ojgomu noba mojenen rua rot oskiyai tein jinaga guru. Jefeda rua runoin keingg risinsa rudou efesi rot mar insa koma jinaga guru, tina rua ruroru mar onnga oska ebireira ojgomuja.

²⁰ Tina mar onnga iwa imfokor rot osok gij Yesus Kristus bera erek koma guru.

²¹ Jeska iwa ig mar rot Ofa, noba rusnok ruftuftu mar osok gij Ofa gu iwa oisouska Ofa efen oga onnga tenten ojgomu.

²² Sis fob rusnok ruftuftu iwa osok gij yeyin iteij ah onnga oska ros. Noba rua ruftuftu iwa jeskaseda ikikif jeska yeyin mar onnga oska insa koma. Jeska iteij ah koma bera ebera rot mar onnga oska jera mar onnga ofogog tein.

²³ Noba rua ruftuftu mar gu iwa jeskaseda iwa ita idou efesi onnga osujohu rot mar erek efeinah deika.

²⁴ Noba rua tein ruftuftu mar gu iwa jeskaseda ija erek rusnok onnga efeinah ojgomu. Beda iwa imeita mar morototuma erek Allah eita mar. Iwa inja erek

rusnok onggga rerin mar onggga oska oskiyai tein guru. Jeska idou efesi erek ebsi komowa fob.

²⁵ Jefeda iwa tein inocuwei mar gu yeyin ihujir deika guru. Tina iwa yagot rot mar onggga tenten gu rua ojgomu. Jeska mimif nomnaga bera mimebiedima erek egens oisouska Yesus Kristus fob.

²⁶ Noba erek iwa yutkonu oska skoita rusnok enjgineg, beda inorons rot mar koma ojgomuja onjoros itunggom mar onggga oska rot guru. Noba iwa inorons rot mar insa koma ah gij idou efesi ojgomuja onjoros motu tein guru. Tina iwa isuna rot mar onggga oska insa koma ebeirens ojgomu.

²⁷ Iwa isuna rot ebeirens jeskaseda Bilis eneita efekesa nou ocunc mar onggga oska gij idou efesi rot guru.

²⁸ Noba iwa onggga yukoreka mar sis fob, iwa ineita mar erek koma deika guru. Tina iwa ifarur rot iskusk nou mar onggga iwa icosu rot ojgomu. Noba iwa yufij rusnok enjgineg onggga rufojingki tein.

²⁹ Noba iwa inagot mar rot yuga onggga erek oska gu rusnok enjgineg guru. Tina iwa yagot mar rot yuga onggga erek eriagamaga ojgomu. Jeska erek rua ruhoda rudou efesi rot mar insa koma beda mar koma bera omofij rua noba omorocunc rot mar onggga oufamofa gu rua tein.

³⁰ Noba iwa inotunggom mar onggga ereita Efena Ebsi Allah odou okumkum rot iwa guru. Jeska erek osnok egens oin buk keingg surat rot mar onggga ofa anggen rot, beda erek koma tein Allah ombk Efena Ebsi jah gu idou efesi jeskaseda orocunc rot mar onggga Ofa anggen rot fob. Mar koma bera oida iwa imesma eiteij ah onggga efeinah si. Koma bera gij mona onggga Tuhan ongksens en.

³¹ Jefeda iwa ineita mar rot idou onnga okumkum skoita rusnok enjgineg guru. Noba iwa inotkonu oska ebeirens rot rusnok enjgineg guru. Noba inohurmei mar gu rusnok enjgineg tein guru. Iwa ineita mar onnga oska erek koma nomnaga jinaga guru.

³² Tina onnga oufa ekirsa bera, iwa icunc idou efesi onnga ongnoska morototuma ojgomu. Noba iwa isuna rot mar onnga oska onnga rusnok enjgineg rutunggom skoita iwa. Iwa ita erek mar erek koma jeska Allah bera onsuna rot yeyin mar onnga oska tein fob. Ofa onsuna rot yeyin mar onnga oska jeska iwa iroru Yesus Kristus tein fob.

5¹ Iwa bera erek Allah efen efeser onnga Ofa odou okora rot. Jefeda iwa ireneni rot ahais jeskaseda ita mar erek Ofa ojgomu.

² Noba iwa ita mar nomnaga rot idou onnga omokorema moguma tein. Iwa idou omokorema erek Yesus Kristus odou okora rot mimif fogora agos tumu mega salib nou mimif. Jeska mar onnga Ofa ontunggom koma bera erek mar onnga Ofa orougif gu Allah rot. Noba koma erek efen mar ensesa onnga ongnoska eteb. Jefeda Allah odou eskeira eteb rot tein.

³ Iwa bera erek Allah efen rusnok. Jefeda enadaij nou iwa idou eftirir mekeinggma guru. Noba enadaij nou iwa yuckahtah fogora isiri morototuma erek oskiyai tein jinaga guru. Noba idou tein enekeben keingg yeyin mareibra erek oskiyai tein jinaga guru. Jeska mar insa koma bera enadaij nou rusnok onnga Kristen guru.

⁴ Noba iwa tein inagot mar rot yuga onnga imahaisentima era inoubder mar ojgomuja tein jinaga guru. Tina iwa yagot mar erek ongnoska onnga ereita

Allah odou eskeira rot iwa ojgomu. Koma bera erek iwa yuis oufamofa gu Ofa gij.

⁵Jeska onnga tentenmen bera, rusnok onnga rudou eftirir mekeinggma ni, rusnok onnga risiri morototuma ni, rusnok onnga rudou ekeben keingg rerin mareibra ofoukou ni, (koma erek rua rudou os mareibra koma ekirsa jeska Allah), rua koma nomnaga bera runoira morototuma jera rusnok onnga Allah jera Yesus Kristus ofoka ereij keingg tein jinaga guru.

⁶Noba iwa inesiri gu rusnok onnga rudou os ruokrusa iwa rot ruga efei jeskaseda iroru rua rot rerin mar onnga oska insa koma tein guru. Jeska Allah omofra mar okum eteb keingg rusnok nomnaga onnga runororu Ofa efen oga guru si.

⁷Erek koma jefeda iwa ibes ifaga jeska rusnok nomnaga onnga rutunggom mar erek insa koma ojgomu.

⁸Jeska sis fob bera iwa iker gij motkobah ros. Koma erek yeyin iteij ah onnga oska. Tina ebeibeyaif bera iwa injerek Allah efen rusnok onnga ringker gij eisa fob. Jefeda iwa ita mar onnga oufamofa ojgomu, erek rusnok onnga ringker gij eisa fob.

⁹Jeska rusnok onnga erek koma bera rita mar onnga ongnoska ni, rua rita mar onnga erek rusnok enjineg runocunc oida erek oska guru ni, rua rita mar onnga erek tentenmen ojgomu ni. Rua koma bera erek mega egens onnga er fogora efen efek ofoukou noba ongnoska eteb tein.

¹⁰Iwa ireni rot ahais jeskaseda yeyin idou ebriyi gij mar onnga ereita Allah odou eskeira rot ojgomu.

¹¹Noba iwa ibes ifaga jeska mar onnga rusnok onnga ringker gij motkobah rutunggom ojgomuja

tein ojgomu. Jeska mar koma bera onofij rua tein jinaga guru. Tina onnga oufa bera iwa ironun rua skoita Allah efen eisa ojgomu.

¹² Mojen en Didif rot danggot mar osok gij rua onnga ringker gij motkobah ros. Jeska mar onnga rua rutunggom erek wuswus bera oska efekeifa eteb.

¹³ Tina rusnok onnga ringker gij eisa bera rutunggom mar onnga oufamofa ojgomu. Noba mar onnga oufamofa koma bera onnga orocunc rot tomnomna gu rusnok onnga ringker gij motkobah rot oida rua rerin mar onnga oska ros.

¹⁴ Jeska Allah efen eisa koma bera orocunc rot mar onnga rusnok rutunggom gij motkobah fogora ah tomnomna gu rusnok nomnaga. Erek koma jeska mar egens gij Mar Efeyi Ebsi bera agot erek kef oida, "Iwa onnga yahca ahaingkongka, iwa isba iteij noba idebecki jeska yanggos ojgomu. Beda Kristus omocunc efen eisa gu iwa."

¹⁵ Erek koma jefeda iwa yut joug idou efesi rot yeyin iteij ah ojgomuja. Iwa ineita mar erek rusnok enjineg onnga rudou osumsumu eteb rot ojgomu guru. Tina iwa ita mar rot idou onnga ebriyi eteb gij mar ojgomu.

¹⁶ Noba gij yeyin mona efekesa insa kef bera iwa isejah idou efesi rot iskusk jeskaseda itunggom mar onnga oufamofa ojgomu. Jeska gij mona ebeibeyaif bera rusnok rutunggom mar onnga ofogog eteb ojgomuja.

¹⁷ Jefeda iwa ineita mar jera idou onnga osumsumu rot tein guru. Tina iwa ireni rot ahais ojgomu jeskaseda idou ebriyi gij mar meidu onnga Allah ondou os rot ojgomu.

¹⁸ Noba ibirfaga enerebibe rot mofut efei ojgomuja tein guru. Jeska koma bera onnga oroku rusnok rudou efesi fogora risiri gij mar onnga oska ojgomuja. Tina iwa ita idou onnga ebera rot Efena Ebsi Allah ojgomu.

¹⁹ Beda iwa ifesij mar moguma rot yuga onnga oufamofa tein ojgomu. Noba mar onnga oufamofa koma bera erek mar onnga iwa yuf medemer moguma rot jera imfesij moguma rot jeska buku Mazmur tein. Iwa ifesij mar onnga ongnoska noba yuf medemer erek koma rot idou onnga esitit gu Tuhan.

²⁰ Noba iwa tein yuis oufamofa gu mifmin mika Allah oisouska mifmin Tuhan Yesus Kristus ofoka rot mar nomnaga.

²¹ Didif duis gu iwa nomnaga jeskaseda iwa yugif moguma ojgomu. Jeska iwa bera onnga yugif gu Yesus Kristus rot tenten tein fob.

²² Iwa onnga yahi igers fob bera yugif gu yeyin yahiner ojgomu erek iwa yugif gu Tuhan tein.

²³ Jeska rahiner bera erek ebirfaga nou rerin ruhoner. Koma erek Yesus Kristus onnga erek ebirfaga nou efen rusnok Mod Ari nomnaga. Noba Ofa bera onnga onskotu efen rusnok Mod Ari nomnaga onnga erek esinsa efen efaga tein fob.

²⁴ Jefeda iwa onnga yahi igers fob bera yugif gu yeyin yahiner gij mar nomnaga ojgomu. Koma bera morototuma erek rusnok Mod Ari onnga rugif gu Yesus Kristus onnga erek mifmin ebirfaga rot mar nomnaga.

²⁵ Erek koma tein, iwa onnga yuskotu arja fob bera idou okora rot yeyin ihoner ojgomu morototuma erek Yesus Kristus odou okora rot efen rusnok Mod Ari nomnaga fogora agos tumu mega salib nou rua.

²⁶ Ofa otunggom mar koma jeskaseda efen rusnok Mod Ari nomnaga risma rudou efesi onggga ebsi komowa. Noba mei onggga mimif mita baptis gij orocunc rot oida mudou efesi bera ebsi komowa fob. Noba mar insa koma en oisouska Allah oga onggga oufamofa.

²⁷ Ofa otunggom mar erek koma jeskaseda oroun efen rusnok Mod Ari skoita esinsa rot rerin rudou onggga ebsi komowa ojomu. Jeska mar onggga erek ahtaboku bera enah gij rudou efesi erek oskiyai tein jinaga guru.

²⁸ Jefeda iwa onggga yuskotu arja fob bera ita idou onggga okora rot yeyin ihoner erek koma. Ita idou onggga okora rot rua erek idou okora rot isinsa ifaga tein ojomu. Jeska erek osnok egens odou okora rot efen mohona, beda ofa ot joug efen mohona koma erek ofa ot joug efen esinsa efaga.

²⁹ Erek koma jeska giskini bera rusnok rineita mar onggga oska skoita risinsa rifaga guru, tina rua rut joug rerin risinsa rifaga rot iskusk ojomu. Noba rua rita mar onggga erek ongnoska rot risinsa rifaga ojomu. Beda koma tein bera erek Yesus Kristus onggga eita mar onggga ongnoska ojomu gu efen rusnok Mod Ari.

³⁰ Noba mimif onggga rusnok Mod Ari bera erek Ofa efen efaga onggga Ofa ot joug rot iskusk tein.

³¹ Jeska mar egens gij Mar Efeyi Ebsi bera agot erek kef oida, "Orna egens eja jeska efen meka jera mosu, beda ofa jera efen mohona gegang godou geja erek egens."

³² Noba mar egens koma bera agot rot mar onggga tentenmen ojomu. Tina mar onggga didif danggot rot

insa koma bera orocunc rot Yesus Kristus jera efen rusnok Mod Ari.

³³Erek koma tina mar insa koma tein bera erek orocunc rot iwa onnga yuskotu arja fob. Jefeda orofosutut runer onnga runskotu arja fob bera rudou okora rot rerin ruhoner insa koma noba rut joug rua erek rua rut joug risinsa rifaga tein ojgomuja. Noba orofosutut rujager onnga ranghi igers fob tein bera rugif gu rerin rahiner rot tenten ojgomu.

6¹Iwa onnga erek iforoker bera yugif gu yeyin iker jera isir ojgomu erek rusnok onnga ruroru Tuhan rot tenten fob tein. Koma bera erek mar onnga tenten ojgomu. Jeska mar ofoka egens onnga Allah anggot gu Musa rot sismeni bera erek kef oida, "Iwa yugif gu yeyin iker jera isir ojgomu."

²(6:1)

³Noba oisouska mar egens insa koma bera Ofa anggen rot mar ofoka egema deika oida, "Yugif gu yeyin iker jera isir jeskaseda yeyin iteij ah erek dektek ojgomu noba ebera rot mar nomnaga erek adaij nou iwa tein."

⁴Iwa onnga yeyin iser bera ineyahehir joug iser insa koma rot ahais ojgomuja onjoros rudou oska rot iwa guru. Tina onnga oufamofa bera iwa isisi joug rua noba yuftuftu mar gu rua rot idou onnga ebriyi gij mar erek Kristen onnga ruroru Tuhan rot tenten fob ojgomu.

⁵Didif duis gu iwa onnga irek rusnok onnga rumfij rerin ebirfager ojgomuja jeskaseda iwa yufij rua rot idou onnga emeesa noba onnga efeneinei rot rua ojgomu. Noba iwa ita mar erek koma jera idou onnga oitij rot noba onnga onokoja rot guru. Iwa ita mar

erek koma nou rua morototuma erek iwa ita mar nou Yesus Kristus tein ojgomu.

⁶ Noba iwa ineita mar erek koma askesi rua riajga joug iwa jeskaseda rudou eskeira rot iwa ojgomu guru. Tina iwa ita mar insa koma erek rusnok onnga rumfij Yesus Kristus jera rudou onnga oitij rot jeskaseda iwa ita mar onnga jeni erek Allah odou ejginaga rot ojgomu.

⁷ Jefeda iwa ita mar nou yeyin ebirfager insa koma rot idou onnga eskeiramera ojgomu. Noba iwa ineita mar koma erek rusnok onnga rumfij rusnok enjgineg ojgomu guru. Tina iwa ita mar erek rusnok onnga rumfij Tuhan tein ojgomuja.

⁸ Jeska iwa idou ah keingg rot oida Allah emeita ofons gu orofosut osnok egens onnga otunggom mar onnga oufamofa ojgomu. Koma bera rot rusnok onnga rumfij rerin ebirfager jera rusnok onnga rut gu risinsa tein.

⁹ Didif duis gu iwa tein onnga irek ebirfager nou yeyin rusnok onnga rumfij iwa tein jeskaseda iwa ita mar onnga ongnoska skoita rua tein ojgomu. Beda iwa inaha yuga onnga ofogog keingg rua guru. Jeska iwa ijginaga rot oida Allah, onnga engker gu mebaga, bera erek iwa jera rua rerin ebirfaga tein. Noba Ofa onofra osnok egens erek ekirsa jeska rusnok egema tein guru.

¹⁰ Jefeda didif dudou os duftu iwa rot mar ofoka egens dokun deika onnga omoisa rot gij surat kef. Didif duis gu iwa jeskaseda iwa ita idou egens jera Tuhan Allah rot ahais oisouska Ofa efen owesa efek onnga eteb ojgomu.

¹¹ Beda iwa ira mar nomnaga onnga Allah eita gu iwa fob onnga orot joug iwa tein ojgomu. Iwa ira

mar koma nomnaga jeskaseda gij mona ongg Bilis ereneni iwa rot mar ongg ofa ensejah gij odou efesi nou iwa fob, beda iwa inesiri gu ofa guru.

¹² Jeska mimif mineremeteima jera rusnok guru. Tina mimif miremeteima jera efena ofogog ofoukou doska ongg rerin owesa efek eteb, noba ongg ringker gij motkobah ojgomuja. Rua rufoka ereij keingg mar gij mebaga jera mebif tein. Noba rua ruftufts mar ongg oska gu rusnok rerin ebirfager mebif ongg runougif gu Allah guru.

¹³ Jefeda iwa ira mar nomnaga ongg Allah eita gu iwa fob ongg erek orot joug iwa ojgomu. Iwa ira mar koma nomnaga jeskaseda gij mona ongg Bilis ereneni iwa, beda iwa imot rot ahais ojgomuja onjoros omoisa. Beda iwa inesiri gu ofa jinaga guru.

¹⁴ Erek koma noba erek tentara egens ongg era mekmei ofos erakid okom ofoj sismeni fogora esejah nou mona ongg rusnok rimagobuma, beda erek koma tein iwa isejah idou efesi ongg ebriyi gij Allah oga rot tenten sismeni ojgomu. Noba erek tentara egens ergi meisoufa erek kermom joug ofos jeskaseda mar ongg ofog enecirej ofa guru, beda erek koma tein iwa ita idou ongg efen mar ongg oska oskiyai tein guru. Koma bera ongg orot joug iwa jeskaseda inesiri gij mar ongg oska deika guru.

¹⁵ Noba erek tentara egens ergi sepatu kermom joug okoda jeskaseda ot joug efen okoda, beda erek koma tein iwa isejah idou efesi jeskaseda ijoftufts gu rusnok rot Allah efen oga. Jeska Allah efen oga insa koma bera ongg eita rusnok riteij ah ongg eskeiramera ojgomuja.

¹⁶ Noba erek tentara egens orka efen monska ofos ongg ontumba joug esinsa jeskaseda mar ongg

ofog enecirej ofa guru, beda erek koma tein iwa ita yeyin idou onnga ororu Allah rot tenten fob. Koma bera orot joug iwa jeska mar onnga Bilis otunggom skoita iwa.

¹⁷ Noba erek tentara egens aha efen topi kermom joug ebirfaga jeskaseda erek rusnok rubu ofa tina enagos guru, beda erek koma tein yeyin iteij ah onnga efeinah bera oskotu iwa jeskaseda ineja gu mahmei meren guru. Beda erek tentara egens era meiteb kelawan jeskaseda eragob mesa, beda erek koma tein iwa ira Allah efen oga oisouska Efena Ebsi jeskaseda ireseda rot rusnok rerin ruga onnga riretei rot iwa.

¹⁸ Beda iwa tein yum iteij rot ahais ojgomuja oisouska mar onnga Efena Ebsi oncunc gij idou efesi fob. Iwa yum iteij gu Allah ojgomuja jeskaseda Ofa ofij iwa ojgomuja. Noba iwa ita idou onnga ensejah nou yum iteij rot mar erek koma ojgomuja. Beda iwa yum iteij nou Allah efen rusnok nomnaga tein ojgomuja.

¹⁹ Noba iwa yum iteij nou didif tein jeskaseda gij mona onnga didif disejah nou difesij mar rot Allah oga, beda Ofa omocunc mar gu didif gij dudou efesi osok gij mar onnga didif dimefesij rot gij mona insa koma. Noba iwa yum iteij gu Ofa jeskaseda didif duku dufos rot mar onnga didif dimefesij gu rusnok osok gij Allah efen oga onnga oufamofa tein. Oga onnga oufamofa koma bera ah jejema jeska rusnok sis fob.

²⁰ Erek koma jeska didif bera osnok egens onnga Allah oncunc jeskaseda difesij mar rot Ofa efen oga onnga oufamofa. Noba rusnok raha didif gij mod oskusk, jeska didif dimfesij rot efen oga insa koma fob. Jefeda iwa yum iteij gu Allah nou didif tein

jeskaseda didif duku dufos noba difesij rot Ofa efen oga onnga oufamofa insa koma ojgomu. Jeska koma bera erek ofoufem eteb nou didif.

²¹ Mifmin muhuj Tikhikus onnga mudou okora rot, bera erek osnok egens onnga emfarur nou Tuhan efen oga rot odou onnga ocosu efei ahtah. Ofa emefesij rot mar nomnaga onnga encirej didif jah sif gu iwa si. Beda iwa imejginaga rot teinefa didif diker jah sif.

²² Didif dumobk ofa skoita iwa jeskaseda ofa efesij rot mar insa koma gu iwa. Beda iwa tein idou emerirei rot ojgomu.

²³ Didif dum diteij gu mifmin mika Allah jera Tuhan Yesus Kristus jeskaseda Ofa eita eiteij ah onnga eskeiramera gu iwa jera mifmin muhujir onnga Kristen nomnaga. Beda Ofa omofij iwa nomnaga jeskaseda iwa iroru Ofa rot tenten ojgomuja fogora idou omokorema moguma ojgomuja.

²⁴ Noba didif dum diteij gu Allah jeskaseda Ofa eita oufamofa eteb gu rusnok nomnaga onnga rudou okora rot mifmin Tuhan Yesus Kristus rot tenten ojgomuja. Ainsoma.

Filipi

1 ¹ Didif Paulus jera Timotius onnga mafij Yesus Kristus bera dunogu surat egens kef skoita iwa nomnaga onnga ingker gij kota Filipi. Iwa bera irek Allah efen rusnok onnga rudou egens jera Yesus Kristus fob. Noba magef masa surat egens gu iwa onnga erek ebirfager Mod Ari tein jera iwa onnga yumfij ebirfager Mod Ari tein.

² Didif dum diteij gu mifmin mika Allah jera Yesus Kristus onnga erek mifmin Tuhan jeskaseda Ofa ocunc efen odou onnga oufamofa rot iwa noba jeskaseda Ofa eita eiteij ah onnga eskeiramera gu iwa tein.

³ Gij orofosutut mona onnga didif dum diteij gu Allah nou iwa bera didif duis oufamofa eteb gu Ofa rot iwa ojgomuja.

⁴ Noba gij mona insa koma tein bera didif dum diteij rot dudou onnga ererei eteb ojgomu.

⁵ Jeska sis mona onnga iwa inroru Yesus ojgomuja onjoros mona deisef tein bera iwa imfesij rot Yesus Kristus oga gu rusnok enjgineg morototuma erek didif tein dutunggom ojgomuja.

⁶ Noba didif dijginaga rot tenten oida mar onnga Allah onotunggom gij idou efesi ros bera emecira ojgomuja onjoros mar insa koma omoisa rot gij mona onnga Yesus ongksons en fob.

⁷ Erek koma jeska dudou okora eteb rot iwa. Noba Allah bera oncunc efen odou onnga oufamofa skoita iwa morototuma jera didif askesi mimif muftufts rot Ofa efen oga gu rusnok enjgineg. Allah oncunc efen

odou onnga oufamofa gu didif tein gij mona onnga didif dingker gu mod oskusk ros, era gij mona onnga didif duga eseda rot rusnok enjgineg onnga ranggot oida Allah oga bera erek tenten guru tein.

⁸ Allah ejginaga rot teinefa didif dudou okora eteb rot iwa erek Yesus Kristus esinsa odou okora rot iwa.

⁹ Didif dum diteij gu Allah jeskasada iwa idou omokorema odudu deika. Erek koma beda iwa idou emebriyi ekirsa gij mar onnga Allah ondou os rot ojgomu. Fogora idou emejginaga rot teinefa iwa intunggom mar nomnaga onnga erek oufamofa ojgomu.

¹⁰ Noba oisouska mar insa koma bera idou emebriyi gij rot teinefa iwa imeita mar onnga erek ongnoska ojgomu. Beda enadaj nou rusnok enjgineg ragot oida iwa bera erek rusnok onnga rita mar onnga oska jinaga guru. Tina yeyin idou efesi bera erek ebsi komowa ojgomuja onjoros mona onnga Yesus Kristus ongksons en fob.

¹¹ Noba Yesus Kristus bera onnga eneita owesa efek gu iwa. Ofa eita owesa efek erek koma jeskasada mar nomnaga onnga iwa itunggom gij yeyin iteij ah kef bera ororu mar onnga oufamofa jeni erek Allah ondou os rot ojgomu.

¹² Edohuji, didif dudou osos jeskasada iwa ijginaga rot oida mar okum onnga ah keingg didif jah sif bera eneragou joug rusnok fogora rineg rot Allah oga erek koma jinaga guru. Tina onnga tenten bera, mar okum insa koma orofij didif fogora rusnok ekirsa rururu Allah oga ogun odudu dokun deika ojgomu.

¹³ Jefeda ebeibeyaif raja Kaisar efen tentarer onnga runt joug didif jera rusnok enjgineg tein gij kota kef bera rijginaga rot didif fob. Koma bera, rua rijginaga

rot oida rusnok enjgineg raha didif gij mod oskusk kef jeska didif duftuftu mar rot Yesus Kristus efen oga.

¹⁴ Noba jeska mifmin muhujir onggga Kristen ringk rot teinefa Efena Ebsi Allah bera omfij didif jah sif fob, jefeda rua tein rinemeesa rot deika guru. Tina rua ruku rufos keinggir ojgomuja fogora ruftuftu rot Allah oga erek ekirsa ojgomu.

¹⁵ Noba ebeibeyaif tein, bera rusnok enjgineg rudou os ruftuftu mar rot Allah oga jeska rudou ejisei rot Didif. Jefeda rua tein ruga eretei didif rot mar insa koma onggga didif duntunggom. Tina rusnok rineya bera riflesij mar rot Allah oga oisouska rudou onggga erek eskeiramera ojgomu.

¹⁶ Rua rita mar koma rot rudou onggga okora nou didif, jeska rua rijginaga rot oida didif dingker gij mod oskusk insa kef rot Yesus Kristus oga onggga didif dimfesij gu rusnok sis fob.

¹⁷ Erek koma tina rua onggga enjgineg insa koma ruga eretei didif rot rudou onggga oska skoita didif ojgomu. Noba rua ruftuftu rot Allah oga jeskaseda rusnok rufra risinsa rufoka erek aksa ojgomu. Rua rita mar erek insa koma jeskaseda ruofra okum ekirsa keingg didif askesi dingker gij mod oskusk jah sif ros.

¹⁸ Tina skoidu, dudou onokum rot mar onggga rusnok insa koma runtunggom skoita didif guru. Jeska erek rusnok ruftuftu Allah Oga rot rudou onggga egeka era rot rudou onggga eskeira tein, beda mar onggga egeka tein bera oufa ojgomu. Jeska onggga ofoufem bera rusnok insa koma ruftuftu rot Allah oga osok gij Yesus Kristus ojgomu. Noba koma bera onggga eita dudou erirei rot. Erek koma tein, dudou eskeira rot mar insa koma ojgomuja.

¹⁹ Jeska didif dijginaga rot tenten oida oisouska mar onnga iwa yum itej gu Allah rot, noba oisouska owesa efek onnga Efena Ebsi Allah eita bera didif dimesma oufamofa eteb gij mar meidu meidu onnga encirej didif ojgomu.

²⁰ Erek koma jeska didif dita dudou ahais noba duisum gij Allah rot oida mojenen didif rot mar onnga rusnok enjgineg rutunggom skoita didif guru. Erek rua ruga ojga rot oida difena ebah era dagos rot tein, beda didif dumoku dufos rot ojgomu jeskaseda dufra Yesus Kristus efen ofoka erek aksa gij mar nomnaga onnga encirej didif ojgomu.

²¹ Erek koma jeska didif dusujohu rot oida erek difena ebah ros, beda dumofra Yesus Kristus efen ofoka erek aksa ojgomuja. Noba erek didif dagos tein, beda koma erek oufamofa ekirsa nou didif, jeska didif dijeker morototuma jera Yesus ojgomu.

²² Noba erek didif difena ebah ros, beda didif dumotunggom mar egema deika nou Yesus Kristus ojgomu. Erek koma tina kenefo bera onnga erek oufamofa ekirsa nou didif ei. Didif dinejginaga rot guru.

²³ Koma bera, didif disejah dudou egeka rot mar insa koma ojgomuja. Didif dudou os dagos fogora dijeker morototuma jera Yesus Kristus gu mebaga. Jeska koma bera oufamofa eteb ekirsa nou didif.

²⁴ Tina onnga ofoufem ekirsa bera difena ebah ros jeskaseda dufij iwa ojgomuja.

²⁵ Erek koma jeska didif dijginaga rot tenten oida difena ebah ros noba dimejeker morototuma jera iwa deika. Beda didif dumofij iwa deika jeskaseda iwa iroru Yesus oga rot ahais ekirsa ojgomuja noba

jeskaseda iwa tein imeita idou onnga erirei ekirsa rot mar insa koma ojgomuja.

²⁶ Erek koma jefeda yeyin idou efesi emefaga ouka eteb rot gij Yesus Kristus erek ekirsa jeska didif diker morototuma jera iwa sons fob.

²⁷ Ebeibeyaif mar onnga ofoufem bera, iwa ita mar onnga ongnoska jeni Yesus Kristus anggot rot sis fob. Iwa ita mar erek koma jeskaseda erek didif din skoita iwa, era erek didif dingg mar osok gij iwa, beda dudou emejginaga rot tenten oida iwa yut joug ahais rot idou onnga erek egens ojgomuja. Koma bera erek iwa yuin keingg rusnok onnga rukoja Yesus Kristus efen oga rot idou egens jeskaseda irocunc rot oida Yesus efen oga bera erek tenten ojgomu.

²⁸ Mar insa koma tein omorocunc rot gu rusnok insa koma oida iwa inemeesa rot rua guru. Noba koma tein omorocunc rot oida Allah omofra mar okum keingg rua tein si. Tina skoita iwa bera Ofa emeita eiteij ah onnga ah aibin si.

²⁹ Jeska Allah oncunc iwa rot odou onnga eskeiramera fob jeskaseda iwa iroru Yesus Kristus ojgomuja. Noba erek koma tein Ofa oncunc iwa fob jeskaseda ita ifera okora nou Yesus.

³⁰ Noba ebeibeyaif tein iwa ita ifera okora gij mar onnga ereneni iwa erek didif dita gij mona onnga dingker jah Kota Filipi sis fob, noba erek dita ebeibeyaif gij mod oskusk jah sif tein.

2¹ Iwa yut joug idou efesi rot ahais ojgomu jeska yeyin idou bera eja erek egens jera Yesus Kristus fob. Noba idou efesi tein eskeiramera jeska Yesus Kristus efen odou onnga okora rot iwa. Noba iwa idou erek egens jeska Efena Ebsi Allah tein onnga engker gij idou efesi fob. Jefeda iwa icunc idou

ongga oufamofa fogora ita idou onggga omokorema ojgomuja.

²Erek koma tein, didif duis gu iwa jeskaseda mar onggga iwa isujohu rot bera erek egens ni, idou omokorema ni, idou efesi oitij rot mar onggga iwa intunggom erek egens morototuma ni ojgomuja. Mar koma bera ereita dudou efesi erek eskeiramera eteb rot iwa.

³Noba iwa ineita mar egema tein rot idou onggga eftirir keingg mar guru, era rot idou onggga yufra isinsa ifoka erek aksa gij tein guru. Tina yuin keingg isinsa idou efesi noba yufra rusnok enjgineg rufoka erek ekirsa jeska iwa ojgomu.

⁴Noba idou enefeneinei rot isinsa yeyin iteij ah ojgomu guru, tina idou efeneinei rot rusnok enjgineg rerin riteij ah tein ojgomuja.

⁵Iwa isujohu rot mar morototuma erek Yesus Kristus osujohu rot mar erek kef oida,

⁶Gij mona onggga Ofa enen gu mebif enesi, bera Ofa tein morototuma erek Allah ojgomu. Erek koma tina, Ofa odou enefeneinei rot efen ofoka onggga aksa morototuma erek Allah ojgomuja guru.

⁷Tina Ofa aha esinsa ofoka onggga aksa insa koma jah, fogora oin keingg esinsa erek osnok egens onggga omfij rusnok enjgineg ojgomu. Koma bera, Ofa eja erek rusnok giskini ojgomu.

⁸Noba gij mona onggga Ofa eja erek rusnok giskini fob, beda Ofa oin keingg esinsa ofoka ekirsa deika fogora ougif gu Allah beda Ofa agos. Koma bera, rusnok rifena oskereta Ofa, beda Ofa agos tumu mega salib rot tein.

⁹ Ere koma jefeda Allah omfra Ofa efen ofoka erek aksa ekirsa jeska mar nomnaga. Noba Allah eita owesa efek onnga ekirsa jeska mar nomnaga gu Ofa.

¹⁰ Allah otunggom mar insa koma jeskaseda rusnok jera mar nomnaga onnga angh gu mebif ni, mebaga ni, jera mar onnga engker gij mebi efesi owohoh ni bera rugif gu Ofa ojgomu.

¹¹ Beda orofosutut rusnok egens egens nomnaga rumofra Yesus Kristus efen ofoka aksa fogora ragot oida Ofa bera Tuhan onnga ofoka ereij keingg mar nomnaga. Noba mar onnga rua rumotunggom insa koma bera erek ruofra Allah efen ofoka erek aksa tein.

¹² Ere koma jefeda, edohuji onnga dudou okora rot, iwa tein yugif gu Allah erek Yesus Kristus ougif gu Ofa sis fob. Noba iwa ita mar erek iwa intunggom sis fob ojgomuja fogora iroru mar onnga oufamofa erek rusnok onnga Allah onsuwa jeska rerin mar onnga oska fob. Iwa intunggom mar erek koma sis mona onnga didif dingker morototuma jera iwa ros. Tina ebeibeyaif bera didif dui gu iwa jeskaseda iwa ita mar erek insa koma rot ekirsa deika gij mona onnga dingker jera iwa deika tein guru. Iwa ita mar erek koma rot idou onnga emesmeesa rot jera idou onnga ougif gu Allah askesi iwa iroru efen oga ojgomuja.

¹³ Jeska Allah bera onnga eita owesa efek gu iwa jeskaseda mar onnga iwa itunggom bera emah jeni erek Allah ondou os rot ojgomu fogora iwa imecira gij mar insa koma ojgomuja.

¹⁴ Iwa ita mar nomnaga moguma rot yuga onnga enerahah rot guru era rot yuga onnga onomosokuma rot tein guru.

¹⁵ Tina iwa ita mar onnga oufamofa ojgomu jeskaseda enadaij nou rusnok enjgineg rucunc iwa erek rusnok onnga rita mar onnga oska jinaga guru. Noba iwa ita mar erek insa koma ojgomu jeskaseda iwa ijerek Allah efen efeser onnga rudou ebsi komowa noba onnga efen mar onnga oska oskiyai tein guru. Yeyin idou efesi erek ebsi komowa askesi iwa iker gu rusnok onnga rita mar onnga oska ofoukou gu iwa rifekesa ros. Beda yeyin iteij ah bera erek eisa nou rusnok insa koma onnga ringker gij motkobah ros.

¹⁶ Iwa bera erek eisa nou rusnok insa koma jeska iwa imfesij rot Allah oga onnga eita eiteij ah onnga ah aibin gu rusnok fob. Noba erek iwa ita mar insa koma nomnaga, beda didif dudou emefaga ouka eteb rot iwa gij mona onnga Yesus Kristus ongksons en fob. Jeska koma bera orocunc rot oida mar onnga didif dimfarur rot jah gu iwa ifekesa bera erek omfij iwa rot tenten fob.

¹⁷ Didif duftuftu iwa jera rusnok enjgineg rot Allah efen oga fogora iwa iroru Ofa fob. Erek koma tina erek raja Kaisar efen tentarer onnga ragob didif jah sif rot ojgomu, beda dedin dugufu onnga otkinaja bera erek orocunc rot anggur efei onnga imam Yahudi egens eres gij mar onnga ofa orougif gu Allah rot omoisa rot. Noba yeyin iteij ah onnga yangha gu Allah fob bera erek mar insa koma onnga imam era fogora orougif gu Allah. Jefeda didif duis oufamofa eteb rot noba dudou efaga ouka morototuma jera iwa rot mar insa koma ojgomu.

¹⁸ Erek koma jefeda iwa tein ita idou onnga efaga ouka rot ojgomu morototuma jera didif ojgomuja.

¹⁹ Erek Tuhan Yesus ondou os rot beda ai juens bera didif dumobk Timotius skoita iwa jeskaseda gij

mona onnga didif dingg mar jeska ofa, beda dudou emefaga ouka rot iwa ojomu tein.

²⁰ Didif dumobk ofa jeska dedin rusnok egema onnga rudou okora rot iwa morototuma erek didif onnga riker jah sif guru. Ofa odou efeneinei eteb rot iwa tein.

²¹ Tina rusnok jah sif bera rudou efeneinei rot risinsa rerin riteij ah ojomu. Noba rua rudou enefeneinei rot mar onnga Yesus Kristus odou efeneinei rot guru.

²² Tina iwa isinsa ik rot oida mar onnga Timotius emfarur rot fob bera erek tenten ojomu. Jeska ofa bera ofij didif gij mona onnga didif dimfesij mar osok gij Allah oga rot iskusk fob, erek oforoaka egens onnga ofij efen meka rot iskusk ojomu.

²³ Jefeda didif dumobk ofa skoita iwa gij mona onnga rusnok ruga ojga rot didif jah sif fob.

²⁴ Noba didif dijginaga rot fob oida Allah omofij didif jeskaseda dektek deika guru, beda didif dumojogog iwa deika si.

²⁵ Noba didif dusujohu rot oida dumobk mifmin muhuj Epafroditus sons skoita iwa tein. Sis fob iwa yumbk ofa skoita didif jeskaseda ofij didif jah sif. Noba ebeibeyaif ofa bera erek dedin edohuj egens tein onnga ofij didif rot ahais erek maroska efer egens onnga ofij efen ebirfaga rot ahais ojomu.

²⁶ Didif dumobk ofa sons skoita iwa jeska ofa odou os ejek iwa ebeirens. Ofa tein odou efeneinei rot iwa jeska iwa ingg rot oida ofa maren eteb fob.

²⁷ Sis fob ofa maren eteb noba doida nou onnga anggos rot fob. Tina Allah ocunc efen odou onnga oufamofa skoita ofa jefeda ofa enagos guru. Koma tein bera erek Allah ocunc efen odou onnga oufamofa

skoita didif tein jeskaseda mar onggga okum ekirsa enah keingg didif deika guru.

²⁸ Erek koma jefeda didif dinsejah gij dudou efesi rot oida didif dumobk ofa sons skoita iwa jeskaseda iwa tein idou erirei eteb rot ofa. Beda didif tein dudou emefaga ouka eteb tein jeska iwa idou erirei rot erek koma.

²⁹ Noba gij mona onggga ofa ensaga jah suma fob, beda iwa iroun ofa rot idou onggga eskeiramera eteb ojgomu. Noba iwa yugif gu ofa jera rusnok enjgineg tein onggga rita mar erek ofa ojgomu.

³⁰ Jeska ofa aha efen eiteij ah nou rusnok enjgineg jeskaseda ofij Yesus Kristus ojgomuja. Noba doida nou onggga ofa anggos rot mar insa koma askesi ofa ofij didif. Noba ofa ontunggom mar insa koma oisouska iwa onggga yubk ofa skoita didif sis fob.

3¹ Erek koma jefeda Edohuji, iwa idou efaga ouka rot ojgomu jeska iwa bera injerek egens morototuma jera Tuhan fob. Mar onggga didif dunogu gij surat egens kef bera erek mar onggga didif dunggu rot gu iwa sis fob. Noba didif dudou os disisi joug iwa juens deika rot mar insa koma nomnaga, jeska mar insa koma bera erek omofij iwa tein si.

² Jefeda iwa ibes ifaga jeska rusnok onggga rutunggom mar onggga ofogog ojgomuja. Jeska rua riradgodu rusnok enjgineg rot oida riris rufom mareij ofos jeska ojgomu. Noba mar onggga rua rita insa koma bera orotunggom rusnok enjgineg rerin riteij ah fogora riremeseesema.

³ Rua rusujohu rot oida erek rusnok riris rufom mareij ofos jeska, beda koma bera onggga eita rudou efesi erek ebsi komowa ahah Allah eiteij, tina guru. Jeska mimif onggga muroru Yesus Kristus bera misma

mudou efesi onnga ebsi komowa ahah Allah eiteij rot tenten ojgomu. Noba mimif bera onnga mugif gu Ofa oisouska Efena Ebsi onnga engker gij mudou efesi fob. Noba mimif bera onnga mifaga ouka rot mar onnga Ofa ontunggom nou mimif fob. Noba mimif bera munoisum gij mar onnga rusnok risinsa rutunggom jeskaseda rita rudou onnga ebsi komowa ahah Allah eiteij jinaga guru.

⁴Erek rusnok rusujohu rot oida rua ruisum gij mar onnga risinsa rutunggom ojgomu, beda didif disinsiyai bera dijginaga rot mar insa koma erek ekirsa eteb tein. Rusnok rineya ruisum gij rerin rufoka era ruisum gij mar onnga risinsa rutunggom ojgomu jeskaseda risma rudou efesi onnga ebsi komowa. Koma erek tenten ei, beda didif bera erek osnok egens onnga dimesma dudou efesi onnga erek ebsi komowa ekirsa jeska rua nomnaga.

⁵Jeska gij mona onnga ameina onojuj rot didif erek mona cinja orfomu fob, beda rusnok riris dufom mareij ofos jeska. Noba didif tein dedin dufou ebiedi rua onnga Israel. Beda didif dujuj jeska indimowa Yahudi onnga ebic Benyamin. Noba didif duroru hukum Musa rot ahais ojgomuja, jeska sis fob bera didif dudou os daira gij ebic Yahudi egens onnga ofoka Farisi.

⁶Didif duroru hukum Musa rot ahais erek koma, jefeda didif dufra mar okum keingg rusnok onnga ruroru Yesus ojgomuja. Noba didif duroru hukum Musa nomnaga rot ahais fogora enadaij nou rusnok rucunc rot hukum egema tein onnga dunororu jinaga guru.

⁷Gij mona insa koma bera didif duisum gij mar insa koma nomnaga jeskaseda disma dudou onnga

ebsi komowa ahah Allah eiteij. Tina ebeibeyaif didif dusujohu rot oida mar insa koma nomnaga bera enerek ofoufem deika jinaga guru. Jeska mar onggga Yesus Kristus ontunggom nou rusnok fob bera erek ofoufem ojgomu.

⁸ Koma bera, didif dusujohu rot oida mar meidu meidu onggga didif disinsa duntunggom jeskasada disma dudou onggga ebsi komowa ahah Allah eiteij bera enerek ofoufem jinaga guru. Jeska mar egens onggga ofoufem ojgomu bera oida didif duroru Yesus Kristus onggga erek dedin Tuhan ojgomu. Didif daha mar insa koma nomnaga jah jeskasada duroru Ofa. Jefeda didif dusujohu rot oida mar onggga enjgineg nomnaga tein bera erek maroforu ejeres onggga mij jeska ojgomu. Erek koma jeska ebeibeyaif bera dudou efesi Kristus oisum gij Yesus ojgomu.

⁹ Jeska ebeibeyaif bera didif dunosujohu rot oida dimesma dudou onggga ebsi komowa oisouska hukum Musa deika guru. Tina oisouska dudou onggga ororu Yesus Kristus fob bera didif dimesma dudou efesi onggga ebsi komowa ahah Allah eiteij ojgomu.

¹⁰ Didif dudou os duisum gij Yesus Kristus rot mar nomnaga ojgomu jeskasada dudou ejerek egens jera Ofa ojgomuja. Noba didif dudou os dufij Ofa oisouska owesa efek eteb onggga Ofa esma gij mona onggga Ofa endebecki jeska anggos fob. Noba didif dudou os dita difera okora morototuma erek Ofa eita efera okora gij mar onggga Ofa ontunggom sis fob.

¹¹ Ofa bera anggos fogora edebecki sons. Jefeda erek koma tein didif dudou os dagos fogora dimedebecki sons erek Ofa si.

¹² Erek koma beda didif dinagot rot oida didif bera dita mar erek insa koma nomnaga rot iskusk

fob guru. Noba didif dinagot rot oida didif dita mar nomnaga erek ongkoska eteb fob guru. Tina didif duh dudou efesi rot ahais gij mar onnga dimfarur rot jeskaseda dudou eja erek egens jera Yesus Kristus ojgomuja. Jeska mar insa koma bera onnga Yesus Kristus odou os rot gij mona onnga Ofa oncunc didif erek osnok egens onnga ororu Ofa.

¹³ Edohuji, didif dunosujohu rot oida didif bera duntunggom mar nomnaga onnga Yesus ondou os rot erek jeni fob guru. Didif dunosujohu rot mar onnga didif duntunggom onnga erek ongkoska sis fob ojgomuja guru. Tina didif duh dudou efesi rot ahais gij fogora dusujohu rot mar onnga angh gij mona kahma ojgomu.

¹⁴ Didif duh dudou efesi rot ahais gu Yesus erek koma jeskaseda dutunggom mar nou Ofa ojgomuja onjoros mona onnga omoisa fob. Beda didif dimesma dedin dufons onnga oufamofa eteb jeska Allah gu mebaga si. Didif dimesma dufons insa koma jeska didif duroru Yesus Kristus rot tenten fob. Noba koma bera onnga Allah ondou os rot gij mona onnga Ofa oncunc didif sis fob tein.

¹⁵ Erek koma jefeda, mimif nomnaga onnga muroru Efena Ebsi Allah rot tenten fob bera musujohu rot mar erek insa koma ojgomu. Noba erek rineya jeska iwa rusujohu rot mar erek onnga toga, beda Allah omocunc mar onnga tenten gu rua gij rudou efesi rot si.

¹⁶ Erek koma tina ebeibeyaif bera mimif mita mar nomnaga jeni erek mudou ebriyi gij onjoros mona deisef ojgomu.

¹⁷ Edohuji, iwa ita mar jeni erek iwa ingk didif duntunggom gij mona onnga dingker morototuma

jera iwa sis fob. Noba iwa iaigga joug rot teinefa rusnok enjgineg rita mar jeni erek didif tein, beda iwa itunggom mar erek rua tein oigomu.

¹⁸ Jeska rusnok rufoukou bera rukoja mar onggga memef moftuftu rot osok gij Yesus Kristus onggga anggos tumu mega salib nou mimif. Noba didif danggot rot mar insa koma gu iwa sis fob, tina didif dudou os dagot rot mar insa koma gu iwa erek juens deika oigomu. Noba didif dinagot rot mar insa kef oisouska dudou efesi onggga ebsi komowa oigomu.

¹⁹ Tina Allah omofra okum eteb keingg rua rot mar insa koma oigomu. Jeska rua rugif gu mar erek meidu meidu onggga rudou efesi eftirir keingg rot oigomuja. Noba mojenen rua rot mar insa koma jinaga guru, tina rua risitit risinsa rifaga rot oigomu. Beda rua rusujohu rot mar onggga angh gu mebif oigomu.

²⁰ Erek koma, tina mimif mita mar erek rusnok onggga rerin monuh onggga angh gu mebaga oigomu. Noba mimif mumom mudou nou mona onggga Tuhan Yesus Kristus ongksions en jeska mebaga tein oigomu. Ofa bera onggga onskotu mimif jeska mifmin mar onggga oska sis fob.

²¹ Beda oisouska Ofa efen owesa efek eteb onggga oin keingg mar nomnaga tein, bera Ofa emeita efaga onggga efeinah gu mimif onggga morototuma erek Ofa efen efaga onggga ongkoska eteb.

4¹ Erek koma jefeda, edohuji onggga dudou okora eteb rot, iwa yut rot ahais gij mar insa koma nomnaga oisouska Yesus Kristus onggga ofij iwa oigomuja. Noba didif dudou os diker morototuma jera iwa deika. Jeska mar oufamofa onggga iwa intunggom bera ereita dudou efesi erirei eteb rot oigomuja.

Noba didif dudou efesi bera eskeiramera eteb rot iwa tein.

² Noba didif dui gu Euodia jera Sintike jeskaseda gojaga koma goga onomosokuma rot mar guru. Jeska goga geita mar onnga oufamofa erek gosnok gegeka onnga gororu Tuhan rot tenten fob.

³ Noba didif dui gu bua Sunsugos, dedin edohuj egens onnga odou ocosu efei ahtah, jeskaseda bua bufij gojaga insa koma rot mar onnga goga omosokuma rot insa koma. Jeska gojaga insa koma gomfij didif rot iskusk gij mona onnga didif duftu mar rot Yesus oga onnga oufamofa jah suma sis fob. Goga gofij didif morototuma jera Klemen, noba jera dedin edohujir enjgineg tein onnga rudou ocosu efei ahtah noba onnga rufij Tuhan Yesus morototuma jera didif. Rua insa koma nomnaga bera rerin rufoka onnga Allah onngu gij efen buku eiteij ah fob. Jeska Allah onngu rot rusnok rufoka nomnaga onnga rimesma riteij ah onnga ah aibin.

⁴ Iwa idou efaga ouka eteb ojgomuja, jeska iwa bera erek egens jera Tuhan Yesus Kristus fob! Didif dagot mar insa koma juens deika gu iwa oida, iwa idou efaga ouka eteb ojgomu!

⁵ Iwa icunc rot idou onnga ongoskamoka skoita rusnok nomnaga jeskaseda rua rik rot teinefa yeyin idou onnga oufamofa ojgomu. Jeska erek dektek deika guru, beda Tuhan Yesus emen si.

⁶ Erek koma tein, iwa idou enefeneinei rot yeyin iteij ah kef erek oskiyai tein guru. Tina iwa yum iteij gu Allah osok gij mar meidu onnga ereneni iwa ojgomu. Koma bera, iwa yagot gu Ofa rot mar onnga iwa indou os rot ojgomu. Noba gij mona insa koma bera yuis oufamofa eteb skoita Ofa tein.

⁷ Beda Allah omofij iwa jeskaseda idou efesi eskeiramera ojgomuja. Noba erek iwa idou enebriyi gij rot teinefa Ofa eita idou onнга eskeiramera rot koisoisa enesi, beda enadaij nou iwa ijekjeka idou efesi rot mar egema tein deika guru. Jeska Allah emeita mar insa koma nomnaga oisouska idou onнга erek egens jera Yesus Kristus fob si.

⁸ Erek koma jefeda edohuji, iwa isujohu rot mar nomnaga onнга ongnoskamoka ojgomu, noba onнга erek mimif misitit Allah rot ojgomu. Koma bera, iwa isujohu rot mar onнга erek tenten ni, mar onнга rusnok rudou os rot ni, mar onнга oufamofa ahah Allah eiteij ni, mar onнга eita rusnok rudou eskeiramera rot ni, mar onнга ereita rusnok rudou oufamofa skoita iwa rot ni, erek koma ojgomuja.

⁹ Noba iwa ita mar nomnaga jeni erek iwa imfokor gij jeska didif fob, era onнга didif duncunc gu iwa sis fob, era onнга iwa ingk oida didif duntunggom fob ojgomu. Iwa ita mar erek koma nomnaga ojgomu. Noba mifmin Allah, onнга eita mudou efesi onнга eskeiramera gu mimif, bera omofij iwa rot si.

¹⁰ Didif disitit gu Tuhan rot iwa jeska sis fob bera iwa yumfij didif fogora insa mar skoita didif. Jeska gij mona onнга dektek fob bera dinesma mar egema tein jeska guru. Erek koma tina ebeibeyaif bera iwa incunc gu didif rot oida idou okora rot didif ojgomuja ros fogora iwa insa mar koma skoita didif fob. Noba didif dijginaga rot oida iwa idou os yufij didif gij mona onнга sismeni fob tein. Noba didif dijginaga rot oida idou okora rot didif gij mona onнга sis fob tein. Tina sis fob bera iwa yeyin mona efekesa nou yufij didif enesi.

¹¹ Didif dinagot rot mar insa kef jeska didif ducosu rot mar jeska iwa deika guru. Jeska didif dudou eskeira gij mona onnga dedin mar onnga enadaij guru, jera mona onnga dedin mar onnga ofoukou ros tein ojgomu.

¹² Jeska gij mona juens bera mosona eteb ongak didif. Noba gij mona egema deika bera dedin maat ofoukou tein. Erek koma tina didif dita dudou onnga eskeira gij mona onnga egeka insa koma tein ojgomu. Gij mona onnga mosona ongak didif ni, gij mona onnga didif dit maat ofoukou ni, gij mona onnga didif disma mar onnga oskiyai ojgomu ni, era gij mona onnga didif disma mar onnga ofoukou tein ni, koma bera dudou eskeira rot mar insa koma nomnaga ojgomuja.

¹³ Jeska oisouska owesa efek onnga en jeska Yesus Kristus bera adaij nou didif dita dudou onnga ahais gij mar nomnaga onnga angh gu didif ojgomuja.

¹⁴ Erek koma tina didif dui oufamofa eteb gu iwa jeska ebeibeyaif bera iwa yumfij didif rot mar onnga ducosu rot gij mona insa kef onnga mar okum ah keingg didif fob.

¹⁵ Noba iwa onnga ingker gij Kota Filipi ijginaga rot tein oida, gij mona onnga didif dumftu mar rot Allah oga gij monuh Makadonia oisa fob fogora dinja jeska, beda rusnok onnga Mod Ari egema tein bera runofij didif rot mar onnga ducosu rot guri. Tina iwa isinsiyai bera onnga yumfij didif rot mar onnga duncosu rot gij mona insa koma ojgomu.

¹⁶ Erek koma tein, gij mona onnga didif dingker gij Kota Tesalonika ros, beda iwa yumfij didif rot mar onnga ducosu rot erek ofosma ofoukou fob.

¹⁷ Didif danggot rot mar insa kef jeskaseda diradgodu iwa fogora yufij didif guru. Tina didif dagot rot mar erek insa kef jeska didif dudou os rot oida Allah eita oufamofa ekirsa dokun deika gu iwa rot mar onnga intunggom nou didif fob.

¹⁸ Noba ebeibeyaif bera didif disma mar nomnaga onnga iwa insa gu didif sis fob. Jefeda didif dedin mar nomnaga onnga erek eteb ekirsa fob, jeska Epafroditus bera orka mar insa koma onnga iwa insa skoita didif jah sif fob. Noba mar onnga iwa insa skoita didif fob bera erek mar onnga efen ensesa onnga iwa irougif gu Allah rot. Noba Ofa odou efesi eskeiramera eteb rot tein.

¹⁹ Noba Tuhan Allah, onnga didif dugif gu noba onnga efen mar onnga ofoukou eteb ekirsa, Ofa bera emeita mar nomnaga onnga iwa icosu rot gu iwa si. Noba Ofa emeita mar insa koma odou onnga eskeiramera eteb rot iwa jeska iwa bera irek egens jera Yesus Kristus fob.

²⁰ Mimif muis oufamofa eteb gu mifmin mika Allah ojgomuja gij mona onnga ah aibin tein. Ainsoma.

²¹ Didif duisu Allah efen ruforoker nomnaga onnga ruroru Yesus Kristus jah suma. Noba rua onnga rumfij didif jah sif bera ruisu iwa tein.

²² Noba Allah efen ruforoker onnga ringker gij kota kef tein, jera rua onnga rumfij raja Kaisar gij efen mod jah sif tein bera ruisu iwa nomnaga.

²³ Didif dum diteij gu Tuhan Yesus Kristus jeskaseda Ofa eita oufamofa eteb gu iwa ojgomuja. Ainsoma.

Kolose

1 ¹ Didif Paulus, bera onnga dunogu surat egens kef. Noba mifmin muhuj Timotius bera onnga ofij didif jah sif. Noba didif bera dinja erek Yesus Kristus efen rasul egens oisouska Allah odou ejginaga rot. Noba didif disa surat egens kef skoita iwa onnga irek dedin edohujir gij kota Kolose. Iwa bera irek rusnok onnga rerin rudou efesi onnga ebsi komowa noba onnga ruroru Yesus Kristus rot tenten ojgomuja. Memef mom meiteij gu mifmin mika Allah jeskasada Ofa eita oufamofa eteb gu iwa noba eita eiteij ah onnga eskeiramera tein gu iwa.

² (1:1)

³ Gij orofosut mona onnga memef mom meiteij nou iwa bera memef mois oufamofa eteb gu mifmin mika Allah onnga Yesus Kristus efen meka.

⁴ Erek koma jeska memef meg rot oida iwa iroru Tuhan Yesus Kristus rot tenten fob, noba oida iwa idou okora rot Allah efen rusnok enjgineg tein ojgomuja.

⁵ Iwa intunggom mar erek koma jeska iwa insejah idou efesi rot yeyin ifons onnga Allah ensejah nou iwa jah gu mebaga fob. Iwa ingg mar osok gij ifons insa koma gij mona onnga iwa inroru Yesus efen oga onnga oufamofa fob.

⁶ Jeska sis fob rusnok rin skoita iwa noba rimfesij rot Yesus oga onnga oufamofa gu iwa, erek rusnok rimfesij rot Yesus oga onnga oufamofa gij monuh enjgineg tein. Jefeda ebeibeyaif rusnok rufoukou gij monuh insa koma nomnaga bera ruroru mar

ongga oufamofa ojgomu. Mar koma bera erek iwa tein intunggom gij mona onggga iwa ingg rot Allah efen oga onggga tenten osok gij Yesus Kristus fob. Gij mona insa koma bera iwa tein ita idou onggga ebriyi gij rot teinefa Allah oncunc efen odou onggga oufamofa skoita rusnok onggga rutunggom mar onggga oska fob.

⁷ Iwa ingg rot Yesus oga onggga oufamofa insa koma jeska mifmin muhuj Epafras sismeni fob. Ofa tein bera erek osnok egens onggga efarur nou Yesus Kristus morototuma jera memef jeskaseda ofij iwa. Noba ofa bera onggga mimif nomnaga mudou okora rot tein.

⁸ Ofa emfesij gu memef fob oida idou omokorema oisouska Efena Ebsi onggga engker gij idou efesi ojgomuja.

⁹ Erek koma jefeda askesi mona onggga memef mengg rot mar insa koma onjoros mona deisef tein bera memef mom meiteij gu Allah nou iwa ojgomuja. Memef mom meiteij gu Ofa jeskaseda Ofa ofij iwa fogora idou emebriyi gij rot mar onggga Ofa odou os rot. Beda oisouska Efena Ebsi bera iwa idou os rot mar insa koma nomnaga tein.

¹⁰ Noba memef mom meiteij erek koma jeskaseda iwa tein ita mar onggga oufamofa erek rusnok onggga rururu Tuhan efen oga rot tenten ni, noba jeskaseda Ofa emeita odou onggga eskeiramera eteb rot iwa ni, noba jeskaseda iwa ita mar onggga oufamofa ni, noba jeskaseda idou ejginaga rot mar onggga Allah ondou os rot erek ogun odudu deika ni,

¹¹ noba jeskaseda iwa isma owesa efek eteb oisouska Ofa efen owesa efek eteb ni, noba jeskaseda iwa yuin keingg idou efesi noba yut rot ahais tein gij

mar nomnaga ni, noba jeskaseda yeyin idou efesi tein bera emefaga ouka rot mifmin Tuhan ojgomuja ni.

¹² Beda iwa imois oufamofa eteb gu Allah jeska Ofa oncunc iwa jeskaseda isma ifons onnga Ofa ensejah nou efen rusnok nomnaga gu mebaga ojgomu fob. Ofa Ofoka ereij keingg mar nomnaga jah suma rot odou onnga efesis eteb tein.

¹³ Erek koma jeska Allah onskotu mimif jeska Bilis onnga ofoka ereij keingg rusnok nomnaga onnga ringker gij motkobah ros. Beda Ofa oroun mimif skoita efen efesa Yesus Kristus onnga Ofa odou okora eteb rot. Jefeda ebeibeyaif Yesus bera onnga ofoka ereij keingg mimif fob.

¹⁴ Noba oisouska Yesus onnga agos tumu mega salib nou mimif fob, bera Allah onsuwa mimif jeska mifmin mar onnga oska fogora osuna rot mar insa koma jeska mudou efesi tein fob.

¹⁵ Rusnok rinek Allah gu riteij jinaga guru. Tina Yesus Kristus bera erek orocunc jeni rot Allah nou rusnok nomnaga. Noba Yesus bera eker morototuma jera Allah gij mona onnga sismeni fob.

¹⁶ Jeska oisouska Ofa bera Allah ontunggom mar nomnaga onnga angh gu mebaga jera mar nomnaga onnga angh gu mebif tein. Ofa ontunggom mar nomnaga onnga mimif minek gu miteij guru jera mar nomnaga onnga mimif mik gu miteij tein ni. Ofa bera onnga ontunggom rifena onnga efen owesa efek ni, onnga rufoka ereij keingg mar ni, noba onnga rerin rufoka aksa tein ni. Ofa ontunggom mar insa koma nomnaga oisouska Yesus jeskaseda Yesus bera esma ofoka onnga aksa ekirsa jeska mar nomnaga.

¹⁷ Erek koma jeska Yesus bera engker rot sismeni jeska mar insa koma nomnaga. Noba mar insa koma

nomnaga ein tumu efen owesa efek jeskaseda riker tein.

¹⁸ Noba Ofa bera erek ebirfaga ongga ofoka ereij keingg rusnok Mod Ari nomnaga. Jeska oisouska Ofa bera rusnok Mod Ari nomnaga risma eiteij ah ongga efeinah. Erek koma jeska Ofa bera ongga endebecki rot sismeni jeska rusnok nomnaga ongga ranggos fob. Ofa endebecki rot sismeni erek koma jeskaseda Ofa esinsiyai emeita ofoka ongga aksa ekirsa jeska mar nomnaga.

¹⁹ Ofa bera ongga ocunc rot Allah erek jeni tein. Noba Allah odou os rot oida mar nomnaga ongga Ofa odou ejginaga rot bera ah gij Yesus efen odou efesi tein.

²⁰ Noba Allah oga ojga rot oida oisouska Yesus bera Ofa omoroun mar nomnaga ongga angh gu mebaga jera mebif tein sons skoita Ofa. Noba oisouska Yesus efen ogufu ongga eyah tumu mega salib bera Allah eita odou efesi ongga eskeiramera rot sons skoita mar nomnaga ongga angh gu mebaga jera mebif tein.

²¹ Sis fob bera iwa iker erek yesmes jeska Allah. Noba mar ofogog ongga angh gij idou efesi bera ongga orotunggom iwa erek ofogog ahah Allah eiteij tein.

²² Erek koma tina, oisouska Allah efen efesa ongga agos tumu mega salib fob bera Ofa oroun mimif nomnaga sons skoita Ofa fob. Ofa otunggom erek koma jeskaseda oroun iwa skoita Ofa rot idou ongga ebsi komowa, noba jeskaseda enadaij nou rusnok enjgineg rucunc iwa erek rusnok ongga rerin mar ongga oska ros jinaga guru.

²³ Jefeda iwa iroru Yesus Kristus efen oga rot ahais ojgomu. Noba erek idou eneineina gij rot tein guru, tina iwa yuisum gij oga onnga oufamofa insa koma ojgomuja, beda iwa imesma idou onnga ebsi komowa si. Oga onnga oufamofa insa kef bera onnga iwa ingg rot sis fob. Noba oga onnga oufamofa insa kef bera onnga rusnok runjoftuftu gu rusnok onnga ringker gij monuh ofoukou fob. Noba didif bera direk osnok egens onnga ofij Yesus Kristus rot oga onnga oufamofa insa koma tein.

²⁴ Ebeibeyaif didif dudou erirei eteb ojgomu jeska didif difera okora nou iwa onnga rusnok Mod Ari. Noba oisouska koma bera didif dita difera okora gij mar onnga Yesus Kristus tein eita efera okora gij nou efen rusnok Mod Ari sis fob. Noba rusnok Mod Ari insa koma bera erek Ofa esinsa efen efaga tein. Noba mar onnga didif duntunggom onnga ereita difera okora rot bera doida omoisa fob.

²⁵ Sis fob bera Allah oncunc didif jeskaseda dufij efen rusnok Mod Ari nomnaga fogora duftuftu mar osok gij efen oga onnga oufamofa rot onngas gu iwa tein onnga irek Yahudi guru.

²⁶ Noba sis dojunmeni fob onjoros deisef tein bera oga onnga oufamofa insa koma ah jejema jeska rusnok nomnaga. Tina ebeibeyaif Allah oncunc rot efen oga insa koma gu efen rusnok fob.

²⁷ Allah oga ojga rot oida Ofa omocunc rot efen oga insa koma onnga angh jejema sis fob skoita rusnok erek iwa tein onnga Yahudi guru. Noba oga insa koma bera agot rot oida rusnok onnga Yahudi guru tein rimesma oufamofa eteb jeska Allah si. Iwa onnga Yahudi guru tein imeja erek egens morototuma jera Yesus Kristus tein. Noba oisouska idou onnga egens

jera Yesus Kristus fob bera iwa yuisum gij mar onnga oufamofa eteb onnga Allah emeita gu iwa tein.

²⁸ Memef moftuftu mar osok gij Yesus Kristus gu rusnok ebic nomnaga tein. Memef moftuftu jera meisisi joug rua oisouska modou onnga efesis rot jeskaseda moroun rua skoita Allah fogora rua tein rita rudou onnga ebriyi gij fob. Beda rua tein rija erek egens jera Ofa tein.

²⁹ Noba didif duh dudou efesi rot ahais beda dug dijmeg gij ojgomuja oisouska Yesus Kristus efen owesa efek onnga angh gu dudou efesi.

2¹ Didif dudou os rot oida idou ebriyi gij rot teinefa didif duh dudou efesi rot ahais noba dug dijmeg gij mar nou iwa jera rusnok enjgineg tein onnga ringker gij kota Laodikia jera rusnok enjgineg tein onnga rinek didif enesi.

² Didif dita mar erek koma jeskaseda iwa nomnaga ita idou onnga ahais oisouska idou onnga omokorema fogora iwa ija erek egens ojgomu. Beda oisouska idou onnga erek egens insa koma bera idou emebriyi eteb gij rot Allah efen oga insa koma onnga ah jejema jeska rusnok sis fob. Allah oga insa koma bera osok gij Yesus Kristus ojgomu.

³ Noba oisouska Ofa bera mifmin mudou ebriyi gij rot teinefa Allah efen odou onnga efesis eteb noba onnga ebriyi gij mar nomnaga. Sis fob bera rusnok rudou enebriyi gij mar insa koma jinaga guru. Tina ebeibeyaif mifmin mudou ebriyi gij fob.

⁴ Noba didif dagot rot mar insa kef gu iwa jeskaseda enadaij nou rusnok enjgineg ruokrusa iwa rot mar onnga oska onnga rua ruftuftu gu iwa guru.

⁵ Noba didif dineker morototuma jera iwa ebeibeyaif guru, tina gij dudou efesi bera difeneinei rot iwa

ojgomuja ros. Erek koma tein, didif dudou ererei eteb jeska iwa ita idou ahais erek egens morototuma fogora iroru Yesus Kristus rot tenten ojgomuja fob.

⁶Erek koma jefeda, iwa ita mar onggga tenten ojgomu erek rusnok onggga rerin rudou egens jera Yesus Kristus fob. Iwa ita mar insa koma jeni erek rusnok rumftuftu gu iwa osok gij Yesus Kristus onggga erek mifmin Tuhan sis fob.

⁷Beda yeyin idou efesi imeja erek ahais odudu deika erek mar efef egens onggga eij ofom gij mebi efesi odudu deika fogora ahais. Koma bera erek iwa isisi joug isinsa idou efesi rot ahais ojgomuja osok gij Yesus efen oga onggga rusnok rumftuftu gu iwa sis fob. Noba erek rusnok rii mod egens ojgomuja onjoros mod koma ot rot ahais fob, beda iwa tein yuis oufamofa eteb gu Allah ojgomuja rot mar onggga Ofa ontunggom nou iwa fob.

⁸Beda iwa ibes ifaga jeska rusnok onggga rudou os ruokrusa iwa jeskaseda iroru mar onggga risinsa ruftuftu rot gu iwa ojgomu. Jeska mar koma onggga rua ruftuftu rot bera erek tenten guru, noba onofij iwa tein jinaga guru. Mar koma bera en jeska rusnok mebif rerin erebent ojgomu, noba koma ororu mar onggga rusnok rusujohu rot gij rudou efesi tein. Noba mar koma bera eretei rot mar onggga Yesus Kristus omftuftu sis fob.

⁹Didif disisi joug iwa erek insa koma jeska mar nomnaga onggga angh gu Allah bera angh gu Yesus Kristus tein gij mona onggga Ofa engker gu mebif ros.

¹⁰Noba iwa tein bera insma eiteij ah onggga efeinah noba onggga ebera rot mar onggga oufamofa oisouska idou onggga egens jera Yesus fob. Ofa bera efen ofoka onggga aksa ekirsa jeska mar nomnaga onggga efen

owesa efek noba onnga ofoka ereij keingg rusnok tein.

¹¹ Erek koma tein, mar onnga rusnok mebif runtunggom erek riris rufom mareij ofos jeska bera onosuwa rua jeska rerin mar onnga oska jinaga guru. Tina oisouska idou onnga egens jera Yesus Kristus fob bera Allah onsuwa iwa jeska yeyin mar onnga oska fob.

¹² Jeska gij mona onnga iwa ita baptis gij mei efen beda koma erek orocunc rot oida iwa yanggos jeska yeyin mar onnga oska morototuma jera Yesus gij mona onnga Ofa anggos fob. Beda nou onnga iwa indebecki jeska mei efen insa koma fob, beda koma tein erek orocunc rot eiteij ah onnga efeinah onnga iwa insma morototuma jera Yesus Kristus gij mona onnga Ofa endebecki jeska anggos fob. Noba iwa isma eiteij ah onnga efeinah insa koma oisouska idou onnga ororu rot tenten oida Allah efen owesa efek eteb onnga adaij nou. Jeska Ofa bera onnga ofra Yesus Kristus jeska anggos fob.

¹³ Noba sis fob bera iwa iker gij yeyin iteij ah onnga oska ros noba iwa tein inejginaga rot Allah enesi. Gij mona insa koma iwa bera erek rusnok onnga ranggos noba rah gij moksou fob. Erek koma tina, Allah onsuna rot yeyin mar onnga oska jeska idou efesi fob. Jefeda koma erek iwa isma eiteij ah onnga efeinah sons morototuma jera Yesus Kristus onnga endebecki jeska anggos fob.

¹⁴ Sis fob bera iwa ingkirsu rot Allah efen oga ojgomuja. Jefeda koma erek yeyin mar onnga oska ah gu iwa ros. Noba koma bera onnga eragou joug iwa fogora inesma eiteij ah onnga efeinah enesi. Tina oisouska Yesus Kristus, onnga rusnok runtob tumu

mega salib, bera Allah anggot rot oida yeyin mar onnga oska insa koma enah gu iwa deika guru. Jeska Ofa onsuna rot mar insa koma jeska idou efesi fob.

¹⁵ Noba oisouska Yesus Kristus onnga anggos tumu mega salib fob bera Allah oin keingg Bilis fogora efen owesa efek enah keingg mimif deika guru. Beda oisouska mar insa koma bera Allah ocunc rot tomnomna gu rusnok mebif nomnaga rot oida Bilis efen owesa efek koma bera ensiri fob.

¹⁶ Erek koma jefeda iwa idou enemeesa guru rot rusnok onnga rucunc iwa erek oska rot maat onnga iwa int ni, era mar onnga iwa ij tein ni, era jeska iwa idou enefaga ouka morototuma jera rua gij rerin mona eteb guru ni, era jeska iwa inororu rua gij mona onnga rua ruina maat keingg mesta efeinah era gij mona onnga rerin ari eteb guru ni.

¹⁷ Mar insa koma nomnaga bera erek hukum rusnok mebif rerin onnga orohuhur reirei ojgomu. Yeyin hukum insa koma bera eneita eiteij ah onnga efeinah gu iwa jinaga guru. Tina hukum koma bera erek mar onnga orocunc rot mona onnga Yesus Kristus emen ojgomu. Jeska Ofa bera onnga eita eiteij ah onnga efeinah gu mimif rot tenten ojgomu.

¹⁸ Erek koma tein, iwa idou enemeesa rot rusnok onnga rucunc iwa erek oska jeska iwa inougif gu malaikat-malaikat morototuma jera rua tein guru. Noba rua rucuwei mar rot oida Allah oncunc mar onnga onswos gu risinsiyai ojgomu. Noba rua ruin keingg risinsa rufoka gij mar onnga rua ragot jah gu rusnok rudou ojgomu, tina gij rudou efesi bera rua rufra risinsa rufoka erek aksa ekirsa jeska rusnok insa koma ojgomu.

¹⁹ Tina rua insa koma bera rinebiedi morototuma jera Yesus Kristus onnga Kristen nomnaga efen ebirfaga guru. Noba mimif nomnaga mimebiedima rot ahais erek egens noba misma oufamofa tein oisouska Ofa efen owesa efek ojgomu. Beda mimif muroru Ofa rot ahais odudu deika jeni erek Allah ondou os rot.

²⁰ Iwa inja erek egens jera Yesus Kristus onnga anggos nou mimif fob, jefeda Ofa onsuwa iwa jeskaseda inororu erebent ensis onnga en jeska rusnok deika guru. Erek koma jefeda teinefa fogora iwa iroru erebent insa koma ojgomuja roso.

²¹ Jeska iwa iroru erebent ensis onnga agot rot mar erek kef oida, "Iwa inagei mar kef guru ni, inet maat erek koma guru ni, inahtec mar koma guru ni!"

²² Jefeda erek iwa iroru mar insa koma ojgomuja, beda koma tein onofij iwa jinaga guru. Jeska mar koma bera erek rusnok rerin erebent ojgomu. Jefeda mar koma nomnaga emeseiseifa jeska mebif ojgomu si.

²³ Erebent insa koma nomnaga agot mar erek kef oida, "Rusnok rugif gu malaikat ni, ribes rifaga jeska maat onnga erek mar mareij ni, rita rifera okora gu risinsa rifaga ni." Noba rusnok onnga ruftuflu rot mar insa koma bera rusujohu rot oida rerin rudou onnga ebriyi eteb gij mar koma ojgomu. Tina onnga tenten bera, mar insa koma nomnaga efen owesa efek enadaij nou oin keingg mar onnga oska onnga angh gij rusnok rudou efesi jinaga guru.

3¹ Iwa insma eiteij ah onnga efeinah morototuma jera Yesus Kristus gij mona onnga Ofa endebecki jeska anggos fob. Jefeda iwa yuh idou efesi rot onngas jah nou mar onnga angh gu mebaga ojgomu.

Jeska jah suma bera Yesus Kristus engker desi Allah rot efen ofoka onnga aksa eteb fob.

²Erek koma tein, iwa isujohu rot mar onnga angh gu mebaga ojgomuja, noba idou enemeesa rot yeyin iteij ah gij mona onnga ebeibeyaif ojgomu guru.

³Jeska yeyin mar onnga oska enah gu iwa deika guru. Koma erek iwa yanggos jeska mar koma fob morototuma jera Yesus gij mona onnga Ofa anggos fob. Noba iwa insma eiteij ah onnga efeinah morototuma jera Yesus Kristus onnga engker desi Allah gu mebaga fob.

⁴Beda gij mona onnga Yesus Kristus, onnga eita eiteij ah gu mimif, omorogna keingg rusnok nomnaga, beda mimif tein mumorogna keingg rua morototuma jera Ofa. Noba mimif tein mimesma mufoka onnga aksa eteb morototuma erek Ofa efen ofoka onnga aksa.

⁵Iwa ineita mar onnga oska egema tein onnga angh gij idou efesi sis fob deika guru. Iwa inockahtah morototuma guru ni, inesiri morototuma jera mar enjineg tein guru ni, inodou os itunggom mar onnga ofogog guru ni, idou eneftirir keingg mareibra ofoukou guru ni. Jeska koma bera erek iwa idou osos rot mar insa koma ekirsa jeska rot idou onnga osos rot Allah tein.

⁶Iwa ineita mar erek insa koma guru, jeska Allah omofra mar okum eteb keingg rusnok nomnaga onnga rutunggom mar erek koma si.

⁷Gij mona onnga iwa inororu Yesus Kristus efen oga enesi, bera iwa ita mar erek insa koma ojgomuja.

⁸Erek koma tina, ebeibeyaif iwa inororu mar onnga oska egema tein deika guru. Iwa idou onotkonu oska skoita rusnok enjineg guru ni, idou onofogog rot

rusnok enjgineg guru ni, inohurmei mar gij rusnok enjgineg guru ni, inahaisent gij rusnok enjgineg guru ni,

⁹ inocuwei mar moguma guru ni. Iwa ineita mar insa koma nomnaga deika guru. Jeska iwa bera yaha yeyin mar onggga oska nomnaga jah fob. Mar koma bera onggga iwa intunggom gij mona onggga iwa inororu Yesus Kristus enesi.

¹⁰ Ebeibeyaif bera iwa iker rot yeyin iteij ah onggga efeinah fob. Jefeda iwa ita mar onggga onggkoska odudu dokun deika erek Allah eita mar onggga onggkoska. Noba Allah bera onggga eita eiteij ah onggga efeinah koma gu iwa jeskaseda idou ebriyi gij Ofa erek odudu deika.

¹¹ Ofa otunggom mar koma nou iwa nomnaga tein. Jefeda rusnok Yahudi tein bera rinekirsas jeska rusnok onggga Yunani guru. Noba rusnok onggga riris rufom mareij ofos jeska bera rinekirsas jeska rusnok onggga rineris rufom mareij ofos jeska guru. Noba rusnok onggga rujga jeska rerin monuh bera rinekirsas jeska rusodosa onggga ringker gij rusnok koma rerin monuh guru. Noba rusnok onggga rut gu risinsas fob bera rinekirsas jeska rusnok onggga rumfij rerin ebirfaga ojjomuja ros guru. Tina Yesus Kristus bera onggga ofoufem eteb nou iwa nomnaga. Noba Ofa bera eja erek egens morototuma jera rusnok nomnaga onggga rururu Ofa fob.

¹² Iwa bera erek Allah efen rusnok onggga ebsi komowa noba onggga Ofa oncunc fob. Noba Ofa odou okora eteb rot iwa. Jefeda iwa idou omokorema moguma ni, ita mar onggga erek onggkoska moguma ni, yuin keingg isinsas idou efesi moguma ni, noba ita mar deci deci moguma ni.

¹³ Erek koma noba iwa imofijma ni, isuna rot mar onnga oska onnga rineya rutunggom skoita iwa rot idou onnga eskeiramera ojomu ni. Iwa isuna rot mar onnga oska insa koma erek Tuhan onsuna rot isinsa yeyin mar onnga oska rot odou onnga eskeira fob.

¹⁴ Noba mar egens onnga ofoufem ekirsa bera iwa idou omokorema ojomuja. Jeska koma bera onnga ebiedi iwa rot ahais erek ebic egens ojomuja.

¹⁵ Noba oisouska Yesus Kristus bera iwa ita idou onnga eskeiramera moguma. Jefeda iwa ita idou onnga eskeiramera moguma erek koma ojomuja. Jeska Allah oncunc iwa fob jeskaseda iwa nomnaga ita mar erek koma. Noba iwa tein yuis oufamofa gu Allah ojomuja.

¹⁶ Beda iwa ireni rot ahais jeskaseda idou ebriyi gij Yesus Kristus efen oga erek ekirsa deika ojomuja. Noba iwa imoftuftuma jera icunc mar moguma rot idou onnga efesis nou ojomu. Erek koma tein, iwa yuf medemer jeska buku Mazmur ni, noba yuf medemer onnga erek oroftuftu rusnok ni, noba onnga erek orois oufamofa gu Allah tein.

¹⁷ Beda mar nomnaga onnga iwa itunggom jera mar nomnaga onnga iwa yanggot rot bera ita mar insa koma nomnaga erek rusnok onnga rururu Yesus Kristus rot tenten ojomu. Noba iwa ita mar erek koma askesi iwa yuis oufamofa oisouska Yesus Kristus. Noba ois oufamofa gu Allah oisouska idou onnga egens jera Tuhan Yesus Kristus fob.

¹⁸ Iwa onnga yanghi igers fob, iwa yugif gu yeyin yahiner ojomu. Jeska koma bera onnga Tuhan ondou os rot.

¹⁹ Noba iwa onggga yuskotu arja fob, iwa tein idou okora rot yeyin ihoner, noba ita idou onggga eriaga skoita rua ojgomu.

²⁰ Noba iforoker, iwa tein yugif gu yeyin iker jera yuser tein ojgomu. Jeska koma bera onggga ereita Allah odou eskeira eteb rot iwa.

²¹ Noba yuner onggga yeyin iser fob, iwa inoftuftu mar rot yuga onggga okumkum eteb skoita rua guru. Jeska koma bera onggga orotunggom rudou efesi okum eteb rot iwa.

²² Erek koma tein, iwa onggga erek rusnok onggga rumfij rerin ebirfager, iwa yugif gu rua rot mar nomnaga onggga rua ranggot rot gu iwa ojgomu. Noba iwa ineita mar erek koma gij mona onggga rua riajga joug iwa jeskaseda rudou oufa rot iwa ojgomu guru. Tina yugif gu rua rot idou onggga erirei ojgomuja. Ita mar erek koma jeska iwa idou okora rot Tuhan.

²³ Noba gij mar meidu onggga iwa intunggom, beda iwa ita mar insa koma rot idou onggga ocosu efei ahtah ojgomu. Jeska mar onggga iwa intunggom insa koma bera nou rusnok ojgomu guru, tina mar koma onggga iwa intunggom bera nou Tuhan Allah tein.

²⁴ Iwa ita mar erek koma jeska iwa ijginaga rot oida iwa imesma ifons onggga ongnoska eteb jeska Tuhan Yesus Kristus. Ofa bera onggga yeyin ebirfaga onggga iwa yumfij rot tenten tein.

²⁵ Tina Allah bera omofra mar okum eteb keingg rusnok ororu jeni rerin rita mar onggga oska. Jeska Ofa omoga ojga rot rusnok nomnaga ororu jeni rerin rita mar onggga oska era rerin rita mar onggga oufamofa tein si.

4¹ Ere koma tein, iwa onnga irek ebirfager onnga yeyin rusnok onnga rumfij iwa, iwa tein ita mar onnga erek ongnoska gu rua ojgomu, noba iwa inorokrusa rua guru. Jeska iwa tein yeyin ebirfaga onnga engker gu mebaga. Noba Ofa eyajga joug iwa rot mar insa koma tein ojgomuja.

² Beda iwa tein yum iteij gu Allah ojgomuja. Noba iwa yut joug idou efesi rot ahais noba yuis oufamofa gu Ofa tein askesi iwa yum iteij gu Ofa.

³ Beda iwa yum iteij nou didif tein jeskaseda didif disma efekesa nou duftuftu mar rot Yesus Kristus efen oga onnga angh jejema jeska rusnok enjgineg ros. Didif dingker gij mod oskusk insa kef jeska didif duftuftu rot Yesus Kristus efen oga insa koma fob.

⁴ Jefeda iwa yum iteij nou didif erek insa koma jeskaseda duku dufos ojgomu fogora duftuftu mar insa koma gu rusnok rot koisoisa. Jeska mar onnga didif dimfarur gij bera erek koma.

⁵ Noba iwa tein ita mar nomnaga rot idou onnga efesis eteb gij jeskaseda rusnok onnga runororu Yesus Kristus enesi bera rimek yeyin iteij ah onnga ongnoska ojgomu.

⁶ Ere koma beda iwa tein yagot mar rot yuga onnga erek eriaga skoita rusnok enjgineg ojgomu. Noba iwa isejah idou efesi nou mar onnga rua rinjeka iwa rot jeskaseda iwa iroun mar sons gu rua rot iskusk.

⁷ Mifmin muhuj Tikhikus bera emefesij rot mar nomnaga osok gij didif gu iwa gij mona onnga ofa ensaga keingg iwa jah suma. Ofa tein bera osnok egens onnga ofij Tuhan Yesus Kristus rot ahais ojgomuja.

⁸ Didif dumobk ofa skoita iwa jeskaseda iwa ijginaga rot memef erek teinefa, fogora idou efaga ouka rot tein.

⁹ Ofa emen morototuma jera Onesimus. Onesimus koma bera mefmen mohuj egens tein onga ororu Yesus Kristus rot tenten fob, noba onga modou okora rot tein. Beda gegeka tein bera gemagot rot mar nomnaga gu iwa si.

¹⁰ Beda Aristarkus onga eker morototuma jera didif gij mod oskusk kef tein bera oisu iwa. Noba Markus onga Barnabas efen mokosa tein oisu iwa. (Didif direjgei iwa sis fob, jeskaseda erek ofa en skoita iwa, beda imoroun ofa rot idou onga oufamofa ojgomu tein).

¹¹ Erek koma tein Yesus, onga efen ofoka Yustus tein, bera oisu iwa. Rusnok Yahudi onga rufij didif jeskaseda ruftuflu rot teinefa Allah ofoka ereij keingg rusnok bera rua insa kef ojgomu. Noba rua tein rifarur rot Allah oga insa koma erek iskusk ojgomu.

¹² Noba Epafras, onga ororu Yesus Kristus tein, noba onga en jeska iwa, ofa tein oisu iwa. Ofa om eiteij gu Allah nou iwa rot ahais ojgomuja. Ofa om eiteij jeskaseda iwa yut joug idou efesi rot ahais ni, jeskaseda idou ebriyi gij Yesus Kristus efen oga ni, noba jeskaseda iroru mar onga Allah odou ejginaga rot ojgomuja ni.

¹³ Noba didif dagot rot tenten oida ofa efarur rot ahais nou iwa jera nou Yesus efen rusnok gij kota Laodikia jera kota Hierapolis tein.

¹⁴ Erek koma tein, mifmin muhuj Lukas onga erek dokter, noba onga mudou okora rot, ofa jera Demas tein goisu iwa.

¹⁵ Erek koma beda didif tein daisu mifmin muhujir onnga rururu Yesus Kristus gij kota Laodikia jera mifmin mohuj Nimfa jera rusnok nomnaga onnga rumohoturuma gij ofa efen mod.

¹⁶ Beda nou onnga rusnok rik surat kef fogora rimfesij gu iwa onnga Kolose nomnaga fob, beda iwa isa surat kef skoita Yesus efen rusnok onnga ringker gij kota Laodikia jeskaseda rua rik fogora rifesij rot gu rusnok jah suma tein. Erek koma tein, gij mona onnga rusnok Laodikia risa surat onnga didif dunggu gu rua skoita iwa fob, beda iwa tein ik fogora ifesij rot gu yeyin rusnok jah Kolose tein.

¹⁷ Noba iwa isisi keingg Arkhipus jeskaseda ofa efarur rot mar onnga Tuhan oncunc gu ofa onjoros omoisa fob.

¹⁸ Didif Paulus bera dira disinsa ditma durogu keingg mar onnga daisu iwa rot insa kef. Noba iwa inodou ofoj joug rot oida didif dingker gij mod oskusk kef ros guru, tina yum iteij gu Allah nou didif. Noba Didif tein dum diteij gu Allah jeskaseda Ofa eita oufamofa eteb gu iwa. Ainsoma.

1 Tesalonika

1 ¹ Didif Paulus jera dedin edohujirga Silas gonu Timotius bera monogu surat egens kef gu iwa onnga irek rusnok onnga Allah efen noba onnga iroru Tuhan Yesus Kristus tein gij kota Tesalonika. Memef mois gu Allah jeskaseda Ofa eita oufamofa eteb gu iwa noba jeskaseda iwa imesma eiteij ah onnga ongnoska jeska Allah.

²(1:1)

³ Orofosut mona onnga memef mom meiteij gu Allah beda memef mom meiteij gu Ofa nou iwa tein. Noba memef mesitit gu Ofa jeska mek iwa, tina yeyin ita mar onnga erek ongnoska ojgomuja fob. Koma erek iwa irocunc rot oida iwa iroru Yesus rot tenten fob. Noba iwa idou okora rot rusnok enjgineg fogora yumfij rua tein fob. Noba iwa tein yunt joug idou efesi rot ahais fob, jeska iwa ijginaga rot tenten oida mifmin Tuhan Yesus Kristus bera omoksons en si.

⁴ Memef mejginaga rot oida Allah odou okora eteb rot iwa fob, jefeda Ofa oncunc iwa erek efen rusnok tein fob.

⁵ Memef mejginaga rot mar insa koma fob, jeska memef bera onnga manggot rot Allah oga onnga oufamofa gu iwa gij mona onnga sismeni. Noba mar insa koma bera enen jeska mar onnga memef mesinsa monsojohu rot ojgomu guru. Tina memef mejginaga rot tenten oida mar onnga manggot insa koma gu iwa fob bera en jeska Efena Ebsi Allah ojgomu. Iwa ijginaga rot oida gij mona onnga memef

mengker morototuma jera iwa, beda motunggom mar erek mofij iwa ojomu.

⁶ Iwa iroru jeni mar onnga memef moncunc gu iwa, jefeda rusnok enjineg rita efera okora eteb gu iwa rot fob. Noba iwa iroun mar onnga memef manggot gu iwa gij mona insa koma rot idou onnga efaga ouka eteb. Efena Ebsi Allah bera onnga eita idou onnga efaga ouka eteb rot fob.

⁷ Jeska iwa ita mar erek insa koma fob, jefeda rua onnga Kristen gij monuh Makedonia jera monuh Akaya bera rik fogora rua tein ruroru jeni mar onnga iwa intunggom tein.

⁸ Iwa bera erek rusnok sismeni onnga rimfesij rot Allah oga onnga oufamofa gu rusnok enjineg fob, jefeda oga insa koma bera enja jah monuh Makedonia jera monuh Akaya tein. Noba iwa iroru Yesus oga rot ahais fob jefeda rusnok rufoukou rifesij moguma rot mar koma rejrej monuh ofoukou fob. Jefeda ebeibeyaif enadaij nou memef mefesij mar rot iwa gu rusnok rineya deika guru, jeska rua rijjinaga rot iwa fob.

⁹ Rusnok insa koma nomnaga rifesij moguma rot teinefa iwa iroun memef gij mona onnga sismeni fob. Rua rifesij moguma rot teinefa iwa ingkikif jeska yeyin mar onnga oska onnga iwa yugif gu sis fob fogora in skoita Allah noba yugif gu Ofa ojomu.

¹⁰ Rua rifesij moguma rot oida iwa yum idou nou mona onnga Yesus Kristus ongksons en jeska mebaga. Yesus koma bera Allah efen efesa onnga Ofa omfra jeska anggos fob. Ofa bera onnga omoskotu mimif nomnaga jeska mar okum onnga emen.

2¹ Edohuji, iwa isinsa ijginaga rot fob oida gij mona onnga memef monjogog iwa bera mar onnga memef montunggom gu ifekesa enerek rourou guru.

² Iwa ijginaga fob oida gij mona onnga memef meneja skoita iwa enesi, beda memef mejeker jah kota Filipi fog. Beda rua onnga kota Filipi rita mar okum onnga ereneni memef rot, noba rua ruga oruh memef tein. Rusnok rufoukou onnga rita mar okum skoita memef, tina Allah eita owesa efek gu memef jeskaseda menemeesa rot guru. Jefeda memef manggot rot efen oga onnga oufamofa gu iwa ojgomuja.

³ Memef monoftu iwa rot modou onnga eredemdemi mar eneya jeska iwa jinaga guru. Noba memef monocuwei mar jeska iwa tein jinaga guru.

⁴ Noba memef tein menagot mar onnga oroku rusnok rudou efesi fogora risitit mofoka tein guru. Tina memef mefesij mar gu rusnok jeni onnga Allah oncunc fob ojgomu. Ofa oncunc memef jeskaseda mejefesij rot efen oga onnga oufamofa insa koma gu rusnok enjgineg tein. Noba Ofa ejginaga rot mar nomnaga onnga mimif musujohu rot gij mudou efesi tein fob.

⁵ Iwa isinsa tein ijginaga rot fob oida memef monoga efei jeska iwa guru. Noba memef menedemdemi mar egema gij modou efesi erek mohca mareibra era fifi jeska iwa guru. Allah esinsa ejginaga rot oida koma bera erek tenten ojgomu.

⁶ Memef menefesij rot Allah oga gu iwa jeskaseda iwa era rusnok enjgineg tein rugif gu memef rot ojgomu guru. Memef bera erek rasul jefeda adaij nou memef mocunc mar ofoukou skoita iwa ojgomu, tina meneita mar erek koma guru.

⁷ Tina memef moncunc modou onnga eriagamaga gu iwa erek ojaga egens onnga ofij efen efesa rot odou onnga eriagamaga tein.

⁸ Memef modou okora eteb rot iwa, jefeda memef moftuftu iwa rot Allah oga ojgomuja. Noba memef tein moh modou rot onngkas skoita iwa jeskaseda mofij iwa gij mar enjineg tein ojgomuja.

⁹ Iwa isinsa ijginaga rot oida gij mona onnga memef mengker jera iwa beda memef mefarur rot ahais ojgomuja jeskaseda meita maat jera meisoufa tein. Gij mona insa koma bera memef mefarur orofosut mona jera motu tein jeskaseda misma mar insa koma fogora monois gu iwa rot mar insa koma jinaga guru.

¹⁰ Gij mona insa koma bera memef meker gu iwa ifekesa rot modou onnga ebsi komowa noba memef meneita mar onnga oska egema tein guru. Jefeda enadaj nou rusnok egema tein rucunc memef erek oska guru. Iwa isinsa tein ik joug memef rot mar insa koma fob. Noba Allah tein ek rot mar insa koma fob.

¹¹ Memef meita mar jera iwa rot onngkoskamoka erek orna egens onnga eita mar gu efen efesa rot onngkoskamoka ojgomu.

¹² Memef modou okora rot iwa, jefeda memef mofij iwa rot modou onnga eteb noba meisisi joug iwa rot ahais tein. Memef montunggom mar erek insa koma jeskaseda iwa yut joug iteij ah erek onngkoska jeni onnga Allah ondou os rot. Ofa bera onnga oncunc iwa erek efen rusnok onnga Ofa ofoka ereij keingg. Noba iwa imesma ifoka onnga aksa morototuma jera Ofa gij mona kahma tein si.

¹³ Beda memef mois oufamofa eteb gu Allah tein, jeska gij mona onnga memef menjefesij rot Allah oga gu iwa, beda iwa ig rot iskusk noba iroun efen

oga insa koma rot idou onggga eskeiramera. Noba gij mona insa koma tein iwa iroun oga insa koma, jeska iwa ijginaga rot oida oga koma bera enen jeska rusnok onggga giskini ojgomu guru. Tina iwa iroun oga insa koma jeska idou ororu oida koma bera Allah efen oga onggga tenten fob. Noba koma bera tenten ojgomu, jeska Allah ofij iwa onggga iroru efen oga rot tenten ojgomuja.

¹⁴Edohuji, mar okum onggga angh keingg iwa bera enah gu iwa isinsiyai ojgomu guru. Tina mar okum angh keingg rusnok nomnaga onggga ruroru Yesus Kristus gij monuh Yudea tein. Rusnok Yahudi bera rita mar okum insa koma gu iwa fob. Erek koma tein, rusnok Yahudi bera rita mar okum gu rua onggga ruroru Yesus Kristus gij monuh Yudea tein.

¹⁵Rusnok Yahudi bera onggga ranggob nabi-nabi onggga sis fob, noba rua tein bera onggga runtob Yesus tumu mega salib fob. Noba rua rua tein bera onggga rita mar okum keingg memef tein fob. Rua rucunc rudou onggga ofogog skoita rusnok enjgineg tein ojgomuja. Jefeda Allah odou eneskeira rot rua jinaga guru.

¹⁶Rua rutunggom mar onggga oska ofoukou skoita memef jeskaseda menefesij rot Allah oga onggga eita eiteij ah onggga efeinah gu rusnok onggga erek Yahudi guru tein. Jefeda koma orocunc rot oida rerin mar onggga oska erek ofoukou doska fob. Jefeda ebeibyaif Allah omofra mar okum eteb keingg rua rot si.

¹⁷Edohuji, sis fob bera memef menja jeska iwa nou mona onggga dektek guru. Tina gij mona insa koma bera memef mosujohu rot iwa ojgomuja. Noba

gij mona insa koma bera memef mereni rot ahais jeskaseda moksons skoita iwa deika fog.

¹⁸ Memef modou os eteb jeskaseda moksons skoita iwa. Noba didif Paulus direni jeskaseda duksons ojomuja, tina Bilis eragou joug moroju fogora monoksons skoita iwa enesi.

¹⁹ Jeska didif dik, tina iwa iroru Yesus rot tenten fob. Noba koma ereita modou efaga ouka eteb rot. Jeska gij mona onnga Yesus onksons en fob, beda memef moism gij Ofa rot oida Ofa emeita mefmen mofons onnga onkoska eteb rot si. Beda Ofa omofra mefmen mofoka erek aksa morototuma jera iwa tein.

²⁰ Iwa bera iroru mar onnga memef moftuftu rot tenten fob, jefeda memef modou emefaga ouka eteb gij mona onnga mimif nomnaga misma mufoka onnga aksa morototuma.

3¹ Memef mereneni jeskaseda menja skoita iwa, tina guru. Jefeda memef mosujohu rot oida memef meker gu mesinsa gij kota Atena ojomu.

² Tina memef mobk mefmen mohuj Timotius skoita iwa. Ofa bera mefmen mohuj egens onnga ejefesij rot Allah efen oga gu rusnok enjineg tein. Ofa en skoita iwa jeskaseda eisisi joug iwa fogora imororu Yesus rot tenten deika ojomuja.

³ Ofa omoftuftu iwa erek koma jeskaseda gij mona onnga mar okum ereneni iwa deika, beda iwa imot rot ahais gij ojomuja. Noba iwa isinsa ijginaga rot oida mar okum insa koma bera en oisouska Allah odou ejginaga rot fob.

⁴ Gij mona onnga memef men skoita iwa deika fob, beda memef memagot gu iwa rot oida mar okum ereneni mimif nomnaga si. Noba ebeibeyaif iwa ik rot oida mar okum insa koma bera ereneni mimif fob.

⁵ Erek koma jefeda didif dumbk Timotius skoita iwa jeska didif dudou efeneinei eteb rot iwa ojgomuja. Noba didif dudou os dijginaga rot oida iwa iroru Yesus rot ahais ojgomuja ros ei era gurei. Jeska didif dimeesa rot oida iwa insiri gu Bilis fogora inororu Yesus rot ahais deika guru. Beda mar onggga memef moftuftu gu iwa enja eseseifa, tina guru.

⁶ Erek koma, tina ebeibeyaif Timotius ongksons en skoita memef jah sif fob. Noba ofa emfesij gu didif rot oida iwa iroru Yesus rot tenten ros noba idou omokorema ojgomuja. Ofa emfesij gu didif rot oida iwa idou ousaha rot memef tein, noba iwa idou os ik memef deika tein morototuma erek memef modou os mek iwa deika tein.

⁷ Mar onggga Timotius emfesij gu memef osok gij iwa bera ereita modou efesi erek ahais gij mar onggga memfarur ojgomuja fob. Jefeda erek mar onggga okum ereneni memef tein, tina memef mog mejmeg gij ojgomu.

⁸ Ebeibeyaif memef meita modou ahais jeska iwa iroru Yesus rot tenten ojgomuja fob.

⁹ Jefeda memef mois oufamofa eteb gu Allah jeska iwa iroru Ofa rot ahais ojgomuja. Noba koma bera onggga ereita modou onggga efaga ouka eteb rot ojgomuja.

¹⁰ Gij orofosutut mona jera motu tein bera memef mom meiteij rot ahais gu Allah nou iwa. Memef mom meiteij erek koma jeskaseda memek iwa deika fogora moftuftu iwa gij mar ofoukou egema dokun deika onggga emeita idou ahais rot tein si.

¹¹ Memef mois gu mifmin mika Allah jera mifmin Tuhan Yesus Kristus jeskaseda Ofa omofij memef fogora meja skoita iwa deika.

¹² Noba memef mois gu Allah jeskaseda Ofa omofij iwa fogora idou omokorema odudu dokun deika ojgomuja tein. Koma morototuma erek memef onggamodou okora eteb rot iwa.

¹³ Noba memef mom meiteij gu Ofa jeskaseda gij mona onggamifmin Tuhan Yesus Kristus ongksons en jera efen rusnok onggaebsi komowa fob, beda iwa imot jah Allah odou rot idou onggaebsi komowaebeb tein si. Ofa onocunc iwa erek rusnok onggarerin mar onggaoska jinaga guru.

4¹ Edohuji, sis fob memef moftuftu iwa rot teinefa iwa ita iteij ah onggangkoska noba onggareita Allah odou eskeiramera rot fob. Noba onjoros monadeisef bera iwa intunggom koma rot iskusk fob. Tina ebeibeyaif memef mois rot modou efesi eteb oisouska Yesus ofoka gu iwa jeskaseda iwa itunggom mar erek insa koma odudu dokun deika ojgomuja.

² Jeska iwa ijginaga rot mar nomnaga onggamemef moftuftu oisouska Tuhan Yesus efen owesa efek gu iwa sis fob.

³ Allah ontunggom iwa irek rusnok onggarudou ebsi komowa. Noba Ofa ontunggom koma oisouska Ofa odou ejginaga rot fob. Noba Ofa odou os rot jeskaseda iwa inesiri morototuma guru.

⁴ Noba Ofa odou os jeskaseda iwa orofosut osnok egens egens yut joug isinsa yeyin ifaga fogora yeyin ifaga onggaebsi komowa ojgomuja.

⁵ Iwa inockahta rot rujager era runer enjgineg guru. Jeska rusnok onggarunougif gu Allah guru bera rita mar erek koma ojgomuja.

⁶ Jefeda didif dagot skoita iwa oida inotunggom mar onggaoska rot yeyin ihujir fogora inockahta rot rerin ruhoner tein erek koma jinaga guru. Memef

meyahehir joug iwa rot mar insa koma sis fob. Jeska Tuhan Allah omofra mar okum eteb keingg rusnok nomnaga onnga rita mar erek koma si.

⁷ Jeska Allah onotunggom rusnok jeskaseda risiri morototuma erek koma guru. Tina Ofa ontunggom rusnok jeskaseda riker gij riteij ah rot rudou onnga ebsi komowa ojgomu.

⁸ Jefeda idu onnga okoja mar onnga memef moftuftu insa koma fob, beda koma erek ofa okoja Allah oga ojgomu. Allah bera onnga eita Efena Ebsi gu rusnok.

⁹ Iwa idou omokorema ojgomu jeni erek Allah esinsa omftuftu gu iwa fob, jefeda enadaij nou memef moftuftu iwa rot mar insa koma deika guru.

¹⁰ Noba iwa idou okora rot yeyin ihujir nomnaga onnga ringker gij monuh Makedonia tein. Tina memef mois gu iwa jeskaseda idou okora rot rua odudu dokun deika ojgomuja.

¹¹ Iwa yuh idou efesi rot ahais ojgomu jeskaseda iker gij yeyin iteij ah kef rot eskeiramera ojgomuja. Noba iwa inoromohohuma jera rusnok enjgineg rerin mar onnga ebireira guru. Tina onnga oufamofa bera ifarur gij isinsa yeyin mar ojgomu. Noba idou eneskes rot mar onnga imfarur gij guru, tina ifarur rot ahais ojgomu. Memef momftuftu iwa rot mar insa koma sis fob.

¹² Jefeda iwa itunggom mar erek koma jeskaseda rusnok onnga runororu Yesus guru rumougif gu iwa rot, noba iwa inoisum gij rusnok enjgineg rot mar tein guru.

¹³ Edohuji, memef modou os jeskaseda iwa tein ijginaga rot osok gij rusnok Kristen onnga ranggos fob. Beda idou onoubsaha rot rua insa koma deika

guru. Jeska rusnok onnga runoisum gij Yesus guru bera rerin rudou osumsumu rot rusnok onnga ranggos fob. Jefeda rua ribisa rot rusnok insa koma ojgomuja.

¹⁴ Mimif mudou ororu rot tenten oida Yesus anggos noba efena ebah sons fob. Jefeda mimif mudou ororu rot tenten oida Allah omofra Kristen nomnaga onnga ranggos fob fogora rumororu Tuhan Yesus gij mona onnga Ofa ongksons en si.

¹⁵ Tuhan Yesus esinsa anggot rot mar insa koma sis fob. Jefeda ebeibeyaif memef magot gu iwa tein rot oida, rusnok onnga rifena ebah gij mona onnga Yesus Kristus ongksons en fob bera runokag rot rua onnga ranggos fob guru. Tina rua onnga ranggos fob bera rumokag rot mimif ojgomu.

¹⁶ Gij mona insa koma malaikat egens onnga ofoka aksa bera emagerir mar rot oga eteb. Beda rusnok rimeg mar egens erek manghi mei oga. Beda Tuhan omojuj jeska mebaga gu mebif. Beda rusnok onnga ragos gij mona onnga rua rururu Yesus fob bera rimedebecki jeska ranggos rot sismeni.

¹⁷ Beda mimif onnga mifena ebah ros gij mona insa koma bera mumosok jah mebaga fogora mimif nomnaga mumorodosu Yesus gij mocgoj ofog tein. Beda mimif miker morototuma jera Tuhan nou mona onnga ah aibin ojgomuja.

¹⁸ Erek koma jefeda iwa ira oga insa kef iremeisisi joug moguma ojgomu.

5¹ Edohuji, iwa isinsa ijginaga rot mar insa koma nomnaga fob. Iwa ijginaga rot oida mona insa koma bera emen si, noba rot mar nomnaga onnga omorogna keingg rusnok gij mona insa koma fob.

Jefeda enadaij nou memef moftufts iwa gij surat egens kef rot mar insa koma deika guru.

²Jeska iwa ijginaga rot oida Yesus omorogna keingg rusnok nomnaga ebeirens erek osnok egens onnga oukoreka mar orogna keingg rusnok ebeirens gij rerin mod.

³Gij mona onnga rusnok ragot oida, "Mimif miker rot ongkoskamoka ojgomu. Mar okum egema tein enecirej mimif guru," beda ainsa koma tein mar okum eteb emesiri keingg rua si. Erek ojaga egens onnga efaga okum noba ainsa koma tein etei ejmeg okora rot efesa, beda erek koma tein, rusnok rimek mar okum esiri keingg rua ebeirens. Noba rua runosuwa jeska mar insa koma jinaga guru.

⁴Tina iwa inerek rusnok onnga ringker gij motkobah ros guru. Jefeda iwa inofos graga gij mona onnga Yesus emen guru erek rusnok onnga rufos graga gij mona onnga osnok egens oira gij rerin mod jeskaseda rukoreka mar onnga rerin.

⁵Iwa nomnaga bera irek rusnok onnga ringker gij eisa fob. Iwa ineker gij motkobah deika guru. Iwa yuira gij Yesus efen eisa fob.

⁶Erek koma jefeda enadaij nou mimif mita mar erek rusnok onnga runot joug risinsa rot iskusk guru. Mimif mineita mar erek rusnok onnga ribirfaga erebibe rot mofut efei tein guru. Tina mimif mut joug mudou efesi rot ahais noba musujohu rot koisoisa jeskaseda minsejah nou mona onnga Yesus Kristus omoksons en ojgomu.

⁷Nou motu bera rusnok rahca noba rij mofut efei onjoros ribirfaga erebibe rot ojgomu.

⁸Tina mimif bera muiira gij eisa fob. Jefeda mimif musujohu rot koisoisa ojgomu fog. Erek tentara

egens orka efen monska ofos onnga ontumba jeskaseda ot joug esinsa, beda mimif tein muroru Allah oga rot tenten noba mudou omokorema ojgomu, jeska koma bera onnga ot joug mimif. Noba erek tentara egens oisum gij efen topi besi onnga ergi joug ebirfaga, beda mimif tein muisum gij Allah ojgomu jeskaseda Ofa emeita eiteij ah onnga efeinah gu mimif.

⁹ Allah onocunc mimif jeskaseda ofra mar okum keingg mimif guru. Tina Ofa oncunc mimif jeskaseda misma eiteij ah onnga efeinah oisouska Yesus Kristus.

¹⁰ Yesus bera agos nou mimif jeskaseda gij mona onnga Ofa onksons en fob, beda mimif mimesma eiteij ah onnga efeinah fogora miker morototuma jera Ofa. Koma rot rua onnga ranggos tein noba rot rua onnga rifena ebah ros tein gij mona insa koma.

¹¹ Noba Ofa efen rusnok nomnaga onnga rifena ebah era ranggos fob bera rimesma mar insa koma gij mona onnga Ofa onksons en fob si.

¹² Edohuji, memef modou os mois gu iwa jeskaseda iwa yugif gu rusnok onnga rimfarur rot ahais gu ifekesa noba onnga ruftuftu iwa jeskaseda iroru Yesus rot tenten.

¹³ Yugif gu rua noba idou okora eteb rot rua jeska rua rimfarur gij mar onnga erek ofoufem nou iwa. Noba iwa iker rot idou onnga eskeiramera morototuma ojgomu.

¹⁴ Edohuji, memef mois gu iwa jeskaseda iwa yagot joug rusnok onnga rudou eskes rot mar ojgomu. Noba isisi joug rusnok onnga runowesa efek gij mar guru. Noba yuftuftu rua onnga runoruru Yesus rot ahais enesi jeskaseda runotunggom mar onnga oska guru. Noba yuin keingg idou efesi rot rusnok

nomnaga fogora ita mar rot idou onnga eriagamaga ojgomu.

¹⁵ Noba iwa inesesa mar okum sons skoita rusnok onnga rita mar okum gu iwa jinaga tein guru. Tina ita mar onnga oufamofa moguma ojgomuja.

¹⁶ Iwa ita idou onnga erirei gij mar nomnaga ojgomuja. Noba yum iteij gu Allah ojgomuja tein. Beda yuis oufamofa eteb gu Ofa rot mar nomnaga. Allah odou os jeskaseda rusnok nomnaga onnga rudou egens jera Yesus rita mar erek insa koma ojgomuja.

¹⁷ (5:16)

¹⁸ (5:16)

¹⁹ Iwa ineretei rot mar onnga Efena Ebsi Allah otunggom gij rusnok rudou efesi guru.

²⁰ Noba ineita idou onnga oska rot mar onnga rusnok enjgineg rimfesij oisouska mar onnga Allah oncunc gu rua gij rudou efesi tein guru.

²¹ Iwa ig rot mar insa koma ojgomu, fogora iwa imek rot oida mar koma bera erek tenten era gurei. Beda iroru mar onnga tenten ojgomu.

²² Noba iwa ibes ifaga jeska mar onnga oska ojgomuja.

²³ Memef mois gu Allah, onnga eita eskeiramera gu rusnok jeskaseda Ofa ofij iwa fogora imeita mar nomnaga rot idou onnga ebsi komowa. Memef mois gu Ofa jeskaseda Ofa omot joug yeyin idou efesi jera ifaga tein fogora Ofa omocunc iwa erek rusnok onnga rerin mar onnga oska oskiyai tein guru gij mona onnga Yesus Kristus ongksons en fob.

²⁴ Allah bera onnga enjeka iwa erek efen rusnok fob. Jefeda Ofa tein omofij iwa gij mar insa koma

si. Jeska Ofa omotunggom mar nomnaga onnga Ofa anggen gu rusnok fob si.

²⁵ Memef mois gu iwa jeskaseda yum iteij nou memef tein.

²⁶ Noba yagei yitma morototuma erek irocunc rot oida iwa imokosama oisouska Yesus Kristus fob.

²⁷ Didif duis gu iwa oisouska Tuhan ofoka jeskaseda iwa ifesij surat egens kef gu rusnok nomnaga onnga ruroru Yesus jah suma tein.

²⁸ Didif duis gu mifmin Tuhan Yesus Kristus jeskaseda Ofa eita oufamofa eteb gu iwa ojgomuja. Ainsoma.

2 Tesalonika

1 ¹ Didif Paulus jera dedin edohujirga Silas gonu Timotius bera monogu surat egens kef gu iwa onnga iroru Yesus Kristus Kristus gij kota Tesalonika. Iwa bera injerek mifmin mika Allah jera mifmin Tuhan Yesus efen rusnok fob.

² Memef mois gu mifmin mika Allah jera Tuhan Yesus Kristus jeskaseda Ofa ocunc efen odou onnga oufamofa eteb gu iwa, noba jeskaseda iwa isma iteij ah onnga eskeiramera ojgomuja.

³ Edohuji, memef mesitit mar gu Allah rot iwa ojgomuja. Memef modou os motunggom erek koma jeska memef mek, tina iwa iroru Yesus Kristus rot idou onnga ahais odudu dokun deika ojgomuja. Noba iwa idou omokorema rot tenten odudu deika tein ojgomuja fob.

⁴ Jefeda gij mona onnga memef monjogog rusnok onnga rururu Yesus gij monuh enjineg tein, beda memef mofra yeyin ifoka erek oufamofa skoita rusnok insa koma. Memef magot gu rua oida, "Erek rusnok rita mar onnga ofogog skoita rua onnga Tesalonika fogora mar okum ereneni rua ojgomuja, tina rua rut rot ahais gij mar insa koma noba rua rururu Yesus rot tenten ojgomuja."

⁵ Mar insa koma bera orocunc gu mimif nomnaga rot oida mar onnga Allah oga ojga rot rusnok bera erek tenten ojgomu. Jefeda Ofa omoga ojga rot oida iwa imoira jera rusnok onnga Ofa ofoka ereij keingg si. Jeska iwa yut rot ahais gij mar onnga ereneni iwa ojgomuja.

⁶ Mar nomnaga onnga Allah otunggom skoita rusnok bera erek edeider ojgomu. Beda ofa emesesa mar onnga okum sons skoita rusnok onnga rita mar onnga okum skoita iwa fob si.

⁷ Noba ofa omofij iwa gij mar okum onnga ereneni iwa fogora imeker keingg ifonskos rot si. Noba Ofa omofij memef tein gij mona onnga Tuhan Yesus ongksons jeska mebaga gij mah onnga eisa eteb jera efen malaikat-malaikat onnga efen owesa efek eteb tein.

⁸ Beda Ofa omofra mar okum eteb keingg rusnok nomnaga onnga runougif gu Allah guru jera rusnok nomnaga onnga runoruru efen oga onnga oufamofa osok gij mifmin Tuhan Yesus Kristus guru tein si.

⁹ Rua insa koma rimesma mar okum eteb fogora rimeseiseifa rot gij mona onnga ah aibin ojgomuja. Tuhan emekemeji rua jeska Ofa rot ahais fogora rinek Ofa efen ofoka aksa jera efen owesa efek eteb deika guru.

¹⁰ Ofa omotunggom mar insa koma gij mona onnga Tuhan Yesus ongksons en fob. Gij mona insa koma Ofa efen rusnok onnga rudou ebsi komowa omofra efen ofoka erek aksa eteb. Noba rua nomnaga onnga rururu efen oga rot tenten fob bera rudou emeskeira eteb rot Ofa si. Noba iwa onnga kota Tesalonika bera rimeita idou efesi onnga eskeira morototuma gij mona insa koma tein. Jeska iwa iroun mar onnga memef moftuftu gu iwa sis fob.

¹¹ Erek koma jefeda memef mom meiteij gu Allah nou iwa ojgomuja jeskaseda Ofa omocunc iwa erek efen rusnok onnga rururu efen oga rot tenten fob. Jeska Ofa bera onnga enjeka iwa jeskaseda ija erek efen rusnok fob. Beda oisouska Ofa efen owesa efek

bera Ofa omofij iwa gij mar nomnaga onnga iwa itunggom oisouska idou onnga ororu Ofa rot tenten fob.

¹² Memef mom meiteij rot mar erek insa koma jeskaseda gij mona onnga rusnok enjgineg rik mar onnga oufamofa onnga iwa intunggom fob, beda rua rumofra Tuhan Yesus ofoka erek aksa eteb rot. Noba koma bera emecira jeni mifmin Allah jera Tuhan Yesus Kristus oncunc odou onnga oufamofa skoita iwa fob.

2¹ Edohuji, memef modou os magot mar gu iwa osok gij mona onnga mifmin Tuhan Yesus Kristus omoksons en deika. Gij mona insa koma bera Allah omohoturu mimif nomnaga jeskaseda miker morototuma jera Ofa.

² Tina rusnok enjgineg ranggot rourou oida Yesus Kristus bera ongxons en fob ovgomu. Rua ragot oida Allah oncunc rot mar insa koma gu rua gij rudou efesi fob. Noba rineya tein ragot oida memef bera monggu rot mar insa koma tein gij mefmen surat egens fob. Tina koma bera tenten guru. Jefeda iwa idou enemeesa rot mar onnga rucuwei rot insa koma guru.

³ Gij mona onnga rusnok rudou os rurokrusa iwa osok gij mar insa koma, beda iwa inororu rerin ruga insa koma jinaga guru. Jeska mar ofoka egeka bera emecira rot sismeni fog, beda Yesus Kristus omoksons en si. Mar ofoka egeka koma bera erek kef: Rusnok rufoukou rumokoja Allah noba rudou eskes rot efen oga. Beda osnok egens onnga eretei rot Allah oga nomnaga omorogna si. Sis fob Allah ensejah nou eij ofa gij mahmei meren.

⁴Ofa emeretei rot mar nomnaga onggga Allah ontunggom fob. Noba Ofa emeretei rot mar nomnaga onggga rusnok runtunggom gij mona onggga rua rugif gu Allah tein. Beda ofa omofra esinsa efen ofoka erek aksa ekirsa jeska Allah ofoka fogora ofa omoira gij Mod Allah beda ocunc esinsa erek Allah ojgomu.

⁵Iwa ijginaga rot fob oida didif dimfesij rot mar insa koma gu iwa gij mona onggga didif dingker jera iwa ros.

⁶Noba ebeibeyaif iwa ijginaga rot mar onggga eragou joug osnok egens onggga ofogog insa koma jeskaseda onorogna enesi. Mar koma eragou joug ofa jeskaseda ofa orogna gij mona onggga Allah oga eris rot ojgomu.

⁷Erek koma tina Bilis, onggga orokrusa rusnok erek wuswus jeskaseda rudou okoja Allah, bera otunggom mar koma ojgomuja fob. Tina Ofa onggga eragou joug osnok egens onggga ofogog insa koma bera emagei ofa onjoros mona onggga Allah oga eris rot. Beda Ofa omosuwa osnok egens koma

⁸fogora rusnok rimek ofa si. Noba gij mona onggga Tuhan Yesus ongksons en rot owesa efek eteb fob, beda Ofa emera awesi efeni orofc osnok onggga ofogog egens insa koma fogora ofa emesiri gu Yesus ojgomu. Beda ofa emeseiseifa ojgomuja.

⁹Erek koma, tina sismeni bera osnok egens onggga ofogog insa koma omorogna rot owesa efek eteb onggga ofa esma jeska Bilis. Beda ofa omocunc rot mar onswos ofoukou onggga orokrusa rusnok rufoukou fogora rudou ousaha eteb rot ofa noba rumororu ofa tein.

¹⁰Ofa emera mar onggga ofogog fogora orokrusa rusnok onggga rimeja jah mahmei meren ojgomu. Rua

rimeseiseifa jeska rua rukoja Allah oga onggga tenten, noba runodou os jeskaseda Allah oskotu rua jeska rerin mar onggga oska guru.

¹¹ Jefeda Allah omobk mar egens gu rua gij rudou efesi jeskaseda rua ruroru mar onggga osnok egens insa koma ocuwei rot ojgomu.

¹² Beda rusnok nomnaga onggga rungkoja Allah oga onggga tenten noba onggga rudou os ruroru mar onggga ofogog insa koma bera rimesma mar okum eteb jeska Allah si.

¹³ Edohuji onggga Allah odou okora rot, orofosut mona bera memef mois oufamofa eteb gu Allah rot iwa. Jeska gij mona onggga sismeni bera Allah ocunc iwa jeskaseda oskotu iwa jeska yeyin mar onggga oska. Noba Ofa ontunggom koma oisouska Efena Ebsi onggga eita idou onggga ebsi komowa fob. Noba mar insa koma nomnaga en oisouska idou onggga ororu efen oga onggga tenten fob.

¹⁴ Noba ofa enjeka iwa jeskaseda isma mar insa koma oisouska mar onggga memef moftuftu gu iwa sis fob. Ofa ontunggom mar koma jeskaseda iwa tein imesma ifoka onggga aksa eteb morototuma jera Yesus Kristus.

¹⁵ Erek koma jefeda edohuji, iwa yut rot ahais gij mar nomnaga onggga memef momftuftu gu iwa jera mar nomnaga onggga memef monggu gij surat-surat gu iwa ojgomuja.

¹⁶ Memef mom meiteij gu mifmin Tuhan Yesus Kristus jera mifmin mika Allah, onggga odou okora eteb rot mimif ni, onggga eisisi joug mimif ni, noba onggga ofij mimif oisouska odou onggga oufamofa rot mimif ni jeskaseda muisum gij ofa rot mona onggga ah aibin ojgomuja.

¹⁷ Memef mom meiteij gu Ofa jeskaseda Ofa emeisisi joug iwa gij idou efesi noba eita owesa efek gu iwa fogora imeita mar onnga oufamofa noba imefesij rot mar onnga oufamofa tein ojgomuja.

3¹ Edohuji, nou onnga memef mogu mar rot omoisa gij surat egens kef bera memef mois gu iwa jeskaseda iwa yum iteij gu Allah nou memef tein. Iwa yum iteij gu Ofa jeskaseda Tuhan oga onnga memef moftuftu rot bera omorok mokcin rusnok rufoukou egema dokun deika ojgomuja. Noba yum iteij jeskaseda rusnok onnga ringg rot Tuhan oga insa koma rumougif gu oga koma morototuma erek iwa yugif gu gij mona onnga sismeni fob.

² Noba iwa yum iteij gu Tuhan jeskaseda Ofa omoskotu memef jeska rusnok onnga rutunggom mar onnga ofogog skoita memef tein. Jeska rusnok rineya onnga runororu Allah oga rot tenten jinaga guru.

³ Erek koma tina, Tuhan emeita mar nomnaga onnga Ofa anggen rot sis fob si. Noba Ofa emeita owesa efek gu iwa fogora omot joug iwa jeska Bilis onnga ofogog eteb si.

⁴ Memef moisum gij Tuhan rot oida iwa bera incira gij mar onnga memef moftuftu gu iwa sis fob. Noba iwa imecira gij mar insa koma nou mona kahma tein si.

⁵ Memef mom meiteij gu Tuhan jeskaseda Ofa omofij iwa fogora idou emebriyi gij rot teinefa Ofa odou okora eteb rot iwa. Noba memef mom meiteij gu Ofa jeskaseda iwa imeita idou ahais gij mar okum onnga ereneni iwa morototuma erek Yesus Kristus eita odou ahais gij mar onnga ereneni Ofa sis fob.

⁶ Edohuji, memef magot rot gu iwa oisouska Tuhan Yesus Kristus ofoka oida iwa ibes efaga jeska yeyin ihujir onggara rufora ogug joug rerin mar onggara rimfarur rot, noba onggara runoruru mar onggara memef momftuftu gu iwa sis fob guru.

⁷ Jeska iwa isinsa ijginaga rot teinefa iwa inroru mar nomnaga onggara memef moncunc gu iwa sis fob ovgomu. Gij mona insa koma bera memef monofora ogug rot askesi mengker gu ifekesa ros guru.

⁸ Memef menet rusnok enjgineg rerin maat rourou guru. Tina memef mengk maat insa koma jeska rua fogora memet. Noba memef mog mejmeg noba mefarur orofosut mona jera motu jeskaseda monoisum gij iwa rot maat jera meisoufa egema tein guru. Jeska memef modou os mofij iwa gij mar insa koma ovgomu.

⁹ Memef meneita mar erek insa koma jeska enadaij nou memef moisum gij iwa rot mar insa koma guru. Jeska adaij nou memef mois rot mar koma gu iwa ovgomu. Tina memef meita mar erek insa koma jeskaseda morocunc gu iwa rot teinefa rusnok rifarur rot iskusk ovgomu.

¹⁰ Jeska gij mona onggara memef mengker jera iwa ros, bera memef magot rot gu iwa oida, "Erek osnok egens ofora ogug fogora enefarur rot mar onggara ofa ocosu rot guru, beda iwa ineita maat gu ofa tein guru."

¹¹ Memef modou os magot rot mar ofoka egens insa koma gu iwa jeska memef meg rot oida rineya jeska iwa bera rumfara ogug joug mar onggara rimfarur gij ovgomuja. Mar egens onggara rua rita rot iskusk bera ruh rufonoknok gij rusnok enjgineg ovgomu. Tina koma bera onoufa guru.

¹² Memef mois gu rua noba magot rot oisouska Tuhan Yesus Kristus ofoka jeskasada rua insa koma rineita mar erek koma deika guru, tina rifarur rot iskusk nou maat onnga rimet ojgomu.

¹³ Noba memef mois gu iwa onnga iroru Yesus oga rot tenten fob jeskasada iwa ineita idou onnga eskes rot mar onnga oufamofa ojgomu, tina iroru mar insa koma rot ahais ojgomuja.

¹⁴ Noba iwa inoromohohuma jera rusnok onnga rukoja mar onnga memef memfesij rot gij surat kef ojgomu guru. Iwa ita mar erek insa koma jeskasada mojenir rot mar onnga runtunggom fob.

¹⁵ Noba iwa inocunc rua erek mesa onnga ofogog guru. Tina iyahehir joug rua erek yeyin ihujir onnga ruroru Yesus fob tein ojgomu.

¹⁶ Tuhan Allah bera onnga eita eiteij ah onnga eskeiramera gu rusnok nomnaga. Noba memef mois gu Ofa jeskasada Ofa emeita eiteij ah onnga eskeiramera gu iwa ojgomuja, noba jeskasada Ofa emeker joug iwa tein ojgomuja.

¹⁷ Didif Paulus disinsa dugu mar insa kef gu iwa. Noba didif dugu mar erek kef gij surat nomnaga onnga didif disa skoita rusnok fob. Koma bera ditma efeb insa kef ojgomu.

¹⁸ Memef mom meiteij gu mifmin Tuhan Yesus Kristus jeskasada Ofa ocunc efen odou onnga oufamofa eteb gu iwa nomnaga. Ainsoma.

1 Timotius

1 ¹ Didif Paulus bera dunogu surat egens kef. Didif direk rasul egens onnga dufij Yesus Kristus. Didif dijerek rasul egens jeska Allah, onnga eita eiteij ah onnga efeinah gu mimif, noba Yesus Kristus onnga mimif muisum gij, bera oncunc didif erek koma. Didif dugu surat egens kef gu bua Timotius onnga dijeka erek dedin edesa, jeska bua buroru Yesus Kristus rot tenten fob. Didif duis gu mifmin mika Allah jera Yesus Kristus onnga erek mifmin Tuhan, jeskaseda Ofa eita oufamofa eteb gu bua, noba jeskaseda ofa odou okora rot bua noba eita eiteij ah onnga eskeiramera eteb gu bua ojgomuja.

²(1:1)

³ Timotius, didif dudou os rot oida bua biker gij kota Efesus erek didif duis gu bua sis mona onnga dingker gij monuh Makedonia ros. Didif dagot erek koma jeska rusnok rineya gij kota Efesus bera ruftuflu mar onnga erek tenten guru. Bua biker gij kota koma jeskaseda bagot joug rua osok gij mar insa koma ojgomu.

⁴ Bagot joug rua jeskaseda rua rinefesij mar ofoukou osok gij rerin mahteyi ojgomuja tein, era jeskaseda rua rinedibdib rot rerin rufou ebiedi tein ojgomuja guru. Jeska mar koma bera orotunggom rusnok rudou erebibeit rot ojgomu, noba koma onofij rua jeskaseda riker joug rusnok enjgineg tein onnga ruroru Allah jinaga guru.

⁵ Didif dinagot rot mar erek kef jeskaseda rusnok insa koma rita rudou onnga ebsi komowa noba

eskeira fogora rutunggom mar onggga erek tenten ojomu. Beda rua rumororu Yesus oga rot tenten tein noba rua rudou omokorema tein.

⁶Tina rineya jeska rua bera ringkikif jeska mar onggga oufamofa insa koma fob. Jefeda mar onggga rua riflesij moguma rot bera onofij rua jinaga guru.

⁷Rua rutunggom mar erek insa koma jeska rua rudou os rija erek ebirfager onggga ruftuftu rot hukum Musa gu rusnok Mod Ari. Tina rua risinsa rudou enebriyi gij mar onggga rua ruftuftu rot guru. Noba rua rusujohu rot oida rudou efesis gij mar insa koma fob, tina guru. Jeska rua rudou eineina gij mar onggga rua risinsa ranggot rot gu rusnok insa koma ojomu.

⁸Erek koma, tina mimif mijjinaga rot oida hukum onggga Musa anggot rot jeska Allah bera ongkoska rot rusnok onggga ruroru hukum insa koma rot tenten ojomu. Tina rusnok rineya bera runoftuftu osok gij hukum insa koma rot tenten guru.

⁹Mimif tein mijjinaga rot oida Allah eneita hukum insa koma jeskaseda ofra mar okum keingg rusnok onggga rudou ebsi komowa guru. Tina Ofa eita hukum koma jeskaseda ofra mar okum keingg rusnok onggga rutunggom mar onggga oska onggga ekirsa rot hukum Musa fogora rukoja Allah tein. Rua runougif gu Allah guru, noba rua rita mar onggga oska ojomuja. Jefeda Allah omofra mar okum keingg rua onggga runororu mar onggga erek Ofa odou os rot guru. Rua runot joug rudou efesi rot Allah oga guru, tina rua ragob rerin riker jera riser tein. Noba rua ragob rusnok enjgineg tein. Jefeda rua rimesma mar okum jeska Allah si.

¹⁰Ofa omofra mar okum keingg rusnok onggga risiri morototuma ni, runer onggga raha rerin ruhoner jah noba rudou ockahtah rot runer enjgineg ojomu ni,

rua onnga ragei rusnok rourou jeskaseda ruhu rua gu rusnok enjgineg ni, rusnok onnga ruhurmei mar rourou gij rusnok egema ni, rusnok onnga rucuwei mar gij rusnok enjgineg ni, jera rusnok enjgineg tein onnga runtunggom mar onnga ekirsa rot hukum Musa tein si.

¹¹ Mar onnga didif duftuftu insa koma bera en jeska Allah oga onnga oufamofa, noba mimif nomnaga misitit Ofa rot. Noba Ofa oncunc didif jeskaseda dijefesij rot efen oga insa koma gu rusnok enjgineg fob.

¹² Didif duis oufamofa eteb gu Tuhan Yesus kristus, jeska Ofa odou eredi didif fogora omfra didif jeskaseda duftuftu mar osok gij efen ofoka gu rusnok enjgineg. Ofa bera eita owesa efek gu didif fogora didif duftuftu mar gu rusnok erek koma.

¹³ Sis fob bera didif danggot mar onnga oska eteb rot Yesus. Gij mona insa koma didif dufra mar okum keingg rusnok onnga ruroru Ofa ojgomuja. Noba dudou efesi oska rot Yesus jera rusnok nomnaga onnga ruroru Ofa ojgomu. Erek koma tina Yesus ocunc efen odou onnga okora eteb rot didif, jeska didif dunoruru Ofa gij mona insa koma enesi. Jefeda didif dinejginaga rot oida mar onnga didif duntunggom insa koma bera erek onoska enesi.

¹⁴ Tina Tuhan odou okora eteb rot didif noba ofij didif. Jefeda ebeibeyaif didif duroru Ofa noba dudou okora rot Ofa eteb.

¹⁵ Yesus Kristus ojuj jah mebif jeskaseda osuwa rusnok jeska rerin mar onnga oska. Koma bera tenten ojgomu, jefeda rusnok ruroru mar koma ojgomu. Jeska sis fob didif tein bera dita mar onnga oska eteb ekirsa jeska rusnok nomnaga.

¹⁶ Erek koma tina Yesus odou okora eteb rot didif. Noba Ofa eita odou erek koma jeskaseda orocunc gu rusnok nomnaga oida Ofa oin keingg odou efesi noba enaha mar okum ebeirens keingg rusnok onnga rutunggom mar onnga oska enesi. Sis fob didif dutunggom mar onnga oska ekirsa jeska rusnok nomnaga. Tina Ofa oh odou onnga ongnoska rot didif jeskaseda rusnok enjgineg tein rik beda rikikif jeska rerin mar onnga oska fogora rururu Ofa tein. Beda rua rimesma eiteij ah onnga efeinah tein si.

¹⁷ Mimif muis oufamofa eteb gu mifmin mika Allah onnga ofoka ereij keingg rusnok erek raja egens nou mona onnga ah aibin ojgomuja. Ofa bera eker ah aibin. Noba erek minek Ofa gu miteij tein guru, tina Ofa bera Allah onnga egensmes ojgomu, noba mimif mugif gu Ofa noba misitit Ofa rot gij mona onnga ah aibin ojgomuja.

¹⁸ Timotius, didif dijeka bua morototuma erek dedin edesa egens. Didif dudou os disisi keingg bua rot mar onnga ebirfager Mod Ari ranggot jeska Allah osok gij bua sis fob. Jefeda bua tein buftuftu rusnok insa koma rot mar onnga dinefesij gu bua gij surat kef. Noba erek tentara egens onnga ot rot ahais fogora agob mesa, beda bua tein but rot ahais gij mar onnga ereneni bua ojgomu.

¹⁹ Gij mona onnga bua buftuftu rot Allah oga erek insa koma, beda bua bisinsa tein bururu mar koma rot tenten ojgomu. Bua butunggom mar onnga bua bisinsa tein bijginaga rot onnga erek tenten ojgomu. Jeska rusnok rineya bera rungkoja rot mar insa koma fogora runoruru mar onnga tenten deika guru. Jeska rua rita mar insa koma, jefeda mar okum emah keingg rua rot si.

²⁰ Gosnok gegeka jeska rusnok insa koma bera gofoka Himeneus gonu Aleksander. Goga gagot mar onga oska skoita Allah ojgomuja. Jefeda didif dungkoja goga noba daha goga gu Bilis ojgomu. Didif duntunggom erek koma jeskaseda gij mona onga Bilis eita ofogog skoita goga, beda goga gemek oida mar onga gontunggom insa koma bera oska.

2¹ Timotius, sismeni bera didif dui gu rusnok onga Kristen jeskaseda rua rum riteij gu Allah nou rusnok nomnaga. Rua rum riteij gu Allah jeskaseda Ofa eita meidu onga erek ofoufemfem rot rua fogora ofij rua. Noba rua tein ruis oufamofa eteb rot rusnok insa koma gu Allah ojgomuja

² Rua rum riteij gu Allah rot rerin raja-raja jera rerin ebirfager nomnaga tein. Rua rutunggom mar erek koma jeskaseda adaj nou mimif miker rot ongkoskamoka. Beda mimif tein muroru Allah rot tenten noba mifarur gij mar onga erek ongkoska ojgomu.

³ Mar insa koma bera erek oufa ojgomu noba Allah, onga oskotu rusnok jeska rerin mar onga oska, Ofa tein odou eskeira rot.

⁴ Jeska Allah odou os oida rusnok nomnaga tein risma eiteij ah onga efeinah. Ofa tein odou os rot jeskaseda rusnok nomnaga rijginaga rot mar onga tenten.

⁵ Jeska mifmin Allah egens ojgomu. Noba Ofa bera rusnok nomnaga rerin Allah tein. Noba osnok egens onga ot deismos rot rusnok skoita Allah bera erek egensmes ojgomu. Ofa bera Yesus Kristus.

⁶ Ofa erek osnok egens giskini onga aha esinsa gu rusnok onga rufogog fogora ranggob Ofa fob. Ofa otunggom mar insa koma jeskaseda osuwa rusnok

nomnaga jeska rerin mar onnga oska. Koma jeni erek Allah oncunc rot gu rusnok gij mona onnga Ofa anggot rot sis fob. Jeska gij mona onnga sis fob bera Ofa anggot eimofoj rot mona onnga Yesus Kristus emen jeskaseda eita eiteij ah onnga efeinah gu rusnok.

⁷ Noba Allah oncunc didif erek efen rasul egens onnga duftuftu rot mar insa koma gu rusnok onnga Yahudi guru. Didif duftuftu rua osok gij mar onnga tenten onnga rumororu. Mar onnga didif dinagot insa kef bera tenten ojgomu. Didif dunorokrusa rusnok oskiyai tein guru.

⁸ Didif dudou os jeskaseda runer nomnaga rum riteij gu Allah. Noba gij mona onnga rua rum riteij, beda didif dudou os jeskaseda rua rirek rusnok onnga runotunggom mar onnga oska oskiyai tein guru. Noba rua rinejekjeka rudou efesi osok gij mar onnga rua rum riteij rot insa koma gu Allah guru.

⁹ Didif dagot gu rujager rot oida rua rinesitit risinsa rifaga doska guru. Koma bera, rua rinergi meisoufa onnga ebahetkik fogora eirir, era rinesa merfej ofoukou erek insa koma tein guru. Jeska koma bera erek rua rufra risinsa rufoka erek ekirsa jeska rujager enjineg ojgomu. Rua tein rinergi meisoufa onnga erek rinerec runer rudou erek koma tein guru. Rua rirgi meisoufa onnga iskusk erek giskini ojgomu. Noba rua tein rusujohu rot mar gij rudou efesi onnga erek iskorej ojgomu.

¹⁰ Rujager onnga ongnoska bera rirek rua onnga rudou os rut joug rifaga rot ongnoska. Jeska koma bera onnga orocunc rot oida rua ruroru Allah oga rot tenten fob.

¹¹ Didif dagot gu rujager rot oida, gij mona onnga ebirfager Mod Ari ruftuftu mar, era rerin rahiner ruftuftu mar, beda rua rugif nou ojomu noba rinagot mar esesa sons tein guru.

¹² Didif tein dunodou os rot oida rujager ruftuftu runer gij Mod Ari efesi tein guru. Noba rua rineisera jeska runer rot mar onnga ranggot tein guru. Rua rig mar onnga runer ruftuftu rot ojomu.

¹³ Didif dagot mar erek koma jeska Allah otunggom Adam rot sismeni fog, beda Ofa otunggom efen mohona Hawa otoij ofa.

¹⁴ Noba Bilis orokrusa Hawa rot sismeni. Jefeda Hawa bera onnga engkirsas mar onnga Allah anggot joug rot sismeni fog.

¹⁵ Erek koma tina, erek rujager rut joug rerin riser rot iskusk ojomu ni, noba ruroru Allah rot tenten ni, jera rita rudou onnga okora rot rusnok enjgineg ni, noba ribes rifaga jeska mar onnga oska ni, rua rita rudou onnga erek ebsi komowa tein ni, beda rua rimesma riteij ah onnga efeinah si.

3¹ Mar onnga tenten bera erek kef: Erek osnok egens odou os ejerek ebirfaga egens nou Mod Ari, beda koma bera oufamofa ojomu.

² Idu onnga odou os rot mar insa koma, beda ofa eita mar gij efen eiteij ah kef onnga erek ongnoska ojomu. Ofa oskotu mohona egens ojomu. Noba ofa onosujohu rot mar onnga oska guru. Ofa oin keingg odou efesi rot mar onnga ereneni ofa ojomuja. Ofa odou efesis gij mar onnga ofa oftuftu gu rusnok enjgineg tein. Noba rusnok enjgineg rugif gu ofa rot efen eita mar. Noba ofa oroun rusnok rot odou onnga oufamofa skoita rua tein ojomu.

³ Ofa ebirfaga enerebibeibe rot mofut efei tein guru. Noba ofa onodou os rimagobuma jera rusnok enjineg tein guru. Tina onnga tenten bera ofa eita odou eriagamaga eteb, noba onoga omosokuma jera rusnok ebireira tein guru. Ofa tein enagei mareibra jera odou ojgomuja guru.

⁴ Ofa oftufu efen mod etma rot ongnoska ojgomuja. Noba ofa tein oftufu efen efeser rot tenten fogora rua rugif gu ofa tein.

⁵ Jeska erek osnok egens onoftufu efen mod etma rot iskusk guru, beda enadaij nou ofa ejerek ebirfaga egens gij Mod Ari guru.

⁶ Noba erek osnok egens onnga ororu Yesus fob, tina ofa ororu Yesus erek efeinah ros, beda iwa inofra ofa erek ebirfaga Mod Ari egens enesi. Jeska erek iwa yumfra ofa erek koma fob, beda ofa emesitit esinsa efaga rot ojgomu. Noba gij mona onnga dektek guru, beda ofa emesiri gij mar onnga oska sons si. Beda Allah omofra mar okum keingg ofa morototuma erek ofa omfra mar okum keingg malaikat egens onnga ofoka Bilis sis fob. Malaikat egens insa koma esitit esinsa efaga rot eteb tein.

⁷ Erek koma tein, idu onnga eita mar erek ebirfaga egens nou Mod Ari, beda ofa ot joug esinsa efen ofoka rot ongnoskamoka ojgomu, jeskaseda rusnok onnga runoruru Yesus guru rucunc ofa erek osnok egens onnga oufamofa. Erek ofa onot joug esinsa ofoka erek koma guru, beda rusnok insa koma ruga omoruh Yesus oga. Jefeda ofa emesiri gij Bilis etma fogora emeita mar onnga Bilis odou os rot ojgomu.

⁸ Rusnok onnga rufij ebirfager Mod Ari bera rut joug rufoka erek ongnoskamoka tein ojgomu. Rua rita mar rot rudou onnga ocosu efei ahta jera rudou onnga

eriaga tein, noba ribirfaga enerebibeï rot mofut efei tein guru. Noba rudou eneftirir keingg mareibra ofoukou tein guru.

⁹Rua tein ragei mar koma onnga rusnok Kristen nomnaga ruroru ojgomu, onnga ah jejema sis fob, rot ahais ojgomuja.

¹⁰Gij mona onnga rusnok runofra rua jeskaseda rufij ebirfager Mod Ari enesi, beda rusnok riajga joug rua rerin rita mar erek teinefa sismeni fog. Noba erek rerin rita mar onnga onkoska ojgomu, beda rucunc rua erek rusnok onnga rumfij ebirfager Mod Ari tein.

¹¹Rusnok insa koma rerin ruhoner tein onnga rut joug rufoka rot onkoskamoka ojgomu. Koma bera, rua runok mocusur gij rusnok rufoka ebireira guru. Noba ribirfaga enerebibeï rot mofut efei tein guru. Rua riker gij mar nomnaga rot iskusk ojgomu.

¹²Noba rua onnga rumfij ebirfaga Mod Ari insa koma bera ruskotu ruhoner egensmes ojgomu. Noba rua tein ruftuftu rerin riser jera rerin mod etma rot iskusk ojgomu.

¹³Erek rua rufij ebirfager Mod Ari rot tentenmen ojgomu, beda rusnok Mod Ari rudou emeskeira rot fogora rumougif gu rua si. Beda rua rinemeesa rot ruftuftu rusnok rot teinefa rua ruroru Yesus Kristus oga guru.

¹⁴Timotius, erek dektek guru beda didif dumojogog bua. Tina erek askesi ros, beda didif dugu surat egens kef skoita bua fog.

¹⁵Didif disa surat egens kef jeskaseda erek didif dinen ebeirens guru, beda bua bimejginaga rot teinefa rusnok onnga ruroru Allah rita mar rot tenten ojgomu. Jeska mimif nomnaga bera mirek mod egens onnga Efena Ebsi Allah engker gij. Jefeda mimif

muftuftu osok gij efen oga rot ahais ojgomu, noba muroru mar insa koma rot tenten ojgomuja.

¹⁶Sis fob bera rusnok rinejinaga rot teinefa rua rita rudou onnga ebsi komowa ahah Allah eiteij enesi. Jeska mar koma ah jejema jeska rua ros. Tina mimif mijjinaga rot koma fob jeska: Ofa en erek osnok egens. Beda Efena Ebsi Allah ocunc Ofa erek osnok egens onnga efen mar onnga oska oskiyai tein guru. Noba malaikat-malaikat tein ringk Ofa. Rusnok rufoukou tein rimfesij osok gij Ofa gu rusnok onnga erek Yahudi guru. Jefeda ebeibeyaif rusnok rufoukou rudou ororu Ofa fob. Allah omfra Ofa jah mebaga fogora Ofa ensma ofoka onnga aksa eteb tein fob.

4¹Efena Ebsi Allah anggot rot koisoisa fob oida gij mona kahma bera rusnok rineya rimeita rudou onnga eskes fogora runororu Yesus oga deika guru. Tina rua rumororu mar onnga rua rig jeska efena ofogog noba rimeita mar onnga efena ofogog insa koma oftuftu gu rua ojgomu.

²Rua rineita mar jeni erek rua ruftuftu gu rusnok enjineg jinaga guru. Tina rua rucuwei mar ofoukou gu rusnok ojgomu, noba rudou onokora rot rusnok insa koma jinaga guru.

³Rua riyahahir joug rusnok oida runoskotu arja guru, era rinet maat ebireira guru. Tina Allah bera otunggom maat insa koma jeskaseda rusnok onnga ruroru Ofa efen oga rot tenten risma maat insa koma rot rudou onnga eirir. Noba rua ruis oufamofa eteb gu Ofa rot tein.

⁴Jeska mar nomnaga onnga Allah ontunggom fob bera erek oufamofa ojgomu. Noba enadaij nou rusnok rucunc maat insa koma erek mar onnga oska

guru. Rua ruis oufamofa eteb gu Allah rot maat insa koma ojgomu.

⁵ Jeska Allah esinsa enagot rot oida maat nomnaga bera erek oufamofa ojgomu. Noba rusnok tein rum riteij rot maat insa koma.

⁶ Timotius, bua buftuftu rot mar insa koma gu bebin obohujir nomnaga onnga ruroru Yesus fob jeskaseda bua bijerek osnok egens onnga omfij Yesus Kristus rot iskusk. Noba butunggom erek koma oisouska mar onnga rusnok rumftuftu gu bua osok gij Allah efen oga onnga tenten sis fob. Noba bua buroru oga insa koma rot tenten fob tein.

⁷ Bua bibes bifaga jeska mar onnga rusnok enjgineg riflesij moguma onnga erek rourou ojgomu. Rua ruroru mar insa koma ojgomuja, tina runororu Allah oga rot ahais guru. Bisisi joug bisinsa jeskaseda bita mar onnga erek Allah odou os rot ojgomu.

⁸ Rusnok rineya rut joug risinsa rifaga rot ahais jeskaseda rufora efek noba rufogu eskeira eteb, tina koma ofij rua erek oskiyai ojgomu. Tina rusnok onnga rireni rot ahais jeskaseda rutunggom mar onnga Allah odou os rot, beda koma bera ofij rua gij mar nomnaga ojgomuja. Koma bera ofij rua erek eteb gij rerin riteij ah insa kef jera riteij ah efeinah onnga emen tein.

⁹ Mar onnga didif danggot insa koma bera tenten ojgomu noba adaij nou rusnok ruroru mar insa koma rot rudou ongkasmos tein.

¹⁰ (Mimif mug mijmeg rot noba mireni rot ahais jeskaseda muroru mar insa koma ojgomu.) Koma bera, mimif muisum gij Allah, onnga efen owesa efek adaij nou oskotu rusnok nomnaga jeska rerin mar

ongga oska. Noba Ofa emeita eiteij ah onggga efeinah gu rusnok nomnaga onggga ruroru Yesus fob si.

¹¹ Bua bagot rot noba buftufts rot mar insa koma nomnaga ojomu gu rusnok jah suma.

¹² Enadaij nou rua runougif gu bua guru jeska rua rusujohu rot oida bua birek buforoka bifes ojomu ros. Tina onggga oufamofa bera bua bucunc gu rusnok jah suma oida rusnok onggga ruroru Yesus rot tenten fob bera rita mar onggga erek onggkoska ojomu. Jefeda erek bua buroru Allah rot tenten ni, binesiri jera rujager ebireira guru ni, bagot mar onggga erek oufamofa gu rusnok ni, budou okora rot rusnok ni, bucunc biteij ah onggga erek onggkoska ni, beda koma erek burocunc rot mar onggga oufamofa skoita rusnok nomnaga fob.

¹³ Beda gij mona onggga iwa imohoturuma, beda bifesij jeska Mar Efeyi Ebsi efeb gu rua nomnaga. Noba bifesij rot Allah oga onggga oufamofa gu rusnok noba buftufts rua rot mar insa koma tein. Bua bita mar insa koma nomnaga ojomuja onjoros mona onggga didif dinsaga jah suma.

¹⁴ Sis fob, gij mona onggga ebirfager Mod Ari raha ritma esij bua noba rum riteij keingg bua, beda bua bisma owesa efek eteb jeska Efena Ebsi Allah fob. Jefeda bunodou eskes rot owesa efek insa koma guru, tina bufij Allah oisouska mar insa koma ojomuja.

¹⁵ Bua bita mar insa koma nomnaga rot iskusk ojomu jeskaseda rua nomnaga rik oida bua bisinsa buroru mar koma nomnaga rot tenten ojomuja fob.

¹⁶ Bua but joug budou efesi rot mar insa koma nomnaga erek ahais ojomuja. Bug bijmeg gij mar koma ojomu jeska koma bera onggga ereita eiteij ah

ongga efeinah gu bua jera rusnok enjgineg ongg
 bua buftuflu rua rot jah suma fob.

5¹ Timotius, bua binetaha joug runer ongg
 ari mega ofoj ekirsa jeska bua rot ahais guru.
 Ongga oufa bera bisisi joug rua rot budou ongg
 eriagamaga erek bua bisisi joug bisinsa bebin mekeb.
 Noba bisisi joug ruforoka rifes erek bua bisisi joug
 bisinsa bebin obkoser.

² Erek koma tein rot rujager ongg
 ari mega ofoj ekirsa jeska bua tein. Bisisi joug
 rua erek bua bisisi joug bisinsa bebin mosib.
 Noba bisisi joug ruforoka rujowu erek bua
 bisisi joug bisinsa bebin ebieser. Bua bisisi
 mar joug rua insa koma nomnaga rot budou
 efesi ongg eskeiramera rot rua ojgomu.

³ Bua bucunc budou ongg okora rot
 rujona ongg rija mesina tein ongg rerin riser
 egema tein guru, fogora bufij rua ojgomu.

⁴ Tina erek rujona ongg rija mesina
 rerin riser, era rerin ridebeser ongg runofo-
 guma ros, beda riser era ridebeser insa koma
 rugif gu rerin ruser era rimower fogora
 rufij rua rot iskusk ojgomu. Koma erek rua
 ridaga rerin ruser era rerin rimower rufons
 sons gu rua. Mar koma bera ongg Allah on-
 dou os rot.

⁵ Noba rujona ongg rija mesina ongg
 rerin mareibra oskiyai tein guru, era rerin
 riser egema tein guru, beda rua ruisum
 gij Allah ojgomu. Noba rua rum riteij gu
 Allah orofosut mona jera motu tein
 jeskaseda Ofa ofij rua.

⁶ Tina erek rujona ongg rija mesina
 runoisum gij Allah guru, tina rujohca mar
 ongg ereita risinsa rudou efaga ouka eteb
 rot ojgomu, beda rua rimeseiseifa si. Erek
 rua rifena ebah ros, tina gij

mona kahma beda rinesma eiteij ah ongga efeinah jinaga guru.

⁷ Bisisi joug rusnok insa koma oida rua rumofij gu rerin rujager rija mesina ojgomu jeskaseda rusnok runocunc rua erek rusnok ongga oska guru.

⁸ Tina erek osnok egens onofij efen ebskir era efen mod etma guru, beda koma erek ofa okoja Allah oga ongga mimif muroru. Jefeda ofa oska efekefa ekirsa jeska rusnok ongga runoruru Yesus jinaga guru.

⁹ Rujona rija mesina ongga erek rujonokona fob, noba rinahi igers deika guru, bera ebirfager Mod Ari rucunc rudou ongga okora rot rua ojgomu.

¹⁰ Rujona rija mesina insa koma bera runcunc gu rusnok enjineg oida rua rita mar ongga ongkoska ojgomuja. Koma erek rua rufij rerin riser rot iskusk fob, noba rua tein ruroun rusnok ongga runjogog rua rot rudou ongga eskeiramera. Noba rua rufij rusnok ongga rururu Yesus tein, noba rua rufij ruforoker rujowu rot mar okum ongga ah keingg rua. Rua rutunggom mar nomnaga rot iskusk ojgomu.

¹¹ Rusnok Mod Ari runofij rujona rija mesina ongga erek ruforoka rujowu ros guru. Jeska gij mona egema deika beda rua rudou osos runa egema. Jefeda rua runofij Yesus Kristus erek rua ranggen rot sis fob deika guru, tina rua raha mar koma jah fogora rahi igers deika ojgomu.

¹² Beda rusnok rumocunc rua erek oska jeska runofij Yesus Kristus erek rua ranggen rot gij mona ongga rahiner ragos jeska rua fob guru.

¹³ Dokun mar insa koma bera rua rufora ogug rot mar, noba rua rudou os rija jah rusnok egema rerin mod jeskaseda ruh ofonoknok osok gij rusnok enjineg rerin mar ojgomuja.

¹⁴ Erek koma jefeda didif disisi joug rujona rija mesina onnga ruforoka rujowu ros jeskaseda rua rijahi igers deika ojgomu. Beda rumok riser noba rita mar gij rerin mod etma rot iskusk tein. Rua rita mar erek koma jeskaseda rusnok enjgineg onnga rudou oska skoita mimif rimek fogora rinagot mar onnga oska osok gij mimif onnga muroru Yesus guru.

¹⁵ Didif dagot erek koma jeska ebeibeyaif rujona rija mesina rineya onnga runororu Yesus oga deika guru, jefeda rua ruroru mar onnga oska onnga en jeska Bilis ojgomu.

¹⁶ Erek koma tein, erek ojaga egens onnga ororu Yesus fob, noba ofa efen mokorer era mokoser onnga rinjerek rujona rija mesina fob, beda ofa tein ofij rua ojgomu. Enadaij nou ofa osujohu rot oida rusnok Mod Ari bera rumofij rua ojgomu si guru. Ofa tein ofij rua insa koma jeskaseda ebirfager Mod Ari rumofij rujona rija mesina onnga rerin riser era ridebeser era rusnok egema tein guru rot tenten ojgomu.

¹⁷ Timotius, didif duis gu rusnok onnga ruroru Yesus jeskaseda rua rugif gu rerin ebirfager Mod Ari ojgomuja. Noba onnga ofoufem ekirsa bera rua rugif gu rerin ebirfager koma onnga ruftu noba rifiesij mar rot Allah gu rua.

¹⁸ Jeska mar egens gij Mar Efeyi Ebsi agot oida, "Iwa inagei maat jeska rua onnga rumfij iwa guru, jeskaseda rua rumofij iwa ojgomuja." Noba mar egema tein gij Mar Efeyi Ebsi bera agot oida, "Rua onnga rimfarur gij mar bera risma rerin rufons rot ojgomu." Jefeda rusnok Mod Ari tein rufij rerin ebirfager rot rerin maat onnga rimet era meisoufa onnga rimergi ojgomu.

¹⁹ Timotius, erek osnok egens bera efesij gu bua rot mar onnga oska onnga ebirfaga Mod Ari egens ontunggom fob, beda budou onororu mar koma guru. Tina erek gosnok gegeka era rusnok rugomu rifesij rot mar onnga oska onnga ebirfaga Mod Ari egens ontunggom fob, beda bua big rot mar onnga rua rifesij insa koma ojgomu.

²⁰ Erek ebirfaga Mod Ari rineya runtunggom mar onnga oska fob, beda bagot rot gu rua gij rusnok Mod Ari rifelesa jeskaseda ebirfager onnga enjineg tein rimek fogora rimeesa rot rutunggom mar onnga oska.

²¹ Noba didif duis gu bua jeskaseda bua buftuftu rot mar insa koma gu rusnok ebic nomnaga ojgomu. Enadaj nou bua bufra rusnok ebic egens erek ekirsa jeska rusnok ebic rineya guru. Budou ah keingg rot oida, Allah jera Yesus Kristus jera malaikat-malaikat onnga Allah efen, rua nomnaga ringg rot mar onnga didif danggot insa kef gu bua fob.

²² Bua bunocunc rusnok ebireira erek ebirfaga Mod Ari guru. Jeska erek bua bucunc osnok egens onnga edemdemi mar onnga oska gij odou efesi ros, beda mar onnga oska onnga ofa otunggom bera emah gu bua tein si. Tina bibes bifaga jeska rusnok erek insa koma ojgomu.

²³ Noba bua binej mei tuturu guru. Tina onnga oufa bera bij anggur efei erek oskiyai tein jeskaseda orot rot butkonu onnga okora koma.

²⁴ Mimif mijginaga rot rusnok rineya rerin mar onnga oska fob, jeska rua rinedemi mar insa koma jeska rusnok guru. Noba Allah ensejah nou ofra mar okum keingg rua rot. Tina rineya ridemi rerin mar onnga oska jeska rusnok. Tina mar insa koma tein

emah rot tomnomna beda rua rimesma okum rot tein si.

²⁵Erek koma tein, mar onnga oufamofa onnga rusnok rutunggom bera ah tomnomna gu rusnok nomnaga. Tina enadaij nou rusnok ridemi rerin mar onnga oska jeska rusnok ojgomuja guru. Jeska gij mona kahma beda mar insa koma tein emah rot tomnomna gu rusnok nomnaga si.

6¹Timotius, rusnok onnga rufij rerin rusnok ebirfager ojgomuja bera rugif gu ebirfager insa koma rot tenten ojgomu. Rua rucunc rudou onnga rugif gu rua ojgomu jeskaseda rusnok rineya runoga oruh Allah ofoka era runoga oruh mar onnga memef moftuftu rot gu iwa guru.

²Noba rua insa koma onnga rerin ebirfager onnga rirek Kristen tein bera rufij rerin ebirfager insa koma rot ongnoska ekirsa ojgomu. Enadaij nou rua rusujohu rot oida rerin rufoka bera morototuma jera rerin ebirfager ofoka jefeda rua runougif gu rua deika guru. Jeska ebirfager insa koma onnga rua rumfij bera ororu Yesus rot tenten tein fob, noba rua rudou okora rot rerin ebirfager insa koma tein. Buftuftu rot mar insa koma gu rusnok jah suma, noba buis gu rua jeskaseda rumororu mar koma ojgomuja.

³Erek koma tina, rusnok rineya ruftuftu rot mar onnga tenten guru. Noba rua runoitij rot mar onnga Tuhan Yesus kristus anggot rot tenten sis fob guru. Noba rua tein rukoja mar onnga memef moftuftu rot Allah oga onnga ebsi komowa guru.

⁴Rusnok insa koma bera rufra risinsa rufoka erek aksa ojgomu. Noba rua rudou osumsumu ojgomuja. Rua rudou os ruga omosokuma ojgomuja onjoros ruga oska moguma. Jefeda mar insa koma

orotunggom rusnok rudou efesi emejiseima ni, rimagobuma ni, rucuwei mar moguma ni, noba ris rudou efesi ofogog moguma gij mar ongganggot insa koma ni.

⁵Rua rudou oska fogora ruga emaksema moguma rot mar ojomuja. Rua runoruru mar ongganggot tenten deika guru, tina rua rusujohu rot oida rururu Allah jeskaseda risma mareibra ofoukou ojomu.

⁶Tina rusnok ongganggot rururu Allah oga rot tenten fob bera rita rudou ongganggot eskeira rot mar ongganggot rua risma jeska Allah ojomu. Noba koma bera ongganggot omofij rua rot tenten si.

⁷Jeska gij mona ongganggot mimif munjuj jeska musir bera munorka mar egema tein guru. Noba gij mona ongganggot mimif manggos fob tein bera munorka mar egema guru.

⁸Jefeda erek mimif misma maat jera meisoufa, beda koma bera adaj fogora mudou eskeira rot ojomu.

⁹Tina rineya ongganggot rudou os jeskaseda risma mareibra ofoukou ojomuja bera risiri gij mar ongganggot oska ongganggot oroku rudou rot ojomuja. Jefeda rudou osos rot fogora eftirir keingg mar ongganggot oska ofoukou rot rudou ongganggot osumsumu onjoros riteij ah ejeseiseifa rot ojomu.

¹⁰Jeska rusnok ongganggot rudou os mareibra ofoukou bera ruhca nou mar koma onjoros rua risiri gij mar ongganggot oska ofoukou ojomu. Rusnok rineya ongganggot rudou osos fogora eftirir keingg mareibra ofoukou bera ringkikif jeska Allah beda runoruru Ofa efen oga deika guru. Jefeda koma erek rua rufra mar okum keingg risinsa gij mar ongganggot rua runtunggom insa koma fob.

¹¹ Erek koma tina, bua Timotius bunroru Allah rot tenten fob. Jefeda bua bibes bifaga jeska mar onnga oska insa koma nomnaga ojgomuja. Bua bita mar rot budou onnga ebsi komowa ojgomuja ni, buroru Allah oga rot tenten ni, butunggom mar nomnaga rot tenten ni, budou okora rot rusnok enjgineg ni, bita budou ahais gij mar onnga ereneni bua ni, noba bucunc budou onnga eriagamaga skoita rusnok enjgineg ni erek koma ojgomuja.

¹² Sis fob bua bimeesa joug bebin mar onnga oska jah rusnok rufoukou rudou. Beda gij mona insa koma Allah enjeka bua tein jeskaseda bisma eiteij ah onnga ah aibin ojgomuja. Jefeda erek tentarer rimagobuma rot ahais, beda bua tein bireni rot ahais jeskaseda buroru Allah oga onnga oufamofa rot tenten ojgomuja.

¹³ Oisouska Allah ofoka onnga eita eiteij ah gu mar nomnaga, jera Yesus Kristus onnga anggot mar rot esinsa onnga erek tenten skoita Pontius Pilatus sis fob, bera didif duis gu bua jeskaseda

¹⁴ bua buroru mar insa koma nomnaga onnga didif danggot gu bua rot budou onnga ebsi komowa ojgomuja. Noba bua buroru mar insa koma rot ahais ojgomuja onjoros mona onnga mifmin Tuhan Yesus Kristus ongksons en fob.

¹⁵ Allah esinsa bera onnga eita mar rot odou onnga ongkoskamoka. Ofa esinsiyai bera onnga ofoka ereij keingg mar nomnaga. Ofa bera erek raja egens onnga ofoka ekirsa jeska raja nomnaga. Noba Ofa bera erek Tuhan rot mar nomnaga tein. Jefeda ofa bera onnga oga ojga rot mona kenefo fogora Yesus Kristus omoksons en.

¹⁶ Allah esinsiyai bera enagos jinaga guru. Ofa engker gij eisa eteb onnga rusnok egema tein rimen doida gij jinaga guru. Sis fob rusnok egema tein rinek Ofa gu riteij guru. Noba ebeibeyaif rusnok rinek Ofa gu riteij tein guru. Mimif mudou os jeskaseda rusnok nomnaga rufra Ofa efen ofoka erek aksa eteb. Noba mimif mudou os jeskaseda Ofa ocunc rot efen owesa efek eteb gu rusnok nomnaga. Ainsoma.

¹⁷ Bua bagot gu rusnok onnga runa mei ahtah jeskaseda rua rinesitit risinsa rifaga era runoisum gij rerin mareibra ofoukou ojgomuja guru. Jeska rusnok egema tein rinejginaga rot oida rerin mareibra ofoukou emah gu rua era emeseiseifa jeska rua guru. Tina onnga tenten bera rua ruisum gij Allah ojgomu. Jeska Ofa bera eita mar nomnaga onnga ongnoska eteb gu mimif jeskaseda mudou erirei rot ojgomu. Ofa otunggom erek koma jeskaseda mudou efaga ouka eteb rot Ofa.

¹⁸ Bua bagot rot gu rua tein jeskaseda rua rita mar onnga ongnoska ojgomu. Rua rucunc rot teinefa rerin riteij ah onnga ongnoska fogora rufij rusnok enjgineg rot rerin mareibra ojgomuja.

¹⁹ Beda mar insa koma omorka rufons onnga ongnoskamoka eteb gu rua gij mebaga. Mar insa koma emah aibin gij mona onnga emen. Rua rita mar erek insa koma jeskaseda rua rimesma eiteij onnga efeinah rot tenten ojgomu.

²⁰ Timotius, budou ah keingg rot ahais gij mar onnga Allah anggot rot noba angha gu bua jeskaseda bufij Ofa rot ojgomuja. Bibes bifaga jeska mar onnga rusnok rimfesij rot onnga onorka mimif skoita Allah guru. Noba but joug budou efesi jeska mar onnga rusnok enjgineg ruftuftu onnga eretei rot Allah oga

ongga tenten tein. Rua ragot oida rua ruftuflu mar insa koma rot rudou onnga ebriyi eteb gij, tina guru.

²¹ Rusnok rineya ruroru mar insa koma onnga tenten guru fob. Jefeda ebeibeyaif rua runororu Allah oga onnga tenten deika guru. Didif dum diteij gu Allah jeskaseda Ofa ocunc odou onnga oufamofa eteb gu iwa nomnaga. Ainsoma.

2 Timotius

1 ¹ Didif Paulus bera dinjerek Yesus efen rasul egens jeni Allah odou ejginaga rot fob. Didif dunogu surat kef gu bua Timotius onnga didif dudou okora rot erek dedin edesa egens tein. Noba oisouska mar onnga Yesus Kristus ontunggom fob bera Allah anggen rot oida efen rusnok nomnaga rimeita eiteij ah onnga efeinah si. Didif dum diteij gu Allah jeskasada Ofa jera mifmin Tuhan Yesus Kristus omocunc odou onnga oufamofa noba onnga eriaga skoita bua. Noba didif dum diteij jeskasada Ofa emeita biteij ah onnga eskeiramera gu bua ojgomuja.

² (1:1)

³ Gij orofosut mona jera motu nou onnga didif dum diteij gu Allah, beda didif duis oufamofa eteb gu Ofa. Ofa bera onnga didif dufij rot dudou onnga eskeiramera ojgomuja. Noba dedin indimower tein rufij Ofa gij mona onnga sis fob. Noba orofosut mona onnga didif dum diteij gu Ofa, beda didif duis oufamofa eteb rot bua Timotius tein.

⁴ Didif dudou ah keingg rot teinefa bua budou ousaha eteb noba ebisa rot gij mona onnga didif dinja jeska bua sis fob tein. Noba didif dudou os dujorodosu bua deika jeskasada didif dudou efaga ouka morototuma jera bua deika.

⁵ Didif dudou ah keingg rot teinefa bua buroru Yesus rot tenten fob. Sismeni bebin abowa Lois jera mosib Eunike onnga gororu Yesus rot tenten fob. Noba didif dudou ejginaga rot tenten oida bua buroru Yesus rot tenten tein fob.

⁶Erek koma jefeda didif disisi joug bua deika jeskaseda bua bicira gij owesa efek onnga Allah eita gu bua sis fob. Ofa eita owesa efek insa koma sis mona onnga didif dangha ditma esij bua noba dum diteij keingg bua fob.

⁷Erek koma jeska Efena Ebsi onnga Allah ensa skoita mimif bera onotunggom mudou erek emeesa rot mar guru. Tina onnga tenten bera, Efena Ebsi insa koma eita owesa efek gu mimif gij mudou efesi fogora mifmin mudou onnga okora rot rusnok enjgineg ni, noba mudou ororu mar onnga oufamofa rot ahais ojgomuja ni.

⁸Erek koma jefeda mojenenib rot Tuhan oga guru. Noba mojenenib rot didif jeska rusnok raha didif gij mod oskusk insa kef fob guru. Tina bua bisejah budou efesi jeskaseda bita biferi okora morototuma jera didif askesi magef mancira rot Allah oga onnga oufamofa. Magef mancira rot ahais oisouska Allah efen owesa efek ojgomu.

⁹Allah bera onnga onsuwa mimif nomnaga jeska mifmin mar onnga oska, noba Ofa oncunc mimif jeskaseda mita mar rot mudou onnga ebsi komowa ojgomuja. Ofa onotunggom mar insa koma oisouska mar onnga oufamofa onnga mimif misinsiyai muntunggom guru. Tina Ofa ontunggom mar insa koma oisouska Ofa esinsa odou ejginaga rot ojgomu, noba oisouska odou onnga oufamofa rot mimif tein. Ofa ensejah nou ocunc efen odou erek insa koma gu mimif oisouska Yesus Kristus gij mona onnga sis dojunmeni fob.

¹⁰Tina ebeibeyaif Allah oncunc rot mar insa koma oisouska Yesus Kristus fob. Ofa bera onnga en jeskaseda oskotu mimif jeska mifmin mar onnga

oska. Jefeda ebeibeyaif mimif minagos deika guru. Noba oisouska efen oga onnga oufamofa insa koma bera rusnok ruirah gij efen eisa fob. Jefeda rua risma eiteij ah onnga efeinah noba onnga ah aibin ojgomuja.

¹¹ Allah ocunc didif erek efen rasul egens jeskaseda dijefesij rot efen oga onnga oufamofa insa koma gu rusnok enjgineg noba jeskaseda duftuflu rua rot efen ofou jeni tein fob.

¹² Jefeda ebeibeyaif rusnok rumfra mar okum keingg didif rot ojgomuja. Tina mojenen didif rot mar insa koma guru. Jeska didif dijginaga rot tenten oida Yesus omofij didif si. Noba didif dijginaga rot tenten oida Ofa omot joug didif rot oga onnga oufamofa insa koma onnga Ofa oncunc rot gu didif onjoros mona onnga didif dimfesij rot mar insa koma oisa fob.

¹³ Timotius, didif dumftuflu bua rot oga insa koma onnga tenten. Jefeda buroru mar insa koma rot ahais fogora buh budou onngas rot ojgomuja. Buroru Yesus Kristus noba budou okora rot rusnok enjgineg tein. Mimif nomnaga mita mar insa koma oisouska mudou onnga egens jera Yesus Kristus fob.

¹⁴ Butunggom mar insa koma nomnaga oisouska owesa efek onnga en jeska Efena Ebsi Allah onnga engker gij budou efesi ojgomuja. Noba bicira gij mar onnga oufamofa insa koma onnga Allah oncunc bua rot fob ojgomuja.

¹⁵ Bua bijginaga rot fob oida dedin edohujir nomnaga gij monuh Asia rija jeska didif fob. Rineya jeska rua insa koma bera Figelus gonu Hermogenes.

¹⁶ Tina Onesiforus jera efen rusnok nomnaga onnga ringker jera ofa bera mojenenir rot didif jeska dingker gij mod oskusk kef guru. Jeska gij mona onnga

Onesiforus ensaga gu kota Roma fob, beda ofa ohca didif ojgomuja onjoros ofa ek didif. Beda ofa ofij didif jeskaseda dudou onokum eteb rot mar onnga angh keingg didif guru. Jefeda didif duis gu Allah jeskaseda Ofa ocunc odou onnga eskeiramera gu Onesiforus jera efen rusnok tein.

¹⁷ (1:16)

¹⁸ Noba bua tein bijginaga rot oida gij mona onnga dingker jah kota Efesus ros, beda ofa ofij didif ofoukou jah suma tein. Jefeda didif duis gu Tuhan jeskaseda Ofa ocunc efen odou onnga oufamofa eteb gu Onesiforus gij mona onnga Ofa ongksons en deika fob.

2¹ Timotius, bua birek dedin edesa egens. But rot ahais oisouska budou onnga enjerek egens jera Yesus Kristus fob. Jeska Ofa ocunc odou onnga oufamofa eteb skoita memef fob.

² Bua bingg rot mar nomnaga onnga didif dumftuftu jah rusnok rufoukou rudou fob. Jefeda bua tein buftuftu rot mar insa koma gu rusnok enjineg tein rot koisoisa ojgomu. Beda rua tein rumoftuftu rot mar insa koma gu rusnok enjineg rot koisoisa deika si.

³ Noba erek tentarer rita rudou ahais gij mar onnga eita rifea okora gu rua, beda bua tein bita budou ahais gij mar onnga eita bifera okora gu bua tein. Jeska bua bera erek osnok egens onnga ofij Yesus Kristus ojgomuja.

⁴ Tentarer onnga rufij rerin ebirfaga egens bera runoromohohuma rot mar onnga ebirfaga insa koma odou os rot jera mar onnga rusnok enjineg rudou os rot guru. Tina rua rutunggom mar onnga rerin ebirfaga egens ondou os rot ojgomu. Erek koma tein rot bua onnga bufij Yesus Kristus.

⁵ Noba rusnok onnga rufof riremeteima jeskaseda risma rufons onnga ongnoska bera ruroru ebirfager ruga jeni jeskaseda risma mar insa koma ojgomu.

⁶ Noba rusnok onnga rif mar gij mekeni rot iskusk bera risma maat efema onnga sismeni jeska mekeni egens insa koma.

⁷ Bua busujohu rot osok gij mar orocunc insa koma nomnaga rot iskusk jeskaseda budou emebriyi gij efen ofou ojgomu. Jeska Tuhan omofij bua jeskaseda budou ebriyi gij mar insa koma nomnaga efen ofou si.

⁸ Beda bua budou ah keingg rot Yesus Kristus ojgomuja. Ofa onjuj jeska efen ofou ebiedi meimowa raja Daud. Noba Allah omfra Ofa jeska agos fob. Didif dumftuftu rot oga onnga oufamofa insa koma gu rusnok rufoukou fob.

⁹ Noba didif dimfesij rot oga onnga oufamofa insa koma, jefeda rusnok rita efera okora gu didif fogora rira rantai rirakid ditma erek osnok egens onnga ofogog. Tina enadaij nou rusnok rakid Allah oga onnga oufamofa jinaga guru.

¹⁰ Jefeda didif dug dijmeg gij mar okum nomnaga onnga angh gu didif jeskaseda rusnok onnga Allah oncunc fob rimeg rot oga insa koma si. Beda Allah omoskotu rua tein oisouska Yesus Kristus fogora rua rimesma eiteij ah onnga ongnoska noba onnga ah aibin ojgomuja. Kef bera onnga tenten oida,

¹¹ "Erek mimif manggos rot mifmin mar onnga oska gij mona onnga Ofa anggos tumu mega salib, beda mimif tein bera mimesma eiteij ah morototuma jera Ofa gij mona onnga Ofa endebecki jeska agos fob.

¹² Noba erek mimif mita mudou ahais gij mar onnga eita efera okora gu mimif, beda mimif tein mumofoka

ereij keingg mar nomnaga morototuma jera Ofa si. Noba erek mimif mudou okoja Ofa, beda Ofa tein odou omokoja mimif.

¹³ Noba erek mimif munororu efen oga rot tenten guru, tina Ofa omotunggom mar nomnaga onnga Ofa anggen rot ojgomu. Jeska Ofa enekikif jeska mar onnga Ofa anggen rot gu mimif sis fob jinaga guru."

¹⁴ Timotius, enadaj nou bebin rusnok ruga omosokuma rot mar onnga erek onofoufem insa koma guru. Jeska mar koma bera orotunggom rusnok rudou oska moguma ojgomu. Bua bisisi joug bebin rusnok jah suma ahah Allah odou rot ahais jeskaseda rua rineita mar erek koma guru.

¹⁵ Budou mojenenib rot mar onnga bua bimfarur gij guru. Tina buftuftu rusnok osok gij Allah oga rot tenten ojgomu. Beda ahah Allah bera bua bimerek osnok egens onnga Ofa odou eskeira eteb rot si.

¹⁶ Bua bibes bifaga jeska rusnok onnga ruga omosokuma noba ruga rahisent mar rot rudou onnga osumsumu eteb ojgomu. Jeska mar koma onoroun mimif skoita Allah jinaga guru.

¹⁷ Noba erek aki efera ejerek eteb fogora omorok mokcin aki nomnaga, beda erek koma tein, mar onnga rua rumftuftu rot insa koma orok mokcin rusnok rufoukou fogora nomnaga rimejerek oska. Himeneus gonu Filetus bera gerak gosnok gegeka onnga gotoiru gij mar insa koma.

¹⁸ Goga gonororu Allah oga onnga tenten deika guru. Noba ebeibeyaif goga goftuftu rot oida Allah omfra rusnok nomnaga jeska ranggos fob, jefeda Ofa onofra rusnok egema deika guru. Erek koma jefeda rineya rija jeska Allah noba ruroru Ofa deika guru.

¹⁹ Erek koma tina, Allah oga onggga oufamofa bera ah rot ahais erek mamu ofoj eteb egens onggga eneineina gij jinaga guru. Noba Allah oga insa koma bera agot mar erek kef oida, "Allah ejjinaga rot idu onggga ejerek efen rusnok fob." Noba mar egens enjgineg agot oida, "Idu onggga agot rot oida ofa oira jera Allah efen rusnok fob, beda ofa ekikif jeska efen mar onggga oska ojgomu."

²⁰ Gij mod efesi onggga runa mei ahtah rerin bera bokor efeyi jera morogum onggga runtunggom jeska emas jera perak onggga efen efera osok eteb enah jah suma. Noba rua rira mar insa koma gij mona onggga rusnok onggga rufoka aksa runjogog rua ojgomu. Tina gij mod insa koma bera bokor efeyi onggga rutunggom jeska mombus owoha jera mok osku onggga runtunggom jeska meic owoha onggga erek onok efera erek eteb gij guru bera ah jah suma tein. Noba rua rira mar insa koma gij mona onggga rusnok giskini runjogog rua ojgomu.

²¹ Erek koma tein, erek rusnok rikikif jeska rerin mar onggga oska noba rita riteij ah onggga onggkoska, beda Allah omocunc rua jeskaseda ricira gij efen mar onggga ofoufem si. Jeska ahah Ofa eiteij bera rua erek efen rusnok onggga ofoufem eteb. Noba rua rinsejah nou rufij Ofa gij mar onggga erek oufamofa eteb ojgomuja.

²² Timotius, but joug budou efesi rot ahais jeska mar onggga oska onggga oroku ruforoker rudou efesi ojgomuja. Noba bireni rot ahais ojgomu jeskaseda butunggom mar onggga orocunc rot budou onggga efen mar onggga oska oskiyai tein guru. Noba buroru Allah oga rot tentenmen ojgomu ni, bita budou onggga okora rot rusnok enjgineg ni, biker rot biteij ah onggga

eskeira jera rusnok nomnaga ni. Bita mar erek insa koma jera rusnok enjgineg tein onnga ruis gu Tuhan jeskaseda Ofa omofij rua ojgomuja.

²³ Noba bibes bifaga jeska rusnok onnga ruga omosokuma osok gij mar rourou rot rudou onnga osumsumu ojgomu. Jeska bua bijginaga rot oida mar insa koma bera otunggom rusnok rudou otkonu oska moguma ojgomuja.

²⁴ Bua bera osnok egens onnga bufij Tuhan, jefeda bua bunoga omosokuma jera rusnok enjgineg guru. Bucunc budou onnga eriagamaga skoita rusnok nomnaga. Noba buin keingg budou efesij rot rusnok nomnaga noba buftuftu rua rot budou onnga oufamofa rot rua.

²⁵ Noba buftuftu rusnok enjgineg onnga riretei rot bua jera budou onnga eriagamaga ojgomu. Beda Allah emeita mona efekesa gu rua jeskaseda rimekikif jeska rerin mar onnga oska fogora rumororu efen oga onnga tenten tein.

²⁶ Beda rua rudou emebriyi gij rerin rita mar erek teinefa fogora rua rumosuwa risinsa jeska Bilis si. Beda rua runororu mar onnga Bilis odou os rot deika guru.

3¹ Timotius, budou ah keingg rot mar kef oida: Gij mona onnga enja ejgwaga ensaga doida fob, beda rusnok rimek mar onnga okum ofoukou.

² Gij mona insa koma bera rusnok rudou agei rerin mareibra ojgomuja ni, rudou ekeben keingg mareibra ofoukou ni, rua rimesitit risinsa rufoka ni, ruga omoruh rusnok enjgineg ni, runougif gu riker ruga jinaga guru ni, runois oufamofa gu rusnok enjgineg rot mar onnga rua risma guru ni, runororu Allah oga rot tenten guru ni.

³Rua rimeita mar onnga oska skoita rusnok enjineg ni, runocunc rudou onnga eriaga skoita rusnok enjineg guru ni, ruga oska rot rusnok enjineg ni, rita mar onnga ofogog eteb skoita rusnok enjineg ni, rudou oska rot mar nomnaga onnga erek ongnoska ni,

⁴Rua ruokrusa rusnok enjineg ni, rutunggom mar nomnaga rot rudou onnga oska ni, rufra risinsa rufoka erek aksa ekirsa jeska rusnok enjineg ni, rua rudou os rita mar onnga eita rudou erirei ojgomu ni, tina rudou onosos Allah guri ni.

⁵Rua rucunc risinsa erek rusnok onnga rua rugif gu Allah, tina rua rukoja mar nomnaga onnga Allah eita gu efen rusnok onnga rumofij rua ojgomu.

⁶Rineya jeska rua insa koma ruhca rujager onnga rudou okumkum rot risinsa, jeska rujager koma runtunggom mar onnga oska ofoukou gij mar onnga rudou eftirir keingg ojgomuja. Beda rua ruhurmei mar jeska rujager insa koma jeskaseda rujager koma ruroru mar onnga rua ruftuftu ojgomu.

⁷Rujager insa koma rudou os jeskaseda rusnok ruftuftu rua rot mar onnga tenten, tina rua rudou enekikif jeska rerin mar onnga oska insa koma guru. Jefeda rua runororu mar onnga tenten guru.

⁸Rusnok onnga rutunggom mar onnga oska insa koma bera rirek gonerga onnga gofoka Yanes gonu Yambres. Jeska sis fob eteb goga geretei rot mar onnga Musa oftuftu gu efen rusnok Israel ojgomuja. Erek koma tein rusnok insa koma riretei rot mar nomnaga onnga erek tenten ojgomuja. Rua rudou onosujohu rot mar onnga ongnoska jinaga guru. Noba rua ringkikif jeska Allah oga fogora runororu oga insa koma deika jinaga guru.

⁹Tina rua runotoiru gij rerin mar onnga oska ojomuja guru, jeska rusnok nomnaga rimek rot teinefa rua rita mar rot rudou onnga osumsumu eteb si. Koma morototuma erek Yanes gonu Yambres insa koma onnga geretei rot Musa sis fob. Gij mona onnga estir deika beda rusnok runororu goga deika guru.

¹⁰Tina bua bijginaga rot mar nomnaga onnga didif duntunggom fob jera mar onnga didif dumftuftu gu rusnok fob. Noba bua bijginaga rot oida duh dudou rot onngas jeskaseda dufij Yesus Kristus ojomuja. Bua bingk rot teinefa didif duroru Allah oga rot tenten ojomuja. Noba bua bingk rot teinefa didif duin keingg dudou efesi gij mar onnga ereneni didif ojomuja tein. Bua bingk rot teinefa didif dudou okora rot rusnok enjgineg noba rot teinefa didif dug dijmeg gij mar okum onnga ah gu didif ojomuja.

¹¹Bua bijginaga rot teinefa didif dita dudou ahais sis mona onnga rusnok rita efera okora eteb gu didif jah Kota Antiokhia ni, kota Ikonium ni, jera kota Listra tein. Tina Tuhan oskotu didif jeska mar insa koma nomnaga.

¹²Ongga tenten bera idu onnga odou os ororu Allah oga rot tenten oisouska odou onnga egens jera Yesus Kristus fob, beda ofa emek mar okum jeska rusnok enjgineg onnga rufogog rot ofa si.

¹³Erek koma noba rusnok onnga rufogog jera rusnok onnga rucuwei mar bera rimeita mar onnga oska ofoukou odudu dokun deika ojomuja. Rua rumorokrusa rusnok enjgineg noba rusnok enjgineg rumorokrusa rua tein sons.

¹⁴Tina Timotius, bua butoiru gij mar onnga tenten onnga rusnok enjgineg rumftuftu gu bua sis fob. Jeska bua budou ororu mar insa koma rot ahais

fob. Budou ah keingg rot rusnok insa koma onnga rumftuftu bua rot Allah oga sis fob.

¹⁵ Noba budou ah keingg rot oida sis mona onnga bua bumforoka bifes ros onjoros deisef tein bera budou ebriyi gij Mar Efeyi Ebsi fob. Jeska oisouska Mar Efeyi Ebsi insa koma bera bua bisma budou onnga ebriyi gij rot teinefa rusnok risma eiteij ah onnga efeinah. Rua risma mar insa koma oisouska rudou onnga ororu Yesus Kristus rot tenten ojomu.

¹⁶ Mar nomnaga onnga rusnok runggu gij Mar Efeyi Ebsi fob bera en oisouska Efena Ebsi Allah onnga oncunc rot mar insa koma gu rua gij rudou efesi fob. Noba oisouska Mar Efeyi Ebsi insa koma bera mimif muftuftu rusnok enjineg rot mar onnga tenten ni, mimif magot joug rua rot rerin mar onnga oska ni, mimif mucunc gu rua rot teinefa rua rita mar onnga oufamofa ojomu ni, noba mimif muftuftu rua rot teinefa rua rita riteij ah onnga ongnoska ojomu ni.

¹⁷ Mimif mita mar erek insa koma jeskaseda rusnok onnga rufij Allah bera rijginaga rot teinefa rua rita mar nomnaga onnga oufamofa eteb ahah Allah eiteij ojomuja.

4¹ Yesus Kristus omoksons jah mebif deika jeskaseda oga ojga rot rusnok nomnaga osok gij rerin rita mar. Koma rot rua onnga ranggos fob jera rua onnga rifena ebah ros tein. Beda Ofa omofoka ereij keingg rusnok nomnaga erek raja. Jefeda didif dui gu bua jah Allah odou jera Yesus Kristus odou rot mar erek kef:

² Bua bifesij rot Allah oga ojomuja. Noba bua bisejah budou efesi jeskaseda bagot rot Allah oga gu rusnok nomnaga onnga rudou os rig rot jera rusnok nomnaga onnga runodou os rig rot guru tein. Bua

buftufts rusnok onnga rineita mar onnga oufamofa guru, noba bisisi joug rusnok rot mar onnga oufamofa tein. Bua bita mar insa koma nomnaga rot budou onnga eriagamaga skoita rua. Noba buftufts rot mar insa koma rot koisoisa tein ojgomu.

³Jeska gij mona onnga emen bera rusnok rineya rumokoja Allah oga onnga tenten si. Tina rua rimekikif jeska oga insa koma fogora rua rumohoturu Guru-Guru enjgineg onnga rumoftufts mar onnga oska jeni rua risinsa rudou os rot ojgomu.

⁴Rua rinagosuit rot mar onnga tenten deika guru, tina rua rumoj rusu nou mar onnga rusnok riflesij onnga erek rourou ojgomuja.

⁵Erek koma tina bua Timotius, bitin budou gij mar nomnaga, noba but rot ahais gij mar okum onnga ereneni bua tein. Noba bifesij rot Allah oga onnga oufamofa gu rusnok onnga rineg rot enesi. Bua bera osnok egens onnga bufij Allah, jefeda butunggom mar insa koma nomnaga rot iskusk ojgomuja.

⁶Mona onnga didif dimagos bera enesaga doida fob. Noba erek osnok egens onnga era mar orougif gu Allah, beda erek koma tein dedin diteij ah bera erek mar onnga didif durougif gu Allah fob.

⁷Noba erek tentara efer egens ororu jeni ebirfaga oga, beda didif tein duroru jeni mar nomnaga onnga Allah oncunc gu didif fob. Noba erek osnok egens ofof eremeteima onjoros oisa fob, beda didif tein dincira gij mar nomnaga onnga Allah enjeka didif rot fob. Noba didif dunroru Allah oga nomnaga rot koisoisa fob.

⁸Jefeda ebeibeyaif Allah ensejah dufons onnga ongnoska eteb nou didif fob, jeska gij mona insa koma bera Allah omoroun didif erek osnok egens

ongga efen mar onggga oska oskiyai tein guru. Allah, onggga oga ojga rot rusnok nomnaga oisouska efen oga onggga tenten, bera omorocunc rot didif erek koma gij mona onggga emen. Noba ofa emeita mar insa koma gu rusnok nomnaga onggga rumom rudou nou mona onggga Yesus Kristus ongksons en gu mebif si.

⁹Timotius, bireni rot iskusk jeskaseda bin skoita didif jah sif.

¹⁰Jeska Demas aha didif jah fob noba enja jah Kota Tesalonika. Ofa eja jeska didif erek koma jeska ofa odou os ekirsa rot mareibra onggga angh gu mebif ojgomu. Noba Kreskes tein enja jah monuh Galatia fob, noba Titus tein enja jah monuh Dalmatia fob.

¹¹Noba Lukas esinsiyai bera onggga eneker jera didif jah sif ros. Noba buhca Markus beda buroun ofa morototuma jera bua jah sif. Jeska ofa omofij didif rot iskusk tein.

¹²Didif dubk Tikhikus jah kota Efesus fob.

¹³Noba gij mona onggga bua bin, beda burka dedin meisoufa onggga didif dangha gij kota Troas. Koma ah gij mod onggga Karpus efen. Noba burka dedin buku-buku onggga giskini jera Surat Mar Efeyi Ebsi onggga rungkuku tein jah sif.

¹⁴Aleksander, onggga otunggom mar jeska besi, ofa eita mar onggga oska ofoukou skoita Didif fob. Tina Tuhan omofra mar okum keingg ofa rot mar insa koma si.

¹⁵Jefeda bua tein but joug bisinsa rot ofa, jeska ofa bera ofogog skoita mimif rot mar onggga mimif muftuftu gu rusnok.

¹⁶Gij mona onggga didif danggot mar rot disinsa gu ebirfager onggga ranggei didif fob, beda dedin

edohujir nomnaga rinja jeska didif fogora runofij didif deika guri. Beda didif duis gu Allah jeskaseda Ofa osuna rot rerin mar ongga oska insa koma ojomu.

¹⁷ Erek koma tina Allah ofij Didif fogora eita owesa efek gu didif ojomu. Ofa ofij didif erek koma jeskaseda difesij osok gij efen oga ongga oufamofa rot ongkasmos gu rusnok nomnaga ongga erek Yahudi guru. Noba Allah oskotu didif jeska rusnok ongga ofogog doska gij mona insa koma tein.

¹⁸ Didif dijginaga rot tenten oida Tuhan omoskotu didif jeska mar nomnaga ongga ofogog si. Beda Ofa omofra didif jah mebaga rot eskeiramera tein. Mimif mufra efen ofoka erek aksa eteb ojomuja. Ainsoma.

¹⁹ Didif duisu Priskila jera efen mahina Akwila. Noba didif duisu Onesiforus jera efen mohona jera efeser tein.

²⁰ Erastus engker gij kota Korintus ros, noba Trofimus maren, jefeda ofa engker gij kota Miletus ros.

²¹ Bua bireni rot iskusk ojomu jeskaseda bin jah sif rot ebeirens ojomu. Jeska gij mona dektek deika guru, beda mona ongga mof meifina emesaga. Bulus ni, Pudes ni, Linus ni, Klaudia ni, jera rusnok enjgineg ongga rururu Yesus jah sif ruisu bua.

²² Didif duis gu Allah jeskaseda Ofa ofij bua noba ocunc odou ongga oufamofa eteb gu bua. Ainsoma.

Titus

1 ¹ Surat egens kef jeska didif Paulus. Didif direk osnok egens onnga omfij Allah. Noba Yesus Kristus oncunc didif erek efen rasul egens onnga omfij Ofa fob. Allah tein enjeka didif erek koma fogora obk didif jeskaseda dija skoita efen rusnok onnga Ofa oncunc fob. Beda didif dufij rua jeskaseda rumororu Ofa efen oga rot ahais noba jeskaseda ruroun rua skoita Ofa onnga efen oga onnga tenten. Koma bera oisouska mar onnga didif duftufts rot efen oga insa koma gu rua.

² Noba oisouska efen oga insa koma bera mimif muisum gij Ofa nou eiteij ah onnga ah aibin ojgomuja. Allah onocuwei mar jinaga guru, noba gij mona onnga sis dojunmeni bera Ofa anggen rot oida Ofa emeita eiteij ah insa koma gu rusnok si.

³ Noba gij mona onnga Ofa esinsa anggot rot fob bera Ofa ocunc rot eiteij ah insa koma oisouska efen oga onnga oufamofa. Noba Ofa oncunc didif jeskaseda dijefesij rot efen oga insa koma gu rusnok enjineg. Jefeda didif dita mar insa koma oisouska Ofa efen owesa efek ojgomuja.

⁴ Didif disa surat egens kef gu bua Titus, onnga dudou okora rot erek dedin edesa egens tein. Jeska bua tein bunroru Yesus Kristus morototuma erek didif fob. Didif duis gu mifmin mika Allah jera Yesus Kristus, onnga onskotu mimif jeska mifmin mar onnga oska fob, jeskaseda Ofa ocunc efen odou onnga oufamofa skoita bua noba eita eiteij ah onnga eskeiramera gu bua tein ojgomuja.

⁵ Sis fob didif dubk bua jeskaseda biker gij motowohu Kreta fogora buftuftu osok gij mar nomnaga rot omoisa gu rusnok jah suma. Noba didif dubk bua jeskaseda bucunc rusnok rineya erek ebirfager Mod Ari gij orofosut kota egens egens tein.

⁶ Gij mona insa koma didif duftuftu bua rot mar erek kef oida: Rua onnga rijerek ebirfager Mod Ari bera rerin rita mar onnga oufamofa ojomu. Rua ruskotu ruhoner egensmes ojomu. Noba rerin riser tein ruroru Yesus Kristus rot tenten, noba rua rinerek ruforoker onnga rutunggom mar onnga oska guru, era onnga rukoja rot mar onnga riker ruftuftu gu rua guru.

⁷ Rua onnga rijerek ebirfager Mod Ari bera rutunggom mar onnga Allah odou os rot ojomu. Jefeda rusnok onnga rimejerek ebirfager Mod Ari bera rerin rita mar onnga ongoskamoka ojomu. Rua rinerek rusnok onnga risitit risinsa rerin rufoka guru, noba runotkonu oska ebeirens skoita rusnok enjineg tein guru. Rua ribirfaga enerebibi rot mofut efei tein guru. Rua rineita mar onnga ofogog skoita rusnok enjineg guru, noba rua rudou eneftirir keingg fifi ojomu guru.

⁸ Onnga oufamofa bera rua ruroun rusnok gij rerin mod rot rudou onnga oufamofa ojomu ni, rudou ot rot mar onnga ongoskamoka ojomu ni, rut joug rudou efesi rot ahais osok gij mar onnga oska tein ni, rita mar rot rudou onnga aharukamoka ojomu ni, ricira gij mar nomnaga onnga rua ranggen rot ojomu ni.

⁹ Rua ruroru oga onnga oufamofa onnga mimif mumftuftu gu rua rot ahais ojomu. Jeska oga insa koma bera tenten noba ororu jeni mar onnga mimif

nomnaga muftufts rot fob. Beda rua tein rimeita owesa efek jeskaseda risisi joug rusnok enjgineg rot Yesus oga insa koma onnga erek tenten. Beda oisouska oga onnga oufamofa insa koma bera rua rumocunc oida rusnok onnga riretei rot rerin ruga insa koma bera runsujohu rot mar onnga tenten guru.

¹⁰ Ere koma jeska rusnok rufoukou bera rungkoja rot mar onnga mimif mumftufts rot fob. Noba rua ruokrusa rusnok enjgineg rot mar onnga rua runsujohu rot tein. Noba rua onnga Yahudi onnga ruroru Yesus fob bera runtunggom mar erek koma ekirsa jeska rusnok enjgineg.

¹¹ Bagot joug rusnok insa koma, jeska mar insa koma onnga rua ruftufts rot bera orotunggom rusnok enjgineg rudou eineina gij mar onnga tenten jera mar onnga oska ojomu. Noba rua ruftufts rot mar insa koma jeskaseda risma fifi ofoukou ojomu. Noba koma bera erek oska ekirsa ojomu.

¹² Rusnok jeska motowohu Kreta insa koma risinsa rerin nabi egens onnga anggot sis fob oida, "Rua onnga motowohu Kreta bera rucuwei mar ofoukou. Rua rierek mar onnga oska ojomu, noba rua rudou ot rot jeskaseda rit maat ofoukou doska ojomu, tina rudou eskes rot mar enjgineg."

¹³ Ere koma jefeda bua buftufts rua rot buga ahais jeskaseda rua rumororu Allah oga rot tenten ojomu.

¹⁴ Butunggom erek koma jeskaseda rua runororu rusnok Yahudi rerin erebent onnga erek rourou ojomuja guru.

¹⁵ Rusnok onnga rerin rudou onnga ebsi komowa bera ruroru mar onnga erek oufamofa ojomu. Tina rusnok onnga rudou ahtaboku rot rerin mar

ongga oska noba ongg runoruru Yesus Kristus guru bera ruhca mar ongg oska ojgomuja. Jeska mar ongg angh gij rudou efesi fob jera mar ongg rua runsujohu rot bera erek oska ojgomu.

¹⁶Rua ragot oida rua bera rururu Allah oga rot tenten fob. Tina gij mona ongg mimif mik mar ongg oska ongg rua runtunggom fob, beda mimif mijginaga rot oida rua runoruru Allah oga rot tenten jinaga guru. Rua rudou oska rot rusnok enjineg ojgomuja, noba rerin owesa efek jeskaseda rita mar ongg oufamofa jinaga guru.

2¹Erek koma, tina bua Titus buftuftu rot mar ongg tentenmen gu rusnok jah suma ojgomu.

²Buftuftu mar gu runer jeskaseda ribirfaga enerebibe rot mofut efei guru ni, rita mar rot rudou ongg ocosu efei ahtah ni, rut joug rudou efesi jeska mar ongg oska ni, rururu Allah oga rot ahais ojgomuja ni, rita rudou ongg okora rot rusnok enjineg erek tenten ni, rut rot ahais gij mar ongg ereneni rua ni.

³Beda bua bisisi joug rujoner jeskaseda rua tein rita riteij ah ongg onggoska jeni rujager ongg rururu Allah rot tenten fob. Enadaij nou rua ruga oruh rusnok enjineg jinaga guru. Noba ribirfaga enerebibe rot mofut efei ojgomuja guru. Ongg oufamofa bera rua rucunc rot mar ongg erek oufamofa ojgomu

⁴jeskaseda rujowu enjineg rimek fogora rimejginaga rot teinefa rua rudou okora rot rerin rahiner jera riser.

⁵Beda rujowu insa koma rumot joug rudou efesi jeska mar ongg oska fogora rimeita mar rot rudou ongg ebsi komowa ojgomu. Beda rua rifarur rot

iskusk gij rerin mod etma noba rumougif gu rerin rahiner tein. Rua rita mar onnga oufamofa erek insa koma jeskasada enadaj nou rusnok enjgineg ruga oruh Allah rot mar onnga rujager insa koma runtunggom onnga erek oska guru.

⁶Erek koma tein buis gu ruforoker runer jeskasada rua tein rut joug rudou efesi rot ahais jeska mar onnga oska ojgomu.

⁷Bua bisinsa tein bita mar nomnaga onnga erek oufamofa ojgomu jeskasada rusnok enjgineg jah suma rimek fogora rumororu mar insa koma tein. Noba gij mona onnga bua buftuftu mar, beda bagot mar insa koma rot budou onnga eriagamaga ojgomu, noba binagot mar onnga erek rourou gij mona insa koma guru.

⁸Bagot rot mar onnga erek tenten ojgomu jeskasada enadaj nou rusnok enjgineg ruga onoruh bua rot guru. Bita mar erek koma jeskasada enadaj nou rusnok enjgineg rik mar egema tein onnga bua buntunggom onnga erek oska jinaga guru. Beda mojenir rot mar onnga risinsa ranggot fob ojgomu.

⁹Beda bua bisisi joug rua onnga rumfij rerin ebirfager jeskasada rua rugif gu ebirfager insa koma rot tenten. Noba rua rita mar rot rudou onnga ocosu efei ahtah tein ojgomu. Enadaj nou rua ragot mar esesa sons gu rerin ebirfager insa koma guru.

¹⁰Noba enadaj nou rua rukoreka mar jeska rerin ebirfager insa koma tein guru. Tina onnga oufamofa bera rua rucunc rot oida rerin rudou onnga aharukamoka noba ruroru mar nomnaga onnga rerin ebirfager insa koma ranggot rot ojgomu. Rua rita mar erek insa koma nomnaga jeskasada rusnok enjgineg rimek fogora rimejginaga rot oida mar onnga mimif

muftufts osok gij Allah, onnga oskotu mimif, bera erek oufamofa ojgomu.

¹¹ Erek koma jeska Allah bera oncunc rot efen odou onnga oufamofa skoita rusnok nomnaga fob. Noba oisouska efen odou onnga oufamofa insa koma bera rusnok rimesma eiteij ah onnga efeinah si.

¹² Noba oisouska Allah odou onnga oufamofa insa koma bera mimif mijginaga rot oida munororu mar onnga eretei rot Ofa efen oga guru. Noba mimif mukoja mar onnga oska onnga oroku mudou efesi ojgomuja ni, mimif mut joug mudou efesi rot ahais gij mar koma nomnaga ni, mimif mita mar rot mudou onnga ebsi komowa ojgomu ni.

¹³ Mimif mita mar insa koma nomnaga askesi mimif muisum gij mona onnga Ofa emen rot efen ofoka aksa eteb. Jeska gij mona insa koma bera mimif mimek Yesus Kristus onnga erek Allah. Ofa bera onnga onskotu mimif jeska mifmin mar onnga oska fob.

¹⁴ Noba Ofa bera onnga aha esinsa gu rusnok onnga rufogog fogora agos. Ofa ontunggom mar koma jeskaseda osuwa mimif jeska mifmin mar nomnaga onnga ofogog. Beda oisouska mar insa koma bera Ofa ontunggom mimif erek efen rusnok onnga ebsi komowa fob. Jefeda mimif mudou os mita mar onnga oufamofa nou Ofa ojgomuja.

¹⁵ Erek koma jefeda bua buftufts rusnok jah suma rot mar insa koma nomnaga ojgomu. Bua bisisi joug rusnok rineya onnga rita mar onnga oufamofa, noba bagot joug rot buga ahais skoita rusnok rineya onnga rita mar onnga oska ros. Noba bita mar insa koma oisouska bebin owesa efek ojgomu. Enadaj nou

rusnok egema tein rita rudou onggga oska rot mar onggga bua buftufts insa koma jinaga guru.

3¹ Titus, bua bisisi joug rusnok jah suma juens deika jeskaseda rua rugif gu rerin ebirfager monuh nomnaga fogora ruroru mar nomnaga onggga rerin ebirfager runcunc gu rua fob ojgomu. Rua risejah rudou efesi jeskaseda rita mar nomnaga onggga erek oufamofa tein.

² Enadaj nou rua ruhurmei mar gij rusnok egema tein guru. Tina rua rita rudou onggga eriagamaga jera rusnok nomnaga noba rufij rua tein. Noba rua ruin keingg risinsa rufoka rot tenten skoita rusnok nomnaga ojgomu.

³ Sis fob mifmin mudou efesi onggga osumsumu rot mar insa koma nomnaga tein. Gij mona insa koma bera mimif mugif gu mar onggga oska nomnaga onggga oroku mudou efesi rot ojgomuja. Mifmin mudou onggga ejisei rot mar onggga rusnok enjgineg rerin ojgomuja, jefeda mudou ofogog rot rua. Noba mudou oska moguma ojgomuja.

⁴ Erek koma tina gij mona onggga Allah ocunc efen odou onggga oufamofa skoita mimif, beda Ofa oskotu mimif jeska mifmin mar onggga oska.

⁵ Noba Allah onskotu mimif oisouska mar onggga oufamofa onggga misinsa muntunggom fob jinaga guru. Tina Ofa oskotu mimif oisouska Ofa esinsa efen odou onggga eriaga rot mimif ojgomu. Ofa onskotu mimif oisouska Efena Ebsi onggga engker gij mudou efesi fogora eita eiteij ah onggga efeinah gu mimif. Jefeda mimif minja erek rusnok onggga efeinah deika.

⁶ Noba Ofa eita Efena Ebsi insa koma gu mimif rot odou onggga oufamofa oisouska Yesus Kristus onggga onskotu mimif jeska mifmin mar onggga oska fob.

⁷ Ofa ontunggom mar insa koma jeskaseda mimif misma mudou onnga ebsi komowa oisouska efen odou onnga oufamofa rot mimif ojgomu. Beda mimif muisum gij Ofa rot oida mimif mimesma eiteij ah onnga ah aibin fogora Ofa emeita mar onnga oufamofa eteb gu mimif erek efen efeser.

⁸ Mar onnga didif danggot insa koma bera erek tentenmen ojgomu. Noba bua buftuftu mar insa koma rot ahais gu rusnok jah suma jeskaseda rua onnga rudou eredi rot Allah fob bera rumoh rudou efesi ahais rot mar onnga oufamofa ojgomu. Jeska mar onnga oufamofa insa koma bera erek ongnoska eteb nou rusnok nomnaga. Noba mar koma omofij rua si.

⁹ Bua bibes bifaga jeska rusnok onnga ruga emesedema rot mar onnga erek rourou ni, jera mar onnga rusnok rimfesij osok gij rerin rufou ebiedi ni, era mar onnga rua ruga omosokuma rot ojgomuja ni. Jeska mar insa koma bera onofij rusnok egema tein jinaga guru.

¹⁰ Erek osnok egens oftuftu mar onnga orotunggom rusnok fogora rimekeinggma rot, beda biyahehir joug ofa rot ojgomu. Tina erek ofa onororu buga insa koma guru, beda biyahehir joug ofa juens deika. Tina erek ofa onororu buga insa koma tein guru, beda bibes bifaga jeska osnok egens koma ojgomu.

¹¹ Jeska osnok egens koma bera efen odou onnga ofogog ojgomu. Ofa odou os ororu mar onnga oska ojgomuja. Jefeda oisouska esinsa efen eita mar onnga oska bera ofa emesma okum eteb jeska Allah si.

¹² Didif dumobk Artemas era Tikhikus skoita bua si. Jefeda gij mona onnga gegema gen skoita bua

fob, beda bireni rot ahais jeskaseda bin skoita didif jah kota Nikopolis. Jeska didif dimeker gij kota egens koma onjoros mona onga mof meifeni oisa fob.

¹³ Noba bua bufij Zenas, onga ot deismos rot rusnok skoita Hakim jera Apolos tein gij mona onga goga genja jeskaseda gegang maat jera mar enjgineg tein onga adaij fogora gefarur gij Allah oga ojomu.

¹⁴ Bua buftuftu mifmin muhujir nomnaga jeskaseda rua ruh rudou efesi ahais rot mar onga rimfarur gij ojomuja. Beda orofosut mona bera rerin mar onga ofoufem nou rua fogora rineker gij riteij ah kef erek rourou guru.

¹⁵ Rusnok nomnaga onga ringker jah sif ruisu gu bua. Noba bua tein buisu gu mefmen muhujir nomnaga onga rudou okora rot memef. Didif dui gu Allah jeskaseda Ofa ocunc efen odou onga oufamofa eteb skoita bua ojomuja. Ainsoma.

Filemon

1 ¹ Didif Paulus, onnga dingker gij mod oskusk jeska didif duftu mar rot Yesus Kristus efen oga, bera onnga dunogu surat egens kef. Noba surat egens kef bera jeska Timotius tein onnga omfij didif jah sif. Didif dugu surat egens kef skoita bua Filemon onnga erek mefmen mohuj egens onnga modou okora rot. Noba bua tein bera onnga bufij Yesus Kristus rot efen oga morototuma jera memef. Didif disa surat egens kef skoita rusnok koma onnga rumohoturuma jeskaseda rum riteij gu Allah gij bebin mod tein. Noba didif disa surat egens kef skoita Apfia onnga erek mefmen meyesa tein jera Arkhipus onnga erek Yesus efen tentara egens tein.

²(1:1)

³ Didif dum diteij gu mifmin mika Allah jera Tuhan Yesus Kristus tein jeskaseda Ofa ocunc odou onnga oufamofa skoita iwa, noba jeskaseda Ofa eita idou efesi onnga eskeiramera ojgomuja.

⁴ Gij orofosut mona onnga didif dum diteij gu mika Allah bera didif dui oufamofa eteb gu Ofa rot bua.

⁵ Jeska didif dingg rot fob oida bua buroru Yesus Kristus rot tenten fob, noba budou okora rot rusnok nomnaga onnga rururu Ofa tein.

⁶ Noba didif dum diteij gu Allah jeskaseda gij mona onnga iwa imfesij rot teinefa iwa iroru Yesus Kristus gu rusnok enjgineng, beda rusnok koma rimek yeyin ita mar onnga erek ongoskamoka ojgomu. Ere koma jefeda rua rudou emebriyi gij rot teinefa Yesus

eita mar onnga oufamofa eteb gu mimif nomnaga onnga muroru Ofa rot tenten fob.

⁷ Noba mar onnga bua buntunggom nou rusnok enjineg oisouska budou onnga okora rot rua bera ereita didif dudou eskeira eteb noba erirei rot tein. Erek koma jeska bua bumfij Allah efen rusnok enjineg fogora rua rita rudou onnga ahais dokun deika.

⁸ Erek koma jefeda, ebeibeyaif didif dudou os direjgei mar jeska bua. Noba erek didif duku dufos fogora direjgei rot mar oisouska Yesus Kristus ofoka beda didif dijginaga rot oida bua bimeita mar insa koma si. Noba koma bera enerek oska guru.

⁹ Erek koma tina didif dinerejgei mar rot duga erek insa koma guru. Onnga tenten bera didif dudou os direjgei mar jeska bua oisouska dudou onnga okora rot bua ojgomu. Koma bera, didif, onnga dunokona fob, noba onnga dingker gij mod oskusk rot Yesus efen oga

¹⁰ bera direjgei bua osok gij dedin edohuj egens onnga enjerek dedin edesa fob. Jeska askesi didif dingker gij mod oskusk kef ros bera didif duroun ofa skoita Yesus fob. Ofa koma bera Onesimus.

¹¹ Noba didif dijginaga rot oida sis fob bera ofa onofij bua rot iskusk guru. Tina ebeibeyaif ofa bera erek osnok egens onnga ofij didif jera bua tein rot iskusk fob.

¹² Noba didif dubk ofa, onnga dudou okora eteb rot, sons skoita bua fob.

¹³ Noba onnga tenten bera, didif dudou os eteb jeskaseda ofa eker jera didif jah sif askesi dingker gij mod oskusk kef ros fogora ofij didif ojgomuja.

Beda koma tein erek ofa ofij didif oisouska bua bebin bufoka ojgomu.

¹⁴Tina didif dineita mar onnga ekirsa jeska meidu onnga bua budou os rot guru. Jeska didif dineita mar onnga erek eradgodu bua jeskaseda bufij didif rot erek koma guru. Erek bua budou os bufij didif rot, beda koma en jeska bua ojgomu.

¹⁵Onesimus onngu jeska bua gij mona onnga estir ojgomu. Noba koma jeskaseda gij mona kahma beda ofa omoksons noba ofij bua ojgomuja.

¹⁶Jeska ebeibeyaif ofa onoksons skoita bua erek bebin osnok egens onnga omfij bua ojgomu guru. Tina onnga oufamofa ekirsa bera ofa oksons en skoita bua erek bebin obohuj egens onnga ororu Yesus Kristus rot tenten fob. Koma bera, ofa erek osnok egens onnga ofoufem nou didif, tina ofa erek ofoufem ekirsa nou bua tein. Jeska ofa enerek bebin osnok egens onnga omfij bua ojgomu guru, tina ofa tein bera erek bebin obohuj onnga erek Kristen fob.

¹⁷Erek koma jefeda, erek bua busujohu rot oida bua bifarur rot Yesus Kristus morototuma erek egens jera didif ei, beda buroun Onesimus rot budou onnga eskeiramera rot ofa morototuma erek bua buroun didif teina.

¹⁸Noba erek ofa eita mar onnga oska gu bua fob, era erek bebin mar okowu onnga ah gu ofa, beda didif dumoh bebin mar okowu insa koma tera ofa si.

¹⁹Didif Paulus, bera dugu keingg rot disinsa dedin ditma oida, "Didif dumoh bebin mar okowu insa koma tera ofa si." Erek koma tina budou onfoj joug guru rot oida bua bisma eiteij ah onnga efeinah jeska didif dumftuftu rot Yesus oga onnga oufamofa gu bua sis fob.

²⁰ Jefeda, edohuj onnga dudou okora rot, bua bita mar erek Kristen egens onnga ororu Tuhan rot tenten fob fogora buroun Onesimus sons rot budou onnga eriagamaga ojgomu. Koma tein bera emeita dudou erirei eteb rot si.

²¹ Didif disa surat egens kef skoita bua jeska didif dijginaga rot oida bua bimeita mar insa koma erek jeni si. Noba bua bimeita mar onnga oufamofa erek bugun dokun deika rot tein.

²² Erek koma noba bua bisejah bebin mer efesi egens jah nou didif. Jeska didif duisum gij Allah rot oida Ofa emeita mar onnga bua bum biteij rot fogora omosuwa didif jeska mod oskusk insa kef. Beda didif dimen skoita iwa jah kota Kolose.

²³ Epafra tein oisu iwa. Ofa bera erek dedin edohuj egens onnga engker morototuma jera didif gij mod oskusk jeska ofa tein oftufu rot Yesus efen oga onnga oufamofa.

²⁴ Noba Markus ni, Aristarkus ni, Demas ni, Lukas ni, rua nomnaga onnga rifarur morototuma jera didif jah sif bera ruisu iwa tein.

²⁵ Didif dum diteij gu Tuhan Yesus Kristus jeskaseda Ofa eita oufamofa eteb gu iwa nomnaga. Ainsoma.

Ibrani

1 ¹ Gij mona onnga sismeni eteb fob bera Allah anggot mar ofoukou skoita mifmin mimower. Ofa anggot mar koma oisouska mar onnga Ofa oncunc gu efen nabi-nabi gij rudou efesi. Noba Ofa era efen moroju onnga erek ofoukou jeskasada oroftuftu rot efen oga gu nabi-nabi insa koma. Beda rua riflesij rot mar insa koma gu rusnok enjginég.

² Erek koma tina, gij mona onnga enja ejgwaga insa kef bera Ofa anggot mar skoita mimif oisouska efen efesa Yesus Kristus. Noba oisouska Yesus Kristus bera Allah ontunggom mar nomnaga. Noba Ofa bera onnga Allah oncunc jeskasada eja erek ebirfaga onnga ofoka aksa egens rot mar nomnaga tein.

³ Ofa bera onnga orocunc erek jeni rot Allah efen ofoka onnga aksa eteb noba onnga eskeira eteb tein. Noba Ofa bera onnga otunggom mar nomnaga jeni erek Allah otunggom mar tein. Noba oisouska efen oga bera Ofa agei joug mar nomnaga rot owesa efek eteb tein. Noba gij mona onnga Ofa aha esinsa jeskasada agos tumu mega salib, beda Ofa onsuna rot rusnok rerin mar onnga oska nomnaga fob. Beda Ofa eja eker desi Allah gu mebaga. Beda jah suma bera Ofa ofoka ereij keingg mar nomnaga oisouska efen owesa erek eteb morototuma jera Allah onnga efen ofoka aksa eteb tein.

⁴ Erek koma jefeda Allah oncunc rot oida Yesus bera efen ofoka onnga aksa ekirsa jeska malaikat-malaikat tein. Noba koma bera onnga orocunc rot oida Ofa

efen owesa efek onnga ekirsa jeska malaikat-malaikat nomnaga tein.

⁵Erek koma jeska gij Mar Efeyi Ebsi bera Allah enagot gu malaikat-malaikat rot mar insa kef guru. Ofa agot oida, "Deisef bera Didif dagot rot tomnomna oida Bua bera dedin edesa noba Didif bera erek bebin mekeb."

⁶Ofa agot mar insa koma osok gij Yesus Kristus ojgomu. Jeska nou onnga Ofa omobk Yesus jah gu mebif, beda rusnok rungu gij Mar Efeyi Ebsi rot sismeni oida, "Allah efen malaikat-malaikat nomnaga bera rugif gu Ofa ojgomu."

⁷Noba mimif mijginaga rot oida Yesus ofoka bera aksa ekirsa jeska malaikat-malaikat, jeska rusnok rungu gij Mar Efeyi Ebsi oida, "Malaikat-malaikat onnga Allah obk bera erek mof eteb. Ofa obk malaikat-malaikat koma onnga rumfij Ofa erek mah eisa egigir eteb."

⁸Tina rungu gij Mar Efeyi Ebsi osok gij mar egens mar enjgineg deika onnga Allah anggot rot efen efesa Yesus erek kef oida, "Edesa, Bua bera bufoka ereij keingg mar nomnaga nou mona onnga ah aibin ojgomuja. Noba Bua bufoka ereij keingg mar nomnaga rot budou efesi onnga aharukamoka ojgomu tein.

⁹Bua budou okora rot rusnok onnga runotunggom mar onnga oska oskiyai tein guru. Noba Bua bukoja rusnok nomnaga onnga rutunggom mar onnga ofogog. Beda Didif onnga bebin mekeb bera dimeita budou efesi onnga erirei eteb ekirsa jeska rusnok nomnaga si."

¹⁰Erek koma tein, rusnok rungu mar osok gij Yesus erek kef oida, "Tuhan, gij mona onnga bua

butunggom mar nomnaga rot sismeni, beda Bua buntunggom mebif nomnaga fob. Noba Bua tein buntunggom mar nomnaga onggga angh gij mebaga tein.

¹¹ Noba mar insa koma nomnaga bera emeja oska erek meisoufa onggga efeyei eteb onggga eja erek oska. Beda mar koma nomnaga bera emeseiseifa si. Tina Bua bera biker rot mona onggga ah aibin ojgomuja. Noba Bua bumohoda rot mar insa koma nomnaga fogora bimeferwei mar koma jera mar onggga erek efeinah deika. Koma erek osnok egens onggga eij efen meisoufa onggga efeyei eteb jah fogora eferwei rot meisoufa onggga efeinah deika. Tina Bua bineja erek mar onggga efeyei fob jinaga guru. Bua bera biker rot mona onggga ah aibin ojgomuja."

¹² (1:11)

¹³ Noba mar kef onggga Allah anggot gu Yesus bera Ofa enagot gu malaikat-malaikat tein guru. Ofa anggot oida, "Bua biker desi Didif rot bufoka onggga aksa eteb, noba Didif dumoin keingg mesa nomnaga fogora rumougif gu Bua si."

¹⁴ Allah agot mar insa koma gu Yesus Kristus ojgomu. Jeska efen malaikat-malaikat insa koma bera erek mar onggga Ofa obk skoita rusnok onggga rimesma eiteij ah onggga ah aibin jeskaseda rufij rua ojgomu.

2¹ Erek koma jefeda mimif muh mudou efesi rot ahais ojgomu osok gij mar insa koma onggga rusnok rungggu gij Mar Efeyi Ebsi sis fob ojgomuja. Beda mimif mita mar erek koma jeskaseda minekikif deci deci jeska mar insa koma onggga tenten fogora minaha mar koma jah jinaga guru.

² Mimif mijginaga rot oida Allah efen oga onnga Ofa eita gu rusnok oisouska malaikat-malaikat sis fob bera erek tenten ojgomu. Noba mimif tein mijginaga rot oida Allah omofra mar okum eteb keingg rusnok nomnaga onnga ringkirsarot efen oga insa koma era onnga runororu rot tenten tein guru.

³ Allah oga insa koma bera efen owesa efek eteb noba efesij rot teinefa rusnok risma eiteij ah onnga efeinah. Tina erek mifmin mudou eskes rot, beda mimif munosuwa jeska mar okum koma guru. Noba Tuhan Yesus bera onnga emfesij rot oga insa koma skoita rusnok rot sismeni fob. Beda rusnok koma rimfesij rot gu mimif oida oga insa koma bera erek tenten ojgomu.

⁴ Noba Allah tein oncunc rot oida oga insa koma bera erek tenten ojgomu. Ofa otunggom mar koma oisouska owesa efek onnga Ofa eita gu rusnok jeskaseda rutunggom mar onswos gu rusnok rufoukou rifelesa. Noba rua rutunggom mar enjineg tein rot owesa efek jeska Allah. Beda rua tein rutunggom mar oisouska owesa efek onnga Efena Ebsi oncunc gu rua orofosut osnok egens egens gij rudou efesi fob. Noba mar koma bera ororu Allah odou ejginaga rot tein.

⁵ Mimif mijginaga rot oida Allah onocunc malaikat-malaikat jeskaseda rufoka ereij keingg rusnok gij mona efeinah onnga emen guru. Tina Ofa ocunc rusnok jeskaseda rufoka ereij keingg mar nomnaga gij mona insa koma. Ainsa kef bera didif difesij rot mona egens koma onnga emen ojgomu.

⁶ Jeska sis fob bera osnok egens onngu mar gij Mar Efeyi Ebsi onnga eragot rot tenten osok gij mar insa koma. Ofa onngu rot oida, "Rusnok mebif bera erek

mar onnga onofoufem guru. Rua nomnaga bera erek Adam efen efeser onnga runjuj jeska ofa ojgomu. Erek koma tina Bua Allah bera budou efeneinei rot bebin rusnok ros. Jefeda Bua budou os bufij rua ojgomuja.

⁷ Noba ebeibeyaif bera malaikat-malaikat rerin owesa efek onnga ekirsa oskiyai jeska rusnok, tina Bua bumfra rusnok rufoka aksa erek raja onnga rineya rugif gu.

⁸ Noba Bua buncunc rusnok fob jeskaseda rufoka ereij keingg mar nomnaga tein." Mar egens insa koma agot rot oida, "Bua buncunc rusnok fob jeskaseda rufoka ereij keingg mar nomnaga." Noba koma bera erek tenten ojgomu. Erek koma tein, gij mona ebeibeyaif bera mimif minek rusnok egema onnga rufoka ereij keingg mar erek koma enesi.

⁹ Tina mimif mijjinaga rot oida gij mona onnga sismeni fob bera Allah eita owesa efek gu malaikat-malaikat onnga ekirsa oskiyai jeska owesa efek onnga Ofa eita gu Yesus gu mebif. Allah ontunggom mar erek koma oisouska odou onnga eskeira rot mimif jeskaseda Yesus Kristus agos tumu mega salib nou rusnok nomnaga. Noba ebeibeyaif Yesus bera esma ofoka onnga aksa eteb noba onnga rusnok rugif gu. Jeska Ofa bera eita efera okora fogora agos nou mifmin mar onnga oska fob.

¹⁰ Allah bera onnga ontunggom mar nomnaga, noba mar nomnaga ah oisouska Ofa ojgomu. Noba Ofa bera oitij rot oida Yesus Kristus eita efera okora tein. Jeska sis fob bera Allah ensejah mar insa koma nou Yesus jeskaseda Ofa eja okag rot efen rusnok nomnaga rot rerin eiteij ah onnga efeinah. Noba mar

koma onggga Allah ontunggom bera erek oufamofa eteb.

¹¹ Yesus bera eja erek egens jera rusnok onggga risma rudou onggga ebsi komowa fob. Noba Ofa bera onggga eita rudou onggga ebsi komowa gu rua tein. Jefeda mojenen Ofa rot rusnok insa koma tein guru, tina Ofa ejeka rua erek Ofa efen mokoser jera meiyeser.

¹² Noba mar onggga runggu gij Mar Efeyi Ebsi osok gij mar insa koma bera oida, "Didif dimagot rot bebin bufoka gu dedin edkoser jera edieser. Noba Didif dimesitit rot bebin bufoka gu rusnok rifekesa gij mona onggga rua rumohoturuma ojgomu."

¹³ Noba mar egens enjgineg tein gij Mar Efeyi Ebsi bera agot rot Yesus erek kef oida, "Didif dudou emeredi Ofa ojgomuja." Noba gij Mar Efeyi Ebsi bera Yesus agot oida, "Didif diker jah sif morototuma jera dedin edeser jera edieser onggga Allah eita gu Didif fob."

¹⁴ Erek koma noba, Allah efen efeser nomnaga onggga rirek rusnok giskini ojgomu, jefeda Yesus Kristus tein en gu mebif erek osnok egens onggga giskini tein. Ofa eita mar erek koma jeskaseda oisouska Ofa onggga anggus tumu mega salib bera Ofa orohoda rot Bilis efen owesa efek nomnaga. Jeska Bilis bera onggga eita mar onggga oska skoita rusnok fogora riseiseifa ojgomuja.

¹⁵ Noba Yesus ontunggom mar insa koma jeskaseda rusnok nomnaga rinemeesa rot mona onggga rua ranggos deika guru.

¹⁶ Yesus onotunggom mar insa koma jeskaseda ofij malaikat-malaikat rot guru. Tina Ofa otunggom mar insa koma jeskaseda ofij rusnok onggga runjuj jeska

Abraham jera rusnok enjgineg tein onggga runojuj jeska Abraham guru tein.

¹⁷ Erek koma noba, jeska Ofa odou os ofij rusnok nomnaga, jefeda Ofa en erek osnok egens onggga giskini tein. Beda Ofa ejeka rusnok erek efen mokoser jera meiyeser tein. Ofa otunggom mar insa koma jeskaseda Ofa eja erek rusnok rerin ebirfaga imam egens onggga ocunc rot efen odou onggga oufamofa skoita rua. Noba Ofa bera onggga ofij Allah rot tenten gij mar insa koma ojgomuja. Ofa otunggom mar insa koma jeskaseda rusnok rerin mar onggga oska bera enah gu rua deika guru.

¹⁸ Noba Ofa bera efen owesa efek adaij nou ofij rusnok onggga rita efera okora gij mona onggga rusnok enjgineg rireneni rua tein. Jeska Ofa tein bera eita odou efera okora gij mona onggga rusnok rireneni Ofa sis fob.

3¹ Edohuji, Allah bera enjeka iwa morototuma jera didif erek Ofa efen rusnok onggga rudou ebsi komowa. Jefeda iwa isujohu rot koisoisa osok gij Yesus Kristus ojgomu. Jeska Ofa bera onggga Allah ombk jeskaseda efesij rot efen oga gu rusnok nomnaga. Noba Ofa bera onggga Allah ombk jeskaseda eja erek mifmin ebirfaga imam egens onggga ofoka aksa. Noba mimif magot rot oida mudou ororu Ofa rot tenten ojgomuja.

² Allah oncunc Ofa erek ebirfaga imam egens, noba Ofa otunggom mar nomnaga onggga Allah odou os rot. Koma tein erek Musa onggga ontunggom mar nomnaga onggga Allah ocunc gu ofa nou efen rusnok sis fob.

³ Noba Yesus bera efen ofoka onggga aksa ekirsa jeska Musa. Erek koma jeska giskini rusnok runougif

gu mod egens onnga osnok egens ei fob guru. Tina rua rugif gu ofa onnga enei mod insa koma. Jefeda rusnok runougif gu Musa guru, tina rua rugif gu Yesus ojgomu.

⁴Koma tenten, jeska mod nomnaga onnga onotuma bera rusnok enjgineg rii fob. Tina Allah bera onnga ontunggom mar nomnaga.

⁵Noba Musa omfij Allah efen rusnok rot tenten, erek osnok egens ofij efen ebirfaga ojgomu. Jefeda ofa ougif gu Allah fogora emfesij gu rusnok rot mar onnga angh gij mona kahma ros tein.

⁶Tina Yesus bera ofij efen meka Allah rot tenten ojgomu, jeska Ofa bera onnga Allah oncunc erek mifmin ebirfaga egens fob. Noba erek mimif muku mufos rot fogora muisum gij Yesus nou mar onnga Allah emeita gu mimif, beda Allah omocunc mimif erek efen rusnok ojgomuja si.

⁷Yesus bera erek mifmin ebirfaga imam egens, jefeda iwa idou ah keingg rot mar onnga runggu gij Mar Efeyi Ebsi oisouska Efena Ebsi Allah erek kef oida, "Ebeibeyaif, erek iwa ig mar onnga Allah anggot gu iwa gij idou efesi fob,

⁸beda iwa inokoja mar koma rot idou onnga osumsumu guru.

⁹Jeska koma bera onnga yeyin imower rusnok onnga Israel runtunggom sis fob. Rua rikikif jeska Ofa gij mona onnga rua rincira gij monuh onnga mebi oska. Noba gij tahun rara setka tohkuru bera rua rik mar onswos nomnaga onnga Allah ontunggom jah gu rifekesa. Tina rua rirenene Allah rot mar onnga oska onnga rua runtunggom gij mona insa koma ojgomuja.

¹⁰ Jefeda gij mona insa koma bera Didif dudou okum eteb rot rua, beda Didif dagot oida rua runougif nou dedin duga jinaga guru, noba rua rudou osumsumu rot mar onggga Didif dudou os jeska rua ojgomu.

¹¹ Ebeibeyaif Didif dudou okum eteb rot rua. Jefeda Didif danggen rot oida rua runoira gij monuh onggga ongnoska koma guru. Fogora rua rineker keingg rufons rot rerin mar okum jah suma tein jinaga guru."

¹² Erek koma jefeda, edohuji, didif dui gu iwa jeskaseda iwa ineita idou efesi onggga ofogog erek yeyin imower insa koma onggga ringkikif jeska Allah onggga eker rot ah aibin tein jinaga guru.

¹³ Tina jeska mona efekesa enahuma ros, jefeda iwa imeisisima joug moguma ojgomuja. Iwa ita mar erek koma jeskaseda iwa inocuwei mar gu isinsa oisouska yeyin mar onggga oska onggga orotunggom idou efesi erek eskes rot Allah oga guru.

¹⁴ Jeska erek mudou ot rot Ofa efen oga ojgomuja, morototuma erek mona onggga mimif munroru Ofa erek efeinah ros, beda mimif mimesma mar nomnaga onggga ongnoska morototuma jera Ofa si.

¹⁵ Koma bera tenten, jeska rusnok runggu gij Mar Efeyi Ebsi erek kef oida, "Ebeibeyaif, erek iwa idou ebriyi gij mar onggga Allah anggot rot gu iwa gij idou efesi fob, beda iwa inokoja rot mar koma jera idou onggga osumsumu ojgomu guru. Jeska yeyin imower rungkoja rot mar koma sis fob. Rua rikikif jeska Ofa gij mona onggga rua rincira gu monuh onggga mebi oska."

¹⁶ Iwa idou ah keingg rot mar onggga yeyin imower insa koma runtunggom sis fob ojgomu. Jeska rua bera onggga ruroru Musa gij mona onggga rua rurogna jeska monuh Mesir. Noba gij mona insa koma rua rig

Allah oga noba rik mar onswos ofoukou tein onnga Ofa ontunggom jah gu rifelesa fob. Tina rua ringkikif jeska Ofa ojgomu.

¹⁷ Noba iwa idou ah keingg rot oida Allah odou okum eteb skoita rua rot tahun rara setka tohkuru fob, jeska rua rutunggom mar onnga oska ojgomuja. Jefeda rusnok rufoukou jeska rua bera ranggos askesi rua rincira gij monuh onnga mebi oska insa koma.

¹⁸ Noba jeska rua onnga Israel insa koma runororu Allah oga rot tenten guru, jefeda Ofa agen rot oida rua runoira gij monuh onnga ongnoska koma guru. Fogora rua rineker keingg rufons rot rerin mar okum jah suma tein guru.

¹⁹ Erek koma jefeda mimif mijginaga rot oida rua runoira gij monuh onnga ongnoska insa koma guru, jeska rua rudou onororu Allah rot tenten jinaga guru.

4¹ Allah bera anggen rot oida mimif tein mimeker keingg mufons rot mifmin mar okum ojgomuja si. Jefeda mimif nomnaga mut joug mudou efesi rot ahais ojgomu jeskaseda rineya jeska mimif minesiri gij mar onnga oska fogora minesma mar onnga oufamofa koma onnga Allah anggen rot guru.

² Jeska mimif mingg mar onnga Allah anggen rot oisouska efen oga onnga oufamofa skoita mimif fob. Jefeda iwa isujohu osok gij rusnok Israel onnga riker sis fob. Jeska rua tein ringg mar onnga Allah anggen rot gu rua fob. Tina mar koma onofij rua jinaga guru, jeska rua runororu efen oga rot tenten guru. Noba erek mimif tein munororu Ofa efen oga onnga oufamofa guru, beda mar insa koma onnga Ofa anggen rot gu mimif bera onofij mimif tein jinaga guru.

³ Erek koma, tina mimif onggaga muroru Allah oga onggaga oufamofa osok gij Yesus Kristus fob bera miker keingg mufons rot mifmin mar okum ojgomuja. Noba mimif mijjinaga rot oida mar insa koma bera tenten ojgomu. Jeska sis fob Allah agot mar osok gij rua onggaga Israel erek kef oida, "Didif dudou okum eteb rot iwa onggaga Israel. Jefeda Didif dagen rot oida rua rineker keingg rufons rot rerin mar okum jinaga guru." Erek Allah esinsa engker keingg ofons rot mar onggaga Ofa otunggom gu mebif sis fob, tina Ofa agot mar insa koma rot rua onggaga Israel insa koma ojgomu.

⁴ Koma tenten, jeska gij Mar Efeyi Ebsi bera rusnok runggu mar osok gij mar onggaga Allah ontunggom gij mona onggaga cinja erfeka fob. Rua runggu oida, "Gij mona onggaga cinja erfeka, beda Allah eker keingg ofons, jefeda Ofa onotunggom mar deika guru."

⁵ Tina iwa ik juens deika rot mar onggaga runggu osok gij rua onggaga Israel. Jeska gij mar egens insa koma bera Allah agot oida, "Rua rineker keingg rufons rot rerin mar onggaga okum jinaga guru."

⁶ Sis fob rineya onggaga Israel ringg rot Allah efen oga, tina rua runoruru Ofa efen oga onggaga oufamofa insa koma guru. Jefeda Ofa okoja rua jeskaseda runoira gij monuh egens onggaga ongnoska eteb guru. Beda rua rineker keingg rufons rot rerin mar okum jah suma tein guru. Tina gij mona onggaga egema deika beda Allah odou os rot oida rusnok rineya riker keingg rufons rot rerin mar okum jah suma fog tein.

⁷ Noba mona onggaga egema deika insa koma bera erek mona ebeibeyaif tein. Sismeni eteb fob bera Allah anggot rot mona onggaga ebeibeyaif oisouska raja Daud. Raja Daud agot oida, "Gij mona ebeibeyaif

tein, erek iwa idou ebriyi gij mar onggga Allah anggot gu iwa gij idou efesi fob, beda iwa inokoja mar koma rot idou onggga osumsumu guru."

⁸ Noba gij mar insa koma bera Allah enagot mar osok gij mona onggga Yosua ongakag rot rua onggga Israel gij monuh onggga onggkoska sis fob guru. Jeska gij mar egens koma Ofa bera agot rot mona kahma onggga ah yes ros.

⁹ Mimif mijginaga rot oida mona onggga rusnok ringker keingg rufons rot rerin mar okum bera enahuma ros.

¹⁰ Jefeda, ebeibeyaif Allah efen rusnok rinecira rot rerin mar okum deika guru, tina rua riker keingg rufons rot rerin mar okum koma ojgomuja. Jeska gij mona onggga Allah otunggom mar nomnaga oisa fob, beda Ofa tein engker keingg ofons.

¹¹ Erek koma jefeda mimif tein muh mudou efesi gu Allah rot efen oga insa koma jeskaseda mingker keingg mufons rot mifmin mar okum tein ojgomuja. Mimif mita mar erek koma ojgomu jeskaseda minesiri gij mar onggga oska erek rua onggga Israel rinsiri gij sis fob guru. Jeska rua runororu Allah oga rot tenten guru.

¹² Mimif muh mudou efesi rot onggkas gu Allah erek koma, jeska Ofa efen oga bera erek mar onggga efena ebah rot owesa efek eteb tein. Ofa efen oga insa koma bera erek meiteb kalawan onggga efeya doska. Rusnok rira meiteb kalawan insa koma rireris marska fogora rik rot onggga ojga gij efen ofoufu erek koisoisa. Beda erek koma tein Allah oga bera onggga orocunc rot koisoisa gij mudou efesi rot mar onggga oska jera mar onggga oufamofa tein.

¹³ Noba enadaj nou rusnok ridemдеми mar egema tein gij rudou efesi jeska Allah jinaga guru. Jeska Ofa efen owesa efek adaj nou ek tumu mar nomnaga onnga angh gu mebif nomnaga. Noba gij mona kahma deika bera Ofa emejeka joug mimif rot mifmin mita mar nomnaga si.

¹⁴ Erek koma noba mimif mifmin imam egens onnga ofoka aksa. Ofa bera onnga ot deismos nou mimif skoita Allah rot mifmin mar onnga oska. Ofa bera Yesus Kristus onnga Allah efen efesa, noba onnga Ofa omfra jah mebaga fob. Noba erek mimif magot rot oida mudou ororu Ofa efen oga fob tein, jefeda mimif muroru oga insa koma rot ahais ojgomu.

¹⁵ Noba Yesus, onnga erek mifmin imam egens onnga ofoka aksa, bera ejjinaga rot teinefa mifmin mudou efesi enahais rot mar onnga ereneni mimif guru. Jeska gij mona onnga Ofa engker gu mebif ros, beda mar okum ereneni Ofa tein. Tina Ofa enesiri gu mar koma jinaga guru.

¹⁶ Jefeda oufa nou mimif tein mirejgei mar jeska Allah rot mudou onnga enemeesa guru. Jeska Ofa bera onnga ofoka ereij keingg rusnok nomnaga rot odou onnga oufamofa eteb. Mimif mirejgei Ofa rot mar erek koma jeskaseda Ofa omofij mimif rot odou onnga eskeira gij mona onnga mar ereneni mimif. Beda mimif mimesma mudou efesi onnga ahais rot si.

5¹ Imam-imam jeska rusnok onnga Yahudi bera erek rusnok giskini ojgomu. Noba sis fob bera Allah oncunc rua jeskaseda rut deismos nou rusnok enjgineg skoita Ofa. Imam-imam rumorka mar jeskaseda rimeita gu Allah. Beda rua ris mah gij marska erek mar onnga rurougif gu Ofa. Beda Ofa

osuna rot rusnok enjgineg koma rerin mar ongg
oska.

²Noba imam-imam insa koma bera rufij rusnok
ojgomu. Jeska rusnok bera rutunggom mar ongg
oska rot rudou ongg osumsumu ojgomu noba rua
ringkikif jeska Allah tein. Tina imam-imam koma rufij
rusnok insa koma rot rudou ongg eskeira ojgomu.
Jeska rua rijginaga rot oida rua tein rerin rudou
ongg eriaga noba ongg runtunggom mar ongg
oska morototuma erek rusnok insa koma tein.

³Jefeda rua ris mah gij marska insa koma skoita
Allah nou risinsa rerin mar ongg oska sismeni fog.
Beda rua rutunggom mar erek koma juens deika rot
rusnok enjgineg rerin mar ongg oska tein.

⁴Rusnok runocunc risinsa jeskaseda rija erek Allah
efen imam guru. Tina Allah bera ongg ocunc rua
erek efen imam-imam. Koma erek Allah oncunc Musa
efen mokosa Harun erek efen imam egens sis fob.

⁵Erek koma tein, Yesus onofra esinsa ofoka aksa
fogora eja erek imam egens tein guru. Tina Allah
oncunc Ofa efek imam egens gij mona ongg
Ofa anggot gu Yesus oida, "Deisef Didif dagot rot
tomnomna oida Bua bera dedin edesa noba, Didif
bera bebin mekeb."

⁶Noba gij mar egens ongg enjgineg bera Ofa agot
rot Yesus oida, "Didif ducunc Bua erek dedin imam
egens morototuma erek dedin imam egens ongg
ofoka Melkisedek."

⁷Gij mona ongg Yesus engker gu mebif ros, beda
Ofa om eiteij rot ahais gu Allah askesi efen odou
okumkum rot mar ongg ah keingg Ofa. Ofa om eiteij
erek koma jeskaseda Allah omofij Ofa rot mar ongg
okum insa koma. Noba Allah omfij Ofa rot, jeska Ofa

bera osnok egens onggga ougif gu Allah rot tenten oigomu.

⁸Ofa bera Allah efen efesa. Tina oisouska mar okum onggga angh keingg Ofa bera Ofa eita odou onggga ebriyi gij rot teinefa Ofa ougif gu Allah rot efen oga oigomuja.

⁹Noba gij mona onggga Ofa ontunggom mar nomnaga onggga Allah ombk Ofa rot erek oisa fob, beda Ofa esma ofoka onggga aksa eteb ekirsa jeska mar nomnaga. Jefeda Ofa efen owesa efek onggga adaij nou oskotu rusnok nomnaga onggga rugif gu Ofa rot efen oga tein.

¹⁰Erek koma beda Allah oncunc Ofa erek imam egens morototuma erek Allah efen imam egens onggga ofoka Melkisedek.

¹¹Memef modou os moftuftu iwa deika osok gij mar insa koma, tina koma bera okum nou memef, jeska iwa idou enebriyi gij mar insa koma erek eteb enesi.

¹²Erek koma tina iwa inroru Yesus Kristus efen oga erek dektek fob. Jefeda memef mosujohu rot oida adaij nou iwa yuftuftu rusnok enjineg rot mar insa koma nomnaga, tina guri. Jeska iwa idou os oida memef moftuftu mar onggga erek osufou rot Allah oga gu iwa deika sons oigomu. Koma erek rusnok onggga rita mengk gu osnok egens onggga orna fob jeska enadaij nou ofa et marska enesi.

¹³Jefeda rusnok onggga ruroru Yesus Kristus rot dektek fob, tina rudou onororu Efena Ebsi Allah rot tenten enesi, beda rua rinejginaga jeni rot mar meidu onggga oufamofa jera mar meidu onggga erek oska tein enesi.

¹⁴Tina rusnok onggga rufokor gij Allah efen oga fob, noba onggga ruroru Efena Ebsi Allah rot tenten fob,

rua bera onnga rijginaga jeni rot mar meidu onnga oufamofa jera mar meidu onnga oska tein.

6¹ Ere koma jefeda, onnga oufa bera iwa ifokor gij Allah efen oga erek eteb ekirsa deika ojgomu. Enadaij nou iwa ifokor rot mar onnga memef moftuftu gu iwa rot sismeni ojgomu guru. Jeska mar koma bera nou rusnok onnga ruroru Yesus Kristus erek efeinah ros. Enadaij nou memef moftuftu gu iwa deika oida imeesa joug rot yeyin mar onnga oska jeskaseda ineseiseifa guru ni, era oida iroru Yesus Kristus rot tenten ojgomu ni,

² era eita baptis gu rusnok ni, era osok gij owesa efek onnga Allah eita gu rusnok oisouska Efena Ebsi ni, era osok gij rot teinefa rusnok rimedebecki jeska ranggos ni, era osok gij rot teinefa Allah omofra mar okum keingg rusnok nomnaga onnga rutunggom mar onnga oska tein ni. Jeska iwa ijginaga rot mar insa koma nomnaga fob.

³ Noba oisouska Allah odou ejginaga rot bera memef momoftuftu iwa rot mar onnga erek ekirsa deika jeska mar insa koma nomnaga si.

⁴ Memef modou os moftuftu rot Allah oga erek ekirsa deika gu iwa. Jeska erek osnok egens ororu Yesus Kristus efen oga fob, tina ofa ekikif fogora okoja rot oga insa koma, beda ofa emeseiseifa si. Noba enadaij nou rusnok enjgineg ruroun ofa sons skoita Allah jinaga guru. Ere koma jeska, erek osnok egens odou ebriyi gij Allah efen oga osok gij Yesus Kristus fob ni, erek ofa esma mar onnga ongnoska jeska Allah fob ni, erek Efena Ebsi engker gij odou efesi fob ni,

⁵ erek ofa ensma oufamofa eteb jeska Allah efen oga fob ni, erek ofa ek Allah efen owesa efek onnga

omorogna keingg rusnok nomnaga gij mona onnga enja ejgwaga fob ni,

⁶tina ofa ekikif fogora okoja mar insa koma nomnaga, beda enadaij nou rusnok enjgineg ruroun ofa sons skoita Allah jinaga guru. Jeska mar onnga ofa ontunggom insa koma bera erek ofa esinsa otob Yesus Kristus tumu mega salib fob. Noba koma bera erek ofa oga oruh Yesus rot tomnomna gu rusnok nomnaga rudou tein.

⁷Gij mona onnga mos ens, beda mebi mekeni eja erek ofogu rara. Jefeda rusnok onnga rif mekeni koma risma maat ofoukou. Noba koma bera erek mar onnga oufamofa eteb onnga en jeska Allah. Koma tein bera erek rusnok onnga ruroru Yesus Kristus fob. Jeska erek rua rutunggom mar onnga ereita Allah odou eskeira rot ojgomuja, beda Ofa emeita oufamofa deika gu rua si.

⁸Tina mebi mekeni onnga ebera rot moworug ofogog bera erek oska ojgomu, noba rusnok rukoja fogora rinerefa maat gij guru. Dektek deika guru, beda rua rimes mah gij mekeni insa koma ojgomu fogora eseseifa. Erek koma tein rot rua onnga rikikif jeska Allah efen oga fogora rutunggom mar onnga oska deika sons fob. Jeska Allah bera omofra mar okum eteb keingg rua rot si, beda rua rimeseseifa ojgomu.

⁹Edohuji onnga modou okora rot, memef mejginaga rot oida iwa bera inerek rusnok insa koma onnga ringkikif jeska Allah fob guru. Jeska iwa bera intunggom mar jeni erek rusnok onnga Allah onskotu jeska rerin mar onnga oska fob.

¹⁰Allah bera erek oufa ojgomu, noba Ofa ek rot teinefa iwa imfarur rot ahais nou Ofa fob. Noba

Ofa ek rot teinefa iwa icunc idou onнга okora rot Ofa askesi iwa yufij rusnok Kristen enjgineg tein oјgomuja. Jefeda Ofa emeita oufamofa eteb gu iwa rot si.

¹¹ Memef modou os rot oida iwa ita mar erek insa koma oјgomuja onјoros iwa insma mar nomnaga onнга iwa yuisum gij Ofa rot.

¹² Iwa ineita idou onнга eskes rot guru. Tina yuin keingg idou efesi oјgomuja fogora iroru Allah oga rot tenten oјgomuja. Beda iwa imesma mar nomnaga onнга Allah anggen rot nou efen rusnok si.

¹³ Gij mona onнга sismeni eteb fob bera Allah agen gu Abraham rot oida, "Rusnok onнга runјuj jeska bua noba onнга rumougif gu Didif bera rimeja erek rufoukou doska." Beda Allah agen deika rot oida, erek Ofa eneita mar insa koma gu Abraham guru, beda Ofa omocunc esinsa erek oska. Ofa agot mar erek koma jeska enadaiј nou rusnok enjgineg rucunc Allah erek oska guru.

¹⁴ (6:13)

¹⁵ Jefeda Abraham oin keingg esinsa odou efesi fogora eker rot mar insa koma onнга Allah anggen rot gu ofa oјgomu. Noba gij mona kahma deika beda Abraham ensma mar insa koma jeska Allah fob.

¹⁶ Gij mona onнга rusnok ragen mar moguma, beda rua ragen mar koma oisouska osnok egens onнга ofoka ekirsa jeska rua. Beda koma orocunc rot oida rua rimeita mar onнга rua ranggen rot si. Noba rusnok nomnaga rumoitij rot mar insa koma oјgomu.

¹⁷ Erek koma tein, sis fob Allah odou os orocunc erek jeni gu rusnok onнга rimesma oufamofa eteb jeska Ofa rot oida Ofa emeita mar koma onнга Ofa anggen rot gu rua si.

¹⁸ Noba enadaij nou Allah ocuwei mar jinaga guru. Ere koma tina Ofa anggen rot mar insa koma gu Abraham jera rusnok onnga runjuj jeska ofa jeskaseda mimif mijginaga rot oida mimesma eiteij ah onnga efeinah si. Noba mimif muisum gij Ofa rot mar insa koma. Noba koma bera onnga ereita mudou efesi erek erirei eteb rot ojgomuja.

¹⁹ Mimif muisum gij Allah efen oga insa koma rot ahais ojgomuja, erek rusnok onnga ruisum gij kamantuw onnga rua rij gij mei jeskaseda agei rerin kabar mei rot ahais. Noba mimif muisum gij Yesus Kristus onnga ongakag rot mimif jah monuh onnga Allah engker gij. Jah suma bera Ofa ot deismos nou mimif skoita Allah. Koma bera erek imam-imam Yahudi onnga rirabj meifeti onnga ont joug montoj rot rusnok jeska Mod Allah efesi. Jah suma bera rua rut deismos nou rusnok nomnaga skoita Allah. Jefeda Yesus Kristus bera enja erek Allah efen imam egens onnga ofoka aksa eteb morototuma erek Allah efen imam egens onnga ofoka Melkisedek rot mona onnga ah aibin ojgomuja. Jeska Melkisedek bera erek Allah efen imam egens onnga ofoka aksa eteb tein.

²⁰ (6:19)

7¹ Didif dudou os difesij mar deika rot imam egens insa koma onnga ofoka Melkisedek. Gij mona onnga sismeni eteb fob, ofa bera raja egens onnga ofoka ereij keingg kota Salem. Noba ofa tein bera erek Allah efen imam egens onnga ofoka aksa eteb ekirsa jeska nomnaga. Ere koma, noba gij mona onnga Abraham jera efen rusnok rimagobuma jera raja-raja enjgineg, beda raja-raja insa koma risiri gu Abraham. Beda ofa oksons gu efen monuh. Noba askesi ofa encira gu moroju ros, beda Melkisedek

orodosu Abraham. Beda Melkisedek ois gu Allah jeskaseda Ofa eita oufamofa eteb gu Abraham.

² Beda Abraham ekeba egema jeska efen mareibra ofoukou onnga ofa eita jeska raja-raja insa koma gu Melkisedek. Ofoka Melkisedek efen ofou erek egeka. Onnga sismeni bera efen ofou oida, "Raja onnga ofoka ereij keingg rot odou onnga efen mar onnga oska oskiyai tein guru." Noba ofa tein erek raja rot kota Salem. Jefeda efen ofou onnga egeka bera oida, "Raja onnga ofoka ereij keingg rot odou onnga eskeiramera eteb tein."

³ Noba runogu gij Mar Efeyi Ebsi rot ofa efen meka jera mosu, era rot rusnok onnga ofa onjuj jeska tein jinaga guru. Noba mimif minejginaga rot mona onnga ofa onjuj jeska efen mosu jera mona onnga ofa anggos tein jinaga guru. Jefeda koma erek ofa bera Allah efen imam egens ojgomuja morototuma erek Allah efen efesa Yesus erek imam egens ojgomuja.

⁴ Mimif mijginaga rot oida imam Melkisedek bera efen ofoka onnga aksa eteb. Jeska mifmin mimowa Abraham bera efen ofoka onnga aksa eteb tein. Tina ofa ougif gu Melkisedek fogora eita egema jeska efen mareibra ofoukou onnga ofa agei jeska raja-raja insa koma gu ofa.

⁵ Rusnok onnga runjuj jeska Abraham efen medebesa Lewi bera rufij Allah erek imam-imam. Noba gij hukum Musa bera mar egens agot rot oida Allah efen rusnok nomnaga rikeba rerin mareibra egema gu rua onnga ebic Lewi. Noba Allah efen rusnok insa koma nomnaga bera erek rumokosama onnga runjuj jeska Abraham tein. Tina rua rugif gu hukum Musa ojgomu fogora rikeba rerin mareibra

egema gu ebic Lewi insa koma onggga rufij Allah erek efen imam-imam.

⁶ Noba Abraham bera erek imam onggga sismeni. Jeska ofa bera erek ebic Lewi insa koma rerin rimowa. Erek koma, tina gij mona onggga Melkisedek orodosu Abraham fob, beda Abraham ougif gu Melkisedek fogora ekeba efen mareibra egema gu ofa. Noba Melkisedek tein bera onggga ois gu Allah jeskaseda Allah eita oufamofa eteb gu Abraham. Erek koma tein, mimif mijginaga rot oida sis fob bera Allah anggen rot oida Ofa emeita oufamofa eteb gu Abraham si.

⁷ Noba mimif tein mijginaga rot oida rusnok onggga rufoka aksa ekirsa bera onggga ruis oufamofa oisouska Allah ofoka gu rusnok onggga rufoka oin gij rua. Jefeda mar onggga egeka insa koma orocunc rot oida Melkisedek bera efen ofoka onggga aksa ekirsa jeska Abraham.

⁸ Imam-imam jeska ebic Lewi onggga risma mifmin mareibra egema gij mona ebeibeyaif tein bera rimagos gij mona kahma si. Tina runogu gij Mar Efeyi Ebsi rot imam Melkisedek efen mona onggga ofa anggos guru. Beda koma bera erek ofa efena ebah ojgomuja. Jefeda ofa onggga erek efena ebah ojgomuja bera esma rusnok rerin mareibra egema tein.

⁹ Noba Abraham ekeba efen mareibra egema gu Melkisedek. Jefeda koma tein erek imam-imam jeska ebic Lewi bera onggga rikeba rerin mareibra egema insa koma gu Melkisedek. Jeska Abraham bera erek rua rerin rimowa onggga rua runjuj jeska.

¹⁰ Koma tenten, jeska gij mona onggga Melkisedek orodosu Abraham, beda rua onggga ebic Lewi runojuj jeska Abraham enesi.

¹¹ Gij mona onggga sismeni eteb fob bera Allah eita efen hukum-hukum gu Musa. Noba mar egens jeska hukum koma agot rot oida rua onggga ebic Lewi rufij Allah erek efen imam-imam. Tina mar onggga rua rutunggom nou rusnok skoita Allah bera enadaij nou eita rusnok rudou erek ebsi komowa ahah Allah eiteij guru. Jefeda Allah ocosu rot omobk imam egens onggga ofoka ekirsa jeska ebic Lewi jera rerin rimowa Harun tein. Ofa efen ofoka onggga aksa morototuma erek Melkisedek ojgomu. Ofa koma bera Yesus Kristus.

¹² Erek koma tina mimif mijginaga rot oida Yesus onojuj jeska ebic Lewi guru. Tina Ofa onjuj jeska efen meimowa Yehuda ojgomu. Noba sis fob Musa onocunc rusnok jeska ebic Yehuda jeskaseda rufij Allah erek imam-imam guru. Tina Allah ombk Yesus erek efen imam egens onggga efeinah deika. Jefeda Ofa otunggom hukum-hukum onggga erek efeinah deika tein.

¹³ (7:12)

¹⁴ (7:12)

¹⁵ Beda mimif mijginaga rot oida koma erek tenten ojgomu, jeska gij mona onggga Yesus Kristus en gu mebif fob, beda Ofa esma efen ofoka onggga aksa morototuma erek Melkisedek.

¹⁶ Noba Ofa eneja erek imam egens oisouska mar onggga hukum Musa anggot rot gu rusnok onggga runjuj jeska ebic Lewi guru. Tina Ofa eja erek imam egens oisouska efen owesa efek onggga adaij nou efena ebah rot ah aibin ojgomuja.

¹⁷ Koma erek tenten, jeska gij Mar Efeyi Ebsi bera Allah anggot osok gij Yesus oida, "Bua bimeja erek imam egens onggga efena ebah ojgomuja morototuma erek Melkisedek."

¹⁸ Erek koma beda oisouska mar insa koma bera Allah oncunc rot oida mar onggga hukum Musa anggot rot imam-imam bera efen owesa efek deika guru. Jeska hukum insa koma bera onotunggom rusnok rudou ebsi komowa erek Allah odou os rot guru. Beda Ofa obk Yesus onggga mimif muisum gij erek osnok egens onggga ofoka aksa ekirsa. Jeska oisouska Ofa bera mimif mita mudou onggga egens jera Allah tein.

¹⁹ (7:18)

²⁰ Gij mona onggga Allah ocunc rusnok ebic Lewi erek imam-imam, beda Ofa enagen rot mar gu rua guru. Tina gij mona onggga Allah oncunc Yesus erek efen imam egens, beda Ofa agen rot mar gu Yesus ojgomu.

²¹ Mimif mijginaga rot erek koma jeska runggu gij Mar Efeyi Ebsi oida, "Allah anggen rot oida Bua bimeja erek efen imam egens ojgomuja. Noba Ofa eneferwei mar insa koma jinaga guru."

²² Noba oisouska Yesus bera mimif muisum gij rot ahais oida mimif mimesma mar nomnaga onggga Allah anggot eimofoj rot si. Jeska mar koma bera oufa ekirsa jeska mar onggga Ofa anggen rot oisouska hukum Musa sis fob.

²³ Sis fob Allah efen imam-imam jeska ebic Lewi erek rufoukou doska. Jeska gij mona onggga rineya ranggos fob, beda Ofa oncunc egema deika onggga eferwei rua onggga ranggos insa koma.

²⁴ Erek koma tina ebeibeyaif bera Ofa efen imam Yesus Kristus onggga efena ebah rot mona onggga ah

aibin ojgomuja. Jefeda Ofa onocosu rot eferwei efen imam egema deika guru.

²⁵ Jefeda adaj nou Ofa oskotu rusnok nomnaga onnga rin skoita Ofa oisouska Yesus Kristus ojgomu. Jeska ebeibeyaif bera Yesus Kristus onot deismos nou rusnok nomnaga skoita Allah rot mona onnga ah aibin ojgomuja.

²⁶ Noba mimif mucosu rot imam egens onnga erek Yesus Kristus ojgomu. Jeska Ofa bera onnga Allah oncunc onnga erek ebsi komowa. Noba Ofa eneita mar onnga oska oskiyai tein jinaga guru. Noba gij mona onnga Ofa efena ebah gu mebif ros, beda Ofa ebes efaga jeska mar onnga oska onnga rusnok runtunggom ojgomuja. Noba ebeibeyaif Ofa omfra jah mebaga fogora ensma efen ofoka onnga aksa eteb fob.

²⁷ Rua onnga imam-imam jeska ebic Lewi onnga rufoka aksa bera rita mar onnga rurougif gu Allah rot risinsa rerin mar onnga oska sismeni fog. Beda rua rutunggom mar erek koma juens deika rot rusnok enjineg nomnaga rerin mar onnga oska ojgomuja. Tina Yesus bera eneita mar erek koma ojgomuja jinaga guru. Jeska gij mona onnga Ofa aha esinsa skoita rusnok onnga rufogog fogora rua runtob Ofa tumu mega salib, beda efen efaga koma bera erek mar onnga Ofa orougif gu Allah rot rusnok nomnaga rerin mar onnga oska. Ofa otunggom mar koma erek ofosma juens ojgomu, beda koma erek adaj nou.

²⁸ Noba oisouska hukum-hukum Musa bera Allah oncunc efen imam-imam onnga ofoka aksa. Tina rua tein rerin mar onnga oska erek rusnok giskini ojgomu. Erek koma, tina gij mona kahma deika beda Allah agen rot oida Ofa omocunc efen efesa erek imam

egens onggga ofoka aksa. Noba ebeibeyaif Ofa bera efena ebah rot odou onggga ebsi komowa ojgomuja.

8¹ Mar insa koma nomnaga onggga didif dunggu gij surat kef bera efen mar ofoka egens. Koma bera oida, Yesus Kristus eja erek mifmin imam egens onggga ofoka aksa fob. Noba Ofa enja eker gu mebaga fogora ofoka ereij keingg mar nomnaga morototuma jera efen meka Allah fob.

² Jefeda Ofa ofij Allah erek efen imam onggga ofoka aksa gij monuh mebaga onggga erek ebsi komowa ojgomuja. Noba gij monuh insa koma bera rusnok rugif gu Allah rot tenten ojgomu, jeska Tuhan Allah bera onggga ontunggom monuh insa koma. Rusnok mebif runotunggom monuh insa koma guru.

³ Allah bera onggga oncunc orofosut imam-imam onggga ofoka aksa egens egens jeskaseda rumorka mar fogora rurougif gu Ofa rot. Beda rua tein ris mah gij marska koma erek mar onggga rurougif gu Ofa rot. Erek koma jefeda Yesus Kristus tein ocosu rot otunggom mar erek insa koma, jeska Ofa tein bera erek imam egens onggga ofoka aksa.

⁴ Tina erek Yesus eker gu mebif ojgomu ros, beda Ofa enerek imam guru. Jeska gu mebif bera mifmin imam-imam onggga rutunggom mar insa koma jeni hukum Musa.

⁵ Noba mar onggga imam-imam rutunggom gu mebif gij Mod Allah efesi bera erek orocunc rot mar onggga Yesus otunggom gu mebaga. Gij mona onggga sismeni fob bera Allah ocunc gu Musa jeskaseda ofa ei Mod nou Ofa gu mebif jeskaseda Mod koma orocunc erek jeni rot monuh onggga angh gu mebaga. Jefeda Ofa eisisi joug Musa erek kef oida, "Bua bii dedin Mod

jeni erek Didif duncunc gu bua fob gij mona onnga bua bineker gu memaga Sinai ros."

⁶Erek koma tina, ebeibeyaif Yesus ofij Allah gu monuh mebaga erek oufa ekirsa jeska imam-imam onnga Ofij Allah gu mebif ros. Noba ebeibeyaif Ofa ot deismos nou rusnok skoita Allah ojgomuja. Koma bera onnga Allah anggot eimofoj rot gij mona onnga sis fob. Noba koma tein bera erek oufa ekirsa jeska hukum Musa onnga Allah anggot eimofoj rot sismeni fob. Jeska mar onnga Allah anggot eimofoj rot oisouska Yesus bera omofij mimif ekirsa jeska hukum Musa insa koma tein.

⁷Noba erek hukum Musa onnga Allah anggot eimofoj rot sismeni fob bera adaij nou ofij mimif rot mar nomnaga tein, beda munocosu rot oida Allah agot eimofoj rot mar egema deika fog erek koma guru.

⁸Tina mimif mijginaga rot oida hukum Musa insa koma bera enadaij tein guru. Jeska mar egens gij Mar Efeyi Ebsi bera agot rot teinefa Allah odou okum rot rua onnga Israel. Gij mar egens insa koma Allah agot mar erek kef oida, "Didif Tuhan dagot oida, gij mona kahma bera Didif dimagen rot mar onnga erek efeinah deika rot rua onnga ebic Yehuda jera rua onnga ebic Israel.

⁹Noba mar onnga efeinah koma bera enerek mar onnga Didif danggot eimofoj rot jera rusnok onnga Israel rerin rimower gij mona onnga Didif dincira deci deci rot rua jeska monuh Mesir guru. Jeska rua runororu mar onnga Didif danggot eimofoj rot erek tenten sis fob guru. Jefeda Didif dumokoja rua ojgomu.

¹⁰ Noba Didif Tuhan dagot oida, Didif danggot eimofoj rot mar onnga erek efeinah deika gu rua onnga Israel. Didif dumotunggom mar erek koma gij mona onnga mar onnga Didif danggot eimofoj rot gu rerin rimower sis fob bera omoisa fog. Beda gij mona insa koma bera Didif dumofij rua jeskaseda rua rudou ebriyi gij rot dedin duga. Noba Didif dumofij rua jeskaseda rua ruroru dedin duga rot tenten ojgomuja. Beda Didif dumofoka ereij keingg rua erek rerin Allah. Noba rua rumororu Didif erek dedin rusnok.

¹¹ Jefeda gij mona insa koma bera rusnok runoftuftu rerin ruhujir era rukoser rot Didif deika guru. Jeska rusnok nomnaga rimejginaga rot Didif fob. Rusnok onnga runok ofoka guru jera rusnok onnga rufoka aksa tein nomnaga rimejginaga rot Didif si.

¹² Jeska Didif dumosuna rot rerin mar onnga oska jeska rudou efesi oisouska dudou onnga eskeiramera eteb rot rua ojgomu. Beda Didif dumocunc rua erek rusnok onnga rerin mar onnga oska deika guru."

¹³ Erek koma jefeda gij mar insa koma bera Allah oncunc rot oida Ofa emeferwei mar koma onnga Ofa anggen rot sismeni fob si. Jeska mar nomnaga onnga erek ensis bera emeseiseifa si.

9 ¹ Gij mona onnga Allah anggot eimofoj rot sismeni insa koma, bera Ofa ocunc gu rusnok rot mar onnga rua rutunggom erek jeni jeskaseda rugif gu Ofa. Noba Ofa tein ocunc gu rua rot teinefa rua rii efen Mod erek jeni nou Ofa. Beda rua rumougif gu Ofa gij Mod efesi egens insa koma.

² Mod egens insa koma bera erek modwok frak efeyi eteb onnga rusnok runtunggom jeska meifeti. Beda gij modwok efesi insa koma bera rua runtunggom morongsu egens onnga erek eteb. Noba gij morongsu

efesi egens insa koma bera rua raha lampu egens jera meja egens. Beda rua raha roti esij meja egens koma erek mar onnga rurougif gu Allah rot. Noba rua rijeka morongsu egens insa koma oida, Morongsu onnga Ebsi Komowa.

³ Beda rua rutunggom morongsu egens deika gij morongsu egens insa koma efesi onnga rua rira meifeti ruof joug montoj rot rusnok. Noba rua rijeka morongsu onnga egeka koma oida, Morongsu onnga Ebsi Komowa Eteb.

⁴ Beda rua raha meja egens onnga rutunggom jeska emas gij morongsu efesi insa koma. Beda rua ris mah gij mar onnga efen ensesa esij meja egens koma erek mar onnga rurougif gu Allah rot. Noba rua raha burwa egens onnga runtunggom jeska emas gij morongsu efesi insa koma. Noba rua rijeka burwa koma oida, "Burwa onnga orocunc rot mona onnga Allah anggot eimofoj jera rusnok onnga Israel." Beda rua risah mar egens onnga erek roti egema gij burwa insa koma. Beda rua risah Harun efen moskur gij burwa insa koma tein. Noba rua tein risah mamu onnga Allah onngu efen hukum-hukum tumu nou Musa gij burwa insa koma tein.

⁵ Beda rua rutunggom mar erek malaikat-malaikat onnga efen efembra ofou. Beda rua raha mar koma skida burwa insa koma. Noba mar onnga erek Malaikat efembra ofou insa koma bera orocunc rot Allah efen eskeira eteb. Noba mar efembra ofou koma bera orocohun joug burwa insa koma tein. Noba rua rira marska efen ogufu fogora rires burwa insa koma. Koma erek orocunc rot rusnok rerin mar onnga oska onnga Allah onsuna jeska rudou efesi

fob. Didif dinagot rot mar insa koma nomnaga efen ofou deika enesi.

⁶Nou onnga imam-imam runtunggom mar insa koma nomnaga oisa fob, beda imam-imam Yahudi ruiru gij morongsu onnga sismeni. Beda rua rutunggom mar onnga erek rurougif gu Allah jah suma.

⁷Tina imam egens onnga ofoka aksa esinsiyai bera onnga oira gij morongsu onnga egeka koma onnga meifeti orof joug rot rusnok enjgineg ojgomu. Noba ofa oira erek ofosma juens gij tahun egens ojgomu. Gij mona insa koma bera ofa orka ogufu jeska marska onnga ofa eris fob. Beda ofa eita ogufu insa koma gu Allah erek mar onnga orougif gu Ofa rot. Ofa otunggom mar erek koma rot ofa esinsa efen mar onnga oska sismeni fog. Beda ofa otunggom koma tein juens deika nou rusnok enjgineg rerin mar onnga oska onnga rua runtunggom rot rudou onnga osumsumu ojgomu.

⁸Noba oisouska mar onnga imam-imam runtunggom insa koma bera Efena Ebsi orocunc rot oida mar onnga Allah anggot eimofoj rot nou rusnok bera angh gij mona kahma ros. Jeska oisouska mar insa koma bera Allah ocunc rot oida enadaj nou rusnok giskini rin teisis skoita Ofa enesi. Jeska mar onnga imam-imam runtunggom ecira rot efen owesa efek ros.

⁹Noba mar insa koma bera orocunc rot mona onnga Allah anggot eimofoj sismeni fog, onnga ecira gij efen owesa efek ros. Jeska gij mona insa koma bera rusnok rurka mar insa koma jeskaseda rita gu Allah noba ris mah gij gu Ofa tein. Beda Ofa onofra mar okum keingg rua rot rerin mar onnga oska guru. Rua

rutunggom mar erek insa koma jeni hukum Musa, tina gij rudou efesi bera rua rijginaga rot oida rerin mar onnga oska bera enahuma ros.

¹⁰ Rua rutunggom mar insa koma jeska hukum Musa agot rot erek koma ojomu. Koma erek mar enjineg tein onnga rua rutunggom jeni hukum Musa. Jeska hukum Musa agot rot maat onnga rusnok rinet guru, era mar onnga rusnok rinej guru, jera rot teinefa rua rut rerin mar oboha erek jeni sismeni fog. Noba hukum-hukum insa koma onnga Allah eita gu rua bera nou rusnok rifaga ojomu. Noba hukum-hukum koma efen owesa efek ecira ojomuja onjoros mona onnga Allah anggot eimofoj rot mar efeinah bera encira fob.

¹¹ Yesus Kristus en erek mifmin imam onnga ofoka aksa eteb fob. Noba Ofa otunggom mar onnga ongnoska ekirsa nou mimif jeska mar onnga hukum Musa insa koma ontunggom nou rusnok sis fob. Ofa bera eja eker morototuma jera Allah gij efen Mod onnga tenten noba onnga ongnoska eteb gu mebaga. Jah suma bera rusnok rugif gu Ofa rot tenten.

¹² Gij orofosut tahun egens bera imam-imam orka mar ogufu jeska kambing jera sapi efer jeskaseda eita gu Allah erek mar onnga rurougif gu Ofa rot rerin mar onnga oska. Noba gij mona onnga Yesus ogufu eya jeska esinsa efaga tumu mega salib, beda koma bera erek Ofa oira gij morongsu gu Mod Allah efesi jeskaseda eita esinsa efen ogufu erek mar onnga orougif gu Allah tein. Noba Ofa eita mar koma gu Allah rot ofosma juens ojomu jeskaseda osuwa mimif nomnaga jeska mifmin mar onnga oska. Jefeda oisouska mar onnga Ofa ontunggom fob bera mimif

misma eiteij ah onggah efeinah noba onggah ah aibin ojgomuja tein.

¹³ Ororu Yahudi rerin erebent bera imam-imam rira mar ogufu jeska kambing jera ogufu jeska sapi orna fogora rires ogufu koma gij Mod Allah efesi. Noba rua tein ris mah gij sapi efer onjoros ofora ebsi fob. Beda rua rira ofou insa koma tein fogora rires gij Mod Allah efesi. Noba rua rutunggom mar insa koma jeni rerin agama erebent jeskasada Allah onofra mar okum keingg rua rot rerin mar onggah oska guru. Tina koma bera ororu rerin agama erebent insa koma ojgomu.

¹⁴ Erek koma tina, Yesus bera aha esinsa efaga erek mar onggah eirirbi eteb gu Allah nou mifmin mar onggah oska fob. Noba Ofa otunggom mar koma oisouska owesa efek jeska Efena Ebsi onggah eker rot ah aibin. Noba mar onggah Ofa ontunggom koma bera efen owesa efek ekirsa jeska ogufu onggah sapi efen. Jeska Ofa efen ogufu bera onggah orosuna rot mifmin mar onggah oska nomnaga. Noba mar onggah oska koma bera onggah orotunggom mimif fogora miseiseifa rot ojgomu. Tina ebeibeyaif bera mudou efesi onokum rot mifmin mar onggah oska deika guru. Jefeda mimif mufij Allah onggah efen owesa efek eteb ojgomuja.

¹⁵ Noba rusnok rerin mar onggah oska ros jeska rua runororu jeni hukum-hukum onggah Allah anggot eimofoj rot sismeni fob erek jeni guru. Jefeda Yesus Kristus aha esinsa fogora anggos tumu mega salib jeskasada orosuwa rusnok nomnaga jeska rerin mar onggah oska fob. Noba ebeibeyaif Ofa ot deismos nou mimif skoita Allah jeskasada rusnok onggah Allah enjeka bera rimesma mar onggah efeinah koma onggah Ofa anggot eimofoj rot sis fob. Mar onggah efeinah

koma bera oida mimif misma eiteij ah onnga efeinah rot ah aibin ojgomuja.

¹⁶ Didif dagot mar orocunc egens osok gij mar onnga Yesus ontunggom insa koma fob. Giskini bera rusnok ragen mar rot idu onnga emesma osnok egens efen mareibra gij mona onnga ofa anggos fob. Tina rua onnga rimesma mareibra insa koma bera rinesma askesi osnok egens insa koma efena ebah ros guru. Jeska mar onnga osnok egens insa koma anggen rot bera ah gij efera gij mona onnga ofa anggos fob ojgomu.

¹⁷ (9:16)

¹⁸ Erek koma tein rot hukum-hukum Musa onnga Allah anggen rot sismeni fob. Hukum koma efen owesa efek enecira guru onjoros mar egens agos sismeni fog. Beda rua rira mar koma efen ogufu fogora rires gij Mod Allah efesi. Beda hukum-hukum efen owesa efek ecira ojgomu fob.

¹⁹ Jeska gij mona onnga Musa emfesij rot Allah efen hukum-hukum nomnaga gu rua onnga Israel fob, beda ofa eita ogufu jeska sapi efer jera kambing fogora orohoh mar ogufu koma jera mei. Beda ofa eita domba efeji onnga ekeni fogora erakid koma rejrej mega efetma onnga ofoka hisop. Beda ofa ec mega efetma koma rot domba efeji gij mar ogufu insa koma. Beda ofa era mar koma eres kertas efeyi onnga rungkuku noba onnga rua runggu hukum-hukum Allah tumu. Noba ofa tein eres rusnok jah suma rot mar ogufu insa koma tein.

²⁰ Beda ofa agot gu rusnok insa koma oida, "Oisouska ogufu kef bera Allah orocunc gu iwa oida hukum-hukum onnga Ofa anggot eimofoj rot bera

erek tenten ojgomu. Jefeda iwa iroru hukum-hukum koma rot tenten ojgomu."

²¹ Beda ofa tein era ogufu insa koma eres Mod Allah jera mar nomnaga onnga rua risah gij Mod koma efesi tein.

²² Ofa otunggom mar erek koma jeska hukum-hukum insa koma agot rot oida rua rira ogufu fogora rires mar ofoukou ojgomu. Noba erek rua rineres mar rot ogufu guru, beda Allah onosuna rot rerin mar onnga oska tein guru.

²³ Mod Allah jera mar onnga angh gij Mod efesi insa koma bera erek orocunc rot mar onnga angh gu mebaga. Jefeda imam-imam insa koma rucosu rot rira mar ogufu jeskaseda rutunggom mar insa koma erek ebsi komowa ojgomu. Tina enadaij nou mar insa koma orotunggom mar onnga angh gu mebaga erek ebsi komowa jinaga guru. Jefeda Yesus onnga anggos tumu mega salib bera orotunggom mar koma onnga ah gu mebaga erek ebsi komowa ojgomu.

²⁴ Noba Ofa onoirra gij mod egens onnga rusnok rii fob jeskaseda era efen ogufu fogora orougif gu Allah rot guru. Jeska Mod Allah koma bera erek mar onnga orocunc rot mebaga ojgomu. Tina Yesus oira gij mebaga ojgomu. Noba ebeibeyaif bera Ofa eker jah suma morototuma jera Allah jeskaseda ot deismos nou mimif skoita Allah tein.

²⁵ Rua onnga imam-imam rucosu rot ruirra gij Mod Allah orofosut tahun egens jeskaseda rutunggom mar insa koma nomnaga onnga hukum Musa anggot rot ojgomuja. Noba rua runoirra oisouska risinsa rerin rugufu guru. Tina rua rira mar ogufu rot ojgomu. Erek koma tina Yesus oira gij mebaga erek imam egens oisouska esinsa efen ogufu jeskaseda otunggom mar

rot ofosma juens ojgomu. Noba koma bera adaij nou tein.

²⁶Jeska erek Yesus oira mebaga gij orofosut tahun egens jeskaseda otunggom mar erek imam egens, beda koma bera erek Ofa eita efera okora tumu mega salib gij orofosut tahun egens tein ojgomuja. Koma erek Ofa otunggom mar insa koma sis mona ongg Allah ontunggom mebif ojgomuja onjoros ebeibeyaif tein, tina guru. Jeska gij mona ongg enja ejgwaga kef bera Yesus angha esinsa efaga erek mar ongg orougif gu Allah rot ofosma juens ojgomu. Noba Ofa ontunggom mar erek koma jeskaseda mifmin mar ongg oska enah gu mimif deika guru.

²⁷Rusnok nomnaga ragos erek ofosma egens ojgomu. Beda Allah oga ojga rot rerin rita mar nomnaga.

²⁸Jefeda erek koma tein, Yesus agos rot ofosma egens ojgomu jeskaseda osuwa mimif jeska mifmin mar ongg oska. Beda Ofa omoksons en gu mebif deika si. Tina Ofa onoksons jeskaseda osuwa rusnok jeska rerin mar ongg oska deika guru. Ofa omoksons en jeskaseda eita eiteij ah ongg efeinah gu rusnok nomnaga ongg rug moroju nou Ofa.

10¹Didif dudou os difesij deika rot hukum Musa insa koma. Allah eita hukum-hukum insa koma gu Musa erek mar ongg orocunc rot mar enjgineg ongg erek oufamofa ekirsa. Noba mar ongg oufamofa ekirsa koma bera emen gij mona kharma si. Jeska hukum-hukum insa koma enerek mar ongg oufamofa eteb ongg Allah anggen rot sis fob guru. Jefeda mar ongg imam-imam rutunggom gij Mod Allah efesi ojgomuja bera enadaij nou orotunggom Allah efen rusnok rudou efesi erek ebsi komowa guru.

²Jeska erek mar ofoukou ongga rua runtunggom insa koma bera adaij nou, beda rusnok insa koma ongga rugif gu Allah bera rimeja jera rudou ongga eskeiramera rot ojgomu. Jeska rua rusujohu rot oida rerin mar ongga oska egema enah gu rua deika guru. Beda rua rineita mar gij Mod Allah efesi deika guru.

³Tina rua rinesma rudou efesi ongga ebsi komowa oisouska mar insa koma guru. Ongga tenten bera, mar ongga imam-imam insa koma rutunggom gij Mod Allah efesi gij orofosut tahun egens bera erek mar ongga eisisi keingg rua rot oida rudou enebisi komowa rot tenten enesi.

⁴Jeska enadaij nou sapi orna efen ogufu era kambing efen ogufu orosuna rot rusnok rerin mar ongga oska jinaga guru.

⁵Jefeda nou ongga Yesus emen gu mebif, beda runggu gij Mar Efeyi Ebsi rot mar ongga Ofa agot gu efen meka Allah. Ofa agot mar erek kef oida, "Bua bunodou os rot sapi jera kambing efaga ongga rusnok riris erek mar ongga rurougif gu Bua gij orofosut tahun egens guru.

⁶Noba marska ongga rusnok ris mah gij erek mar ongga rurougif gu Bua bera enereita budou efesi eskeira rot tein guru. Noba mar enjgineg tein ongga rua rutunggom erek mar ongga rurougif gu Bua bera enereita budou efesi eskeira rot guru. Tina Bua bubk Didif erek osnok egens jeskaseda dagos erek mar ongga orougif gu Bua.

⁷Beda Didif dagot gu Bua rot oida, Didif dimeja gu mebif jeskaseda dutunggom mar ongga Bua budou os rot ojgomu nou rusnok ongga rerin mar ongga oska. Koma bera ororu jeni mar ongga rusnok runggu gij Mar Efeyi Ebsi rot Didif."

⁸ Iwa ik rot mar insa koma juens deika. Jeska gij mar egens insa koma bera Yesus agot oida, "Bua bunodou os rot sapi jera kambing efaga onnga rusnok riris erek mar onnga rurougif gu Bua orofosut tahun egens jera marska onnga rusnok ris mah gij guru. Jeska mar insa koma enereita Budou eskeira rot guru." Noba erek hukum Musa agot rot oida imam-imam rutunggom mar koma ojgomu, tina enadaij nou mar koma ereita Allah odou eskeira rot rusnok jinaga guru.

⁹ Gij Mar Efeyi Ebsi insa koma Yesus agot oida, "Didif dimeja gu mebif jeskaseda durosuna rot rusnok rerin mar onnga oska. Noba koma bera oisouska Budou ejginaga rot." Erek koma noba hukum Musa bera erek moroju onnga sismeni nou rusnok jeskaseda Allah osuna rot rerin mar onnga oska. Tina gij Mar Efeyi Ebsi insa koma bera Yesus agot oida Ofa of joug rot moroju insa koma. Beda Ofa ohoda moroju onnga efeinah deika jeskaseda Allah osuna rot rusnok rerin mar onnga oska.

¹⁰ Jefeda ororu Allah odou ejginaga rot ojgomu bera mimif misma mudou onnga ebsi komowa fob. Noba koma bera oisouska Yesus Kristus onnga aha esinsa jeskaseda anggos tumu mega salib nou mimif rot ofosma juens ojgomu.

¹¹ Gij orofosut mona bera imam-imam Yahudi rut gu meja ofoj egens onnga angh gij Mod Allah efesi. Beda rua rutunggom mar nomnaga onnga hukum Musa anggot rot ojgomu. Noba rua riris marska erek giskini ojgomuja tein. Noba mar onnga imam-imam runtunggom insa koma bera onorosuna rot rusnok rerin mar onnga oska guru.

¹² Tina Yesus bera aha esinsa efaga erek mar onnga orougif gu Allah rot mifmin mar onnga oska nomnaga. Noba Ofa otunggom mar erek koma rot ofosma juens ojgomu. Beda Ofa eja gu mebaga jeskaseda ofoka ereij keingg mar nomnaga morototuma jera efen meka Allah.

¹³ Noba ebeibeyaif Ofa eker jah suma ojgomuja onjoros mona onnga mesa nomnaga rinsiri gu Ofa fob.

¹⁴ Yesus aha esinsa efaga jeskaseda agos tumu mega salib rot ofosma juens ojgomu. Noba oisouska koma bera Allah ocunc efen rusnok rudou efesi erek ebsi komowa nou mona onnga ah aibin ojgomuja.

¹⁵ Efena Ebsi tein ocunc rot oida mar insa koma bera erek tenten ojgomu. Jeska sis fob bera runggugij Mar Efeyi Ebsi rot mar onnga Efena Ebsi agot erek kef oida,

¹⁶ "Tuhan agot oida, 'Gij mona kahma, beda Didif dimagen rot mar onnga erek efeinah deika nou rua. Beda Didif dumofij rua jeskaseda rudou ebriyi gij rot dedin hukum-hukum. Noba Didif dumofij rua jeskaseda rua ruroru hukum-hukum koma rot tenten ojgomu.' "

¹⁷ Erek koma noba Efena Ebsi agot tein oida, "Didif dumosuna rot rua rerin mar onnga oska fogora Didif dunosujohu rot mar insa koma deika guru."

¹⁸ Noba gij mona onnga Allah ocunc oida rusnok rerin mar onnga oska deika guru fob, beda imam-imam onocosu rot rutunggom mar erek rurougif gu Ofa nou rusnok insa koma rerin mar onnga oska deika guru.

¹⁹ Erek koma jefeda oisouska Yesus Kristus ogufu onnga eya jeska efen efaga tumu mega salib, bera

mimif nomnaga minemeesa nou mija teisis skoita Allah jeskaseda mugif gu Ofa guru. Koma erek imam-imam insa koma onnga rija teisis skoita Allah gij efen Mod efesi tein.

²⁰ Tina oisouska Yesus efaga onnga anggos tumu mega salib fob bera Ofa ohoda moroju onnga efeinah. Noba moroju onnga efeinah koma bera efen owesa efek onnga ofij mimif jeskaseda mija teisis skoita Allah tein. Noba koma erek Ofa ohoda rot meifeti insa koma onnga orof joug rusnok jeska Mod Allah efesi fob.

²¹ Noba Yesus Kristus bera erek mifmin imam egens onnga ofoka aksa tein. Ofa bera onnga ofij mimif onnga erek Allah efen rusnok.

²² Jefeda onnga oufa bera mimif mija erek egens jera Allah rot mudou onnga erirei noba rot mudou onnga ororu rot tenten oida mifmin mar onnga oska enah gij mudou efesi deika guru. Jeska erek imam-imam rires mar ogufu nou rusnok rerin mar onnga oska, beda erek koma tein Yesus ogufu onnga eya jeska efen efaga tumu mega salib bera onnga orosuna rot mifmin mar onnga oska fob. Noba erek imam-imam rut risinsa rifaga jeni jeskaseda rija skoita Allah gij efen Mod efesi, beda erek koma tein mar onnga Yesus ontunggom bera orot mimif rot mifmin mar onnga oska fob. Jefeda mimif tein mija teisis skoita Allah ojomu.

²³ Beda onnga oufamofa bera mimif muroru Allah efen oga onnga erek tenten ojomuja. Noba mudou eneineina gij mar onnga Ofa anggen rot guru. Tina mimif muisum gij mar insa koma ojomuja. Jeska Ofa emeita mar nomnaga onnga Ofa agen rot gu mimif si.

²⁴ Noba mimif muh mudou efesi erek ahais rot mar insa koma fogora mimif mita mudou onnga omokorema jera mudou onnga omofijma ojgomuja.

²⁵ Beda mimif miremecinma jeskaseda mugif gu Allah erek egens ojgomuja. Noba mimif minaha mar koma jah erek rusnok Kristen enjgineng runtunggom fob guru. Tina onnga oufa bera mimif misisi joug moguma rot mar onnga oufamofa ojgomuja. Noba mimif mita mar insa koma erek odudu deika askesi mimif mug moroju rot mona onnga Tuhan Yesus Kristus ongksons en fob.

²⁶ Mimif mita mar erek insa koma ojgomu, jeska ebeibeyaif bera mimif mijginaga rot mar meidu onnga erek tenten ojgomu. Noba mifmin mudou bera ororu mar koma rot tenten fob. Tina erek mimif mikikif jeska mar insa koma nomnaga fogora misiri sons gij mifmin mar onnga oska, beda koma bera erek mimif mukoja rot mar onnga Yesus ontunggom nou mimif fob. Jefeda enadaij nou mar egema tein ofij mimif rot mifmin mar onnga oska deika guru.

²⁷ Beda mimif mijginaga rot mudou onnga emeesa oida Allah emeij mimif gij mahmei meren onnga eisa egigir rot ahais ojgomuja. Jeska Allah ensejah mahmei meren koma nou rusnok nomnaga onnga rufogog rot Ofa fob.

²⁸ Sis fob hukum Musa agot rot oida, erek rusnok egeka era rugomu ragot gu ebirfager Yahudi oida osnok egens bera okoja rot efen hukum fob, beda rua rudou eneskeira rot osnok egens insa koma jinaga guru. Jefeda rua ragob ofa rot ojgomu.

²⁹ Jefeda Allah omofra mar okum eteb ekirsa keingg rusnok onnga rukoja Yesus onnga erek Ofa efen efesa si. Noba Ofa emeita mar koma skoita rusnok

ongga ruga oruh Yesus rot efen ogufu onggga eya tumu mega salib tein. Jeska efen ogufu koma bera onggga ohoda moruju onggga efeinah nou mimif. Noba efen ogufu koma bera onggga oroskotu mimif jeska mifmin mar onggga oska nomnaga tein. Beda Allah omofra mar okum eteb keingg rusnok onggga ruga oruh Efena Ebsi Allah onggga ofij mimif rot odou onggga eskeiramera tein.

³⁰ Mimif mijginaga rot oida Allah omofra mar okum eteb keingg rusnok onggga rutunggom mar onggga oska erek insa koma si. Jeska runggu gij Mar Efeyi Ebsi rot mar onggga Ofa anggot rot erek kef oida, "Didif disinsa dimesesa mar okum sons keingg rusnok nomnaga rot mar onggga oska onggga rua rutunggom skoita iwa fob si." Noba mar enjgineg tein onggga runggu rot bera oida, "Didif duga omojga rot mar nomnaga onggga dedin rusnok runtunggom fob."

³¹ Jefeda mar okum eteb emah keingg rusnok onggga Allah ocunc rot oida rerin mar onggga oska ros. Jeska mimif mijginaga rot oida Allah, onggga efen owesa efek eteb, bera omofra mar okum eteb keingg rua rot si.

³² Iwa idou ah keingg rot mona onggga iwa inroru Yesus Kristus fogora yuira gij eisa fob. Gij mona insa koma bera mar onggga okum ofoukou ereneni iwa jeska iwa iroru Yesus Kristus rot tenten fob. Noba iwa yut rot ahais askesi mar koma ah keingg iwa sis fob.

³³ Gij mona insa koma bera rusnok onggga rudou oska rot iwa bera ruga oruh iwa rot tomnomna. Noba iwa yumfij rusnok enjgineg onggga rifeira okora rot mar ofogog insa koma tein.

³⁴ Noba gij mona insa koma tein bera iwa yumfij rua onggga rusnok enjgineg rikris jah mod oskusk jeska

rua ruroru Yesus Kristus efen oga fob. Beda gij mona insa koma bera rusnok onnga rufogog rikris yeyin mareibra jeska. Rua rita mar koma jeska iwa iroru Yesus Kristus fob. Tina iwa ineita idou ofogog sons skoita rua sis fob guru. Jeska iwa ijginaga rot oida yeyin ifons gu mebaga bera erek oufamofa ekirsa.

³⁵ Jefeda ebeibeyaif bera didif duis gu iwa jeskaseda iwa ita idou ahais deika morototuma erek iwa intunggom gij mona onnga sismeni fob ojgomu. Jeska erek iwa iroru Allah rot tenten ojgomuja, beda Ofa emeita yeyin ifons onnga oufamofa eteb si.

³⁶ Iwa iroru Allah efen oga rot ahais ojgomuja. Beda gij mona onnga iwa intunggom mar nomnaga onnga Allah odou ejginaga rot, beda iwa imesma mar nomnaga onnga Ofa anggen rot si.

³⁷ Iwa itunggom mar erek koma ojgomuja, jeska gij Mar Efeyi Ebsi bera runngu rot mar onnga Allah anggot erek kef oida, "Gij mona onnga dektek guru, beda Ofa onnga Didif danggen eimofoj rot oida emen bera emen si.

³⁸ Tina askesi Ofa enen enesi, beda rua onnga Didif duncunc erek rusnok onnga rerin mar onnga oska guru bera ruroru Didif rot tenten ojgomuja. Noba erek rua risiri fogora runroru Didif deika guru, beda Didif dudou omokum eteb rot rua si."

³⁹ Tina mimif bera enerek rusnok onnga rimeesa fogora runroru Yesus Kristus deika guru, erek koma guru. Rusnok onnga rita mar erek koma bera rimeja eseiseifa si. Onnga tenten bera, mimif mita mar erek rusnok onnga ruroru Allah rot ahais ojgomuja. Jefeda mimif mimesma eiteij ah onnga ah aibin ojgomuja tein si.

11 ¹Ebeibeyaif didif dudou os difesij mar osok gij rusnok onnga rudou os ruroru Allah rot tenten ojgomuja. Jeska oisouska mudou onnga ororu Allah rot tenten, bera mimif mijginaga rot oida mimesma mar onnga oufamofa eteb jeska Ofa si. Noba mimif tein mijginaga rot oida erek minek mar onnga oufamofa koma gu miteij enesi, tina gij mona kahma bera mimif mimek mar insa koma si.

²Koma erek tenten, jeska mifmin mimower tein bera ruroru Allah rot tenten ojgomuja. Jefeda Ofa odou eskeira eteb rot rua tein.

³Noba oisouska mudou onnga ororu Allah bera mimif mijginaga rot oida Ofa ontunggom mar nomnaga gu mebif jera mebaga. Noba Ofa otunggom mar insa koma oisouska esinsa efen oga ojga rot ojgomu.

⁴Erek koma tein, Adam efen efesa Habel bera anggos sismeni eteb fob. Tina mar onnga ofa otunggom bera erek orocunc nou mimif onnga deisef tein. Jeska oisouska efen odou onnga ororu Allah rot tenten fob bera ofa eita mar erek orougif gu Allah. Noba Allah odou eskeira eteb ekirsa rot mar onnga ofa eita jeska mar onnga ofa efen mokora Kain eita. Beda Allah ocunc ofa erek osnok egens onnga efen mar onnga oska guru.

⁵Noba oisouska Henokh efen odou onnga ororu Allah rot tenten fob bera ofa efen eiteij ah onnga ongnoska fogora ereita Allah odou eskeira rot ofa. Jefeda Allah ofra ofa rot efen efaga jah mebaga. Beda rusnok ruhca ofa, tina rua rinek ofa deika guru. Ofa enagos guru, tina Allah omfra ofa erek koma, jeska sis fob Ofa ocunc Henokh erek osnok egens onnga ereita Ofa efen odou erek eskeiramera.

⁶ Jeska erek rusnok runororu Allah rot tenten guru, beda enadaij nou rua rita Ofa efen odou erek eskeira rot rua jinaga guru. Jeska osnok egens onggga odou os ougif gu Allah, beda ofa odou ororu rot tenten oida Allah bera onggga efena ebah rot ah aibin, noba Ofa bera onggga eita ofons skoita rusnok nomnaga onggga rugif gu Ofa si.

⁷ Noba oisouska Noak efen odou onggga ororu Allah rot tenten fob bera ofa otunggom meg eteb egens jeskaseda oskotu esinsa jera efen mohona jera efen efeser tein. Jeska Allah agot gu ofa rot oida gij mona kahma beda Ofa omotunggom mei ofot eteb fogora rusnok onggga runororu efen oga guru nomnaga rimageben si. Jefeda Noak ougif gu Allah jera odou onggga emeesa rot fogora ofa otunggom meg eteb egens insa koma. Beda mar onggga ofa ontunggom koma bera erek orocunc rot oida rusnok enjgineg gij mona insa koma rimagos si. Jefeda oisouska mar onggga ofa ontunggom insa koma bera Allah ocunc ofa erek osnok egens onggga efen mar onggga oska oskiyai tein guru.

⁸ Noba oisouska Abraham efen odou onggga ororu Allah rot tenten fob bera ofa ougif gu mar onggga Allah anggot rot gu ofa, fogora ofa eja eker gij monuh efeinah onggga ofa enejginaga rot enesi. Jeska Allah agot gu ofa rot oida Ofa emeita monuh onggga efeinah insa koma gu ofa si.

⁹ Noba oisouska odou onggga ororu Allah rot tenten fob bera ofa engker gij monuh insa koma erek osnok egens onggga osodosa. Koma bera, ofa engker gij modwok frak efeyi ojgomuja. Noba ofa efen efeser Ishak jera efen medebesa Yakub tein geker erek koma jah suma. Jeska rua nomnaga bera onggga

rimesma mebi gij monuh insa koma onggga Allah anggen rot gu rua sis fob.

¹⁰ Abraham eker gij modwok frak efeyi onggga orohuhur erek koma, jeska ofa ejginaga rot oida gij mona kahma beda ofa emeker gij monuh egens onggga Allah esinsa ontunggom fob. Noba monuh egens koma bera angh rot ahais ojomuja, jeska monuh insa koma bera angh gu mebaga.

¹¹ Noba oisouska Abraham efen odou onggga ororu Allah rot tenten fob bera ofa esma efen efesa orna egens. Sis fob Abraham eja erek onokona fob. Noba efen mohona Sara tein bera erek ebsei fob. Erek koma tina ofa ororu Allah rot tenten ojomu. Jeska sis fob Allah agen gu ofa rot oida ofa emesma efen efesa orna egens si. Noba ofa ororu rot tenten oida Allah emeita mar onggga Ofa anggen rot gu ofa si.

¹² Erek koma jefeda oisouska Abraham, onggga erek onokona eteb fob, bera rusnok rufoukou doska onggga runjuj jeska ofa. Noba enadaij nou mimif mufosuit orofosut osnok egens egens onggga runjuj jeska ofa insa koma jinaga guru. Jeska rua nomnaga bera erek motur ofoukou doska onggga angh gu mebaga, era erek mebsta ofoukou onggga angh gu mei mojomu efembra nomnaga.

¹³ Noba askesi rusnok insa koma nomnaga riker rot mar onggga Allah anggen rot, beda rua ragos fob. Noba erek rua risinsa rinesma mar koma askesi rifena ebah ros guru, tina rua ragos jera rudou onggga eskeiramera rot ojomu. Jeska rudou ororu rot tenten oida mar insa koma emen gij mona kahma si. Noba rua tein rusujohu rot oida rua riker gu mebif erek rusnok onggga rusodosa ojomu. Jeska rua rijginaga

rot oida rerin monuh onggga tenten bera angh gu mebaga ros.

¹⁴Rusnok onggga ragot mar erek koma bera erek rua onggga ruhca rot rerin monuh onggga tenten ojomu.

¹⁵Jeska erek rua rusujohu rot rerin monuh giskini onggga rua rin jeska sis fob, beda adaij nou rua ruksons gu rerin monuh insa koma ojomu.

¹⁶Tina rua ruhca rot monuh egens onggga onggoska eteb ekirsa ojomu. Noba monuh insa koma bera angh gu mebaga. Jefeda gij mona onggga rua ragot oida rua bera onggga ruroru Allah rot tenten fob, beda mojenen Ofa rot rua guru. Jeska Ofa ontunggom monuh egens gu mebaga nou rua fob.

¹⁷Noba oisouska Abraham efen odou onggga ororu Allah rot tenten fob, bera ofa esejah odou efesi jeskaseda agob efen efesa Ishak ororu mar onggga Allah anggot rot gu Ofa. Koma bera, sis fob Allah anggen rot oida ofa emesma efen efesa onggga onjuj jeska efen mohona Sara si. Noba Allah anggot rot tein oida rusnok rufoukou rumojuj jeska ofa oisouska efen efesa Ishak ojomu. Beda gij mona kahma deika Allah obk ofa jeskaseda eris efen efesa Ishak ojomu. Allah ereneni ofa odou efesi jeskaseda ek oida erek ofa ororu efen oga rot tenten ei era gurei.

¹⁸(11:17)

¹⁹Beda Abraham ensejah odou efesi jeskaseda eris efen efesa, jeska ofa osujohu rot oida Allah efen owesa efek onggga adaij nou ofra efen efesa sons jeska anggos. Beda gij mona onggga ofa ensejah nou eris efen efesa, beda Allah agot joug rot oida, "Bua bineris ebasa kef guru." Jefeda koma bera erek Abraham ensma efen efesa sons jeska anggos fob.

²⁰ Noba oisouska Ishak efen odou onggga ororu Allah rot tenten fob, bera ofa om eiteij gu Allah jeskaseda Ofa eita oufamofa eteb gu efen efeserga Yakub jera Esau gij mona onggga ofa anggos fob.

²¹ Noba oisouska Yakub efen odou onggga ororu Allah rot tenten fob, bera ofa om eiteij gu Allah jeskaseda Ofa eita oufamofa eteb gu efen medebeserga onggga Yusuf efen efeserga. Ofa tein ois oufamofa eteb gu Allah erek koma askesi ofa era moskur oroisif ojgomu fob. Jeska gij mona insa koma ofa erek onokona eteb ojgomu fob. Noba erek dektek deika guru beda ofa nou onggga anggos.

²² Noba oisouska Yusuf efen odou onggga ororu Allah rot tenten fob, bera gij mona onggga ofa nou onggga anggos, beda ofa efesij mar rot mona onggga rusnok Israel nomnaga rumorogna jeska monuh Mesir. Beda ofa tein agot gu efen rusnok jeskaseda rua rurka efen ofora jeska odog gij mona onggga rua rumorogna jeska monuh Mesir fob. Beda rua risah efen ofora insa koma gij monuh efeinah onggga rua rinja gij.

²³ Noba oisouska Musa efen meka jera mosu godou onggga gororu Allah rot tenten fob, bera goga gendemi gegang oforokai onggga ofoka Musa gij mesta orgomu. Gij mona insa koma raja monuh Mesir agot rot oida rua onggga Israel rerin riser onggga orna nomnaga ragos ojgomu. Tina goga godou enemeesa rot raja egens insa koma efen oga guru. Jefeda goga gejedemi gegang oforokai egens insa koma, jeska goga gosujohu rot oida ofa erek onggkoska eteb.

²⁴ Noba oisouska Musa efen odou onggga ororu Allah rot tenten fob bera ofa ekeba esinsa jeska raja Mesir jera efen rusnok nomnaga. Jeska sis fob raja koma

efen efesa ojaga egens onggga ofra Musa erek esinsa efen efesa.

²⁵ Tina gij mona onggga Musa erek orna eteb fob, beda ofa onodou os ororu rua onggga Mesir gij rerin mar onggga oska erek oskiyai tein guru. Jefeda ofa eja sons erek egens jera Allah efen rusnok Israel jeskaseda eita efera okora morototuma jera rua ojgomu.

²⁶ Jeska ofa osujohu rot oida erek ofa eita efera okora nou Kristus, onggga Allah anggot eimofoj rot oida emen, beda koma bera erek oufamofa ekirsa jeska mareibra ofoukou onggga ofa emesma jeska raja Mesir. Ofa osujohu rot erek koma jeska ofa odou ororu rot tenten oida gij mona kahma bera Allah emeita efen ofons onggga erek ongkoska ekirsa jeska mar insa koma si.

²⁷ Beda oisouska Musa efen odou onggga ororu Allah rot tenten fob, bera ofa orogna jeska monuh Mesir insa koma. Noba ofa enemeesa rot raja Mesir onggga otkonu oska rot ofa guru. Jeska erek ofa enek Allah gu eiteij guru, tina ofa ororu mar onggga Allah ocunc gu ofa gij odou efesi rot ahais ojgomuja.

²⁸ Noba oisouska Musa efen odou onggga ororu Allah rot tenten fob bera ofa obk rua onggga Israel nomnaga jeskaseda ruina maat keingg mona onggga rua rires domba efer efen ogufu tumu mod montoj ojgomu. Jeska gij mona insa koma Allah obk efen malaikat jeskaseda agob rusnok nomnaga rerin riser onggga rusumbohka. Tina malaikat koma enagob rusnok onggga Israel rerin riser guru, jeska rua rires domba efer efen ogufu insa koma tumu rerin mod montoj.

²⁹ Noba oisouska rudou onnga ororu Allah rot tenten fob bera rua onnga Israel ruiru gij Mei Mojumu Efei Ekeni. Tina rua rinageben gij mei koma guru jeska Allah esinsa orohoda mei koma jeska rua fogora ruiru ojgomuja. Jefeda rua ricira gij mei oforga onnga erek ahahir ojgomu onjoros rinjesaga jah gu mei mojumu efei koma enama fob. Tina gij mona onnga raja Mesir efen tentarer rutoij rua onnga Israel gij mei insa koma, beda Allah aha mei mojumu efei insa koma moguma sons, jefeda tentarer insa koma nomnaga rageben gij mei ojgomu.

³⁰ Noba oisouska rusnok Israel onnga rururu Allah rot tenten fob bera mamu onnga rusnok enjineg rungk erek mejga aksa eteb joug kota Yerikho jeskaseda orof joug rusnok jah suma bera ohoda nomnaga fob. Erek koma jeska Allah ocunc gu efen rusnok rot oida rua rumotoijma rejrej kota insa koma gij mona cinja erfeka. Beda Ofa omotunggom mamu onnga rungk erek mejga insa koma jeskaseda ohoda nomnaga.

³¹ Noba oisouska Rahab odou onnga ororu rot mar onnga Allah anggot rot bera ofa enagos morototuma jera efen rusnok nomnaga onnga ringker gij kota Yerikho onnga runougif gu Allah guru. Ofa bera erek ojaga eja motu egens. Tina ofa ofij rua onnga Israel gij mona onnga rua rinsejah nou rimagob rusnok insa koma nomnaga, jefeda rua onnga Israel rinagob ofa guru.

³² Erek koma noba, rusnok enjineg tein onnga rutunggom mar rot rudou onnga ororu Allah rot tenten fob bera erek ofoukou doska. Tina enadaij nou didif difesij rot mar nomnaga onnga rua tein runtunggom gij surat kef guru. Rineya jeska rua bera

erek Gideon ni, Barak ni, Simson ni, Yefta ni, Daud ni, Samuel ni, jera nabi-nabi enjgineg tein.

³³ Jeska oisouska rudou onnga ororu Allah rot tenten fob bera rineya onnga rimedima jera rusnok enjgineg onnga rufogog. Beda rusnok koma risiri gu rua ojgomu. Noba rineya onnga rucunc rot oida rua risma owesa efek jeska Allah gij mona onnga rua rufoka ereij keingg Israel rot tenten noba rufra okum keingg rusnok onnga runoruru Allah oga rot tenten guru. Noba rineya onnga risma mar onnga Allah anggen rot gu rua askesi rua rururu Ofa gij monuh onnga efeinah. Noba rineya onnga ruskotu jeska singa onnga ofogog doska.

³⁴ Noba rineya onnga ruskotu jeska mah eteb onnga et mar rot ebeirens. Noba rineya onnga ruskotu jeska rusnok enjgineg onnga rudou os ragob rua. Noba rineya onnga runofora efek guru bera rija erek rufora efek deika sons. Noba rineya onnga rimedima jera rusnok onnga rusodosa bera risma rufora efek fogora rikemeji rusnok insa koma.

³⁵ Noba rineya onnga erek rujager risma riser sons jeska ranggos. Noba oisouska rudou onnga ororu Allah rot tenten fob bera rineya onnga risma rifeira okora eteb jeska rusnok enjgineg tein. Koma bera, rineya onnga runougif gu rusnok onnga rufogog guru. Jefeda rusnok koma ragob rua onjoros ranggos fob. Tina rua runokoja rot guru, jeska rua rijginaga rot oida rua rimesma eiteij ah onnga ah aibin jeska Allah si.

³⁶ Noba rineya bera rusnok ruga oruh rua noba rangha rua rot ahais tein. Noba rineya onnga rusnok rikris rua jah mod oskusk tein. Beda rusnok koma rira rantai rirakid rerin ritma jera raki tein.

³⁷ Noba rineya onggaga ragos jeska rusnok enjgineg rira mamu riredi rua rot ahais ojomu. Noba rineya bera rusnok enjgineg rira meiteb aksa rireris rifaga fogora ojga erek egeka. Noba rineya onggaga rusnok enjgineg rira meiteb aksa riragob rua. Noba rineya onggaga ricira rourou gij monuh onggaga owowa. Rua rirgi meisoufa onggaga erek domba jera kambing ofos ojomu. Jeska rerin fifi era mareibra egema tein guru. Noba rusnok enjgineg rudou ofogog rot rua ojgomuja.

³⁸ Jeska mar onggaga rusnok insa koma runtunggom gu rua fob, beda Allah efen rusnok ruku fogora ricira rourou gij monuh onggaga owowa erek memaga jera modreni tein. Noba rua rahca gij mansu efesi ojgomuja. Rusnok onggaga rufogog runtunggom mar onggaga oska erek insa koma gu Allah efen rusnok ojgomuja. Jefeda enadaij nou rusnok koma risma mar onggaga oufamofa egema tein jeska Allah efen rusnok insa koma jinaga guru.

³⁹ Mar onggaga rusnok insa koma nomnaga runtunggom rot rudou onggaga ororu Allah rot tenten fob bera erek oufa ojomu. Noba Allah bera erek eskeira rot rua tein. Tina gij mona insa koma rua rinesma mar nomnaga onggaga Allah anggen rot gu rua enesi.

⁴⁰ Jeska Ofa odou os rot oida rua riker nou rerin rufons onjoros mimif tein misma mufons insa koma morototuma jera rua. Noba mufons insa koma bera mifmin mudou onggaga eja erek ebsi komowa oisouska Yesus Kristus fob.

12 ¹ Erek koma jefeda onggaga oufamofa bera mimif mudou ah keingg rot mar onggaga rusnok insa koma nomnaga runtunggom rot rudou

ongga ororu Allah rot tenten fob ojgomu. Jeska mar insa koma nomnaga bera erek mar onggareisisi joug mimif rot mar okum onggah keingg mimif tein ojgomuja. Jefeda erek rusnok onggaraha rerin meisoufa onggah okum jah jeskaseda rufof riremeteima, beda mimif tein maha mar nomnaga onggah orotunggom mudou efesi okum rot jah. Noba erek rusnok rufof riremeteima jeni mar onggah rusnok runcunc gu rua fob, beda mimif tein muroru jeni mar nomnaga onggah Yesus Kristus oncunc rot sis fob.

² Beda mimif tein musujohu rot Yesus efen oga insa koma ojgomuja. Jeska Ofa eita odou ahais gij mona onggah rusnok runtob Ofa tumu mega salib. Beda mojenen Ofa rot mar onggah rua runtunggom skoita Ofa gij mona insa koma guru. Jeska ofa osujohu rot mar onggah emereita efen odou erirei eteb rot gij mona kahma ojgomu. Noba ebeibeyaif bera Ofa enjah mebaga fob jeskaseda ofoka ereij keingg rusnok nomnaga morototuma jera efen meka Allah.

³ Erek koma jefeda gij mona onggah mar okum ah keingg iwa, beda iwa idou ah keingg rot teinefa Yesus eita odou ahais gij mona onggah rusnok onggah rufogog rutunggom mar insa koma gu Ofa ojgomu. Beda koma omorofij iwa tein jeskaseda idou ahais fogora imororu Allah rot tenten ojgomuja.

⁴ Onjoros mona deisef bera iwa iroru Allah rot idou onggah ahais jeskaseda inesiri gu Bilis guru. Tina askesi mar okum ereneni iwa bera yeyin yugufu eneya jeska ifaga erek Yesus ogufu eya jeska Ofa sis fob guru.

⁵ Iwa bera Allah efen efeser. Jefeda iwa inodou ofoj joug rot mar onggah Allah anggot gij Mar Efeyi Ebsi guru. Jeska koma bera onggah ereisisi joug iwa. Ofa

agot oida, "Edesa, gij mona onnga Didif dira mar okum jeskaseda duroftuflu bua, beda bineita budou onnga eskes rot guru. Noba gij mona onnga Didif ducunc gu bua rot bebin mar onnga oska, beda budou enesiri rot guru.

⁶Jeska Didif dutunggom mar insa koma gu rusnok nomnaga onnga Didif dudou okora rot erek dedin edeser."

⁷Jefeda iwa yuin keingg idou efesi rot ahais ojgomu askesi Allah era mar okum jeskaseda oroftuflu iwa. Ofa otunggom mar koma nou iwa jeska Ofa bera erek yeyin ika, noba iwa bera erek Ofa efen efeser.

⁸Noba Ofa oftuflu efen efeser nomnaga rot mar erek koma ojgomu. Jefeda erek Ofa onoftuflu iwa rot yeyin mar onnga oska guru, beda iwa inerek Ofa efen efeser rot tenten guru.

⁹Erek koma tein, sis fob bera mimif nomnaga mifmin miker giskini onnga rira mar okum ruoftuflu mimif. Beda mimif mugif gu rua rot ojgomu. Jefeda gij mona onnga mifmin mika Allah era mar okum oroftuflu mimif erek insa koma, beda koma erek oufa ekirsa nou mimif ojgomu. Jeska oisouska Efena Ebsi Allah bera mimif mita eiteij ah onnga efeinah noba onnga ah aibin.

¹⁰Erek koma noba sis mona onnga mimif erek muforoka ros, beda mifmin miker rira mar okum ruoftuflu mimif gij mona onnga estir ororu risinsa rudou ejginaga rot ojgomu. Tina Allah bera era mar okum oroftuflu mimif jeskaseda orofij mimif rot ojgomu. Ofa otunggom mar insa koma nou mimif jeskaseda mimif tein mita mudou onnga ebsi komowa morototuma erek Ofa.

¹¹ Noba gij mona onnga Allah era mar okum jeskaseda oroftuutu mimif, beda giskini mudou enerirei rot guru. Jeska mimif mita mifera okora rot mar insa koma tein. Tina mar koma bera orofij mimif jeskaseda miker gij miteij ah kef rot mudou onnga eskeiramera jera mudou onnga efen mar onnga oska oskiyai tein guru.

¹² Erek koma jefeda, iwa ita idou efesi onnga erek ahais rot mar insa koma ojgomu fogora iroru Allah oga rot tenten ojgomuja. Iwa ita mar erek koma jeskaseda rua onnga Kristen enjgineg onnga rudou eriaga rot bera rinesiri guru. Beda mar insa koma omorofij rua jeskaseda rua tein rita rudou onnga ororu Allah rot tenten deika.

¹³ (12:12)

¹⁴ Erek koma beda iwa ireneni rot ahais jeskaseda ita idou onnga eskeira morototuma. Noba ita mar rot idou onnga ebsi komowa ojgomu tein. Jeska rusnok onnga ruroru mar onnga oska ros bera rineker morototuma jera Allah gij mona kahma guru.

¹⁵ Beda iwa tein yut joug idou efesi rot ahais ojgomu jeskaseda rineya rinekikif jeska Allah guru. Jeska rusnok koma rinesma eiteij ah efeinah onnga Allah eita rot odou onnga oufamofa guru. Beda iwa tein yut joug idou efesi rot ahais jeskaseda ineita idou onnga oska skoita rusnok enjgineg fogora rudou oska rot iwa tein guru. Jeska mar insa koma bera orok mokcin rusnok nomnaga onjoros rua tein rudou oska morototuma fob. Beda rusnok rufoukou rimeita mar onnga oska rot tein ojgomu.

¹⁶ Beda iwa isisi joug moguma jeskaseda rineya rinesiri morototuma jera egema efen mohona guru. Noba iwa tein ineita mar erek Esau eita sis fob rot

odou onnga osumsumu eteb guru. Jeska ofa erek osnok egens onnga onougif gu Allah rot tenten guru. Ofa erek Ishak efen efesa onnga osumbohka. Jefeda gij mona kahma ofa bera onnga emesma oufamofa jeska Allah morototuma erek efen meka ensma jeska Allah sis fob. Tina ofa eferwei mar insa koma rot maat onnga mokosa efen.

¹⁷ Noba gij mona onnga efen meka ai juens anggos, beda ofa odou os esma oufamofa insa koma jeska Allah ojomu. Tina efen meka okoja ofa rot ojomu, jeska ebeibeyaif mokosa emesma oufamofa jeska Allah ojomu. Beda ofa erejgejgei efen meka noba ebisa rot tein, tina guru.

¹⁸ Gij mona onnga iwa in skoita Allah beda koma enerek mona onnga rusnok Israel rin skoita Allah gu memaga ofos Sinai sis fob guru. Jeska gij mona insa koma bera rua rik mah eteb. Noba mebaga eja erek motkobah rot mocgoj ofog onnga orocohun rua. Beda mof eteb tein edi rot rua.

¹⁹ Beda rua rig Allah oga onnga erek manghi mei onnga oga eteb tein. Jefeda rua rimeesa eteb noba ruis gu Allah jeskaseda Ofa enagot mar teisis skoita rua erek koma guru.

²⁰ Jeska rua rimeesa eteb rot mar onnga Ofa anggot erek kef oida, "Erek rineya jeska iwa era yeyin kambing tein rusok memaga kef, beda Didif dagot rot oida rusnok rira mamu riredi rua era kambing insa koma onjoros ranggos fob."

²¹ Noba mar insa koma onnga rua rik noba rig bera orotunggom rua fogora rimeesa eteb rot. Beda Musa tein agot oida, "Didif dimeesa eteb rot."

²² Sis fob yeyin imower rija jah Memaga Ofos Sion jera kota Yerusalem jeskaseda rugif gu Allah

jah suma. Jeska Allah, onggga efena ebah rot ah aibin, bera efen Mod onggga angh gij kota koma. Tina ebeibeyaif, oisouska Yesus Kristus, bera iwa inja teisis skoita Allah onggga engker jah gu mebaga ojgomu. Jah suma bera Allah efen malaikat-malaikat ofoukou doska onggga risitit gu Ofa rot rudou onggga erirei eteb ojgomuja.

²³ Noba iwa tein yuira jera Allah efen rusnok nomnaga onggga risma mar onggga onggoska eteb jeska Ofa, erek orna osumbohka egens onggga esma mareibra onggga oufamofa jeska efen meka. Noba jah suma bera Allah ongggu keingg yeyin ifoka gij efen buku eiteij ah fob. Noba rusnok onggga ranggos sis fob rot rudou onggga ebsi komowa tein bera rerin rifena onggga ringker jah suma tein. Noba iwa bera in skoita Ofa onggga oga ojga rot rusnok nomnaga rerin rita mar.

²⁴ Noba iwa bera in skoita Yesus Kristus onggga ot deismos nou mimif skoita Allah rot mar efeinah onggga Ofa anggot eimofoj rot sis fob. Jeska oisouska efen ogufu onggga eya jeska efen efaga tumu mega salib erek mar onggga orougif gu Allah, bera Allah onsuna rot mifmin mar onggga oska fob. Noba Yesus ogufu bera oufa ekirsa jeska Habel efen ogufu. Jeska Habel efen ogufu eya gij mona onggga efen mokora anggob ofa fob. Jefeda efen ofoj emah keingg ofa esinsa sons si. Tina Yesus ogufu bera eya, jeska Ofa aha esinsa gu rusnok onggga rufogog erek mar onggga orougif gu Allah jeskaseda Ofa osuna rot rusnok rerin mar onggga oska nomnaga.

²⁵ Erek koma jefeda iwa ig mar nomnaga rot iskusk onggga Allah agot gu iwa ojgomuja. Jeska sis fob bera rusnok onggga Israel runororu mar onggga Musa eisisi

joug gu rua rot guru. Jefeda rua runosuwa jeska mar okum onnga Allah ofra keingg rua rot guru. Erek koma tein, erek mimif munororu mar onnga Allah esinsa eisisi keingg mimif rot guru, beda koma erek mimif munosuwa jeska mar okum insa koma tein guru.

²⁶ Noba gij mona onnga Allah efesij mar gu rua onnga Israel gu Memaga ofos Sinai sis fob, beda mebif nomnaga icusur rot ahais. Tina ebeibeyaif bera Allah agen rot oida, "Gij mona kahma bera Didif dumotunggom mebif jeskaseda icusur rot ahais juens deika. Tina gij mona insa koma tein Didif dumotunggom mebaga jeskaseda eineina erek ahais tein."

²⁷ Noba jeska Ofa agot oida, "Mebif icusur juens deika," beda koma orocunc rot mebif jera mebaga nomnaga onnga Ofa ontunggom fob. Beda Ofa omorohoda rot mar insa koma nomnaga jeskaseda mar onnga angh gu monuh mebaga bera emah rot ahais ojgomuja.

²⁸ Erek koma jefeda, onnga oufa bera mimif muis oufamofa eteb gu Allah noba mugif gu Ofa rot mudou onnga emeesa ojgomu. Jeska mimif minja erek efen rusnok onnga rumuira gij efen monuh mebaga si. Noba monuh koma bera eneineina jinaga guru, tina ah rot ahais gij mona onnga aibin ojgomuja.

²⁹ Jeska mifmin Allah bera omofra mar okum eteb keingg rusnok nomnaga onnga rerin mar onnga oska morototuma erek mah onnga et mar nomnaga.

13 ¹ Iwa ita idou onnga omokorema erek imokosama morototuma.

² Beda iwa icunc idou onnga oufamofa skoita rusnok onnga iwa inejginaga rot enesi tein. Noba yufij rua

rot maat era mar enjineg tein. Jeska sis fob mifmin muhujir ruroun rusnok onnga rua rinejginaga rot enesi gij rerin mod jeskaseda rufij rua. Tina rua rinejginaga rot oida rusnok insa koma onnga rua rumfij bera malaikat-malaikat onnga Allah ombk guru. Rua rusujohu rot oida rusnok insa koma bera erek rusnok giskini ojgomu.

³ Noba iwa idou ah keingg rot mar okum onnga ah keingg yeyin ihujir Kristen onnga ringker gij mod oskusk ros, fogora rufij rua ojgomuja. Noba yufij yeyin ihujir onnga risma rifera okora jeska rusnok enjineg tein.

⁴ Beda iwa iroru Allah efen moroju onnga tenten nou runer jera rujager onnga rumoskotuma fob rot koisoisa ojgomu tein. Noba iwa inesiri jera egema efen mohona guru. Jeska Allah omofra mar okum eteb keingg rusnok onnga rutunggom mar onnga erek koma si. Ofa omofra mar okum keingg rusnok nomnaga onnga risiri morototuma si.

⁵ Noba yut joug idou efesi jeskaseda idou enesma keingg rot fifi eteb ojgomuja guru. Tina ita idou onnga eskeira rot mar onnga iwa yeyin ebeibeyaif ojgomu. Noba iwa inemeesa rot yeyin itej ah kef ojgomuja guru. Jeska gij Mar Efeyi Ebsi bera Allah agot oida, "Didif dumofij iwa si. Didif dinaha iwa igef jah jinaga guru."

⁶ Jefeda mimif tein magot erek mar egens gij Mazmur agot oida, "Allah bera onnga ofij didif, jefeda didif dinemeesa rot mar egema tein guru. Jeska enadaij nou rusnok rutunggom mar onnga oska skoita didif jinaga guru."

⁷ Beda iwa tein idou onfoj joug rot rusnok onnga ruftuftu iwa osok gij Allah oga rot sismeni fob guru.

Tina isujohu osok gij mar onggua rua rutunggom rot rudou onggua ororu Allah gij mona onggua rua rifena ebah ros. Beda iwa ita mar morototuma erek rua ojgomu.

⁸Jeska Yesus efen eita mar eneja erek toga guru. Mar onggua Ofa eita sis fob, jera deisef, jera gij mona kahma tein bera erek morototuma ojgomuja.

⁹Jefeda iwa ibes ifaga jeska rusnok onggua ruftuftu mar onggua erek toga jeska Allah efen oga ojgomu. Jeska mar koma omoroku idou efesi fogora imesiri gij tein. Noba mimif munoruru rerin erebent osok gij maat onggua rinet guru, jeska koma eneita owesa efek gu mimif era gu rua tein jinaga guru. Tina onggua oufa bera mimif misma owesa efek oisouska Allah odou onggua oufamofa rot mimif ojgomu.

¹⁰Jeska mifmin Tuhan Yesus Kristus bera anggos tumu mega salib erek mar onggua orougif gu Allah nou mimif fob. Noba koma bera onofij rusnok onggua rururu erebent onggua hukum Musa anggot rot jeskaseda rusuna rot rerin mar onggua oska ros guru.

¹¹Ororu jeni erebent hukum Musa bera imam onggua ofoka aksa orka mar ogufu gij Mod Allah efesi jeskaseda eita mar koma erek orougif gu Allah nou rusnok rerin mar onggua oska. Tina rua rurka marska insa koma efen efaga jeska kota jah mebah. Beda rua ris mah gij marska insa koma jah suma.

¹²Erek koma tein, rusnok ruroun Yesus Kristus jeska kota jah mebah fogora Ofa agos tumu mega salib jah suma jeskaseda orosuna rot rusnok rerin mar onggua oska.

¹³Jefeda onggua oufa bera mimif maha mifmin erebent jeska hukum Musa insa koma nomnaga jah ojgomu. Beda mimif mururu Yesus Kristus jeskaseda

misma eiteij ah ongga efeinah deika. Noba mimif tein mita mudou ahais askesi rusnok rutunggom mar ongga oska skoita mimif rot. Koma morototuma erek rusnok rita mar ongga oska skoita Yesus tein sis fob.

¹⁴Jeska gu mebif bera mimif mifmin kota egens ongga enah aibin guru. Noba mimif miker rot mifmin monuh ongga ah gu mebaga ojgomu. Monuh insa koma bera ah aibin ojgomuja.

¹⁵Jefeda oisouska Yesus Kristus bera mimif mira muga miresitit rot Allah erek mar ongga murougif gu Ofa rot ojgomu. Noba Ofa odou bera eskeira rot tein. Beda gij mar insa koma bera mimif tein magot rot oida mudou ororu Ofa rot tenten ojgomuja.

¹⁶Noba iwa icunc idou ongga oufamofa skoita rusnok enjgineg tein, noba yufij rua tein rot mar ongga rua rucosu rot. Jeska koma tein bera erek mar ongga iwa irougif gu Allah rot. Noba Ofa odou bera eskeira rot mar erek koma tein.

¹⁷Beda iwa yugif gu yeyin ebirfager ongga ruftuftu iwa rot Allah efen oga tein. Noba iwa iroru rerin ruga rot mar insa koma tein. Jeska rua bera ongga rufij iwa jeskaseda iwa iroru mar ongga tenten ojgomu. Noba rua rijginaga rot oida gij mona kahma, beda Allah emejeka joug rua rot mar ongga rua rumftuftu gu iwa fob. Jefeda iwa iroru rerin ruga rot tenten ojgomu jeskaseda rudou onokum rot iwa guru. Jeska erek iwa yufij rua, beda koma erek iwa yufij isinsa rot tein.

¹⁸Noba iwa yum iteij gu Allah nou memef tein jeskaseda Ofa omofij memef ojgomuja. Jeska memef mosujohu rot oida monotunggom mar ongga ereita Allah odou okum skoita memef rot guru. Noba memef

modou os meita mar onnga erek oufamofa skoita iwa ojgomu.

¹⁹ Noba didif disinsa duis gu iwa erek koma jeskaseda Allah omohoda moroju nou didif fogora dumoksons skoita iwa.

²⁰ Didif dum diteij gu Allah nou iwa fob. Noba Ofa bera onnga eita eiteij ah onnga eskeira gu mimif. Noba Ofa bera onnga omfra Yesus sons jeska anggos fob. Noba ebeibeyaif bera Yesus Kristus ot joug mimif ojgomuja erek gembala egens onnga ont joug efen domba-domba. Allah omotunggom mar erek koma jeskaseda orocunc gu rusnok nomnaga rot oida mar onnga Ofa anggot eimofoj rot sis fob bera ah gij efera fob. Noba koma bera oisouska Yesus Kristus ogufu onnga eya jeska efen efaga tumu mega salib. Noba mar koma bera ah rot aibin ojgomuja. Mimif mudou os erek koma (Ainsoma).

²¹ Noba didif dum diteij gu Allah jeskaseda Ofa emeita owesa efek gu iwa fogora iwa imotunggom mar nomnaga onnga Ofa odou ejginaga rot tein. Askesi iwa itunggom mar insa koma nou Ofa ojgomuja, beda Ofa omotunggom mar gij idou efesi onnga ereita Ofa odou eskeira rot iwa si. Ofa otunggom mar koma oisouska Yesus Kristus. Jefeda mimif mudou os oida rusnok nomnaga risitit gu Yesus Kristus rot efen ofoka onnga aksa eteb ojgomuja.

²² Edohuji, didif duis gu iwa jeskaseda iwa isujohu rot iskusk osok gij mar nomnaga onnga didif dinsisi joug gu iwa gij surat egens kef fob. Jeska surat egens kef bera erek estir ojgomu.

²³ Noba didif dudou os dagot gu iwa rot oida mifmin muhuj Timotius bera orogna jeska mod oskusk fob.

Noba erek ofa en skoita didif ebeirens, beda dimeja skoita iwa morototuma jera ofa si.

²⁴Didif duisu yeyin ebirfager nomnaga onnga ruftuftu iwa rot Allah efen oga, jera Allah efen rusnok nomnaga jah suma. Allah efen rusnok gij monuh Italia insa kef bera ruisu iwa tein.

²⁵Didif duis gu Allah jeskaseda Ofa ocunc odou onnga eskeiramera eteb rot iwa nomnaga. Ainsoma.

Yakobus

1 ¹ Didif Yakobus bera dunogu surat egens kef gu iwa onnga Yahudi jeska ebic setka kungkob erfeka onnga enjerek Allah efen rusnok fob. Iwa tein bera onnga iroru Yesus Kristus fob. Noba ebeibeyaif iwa injeker sinefa sinefa rejrej monuh ofoukou fob. Didif bera erek osnok egens onnga dumfij Allah jera mifmin Tuhan Yesus Kristus ojgomuja. Noba didif duis oufamofa eteb gu iwa nomnaga!

² Edohuji, gij mona onnga mar okum ofoukou ereneni iwa, beda iwa idou efaga ouka rot mar koma ojgomu.

³ Jeska iwa ijginaga rot oida, erek iwa iroru Tuhan Yesus rot ahais gij mona insa koma, beda iwa imot rot ahais ojgomuja askesi mar insa koma ah keingg iwa si.

⁴ Iwa ita idou onnga ahais erek koma ojgomuja onjoros iwa injerek Kristen onnga rinsma riteij ah onnga onkoska gij mar nomnaga.

⁵ Erek osnok egens jeska iwa onnga odou enebriyi eteb gij mar enesi, beda ofa ois gu Allah rot ojgomu. Jeska Allah bera onnga eita mar onnga oufamofa erek ofoukou gu rusnok. Beda osnok egens koma emesma odou onnga ebriyi gij mar rot tenten si. Jeska Allah emeita mar erek koma rot efen odou onnga eriagamaga eteb ojgomu. Ofa enagei mar koma jeska iwa guru.

⁶ Tina idu onnga omois rot mar erek insa koma gu Allah, beda odou ororu rot tenten oida Allah emeita mar onnga ofa ois rot insa koma gu ofa si. Enadaij

nou ofa osujohu rot oida Allah eneita mar koma gu ofa guru. Jeska idu onnga ejekjeka gij odou efesi erek koma, beda ofa erek mega rawom efek onnga eibibi gij mei mojomu efei ojgomuja. Noba mei mojomu efei omorkorka rawom efek insa koma jah sinefa sinefa.

⁷ Idu onnga osujohu rot mar erek insa koma bera erek rusnok onnga rudou egekeka rot mar onnga rumois rot gu Allah ojgomu. Jeska ofa osujohu rot oida, "Tuhan Allah emeita mar koma gu didif ei, era gurei." Koma bera orocunc rot oida efen odou onnga eineina gij mar nomnaga onnga ofa otunggom ojgomuja. Erek koma jefeda enadaij nou rusnok onnga rudou egekeka erek insa koma rusujohu rot oida rua rimeita mar egema tein jeska Allah jinaga guru.

⁸(1:7)

⁹ Erek rusnok enjgineg rusujohu rot oida mifmin muhujir rineya rerin rufoka guru, beda muhujir insa koma rudou onokum rot koma guru. Onnga tenten bera, rua onnga runofoka guru rita rudou efaga ouka rot ojgomu. Jeska rua ruroru Yesus Kristus fob, jefeda Allah omfra rua jeska rerin mar onnga okum tein fob.

¹⁰ Erek koma tein rot rua onnga runa mei ahta. Gij mona onnga rua rerin mareibra nomnaga enseiseifa jeska rua fob, beda rudou onokum rot koma ojgomu guru. Jeska runa mei ahta koma bera erek marfok onnga er reirei ojgomu.

¹¹ Ai juens beda mowa endi marfok koma fogora osra, noba efen ofok onnga ongnoska koma ejba toumou. Erek koma tein rot runa mei ahta onnga ribirfaga erebibeitumu rerin mareibra ojgomuja.

Jeska gij mona onggara ranggos fob, beda rua rija jeska rerin mareibra onggara ofoukou koma nomnaga fob.

¹²Oufamofa eteb nou rua onggara rita rudou ahais gij mona onggara mar okum eteb ereneni rua. Jeska erek rua rut rot ahais askesi mar onggara okum koma anghu rua ros, beda gij mona kahma bera rua rimesma rufons onggara Allah anggen rot gu rusnok nomnaga onggara rudou okora rot Ofa. Rufons insa koma bera erek rua rijeker morototuma jera Allah jah mebaga nou mona onggara ah aibin ojgomuja.

¹³Erek koma tein, gij mona onggara mar egema ereita rusnok rudou efesi fogora risiri gij mar onggara oska fob, beda enadaij nou rua rusujohu rot oida Allah bera onggara ombk mar koma gu rua guru. Jeska Allah esinsa enesiri gij mar onggara oska onggara ereita odou efesi jinaga guru. Noba Ofa onobk mar onggara ereita rusnok rudou efesi tein guru.

¹⁴Tina erek mar egema onggara ereita rusnok rudou efesi fogora risiri gij mar onggara oska, beda mar koma en jeska risinsa rudou onggara eftirir keingg mar onggara oska insa koma sis fob ojgomu.

¹⁵Rua risah mar onggara oska insa koma gij rudou efesi sis fob ojgomu. Noba gij mona egema deika bera rua rutunggom mar onggara oska insa koma jeni rudou os rot ojgomu. Rua runtunggom mar onggara oska erek koma fob, jefeda rua rimeja jah mahmei meren rot ah aibin ojgomuja si.

¹⁶Edohuji onggara dudou okora rot, erek iwa isujohu rot mar onggara oska insa koma ojgomuja, beda koma erek iwa yucuwei mar jeska isinsa ojgomu. Jeska Allah onobk mifmin mudou efesi jeskaseda mita mar onggara oska guru.

¹⁷ Mar onggaga onggoska bera en jeska Allah onggaga angh gu mebaga ojjomu. Ofa bera onggaga ontunggom mowa ni, mesta ni, motur ni. Ofa eneferwei mar egema tein onggaga Ofa anggot rot era ontunggom sis fob jinaga guru.

¹⁸ Noba sis fob Ofa esinsa onsujohu rot oida Ofa omoroun mimif erek efen rusnok. Jefeda oisouska efen oga onggaga oufamofa insa koma bera mimif minjerek mar onggaga ofoufem ekirsa jeska mar nomnaga onggaga Ofa otunggom fob.

¹⁹ Edohuji onggaga dudou okora rot, didif dui gu iwa jeskaseda idou ororu mar erek kef ojjomu: Orofosut osnok egens eg Allah oga rot iskusk ojjomu. Beda rua runojoftu tu rot oga insa koma ebeirens gu rusnok enjgineg guru. Tina rua riker noba rusujohu rot oga insa koma sismeni fog. Noba rua tein rudou onotkonu oska rot ebeirens skoita rusnok enjgineg guru.

²⁰ Jeska rusnok onggaga rutkonu oska bera rerin rudou efesi onggaga oska. Tina Allah odou os oida mimif mita mudou efesi onggaga efen mar onggaga oska oskiyai tein guru.

²¹ Jefeda iwa ija jeska yeyin mar onggaga oska nomnaga onggaga oroku idou efesi rot ojjomuja. Beda iwa ita idou onggaga eriagamaga fogora iroru Allah oga onggaga ofa ensah gij idou efesi fob. Allah oga onggaga oufamofa bera efen owesa efek nou osuwa iwa jeska yeyin mar onggaga oska.

²² Gij mona onggaga iwa ingg rot Allah oga onggaga oufamofa fob, beda iwa ita mar jeni Allah oga insa koma ojjomu. Jeska erek iwa ingg rot Allah oga insa koma fob, tina iwa ineita mar jeni oga insa koma guru, beda koma erek yucuwei mar jeska isinsa fob.

²³ Jeska rusnok onnga ringg rot Allah oga fob, tina rineita mar jeni guru, beda rua koma bera erek rusnok onnga ringk rusum gij kansinam.

²⁴ Rua rik rifena rot iskusk gij kansinam insa koma, tina nou onnga rua rinja jeska, beda ainsa koma tein rudou ofoj joug rot rerin rusum insa koma deika. Koma bera erek rusnok onnga ringg rot Allah oga tein, tina rudou ofoj joug rot ebeirens ojomu.

²⁵ Erek koma, tina hukum Allah bera ongnoska eteb noba efen owesa efek nou osuwa rusnok jeska rerin mar onnga oska. Noba rusnok onnga rig Allah oga rot iskusk noba rudou onofoj joug rot guru, tina rua rita mar koma jeni ojomu, beda Allah omofij rua rot mar nomnaga onnga rua risinsa rutunggom. Jeska rua bera erek rusnok onnga ruroru hukum Allah rot tentenmen fob.

²⁶ Erek koma tein, idu onnga osujohu rot oida ofa esinsa bera ororu Allah oga rot tenten fob, tina onof joug awesi jeska mar onnga oska guru, beda koma erek ofa ocuwei mar jeska esinsa ojomu. Mar insa koma onnga ofa esitit esinsa efaga rot bera onofij ofa jinaga guru, jeska Allah odou eneskeira rot ofa guru.

²⁷ Noba, rusnok onnga Allah osujohu oida ruroru Ofa rot rudou onnga ebsi komowa bera rutunggom mar erek kef: Rua rufij ruforoker onnga rusir jera riker ragos jeska fob. Noba rua rufij rujager rija mesina onnga rinesma mar rot risinsa rifaga guru. Noba rua rut joug rudou efesi jeska mar onnga oska tein ojomuja.

2¹ Edohuji, mimif nomnaga bera muroru Tuhan Yesus Kristus onnga mimif mufra efen ofoka erek aksa eteb fob. Jefeda enadaj nou mudou ekeba

rusnok oisouska mar onnga mimif mingk jeska rua guru.

²Erek osnok egens ergi meisoufa onnga ebahetkitk noba aha emas tumu otub ofou, noba osnok egens enjgineg onnga ergi meisoufa onnga ebgebga tumu efaga gen jah mod onnga iwa imohoturuma gij,

³beda giskini iwa yugif gu ofa onnga ergi meisoufa onnga ebahetkitk insa koma ojgomu. Beda iwa iron ofa noba yagot gu ofa oida, "Akeina, bijeker gij kursi onnga oufamofa koma." Tina iwa yagot gu osnok egens insa koma onnga ergi meisoufa ebgebga rot oida, "Bua but yes jah sunj ojgomu," era "Bijeker jah mersa degini koma ojgomu."

⁴Erek iwa itunggom mar insa koma, beda koma erek idou ekebkeba rusnok oisouska mar onnga iwa ingk jeska rua ojgomu. Beda koma erek iwa yuga ojga rot rua noba yufra rineya erek eteb ekirsa jeska rigema. Jefeda mar onnga iwa intunggom insa koma bera oska eteb fob.

⁵Edohuji onnga dudou okora rot, idou ah keingg rot kef ojgomu: Rusnok onnga runok rufoka gij guru nou mona insa kef, rua bera onnga Allah oncunc fob jeskaseda rija erek efen rusnok onnga ruroru efen oga rot rudou ongakmos. Rua bera onnga rimesma eiteij ah onnga efeinah jeska Ofa gij mona onnga Ofa ofoka ereij keingg rusnok nomnaga. Jeska koma bera onnga Ofa anggen rot sis fob gu rusnok nomnaga onnga rudou okora rot Ofa.

⁶Tina ebeibeyaif iwa bera yuga oruh rua insa koma onnga runok rufoka gij guru. Iwa itunggom mar erek koma gu rua, tina rusnok onnga runa mei ahta bera onnga rut keingg iwa tein ojgomu. Noba rua bera onnga rikris iwa skoita hakim tein.

⁷ Erek koma tein, Yesus bera onnga iwa iroru erek yeyin ebirfaga onnga ofoka aksa eteb. Tina runa mei ahta insa koma bera ruga oruh rot Yesus Kristus ofoka tein.

⁸ Mar egens onnga Allah anggot gij Mar Efeyi Ebsi sis fob bera erek kef oida, "Idou okora rot rusnok enjgineg erek iwa idou okora rot isinsa." Jefeda erek iwa ita mar jeni hukum Allah egens insa kef ojgomu, beda koma erek iwa itunggom mar onnga oufamofa eteb.

⁹ Tina erek iwa idou ekebkeba rusnok oisouska mar onnga iwa ingk jeska rua, beda koma erek iwa ikirsa rot hukum Allah egens insa koma ojgomu ros. Noba koma erek iwa intunggom mar onnga oska fob.

¹⁰ Jeska erek osnok egens ororu jeni hukum Allah nomnaga, tina ofa ekirsa rot hukum Allah egens ai ojgomu, beda koma erek ofa ekirsa jeska hukum insa koma nomnaga tein fob.

¹¹ Koma tenten, jeska Allah anggot rot mar erek kef oida, "Iwa inesiri morototuma jera egema efen mohona guru." Noba Ofa tein anggot rot oida, "Iwa inagob rusnok enjgineg guru." Jefeda erek iwa inesiri morototuma jera egema efen mohona guru, tina iwa yagob rusnok enjgineg ojgomu, beda koma erek iwa ingkirsa rot hukum Allah nomnaga fob ojgomu.

¹² Allah oga onnga oufamofa bera onnga onsuwa mimif jeska mifmin mar onnga oska fob. Jefeda ebeibeyaif Ofa omoga ojga rot mimif nomnaga oisouska jeni erek mar onnga muntunggom rot efen oga insa koma. Erek koma jefeda mimif mut joug misinsa mudou efesi rot ahais osok gij mar onnga mimif mutunggom noba magot rot ojgomu.

¹³ Jeska erek rusnok rudou onokora rot rusnok enjgineg guru, beda gij mona onnga Yesus Kristus ongksons en fob, beda Allah odou onokora rot rua tein guru. Tina rusnok onnga rudou okora rot rusnok enjgineg fob bera rinemeesa rot mona onnga Tuhan emen jeskaseda ofra okum keingg rusnok guru.

¹⁴ Edohuji, erek iwa yagot oida iwa iroru Allah oga rot tenten fob, tina mar onnga iwa itunggom bera onocunc jeni rot koma guru, beda mar onnga iwa yanggot insa koma bera eneita eiteij ah onnga efeinah gu iwa jinaga guru.

¹⁵ Erek yeyin ihuj orna egens era ojaga egens onnga efen meisoufa era maat enadaij nou ofa guru,

¹⁶ noba iwa yuis gu ofa oida, "Biker rot ongkoska ojgomu," tina iwa inofij ofa rot maat era meisoufa tein guri. Beda mar insa kef onnga iwa yuis gu ofa bera onofij ofa rot jinaga guru.

¹⁷ Jefeda erek osnok egens agot oida ofa ororu Allah oga fob, tina ofa onocunc rot koma oisouska mar onnga ofa otunggom guru, beda mar onnga ofa esitit esinsa efaga rot insa koma bera erek rourou ojgomu. Jeska koma bera orocunc rot oida ofa onororu Allah oga rot tenten enesi. Jefeda mar onnga ofa anggot insa koma bera onofij ofa erek oskiyai tein jinaga guru.

¹⁸ Beda rineya onnga ranggot oida, "Memef mororu Allah rot tenten fob." Tina teinefa fogora mimif mijginaga rot oida mar onnga rua ranggot koma bera erek tenten ei era gurei? Jeska mimif minek rua rutunggom mar onnga oufamofa jeni mar insa koma onnga rua ranggot jinaga guru. Erek koma, tina didif dagot oida mar onnga ongkoska onnga mimif muntunggom bera onnga orocunc rot oida mimif

muroru Allah rot tenten fob ojgomu. Koma bera erek ofoufem. Jeska erek rusnok enjgineg rik mar koma ongga mimif mutunggom fob, beda rua rimejginaga rot oida mimif muroru Allah rot tenten fob.

¹⁹ Iwa isitit isinsa ifaga fogora yagot oida, "Memef mougif gu Allah ongga tenten ojgomu. Noba mar ongga rusnok enjgineg rugif gu bera erek tenten guru." Mar ongga iwa yanggot insa koma bera ongkoska, tina koma onocunc rot oida iwa iroru Allah rot tenten enesi. Jeska rifena ofogog ragot oida Allah bera ongga tenten tein. Tina efena ofogog koma rimeesa eteb rot mar okum ongga Allah omofra keingg rua gij mona kahma si.

²⁰ Noba iwa ongga yagot mar erek insa koma bera yucuwei mar ros! Jefeda mar ongga yanggot insa koma bera onofij iwa oskiyai tein jinaga guru. Didif dumocunc gu iwa juens deika rot teinefa rusnok ongga ranggot mar erek insa koma bera runoruru Allah rot tenten enesi.

²¹ Mimif nomnaga mijginaga rot mifmin mimowa Abraham fob. Ofa ougif gu Allah noba ontunggom mar ongga Allah anggot rot fob, jefeda Allah odou eskeira eteb rot ofa. Koma erek sis fob gij mona ongga Allah obk Abraham jeskaseda eris efen efesa Isak erek mar ongga orougif gu Allah rot.

²² Abraham odou ororu Allah oga rot tentenmen, jefeda ofa otunggom mar nomnaga ongga Allah ombk ofa rot fob. Noba mar egeka insa koma ongga Abraham ontunggom bera orocunc rot oida ofa ororu Allah rot tenten ojgomuja fob.

²³ Noba mar insa koma ongga ofa otunggom bera angh gij efera jeni Mar Efeyi Ebsi anggot rot sis fob oida, "Abraham ororu Allah oga rot tenten, jefeda

Allah ocunc ofa erek osnok egens onnga efen mar onnga oska oskiyai tein guru." Noba Allah tein ejeka Abraham erek efen mohuj egens.

²⁴ Erek koma jefeda Allah odou eneskeira rot rusnok onnga ragot rot oida rua ruroru Ofa fob, tina rua runotunggom mar egema tein onnga orocunc jeni rot mar insa koma guru. Tina Allah odou eskeira eteb rot rusnok onnga rutunggom mar onnga orocunc rot koisoisa oida rua ruroru Ofa efen oga rot tenten ojgomuja.

²⁵ Mimif mijginaga rot Rahab tein fob. Ofa erek ojaga egens onnga rija motu nou fifi. Tina Allah odou eskeira rot ofa jeska mar egens onnga ofa ontunggom sis fob. Koma gij mona onnga ofa edemi Yosua efen gosnok onnga goira gij kota Yeriko jeska tentarer onnga ruhca goga. Beda Rahab ofij goga jeskaseda geja rot toumou jeska kota koma tein. Ofa otunggom mar insa koma jeska odou ororu rot tenten oida ai juens beda Allah omofra mar okum eteb keingg ofa efen rusnok onnga ringker gij kota koma.

²⁶ Koma erek mifmin mifaga kef tein. Gij mona onnga mifena eneker gij mifaga deika guru, beda koma orocunc rot oida manggos fob. Koma erek rusnok onnga ragot oida rua ruroru Allah fob, tina runotunggom mar egema tein onnga orocunc rot koma guri. Jefeda mimif mijginaga rot oida rua runororu Allah rot tenten enesi. Jeska rua rineita mar onnga orocunc rot jeni guru. Jefeda mar onnga rua ranggot insa koma bera onofij rua erek oskiyai tein guru.

3¹ Edohuji, rusnok rufoukou rudou os ruftuftu rot Allah oga erek didif. Tina onnga oufamofa

bera rua rusujohu decideci rot mar onggara rudou os insa koma fog. Jeska gij mona onggara Yesus Kristus onggara ons en fob, beda Ofa emejeka joug memef onggara moftuftu rot efen oga erek ahais ekirsa jeska rusnok onggara runoftuftu rot efen oga guru.

² Mimif nomnaga bera muntunggom era manggot mar onggara oska onjoros mona deisef fob. Tina idu onggara ot joug awesi rot mar onggara oska, beda koma erek ofa ot joug esinsa efaga nomnaga rot ahais ojgomu. Jefeda koma erek ofa onotunggom mar onggara oska egema tein deika guru.

³ Didif dimagot mar egens onggara orocunc rot marni ofou onggara erek mar onggara ofokai ojgomu. Giskini bera mimif mira mar onggara ofokai erek marfeb jeskaseda mirakid kuda awesi. Kuda egens koma bera erek eteb doska, tina mimif muku marfeb rot kuda egens insa koma, beda kuda egens koma ororu meidu onggara mimif mudou os rot ojgomu.

⁴ Noba mifmin marni ofou insa koma bera erek kabar mei tein. Kabar mei erek mar onggara eteb doska. Tina efen mansinya onggara ofokai ojgomu. Noba rusnok ragei mansinya koma fogora rifin kabar mei onggara eteb jah monuh onggara rudou os rinja gij, beda kabar mei ororu ojgomu.

⁵ Erek koma tein rot mifmin marni ofou. Marni ofou kef erek ofokai tein, tina mimif mira marni ofou koma fogora misitit misinsa erek eteb tein. Mimif mijginaga fob rot oida mah efesi erek ojgomai tein, tina gij mona onggara mah ofokai ensiri gij mekta, beda koma adaij nou et mekta onggara eteb doska koma nomnaga tein.

⁶ Mifmin marni ofou koma erek mah onggara ent mar. Marni ofou koma bera erek mar onggara ofokai, tina

koma omorka mimif gij mar onggga oska eteb onjoros mifmin mifaga nomnaga enjeseiseifa rot. Bilis bera onokub mah gij mifmin marni ofou insa koma. Jefeda mar onggga mimif manggot bera orka mar okum skoita mimif sis mona onggga muforokai onjoros mona onggga munokona rot tein fob.

⁷ Mar nomnaga onggga osuwotu gu mebif erek rusa ni, mem ni, jera mar enjineg onggga angh gu mei mojemu efei bera rusnok rifa onjoros egma. Beda mar koma ororu meidu onggga rusnok koma rundou os rot ojgomu.

⁸ Tina marni ofou egens koma bera erek mar ofogog onggga otunggom mar onggga oska ojgomuja. Enadaij nou mimif mut joug marni ofou koma rot ahais jinaga guru. Jeska mar onggga rusnok ranggot rot bera onggga orka mar onggga oska ofoukou tein.

⁹ Mimif mira mifmin marni murois oufamofa eteb gu Allah. Tina mimif mira marni insa koma miragot mar onggga oska eteb skoita rusnok enjineg tein. Tina koma enadaij guru, jeska Allah esinsa era etma orotunggom rusnok insa koma jeskaseda rerin rifena tein morototuma erek Ofa efen efena.

¹⁰ Gij mona juens bera mimif mira marni ofou egens murois oufamofa gu Ofa. Beda gij mona egema deika bera mimif mira marni ofou egens insa koma tein fogora miragot mar onggga oska skoita rusnok enjineg. Noba mar koma bera onoufa jinaga guru.

¹¹ Mei onggga oska efekeifa jera mei onggga eyejkita bera enen jeska mei eiteij egensmes guru.

¹² Noba mega meibetnek enejefek erek jodi tein guru. Noba mega onggga efen efek bera enejefek morug tein guru. Erek koma tein, mimif minej mei onggga eyejkita jeska mei efej onggga efen mei

osusuwu ojgomu guru. Jefeda edohuji, mimif mira marni ofou jeskaseda miragot mar onnga oufamofa ojgomu, noba minera marni ofou jeskaseda magot mar onnga oska skoita rusnok enjgineg tein guru.

¹³ Idu jeska iwa ifekesa onnga odou ebriyi gij mar rot tenten, beda ofa efen eiteij ah onnga orocunc jeni rot mar insa koma ojgomu. Ofa otunggom mar onnga oufamofa skoita rusnok enjgineg rot odou onnga eriagamaga jera odou onnga ebriyi gij mar rot tenten ojgomu.

¹⁴ Tina idu onnga odou ejisei noba odou os ofra esinsa ofoka erek eteb ojgomu, beda enadaij nou ofa efesij rourou gu rusnok oida ofa efen odou onnga ebriyi gij mar rot tenten guru. Jeska koma erek ofa ocuwei mar ojgomu.

¹⁵ Mar onnga rusnok mebif ranggot oisouska rudou onnga risinsa rusujohu rot oida ebriyi eteb gij fob bera enen jeska Allah guru. Mar koma en jeska rusnok rudou efesi onnga oska ojgomu. Noba Bilis bera onnga eita rudou efesi onnga oska erek koma ojgomu.

¹⁶ Jeska gij mona onnga mimif mik rusnok onnga rudou enjisei noba rufra risinsa rufoka erek eteb, beda mimif tein mimek mar erek rusnok onnga ruga omosokuma jera rusnok onnga rutunggom mar onnga oska ofoukou tein.

¹⁷ Tina idu onnga odou ebriyi gij mar onnga en jeska Allah rot tenten ojgomu, beda mimif mik mar erek kef: Ofa efen odou onnga ebsi komowa ni, ofa ocunc odou onnga eskeiramera skoita rusnok enjgineg ni, ofa odou eriagamaga skoita rusnok enjgineg tein ni, efen ebirfaga ombrera guru n, odou okora rot rusnok enjgineg ni, ofa tein eita mar onnga ongnoska

ojgomu ni, ofa enekeba rot rusnok ebic enjgineg guru ni, tina ofa efen odou onnga aharukamoka rot rusnok nomnaga ni,

¹⁸Erek osnok egens erefa marsi, beda gij mona kahma ofa emek efen efek si. Erek koma tein rot rusnok onnga rucunc rudou onnga eriagamaga skoita rusnok enjgineg. Jeska gij mona kahma beda rua rimek oida rua nomnaga riker morototuma rot rudou onnga eskeiramera eteb. Noba Allah odou eskeira rot rerin riteij ah tein si.

4¹Mar onnga idou eftirir keingg rot, noba mar onnga oroku idou efesi bera onnga orotunggom idou onnga erek ofogog moguma. Jefeda iwa yuga omosokuma ojgomuja.

²Idou eftirir keingg mar, tina inesma mar koma guru. Jefeda iwa isujohu gij idou efesi oida yagob rusnok jeskaseda ita mar insa koma ojgomu. Noba iwa idou eftirir keingg rot mar onnga rusnok enjgineg rerin. Tina iwa inesma mar koma guru, jefeda iwa yuga omosokuma onjoros imagobuma. Noba iwa inerejgei gu Allah rot mar koma sismeni fog guru.

³Tina gij mona onnga iwa yuis gu Allah rot mar, beda iwa inesma mar koma jeska Ofa guru. Jeska iwa yuis rot mar insa koma oisouska idou onnga onosujohu rot mar onnga tenten enesi. Idou eyet rot yeyin mar ojgomuja, jefeda inekeba gu rusnok enjgineg tein guri.

⁴Iwa bera irek ojaga egens onnga eja jeska efen mahina noba ejeker jera orna egens egema deika. Ofa otunggom mar erek koma jeska odou otot nou mareibra onnga angh gu mebif ojgomuja ros. Yeyin idou eftirir keingg mar erek insa koma ojgomu, noba

koma erek iwa ingkirsira rot Allah oga fob. Jefeda Ofa onocunc iwa jeskasada ijerek efen rusnok deika guru.

⁵ Mar egens onggga angh gij Mar Efeyi Ebsi agot oida, "Allah eita eiteij ah gu mimif jeska Ofa odou okora rot mimif, noba jeskasada mimif tein mudou okora rot Ofa ojgomu." Efena Ebsi Allah onggga engker gij mudou efesi bera odou os jeskasada mimif muroru Allah rot ahais ojgomu. Tina iwa isujohu rot oida mar onggga angh gij Mar Efeyi Ebsi insa koma bera enerek tenten gurei?

⁶ Tina Allah oncunc efen odou onggga oufamofa eteb gu mimif ojgomuja. Jeska mar egens onggga angh gij Mar Efeyi Ebsi agot rot mar erek koma oida, "Allah odou onoufa skoita rusnok onggga rumfra risinsa rufoka guru. Tina Ofa eita oufamofa eteb gu rusnok onggga rudou eriagamaga ojgomu."

⁷ Erek koma jefeda iwa yugif gu Allah ojgomu. Noba ita idou ahais gij mona onggga Bilis ereni iwa ojgomu, beda ofa emesiri gu iwa si.

⁸ Noba yuh idou rot ongkasmos gu Allah, beda Ofa omoroun iwa desi Ofa erek efen rusnok si. Erek osnok egens onggga ot efen etma onggga ahtaboku, beda iwa tein ikikif jeska yeyin mar onggga oska onggga angh gij idou efesi erek mar onggga ahtaboku. Beda idou efesi emejerek ebsi komowa. Noba inororu Allah oga erek rusnok onggga rudou egeka rot mar onggga tenten guru.

⁹ Ita idou okumkum rot mar oska onggga iwa intunggom sis fob ojgomu. Noba ibisa rot isinsa osok gij mar insa koma ojgomu. Iwa inotut rot mar onggga oska onggga iwa intunggom sis fob guru. Tina ita idou okum rot ojgomu. Jeska mar koma bera onggga

orocunc rot oida iwa imeesa joug yeyin mar ongg
oska rot tentenmen fob.

¹⁰Yuin keingg isinsa ifoka jah Allah odou, beda Ofa omofra iwa fogora emeita yeyin ifoka ongg aksa gu iwa tein si.

¹¹Edohuji, iwa inoga omoruhuma guru, jeska idu ongg oga oruh efen mohuj egens noba agot rot oida ofa bera erek mar ongg oska, beda koma erek ofa oga oruh hukum Allah noba agot rot oida hukum koma bera oska tein. Erek ofa agot mar insa koma, beda koma orocunc rot oida ofa onororu hukum koma rot tenten enesi, tina ofa ofra esinsa erek ekirsa jeska hukum Allah insa koma ojgomu.

¹²Allah esinsiyai bera ongg eita hukum gu rusnok. Ofa bera ongg oga ojga rot rusnok oisouska efen hukum insa koma. Ofa bera ongg efen owesa efek eteb jeskaseda osuwa rusnok jeska rerin mar ongg oska jera eij rusnok ongg runtunggom mar ongg oska gij mahmei meren tein. Tina erek iwa yuga ojga rot mar ongg oska ongg yeyin ihujir rutunggom fob, beda koma bera erek oska tein.

¹³Rineya jeska iwa ragot oida, "Deisef era monog, beda memef memeja jah kota enjineg noba meker jah suma erek Tahun egens jeskaseda mefarur rot fifi eteb doska fob."

¹⁴Rua ragot mar erek koma, tina rua rinejginaga rot meidu ongg emecirej rua gij mona kahma jinaga guru. Erek mah efeb ongg mof onk noba ainsa koma tein eseseifa toumou ojgomu, beda yeyin iteij ah tein emeseiseifa toumou erek koma si.

¹⁵Erek koma jefeda iwa yagot mar erek kef ojgomu, "Erek Tuhan odou os rot noba memef mefena ebah

ros, beda momotunggom mar koma, era mar kef ojomu."

¹⁶Tina ebeibeyaif iwa isitit isinsa ifaga noba yawesi efei rourou rot mar onnga yanggot. Noba mar onnga iwa yanggot rot insa koma bera erek oska ojomu.

¹⁷Ebeibeyaif iwa ijginaga rot mar onnga tenten fob. Jefeda idu onnga ejginaga rot meidu onnga tenten fob, tina ofa onotunggom mar koma guru, beda ahah Allah eiteij koma bera erek ofa ontunggom mar onnga oska skoita Allah ojomu.

5¹Iwa onnga yurna mei ahta, iwa ig mar onnga didif dimagot kef rot iskusk ojomu fog. Iwa ibisa noba irahahuma, jeska mar okum onnga emen gij mona kahma bera emah keingg iwa si.

²Yeyin mareibra ofoukou emejeseiseifa, noba yeyin meisoufa onnga ebahetkit koma nomnaga eja oska efekeifa tein fob.

³Noba yeyin fifi onnga eirirbi koma nomnaga motetesi et fob. Koma erek orocunc rot mar onnga emecirej iwa si. Jeska gij mona kahma tein Allah emeij iwa gij mahmei meren fogora ifora emeribseb nomnaga. Iwa idou eyet rot yeyin mareibra ofoukou gij mona onnga doida enja ejgwaga kef tein ojomuja. Jefeda erek mar onnga mah ent fogora eribseb, beda yeyin mareibra ofoukou tein emejeseiseifa noba iwa tein imeita ifera okora eteb.

⁴Idou eyet rot yeyin rot fifi ojomuja, noba inoh rufons gu rusnok onnga rimfarur nou iwa tein guri. Jefeda ebeibeyaif rusnok insa koma nomnaga onnga rimfarur nou iwa ragerir gu Tuhan onnga efen owesa efek eteb. Noba Ofa engg mar onnga rangerir rot insa koma fob.

⁵ Yeyin itej ah kef bera ongnoska eteb gij mareibra ofoukou onnga iwa yagei rot isinsa ojgomu. Noba mar onnga iwa intunggom koma bera erek sapi onnga ent mofombra efef fogora efaga oskumom. Tina sapi koma enejginaga rot oida ai juens beda efen tuan emeris ofa guru. Erek koma rot iwa tein. Iwa idou eftirir keingg rot mareibra ofoukou gij mebif ojgomuja, tina iwa inejginaga rot oida mona ensaga doida nou iwa fob gurei. Jefeda iwa imeita ifera okora eteb gij mona onnga ah aibin ojgomuja.

⁶ Iwa ikris rusnok onnga runotunggom mar onnga oska guru skoita hakim egens jeskasada hakim egens koma omofra okum keingg rua. Rusnok insa koma runotunggom mar onnga oska skoita iwa guru, tina iwa yagob rua insa koma ojgomu.

⁷ Edohuji, iwa ita idou ahais gij mar insa koma onnga runa mei ahta runtunggom skoita iwa ojgomu. Noba iwa iroru Allah rot idou ongkamos ojgomuja onjoros mona onnga Tuhan Yesus ongksons en fob. Iwa isujohu rot osnok egens onnga efarur gij efen mekeni. Nou mona onnga mosua beda ofa ebij mekeni. Nou onnga koma oisa fob beda ofa erefa marsi gij onjoros mona onnga mos ens. Beda ofa eker rot odou ahais ojgomuja onjoros maat onnga enrefa insa koma enjefema beda ofa et.

⁸ Erek koma tein, iwa ita idou ahais ojgomuja, jeska mona onnga Tuhan Yesus emen ensaga doida fob.

⁹ Beda isum onoskusk noba inoga omosokuma guru, beda Allah onofra okum keingg iwa rot guru. Jeska mona onnga Allah omoga ojga rot rusnok nomnaga rerin rita mar bera ensaga doida fob.

¹⁰ Edohuji, iwa ijginaga rot oida sis fob nabi-nabi ranggot mar nou Allah gu efen rusnok. Gij mona insa

koma bera rua rita rudou ahais gij mar onggga oska ofoukou onggga ereneni rua ojgomuja. Jefeda iwa ita mar erek koma tein.

¹¹ Mimif musujohu rot oida nabi-nabi insa koma rinsma rufoka onggga aksa fob jeska rua rita rudou ahais gij mar koma onggga ereneni rua sis fob. Erek koma tein, iwa ingg rot osnok egens onggga ofoka Ayub onggga engker gij mona onggga sis eteb fob. Noba iwa ijginaga rot teinefa Allah eita oufamofa eteb gu Ofa fob. Ofa eita efera okora eteb, tina odou ororu rot tenten oida Allah omofij ofa si. Ofa eita odou ahais gij mar koma ojgomuja. Noba gij mona onggga mar okum koma oisa fob, beda Allah eita oufamofa eteb gu ofa. Erek koma jefeda mimif mijginaga rot oida Allah odou okora rot mimif tein, noba efen odou oufamofa skoita mimif tein. Jeska mimif mita mudou ahais gij mar onggga ereneni mimif ojgomuja.

¹² Mar ofoka egens onggga ofoufemfem bera erek kef: Iwa inagen mar moguma oisouska Allah ofoka erek rourou guru. Noba iwa inagen mar moguma oisouska mebaga ofoka era mebi ofoka erek rourou tein guru. Tina erek iwa yuitij moguma rot mar, beda yagot oida, "Tenten, memeita si." Iwa yagot mar erek koma ojgomu. Noba erek inoitij moguma rot mar guru, beda yagot oida, "Monoitij rot guru," ojgomu. Koma bera adaij nou. Iwa itunggom mar erek koma jeskaseda Allah onofra okum keingg iwa rot mar onggga iwa yanggen rot erek rourou guru.

¹³ Erek mar onggga okum ah gu yeyin ihuj egens fob, beda ofa om eiteij gu Allah rot ojgomu. Noba erek eneya onggga odou erirei, beda ofa ois oufamofa noba esitit gu Allah rot odou onggga efaga ouka eteb ojgomu.

¹⁴Erek eneya onnga maren, beda ofa ois gu ebirfager Mod Ari jeskaseda rua rira miniyi ruos eitofu. Beda rua rum riteij oisouska Tuhan Yesus ofoka nou osnok egens koma.

¹⁵Noba erek rua onnga rum riteij insa koma rumois rot rudou onnga ororu Allah rot tenten ojgomu, beda Tuhan Allah emeita eskeira gu osnok egens koma onnga maren si. Noba erek osnok egens koma tein ontunggom mar onnga oska sis fob, beda Allah omosuna rot efen mar onnga oska insa koma jeska odou efesi tein si.

¹⁶Jefeda iwa imeesa joug rot yeyin mar onnga oska onnga iwa intunggom moguma ojgomu. Beda iwa yum iteij moguma jeskaseda Allah eita eskeira gu iwa onnga marenir. Rusnok onnga rum riteij rot rudou onnga efen mar onnga oska egema tein guru bera rerin owesa efek eteb rot mar onnga rumois insa koma. Noba Allah emeita mar koma onnga rua rum riteij rot insa koma si.

¹⁷Koma erek nabi Elia onnga agot mar jeska Allah gu rusnok sis fob. Ofa osnok egens giskini erek mimif tein. Tina gij mona juens beda ofa om eiteij gu Allah jeskaseda mos enes guru. Beda ainsa koma tein Allah enaha mos enes gij tahun orgomu noba ofod guru.

¹⁸Gij mona egema deika beda ofa om eiteij gu Allah, beda Allah aha mos es deika onjoros mebi tein omforu eriagamaga noba mega efej nomnaga enjefek.

¹⁹Edohuji, erek rineya jeska iwa rikikif jeska Allah oga onnga tenten, noba osnok egens enjgineg oftufu ofa fogora ofa oksons skoita Allah, beda koma erek oufamofa eteb. Jeska osnok egens insa koma oskotu ofa jeska efen mar onnga oska onnga omorka ofa gu

mahmei meren. Beda Allah omosuna rot efen mar
ongga oska jeska odou efesi. Ainsoma.

²⁰(5:19)

1 Petrus

1 ¹ Surat egens kef bera jeska didif Petrus onnga Yesus Kristus oncunc erek efen rasul egens fob. Noba didif dunogu surat kef gu iwa onnga Allah oncunc erek efen rusnok fob. Iwa bera onnga irebserma fogora ijeker erek rusodosa jah gu monuh Pontus ni, Galatia ni, Kapadokia ni, Asia ni, Bitinia ni.

² Noba mifmin mika Allah bera onnga oncunc iwa jeni Ofa odou ejginaga rot gij mona onnga sismeni eteb fob. Beda oisouska Efena Ebsi onnga engker gij idou efesi fob bera iwa injerek Ofa efen rusnok onnga idou ebsi komowa. Ofa otunggom koma jeskaseda iwa idou ekebin Yesus Kristus oga fogora efen ogufu omosuna rot yeyin mar onnga oska nomnaga jeska idou efesi. Didif dum diteij gu Allah jeskaseda Ofa eita oufamofa eteb gu iwa noba eita eiteij ah onnga eskeiramera gu iwa ojgomuja.

³ Didif disitit gu Allah onnga erek mifmin Tuhan Yesus Kristus efen meka. Ofa bera oncunc odou onnga oufamofa eteb gu mimif fogora Ofa eita eiteij ah efeinah gu mimif fob. Ofa otunggom koma oisouska Yesus Kristus onnga endebecki jeska anggos fob. Ofa otunggom erek koma jeskaseda mimif muisum gij Ofa rot oida Ofa emeita eiteij ah onnga efeinah koma gu mimif si.

⁴ Erek koma jefeda mimif tein muisum gij Ofa rot mar onnga oufamofa eteb onnga Ofa ensejah gu mebaga nou mimif fob. Jah suma bera mar onnga oufamofa insa koma eneja erek oska era enetefa guru, tina ah aibin ojgomuja.

⁵ Noba Allah omot joug iwa rot efen owesa efek oisouska idou onnga eredi rot Ofa. Noba Ofa omotunggom mar koma rot ongkasmos nou mimif onnga misma eiteij ah onnga efeinah. Noba Ofa ensejah nou ocunc mar koma gu rusnok nomnaga gij mona onnga enja ejgwaga.

⁶ Gij mona onnga estir kef bera mar onnga okum ofoukou ah keingg iwa ros, jefeda iwa ifera okora ojgomuja. Erek koma, tina idou efaga ouka eteb rot mar onnga didif danggot gu iwa insa koma nomnaga ojgomu.

⁷ Mar onnga okum koma bera enen rourou guru. Tina mar koma en jeskaseda orocunc rot oida yeyin idou bera ororu Yesus Kristus rot tenten fob ei era enesei. Koma erek rusnok onnga ris mah gij emas jeskaseda mah et fogora orocunc rot efen eirirber ojgomu. Erek koma tina, gij mona onnga enja ejgwaga, beda emas koma tein emeseiseifa si. Tina yeyin idou onnga ororu Yesus Kristus bera efen efera osok ekirsa jeska emas insa koma. Noba mar onnga okum koma onnga ereneni iwa bera orocunc rot oida yeyin idou onnga ororu Yesus tein onnga erek eirirber. Beda Ofa emesitit iwa noba omofra ifoka erek aksa gij mona onnga Ofa ongksos en.

⁸ Erek iwa inek Yesus Kristus gu iteij jinaga guru, tina idou okora rot Ofa ros. Noba gij mona onnga deisef tein bera iwa inek Ofa enesi, tina iwa iroru Ofa ros. Noba idou erirei eteb ekirsa jeska mudou ebriyi gij ojgomuja tein. Noba idou tein erirei eteb doska rot mar koma.

⁹ Erek ebeibeyaif iwa inesma mar koma onnga iwa iroru Yesus rot fob enesi, tina mar onnga iwa imesma

koma bera erek eiteij ah onggga efeinah noba ah aibin.

¹⁰ Eiteij ah onggga efeinah insa koma bera onggga nabi-nabi rimfesij rot sis fob. Jeska rua ranggot oida gij mona kahma, beda Allah emeita eiteij ah onggga efeinah gu rusnok oisouska efen odou onggga oufamofa eteb. Sis fob rua riajga joug rot eiteij ah onggga efeinah insa koma onggga en skoita iwa onggga irebserma fob. Jeska sis fob Efena Ebsi Allah ocunc gu rua gij rudou efesi rot teinefa Kristus emeita efera okora eteb fogora emesma ofoka onggga aksa eteb ekirsa jeska rusnok enjgineg nomnaga. Jefeda rua riajga touj rot mar insa koma. Rua rudou os rijginaga rot teinefa noba gij mona juaho fogora mar insa koma emesaga.

¹¹ (1:10)

¹² Noba Allah oncunc gu rua insa koma oida mar insa koma onggga rua rimfesij rot bera enen nou rua risinsa guru. Tina mar koma en nou mimif onggga miker gij mona deisef ojpgomu. Ebeibeyaif rusnok rimfesij rot oga onggga oufamofa insa koma osok gij Yesus Kristus gu iwa fob. Rua rutunggom mar erek koma oisouska owesa efek jeska Efena Ebsi onggga Allah ombk jeska mebaga. Noba malaikat-malaikat onggga ringker gij mebaga rudou os eteb jeskaseda rua tein rudou ebriyi gij rot teinefa rusnok risma eiteij ah onggga efeinah erek koma.

¹³ Erek koma jefeda, iwa isejah idou efesi rot ahais noba yuisum gij Allah rot eiteij ah onggga efeinah onggga iwa insma rot fob. Ofa eita mar insa koma rot onggkas gu iwa oisouska efen odou onggga oufamofa eteb rot iwa. Koma bera, gij mona onggga Yesus

Kristus ongksons en fob, beda iwa imesma mar koma rot ongkamos ojgomu tein.

¹⁴Iwa yugif gu Allah onggga erek yeyin ika ojgomu. Noba iwa inororu mar onggga oska koma onggga idou os itunggom gij mona onggga idou osumsumu rot Allah oga ros guru.

¹⁵Tina iwa ita idou onggga ebsi komowa gij mar nomnaga onggga iwa itunggom. Jeska Allah, onggga ejeka iwa erek efen rusnok fob, bera ebsi komowa.

¹⁶Erek koma jeska gij Mar Efeyi Ebsi bera Allah agot oida, "Iwa ita idou onggga ebsi komowa, jeska Didif bera erek ebsi komowa ojgomu tein."

¹⁷Allah bera erek yeyin ika. Noba Ofa bera onggga oga ojga rot mar onggga oska jera mar onggga oufamofa nomnaga tein onggga rusnok runtunggom fob. Jefeda iwa yugif gu Ofa gij mona kef onggga iwa ingker gu mebif ros ojgomu.

¹⁸Jeska Ofa onskotu iwa jeska mar onggga oska onggga iwa intunggom sis fob. Mar onggga ensis koma bera onofij iwa oskiyai tein guru. Mar koma bera onjuj en jeska yeyin imower ojgomu. Noba Allah enera mar onggga erek emas era perak fogora oroskotu iwa jeska yeyin mar onggga oska guru. Jeska mar koma bera erek orohuhur ojgomu.

¹⁹Tina Yesus Kristus ogufu onggga eya nou mimif tumu mega salib bera efen efera osok eteb ekirsa. Noba koma bera onggga oskotu iwa jeska yeyin mar onggga oska fob. Rusnok onggga Yahudi riris domba efer egens onggga efen efeji eirirber ojgomu jeskaseda rurougif gu Allah. Erek koma tein, Yesus Kristus bera erek mifmin domba efer egens onggga efeji eirirber. Jeska Ofa bera onggga oskotu mimif jeska mifmin mar onggga oska fob. Ofa bera erek ebsi komowa ojgomu.

²⁰ Gij mona onnga Allah onotunggom mebif enesi, beda Ofa osujohu gij odou efesi rot oida Ofa omobk Yesus Kristus jeskaseda agos nou mimif. Tina Ofa en gij mona onnga doida omoisa insa kef jeskaseda ofij mimif fob.

²¹ Noba oisouska mar onnga Yesus Kristus ontunggom nou iwa, bera iwa iroru Allah fob. Ofa bera onnga omfra Yesus jeska anggos. Noba Ofa omfra Yesus efen ofoka erek aksa ekirsa jeska mar nomnaga tein fob. Erek koma jefeda iwa iroru Allah rot ahais noba yuisum gij Ofa rot mar insa koma nomnaga.

²² Ebeibeyaif iwa iroru oga onnga tenten koma osok gij Yesus Kristus fob. Jefeda koma erek iwa yut idou efesi rot yeyin mar onnga oska fob. Noba ebeibeyaif idou omokorema rot tenten ojgomuja. Jefeda iwa ita idou onnga omokorema rot tenten noba ahais ojgomuja.

²³ Iwa insma eiteij ah onnga efeinah fob. Noba koma en oisouska Allah oga onnga oufamofa noba onnga ereita eiteij ah onnga efeinah gu rusnok. Noba eiteij ah onnga efeinah koma bera enen jeska yeyin iker gonu yuser jinaga guru. Tina eiteij ah insa koma bera en jeska Allah ojgomu. Jeska oga onnga oufamofa insa koma bera onnga eita eiteij ah onnga efeinah noba ah aibin.

²⁴ Mimif mijginaga rot koma jeska Allah anggot gij Mar Efeyi Ebsi oida, "Rusnok mebif bera erek mofombra jera marfok. Mofombra er gij mebi oforu rara, noba marfok tein efen ofok onnga onkoska. Tina gij mona onnga estir deika, beda mofombra jera marfok koma osrosra ojgomu. Erek koma tina Tuhan Allah oga onnga oufamofa bera ah aibin ojgomuja."

Noba oga onggga oufamofa osok gij Yesus Kristus insa kef bera onggga rusnok enjgineg rimfesij gu iwa sis fob.

²⁵(1:24)

2¹Erek koma jefeda, iwa ibes ifaga jeska mar nomnaga onggga oska jera mar onggga ofogog. Iwa inohurmei mar guru ni, inororu mar onggga oska onggga iyahehir joug rusnok enjgineg rot guru ni, idou eneftirir keingg mar onggga rusnok enjgineg rerin guru ni, inoga oruh rusnok enjgineg guru ni.

²Erek oforoka efes egens onggga ebisa rot mengk ojjgomuja jeskaseda et mengk koma fogora omona eteb, beda iwa tein yuisum gij Allah oga ojjgomuja onggga otunggom idou efesi erek ahais. Iwa yuisum gij efen oga insa koma jeskaseda idou ejerek ahais fogora iwa imesma eiteij ah onggga efeinah si.

³Jeska iwa ijginaga rot oida Tuhan bera eita oufamofa eteb skoita iwa fob.

⁴Iwa in skoita Tuhan Yesus onggga erek mamu ahais egens onggga angh rot mod nomnaga. Ofa bera onggga rusnok rungkoja fob, tina Allah oncunc Ofa erek mar onggga efen efera osok eteb ojjgomu.

⁵Iwa bera erek mamu egens onggga ahais tein noba onggga efena ebah. Noba iwa iroru Allah oga rot tenten fob, jefeda iwa injerek mod egens onggga Ofa ei nou esinsa fob. Ofa otunggom mar erek koma jeskaseda iwa ijerek Ofa efen imam-imam onggga ebsi komowa, noba onggga yufij Ofa gij efen mod insa koma. Jefeda oisouska mar onggga Yesus Kristus ontunggom nou iwa fob, bera Allah odou eskeira eteb rot mar onggga iwa itunggom nou Ofa.

⁶Jeska Allah anggot gij Mar Efeyi Ebsi rot oida, "Iwa ig mar onggga dinagot kef fog: Ai juens beda Didif

dumocunc osnok egens onnga omofoka ereij keingg dedin rusnok gij monuh Zion. Ofa bera erek mamu ahais egens onnga efen efera osok eteb. Noba mod nomnaga bera angh esij mamu egens koma. Noba idu onnga odou eredi rot Ofa, beda gij mona kahma bera mojenenir rot jinaga guru."

⁷Ebeibeyaif iwa iroru Yesus rot tenten fob. Jefeda Ofa bera erek mamu ahais egens insa koma. Noba Ofa bera erek mar onnga efen efera osok eteb skoita Allah. Tina Allah anggot mar gij Mar Efeyi Ebsi osok gij rusnok onnga runororu Ofa guru. Ofa agot oida, "Mamu ahais egens koma onnga rusnok rij jeska noba rukoja rot mod efeinah, mamu egens koma enjerek mamu onnga ofoufem ekirsa nou mod koma nomnaga."

⁸Noba mimif mijginaga rot oida Allah omofra okum eteb keingg rua insa koma onnga rungkoja Yesus Kristus si. Jeska Allah anggot gij Mar Efeyi Ebsi oida, "Mamu onnga ahais egens koma bera orotunggom rusnok fogora rukockereta noba risiri rot ojgomu." Rua rukockereta mamu egens insa koma fogora risiri, jeska rudou oska rot Ofa efen oga fogora rukoja rot efen oga insa koma ojgomu. Noba gij mona onnga sismeni fob bera Allah ejginaga rot oida rua rimeita mar erek koma si.

⁹Tina iwa bera erek rusnok onnga Allah oncunc fob. Noba sis fob Ofa ocunc imam-imam jeska rusnok onnga Yahudi jeskaseda rufij Ofa gij efen Mod efesi. Beda erek koma tein, ebeibeyaif Ofa oncunc iwa jeskaseda yufij Ofa ojgomuja. Iwa injerek rusnok monuh egens onnga ebsi komowa nou Allah ojgomu, jeska iwa bera injerek Ofa efen rusnok fob. Ofa oncunc iwa erek koma jeskaseda iwa ijefesij rot

mar onnga oufamofa eteb onnga Ofa ontunggom nou rusnok fob. Jeska Ofa bera onnga ejeka iwa jeskaseda irogna jeska motkobah noba yuira gij efen eisa onnga oufamofa eteb. Eisa koma bera en jeska Ofa.

¹⁰ Sis fob bera iwa inerek Allah efen rusnok rot tenten guru, tina ebeibeyaif iwa injerek Ofa efen rusnok fob. Noba sis fob Ofa onocunc efen odou onnga oufamofa skoita iwa guru, tina ebeibeyaif Ofa oncunc efen odou onnga oufamofa eteb skoita iwa fob.

¹¹ Edohuji onnga dudou okora rot, iwa onnga inroru Yesus Kristus fob bera iker gij mebif erek rusnok onnga rusodosa ros. Noba didif dui gu iwa jeskaseda iwa ibes ifaga jeska mar onnga oska onnga idou osos rot ojgomu. Jeska mar koma bera oroku idou efesi ojgomuja fogora imesiri gij mar onnga oska si.

¹² Noba iwa onnga ingker morototuma jera rusnok onnga runororu Yesus Kristus enesi ros, beda ita mar onnga erek ongkoskamoka ojgomu. Jeska ebeibeyaif rua ruga oruh iwa ojgomuja. Tina gij mona onnga Allah en jeskaseda ofra okum keingg rusnok onnga rita mar onnga oska, beda rua insa koma rumofra efen Ofoka erek aksa. Rua rimeita mar erek koma jeska rua rik mar onnga iwa itunggom gij mona deisef onnga erek ongkoskamoka ojgomu.

¹³ Beda iwa yugif gu yeyin ebirfager nomnaga onnga rusnok runcunc fob. Noba yugif skoita yeyin ebirfaga egens onnga ekirsa jeska nomnaga.

¹⁴ Noba iwa yugif gu efen moskur onnga ofa oncunc tein, jeska Allah odou os erek koma. Ebirfaga egens koma obk efen moskur jeskaseda rufra okum keingg rusnok onnga rita mar onnga oska. Noba ofa tein

emeita oufamofa gu rusnok onnga rita mar onnga oufamofa ojgomu.

¹⁵ Allah odou os rot oida iwa ita mar erek koma jeskaseda mar insa koma omorocunc rot tenten gu rusnok onnga rudou osumsumu rot. Beda rua rimejginaga rot oida mar onnga rua ruga oruh iwa rot bera erek tenten guru.

¹⁶ Ebeibeyaif iwa yut gu isinsa jeska Yesus Kristus onsuwa iwa fob. Erek koma tina enadaij nou iwa isujohu rot oida iwa ita mar onnga oska ojgomuja tein jinaga guru. Onnga tenten bera iwa ita mar jeni erek rusnok onnga rumfij Allah ojgomuja.

¹⁷ Beda yugif gu rusnok nomnaga. Noba idou omokorema rot yeyin ihujir ni, imeesa rot Allah onnga ebsi komowa ni, noba yugif gu yeyin ebirfaga egens onnga ofoka ereij keingg yeyin monuh tein.

¹⁸ Iwa onnga yumfij yeyin ebirfager ojgomuja bera yugif gu rua fogora iroru rerin ruga rot iskusk ojgomu. Noba iwa ineita mar erek koma rot yeyin ebirfager onnga rudou eriagamaga rot iwa ojgomu guru, tina iwa ita mar erek koma rot yeyin ebirfager onnga rudou oska rot iwa tein.

¹⁹ Jeska erek osnok egens ororu Allah oga rot ahais fob, tina rusnok enjineg rita efera okora gu ofa rot, beda Allah odou emeskeira eteb rot ofa si.

²⁰ Tina erek osnok egens ororu mar onnga oska, noba ofa eita odou ahais gij mar okum onnga ah keingg ofa rot, beda Allah eneita oufamofa gu ofa rot mar insa koma jinaga guru. Erek koma tina erek osnok egens ororu Ofa efen oga erek ahais fogora eita efera okora rot, beda Allah odou eskeira eteb rot ofa.

²¹ Allah bera oncunc iwa jeskaseda ita ifera okora ojgomu. Jeska sis fob Yesus Kristus eita efera okora tein. Ofa eita mar erek koma jeskaseda ofij iwa. Noba Ofa eita odou ahais gij mar onnga okum insa koma ojgomuja. Noba koma bera erek orocunc nou iwa jeskaseda iwa tein ita idou ahais erek Ofa ojgomu.

²² Sis fob nabi egens agot mar rot Yesus Kristus erek kef oida, "Ofa eneita mar onnga oska oskiyai tein guru. Noba rusnok rig, tina Ofa onohurmei mar jinaga guru."

²³ Erek koma tein, gij mona onnga rusnok ragot mar onnga oska ofoukou skoita Ofa, beda Ofa enagot mar onnga oska sons gu rua guru. Noba gij mona onnga rusnok rita rifeira okora eteb gu Ofa, beda Ofa enagot oida Ofa emeita mar onnga ofogog skoita rua sons rot guru. Tina Ofa oisum gij Allah onnga omoga ojga rot rusnok nomnaga erek tenten ojgomu.

²⁴ Ofa esinsa bera onnga eita efera okora eteb tumu mega salib rot mifmin mar onnga oska fob. Ofa otunggom mar erek koma jeskaseda mifmin mar onnga oska enah gu mimif ojgomuja guru. Tina mimif mudou os mutunggom mar onnga oufamofa ojgomu. Jeska oisouska Yesus Kristus efen efera okora insa koma bera Ofa onsuna rot mifmin mar onnga oska jeska mudou efesi fob.

²⁵ Sis fob iwa intunggom mar onnga oska jeska inejinaga rot Yesus Kristus enesi. Jefeda koma erek iwa ijeker yes jeska Ofa erek domba-domba onnga ejeker yes jeska rerin gembala egens onnga ont joug rua. Tina ebeibeyaif iwa iroru Ofa fob. Jefeda Ofa omot joug iwa erek gembala egens onnga ot joug efen domba-domba onnga ongksons skoita ofa fob.

3¹ Erek koma tein, iwa onnga yanghi igers fob bera yugif gu yeyin yahiner rot tenten ojomu. Noba erek yahiner rineya onnga runororu Yesus Kristus enesi, beda ineradgodu rua rot mar insa koma guru. Tina nou onnga rua rik mar onnga oufamofa onnga iwa itunggom jera rot teinefa iwa yugif gu Allah rot tenten fob, beda oisouska mar insa koma bera rua tein rumororu Yesus Kristus ojomu.

²(3:1)

³ Erek koma tein, mar onnga orocunc rot rujager rerin ongnoska bera enen jeska mar onnga rutunggom erek rumoumna risinsa guru. Erek rua rirgi meisoufa onnga ebahetkit ni, era merfej onnga rinsa ni, serag onnga raha tumu ritma ni, jera mofou onnga raha tumu rutufou ni, mar erek koma nomnaga bera onorocunc rot rerin ongnoska guru.

⁴ Tina mar onnga orocunc rot rujager rerin ongnoska rot ah aibin bera en jeska mar onnga angh gij rudou efesi ojomu. Koma erek rua runofra risinsa rufoka guru. Noba rua rita mar rot rudou onnga eriagamaga tein ojomu. Jeska ahah Allah eiteij bera mar insa koma efen efera osok ekirsa jeska meisoufa jera merfej tein.

⁵ Sis fob rujager onnga rudou ebsi komowa noba onnga ruisum gij Allah bera rugif gu rerin rahiner ojomu. Oisouska mar koma bera rua ruocunc rot rerin ongnoska onnga tenten ojomu.

⁶ Koma bera erek Sara onnga Abraham efen mohona. Jeska sis fob ofa ougif gu efen mahina noba ejeka ofa erek efen ebirfaga egens. Jefeda erek iwa ita mar onnga tenten ojomu noba inekjekka idou efesi rot mar egema tein guru, beda koma omorocunc rot oida iwa tein irek Sara fob.

⁷ Iwa onnga yuskotu arja fob, iwa ita mar erek insa koma tein ojgomu. Iwa ita mar onnga ongnoska skoita yeyin yuhoner noba yugif gu rua tein ojgomu. Jeska rua bera runofora efek erek iwa guru, noba rua rimesma eiteij ah onnga efeinah onnga Allah anggen rot morototuma jera iwa tein. Erek iwa ineita mar insa koma guru, beda Allah eneg rot mar onnga iwa yum iteij gu Ofa rot guru.

⁸ Mar ofoka egens gij surat kef rot omoisa bera erek kef: Didif duis gu iwa jeskaseda iker morototuma rot idou onnga eriagamaga ojgomu, ita idou onnga okora rot rusnok enjgineg rot rerin mar okum ni, idou omokorema ni, inofra yeyin ifoka erek ekirsa jeska rusnok enjgineg guru ni.

⁹ Inesesa mar onnga ofogog sons skoita rusnok enjgineg guru ni, inohurmei mar skoita rusnok enjgineg onnga ruhurmei mar skoita iwa guru ni. Tina onnga ongnoska bera iwa ita mar onnga oufamofa sons skoita rua insa koma ojgomu. Jeska Allah enjeka iwa jeskaseda isma oufamofa eteb jeska Ofa.

¹⁰ Iwa isma mar erek koma jeska Allah anggot gij Mar Efeyi Ebsi erek kef oida, "Idu onnga odou os esma eiteij ah onnga oufamofa eteb ojgomuja, beda ofa enagot mar onnga ofogog skoita rusnok enjgineg guru era onocuwei mar gij rua tein guru.

¹¹ Onnga ofa bera ofa ekikif jeska efen mar onnga oska, noba eita mar onnga oufamofa ojgomu. Noba ofa ereni rot ahais jeskaseda eita odou onnga eriagamaga jera rusnok nomnaga ojgomuja.

¹² Jeska Allah ot joug rusnok onnga rutunggom mar onnga oufamofa ojgomu. Noba Ofa oj osu nou mar onnga rua rum riteij rot gu Ofa tein. Tina Ofa odou

oska rot rusnok onggá rutunggom mar onggá ofogog ojjomu."

¹³ Erek iwa idou os eteb jeskaseda ita mar onggá oufamofa ojjomu, beda giskini rusnok enjineg rineita mar onggá oska skoita iwa rot guru.

¹⁴ Erek koma, tina erek rusnok rita mar onggá oska skoita iwa fogora ifera okora rot mar onggá oufamofa onggá intunggom fob, beda Allah emeita oufamofa eteb gu iwa rot koma si. Noba iwa inemeesa rot rusnok onggá rudou os rita mar onggá oska skoita iwa guru. Noba iwa inemeesa rot mar egema tein guru.

¹⁵ Tina yuh idou efesi rot onggas skoita Yesus Kristus onggá erek yeyin Tuhan ojjomuja. Noba isejah idou efesi onggá ejjinaga rot teinefa iwa iroru Yesus Kristus fob. Jeska erek rusnok enjineg rijeka iwa rot teinefa fogora yuisum gij Yesus Kristus, beda iwa imagot rot koisoisa gu rua si. Tina iwa ifesij osok gij mar koma gu rua rot idou onggá eriagamaga noba onggá emeesa rot Allah ojjomu.

¹⁶ Iwa ita mar onggá iwa ijjinaga bera jeni erek Allah odou os rot ojjomu. Noba ita mar erek koma jeskaseda mojen en skoita rusnok onggá ragot mar onggá oska skoita iwa. Rua ruhurmei mar gu iwa rot mar onggá oufamofa onggá iwa itunggom jeska iwa iroru Yesus Kristus fob.

¹⁷ Erek iwa ifera okora rot mar onggá oufamofa onggá iwa intunggom fob, noba mar koma bera ororu Allah odou ejjinaga rot, beda koma bera oufamofa eteb ojjomu. Tina erek iwa ifera okora rot mar onggá oska onggá iwa intunggom fob, beda koma onofij iwa jinaga guru.

¹⁸ Gij mona juens bera Yesus Kristus eita efera okora eteb tumu mega salib jeskaseda osuna mar onnga oska nomnaga jeska rusnok rudou efesi fob. Ofa, onnga efen mar onnga oska oskiyai tein guru, bera eita efera okora rot rusnok onnga rerin mar onnga oska ofoukou. Noba mar onnga Ofa ontunggom insa koma bera erek esejah moroju jeskaseda rusnok ruksons skoita Allah. Rusnok mebif bera onnga ragob Ofa fogora agos fob, tina Ofa esma eiteij ah onnga efeinah sons oisouska Efena Ebsi Allah ojgomu.

¹⁹ Noba oisouska Efena Ebsi koma tein bera Yesus ojoftufts mar gu rifena onnga ringker gij monuh mar agos noba onnga rineja jeska jinaga guru.

²⁰ Jeska sis fob, gij mona onnga Nuh asus meg eteb ros, beda Allah oin keingg odou efesi rot mar onnga oska onnga rusnok rufoukou runtunggom gij mona insa koma ojgomuja. Noba rua runoruru Ofa efen oga jinaga guru. Jefeda rua nomnaga rageben gij mei ofot eteb. Tina rusnok rufok cinja orfomu onnga ringker gij meg eteb insa koma bera rifena ebah. Koma bera Nuh jera efen mohona jera efeser ojgomu onnga risma riteij ah.

²¹ Beda mei insa koma tein bera orocunc rot mei baptis onnga iwa ita ebeibeyaif jeskaseda isma eiteij ah onnga efeinah. Noba mei baptis koma onnga iwa ita bera onot rot yeyin ifaga onnga ahtaboku guru. Tina mei baptis insa koma bera orocunc gu rusnok enjineg oida iwa idou os jeskaseda Allah osuna yeyin mar onnga oska jeska idou efesi. Jefeda iwa ijginaga rot teinefa iwa iroru Ofa rot idou onnga efen mar onnga oska oskiyai tein deika guru. Mei insa koma bera onnga eita eiteij ah onnga efeinah gu iwa

oisouska Yesus Kristus onnga endebecki jeska agos fob.

²² Beda ebeibeyaif Ofa onjosok jah mebaga fob. Noba jah suma bera Ofa ofoka ereij keingg mar nomnaga morototuma jera Allah. Noba malaikat-malaikat jera mar nomnaga onnga efen owesa efek bera rugif gu Ofa ojgomuja.

4¹ Erek koma jefeda iwa isejah idou efesi erek ahais rot mar onnga eita efera okora gu iwa ojgomu. Jeska sis fob Yesus eita efera okora tumu efen efaga nou mimif tein. Noba idu onnga eita efera okora rot mar oufamofa onnga ofa ontunggom fob, beda koma orocunc rot oida ofa engkikif jeska mar onnga oska rot tenten fob.

² Jefeda ofa onororu mar onnga ofogog onnga rusnok mebif rundou os rot deika guru. Tina ofa eker jeskaseda ororu meidu onnga Allah ondou os rot ojgomu.

³ Sis fob bera iwa ita mar onnga oska morototuma erek rusnok mebif rundou os rot tein ojgomuja. Rua rururu mar onnga oska efekeifa onnga angh gij rudou efesi ojgomuja ni, rua ruckahtah morototuma ojgomuja ni, rudou erebibi rot mofut efeyi ni, risiri morototuma ojgomuja ni, rugif gu mar onnga oska eteb ojgomuja ni, rujohca mar onnga oska efekeifa ni.

⁴ Noba ebeibeyaif rua rudou ousaha eteb jeska iwa inosoka ebeirens gij rerin mar onnga oska insa koma rot idou onnga erebibi morototuma jera rua deika guru. Jefeda rua ruga oruh iwa rot ojgomu.

⁵ Tina rua rumot jah Allah odou rot gij mona onnga Ofa oga ojga rot rua osok gij rerin rita mar onnga oska nomnaga si. Beda Ofa emaha okum eteb keingg

rua rot. Ofa ensejah nou ofra okum eteb keingg rusnok nomnaga onnga ranggos fob jera rusnok onnga rifena ebah ros tein rot rerin rita mar onnga oska.

⁶Sis fob bera rusnok ruftuftu rot Allah oga onnga oufamofa skoita rusnok onnga ebeibeyaif ranggos fob. Orofosutut osnok egens egens nomnaga rimagos, beda rerin riteij ah insa koma oisa ojgomu fob. Tina rua ruftuftu rot oga onnga oufamofa gu rusnok sis fob jeskasada rua tein rimesma eiteij ah onnga efeinah morototuma erek Allah efen ojgomu. Eiteij ah koma bera ah aibin ojgomuja.

⁷Ebeibeyaif mona onnga enja ejgwaga bera ensaga doida fob. Erek koma jefeda iwa yut joug idou efesi rot ahais ojgomu. Yut joug idou efesi jeskasada inosoka gij mar onnga oska rot ebeirens guru. Iwa ita mar erek koma jeskasada yum iteij gu Allah rot koisoisa ojgomuja.

⁸Onnga ofoufemfem bera, iwa idou omokorema rot ahais ojgomuja. Jeska rusnok onnga rita mar erek koma bera rudou eskeira mejerema fogora runotkonu oska rot rusnok enjgineg onnga runtunggom mar onnga oska gu rua jinaga guru.

⁹Noba iwa icunc idou onnga oufamofa moguma gij mona onnga rusnok runjogog iwa ojgomu. Iwa isum onoskusk rot rusnok insa koma guru.

¹⁰Orofosut osnok egens egens era owesa efek onnga Efena Ebsi Allah eita gu ofa fogora orofij rusnok enjgineg tein ojgomu. Iwa ita mar erek koma rot iskusk erek rusnok onnga rinsma owesa efek ofoukou jeska Allah fob. Jeska Ofa eita owesa efek gu iwa rot efen odou onnga oufamofa eteb rot iwa.

¹¹ Iwa onggga yuftuftu mar gu rusnok, beda yuftuftu mar rot iskusk ojgomu erek rusnok onggga ranggot mar rot Allah efen oga. Noba idu onggga omfij rusnok enjgineg, beda ofij rot owesa efek koma onggga ofa ensma jeska Allah tein. Ofa otunggom mar erek koma nomnaga oisouska Yesus Kristus efen owesa efek jeskaseda gij mar nomnaga beda rusnok rumofra Allah ofoka erek aksa eteb tein. Mimif mudou os jeskaseda rusnok nomnaga rufra Ofa efen ofoka erek aksa eteb. Noba mimif mudou os jeskaseda Ofa ofoka ereij keingg mar nomnaga rot owesa efek eteb onggga ah aibin ojgomuja tein, ainsoma.

¹² Edohuji onggga dudou okora rot, iwa idou onoubsaha rot mar koma onggga ereneni iwa fogora ita ifera okora rot guru. Jeska mar koma onggga ereneni iwa bera enerek mar onggga efeinah guru.

¹³ Tina iwa idou efaga ouka rot mar insa koma ojgomu, jeska koma erek iwa ita efera okora morototuma jera Yesus Kristus tein. Iwa ita mar erek koma jeskaseda gij mona onggga rusnok nomnaga rik Ofa ongksons en gu mebif fob, beda yeyin idou emerirei eteb rot efen ofoka onggga aksa gij mona insa koma.

¹⁴ Noba erek rusnok ruga oruh iwa jeska iroru Yesus Kristus, beda Allah emeita oufamofa eteb gu iwa rot mar insa koma tein. Rua rudou os rutunggom mar onggga oska insa koma skoita iwa jeska Efena Ebsi Allah engker gij idou efesi fob.

¹⁵ Jefeda onggga oufa nou iwa bera ita ifera okora rot mar onggga oufamofa onggga iwa intunggom fob ojgomu. Jeska rusnok onggga rutunggom mar onggga oska erek ragob rusnok enjgineg ni, rukoreka mar ni, ruromohohuma jera rusnok enjgineg rerin mar ni, rita

mar onnga ofogog ni, rua bera rimeita rifera okora jeni rot mar onnga rua runtunggom insa koma si.

¹⁶ Tina erek iwa ita ifera okora jeska iwa iroru Yesus Kristus fob, beda mojenen iwa rot guru. Tina iwa isitit gu Allah rot ojgomu, jeska iwa bera rusnok onnga ruroru Yesus Kristus rot tenten fob.

¹⁷ Ebeibeyaif bera Allah ensejah nou omoga ojga rot rusnok nomnaga rerin rita mar onnga oufamofa jera rerin rita mar onnga oska tein. Noba Allah omoga ojga rot mimif onnga erek efen rusnok ebeibeyaif fob. Jefeda gij mona onnga Ofa oga ojga rot rusnok onnga rukoja efen oga onnga oufamofa, beda Ofa omofra mar okum eteb ekirsa keingg rua si.

¹⁸ Jeska Allah anggot gij Mar Efeyi Ebsi erek kef oida, "Enadaij nou rusnok onnga ruroru mar onnga oufamofa eteb jeskaseda ruskotu risinsa jeska rerin mar onnga oska guru. Tina teinefa rot rusnok onnga runougif gu Allah guru, jera rusnok onnga ruroru mar onnga oska ojgomuja. Erek rua rireni tina rineita eiteij onnga efeinah jinaga guru."

¹⁹ Erek koma jefeda rusnok onnga rita rifera okora ororu Allah odou ejginaga rot bera ruh rudou efesi gu Ofa, noba rita mar onnga oufamofa ojgomu. Jeska Ofa bera onnga ontunggom mar nomnaga.

5¹ Ebeibeyaif didif dudou os dagot mar gu iwa onnga irek ebirfager Mod Ari. Didif tein bera direk ebirfaga egens nou rusnok Mod Ari, noba sis fob didif dik Yesus Kristus eita efera okora gu diteij. Noba didif dimesma dufoka onnga aksa eteb gij mona onnga Yesus Kristus ongksons en morototuma jera iwa tein. Jefeda didif dui gu iwa onnga irek ebirfager Mod Ari jeskaseda iwa yut joug Allah efen rusnok rot iskusk ojgomu. Koma erek gembala egens onnga ot joug

ebirfaga egens efen domba-domba rot iskusk tein. Beda iwa inot joug rua jeska rusnok enjgineg rubk iwa rot ojgomu guru, tina yut joug rua jeni yeyin idou onnga erirei rot ojgomu. Jeska koma bera onnga Allah ondou os rot. Noba iwa inot joug rua jeskaseda isma mareibra ofoukou rot ojgomu guru, tina yut joug rua jeska idou os yufij rua ojgomu.

²(5:1)

³Iwa ineradgodu rua rot yuga onnga owesa ojgomuja tein guru, tina iwa ita mar onnga erek orocunc rot ongkoska nou rua onnga erek Allah efen domba-domba ojgomu. Jeska Allah oncunc iwa jeskaseda yufijir.

⁴Iwa ita mar erek koma ojgomu. Noba gij mona onnga Yesus Kristus, onnga erek ebirfaga nou gembala nomnaga ongksons en fob, beda iwa imesma yeyin ifons onnga efen efera osok eteb doska. Yeyin ifons insa koma bera eneseiseifa jeska iwa jinaga guru.

⁵Noba skoita iwa onnga iforoka efes ros, bera didif duis gu iwa jeskaseda yufij ebirfager Mod Ari ojgomu. Noba iwa yuin keingg idou efesi rot tenten moguma. Iwa itunggom mar erek koma jeska ranggot gij Mar Efeyi Ebsi oida, "Allah eretei rot rusnok onnga rufra risinsa rufoka erek aksa eteb, tina Ofa eita oufamofa eteb skoita rusnok onnga ruin keingg risinsa rudou efesi."

⁶Jefeda iwa yuin keingg isinsa idou efesi skoita Allah onnga efen owesa efek eteb jeskaseda Ofa omofra yeyin ifoka erek aksa gij mona onnga Ofa anggot rot.

⁷ Noba idou enefeneinei rot mar egema tein guru, tina yuisum gij Allah rot mar nomnaga ojgomu. Jeska Ofa bera omot joug iwa ojgomuja.

⁸ Iwa yut joug idou efesi rot ahais, noba yusku joug isinsa tein rot mar onnga ofogog skoita iwa. Jeska Bilis bera erek singa egens onnga edib mar efen ojgomuja jeskaseda eska fogora et. Erek koma tein ofa bera ofogog eteb rot iwa, noba ofa ohca moroju jeskaseda otunggom mar onnga ofogog skoita iwa tein.

⁹ Jefeda oisouska idou onnga eredi Allah rot ahais bera iretei Bilis ojgomuja. Jeska iwa ijginaga rot fob oida yeyin ihujir onnga rururu Yesus Kristus rejrej monuh nomnaga bera rita rifera okora morototuma erek iwa ebeibeyaif tein.

¹⁰ Noba iwa ita mar erek koma tein jeska Allah, onnga odou oufamofa eteb rot mimif, bera enjeka iwa jeskaseda isma ifoka onnga aksa morototuma jera Yesus Kristus fob. Noba nou onnga mona estir kef onnga iwa ita ifera okora bera oisa fob, beda Ofa emeisisi joug idou efesi deika ojgomuja. Beda Ofa tein emeita owesa efek eteb gu iwa gij mar nomnaga onnga iwa intunggom fogora iwa imot rot ahais ojgomuja.

¹¹ Mimif nomnaga mudou os jeskaseda Allah ofoka ereij keingg rusnok nomnaga rot ahais ojgomuja. Ainsoma.

¹² Silas bera erek dedin edohuj egens onnga ororu Yesus Kristus rot tenten fob. Noba ofa omfij didif jeskaseda dugu surat egens kef onnga estir gu iwa. Didif dunggu surat egens kef gu iwa jeskaseda disisi joug iwa. Noba didif disa surat egens kef jeskaseda iwa ijginaga rot tenten oida, oisouska Allah odou

ongga oufamofa eteb rot mimif, bera mimif misma eiteij ah ongg a efeinah. Jefeda iwa iroru mar ongg a didif danggot gij surat egens kef fob ojjomuja.

¹³ Noba rusnok ongg a ruroru Yesus Kristus gij kota Babilon, noba ongg a Allah oncunc morototuma jera iwa, bera ruisu iwa. Noba Markus, ongg a erek dedin edesa egens, ofa bera oisu iwa tein.

¹⁴ Gij mona kenefa ongg a iwa imorodosuma, beda iwa yagei itma erek irocunc rot oida idou omokorema fob. Didif dum diteij gu Allah jeskaseda iwa nomnaga ongg a iroru Yesus Kristus fob imesma iteij ah ongg a eskeiramera ojjomuja. Ainsoma.

2 Petrus

1 ¹ Didif Simon Petrus bera onnga dunogu surat egens kef. Didif bera direk osnok egens onnga omfij Yesus Kristus. Noba Ofa bera onnga oncunc didif tein erek efen rasul egens fob. Didif disa surat egens kef skoita iwa onnga isma idou onnga ororu Yesus Kristus morototuma jera memef tein. Mimif misma mudou onnga ororu Yesus Kristus oisouska Allah, onnga odou ebsi komowa, jera Yesus Kristus tein onnga onskotu mimif jeska mifmin mar onnga oska fob. Noba mudou onnga ororu Ofa erek koma bera erek mar onnga ongnoska eteb ahah Allah eiteij.

² Didif dum diteij gu Allah jeskasada Ofa ocunc efen odou onnga oufamofa eteb skoita iwa noba jeskasada iwa ita iteij ah onnga eskeiramera eteb ojgomuja. Mimif misma mar insa koma oisouska mar onnga mimif mijginaga rot osok gij Allah jera Yesus tein fob. Ofa bera erek mifmin Tuhan.

³ Oisouska Allah efen owesa efek eteb bera mimif misma mar nomnaga onnga mimif mucosu rot jeskasada mita eiteij ah onnga efeinah noba muroru Ofa rot mudou onnga ebsi komowa ojgomuja. Noba mimif misma mar insa koma oisouska mudou onnga ejginaga rot Ofa tein. Jeska Ofa bera enjeka mimif jeskasada mija erek efen rusnok fob. Ofa enjeka mimif erek koma oisouska efen ofoka onnga aksa eteb jera odou onnga ebsi komowa eteb tein.

⁴ Noba oisouska mar insa koma nomnaga bera Ofa agen rot oida Ofa emeita mar onnga ofoufem noba onnga ongnoska eteb gu mimif si. Ofa agen rot mar

koma jeskaseda mimif tein mutunggom mar onnga oufamofa ojgomu erek Ofa otunggom mar onnga oufamofa. Beda mimif mumosuwa jeska mar onnga oska onnga angh gu mebif si. Jeska mar onnga oska insa koma bera en jeska rusnok rudou efesi onnga ofogog tein.

⁵Erek koma jefeda iwa ireni rot ahais jeskaseda ita mar onnga oufamofa jeni erek rusnok onnga ruroru Yesus rot tenten fob. Noba iwa ita mar onnga ongoska tein ni, ita idou onnga ebriyi gij Allah efen oga ni,

⁶yut joug idou efesi rot ahais ni, yuin keingg idou efesi rot mar onnga oska ni, iroru Allah oga rot ahais ojgomuja ni, ita mar rot idou onnga ebsi komowa ni, ⁷idou omokorema ni, idou okora rot rusnok enjgineg tein ni.

⁸Erek iwa ita mar erek koma nomnaga odudu dokun deika, beda mar koma omofij iwa fogora imotunggom mar nomnaga rot tenten ojgomu. Noba mar insa koma bera omorocunc rot oida yeyin idou onnga ebriyi gij mar onnga Tuhan Yesus Kristus anggot rot sis fob tein.

⁹Tina erek osnok egens eneita mar insa koma tein guru, beda ofa bera erek osnok egens onnga eiteij ofou jefeda engker gij motkobah ros. Ofa odou ofoj joug rot oida Allah onsuna rot efen mar onnga oska jeska odou efesi sis fob.

¹⁰Erek koma jefeda, edohuji, iwa ireneni rot ahais jeskaseda mar onnga oufamofa insa koma onnga iwa intunggom bera orocunc rot tenten oida Allah enjeka iwa fogora oncunc iwa erek efen rusnok fob. Jeska erek iwa ita mar insa koma nomnaga, beda iwa inesiri gij mar onnga oska tein deika guru.

¹¹ Noba Allah tein omoroun iwa rot odou onnga eskeiramera eteb. Fogora iwa imoira jera rusnok nomnaga onnga mifmin Tuhan Yesus Kristus ofoka ereij keingg nou mona onnga ah aibin ojgomuja. Ofa bera onnga onskotu mimif jeska mifmin mar onnga oska nomnaga fob.

¹² Iwa idou ejginaga rot mar onnga didif danggot rot insa koma nomnaga fob. Noba iwa inroru Allah efen oga onnga tenten insa koma rot ahais fob. Erek koma tina didif dudou os disisi keingg iwa rot mar insa koma juens deika ojgomu.

¹³ Jeska didif dusujohu oida oufa nou didif dita mar erek koma gij mona insa kef onnga difena ebah ros.

¹⁴ Jeska Yesus Kristus emfesij rot koisoisa gu didif sis fob oida erek dektek deika guru, beda didif dimagos ojgomu.

¹⁵ Noba didif direneni rot iskusk jeskaseda disisi keingg iwa rot mar insa koma. Noba gij mona onnga didif danggos fob, beda mar onnga didif danggot insa koma nomnaga emah gij idou efesi ojgomuja.

¹⁶ Sis fob memef memfesij gu iwa osok gij mifmin Tuhan Yesus Kristus efen owesa efek jera osok gij mona onnga Ofa omoksens en tein. Noba mar koma bera enen jeska rusnok enjgineg onnga rimfesij rourou rot rudou onnga efesis gij guru. Jeska memef mek Tuhan Yesus Kristus efen eskeiramera eteb gu mesinsa meiteij fob.

¹⁷ Erek koma jeska gij mona insa koma bera mifmin mika Allah omfra mifmin Tuhan Yesus Kristus ofoka erek aksa eteb. Beda memef meg Allah, onnga efen efesa onnga eskeiramera eteb, gij mona onnga Ofa anggot jeska mebaga oida, "Ofa kef bera dedin edesa

ongga dudou okora rot noba onggga dudou eskeira eteb rot tein."

¹⁸ Memef mesinsa meg Ofa efen oga egens koma onggga en teisis jeska mebaga gij mona onggga mengker morototuma jera Yesus gu memaga ofos egens onggga ebsi komowa.

¹⁹ Noba mimif mifmin buku-buku onggga nabi-nabi runggu rot sis fob tein. Mar onggga rua ranggot rot gij buku-buku koma bera erek tenten ojgomu. Noba mar insa koma onggga rua runggu rot sis fob bera onggga omofij iwa jeskaseda idou ejginaga rot mar onggga rusnok ruftuftu bera erek tenten ei era gurei. Mar insa koma bera erek lampu onggga eisa gij motkobah jeskaseda rusnok rik fogora rimecira rot iskusk gij ojgomu. Iwa iroru mar onggga nabi-nabi runggu rot insa koma onjoros mona onggga Yesus Kristus ongksons en fob. Beda koma omofij iwa jeskaseda idou ebriyi gij ojgomu. Jeska mona onggga Yesus ongksons en bera erek mowa onggga orogna tomnomna jera motur onggga orogna raha tentena jeska mebaga.

²⁰ Noba mar onggga ofoufem eteb ekirsa bera, mar nomnaga onggga nabi-nabi ranggot rot gij Mar Efeyi Ebsi sis fob bera bera enen jeska risinsa rudou efesi guru.

²¹ Jeska rua onggga nabi-nabi insa koma bera runogu mar egema tein onggga rusnok mebif runsujohu rot guru. Tina rua runggu rot mar onggga Efena Ebsi Allah oncunc gu rua gij rudou efesi fob ojgomu.

2¹ Sis fob nabi-nabi enjgineg onggga ebireira bera ringker gu rua onggga Israel rifekesa tein. Jefeda Guru-Guru onggga ebireira bera rimeker gu iwa ifekesa tein si. Rua rumoftuftu mar onggga oska

gu iwa erek wuswus onnga orotunggom rusnok rudou emekebema. Beda oisouska mar insa koma bera rusnok rineya rimeseiseifa rot. Noba rua rudou omokoja rot Yesus Kristus tein. Ofa bera Tuhan onnga anggos tumu mega salib jeskaseda osuwa rua jeska rerin mar onnga oska fob. Jefeda Allah emaha mar okum eteb keingg rua rot ebeirens si.

²Rusnok rufoukou bera rumororu Guru-Guru onnga oska insa koma rerin mar onnga oska efekeifa tein. Jefeda rusnok enjineg rimek mar onnga rua runtunggom insa koma fogora rua rimagot rot oida Allah oga onnga oufamofa insa koma bera erek oska ojgomu.

³Noba jeska Guru-Guru insa koma rudou eftirir keingg mar ofoukou, jefeda rua rumocuwei mar gu iwa jeskaseda ruokrusa iwa rot yeyin mareibra. Tina Allah ensejah gij mona dektek fob jeskaseda ofra mar okum eteb keingg rua insa koma ojgomu. Ofa omoga ojga rot rua jeni rerin rita mar onnga oska insa koma si.

⁴Mimif mijginaga rot oida Allah omofra okum eteb keingg Guru-Guru onnga ebireira insa koma si. Jeska Ofa onorons rot mar onnga oska onnga malaikat-malaikat rineya runtunggom sis fob guru. Tina Ofa eij rua gij monuh onnga motkobah jeskaseda rua riker jah suma ojgomuja onjoros mona onnga Ofa ofra mar okum keingg rusnok nomnaga onnga rerin mar onnga oska.

⁵Noba Ofa tein onorons rot mar onnga ofogog onnga rusnok runtunggom gij mona onnga sis eteb fob guru. Tina Ofa era mei ofot eteb eredi rua fogora rua nomnaga rageben. Erek koma tina Ofa oskotu Nuh jera efen rusnok rufok cinja erfeka ojgomu.

Jeska Nuh bera erek osnok onnga oftufu rusnok rot mar onnga oufamofa ojgomu.

⁶ Beda sis fob, Allah oga ojga rot rusnok onnga gij kota Sodom jera kota Gomora rot rerin mar onnga oska fogora esa mah keingg rua onjoros rua nomnaga riribseb. Noba mar onnga Ofa ontunggom insa koma bera erek orocunc nou rusnok enjineg jeskaseda rua tein rineita mar onnga oska erek rua onnga rufogog insa koma guru.

⁷ Tina gij mona insa koma bera Ofa oskotu Lot jeska kota Sodom koma, jeska Lot bera erek osnok egens onnga efen mar onnga oska oskiyai tein guru. Noba Lot tein odou okumkum eteb rot rusnok insa koma rerin rita mar onnga oska. Jeska rua runororu hukum egema tein guru, tina rutunggom mar onnga oska onnga rudou eftirir keingg rot ojgomuja.

⁸ Gij orofosut mona egens egens bera Lot ek noba eg tumu rusnok insa koma onnga runororu hukum egema tein guru. Ofa ek rua rutunggom mar onnga oska ofoukou ojgomuja. Jefeda efen odou efesi onnga ebsi komowa bera okumkum eteb rot rua ojgomu.

⁹ Noba Allah ejginaga rot teinefa oskotu Nuh jera Lot jeska mar onnga ofogog insa koma. Jefeda Ofa tein ejginaga rot teinefa oskotu efen rusnok onnga rudou ebsi komowa jeska mar okum onnga ereneni rua tein gij mona ebeibeyaif ojgomu. Noba Ofa emagei rusnok insa koma nomnaga onnga rutunggom mar onnga oska ojgomuja onjoros mona onnga Ofa ofra mar okum keingg rua jera rusnok enjineg tein onnga rerin mar onnga oska.

¹⁰ Ofa emaha mar erek koma keingg rusnok nomnaga onnga risiri gij mar onnga rudou eftirir

keingg ojgomuja, jera rusnok onnga rudou oska skoita Ofa efen owesa efek tein si. Erek koma tein, Guru-Guru onnga ebireira insa koma bera ruku rufos ojgomuja, jeska rua rinemeesa guru, tina ruga oruh mar onnga angh gu mebaga rot rufoka onnga aksa tein.

¹¹ Erek koma tina, malaikat-malaikat onnga efen owesa efek ekirsa jeska mar onnga angh gu mebaga insa koma bera runoga oruh mar koma jinaga guru. Noba malaikat-malaikat tein runocunc mar koma erek oska skoita Allah jinaga guru.

¹² Tina Guru-Guru insa koma ruga oruh mar onnga risinsa rudou enebriyi gij guru. Jeska rua bera erek marska onnga ecira ebireira, noba onnga angh gu mebif jeskaseda rusnok ruskotu noba ragob ojgomu. Rua insa koma rutunggom mar onnga oska ebireira ojgomuja, jefeda rua rimesma mar okum eteb jeska Allah rot si.

¹³ Rua rerin rufons bera erek mar okum onnga emah keingg rua si. Jeska rua rita mar onnga okum gu rusnok enjgineg tein. Noba rua rudou eftirir keingg mar onnga oska gij orofosut mona ojgomuja. Noba mar koma bera onnga ereita rudou efesi erirei rot ojgomu. Noba gij mona onnga rua rint maat morototuma jera iwa, beda rua rita mar onnga oska efekeifa gij mona insa koma tein.

¹⁴ Guru-Guru onnga ebireira insa koma rudou os risiri jera egema efen mohona ebireira ojgomuja. Noba rua rudou osos rot rutunggom mar onnga oska ojgomuja. Rua rik rusnok enjgineg onnga rudou enahais rot mar onnga oufa jera mar onnga oska enesi, fogora rua ruokrusa rusnok insa koma jeskaseda rua tein ruroru rerin mar onnga oska

insa koma ojgomuja. Noba rua rijginaga rot teinefa rimeita mar onnga rudou eftirir keingg rot ojgomuja. Jefeda gij mona kahma beda Allah omofra mar okum eteb keingg rusnok erek koma si.

¹⁵ Erek koma noba rua rikikif jeska rusnok rerin erebent onnga oufamofa, noba rija yes jeska erebent insa koma jeskasada rita mar onnga oska ojgomu. Rua rita mar erek Bileam onnga Beor efen efesa eita sis fob. Bileam odou osos esma fifi rot mar onnga oska onnga ofa ontunggom gij mona insa koma.

¹⁶ Tina Allah etaha joug ofa rot mar insa koma ojgomu. Koma bera, Allah eita owesa efek gu keledai egens jeskasada era oga erek rusnok fogora etaha joug Bileam rot mar insa koma onnga ofa ontunggom. Jefeda keledai egens koma eragou joug Bileam onnga eja rot odou onnga eftirir keingg fifi jeskasada otunggom mar onnga ofogog.

¹⁷ Rusnok rik Guru-Guru ebireira insa koma beda rua rusujohu oida rua koma rumoftuftu mar rot tenten ojgomu. Tina rua ruhurmei mar skoita rusnok insa koma ojgomu. Jefeda rua bera erek mei eiteij onnga rusnok runsujohu oida rageya efei jeska si. Tina nou onnga rinsaga gu mei eiteij fob, beda mei koma ofora ojgomu. Noba Guru-Guru insa koma bera erek mocgoj ofog onnga ahtaboku eteb noba ocohun monuh egens tein. Rusnok rik mocgoj koma beda rusujohu oida ai juens mos emes si. Tina mos enes jeska mocgoj onnga ahtaboku insa koma guri. Jefeda Allah ensejah monuh onnga motkobah tuturu ojgomuja nou Guru-Guru ebireira insa koma fob.

¹⁸ Noba oisouska mar onnga rua ranggot rot ruga efeyei bera rua rusos rusnok rudou efesi jeskasada rua rita mar onnga oska onnga rusnok mebif rudou

eftirir keingg rot ojgomuja. Noba Guru-Guru insa koma rutunggom mar erek koma askesi rusnok insa koma ringkikif jeska rerin mar onggga oska ros. Mar onggga oska koma bera rusnok mebif runtunggom ros.

¹⁹ Noba rua tein ragen oida rusnok insa koma rimeita owesa efek jeskaseda rut gu risinsa ojgomu. Tina Guru-Guru insa koma rerin owesa efek jeskaseda rusuwa risinsa jeska mar onggga oska onggga angh gij rudou efesi ojgomuja jinaga guru. Jeska rusnok ruroru mar onggga oska onggga angh gij rudou efesi fogora rutunggom mar koma ojgomu.

²⁰ Noba erek Guru-Guru insa koma rusuwa risinsa jeska rerin mar onggga oska onggga rusnok mebif rutunggom oisouska mifmin Tuhan Yesus Kristus, beda koma bera oufa. Jeska Yesus bera onggga onskotu rusnok jeska rerin mar onggga oska. Tina rua risiri gij mar onggga oska insa koma deika sons fogora mar koma agei rudou ahais deika. Jefeda rerin riteij ah bera erek oska ekirsa eteb deika.

²¹ Memef onggga rasul moftuftu osok gij mar onggga Allah anggot rot sis fob jefeda Guru-Guru insa koma ruroru mar koma fob. Tina ebeibeyaif rua ringkikif jeska Allah oga insa koma ojgomu fob. Jefeda onggga oufa ekirsa nou rua bera erek sis fob rukoja mar insa koma ojgomu. Jeska erek rusnok ruroru oga onggga oufamofa insa koma, noba gij mona enjineg bera raha oga koma jah ojgomu, beda koma erek mar onggga oska ekirsa jeska rusnok onggga rungkoja rot efen oga rot sismeni ojgomu.

²² Mar onggga rua runtunggom insa koma bera erek mar egens onggga rusnok ragot erek kef oida, "Mes egens onggga aha meisohu jah bera oksons noba enet

efen meisohu insa koma sons deika." Noba koma tein erek kef oida, "Mek orins onnga rusnok rut efaga fob bera oksons noba ah gij mohtefa deika fob." Erek koma tein, sis fob rua onnga Guru-Guru ebireira ruroru mar onnga oufamofa. Tina ebeibeyaif rua ruksons gu rerin mar onnga oska efekeifa deika fob.

3¹ Edohuji onnga dudou okora rot, surat egens kef onnga didif dunogu skoita iwa bera erek surat onnga egeka deika nou iwa. Noba didif dugu surat onnga egeka kef jeska didif dudou os direbs idou efesi jeskaseda iwa isujohu rot mar onnga erek ongkoska ojgomu.

² Didif dita mar erek koma jeskaseda idou ah keingg rot mar onnga Allah efen nabi-nabi onnga ebsi komowa ranggot rot sis fob. Noba iwa idou ah keingg rot mar onnga mifmin Tuhan Yesus Kristus, onnga onskotu mimif, anggot rot gu iwa oisouska memef onnga erek iwa yeyin rasul-rasul.

³ Iwa ijginaga rot kef ojgomu oida, nou mona onnga enja ejgwaga ensaga doida fob, bera rusnok onnga ruga oruh iwa rimen si. Rua rumoga oruh rusnok ojgomuja noba rumororu mar onnga ofogog onnga rudou eftirir keingg rot tein si.

⁴ Rua rimagot mar erek kef oida, "Sis fob Tuhan Allah anggen rot oisouska nabi-nabi oida Ofa omoksons en si. Tina mimif minek mar egema tein onnga orocunc rot mar insa koma guri. Noba sis mona onnga Kristen rerin ebirfager onnga ranggos fob bera mar nomnaga ecira erek giskini ojgomu. Jeska sis mona onnga Allah ontunggom mebif nomnaga onjoros mona deisef tein bera mar nomnaga ah erek giskini ojgomu. Jefeda Yesus onoksons en deika guru."

⁵ Rua ragot mar rourou erek koma, tina rua rijginaga rot oida mar insa koma bera enerek tenten guru. Jeska rua rudoubu joug rusujohu rot mar onnga Allah ontunggom sis mona onnga dojunmeni ojgomu. Rua rudou onosujohu rot mar erek kef guru oida, "Allah ontunggom mebaga oisouska efen oga onnga anggot rot ojgomu. Noba Ofa era mei orotunggom mebif tein oisouska oga onnga anggot rot ojgomu."

⁶ Noba oisouska mar onnga Ofa anggot rot, bera Ofa era mei ofot orohoda monuh nomnaga onjoros orowora fob.

⁷ Erek koma tein, oisouska mar onnga Ofa anggot rot bera Ofa aha mebaga jera mebif jah. Mar koma emah ojgomuja onjoros mona onnga Ofa omoga ojga rot rusnok rot rerin rita mar onnga oska fogora ofra okum mar keingg rua rot oisa fog ojgomu. Noba Ofa aha mebaga jera mebif koma jah ojgomuja jeskaseda gij mona insa koma tein Ofa emereres mah gij mar koma nomnaga fogora eribseb ojgomu.

⁸ Erek koma tina, edohuji onnga dudou okora rot, iwa idou onofoj joug rot kef guru oida, skoita Allah mona egens bera erek tahun ribu egens ojgomu. Noba skoita Ofa tein tahun ribu egens bera erek mona egens ojgomu.

⁹ Erek koma jefeda rusnok rineya rusujohu oida Tuhan enen jinaga guru. Tina iwa ijginaga rot tenten oida Ofa enen jeskaseda oga ojga rot rusnok enesi, jeska Ofa oin keingg odou efesi rot rusnok ros. Ofa eita mar erek koma jeska Ofa odou os rusnok nomnaga tein rimeesa joug rerin mar onnga oska fogora risma eiteij ah onnga efeinah ojgomu.

¹⁰ Erek Allah oin keingg odou efesi erek insa koma, tina Yesus emen si. Noba mona onnga Ofa onksons

en bera omorogna keingg rusnok nomnaga erek osnok egens onggga okoreka mar orogna keingg rusnok gij rerin mod efesi ojomu. Gij mona insa koma bera mebaga emeseiseifa. Beda rusnok rimeg moc ogugur eteb fogora mah emet mar nomnaga onggga angh gu mebaga fogora eribseb. Noba Allah tein emes mah eteb gij mebif jera mar nomnaga onggga angh gij mebif onjoros mar insa koma nomnaga eribseb ojomu.

¹¹ Ofa omotunggom mar erek insa koma si, jefeda iwa ita mar rot idou onggga ebsi komowa ojomu.

¹² Iwa ita mar erek koma askesi yug moroju joug mona onggga Allah oncunc rot jeskaseda Yesus Kristus omoksons en rot ebeirens. Jeska gij mona insa koma bera mah emet mebaga jera mar nomnaga onggga angh gu mebaga jera mebif fogora eribseb ojomu.

¹³ Erek koma tina, mimif mudou ot rot oida Allah omotunggom mebaga jera mebif onggga efeinah deika si. Jeska Ofa anggen rot mar erek koma sis fob. Jeska rusnok onggga rerin rudou onggga ebsi komowa bera rimeker jah suma si.

¹⁴ Erek koma jefeda, edohuji onggga dudou okora rot, jeska iwa yug moroju rot mar insa koma nomnaga, beda iwa tein ireni rot ahais jeskaseda gij mona onggga Tuhan Yesus ek iwa, beda idou erek ebsi komowa ojomu. Ita mar erek koma jeskaseda rusnok runocunc iwa rot yeyin mar onggga oska egema tein jinaga guru. Noba ita idou onggga eskeira mejerema ojomu.

¹⁵ Noba iwa idou ejginaga rot oida, mifmin Tuhan oin keingg odou efesi rot rusnok jeska Ofa odou os oskotu rusnok jeska rerin mar onggga oska ros. Noba Paulus tein, onggga mudou okora rot, bera ongggu mar

osok gij mona onnga Yesus omoksons en. Noba ofa ogu mar koma rot odou onnga efesis eteb onnga ofa enisma jeska Allah fob.

¹⁶ Ofa ogu efen surat nomnaga rot odou onnga efesis eteb erek koma. Noba surat-surat koma bera efen mar ofoka egens egens onnga okum rot rusnok rudou ebriyi gij. Jefeda rusnok enjineg onnga rudou osumsumu noba onnga risiri gij mar onnga oska bera ragot rot surat-surat insa koma efen ofou onnga erek toga jeska mar onnga Paulus anggot rot. Rua rita mar erek koma rot Mar Efeyi Ebsi tein efen ofou. Jefeda koma erek rua rufra mar onnga okum jeska Allah keingg risinsa ojgomu.

¹⁷ Edohuji onnga dudou okora rot, iwa ijginaga fob oida mar onnga Guru-Guru ebireira insa koma ranggot rot bera erek oska eteb fob. Jefeda iwa yut joug idou efesi rot ahais. Rua koma runororu hukum egema tein guru. Jefeda iwa ita idou ahais jeskaseda mar onnga rua runtunggom bera onorokrusa iwa fogora imororu rerin mar onnga oska insa koma tein guru. Jeska erek iwa iroru rerin mar insa koma, beda iwa imesiri jeska mar koma onnga iwa inroru rot tenten ebeibeyaif si.

¹⁸ Iwa ineita mar erek Guru-Guru ebireira insa koma guru, tina iwa ita mar onnga oufamofa jeskaseda mifmin Tuhan Yesus Kristus, onnga onskotu mimif, bera eita efen odou onnga eskeiramera rot iwa ojgomuja. Mimif mudou os jeskaseda rusnok nomnaga rufra Yesus Kristus efen ofoka erek aksa eteb ebeibeyaif noba gij mona onnga ah aibin tein ojgomuja. Ainsoma.

1 Yohanes

1 ¹ Didif dugu surat egens kef gu iwa osok gij Ofa onggga enofoguma gij mona onggga Allah onotunggom mar egema tein enesi. Ofa koma bera Yesus Kristus. Noba memef bera meg efen oga ni, memef mek Ofa gu mesinsa meiteij ni, memef meyajga joug Ofa ni, memef tein mahtec Ofa efen efaga ni. Ofa bera onggga oncunc gu memef rot teinefa rusnok risma eiteij ah onggga efeinah tein.

² Noba Allah bera oncunc gu memef rot oida Ofa koma bera onggga eita eiteij ah onggga efeinah gu rusnok. Jefeda memef magot rot tenten noba mefesij tein gu iwa oida memef mek Ofa onggga efena ebah rot ah aibin fob. Sis fob bera Ofa eker jera efen meka Allah noba Allah bera onggga oncunc Ofa gu memef tein.

³ Memef mefesij rot oga onggga oufamofa insa koma osok gij Ofa onggga memef mek gu meiteij noba meg rot efen oga tein fob. Memef motunggom mar erek koma jeskaseda iwa tein ita idou onggga egens jera memef rot. Noba mimif nomnaga bera mirek egens jera mifmin mika Allah jera Ofa efen efesa Yesus Kristus.

⁴ Memef mogu mar kef jeskaseda mimif nomnaga mita mudou onggga efaga ouka eteb rot ojgomu.

⁵ Memef magot rot tenten osok gij mar onggga memef meg Yesus Kristus anggot rot sis fob. Mar insa koma bera erek kef oida, Allah bera erek eisa egigir ojgomu, noba motkobah egema tein enah gij Ofa efen odou efesi jinaga guru.

⁶Erek mimif magot rot oida mudou bera egens jera Allah fob, tina mimif mita mar onnga oska erek rusnok onnga ringker gij motkobah ros, beda koma orocunc rot oida mimif mucuwei mar ojgomu, noba munororu mar onnga tenten enesi.

⁷Tina erek mimif mita mar onnga oufamofa ojgomu, beda koma orocunc rot oida mimif miker gij eisa fob, erek Ofa eker gij eisa. Beda mifmin mudou eja erek egens jera Ofa fob. Noba oisouska efen efesa Yesus ogufu onnga eya tumu mega salib fob bera Ofa onsuna rot mifmin mar onnga oska nomnaga jeska mudou efesi fob.

⁸Erek mimif magot oida mineita mar onnga oska egema tein jinaga enesi, beda koma erek mimif mucuwei mar gu misinsa ojgomu ros. Noba Allah efen oga onnga tenten bera enah gij mudou efesi enesi.

⁹Tina erek mimif mimeesa joug rot mifmin mar onnga oska, beda Allah omosuna rot mar onnga oska insa koma jeska mudou efesi si. Beda Ofa emeita odou onnga ebsi komowa gu mimif fogora mifmin mar onnga oska insa koma enah deika guru fob. Jeska Ofa omotunggom mar nomnaga onnga Ofa anggen rot erek insa koma sis fob si.

¹⁰Allah anggot rot oida rusnok nomnaga bera rita mar onnga oska fob. Tina erek mimif magot oida mineita mar onnga oska egema tein enesi, beda koma erek mimif magot oida Allah ocuwei mar ojgomu. Noba koma tein erek mimif mungkoja rot Ofa efen oga tein fob.

2¹Edohuji onnga dudou okora rot, didif dugu surat egens kef gu iwa onnga erek dedin edeser jeskaseda iwa ineita mar onnga oska guru. Tina erek rineya jeska iwa onnga rita mar onnga oska, beda

mifmin osnok egens onnga onot deismos nou mimif skoita Allah. Ofa bera Yesus Kristus onnga efen mar onnga oska oskiyai tein guru.

²Ofa aha esinsa gu rusnok onnga rufogog fogora agos nou mifmin mar onnga oska nomnaga fob. Ofa ontunggom mar koma jeskaseda Allah onofra okum keingg mimif rot guru. Noba Ofa onotunggom mar insa koma nou mimif ojgomu guru, tina Ofa agos nou rusnok monuh nomnaga tein rerin mar onnga oska.

³Erek mudou ororu mar onnga Allah anggot rot, beda koma bera onnga orocunc rot oida mimif mijginaga Ofa rot tenten fob.

⁴Noba idu onnga agot oida ofa ejginaga Allah rot tenten fob, tina ofa onororu mar onnga Ofa anggot rot insa koma guru, beda ofa ocuwei mar ojgomu. Noba koma tein erek ofa okoja Allah oga onnga tenten tein.

⁵Tina idu onnga omororu mar onnga Allah anggot rot, beda ofa efen odou onnga okora eteb rot Allah jeni erek Allah odou okora eteb rot mimif tein. Mar koma bera omorocunc rot oida mifmin mudou egens jera Ofa fob.

⁶Noba idu onnga agot oida ofa efen odou egens jera Allah, beda ofa eita mar erek Yesus Kristus eita ojgomu gij mona onnga Ofa engker gu mebif ros.

⁷Edohuji onnga dudou okora rot, didif dugu surat egens kef osok gij mar egens onnga Allah anggot rot sis fob. Noba mar onnga dinagot insa kef bera enerek mar onnga efeinah guru. Tina didif dumftufts iwa rot mar insa koma sis fob. Jeska iwa ingg rot mar insa koma sis mona onnga iwa imororu Yesus Kristus erek efeinah ros.

⁸Tina mar insa koma bera erek mar onnga efeinah tein. Jeska ebeibeyaif iwa idou omokorema rot tenten erek Yesus Kristus odou okora rot iwa gij mona onnga Ofa engker gu mebif ros. Koma tenten ojgomu, jeska erek mimif mita mar koma erek Yesus eita sis fob, beda motkobah onnga angh gij mudou efesi bera eseiseifa ojgomu. Noba mimif misma eiteij ah onnga efeinah onnga erek eisa egigir.

⁹Erek osnok egens agot oida ofa eita mar onnga ongnoska ojgomu, tina ofa odou oska rot efen mohuj onnga Kristen tein, beda koma orocunc rot oida ofa engker gij motkobah ros, noba onaira gij eisa tein enesi.

¹⁰Tina erek osnok egens odou okora rot efen mohuj onnga Kristen fob, beda ofa koma bera oira gij eisa fob. Noba mar egema tein onotunggom ofa jeskaseda esiri gij mar onnga oska jinaga guru.

¹¹Erek koma tina, erek osnok egens efen odou onnga oska rot efen mohujir onnga Kristen, beda ofa bera erek rusnok onnga ringker gij motkobah ros, jeska ofa otunggom mar onnga oska ojgomu ros. Noba jeska ofa engker gij motkobah ros, beda ofa enejginaga rot oida efen odou onnga osumsumu guru. Ofa enejginaga rot oida ofa emesma okum eteb rot efen mar onnga oska insa koma tein guru.

¹²Didif dunogu surat egens kef gu iwa onnga erek iforoker ros, jeska Allah onsuna rot yeyin mar onnga oska jeska idou efesi fob. Ofa ontunggom mar erek koma oisouska Yesus Kristus onnga anggos nou iwa sis fob.

¹³Noba didif dunogu surat egens kef gu iwa onnga erek runa ofos fob, jeska iwa bera ijginaga rot Yesus Kristus onnga eker morototuma jera Allah gij mona

ongga Allah onotunggom mebif enesi. Noba didif dunogu surat egens kef gu iwa onnga erek iforoker ros, jeska iwa bera inesiri gu Bilis deika guru, tina ebeibeyaif iwa yut rot ahais ojgomuja. Noba didif dunogu surat egens kef gu iwa nomnaga onnga erek dedin edeser, jeska iwa ijginaga rot mifmin mika Allah fob.

¹⁴ Noba didif dunogu surat egens kef gu iwa onnga erek runa ofos fob, jeska iwa bera ijginaga rot Yesus Kristus onnga engker morototuma jera Allah sis mona onnga Allah onotunggom mebif enesi tein. Noba didif dunogu surat egens kef gu iwa onnga erek iforoker ros, jeska iwa bera iroru Allah oga onnga angh gij idou efesi rot ahais ojgomuja, noba jeska iwa inesiri gu Bilis deika guru.

¹⁵ Iwa inofra mar onnga rusnok mebif rufra erek oufamofa guru. Noba idou onosos rot mar onnga rusnok mebif rudou osos rot guru. Erek koma tein, erek osnok egens onnga ofra mar onnga mebif efen insa koma erek oufamofa, beda ofa onofra Allah ofoka erek oufamofa guru.

¹⁶ Jeska mar insa koma bera ofogog noba en jeska rusnok mebif ojgomu. Noba mar ofogog onnga rusnok rudou eftirir keingg ni, mar onnga rua rik gu riteij fogora rudou osos rot ni, mar onnga rua rufra risinsa rufoka erek aksa rot ni, mar koma nomnaga bera enen jeska mika Allah guru. Tina mar koma bera en jeska rusnok mebif onnga rufogog ojgomu.

¹⁷ Noba rusnok mebif jera mar nomnaga onnga rudou eftirir keingg bera emeseiseifa si. Tina osnok egens onnga ororu mar onnga Allah ondou os rot ojgomu bera emesma eiteij ah onnga ah aibin si.

¹⁸ Edohuji onnga dudou okora rot erek dedin edeser, mona onnga enja ejgwaga bera enesaga doida fob. Noba iwa ingg fob rot oida gij mona insa koma bera osnok egens onnga ofogog doska emen. Ofa bera onnga eretei rot Yesus Kristus. Noba ebeibeyaif tein rusnok ofoukou onnga riretei rot Yesus Kristus erek osnok egens insa koma bera rin fob. Erek koma jefeda mimif mijginaga rot oida mona onnga enja ejgwaga bera enesaga doida fob.

¹⁹ Rusnok rufoukou insa koma rimekebema jeska mimif jeska rudou enerek egens jera mimif deika guru. Erek rua bera Kristen onnga ruroru mar onnga tenten ojgomu, beda rua rimeker erek egens morototuma jera mimif ojgomuja si. Tina rua rineita erek koma guri. Noba rua rudou os rimekebema ojgomu. Jefeda rusnok nomnaga rijginaga rot oida rua rinerek egens jera mimif deika guru.

²⁰ Tina iwa bera inerek rusnok insa koma guru. Jeska iwa insma owesa efek jeska Efena Ebsi Allah fob. Jefeda iwa ijginaga rot mar meidu onnga erek tenten ojgomu.

²¹ Noba didif dugu surat egens kef gu iwa jeska iwa ijginaga rot oida Allah efen oga bera erek tenten ojgomu. Noba iwa tein ijginaga rot oida mar onnga rusnok enjgineg rucuwei mar gij bera enen jeska Allah efen oga onnga tenten jinaga guru.

²² Erek koma tein, rusnok onnga ranggot oida Yesus bera enerek Kristus koma onnga omosuwa mimif jeska mifmin mar okum guru, beda rua bera onnga rucuwei mar ekirsa jeska rusnok nomnaga. Rua bera onnga rukoja Yesus Kristus erek Allah efen efesa jera mifmin mika Allah.

²³ Jeska erek osnok egens okoja Yesus erek Allah efen efesa ojomu, beda koma erek ofa okoja rot Allah tein. Tina erek osnok egens agot oida Yesus bera Allah efen efesa, beda ofa tein efen odou onnga egens jera Allah fob.

²⁴ Jefeda iwa iroru Allah oga insa koma onnga iwa ingg rot gij mona onnga iwa inroru Yesus Kristus fob ojomu. Iwa ita mar erek koma, beda idou emeja erek egens jera Yesus onnga Allah efen efesa, jera Ofa efen meka Allah tein si.

²⁵ Noba mar onnga Ofa anggen rot gu mimif sis fob bera oida Ofa emeita eiteij ah gu mimif onnga ah aibin ojomuja si.

²⁶ Mar kef onnga didif dunogu gu iwa bera osok gij rusnok onnga rudou os ruokrusa iwa jeskaseda inroru Allah oga onnga tenten deika guru.

²⁷ Tina Efena Ebsi Allah, onnga iwa insma jeska Yesus Kristus fob, bera engker gij idou efesi ros. Jefeda iwa inocosu rot oida rusnok enjgineg ruftuftu iwa deika guru. Jeska Efena Ebsi Allah bera onnga oftuftu iwa osok gij mar insa koma nomnaga. Noba mar onnga Ofa oftuftu gu iwa bera erek tenten ojomu. Ofa onocuwei mar jinaga guru. Jefeda iwa ita idou egens jera Yesus Kristus noba iroru mar koma onnga Efena Ebsi Allah omftuftu gu iwa sis fob ojomuja.

²⁸ Edohuji onnga dudou okora rot erek dedin edeser, iwa ita idou egens jera Yesus Kristus ojomuja. Iwa ita mar erek koma jeskaseda gij mona onnga Ofa onksons en fob, beda yeyin idou erek ahais ros noba mojenen iwa rot gij mona insa koma tein guru.

²⁹ Noba iwa ijginaga rot oida mar nomnaga onnga Allah ontunggom fob bera erek oufamofa ojomu.

Jefeda erek osnok egens ontunggom mar onnga oufamofa ojgomu, beda ofa enja erek Allah efen efesa fob.

3¹ Mifmin mudou ousaha jeska Allah odou okora eteb rot mimif fogora Ofa oncunc mimif erek efen efeser fob. Noba koma erek tenten ojgomu. Tina rusnok mebif bera rudou enebriyi gij mar koma guru, jeska rua rinejginaga rot Allah enesi.

² Edohuji onnga dudou okora rot, ainsa kef mimif bera erek Allah efen efeser. Tina gij mona onnga emen bera minejginaga rot oida mijerek teinefa enesi. Erek koma tina mimif mijginaga rot oida gij mona onnga Yesus ongksons en fob, beda mimif mimesma mifaga onnga morototuma erek Ofa tein efen efaga si. Jeska gij mona insa koma bera mimek Ofa rot koisoisa.

³ Jefeda rusnok nomnaga onnga ruisum gij Ofa rot mar insa koma bera rimeita rudou onnga ebsi komowa morototuma erek Ofa efen odou onnga ebsi komowa.

⁴ Tina erek osnok egens eita mar onnga oska, beda koma erek ofa engkirsa rot Allah efen hukum tein fob. Jeska mar onnga rusnok rutunggom onnga ekirsa rot hukum Allah, koma bera erek mar onnga oska ojgomu.

⁵ Noba iwa ijginaga rot oida sis fob bera Yesus en jeskaseda osuna mar onnga oska jeska rusnok rudou efesi. Noba iwa tein ijginaga rot oida Ofa esinsa eneita mar onnga oska egema tein jinaga guru.

⁶ Jefeda rusnok onnga rita rudou egens jera Yesus fob bera runoruru mar onnga oska deika guru. Tina rusnok onnga rururu mar onnga oska ojgomuja bera rudou enejginaga rot Yesus enesi. Noba rudou

enebriyi gij mar onnga Ofa ontunggom tein jinaga guru.

⁷Erek koma jefeda, edohuji onnga dudou okora rot erek dedin edeser, yut joug idou efesi rot ahais jeskaseda rusnok runorokrusa iwa fogora itunggom mar onnga oska guru. Jeska rusnok onnga rita mar onnga erek oufamofa bera risma rudou onnga ebsi komowa morototuma erek Yesus efen odou onnga ebsi komowa.

⁸Tina rusnok onnga rita mar onnga oska ojgomuja bera rirek Bilis ojgomu. Jeska Bilis eita mar onnga oska ojgomuja gij mona onnga Allah otunggom mebif onjoros deisef tein. Noba Allah efen efesa bera en gu mebif jeskaseda ohoda rot Bilis efen mar onnga ofogog nomnaga ojgomu.

⁹Erek koma tein, idu onnga Allah enjeka erek efen efesa fob bera eneita mar onnga oska ojgomuja deika guru. Tina ofa odou os eita mar onnga oufamofa ojgomu. Jeska ebeibeyaif ofa bera erek Allah efen efesa fob.

¹⁰Noba idu onnga eita mar onnga oska ojgomuja, erek odou onokora rot efen mohujir onnga Kristen guru, beda ofa koma bera enerek Allah efen efesa jinaga guru. Mar insa koma bera onnga orocunc rot oida idu onnga erek Allah efen efeser jera idu onnga erek Bilis efen efeser.

¹¹Gij mona onnga iwa inroru Yesus Kristus bera iwa ingg rot oida mimif mita mudou onnga omokorema ojgomu.

¹²Noba onnga ofoufem eteb bera mineita mar erek osnok egens onnga ofoka Kain eita sis eteb fob guru. Ofa bera Adam efen efesa onnga ororu Bilis ojgomu. Ofa odou ejisei rot efen mokosa jeska mokosa eita

mar onnga oufamofa ojgomu, noba ofa eita mar onnga ofogog ojgomu. Noba Allah odou eskeira ekirsa rot ofa efen mokosa. Jefeda ofa agob efen mokosa insa koma rot.

¹³ Erek koma tein, edohuji, erek rusnok mebif rudou oska rot iwa, tina idou onoubsaha rot koma guru.

¹⁴ Jeska gij mona onnga mimif munororu Yesus enesi, beda mimif tein mirek rusnok onnga rimagos noba rimeja jah mahmei meren ojgomu. Tina jeska mimif muroru Yesus fob, jefeda ebeibeyaif bera mimif mimesma eiteij ah onnga efeinah noba ah aibin si. Mimif mijginaga rot erek koma jeska mudou okora rot mifmin muhujir onnga Kristen ojgomuja. Tina idu onnga odou onokora rot efen mohujir onnga Kristen guru bera enesma eiteij ah onnga efeinah guru.

¹⁵ Jeska rusnok onnga rudou oska rot rerin ruhujir onnga Kristen bera rirek rusnok onnga ragob rusnok enjgineg ojgomu. Noba iwa tein ijginaga rot oida Allah eneita eiteij ah onnga ah aibin gu rusnok onnga rutunggom mar onnga oska erek insa koma guru.

¹⁶ Erek koma tina, Yesus oncunc gu mimif fob rot teinefa mimif mita mudou onnga omokorema rot tenten ojgomu. Jeska Ofa agos tumu mega salib jeskaseda oskotu mimif jeska mifmin mar onnga oska. Noba oisouska koma bera mimif mijginaga rot teinefa mimif mita mudou onnga okora rot mifmin muhujir. Jefeda mimif tein misejah mudou efesi rot mifmin muhujir onnga Kristen fogora mufij rua rot meidu meidu ojgomuja onjoros erek magos nou rua tein ojgomu.

¹⁷ Erek osnok egens efen mareibra ofoukou, beda ofa ocunc odou onnga okora rot efen mohuj egens onnga ofojingki koma fogora ofij ofa ojgomu. Tina

erek ofa onofij efen mohuj egens koma ongg
ofojingki guru, beda koma orocunc rot oida ofa odou
onokora rot Allah erek tenten enesi.

¹⁸ Edohuji ongg dudou okora rot erek dedin
edeser, mimif minagot rot oida mudou okora rot
mifmin muhujir ongg Kristen ojgomu guru. Tina
ongg oufamofa bera mimif murocunc rot mar insa
koma rot tenten fogora mufij rua rot mar ongg
rucosu rot tein.

¹⁹ Erek koma jefeda erek mimif mufij mifmin
muhujir ongg Kristen, beda mimif mijginaga rot
tenten oida mimif muroru Allah oga rot tenten fob.
Jefeda mifmin mudou enemeesa rot Allah guru. Jeska
Ofa odou eskeira rot mimif fob.

²⁰ Koma tenten, jeska erek mudou ah keingg
rot mar ongg oska ongg mimif mutunggom sis
fob, beda mudou efeneinei rot ojgomu. Tina Allah
ejginaga rot mar insa koma nomnaga tein. Noba
oisouska efen owesa efek bera Ofa onsuna rot mar
insa koma fogora odou eskeira rot mimif ojgomu.

²¹ Edohuji ongg dudou okora rot, enadaij nou
mudou efeneinei rot mar ongg oska insa koma
deika guru, jeska Allah onsuna rot mar ongg oska
insa koma jeska mudou efesi fob. Jefeda ebeibeyaif
mimif mijginaga rot tenten oida Allah odou eskeira
rot mimif ojgomu fob.

²² Jeska ebeibeyaif mimif muroru mar ongg Ofa
anggot rot noba mutunggom mar ongg ereita Ofa
efen odou ongg eskeira rot ojgomu. Jefeda erek
mimif mirejgei mar jeska Ofa, beda Ofa emeita mar
koma gu mimif si.

²³ Noba mar ongg Ofa anggot rot insa koma bera
erek kef oida, "Mudou ororu Yesus Kristus ongg Ofa

efen efesa ojgomu, noba mudou omokorema erek Yesus anggot rot sis fob."

²⁴Beda idu onnga otunggom mar onnga Allah anggot rot bera efen odou erek egens jera Ofa. Noba Allah tein odou erek egens jera ofa. Noba mimif mijginaga rot oida Ofa efen odou erek egens jera mimif oisouska Efena Ebsi onnga Ofa obk jeskaseda engker gij mudou efesi.

4¹Edohuji onnga dudou okora rot, onnga tenten bera iwa inororu mar nomnaga onnga rusnok ruftuftu gu iwa osok gij Allah oga rot ebeirens guru. Tina iwa isujohu rot koisoisa osok gij mar koma sismeni fog jeskaseda iwa ijginaga rot tenten oida mar koma bera en oisouska Efena Ebsi Allah ei era gurei. Jeska rusnok rufoukou onnga rinja rejrej monuh ofoukou noba ruftuftu rot mar onnga tenten guru. Noba rua tein rucuwei mar rot oida mar onnga rumftuftu insa koma bera en jeska Allah ojgomu, tina guru.

²Rusnok onnga ruftuftu rot mar onnga tenten osok gij Allah oga bera ragot tein oida Yesus Kristus en jeska Allah gu mebif, noba Ofa efen efaga morototuma erek rusnok rerin rifaga tein. Koma orocunc rot oida mar onnga rusnok ruftuftu bera en jeska Allah era gurei.

³Tina erek rusnok ruftuftu oida Yesus enen gu mebif rot efen efaga guru, beda mar onnga rua ruftuftu enen jeska Allah jinaga guru. Rusnok onnga rita mar erek koma bera erek osnok egens koma onnga ok eretei rot Yesus Kristus. Iwa ig rot fob oida ofa koma emen. Noba rusnok onnga rita mar erek ofa bera rin fob.

⁴Erek koma tina, edohuji onggga dudou okora rot, iwa bera rusnok onggga Allah efen fob. Noba iwa inesiri gu rusnok insa koma guru. Jeska owesa efek onggga iwa insma jeska Allah bera ekirsa jeska owesa efek onggga rusnok insa koma rinsma jeska Bilis.

⁵Erek koma jeska rusnok onggga ruftuftu mar onggga oska insa koma bera erek rusnok mebif efen ojomu. Noba rua ruftuftu mar oisouska meidu onggga rusnok mebif runsujohu rot ojomu. Noba rusnok enjgineg rudou os rig rot mar onggga rua ruftuftu ojomu.

⁶Tina memef bera moftuftu mar onggga en jeska Allah. Noba rusnok onggga ruroru Allah rot tenten bera ruroun mar onggga memef moftuftu. Noba rusnok onggga runororu Allah rot tenten guru bera runoroun mar onggga memef moftuftu rot guru. Mar insa koma bera onggga orocunc rot oida mar onggga rusnok ruftuftu bera erek tenten era erek oska ojomu.

⁷Edohuji onggga dudou okora rot, onggga oufamofa bera mimif mudou omokorema ojomuja. Jeska Allah eita owesa efek gu mimif jeskaseda mudou okora rot rusnok. Noba idu onggga odou okora rot rusnok enjgineg, beda ofa bera onggga erek Allah efen efesa. Noba ofa tein ejginaga rot Allah erek tenten fob.

⁸Tina idu onggga odou onokora rot rusnok enjgineg guru, beda ofa tein enejginaga rot Allah enesi. Jeska mar nomnaga onggga Allah ontunggom bera oisouska odou onggga okora rot rusnok.

⁹Noba Ofa obk efen efesa onggga egensmes gu mebif jeskaseda agos nou mimif. Beda oisouska koma bera mimif misma eiteij ah onggga ah aibin. Noba oisouska mar insa koma bera Allah oncunc gu mimif oida Ofa odou okora eteb rot mimif.

¹⁰ Allah onobk efen efesa skoita mimif jeska mimif mudou okora rot Ofa guru. Tina Ofa orocunc rot oida odou okora eteb rot mimif oisouska efen efesa onnga Ofa obk jeskaseda aha esinsa efaga nou mifmin mar onnga oska. Jefeda Allah onofra mar okum keingg mimif rot mifmin mar onnga oska insa koma deika guru.

¹¹ Erek koma jefeda, edohuji onnga dudou okora rot, jeska Allah odou okora rot mimif erek koma, jefeda mimif tein mudou omokorema ojgomuja.

¹² Rusnok egema tein rinek Allah gu riteij enesi. Tina erek mifmin mudou omokorema, beda Allah emeja erek egens jera mimif ojgomuja. Noba mifmin mudou okora rot rusnok erek Ofa odou okora rot rusnok tein ojgomu.

¹³ Jeska mimif mijginaga rot oida Efena Ebsi onnga Ofa eita gu mimif bera orocunc rot oida mudou erek egens jera Ofa fob.

¹⁴ Noba memef mek gu meiteij jera magot rot gu rusnok tein oida mika Allah ombk efen efesa jeskaseda oskotu rusnok nomnaga jeska rerin mar onnga oska fob.

¹⁵ Jefeda idu onnga agot oida Yesus Kristus bera Allah efen Efesa, beda ofa bera efen odou onnga egens jera Allah fob.

¹⁶ Erek koma tein, mimif mijginaga rot tenten oida Allah odou okora rot mimif. Jeska Ofa efen odou onnga okora rot rusnok ojgomuja. Noba idu onnga odou okora rot rusnok enjineg ojgomuja, beda ofa efen odou onnga egens jera Allah tein.

¹⁷ Beda oisouska mudou onnga okora rot rusnok erek Allah odou okora rot rusnok bera mimif minemeesa rot mona onnga enja ejgwaga jinaga

guru. Gij mona insa koma bera Ofa omoga ojga rot rusnok nomnaga rerin rita mar. Mimif minemeesa rot mona insa koma guru, jeska mimif mita mar onggafamofa gij miteij ah insa kef morototuma erek Yesus Kristus eita gij efen eiteij ah sis fob.

¹⁸Noba rua onggafudou okora rot rusnok erek Allah bera rinemeesa rot mona onggafu runjot jah Allah odou guru. Erek koma jeska rusnok onggafudou okora rot rusnok enjgineg erek insa koma bera risma rudou onggafenemeesa oskiyai tein guru. Jeska erek rusnok rimeesa, beda koma orocunc rot oida rua rijginaga rot mar okum onggafemen skoita rua ojgomu. Noba rusnok onggafimeesa rot Allah bera erek rusnok onggafudou onokora rot rusnok enjgineg erek Allah odou okora rot rusnok enesi.

¹⁹Mimif mudou okora rot Allah noba mudou okora rot rusnok enjgineg jeska sismeni bera Allah odou okora rot mimif.

²⁰Noba idu onggafagot oida ofa odou okora rot Allah, tina ofa tein efen odou onggafoska skoita efen mohuj onggafKristen, beda ofa ocuwei mar ojgomu. Jeska erek osnok egens efen odou oska rot efen mohuj Kristen onggafofa ek gu eiteij, beda ofa odou onokora rot Allah onggafofa enek gu eiteij tein guru.

²¹Noba Allah anggot rot gu mimif erek kef oida, "Idu onggafodou okora rot Ofa, beda ofa tein odou okora rot efen mohuj onggafKristen ojgomu."

5¹Idu onggafodou ororu rot oida Yesus bera Kristus onggafAllah omobk fob, beda ofa tein bera erek Allah efen efesa. Noba ofa koma odou okora rot mifmin mika Allah tein. Beda ofa odou okora rot efen mohujir onggafKristen tein. Jeska mohujir insa koma tein bera erek Allah efen efeser.

² Noba erek mudou okora rot mifmin muhujir, beda oisouska mar koma bera mimif mijginaga rot oida mudou okora rot Allah tein fob. Noba mimif muroru mar onggga Ofa anggot rot ojgomuja.

³ Koma tein bera onggga orocunc rot oida mudou okora rot Allah erek tenten fob. Noba mimif muroru mar insa koma onggga Ofa anggot rot ojgomu.

⁴ Jefeda mimif mijginaga rot tenten fob oida rua onggga Allah enjeka erek efen efeser bera rut joug rudou efesi rot ahais jeska mar onggga oska ojgomuja. Jeska oisouska mudou efesi onggga ororu rot tenten oida Yesus Kristus bera Allah efen efesa, beda minesiri gij mar onggga oska deika guru.

⁵ Jeska rusnok onggga rudou ororu rot oida Yesus Kristus bera Allah efen efesa, beda rua koma bera rinesiri gij mar onggga oska gij mebif jinaga deika guru.

⁶ Yesus Kristus bera Allah efen efesa onggga Ofa ombk gu mebif. Ofa en gu mebif jeskaseda eita baptis gu rusnok. Noba Ofa en jeskaseda efen ogufu eya tumu mega salib nou mifmin mar onggga oska tein. Koma bera, Ofa enen jeskaseda eita baptis ojgomu guru. Tina Ofa en jeskaseda efen ogufu eya tumu mega salib nou mifmin mar onggga oska tein. Noba Efena Ebsi Allah bera onocunc gij rusnok rudou efesi rot oida mar insa koma bera tenten. Jeska Efena Ebsi Allah bera agot rot mar onggga tenten ojgomu.

⁷ Jefeda mar orgomu kef bera orocunc rot gu mimif oida Yesus erek Kristus onggga Allah omobk.

⁸ Mar onggga egens insa koma bera, Efena Ebsi Allah onggga angh gij mudou efesi fob. Noba mar onggga egeka insa koma bera, Allah anggot rot erek mar koma gij mona onggga Yesus eita baptis gij mei. Noba

mar onnga orgomu bera, rusnok ragot rot erek koma gij mona onnga rusnok enjgineg runtob Yesus efaga tumu mega salib fogora efen ogufu eya. Noba mar onnga orgomu insa koma bera orocunc rot mar ofoka egens ojgomu. Koma orocunc rot oida Yesus Kristus bera Allah efen efesa.

⁹Giskini mudou ororu mar onnga rusnok ranggot rot. Tina mifmin mudou ororu mar onnga Allah anggot rot erek ekirsa ojgomu. Jeska Ofa anggot rot tenten osok gij Yesus Kristus oida Ofa bera efen efesa.

¹⁰Jefeda idu onnga odou ororu rot oida Yesus Kristus bera Allah efen efesa, beda ofa ejginaga gij odou efesi rot oida mar onnga Allah anggot rot insa koma bera tenten ojgomu. Tina idu onnga onororu mar onnga Allah anggot rot insa koma guru, beda koma erek ofa osujohu oida Allah ocuwei mar rot ojgomu. Jeska ofa odou onororu mar onnga Allah anggot rot insa koma osok gij efen efesa Yesus Kristus rot tenten guru.

¹¹Noba mar onnga Allah anggot gu mimif bera erek kef oida, "Mimif misma eiteij ah onnga ah aibin oisouska Ofa efen efesa Yesus Kristus onnga mudou ororu fob."

¹²Noba idu onnga eita odou egens jera Allah efen efesa, beda ofa emesma eiteij ah onnga ah aibin si. Tina idu onnga okoja Allah efen efesa, beda ofa enesma eiteij ah onnga ah aibin jinaga guru.

¹³Didif Yohanes, dunogu surat egens kef gu iwa onnga iroru Yesus Kristus onnga Allah efen efesa jeskaseda iwa ijginaga rot oida Allah emeita eiteij ah onnga ah aibin gu iwa si.

¹⁴ Erek koma tein, mimif minemeesa rot Ofa guru, tina mimif mum miteij rot mar gu Ofa ojgomu. Jeska erek mimif mum miteij gu Ofa rot mar ororu jeni Ofa odou ejginaga rot, beda Ofa emeg muga rot mar insa koma si.

¹⁵ Noba jeska Ofa emeg muga rot mar insa koma, beda Ofa tein emeita mar insa koma rot koisoisa gu mimif si.

¹⁶ Erek yeyin ihujir onggaruntunggom mar onggar oska, beda iwa yum iteij nou rua ojgomu. Iwa yum iteij erek koma jeskaseda rua rimekikif jeska rerin mar onggar oska insa koma, beda Allah emeita eiteij onggar efeinah gu rua si. Tina erek rua rutunggom mar egens onggar oska eteb ahah Allah eiteij, beda Ofa onosuna rot mar egens koma jeska rudou efesi jinaga guru. Jefeda iwa inom iteij nou rusnok onggar rutunggom mar egens koma guru. Jeska Allah emeij rua gij mahmei meren rot mar insa koma si.

¹⁷ Jeska Ofa odou eneskeira rot mar onggar oska egema tein onggar rusnok rutunggom jinaga guru. Tina rot mar onggar oska egema bera Ofa onobk rusnok gu mahmei meren nou mona onggar ah aibin guru.

¹⁸ Mimif mijginaga rot oida rusnok onggar Allah oroun erek efen efeser bera rineita mar onggar oska ojgomuja deika guru. Erek koma tein Allah omot joug rua jeska mar onggar ofogog. Noba Bilis enesma rua jeska Ofa jinaga guru.

¹⁹ Mimif mijginaga rot oida mimif bera erek Ofa efen efeser. Noba mimif tein mijginaga rot oida Bilis bera onggar ofoka ereij keingg rusnok nomnaga onggar rutunggom mar onggar oska ojgomuja.

²⁰ Erek koma tein mimif mijginaga rot oida Yesus Kristus bera en gu mebif rot tenten fob. Noba Ofa omfij mimif gij mudou efesi jeskasada mimif mijginaga rot Allah onnga tenten. Jefeda mifmin mudou onnga egens jera Allah rot tenten fob. Noba mifmin mudou tein erek egens jera efen efesa Yesus Kristus fob. Ofa bera Allah onnga tenten, noba Ofa bera onnga eita eiteij ah onnga ah aibin gu rusnok.

²¹ Erek koma Jefeda, edohuji onnga dudou okora rot erek dedin edeser, iwa ibes ifaga jeska mar nomnaga onnga enen jeska Allah guru. Ainsoma.

2 Yohanes

1 ¹ Didif, onnga direk ebirfaga Mod Ari egens, bera dugu surat egens kef skoita bua onnga erek ojaga egens onnga Allah oncunc fob jera bebin ebesser nomnaga onnga dudou okora rot tenten fob. Noba rusnok nomnaga tein onnga rururu mar onnga tenten bera rudou okora rot iwa.

² Jeska mimif nomnaga muroru mar onnga tenten ojgomu, noba mar insa koma enah gu mimif rot mona onnga ah aibin ojgomuja.

³ Didif dum diteij gu mifmin mika Allah jera efen efesa Yesus Kristus jeskaseda Ofa eita odou onnga oufamofa skoita mimif jera eiteij ah onnga eskeiramera ojgomuja tein. Mimif tein mimesma mudou onnga omokorema noba onnga muroru mar onnga tenten ojgomuja.

⁴ Didif dudou erirei eteb rot iwa jeska didif dingg rot oida bebin ebesser rururu mar onnga tenten ojgomuja fob. Koma bera ah jeni erek mar onnga mifmin mika Allah anggot rot gu mimif fob.

⁵ Ebeibeyaif didif duis gu bua, onnga dudou okora rot, jeskaseda iwa nomnaga iroru mar onnga Allah anggot rot sis fob ojgomu. Mar insa kef bera enerek efeinah guru, jeska mimif mingg rot mar insa kef sis fob.

⁶ Noba erek mimif mudou okora rot Allah, beda koma erek mimif muroru mar onnga Ofa anggot rot fob. Noba mar onnga Ofa anggot rot insa koma bera oida mudou omokorema. Noba iwa ig gij mona onnga

sismeni fob rot oida Ofa obk mimif jeskaseda mudou omokorema.

⁷ Rusnok rufoukou onnga rucuwei mar bera ruroгна noba rirebserma rejrej mebif nomnaga fob. Rua ragot oida Yesus Kristus enen gu mebif jera efen efaga rot tenten guru. Rusnok onnga ragot mar erek insa koma bera erek osnok egens koma onnga ofoka Anti-Kristus. Jeska rua rucuwei mar noba riretei rot Yesus Kristus erek osnok egens koma.

⁸ Iwa isisi joug idou efesi rot ahais jeskaseda inororu mar onnga rua ruftu guru. Iwa ita mar erek koma jeskaseda yeyin ifons onnga Allah ensejah gu mebaga bera eneseiseifa jeska iwa jinaga guru. Jeska iwa imfarur rot ahais nou yeyin ifons insa koma fob.

⁹ Noba erek osnok egens onnga oftuftu mar ekirsa jeska mar onnga Yesus oftuftu rot, beda ofa koma bera onororu Allah rot tenten enesi. Tina osnok egens onnga ororu jeni mar onnga Yesus oftuftu rot, beda ofa koma bera ororu Allah jera efen efesa rot tenten fob.

¹⁰ Beda erek osnok egens en skoita iwa, tina ofa onororu mar onnga didif dimfesij rot ainsa kef guru, beda iwa inoroun ofa gij yeyin mod era inoisu ofa tein guru.

¹¹ Jeska idu onnga oroun osnok egens insa koma gij efen mod, beda ofa efen odou erek egens morototuma jera osnok egens insa koma onnga odou ofogog fob.

¹² Didif dudou os dugu rot mar ofoukou deika skoita iwa, tina didif dunogu rot mar koma ebeibeyaif guru. Jeska didif dusujohu rot oida dimen skoita iwa fogora dimagot rot mar insa koma teisis gu iwa ojgomu si.

Didif dudou os erek koma jeskaseda mudou erirei rot
erek morototuma.

¹³ Bebin obkosa onnga Allah oncunc fob efen efeser
ruisu iwa nomnaga tein. Ainsoma.

3 Yohanes

1 ¹ Didif Yohanes, onnga direk ebirfaga Mod Ari egens, bera dunogu surat egens kef skoita bua Gayus onnga dedin edohuj onnga dudou okora rot.

² Didif dum diteij gu Allah nou bua ojgomuja jeskaseda bua bita biteij ah onnga eskeiramera noba ebera rot mar onnga ongoska ojgomu. Didif dijginaga fob rot oida budou efesi bera erek eskeira ojgomu.

³ Noba didif dudou erirei eteb rot mar onnga didif dingg jeska obohujir onnga rin jah sif fob. Jeska rua riflesij gu didif rot teinefa bua bita mar onnga erek tenten ojgomu. Noba rua tein riflesij rot oida bua buroru Allah oga rot tenten ros.

⁴ Gij mona onnga didif dingg oida dedin edohujir ruroru Allah oga rot tenten ojgomuja, beda mar koma ereita dudou efesi erirei eteb rot tein. Dudou erirei erek koma jeska rua bera erek dedin edeser.

⁵ Edohuj onnga dudou okora rot, bua bera buroru Allah oga rot tenten fob, jeska bua bumfij rusnok enjgineg onnga rin skoita bua fob. Erek bua binejginaga rot rua enesi, tina jeska rua erek Kristen tein, beda bua bumfij rua fob. Koma bera erek mar onnga ongoska eteb.

⁶ Ebeibeyaif rua riflesij gu mimif gij Mod Ari jah sif rot teinefa bua bucunc budou onnga okora rot rua. Noba onnga oufamofa ekirsa bera, bua bubk rua jah monuh enjgineg tein rot ongoska ojgomu erek Allah ondou os rot.

⁷ Rua insa koma rincira jah monuh enjgineg jeskaseda ruftuflu mar rot Yesus oga gu rusnok jah suma. Noba rua runohca fifi era mareibra jeska rusnok onnga runororu Yesus enesi guru, tina rua ruisum gij Yesus efen rusnok rot mar koma ojgomu.

⁸ Jefeda erek mimif mufij rusnok onnga rimfarur rot Yesus oga erek koma, beda koma bera erek mar onnga oufamofa eteb ojgomu. Mimif mita mar erek koma jeskaseda mimif nomnaga tein mimfarur morototuma erek egens rot Yesus oga onnga tenten.

⁹ Didif disa surat egens onnga estir kef skoita Mod Ari onnga Diotrefes efen tein jeskaseda rua rufij rusnok onnga rumftuflu rot Allah oga. Tina Diotrefes bera ohca rot efen ofoka onnga aksa ojgomu, jefeda ofa onofij memef rot mar insa koma guri.

¹⁰ Ofa ocuwei mar rourou gij memef gu rusnok enjgineg. Noba mar onnga oska ekirsa bera, ofa onofij mifmin rusnok insa koma onnga rujoftuflu rot Yesus oga guri. Beda ofa tein eyahehir joug rua onnga rudou os ruftuflu rot Yesus oga noba ekemeji rua jeska Mod Ari jah suma. Jefeda erek didif dija jah suma, beda didif dumocunc mar insa koma onnga ofa ontunggom rot tomnomna gu rusnok nomnaga jah suma tein si.

¹¹ Erek koma jefeda, edohuj onnga dudou okora rot, bua bunororu mar onnga oska guru, tina buroru mar onnga onkoska ojgomuja. Budou ah keingg rot kef oida, rusnok onnga rutunggom mar onnga onkoskamoka bera ruocunc rot oida rudou ejginaga rot Allah fob. Noba rusnok onnga rutunggom mar onnga oska bera ruocunc rot oida rudou rinejginaga rot Allah enesi.

¹² Rusnok rufoukou bera ragot mar rot Demetrius fob oida ofa bera erek osnok egens onnga oufamofa eteb. Noba Ofa ororu jeni mar onnga Allah anggot rot ojgomu fob. Noba memef tein magot rot oida ofa bera osnok egens onnga ongnoska ojgomu. Noba iwa ijginaga rot oida monocuwei mar rot tein guru.

¹³ Mar ofoukou onnga didif dudou os dugu gij surat egens kef skoita iwa deika, tina didif dunogu rot mar insa koma ebeibeyaif guru.

¹⁴ Jeska didif dusujohu oida dimen skoita iwa fogora dimagot rot mar insa koma teisis gu iwa si. (1-15) Didif dum diteij gu Allah jeskasada Ofa eita oufamofa eteb gu iwa nomnaga. Mifmin muhujir jah sif ruisu iwa tein. Noba didif duisu orofosutut osnok egens egens onnga ringker jera iwa jah suma tein. Ainsoma.

Yudas

1 ¹ Didif Yudas bera onnga dunogu surat egens kef. Didif bera erek osnok egens onnga ofij Yesus Kristus ojgomuja. Noba didif tein bera Yakobus efen mokosa. Didif dunogu surat egens kef skoita iwa onnga Allah enjeka erek efen rusnok fob. Noba iwa bera onnga mifmin mika Allah odou okora eteb rot. Noba iwa yut rot ahais oisouska Yesus Kristus efen owesa efek.

² Didif dum diteij gu Allah jeskaseda Ofa ocunc efen odou onnga eskeiramera eteb gu iwa ni, jera eita eiteij ah onnga eskeiramera gu iwa ni, jera ocunc efen odou onnga okora eteb rot iwa odudu deika ni erek koma.

³ Edohuji onnga dudou okora rot, sis fob bera didif dinsejah gij dudou efesi jeskaseda dugu surat egens skoita iwa osok gij rot teinefa Allah onskotu mimif jeska mifmin mar onnga oska fob, tina didif dineita erek koma guru. Jeska ebeibeyaif, onnga ofoufem ekirsa bera, didif dugu surat egens kef skoita iwa sismeni fog jeskaseda disisi joug iwa rot mar egens onnga ofoufem eteb ojgomu. Koma bera, didif dudou os duis gu iwa jeskaseda iwa yut joug idou efesi rot ahais ojgomu. Jeska rusnok onnga rudou os riferwei Allah efen oga onnga tenten bera rumorogna keingg iwa is. Jeska Allah eita efen oga insa koma rot ongkasmos juens mes gu rusnok nomnaga fob. Noba enadaij nou rusnok enjgineg rireni jeskaseda riferwei efen oga insa koma jinaga guru.

⁴Jeska rusnok rineya onnga runougif gu Allah rot tenten guru bera ruiru wuswus jah gu iwa ifekesa fob ojomu. Noba rua ruftuftu gu rusnok rot oida adaij nou mimif onnga erek Kristen mita mar meidu onnga mudou eftirir keingg rot ojomu, jeska Allah onofra okum keingg mimif rot mar koma guru. Beda rua tein rikikif jeska Yesus Kristus noba rukoja Ofa onnga erek mifmin Tuhan noba onnga erek mifmin ebirfaga egens onnga mimif mufij. Sis fob bera rusnok runggu gij Mar Efeyi Ebsi osok gij mar okum onnga Allah omofra keingg rua insa koma rot mar onnga rua runtunggom ebeibeyaif si.

⁵Noba mar onnga ai juens dimagot rot gu iwa bera idou ejginaga rot fob. Tina didif dudou os disisi keingg iwa rot juens deika. Koma bera erek kef: Gij mona onnga sis eteb fob Allah onsuwa efen rusnok Israel onnga Ofa oncunc fob jeska monuh Mesir. Tina gij mona kahma deika beda Ofa ofra mar okum keingg rua onnga rudou eneredi Ofa rot tenten guru, fogora rua ragos ojomu.

⁶Noba iwa tein idou ah keingg rot malaikat-malaikat onnga ringker gu mebaga sis fob. Rineya jeska rua bera rikikif jeska owesa efek onnga Allah eita gu rua jeskaseda rufij Ofa rot. Beda rua rija jeska rerin monuh onnga Allah ocunc nou rua fob. Jefeda Allah aha rua gij monuh motkobah egens onnga rua runorogna jeska jinaga guru. Ebeibeyaif rua riker jah suma ojomuja onjoros mona onnga Ofa ofra mar okum eteb keingg rusnok nomnaga onnga rerin mar onnga oska ros.

⁷Noba iwa tein isujohu rot rusnok onnga ringker gij kota Sodom jera kota Gomora jera kota-kota enjineg tein onnga angh rejrej kota insa koma

sis fob. Rusnok gij kota-kota insa koma tein bera rutunggom mar onnga ofogog. Jeska rua rutunggom mar meidu onnga rudou eftirir keingg rot rifaga tein ojgomuja. Noba rua rudou eftirir keingg jeskaseda risiri jera rujager ebireira ojgomuja. Noba runer tein ruckahtah mekeinggma jeskaseda risiri morototuma. Jefeda Allah omfra mar okum eteb keingg rua erek mah onnga et kota-kota insa koma rot rua nomnaga fogora riribseb ojgomu fob. Jefeda koma bera erek orocunc nou rusnok nomnaga rot oida gij mona kahma beda Allah emeij rusnok onnga rutunggom mar erek insa koma nomnaga gij mahmei meren onnga eisa egigir tumu rufos rot ah aibin ojgomuja.

⁸Erek koma tein, Guru-Guru onnga ebireira insa koma bera erek rusnok onnga risih mar erek ebireira ojgomu fogora rutoiru gij rerin mar onnga oska efekeifa onnga rua rutunggom rot rifaga ojgomuja. Noba rua tein rukoja Allah efen owesa efek ojgomuja. Noba rua tein ruga oruh rot mar onnga angh gu mebaga rot eskeiramera eteb.

⁹Erek koma tein gij mona onnga malaikat Mikhael, onnga erek ebirfaga malaikat-malaikat nomnaga, oga osokuma jera Bilis rot Musa efen efaga, beda malaikat Mikhael insa koma enetaha joug Bilis rot guru. Tina ofa agot gu Bilis oida, "Tuhan bera onnga emetaha joug bua rot si."

¹⁰Erek koma tein, Guru-Guru insa koma ruga oruh mar nomnaga onnga risinsa rudou enebriyi gij jinaga guru. Rua bera erek mar onnga angh gu merenrah, jeska rua runosujohu rot mar onnga rua runtunggom onnga erek ebireira jinaga guru. Jefeda mar insa koma bera omorohoda rot risinsa ojgomu.

¹¹ Ayo, mar okum eteb emah keingg rua rot si! Jeska rua ruroru mar ebireira onnga rudou eftirir keingg rot ojomu. Koma erek Adam efen efesa Kain otunggom sis fob. Jeska ofa agob efen mokosa jeskaseda eita mar onnga ofa odou os rot ojomu. Noba Guru-Guru insa koma tein rusoka ebeirens gij mar onnga oska jeskaseda risma fifi ofoukou erek nabi Bileam ontunggom sis fob. Noba jeska rua rikirsa rot mar onnga Allah anggot rot, jefeda Allah oga ojga rot oida rua rimagos rot si. Koma erek Korah otunggom sis fob fogora agos rot tein.

¹² Noba gij mona onnga iwa int maat morototuma onnga irocunc rot oida idou omokorema, beda Guru-Guru ebireira insa koma rit mat morototuma jera iwa rot rerin rudou onnga erek rourou ojomu. Noba mojen en rua rot mar onnga rua runtunggom gij mona insa koma jinaga guru. Noba rua rutunggom mar onnga oska ofoukou dokun deika gij mona insa koma tein. Rua bera erek mar onnga ahtaboku onnga eyet meisoufa onnga ebsi komowa ojomu. Noba rua tein runofij Allah efen rusnok jinaga guru. Jefeda rua bera erek gembala egens onnga onot joug efen domba guru, tina ot joug esinsa ojomu. Noba rua bera rirek mocgoj ofog ahta onnga mof orkorka ojomuja. Rusnok rik mocgoj insa koma beda rusujohu rot oida ai juens nou mos ens, tina mos enes jeska jinaga guru. Erek koma tein rusnok rik oida rua bera erek Guru-Guru agama. Jefeda rua rusujohu rot oida Guru-Guru insa koma rumoftuftu rot mar onnga tenten. Tina rua runoftuftu rusnok rot mar onnga tenten egema tein guri. Rua tein bera erek mega egens onnga efen mona onnga emfebi, tina okora jeska mebi fob. Jefeda efen efek egema

tein guru. Erek koma tein, mimif minek Guru-Guru insa koma rutunggom mar egema tein nou rusnok enjgineg onnga erek ongnoska jinaga guru. Rua bera erek rusnok onnga ranggos fob jefeda rineita mar onnga oufamofa deika guru.

¹³ Noba erek mei mojemu ofog eteb onnga ot noba esma ojomuja, beda erek koma tein enadaij nou rua ruin keingg risinsa rot rerin mar onnga oska jinaga guru. Noba erek mei mojemu ofog insa koma efen efeireira ahtahta onnga angh suma suma gij mebsta ojomu, erek koma tein mar onnga rua ruftu bera erek mar onnga oska efekeifa onnga rija suma suma ojomuja. Noba rua bera erek motur onnga ecira ebeirens jah mebaga, jeska rua ruftu rot mar onnga ebireira ojomu. Jefeda Allah bera ensejah nou eij rua gij monuh onnga motkobah eteb fogora riker jah suma rot mona onnga ah aibin ojomuja.

¹⁴ Henokh bera erek ebic cinja erfens onnga onjuj jeska Adam. Noba sis eteb bera fob ofa emfesij rot mar onnga emecira gij mona kahma erek kef oida, "Gij mona kahma bera Tuhan emen rot efen malaikat-malaikat onnga ebsi komowa noba onnga erek rufoukou eteb doska.

¹⁵ Noba Ofa en jeskaseda oga ojga rot mar nomnaga onnga rusnok runtunggom onnga erek oufa jera oska. Beda Ofa omofra mar okum eteb keingg rusnok nomnaga onnga runougif gu Ofa guru, rot rerin mar onnga oska. Noba Allah omofra okum eteb keingg rua rot mar onnga oska eteb onnga rua ranggot rot efen ofoka tein si."

¹⁶ Guru-Guru insa koma bera ruga erahah rot mar ojomuja. Noba rua tein rucunc rusnok enjgineg oida rua bera onnga erek oska, noba risinsa bera guru.

Noba rua ruroru mar onnga ofogog onnga rudou eftirir keingg rot ojgomuja. Noba rua risitit risinsa rufoka rot mar ojgomu. Noba rua tein rira ruga efei ruroku rusnok rudou efesi jeskaseda rita mar onnga rua risinsa rudou os rot ojgomu.

¹⁷ Edohuji onnga dudou okora rot, mimif mijjinaga rot Guru-Guru onnga ebireira insa koma rerin rita mar fob, jeska sis fob Yesus Kristus efen rasul-rasul bera rumftuftu rot oida, "Gij mona onnga enja ejgwaga ensaga doida fob, beda rusnok onnga rudou oska rot iwa noba onnga ruga oruh iwa bera rimen si. Rua bera erek rusnok onnga runougif gu Allah guru, tina rua ruroru mar meidu meidu onnga rudou eftirir keingg ojgomu." Erek koma noba ebeibeyaif rusnok onnga rita mar erek koma bera rinjeker jah gu iwa ifekesa fob.

¹⁸ (1:17)

¹⁹ Rusnok onnga erek insa koma bera ruftuftu rot mar onnga oska fogora rusnok nomnaga rimekebema rot rudou onnga oska moguma. Noba Efena Ebsi Allah bera eneker gjj rudou efesi tein guru. Jefeda rua ruroru mar meidu meidu onnga angh gjj rudou efesi ojgomuja.

²⁰ Tina edohuji, didif duis gu iwa jeskaseda iwa imofijma fogora yut rot ahais gjj Allah efen oga onnga iwa iroru rot tenten fob, noba onnga erek ebsi komowa ojgomu. Beda iwa tein yum iteij oisouska owesa efek jeska Efena Ebsi Allah.

²¹ Noba iwa iker gjj yeyin iteij ah kef rot ongoska oisouska Allah odou onnga okora rot iwa ojgomu. Iwa ita mar erek koma askesi iwa yug moroju nou mona onnga mifmin Tuhan Yesus Kristus ongksons en. Ofa

emen jeskaseda eita eiteij ah onggah ah aibin gu iwa oisouska efen odou onggah eskeiramera rot iwa.

²² Beda iwa tein ineita idou onggah okumkum rot rusnok onggah rijekjeka rudou efesi rot Allah oga ros guru, tina icunc idou onggah oufamofa skoita rua ojomu.

²³ Noba iwa iroun rua skoita Yesus Kristus jeskaseda yuskotu rua jeska mahmei meren. Noba iwa tein inocunc idou onggah okumkum skoita rusnok enjineg onggah rururu mar onggah oska eteb ros guru. Tina iwa ibes ifaga jeska mar onggah oska insa koma onggah rua rururu ojomu jeskaseda iwa tein inesiri gij rerin mar onggah oska efekeifa insa koma guru. Jeska koma bera erek mar ahtaboku onggah oskotu meisoufa onggah ebsi komowa fogora orotunggom meisoufa insa koma nomnaga erek oska fob.

²⁴ Didif duis oufamofa eteb gu Allah, jeska Ofa bera onggah ont joug iwa jeskaseda inesiri gij mar onggah oska guru. Noba Ofa bera onggah omoroun iwa nomnaga jah efen monuh onggah ongnoska eteb gu mebaga. Jah suma bera rusnok runocunc iwa erek rusnok onggah rerin mar onggah oska egema tein deika guru. Noba jah suma bera idou efaga ouka eteb ojomuja.

²⁵ Mimif mudou os jeskaseda mifmin Allah, onggah onskotu mimif jeska mifmin mar onggah oska oisouska mifmin Tuhan Yesus Kristus fob, esma ofoka onggah aksa eteb ni, noba onggah ongnoska eteb ni, noba esma owesa efek eteb ekirsa jeska mar nomnaga ni, noba ofoka ereij keingg rusnok nomnaga tein ojomuja. Ofa bera onggah ofoka ereij keingg mar nomnaga gij mona onggah sis dojunmeni fob, jera

deisef tein, noba gij mona onnga ah aibin tein
ojgomuja. Ainsoma.

Wahyu

1 ¹ Sis fob bera Allah ocunc gu Yesus Kristus osok gij mar onnga omorogna keingg Ofa gij mona onnga enja ejgwaga ensaga fob. Ofa otunggom mar erek koma jeskaseda Yesus tein omocunc rot mar insa koma gu efen rusnok onnga rumfij Ofa. Beda rua tein rudou emebriyi gij mar insa koma onnga omorogna en si. Noba Yesus oncunc rot mar insa koma oisouska malaikat egens onnga Ofa obk skoita didif Yohanes onnga dumfij Ofa tein.

² Beda didif dugu keingg mar nomnaga onnga didif dik gu diteij noba dig gu dusuw tein gij surat egens kef. Koma bera, didif dugu keingg osok gij mar onnga Allah anggot rot jera mar onnga Yesus ontunggom nou rusnok sis fob.

³ Jefeda oufamofa eteb bera ah gu rusnok onnga rik rot mar onnga Yesus oncunc gu didif fogora dunggu gij surat kef osok gij mar onnga omorogna gij mona kahma si. Noba oufamofa eteb ah gu rusnok onnga ringg rot mar insa koma fogora ruroru rot tenten ojgomuja. Jeska mona onnga mar insa koma omorogna keingg rusnok bera ensaga doida fob.

⁴ Surat kef bera jeska didif Yohanes skoita iwa onnga iroru Yesus Kristus gij kota cinja erfeka onnga angh gij monuh Asia. Noba didif dum diteij gu Allah jeskaseda Ofa eita yeyin iteij ah onnga ongkoskamoka jera eskeiramera gu iwa ojgomuja. Ofa bera onnga enofogu gij mona onnga sismeni fob. Noba Ofa tein bera onnga enofogu ojgomuja ebeibeyaif tein. Noba Ofa tein bera onnga emen si.

Noba mar onggga didif dunggu gij surat kef en jeska efena cinja erfeka onggga ringker rejrej kursi eteb onggga Allah engker gij jeskaseda ofoka ereij keingg mar nomnaga.

⁵ Noba oga kef tein en jeska Yesus Kristus onggga emfesij rot mar onggga tenten ojomu. Ofa bera onggga endebecki jeska agos rot sismeni erek osumbohka rot rusnok nomnaga onggga rimedebecki jeska ranggos si. Ofa tein bera onggga ofoka ereij keingg ebirfager mebif nomnaga. Ofa odou okora rot mimif. Noba oisouska efen ogufu onggga eya jeska efen efaga tumu mega salib bera Ofa onsuwa mimif jeska mifmin mar onggga oska fob.

⁶ Ofa ontunggom mimif erek Allah efen rusnok onggga Ofa ofoka ereij keingg. Jefeda mimif minja erek efen imamir onggga rumfij Ofa efen meka Allah ojomuja. Mimif mudou os jeskaseda Ofa esma ofoka onggga aksa eteb jera esma owesa efek onggga ekirsa jeska nomnaga rot ah aibin ojomuja. Ainsoma.

⁷ Iwa ik ojomu, jeska Ofa emen orogna gij mocgoj ofog. Beda rusnok nomnaga rimek Ofa si. Noba rusnok onggga runduis Ofa efen efaga sis fob tein bera rimek Ofa gij mona insa koma si. Beda rusnok ebic nomnaga bera ruga rifeda risinsa rudou efesi rot gij mona onggga rimek Ofa. Mimif mudou os erek koma ojomu. Ainsoma.

⁸ Tuhan Allah agot oida, "Didif bera Alfa jera Omega. Didif direk onggga sismeni, noba erek onggga omoisa rot mar nomnaga tein. Didif bera onggga dingker gij mona onggga sismeni fob, noba Didif dineker ojomuja ebeibeyaif tein, noba Didif dimen si. Noba Didif bera onggga dedin owesa efek onggga aksa ekirsa jeska nomnaga."

⁹ Didif Yohanes bera erek yeyin ihuj egens onnga dita difera okora morototuma jera iwa, jeska mimif muroru Yesus Kristus rot tenten ojgomuja fob. Mimif nomnaga bera morototuma erek Allah efen rusnok. Noba oisouska Yesus Kristus efen owesa efek bera mimif muin keingg mudou efesi askesi mar okum ah keingg mimif ojgomuja. Sis fob rusnok ragei didif fogora rikris didif jah motowohu onnga ofoka Patmos. Rua rutunggom mar insa koma jeska didif difesij rot Allah efen oga jera rot mar onnga Yesus Kristus ontunggom nou rusnok sis fob.

¹⁰ Gij mona onnga Ari eteb bera didif disma owesa efek jeska Efena Ebsi Allah fogora didif dig oga egens jah ejmeg onnga ogugur eteb erek rusnok onnga rin manghi mei.

¹¹ Erek koma beda, oga egens insa koma agot gu didif oida, "Mar onnga ai juens bua bimeg rot bera bugu keingg gij surat egens ojgomu. Beda bua bisa surat koma skoita rusnok onnga ruroru Yesus Kristus gij kota cinja erfeka onnga angh gij monuh Asia. Kota insa koma bera efen ofoka Efesus ni, Smirna ni, Pergamus ni, Tiatira ni, Sardis ni, Filadelfia ni, Laodikia ni."

¹² Erek koma beda didif dikikif jeskasada dik rot oida idu bera enagot mar insa koma gu didif. Tina didif dik lampu emas cinja erfeka onnga angh esij mowuj mosu cinja erfeka.

¹³ Noba didif dik mar erek osnok egens onnga ont gu lampu-lampu cinja erfeka insa koma efekesa. Noba Ofa ergi meifeti onnga aksa noba ojuj jah okoda. Noba Ofa era meifeti onnga erek emas erakid okom ofoj tein.

¹⁴ Ofa efen ebirfaga efeji bera erek ebsi komowa, noba efen eiteij bera eisa egigir eteb erek mah eisa.

¹⁵ Noba Ofa efen okoda bera eirirbi eteb doska erek kermom onggga rukub gij mah fogora efeskrenmeni. Noba efen oga bera ogugur eteb erek mei onggga onsoka gij ofoska.

¹⁶ Noba Ofa agei motur cinja erfeka tumu etma jah ognosk. Noba meiteb kalawan onggga efeya jah enama tein enama tein bera orogna jeska awesi. Noba efen osum efesa eteb doska noba eisa egigir erek mowa.

¹⁷ Nou onggga didif dik rot mar insa koma nomnaga fob, beda didif disiri gu Ofa odou ojpgomu, erek osnok egens onggga agos fogora esiri jah gu mebi ojpgomu. Beda Ofa aha efen etma ognosk esij didif noba agot oida, "Bua binemeesa rot guru. Jeska Didif bera onggga erek sismeni noba erek onggga omoisa rot mar nomnaga tein.

¹⁸ Didif bera onggga dita eiteij ah onggga efeinah gu rusnok. Jeska sis fob Didif danggos. Tina Didif difena ebah sons fob. Jefeda Didif difena ebah rot mona onggga ah aibin ojpgomuja. Didif bera dedin owesa efek nou danggot rot idu onggga rija gu mahmei meren jera idu onggga risma eiteij ah onggga efeinah. Noba Didif bera dufoka ereij keingg monuh onggga mar agos ringker gij tein.

¹⁹ Erek koma jefeda bua bugu keingg mar onggga bua bingk ainsa kef jera mar onggga Didif dumocunc gu bua rot mar onggga emen gij mona kahma tein ojpgomu.

²⁰ Noba ebeibeyaif Didif dimagot rot motur cinja erfeka insa koma onggga bua bik tumu ditma, jera lampu emas cinja erfeka insa koma efen ofou tein.

Jeska mar koma efen ofou onggah ah jejema jeska rusnok ros. Motur insa koma bera erek orocunc rot malaikat-malaikat cinja erfeka onggah Allah ombk jeskaseda ot joug Mod Ari ebic cinja erfeka insa koma. Noba lampu emas cinja erfeka insa koma bera orocunc rot Mod Ari ebic cinja erfeka insa koma."

2¹ Erek koma beda Ofa insa koma agot gu didif Yohanes deika oida, "Mar onggah ai juens dimagot gu bua bera bugu keingg rot skoita malaikat egens onggah ont joug rusnok Mod Ari gij kota Efesus erek kef oida, Oga kef bera en jeska Ofa onggah agei motur cinja erfeka tumu etmah jah ognosk, noba onggah encira jah gu lampu emas cinja erfeka onggah angh esij mowuj mosu cinja erfeka efekesa. Ofa bera agot erek kef oida,

² Didif dijginaga rot iwa onggah Kristen gij kota Efesus yeyin ita mar nomnaga fob. Noba Didif dijginaga rot oida iwa imfarur rot ahais noba oida iwa ita idou onggah ahais gij mona onggah mar okum ereneni iwa tein ojgomuja. Didif dijginaga rot oida idou eneskes rot rusnok onggah rutunggom mar onggah oska jah gu ifekesa tein guru. Noba iwa tein inoruru rua onggah ragot rot ruga efei oida rua bera erek rasul onggah tenten rot ebeirens guru. Tina iwa ijeka joug rua rot sismeni fog. Beda iwa incunc rua erek rasul onggah ebireira ojgomu fob.

³ Noba iwa bera onggah ita idou onggah ahais askesi mar okum ah keingg iwa ojgomuja jeskaseda iroru dedin duga. Iwa tein ineita idou onggah eskes rot mar insa koma guru.

⁴ Erek koma tina Didif dudou okum rot iwa osok gij mar ofoka egens erek kef. Gij mona onggah iwa inoruru Didif erek efeinah ros, bera idou okora eteb rot Didif

erek eteb. Tina gij mona onggga ebeibeyaif bera idou onggga okora rot Didif insa koma bera ensiri fob.

⁵ Didif duis gu iwa jeskaseda iwa idou ah keingg rot mona onggga idou okora rot Didif erek eteb sis fob deika sons ojomu. Beda iwa imek rot teinefa yeyin idou onggga eskes rot Didif gij mona ebeibeyaif fob. Iwa imeesa joug rot yeyin mar onggga oska fogora ita idou onggga okora rot Didif erek sis fob deika sons ojomu. Tina erek iwa inemeesa joug yeyin mar onggga oska insa koma guru, beda Didif dimen noba dukweisi lampu onggga ont gu iwa ifekesa.

⁶ Erek koma tina iwa itunggom mar egens onggga ereita dudou eskeira rot iwa ros. Koma bera, iwa idou oska rot mar ofogog onggga Nikolaus otunggom ojomuja. Jeska Didif tein dudou oska rot mar ofogog onggga ofa otunggom insa koma ojomuja.

⁷ Erek iwa idou os isma idou onggga ebriyi gij mar insa koma, beda iwa ig rot mar onggga Efena Ebsi agot gu rusnok Mod Ari insa koma rot iskusk ojomu. Jeska erek iwa inesiri gu Bilis guru, beda Didif dumoroun iwa fogora iwa imet dedin mega efek onggga eita eiteij ah si. Mega eiteij ah insa koma bera ont gu monuh onggkoska onggga Allah engker gij."

⁸ Erek koma beda Ofa agot gu didif Yohanes deika oida, "Mar onggga ai juens dimagot gu bua bera bugu keingg rot skoita malaikat egens onggga ont joug rusnok Mod Ari gij kota Smirna erek kef oida, Oga kef bera en jeska Ofa onggga erek sismeni jera onggga erek omoisa rot mar nomnaga. Ofa bera onggga anggos, beda endebecki jeska agos fob.

⁹ Ofa agot erek kef oida, Didif dijginaga rot oida mar okum ah keingg iwa onggga Kristen gij kota Smirna fob. Noba Didif dijginaga oida iwa irek ifojingki tein.

Tina ahah Allah eiteij bera iwa yeyin ifoka aksa erek runa mei ahta, jeska iwa iroru Yesus Kristus ojomuja. Didif dijginaga rot rusnok Yahudi onnga ranggot rourou oida rua ruroru Allah rot tenten, tina guru. Jeska rua ruga oruh iwa ojomuja. Rua bera onnga rugif gu Bilis ojomu.

¹⁰ Iwa inemeesa rot mar okum onnga emah keingg iwa gij mona onnga emen guru. Jeska gij mona onnga emen bera Bilis emerenei iwa rot ahais fogora rusnok rimekris rineya jeska iwa jah mod oskusk. Beda iwa imeita ifera okora gij mona rara setka. Noba erek rua risejah rudou ofogog jeskaseda ragob iwa, beda iwa inesiri gu rua guru, tina iroru Didif rot ahais ojomu. Beda Didif dimeita yeyin ifons onnga erek eiteij ah onnga efeinah noba onnga ah aibin ojomuja gu iwa si.

¹¹ Erek iwa idou os isma idou onnga ebriyi gij mar insa koma, beda iwa ig mar onnga Efena Ebsi agot gu iwa onnga rusnok Mod Ari rot iskusk ojomu. Jeska rusnok onnga rinesiri gu Bilis guru, rua bera rinagos gij mona onnga rusnok ragos rot ofosma jueka guru."

¹² Erek koma beda Ofa agot gu didif Yohanes deika oida, "Mar onnga ai juens dimagot gu bua bera bugu keingg rot skoita malaikat egens onnga ont joug rusnok Mod Ari gij kota Pergamus. Bua bugu keingg mar erek kef oida, Oga kef bera jeska Ofa onnga agei meiteb kalawan onnga efeya jah enama enama tein tumu etma.

¹³ Ofa agot erek kef oida, Didif dijginaga rot iwa Kristen onnga ingker gij kota Pergamus. Didif dijginaga rot oida yeyin monuh onnga iwa ingker gij bera Bilis ofoka ereij keingg rusnok rufoukou jah suma. Tina iwa iroru dedin dufoka rot tenten ros.

Jeska gij mona onggga Antipas oftufu osok gij dedin dufoka rot tenten jah suma, beda rusnok onggga Bilis ofoka ereij keingg gij yeyin monuh insa koma bera ragob ofa rot. Ere koma tina iwa bera inekikif jeska Didif gij mona insa koma jinaga guru.

¹⁴Ere koma tina mar egema onggga iwa intunggom bera ereita dudou okumkum rot iwa ojgomu. Rusnok rineya jeska iwa bera ruroru mar onggga oska onggga Bileam oftufu rot sis fob. Jeska Bileam bera onggga oftufu mar gu Balak jeskaseda ofa oroku Israel rerin rimower rudou efesi fogora rua tein rutunggom mar onggga oska. Mar onggga oska insa koma bera ere koma rit marska onggga rusnok enjgineg rira jeskaseda rirejiteyi skoita mar onggga tenten guru, jera risiri morototuma ere ebireira tein.

¹⁵Noba ere koma tein rineya jeska iwa bera iroru mar onggga oska onggga rusnok onggga ruroru Nikolaus ruftufu rot.

¹⁶Jefeda Didif dui gu rineya insa koma jeskaseda rimeesa joug rot rerin mar onggga oska insa koma ojgomu. Tina guru, beda Didif dimen rot ebeirens skoita rua. Beda Didif dimera meiteb kalawan onggga orogna jeska dawesi fogora dagob rua si.

¹⁷Ere iwa idou os isma idou onggga ebriyi gij mar insa koma, beda iwa ig rot mar onggga Efena Ebsi agot gu iwa onggga rusnok Mod Ari rot iskusk ojgomu. Ere iwa inesiri gu Bilis guru, beda Didif dimeita maat egens onggga ofoka manna gu iwa. Manna insa koma bera ah jejema gij mebaga ros. Noba Didif dimeita mamu ebsi onggga dunggu keingg yeyin ifoka onggga efeinah tumu gu iwa si. Noba yeyin ifoka insa koma bera ah jejema jeska rusnok enjgineg. Iwa isinsiyai

egens egens ijginaga rot yeyin ifoka onggga efeinah insa koma ojgomu."

¹⁸ Erek koma beda Ofa agot gu Didif Yohanes deika oida, "Mar onggga ai juens dimagot gu bua bera bugu keingg rot skoita malaikat egens onggga ont joug rusnok Mod Ari gij kota Tiatira erek kef oida, Oga kef bera en jeska Allah efen Efesa. Noba efen eiteij efej bera erek mah eisa egigir eteb, noba efen okoda bera eirirbi eteb doska erek kermom onggga rukub gij mah fogora efeskrenmeni.

¹⁹ Ofa agot erek kef oida, Didif dijginaga rot oida iwa onggga Kristen gij kota Tiatira bera intunggom mar ofoukou onggga erek oufamofa ojgomu. Didif dijginaga rot oida idou okora rot Allah ni, idou ororu efen oga ojgomuja ni, iwa yufij Ofa rot iskusk ojgomu ni, iwa yut rot ahais gij mar okum onggga ereneni iwa ni, noba ebeibeyaif bera iwa itunggom mar onggga erek oufamofa ekirsa jeska mar onggga sis fob tein ni.

²⁰ Erek koma tina mar egema onggga iwa intunggom bera ereita dudou okum rot iwa ojgomu. Jeska iwa irons rot ojaga egens onggga ofoka Izebel fogora ofa oftufu mar onggga erek tenten guru jah gu ifekesa ojgomuja. Ofa ocunc esinsa erek Allah efen nabi ojaga egens, tina guru. Jeska oisouska mar onggga ofa oftufu bera ofa orokrusa dedin rusnok onggga rumfij Didif fogora rua risiri morototuma, noba rua tein rit marska onggga rusnok rira nou rirejiteyi skoita mar onggga erek tenten guru.

²¹ Didif duh mona gu ojaga insa koma jeskaseda emeesa joug rot efen mar onggga oska insa koma. Tina ofa enemeesa joug rot jinaga guri.

²² Jefeda Didif dumofra mar okum eteb keingg ofa rot si, beda ofa emah rot ofogu okora eteb ojgomuja.

Noba erek rusnok ongg ruomohohuma jera ofa rot efen mar ongg oska insa koma ojpgomuja, noba rua rinekikif jeska mar koma guru, beda Didif dimesa mar okum erek insa koma skoita rua tein si. Beda rua tein rimeita rufogu okora eteb rot si.

²³ Beda Didif dimagob ofa efen rusnok ongg ruroru ofa nomnaga fogora rimagos ojpgomu. Beda rusnok Mod Ari nomnaga rimejginaga rot oida Didif bera ongg diajga joug gij orofosutut rusnok egens egens rudou efesi. Jefeda Didif dumofra mar okum eteb keingg rua ororu jeni rerin rita mar ongg oska. Noba didif dimeita oufamofa eteb gu rusnok ororu jeni rerin rita mar ongg oufamofa si.

²⁴ Noba Didif dijinaga rot iwa ineya ongg ingker gij kota Tiatira ongg inororu mar ongg oska ongg ojaga egens koma oftufu guru. Mar ongg oska koma bera rineya rijeka erek mar ongg en jeska Bilis, tina rindemdemi jeska rusnok ongg runororu ojaga egens insa koma guru. Jeska iwa inororu ojaga egens insa koma rot efen mar ongg oska guru, beda Didif dunofra mar okum keingg iwa guru.

²⁵ Tina iwa yagei dedin dufoka rot ahais ojpgomuja onjoros mona ongg Didif dungksons en fob.

²⁶ Erek koma jeska rusnok ongg rinesiri gu Bilis guru, tina rua ruroru mar ongg dudou ejginaga rot onjoros mona ongg omoisa, beda Didif dimeita owesa efek gu rua jeskaseda rufoka ereij keingg rusnok mebif nomnaga.

²⁷ Runggu gij Mar Efeyi Ebsi erek kef oida, 'Ofa bera ofoka ereij keingg rua rot ahais doska. Ofa omohoda rot mesa gij monuh mebif nomnaga erek osnok egens orobuma debeji fogora ofojeres nomnaga!'

Owesa efek insa koma bera morototuma erek owesa efek onnga Akeina eita gu Didif fob.

²⁸ Beda Didif dimeita mensir efaga onnga eisa egigir nou rahah tentena gu iwa.

²⁹ Erek iwa idou os isma idou onnga ebriyi gij mar insa koma, beda iwa ig rot mar onnga Efena Ebsi agot gu iwa onnga irek rusnok Mod Ari insa koma rot iskusk ojgomu."

3¹ Erek koma beda Ofa agot gu didif Yohanes deika oida, "Mar onnga ai juens dimagot gu bua bera bugu keingg rot skoita malaikat egens onnga ont joug rusnok Mod Ari gij kota Sardis erek kef oida, Oga kef bera en jeska Ofa onnga agei Allah efen efena cinja erfeka jera motur cinja erfeka. Ofa agot mar erek kef oida, Didif dijginaga rot iwa onnga Kristen gij kota Sardis yeyin ita mar. Jeska rineya rifesij rot oida rerin riteij ah onnga efeinah tein fob. Tina rerin rita mar insa koma bera onorocunc rot erek koma guru.

² Jefeda iwa ibs keingg idou efesi rot mar insa koma sons deika ojgomu fog. Jeska erek iwa ineita mar insa koma guru, beda yeyin ita mar onnga oufa oskiyai insa koma tein bera emeseiseifa. Didif dijginaga rot oida yeyin ita mar onnga oufamofa bera enadaj nou ereita Allah odou eskeira rot iwa enesi.

³ Iwa idou ah keingg rot oga onnga oufamofa onnga rusnok rumftuftu gu iwa sis fob noba onnga iwa inroru sis fob tein ojgomu. Iwa imeesa joug rot yeyin mar onnga oska fogora iroru oga onnga oufamofa insa koma deika sons. Tina erek iwa inebs idou efesi rot guru, beda Didif dumorogna keingg iwa morototuma erek osnok egens onnga oukoreka mar orogna keingg rusnok gij rerin mod efesi. Erek koma

jeska iwa inejginaga rot mona kenefa onnga Didif dimen skoita iwa jinaga guru.

⁴Tina rineya gu ifekesa gij kota Sardis koma bera rineita mar onnga orotunggom rudou efesi erek oska guru. Koma bera erek mar onnga ahtaboku eneyet tumu rerin meifeti onnga ebsi komowa guru. Adaij nou rua rimecira morototuma jera Didif rot rerin meifeti onnga ebsi komowa ojgomu.

⁵Jeska rusnok onnga rinesiri gu Bilis guru, tina rutunggom mar onnga oufamofa erek rua insa koma ros, beda rerin rudou efesi emeja erek ebsi komowa erek rusnok risma meifeti onnga erek ebsi komowa. Beda rua rimeja erek egens jera Didif tein. Noba Didif dunosuna rot rerin rufoka jeska buku eiteij ah tein jinaga guru. Noba Didif dimagot rot rerin rufoka skoita Akeina Allah jera efen malaikat-malaikat tein.

⁶Erek iwa idou os isma idou onnga ebriyi gij mar insa koma, beda iwa ig mar onnga Efena Ebsi agot gu iwa onnga irek rusnok Mod Ari rot iskusk ojgomu."

⁷Erek koma beda Ofa agot gu didif Yohanes deika oida, "Mar onnga ai juens dimagot gu bua bera bugu keingg rot skoita malaikat egens onnga ont joug rusnok Mod Ari gij kota Filadelfia erek kef oida, Oga kef bera jeska Ofa onnga ebsi komowa noba onnga tenten tein. Ofa bera onnga agei gusin montouj morototuma erek raja Daud agei gusin montouj sis fob. Jefeda montouj onnga Ofa ohoda bera rusnok enjgineg runof joug sons jinaga guru. Noba montouj onnga Ofa of joug bera rusnok enjgineg runohoda sons jinaga guru.

⁸Ofa agot oida, Didif dijinaga rot iwa Kristen yeyin ita mar fob. Didif dijinaga rot oida yeyin owesa efek bera erek oskiyai ojgomu, tina iwa iroru dedin duga

ojgomuja. Noba iwa inekikif jeska dedin dufoka guru. Jefeda Didif dunghoda montouj egens nou iwa fob. Noba enadaij nou rusnok enjineg ruf joug montouj koma rot iwa jinaga guru.

⁹ Noba rusnok Yahudi rineya onnga ringker jah gu ifekesa bera ragot rourou oida rua ruroru Didif rot tenten fob, tina rua rucuwei mar ojgomu. Jeska rua bera rugif gu Bilis ojgomu. Jefeda Didif diradgodu rua jeskaseda rugif gu iwa fogora ragot rot tenten oida iwa bera erek rusnok onnga Didif dudou okora rot ojgomu.

¹⁰ Noba jeska iwa ita idou ahais askesi mar okum ereneni iwa, erek Didif duftufts iwa rot sis fob, jefeda Didif dumot joug iwa si. Beda gij mona onnga mar okum eteb ah keingg rusnok mebif nomnaga erek mar onnga ereneni rua, beda mar koma enah keingg iwa jinaga guru.

¹¹ Gij mona onnga ai estir deika beda Didif dimen si. Jefeda iwa iroru mar onnga Didif dumftufts gu iwa fob jeskaseda yeyin ifons onnga ongnoska eteb eneseiseifa jeska iwa guru.

¹² Jeska rusnok onnga rinesiri gu Bilis guru, beda Didif dimeita rerin rufoka aksa eteb gij mebaga. Rua bera rimerek mowuj mosu onnga ot rot ahais erek mamu. Rusnok runokoja rua jeska mod Allah insa koma jinaga guru. Beda Didif dumogu keingg Akeina Allah efen ofoka tumu rua. Noba Didif tein dumogu keingg Akeina Allah efen kota ofoka tumu rua tein. Kota koma ofoka Yerusalem onnga efeinah, noba onnga onjuj jeska Akeina Allah gu mebaga. Noba Didif tein dumogu keingg dedin dufoka onnga efeinah tumu rua.

¹³ Erek iwa idou os isma idou onggga ebriyi gij mar insa koma, beda iwa ig mar onggga Efena Ebsi agot gu iwa onggga irek rusnok Mod Ari insa koma rot iskusk ojgomu."

¹⁴ Erek koma beda Ofa agot gu didif Yohanes deika oida, "Mar onggga ai juens dimagot gu bua bera bugu keingg rot skoita malaikat egens onggga ont joug rusnok Mod Ari gij kota Laodikia erek kef oida, Oga kef bera en jeska Ofa onggga anggot oida, Ainsoma! Ofa bera onggga otunggom mar onggga tenten noba onggga anggot rot mar onggga tenten. Noba Ofa bera onggga ofoka ereij keingg mar onggga Allah ontunggom nomnaga sismeni fob.

¹⁵ Ofa agot oida, Didif dijginaga rot iwa onggga Kristen gij kota Laodikia yeyin ita mar. Yo, iwa inokoja Didif guru, tina erek iwa inororu Didif rot ahais tein guri. Koma erek rusnok onggga runt gij mesiga onggga ofon deis ojgomu. Onggga tenten bera iwa ikoja Didif ei, era iroru Didif rot ahais ei.

¹⁶ Noba jeska iwa yunt gij mesiga onggga ofon deis ojgomu, jefeda Didif dumokoja iwa rot dudou onggga oska eteb rot iwa ojgomu.

¹⁷ Iwa yagot rot oida iwa ihoturu yeyin mareibra ofoukou fob, jefeda yeyin mareibra ofoukou insa koma bera adaj nou iwa fob. Erek koma tina ahah Allah eiteij bera iwa irek rusnok onggga rufojingki doska ni, jera rua onggga riteij ofou ni, jera rua onggga erek ricira rot rufos robrob ojgomu. Erek koma jeska yeyin ita mar onggga erek onggkoska tein egema enah jinaga guru.

¹⁸ Erek koma jefeda Didif dimeisisi keingg iwa jeskaseda iwa ita emas onggga rungkub gij mah fogora eirirbi eteb jeskaseda iwa isma ifoka aksa rot

tenten ojgomu. Koma erek iwa imeesa joug rot yeyin mar onnga oska fogora ita idou onnga ororu mar onnga oufamofa ojgomu. Noba iwa ita meifeti onnga ebsi komowa jeskaseda mojen en iwa rot ifos robrob insa koma guru. Koma erek iwa ita idou onnga ebsi komowa ojgomuja. Noba iwa ita ariawun onnga imfin gij itej efej tein jeskaseda ik mar rot koisoisa. Koma erek iwa ita idou onnga ebriyi gij rot dedin duga ojgomu.

¹⁹ Didif bera dagot joug mar noba duftuflu rot mar onnga ahais skoita orofosutut rusnok onnga dudou okora rot. Jefeda iwa ita idou eriamaga fogora imeesa joug yeyin mar onnga oska ojgomu.

²⁰ Didif dut jah sif noba dingkingk montouj. Noba osnok egens onnga eg rot dedin duga fogora ohoda montouj jeska Didif, beda Didif dumoira gij efen mer efesi noba dimet maat morototuma jera ofa si. Beda ofa emet maat morototuma jera Didif tein.

²¹ Noba rusnok onnga rinesiri gu Bilis guru, beda Didif dimeita owesa efek gu rua jeskaseda riker morototuma jera Didif gij kursi onnga Didif dufoka ereij keingg mar nomnaga jeska. Beda rua rimeker morototuma erek Didif onnga dinesiri gu Bilis guru. Noba Didif bera dingker morototuma jera Akeina Allah gij efen kursi egens insa koma fob.

²² Erek iwa idou os isma idou onnga ebriyi gij mar insa koma, beda iwa ig mar onnga Efena Ebsi agot gu iwa onnga irek rusnok Mod Ari rot iskusk ojgomu."

4 ¹ Nou onnga koma nomnaga oisa fob beda didif dik montouj egens gu mebaga onnga onghoda fob. Beda didif dig oga egens onnga agot mar gu didif rot ahais erek manghi mei oga onnga ogugur eteb. Oga insa koma agot oida, "Bua bin skoita Didif, beda

Didif dumocunc gu bua rot mar onggga omorogna gij mona kahma si."

² Ainsa koma tein didif disma owesa efek jeskaseda dik mar onggga onswos eteb gu mebaga. Beda didif dik kursi eteb egens onggga osnok egens engker gij.

³ Noba osnok egens koma bera efen Efesa eteb onggga erek mamu onggga efera osok eteb noba efen efeb titnetna onggga erek ebsi oromohohuma jera ofrahamaha jera ekeni mebi tein. Noba didif dik meinji onggga efen efeb titnetna onggga erek ofrahamaha. Noba meinji insa koma ah rejrej kursi eteb insa koma tein.

⁴ Beda didif dik kursi setka egeka noba tohkuru onggga ah rejrej kursi eteb egens insa koma. Noba didif dik ebirfager nou rusnok Mod Ari ringker gij kursi-kursi setka egeka noba tohkuru insa koma. Rua rirgi meifeti onggga erek ebsi komowa ojomu, noba manggem eteb onggga eirirbi erek emas ah tumu ritoufu tein.

⁵ Beda didif dik moc efesa eteb noba dig moc ogugur rejrej kursi eteb egens insa koma. Noba lampu cinja erfeka onggga eisa eteb bera ah jah kursi insa koma odou. Lampu-lampu insa koma bera orocunc rot Allah efen efena cinja erfeka.

⁶ Beda didif dik mar erek mei mojomu efei onggga edeider noba efena eirirbi eteb erek kasinam onggga ah jah kursi insa koma odou tein. Beda didif dik mar tohkuru onggga efena ebah noba onggga efen eiteij ofoukou onggga ah jah odou jera ejmeg tein. Noba mar insa koma bera ot rejrej kursi egens insa koma deismos.

⁷ Mar egens onggga efena ebah insa koma bera erek singa. Noba mar efena ebah onggga egeka bera erek

sapi. Noba mar onggga efena ebah orgomu insa koma bera efen osum onggga erek orna egens efen. Noba mar onggga efena ebah tohkuru insa koma bera erek mem nesmei eteb onggga ofu gij mebaga.

⁸ Noba orofosut mar onggga efena ebah insa koma egens egens bera efen efembra ofou cinja erfens. Noba rua tein rerin riteij ofoukou onggga ah rejrej rifaga nomnaga. Riteij insa koma ah jah rines efesi obohoh tein. Noba rua ragerir orofosut motu jera mona ojgomuja oida, "Tuhan Allah bera efen owesa efek eteb ekirsa jeska nomnaga. Ofa bera onggga ebsi komowa ojgomu. Noba Ofa bera onggga enofoguma gij mona onggga sismeni fob. Noba Ofa bera onggga eneker ojgomuja ebeibeyaif tein, noba Ofa bera onggga emen tein si."

⁹ Beda mar onggga efena ebah tohkuru insa koma risitit mar gu Ofa onggga engker gij kursi egens insa koma noba onggga efena ebah rot mona onggga ah aibin. Rua risitit rot efen ofoka onggga aksa eteb noba rua ruis oufamofa eteb skoita Ofa tein. Noba askesi rua risitit rot mar insa koma, beda ebirfager Mod Ari setka egeka noba tohkuru insa koma bera risiri fogora rugif gu Ofa onggga engker gij kursi insa koma noba onggga efena ebah rot ah aibin ojgomuja. Beda ebirfager insa koma raha rerin manggem onggga eirirbi insa koma jah Ofa odou erek mar onggga rurougif gu Ofa.

¹⁰ (4:9)

¹¹ Beda rua risitit gu Ofa oida, "Bua bera erek mefmen Tuhan jera Allah. Noba adaij nou Bua bisinsiyai bisma bufoka onggga aksa eteb, jera owesa efek eteb ojgomu. Noba adaij nou rusnok nomnaga rugif gu Bua ojgomu. Jeska Bua bera

ongga buntunggom mar nomnaga. Bua bera ongg
 buntunggom mar nomnaga oisouska budou ejginaga
 rot. Mar nomnaga bera ah oisouska Bua oigomu."

5¹ Erek koma beda didif dik Ofa ongg
 engker gij kursi eteb insa koma agei kertas efeyi ongg
 onggkuku tumu efen etma jah ognosk. Noba didif dik
 mar ongg runggu gij kertas insa koma jah enama
 tein enama tein. Noba Ofa era mar erek mecij ofot
 cinja erfeka ereyet joug kertas efeyi insa koma fogora
 of joug fob.

² Beda didif dik malaikat egens ongg efen owesa
 efek ois rot oga eteb oida, "Idu bera efen owesa efek
 ongg adaij nou ohoda rot mar ongg ereyet kertas
 efeyi ongg onggkuku ainsa kef fogora osu rot."

³ Tina rusnok egema tein ongg ringker gu mebaga,
 era ongg ringker gu mebif, era ongg ringker gij
 mebif efesi tein bera rerin owesa efek adaij nou
 ruhoda kertas efeyi insa koma era rik tumu tein
 jinaga guru.

⁴ Jefeda didif dibisa eteb rot jeska didif dinek rusnok
 egema tein ongg rerin owesa efek ongg adaij nou
 ruhoda kertas efeyi insa koma beda rik rot mar ongg
 runggu gij jinaga guru.

⁵ Erek koma tina, ebirfager egens jeska rua ongg
 setka egeka noba tohkuru insa koma agot gu didif
 oida, "Bua binebisa rot guru, jeska osnok egens
 ongg efen owesa efek ongg adaij nou ohoda mar
 cinja erfeka insa koma ongg ereyet joug kertas
 efeyi koma bera enofoguma. Ofa bera ongg erek
 Singa jeska ebic Yehuda. Noba Ofa bera ongg erek
 ofojuwu egens ongg onjuj jeska raja Daud. Noba
 Ofa bera ongg oin keingg efen mesa nomnaga fob."

⁶ Beda didif dik domba efer egens jera efen efera ofamosma jeska rusnok onggga ranggob Ofa sis fob. Ofa ot deismos desi kursi eteb egens insa koma. Noba mar onggga efena ebah tohkuru insa koma jera ebirfager setka egeka noba tohkuru insa koma tein bera rut rejrej domba efer egens insa koma. Noba domba efer insa koma bera efen oubukum cinja erfeka. Noba efen eiteij cinja erfeka tein. Noba mar insa koma bera orocunc rot Allah efen efena cinja erfeka onggga Ofa ombk gu mebif.

⁷ Beda domba efer insa koma en noba eita kertas efeyi koma jeska Ofa onggga engker gij kursi koma etma jah ognosk.

⁸ Nou onggga ofa eita kertas efeyi insa koma, beda mar onggga efena ebah tohkuru jera ebirfager setka egeka noba tohkuru insa koma nomnaga risiri jah gu Domba Efer okoda. Noba orofosutut rua insa koma nomnaga ragei mar egens onggga erek moubseja tumu ritma. Noba rua ragei mokosku onggga erek emas gij ritma enama. Noba mah efeb jeska mar efen ensesa onggga ris mah gij tein orogna jeska mokosku insa koma. Noba mah efeb insa koma bera erek orocunc rot mar nomnaga onggga Allah efen rusnok rum riteij rot gu Ofa sis fob.

⁹ Beda rua nomnaga ruf medemer egens rot mar onggga efeinah erek kef oida, "Bua bera bebin owesa efek onggga adaij nou bita kertas efeyi onggga onggkuku fogora bumohoda mar onggga eyet kertas efeyi insa koma ojgomu. Jeska Bua bera onggga rusnok enjgineg ranggob sis fob. Noba oisouska bebin bugufu onggga eya jeska bifaga bera bua bunskotu rusnok fogora buroun rua skoita Allah fob. Noba rusnok onggga Bua bunskotu fob bera rineya rin jeska orofosutut ruga

rusnok egens egens, jera orofosutut rusnok ebic egens egens, jera orofosutut monuh egens egens gu mebif nomnaga.

¹⁰ Bua bera butunggom rusnok insa koma erek Allah efen rusnok onnga Ofa ofoka ereij keingg mar ojgomuja. Noba rua nomnaga tein bera rinja erek imamir onnga rufij mifmin Allah ojgomuja. Rua tein bera rumofoka ereij keingg rusnok gu mebif si."

¹¹ Beda didif dik malaikat-malaikat riskembemba onnga erek ribu-ribu rufoukou doska. Noba rua nomnaga ringker rejrej kursi egens insa koma jera mar onnga efena ebah tohkuru jera ebirfager setka egeka noba tohkuru insa koma tein.

¹² Beda rua ruf medemer rot ruga onnga eteb erek kef oida, "Adaij nou domba efer egens onnga rusnok ranggob sis fob esma owesa efek ni, jera mar nomnaga onnga oufamofa jeska Allah ni, jera odou onnga ebriyi eteb gij mar ni, jera ofoka aksa onnga rusnok nomnaga rugif gu noba risitit rot tein ni."

¹³ Beda didif dig mar nomnaga onnga efena ebah gu mebaga ni, gu mebif ni, gij mebif efesi ni, gij mei mojemu efei ni, nomnaga ruf medemer erek kef oida, "Mimif mudou os oida Ofa onnga engker gij efen kursi eteb gu mebaga jera efen domba efer esma ofoka onnga aksa eteb ni, owesa efek ni, rusnok nomnaga risitit rot efen ofoka ni, rua rugif gu Ofa rot mona onnga ah aibin ojgomuja tein ni."

¹⁴ Beda mar onnga efena ebah tohkuru insa koma ruroun oida, "Memef modou os erek koma tein ojgomu." Beda ebirfager setka egeka noba tohkuru bera risiri fogora rugif gu Ofa ojgomu.

6 ¹ Erek koma beda didif diajga joug domba efer insa koma ohoda mar onnga eyet joug kertas

efeyi onggga sismeni. Beda didif dig mar onggga efena ebah egens jeska mar efena ebah tohkuru insa koma agot rot oga eteb oida, "Bua bin." Noba efen oga insa koma bera erek moc ogugur eteb.

²Erek koma beda ainsa koma tein didif dik kuda egens onggga efen efeb titnetna erek ebsi komowa. Noba osnok egens onggga eifef esij kuda egens insa koma bera agei mocong tumu etma. Beda rusnok rita manggem egens onggga eirirbi nou erakid eitoufu erek raja. Ofa eifef kuda egens insa koma beda eja erek osnok egens onggga eja jeskaseda agob mesa fogora risiri gu ofa.

³Nou onggga Domba Efer insa koma ohoda mar onggga eyet joug kertas efeyi egeka, beda didif dig mar onggga efena ebah egeka jeska mar onggga efena ebah tohkuru insa koma agot oida, "Bua bin."

⁴Erek koma beda didif dik kuda egeka deika onggga efen efeb titnetna onggga ekendidi erek mah efeskreni. Noba osnok egens onggga eifef esij kuda egens insa koma bera eita owesa efek jeskaseda otunggom mar gu rusnok mebif fogora rineker rot eskeiramera deika guru, tina rua rimagobuma ebireira ojgomu. Ofa esma meiteb kelawan onggga aksa eteb.

⁵Nou onggga domba efer insa koma ohoda mar onggga eyet joug kertas efeyi orgomu deika, beda didif dig mar onggga efena ebah orgomu jeska mar onggga efena ebah tohkuru insa koma agot oida, "Bua bin." Beda didif dik kuda egens deika onggga efen efeb titnetna onggga erek ahtaboku. Noba osnok egens onggga eifef esij kuda egens insa koma bera agei timbangan tumu etma.

⁶ Beda didif dig mar erek oga egens onggga orogna jeska mar onggga efena ebah tohkuru insa koma nomnaga rifekesa. Noba oga egens insa koma agot oida, "Gij mona insa koma beda maat efen efera osok eteb doska. Jefeda erek osnok egens efarur nou mona juens, beda efen ofons adaij nou engk gandum liter egens ojgomu, era ofa esma meismei liter orgomu rot ojgomu. Noba bunotunggom mar gu mega zaitun efek jera anggur efek tein guru."

⁷ Erek koma beda nou onggga domba efer egens insa koma ohoda mar onggga eyet joug kertas efeyi tohkuru deika, beda didif dig oga jeska mar onggga efena ebah tohkuru insa koma agot oida, "Bua bin."

⁸ Beda didif dik kuda egens onggga efen efeb titnetna erek oruk. Noba osnok egens onggga eifef esij kuda insa koma bera efen ofoka Agos. Noba mar eneya onggga ontoij ofa bera efen ofoka Mahmei Meren. Noba goga insa koma gesma owesa efek jeskaseda gotunggom mar onggga okum eteb skoita rusnok mebif erek tohkuru tumu. Noba mar okum insa koma bera erek rusnok rimagobuma ni, mosona eteb ongr rua ni, mar ofoukou orotunggom rua fogora marenir ni, mar ofogog onggga angh gu merenrah riska rua fogora ragos rot ni.

⁹ Nou onggga domba efer insa koma ohoda mar onggga eyet joug kertas efeyi onggga cinja, beda didif dik rusnok riker degini meja egens onggga imam raha mar esij jeskaseda orougif gu Allah. Rusnok enjgineg ranggob rua sis fob, jeska rua rinfesij rot Allah oga, noba rinaha mar insa koma jah guru.

¹⁰ Beda rua ragerir rot ruga eteb oida, "Bua Tuhan bera onggga ebsi komowa noba onggga bagot mar onggga tenten ojgomu. Noba Bua bera onggga

butunggom mar onggabua budou os ojomu. Sis fob rusnok ranggob memef fogora manggos fob. Jefeda memef mois gu Bua jeskaseda Bua bisesa mar okum sons ebeirens skoita rusnok rot mar insa koma ojomu."

¹¹ Beda rua risma meifeti onggabua erek ebsi komowa. Beda Allah agot gu rua oida ruin keingg rudou efesi juens deika fog onjoros rerin ruhujir rufoukou onggabua rufij Allah noba onggabua rusnok mebif rimagob tein nomnaga bera rimagos fog.

¹² Beda didif dik domba efer insa koma ohoda mar onggabua eyet joug kertas efeyi cinja erfens deika. Beda ainsa koma tein mebif icusur eteb, noba mowa eja erek ahtaboku erek meifeti onggabua ahtaboku doska. Noba mesta tein eja erek ekenkeni onggabua erek ogugufu.

¹³ Beda motur tein esiri jeska mebaga gu mebif erek mega egens onggabua mof agoska rot fogora efen efek onggabua efej esiri gu mebif.

¹⁴ Beda mebaga nomnaga omokukuma erek kertas efeyi onggabua okuku onjoros eseiseifa nomnaga. Noba memaga jera motowohu nomnaga ojuj jeska efen oka deika beda eseiseifa.

¹⁵ Beda gij mona insa koma bera raja-raja onggabua mebif ni, ebirfager ni, tentarer rerin ebirfager ni, rua onggabua runa mei ahta ni, rua onggabua rerin owesa efek ni, rua onggabua rumfij rerin ebirfaga ni, rua onggabua rut gu risinsa ni, rua insa koma nomnaga ruku noba ridemdemis risinsa jejema gij mansu.

¹⁶ Beda rua ruis gu memaga mosu jera mamu tein rot oida, "Iwa isiri fogora irocohun joug memef jeskaseda mendemdemis. Jeska Ofa onggabua ofoka ereij keingg mar nomnaga jeska efen kursi eteb gu

mebaga, jera Domba Efer tein bera otkonu oska eteb rot memef.

¹⁷Jeska mona onggga Ofa en jeska mebaga jeskaseda ofra mar okum keingg memef bera ensaga fob. Noba enadaij nou memef mot rot ahais joug mar koma jinaga guru."

7¹Nou onggga mar insa koma oisa fob, beda didif dik malaikat tohkuru rija gu mebif. Beda malaikat egens ojot gu monuh onggga mowa orogna. Noba malaikat egema ojot jah monuh onggga mowa esiri gij. Noba malaikat egema ojot jah emaga. Noba malaikat egema ojot jah agosu. Beda rua ragei mof aki gij monuh tohkuru insa koma jeskaseda mof onokuj gij mebif ni, mei mojemu efei ni, era mega ni deika guru.

²Beda didif dik malaikat egens onggga egema deika en jeska monuh onggga mowa orogna jeska. Ofa orka mar egens onggga erek orocunc rot Allah onggga efena ebah rot ah aibin ojgomuja. Beda ofa ois mar rot oga eteb skoita malaikat tohkuru insa koma onggga rinsma owesa efek jeskaseda rutunggom mar okum skoita mebif jera mei mojemu efei tein.

³Ofa agot gu rua rot oida, "Iwa inotunggom mar okum skoita mebif era skoita mei mojemu efei era skoita mega tein enesi jeskaseda memef maha mar tumu rusnok ritoufu onggga orocunc rot oida rua bera erek Allah efen rusnok onggga rufij Ofa sismeni fog."

⁴Beda didif dig rot rusnok idu onggga rimesma mar insa koma tumu ritoufu. Rusnok rufok 144,000 jeska rusnok ebic Israel nomnaga bera rimesma mar insa koma.

⁵Koma bera orofosutut rusnok rufok 12,000 jeska ebic Yehuda ni, ebic Ruben ni, ebic Gad ni,

⁶ebic Asyer ni, ebic Naftali ni, ebic Manasye ni,

⁷ ebic Simeon ni, ebic Lewi ni, ebic Isakhar ni,

⁸ ebic Zebulon ni, ebic Yusuf ni, ebic Benyamin ni,
rusnok rufok 12,000 jeska ebic insa koma nomnaga
rimesma mar insa koma tumu ritoufu si.

⁹ Nou onggga mar insa koma oisa fob, beda didif
dik rusnok riskembemba doska onggga rin jeska
orofosutut monuh ni, rusnok ebic egens egens ni,
ruga rusnok egens egens ni. Rua bera rufoukou
doska jefeda enadaij nou didif dufosuit rua nomnaga
jinaga guru. Beda didif dik rua nomnaga rut jah kursi
odou onggga Domba Efer insa koma engker gij. Rua
rirgi meifeti onggga ebsi komowa, noba rua ragei ayug
efeyi tumu ritma.

¹⁰ Beda rua nomnaga ragerir rot ruga eteb oida,
"Allah, onggga engker gij efen kursi fogora ofoka ereij
keingg rusnok nomnaga jera Ofa onggga erek Allah
efen Domba Efer, bera onggga eita eiteij ah onggga
efeinah gu rusnok ojgomu."

¹¹ Noba malaikat-malaikat nomnaga rut rejrej kursi
Allah jera ebirfager setka egeka noba tohkuru jera
mar onggga efena ebah tohkuru insa koma tein. Beda
rua risiri fogora rugif gu Allah.

¹² Beda rua ragot oida, "Mimif mudou os oida
rusnok nomnaga risitit noba rugif gu mifmin Allah
noba ruis oufamofa eteb skoita Ofa! Jeska Ofa bera
onggga efen ofoka onggga aksa eteb ni, noba onggga
efen owesa efek onggga ekirsa jeska nomnaga ni,
noba onggga efen odou onggga ebriyi gij mar nomnaga
ni, rot mona onggga ah aibin ojgomuja. Ainsoma."

¹³ Beda ebirfaga egens jeska ebirfager setka egeka
noba tohkuru insa koma ejeka didif oida, "Rusnok
insa kef onggga rirgi meifeti onggga ebsi komowa bera
idu? Noba rua bera rin jeska guaidu?"

¹⁴ Beda didif duroun gu ofa oida, "Tuan, didif dinejginaga rot guru." Beda ofa agot gu didif oida, "Rua bera onggga rifena ebah ros gij mona onggga mar okum ah keingg rusnok nomnaga fogora rita rifeira okora eteb gu mebif. Rua bera onggga rut rerin meisoufa oisouska Domba Efer efen ogufu fogora rutunggom erek ebsi komowa fob. Jefeda,

¹⁵ 'Rua riker gij mod Allah jah kursi odou onggga Ofa engker gij. Noba rua rufij Ofa gij efen mod orofosutut mona jera motu ojgomuja. Noba Allah bera onggga orocohun rua rot efen owesa efek ojgomuja.

¹⁶ Mosona onongk rua gij mona onggga egema tein deika guru. Noba magonen rua tein deika guru. Mowa tein onofogog skoita rua deika guru. Mar egema tein onggga erek ofoufem enefet rua deika guru.

¹⁷ Jeska Domba Efer egens onggga engker gij kursi insa koma bera orot joug rua erek gembala egens onggga eja okag rot efen domba-domba. Ofa bera omocunc mei eiteij onggga eita eiteij ah onggga efeinah gu rua. Beda Allah omosuna rot mar nomnaga onggga ereita rudou okumkum rot tein.' "

8 ¹ Nou onggga koma oisa fob, beda didif dik Domba Efer insa koma ohoda mar onggga eyet joug kertas efeyi cinja erfeka. Beda ainsa koma tein, moubrahamaha gij mebaga nou aras ofod ojgomu.

² Beda didif dik malaikat cinja erfeka onggga runt jah Allah odou. Noba rua risma manghi mei cinja erfeka onggga erek akseij.

³ Beda malaikat egens deika en noba orka mokosku egens onggga ris mah gij mar onggga ensesa onggga angh gij mokosku. Mokosku koma bera runtunggom jeska emas. Ofa ot gu meja egens onggga imam raha mar esij jeskaseda rurougif gu Allah rot. Beda ofa

esma mar efen ensesa ofoukou. Beda ofa aha mar efen ensesa insa koma morototuma jera mar ongg Allah efen rusnok rum riteij gu Ofa rot esij meja ongg emas koma ongg ot jah Allah efen kursi odou.

⁴Beda mah efeb ongg en jeska mar efen ensesa ongg malaikat koma es mah gij mok osku morototuma jera mar ongg Allah efen rusnok rum riteij rot bera osok erek mah efeb jeska malaikat etma. Beda mah efek koma eja skoita Allah.

⁵Erek koma beda malaikat egens insa koma ecka mah efesi krenmeni rot eisa jeska meja ongg emas insa koma, beda ofa aha mar koma gij mokosku insa koma. Beda ofa era mar insa koma orobuma rot gu mebif. Beda ainsa koma tein moc ogugur eteb doska, noba moc efesa tein ofoukou, noba mebif icusur eteb doska.

⁶Beda didif dik malaikat cinja erfeka risejah nou rin manghi mei oga.

⁷Beda malaikat ongg sismeni en manghi mei oga. Beda ainsa koma tein mar erek eis mamu jera mah ongg oromohohuma jera ogufu bera ojuj gu mebif. Beda mah et mebif oknama ni, mega oknama ni, jera mofombra ongg efei ofraha nomnaga ni.

⁸Beda malaikat ongg egeka en manghi mei oga ongg egeka deika. Beda ainsa koma tein didif dik mar erek memaga mosu eteb ongg mah eisa gij nomnaga ojuj gu mei mojomu efei. Beda mei mojomu efei oknama eja erek ogufu.

⁹Noba mar nomnaga ongg angh gij mei mojomu efei oknama agos. Noba kabar mei ongg ah gu mei mojomu efei oknama eseseifa.

¹⁰ Beda malaikat onggga orgomu en manghi mei oga onggga orgomu deika. Beda ainsa koma tein bera mensir efaga onggga erek mah eisa gij ojuj jeska mebaga beda esiri gij mei oknama, noba esiri gij mei eiteij oknama tein.

¹¹ Noba mensir efaga insa koma efen ofoka oida, Oska Efeki. Jefeda rusnok rufoukou ragos jeska rua rij mei insa koma onggga eja erek oska efeki.

¹² Beda malaikat onggga tohkuru en manghi mei oga onggga tohkuru deika. Beda ainsa koma tein mar egens edi mowa oknama jera mesta oknama jera motur oknama. Beda mar insa koma nomnaga oknama eneisa deika guru. Jefeda gij mona beda oknama erek motkobah ojpgomu. Noba gij motu tein, oknama erek eneisa deika guru.

¹³ Askesi didif diajga mar insa koma, beda didif dik mem nesmei ofu gu mebaga skidameda. Noba mem insa koma ois rot oga eteb gu rusnok mebif oida, "Ayo rot rusnok mebif, jeska ai juens beda malaikat onggga cinja ni, malaikat onggga cinja erfens ni, malaikat onggga cinja erfeka ni rimen manghi mei oga deika. Beda mar okum onggga ekirsa emecirej iwa si!"

9¹ Beda malaikat onggga cinja bera en manghi mei oga onggga cinja deika. Beda ainsa koma tein didif dik malaikat egens onggga erek mensir efaga onggga ensiri gu mebif sis fob. Ofa esma gusin jeskasada orohoda moksu onggga eja ah degini kemb montouj jeska.

² Nou onggga ofa ohoda moksu insa koma efen montouj jeska fob, beda mah efeb ofoukou orogna jeska moksu efesi insa koma. Mah efeb insa koma ofoukou doska erek mocgoj ofog onggga ocohun

monuh ofoukou. Jefeda mowa jera mebaga eja erek motkobah.

³ Beda mof ofoukou orogna jeska mah efeb insa koma noba rujuj rejrej mebif nomnaga. Noba mof insa koma efen owesa efek jeskaseda eska rusnok morototuma erek mouma ofon onggga eska rusnok.

⁴ Beda riyahahir joug mof ofoukou insa koma jeskaseda rinet mofombra era marfok era mega egema tein guru. Tina riska rusnok onggga Allah enaha mar insa koma tumu ritoufu guru. Ofa aha mar insa tumu efen rusnok ritoufu ojomu onggga erek orocunc rot idu onggga Ofa efen rusnok.

⁵ Noba mof ofoukou insa koma rinesma owesa efek jeskaseda riska rusnok insa koma onjoros ranggos rot guru. Tina rua riska rusnok insa koma jeskaseda rua rufogu okora ojomuja gij mesta rara cinja. Mof onggga eska rusnok insa koma rita rufogu okora ahais doska morototuma erek mouma ofon onggga eska rua ojomuja.

⁶ Noba gij mona insa koma bera rusnok rudou os ragos ojomu, tina guru. Rua rifena ebah askesi mar insa koma enska rua ojomuja ros. Rua rujohca moroju nou jeskaseda ragos, tina guru.

⁷ Noba mof onggga ofoukou insa koma bera rinsejah nou rija skoita rusnok mebif erek kuda ofoukou onggga rusnok rifef fogora rija rimedima. Noba mof insa koma bera ringi manggem onggga erek emas tumu ritoufu. Noba rusum bera erek rusnok rusum tein.

⁸ Ribirfaga efeji bera erek rujaga ribirfaga efeji ojomu. Noba rerin rufon bera erek singa efen ofon onggga akseij doska.

⁹ Noba mof insa koma rerin mar erek monska ofos ontumba onnga erek besi. Nou onnga mof ofoukou insa koma rumfu fob, beda rifembra ofou ogugur eteb doska. Koma erek kuda eskembemba onnga rusnok rifef jeskasada rija rimedima fogora ogugur eteb doska tein.

¹⁰ Noba rerin ruiraga onnga eska rusnok erek mouma ofon eska tein. Noba rua tein rerin owesa efek nou riska rusnok mebif fogora rita rufogu okora eteb ojgomuja gij mesta cinja.

¹¹ Noba rerin ebirfaga bera malaikat egens insa koma onnga ohoda moku montouj insa koma. Ofa efen ofoka gij Yahudi oga bera Abadon. Noba gij Yunani oga efen ofoka bera Apolion. Ofoka koma efen ofou oida, "Ofa onnga onghoda mar rot ahais."

¹² Ebeibeyaif mar okum onnga ah keingg rusnok rot sismeni bera oisa fob. Tina mar okum onnga egeka deika emen gij mona kahma deika ros.

¹³ Erek koma beda malaikat onnga cinja erfens bera en manghi mei oga onnga cinja erfens deika. Beda ainsa koma tein didif dig oga egens en jeska oubukum onnga angh gu meja emas jah Allah odou.

¹⁴ Beda oga insa koma agot gu malaikat onnga cinja erfens oida, "Bua bija gu mei mosu eteb onnga ofoka Efrat. Beda bua busuwa malaikat tohkuru onnga rinrakid rua jah suma fob."

¹⁵ Beda malaikat egens insa koma onsuwa malaikat tohkuru insa koma fob. Jeska sis fob rua rinsejah nou tahun kef, jera mesta kef, jera mona kef, jera aras kef tein jeskasada rijagob rusnok mebif oknama fogora ragos ojgomu.

¹⁶ Noba didif dig rot oida rerin tentarer onnga rifef kuda bera erek rufok juta wuntin egeka.

¹⁷ Beda askesi didif diajga mar onswos insa koma, beda didif dik kuda-kuda jera rua onnga rifef kuda insa koma bera erek kef oida, rerin mar erek monska ofos ontumba onnga efen titnetna erek ekenkeni doska jera ofrahamaha jera orugrug tein. Beda kuda-kuda insa koma rerin ribirfaga bera erek singa ebirfaga ojgomu. Beda mah onnga et mar jera mah efeb jera mah eisa onnga erek orugrug bera orogna jeska rawesi.

¹⁸ Beda mar orgomu insa koma edi rusnok mebif fogora oknama ragos rot.

¹⁹ Noba kuda-kuda insa koma rerin owesa efek eteb onnga orogna jeska rawesi jera ruiraga tein. Jeska rerin ruiraga bera erek womfieda onnga eska rusnok fogora rita rufogu okora eteb ojgomuja.

²⁰ Erek koma tina rusnok mebif enjgineg onnga rinagos gij mar insa koma guru bera rinekikif jeska rerin mar onnga oska jinaga guru. Tina rua rugif gu mar onnga erek tenten guru ojgomuja ros. Mar koma onnga rua rugif gu bera erek efena ofogog jera mar onnga rua risinsa runtunggom jeska emas ni, perak ni, timbaga ni, mega ni, mamu ni. Noba mar insa koma onnga rua rugif gu bera efena enebah guru. Mar insa koma rinek mar guru, noba rineg mar guru, noba rinecira tein guru.

²¹ Noba rusnok insa koma rinekikif jeska rerin mar onnga oska enjgineg tein guru. Tina rua ragob rusnok ebireira ojgomuja ni, rugif gu rerin meseya ojgomuja ni, risiri morototuma ojgomuja ni, rungkoreka mar ojgomuja ni.

10¹ Nou onnga mar insa koma oisa fob, beda didif dik malaikat egens onnga efen owesa efek ojuj jeska mebaga. Didif dik mocgoj ofog ah

rejrej ofa, noba meinji tein ok tera ebirfaga. Efen osum bera eisa eteb erek mowa, noba efen aki bera erek mowuj mosu onggga mah eisa egigir eteb tumu.

²Ofa agei kertas efeyi ofokai onggga ohoda fob tumu etma. Ofa efen aki jah ognosk ot keingg mei mojumu efei, noba efen aki jah egris ot keingg jah mog tein.

³Beda ofa agerir mar rot oga onggga ahais doska erek singa efen oga. Nou onggga ofa agerir mar oisa fob, beda moc ogugur erek cinja erfeka ogugur erek eteb sons.

⁴Nou onggga moc ogugur cinja erfeka insa koma ruis mar, beda didif disejah nou dugu keingg mar onggga rumois insa koma. Tina didif dig oga egens onggga en jeska mebaga agot gu didif oida, "Bua bunogu keingg mar onggga moc ogugur cinja erfeka insa koma rumois rot guru. Tina bua bidemdemmi mar insa koma ojgomu."

⁵Beda malaikat egens insa koma onggga ot gu mei mojumu efei jera mog bera ofra etma ognosk jah mebaga.

⁶Beda ofa agen mar oisouska Ofa onggga engker rot mona onggga ah aibin ojgomuja ni, noba onggga ontunggom mebaga jera mar nomnaga onggga angh gu mebaga ni, noba onggga otunggom mebif jera mar nomnaga onggga angh gij mebif ni, noba onggga otunggom mei mojumu efei jera mar nomnaga onggga angh gij mei mojumu efei ni. Noba mar onggga ofa agen rot bera oida, "Erek doida mona onggga malaikat cinja erfeka emen manghi mei oga onggga cinja erfeka deika fob, beda Allah omotunggom mar onggga Ofa endemdemmi jeska rusnok nomnaga sis fob si. Mar koma bera jeni erek Ofa oncunc gu efen nabi-nabi

ongga rumfij Ofa sis fob. Jefeda mar koma bera enah dektek guru, tina emen rot ebeirens si."

⁷(10:6)

⁸Beda oga egens insa koma onggga onjuj jeska mebaga bera agot gu didif deika oida, "Bua bija skoita malaikat egens onggga ont gij mei mojomu efei jera mog tein, beda bita kertas efeyi onggga ohoda fob tumu efen etma jeska ofa."

⁹Jefeda didif dija skoita malaikat egens insa koma, beda direjgei ofa rot kertas efeyi onggga ofokai insa koma. Beda ofa agot gu didif oida, "Bua bita kertas kef beda bit ojomu. Askesi bua bit kertas efeyi koma gij bawesi beda eyejkita erek mosusu efei. Tina nou onggga enja gij butkonu fob, beda erek oska efeki ojomu."

¹⁰Jefeda didif dita kertas efeyi ofokai insa koma jeska efen etma noba didif dit ojomu. Noba nou onggga dint gij dawesi, beda eyejkita erek mosusu efei. Tina nou onggga enja gij dutkonu fob, beda erek oska efeki ojomu.

¹¹Beda oga egens insa koma agot gu didif oida, "Bua bagot rot mar onggga Allah oncunc gu bua osok gij rusnok enjgineg ni, oga enjgineg ni, jera raja-raja enjgineg ni juens deika ojomu."

11¹Nou onggga koma oisa fob beda didif disma moskur egens onggga erek rusnok rira nou rireni jeni mar. Beda oga egens agot gu didif oida, "Bua bireni jeni Mod onggga Allah efen jera meja onggga imam-imam ris mah gij mar esij. Beda bua tein bufosuit rusnok nomnaga onggga rugif gu Allah jah suma.

²Tina bua binireni jeni momas onggga angh rejrej Mod Allah guru. Jeska rua onggga Yahudi guru bera

rimesma owesa efek jeskaseda rutunggom mar onnga oska jeni rudou os rot gij momas insa koma ojgomu. Beda rua rumot keingg kota Yerusalem onnga ebsi komowa gij tahun rara orgomu noba ofod.

³ Beda Didif dimeita owesa efek gu dedin gosnok gegeka fogora goga gemefesij rot mar onnga Didif duncunc gu goga fob. Noba goga gemergi meisoufa onnga oska. Koma bera orocunc rot oida godou okumkum noba gebisa rot rusnok rerin mar onnga oska. Beda goga gemefesij rot mar insa koma gij mona rara 1,260.

⁴ Gosnok gegeka insa koma bera erek mega zaitun efej egeka jera mowuj mosu egeka onnga lampu ont esij noba onnga gont jah Allah odou. Allah bera onnga ofoka ereij keingg mebif nomnaga.

⁵ Noba erek rineya rutunggom mar onnga oska skoita goga, beda mah eisa omorogna jeska gawesi fogora et rua onnga rutunggom mar onnga oska skoita goga. Noba rusnok onnga runtunggom mar onnga oska skoita goga, beda rua rimagos erek insa koma tein si.

⁶ Noba goga insa koma gegang owesa efek jeskaseda gof joug mebaga fogora mos enes gij mona onnga goga goftuotu rot Allah oga jinaga guru. Noba goga tein gegang owesa efek jeskaseda gotunggom mei fogora eja erek ogufu. Noba goga tein gegang owesa efek jeskaseda gesa mar onnga okum skoita rusnok fogora marenir. Goga gegang owesa efek onnga adaij nou gotunggom mar erek insa koma nomnaga rot ofosma ofoukou ojgomuja.

⁷ Erek koma beda, gij mona onnga goga gemfesij rot Allah oga erek oisa fob, beda mar ofogog egens

omorogna jeska moksu efesi onggaga degini kemb. Beda mar koma omosoka keingg goga insa koma, beda emagob goga fogora gemagos.

⁸ Beda gegang gefaga onggaga agos fob bera emah joug moroju deis gij kota insa koma onggaga ofoka aksa. Gegang Tuhan, Ofa tein bera agos tumu mega salib gij kota insa koma tein. Noba kota Sodom jera monuh Mesir bera erek orocunc rot kota egens insa koma tein.

⁹ Noba gij mona orgomu ofod, beda rusnok jeska orofosutut ruga rusnok egens egens, jera orofosutut rusnok ebic egens egens, jera orofosutut monuh egens egens nomnaga rimeyajga toutou joug rot gegang gefaga ojomu. Tina rineya rinesah gegang gefaga gij moksu guri.

¹⁰ Erek koma beda rusnok rufoukou rudou emefaga ouka eteb rot jeska goga gagos fob. Beda rua rumoh mar onggaga erek ongkoskamoka moguma onggaga orocunc rot rudou onggaga efaga oka eteb jeska goga insa koma ganggos fob. Rua rudou emefaga ouka erek koma jeska sis fob gosnok gegeka insa koma gofra mar okum keingg rua oisouska mar onggaga goga goftuftu rot Allah oga.

¹¹ Tina gij mona orgomu ofod insa koma oisa fob, beda Allah emeita eiteij ah sons gu goga fogora goga gemededebecki beda gecira sons deika. Beda rusnok nomnaga onggaga riajga toutou joug gegang gefaga insa koma bera rimek goga gecira sons deika fob. Jefeda rua rudou omoubsaha fogora rimeesa eteb rot tein.

¹² Beda rusnok insa koma rimeg oga egens onggaga emen jeska mebaga onggaga agot gu goga oida, "Goga gosok skoita Didif jah sif." Beda goga gomosok

mocgoj ofog jah mebaga askesi rusnok insa koma riajga toutou joug goga."

¹³ Beda ainsa koma tein mebi icusur eteb doska, noba mod ofoukou oknama gij kota insa koma emesma. Noba rusnok rufok ribu cinja erfeka rimagos tein. Beda rusnok enjineg onggga rifena ebah ros bera rudou omoubsaha noba rimeesa eteb rot. Jefeda rua rumofra Allah efen ofoka erek aksa gu mebaga.

¹⁴ Ebeibeyaif mar okum onggga ah keingg rusnok rot egeka bera oisa fob. Tina mar okum onggga orgomu deika emen gij mona kahma deika ros.

¹⁵ Erek koma beda malaikat onggga cinja erfeka en manghi mei oga onggga cinja erfeka deika. Beda ainsa koma tein didif dig rusnok ruga ofoukou onggga ragerir eteb gij mebaga. Rua ragot mar erek kef oida, "Ebeibeyaif, owesa efek nou ofoka ereij keingg rusnok mebif nomnaga bera angh gu mifmin Tuhan Allah jera efen osnok egens koma onggga Ofa oncunc erek Kristus fob. Ofa oncunc Kristus koma jeskaseda osuwa rusnok nomnaga jeska rerin mar okum fob. Noba Ofa omofoka ereij keingg mar nomnaga rot mona onggga ah aibin ojgomuja."

¹⁶ Beda ebirfager setka egeka noba tohkuru insa koma onggga ringker gij rerin kursi jah Allah odou bera risiri fogora rugif gu Allah.

¹⁷ Beda rua risitit oida, "Memef mois oufamofa eteb gu Bua Tuhan rot bebin bufoka onggga aksa eteb. Bua bera onggga bunofoguma gij mona onggga sismeni fob. Bua bunofoguma gij mona onggga mar nomnaga omoisa rot tein. Jeska Bua bisma bebin owesa efek eteb fogora bumfoka ereij keingg rusnok nomnaga fob.

¹⁸ Sis eteb fob bera mesa rudou otkonu oska fogora rita rudou ofogog eteb skoita Bua. Tina ebeibeyaif Bua buncunc budou onnga otkonu oska eteb rot rua. Ebeibeyaif Bua bebin eimofoj adaj fob nou buga oja rot rusnok nomnaga rerin rita mar. Erek koma tein, ebeibeyaif bebin eimofoj adaj fob nou bimeita ofons onnga ongoska eteb skoita bebin rusnok nomnaga onnga rugif gu bebin bufoka. Koma bera erek skoita rusnok onnga runok rufoka gij guru ni, jera rusnok onnga rufoka aksa tein ni, jera bebin nabi onnga rumfij Bua sis fob ni. Ebeibeyaif Bua bebin eimofoj adaj fob nou bufra okum eteb keingg rusnok onnga runghoda rusnok rerin riteij ah gu mebif tein."

¹⁹ Erek koma beda, didif dik Allah efen mod montouj gu mebaga ohoda. Beda didif dik burwa onnga rua rinsah mamu efebr onnga Musa onngu keingg Allah efen hukum tumu sis fob gij burwa insa koma efesi. Noba burwa koma bera orocunc rot mar onnga Allah anggen eimofoj rot gu rusnok sis fob. Noba didif dik moc efesa eteb ni, dig moc ogugur eteb ni, mebif erek icusur doska ni, noba mos eteb onnga erek eis mamu ofoukou doska ens ni nomnaga.

12 ¹ Koma oisa fob beda didif dik mar onnga onswos eteb gu mebaga onnga orocunc rot mar erek kef oida, Didif dik ojaga egens onnga efen meisoufa onnga eisa egigir eteb erek mowa. Noba mesta ah gu okoda obohoh. Noba manggem onnga efen motur setka kungkob erfeka bera ah tumu eitoufu.

² Noba ofa efen efaga okum eteb rot efesa fogora ofa agerir rot otkonu okora, jeska ai juens beda eker rot efen efesa.

³Erek koma beda didif dik mar egens deika gu mebaga onnga orocunc rot mar erek kef oida, didif dik magosu eteb doska egens onnga ofoka Naga. Efen efeb titnetna onnga erek ogugufu, noba efen ebirfaga cinja erfeka jera oubukum setka. Noba orofosutut ebirfaga egens egens insa koma bera efen manggem cinja erfeka onnga eirirbi tumu eitoufu cinja erfeka insa koma tein.

⁴Beda ofa efen oiraga bera erajgej motur oknama jeska mebaga fogora esiri gu mebif. Noba magosu egens insa koma osku joug jah ojaga egens insa koma odou jeskaseda oskotu ofa efen efesa onnga onjuj rot fogora oub ojgomu.

⁵Beda ojaga insa koma onjuj rot efen efesa orna fob. Noba gij mona kahma Allah omoskotu efen efesa insa koma fogora ofra Ofa gu mebaga. Jah suma Allah ofoka ereij keingg mar nomnaga. Tina askesi efesa insa koma engker mebif ros, beda efen mosu egens insa koma oku rot efen efesa jah gu monuh onnga mebi oska onnga Allah ensejah nou ofa jeskaseda engker gij. Beda Allah ont joug ofa jera efen efesa egens insa koma jah suma ojgomuja gij mona rara ribu egens noba ofod (1,260) fob. Beda efesa insa koma esma owesa efek eteb morototuma jera Allah. Noba Ofa bera onnga omofoka ereij keingg rusnok monuh mebif nomnaga rot efen owesa efek eteb si.

⁶(12:5)

⁷Erek koma beda didif dik malaikat-malaikat rimedima eteb gij monuh mebaga. Malaikat Mikhael, onnga erek ebirfaga rot Allah efen malaikat-malaikat enjgineg tein, bera rimedima jera magosu egens

insa koma onnga ofoka Naga rot ofa efen malaikat-malaikat tein.

⁸ Tina Naga insa koma bera efen owesa efek enadaj guru, jefeda Mikhael jera Allah efen malaikat-malaikat rikemeji Naga rot ofa efen malaikat nomnaga jeska monuh mebaga.

⁹ Koma bera, rua rij magosu egens insa koma onnga mijeka efen ofoka oida Bilis tein rot efen malaikat nomnaga jeska mebaga gu mebif. Ofa bera erek ebirfaga efena ofogog onnga orokrusa rusnok mebif nomnaga fogora risiri gij rerin mar onnga oska.

¹⁰ Beda didif dig oga egens gu mebaga agot rot oga eteb oida, "Ebeibeyaif bera Allah efen eimofoj adaj fob nou oskotu efen rusnok jeska rerin mar onnga oska fob. Noba Ofa oncunc efen owesa efek eteb jeskaseda ofoka ereij keingg rusnok. Noba Ofa oncunc rot Kristus koma, onnga osuwa rusnok jeska rerin mar onnga okum, rot efen owesa efek tein. Jeska rua rungkoja Bilis jeska mebaga fob. Ofa bera onnga oh mojen rourou ojgomuja gu mifmin muhujir orofosut mona jera motu tein jah Allah odou.

¹¹ Mifmin muhujir bera ruin keingg ofa oisouska Domba Efer efen ogufu onnga eya tumu mega salib nou rua, jera oisouska mar onnga rua rimfesij rot osok gij Allah oga sis fob. Noba rua rinefeneinei rot risinsa riteij ah guru, tina rua raha risinsa jeskaseda ragos rot Allah oga insa koma ojgomu.

¹² Jefeda iwa nomnaga onnga ingker gu mebaga ita idou onnga efaga ouka eteb rot ojgomu. Tina ayo, teinefa nou iwa onnga ingker gu mebif jera mei mojumu efei teino. Jeska Bilis onjuj gu mebif fob. Noba ofa odou otkonu oska eteb doska, jeska ofa

ejginaga rot oida efen eimofoj bera erek estir nou ofa ojgomu fob."

¹³ Nou onggga Bilis, onggga erek magosu egens insa koma, ek rot teinefa rua rungkoja ofa jeska mebaga fob, beda ofa otoij ojaga egens insa koma onggga engker rot efen efesa orna insa koma.

¹⁴ Tina Allah eita efembra ofou erek mem nesmei efembra ofou gu ofa jeskaseda ofa ofu ebeirens erek mem jah monuh mebi oska onggga Allah ensejah nou ofa. Jah suma bera Allah omot joug ofa rot tahun rara orgomu noba ofod. Jeska enadaj nou Bilis, onggga erek magosu insa koma, ohca ofa jah suma jinaga guru.

¹⁵ Beda magosu insa koma ej awesi noba mei mosu eteb eya fogora oforkamaga gij mebif jeskaseda edi ojaga egens insa koma fogora ageben gij ojgomu.

¹⁶ Tina mebif ofij ojaga egens insa koma fogora ohoda awesi onggga eteb doska. Jefeda mei mosu eteb onggga oforkamaga insa koma eya gij mebi efesi ojgomu.

¹⁷ Erek koma beda magosu egens insa koma odou otkonu oska eteb rot ojaga egens insa koma, jefeda ofa eja jeskaseda edi ojaga egens insa koma efen rusnok onggga runjuj jeska ofa. Rua bera erek rusnok onggga rugif gu Allah rot efen oga noba ruroru mar onggga Yesus omftuftu rot sis fob tein. Noba magosu egens insa koma onggga ofoka Naga ont jah mei mojomu efembra rot.

13 ¹ Erek koma beda didif dik mar egens onggga ofogog orogna jeska mei mojomu efei. Mar koma efen oubukum ofog setka jera efen ebirfaga cinja erfeka. Noba efen manggem egens onggga ah tumu orofosutut oubukum ofog insa koma tein. Noba

runggu ofoka tumu orofosutut efen ebirfaga egens egens. Noba rufoka insa koma bera erek mar onggara ruga oruh Allah rot.

²Noba mar onggara ofogog insa koma bera erek macan tutul. Tina efen okoda bera erek beruang efen. Noba efen awesi erek singa efen awesi tein. Beda magosu onggara erek Bilis insa koma eita ofoka aksa jera owesa efek eteb skoita mar onggara ofogog egens insa koma onggara orogna jeska mei mojomu efei jeskasada ofoka ereij keingg mar enjineg.

³Noba didif dik mar erek efera ofamosma tumu efen ebirfaga egens. Efera ofamosma koma bera orocunc rot efen efera onggara eteb doska sis fob. Noba rusnok mebif nomnaga rudou ousaha eteb jeska ofa enagos rot efen efera eteb insa koma guru. Jefeda rua nomnaga rururu ofa ojomu.

⁴Noba rusnok rugif gu magosu egens insa koma onggara ofoka Naga jeska ofa eita owesa efek gu mar onggara ofogog egens insa koma. Noba rua rugif gu mar onggara ofogog insa koma tein. Rua ragot oida, "Rusnok egema tein rerin rufoka onggara morototuma erek ofa efen ofoka onggara aksa jinaga guru. Noba, enadaij nou rusnok rineya rukoja ofa tein jinaga guru."

⁵Beda mar onggara ofogog insa koma esma owesa efek jeskasada esitit esinsa efaga noba oga oruh rot Allah tein ojomuja. Beda mar ofogog insa koma eita owesa efek erek koma ojomuja gij mesta rara setka tohkuru noba egeka.

⁶Beda gij mona insa koma tein mar ofogog koma oga oruh Allah ni, oga oruh Allah efen owesa efek ni, oga oruh Allah efen monuh mebaga ni, oga

oruh Allah efen rusnok onggga ringker gij mebaga ni ojpgomuja.

⁷Noba mar onggga ofogog insa koma esma owesa efek tein jeskaseda edi Allah efen rusnok fogora ot keingg rua. Noba ofa tein esma owesa efek jeskaseda ofoka ereij keingg rusnok ebic nomnaga ni, ruga rusnok nomnaga ni, jera monuh nomnaga ni ojpgomuja.

⁸Noba rusnok mebif rufoukou rugif gu mar egens onggga ofogog insa koma. Tina rua bera rimeseiseifa rot si. Jeska sis fob bera Allah onogu keingg rerin rufoka gij Domba Efer efen buku onggga agot rot idu onggga rimesma eiteij ah onggga efeinah guru. Koma bera gij mona onggga Ofa onotunggom mebif enesi. Domba Efer insa koma bera onggga Allah ensejah rot gij mona onggga sismeni jeskaseda agos nou rusnok rerin mar onggga oska.

⁹Ongga ofoufem bera rusnok nomnaga rik mar erek kef ojpgomu oida,

¹⁰"Rusnok enjgineg rimagei rua, beda enadaij nou rua rukoja mar koma jinaga guru. Jeska rusnok rimagei rua si. Noba rusnok enjgineg rimer meiteb kalawan rimagob rua, beda enadaij nou rua rukoja mar koma jinaga guru, jeska rusnok rimagob rua si." Jefeda Allah efen rusnok bera ruin keingg rudou efesi rot ahais noba ruroru Allah rot tenten askesi mar okum ah keingg rua ojpgomu.

¹¹Erek koma beda didif dik mar ofogog onggga egens deika orogna jeska mebi efesi. Mar koma efen oubukum egeka erek domba efen oubukum egeka. Tina mar koma efen oga bera erek magosu insa koma onggga ofoka Naga.

¹² Ofa ocunc mar gu rusnok oisouska mar ofogog onnga sismeni insa koma efen owesa efek. Noba mar koma eradgodu rusnok jeskaseda rua rugif gu mar ofogog egens onnga sismeni insa koma. Ofa bera onnga efen efera ofamosma onnga orocunc rot efera eteb onnga od fob tina enagos rot guru.

¹³ Noba ofa tein otunggom mar onnga onswos eteb ahah rusnok riteij. Mar egens onnga ofa otunggom bera erek mah eteb onnga onjuj jeska mebaga gu mebif.

¹⁴ Noba ofa otunggom mar onswos insa koma oisouska owesa efek onnga ofa esma jeska mar ofogog onnga sismeni insa koma. Jefeda ofa era mar insa koma orokrusa rusnok mebif nomnaga rot ojgomu. Noba ofa obk rusnok jeskaseda rira mega efaga beda ragosus mar egens onnga orocunc jeni erek mar ofogog onnga sismeni insa koma efen efaga ojgomu. Ofa bera onnga efen efera ofamosma onnga orocunc rot meiteb kalawan onnga riragob ofa sis fob, tina enagos rot guru.

¹⁵ Noba mar ofogog onnga egeka insa koma esma owesa efek tein jeskaseda aha efeni gij mega efaga egens insa koma onnga rusnok ranggosus jeskaseda rugif gu. Jefeda mar egens onnga rusnok runtunggom insa koma tein agot mar noba efen owesa efek jeskaseda agob rusnok nomnaga onnga runougif gu ofa guru.

¹⁶ Beda mar ofogog onnga egeka insa koma eradgodu rusnok onnga erek runok rufoka gij guru ni, rusnok onnga rufoka aksa ni, rusnok onnga runa mei ahta ni, rusnok onnga rufojingki ni, rusnok onnga rut gu risinsa ni, rusnok onnga rumfij rerin ebirfaga

ni, nomnaga jeskaseda risma mar tumu ritma jah rugnosk era tumu ritoufu ojgomu.

¹⁷ Mar insa koma bera orocunc rot mar ofogog onnga sismeni koma efen ofoka. Era mar insa koma orocunc rot efen ofoka onnga erek nomor. Ofa eradgodu rusnok insa koma jeskaseda erek mar egens koma enah tumu rerin ritma jah rugnosk era ritoufu guru, beda enadaij nou rua ringk maat era ruhu maat jinaga guru.

¹⁸ Rusnok onnga rudou ebriyi gij bera rusujohu rot iskusk osok gij mar ofogog insa koma efen ofoka fog. Jeska huruf-huruf rot efen ofoka bera orocunc rot ofa efen nomor. Nomor koma bera 666.

14 ¹ Koma oisa fob beda didif dik Domba Efer ot gu memaga ofos Sion. Noba rusnok rufok 144,000 rut jah suma morototuma jera Ofa tein. Noba Domba Efer insa koma efen ofoka jera efen meka ofoka bera runngu tumu ritoufu tein.

² Beda didif dig mar onnga ogugur eteb egens jeska mebaga onnga erek mei ofoska onnga oforkamaga noba onnga erek moc ogugur eteb tein. Noba didif dig mar egens deika erek rusnok onnga rindi mar onnga erek moubseja oga tein.

³ Noba rua insa koma ruf medemer rot mar onnga erek efeinah skoita Allah onnga engker gij efen kursi, noba skoita mar onnga efena ebah tohkuru rudou, noba skoita ebirfager setka egeka noba tohkuru rudou tein. Noba rusnok mebif rufok 144,000 onnga Domba Efer onskotu fob bera rijginaga rot medemer egens insa koma ojgomu. Noba rusnok enjgineg bera guru.

⁴ Rusnok rufok 144,000 insa koma bera erek rua onnga rita mar rot rudou onnga ebsi komowa

ojgomuja. Rua rinerek rusnok onnga rinsiri jera rujager ebireira guru. Noba rua ruroru Domba Efer insa koma ojgomuja ojgomu. Ofa onskotu rua jeska rusnok mebif erek rusnok onnga sismeni jeskaseda oroun rua skoita Allah erek mar onnga orougif gu Ofa fogora ereita Ofa odou eskeira rot. Koma erek osnok egens onnga orka maat efej onnga sismeni jeska efen mekeni jeskaseda eita gu Allah erek mar onnga orougif gu Ofa ojgomu.

⁵ Rua bera erek rusnok onnga runocuwei mar oskiyai tein jinaga guru. Noba enadaij nou rusnok enjgineg tein rucunc rua erek oska jinaga guru.

⁶ Erek koma beda didif dik malaikat egens onnga ofu gu mebaga skidamedada. Noba ofa orka Allah efen oga onnga oufamofa onnga ah rot mona ah aibin. Ofa orka oga insa koma jeskaseda efesij rot gu orofosutut rusnok ebic nomnaga ni, rusnok ruga nomnaga ni, monuh nomnaga ni.

⁷ Beda ofa agerir rot oga eteb oida, "Iwa icunc idou onnga emeesa rot Allah noba isitit rot efen ofoka onnga aksa eteb. Jeska Allah efen eimofoj adaij fob. Jefeda Ofa omoga ojga rot mar nomnaga onnga rusnok mebif runtunggom fob. Iwa nomnaga yugif gu Ofa onnga ontunggom mebaga ni, mebif ni, mei mojemu efei ni, mei eiteij ni nomnaga."

⁸ Beda malaikat onnga egeka onnga ontoij malaikat egens insa koma ofu gu mebaga skidamedada tein. Noba ofa agerir rot oga eteb oida, "Ofa onnga ofoka kota Babel bera onghoda fob. Ofa ejeseiseifa fob! Jeska ofa bera onnga otunggom mar skoita rusnok rufoukou fogora rudou erebibeit rot rerin mar onnga oska efekeifa ojgomuja, erek rusnok onnga rudou

erebibeit rot mofut efeyi ojgomuja. Jefeda rua rugif gu mar onnga oska efekeifa insa koma ojgomuja."

⁹ Beda malaikat onnga orgomu ontoij malaikat egeka insa koma deika noba agerir rot oga eteb oida, "Iwa inororu mar onnga ofogog onnga orogna jeska mebi efesi guru. Noba iwa inougif gu mega efebr onnga rusnok runtungom onnga erek orocunc rot ofa jinaga guru. Iwa inesma mar tumu itofu era gu itma onnga orocunc rot efen ofoka tein jinaga guru.

¹⁰ Jeska Allah emeita efen odou omotkonu oska eteb skoita rusnok nomnaga onnga ruroru mar insa koma fob. Beda Ofa emaha mar okum eteb keingg rua nomnaga rot si. Mar onnga Allah omotungom insa koma bera erek osnok egens onnga eradgodu rusnok enjgineg jeskasada rij anggur efei onnga ekembemba eteb. Noba rua runokoja mar koma jinaga guru. Erek koma tein, gij mona onnga Allah omfra mar okum eteb keingg rusnok insa koma, beda rua runokoja jinaga guru. Mar okum koma bera erek mah eisa eteb onnga emet rua ojgomuja. Noba malaikat-malaikat jera Domba Efer rimek rusnok insa koma rita rufogu okora eteb gij mah ojgomuja.

¹¹ Jeska mah insa koma efen eisa egigir ah ojgomuja. Jefeda rusnok insa koma rita rufogu okora eteb onnga onnoisa jinaga guru. Rusnok onnga rugif gu mar onnga ofogog egens insa koma, era onnga risma mar insa koma onnga orocunc rot efen ofoka tumu ritoufu tein, bera rimeita rufogu okora eteb gij orofosutut mona jera motu tein ojgomuja si. Rua rineja jeska mah eisa insa koma jinaga guru."

¹² Jefeda rua onnga rugif gu Allah efen oga noba onnga ruroru Yesus Kristus rot tenten ojgomu bera

ruin keingg rudou efesi fogora rita rudou ahais gij mar okum onnga askesi ah keingg rua ojgomu.

¹³ Erek koma beda didif dig oga egens jeska mebaga onnga agot gu didif oida, "Bua bugu keingg mar erek kef oida, ebeibeyaif rusnok onnga ranggos askesi rua ruroru Allah rot tenten ojgomuja bera rimeita rudou onnga efaga ouka eteb ojgomuja. Noba Efena Ebsi tein agot oida, 'Koma tenten ojgomu. Jeska rua bera rimejeker keingg rufons jeska mar okum onnga angh keingg rua sis fob ojgomuja. Beda rua rimesma rerin rufons rot mar oufamofa onnga rua runtungom sis fob.' "

¹⁴ Nou onnga mar insa koma oisa fob beda didif dik mar erek mocgoj ofog onnga ebsi komowa eteb. Noba didif dik osnok egens onnga erek Rusnok Efesa eker jah suma. Noba manggem onnga emas ah tumu eitoufu, noba Ofa agei meiteb yagegeb onnga efen efeya doska tumu etma tein.

¹⁵ Beda didif dik malaikat egens egema deika. Ofa orogna jeska Mod onnga Allah efen gu mebaga. Beda ofa ois rot oga eteb skoita Ofa onnga engker gij mocgoj ofog insa koma oida, "Bua bira meiteb yagegeb beda biris maat efej onnga oruk fob gij mekeni. Jeska maat efej gu mebif bera nomnaga oruk fob."

¹⁶ Jefeda Ofa onnga engker gij mocgoj ofog insa koma era meiteb eris maat efej gu mebif onnga oruk nomnaga fob. Beda Ofa ohoturu maat efej insa koma nomnaga nou esinsa fob.

¹⁷ Erek koma beda didif dik malaikat egens egema deika orogna jeska Mod onnga Allah efen gu mebaga. Noba ofa tein agei meiteb yagegeb onnga efeya doska tumu etma.

¹⁸ Beda malaikat egens egema deika onggga ont joug mah bera en jeska meja onggga angh jah Allah odou gij efen Mod efesi. Beda ofa ois rot oga eteb skoita malaikat egens onggga agei meiteb yagegeb insa koma oida, "Bua bira meiteb yagegeb onggga efeya doska beda bireris anggur efek gu mebif, jeska anggur efek insa koma bera oruk fob."

¹⁹ Jefeda malaikat egens insa koma era meiteb yagegeb beda eris anggur efek gu mebif nomnaga fob. Beda ofa ohoturu anggur efek insa koma noba esah gij mansinya eteb fogora ot keingg gij nomnaga. Mansinya onggga ont keingg gij insa koma bera orocunc rot mar okum eteb onggga Allah omofra keingg rusnok.

²⁰ Ofa ot keingg anggur efek insa koma nomnaga gij mansinya jah kota ejmeg. Beda ogufu ofoukou eya jeska mansinya insa koma noba ofot osok doska gij meter egens noba ofod. Beda ogufu insa koma eya oforkamaga ojgomuja erek kilometer wuntin orgomu.

15 ¹ Nou onggga koma oisa fob, beda didif dik mar egens egema deika gu mebaga onggga erek onswos noba ongnoska eteb. Mar koma orocunc rot mar onggga emen deika. Mar onswos insa koma bera erek malaikat cinja erfeka onggga rurka mar okum cinja erfeka. Noba mar okum insa koma orotunggom rusnok rita rufogu okora eteb rot onggga omoisa. Jeska nou onggga rua raha mar okum cinja erfeka insa koma keingg rusnok fob, beda mar onggga Allah ontunggom rot odou onggga okum eteb skoita rusnok mebif bera oisa fob.

² Beda didif dik mar erek mei mojomu efei onggga edeider noba efena eirirbi eteb erek kasinam. Noba mei insa koma oromohohuma jera mah tein. Noba

didif dik rusnok onggga rinesiri gu mar ofogog insa koma onggga orogna jeska mebi efesi sis fob guru. Rua tein bera onggga runougif gu mega efebr onggga orocunc rot mar onggga ofogog insa koma tein guru. Noba rua tein bera onggga rinesma nomor tumu ritma era ritoufu onggga orocunc rot mar ofogog insa koma efen ofoka guru. Rua bera rut gu mar onggga erek mei mojumu efei insa koma efembra. Noba rua ragei mar onggga erek moubseja onggga Allah eita gu rua tumu ritma.

³ Noba rua ruf medemer osok gij mar onggga Allah ontunggom oisouska Musa onggga omfij Ofa sis fob, jera mar onggga Allah ontunggom oisouska efen Domba Efer tein. Rua ruf medemer erek kef oida, "Bua bera Tuhan Allah onggga efen owesa efek eteb doska. Noba mar nomnaga onggga Bua butunggom bera erek onswos eteb. Mar nomnaga onggga Bua butunggom bera erek tenten ojgomu. Bua buga ojga rot rusnok jera budou onggga aharukamoka ojgomu. Bua bera erek raja nou rusnok monuh nomnaga.

⁴ Rusnok nomnaga rimeesa rot bebin bufoka, noba rua rufra bebin bufoka erek aksa eteb ojgomu. Jeska Bua bisinsiyai bera onggga erek ebsi komowa ojgomu. Rusnok monuh nomnaga bera rimen fogora rumougif gu Bua ojgomuja. Jeska rusnok nomnaga rijginaga rot bebin bita mar onggga erek ongkoska eteb rot tenten fob, jefeda rua rimen noba rugif gu Bua."

⁵ Nou onggga koma oisa fob, beda didif dik mar gij mebaga erek kef oida, Didif dik montouj ohoda jeska mer efesi onggga rinsah burwa onggga orocunc rot mar onggga Allah anggen eimofoj rot gu rusnok sis fob gij. Mer efesi insa koma bera ah deismos gij Mod onggga Allah efen.

⁶ Beda malaikat cinja erfeka ruogna jeska mer efesi insa koma rot mar okum cinja erfeka insa koma onggga rumorka. Noba rua bera rirgi meifeti onggga erek ebsi komowa. Noba rerin meifeti insa koma onggga eirirbi eteb erek emas bera risa tumu ringkwesi.

⁷ Beda mar efena ebah egens jeska mar efena ebah tohkuru onggga ah gu Allah odou bera eita mongkei mos onggga erek emas gu orofosutut malaikat cinja erfeka insa koma. Noba mar onggga ah gij mongkei mos insa koma bera orocunc rot Allah odou onggga otkonu oska eteb rot rusnok mebif. Ofa bera onggga engker rot mona onggga ah aibin ojomuja.

⁸ Beda mer efesi insa koma bera ebera rot mah efeb eteb onggga en jeska Allah efen owesa efek jera efen ofoka onggga aksa eteb. Mar insa koma bera didif dik erek mah efeb onggga ofoukou doska. Noba enadaj nou rusnok egema tein ruiru gij mer efesi insa koma jinaga guru onjoros malaikat cinja erfeka insa koma raha mar onggga okum cinja erfeka keingg rusnok mebif sismeni fog. Mar koma bera orotunggom rusnok mebif fogora rufogu okora eteb erek omoisa rot fob.

16 ¹ Ere koma beda didif dig oga egens orogna jeska mer efesi onggga angh deismos gij Allah efen mod insa koma. Oga egens insa koma agot gu malaikat-malaikat cinja erfeka insa koma oida, "Iwa ija noba itkinaja yeyin mongkei mos cinja erfeka onggga ebera rot Allah efen mar okum keingg rusnok mebif ojomu."

² Jefeda malaikat onggga sismeni eja noba otkinaja Allah efen mar okum jeska mongkei mos gij mebi kemb. Ofa otkinaja mar insa koma esij rusnok

nomnaga onggarisma mar onggarocunc rot mar ofogog insa koma efen ofoka tumu ritoufu, jera rua onggarugif gu mega efebr onggarusnok ranggosus erek orocunc rot mar ofogog insa koma efen efaga tein ojomu. Beda rua risma mowug efera ofoukou onggarotunggom rua fogora rufogu okora eteb ojomu.

³Beda malaikat onggaegeka eja noba otkinaja Allah efen mar okum jeska mongkei mos gij mei mojomu efei. Beda mei mojomu efei eja erek rusnok onggaranggos rerin rugufu. Jefeda mar nomnaga onggangh gij mei mojomu efei agos rot ojomu.

⁴Erek koma, beda malaikat onggarogomu eja noba otkinaja Allah efen mar okum jeska mongkei mos koma gij mei mosu jera mei eiteij nomnaga. Beda mei insa koma nomnaga eja erek rusnok rugufu.

⁵Beda didif dig malaikat egens onggaront joug mei mog nomnaga agot oida, "Bua bera onggabunofoguma gij mona onggasismeni, noba Bua bunofoguma ebeibeyaif tein. Bua bera onggaebsi komowa eteb. Noba Bua bera onggabuga ojgarot rusnok nomnaga rot tenten ojomu, jeska Bua bumfra mar okum keingg rusnok rot rerin mar onggaoska erek tenten fob.

⁶Jeska rusnok onggarufogog insa koma bera onggaranggob bebin rusnok jera bebin nabi-nabi sis fob. Jefeda rerin rugufu bera onggaksons skoita rua erek tenten fob."

⁷Beda didif dig oga egens en jeska meja onggangh gij Mod Allah efesi agot oida, "Bua bera Allah onggafen owesa efek eteb. Noba Bua bera onggabuga ojgarot rusnok nomnaga rot tenten ojomu.

Noba Bua bufra mar okum keingg rusnok rot rerin mar onnga oska erek tenten tein."

⁸ Erek koma beda malaikat onnga tohkuru eja noba otkinaja Allah efen mar okum jeska mongkei mos gij mowa eiteij. Beda mowa eiteij koma esma owesa efek jeskasada eisa egigir erek mah onnga et rusnok rufos ojgomuja.

⁹ Jefeda rusnok insa koma onnga rugif gu mar ofogog insa koma bera rita rufogu okora eteb jeska mowa eisa egigir insa koma ojgomuja. Beda rua ruga oruh Allah rot mar insa koma ojgomuja. Jeska rua rijginaga rot oida Ofa bera onnga ensa mar okum insa koma skoita rua. Erek koma tein rua rudoubu joug rimeesa rot rerin mar onnga oska, noba runofra Allah ofoka erek eteb jinaga guru.

¹⁰ Erek koma beda malaikat onnga cinja eja noba otkinaja Allah efen mar okum jeska mongkei mos gij monuh onnga mar ofogog insa koma ofoka ereij keingg rusnok jeska tein. Jefeda ofa efen monuh nomnaga onnga ofa ofoka ereij keingg bera eja erek motkobah ojgomu. Beda rusnok riska rufuj ofou jeska rua rita rufogu okora eteb ojgomuja.

¹¹ Beda rua tein ruga oruh Allah onnga engker gu mebaga ojgomuja, jeska rua rita rufogu okora eteb erek insa koma ojgomuja. Tina rua rudoubu joug rimeesa rot rerin mar onnga oska onnga rua runtunggom sis fob ojgomu.

¹² Erek koma beda malaikat onnga cinja erfens eja noba otkinaja Allah efen mar okum jeska mongkei mos gij mei mosu eteb onnga ofoka Efrat. Beda mei mosu insa koma ofora fogora ahahir jeska oforga nomnaga. Ofa otunggom mar koma jeskasada raja-raja onnga ringker gij monuh onnga mowa

orogna jeska bera rumoira rot rerin tentarer rufoukou tein.

¹³ Beda didif dik efena ofogog orgomu onnga erek mos inyob orgomu. Didif dik mos insa koma orogna jeska magosu onnga ofoka Naga awesi, noba egema orogna jeska mar onnga ofogog insa koma awesi tein, noba egema orogna jeska Bilis, onnga erek nabi ebireira, efen awesi tein.

¹⁴ Rua bera efena ofogog onnga risma owesa efek jeskaseda rutunggom mar onswos ofoukou. Noba rua bera onnga rija ruhoturu raja-raja jera rerin tentarer nomnaga jeskaseda rimedima jera Allah efen owesa efek gij mona eteb egens onnga emen.

¹⁵ Iwa isku jah joug ojomu, jeska Yesus Kristus anggot oida, "Gij mona kahma beda Didif dumorogna keingg iwa ebeirens erek osnok egens onnga onkoreka mar orogna keingg rusnok ebeirens gij rerin mod efesi tein. Noba rusnok onnga rinsejah nou Didif gij mona insa koma, rua bera rudou emefaga ouka eteb, jeska mojen en rua gij mona insa koma guru. Koma erek osnok egens onnga enahca jeska efen mod guru, tina ofa eker noba ergi efen meisoufa ojomu. Beda ofa onofos graga rot rua onnga ruroгна keingg ofa jeskaseda rukoreka efen mar guru."

¹⁶ Beda mar ofogog onnga erek mos inyob insa koma rumohoturu raja-raja jera rerin tentarer nomnaga gij monuh egens onnga rijeka ofoka Harmagedon gij Yahudi oga.

¹⁷ Erek koma beda malaikat onnga cinja erfeka eja noba otkinaja mongkei mos rot Allah efen mar okum gij mebaga. Beda ainsa koma tein didif dig oga egens agot jeska kursi eteb onnga angh gij Allah efen mod

efesi. Oga egens insa koma bera agot oida, "Oisa fob!"

¹⁸ Beda didif dik moc efesa, noba dig moc ogugur eteb, beda mebi icusur eteb doska. Noba sis mona onnga Allah onotunggom rusnok mebif enesi onjoros mona deisef tein bera minek mebi icusur erek insa koma enesi. Jeska koma erek eteb doska ekirsa jeska nomnaga.

¹⁹ Beda kota eteb onnga ofoka Babel bera ebriyi erek orgomu tumu fogora esma nomnaga. Noba kota-kota onnga angh gij monuh enjgineg tein bera esma nomnaga. Allah ontunggom mar insa koma jeska Ofa odou ah keingg rot rusnok gij kota Babel rerin mar onnga oska efekeifa. Noba rua onnga kota Babel runokoja mar okum insa koma jinaga guru. Mar okum onnga Allah ofra keingg rua bera erek osnok egens onnga otkonu oska eteb fogora eradgodu rusnok jeskaseda rij anggur efei ojgomuja. Noba enadaij nou rua rukoja mar insa koma jinaga guru.

²⁰ Noba motowohu nomnaga jera memaga mosu nomnaga eseiseifa ojgomuja.

²¹ Noba mos eteb onnga erek eis mamu ojuj jeska mebaga. Eis mamu insa koma egens egens nomnaga bera okum erek kilo setka cinja. Noba mar insa koma esiri keingg rusnok fogora rita rufogu okora eteb rot. Tina rua nomnaga ruga oruh Allah rot ojgomuja.

17 ¹ Nou onnga mar insa koma oisa fob, beda didif dik malaikat egens jeska malaikat cinja erfeka insa koma onnga orka mongkei mos cinja erfeka en skoita didif. Beda ofa agot gu didif oida, "Bua bin beda didif dumocunc gu bua rot mar okum onnga emah keingg rusnok gij kota Babel onnga ofoka eiskiskma. Jeska rua bera onnga rudou eftirir

keingg rot mar ofoukou erek ojaga eja motu egens onnga odou eftirir keingg runer rufoukou. Kota Babel koma bera onnga angh doida mei mosu ofoukou.

²Raja-raja mebif nomnaga rinsiri morototuma jera rusnok insa koma fob. Noba rusnok mebif ruroru rerin mar onnga oska efekeifa ojgomuja, erek rusnok onnga rudou erebibei rot mofut efei ojgomuja."

³Erek koma beda, Efena Ebsi eita owesa efek gu didif fogora didif dik mar erek malaikat egens onnga oroun didif jah monuh egens onnga mebi oska. Beda didif dik mar egens onnga erek ojaga egens engker esij mar egens onnga ofogog noba efena ebah. Mar koma efen efeb titnetna erek ekenkeni. Noba runggu mar ofoukou tumu efen efaga onnga erek ruga oruh mar rot Allah. Noba ojaga egens koma efen ebirfaga cinja erfeka jera oubukum setka.

⁴Noba ofa ergi meifeti onnga efera osok eteb noba onnga efen efeb titnetna erek esjiji jera ekeni ofom ahta. Noba mar onnga erek emas jera mamu onnga eirirbi eteb noba efen efera osok eteb jera siriow efej onnga efen efera osok eteb doska bera ruroumna tumu efen meisoufa. Noba ofa agei mok osku onnga runtunggom jeska emas tumu etma. Noba mar onnga angh gij mok osku insa koma bera erek orocunc rot efen mar onnga oska efekeifa jera rot teinefa ofa ensiri morototuma jera runer rufoukou tein.

⁵Noba mar onnga runggu tumu efen eitoufu onnga erek ah jejema jeska rusnok enjineg riteij bera efen ofou erek kef oida, "Mar kef bera ah jejema jeska rusnok riteij. Ofa bera erek orocunc rot rusnok onnga ringker gij kota Babel onnga ofoka eiskiskma. Ofa bera erek ebic onnga rujager rija motu nomnaga jera

mar onggá oska efekeifa onggá orogna jeska mebif efesi."

⁶Beda didif dik ojaga egens insa koma odou erebibeí noba odou efaga ouka rot Allah efen rusnok onggá ofa anggob sis fob. Rusnok insa koma onggá ofa anggob fob bera erek rua onggá rimfesij mar rot Yesus Kristus oga sis fob. Nou onggá didif dik ojaga egens insa koma beda didif dudou ousaha eteb rot.

⁷Beda malaikat egens insa koma agot gu didif oida, "Bua budou onousaha rot ojaga egens koma guru. Jeska didif dimefesij osok gij ojaga egens insa koma onggá eifef esij mar onggá ofogog insa koma onggá efen ebirfaga cinja erfeka jera oubukum setka insa koma rot efen ofou gu bua si.

⁸Mar onggá ofogog insa koma onggá bua bingk bera angh gu mebif sis fob. Noba ebeibeyaif ofa eja jeska fob. Tina gij mona kahma, beda ofa omorogna jeska mebi efesi onggá eteb sons si. Erek koma tein rusnok mebif rimek mar ofogog insa koma, beda rua rudou omousaha eteb rot. Jeska sis fob rua rik mar ofogog insa koma efena ebah ros. Noba ebeibeyaif rua rinek ofa deika guru. Tina gij mona kahma beda rua rimek ofa deika si. Beda gij mona insa koma Allah emeij ofa gij mahmei meren. Rua onggá rudou ousaha rot mar ofogog insa koma bera Allah onogu keingg rerin rufoka gij Ofa efen buku eiteij ah gij mona onggá Ofa onotunggom mebif enesi guru.

⁹Bua bireni rot iskusk jeskaseda budou ebriyi gij mar kef efen ofou erek kef: Mar ofogog insa koma onggá efen ebirfaga cinja erfeka bera orocunc rot mar ofoka egeka. Mar ofoka egens bera memaga ofog oduma cinja erfeka onggá ojaga egens insa

koma engker esij. Noba mar ofoka egeka bera raja cinja erfeka tein.

¹⁰ Noba raja cinja insa koma bera rerin owesa efek ensiri fob. Noba egens enofoguma ros. Noba egens bera enen enesi. Tina gij mona onggga ofa en, beda ofa omofoka ereij keingg rusnok gij mona onggga estir ojgomu.

¹¹ Noba mar ofogog egens insa koma onggga engker sis fob, noba onggga rusnok rinek ofa deika guru, ofa bera erek raja onggga cinja orfomu onggga omokahma otoij raja cinja erfeka insa koma. Noba ofa bera Allah emeij gij mahmei meren tein si.

¹² Noba oubukum setka onggga bua bingk insa koma bera orocunc rot raja setka onggga runofoka ereij keingg rusnok enesi. Rua bera rimesma owesa efek jeskaseda rufoka ereij keingg rusnok morototuma jera mar ofogog egens insa koma. Tina rua rumofoka ereij keingg rusnok gij mona onggga ai estir ojgomu.

¹³ Raja onggga setka insa koma bera rumofoka ereij keingg rusnok rot rudou onggga erek egens ojgomu. Noba rua rumofij mar ofogog egens insa koma rot rerin owesa efek tein.

¹⁴ Beda rua rimeja rimedima jera Ofa onggga erek Allah efen Domba Efer. Tina Domba Efer omoin keingg rua nomnaga ojgomu, jeska Ofa bera onggga erek Tuhan, onggga erek ebirfaga eteb ekirsa jeska mar nomnaga. Noba Ofa bera erek raja onggga ekirsa jeska raja-raja nomnaga tein. Noba rusnok onggga rumororu Ofa gij mona insa koma bera rua onggga Ofa enjeka erek efen ruforoker sis fob. Rua bera onggga Ofa ocunc erek efen rusnok onggga ruroru Ofa rot tenten fob."

¹⁵ Beda malaikat egens agot gu didif deika oida, "Mei mosu ofoukou onnga bua bingk ojaga eja motu engker doida insa koma, mei koma bera orocunc rot rusnok rufoukou jera rusnok ebic rufoukou, jera monuh ofoukou, jera ruga rusnok ofoukou.

¹⁶ Noba mar ofogog jera oubukum setka onnga orocunc rot raja cinja erfeka insa koma bera rudou ofogog rot ojaga eja motu egens insa koma. Beda rua rimekris efen mareibra nomnaga jeska ofa ojgomu fogora ofa eker rot ofos robrob ojgomu. Beda rua rimet ofa efen ofogu tein, noba rumokub efen efaga tein gij mah ojgomu.

¹⁷ Rua rimeita mar erek insa koma jeska Allah bera ensah mar koma gij rudou efesi fob jeskaseda rua rutunggom mar jeni Ofa odou ejginaga rot ojgomu. Jefeda Allah oitij rot oida mar ofogog insa koma ofoka ereij keingg rusnok rot owesa efek onjoros mona onnga Allah efen oga onnga Ofa anggot rot sis fob bera ah gij efera fob.

¹⁸ Noba ojaga eja motu egens onnga bua bingk insa koma bera orocunc rot rusnok gij kota Babel onnga efen ofoka eiskiskma eteb. Jeska rusnok gij kota insa koma bera onnga ofoka ereij keingg raja-raja mebif."

18 ¹ Nou onnga koma oisa fob, beda didif dik mar erek malaikat egens onjuj jeska mebaga. Ofa efen owesa efek eteb doska, noba ofa efen eisa esenin doska gu mebif.

² Beda ofa ois rot efen oga onnga owesa efek eteb oida, "Babel onnga ofoka eiskiskma eteb bera ensiri rot efen rusnok nomnaga fob! Ebeibeyaif efena ofogog jera mar ofogog enjgineg tein onnga bera riker jah kota insa koma ojgomu. Mar onnga oska efekeifa jera mem nomnaga onnga erek oska noba

ongga rusnok rinet guru bera angh jah suma tein ovgomu.

³Jeska rusnok mebif rufoukou bera rinsiri morototuma jera rusnok onggga ringker gij kota koma fob. Noba rua tein rugif gu efen mar onggga oska efekeifa ovgomuja, erek rusnok onggga rudou erebibe rot mofut efei ovgomuja. Raja-raja mebif tein rinsiri morototuma jera rua fob. Noba rusnok gij kota Babel insa koma rudou eftirir keingg mareibra ofoukou ovgomuja. Jefeda rua ringk mareibra ofoukou gij kota koma. Rusnok onggga ruhu mareibra gij kota koma skoita rua onggga kota Babel bera rija erek runa mei ahta rot fifi ofoukou onggga rua rinsma jeska rusnok gij kota Babel insa koma."

⁴Erek koma beda didif dig oga egema deika en jeska mebaga agot oida, "Iwa onggga irek dedin rusnok bera irogna jeska kota Babel koma ovgomu jeskaseda iwa inoromohohuma jera rusnok koma rerin mar onggga oska efekeifa guru. Beda iwa inesma mar okum onggga emah keingg rua fogora rua guru.

⁵Erek koma jeska rerin rita mar onggga oska erek eteb edi mebaga doska. Noba Allah odou ah keingg rot rerin mar ofogog onggga rua runtunggom ovgomuja fob.

⁶Iwa isesa mar okum skoita rua sons rot mar ofogog onggga rua runtunggom gu iwa sis fob. Iwa isesa mar okum eteb onggga erek ekirsa deika skoita rua ovgomu. Jeska erek osnok egens onggga eradgodu rusnok jeskaseda rij mar ekembemba onggga embera gij mok osku egens ovgomuja, beda erek koma tein, sis fob rua riradgodu iwa rot mar okum ovgomuja. Jefeda iwa iradgodu rua tein rot mar onggga okum ekirsa ovgomuja.

⁷Iwa yufra mar okum eteb keingg rua ongg a orotunggom rua fogora rufogu okora eteb ojomu. Jeska sis fob rua bera risitit risinsa rifaga rot rerin mareibra ongg a ofoukou doska ojomu. Noba rua rusujohu rot oida rinesma rufogu okora rot mar egema tein jinaga guru. Jeska askesi rua risitit risinsa rifaga rot beda rua agot oida, 'Memef bera enerek eja mesina egens ongg a odou okumkum noba ebisa ojomuja guru. Tina memef bera erek raja egens ongg a ofoka ereij keingg mar nomnaga ojomu.'

⁸Jefeda gij mona juens beda mar okum eteb emesiri keingg rua rot si. Mar koma emereita rufogu okora eteb gu rua ojomu. Beda rua rimek mar erek mosona ongg a rua eteb fogora rusnok rufoukou rimagos rot. Jefeda rusnok rufoukou rimebisa eteb rot tein ojomuja. Jeska Allah, ongg a efen owesa efek eteb ekirsa, bera ongg a ofra mar okum keingg rua ojomu. Jefeda Ofa omohoda rot rua nomnaga erek mah ongg a eret mar fogora eribseb nomnaga ojomuja."

⁹"Beda gij mona insa koma raja-raja ongg a rinsiri gu rusnok gij kota Babel insa koma noba ongg a rudou eftirir keingg mareibra morototuma jera rua bera rimek mah efeb ongg a onsok jeska kota koma ongg a mah et fob. Jefeda rua rimeita rudou ongg a okumkum eteb noba rua rimebisa eteb rot rusnok gij kota koma ojomuja.

¹⁰Raja-raja insa koma rimeesa eteb rot mar okum insa koma ongg a ensiri keingg rusnok insa koma jera rerin kota. Jefeda rua rumot yes jeska kota insa koma noba rimeririr oida, 'Ayo, sis fob kota Babel ongg a erek ofoka aksa etebo, tina gij mona ongg a ai estir

ojpgomu bera kota koma ensiri rot mar okum eteb onggangh keingg kota koma fobo.'

¹¹ Beda gij mona insa koma tein rusnok onggaru mareibra skoita rua onggakota Babel bera rimeita rudou onggakokumkum nobaribisa rot tein. Jeska ebeibeyaif rusnok rinengk rerin mareibra egema deika guru.

¹² Jeska sis fob bera rua onggakota Babel rudou eftirir keingg mareibra ofoukou doska erek emas ni, perak ni, mamu onggaeirirbi noba efera osok eteb ni, mar onggarek siriow efej onggaefera osok eteb ni, meifeti onggaefera osok eteb doska ni. Meifeti insa koma bera efen efeb erek mei mokowu ni, jera mahwo ekeni efeb ni, jera mei yuhnos efeb ni. Noba rua tein rudou eftirir keingg mar egema onggarek mega mensek ofos efen ensesa ni, mar ofoukou onggarusnok ragosus jeska oubukum ni, mega efebr onggaefera osok eteb ni, kermom onggafen efera osok ni, mamu eirirbi onggarutunggom erek edeider gij mersa ni,

¹³ mar oforu ofoukou egens egens onggarek eyejkita ni, mar ofoukou onggafen ensesa ni, anggurefei ofoukou ni, mini goreng onggaruntunggom jeska zaitun efek ni, gandum ofou onggaesgisgi fob ni, gandum giskini, sapi ofoukou ni, domba ofoukou ni, kuda ofoukou ni, jera korobaga onggakuda encira rot ni, jera rusnok rufoukou onggaranggos askesi rumfij rua ojpgomuja ni.

¹⁴ Beda Allah efen rusnok insa koma rimagot rot rua onggakota Babel efen oida, 'Mareibra ofoukou onggaiwa idou eftirir keingg bera eseiseifa jeska iwa fob. Yeyin mar insa koma onggarek eirirbi noba efen efera osok eteb nomnaga bera eseiseifa jeska iwa,

noba iwa inesma mar erek insa koma deika jinaga guru.'

¹⁵ Noba rusnok onnga ruhu mareibra insa koma skoita rua onnga kota Babel bera risma fifi ofoukou doska rot. Tina rua bera rujot yes jeska kota insa koma, noba rua rudou emeesa eteb rot mar okum insa koma onnga angh keingg kota koma.

¹⁶ Rua ribisa eteb rot fogora ragerir oida, 'Ayo, ayo, rot iwa onnga kota Babel onnga efen ofoka eiskiskma eteb. Sis fob iwa bera onnga irgi meifeti onnga erek ongnoska noba eirirbi eteb. Iwa bera onnga rira mar onnga eirirbi erek emas jera mamu onnga efera osok jera siriow efej tein ruroumna tumu yeyin meifeti.

¹⁷ Tina gij mona onnga ai estir insa kef bera iwa jera yeyin mareibra insa koma nomnaga eja erek eseiseifa fob.' Erek koma tein gij mona onnga kapten kabar mei nomnaga, jera rusnok nomnaga onnga rifef kabar mei tein, jera rusnok nomnaga onnga rimfarur gij kabar mei tein, rua onnga ruhca mos gij mei tein, rua nomnaga rimek mah efeb onnga onsok jeska kota Babel insa koma.

¹⁸ Beda rua rumot yes jeska noba ragot oida, 'Sis fob, kota Babel kef bera erek ekirsa jeska kota-kota nomnaga.'

¹⁹ Beda rua rumokruj mebi ofou noba rirebirma jah ribirfaga jeskasada ruocunc rot oida rudou okumkum eteb rot. Beda rua ribisa eteb rot fogora ragerir oida, 'Ayo, ayo, rot iwa onnga ingker gij kota Babel onnga efen ofoka eiskiskma etebo. Sis fob bera rusnok rufoukou rurka mareibra gij rerin kabar mei jeskasada ruhu mareibra ofoukou skoita iwa. Jefeda rua risma fifi ofoukou rot jeska iwa fob. Noba gij mona onnga ai estir kef bera kota insa koma ensiri nomnaga fob.

²⁰ Tina iwa onggga ingker gu mebaga bera idou efaga ouka eteb rot ojgomu. Noba iwa onggga irek Allah efen rusnok, jera Allah efen rasul, jera Allah efen nabi-nabi nomnaga bera idou efaga ouka eteb rot ojgomu. Jeska Allah bera omfra mar okum eteb keingg rua onggga ringker gij kota Babel insa koma ojgomu. Koma erek Allah bera esesa mar okum sons skoita rua rot mar ofogog onggga rua runtunggom skoita iwa sis fob.' "

²¹ Erek koma beda didif dik malaikat onggga efen owesa efek eteb ofra mamu egens onggga erek eteb doska fogora eij gij mei mojomu efei. Beda ofa agot oida, "Mamu eteb kef onggga didif durobuma bera orocunc rot kota Babel onggga omohoda nomnaga fogora eseseifa. Beda rusnok enjgineg rinek kota koma deika guru.

²² Rusnok rinera mar erek moubseja jera mar erek sulin jera manghi mei jeskaseda ruf medemer rot skoita rusnok enjgineg gij kota koma deika guru. Beda iwa inek rusnok egema tein onggga rimfarur rot rerin mar gij kota koma deika guru. Noba rusnok rinek mamu eteb onggga esgisgi keingg gandum efej deika guru.

²³ Rusnok rinek lampu eisa gij kota koma deika guru. Noba rua rineg rusnok ruga ofoukou onggga rumoskotuma jah suma deika guru. Sis fob rua onggga ruhu mareibra gij kota insa koma bera ekirsa jeska rua onggga ruhu mareibra gij kota-kota enjgineg. Noba rua onggga erek mendersi bera runtunggom mar ofoukou jeskaseda ruokrusa rusnok jeska monuh enjgineg ofoukou.

²⁴ Mar okum insa koma ah keingg kota Babel jeska sis fob rusnok gij kota Babel ranggob nabi-nabi jera

Allah efen rusnok onggga rururu efen oga, jera rusnok enjgineg tein fogora rerin rugufu bera eya jah suma ojomu."

19¹ Nou onggga koma oisa fob beda didif dig rusnok riskembemba gij mebaga onggga risitit oida, "Mimif nomnaga misitit mar eteb gu mifmin Allah ojomu. Jeska Ofa bera onggga eita eiteij ah onggga efeinah gu rusnok. Noba Ofa bera onggga efen ofoka onggga aksa eteb ojomu. Noba Ofa tein efen owesa efek onggga ekirsa jeska nomnaga.

² Noba Ofa bera onggga oga ojga rot rusnok nomnaga rot tenten jera odou onggga aharukamoka ojomu. Jeska Ofa omfra mar okum eteb keingg rusnok onggga rudou eftirir keingg mar ofoukou erek ojaga eja motu egens onggga odou eftirir keingg runer rufoukou. Jeska rua bera onggga ruokrusa rusnok mebif jeskaseda rugif gu efen mar onggga oska efekeifa ojomu. Jefeda Allah ensesa efen rusnok rugufu sons skoita ofa fob. Jeska rua bera onggga ranggob rua sis fob."

³ Beda didif dig rusnok gij mebaga insa koma rufra ruga eteb oida, "Mimif nomnaga misitit gu mifmin Allah ojomuja. Jeska mah efeb jeska kota koma onggga mah ent eribseb nomnaga fob bera osok jah mebaga ojomuja."

⁴ Ere koma beda ebirfager Mod Ari rufok setka egeka noba tohkuru onggga ringker gij mebaga jah Allah odou jera mar onggga efena ebah tohkuru onggga ringker gij mebaga tein bera risiri jah Allah odou fogora ragerir oida, "Mimif nomnaga misitit gu Bua. Noba mimif mudou os erek koma ojomu!"

⁵ Ere koma beda didif dig oga egens en jeska kursi onggga Allah engker gij noba agot oida, "Iwa

nomnaga onggga erek Allah efen rusnok onggga rumfij Ofa jera iwa nomnaga onggga erek ifoka aksa jera iwa onggga inok ifoka gij guru bera isitit Ofa ojgomu."

⁶Erek koma beda didif dig rusnok rufoukou doska onggga ruga eteb. Noba ruga insa koma ogugur eteb doska erek mei mos onggga onsoka gij ofoska fogora ogugur eteb, era erek moc ogugur eteb. Noba rusnok insa koma ruis rot ruga eteb oida, "Mimif nomnaga misitit Allah. Jeska mifmin Tuhan Allah onggga efen owesa efek bera ofoka ereij keingg mar nomnaga erek raja egens ojgomuja.

⁷Mimif nomnaga mudou efaga ouka noba mita mudou onggga erirei eteb, noba misitit rot efen ofoka onggga aksa tein. Jeska Ofa onggga erek Domba Efer bera en fob jeskaseda oskotu efen arja. Noba efen arja insa koma bera ensejah esinsa erek onggkoska nou efen igers insa koma fob.

⁸Noba arja insa koma bera esma meifeti onggga erek ebsi komowa noba eirirbi eteb jeskaseda ergi gij mona insa koma. " (Meifeti onggga ebsi komowa insa koma bera orocunc rot Allah efen rusnok rerin rita mar onggga erek onggkoska).

⁹Beda malaikat egens insa koma agot gu didif oida, "Bua bugu keingg mar erek kef oida, 'Oufamofa eteb rot rusnok onggga Allah oga ebin rua jeskaseda riremecinma jera Ofa onggga erek Domba Efer onggga omoskotu arja. Fogora rua ruina maat keingg morototuma jera Ofa.' " Beda malaikat egens koma agot deika oida, "Allah esinsa bera onggga enagot rot mar insa koma ojgomu."

¹⁰Nou onggga didif dingg malaikat koma anggot mar insa koma nomnaga oisa fob, beda didif disiri jah ofa odou jeskaseda dugif gu ofa. Tina ofa agot gu didif

oida, "Bua bunougif gu didif erek koma guru. Tina bua bugif gu Allah ojgomu. Jeska didif bera dufij Allah morototuma erek bua jera bebin obhujir tein onnga ruroru mar onnga Yesus Kristus anggot rot ojgomu. Bugif gu Allah ojgomu." Ofa agot mar erek koma gu didif jeska mar nomnaga onnga Allah efen nabi-nabi rimfesij rot sis fob bera osok gij Yesus Kristus.

¹¹ Nou onnga mar insa koma oisa fob, beda didif dik mebaga ohoda. Beda didif dik kuda egens onnga efeji ebsi komowa. Noba didif dik osnok egens onnga eifef esij kuda egens insa koma. Ofa ofoka bera efen ofou erek kef oida, "Ofa bera onnga ofij Allah rot tentenmen noba onnga otunggom mar onnga tenten ojgomu." Jeska Ofa bera onnga oga ojga rot rusnok nomnaga erek tenten ojgomu. Noba Ofa edi mesa oisouska odou onnga oga ojga rot mar erek tenten tein.

¹² Ofa efen eiteij erek mah onnga eisa egigir. Noba Ofa aha manggem ofoukou onnga eirirbi eteb tumu ebirfaga. Noba efen ofoka onnga runngu tumu bera Ofa esinsiyai ejginaga rot efen ofou koisoisa ojgomu. Rusnok egema tein rinejginaga rot efen ofou jinaga guru.

¹³ Ofa ergi meifeti onnga ebsi komowa onnga ric gij ogufu. Noba efen ofoka oida, Allah Efen Oga.

¹⁴ Noba efen tentarer gij mebaga bera rifef esij kuda-kuda noba runtoij Ofa. Rua rirgi meifeti onnga ongkoska eteb noba ebsi komowa.

¹⁵ Noba meiteb kalawan onnga efeya doska orogna jeska Ofa awesi. Ofa emera meiteb kalawan koma fogora eragob mesa gij monuh mebif nomnaga. Ofa omofoka ereij keingg rua rot ahais doska. Noba Ofa omorka mar okum eteb jeska Allah onnga efen

owesa efek eteb. Beda Ofa omot keingg rua rot rerin mar onnga oska, erek rusnok rut keingg anggur efek fogora efen efei orogna jeska.

¹⁶ Noba runggu keingg tumu meifeti onnga angh esij efembra ofoj jera tumu okom ofoj efen ofoka erek kef oida, "Raja onnga ekirsa jeska raja-raja nomnaga," jera, "Tuhan onnga efen owesa efek ekirsa jeska nomnaga."

¹⁷ Erek koma beda didif dik malaikat egens onnga ont gij mowa. Noba ofa ois rot oga eteb gu mem nomnaga onnga ofu gu mebaga oida, "Iwa nomnaga iremecinma ebeirens jeskaseda it mar ofoukou onnga Allah ensejah nou iwa fob.

¹⁸ Iwa iremecinma jeskaseda it rusnok rufogu ojgomu. Iwa in noba it rufogu jeska rua onnga erek raja-raja ni, ebirfager tentarer nomnaga ni, rusnok onnga rerin owesa efek ni, kuda-kuda jera rusnok onnga rifef kuda insa koma ni, rusnok rufoukou onnga erek rufoka aksa ni, rua onnga runok rufoka gij guru ni, rusnok onnga runt gu risinsa ni, rusnok onnga rumfij rerin ebirfager ni, rit nomnaga rerin rufogu ojgomu."

¹⁹ Erek koma beda didif dik mar ofogog egens onnga orogna jeska mebi efesi sis fob jera raja-raja mebif nomnaga jera rerin tentarer nomnaga. Rua rumohoturuma fob jeskaseda rimedima jera Osnok egens insa koma onnga eifef kuda onnga ebsi komowa jera Ofa efen tentarer.

²⁰ Tina Ofa onnga eifef kuda onnga ebsi komowa insa koma bera agei mar ofogog egens insa koma morototuma jera osnok egens onnga erek nabi ebireira. Nabi ebireira koma bera onnga ontunggom mar onswos ahah rusnok riteij. Noba oisouska

mar onswos insa koma bera ofa orokrusa rusnok
 jeskaseda risma mar tumu ritoufu onggga orocunc
 rot mar ofogog egens insa koma efen ofoka. Beda
 rua rugif gu mega efaga onggga ranggosus erek mar
 ofogog insa koma efen efaga tein. Beda Ofa onggga
 eifef kuda onggga ebsi komowa insa koma bera eij
 goga insa koma rot gefena ebah gij mahmei meren
 onggga eisa egigir fogora et gofos ojgomuja.

²¹ Beda Ofa era meiteb kalawan onggga orogna jeska
 awesi fogora eragob raja-raja jera rerin tentarer insa
 koma nomnaga. Beda mem insa koma nomnaga rit
 rusnok insa koma rerin rufogu ojgomuja onjoros erek
 ereyer doska.

20 ¹ Erek koma beda didif dik malaikat egens
 onjuj jeska mebaga. Ofa orka rantai jera gusin
 tumu etma. Noba gusin insa koma bera nou orof joug
 montouj mebi efesi.

² Beda malaikat insa koma agei ofa onggga
 enofoguma rot mona onggga dektek fob noba onggga
 rinjeka ofoka oida magosu onggga ofogog ni, Bilis ni,
 Setan ni. Beda malaikat koma era rantai insa koma
 erakid ofa rot ahais. Beda malaikat eij ofa gij mebi
 efesi, beda era gusin insa koma orof montouj joug
 ofa gij tahun rara ribu egens.

³ Ofa otunggom mar koma jeskaseda enadaij nou
 Bilis orokrusa rusnok mebif gij tahun rara ribu egens
 deika guru. Nou onggga tahun ribu egens insa koma
 oisa fob, beda rumohoda montouj efeyi jeska ofa
 fogora omosuwa ofa gij mona onggga estir deika
 ojgomu.

⁴ Erek koma beda didif dik kursi jera rusnok onggga
 ringker gij kursi insa koma. Noba rua bera rinsma
 owesa efek jeskaseda ruga ojga rot rusnok rerin rita

mar erek teinefa. Beda didif dik rusnok onggara rusnok enjineg rinris ribirfaga jeska fob. Jeska rua bera onggara rumftuftu rot Allah oga osok gij Yesus Kristus skoita rusnok enjineg sis fob. Noba rua insa koma bera runougif gu mar ofogog egens insa koma jinaga guru. Noba rua tein rinesma mar tumu ritoufu era ritma onggara orocunc rot mar ofogog insa koma efen ofoka tein jinaga guru. Rua insa koma rimefena ebah sons beda rufoka ereij keingg mar morototuma jera Yesus Kristus gij tahun rara ribu egens insa koma.

⁵ Rua bera onggara rimefena ebah sons sismeni. (Nou onggara tahun ribu egens insa koma oisa fob, beda Allah efen rusnok enjineg onggara ranggos fob bera rifena ebah sons tein.)

⁶ Rua onggara rifena ebah sons gij tahun ribu egens insa koma bera rudou efaga ouka ojomu, jeska rerin rudou bera erek ebsi komowa. Noba Allah eneij rua gij mahmei meren morototuma jera rusnok enjineg guru. Jeska rusnok onggara Allah emeij gij mahmei meren bera erek rusnok onggara rimagos rot ofosma jueka deika. Tina rusnok onggara rudou ebsi komowa insa koma bera rimeja erek Allah jera Yesus Kristus efen imam-imam. Beda rua rumofoka ereij keingg mar nomnaga morototuma jera Allah gij tahun rara ribu egens insa koma.

⁷ Erek koma noba, nou onggara tahun ribu egens insa koma oisa fob, beda rumosuwa Bilis jeska mebi efesi insa koma onggara ofa engker gij erek mod oskusk.

⁸ Beda ofa emeja jeskaseda orokrusa rusnok gij monuh mebif nomnaga onggara rinjeka ofoka erek Gog jera Magog. Beda ofa omohoturu rusnok insa koma nomnaga jeskaseda rimedima jera Allah. Noba efen

rusnok insa koma bera rufoukou doska erek mebsta tuturu onnga angh gu mei mojemu efembra.

⁹ Rua rimecira morototuma jah enama enama tein erek rusnok rufoukou doska. Beda rua rimeja skoita kota egens onnga Allah efen rusnok ringker gij. Beda rua nomnaga rumot rejrej kota egens koma onnga Allah odou okora rot. Tina mah eisa egigir omojuj jeska mebaga noba et rua fogora riseiseifa nomnaga.

¹⁰ Beda Allah emeij Bilis onnga orokrusa rusnok rufoukou insa koma gij mahmei meren onnga eisa egigir. Jefeda ofa eker morototuma jera mar ofogog egens insa koma noba jera nabi onnga ebireira egens insa koma tein ojgomu. Beda rua rimeita rufogu okora eteb doska orofosut mona jera motu rot mona onnga ah aibin ojgomuja.

¹¹ Erek koma beda didif dik kursi eteb egens onnga ebsi komowa jera Ofa onnga engker gij kursi koma. Beda mebif jera memaga nomnaga eja eseseifa jah Ofa odou ojgomu.

¹² Beda didif dik rusnok nomnaga onnga ranggos fob. Rua bera erek rusnok onnga rufoka aksa jera rusnok onnga runok rufoka gij guru. Noba rua rut gu kursi eteb insa koma odou. Beda didif dik buku-buku onnga ohoda fob. Noba didif dik buku egema egens deika onnga ohoda fob. Noba buku egens koma efen ofoka oida, Buku Eiteij ah. Noba Allah oga ojga rot rusnok onnga ranggos insa koma ororu rerin rita mar jeni erek runggu gij buku insa koma.

¹³ Beda rusnok onnga ranggos fob ruogna jeska mei mojemu efei jera mebif efesi jera monuh mar agos tein. Noba Allah oga ojga rot rua orofosutut egens egens ororu jeni rerin rita mar onnga sis fob.

¹⁴ Beda Allah agei rua onggara rerin owesa efek nou rurotunggom rusnok riseiseifa noba onggara rerin owesa efek rot monuh onggara rua onggara riseiseifa ringker gij, beda Ofa eij rua insa koma gij mahmei meren tein. Noba mahmei meren insa koma bera orocunc rot rusnok insa koma onggara ranggos rot ofosma jueka.

¹⁵ Noba Allah eij orofosutut rusnok onggara rufoka enah gij efen Buku Eiteij ah insa koma guru gij mahmei meren ojomu.

21 ¹ Nou onggara koma oisa fob beda didif dik mebaga jera mebif onggara efeinah deika. Jeska mebaga jera mebif onggara ensis bera eja eseseifa fob. Noba mei mojomu efei bera enah deika guru.

² Beda didif dik kota Yerusalem onggara erek efeinah deika noba ebsi komowa onjuj en jeska Allah. Noba kota koma onjuj rot onggoska eteb erek ojaga egens onggara oumna esinsa jeskasada onggoska eteb nou efen igers.

³ Beda didif dig oga eteb egens jeska kursi eteb insa koma agot oida, "Ebeibeyaif bera Allah onjuj jah gu efen rusnok rifelesa. Noba Ofa bera eker morototuma jera rua ojomuja. Rua bera rerek Ofa efen rusnok, noba Ofa bera eker jera rua erek rerin Allah.

⁴ Allah omosuna rusnok insa koma itoh jeska riteij. Rusnok rineita rufogu okora deika guru ni, rusnok rudou onokumkum deika guru ni, rusnok rinebisa deika guru ni, noba rusnok rinagos deika guru. Jeska mar onggara ensis nomnaga bera eseseifa fob."

⁵ Beda Ofa onggara engker gij kursi eteb insa koma agot oida, "Didif dumotunggom mar nomnaga erek efeinah deika." Beda Ofa tein agot oida, "Bua bugu

keingg mar ongg dimagot kef nomnaga, jeska mar insa koma bera erek tenten noba rusnok rudou ororu ojjomu."

⁶Beda Ofa agot gu didif oida, "Mar nomnaga bera angh gij efera fob. Didif bera Alfa jera Omega. Didif ongg erek sismeni, noba ongg erek omoisa rot mar nomnaga tein. Noba rusnok ongg magon enir bera rimej mei jeska dedin mei eiteij ah ongg ereita eiteij ah gu rusnok. Noba rua rinengk mei insa koma jeska Didif guru. Tina Didif dimeita mei koma gu rua rot oubji ojjomu.

⁷Noba rusnok ongg rinesiri gu Bilis guru, rua bera rimesma mar ongg oufamofa insa koma si. Noba rua rimeja erek dedin edeser noba Didif dimeja erek rua rerin Allah.

⁸Tina rua ongg mojenir rot Didif fogora runororu Didif guru ni, rua ongg runororu dedin duga guru ni, rua ongg rita mar erek oska efekeifa ni, rua ongg ragob rusnok enjgineg ni, rua ongg risiri morototuma ni, rua ongg risa mar ongg oska skoita rusnok enjgineg ni, rua ongg rugif gu mar ongg erek tenten guru ni, rua ongg rucuwei mar ni, rua koma nomnaga bera rimeja gu mahmei meren ongg eisa egigir ojjomu. Koma erek rua ranggos rot ofosma jueka."

⁹Erek koma beda malaikat egens ongg agei mongkei mos cinja erfeka ongg ebera rot Allah efen mar okum cinja erfeka nou mona ongg omoisa bera en skoita didif. Beda ofa agot gu didif oida, "Bua bin jera didif jah sif, beda didif dumocunc ofa ongg erek Domba Efer efen arja gu bua."

¹⁰Beda didif disma owesa efek jeskaseda dik mar erek kef oida, malaikat egens koma ofra didif jah

memaga onnga erek skidameda. Beda ofa ocunc kota Yerusalem onnga ebsi komowa noba onjuj jeska Allah gu mebaga gu didif.

¹¹ Noba kota koma efen efesa onnga eskeiramera eteb morototuma erek Allah efen efesa onnga eskeiramera eteb tein. Efen efesa insa koma bera morototuma erek mamu egens onnga efen efera osok noba eirirbi eteb.

¹² Noba mejga mamu onnga aksa eteb angh rejrej joug kota koma. Noba mejga mamu insa koma efen montouj setka kungkob erfeka. Noba malaikat egens ont joug montouj insa koma egens egens. Noba runggu keingg Israel ebic setka kungkob erfeka rerin rufoka egens egens tumu montouj eitoufu insa koma.

¹³ Noba mejga mamu onnga angh jah mowa orogna efen montouj orgomu. Noba mejga mamu onnga angh jah mowa ensiri gij efen montouj orgomu. Noba onnga angh jah emaga efen montouj orgomu. Noba onnga angh jah agosu efen montouj orgomu.

¹⁴ Noba mejga mamu insa koma nomnaga bera angh esij mamu efebr setka kungkob erfeka onnga ahais doska. Noba runggu keingg rasul setka kungkob erfeka onnga rumfij Domba Efer sis fob rerin rufoka tumu mamu efebr setka kungkob erfeka insa koma tein.

¹⁵ Beda malaikat egens insa koma onnga emfesij mar gu didif bera agei moskur emas egens tumu etma. Noba ofa era moskur koma ereni kota insa koma rot mejga mamu jera montouj efen tein erek egaho.

¹⁶ Noba kota insa koma efen efefi jera aksa jera akseij ideja erek edamokuma ojgomu. Noba ofa ereni jeni kota insa koma. Beda ofa ek rot oida kota

insa koma efen efefi jera aksa jera akseij ideja bera edamokuma erek 2,400 kilometer.

¹⁷ Beda ofa tein ereni jeni mejga mamu insa koma onnga angh rejrej kota koma rot efen ontumba erek egaho. Noba ofa ek rot oida efen ontumba bera erek 60 meter. Malaikat ereni jeni rot mar insa koma morototuma erek rusnok giskini rireni jeni mar ojgomu.

¹⁸ Noba mejga mamu insa koma bera runtunggom jeska mamu onnga efera osok doska noba onnga erek eirirbi eteb. Noba kota koma bera runtunggom jeska emas onnga eirirbi erek kasinam efena eirirbi eteb.

¹⁹ Noba rira mamu onnga efera osok noba eirirbi eteb fogora ruroumna mamu efebr setka kungkob erfeka insa koma onnga mejga mamu ot esij. Nou mamu efebr onnga egens bera rira mamu onnga efeb titnetna erek ofrahamaha. Noba onnga egeka bera rira mamu onnga efen efeb titnetna erek ahta mei ahta. Noba onnga orgomu bera rira mamu onnga efen efeb titnetna erek ebsibsi tein. Noba onnga tohkuru bera rira mamu onnga efen efeb titnetna erek ebsibsi orohoh jera mebi.

²⁰ Noba onnga cinja bera rira mamu onnga efen efeb titnetna erek mebi moubja. Noba onnga cinja erfens bera rira mamu onnga efen efeb titnetna erek ekeni mebi. Noba onnga cinja erfeka bera rira mamu onnga efen efeb titnetna ai erek oruk. Noba onnga cinja orfomu bera rira mamu onnga efen efeb titnetna erek igor efeibah. Noba onnga cinja tohkuru bera rira mamu onnga efen efeb titnetna erek ai orugmok ojgomu. Noba onnga setka bera rira mamu onnga efen efeb titnetna erek oruk orohoh ofraha.

Noba onnga setka kungkob erfens bera rira mamu onnga efen efeb titnetna erek igor efeibah ojgomu. Noba onnga setka kungkob erfeka bera rira mamu onnga efen efeb titnetna erek ekeni ofom ahta.

²¹ Noba mejga mamu efen montouj setka kungkob erfeka orofosutut egens egens bera erek siriow efef egens onnga efen efera osok eteb. Noba kota insa koma efen semfag nomnaga bera erek emas onnga eirirbi eteb erek kasinam efena onnga eirirbi.

²² Noba didif dinek mod egens onnga erek Allah efen mod jah suma guru. Jeska rusnok rugif gu Allah jera Ofa onnga erek Domba Efer sinefo sinefo gij kota insa koma ojgomu.

²³ Noba mowa jera mesta eneisa gij kota insa koma deika guru. Jeska Allah esinsiyai efen efesa onnga eisa eteb bera adaij nou kota koma. Noba Ofa efen Domba Efer insa koma bera erek lampu onnga eisa nou rusnok jah suma.

²⁴ Noba kota koma efen eisa eteb jeska Allah bera ejinten rusnok nomnaga. Noba raja-raja mebif nomnaga rumorka rerin mareibra onnga ongnoska eteb jah kota koma.

²⁵ Noba kota insa koma efen montouj bera runof joug jinaga guru. Jeska rua rinek motkobah deika tein jinaga guru.

²⁶ Noba rumorka mar onnga ongnoskamoka jera mar onnga erek ofoufem jeska monuh nomnaga jah kota koma.

²⁷ Noba mar onnga oska bera onnoira gij kota koma jinaga guru. Noba rinek rusnok rutunggom mar onnga oska egema tein gij kota koma deika guru. Tina rik rusnok onnga rerin rufoka bera angh gij Domba Efer efen buku eiteij ah ojgomu.

22¹ Ere koma beda malaikat egens insa koma ocunc mei mosu egens onnga erek mei onnga eita eiteij ah gu didif. Noba mei mosu onnga eita eiteij ah insa koma bera efen efei eskeiramera eteb ojomu.

² Noba mei koma eya jeska kursi onnga Allah jera efen Domba Efer gengker gij fogora oroisa moroju efembra. Noba mega egens onnga eita eiteij ah bera ot jah mei insa koma efembra enama tein enama tein. Noba mega insa koma efen efek setka kungkob erfeka erek toga toga. Noba orofosut mesta egens beda efen efek onnga efeinah deika. Noba efen efeyi bera erek ariawun nou rusnok mebif nomnaga.

³ Noba mar onnga Allah oncunc erek oska bera egema tein enah gij kota insa koma jinaga guru. Jeska Allah jera Domba Efer bera gengker gij kursi gu kota koma ojomu. Noba Ofa efen rusnok rumofij Ofa jah suma ojomuja.

⁴ Rua rimek Ofa efen osum ojomu. Noba Ofa efen ofoka bera runggu tumu rerin ritoufu tein.

⁵ Noba rua rinek motkobah deika guru. Rua runocosu rot mowa onnga eisa era lampu onnga eisa deika guru. Jeska Tuhan Allah bera erek rerin eisa onnga adaij nou ojomu. Rua rumofoka ereij keingg mar nomnaga morototuma jera Ofa gij mona onnga ah aibin ojomuja.

⁶ Ere koma beda malaikat egens agot gu didif oida, "Mar insa koma nomnaga onnga bua bingg noba bingk fob bera erek tenten ojomu, jefeda bua buroru ojomu. Jeska Allah, onnga ombk Efena Ebsi skoita efen nabi-nabi sis fob, bera ombk didif skoita bua onnga erek efen osnok egens onnga omfij Ofa tein. Ofa otunggom erek koma jeskaseda orocunc

rot mar nomnaga onnga ai juens omorogna keingg rusnok si."

⁷ Noba Yesus bera agot erek kef oida, "Iwa ig rot kef oida, gij mona onnga ai estir ojgomu beda Didif dimen si. Noba rusnok nomnaga onnga ruroru mar onnga runggu keingg gij surat kef rot mona kahma bera rudou emefaga ouka rot mona onnga Didif din fob si."

⁸ Didif, Yohanes, bera onnga dingg noba dingk rot mar nomnaga onnga dunggu keingg gij surat kef. Nou onnga didif dingk noba dingg rot mar insa koma fob, beda didif disiri jah malaikat odou fogora dugif gu ofa ojgomu. Jeska ofa bera onnga ocunc rot mar insa koma nomnaga gu didif fob.

⁹ Tina malaikat egens insa koma agot gu didif oida, "Bua bineita erek koma guru. Jeska didif bera dumfij Allah morototuma erek bua jera bebin obhujir jera nabi-nabi jera rusnok nomnaga onnga ruroru mar onnga angh gij surat egens kef ojgomu. Jefeda mimif nomnaga mugif gu Allah ojgomu."

¹⁰ Beda ofa agot gu didif oida, "Bua binedemдеми mar onnga bunggu keingg gij surat kef guru. Jeska gij mona onnga ai estir, beda mar insa koma nomnaga omorogna keingg rusnok si.

¹¹ Jefeda osnok egens onnga eita mar onnga oska ros, beda ofa otoiru mar insa koma ojgomu. Noba osnok egens onnga ororu mar onnga oska efekeifa ros, beda ofa otoiru mar insa koma ojgomu. Noba osnok egens onnga eita mar onnga erek ongoska ros, beda ofa otoiru mar insa koma ojgomu. Noba osnok egens onnga eita mar rot odou onnga ebsi komowa ros, beda ofa otoiru erek koma ojgomu.

Jeska gij mona onnga ai estir deika ojomu, beda Yesus omorogna keingg rua insa koma nomnaga si.

¹² Noba Yesus agot erek kef oida, "Gij mona onnga ai estir deika ojomu beda Didif dimen si. Beda Didif dimeita yeyin ifons onnga oufamofa eteb skoita iwa orofosutut osnok egens egens ororu jeni mar onnga iwa intunggom sis fob.

¹³ Didif bera Alfa jera Omega. Didif bera onnga osumbohka jera onnga osuira. Noba Didif bera erek onnga sismeni jera erek onnga omoisa rot mar nomnaga tein.

¹⁴ Oufamofa eteb skoita rusnok onnga rerin mar onnga oska enah gij rudou efesi deika guru. Rua bera erek rusnok onnga runt rerin meisoufa fogora runtunggom erek ebsi komowa fob. Jefeda rua bera onnga rimet efek jeska mega onnga eita eiteij ah si. Noba rua tein bera onnga rumoira gij montouj kota koma onnga erek efeinah si.

¹⁵ Tina rusnok onnga oska efekeifa ni, rusnok onnga runtasa rusnok enjineg ni, rusnok onnga risiri morototuma ebireira ni, rusnok onnga ragob rusnok ni, rusnok onnga rugif gu mar onnga erek tenten guru ni, rusnok onnga rudou os ruokrusa rusnok enjineg ojomuja ni, rusnok insa koma nomnaga bera rimeker jah kota insa koma ejmeg ojomu. Rua runoira gij jinaga guru.

¹⁶ Didif, Yesus, bera onnga dumbk dedin malaikat egens insa koma skoita bua fob, jeskasada bua bifesij rot mar insa koma nomnaga gu dedin rusnok Mod Ari nomnaga. Didif bera Ofa onnga onjuj jeska raja Daud. Noba Didif bera erek mensir efaga onnga eisa egigir nou rahah tentena."

¹⁷ Efena Ebsi jera rua onggaga erek Domba Efer efen arja bera ruis rot oida, "Bua bin." Noba rusnok nomnaga onggaga ringg rot mar onggaga oufamofa insa koma tein ragot oida, "Bua bin." Noba iwa onggaga magon en iwa beda in noba ij mei onggaga eita eiteij ojgomu. Yesus emeita mei koma gu iwa rot oubji ojgomu.

¹⁸ Didif, Yohanes, diahehir joug rusnok nomnaga onggaga ringk rot mar onggaga angh gij surat insa kef fob onggaga anggot rot mar onggaga emen gij mona kahma erek kef oida, rusnok onggaga runggu mar egema dokun gij surat egens kef, beda Allah omogun mar okum onggaga ranggot rot gij buku kef keingg rua rot si.

¹⁹ Noba rusnok onggaga rusuna rot mar onggaga ranggot rot gij surat kef erek oskiyai tein jeska, beda Allah omokoja rua fogora rinet mega onggaga eita eiteij ah insa koma jinaga guru. Noba rua runoira gij kota efeinah insa koma tein guru. Mar egeka insa koma bera rimfesij rot gij surat kef fob.

²⁰ Yesus bera onggaga oncunc mar insa koma gu didif rot tenten ojgomu. Noba Ofa bera onggaga agot oida, "Gij mona onggaga ai estir deika, beda Didif dimen si." Beda rusnok ruroun rot oida, "Yo, mimif mudou os ojgomu. Tuhan Yesus Kristus, Bua bin ebeirens."

²¹ Didif dum diteij jeskaseda Tuhan Yesus Kristus ocunc odou onggaga oufamofa eteb skoita Allah efen rusnok nomnaga. Ainsoma.

Alkitab Meyah

Alkitab Bahasa Meyah

© 1997-2013 Yayasan
Sumber Sejahtera

Meyah [MEJTBL/YSS]

<http://www.faithcomesbyhearing.com>
